


Eta Táurinaquene máechajiruvahi ema Viya eta  
viyehe, ticajare puito Eta Nuevo Testamento



New Testament in Ignaciano (BL:ign:Ignaciano)

**Eta Táurinaquene máechajiruvahi ema Viya eta viyehe, ticajare puito**  
**Eta Nuevo Testamento**

**New Testament in Ignaciano (BL:ign:Ignaciano)**

copyright © 2012 Wycliffe Bible Translators, Inc.

Language: Ignaciano

Translation by: Wycliffe Bible Translators, Inc.

**Copyright Information**

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Ignaciano

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

---

PDF generated using Haiola and XeLaTeX on 11 Nov 2022 from source files dated 29 Jan 2022  
332465cd-916c-5bfc-8721-b0114be92360

## Contents

San Mateo . . . . .	1
San Marcos . . . . .	76
San Lucas . . . . .	125
San Juan . . . . .	206
Hechos . . . . .	262
Romanos . . . . .	332
1 Corintios . . . . .	361
2 Corintios . . . . .	391
Gálatas . . . . .	409
Efesios . . . . .	420
Filipenses . . . . .	430
Colosenses . . . . .	437
1 Tesalonicenses . . . . .	444
2 Tesalonicenses . . . . .	450
1 Timoteo . . . . .	454
2 Timoteo . . . . .	463
Tito . . . . .	469
Filemón . . . . .	473
Hebreos . . . . .	475
Santiago . . . . .	498
1 Pedro . . . . .	506
2 Pedro . . . . .	514
1 Juan . . . . .	520
2 Juan . . . . .	527
3 Juan . . . . .	529
Judas . . . . .	531
Apocalipsis . . . . .	534

## **Ema Apóstole Mateo májuequenehahi eta máichararacavahi ema Jesucristo, ticaijare puiti eta EANGELIO SEGÚN SAN MATEO**

*Ena achaneana máchucáequeneanaini ema Jesús eta acane  
(Lc 3.23-38)*

<sup>1</sup> Nuvaraha numetacaheya mayehe ema Jesucristo. Éma, vijaneanahi israelítahi, taicha eta mámariéquenériahi ema viáchucaini Abraham. Énerichuvare, ema Jesús rey-yarehi taicha eta mámariéquenériahi ema víyarahaini rey David. Eta juca eta nalista ena máchucaequeneanaini ema Jesús.

<sup>2</sup> Ema víyarahaini Abraham, macachichapa ema Isaac. Ema Isaac macachichapa ema Jacob. Ema Jacob macachichapa ema Judá énapa ena apamuriana maparapenaveana. <sup>3</sup> Ema Judá macachichapa ema Fares émapa ema Zara. (Esu naena ticaijaru Tamar.) Ema Fares macachichapa ema Esrom. Ema Esrom macachichapa ema Aram. <sup>4</sup> Ema Aram macachichapa ema Aminadab. Ema Aminadab macachichapa ema Naasón. Ema Naasón macachichapa ema Salmón. <sup>5</sup> Ema Salmón macachichapa ema Booz. (Esu maena ticaijaru Rahab.) Ema Booz macachichapa ema Obed. (Esu maena ticaijaru Rut.) Ema Obed macachichapa ema Isaí. <sup>6</sup> Ema Isaí macachichapa ema rey David. Ema rey David macachichapa ema Salomón. (Esu máenaini ticaijaru Betseba, esu mayenainihi ema Urías.) <sup>7</sup> Ema Salomón macachichapa ema Roboam. Ema Roboam macachichapa ema Abías. Ema Abías macachichapa ema Asa. <sup>8</sup> Ema Asa macachichapa ema Josafat. Ema Josafat macachichapa ema Joram. Ema Joram macachichapa ema Uzías. <sup>9</sup> Ema Uzías macachichapa ema Jotam. Ema Jotam macachichapa ema Acáz. Ema Acáz macachichapa ema Ezequías. <sup>10</sup> Ema Ezequías macachichapa ema Manasés. Ema Manasés macachichapa ema Amón. Ema Amón macachichapa ema Josías. <sup>11</sup> Ema Josías macachichapa ema Jeconías énapa ena maparapenaveana, ena nacarataruanahi námaqueneanahi ena apavasana ticavasanahi te Babilonia.

<sup>12</sup> Te táequenepa eta juca, ema Jeconías macachichapa ema Salatiel. Ema Salatiel macachichapa ema Zorobabel. <sup>13</sup> Ema Zorobabel macachichapa ema Abiud. Ema Abiud macachichapa ema Eliaquim. Ema Eliaquim macachichapa ema Azor. <sup>14</sup> Ema Azor macachichapa ema Sadoc. Ema Sadoc macachichapa ema Aquim. Ema Aquim macachichapa ema Eliud. <sup>15</sup> Ema Eliud macachichapa ema Eleazar. Ema Eleazar macachichapa ema Matán. Ema Matán macachichapa ema Jacob. <sup>16</sup> Ema Jacob macachichapa ema José, ema suímahi esu María, máenahi ema Jesús, ema ticaijare Cristo, ema vicuchapaquenehi.

<sup>17</sup> Tacahe, catorcemuriana ena mámariéquéqueneanainihi ema Abraham. Ema rey David, émapa náichecuinehi eta natupa. Tacahe, ema rey David, catorcemurianavare ena mámariéqueneanainihi. Ena nacarataruanahi námaqueneanahi ena apavasana te Babilonia, énapa náichecuinehi eta natupa. Ema Jeconías, catorcemuriana ena mámariéqueneanainihi. Ema Jesucristo, émapa náichecuinehi eta natupa.

*Eta máuchusira ema Jesús  
(Lc 2.1-7)*

<sup>18</sup> Ani tacahehi eta máuchusirahi ema Jesucristo. Esu maena María, tráuripahi eta suítauchirayarehi ema José. Vuíchahasera nacachanecacahini. Ticajaripahisera ésu, mávajuechirahi ema Espíritu Santo. <sup>19</sup> Ema José, tétavica-vahi eta máuriva. Eta tacahe, vahi tisemaimahi. Váhivare mavarahahini máimicatsiriachini esu María. Mavarahahisera macaepaha eta matratune suyehe ésu. Váhiserá mávarahahini náechahini ena achaneana eta tacayemaquenehi. <sup>20</sup> Ema Viya máimararacahi eta mapanereruhi. Eta tacahe, tiúcupaica ema ángele mametapanahi te mavapure ema José. Ánipa máicha\*:

—Tata José, tímitecanuhi numetapanavi eta juca: Vahi picueñamava eta pítauchirayare esu María. Tájina píchavaimahi. Taicha ticajaripahi ésu, mávajuechirahi ema Espíritu Santo. <sup>21</sup> Tacahe, te máuchucapa ema suchichayare, enacayare eta máijareyare JESÚS. Éma ticatiuchayare ena achaneana tayehe eta naviurevanayarehini taicha eta napecaturana —máichapa ema ángele.

<sup>22</sup> (Títauchavapahi tamutu eta juca máechajiriruvanahi ema Viya mayehe ema víyarahaini profeta Isaías. <sup>23</sup> Ani tacahehi: “Sutiarihiyare esu amaperu esena témunahiricavaya ticajari. Ema suchichayare, yátupiqueneyare eta émaira Viya, tiúcupauchahaviyare ticatiuchahavipanayare” tacahepa.)

<sup>24</sup> Tacahe, te téjamiuchavapa ema José eta macavapureirahi, ichaperinehi eta masuapirahi eta máechajiriruvanahi ema ángele mavaneruhi ema Viya, eta máitauchirayarehi esu María. <sup>25</sup> Váhiserá nánecacahini te jena cájeanahi eta sucajarirahi. Tacahe, suínacapa ema suárachichahi. Nanacapa eta máijarehi JESÚS.

## 2

### *Náejirapana ema amuya ena reye mágoana*

<sup>1</sup> Eta máuchusinehi ema Jesús te avasare ticaijare Belén tayehe eta departamento Judea. Te jena año, ema Aluresi ema tayehehi rey eta Judea. Tásiha, títecapanapa te Jerusalén ena reye mágoana tiásihanahi te tayerehiquene avasare tinapaica te táuchusine eta sache. <sup>2</sup> Nacayasesererupaipahi, ánipa nacahe:

—Víti, tímitecahavi eta vitanusirahi ema amuya máuchurehi rey-yarehi eyehe eti israelítana. Taicha vímahahi eta arairu jarairiqui, vémetearuhi máicutiarahi ema Viya eta máuchusinehi ema amuya rey-yare. Titupihapa eta te juca eyehe. Puiti vivarahahi véjirapanayare éma. ¿Távihapuca mávihahi ema amuya? —nacahepa.

<sup>3</sup> Te masamairiricapa ema Aluresi, ichaperinehi eta mapaneréqueneháirahi. Vaipa máurisamurehíni. Ena achaneana te tajuhe eta avasare, énerichuvare napaneréquenehahi éna apanavare eta juca téchacarehi. <sup>4</sup> Tacahe, ema Aluresi máimichuhavacapa namutu ena tuparairucana énapa ena títuruequenehana eta Sagrada Escritura. Mayaserecavacapa:

—¿Távihapuca máuchusihayarehi ema vicuchapaquenehi ticaijareyare Cristo? —macahepa.

<sup>5</sup> Éna najicapapa:

—Te Belén te tachacaya eta juca viávasa Jerusalén. Taicha tacahehi eta májurehi ema víyarahaini profetaini Isaías. Máechajicahi éma eta avasare tímícutijiricavahi eta achanénahini. Ánipa macahe: <sup>6</sup> “Piti avasare Belén,

\* **1:20** Ema ángele, eta máechajisirahi ema José, manacahi eta nayeherepi náechajisira ena israelítana. Ani macahehi: “Piti José, machicha ema David”.

tachichavihi eta Judea, picunachacarepánayare píti. Taicha eta máuchusi-hayarehi piyehe ema ichapequeneyarehi eta maháquenucávayare. Éma, téchapajirimurihayare namutu ena vijaneanana israelítana”.

<sup>7</sup>Tacahe, te masamapa ema Aluresi, máichuhavacapa ena mágoana. Mañajichamuripa, taicha mavaraha máechaya tájamuhupuca te tépanavainapa náimahapa eta jarairiqui. <sup>8</sup> Te máechapa, mavanecavacapa éna te Belén. Máichapa:

—Eyana etanuca ema amuya te Belén. Te étupiacapuca, echava emetacanyare, apaesa nuyana núti apanavare néjirapanayare —máichavacapa.

<sup>9</sup> Tacahe, ena mágoana, eta nasamirahi, tiyananavarepa. Tásiha, náimaha-varepa eta jarairiqui náehirupahi. Tiyanapa te namirahu. Éta te Belén eta tatupihaiyahi, te táinahu eta mávihahi ema amuya. <sup>10</sup> Tétavicava eta náurisamurevahi ena mágoana eta náimairahi eta tatupihairaripa. <sup>11</sup> Títecapánavanepa eta te peti mávihahi ema amuya. Náimahapa éma, ésupa esu maena María. Tásiha, tépuyucanapa natsiucapa ema amuya. Navecuhapa eta námavahuanapahi. Nájaracasichapa eta oro, eta incienso éta te táijiyequene perfume. <sup>12</sup> Te táequenepa eta náejirairahi ema amuya, tichavanayarepa te návasa. Apanapasera eta achene eta nayanihapahi, taicha ticametacasianapa te navapure vaipa nacuetavajica te mávihahi ema Aluresi.

*Éma José ésupa esu María náimijunapa ema amuya te Egipto*

<sup>13</sup> Tacahe, te táequenepa eta nayanirahi ena mágoana, tiúcupaicapa ema émana ángele mavaneruhi ema Viya, mametapanayarehi ema José te mavapure. Ánipa máicha:

—Pécheputa, José. Piyana piáma ema amuya ésupa esu María tayehe eta Egipto. Pinasiyare ánaqui. Tiámainucava te numetacavivare eta pichavirainapa, taicha ema Aluresi títecayare matanucayare ema amuya, mavarairahi macapacayare —máichapa ema ángele.

<sup>14</sup> Tacahesera ema José téchepucapa. Tétupirícavanavanepa te jena yati. Tiyananapa námapa ema amuya tayehe eta Egipto. <sup>15</sup> Nanasipa ánaqui. Tiámainucava te tépenapa ema Aluresi, ticavanahianavarepa mayehe ema ángele eta nachavirayare. Tamutu eta juca títauchavahi eta juca mametarapi ema Viya eta te Sagrada Escritura, ani macahehi: “Te Egipto níimijunaiyahi ema nuchicha. Te táequenepa, níchuhayarepa éma”.

*Éma Aluresi máimicapapajicapa ena amuyanaini te avasare Belén*

<sup>16</sup> Tacahe, ema Aluresi te masamairiricapa eta nánucuiraripa ena mágoana, tise-marinehi eta navayuasirahi. Máimivanerecapa nacapapajicapana namutu ena amuyana ajairana tiávihanahi te Belén éna ena tiávihanahi te tachacayahana, ena ticayehearipa apina año éna ena náuchusirávana. Máepanaequenepa eta táuchusihahi eta jarairiqui náimahaquenehi ena mágoana. <sup>17</sup> Tacahe, te Belén eta táitauchiravahi eta májuchaquenehi ema víyahaini profetaini Jeremías. Ani tacahehi: <sup>18</sup> “Tétavicavahi eta najapanuiravahi ena esenana. Ichape eta náiyairahi taicha ena suntaruana nacapapajisirahi ena nachichanaveana. Nájina naratahahini nacamatinaahini taicha eta najapanuiravahi ichape” tacahepa.

<sup>19</sup> Tacahe, te jácani año te táequenepa eta máepenirahi ema Aluresi, tiápechavavarepa ema ángele máechajicahi ema José te mavapure ánaqui te Egipto. Ánipa maicha:

<sup>20</sup> —Pécheputa, José. Piveha ema amuya ésupa esu maena. Piyana pichava te piávasa Israel taicha vaipa táéñamavacare. Tépenaipahi ema tipanereuchainihi ticapacayahini ema amuya —máichapa ema ángele.

<sup>21</sup> Jéhesare, ema José téchepucapa. Tétupiricavapa, ésupa esu maena ema amuya. Tiyananapa tichavanahi tayehe eta návasa. <sup>22</sup> Tacahe, eta napaisirapahi eta nachavirapa tayehe eta návasa, masamairiricapa ema José eta maviravaipahi aquenuca ema Arquelao, machicha ema Aluresini. Tipicapa ema José machavahini tayehe eta Belén. Tásiha, ema ángele mápechavarepa máechajicahi te mavapure eta matupiruirayarepa te Nazaret te tinapaica Galilea. <sup>23</sup> Te títecapanapa, ánaqui étapa náejasihahi. Tacahehi eta táitauhiravahi eta táechajirivanahi eta Sagrada Escritura nájureanahi ena profetanaini eta macaijarerayarehi Nazareno ema Jesús.

### 3

*Ema Juan Tícachasiricarahi tépanavapa ticametarairu eta máechajiriruva ema Viya nayehe ena vámahicuruhana*

*(Mr 1.1-8; Lc 3.1-9, 15-17; Jn 1.19-28)*

<sup>1</sup> Tacahe, te jácani treinta áñoohi, matiarihivare ema achane ticaijare Juan. Éma, máichuhaquenehi ema Viya eta macametarairuirayare, máetupiricavacayare ena achaneana. Tacahe, masupahi eta matuparahahi. Tiyanapa vámahicuruhapa. Váipa avasarecuruhainahini. Ticametarairupaipa nayehe ena macutiqueneanahi vámahicuruhana, ticavasanahi te tachausi eta Jordán te tinapaicahi eta Judea. <sup>2</sup> Ánupa macahehi eta máimituresirahi:

—Ítsivacha eta epanereruana. Éneuchava mayehe ema Viya, taicha márapiainapa ema aquenucayare mavaneruhi ema Viya —máichavacapa.

<sup>3</sup> Ánaquiaparipahi eta áñoana acane, ema Viya mametacapa ema víarahaini profeta Isaías eta mapanereruhi, eta mavanisirayare ema Machicha te juca apaquehe, ticatiurahiyarehi eta tímitecayarehi. Énerichuvare matiarihiyareva ema apana achane máichuhaquenehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tauriqueneana, apaesa táuri eta najacapirayare ema Machicha ema Viya. Émaripa ema Juan, ema máechajisiquenehi ema Viya, máetupiricavacayare ena achaneana. <sup>4</sup> Ema Juan, vanairucahi me Viya, profetahi éma. Eta mamuirihahi eta náitsameru tajiyaha eta náitátiquene ticaijare camello. Eta máitijuhe, vácapi jayumepi. Eta maniriji manicasare eta tsacara. Eta matítivera eta mápama. <sup>5</sup> Tiyananavare nacapayaca ena achaneana ticavasana te Jerusalén, navarairahi nasamararaca eta máechajisiquene; énapa ena ticavasana te Judea, énapa ena tiávihanahi tayehe eta cajacure Jordán. <sup>6</sup> Tacahe, eta nametauresiravaipa, navarairahivare náinajica eta napeaturana, ema Juan máicachasicavacapaipa te cajacure Jordán.

<sup>7</sup> Énaripa ena fariséoana énapa ena saducéoana nayanauchahivare ema Juan. Vahi náeneuchavahini, navarahahisera ticaicachasiana. Tacahe, ema Juan máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táíñehiqueneyare ecuñaquí. Evarahahipuca iúchucuhayare. <sup>8</sup> Tiuri puiti, te evarahapuca eta iúchucuha, yátupina tátupiruva eta epanereruana. Ímrecava eta ínajisiraya eta epeaturana. <sup>9</sup> Váhivare ecucajamurava eta mámariequeneháirahehi ema viáchucaini Abraham. Taicha tayanapane mámariepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mávarahapuca, vahi máejecarachaimahi máepiyaca



achaneanaina eta juca mari, mavarairainahi yátupina ena mámarieque-  
neanaina ema Abraham. <sup>10</sup> Ecauneuchava, taicha tiánehipa eta táiteca-  
pauchirahaviyare eta ecuñaraqui nayehe ena achaneana máitucarahanahi  
téneuchavana, váhivare náitsivachahini eta napanereruana. Tímicutijirícavaipa  
te máechucayarepa ema achane eta yucuqui máhireana. Ticaechuyarehi  
tamutu eta tapareana. Tíjuyarehi. <sup>11</sup> Yátupi núti nícachasicaheni te une,  
te éneuchava mayehe ema Viya. Ávanepaipahisera mácani ema yátupiquene  
Cristo. Te yátupina ecasiñava mayehe, tícachasicahereva; tíjaracaheyareva  
ema Espíritu Santo. Téhesera vahi ecucasiñavapuca mayehe, tícuñacaheyare  
tayehe eta táijurequene yucu. Éma, ichapequenehi nuyehe núti. Váiparinehi  
nácutinasimahi eta máitupajijiasiravahi. Váiparinehivare nácaemuñavaimahi  
macamusuranuhini núti páuresami. <sup>12</sup> Puiti éma márajapainapa tinereji-  
ricainapa nácani yátupiqueneana téhicana. Máunacainapa éna. Ticutinapa  
mácani achane te tiácatayajirica eta arusu. Máunacainapa. Tásiha, máquijicapa  
eta tapiraquiji. Máijuchayarepa te yucu. Eta nacaheyare ena máurirahanahi,  
tíjuanáinapa te yucu, máitavacacayarehi eta namuruira —máichavacapa ema  
Juan.

*Eta macaicachasirahi ema Jesús*

*(Mr 1.9-11; Lc 3.21-22)*

<sup>13</sup> Tacahe, títecapavarepa ema Jesús te cajacure Jordán te mávihahi ema  
Juan. Éma, másihapahi te tinapaica eta Galilea. Mavarahahi ticaicachasiyare  
mayehe ema Juan. <sup>14</sup> Émasera ema Juan, vahi mávarahahini máicachasicahini.  
Ánipa macahe:

—Tata Jesús, nútira táuricahi nútivaina pícachasicanu. Nusapihapa núti  
picaijuhenuhi eta nícachasicaviya —máichapa.

<sup>15</sup> Émasera ema Jesús majicapapa:

—Tájinchucha táichava. Ticamunucarehi nítauchayare eta mavaraha-  
quenehi ema Nucaiyaquene —máichapa.

Tásiha, ema Juan tísapavapa. <sup>16</sup> Te tamutupa eta macaicachasirahi ema  
Jesús, tiúcupaicapa tayehe eta une. Tásiha, tíjahúchavapa téjiaca eta anuma.  
Máimahapa ema Espíritu Santo tiúcupaicapaipahi, mavasimahipaipa eta  
paloma. Tavenesicapa ema Jesús. <sup>17</sup> Tacahe, tiáramicarepa eta mahu ema  
Viya tásihaquenehi te anuma, ánipa macahe:

—Ema maca ema yátupiquenehi nuchicha némunaruquenehi. Tétavicavahi  
eta núrismurevahi máicha —macahepa.

## 4

*Ema Váinaraji Satanás mavaraha macaitsamaraji ema Jesús*

*(Mr 1.12-13; Lc 4.1-13)*

<sup>1</sup> Tacahe, ema Espíritu Santo enurujipa máimitucaipahi ema Jesús eta  
mayaniraya te mávapahi apaquehe. Ánaqui macuchapayarehi eta máitsama-  
rajiyare ema Váinaraji. <sup>2</sup> Tájina manicahini ema Jesús te jena cuarentaquenehi  
sache, cuarentavare yati eta mayerevahi. Ichapepa eta máecuavahi. <sup>3</sup> Tásiha,  
ema Váinaraji témeñahavapa mayehe. Mavarahapa macaetemayarehi. Ánipa  
máicha:

—¿Pécuhapa píti? Tacahe, pivaneca eta juca mari táepiyacava pan, taicha píti  
machichavihi ema Viya, ¿masi? —máichapa.

<sup>4</sup> Ema Jesús majicapapa:

—Váhipuca pecha eta táechajiriruvahi eta Sagrada Escritura, ani taca-  
hehi: “Vahi tacarichuimahi eta tinicacare ticaitarecayare ena achaneana.



Tacachaneyarehi eta máechajiriruvana ema Viya. Jéhevare, éta ticaitarecara-hiyare” macahepa.

<sup>5</sup> Tásiha, ema Váinaraji mámvarepa tayehe eta tacapichahuene avasare Jerusalén. Máimiapanapa te táinahu eta Templo. <sup>6</sup> Tásiha, máichapa:

—Te yátupina machichavina ema Viya, písapavayare pémirica te apaquehe. Tájina píchavaimahi eta pémirisirayare. Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana ángeleana téchapajiricaviana. Tiámavianayare te navahuana, apaesa vahi picucayutetu eta máriana eta te pipaisirayare” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

<sup>7</sup> Tacahe, ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamara-jimahi ema Viya, taicha Piáquenuhi éma” —máichapa.

<sup>8</sup> Tacahe, ema Váinaraji mámvarepa te táinahu eta anuquehe mari cerro. Máimechapa tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji. Máimechavarepa eta ichapequeneana náimahaqueneana ena achaneana. <sup>9</sup> Tacahe, máichapa:

—Núti níjaracaviyare tamutu eta juca avasareana. Pítina náquenuvina ena távacuanahi eta avasareana. Pépuyucanumasera te numirahu. Pitsiucanu apaesa níjaracavisarepa tamutu —máichapa ema Vainaraji.

<sup>10</sup> Émasera ema Jesús majicapapa:

—Pévuisihatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchayare. Macarichuvare vicaemataneacayare” tacahepa. Váhiquene táurica nucaemataneacavihini —máichapa ema Jesús.

<sup>11</sup> Tacahe, ema Váinaraji térajicavapa. Majunijicapa ema Jesús. Tásiha, tíucupaicanapa ena ángeleana, náechapajiricapa ema Jesús.

*Ema Jesús tépanavapa ticametarairu  
(Mr 1.14-15; Lc 4.14-15)*

<sup>12</sup> Tacahe, te jena sácheana, nacaratacapa ema Juan. Námapa te jácani tayerehiquene. Tacahe, ema Jesús, eta masamairirisirapa eta macaera-tairahi te cárcel ema macheji Juan, tiyanapa tichava te mávasa Nazaret te Galilea. <sup>13-17</sup> Váipasera mánasihini te majurusinehi. Tiyanapa tayehe eta avasare Caperaum. Éta maejasihahi. Eta juca avasare távihahi te tachausi eta cáquiure Galilea. Eta macametarairuirahi, tamutuhi mapaica eta tinapaica eta provincia Galilea\*

—Éneuchava mayehe ema Viya. Ítsivacha eta epanereruana, taicha tiánehi eta sácheyare tímerecavaya eyehe ema ticatiuchaheyare. Aquenucayare mavaneruhi ema Viya, téchaheyare éma —máichavacapa.

Eta juca títauchavahi eta májureanahi ema víyarahaini profeta Isaías, ani tacahehi: “Tiúricacareanainapa ena achaneana cávasanahi te tachausi eta cáquiure Galilea tayehe eta provincia Zabalón étapa eta Neftalí, namutu támairiaca ena ticavasana te apachara eta Jordán. Éna, tiyerehi eta nacatajivairanahi, tacuti eta tavayureva eta tamapicuva. Puítisera máitecapauchavacaripahi

\* **4:13-17** Ema profeta Isaías, ánvare macahehi eta máechajisihairahi: “...étaripa eta provincia távaha náitecapihahi ena apavasanana”. (Acane eta juca apaquehe, apina eta apana tájireanaini: eta Zabalón étapa Neftalí.) Eta máimitusiravacahi ena achaneana, ánipa maicha ema Jesús:

ema timícauchamurihi. Ticatiuchavacayarehi tayehe eta nacatajivairahi. Éma, tétumechavacahivare eta mamícauchiravacahi” tacahepa.

*Éma Jesús máichuha ena cuátroqueneana ténicarahiana, máimitureanayare (Mr 1.16-20; Lc 5.1-11)*

<sup>18</sup> Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema ticaijarehi Simón Pedro émapa ema maparape Andrés. Eta náematanerepi ena nani, ténicarahianahi. Náquijierecahi eta nayehe tarrafa. <sup>19</sup> Tacahe, ema Jesús máichuhavacapa:

—Yare, éhicanu. Núti níjaracaheyare eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranayare ema Viya —máichavacapa.

<sup>20</sup> Enevanepa náinajicapa éna eta náenisirahi. Tiyananapa náehicapa ema Jesús.

<sup>21</sup> Ánaquipanavarepa máimahavarepa ema Jesús ena apinana ticaparape-cácanavare: ema Jacobo émapa ema Juan. Téjacanahi te napacure. Matiari-hihivare ema naiya Zebedeo. Náititijiricahi eta nayehe tarrafa. Éma Jesús máichuhavarepa. <sup>22</sup> Enurujipa náehicavare. Nanaquicavarepa eta napacure, émapa ema naiya. Najunijicavarepa.

*Éma Jesús máimitucavacapa ena camuriqueneana achaneana (Lc 6.17-19)*

<sup>23</sup> Éta mapaisirahi ema Jesús tayehe eta avasareana te Galilea, máimitucavacapahi ena achaneana te sávarumuhuana tayehe eta náurujisirarevana. Mavanecapa eta náeneuchiravaina taicha tiánehipa eta sáchezare tímercavayare ema ticatiuchayare, ema aquenucayare mavaneruhi ema Viya. Énerichuvare ema Jesús macanaracapañivare tamutu eta apanapanequeneanahi jumareana eta najumanapahi ena achaneana. <sup>24</sup> Tacahe, nasamairiricapa ena achaneana ticavasanahi eta tasimutuqueneana avasareana te tinapaica eta Siria. Tásiha, námavacapaipa ena nacajumaqueneana, apanapanenejiquenehi eta najumana, nacatiruhavanahi. Énaripa ena návaháruanahi ena éreanana, ena tirapapasiana, énapa ena muracaquihana. Namutu ena nani, macanaracavacapahi ema Jesús. <sup>25</sup> Tacahe, camuriana ena achaneana téhicanahi éma. Éna, tiásihana te Galilea, te Judea, te Jerusalén, te avasareana tinapaica eta Decápolis, étapa te apachara eta Jordán.

## 5

*Éma Jesús máimitucahi nayehe ena ticunachacareanahi me Viya (Lc 6.20-23)*

<sup>1</sup> Tacahe, eta máimairavacahi ema Jesús ena camuriqueneana achaneana, tiápanapa tayehe eta anuquehepahi apaquehe taicha tiúripanahi eta nasamararasirayarehi ena achaneana. Téjacaripa éma, énapa ena máimitureana nachayacaipahi. <sup>2</sup> Ani tacahehi eta máimiturapianahi:

<sup>3</sup> —Éna náimatihí eta tacamunuqueneanahi eta náchanevana, tétavicavahi eta náuricacarevaya taicha máejerare eta najacapirayare eta máechajiriruva ema Viya, machaneranayarehi.

<sup>4</sup> Éna nani tijapanujiricavanahi, tétavicavahi eta náuricacareva taicha émaripa ema Viya macurisamurechavacayare.

<sup>5</sup> Éna nani tisuapajirahianahi me Viya, mánsuanahi mayehe, tétavicavahi eta náuricacareva taicha máijararuanayare eta arairu apaquehe náicuchihi me Viya.

<sup>6</sup> Ena nani, ichape eta najamurachirahi eta náitairesirahi eta matapi-ravacare te mamirahu ema Viya, tétavicavahi eta náuricacarevaya taicha máijaracayare éma eta navarahaquenehi.

<sup>7</sup> Ena nani tijapanurahianahi nayehe ena apamuriana achaneana, tétavicava eta náuricacarevaya; taicha ema Viya, éma apanava majapanuvacayare éna.

<sup>8</sup> Ena nani vahi náisapajirícavahíni tahapapicahini eta náehisirahi ema Viya, tétavicavahi eta náuricacarevaya; taicha éna, títecapanainapa te mamirahu ema Viya, náimararacainapa éma.

<sup>9</sup> Ena nani ticonsejarahianahi nayeheana ena achaneana, nacaepahairahi eta semanereana, tétavicava eta náuricacarevaya éna; taicha máimereu-chainapa ema Viya eta machichairavacahi éma.

<sup>10</sup> Ena nani ticatajivanahi eta nacatianacasivahi nayehe ena achaneana te juca apaquehe táichavenehi eta táurivahi eta náitairesirahi, tétavicavahi eta náuricacarevaya; taicha éna aquenucarahanaya majupahanayare ema Viya.

<sup>11-12</sup> Eti nuchaneranahi, járajapainapa eta sache eta nacatianasiraheya ena achaneana táichavenehi eta éhisiranuhi. Tipanararachaheanainapa, tépiyaequenehaheanainavarepa. Váhisera ecuarami eta juca. Ene nacahehi eta nacatajivairahi ena profetanaini, ena náinapureanahi machaneranahi ema Viya. Eta tacahe, te nacatianacahepuca, ¡ecurisamurechavachucha, evapinavachucha! ¡Tétavicavahi eta iúricacareva taicha ejacapayare eta ícuchiyare te anuma, taicha ichape eta macunachirahehi ema Viya!

*Ena Jesús tímitucahavi eta vicamunucareravayarehi tacutihi eta taca-munucarevahi eta icheve, étapa eta tijarahi*

*(Mr 9.50; Lc 14.34-35)*

<sup>13</sup> Eti ímiyanavayare eta ecamunucareravahi nayehe ena achaneana, tacutihi eta tacamunucarevahi eta icheve. Vahi tacuepaha eta ecamunucareva. Vahi ecucuti eta tajachira eta icheve, taicha tájina eta táichevainahíni. Tásiha, nájinapa ticamunuimahi. Náepuruinapa namutu.

<sup>14</sup> Tacutiquene éti ecutihi eta tijarahi. Éti, namicahuyarehi namutu ena achaneana eta ímitusiravacaya, apaesa náinajica eta náehisirahi eta tamauriqueneana. Ímereuchayarehivare eta iúriya, ecutiya eta avasare tiávihihi te tajirumane eta anuquehe mari. <sup>15</sup> Tacutiquene, vahi ecucuti nácani súnsuana tiyustacanahi jácani lámpara, tásiha nanacapapucaini te tajuhe eta cajune, nayumurusihahini. Nanacayarehisera te anuquehe apaesa náimairiricasarepa namutu ena tiávihihi te peti, tamicaureanayarehi. <sup>16</sup> Ene ecaheyare éti, ímrecayare eta ejaraivayare nayehe ena achaneana apaesa eta náimairainahi eta táuriqueneana íchaqueneanayare; tásiha nacunachainapa ema Tata Vicaiyaquene tiávihihi te anuma.

*Ena Jesús tímitucahavi tayehe eta tasuapacarevahi eta Sagrada Escritura*

<sup>17</sup> Vahi étaina tímitecanuhi núti nucaepahahini eta mavanairipiana ema víyarahaini Moisés, étaripa eta náimiturapianaini ena profetanaini. Eta tímitecanuhi núti, níminicapaequenehaheyare eta nájureanahi. <sup>18</sup> Nutupiruva numetacahe: Títauchavaya tamutu eta máechajiriruvana ema Tata. Tímiyanava eta tasuapacareirahi nayehe ena achaneana tamutu eta Sagrada Escritura. Tájina ticaepahaimahi, tayanapane táitavapuca eta anuma étapuca eta apaquehe. <sup>19</sup> Eta tacahe, nácani tépuruanayare eta tavanairipianahi eta Sagrada Escritura, jácani ánichichaquenehi, vahi tisiapanaimahi te anuma. Tavetijipa te náimitucapuca ena apamuriana eta náepuruiraya. Nácanisera tisuapanayarehi, tímiturecanahivare eta juca nayehe ena apamuriana

achaneana eta náehisiraina; éna, ichapeyare eta nacunachacarevayare eta nasiapiraipa te anuma. <sup>20</sup> Táicha te evaraha ítujicava esiapa te anuma, tacamunuhi tiápajucavaya eta táurivahi eta eyeherepiana éti, ecachuricayare eta nayeherepianahi ena escribánoana, énapa ena fariséoana.

*Éma Jesús tímitucahavi vahi tacunasi te visamure eta visemaneva  
(Lc 12.57-59)*

<sup>21</sup> Eti écharichucha eta nayeherepiana ena iáchucanaveanaini ani tacahe: “Vahi ecucapaca mácani piparaepiya; taicha mácani ticaparecahi, ticaicuñayarehi”. <sup>22</sup> Nútisera numetacahe eta apana: Mácani tise mahi mayehe ema maparape, énerichuvare ticaicuñayare. Mácani tiúmehahi ema maparape, ticayaserehiyare te namirahu nácani tuparairucanahi tayehe eta avasare. Tacuti quene mácani ticaecahihi ema maparape, mávacuhaipahi eta ecuñaraqui tayehe eta infierno.

<sup>23</sup> Eta tacahe, te piámaphi eta piámavahu te mamirahu ema Viya, tásiha, péchapanainapapuca eta pitapiravahi mayehe ema piparape. <sup>24</sup> Vuíchaha picuiyaracuha eta piámavahu. Tativanumayare piyaseapanaya eta perdón ema piparape. Pétipiricanumayare tativa eta píchavaquenevahi mayehe éma. Táuricasarepa píchava píyaracuhapanainapa eta piámavahu te mami- rahu ema Viya.

<sup>25</sup> Tacuti quene te matiarihiyarepuca mavaraha mametauchavi te nami- rahu ena tuparairucana, vahi picucuchapa mametauchavi. Tativayare pétipirica eta píchavaquenevahi mayehe, mapurare vuíchaha picaeratahini mayehe ema juez tayehe eta cárcel. <sup>26</sup> Taicha te náimisipavipa tayehe eta cárcel, ticajerarquene énapa eta piúchusiraya.

*Éma Jesús tímitucahavi vicuneuchavaya eta jácani táimiaquipaica havi tayehe eta pecatu*

<sup>27</sup> Énerichuvare écharichuhi éti eta náimiturapihi ena iáchucanaveanaini: “Vahi ecuveha esu apana esena”. <sup>28</sup> Puítisera núti numetacahe eta apana: Mácani majamurachahi esu apana esena, ticapecaturaipahi te masamure taicha eta majamurachirahi. <sup>29</sup> Eta tacahe, eta iúquiha váure, te tavarahapuca tímiaquipaicahe tayehe eta pecatu, tavarairahi táimahayare eta tamauri- queneana tájiparacana, tiúripana evecuhauquichava iáquijicaya. Taicha tiúripanahi táejiacava ánichichaina te iáquehe, váhisera tacuimicuñacahe eta te yucu infierno, tamutupahi eta iáquehe. <sup>30</sup> Étaripa eta evahu váure, te tavarahapuca tímiaquipaicaheyare tayehe eta pecatu, tapamisirahéna- papuca íchayare eta tamauriqueneana, tiúripana eyuchatica iáquijica. Taicha tiúripanahi táejiacava eta evahu, váhisera tacuimicasiapahe támutu eta iáquehe tayehe eta yucu infierno.

*Éma Jesús manacahi eta máimiturapi nayehe ena tñajicacana  
(Mt 19.9; Mr 10.11-12; Lc 16.18)*

<sup>31</sup> Énerichuvare ena viáchucanaveanaini náisapahi eta máejerare eta máinajisira mácani achane esu mayena. Ani nacahehi: “Mácani tñajicahi esu mayena, máemepiyarecahi eta ajumeruca táechajisihayarehi eta máinajisiraya esu mayena”. <sup>32</sup> Nútisera numetacahe eta apana: Mácani achane, te máinajicapuca esu mayena, ticapecaturaipahi me Viya. (Váhinénipuca sucaecahihini mayehe ema apana achane.) Énerichuvare te tiápechavahipuca ticaíma ésu, tamuriacahi ésu eta maviurevahi ema suima. Tásiha, mácani arairuhi suima, émapa tamuriacahi eta máejecapiravahi taicha eta mavirahi esu esena sucaímaquenehi.

*Éma Jesús tímitucahavi eta vahi vijurachaimahi*

<sup>33</sup> Énerichuvare esamairiricavare eta náimitucasivahi ena iáchucanaveanaini: “Machu vahi ecuitaucha jácani ejurachirahipuca. Yátupinasera eta ítauchiraina tamutu eta íjarasiravahi me Viáquenu” nacahepa. <sup>34</sup> Nútisera numetacahe éti: Vahi táuricahini íchahini eta juramento. Vaipa échajisihahini eta anuma taicha éta, mávacurehi ema Viya. <sup>35</sup> Váipavare échajisihahini eta apaquehe taicha éta, macaematanéyahi éma. Váipavare échajisihahini eta Jerusalén, taicha éta, mávacureyarehi ema yátupiquenehi Rey, mavaneruyare ema Viya. <sup>36</sup> Váipavare échajisihahini eta ejurachirahi te echuti, taicha vahi áratahaimahi ehapamaichahini, ítsivachirahini eta táimahi, tijapupuca, tiquisapuca. <sup>37</sup> Numetacahe: Te tatiarihipuca eta íjarasiravayare, átupiruva ácahe: “Tiuri”. Te váhipuca evarahahi, átupiruva: “Vahi” ácahe. Te émunahacavapuca ejuracha, ema Váinaraji títurucaheripa.

*Éma Jesús tímitucahavi eta vahi vicusema ne nácani ticaetemajiricahaviana (Lc 6.29-30)*

<sup>38</sup> Énerichuvare esamairiricahi eta acane: “Mácani achane téhararecahi mapuchuquichahi ema apana achane, énerichuvare éma napuchuquichayareva ena tuparairucana. Te macavetuquiahechahipuca, énerichuvare nacavetuquiahechayareva ena tuparairucana”. <sup>39</sup> Nútisera numetacahe: Vahi ecujicapa te masema mácani achane váinarajihi. Tiúripa, te náehahepuca nácani te emira, íjaracayare eta apachacaya eta emira. <sup>40</sup> Tacutiquene, te natiarihipuca ena timetauchaheana, navaraha naverejicahe eta ecamisa, vahi ecusema. Váhivare ecujicapairihi. Íjaracavare eta apana eta epacuha. <sup>41</sup> Ísapayare te nácani navanecahepuca eta enaracureca eta tijitacare. Te navaraha iámina étanaina kilómetro, evapinava eta eservichiravacaina. Vahi ecobrachavacaimahi. <sup>42</sup> Mácaniripa tájahapuca mayaseacahe, íjaracayare. Vahi ecueñamiha mácani ticapucahe eta ecayehequeneana.

*Éma Jesús tímitucahavi eta vémunasirayare nácani ticatianacahaviana (Lc 6.27-28, 32-36)*

<sup>43</sup> Énerichuvare esamairiricahi eta acane eta náimitucasivahi ena iáchucanaveanaini: “Émunasirahi nácani témunacaheanahi. Tásiha, ecatichayarepa nácani ticatianacaheanahi”. <sup>44</sup> Nútisera numetacahe: Émunacayareva nácani ticatianacaheanahi. Eyaseaca ema Viya eta nayujarahuina nácani téchajicanahi eyehe. Ímereca eta iúriya nayehe nácani ticaticahaheanahi. Eyujaracha nácani tiúmehaheanahi ticaetemajiricaheanahi. <sup>45</sup> Te ítaucha eta juca, éta tímereuchaheyare eta machichahéirahi ema Vicaiyaquene te anuma. Taicha éma nájina manerejiruina, namutu máemunacavaca: ena achaneana váinarajiana, énapa ena tiúriana. Éma, tíjaracahavi vimutu eta sache vimícahuhi, étapa eta tiquiva. <sup>46</sup> Éti, tájina ecunachacarevaina eta me Viya, te nacarichuhi émunaca nácani témunacaheanahi éti. Apanasica ena tisipecaturarahiana náichahi eta juca. <sup>47</sup> Tacutiquene, tájinavare ecunachacarevaina eta me Viya, te iúriyare nacarichuhi ena eparapenaveanahi. Apanasica ena máimatiarahanahi ema Viya tiúrianahi eta nayehe ena naparapenaveana. Étisera tatuparacahe ecachuricayare eta iúriya. <sup>48</sup> Tétavicavasareya eta iúriya nayehe namutu. Vahi enerejicaimahi ena achaneana. Váhivare eyavanaimahi eta iúriya. Ecutiyare ema Vicaiyaquene te anuma eta máurivahi.

**6**

*Éma Jesús tímitucahavi eta vahi vicusiñavavaicapa eta víchira eta táuriqueneana*



<sup>1</sup> Eta ecajirayare ena páureana, échapavayare. Ema Tata Vicaiyaquene, tájina ticunachahemahi te evarahapuca náimaha ena achaneana eta ecajirahi, evarairahi ticunachaheanayare. Tájinavare máitsirijicavahini éma eta eyehe. <sup>2</sup> Eta tacahe, te ímicatacayarepuca nácani ticamunuvanahi, vahi ecumetajirica. Vahi ecucuti ena apimirana timetajiricanapa te viúrujisirarevana, téhepa te anecapahiana. Eta juca náichahi, navarairahi ticunachacareanayarehi nayehe ena achaneana. Nútisera numetacahe: Ena nani ticaheanahi, tájina nacunachacarevaimahi me Viya. <sup>3</sup> Te jácani píjaraca nácani ticamunuvanahi piyehe, vahi picumetajirica. Váhivare picumetaca nácani pémunacasareana. <sup>4</sup> Piñajichayare eta píjarasirayare nácani píjaracasiruyare. Tacahe, ema Tata Vicaiyaquene te anuma máimararacahi tamutu. Jácani píchaqueneana tayumururevana, éma títsirijiequenehayare, tíjaracaviyare eta pícutihi.

*Éma Jesús tímitucahavi eta viyujarasirayare  
(Lc 11.2-4)*

<sup>5</sup> Te eyujaracahi, vahi ecucuti ena apimirana tiyujaracana te viúrujisirarevana, téhepuca te anecapahiana. Titupihanahi éna eta nayujarasirahi, navarairahi náimararacayarehi ena achaneana. Nútisera numetacahe: Tájinachucha nacunachacarevaimahi me Viya. <sup>6</sup> Étisera ani tacaheyare te eyujaraca. Esiapayare te eyehe cuarto, ératacayare eta tapaja. Eñajichavayare eta échajisirayare ema Tata Vicaiyaquene. Éma, tímararacahavihi; masamayarehi eta piyujaracasa.

<sup>7</sup> Tacuti quene, váhivare ecuapepirica eta ecayemaqueneanayare. Vaipa tácomesahini eápepiricahini eta eyujarasirahi. Vahi ecucuti ena máimatirahanahi ema Viya. Tiúpiemanapa eta nayujarasirahi, náimijachaipa tisamacareanahi mayehe ema Viya. <sup>8</sup> Vahi ecucuti éna, taicha ema Viya máimatiripahi éma jácani vivarahaquenehi viyaseaca. <sup>9</sup> Éti, ani tacaheya eta eyujarouchiravaina: Tata Vicaiyaquene, piti piáviha te anuma, vipicauchahi yátupi eta píjare. <sup>10</sup> Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma. <sup>11</sup> Pájapanuhavi píjaracahavi puiti jena sache eta vicamunuirava eta vinicaqueneana. <sup>12</sup> Pájapanuhavi piperdonachahavi eta viviurevana piyehe, tacuti eta viperdonachira víti ena ticaviurevana viyehe. <sup>13</sup> Vahi picuisapahavi eta vicha eta tauriquene. Picatiuchahavivare mayehe ema Váinaraji. Taicha píti yátupiquenevihi Viáquenuvihi. Nájina pácuti eta pítipajijiasiravahi. Máichecuaraquire eta pijaravahi. Amén.

<sup>14</sup> Taicha te yátupihí eta eperdonachirahi nácani ticaviurevanahi eyehe, ema Tata Vicaiyaquene te anuma tiperdonachaheyare éti apanava. <sup>15</sup> Téhesera te vahi eperdonachahi ena ticaviurevanahi eyehe, ema Tata Vicaiyaquene váhivare tiperdonachahémahi eta éjecapiravanahi éti.

*Éma Jesús tímitucahavi tayehe eta ayuna*

<sup>16</sup> Tacuti quene, te ayunahepuca, vahi ecajapanuramiraimahi te namirahu ena achaneana. Vahi ecucuti ena apimirana ena tímicaecherachavanahi eta ayunairanahi. Núti numetacahe: Tájinachucha nacunachacarevaimahi me Viya. Éma, váhivare títsirijicavaimahi eta nayehe. <sup>17</sup> Étisera, te ayunahepuca, ímiyanava eta esipauquichiravaya, etaticavavare, apaesa nacuija nacuitiacache eta ayunairahéhi. <sup>18</sup> Ema Tata Vicaiyaquene tímararacahéhi tamutu eta esamureana. Tisamacareyarehi eta eyasearuhi.

*Emá Jesús tímitucahavi eta vahi vicuisapava vicasamure eta vímahaqueneanahi*  
(Lc 12.33-34; 11.34-36)

<sup>19</sup> Váhivare tacuavasamurerecahe eta ímahaqueneana te juca apaquehe. Eta juca ticamitiequenehacareana taicha eta tajararesira eta cachusiri, étapa eta táichasivayare. Natiarihivare ena tiámeyechaheanayare. <sup>20</sup> Epanerechaserá eta ecaimahaqueneraya te anuma. Ánaqui jararihi eta táitsivayare eta íchirahi eta táuriqueneana te juca apaquehe. Ánaqui, tájina cachusirina, nájnavare tiámerahina tayehe. Tájina témitiacaimahi. <sup>21</sup> Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

<sup>22-23</sup> Tacutiquene, ecuneuchava, machu tacuetaviuchava eta ejamurachira eta ímahaqueneana. Ecaratacava, vahi ecuisapa tahapasamurechahe eta ecaimahaquenerahi. Taicha te tahapasamureruhepapuca eta ímahaquene, tétavicavahi eta tamapicuvahi eta te iáchanevana. Téhesera esuapa eta nímiturapiana, tétavicavahi eta tamicauchiraya eta iáchanevana, tímijunijicayare eta emaurivahi, étapa eta ejamurachiravahi eta ímahaqueneana. Eta tacahe, machu ísapava tayanariana eta timapicu eta te iáchanevanasami. ¡Páurehesami éti te ísapavapuca tanasipa!

<sup>24</sup> Tacutiquene éti, eta ítaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivare; tásiha ema apana, apaesarineya eta émunasiraya, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurechahe eta plata, machu tahapapirica eta émunasirahi ema Viya, étapa eta ecaemataneasirahi éma.

*Emá Jesús tímitucahavi eta majaneasirahavihi ema Viya viti machichanaveana*  
(Lc 12.22-31)

<sup>25-26</sup> Étasera nuvaraha yátupina eta ecasiñavairaina mayehe ema Tata Vicaiyaquene. Vahi ecucañamaracavaicha tayehe eta enicaquenerepi étapa eta emuiriharapi puiti juca ítaresiraichaha. Eta enicaquenerepi, étapa eta emuiriharapi, tájina táeñamavacarevahini. Ímararacarichuhi eta cáyureana. Vahi táevacahini, váhivare táechatijiricahini, táunacahipucaini eta tanicaquenezare. Émasera ema Tata Vicaiyaquene máechapajiricahi, máijarasirahi tamutu eta tanicaquenerepiana. Evetijipa éti, iápajupanavahi eta éñamacarévhahi me Viya tayehe eta cáyureana. <sup>27</sup> Tájina táuricahíni eta éñamiravahi eta júcana. Éti, nájina tiratahaimahi étijivainahini ecajurucavahini, tayanapane tahapasamurechahehipuca.

<sup>28</sup> Tacahe, ¿tájaha tacayema tihapasamurerecahehi eta emuiriharapi? Ímararacarichuhi eta tajurusirahi eta flúreana, vahi tacañamaracavahini tacaematanehini, táijururecahipucaini. <sup>29</sup> Táitsivahisera, te tépunehapa, tétavicavahi táurinavahi eta taflurene. Nájina tácuti eta nacamuirihaira eta táurinava, émaripa ema víyarahaini rey Salomón eta tajanunusira eta macamuirihairahi. <sup>30</sup> Apanasicahi, ema Viya máijaracahi eta táurinavahi, ánipirichuhinéni eta táitaresirahi. Evetijipa éti eta máechapajirisirahehi, máijarasiraherehi eta emuiriharapi eti achaneana. ¿Tájaha tacayema vahi ácasíñavahíni eta mayehe? <sup>31</sup> Eta tacahe, vahi ecucañamaracavaicha tayehe eta enicaquenerepiana étaripa te echuririacapuca eta une érayare, váhivare eta emuiriharapi. <sup>32</sup> Ena achaneana vahi náimatihini ema Viya, ichapemurihi eta tacañamarasiravacahi eta júcana. Vahi nácasíñavahini mayehe ema



Viya, nacuchapahipucahini eta máijararuyarehi éma. Étiserá, écharine eta mararirahira emá Écaiyaquene te anuma. Máimatihí éma tamutu eta ecamunuqueneanahi. <sup>33</sup> Tásihásera éti, tativayare íjaracava ecaemataneacaya emá Viya, ecasamureirahi eta ítauchirayare tamutu eta mavarahaqueneanahi. Tihapasamurechaheyarehivare eta tátupiruvairaya eta ítaresira, ecurisamurechirayare éma. Máimaharinépa éma. Tíjaracaheyare tamutu eta juca ecamunuqueneana. <sup>34</sup> Eta tacahe, ácasíñava mayehe éma. Vahi tacuimipanerechahe eta íchararacavayare achichu. Puiti ecuchapaipa eta máimicatasiraheyare. Ímíyanava eta ecuchapirayare eta máimicatasiraheya.

## 7

*Éma Jesús tímitucahavi eta vahi vicunemahi eta náejecapiravana ena apamuriana achaneana; vicuneuchavasera víti*  
(Lc 6.37-38, 41-42)

<sup>1</sup> Vahi ecunemahi eta náejecapiravana ena apamuriana achaneana, váhivare ecucaecahivaca, machu étaina támicuñacahe me Viya. <sup>2</sup> Te ecunerahipuca nayehe ena apamuriana achaneana, ecaheyare éti eta macunera-hénapa emá Viya tayehe tamutu eta éjecapirávanahi éti. <sup>3</sup> Piti ajaira, pítipa piti esena, vahi táurica eta picunerahi eta ánichichaqueneana náejecapiravanahi éna. Tituparacavi pítijivaina picuneuchava eta táichapeva eta péjecapirava. <sup>4-5</sup> Vahi tatuparacavimahi pétupirica eta jácani náejecapiravahi íchípichuana ena piparaepiyana. Tájina piviyahini eta piconsejachihaimahi. Ichape-sera eta tatuparasiravihi pétupirica eta péjecapiravanahi píti. Tapaenu-mava pétupirica eta píchavaquenévanahi, táuricapaini piconsejacha emá piparaepiya tayehe eta máichavaquenévahi.

*Éna ticaecahirahiana, vahi vicuijaraca jácani téñamacareana*

<sup>6</sup> Vahi ecuimituca eta máechajiriruvana emá Viya nácani achaneana ticaecahirahiana, taicha váiparinehi náuricaimahi. Machu étaina táemehahe. Váhivare ecuijaraca jácani téñamacareana, machu nácatayayajica.

*Vahi vicuyacuji eta viyaseasiraina emá Tata Vicaiyaquene*  
(Lc 11.9-13; 6.31)

<sup>7-8</sup> Ánivare tacahe eta máechajiriruva emá Jesús:

—Numetacahe: Échajica emá Tata Vicaiyaquene. Eyaseacayare eta ecamunuqueneana. Éma, tíjapanurahi. Tísamaheyare, tíjaracaheyareva. Vahi ecuyacuji eta eyaseasiraina. Énerichuvare, te tatiarihinapupuca eta jácani íchiraya íchapehi eta tacajeravayarehi, eyaseacayare máijaracahehini eta ítupajijiasiravaya. Éma, tíjaracaheyare. Te jararhipuca eta táichejimiráuchahe, éma macaevuisinaheyarehi.

<sup>9</sup> Eta juca tímicutijiricavahi te natiarhipuca ena echichanaveanahi éti, te tiyaseacaheanapuca eta pan nanicayare, váiparinehi táuricaimahi íjaracahini éti eta márijahi. Tímicutijiricava evijaruinahini ena echichanaveana. <sup>10</sup> Étaripa te tiyaseacaheanapuca eta jima, váhivare táuricaimahi íjaracaimahi eta quichare. <sup>11</sup> Etiarihi éti vahi ecajirahihini nayehe ena achaneana. Íurihisera nayehe ena echichanaveana. Mavetijicha emá Tata Ecaiyaquene tíávihahi te anuma. Éma, vahi ticavijaruhemahi eta eyaseserepi. Tíjaracaheyarehi tamutu eta táuriqueneana eyasearuanayarehi.

<sup>12</sup> Evaraha eta náurivaina ena achaneana eta eyehe, ¿masi? Tásiha, táuricahi eta íchiraya eta íúriya nayehe. Taicha eta tacahehi eta táimiturapi eta Sagrada Escritura eta eyehe.

*Jararihi eta apina achene*  
(Lc 13.24)

<sup>13-14</sup> Esamanuchaha. Jararihi eta apina achene. Eta ichape achene, vahi tácajéra eta náehisira ena achaneana. Camurianapana ena téhicana eta ticaijuhe tayehe eta ecuñaraqui. Étasera eta achene ánicuchicharichu, ticaijuhe tayehe eta vítaresirayare, tájina ecuñaraqaina. Váhisera camurianaina ena téhicana éta. Éti epamicava esiapa tayehe eta achene ánicuchicharichu.

*Ema Jesús máimicutichahi ena achaneana tépiyahirahiana, nacuti eta yucuqui máurinisiráha eta tahi*  
(Lc 6.43-44)

<sup>15</sup> Échapavayare tayehe eta náimiturapiana ena tépiyahirahiana tímijachavana machanerana ema Viya. Tépiyacavánapahi tiúriana tacutihi eta tamansuva eta uvesa. Téhesera te nasamureana, tétavicavahi eta navainarajiva, nacutihi eta ichini. <sup>16</sup> Ímatiacavacahisera éna táichavene eta náichaqueneana. Nacutihi eta yucuqui. Eta yucuqui, tímaticarehi eta táhi. Étaripa eta sitavere, váiparinehi tiúchucaimahi eta tacahihini narasahinhipucaini. Tásiha, eta ijicaqui váiparinehivare tacahimahi eta táhi cachiche-ruhinahipucaini. <sup>17</sup> Tacutiquene, tímaticarehi eta táhi eta yucuqui tiúrinisi. Tímaticarevare eta táhi eta máurinisiráhana. <sup>18</sup> Eta yucuqui tiúrinisihi eta táhi, vahi témunahiricavaimahi vahi tacurinisihini eta táhi. Étaripa eta máurinisiráhana, váhivare témunahiricavaimahi táurinisihini eta táhi. <sup>19</sup> Tamutu eta yucuqui máurinisiráhana ticaechuyarehi, tíjuyarepa te yucu. <sup>20</sup> Eta tacahe, ímativacayare ena tépiyahirahiana táichavene eta náichaqueneana tamauriqueneana.

*Vahi námutuimahi títujicavana tisiapanaimahi te anuma*  
(Lc 13.25-27)

<sup>21</sup> Nararihinapa ena achaneana tépiyacavana nuchanerana. Váhisera títujicavanaimahi tisiapana tayehe eta mávasa ema Viya. Tayanapane náichanuinapapuca “Tata Viáquenu”, vahi tisiapanaimahi. Taicha vahi yátupinahini eta nacaemataneasirahi ema Tata Nucaiyaquene te anuma. <sup>22</sup> Te táitecapapa eta juicio, camurianayare ena tíchanuanayare: “Tata Viáquenu, víti véchajisihaparacahi eta píjare. Vipiarcavihi te píjare eta viáquijisirahi ena váinarajiana, téhevare te píjare vímerecohi eta tíramicareana” náichanuinapapuca. <sup>23</sup> Nútisera nujicapainapa: “Éti vahi nuchanerahéna. Nímatisera nútí eta íchaqueneanahi tamauriqueneana. Évuishi te numirahu” níchainapa éna.

*Ema Jesús máimicuticha ena tisuapajirahiana énapa ena masuapajirairahana*  
(Lc 6.47-49; Mr 1.22)

<sup>24</sup> Nácani tisuapanuanahi náitauchahivare eta juca nuvanairipianahi, téchemarahianahi táicha. Nacutiyahehi mácani títucahi tépiyareca peti, manacayarehi eta túmeana yucuqui emuruqui. <sup>25</sup> Jéhesare, te járajapapa eta muraca técatícava, tiámaquiha tiquiva, tisiapapa eta une, váipasera tacayayacahini eta peti, taicha tíusiapiravacahi. <sup>26</sup> Nararihivare ena tépiyacavanahi tisuapanuana, váhisera náitauchahini eta juca nuvanairipiana. Éna nacutihi ema máitucaraha tépiyareca peti. Vahi manacaimahi eta túmeana yucuqui, váhivare táusiapiravacahini máicha. <sup>27</sup> Te járajapapa eta muraca técatícava, tiámaquiha tiquiva, tisiapapa eta une, tacajimuyapaicapa eta apaquehe. Tiáquipaicavapa eta peti, tamutusamipa témitiequeneha —máichavacapa ema Jesús.

<sup>28</sup> Te títapiricapa ema Jesús eta máimitusiravacahi ena achaneana, ichape-rinehi eta náramirahi eta máimiturapiana. <sup>29</sup> Vahi nasamasarénahini. Tétavica-vahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

## 8

### *Ema Jesús macanaraca ema émana achane leproso* (Mr 1.40-45; Lc 5.12-16)

<sup>1</sup> Te tiúcupaicapa ema Jesús tayehe eta cerro te mávinehi, camuriana éna achaneana téhicanapahi. <sup>2</sup> Tacahe, macahepaipa ema émana achane leproso. Temeñahavapa mayehe ema Jesús. Tépuycupa te mamirahu. Tásiha, máichapa: —Tata, nucasiñavahi eta piyehe, picanaracanupaini.

<sup>3</sup> Tacahe, ema Jesús majicapapa:

—Nuvaraha nucanaracavi. Tájinapa píchiravaina puiti —máichapa.

Máemamahacapa. Tásiha, enevanepa tinaracahi ema macajumaquenénihini eta máechajisirahi ema Jesús. <sup>4</sup> Tásiha, ema Jesús máichapa:

—Pímaha, nacuija picumetaca eta nútirahi nucanaracavihi. Piyanavanesera pímerrecava nayehe ena tuparairucana, apaesa náimamacavi. Énainapa timetajiricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihapulupayachirayare taicha eta macanarasiravihi —máichapa ema Jesús.

### *Ema Jesús macanaraca ema mamusura ema capitán romano* (Lc 7.1-10)

<sup>5</sup> Tacahe, ema Jesús títecapapa tayehe eta Capernaúm. Matiarihini ema achane apavasana. Comandantehi éma nayehe ena suntaruana romanoana. Capitán eta mávacure. Tiyanapa mapauchapa ema Jesús. <sup>6</sup> Mayaserecapa, ánipa máicha:

—Tata, mararihi puiti te nupena ema amaperu numusura ticajumahi eta áire. Tétavicavahi tacativa masama. Pájapanupaini, picanarasinanupanaini éma —máichapa.

<sup>7</sup> Ema Jesús, majicapapa:

—Tiuri, nuyanayare nucanarapanayare —máichapa.

<sup>8</sup> Tásiha, ema capitán majicapapa:

—Tata, vahi picucañamacava eta pítesiraina eta nuyehe, taicha vahi táurichahini pisiapahini te nupenasami. Németeaca taratarichu picavanairipi eta picanarasiraya ema numusura. <sup>9</sup> Taicha nútí nusuapahi te tivane-canuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipa tisuapanuvane —máichapa.

<sup>10</sup> Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Nutupiruva numetacahe: Nájina nímaha émanaina vijaneana israelíta mácutihini ema maca achane apavasana eta macasiñavairahi eta nuyehe.

<sup>11</sup> Numetacahe puiti: Járापainapa eta sache, náitecapiraya ena camuriqueneana achaneana apavasanana tiásihanayare te tamutu avasareana te juca apaquehe. Tisiapanayare eta mávasa ema Tata, te mávihahi ema viáchucaini Abraham, ema Isaac, émapa ema Jacob. Tétavicavainapa eta náurisamurevaya. <sup>12</sup> Tacahe, tamapuruji eta náimatiequenehairahi ena vijaneanana israelítana eta máechajiriruva ema Tata, váhisera nácasíñavahini

eta nuyehe. Eta tiviuchavacayarehi tayehe eta nacaicuñaiyaya eta te tamapicuquene te távihahi eta táijurequenehi yucu. Ticapitiquiahechavanainapa eta tacativayare nasama. Tíyahanainapa —máichapa.

<sup>13</sup> Tásiha, ema Jesús máichapa ema capitán:

—Piyana pichava te pipena. Tinaracaripa ema pimusura, taicha eta picasiñavairahi eta nuyehe —máichapa.

Tacahe, ema amaperu ticajumahi tinaracaripahi te jena hora eta náechajirisiravahi éna.

*Ena Jesús macanaraca esu máimase ema Pedro  
(Mr 1.29-31; Lc 4.38-39)*

<sup>14</sup> Ema Jesús tiyanavarepa te mapena ema Pedro. Máimahapa esu máimase ema Pedro, ticajumahi eta muraca fiebre. Mapauchapa tayehe eta suívesihahi. <sup>15</sup> Máemamahacapa, enevanepa táetaviacahi eta fiebre. Tinarcapa. Enurujiapa téchepuca. Tásiha, tépanavapa ésu eta suítátirahi ema Jesús.

*Camuriana ena macanararuanapahi ema Jesús  
(Mr 1.32-34; Lc 4.40-41)*

<sup>16</sup> Te yátipa, títeparácanapaichucha ena achaneana. Námavacapaipa ena nacajumaqueneana, énapa ena návaháruana ena éreanana. Tacarichu te máechajiriruvachucha ema Jesús, macuchuchujicavacapaipa ena éreanana tiávahácanahi ena nacajumaqueneanahi. Macanaracavacapa ena apamuriana tisamanahi eta apana jumareana. <sup>17</sup> Eta juca títauchavapahi eta táechajisihairahi eta májurehi ema víyahaini profeta Isaías, ani tacahehi: “Masaminahavihivare eta vijumana eta macanarasirahavihi”.

*Tituparacahavi vahi véñamavaimahi eta víjarasiravahi véhica ema Jesús  
(Lc 9.57-62)*

<sup>18</sup> Te máimahapa ema Jesús ena camuriqueneana achaneana nachayacahi, macavanairipipa ena máimatureana natsecava eta nánuesirayarehi te apachara cáquiure. <sup>19</sup> Tacahe, ema émana escribáno témeñahavapa mayehe ema Jesús. Máichapa:

—Tata máestro, núti apana nuvaraha néhicavi te jácani pivarahaqueneyare piámianu —máichapa.

<sup>20</sup> Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera nuti Manerejirunuhi ema Viya, tájina nuviya nusiapihahini —máichapa.

<sup>21</sup> Te apanavarepa sache, ema émana máimature máichavarepa:

—Tata, nuyaseacavi písapanuhini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásiha, nucapayacavipa néhicaviya —macahepa.

<sup>22</sup> Ema Jesús majicapapa:

—Péhicanuchucha. Pésamirica náecaracacaichaha ena máecharaireana. Tájina táijaracavimahi eta juca tihapasamurerecavihi —máichapa.

*Ena Jesús macaesamirica eta táepacusirahi eta une étapa eta técatícava  
(Mr 4.35-41; Lc 8.22-25)*

<sup>23</sup> Te títapiricapa ema Jesús, tiávacuhapa te pacure. Énapa ena máimatureana, náehicapaipa éma. <sup>24</sup> Te itupierecanapa, járajapapa eta muraca técatícava. Ichapevaca eta táepacuruhana. Tisiapapaipahi eta une tayehe eta pacure. Ema Jesús, tímacapaichucha éma. <sup>25</sup> Tacahe, ena máimatureana tipiararecanapa eta napisirahi. Nacajamicapa éma. Ánipa náicha:

—Tata maestro, picatiuchahavi. Véricainapa —náichapa.

<sup>26</sup> Ema majicapavacapa:

—¿Tájaha tacayema epica? ¿Vahi ácasiañavapahini eta nutiarahirapahi eta eyehe? —macahepa.

Tásiha, téchepucapa. Macamatinacapa eta técativaca étapa eta une. Enevanepa tésamiricavahi eta táepacusirahi. Tájina pa táichiravainahini.

<sup>27</sup> Ena máimitureana ichaperinehi nárami. Ánipa nacahe:

—¡Tétavivacavahi eta máitupajijiasiravahi! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatinacahi eta técativaca étapa eta une eta táepacusirahi! —nacahepa.

*Ena apinana ajairana návaháruana ena ichapemuriqueneana éreanana (Mr 5.1-20; Lc 8.26-39)*

<sup>28</sup> Te títecapapa ema Jesús te apachara eta cáquiure te apaquehe Gadara, tiúchujicanapa te ecari ena apinana ajairana, návaháruanahi ena éreanana. Tétavivaca eta náñehivavacahi. Náehayarehi nácani tiánucuhanapahi. Tacahe, napauchapa ema Jesús. <sup>29</sup> Tipiararecanapa, ánipa nacahe:

—¿Tájaha picha píteca pipauchahavi piti Jesús, Machichaquenevivihi ema Viya? ¿Pivarahapa picaetemajiricahaviyare víti? ¡Pájapanuhavi, vuíchaha picuvanecahavi tayehe eta vicaicuñaiyayare! —nacahepa.

<sup>30</sup> Tásiha, tatiarivivare nacachacayahi eta camuriqueneana cúchiana tinihicanahi. <sup>31</sup> Ena éreanana nayaseacapa ema Jesús. Ánipa náicha:

—Te piáquijicahaviyarepuca, picatajicahavi. Písapahavi visiapahacavaca eta jena cúchiana —náichapa.

<sup>32</sup> Tacahe, ema Jesús máisapapa:

—Tiuri, eyana esiapahacavaca —máichapa.

Tacahe, tiúchucanapa ena éreanana nayehe ena návaháruanainihi. Tiáramemurihanainehi eta cúchiana. Tijunaparacanapa témiririjicanapa te tachausi eta cáquiure. Téririjicanapa. <sup>33</sup> Ena tijanearecanainihi eta cúchiana tiyananapa tijunana tayehe eta avasare. Timetajiricanapa eta náimairahi, étapa eta nanarasirahi ena návaháruanahi ena éreanana. <sup>34</sup> Tacahe, tiyananapa ena achaneana te mávihahi ema Jesús, náimahapanahi. Te náimahapa éma, nayaseacapa vahi macuitecapahini te návasa, machavahini te másinehi.

## 9

*Ena Jesús macanaraca ema émana achane macajumaquene eta mura-caquiha*

*(Mr 2.1-12; Lc 5.17-26)*

<sup>1</sup> Tacahe, ema Jesús tichavapa tiávachavarepa te pacure. Tichavapa tayehe te mávasahi Capernaum. <sup>2</sup> Ánaqui náimipauchavarepa ema achane macajumaquene eta muracaquiha. Ema tívecahi te mayehe camilla. Te máimahapa ema Jesús eta nacasiñavairahi eta mayehe, máechajicapa ema macajumaquene. Ánipa máicha:

—¡Pétumechava, nuchicha! Nucaepahainavipa eta pipecaturanaini —máichapa.

<sup>3</sup> Natiarihi ena escribánoana. Eta nasamirahi ema Jesús, ánipa nacahe te nasamure: “Ena maca tépiyacava tímijachavahi Viya eta macaepahairahiji eta pecatuana. ¡Tétavivaca eta matapirava!” <sup>4</sup> Émasera ema Jesús máimatihini eta napanereruanahi. Máichavacapa:

—¿Tájaha tacayema eta éjecapirava nuyehe te epanereruanahi? Núti tájina nutapiravaina eta níchirahi eta juca. <sup>5</sup> Núti, eta nucaepahairahi eta



mapecaturana ema maca, tacutihi eta máejerarerahi eta nucanarasirahi eta máquehe. <sup>6</sup> Tiúrisera puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatuana te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa.

<sup>7</sup> Enevanerinehi téchepuca ema macajumaquenéni. Tiyanapa te mapena. <sup>8</sup> Ichaperinehi eta náramirahi namutu ena achaneana natiarihiqueneanahi. Tétavicavarinehi eta nacunachirahi ema Viya taicha eta máitupajijasirava ema Jesús eta máíjarasirahi ema Maiya.

*Ema Jesús máichuha ema achane ticaijare Mateo, mayeheyare apóstole  
(Mr 2.13-17; Lc 5.27-32)*

<sup>9</sup> Te apanapa sache, nuti Mateo néjacahi eta te nucobradesirare eta impuesto. Tacahe, tiánucuhapaipa ema Jesús. Te tímahanupa, tíchuanupa.

—Yare, péhicanu —máichanupa.

Enevanepa, néchepucahi. Néhicapa éma.

<sup>10</sup> Tacahe, námapa éma te nupena, énapa ena máimitureana. Níchuhavacapa ena nuchamuriana ticobraracarahanahi eta impuesto énapa ena apamuriana tisipecaturana. Nénicavacayarehi éna. Macachanemurihivare ema Jesús eta vinisirahi. <sup>11</sup> Títecapanavarepa ena fariséoana. Eta náimairahi namutu ena némunaruqueneana, eta vicachanerahi ema Jesús, ticaecahirecanapa. Ánipa nacahe nayehe ena máimitureana ema Jesús:

—¿Tájaha tacayema tísapava ema eyehe maestro macachanevaca eta manisirahi ena nánitatajiana ticobraracarahiana eta impuesto? ¡Ticapecaturarahiana éna! —nacahepa.

<sup>12</sup> Te masamairiricapa ema Jesús eta náechajiriruvana, máichavacapa:

—Ena majumareanahi vahi nácamunuimahi ema médico. Nacarichu ena ticajumanahi nacamunuyarehi ema médico. <sup>13</sup> Nútiripa vahi étaina tímitcanuhi nutanucayarehi nácani matapiravareanahi. Nutanucapahi núti ena tisipecaturana, apaesa náeneuchava, náinajica eta napecaturana. Tásiha éti, eyana ecaravahu eta máechajiriruvanahi ema Viya. Ánipa macahe: “Núti nuvaraha yátupinaini eta ejapanuraivainahini. Taicha te vahi, tamapurujiyare eta ecamavahirahi eta nuyehe” macahepa ema Viya.

*Nayaserecapa ema Jesús tayehe eta ayuna  
(Mr 2.18-22; Lc 5.33-39)*

<sup>14</sup> Títecapanapa ena máimitureana ema Juan Tícachasiricarahi, nayaserecapa ema Jesús tayehe eta ayuna. Ánipa naicha:

—¿Tájaha tacayema vahi nahayunacha ena pímitureana, vahi nácutihavihini viti máimitureana ema Juan, énapa ena fariséoana?

<sup>15</sup> Ema Jesús majicapavacapa:

—Nímicutichinahe puiti. Vahi táuricaimahi ticatisamurevana nácani ticaichuhacasianahi tinicanahi nayehe ena araimana. Tiúrisamureanayarehi taicha matiarhihi ema arayena. Téhesera te tépenapuca éma, jéhesare ticatisamurevanayarehi. Tacutiquene, vuíchaha táuricaimahi eta ayunanainahini ena nímitureana. Járájpainapasera eta sácheyare, ticaverejicasianayare taicha ticaratacanuanainapa ena ticapacuanaya núti.

<sup>16-17</sup> Esamanuchaha. Eta juca eta nímiturapiana, amairiha arairu. Mavaraha ema Viya arairuyare eta eyeherepianayare eti achaneana. Vahi

ticuticacaimahi eta nayeherepiana ena achaneana. Eta ítusira éti eta nímiturapiana, tavaraha ínajica eta ichasi eyeherepiana tamauriqueneanahi — máichavacapa ema Jesús.

*Ena Jesús macanaraca esu machicha ema Jairo, ésupa esu apana esena sucajumaquenehivare*

*(Mr 5.21-43; Lc 8.40-56)*

<sup>18</sup> Téchajiricavaichahahi ema Jesús nayehere ena achaneana, títecapanechavare ema émana achane ticaijare Jairo. Tuparairucahi éma. Matupírupa tépuyucapa te mamirahu ema Jesús. Ánipa macahe:

—Tátachicha, surarihi esu nuchicha. Puítirichaha tépenahi. Téhesera te piyana, pinacaini eta pivahu, suchavahini suítarecaini —máichapa.

<sup>19</sup> Tásiha masuapapa ema Jesús. Tiyanapa te mapena ema Jairo, vimutupaichu viti máimitureana. <sup>20</sup> Tásiha, sutiarihivare esu ésuna esena sucajumaquene. Doce añoripahi eta sucatajivairahi, táichirahi eta suítine. Témeñahavapa te maquecu ema Jesús. Suémamacapa eta tacheyarapi tamatsianahi eta mamuiraha. <sup>21</sup> Taicha te supanereru ésu, sucahehi: “Taratarichu jácani te némamaca eta ñimuiraha, éta ticanaracanuyare” sucahepa. <sup>22</sup> Émasera ema Jesús masamarichucha eta suémamajiasirahi, macaicutiarahi eta macanararesirahi. Téquerucavapa. Máimahapa eta supisirahi esu esena. Tásiha, máichapa:

—Vaipa picupica, nuchicha. Pinaracapa puiti táichavenehi eta picasiñairanuhi —máichapa.

Tacahe, tinaracapa esu esena. Vaipa tápechahini eta sujumainihi.

<sup>23</sup> Tiyanavarepa ema Jesús. Títecapapa tayehe eta mapena ema Jairo. Máimahainehi ena músicoana. Tiúrianaipahi eta námirayarehi te ecari esu suépenaquene. Énapa ena achaneana, tijajamurianaripahi eta náiyairahi. <sup>24</sup> Tásiha, ema Jesús máichavacapa:

—Íúchucachaha te aneca. Váhinéni suépenahini esu suca amaperu. Tímacarichucha ésu —máichavacapa.

Énaserá nacaecahirichucha éma, técavanapa. <sup>25</sup> Te tiúchucanapa ena achaneana, tisiapapa ema Jesús te suávihahi esu suépenaquene. Macarata-vauchapa ésu. Macaechepucapa. Tichavapa títarecachi ésu. <sup>26</sup> Te nasamairiricapa ena ticavasanahi eta te Capernaum, náraminehi namutu. Nacatsa-tsaicapa timetajiricanapa.

*Ena Jesús macanaraca ena apinana púchuquiana*

<sup>27</sup> Tiuri, tichavayarepa ema Jesús te mapena. Eta mapaisirahi te calle, náehicapaipa ena apinana púchuquiana. Tipiaracanapaipahi te máequene.

—¡Tátachicha Jesús, pájapanuhavi picanaracahavi. Vicasiñavi piti yátupi-quenévihhi Cristo! —náichapa.

<sup>28</sup> Váhisera masuapavanehini éma. Te tisiapapa ema Jesús te mapena, ena púchuquiana tisiapanavarepa. Témeñahavanapa eta mayehe. Tásiha, éma mayaserecavacapa. Ánipa máichavaca:

—¿Yátupipuca ecasiñairanuhi eta nuncanarasiraheyare? —macahepa.

Ena najicapapa:

—Yátupi, tata.

<sup>29</sup> Tacahe, ema Jesús máemamacapa eta náuquihana. Tásiha, máichavacapa:

—Tiúri, eta ecasiñairanuhi, enaracayare —máichavacapa.

<sup>30</sup> Jéhesare, enevanepa tinaracanahi. Tímairiricanapa. Tásiha, muracapa eta matuparasira vahi nacumetajirica eta macanarasiravacahi éma. <sup>31</sup> Váhisera



nácahehini éna. Étarichuhi te tiúchucanapa, timetajiricanapa eta macanarasiravacahi. Tásiha, náechapa namutu te tachacayarahanahi eta avasare eta juca máichaquenehi ema Jesús.

*Ena Jesús macanaraca ema achane upa, macaechajicahi*

<sup>32</sup> Te viúchucavarepa, nacahepaipavare ena achaneana. Námapahi ema achane. Úpahi éma, taicha mávaháruhi ema éreana. <sup>33</sup> Tacahe, ema Jesús máquijicapa ema éreana, ema tiávahácainihi. Tásiha, ema achane tinaracapa. Téchajicapa. Ichaperinehivare eta náramirahi ena achaneana eta náimairahi. Ánipa nacahe:

—¡Tétavicava eta máitupajjiasirava ema Jesús! Te viávasa Israel, nájina tiratahaina tíchaina tácutihini eta juca vímahaquenehi —nacahepa.

<sup>34</sup> Nararihivare ena fariséoana. Ánipa nacahehi:

—Ema maca Jesús, vémeteaca majupahahi ema Satanás, ema náquenu-murihi ena éreanana. Máijjararui jácani eta máitupajjiasiravahi eta macuchusiravacahi éna —nacahepa.

*Ena Jesús majapanuvaca ena achaneana*

<sup>35</sup> Ema Jesús tamutuhi mapaica eta avasareana étapa eta ánichichaqueneana avasarechichana. Tímiturecapahi tayehe te jácani máitecapihapahi te náurujisirarevana. Ticametarairupahi eta máechajiriruva ema Viya eta náuchucuirayare ena ticasíñanahi éma, machaneranayarehi éna. Ticanararecapahivare ena ticatajivanahi ticatiruhanahi. <sup>36</sup> Camuriana ena achaneana títanajirícavanahi. Taicha ticatajivanahi éna, nájina nácasíñahini. Nacutihi eta uvesa te nájina tijaneacaina. Eta máimairavacahi ema Jesús, ichape eta majapanuiravacahi. <sup>37</sup> Tacahe, ema Jesús máichahavipa viti máimitureana:

—Tétavicavapa eta vicamunuirava ena tímicatacavavianaya tayehe eta juca vématanerepihi. <sup>38</sup> Eyaseacayaresera ema Tata Vicaiyaquene, máijaracahavi ena tímicatacavavianayare. Eta juca tímicutijiricavahi mácani achane eta macamunuiravahi ena tímicatacacanaya te máechatijicaya eta maharusura —máichahavipa.

## 10

*Ena dócequeneana apostóleana manerejiruanahi ema Jesús  
(Mr 3.13-19; Lc 6.12-16)*

<sup>1</sup> Tacahe, ema Jesús tíchuhahavipa viti dócequeneana, mayeheanayare apóstole. Tíjaracahavipa eta vítupajjiasiravayare viratahairayarehi vicuchucavaca ena éreanana, vicanarasirayareva ena nacajumaqueneana étapa eta nacatiruhavana.

<sup>2-4</sup> Eta juca víjareana viti apóstoleana\*: Ema tínapuca ema Simón Pedro, émapa ema maparapeichu Andrés, ema Jacobo ema maparapeichu Juan, ema Felipe, ema Bartolomé, ema Tomás, nútupa Mateo, ema apana Jacobo, ema Lebeo, ema apana Simón, émapa ema Júlasí Iscariote (ema tíjararecahi ema Jesús).

\* **10:2-4** Ena nani apinana ajairana ema Jacobo émapa ema Juan, naparapecacahi, machichanaveanahi ema Zebedeo. Ema Mateo, eta máematanerepinihi, ticobrareca eta impuesto. Ema apana Jacobo, machichahi ema Alfeo. Ema Lebeo, mapapihi eta máijare. Ticaijarehivare Tadeo étapa eta Judas. (Te pivaraha pecha, pitanuca te Marcos 3.16-19 étapa te Lucas 6.14-16.) Ema apana Simón, tímaticarehi éma, nachamurinihi ena revolucionárioana ticaijareanahi “cananístana”. Navaraha náquijica ena extranjerona romanoana.

*Ena Jesús mavanecavacapa ena dócequeneana apóstoleana napaicayare tamutu avasareana, ticametarairuanayarepahi*

*(Mr 6.7-13; Lc 9.1-6)*

<sup>5</sup> Tacahe, ena Jesús tévatacavahipa viti dócequeneana apóstoleana vicametarairuyarehi. Ánipa máichahavi:

—Vahi ecuyana tayehe eta návasana ena apavasajuecuana. Váhivare ecuyana nayehe ena samaritanoana. <sup>6</sup> Eyanayaresera tayehe eta avasareana návasanahi ena vijaneanana israelítana. Taicha éna nacutihi eta uvesana máquenureana. <sup>7</sup> Eyana ecametarairuyare nayehe. Emetacayare eta nútijapairainapa nuti Náquenuyare, nuti nucuchucuhavacayare éna, taicha mavanerunuhi nútí ena Viya. <sup>8</sup> Ecanaracavacayarepahi ena leprósoana énapa nácani ticatajivanahi taicha eta apana jumare. Ecaechepucayareva ena náepenaqueneana. Ecuchucayareva ena éreanana. Éti, vahi evachare-ruinahi eta juca ítupajijiasiravahi, váhivare ecobrachaimahi nácani ecanararuanayare.

<sup>9</sup> Váhivare iámaimahi eta oro, eta plata, eta reale. Tacuija iama eta enirurucuha te alforja. <sup>10</sup> Étanarichuvare emuiriha, éta iámayare. Éta ena éparupeva, étaripa eta eyupairiquiana. Ena ticaematanerahi, tatuparacahi náenicayarepahi te jácani macaemataneiyapahi. Ene ecaheya éti, títátiheanayare ena tijacapanaya eta ecametarairuyarepahi.

<sup>11</sup> Te ítecapaucha jácani avasare, etanucayare ena achane tiuri, témunarahi. Enasiyare mayehe. Tiámainucava te táitecapa eta iúchusirayareva tayehe eta avasare, epaenumavaya ejunijica eta ítecapihahi. <sup>12</sup> Te esiapayarepa tayehe eta peti, eyaseacayare ena Viya eta náuricacarevaina ena achaneana ticapenana eta peti. <sup>13</sup> Te tiúrianahi ena achaneana ticapenanahi eta peti, ímiyanava eyaseuchayare eta náuricacarevaina. Téhesera te vahi nacuri, váhi eyaseuchaimahi. <sup>14</sup> Étaripa te váhipuca nacujacapahe te jácani avasare, éta ena te jácani peti ítecapihayare, váhivare nacubaraha nacusamahe, iúchucavane-yareva. Étatapevachavanúmayareséra eta máteji te ívapeana. Táicutiarayare eta máicuñasirayare ena Viya taicha eta namavarairahi najacapahehina. <sup>15</sup> Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinara-jiqueneana ticavasanaini te Sodoma éta ena Gomorra.

*Nacatianacainapa ena téhicanapahi ena Jesús*

*(Lc 12.2-7)*

<sup>16</sup> Esamanuchaha. Nútí nuvanecahehi éti eyana epaica. Nararihisera ena achaneana váinarajiqueneanahi étupiaruanayare. Éna nacutihi eta sárare táíñehiqueneánahi. Étisera ecutiyare eta uvesa eta tamansuvahi. Ítucayare eta ecaichepaisirayare eta navainarajivana. Váhisera ecujicapauchava te návarahapuca náehahe. <sup>17</sup> Échapava, taicha nararihiyare ena achaneana ticatianacaheanayare táichavenehi eta éhisiranuhi. Ticaratacaheanainapa, écaserehinapa nayehe ena juéseana. Téstaheanainavarepa eta te náuruji-sirarevana. <sup>18</sup> Tásiha, etiarhiyare éti tiámaheanaya te namirahu ena aque-nucana, téhevare te namirahu ena Presidenteana gobiernonahi, ecaviu-revayare táichavenehi eta éhisiranuhi. Esapihasera éti, ecamapuravainapa échajisianuyare te namirahu éna, apaesa náimatiyare namutu ena achaneana te avasareana eta nímiturapiana. <sup>19</sup> Tacahe, te jácani námahepupuca te nami-rahua ena aquenucana, vahi ecueñamava tayehe eta jácani échajiuchiravayare, ecatiuchiravayare. Échajicayare eta échajiriruvana máijjararuheyare ena

Espíritu Santo te jena sache. <sup>20</sup> Taicha máimahaheinpa, tímitucaheyare eta échajisiraya. Vahi étijivaimahi eta échajisiraya.

<sup>21</sup> Natiarihiyareva nácani achaneana tjararecanaya ena naparapequeneana, navarairahi náimicapaca táichavenénahi eta náehisiranuhi núti. Natiarihiyareva ena nácani náiyana, navarahayareva náijarareca ena nachichanaveana táichavenehi eta náehisiranuhi núti. Natiarihiyareva nácani nachichanaveana nacanarainapa ena náiyana, náimicapacainapa táichavenehi eta náehisiranuhi núti. <sup>22</sup> Namutuyaréni ena achaneana ticatianacaheanayare táichavenénahi eta éhisiranuhi núti. Téhesera ecamichahi tamutu, ímiyanavahi eta éhisiranuhi te táitavapa tamutu, nucuchucaheyare núti. <sup>23</sup> Te napanajicahepuca te jácani avasare iávihihi, táichavenehi eta ecametarairuirahi, ejunayare tayehe eta apana avasare. Jéhesare, nuti Manerejirunuhi ema Viya, nútijapavanénapa. Vuíchaha ecuitahi epaica eta avasareana ne vijaneanana israelítana.

<sup>24</sup> Éti nímitureana, ticatianacaheanaya ena achaneana. Vahi epicauchacaréimahi nayehe, táichavenehi éhisiranuhi núti. Ticatianacaheyaresera tacuti eta nacatianasiranuhi núti. <sup>25</sup> Tíjarechaheanayare váinarajihe, máurishihepuca, tacuti eta náumehairanuhi núti. Étiserá, evapinavaya eta ecutiranuyare eta nacatianasiranuhi nuti iáquenu, núti eyehenuhi maestro.

<sup>26</sup> Váhisera ecupicavaca ena ticatianacaheana. Ema Viya tímararacaheya. Ticunachaheya eta ecamichirahi, evehainapa eta ícuchihi. <sup>27</sup> Tásiha, étumechava eta ecametarairuiraya tamutu eta nímiturapiana te tamutu avasareana. Jácani néchajiriruvanahi te timapicu, éti ecuchujicayarehi te tijarahi, emicauchiravacaya ena achaneana. Étaripa eta nujajairuhehi te vicarichuhi, epiaracainapa te calle. <sup>28</sup> Vahi ecupica nácani nacapacapuca eta iáquehe, tacarichuchucha náituruequenehayare. Váhisera naratahaimahi nacamítiequeneha eta iáchaneva. Macarichu ema Viya epicayare, taicha éma máituruequenehahi tamutu. Maratahahi macamítiequeneha eta iáchanevana tayehe eta táíñehiquene infierno, te ecainajiruva táichavenehi eta episirapuca eta nacapasiraheyare.

<sup>29</sup> Nímicutichinahe eta cáyurechicha. Éti ímijachapapuca vahi tasivachahini éta. Téñamacareanahisera me Viya. Éma, téchavacahi eta táitaresirahi, étapa eta táepenirahi. <sup>30</sup> Evetijipa éti, éñamacarepanahi me Viya. Éma, tímatipa eta tatupa eta echutimacana. Téchahehivare éma tamutu eta ítaresirana. <sup>31</sup> Eta tacahe, vahi ecueñamavahi éti tayehe eta ítaresirana, taicha tétavicavahi eta emunavahi mayehe.

*Vímereuchavayare eta véhisira ema Jesús  
(Lc 12.8-9)*

<sup>32</sup> Tímiyanava ema Jesús tímitucahavi. Ánivare macahe:

—Namutu ena tímereuchavanahi eta náehisiranuhi te namirahu ena achaneana, núti apanavare nímereuchavaya eta nuchanerairavacahi éna mayehe ema Tata Nucaiyaquene, ema tiávihihi te anuma. <sup>33</sup> Nácanisera vahi návarahahini tímereuchavanahi eta náehisiranuhi, núti apanava nímereuchaya eta vahi nuchaneranainahini éna, te mamirahu ema Tata Nucaiyaquene.

*Ena achaneana náepuruvacainapa nácani téhicanayare ema Jesús  
(Lc 12.51-53; 14.26-27)*

<sup>34</sup> Éti ímijachaipapuca eta nítesirahi te juca apaquehe, tájina tácyemacaréimahi, tiúricacareyarehi nícha. Váhisera ene tacahe. Níchaveneya núti, ena achaneana tépuruheanaya térajicavanaya eyehe. Eta tacahe, nuvaraha échapirica yátupina eta juca éhisiranuhi. <sup>35</sup> Taicha puiti juca vicaijuheyare,

mácani achane, te natiarihi ena machichanaveana, nacatichayarehi ema naiya táichaveneyarehi eta máehisiranuhi éma. Ésuripa esu naena, nacatianacayareva. Ésupa esu chinenaca, sucatianacayareva esu suímase taicha eta suéhisiranuhivare esu apana. <sup>36</sup> Ene nacaheya, nararihiyare ena tachichanaveana eta peti ticatianacana ena náiyana te peti níchavenehi núti.

<sup>37</sup> Nácanisera tñajicavana eta náehisiranuhi táichavenehi eta nacatianasira ena nachichanaveana, váipa tatuparacahini nuchaneranainahini. Énaripa nácani tñajicavana eta náehisiranuhi táichavenehi eta nacatianasira ena náiyana, énerichuvare vaipa tatuparacahini nuchaneranainahini.

<sup>38</sup> Énerichuvare nácani apaesarichu eta navarairahi téhicanuanahi, váhivare nájaracavahini táimicapacahini eta náehisiranuhi, vaipa tátuparacahini nuchaneranainahini. <sup>39</sup> Taicha nácani téñamavanahi eta náitaresira, tiávamirahuana eta náehisiranuhi, énajivayare ticamitiequenehavanaya. Énasera nácani yátupi tñjararecavanahi téhicanuana, táimicaparuanayarepuca eta náehisiranuhi, éna tiúchucuhanayare eta náitaresirayare.

### *Jararihi eta vícuchihi te anuma*

*(Mr 9.41)*

<sup>40</sup> Ema Viya máitsivachayare nácani tiúriana ena najacapiraheyare nasamahe éti. Taicha eta najacapirahehi, ticaecheranahi eta najacapiranuhivare núti; énerichuvare najacapahivare ema Tata Nucaiyaquene. <sup>41</sup> Énerichuvare nácani tijacapanahi ema profeta nuvaneruhi, énapa ena achaneana tiuri eta náehisiranuhi, máitsivachayare ema Tata, máíjarasiravacayare eta náicuchi. <sup>42</sup> Énaripa ena témunarahanahi nayehe ena nani ánichichaqueneana téhicanuanahi, nacumpiracha eta une táichavene eta náehisiranuhi; énerichuvare jararihi eta náicuchiquene —máichahavipa ema Jesús.

## 11

### *Ema Juan Tícachasiricarahi mavanecavacapa ena máimitureana*

*(Lc 7.18-35)*

<sup>1</sup> Te tamutupa eta máimitusirahavihi ema Jesús viti dócequeneana mayeheana apóstole, tiyanavarepa eta te avasareana tayehe eta Galilea. Taicha mavarahahi máimitucayare ena achaneana eta máechajiriruvana ema Viya.

<sup>2</sup> Tiuri puiti, ema Juan Tícachasiricarahi, mávinehi te cárcel. Ánaqui masamairiricapa eta máichaqueneanahi ema Jesús. Tacahe, máevatacapa ena apinana máimitureana, nayaserepanayarehi ema Jesús. <sup>3</sup> Te náitecapauchapa, náichapa:

—Ema viáquenu Juan tivanecahavihi viyaserepanaviyare te yátupihpuca pítiripahpuca Cristo ema vicuchapaquenehi, ¿téheserapuca vímiyanavayarepuca vicuchapa? —náichapa.

<sup>4-5</sup> Ema Jesús majicapavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiana. Nímipaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacaipavare ena náepenaqueaneanaini. Énerichuvare níchuhahi ena páureana náeneuchavaya apaesa náuchucuha. Tásiha, eyana emetaca ema Juan tamutu. <sup>6</sup> Vaipa macueñamava ema Juan eta nuyehe. Tétavicavahi eta máuricacarevahi éma, te ticasiñavahi eta nuyehe —máichavacapa.

<sup>7</sup> Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacaghini éma, te eyanapa te mávapahi apaquehe te mávihahi, ¿tájaha eta epanereruana tayehe eta macametarairuirahi? Éti ímijachaipapuca mamapachichijiriruvaichucha eta máechajisirahi tacutihí te vímararaca ta taflurena eta acutena te tacayamuririjica eta técticava. <sup>8</sup> Ímijachaipavarepuca tavayuaruhi éma tiúrinanácavayarehi eta macamuirihairahi. Écharichuhi éti mácani tiúrinanacavahi, píncanillahi eta máitaresira, váiparinehi tiúchucaimahi te sache, váhivare tiyanaimahi te mávapahiana apaquehe. Manasiqueneyarehi te jácani tiúrina peti. <sup>9</sup> Nuyaserecahe: ¿Tájaha eta ímijachirahi eta mayehe? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana. <sup>10</sup> Ema maca Juan émara máechajisiquenehi ema Viya eta te Sagrada Escritura, ánipa macahehi: “Nuvane-cayare ema títapumirauchaviyarepahi ema ticametarairuyarepahi, apaesa natsecavapaipa ena achaneana eta najacampiraviyare” tacahepa eta Sagrada Escritura. <sup>11</sup> Núti nutupiruva numetacahe: Ema maca Juan, nájina mácuti nayehe ena achaneana. Tétavicavahi eta macunachacarevahi. Tiápajupanavahisera eta nacunachacarevahi nácani nuchaneranaya, apaesachichapucaini eta nacaicutiarairahi eta mapanereruana ema Tata.

<sup>12</sup> Ema Juan tépanavapa eta máimitusirahi ena achaneana tacamunuirahi eta náeneuchirava me Viya. Nararihiserá ena vahi náuricaghini nasamararachini. Éta pa tímicitichahi témecatájivachahi éma. Puíticha tanasihí ticatichanuana núti apanava, témecatájivachanuanyare. <sup>13</sup> Ema víyarahaini Moisés téchajisihanuhi eta te májurehi. Énaripa ena víyarahaini profetana náechajisihahi eta nítésirayarehi nuti Manerejirunuhi ema Viya. <sup>14</sup> Puiti numetacahe: Ema Juan émaripahi ema profeta máiteruyarehi mavasiyarehi ema víyarahaini Elías, eta máinapumirauchiranuyare. <sup>15</sup> Te evarhapuca ecaicutiara, tavaraha eta epanerechinavaya.

<sup>16-17</sup> Etiarihiserá eti achaneana puiti juca sácheana, eta emasuapajiraivahi, nímicutichahesa ena amaperuana tiútseruanahi. Apapipijichucha eta nacayemaqueneanapahi. Ema apana macahepauca: “Vépiyacaya eta piéstachicha”. Énaserá ena apamuriana vahi náisapavahini. Tásiha, ema apana macahepuca: “Vépiyacaya eta ecarí”. Váhivaresera náisapavahini. <sup>18</sup> Ema Juan, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihiserá te emuri ena tépiyaequenehanahi éma. Náimijachahi mávaháruhi ema éreana. <sup>19</sup> Nuti Manerejirunuhi ema Viya, eta nítécapauchirahepa, nucachanehepaipa eti achaneana eta enisirahi. Etiarihivare eti épiyaequenehanuhi: “Ímaha ema maca, cánisiuquitataji, cávahárasí. Macachanevacapaipa ena achaneana tisipecaturarahianahi” ecahehi. Eti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihihini échemarahi, ímatinuhini eta nucavannahi eta me Tata —máichapa ema Jesús.

*Eta táicuñayare eta návasana ena achaneana masuapajirairahana (Lc 10.13-15)*

<sup>20</sup> Ema Jesús tépanavapa máechajisihá eta táicuñayarehi eta avasareana máichinehi eta tiáramicareana. Tícaicuñanayarehi ena tachichanaveanahi



táichavenehi eta namasuapajiraivahi. Váhivare náeneuchavahini, náinajicahipucaini eta napecaturana. Máechajicapa ena achaneana tímicutijiricavahi natiarihinahini te mamirahu. Ánipa macahe:

<sup>21</sup> —¡Páurehesami eti nujaneanana ecavasanahi te avasare Corazín! ¡Páurehesamihivare eti apamuriana nujaneanana ecavasanahivare te avasare Betsaida! Ichape eta ícuñayare taicha éti ímaharipa tamutu eta tiáramicareana níchaqueneanahi te emirahu, váhisera ávarahahini éneuchavahíni. Ena nani achaneana ticavasanahi te Siria, apavasananahinéni, tétavicavahinéni eta namaurivahi, németeacaserá núti nasapihahipucaini téneuchavana te náimahahini eta níchaqueneanapahi. Enévanenahíni náimerecavahini yátupi eta náeneuchiravainahini. <sup>22</sup> Numetacahevanesera: Te jena sácheyare, muracapanayare eta ícuñayare éti, taicha eta emavarairahi éneuchavahini. Tacachuricayare eta nacaicuíñairaya ena achaneana apavasanana ticavasanahi te Siria. <sup>23</sup> Étiripa eti ecavasanahi te avasare Capernaum, tamapurujihí eta nímitusirahehí étapa eta ímairahi eta tiáramicareana níchaqueneana. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahi éneuchavaimahi éti. Taicha te nímerecahíni eta tiáramicareana tayehe eta avasaréni váinarajiquenehi Sodoma, tácutihíni eta ímairahi éti, ichapehipucaini eta náeneuchiravainahini, váipapuca macuicuíñacahíni ema Viya. <sup>24</sup> Numetacahevanesera: Ichape eta ícuñayare te táitecapapa eta juícioyare. Tacachuricayare eta náicuíñayare ena ticavasanaini te avasare Sodoma —macahepa ema Jesús.

*Ena Jesús tíurisamuréinehi mayehe ema Maiya  
(Lc 10.21-22)*

<sup>25</sup> Étarichuhi te jena hórahi, ema Jesús ánipa macahe:

—Tata Nucaiyaquene, tétavicava eta nucunachiravi. Jéhevare píti táquenuvihu eta anuma étapa te juca apaquehe. Títauchavaipa eta pipanereruhi. Vahi písapahíni náitucahíni eta júcana ena tímijachavanahi téchemarahiana. Énapasera píjaracahi ena nani téhicanuanahi, tájinahinéni náechemaraivainahíni. Puiti nasapiharipahi nacachuricahi ena títipajijiacavanahi. <sup>26</sup> Tétavicavahi eta táurivahi eta pipanereruhi píti, Tata Nucaiyaquene.

*Ena Jesús máichuhavaca ena navitajiruana, mavaraha macanaracavaca*

<sup>27</sup> Tacahe, ema Jesús máichavacapa ena achaneana:

—Ena Tata Nucaiyaquene, ema tíjaracanuhi eta nútiraya néchaya tamutu. Nájina énajivainahíni náimatihíni ema Tata. Nucarichu núti néchinavahi ena nímatiruanayare éma. Taicha núti yátupihíni eta nímatirahi ema Tata Nucaiyaquene; tacutiquenehi eta yátupirahivare eta máimatiranuhi éma.

<sup>28</sup> Yare, ecasiñanu emutu eti evitajiruanahi te iáchanevana eti éyarecarahiana eta éjecapiravana. Núti nuncanaracaheyare. <sup>29</sup> Ísapava nunacasicahé eta nuyehe yugo. Nucachanehe apaesa ecaravahu nuyehe, taicha núti mánsunu, tétavicava eta núriva eta nusamure. Éti tétavicavaya eta iúricacarevaya te iáchanevana te ejacapa eta nímiturapiana. <sup>30</sup> Taicha eta nuyehe yugo vahi tácajera. Tipevejiyare esama —máichavacapa ema Jesús.

## 12

*Ena fariséoana náimipicauchahi eta nayeherépiana tayehe eta sávarumuhuana. Émasera ema Jesús máimereuchahi émarichu téchahi eta nayeherépiana ena achaneana eta sache nanarasirayare.*

*(Mr 2.23-28; Lc 6.1-5)*

<sup>1</sup> Eta jena sávaru, ema Jesús tiyanapa tipaica. Tiámahavipa viti máimitureana. Témechavanapa ena fariséoana. Vétavivijicapaipahi eta isanitia. Tac-ahe, eta vipaisirapahi, véchapaipa viti máimitureana. Tásiha, vivechuquiha-paipahi étajavapahi eta trigo. Vivepiraquihapaipa, vépurajacachavapaipahi. Vinicapaipa, taicha tísapacareichucha. <sup>2</sup> Énasera ena fariséoana eta náimarara-sirapahi, tistemamajuheanapa. Ánipa naicha ema Jesús:

—Pímaha ena pímitureana. Ticaemataneanapaichucha eta navepiraquihapahi eta trigo puiti juca sache tétavicavahi eta tacapicahuirahi. Vahi tísapacaremahi eta juca nacaematanérahahi puiti —náichapa.

<sup>3</sup> Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyarahaini David eta mapaisirapahi téchapaipa, énerichuva ena téhicanapahi. <sup>4</sup> Écharichuhi éti te masiapapa eta mapena ema Viya, tiyaseserecapa eta manicayarehi. Nájaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi. <sup>5</sup> Váhipuca échajicuha éti eta te Sagrada Escritura eta mavanairipi ema víyarahaini Moisés eta nayehe ena tiyujaracarahiana téchapajiricanahi eta Templo. Éna, tájina natapiravainahini eta nacaematanerahi te sávarumuhuana. <sup>6</sup> Tavetijichapuca puiti nutiarhipahi núti. Ichápequenénupánahi tayehe eta Templo. <sup>7</sup> Éti váhivare ecaicutiara eta juca máechajiriruvana ema Viya: “Núti nuvaraha yátupinaini eta eJapanuraivainaini. Taicha te vahi, tamapurujiyare eta ecamavahuirahi eta nuyehe” macahepa. Te ecaicutiarahini, váhiyarehini ecaecahivaca ena nímitureana, taicha éna tájina natapiravainapahi. <sup>8</sup> Tiuri puiti, numetacaheyare: Núti Manerejirunuhi ema Viya, nútrichu néchahi eta sache nanarasiraya ena achaneana —máichapa.

*Ena Jesús macanaraca ema achane tépenavahu*

*(Mr 3.1-6; Lc 6.6-11)*

<sup>9</sup> Te apanavarepa sávaru, tiyanavare ema Jesús tisiapahi tayehe eta náuruji-sirareva. <sup>10</sup> Ánaqui matiarihi ema achane vaipa tayamuricahini eta mavahu, tépenavahuipa. Natiarihihivare ena fariséoana, natanujiricahi eta ticaviurevayarehi ema Jesús. Nayaserecapa éma:

—¿Táuricapuca vicanaracavaca ena nacajumaqueneana te sávarumuhuana tacapicahuquenehi? —náichapa.

<sup>11</sup> Ema Jesús majicapavacapa:

—Nímicutichinahe puiti. Németeaca májina émanaina achane vahi macujapanuhini eta máitatiquene uvesa, te téchapaicavapuca te pusu te jena sache tacapicahuquenehi. Éta máeñamirahi, tipatsicava mavecucha eta paure sárare. <sup>12</sup> Núti numetacahe: Ema maca achane tiápajucavahi eta téñamacare tayehe eta uvesa. Tacahe, tísapacaréchucha víchayare eta táuriqueneana te sávarumuhuana —máichavacapa.

<sup>13</sup> Tásiha, ema Jesús máichuhapa ema achane ticajumavahuhi:

—Nímaha. Picajaruvauchava, pímera eta pivahu —máichapa.



Tacahe, ema achane eta macajaruvauchiravahi, enevanerinehi tinaraca eta mavahu. Tiúrivarepa tichava, tacutipa eta mavahu sapa. <sup>14</sup> Tisemanarinehi ena fariséoana eta náimairahi eta máichaquenehi ema Jesús. Tiyananapa. Tinacuchavanapa eta napanerechirahi eta nacapasirayarehi ema Jesús.

*Ema Jesús tiyanavarepa tipaica*

<sup>15</sup> Tacahe, ema Jesús, te máechapa eta napanereruhi ena fariséoana, navarairahi nacapaca, tiyanavarepa tipaica. Náehicapa ena camuriqueneana achaneana. Énerichuvare, náitecapauchapaipa ena nacajumaqueneana. Macanaracavacapaipa namutu. <sup>16</sup> Mavanecapaipasera ena macanararuanapahi vahi nacumetajirica eta émairahi ticanaraca. <sup>17</sup> Eta juca títauchavapahi eta máechajiriruvahi ema Viya tayehe eta májurehi ema víyarahaini profetaini Isaías. <sup>18</sup> Ánipa tacahehi: “Nuvaraha ímatiya ema vanairucahi nuyehe, nunerejiruhi nútí. Tétavicavahi eta némunasirahi, núrísamurehivare máicha. Ímatiyare éma taicha mávaháruhi ema Espíritu Santo máijararuhi éma. Ema nuvanara, tímitucavacayare ena achaneana te tamutu avasareana eta nuvanairipianahi. <sup>19</sup> Éma, tájina máitucaimahi téhacaca. Váhivare tipiararecaimahi, macunachiravahi te cálleana tayehe eta máichaqueneanahi. <sup>20</sup> Mánsuhi éma taicha ticayehehi paciencia. Macamichavacahi namutu. Váhivare macajachaimahi nácani vahi túmeanaina. Tiámainucava te máejacapa tayehe eta mávacureyare, muracainapa eta mávacureyare. <sup>21</sup> Tásihasera, namutu ena achaneana te avasareana ticunevanayare eta mayehe, navarairayare máurichayare éma” macahepa ema Viya.

*Ema fariséoana téjcapavanahi eta náimijachirahi ema Jesús mávaháruhi ema Váinaraji Satanás*

*(Mr 3.19-30; Lc 11.14-23; 12.10)*

<sup>22</sup> Tacahe, ena achaneana námapaipa ema achane púchuqui, úpavare, taicha mávaháruhi ema éreana. Navarahahi macanaraca ema Jesús. Jéhesarehisera ema Jesús macanaracahi. Tiúripa téchejica, tímairicavarepa. <sup>23</sup> Ichaperinehi nárami ena achaneana. Tásiha, ánipa nacahe:

—Ema maca Jesús, émapachupuca ema Cristo, ema vicuchapaquenehi mámariequene ema víyarahaini David —nacahepa.

<sup>24</sup> Énaserá ena fariséoana napanerechahi náepiyaequenehayarehi. Ánipa nacahe:

—Ema maca Jesús, eta macuchusiravacahi ena éreanana, vémeteaca máijararuhi eta máitupajjiasiravahi mayehe ema Satanás, ema náquenu-murihi ena éreanana —nacahepa.

<sup>25</sup> Ema Jesús máimatíhi eta napanereruhi éna. Tacahe, máichavacapa:

—Nímicutichinahe puiti ena machanerana ema gobierno. Éna vahi típutsimurihacacanaimahi apinainahipucaini partido. Te típutsimuriacacanapa, énajicacaipapucaini tíáquipaicacana. Énaripa ena achaneana te avasare, vahi táurica náiputsimuriavahini. Émaripa mácani achane, te camurianahi ena machichanaveana, váiparinehivare típutsimuriavanimahi náehajiricacahini, énajiricacahini náquipairicacahini. <sup>26</sup> Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tisimutuanayarehi éna, tímiyanavanayarehi eta nacaetema-jirisirahaviyarehi. <sup>27</sup> Éti ímijachaipa nútirichu machamuri ema Satanás, táichavenehi eta nuratahairahi nucuchucavaca ena éreanana. Tájina vahi étupicavahini éti eta juca epanereruana. Te émahipuca tímicatcanuhi ema

Satanás, énerichuhivare éti máimicataruanahivare jácani éma, eta ecuchusi-ravaca ena éreanana. Epanerechinávanuma. <sup>28</sup> Émaquenehisera ema Espíritu Santo, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare nécha tamutu. Nútiripara nuti ecuchapaquenehi.

<sup>29</sup> Nájina tisiapaimahi eta námerecahini te jácani peti matiarihíhi ema túmequenehi. Tacamunuhi nacaratacanumayare, náitiacanumayarehi éma. Jéhesare, náituruyechasareyarepa eta máimahaqueneana. Ene nucahehi nútí, túmepananuhi mayehe ema maca Satanás.

<sup>30</sup> Te vahi éhicanu, ecaemataneasiranuya, machamurihehi éti ema ticatianacanuhi. Masapiha ímicatacahi éma eta macaetemajirisiranuhi.

<sup>31-32</sup> Nutupiruva numetacahe: Eperdonachacareana eti achaneana eta epecaturana, tamutu jácani échajisihaira eta táíñemahiqueneana. Jácani te ecaecahinuhipuca nuti Manerejirunuhi ema Viya. Jararihiserá eta epecatura vahi tiperdonachacaremahi. Éti ímijachahi ema Satanás ema tiávahácanuhi. Ichape eta éjecapiravahi, taicha ema tiávahácanuhi nútí, émaquenehi ema Espíritu Santo. Éti epanararacaripa éma. Tásiha, tájina eperdonachacareimahi puiti juca ítaresiraichaha, evetijipa te apana ítaresira —máichavacapa.

*Éma Jesús máimicuticha eta táhi eta yucuqui  
(Lc 6.43-45)*

<sup>33</sup> Tímaticare eta yucuqui te tiúrinisíhi eta tacahira. Tímaticarehivare eta apana yucuqui, máuriraha eta tacahira. ¡Epanerecha! Nútí níchahi eta táuriqueneana nayehe ena achaneana ticatajivanahi. Éta tímereuchanuhi eta mávahásiranuhi ema Espíritu Santo. Téhesera nucaetemarecahini, níchahini eta máematanerepiana ema Váinaraji, jéhevareserapucaini eta tímereuchanuhini eta mávahásiranuinhahini éma. <sup>34</sup> ¡Étiserá machichanaveanatataji ema Váinaraji! Váiparinehi ítucaimahi échajisíha eta táurinaqueneana, taicha éti tamaverasiavahi eta evainarajivana. Eta échajiriruvanahi ticaecherahi eta evainarajiva te esamureana. <sup>35</sup> Nácani tiúriana achaneana, tatupiruvahi eta náechajirisirava taicha tiúrihi eta nasamure. Nácániserá achaneana váinarajiana, vahi tiúrimahi eta náechajirisirava. Tíñemahípivacahi taicha tavayuchahi eta tavainarajiva eta nasamure. <sup>36</sup> Nutupiruva numetacahe: Te táitecapapa eta sache táitecapirayare eta júicio, emutu ecayaserehiyare eta échajisihairana eta tamaeperajiqueneana. <sup>37</sup> Étaripa eta tiviuchaheyare. Téhesera tiúrihipuca eta échajisihairahi, vahi ecaicuñaimahi. Tájina tiviucha-hémahi —máichavacapa.

*Éma Jesús macajachavaca ena fariséoana taicha eta namasuapajiraivahi  
(Mr 8.12; Lc 11.29-32)*

<sup>38</sup> Tacahe, nayaseacapa ema Jesús ena fariséoana énapa ena escribánoana. Ánipa náicha:

—Tata maestro, vivaraha picuchucaini eta tiáramicare, te yátupipuca mavaneruvíhi ema Viya —náichapa.

<sup>39</sup> Éma Jesús majicapavacapa:

—¡Eti achaneana váinarajiqueneana! Nútí nímatihe. Vahi esuapanuimahi, te nímerecapucaini eta tiáramicare. Tásiha, váhinéni étina tatuparaca ímahahini eta tiáramicareana. Ímahayaresera eta tiáramicare tacutiyare eta máichavaquenevahi ema víyahaini profetaini Jonás. <sup>40</sup> Taicha ema Jonás masiapajuechahi eta ichapequene jima, mapana sache eta mayerevahi, mapanavare

yati. Ene nucaheyare, núti Manerejirunuhi ema Viya, mapanayare sache, mapanavare yati, eta nucaheyare eta nucaecarasirayare. <sup>41</sup> Eta jena sácheyare téchepucanayare namutu, tiúchucuhanayare ena achaneana ticavasanáinihi acane te Nínive. Tisipecaturarahianahinéni éna. Natupiruvahisera nasuapa eta mametarairu ema Jonás. Téneuchavanavanehi. Tásiha, te jena sácheyare, nacahenapa eyehe éti: “Táuricapa nacaicuñaini ena nani maparajuruana ema Cristo, táichavenehi eta namasuapirahi éma. Taicha éma, máuriquenepanahi mayehe ema Jonás” nacahénapa. <sup>42</sup> Tacutiquene esu reina Seba eta acane, te susamairiricapa eta máitupajijiasiravahi yátupi ema Salomón. Ésu, tayérehiquenehinéni eta suávasa, tiyanahisera sucapayaca ema Salomón taicha suvarahahi susamayarehi éma. Tacahe te téchepucanapa namutu, ésu suyaseacainapa eta ecaicuña éti máetupicushmanahi puiti. Sucahenapapuca: “Táuricapa nacaicuñahini ena nani máetupicushmana, tájina náetseraruina nasamaripa ema Cristo, ema titupajijiápanavahi mayehe ema Salomón, tásiha vuíchahacaruva nasuapa” sucahénapapuca jácani.

*Éma Jesús máimicutichinahi ena masuapajirairahana mayehe  
(Lc 11.24-26)*

<sup>43</sup> Tímiyanava eta máechajisiravahi ema Jesús, ánipa macahe: —Énerichuvare éti ecuti mácani achane máinajiruhi ema émana éreana. Éma éreana tiyana matanucainapa eta jácani masiapihayarehi. Éta mamaichimavira eta mavarahaquene, mapanerechayarehi tichava. <sup>44</sup> Macahénapapuca: “Nuyanayare nuchava, nusiapayareva mayehe ema návaháruinihi”. Te títecapapa ema éreana mayehe ema achane mávaháruinihi, máimahapa ema achane máinajicaripa eta mapecaturana, vuíchahasera máehicahini ema Viya. <sup>45</sup> Tásiha, tíurisamurepa ema éreana. Tásiha, tíchuarecapa ena siétequeneana machamuriana. Váinarajipanana éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane. Ene ecaheyare éti, taicha eta emasuapiranuhi —máichavacapa ema Jesús.

*Suítecapauchapa esu maena ema Jesús énapa ena maparapenaveana  
(Mr 3.31-35; Lc 8.19-21)*

<sup>46</sup> Tímiturecarichaha ema Jesús nayehe ena achaneana, títecapanecha esu maena énapa ena maparapenaveana. Nanasihisera te aneca. Navarahahi náechajicayarehi éma. <sup>47</sup> Natiarihini ena timetapananahi ema Jesús. Ánipa nacahe:

—Esu pémunaruquenehi pena énapa ena piparapenaveana, nararihi ani te aneca. Navarahahi téchajicaviana —náichapa.

<sup>48</sup> Émasera majicapapa:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi.

<sup>49</sup> Tásiha, tisuvechahavipa viti mayeheana apóstoleana. Tásiha, macahepa:

—Numetacahe, ena nani ena némunaruanahivare. <sup>50</sup> Taicha namutu nácani ticaemataneacanahi me Tata tiávihihi te anuma, énahi ena némunaruanahivare —máichavacapa.

## 13

*Éma Jesús máimicutichinavaca ena achaneana eta evaraqui tacaevaquenehi te  
apanapanenejiquene máteji  
(Mr 4.1-9; Lc 8.4-8)*

<sup>1</sup> Te jena sache, tiyanavarepa ema Jesús, macaijuhe te tachausi eta cáquiure. Téjacavarepa eta ánaqui eta máimituresirayarehi. <sup>2</sup> Tásiha, camuri- napahivare ena achaneana títecapauchanahi éma. Eta navayuchiraripa ena achaneana, tiyanapa ema Jesús tiávacuhapa tayehe eta pacure. Ena achaneana nanasipa te tachausi tiájipahi. <sup>3</sup> Tásiha, camurihi eta máimicuti- chaqueneanahi eta máimitusiravacahi. Ánipa macahe:

—Matiarahi ema émana achane. Tévpapanahi te máesane. <sup>4</sup> Eta mapaisirapahi, témiricapaipa eta evaraqui te achene. Táimahapa eta cáyure, tanicapa. <sup>5</sup> Eta mayeherepi éma eta máevasira, máevajajapaica eta apaquehe. Tásiha, eta apa- muri evaraqui témiricapa te váhirichu tamitutihini eta máteji taicha márípahi eta apaquehe. Tímarucavanepaneni táicha. <sup>6</sup> Téhesera te tíjurepa eta sache, tacapajicapa; taicha váhirichu táuparevacahíni. <sup>7</sup> Tacahe, eta apana evaraqui témiricapaipa te tataracu eta itapepaire. Tiúrinahinéni eta táimarusirahi, étasera eta itape tacachuricapa eta tajurusirahi. Táemuriachapa eta sucureca. <sup>8</sup> Tacahe, eta apamuri evaraqui témiricapaipa te tiúrina máteji. Tiúrinapanahi eta tajurusira. Eta étana, ticahipa tétupicavapanapa. Eta apanavare, ticahipa ánimuríchu. Eta apanavare, ticahivare apaesasajiruichu. <sup>9</sup> Esamararacanu emutu éti. Te evarahapuca ecaicutiara, tavaraha eta epanerechinavayare.

*Ema Jesús máitametacaquenevacapa ena apóstoleana eta juca máimiturapihi  
(Mr 4.10-20; Lc 8.9-15)*

<sup>10</sup> Tacahe, viti mayeheana apostóleana vémeñahavapa eta mayehe ema Jesús. Viyaserecapa tájahapuca tacayemahi eta máimicutiarachirava- caichucha eta máimitusiravacahi ena achaneana.

<sup>11</sup> Tásiha, ema Jesús tijicapahavipa:

—Ema Tata tituparacanuhi nítametacaheyare éti eta juca táequenereruana mapanereruana. Mavaraha ímatiequenehaya éti. Énasera ena apamuriana achaneana vahi nítametacavacaimahi, náimainavainepa éna. <sup>12</sup> Éti, te es- uapa yátupihí eta nímiturapiana, ema Espíritu Santo tímitucaheya tamutu eta tacayemaqueneanahi. Énasera nácani vahi návarahahini nasuapa, énjí- vayare tíchavana ticaverejicasianaya eta nasamaqueneanahi. <sup>13</sup> Eta taca- hehi eta nímitusiravacahí, nímicutiarachinavacaichucha. Te apaesarichu eta navarairahi náituca, vahi nacaicutiarahini eta juca nímechaqueneanahi. Nasamahi eta néchajiriruvana, váhisera nacaicutiarahini eta nímitusirahi. <sup>14</sup> Puiti ena nani achaneana nacuti ena achaneana acane, vahi nasuapahini ema víyarahaini profeta Isaías. Ánipa macahe: “Nímatihe éti. Esamayare- nénipuca, váhisera ecaicutiaraimahi. Ímahayarehinénipuca, váhivaresera ímatiequenehaimahi. <sup>15</sup> Taicha eta esamureana eti achaneana, tétavicavahi eta tamuracava. Vahi evaraha esama. Épiyacavahivare púchuquihe, emava- rairahi esuapahini te esamureana. Tájinapa táichahíni vicuchapahini eta éneuchiravainahíni, evarairapucaini ecasiñavahini me Viya, apaesa macana- racahehíni” macahepa ema víyarahaini Isaías.

<sup>16</sup> Étisera eti nímitureana, tétavicavahi eta iúricacarevahi, taicha esuapahi eta juca ímahaqueneanahi étapa eta esamaqueneanahi. <sup>17</sup> Nutupiruva numetac- ahe: Acane ichapemuriana ena achaneana tiúriana énapa ena víyarahaini profetana, tétavicavahi eta navarairahi tímatinuana, náimahavare eta juca níchaqueneanahi ímahaqueneanahi. Navarahavarepa nasama eta nímiture- sirahi. Váipasera nacapayacahini.

<sup>18</sup> Ácaicutiaraicha eta juca nímicutiarachaquenehi mayehe ema tévacarahi. <sup>19</sup> Núti níchuhavaca ena achaneana, machaneranayare ema Viya ena téhicanuanayare. Tásiha, natiarihi ena achaneana nasamaripahinéni eta nímiturapianahi, émasera ema Váinaraji vahi máisapahini tánasihini te nasamureana. Enevanehi macamitisicavaca eta náimitucasivanainihi. Éna nacutihi eta máteji muracapahiquenehi te achene. <sup>20</sup> Natiarihivare ena apamuriana achaneana, nacutihi eta máteji máripahi. Te nasamararaca eta nímiturapiana, natupiruvanehi nasuapa, tiúrisamureanainehi. <sup>21</sup> Váhisera náratahahini nacaravahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahíni te tatiarihipa eta jácani nacatichaira ena achaneana táichavenehi eta náehisiranuhi. <sup>22</sup> Natiarihivare ena apamuriana achaneana nacuti eta máteji te távihahi eta itapequijiana. Énerichuvare nasamararacahinéni eta nímiturapiana. Napaneréquenehahinéni, tahapapiricavacahisera eta jácani táichararacavayarehi eta náitaresira. Tavayuacavacavare eta tájiparacana, étapa eta navarairahi tirricochavana. Tamutu eta juca táemetavícahi eta navarairahi téhicanuana. Tamapurujiyarehi eta najacapirahi eta nímiturapiana. <sup>23</sup> Natiarihisera ena apamuriana achaneana nacutihi eta tiúrina máteji. Éna, tisamanuanahi. Náunacahi yátupi eta nímiturapiana, náimatiequenehairahi. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararihivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya —macahepa ema Jesús.

*Éma Jesús máimicutiarachina eta sucureca trigo étapa eta ejare*

<sup>24</sup> Éma Jesús máimicutiarachavare ena achaneana eta máimitusiravacahi: —Puiti nuvaraha nímitucahe tatiarihiyare eta sáchezare te táitecapapa eta nacayeserehiraya me Viya ena achaneana. Tacutihi eta máichavaqueneva mácani achane tévacarahi eta tiúrina evaraqui tayehe eta tiúrina máteji. <sup>25</sup> Étasera te tímacapa ema ticayehe eta sucureca, macahepaipa ema macatianaru. Máimisiriqichinapa eta táíñemahiqueneana ejare. Tásiha, tiyanapa. <sup>26</sup> Tacahe, te tímarucainipa eta evaraqui trigo, tiúchucavarepa eta ejare, tacachanepaipa eta evaraqui. <sup>27</sup> Náraminehi ena machaneranahi ema achane tévacarahi. Tiyananapa nametapana ema náejaháruhi. Ánipa náicha: “Tata, eta jena pévaraquihi, tájina tacasiriquihini eta táíñemahiqueneana ejare. Puítisera tiúchucapa tacachanepaipahi eta pévaraquihi” náichapa. <sup>28</sup> Éma náejaháruhi majicapapa: “Matiarihi mácani ticatianacanuhi. Éma tíchahi eta juca, tímisi-riqichinanuhi”. Tásiha, ema machanerana náichapa: “¿Pivarahapuca, tata, viyana víti vivepuraha eta jena ejareana?” <sup>29</sup> Éma majicapapa: “Vahi tiúririne, taicha machu táimivepurica eta névaraqui trigo. <sup>30</sup> Tácuticacarichaha eta tajurusirayare. Tiámainucava te tacaechatijipa, nuvanecahénapa éti nuchanerana tativayare evepurica eta ejarejiana, ítijicainapa eta tacaijuirayare. Tásiha, evehainasarepa eta trigo, ticaunainapa te tacaunairare”.

*Éma Jesús máimicuticha eta taqui eta mostaza  
(Mr 4.30-32; Lc 13.18-19)*

<sup>31-32</sup> Éma Jesús máimicutiarachavare eta taqui eta mostaza eta máimiture-sirahi. Ánipa macahe:

—Puiti nuvaraha nímitucaheya eta apana tayehe eta evaraqui ánichichaquene, étasera te tijurucapa, tíñejiyarehi. Tacaheyare eta tajurusirayare



eta nímiturapiana nayehe nácani tijacapanayare. Ímaticuhi éti eta taqui eta mostaza, eta ánichichapanahi tayehe eta apamuriana evaraquiána. Tásihasera te tímarucapa, tiúnayarehi eta táenaqui, tacutiyahehi eta yucuqui eta táichapeva. Tacachuricayarehi eta apamuriana evaraquiána. Járajapainapa eta cáyureana. Táepiyacainapa eta tamacajiana te tatavavajiana. Ene tacahe-ya-re eta tajurusirayare eta nímiturapiana núti Manerejirunuhi ema Viya.

*Éma Jesús máimicuticha eta levadura  
(Lc 13.20-21)*

<sup>33</sup> Énerichuvare máimicutichina eta juca apana máimituresirahi. Ánipa macahe:

—Tacuti-quene, eta juca nímiturapiana tímicitijiricavahi eta levadura. Esu súcani esena tíurihi eta tasisijisira eta suyehe levadura te tamutu eta suépiyaruhi masa, tayanapane apinapucaini arroba eta suyehe jarina, tasiha-jicahisera. Jéhesare, tiápucayarehi tiuri.

*Camuri eta máimicutichaqueneana  
(Mr 4.33-34)*

<sup>34</sup> Éma Jesús tamutu máimicutiarachinapahi eta máimituresirahi. Tájina étahena te tímitureca, vahi macunacahini eta máimicutichinaqueneana.

<sup>35</sup> Títauchavahi eta juca máechajiriruvanahi ema émana profeta. Ani maca-hehi: “Tamutu eta nímiturapianayare nímicutichinayarepahi. Nímicaecherachainapa eta táeñaurevaquenehi te tépanavainapa máepiyacainapa ema Viya eta apaquehe” macahepa.

*Éma Jesús máimicaecherachapa eta máimicutichaqueneanahi tayehe eta trigo étapa eta ejare*

<sup>36</sup> Tacahe, ema Jesús mavanecavacapa ena achaneana nayanapa te napenana. Éma apanava tiyanavarepa tichava te mapena, vítipa viti mayeaneanahi apóstoleana. Tacahe, te véjacapa vimutu, viyaserecapa máimicaecherachahini eta máimiturapihi máimicutichaquenehi eta ejare tacachanequenehi eta trigo. <sup>37</sup> Tacahe, ema Jesús máichahavipa:

—Nuti Manerejirunuhi ema Viya nucutihi ema achane tévacahi eta tíurina evaraqui. <sup>38</sup> Eta apaquehe tacaevaiyahi eta trigo, énahi ena achaneana te juca apaquehe. Eta tíurina evaraqui, étihi eti nuchaneranahi núti. Tásiha, eta ejare énahi ena machaneranahi ema Váinaraji. <sup>39</sup> Taicha ema ticatiana-canuhi, manacahi eta ejare, mavarairahi máepacuchayarehi eta névaruhi núti. Eta tacachatijirapa eta trigo, étahi eta táitavirayare eta apaquehe. Nárajapayarepa ena ángeleana, ticurujiricanayarehi. <sup>40-42</sup> Tásiha, te jena sáche-yare, nuti Manerejirunuhi ema Viya nuvanecainapa ena nuyeheana ángeleana nacavehasi ena tíchanahi eta máeperajiqueneana énapa ena tímiaqui-paicana ena apamuriana achaneana. Tásiha, náquijicavacainapa eta te táijurequenehi yucu. Ticapitiquiahechavanainapa eta tacativayare nasama. Tíyahanainapa. <sup>43</sup> Tásiha, nácani títauchanahi eta mavanairipianahi ema Viya, téta-vicavayare eta najaraivayare tacutiya-re eta tajaraiva eta sache. Téjacainapa tayehe eta macatuparahaiyahi ema Vicaiyaquene. Te evarahapuca ecaicutiara, tavaraha eta epanerechinavaya.

*Éma Jesús máimicuticha eta entierro*

<sup>44</sup> Eta nímiturapiana nuti násihaquenehi te anuma tacuti eta tayumuru-revaquenehi entierro. Te máichimavahi mácani achane eta entierro, tíurisa-mureyarehi. Tásiha, máimichavayarehi mayumuruca tayehe eta apaquehe távihahi. Mavacharecayarepa eta apaquehe, mavarairayarehi eta entierro. Tayanapane táimijarecayarepa tamutu eta macayehequeneanainihi.

*Máimicutichavare eta perla tasivachaquenehi*

<sup>45</sup> Énerichuvare eta najacapirahi ena achaneana eta nímiturapiana nuti násihaquenehi te anuma tacuti eta macaematanerahi mácani achane comerciantepahi. Matanucapahi eta tasivachaqueneanahi perla. <sup>46</sup> Te máichimavapa eta perla matanurepahi, tétavicavahi eta tasivachavahi. Mavarahasera mavachareca eta perla, tayanapane táimijararecayarehi tamutu eta macayehequeneanainihi.

*Máimicutichavare eta ichape nayutahe*

<sup>47</sup> Énerichuvare nuvaraha nímitucahe tayehe eta sáchezare eta táitecapirayarehi eta ecuñaraqui. Tacutihi eta ichape nayutahe. Te náechipaecapa te cáquiure, tamutu tavehayarehi eta tasimutuqueneana jímana. <sup>48</sup> Te náimahapa tínica eta nayutahe, navehayarepa nachurupaicapa te tiájipahi tachausi. Nanerejicayarepa eta jímana tiúrinana. Nanacacuhayarepa te ichape maha. Tásiha, náquijicayarepa eta apamuri máurirahanahi. <sup>49</sup> Ene tacaheyare eta táitavirayare eta apaquehe. Nárajapayare ena ángeleana, nanerejicainapa ena achaneana tíchanahi eta tauriqueneanahi. <sup>50</sup> Náijuchainapa te yucu, táetaviuchahi eta táijureva. Ticapitiquiahechavanainapa eta tacativayare nasama. Tíyahanainapa —macahepa ema Jesús.

*Ema Jesús mayaserecavaca te nacaicutiarahipuca eta máimiturapianahi*

<sup>51</sup> Tacahe, ema Jesús tiyaserecavapaha. Ánipa macahe:  
—¿Ecaicutiarapuca éti tamutu eta juca nímiturapianahi? —máichahavipa.  
Tásiha, víti vijicapapa:  
—Vicaicutiara, tata —vicahepa.

<sup>52</sup> Tácahe, máichahavipa:  
—Eta yátupirapa eta ímatiequenehairapa eta nímiturapiana, éti apanavare máestrohénapa. Puiti nutuparacahe ímitucavacaya ena achaneana. Tétavicavaya eta ítamuturusirayare eta ímituresirayare eta mapanereruana ema Viya —máichapa.

*Tichavapa ema Jesús te mávasa Nazaret  
(Mr 6.1-6; Lc 4.16-30)*

<sup>53</sup> Te tamutupa eta máimicutichirahi ema Jesús eta juca máimiturapiana, viyanapa. <sup>54-57</sup> Vichavapa tayehe eta mávasa. Te sávarumuhuquenepa, viyanavarepa tayehe eta náurujisirareva eta nayujarauchirahi ena achaneana. Tímiturecapa ema Jesús. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—Témunahiricava eta máitupajijiasiravapahi ema maca. ¿Távihasica macaravahuinehi eta máichirayare eta tiáramicareana? Vivaraha vímaha víti apanava eta jácani máichaqueneanahiji visamairirivanahi. Taicha vímatihí ema maca. Carpintérohi éma. Vímativare ema máiyaini, ésupa esu maena María, énapa ena maparapenaveana ema Jacobo\*, ema José, ema Simón, émapa ema Judas. Vímativare ena esenana maparapenaveanahivare, ticavasanahi eta aní. ¿Távihasica máitusiavahi eta juca máitucaqueneanahicacha? —nacahepa.

Émasera máichavacapa:

\* **13:54-57** Ema maca achane, ticaijarehi Jacobo te náechajiriruva ena israelítana. Te véchajiriruva, ticaijarehi Santiago. Mapaenumavahi máehica ema Jesús te táequenepa eta máechepusirahi te máecari ema Viáquenu.



—Tatuparaca epicauchahaviya vimutu viti mavaneruana ema Viya. Étisera éti nujaneananahi ecavasanahi eta te juca viávasa, étipa eti nuparape-naveana, vahi epicauchanuimahi —máichavacapa.

<sup>58</sup> Tásiha, tájina máimerecachichaini eta tiáramicareana táichavenehi eta namasuapajiraivanahi, váhivare nacasiñavahini eta mayehe.

## 14

*Emá Herodes masamairicapa eta máichaqueneanahi ema Jesús  
(Mr 6.14-29; Lc 9.7-9)*

<sup>1</sup> Tacahe, ema Herodes ema aguenucahi tayehe eta Galilea masamairirica-varepa eta máichaqueneanahi ema Jesús. <sup>2</sup> Tacahe, ema Herodes máimijachahi ema tichavahi téchepuca ema Juan. Tásiha, máichavacapa ena máevanachanahi: —Ema mácara, émaripa ema Juan Tícachasiricarahi, ema nímicaparuhi. Tichavaripa téchepuca te máecari. Táitusiava máiturucahi macuchuca eta tiáramicareana —macahepa.

<sup>3-4</sup> Taicha ema Herodes mavehahi esu Herodías, esu machinenahi, mayenahi ema maparape Felipe. Máiminajicapa ema suima. Tacahe, ema Juan macajachavacaripa éna eta naviracacairahi. Éta tamicatichahi ema Juan, sucaticapa esu Herodías. Tásiha, ema Herodes máeratacapa te cárcel ema Juan, macavanaripipa náitiaca te cadena. <sup>5</sup> Taicha supamicahi ésu eta máimicapasirayarehi. Tipicahisera éma nasemahini ena achaneana. Taicha ema Juan, tétavicavahi eta náemunasirahi ena achaneana. Náimatihí éma, eta vanairucairahi me Viya.

<sup>6</sup> Tásihasera, títecapapa eta sache máijaremuhu ema Herodes, sutiarihíhi esu amaperu, suchicha esu Herodías. Tiúchucapa tírimaica te mamirahu ema Herodes, énapa ena machimaranahi. Ema Herodes máuricainehi ichape.

<sup>7</sup> Tacahe, máichapa ésu:

—Nujuracha te pimirahu, eta níjarasiraviya jácani piyasearunuyare — máichapa.

<sup>8</sup> Tásiha, esu amaperu suyaserecapa esu suena tájahahipuca eta suyasearuyarehi. Esu suena suímitucapa: Piyaseacayare aní píchaya: “Píjaracanu eta ñichuti eñi Juan te curuja” píchayare.

<sup>9</sup> Tásiha, eta masamirahi eta juca suyasearuhi, ema rey Herodes ichaperinehi eta mapanereresirahi. Tájinapasera máicharachavahini taicha máechajiriruvaipahi majurachaipahi te namirahu ena machimaranahi eta máijarasirayare eta suyasearuyarehi ésu.

<sup>10</sup> Tacahe, macavanairipipa nayuchatipiquenuhapana ema Juan. <sup>11</sup> Tacahe, námapaipa te curuja eta machutini, nájaracapa esu amaperu. Tásiha, ésu sujacapapa, suíjaracapa esu suena.

<sup>12</sup> Títecapananecha ena máimitureanahi ema Juan. Navehapa eta máquehe, náecarapanapa. Tásiha, tiyananapa nametapanahi ema Jesús.

*Emá Jesús máitaparavaca máenicavaca ena camuriqueneana achaneana  
(Mr 6.30-44; Lc 9.10-17; Jn 6.1-14)*

<sup>13</sup> Te masamairicapa ema Jesús eta nacapasirahi ema Juan, viyanapa viávacuhapa tayehe eta pacure. Vicaijuhepa tayehe eta apaquehe mávapahi. Énase ena achaneana náecharichucha eta viyanirahi. Tiyananapa náehicahi tipaicapanahi. <sup>14</sup> Te tiúcupaicapa ema Jesús tayehe eta pacure, máimahapa ena camuriqueneana achaneana. Majapanuvacarinehi eta máimairavacahi. Macanaracavacapa ena nacajumaqueneanahi námaqueneanapanahi. <sup>15</sup> Tacahe, viti mayeheana apóstoleana vímahapa eta cáperehíchicharinehi.

Vimetacapa éma máevatomuríhahini ena achaneana natiarihiqueneanahi. Víchapa éma:

—Cáperehipa jena sache. Tiyerehivacahi eta pétiana. Táuricapa pivane-cavaca ena achaneana nayanapa, navachareca eta nanica; taicha ani tájina naviyavaimahi eta te juca —víchapa.

<sup>16</sup> Ema Jesús tijicapahavipa:

—Vahi nuvaraha nuvaneca nayana. Tájina naviyava eta nácaijuhahini. Íjaraca étina eta nanica.

<sup>17</sup> Tásiha, viti víchapa:

—Tájina vácayehe eta tinicacare. Jucarihisera cincochichahi eta pan, apina eta jima.

<sup>18</sup> Ema Jesús máichahavipa:

—Íama ani.

<sup>19</sup> Tacahe, macavanairipipa náejahahapaica ena achaneana te táinahu eta muíjipahi. Mavehapa eta cincoquene pan étapa eta apina jima. Máesenicapa eta anuma. Mahasulupayachapa ema Viya. Mayuvetucavacapa eta pan, tásiha, tíjaracahavipa víti. Víti víjaracavacapa ena achaneana. <sup>20</sup> Vinicapa vimutu, visatuhevacapa. Tásiha, vicaemacharichahavare doce saye ichapehiana táinicachaichahava eta vémacharajiana.

<sup>21</sup> Ena tinicanahi eta juca, cinco mil ena ajairana eta náichapemurívahi, énerichuvare ena esenana énapa ena amaperuana.

*Ema Jesús mapaicaeca eta une  
(Mr 6.45-52; Jn 6.16-21)*

<sup>22</sup> Tiuri, ema Jesús tivanecahavipa viti mayeheana apóstoleana viávacu-hayare eta te pacure. Vínapucayarehi viánueca te apachara eta cáquiure. Émasera manasiyarehi máevatomuríhanumayarehi ena achaneana nachava te napenana. <sup>23</sup> Te tamutupa eta macametavairahi ema Jesús nayehe ena achaneana, tiyanapa tiápanahi tayehe eta cerro. Tiyujaracayarehi tayehe. Étapa tavinehi eta yati, manasipa macarichuhi eta te cerro. <sup>24</sup> Tacahe, víti te túpierecahaviripahi, tichimaracahavipa eta muraca técatícava, viácapaqui-hapaipahi. <sup>25</sup> Te tijarahichichapa, vímahapa ema Jesús mapaicaecapahi eta une eta macapayasirahaviya. <sup>26</sup> Eta vímairahi éma, vipicarinehi. Vímiyachapa cunare. Vipiararecapa eta vipisirahi.

<sup>27</sup> Émasera ema Jesús téchajicahavipa:

—Vahi ecupica. Nútichucha. Étumehava —máichahavipa.

<sup>28</sup> Tásiha, ema Pedro majicapapa:

—Te yátupipuca pítiqúenehi, piti Tata, pivane-canu nútí apanavare nu-paicaeca eta une. Nuvaraha nupauchavi —máichapa.

<sup>29</sup> Ema Jesús majicapapa:

—Yare, pipauchanu.

Enevanepa tiúcupaicahi te pacure ema Pedro. Tiyanapa mapaicaecapa eta une, macapayacayarehi ema Jesús. <sup>30</sup> Étasera eta máramesirahi taicha eta muraca técatícava, timutserahavapaipa téricapaipa. Tásiha, tipiararecapa:

—¡Picatajicanu, Tata! ¡Néricainapa!

<sup>31</sup> Enevanepasera macaratavauchapa ema Jesús eta macuchucuirayarehi. Tásiha, máichapa:

—¿Ticamitiscavipapuca eta pipisirahi eta picasiñanuirahi?

<sup>32</sup> Te tiávacuhapa ema Jesús émapa ema Pedro tayehe eta pacure, enevanepa tésamiricavahi eta técatícava. Tíhecapa eta táepacuirahi. <sup>33</sup> Tacahe, viti

apamuriana vicunachainehi ema Jesús eta vímairahi. Vépuymurihapa te mamirahu. Tásiha, víchapa:

—¡Jéhevare piti Tata, Machichaquenévihí ema Viya! —víchapa.

*Ena Jesús macanaraca ena nacajumaqueneana te avasare Genesaret (Mr 6.53-56)*

<sup>34</sup> Tacahe, te apanapa sache, viápechavavarepa viánueca eta cáquiure. Vítecapapa eta te apaquehe ticajare Genesaret. <sup>35</sup> Tásiha, ena achaneana ticavasanahi tayehe náimativanehi eta émairahi ema Jesús. Timetajiricacanapa náechapa namutu ena achaneana ticavasanahi te avasareana. Tiyananapa mayehe ema Jesús, námavacapaipahi namutu ena nacajumaqueneana. <sup>36</sup> Nayaseacapa éma eta máisapirainahíni náemamajiaca eta tache-yarapi eta mamuiraha. Tacahe, nácani témamajiacanapahi, enevanepaipa tinaracanapahi.

## 15

*Ena Jesús mametaca ena achaneana eta timaeperajicarahi (Mr 7.1-23)*

<sup>1</sup> Tacahe, títecapanapa ena apamuriana fariséoana tiásihanahi tayehe eta Jerusalén, énapa ena escribánoana. Témeñahavanapa eta mayehe ema Jesús. Ánipa naicha:

<sup>2</sup>—Pímaha, ena pímitureana vahi náitauchahini eta viyeherepiana. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? — náichapa.

<sup>3</sup> Tásiha, ema Jesús majicapavacapa:

—¿Tájaha tacayema éti apanavare, vahi ítauchahini eta mavanairipiana ema Viya, tasapihapa epicauchahi eta eyeherepiana nanaquiruhi ena iáchucanaveanaini? <sup>4</sup> Ema Viya ani macahehi eta macavanairipirahi eta viyehe: “Pipicauchaya pémunacayareva ema piya ésupa esu pena”. Jucarihi eta apana vanairipi: “Écapacayarehi mácani tíñemahi eta nacayemaquene mayehe ema máiya, ésupa esu maena”. <sup>5-6</sup> Étiserá vahi epicauchahini eta júcana mavanairipiana ema Viya. Taicha te mararihi mácani achane ticamavahupuca me Viya eta máimahaqueneanahi, eta ímitucasivahi éti: “Vaipa tatuparaca ema achane eta máimicatasiraya ema maiya ésupa esu maena”. Tasapihapa, ichape ticapichuhi eyehe eta eyeherepiana. Étiserá eta mavanairipi ema Viya, vaipa epicauchahini. <sup>7</sup> ¡Éti ecaijarehi apimirana! Tatupiruvahi eta máechajiriruvahi ema Viya, téchajisiahehi éti eta te Sagrada Escritura\*. <sup>8-9</sup> Ánipa macahe: “Ena nani achaneana, tétserajicanuanahi te najaca; váhisera táetupicavahíni te nasamureana. Téneuchavanahi eta nuyehe, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherepiana táuchurechucha te napanereruana ena náchucanaveánaini” macahepa ema Viya.

<sup>10</sup> Tásiha, máichuhavacapa ema Jesús ena achaneana. Ánipa máicha:

—Nuvaraha esamanu yátupina, apaesa ácaicutiara. <sup>11</sup> Tájina máeperajina eta viáchanevana te vinicapuca eta vimacasipavahuiranumahini. Jácani tasiapaquenehi te vijaca, tájina tamaeperajicahavihini. Vahi étaparacaina. Étiserá

\* **15:7** Májurehi ema víyarahaini profeta Isaías eta juca máechajiriruvana ema Viya.

eta evainarajivana táuchureanapuca te ejaca, étapa eta evainarajipanere-ruanahi, jéhevare éta timaeperajicahehi —máichapa.

<sup>12</sup> Tacahe, viti mayeheana apóstoleana vémeñahavapa eta mayehe. Vimetacapa:

—Ena nani fariséoana tisemanahi taicha eta juca píchiravacahi —víchapa.

<sup>13</sup> Émasera máichahavipa:

—Ena nani nacutihi eta ejare, vaipa émaimahi máechahini ema Tata Nu-caiyaquene. Ticavepuricasianayaresera éna. <sup>14</sup> Ésamiricachucha. Vahi ecuimisiapava nayehe, taicha éna, púchuquianahi tayehe eta juca nímiturapiana. Ena púchuquiana, te tichurucacapanapuca, tiáquipaicacanayarehi táicha vahi náimahahini eta nayanihayarehi —máichapa.

<sup>15</sup> Tásiha, ema Pedro mayaserecapa:

—Picatajicahavi pímitucahavi apaesa vímatiequeneha eta juca pímicutiara-chirahi eta táuchureanahi te vijaca —máichapa.

<sup>16</sup> Ema Jesús máichahavivarepa:

—¿Énerichuvare éti mapanererurehehi? <sup>17</sup> ¿Váhipuca ácaicutiarahíni eta juca? Tamutu eta juca tasiapaqueneanahi te vijaca vinicasareanahi, tatupiru te viami. Tásiha, te tiúchucapa, apanapa eta táuchusihahi. Vahi timaeperajicahavimahi. <sup>18</sup> Étasera jácani táuchurehi te vijaca tásihaquenehi te amahe eta visamure. Eta tamaurivahi eta náechajisirana ena achaneana, étara timaeperajicavacahi éna. <sup>19</sup> Táicha jácani táíñemahiqueneanahi paner-rucana, eta tásihaqueneanahi te nasamureana. Ema achane mapanerechahi maveha esu apana esena mayena ema apana achane. Esu esena supanerechahi suveha ema apana achane suima esu apana esena. Ena amape-ruana napanerechahi eta natuhusivaya. Nácanivare, tipanerechanahi eta ticaparecana, tiámerecana, tivayurecana, téchajihiana. <sup>20</sup> Tamutu eta juca panererucana tamauriqueneana, te náichahi ena achaneana, éta timaepera-jicahi éna. Étasera jácani nanicaqueneana, tayanapanepuca vahi náichahi eta nayeherepi eta nasipavauchirava, vahi tamaeperajicaímahi —máichahavipa.

*Esu ésuna esena apavasana sucasiña ema Jesús*

*(Mr 7.24-30)*

<sup>21</sup> Tacahe, tiámahavivarepa ema Jesús te apana avasareana táunavahi eta de-partamento Siria, návasa ena apaechajiriruvana. <sup>22</sup> Ánaqui, ticapayacahavipa esu esena. Supiaracapaipa eta supauchirahi ema Jesús. Ánipa sucahe:

—Pájapanunu, tata. Píti yátupiquenevihi Cristo, ñivaneruvihi eñi Viya, vicuchapaquenevihi. Esu nuchicha ñávahácahi eñi éreana, tétávicavahi eta sucatajivairahi. Picatajicanu, tata, eta picanarasinanuini ésu nuchicha —suíchapa.

<sup>23</sup> Émasera ema Jesús vahi majicapahini. Tipaicapaichucha. Vipauchapa viti mayeheana apóstoleana, vimetacapa éma:

—Tata, pévatata suyana esu suna esena apavasana tipiararecapahi te véquene —vicahepa.

<sup>24</sup> Tásiha, ema Jesús máichahavipa:

—Jéhevare eta epanereruhi. Ema Tata tivanecanuhi nacarichu néchapajiri-cayare ena vijaneanana israelítana. Nacutihi éna eta uvesana máquenureana, taicha ticamununanahi eta nujaneasiraya —máichahavipa.

<sup>25</sup> Ésusera esu esena tépuyucapa te mamirahu. Suíchapa:

—¡Tátachicha, picatajicanupaini, pímicatacanu! ¡Picanarasinanuini esu nuchichasami! —suíchapa.

<sup>26</sup> Ema Jesús majicapapa:

—Nativa néchapajiricavacaya ena nujaneanana. Taicha vahi táuricahini ásapihahíni néchapajiricahehíni éti apavasanana émetavichahíni ena nujaneanana —máichapa.

<sup>27</sup> Esu esena sujicapapa:

—Énehinehi tacahehi, tátachicha. Yátupihí vahi pijaneananuinahini. Pájapanunusera, picatajicanuchuchaini. Vítí apanava vácasíñavahi eta piyehe eta vítátijivairaina —suíchapa.

<sup>28</sup> Ema Jesús majicapavarepa:

—Páurevi piti nuchicha, ichape eta picasíñavairahi eta nuyehé. Puiti títauchavayare eta piyasearapihi nuyehé. Nucanarasinaviyare esu pichicha —máichapa.

Jéhesare enevanepa tinaracahi esu amaperu.

### *Camurianahi ena nacajumaqueneana macanararuanahi ema Jesús*

<sup>29</sup> Tacahe, tiyanavarepa ema Jesús. Véhicavarepa vítí apanava. Vichavavarepa te Galilea. Tásiha, vijuchechausichapaipahi eta cáquiure, vicaijuheya eta te mávapahi apaquehe anuquerehi, te távihahi eta cérroana. Vinasipanapa eta jena sácheana eta ánaquí. <sup>30</sup> Tacahe, nacahepaipavare ena camuriqueneana achaneana te viávihahi vítí. Námaquenepanepahi ena nacajumaqueneana: ena masariana, énapa ena púchuquiána, énapa ena úpana, énapa ena túpupáiqueana. <sup>31</sup> Namutu ena nani nacajumaqueneana macanaracavacapaipahi éma. Ichaperinehi eta náramirahi ena achaneana eta náechajisiraipa ena úpana, énapa ena túpupáiqueana tinaracanapaipa, tiúripaipa eta napaisira ena masariana. Tímairicanapaipa ena púchuquiána. Eta náurisamurevapahi, nacunachapaipa ema Viya.

### *Ema Jesús máenica ena cuatro mílqueneana achaneana (Mr 8.1-10)*

<sup>32</sup> Tásiha, ema Jesús tíchuhavipa viti mayeheana apóstoleana. Máichahavipa:

—Nujapanuvaca ena nani achaneana natiarihiqueneanahi ani, taicha mapanaripahi sache puiti eta tacahehi eta viyehe. Tájinahivare naviyahini nanica. Nujapanuvacaicha névatacavacahini, machu náquipaicava te achene taicha eta náecuavana. Vájapanu eta náecuava, vénicavaca —máichahavipa.

<sup>33</sup> Tásiha, vítí vijicapapa:

—¿Távihapucaini vítusiavahini eta tinicacare eta te juca mávapahi vámahí? ¡Váhivare vítaparahaimahi vénicavaca ena nani camuriqueneana achaneana! —víchapa.

<sup>34</sup> Tacahe, ema Jesús tiyaserecahavipa:

—¿Áyanachaha eta pan eta íamaqueneanapahi?

Vítí vijicapapa:

—Jucarihi siéterine. Ánimurichicharinehivare eta jímachicha —vicahepa.

<sup>35</sup> Tásiha, macavanairipipa eta náejahapaimuriahíni namutu te apaquehe.

<sup>36</sup> Mavehapa eta siétequene pan, étapa eta jímana. Mahasulupayachapa ema Viya. Tásiha, mayuvetucavacapa, tíjaracahavipa vítí. Tásiha, vítí víjaracavacapa ena camuriqueneana achaneana. <sup>37</sup> Tacahe, vimutu vinicahi, visatuhevaca. Vicaemacharichahavare. Siétehi eta sáyeana tánicarui eta vémacharajiana. <sup>38</sup> Eta nasimutuvahi ena achaneana, cuatro mílqueneana ena ajairana. Natiarihihivare ena esenana énapa ena amaperuana. <sup>39</sup> Te tamutupa eta juca, mavanecavacapa ema Jesús ena achaneana nayanapa nachava te napenana. Tásiha, éma tiávacuhavarepa te pacure. Viyanavarepa. Vicaijuhe eta te avasare Magdalena.



## 16

*Ena Jesús mápechavare mayunacavaca eta namasuapajiraivahi ena fariséoana*

*(Mr 8.11-13; Lc 12.54-56)*

<sup>1</sup> Tacahe, ena apamuriana fariséoana énapa ena saducéoana napauchapa ema Jesús. Eta navarairahi náemejecapavacha éma, nayaseacapa máimerecahini eta tiáramicareana, máimerecavahini te yátupihipuca vanairucahi me Viya. <sup>2</sup> Émasera majicapapa:

—Te cáperehichicha, te ímahahi eta táitsirahi eta úcaji, éti ímijacha tímiyanavayare eta tiúriyare eta sácheana. <sup>3</sup> Te yáticarahi, te ímaha eta timapicurume, títsitsimehi, ímijachahi tiquivayare. Éti, ímijachavahi ímatiequeneha eta tapaisira eta anuma. ¡Tétavicavahisera eta emasuapajiraivahi! Taicha éti ímijachavahi religiósohe, ímijachavavare ímatiequeneha eta mavarahaqueneanahi ema Viya, váhisera ávarahahini ímatiequeneha eta máimeruhehi ema Viya, te juca sácheana nucachanerahehi. <sup>4</sup> ¡Eti achaneana váinarajiqueneana! Núti nímatihe. Vahi esuapanuimahi, te nímerecapucaini eta tiáramicare. Tásiha, váhira étina tatuparaca ímahahini eta tiáramicareana. Ímahayaresera eta tiáramicare tacutiyaare eta máichavaquenevahi ema víyarahaini profetaini Jonás —máichavacapa.

Tásiha, majunijicavacapa, tiyanapa.

*Ena Jesús máimicuticha eta levadura eta náimiturapiana ena fariséoana*

*(Mr 8.14-21)*

<sup>5</sup> Tacahe, eta viánuesiravarepa eta cáquiure, vipanerechapaipahi eta vémitisistirapa eta pan.

<sup>6</sup> Ena Jesús máichahavipa:

—Tímaticarehi eyehe eta levadura eta tapareasirahi eta masa. Tacutirichu eta tapareasirahi eta apimirairavacahi ena fariséoana énapa ena saducéoana. Échapavaicha tayehe, vahi ecuehica éna —macahepa.

<sup>7</sup> Vítisera viti apóstoleana, eta véñamavairahi, víchacacapa:

—Tímicajachahavihi eta vémitisistirahi eta pan. Eta tacahe, macahehi tayehe eta levadura —víchapa.

<sup>8</sup> Éma tímatiacahavihi. Tásiha, máichahavipa:

—¿Tájaha tacayema ecahechajiriruvahi eta vahi íamapahini eta pan? ¿Váhipuca ácasíñavahi eta nuyehe? <sup>9</sup> ¿Vuíchahacaru ácaicutiaraini? ¿Vuíchahhipuca ímatinu? ¿Váhivare échaini eta nucaejasirahi eta cincoquene pan nanicaquenehi ena cinco mílqueneana achaneana étapa eta náemacharajiana? <sup>10</sup> ¿Váhivarepuca écha eta siétequene pan naniruhi ena cuatro mílqueneana achaneana étapa eta náemacharajiana? <sup>11</sup> Nímijachapa ecaicutiarayarehi eta níchirahehi eta échapiravainahini eta nayehe levadura ena fariséoana énapa ena saducéoana. Váhira étainahini néchajisihahíni eta levadura tayehe eta pan —máichahavipa.

<sup>12</sup> Vipaenumavahi véchahi eta máichirahavihi éma eta véchapiravainahini vahi vícucuti ena fariséoana énapa ena saducéoana eta apimirairanahi.

*Ena Pedro máimereucha ema Jesús eta émairahi ema Cristo*

*(Mr 8.27-30; Lc 9.18-21)*

<sup>13</sup> Tacahe, te apanapa sache, viyanavarepa vipaica. Vicaijuhe eta te Cesearea máepiyaruhi ema rey Felipe. Te viánehipa, ema Jesús tiyaserecavavipa:

—¿Tájaha nacayema ena achaneana eta nuyehe nuti Manerejirunuhi ema Viya? ¿Nájahapuca náimijachanuhi éna? —máichahavipa.

<sup>14</sup> Vijicapapa víti:

—Ena apamuriana náimijachavihi ema Juan, tichavahi téchepucahi. Ena apamuriana tímijachavianahi ema víyahaini profeta Elías, téchepucahi éma. Ena apamuriana tímijachavianahivare ema víyahaini profeta Jeremías; émapuca ema apana profetaini antívuini, téchepucahi —vicahepa.

<sup>15</sup> Ema Jesús tiápechahavivare tiyaserecavi:

—Étiyapa ¿nájaha ímijachanuhi núti?

<sup>16</sup> Ema Pedro majicapapa:

—Pítira yátupiquenevihi Cristo, machichaquenevihi ema yátupiquenehi Viya.

<sup>17</sup> Ema Jesús majicapapa:

—Piti Pedro\*, tétavicavahi eta pétupisiravahi taicha manacasamureruvihi ema Tata Nucaiyaquene tiávihi te anuma. Vahi étáinahini eta máimiturapinahíni piyehe mácani achane. <sup>18</sup> Núti apanavare nutupiruva numetacavi. Píti picaijarehi Pedro. Píti picutiyare eta mari, tétavicavayare eta pitumevaya. Namutu ena picutiqueneana eta pisuapiranuhi nútirahi yátupiquenehi Cristo, énara nuchaneranayare. Éna apanavare nacutiyareva eta mari eta natumevayare eta náehisiranuhi. Tájina vahi máratahaimahi macaetemavaca ema Váinaraji. <sup>19</sup> Píti picatuparahayare eta llave tayehe eta anuma, apaesa nasiapa nácani pijacapaqueneanayare píti —máichapa.

<sup>20</sup> Tacahe, tituparacahavipa muraca ema Jesús nacuija vicumetaca eta émairahi ema Cristo.

*Ema Jesús máimereucha eta máepenirayarehi*

*(Mr 8.31–9.1; Lc 9.22-27)*

<sup>21</sup> Tacahe, ema Jesús tépanavapa timetacahavihi eta táicharacavayare eta máepenirayare. Máichahavipa:

—Nuti nucatuparahahi eta nuyanirayarehi te Jerusalén. Ánaqui nucatajivayarehi ichape naicha ena tuparairucana, énapa ena aquenucarahana, énapa ena escribánoana. Éna, tímicapacuanayareva. Mapanayareichuhisera sache nucaheyare eta népenirayare. Tásiha, nuchavayarehi néchepuca —máichahavipa.

<sup>22</sup> Tásiha, máiputsicapa mámahí ema Pedro ema Jesús. Ánaqui macajachapa, máijarasiravahi eta mapanereruhi:

—Núti vahi návarahahini táitauchavahini nacapacavihini.

<sup>23</sup> Tacahe, ema Jesús máichapa ema Pedro:

—Piti téjecapavahi eta pipanereruhi. Pínajica eta juca tauriqueneanahi. Pivarahapuca pihapapicayare eta mapanereruhi ema Viya. Eta juca pipanereruhi tacuti eta mapanereruanahi ema Satanás, énapa ena machanerana —máichapa.

<sup>24</sup> Tásiha, máichahavivarepa víti:

—Nácani navaraha náehicanu, tacamunu náinajicava tamutu eta tihapapiricavaca eta náehisiranuhi. Nacaravahuyareva eta nímiturapiana. Náijaracavavare eta táimicapasiraina eta náehisiranuhi. <sup>25</sup> Nácanisera téñamanahi eta náitaresira, tiávamirahuanaya eta náehisiranu, énajivayare ticamitiequenehanaya eta náitaresira. Énaserá nácani yátupiquenehi tíjaracavana téhicanuana, tayanapane táimicapacainepuca eta náehisiranuhi, éna títujicavanayare tíuchuchuanayare eta náitaresiranaya. <sup>26</sup> Énerichuvare nácani tacañamararuanahi eta nacaimahaquenéiraya te juca apaquehe, tájina náimaequenehaimahi, taicha eta tacañamarasiravacahi tahapapiricavacahi tayehe eta

\* **16:17** Ema Jesús téchjicahi te máechajiriruva hebreo, máimijarechahi ema Pedro: “Simón, machicha ema Jonás”.

náuchucuirayarehini. Taicha vahi máratahaimahi mácani achane mavachachahini eta máuricacarevaya te apana vítaesira. <sup>27</sup> Taicha nuti Manerejirunuhi ema Viya nuchavayarehi. Námainapaipa eta majaraiva ema Tata, nucachanénapaipavare ena ángeleana. Te jena sáchezare, níjaracavacainapa eta náicuchianahi ena nuchanerana te tiúrihi eta nacaemataneasiranuhi, te jácani náemataneanapachuhi. <sup>28</sup> Nutupiruva numetacahe: Puítiripa éti, etiaruhi enerejicavayare vahi épenavanémahi, ímahanumaya eta nucatuparahairaya aquenucanuirayare nuti Manerejirunuhi ema Viya —macahepa.

## 17

*Ena Jesús tihapamaichava eta máimahi*  
(Mr 9.2-13; Lc 9.28-36)

<sup>1</sup> Tiuri, sáisipa sache eta vinasirahi ánaqui. Tacahe, tinaquicahavipa ema Jesús. Nacarinehi máma ema Pedro, ema Jacobo émapa ema Juan. Tiyananapa eta te étana cerro anuquehepana. <sup>2</sup> Eta ánaqui, náimahapa tihapamaichavahi eta máimahi ema Jesús te namirahu éna. Eta mamira, tétavicava eta tajararasira tacuti eta sache. Eta mamuiriha, tétavicava eta tajanunumésirahi, étapa eta tajapuvahi. <sup>3</sup> Tásiha, tiáramicareanavarepa tímerecavana ena apinana ajairana: ema víyahaini Moisés émapa ema víyahaini profetaini Elías. Téchajiricavanaripahi mayehe ema Jesús. <sup>4</sup> Tásiha, ema Pedro tímisiapavapa téchajicapa. Ánipa macahe:

—Tata Náquenu, tétavicavapa eta viúricacareva eta viávihairahi eta áni. Tiúrihipucaini vépiyarecahini eta epenahuinapachuhini. Pipenahuinrichuhini píti, mapenainarichuhivaréni ema Moisés, émapaini ema Elías —macahepa.

<sup>5</sup> Tacahe, téchejicaichaha ema Pedro, tiáramicarepa eta úcaji táepacumurihahi éna. Tétavicavahisera eta tajanunusirahi eta úcaji. Nasamavarepa eta mahu ema Viya tayehe eta úcaji. Ánipa macahe:

—Ema maca, éma yátupiquenehi nuchicha némunaruquenehi. Tétavicavahi eta núrismurevahi máicha. Éma esuapayti, mapenainarichuhivarare —macahepa.

<sup>6</sup> Eta nasamirahi ena vichamuriana, tipicanarinehi. Tépuycanapa titsiucapairicanapa. <sup>7</sup> Tásiha, ema Jesús témeñahavapa eta nayehe. Máemamasicavacapa. Máichavacapa:

—Échepuca, nuchichanaveana. Vahi ecupica —máichapa.

<sup>8</sup> Tacahe, te téchepucanapa éna, nájinaripahi éna apinana náimahaque-  
neanahi. Macarinehi ema Jesús.

<sup>9</sup> Te tichavanapa tayehe eta cerro, ema Jesús mametacavacapa vahi nacumetajiricahini eta juca náimahaquenehi. Tiámainucava te máechepucapaini te máecari éma. <sup>10</sup> Tacahe, nayaserecapa ema Jesús:

—Ena escribánoana eta náimiturapihi, náechajisihahi eta machavirayare títareca ema víyahaini Elías, tínapucayarehi eta máimeresiravayare piyehe píti Cristo. ¿Énapuca téjecapavanahi ena escribánoana? —náichapa.

<sup>11</sup> Ema Jesús majicapavacapa:

—Yátupi ema víyahaini Elías títecapayarehi, máetupiripanayarehi tamutu.

<sup>12</sup> Nútisera nutupiruva numetacahe: Títecaripahi ema Elías, váhisera náimatihini ena escribánoana. Váhivare najacpahini éma ena tuparairucana. Nacatianacahi nacapacahi éma. Ene nucaheyare nuti Manerejirunuhi ema Viya, ticatianacuanayarehiva, éneyaréichuvare ticapacuanayare —máichapa.

<sup>13</sup> Tásiha, ena vichamuriana náechapa eta máechajisihairahi ema Jesús ema Juan Tícachasiricarahihi.

*Ena Jesús macanaraca ema amaperu mávaháruhi ema éreana  
(Mr 9.14-29; Lc 9.37-43)*

<sup>14</sup> Tacahe, te tichavanapa éna tayehe eta viávihahi víti énapa ena achaneana, témeñahavapa ema émana achane mayehe ema Jesús. Tépuycapa te mami-  
rahu. Máichapa:

<sup>15</sup> —Picatajicanu, tata, pímicatacanu. Picanarasinanuini ema maca  
nuchicha. Tétavicavahi eta macatajivairahi. Tacaucharipairica te tanahaca  
eta majuma. Tatiarihi te táquipaica te une, téhepuca yucu. <sup>16</sup> Námaripa-  
hinéni nayehe ena pímitureana, váhisera náratahahini nacanaracahini éna —  
máichapa.

<sup>17</sup> Ena Jesús máichahavipa:

—¡Tétavicava emasuapajiraivavaca eti achaneana! ¡Cúverarecachasicáini  
eta nucamichirahenahini! Iáma ani ema amaperu —máichapa.

<sup>18</sup> Tacahe, ema Jesús, muraca eta máevatasirahi ema éreana, máinajiacapa  
ema amaperu. Enevanepa tinaracavanehi éma.

<sup>19</sup> Tásiha, te táequenepa, víti víputsiacavapa ema Jesús, viyaserecapa:

—¿Tájahapuca tacayemahi eta vahi váratahahini vicuchuca ema éreana  
mayehe ema amaperu? —víchapa.

<sup>20</sup> Ena Jesús tijicapahavipa:

—Eta tíchahi éti vuíchaha yátupinahini ácasiñavahini me Viya. Nutupiruva  
numetacahe: Te yátupiquenenahini ácasiñavahini mayehe éma, eratahaya-  
rehini. Váhinéni tácomesahini ichapenahini eta ecasiñavairahi. Tayanapa-  
nepuca ánichichainaichu eta ecasiñairavahi, tacutihpucaini eta táquichicha  
eta mostaza, tamuturihini erataha. Étaripa eta jácani cerro ávarahahini  
ecayejea, eratahayarehi. Te íchapuca: “Piyecava eta te juca. Piyana  
ánaquipana”. Tásiha, tiyecavahini éta. Jéhesare, tájina tacucajerarajihini  
eyehe. <sup>21</sup> Étasera eta juca, muracapanahi ema éreana ema tiávahácahi ema  
maca amaperu. Eta vicuchusira, tavaraha víchanumayare eta ayuna étapa eta  
vivyujaraca —máichahavipa.

*Tiápechavavare ema Jesús máimereucha eta máepenirayarehi  
(Mr 9.30-32; Lc 9.43-45)*

<sup>22</sup> Tacahe, eta vipaisirapahi tayehe eta avasareana eta te táunavahi eta  
Galilea, tiápechahavivarepa timetacahavi ema Jesús eta máepenirayarehi.  
Ánipa macahe:

—Nuti Manerejirunuhi ema Viya, járajapainapa eta sáchezare tíjarareca-  
nuyare mácani achane nayehe ena ticatianacananahi. Ticaratacanua-  
nayare éna. <sup>23</sup> Ticapacananayareva. Néchepucayaresera te mapanaque-  
nenapa sache —máichahavipa.

Tacahe, eta visamirahi, ichaperinehi eta véñamiravahi víti.

*Ticavacha eta impuesto tayehe eta Templo*

<sup>24</sup> Tacahe, te vítecapapa tayehe eta viávasa Capernaúm, natiarihihi ena  
ticobrarecarahiana eta impuesto tayehe eta Templo. Nárajapapa náechaji-  
panahi ema Pedro. Nayaserecapa:

—¿Mavachachapuca ema eyehe máestro éti eta impuesto tayehe eta Templo?  
—náichapa.

<sup>25</sup> Ena Pedro majicapapa:

—Mavachacha —macahepa.

Te visiapayarepa te peti, ema Jesús máechajicanumapa ema Pedro. Ánipa macahe:

—¿Tájaha picayema, piti Pedro, nájahasica tatuparacahi navachachayare eta impuesto mavarahaquene ema mácani rey? ¿Énapuca ena machichaqueneana, énapuca ena machanerana? —máichapa.

<sup>26</sup> Ema Pedro majicapapa:

—Ena machanerana.

Tásiha, ema Jesús macahepa:

—Tiuri, viti machichahavihi ema Viya. Vahi tatuparacahini vivachachahini víti eta juca impuesto. <sup>27</sup> Vinaquicasera eta impuesto apaesa tacuija tacucayemacare nayehe ena achaneana. Piyanayare pénica eta jima te cáquiure. Te piáquijiecapa eta péñirave, eta tínapuca jima tacaratacaya eta péñirave, tatiarihiyare eta plata te tajaca. Pivehainapa eta reale, tásiha taratahayare tavachacha eta nuyehe parte núti, étapa eta piyehe píti — máichapa.

## 18

*¿Nájahapuca ema apóstole ticapicahupana?*

*(Mr 9.33-37; Lc 9.46-48)*

<sup>1</sup> Tacahe, te jena sácheanahi, viyaserecapa ema Jesús:

—¿Nájahapuca ema ticapicahupanaya viyehe víti te táitecapapa eta sache aquenucaviraya? —vicanaquicasera eta impuesto apaehepa.

<sup>2</sup> Tacahe, máichuhapa ema Jesús ema émana amaperuchicha, macatupihapa te vimirahu. <sup>3</sup> Máichahavipa:

—Nutupiruva numetacahe: Ínajicayare eta ecasiñavavaisira. Echávayare ecutiyare ema maca amaperu, apaesa ítujicava esiapa ecachanenu tayehe eta néjasihayare. <sup>4</sup> Nácani navarahahi ticapicahupananayare te jena néjasihayare núti, tacamunu mánsuanayare. Vahi máitucaimahi tiácapauchava. <sup>5</sup> Tacutiquene nácani tijacapanayare ena amaperuana níchavenénahi núti, ena nani yátupihahi náimereca eta náemunasiranuhi núti, taicha tímicitijiricavahi nútinahini najacapa.

*Ichape eta máicuñayare mácani tímiaquipaica te pecatu ena amaperuana*

*(Mr 9.42-48; Lc 17.1-2)*

<sup>6</sup> Tacutiquene mácani tiáquipaicaya ema émana amaperu téhicanuhi, tiúripanahipucaini máepenahini mativainahini éma. Váhirichupucaini macucaicuñahini, taicha vahi macuaquipaicahe ena amaperu tayehe eta pecatu. <sup>7</sup> Taicha muracayare eta náicuñayare nácani tímiaquipaicanayare ena achaneana. Yátupi vahi téjiacavaimahi eta tímiaquipaicaya ena achaneana tayehe eta pecatu. Ichapesera eta náicuñayare nácani ticatapiravanahi eta náimiaquipaisirahi ena achaneana tayehe eta pecatu.

<sup>8</sup> Eta tacahe, te táimipeaturachahepuca eta evahu, étapuca eta ívapeana, tiúripana eyuchatica, iáquijica; apaesa vahi tacuimiaquipaicahe tayehe eta pecatu. Tiúripana táejiacava eta iáquehe eta esiapirayare te anuma, váhisera tacumutuhi tasiapa te yucu eta iáquehe. <sup>9</sup> Étaripavare eta iúquiha, te táimiaquipaicahepuca tayehe eta pecatu, tavarairahi táimahayare eta tamauriqueneana tájiparacana, tiúripana evecuhauquichava iáquijicaya. Taicha tiúripana eta ejacapacarehi éti eta esiapiraya te anuma tayanapane táejiacavapuca eta iúquiha. Páurehesamisera éti, te náepujuquichahepuca te yucu infierno, tamutuyare eta iáquehe.



*Ena Jesús máimicutiarachinahi te témitiaca étana uvesa  
(Lc 15.3-7)*

<sup>10</sup> Vahi ecuepuru ena amaperuana. Numetacahevane: Nararihi ena ángeleana tijaneacavacahi éna. Títupajjiacavanahi eta nacatiuchiravacahi ena amaperuana, máicha ema Viya. <sup>11</sup> Nuti Manerejirunuhi ema Viya, eta tímitecanuhi nucuchucuhayare nácani tiávacuhanahi táíñehiquene eta náitaresira.

<sup>12</sup> Esamanuchaha. Nímicutichinaheyare puiti. Matiarahi ema émana achane. Ticayehe eta cien uvesana. Te témitiyechapuca eta étana, ema achane tiyanayarehi matanuca eta táemitiaruhi. Eta máeñamiravahi, manaquicayarepa eta apamuriana noventa y nueve te majanearesihahi. <sup>13</sup> Te máichimavapa, tichavapa. Tétavicava eta máurisamurevapaipahi eta mámirapaipahi eta táejaruvahi.

<sup>14</sup> Ene macahe ema Tata Ecaiyaquene éti, ema tiávihahi te anuma. Vahi mávarahahini náemitiacahini ena nani amaperuana.

*Tatuparaca vipardonacha ena téjecapavana eta viyehe  
(Lc 17.3)*

<sup>15</sup> Te tatiarihipuca eta máejecapiravahi ema piparape eta piyehe, tituparacavi piperdonachayare. Tásiha, piconsejachayare éma, píputsiacayare éma eta pimetasira eta máejecapiravahi. Te tisuapavihi éma, tájinapa íchiravaimahi. Tiúrinapa eta ítaresirana. <sup>16</sup> Téhesera te vahi macusuapavi, pitanucayare apinanaina ena piyeheanayare testigo apaesa tasuapacarepa eta piconsejarapiyare. <sup>17</sup> Te vuíchaha macusuapavi, pimetacapa namutu ena pichamurianahi picatupihapa te namirahu. Téhesera te váhiquenechapuca macusuapahe, tímaticaréinapa éma eta mamasuapajiraivahi me Viya. Vaipa ecuimisiapava mayehe, taicha eta mamasuapajiraivahi. <sup>18</sup> Nutupiruva numetacahe: Te ecurujicacahi, te ímahahi eta mamasuapajiraivahi, emetacayare éma vahi táepahahini eta mapecatura. Tanasirichuhi. Émaripa ema Viya, máimararacahi eta evarairahi etupirica éma. Téhesera te máeneuchavapuca, emetacayare éma eta táepahairaripa eta mapecatura. Ema Viya, tiúriripa eta máimaira.

<sup>19-20</sup> Énerichuvare te etiarihipuca éti te juca apaquehe apinahehi, mapanahehipuca ecurujicacahi te níjare núti, nutiarihiyarechuhivare núti te emuri. Tásiha, te étanaichuhi eta epanereruhi, ticuticacahi eta eyaseserepi te mayehe ema Tata, éma tíjaracaheyare —máichahavipa.

<sup>21</sup> Tásiha, ema Pedro mapauchapa, mayaserecayarehi ema Jesús. Ánipa macahe:

—Tata, ¿áyahepuca tatuparaca nuperdonachaya ema nuparape, te máejecapava eta nuyehe? ¿Táuricapuca siéteheyare eta nuperdonachirayare? —macahepa.

<sup>22</sup> Ema Jesús majicapapa:

—Vahi tácarichuimahi siétehéinarichuyare eta piperdonachirayare. Tímiyanavayarechucha eta piperdonachiranayare. Vahi pitupachaimahi —máichapa.

*Ena Jesús máimicutiarachina ema achane máuriraha vahi máitucaimahi mapardonacha ema maparape*

<sup>23</sup> Nuti Manerejirunuhi ema Viya nucuti mácani rey rícoquenehi te mavarahahi máechayare eta nanteveana ena mamusurana. <sup>24</sup> Tásiha, námapaipahi ema tétavicavahi eta manteve. Tisintevapanahi éma. <sup>25</sup> Tásiha, ema achane musu, tájina maviyahini mavachachihahini ema máquenuhi. Tacahe, ema rey

macavanairipipa macaijararecasi, namutu esu mayena énapa ena machichanaveana, étapa eta macayehequeneanaini te mapena, apaesa mavachachahini apaesachichainarinehini eta mantevehi. <sup>26</sup> Tásiha, ema achane musu tépuyucapa te mamirahu ema máquenu. Ánipa máicha: “Tátachicha, picatajicanuhini. Picuchapanuini. Te nítucavapaini, nuvachachapaini tamutu eta nunteve piyehe” macahepa. <sup>27</sup> Jéhesare, ema máquenu majapanupa. Maperdonachapa tamutu eta mantevenihi. Macaiticapa. <sup>28</sup> Vuíchahasera táyerehini eta máuchusirahi, mácapajicapa ema apana achane ticantevehi eta mayehe. Macompañeroinihivare. Váhinéni camurinahini eta mantevehi. Macaratachisera, macobrachapa. Masemaracapa macapitinucapa. “Pivachachanu puítirichu” máichapa. <sup>29</sup> Ema achane ticantevehi tépuyucapa te mamirahu. Mayaseacapa: “Picatajicanu, picuchapanuchaha. Te nítucavapa, nuvachachavipa”. <sup>30</sup> Váhiquenesera maperdonachahini. Máimicasiapapa te cárcel, mavarairahi mavachachavaneyarehini eta mantevehi. <sup>31</sup> Tacahe, te náimahapa ena apamuriana machamurianahi, ticatirinehi te nasamure eta náimairahi ema nachamuri présuiraipahi. Tiyananapa nametacahi ema náquenu tamutu eta máichavaquenévahi ema nachamuri. <sup>32-34</sup> Tacahe, ema máquenuhi máimichuhapa ema tipresurecainihi. Ichape eta masemanevahi. Ánipa maicha: “¡Piti máeperajitataji musu! Váiparinehi péchavahini eta nuperdonachiravihi eta pinteve ichapequenehi. Taicha eta piyaseasiranuhi, nuperdonachavihi. Piúriháinehi pájapanuhini píti apanavare ema pichamusuvahi, tácutihini eta nuperdonachiravihi núti” máichapa ema rey. Tásiha, macavanairipipa náicuñaca, étapa mavachachayarehi tamutu eta mantevehi.

<sup>35</sup> Tacahe, ema Jesús te títapiricapa eta juca máimiturapiana, ánipa macahe: —Ene máichaheyare ema Tata Nucaiyaquene éti apanavare, te vahi ecuituca eperdonacha nácani eparapenaveana nájecaparuvanahi eta eyehe —máichahavipa.

## 19

*Ema Jesús tímiturecahi máechajisihahi mácani achane tñajicahi esu mayena (Mr 10.1-12; Lc 16.18)*

<sup>1</sup> Te tamutupa eta juca máimiturapianahi ema Jesús, viúchucapa te Galilea. Viyanapa tayehe eta Judea. Viánuecapa eta cajacure Jordán te tinapaicahi te táuchusine eta sache. <sup>2</sup> Camuriana ena achaneana tiúrujicavanahi. Ánaqui macanaracapaipavare ema Jesús ena nacajumaqueneana.

<sup>3</sup> Tásiha, títecapanapa ena apamuriana fariséoana. Napauchapa ema Jesús. Natanucahi eta tiviuchayarehi éma. Ánipa naicha:

—Vivaraha pimetacahavi ¿te táuricapuca máinajica ema achane esu mayena taicha jácani tájiparacana? —náichapa.

<sup>4</sup> Ema Jesús majicapavacapa:

—Németeaca vahi ácaicutiarahi eta échajicuirá eta Sagrada Escritura. Te tépanavainapa acane, ema Viya máijaracahi ema achane ésunayareichuhi esu mayenayare. Esu esena émanayareichuvare ema suímayare. <sup>5</sup> Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa tíaticacanayare. Eta navehacacairahi, tímicutijiricavaipa étanarinehi eta náqueheana” macahepa ema Viya. <sup>6</sup> Tacahe, tímicutijiricavainapa émanainarichuhini te peti. Étanarichu eta napanereruana. Vaipa táisapacarehini náinajicacahini. Eta tacahe, mácani máinajicahi esu mayena, ema máepuruhi eta juca mavanairipi ema Viya —máichavacapa.

<sup>7</sup> Tásiha, ánvare nacahe:

—¿Tájahasica tacayema eta mavanairipihi ema víyarahaini Moisés ticaepi-yayarehi eta ajureca suyehe esu esena eta máinajisirayarehi ema suima? — náichapa.

<sup>8</sup> Ema Jesús majicapavarepa:

—Ena iáchucanaveanaini, te jácani eta nasemirahi, náinajicapa ena nayanana. Ema víyarahaini Moisés máisapahi tñajicacana táichavenehi eta tájinairahi eta náimitucacarevainahini, táetaviuchirahi eta namuracasa-mureva. Váhisera máuricahini ema Viya eta náinajicacahini. <sup>9</sup> Puiti nuvaraha numetacahe: Te máinajicapuca esu mayena mácani achane, te tájinapuca suíchiravainahini; tásiha, mavehapa esu apana esena, ticapecaturaipahi me Viya. Tacutiquene, mácani mavehahipuca súcani esena máinajiruhi ema suima, ticapecaturaipavare éma, taicha ésu, matiarhichahahi ema suímaquenehi —máichavacapa.

<sup>10</sup> Tacahe, te víputsiacavavarepa, viti mayeheana apóstole viyaserecapa ema Jesús:

—Te énehipuca tacahehi eta juca, eta vivira viti ajairana esu esena, tiúripa-naichuhipuca vahi vicutanuca esu esena —víchapa.

<sup>11</sup> Ema Jesús máichahavivarepa:

—Vahi ámutu árataha ímatiequeneha eta juca. Nararihisera tinerejicavana-yarehi náimatiequenehayare máicha ema Viya. <sup>12</sup> Nararihi ena ajairana vahi natanucaimahi esu esena nayanainahini, taicha eta náquehe vahi táichuhahini esu esena. Nararihivare ena ticavecuhianahi, navetijipa éna vaipa náeseni-caimahi esu esena. Nararihivare ena apamuriana tinerejicavanahi vahi natanucahini esu nayanainahini, navarairahi tacuija jácani tahapapicahini eta nacaemataneasiraya ema Viya. Ticunachacarepanayare ena tirataha-nayare eta juca náijarasirava yátupiquene nacaemataneacaya ema Viya — máichahavipa.

*Ema Jesús mayujaraucha ena amuyana*

*(Mr 10.13-16; Lc 18.15-17)*

<sup>13</sup> Tacahe, ena achaneana námavacapaipa ena amuyana eta mayehe ema Jesús. Navarahahi máemamahacavacayarehi éna, mayujarauchahivaréni. Vítisera viti mayeheana apóstoleana vahi vísapahini. Vicaichepaicapa ena tiámanapahi ena amuyana. <sup>14</sup> Ema Jesús máichahavipa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyahehi ena nani amuyana eta nasuapajiraiva éna —máichahavipa.

<sup>15</sup> Tásiha, máemamahacavacapa ena amuyana, mayujarauchavacapa. Te tamutupa, viyanavarepa te apana avasare.

*Ema achane rico téchajiricava mayehe ema Jesús*

*(Mr 10.17-31; Lc 18.18-30)*

<sup>16</sup> Matiarhi ema achane amaperu rico. Mapauchapa ema Jesús. Mayaserecapa:

—Tata maestro, piti piúriquene. ¿Tájahapucaini eta nícharacavahíni eta nítujisiravaina me Viya máichecuaraquirénahini eta nítaresira? —máichapa.

<sup>17</sup> Ema Jesús majicapapa:

—¿Tájaha tacayema pímiyarechanu “Piti piúriquene”? Mararihi ema Viya. Jéhevare éma, tétavicavahi eta máurivahi. Téhesera te pivarahapuca pécha te apana vítaresira, pisuapayare eta vanairipiana —máichapa.

<sup>18</sup> Mayaserecavarepa ema achane:

—¿Tájahasica eta vanairipianahi eta nusuapaqueneya?

Majicapavare ema Jesús:

—Eta juca eta mavanairipiana ema Viya: Vahi picucapareca. Vahi picuveha esu esena apayena. Vahi picuamereca. Nacuija pépiyéqueneruina.  
<sup>19</sup>Pipicauchayare ena ticachichaviana. Pémunacayareva ema piparaepiyahi, tácuti eta pémunasiravahi píti —máichapa.

<sup>20</sup>Tacahe, ema achane majicapapa:

—Tamutu eta juca nusuapahi nítauchahi. ¿Tájahasera puca eta jácani néjequeruichahahi? —macahepa.

<sup>21</sup>Ema Jesús majicapavare:

—Te pivaraha pítaucha tamutu, piyana píjararecaya tamutu eta pímahaqueneana. Tásiha, píjaracavacapa ena páureana. Jáhevare éta, pijacapayare eta pímahaqueneyare te anuma táitsivayare. Te tamutupa eta juca, pítecavanepa péhicanu —máichapa.

<sup>22</sup>Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyanapa tipanererecapaipa.

<sup>23</sup>Tacahe, ema Jesús máichahavipa viti mayeheana apóstole:

—Nutupiruva numetacahe: Yátupiquenehi máitujihí eta náijarasiravainahini eta náehisiranuinahini ena rícoana eta nasiapirainahini te anuma.  
<sup>24</sup>Esamanuchaha. Eta juca tímicutijiricavahi eta vipera camello, máitujihí tánucuhahini te támicuejehe eta parirapa. Ene nacahehi ena rícoana —macahepa.

<sup>25</sup>Eta visamirahi viti, viáraminehi. Víchacacapa:

—¡Tétavicavahi eta tamáitujicacarevahi! ¡Nájina títujicavaimahi náuchucuhahini!

<sup>26</sup>Ema Jesús tímararacahavipa. Tásiha, máichahavipa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaque-nénahini ema Viya. Tamutu marataha —máichapa.

<sup>27</sup>Ema Pedro máichavarepa:

—Vítisera, Tata, vinaquicahi tamutu eta vicayehequeneanahi, vivarairahi véhicavi. ¿Tájahasica eta vímahaquenéya? —máichapa.

<sup>28</sup>Ema Jesús majicapavarepa:

—Nutupiruva numetacahe: Járjapayare eta sáchevayare, tacaitsivairayare tamutu arairuya. Tásiha, nuti Manerejirunuhi ema Tata néjacainapa te tajarahiquenehi trono. Tásiha, eti éhicanuanahi éjacainavarepa tayehe eta dócequene trono. Ecavanairipinapa nayehe ena dócemuriqueneana vijaneanana israelítana. <sup>29</sup>Tásiha, emutu eti enaquicanahi eta epenana, ejunijicahivare ena ticachichaheana\*, ena eparapenaveana, ena echichanaveana, eta eyehe apaquehe, táichavenehi eta éhisiranuhi puiti, tiápajucavainapa camuripanayare ena ejaneananayare étapa eta ímahaqueneanaya. Énerichuvare táurivayare eta ítaresira máichecuaraquirenapa. <sup>30</sup>Maverahesera eti etiarihiqueneanahi puiti, váhirichuhi ecapicahuhini. Te jena sáchezare, ichapepanainapa eta ecapicahuiraya. Ena puiti ticapicahuanahi, te táitauchavapa te jena sáchezare, énapavainapa téquenehanayare.

\* **19:29** Te jácani apanana versiónéana, tatiaríhi te juca lista eta táechajiriruva “ena nayenana”. Tájinasera nalistanahini te libro antivupanahi. Eta tacahehi, vímatiequeneha vahi manacahini ema Mateo. Mácani apana achane mavejuchahipuca te Lucas 18.29.

## 20

*Ena Jesús máimicutichahi ena achane rico tiuri eta mavachachira ena ticaemataneychana*

<sup>1</sup> Te jena sáchezare te níjaracahénapa eta ícuchiyare eti nuchanerana, tacuti eta mavachachirahi ena émana achane ticayehe eta ichape quinta úvaquiji nayehe ena ticaematanearahiana. Ena maca mayatiruhi tipaica matanuca ena achaneana ticaemataneanayarehi mayehe. Tíreracanayarehi eta uva. <sup>2</sup> Te títucavapa ena ajairana, mametacavacapa eta mavachachirayarehi étana reale te sache. Tiúrihi eta mavachachiravacahi. Mavancavacapa tiyanana tayehe eta náireresihayarehi. <sup>3</sup> Tásiha, macamunui-chahava ena apamuriana achane. Te las nuévapa sache, tiyanavarepa te plaza. Máimahainevare ena apamuriana ajairana máematanereanahi. <sup>4</sup> Máechajiacavarepa eta náireresirayarehi. Mametacavacavarepa eta táurivayarehi eta mavachachirayarehi. Tiyanavarepa éna, tíreracanahi. <sup>5</sup> Te las dócepa sache, tiyanavarepa matanuca ena apamuriana. Títucavavare, máevatamurihavare tíreracanayare. Te las trespa sache, tiápechavavare tiyana títucavavare ena apamuriana, énerichuvare tíreracanayarehi. <sup>6</sup> Te las cócropa sache, tiyanavare tiúchucahi tayehe eta plaza. Títucavavare ena apamuriana ajairana máematanereanahi. Tásiha, máichavacapa: “¿Tájaha tacayema tájina ématanenahini puiti jena sache?” <sup>7</sup> Éna najicapapa: “Nájina náechejiacahavihini”. Tásiha, ena máichavacapa: “Eyana éti apanava írereca ánaqui te nuyehe quinta úvaquiji”. Mametacavarepa eta táurivayarehi eta mavachachiraya. <sup>8</sup> Tacahe, te yátipa, mametacapa ena mayehe empleo máichuhavacapa namutu, mavachachavacayarepa. Mavarahahi náinapuca nacavacha ena náequenereruanahi ticaemataneana. Nasapihapa téquenehanahi ticavachana ena náinapureanahi. <sup>9</sup> Tásiha, ena nasiapaqueneanahi te las cócropa sache, mavachachavacapa ena achane eta étapevacahi eta reale, tacutirichuhi eta navachahi ena ticaemataneanahi tamutu sache. Énapa ena nasiapaqueneanahi te las trespa sache, énerichuvare eta étapevacapa reale eta navachahi. <sup>10</sup> Tacahe, te ticavachanapa ena náinapureanahi tisiapana, náimahapa éna tacutirichuhi eta navachanahi ena náequenereruqueneanahi. <sup>11</sup> Tásiha, tiseanapa mayehe ena náquenuhi. <sup>12</sup> Ánipa nacahe: “Ena nani náequenereruanahi títecapaná, vicutivachavacaichuhi eta navachahi, étanainehinéni hora eta nacaematanerahi. Tacutirichuhisera eta vivachahi víti vínapureanahi. Váhiquene táuricaímahi eta juca, taicha ichapemurihi eta vicamichirahi víti eta táijureva muracaquene eta sache. Táurica vicachuricavacayarehini éna eta navachahi” nacahepa. <sup>13</sup> Émasera ena náquenu majicapavacapa: “Váhira nucaetemahémahi éti. Énaripa ena náequenereruanahi, váhivare nucaetemavacaimahi. Tínunahi eta nuvachachirahehi étapevacahi eta reale níjaracahe. Vahi ecusema. <sup>14</sup> Ésamiricavachucha. Evehachucha eta juca evachahi. <sup>15</sup> Núti néchinava taicha nuyeherichuhi eta plata. Nuvaraha ácuticacahini eta evachana emutu. ¿Éti ecapinarunupapuca eta núrivahi nayehe ena nani?” máichavacapa.

<sup>16</sup> Ena Jesús macahevarepa:

—Ene nacaheyare te jena sáchezare, nácani náequenereruanahi téhicanuana, éna nasapihayare tínapucana. Tásiha, nácani náinapureanahi, nasapihayare



téquenehanayare\* —macahepa.

*Éma Jesús tíápechavavare máechajisiha eta máepenirayare  
(Mr 10.32-34; Lc 18.31-34)*

<sup>17</sup> Tacahe, eta vipaisirapahi te achene te vicaijuhepa eta Jerusalén, típutsia-  
cahavipa ema Jesús viti dócequeneana apóstoleana. Máichahavipa:

<sup>18</sup> —Ímaha puiti, viyanainapaipa vicaijuheyare eta Jerusalén. Ánaqui  
nucaijararecasiyare nuti Manerejirunuhi ema Viya. Ticaratacanuanainapa  
ena tuparairucana. <sup>19</sup> Tímicapacuanayare taicha tíjararecanuanainapa  
nayehe ena suntaruana romanoana. Éna, nájina najapanuquenéna.  
Ticaecahinuanainapa. Téstacuanayareva. Tétatacanuanayareva te  
crusu. Tásihasera, te mapanaquenena sache, néchepucainapa te nécari  
—máichahavipa.

*Esu naena ema Jacobo émapa ema Juan suyaseaca ema Jesús eta macajupa-  
havahini ena suchichanaveana  
(Mr 10.35-45)*

<sup>20</sup> Tásiha, témeñahavapa esu naena ena vichamuriana ema Jacobo émapa  
ema Juan, suámavacapaipahi éna. Tépuycapa ésu te mamirahu ema Jesús,  
suyaseacayarehi énaínahini majupahanainahini ena suchichanaveanahi.

<sup>21</sup> Éma mayaserecapa:

—¿Tájahasica ecamunu, nuchicha?

Ésu suíchapa:

—Nuvaraha pácachanéni ena nuchichanaveana tayehe eta péjasihayare  
picavacureraya. Náejacahini te pichacaya, eñi éñina te pivaure, eñi apana te  
sapa —suíchapa.

<sup>22</sup> Éma Jesús majicapavacapa éna:

—Éti, vahi ímati tájahapuca eta nátajivayare nácani nujupahanayare. ¿Erata-  
hayarepuca ecamicha eta íchavaquenévayare ecatajivairayare, ecutinuya-  
repuca eta nucamichirayare núti? —máichapa.

Éna najicapapa:

—Virataha vicamicha —nacahepa.

<sup>23</sup> Tásiha, máichapa:

—Yátupi ichape eta ecatajivairaya, vicuticacaya eta nacapasirahaviyare.  
Étapasera eta éjasirayare eta te nuchacaya, vaipa nútina necha nucaejaca-  
hehini. Éma Tata Nucaiyaquene, émahí tinerejicayarehi ena nujupaha-  
nayare —máichapa.

<sup>24</sup> Tacahe, eta visamirahi viti diésqueneana mayeheana apóstole, visemapa  
nayehe ena apinana. <sup>25</sup> Émasera ema Jesús máichahavipa. Ánipa macahe:

—Écharichuhi éti ena aquenucana tayehe eta avasare, muraca eta nacava-  
nairipira. Énaripa ena tuparairucana, tétavicavahi tisuapacareanahi eta  
nacavacurerahi. <sup>26</sup> Váhisera ecucahehi éti nayehe ena echamuriana. Mácani  
tímercavahi ticapicahupana, tacamunuhi máitativacayare ena apamuri-  
ana. <sup>27</sup> Te etiarhivarepuca eti evarahahi ínapuca, tacamunuhi ímercavaya  
navanaraheyarehi ena echamuriana. <sup>28</sup> Ecutinuyare nuti Manerejirunuhi  
ema Viya. Vahi étaina tímitecanu nucaítaticasihini. Nútiyarehi nítatihe. Éneri-  
chuvare níjaracavayarehi nímicapacava íchavenequeneanainahi éti camuri-  
queneanaya nucuchucureanaya —máichahavipa.

\* **20:16** Te jácani apanana versiónéana, tatiarihi eta juca táechajiriruvana “porque muchos son llamados, pero pocos son escogidos”. Tájinasera eta juca táechajiriruvanahi te libro antivupanahi. Eta tacahe, vimatiequeneha vahi manacahini ema Mateo. Mácani apana achane mavejuchahi eta juca te Mateo 22.14.

*Ena Jesús macaimairiricavaca ena apinana púchuquiana  
(Mr 10.46-52; Lc 18.35-43)*

<sup>29</sup> Tacahe, te vijunijicavarepa eta avasare Jericó, camurianahivare ena achaneana ticavasanahi tayehe, téhichavianahi. <sup>30</sup> Natiarihi ena apinana ajairana púchuquiana. Téjacanahi te achenechacaya. Te nasamapa ema Jesús eta mánucuirapahi, tipiararecanapa. Ánipa nacahe:

—¡Tátachicha! ¡Pítiqueneripa yátupiquenévihi Cristo! ¡Picatajicahavipaini pájapanuhavi!

<sup>31</sup> Natiarihisera ena achaneana vahi náuricahini eta napiarasirahi ena púchuquiana. Navarahapa nacamatinaca. Énaserá napiaracaichucha:

—¡Tátachicha! ¡Pítiqueneripa yátupiquenévihi Cristo! ¡Picatajicahavipaini pájapanuhavi! —nacahepa.

<sup>32</sup> Tacahe, ema Jesús eta masamiravacahi, titupihapa. Máichuhavacapa ena púchuquiana. Mayaserecapa tájahahipuca navarahahi.

<sup>33</sup> Éna najicapapa:

—Tátachicha, vivaraha pípuhauquichahavini apaesa vímairiricapaini —nacahepa.

<sup>34</sup> Tacahe, ema Jesús majapanuvacainehi. Máemamahauquichavacapa. Enevanerinehi tímairiricana. Tásiha, téhichavianapa.

## 21

*Títecapapa ema Jesús eta te Jerusalén  
(Mr 11.1-11; Lc 19.28-40; Jn 12.12-19)*

<sup>1</sup> Tacahe, te apanapa semana, viyanapa vicaijuhe te Jerusalén. Vétavajicapa tayehe eta avasarechicha Betfagé te tachacaya eta cerro ticaijarehi Olivoqui. Ánaqui ema Jesús mavanecapa ena apinana vichamuriana. <sup>2</sup> Ánipa maicha:

—Eyanayare tayehe eta te jena avasarechicha Betfagé. Ánaqui ímahayare ticaitihahi eta esena burrico, etapa eta tachicha te tachacaya. Evejapucayare íáminanuyare eta áni. <sup>3</sup> Te natiarihinapuca náeñama, emetacayare eta nucamunuirahi núti. Vahi táyerímahi vímichavavaneyare —máichavacapa.

<sup>4</sup> Eta juca tamutuhi títauchavapahi eta májuchaquenehi ema mácani víyarahaini profeta. <sup>5</sup> Ani tacahehi: “Emétaca ena achaneana ticavasanahi te Jerusalén, apaesa natsecava eta najacapirayare ema nayeheyare Rey. Emétacayare vahi nacupica, taicha tétavicavapahi eta mamansuvapahi, etapa eta máurivahi. Mámapahi eta iúritaresirayare. Tímaticareyarepahi ema, taicha ticaperayare eta burricuchicha” tacahehi eta Sagrada Escritura.

<sup>6</sup> Tacahe, ena vanairucanahi náitauchahi eta navanahi mayehe ema Jesús. <sup>7</sup> Námapaipahi eta burricochicha etapa eta tachicha. Nanacamaequechapa eta náepacuhana. Tásiha, ticaperapa ema Jesús. <sup>8</sup> Camuriana ena achaneana tíacapanahi náepacapaicapaipa eta namuirihana. Ena apamuriana navehapa eta tapacaji eta cáchipaca. Nanacavare te mayanihayarehi éma. <sup>9</sup> Ena apamuriana tínapumirauchanapahi énapa ena téquenehanapahi tipiaracanaipa:

—Yare, Tata. Píti yátupiquenevihi Cristo réyvihí viyehe viti israelítana. Ichape eta vicunachiravihi píti. ¡Vanairucaquenevihi me Viya! ¡Asulupaya me Viya te anuma! ¡Viva ema Viáquenu! ¡Viva! —nacahepa.

<sup>10</sup> Tiúchuchujicanapa ena achaneana te Jerusalén. Ichape eta náramirahi ema Jesús eta máitecapirahi. Tiyaserejiricanapaipa:

—¿Nájaha ema maca achane?

<sup>11</sup> Ena apamuriana najicapapa:

—Émara ema profeta ticaijare Jesús, ticavasa te Nazaret te tinapaica te Galilea —nacahepa.

*Ema Jesús macuchuchujicavaca ena tjararecanahi eta sárareana, cáyureana te tajuhe eta Templo*

*(Mr 11.15-19; Lc 19.45-48; Jn 2.13-22)*

<sup>12-13</sup> Tacahe, te apanapa sache, tiyanapa tisiapa ema Jesús tayehe eta te Templo. Máimaharínehi ena achaneana tjararecanahi eta sárareana, cáyureana. Ena apamuriana ena tivacharecanahi. Natiaríhivare ena títsiriperecarahiana eta naplataneana ena apavasanana. Máichavacapa:

—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étísera eti tíámerahiana, ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichavacapa.

Tásiha, macuchuchujicavacapa namutu. Máequehepuichinavacapa eta namesarana étapa eta nasiyana.

<sup>14</sup> Eta mávihairahi te Templo ema Jesús, napauchapa ena púchuquiána énapa ena masariana. Tásiha, éma macanaracavacapaipahi. <sup>15</sup> Tacahe, ena amaperuana tipiararecanahi eta nacunachirahi éma, ánipa nacahe: “Pítiquenehi yátupiquenevihi Cristo manerejiruvíhi ema Viya” nacahepa. Énaserá ena tuparairucana énapa ena escribánoana vaipa náuricahini eta náimairahi tamutu eta juca. Tísemanapa. <sup>16</sup> Náurujiacapa. Navarahapa nacaichepaica eta máichaqueneanahi. Tásiha, náichapa éma:

—¿Tájaha tacayema písapa tipiararecana ena nani amaperuana? ¿Váhiyapa picamatinacavacapaini? —náichapa.

Ema Jesús majicapavacapa:

—¿Tájahasica táichavahi eta juca najirairahi? ¿Váhipuca échajicuha eta Sagrada Escritura eta táechajisíhairahi eta juca najirasahi ena nani amaperuana? Ani tacahehi: “Píti, Tata, pinacasamurechavacahi ena amaperuana eta máejererarayarehi naicha eta najirairayare eta táurinaquene alabanza” —máichavacapa.

<sup>17</sup> Te títapiricapa eta majicapiravacahi, majunijicavacapa. Tiyanapa eta te avasarechícha Betania, étapa máimasínehi. Véhicapaichuhísera víti.

*Ema Jesús májiquiha eta higo taicha máhiquirehi*

*(Mr 11.12-14, 20-26)*

<sup>18</sup> Te apanapa sache, te yáticarahichícha, tiyanavarepa ema Jesús tayehe eta Jerusalén. Véhicapaichuhivare víti apanava. Eta vipaisirapahi, técuhasamurepa éma. <sup>19</sup> Máimahapa eta yucuqui ticaijare higo te achenechacaya. Tiyanapa mapauchahi. Tájinasera táhinahini. Tapacajianachucha. Tásiha, máichapa ema Jesús eta higo:

—¡Pépiyainapa píti eta máhiquereviyare! —máichapa.

Eta macaherahi, enevanepa tíjiyujipa eta tapacajiana. <sup>20</sup> Eta vímairahi víti, víáramínehi ichape. Viyaserecapa ema Jesús:

—¿Tájaha táichararacavahi eta táijahúchiravahi tíájiqi eta higo? —vicahepa.

<sup>21</sup> Ema Jesús tíjicapahavipa:

—Jéhesare nusamacarehi me Tata. Éti apana esamacareyareva, te yátupina eta ecasiñavairahi me Viya. Tájina émaítucaimahi. Eratahayare ícha, ecutinuya eta níchaquenehi. Eratahayareva ecayejeca eta cerro te apachacaya. <sup>22</sup> Tamutu jácani eyaseserepiyare eta mayehe ema Viya te eyujarasirana, ecájaracasiyare te yátupina eta ecasiñavairahi me Viya —máichahavipa.

*Nayaserecapa ema Jesús nájahhipuca tituparacahi éma  
(Mr 11.27-33; Lc 20.1-8)*

<sup>23</sup> Tacahe, visiapavarepa tayehe eta te Templo. Ema Jesús, tímiturecavarepa nayehe ena achaneana. Tacahe, napauchapa ena tuparairucanahi. Natiarihihivare ena tinerejicavanahi ena aquenucarahana. Ánipa nacahe:

—Píti, vahi vitupararuvinahini víti eta píchira eta júcana. ¿Nájahasica tímitucavihi? ¿Nájaha tituparacavihi eta juca píchaqueneana? —náichapa.

<sup>24</sup> Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana. <sup>25</sup> ¿Nájahapuca tivanecahi ema Juan eta máitesirahi máicachasirisirahi? ¿Émapuca ema Viya tivanecahi, émajivapuca eta máitesirahi? —máichavacapa.

<sup>26</sup> Váhisera náituruequenehahini eta najicapirayarehi. Tiácapaemajiricanapapa. Ánipa nacahe:

—¿Tájahasica vicayemayare eta vijicapirayare ema maca? Te vémunahacava vícha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?” Téhesera vácahepuca: “Émajivaichucha eta máitesirahi”, ticauyayacareripa titupisicahaviana eta te márijahiana ena achaneana, taicha namutuhi náimijachahi ema Juan profetaquenehi yátupiquene, mavaneruhi ema Viya —téchajiricanapapa.

<sup>27</sup> Tásiha, náichapa ema Jesús:

—Vahi vecha víti —nacahepa.

Tacahe, máichavacapa éma:

—Énerichuvare núti, vahi numetacahémahi nájahapuca ema tituparacanuhi. <sup>28</sup> Nuvarahasera nímicutiarachinaheyare. Nararihi ena apinana ticaparapecacana. Ticavanahipa ema émana mayehe ema naiya. Ánipa máicha: “Nuchicha, piyana picaematane puiti jena sache. Pírerecaya eta uva” máichapa. <sup>29</sup> Ema machicha majicapapa: “Vahi nuvaraha nucaematane puiti juca sache”. Te tiyerepa, tiyanapanéni ticaematanehi. <sup>30</sup> Tásiha, ema naiya mavanecavarepa ema émana machicha, mayanahini macaematanehini éma apanavare. Tásiha, ema amaperu majicapapa: “Tiuri, nuyanayare” macahepa. Váhinéni mayanahini. <sup>31</sup> Puiti nuyaserecaheyare: ¿Nájaha ema tisuapajirahihi mayehe ema maiya? —máichavacapa ema Jesús.

Éna najicapapa:

—Ema tínapuca, éma tisuapajirahihi.

Tásiha, ema Jesús máichavacapa:

—Nutupiruva numetacahe puiti. Nasapihayare ticachuricaheanayare tisiapana te anuma ena túhusianainihi énapa ena tisipecaturarahianainihi. Éti vahi esiapaimahi. <sup>32</sup> Taicha vahi esuapahini eta máimiturapiana ema Juan Tícachasiricarrahini, váhivare ávarahahini étupiricavahini eta ítaresirana. Nararihisera ena tisipecaturarahiana, ichape eta nasuapirahi. Étiserá, tétavicava eta emasuapajiraiva, tayanapane ímahahi masuapacarevahi éma —máichavacapa.

*Ema Jesús máimicutichina ena pártirárioana máurirahana  
(Mr 12.1-12; Lc 20.9-19)*

<sup>33</sup> Ema Jesús máichavarepa:

—Esamanu eta juca apana nímiturapiya. Nímicutichinaheyare. Matiarahihi ema achane. Ticaevaruhi camuri eta uva te máesane. Manaruchapa eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiha, májjaracapa ena achaneana, pártirárioanayarehi. Tásiha, tiyanapa ema achane te apana avasare. <sup>34</sup> Tacahe, te títecapapa eta caje tayairahi eta uva, máimivanerecapa ena mamusurana nayaseapanavacayarehi ena pártirárioanahi eta tatucachaqueneyarehi éma. <sup>35</sup> Énaserá ena pártirárioanahi tisemauchavanarichucha. Nacaratacavacapa, náehapa ena vanairucana. Nacapacapa ema émana. Ema apana nayucaracapa te márijahiana. <sup>36</sup> Tásiha, ema achane máimivanerecavarepa ena apamuriana. Camuripananapa. Váhiquenesera nájjaracahini, náehavacavarepa. Nacapacavacapa ena apamuriana.

<sup>37</sup> Tacahe, émajacaruvapa máevataca ema machicha. Máimijachaipahi émapapucaini napicauchahini. <sup>38</sup> Te náimahapa ema machicha ema ticayehe eta úvaquiji, ánipa nacahe: “Émainapapuca ticayeheyare ema maca. Yare, vicapaca apaesa tánasipa viyehe tamutu. Tájina máicharachavimahi ema achanénavaji”. <sup>39</sup> Tacahe, nacaratacapa ema machicha, nacuchucapa eta tayehe eta isaniti, nacapacapa.

<sup>40</sup> Puiti, nuyaserecaheyare: ¿Tájahapuca máicharachavayare ema ticayehe eta úvaquiji ena pártirárioanahi máurirahana? —macahepa ema Jesús.

<sup>41</sup> Éna najicapapa:

—Éma tisemainapa. Vaipa májapanuvacaimahi. Macapapanavacayarepa ena pártirárioanainihi. Májjaracainapa ena apamuriana pártirárioanayareva, nácani tipicaurahianahi, nájjaracahini eta mayehe parte —náichapa.

<sup>42</sup> Tásiha, ema Jesús máichavacapa:

—Jehe tíurihi eta ejicapiranuhi. Nuvarahasera epanerechinavapaini eta tacayemahi eta Sagrada Escritura, apaesa ácaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapahi eta te táicuchihi eta tatuparahahi. Tacapicahuquenehi puiti. Táitusiava, tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya.

<sup>43</sup> Puiti numetacahe: Táichavenehi eta emasuapajiraivahi, vaipa étiparacaimahi tayehe eta mavanairipi ema Viya. Ena tisupajirahianahi, éna ticavacureanayare te jena sáchezare. Énainapa téchanayare eta vanairipiana. <sup>44</sup> Puiti, núti nucutihi eta ichape mari náepuruquenehi. Eti épurunuanahi, iáquipaicavayare évetutujicayare. Tichimarahenapa eta muraca ecuñaraqui taicha eta emavarahairahi éhicanu —máichavacapa.

<sup>45</sup> Étasera eta nasamirahi ena tuparairucana énapa ena fariséoana, tisemarinenehi taicha tímatiacavanapa eta énairehi tayunacavaca eta máimicutichiravacahi ema Jesús. <sup>46</sup> Navarahapa nacaratacayarehíni. Tipicacavanachuchasera nayehe ena achaneana taicha namutu nacunachahi ema Jesús eta émairahi vanairuca me Viya.

## 22

*Ema Jesús tímicutichava mácani rey te máichuhavacapa ena machimaranaya, máichayarehi eta ichape piesta*

<sup>1</sup> Ema Jesús máimitucavare ena achaneana eta apana máimicutichaquene. Ánipa macahe:

<sup>2</sup> —Ema Viya, macutihi mácani rey te máimiyenachayare ema machicha, máichayarehi eta ichape piesta. <sup>3</sup> Mavanecapa ena mavanarana náichuhapanavaca ena machimaranaya. Váhiserá návarahahini nayanahini éna. <sup>4</sup> Tásiha, ema rey máevatacavare ena apamuriana mavanarana. Ánipa máichavaca:



“Eyanavare étipava ímitatajiricavaca ena níchuhaqueneanahi, náitecavanepa. Nucaparecaripahi eta vaca nirureyare nésinaruanahi. Tiúrinapa tamutu eta juca tinicacare. Énanecha nucuchapahi náitecavanepa” macahepa.

<sup>5</sup> Énasera ena máichuhaqueneanahi vahi nasuapahini. Nájina nayanahini. Ema émana tiyanapa te máesane. Ema apana máimahapana eta mayehe tienda. <sup>6</sup> Ena apamuriana nacaratacapa ena vanairucanainihi, náehavacapa, nacapacavacapa. <sup>7</sup> Tacahe, te máechapa ema rey, tise mapa. Mavanecapa ena masuntaruana nacapapanavaca ena ticapahianahi. Náijuchavare eta tamutu eta napenanaini. <sup>8</sup> Tásiha, máichavacavarepa ena apamuriana mavanaranahi: “Tiúripa tamutu eta juca tinicacareana. Váipasera nuvaraha náiteca ena náinapureanahi níchuhaqueneanainihi. <sup>9</sup> Eyana te tamutu cálleana. Íchuhavacayare namutu nácani ecainunaqueneanayare” máichavacapa. <sup>10</sup> Tacahe, ena mavanaranahi tiyananapa, náchepupanevacapa. Nacurujicavacapa namutu nácani nacainunaqueneanapahi: nácani achaneana tiúriana énapa ena súnsusurujiana. Camurianahi. Tínicanarinehi eta te távihayarehi eta piesta.

<sup>11</sup> Tacahe, ema rey tisiapapa, máimahayarehi ena machimaranahi. Máimahapa ema émana achane ema matiarihiquenehi vahi manacahini eta namuirihasa te ticaichuasiana. <sup>12</sup> Tacahe, máichapa: “Ajaira, ¿tájaha tacayema vahi pinacahini eta múiriare níjararuheanahi tayeheyarehi puiti juca piéstayarehi?” Émasera ema achane vahi majicapahini. <sup>13</sup> Tacahe, ema rey mavanecavacapa ena mavanarana: “Eveha ema maca. Ítijivaucha, ítiápechavare. Íyaracuhapana te timapicu tayehe eta máiyauchiavayare macapitiquiahechiavayare” macahepa ema rey.

<sup>14</sup> Ema Jesús máichavarepa:

—Numetacahe puiti: Camurianahi ena níchuhaqueneanapaipahi. Ánimurianarichusera ena títaurashianayare —macahepa ema Jesús.

*Navaraha náemejecapavacha ema Jesús tayehe eta impuesto (Mr 12.13-17; Lc 20.20-26)*

<sup>15</sup> Tacahe, eta nasamirahi ena fariséoana, tise manarinehi. Tiyananapa ticurujicacanapa, navarahaipa náemejecapavachayarehi apaesa étainahipucaini taviuchahini ema Jesús. <sup>16</sup> Tacahe, navanecapa ena nachamuriana énapa ena políticoana. Nayaserepanahi ema Jesús. Te náitecapauchapa, ánipa nacahe:

—Tata maestro, vímatihi eta tatupiruvairahi táurivahi eta juca pímiturapianahi. Yátupihí eta pímitusiravacahí eta táurinaquene achene ticaijuhe me Viya. Váhivare pipicacaracavahini eta péchajisihairahi eta náichavaquenévanahi nácani achaneana, tayanapanehi aquenucahi. <sup>17</sup> Vivarahahisera viyaserecaviyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

<sup>18</sup> Émasera ema Jesús máimatiacavacapa eta taurivapahi eta napanereruana. Tacahe, máichavacapa:

—¡Apimirahetataji! ¿Tájaha tacayema evaraha ímiaquipaicanu?

<sup>19</sup> Nímahaseji, iáminanu étapena eta reale —máichavacapa.

<sup>20</sup> Eta náijarasirapa, éma máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

<sup>21</sup> Éna najicapapa:

—Mayehe ema Presidente Emperador —náichapa.

Tacahe, éma máichavacapa:

—Tiuri, táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma — máichavacapa.

<sup>22</sup> Te nasamapa ema Jesús eta majicapiravacahi, ichaperinehi titsirihacavanahi. Náramipa eta máitupajijiasiravahi. Tiyananapa tichavanahi.

*Nayasereca ema Jesús náicharacavayarepuca ena náepenaqueneana eta náechepusirayare*

*(Mr 12.18-27; Lc 20.27-40)*

<sup>23</sup> Étarichu te jena sache, nacahepaipahi ena saducéoana. Ena nani saducéoana, apanahivare eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Natanucahi eta táetseraruvayarehi náicha. Ánipa nacahe:

<sup>24</sup> —Tata maestro, ema víyarahaini Moisés, manaquicahi eta máechajiriruvahi eta viyehe: “Te máepenaquenehahipuca ema achane esu mayena, tásiha nájinahipuca manaquiequeneruvainahini machichainahini; te matiarihhipuca mácani maparapehi, mavehayare esu machinenaequenéni, apaesa émainapuca macachicha eta suyehe, máitsivainahi ema maparapéni”. <sup>25</sup> Tacutiquene te juca vitaracu, natiarihinahi ena siétequeneana ticaparapejiricacana. Tacahe, ema náechavimuri títauchavapa. Máepenaequenehapasera esu mayena. Nájinahi machichainahini. <sup>26</sup> Tacahe, ema maparape máitauchavare esu machinenaini. Énerichuwaresera máepenaquenehavare, nájinavare máchichainahini. Ema émana maparape máitauchavare ésu. Énerichuware máepenaquenehavare. Namutupa ena siétequeneana navehahi ésu, tásihasera náepenaquenehapaipa, nájina émanainahini macachichahini eta suyehe. <sup>27</sup> Te táequenepa, tépenapa esu esenaini. <sup>28</sup> Tacahe puiti, te apanapapuca eta náitaresirayare ena nani, ¿nájahapuca ena siétequeneana ema yátupiquenehi suímaquenehi esu esena, taicha ena siétequeneana namutuhi suímanarihi? —náichapa.

<sup>29</sup> Tásiha, ema Jesús majicapavacapa:

—Éjecapava éti. ¿Tájaha tacayema vahi ácaicutiarahini eta táimiturapi eta Sagrada Escritura? ¡Váhivare evarahahini esuapahini eta tamutuirahi marataha ema Viya! <sup>30</sup> Ánaqui te apana náitaresiraya, vaipa nácamunuimahi esu esena. Énaripa ena esenana, váipavare nácamunuimahi ema ajaira. Nacutinapa ena ángeleana tiávihanahi te anuma eta namaepenacacairahi. <sup>31</sup> Éti váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruva ema Viya. Ani macahehi éma: <sup>32</sup> “Nútira yátupiquenenuhi Viya, macasiñaquenehi ema Abraham, ema Isaac émapa ema Jacobo” macahepa ema Viya. Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenanaripa. Eta náchanevana, tímiyanavarichucha títareca te mamirahu. Éti, ichape eta éjecapiravahi —máichavacapa ema Jesús.

<sup>33</sup> Tacahe, eta nasamirahi ema Jesús, ichaperinehi eta náramirahi ena achaneana eta máimiturapihi.

*Eta tisuapacarepanahi te mavanairipiana ema Viya*  
*(Mr 12.28-34)*

<sup>34</sup> Tacahe, ena fariséoana eta náimairahi macamatinasiravacahi ema Jesús ena saducéoana, ticurujicacanapa éna. <sup>35</sup> Tásiha, tiyananapa náemejecapavachayarehi ema Jesús. Ema émana ticainapucavapa, máestrohi éma tayehe eta nayeherepiana. Mayaserecapa éma:

<sup>36</sup> —Tata maestro, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

<sup>37-38</sup> Ema Jesús majicapapa:

—Eta máechajiriruva ema Viya te Sagrada Escritura, ani tacahehi: “Yátupina eta émunasiranuina nuti Iáquenu. Iúnaca te esamureana. Yátupina eta ecachanevairanuina núti. Epanerecha eta nímiturapiana tamutu sácheana, yátiana”. Étara eta juca eta vanairipi tisuapacarepanahi. Éta tativayare ítauchayare, tínapuca tayehe eta apamuri vanairipiana. <sup>39</sup> Eta apana táehiruhi eta juca, ánivare tacahe: “Pémunacayare ema píparaepiyahi, tácuti eta pémunasiravahi píti”. <sup>40</sup> Eta juca apinaquene vanairipi, éta máehicahi ema víyarahaini Moisés tayehe eta apamuriana mavanairipianahi éma. Énaripa ena apamuriana profetana, étarichuvare náehicahivare éna tayehe eta náimiturapianahi.

*Yátupi ema Cristo mámariequenénihí ema rey David, Víyahivare éma (Mr 12.35-37; Lc 20.41-44)*

<sup>41</sup> Tacahe, eta náurujiasiraichaha ena fariséoana te machacaya ema Jesús, <sup>42</sup> máichavacapa:

—Puiti, nuvaraha nuyaserecahe eti: ¿Tájaha tacayema eta epanereruana éti mayehe ema Cristo ema ecuchapaquenehi? ¿Tájaha eta ícutiarayare eta ímatirayarehi éma te máimerecavapa? —máichavacapa.

Éna najicapapa:

—Vímatinapa éma taicha tiúchucayare mámariequenezare ema víyaraháini rey David —nacahepa.

<sup>43</sup> Majicapavarepa:

—Yátupihí ema Cristo achanequenehi eta máimahi taicha mámariequenezarehi ema víyaraháini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: <sup>44</sup> “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. <sup>45</sup> Ema David, eta máimijarechirahi ema Cristo “Tata Náquenu”, ¿tájahapuca eta macayemaquenehi? Núti németeaca Víyahivare ema Cristo. ¿Tájaha íchahi éti? —máichavacapa.

<sup>46</sup> Eta nasamirahi eta juca, nájina náijaracavahini najicapahini. Eta tacahe, nájinapa napatsicavahini nápechahini nayaserecahini.

## 23

*Ema Jesús máimereuchavaca eta nájecapiravana ena fariséoana énapa ena es-cribánoana*

*(Mr 12.38-40; Lc 11.37-54; 20.45, 46)*

<sup>1</sup> Tacahe, ema Jesús máichavacapa ena achaneana vítipa viti máimitureana. Ánipa máichahavi:

<sup>2</sup> —Ena escribánoana énapa ena fariséoana tímijachavana catuparahana eta navepaisirayarehi eta mavanairipiana ema Moisés. <sup>3</sup> Tacahe, éna es-uapayare. Ítauchayare eta navanairipiana. Váhisera ecuehica eta nayeherepiana taicha ena apapipijichucha eta napanereruana. <sup>4</sup> Tacutiquene tipamicaheana ítauchaya eta camuriqueneana nayeherepiana. Éti, tájina eta

ejapanucarehíni nayehe. Nájinapa tiratahaimahi títaucha. Apanasica éna, vahi náratahahini náitauchahini tamutu. <sup>5</sup> Tímijachavanahi tamutu náitaucha, navarairahi ticunachacareanayarehi nayehe ena achaneana. Tisiñavavaicanahi eta nápajusiravahi religiósóana. Nanacahi te nanahuana eta ajureca navejurehi eta te Sagrada Escritura. Tacutiquene eta nacamuirihaira tísapepeacavanahi píncanillanahi. Ticamatsivacahi eta nacamuirihaira. <sup>6</sup> Ena nani, te ticaichuasiana eta nanisiraya, éna tinerejisinavanahi eta tiúripánána eta náejasihaya. Navarahahivare ichape eta napicauchiraya ena achaneana te náurujisirarevanahi. <sup>7</sup> Tétavicavahi eta navarairahi ticapicahuana. Navarahahivare ticacajamicasianayarehi te jácani nácapajisiha ena náimitureana téhepahi calle.

<sup>8</sup> Étisera vahi ecujamuracha eta nacajamisirahenahini ena achaneana, étainapapucaini nacunachirahenahini. Taicha éti eparapejiricacahi, ecuticacahi te mamirahu ema Viya. Nucarichu núti yátupiquenénuhi eyehenuhi Maestro, nuti Cristo. <sup>9</sup> Váhivare “Tata Nucaiyaquene” ecuquicha nácani achaneana te juca apaquehe. Taicha mararihi ema yátupiquene Ecaiyaquene, ema tiávihi te anuma. <sup>10</sup> Váhivare tísapacarémahí eta náimijarechahe, “Tata nuyehe jefe”, taicha nucarichuhi núti yátupiquenénuhi jéfenuhi eyehe. <sup>11</sup> Nuvarahasera ítátijiricacayare. Nácani títátirahiana, éna ticunachacarepananayarehi eta eyehe. <sup>12</sup> Énerichuvare nácani mánsuanahi, éna ticunachacarepananayare me Viya. Nácanisera ticasíñavavaicanahi ticunachavanapuca, tímitsiriávanayare me Viya —macahepa.

*Ena Jesús mayunacavaca eta nájecapiravanahi ena escribánoana énapa ena fariséoana*

<sup>13</sup> Tacahe, títecapanapa ena escribánoana énapa ena fariséoana. Tásiha, ema Jesús máechajicavacapa éna, mayunacavacahi. Ánipa macahe:

—¡Éti escribánoana étipa eti fariséoana! ¡Muracayare eta ícuñayare taicha eta apimirairahehi! ¿Tájaha tacayema ímijachavahi éti echa eta tapaja eta anuma? Vahi ísapa nasiapahini ena achaneana, nácani tivarahana tisiapana. ¡Étiripa vahi ítujicavaimahi esiapa!

<sup>14</sup> Jucarihi eta apana tiviuchahehi. Tatuparacahi ejapanuyare ena tépenaimana te váhipuca narataha navachachahini eta nantéve. Étisera everejicavacahi tamutu eta nacayehequeneana. ¡Apimirahehi! Épiyacavahi religiósóhehi, íchahi iúpiemahi eta eyujarasira te namirahu ena achaneana, evarairahi vahi tacuimicaecherachava eta emaurivanahi. Ichapeyare eta ícuñayare táicha.

<sup>15</sup> ¡Jucarihivare eta apana tiviuchahehi, éti escribánoana étipa eti fariséoana! ¡Muracayare eta ícuñayare taicha eta apimirairahehi! Éti, tétavicavahi eta éñamavairahi eta íturuca ena téhicana eta ímiturapiana, eyanirahi te avasareana tiyerehiana. Tasapihahi ímitucavacahi eta nacutiheraya eta evainarajivahi. Tiápajucava eta namaurivahi ícha. Eta tacahe, ecachanevacayare éna te yucu infierno.

<sup>16</sup> Jéhevare éti ecaijare páurehe. Ichape eta ícuñayare taicha eta ímiaquipaisiravacahi ena ecutiqueneana púchuquiana. Éjecapavahi tayehe eta juca ímiturapihi. Ímituca eta tájinahi eta taviuchaimahi nácani najurachahi eta Templo. Étasera te najuracha tayehe eta oro eta tiávihi eta te Templo, ticaviurevanainapa ícha éti. <sup>17</sup> ¡Tétavicavahi eta emaecharaireva eti púchuquiana! Eta Templo, étara tipicauchacarepanahi tayehe eta oro tiávihi tayehe.

<sup>18</sup> Iápechavavare eta éjecapiravahi tayehe eta apana ímiturapi. Éti íchavare:

“Te náichapuca nácani eta promesa, najurachapuca tayehe eta náijuchirare eta sárareana, tájinaipavare ticaviurémahi. Téhesera najurachahi tayehe eta nanaquiruvahi te táinahu eta náijuchirarehi, étasera ticaviurevanaripa” íchahi éti. <sup>19</sup> ¡Tétavicavahi eta emaecharaireva eti púchuquiána! Eta náijuchirarehi eta sárareana, étara tipicauchacarepanahi tayehe eta enaquiruvanahi. Éta tímipicauchahi eta enaquiruvanahi. <sup>20</sup> Taicha nácani tijurachanahi tayehe eta náijuchirarehi, vahi tácarichuhini napicauchayare éta, napicauchayarehiva tamutu eta námavahuana tiávihanahi te náijuchirarehi. <sup>21</sup> Tacutiquene nácani tijurachanahi tayehe eta Templo, vahi tácarichuhini náichahini eta juramento tayehe eta Templo. Najurachahivare mayehe ema Viya tiávihi tayehe. <sup>22</sup> Énaripa ena tijurachanahi tayehe eta anuma, najurachahivare mayehe ema Viya, taicha eta anuma étahi eta mávasa, étaipa eta máejasihahi ema téchahi tamutu.

<sup>23-24</sup> ¡Jucarihivare eta apana tiviuchahehi eta tamuracavaya eta ícuñayare, éti apimirana! Éti ímijachavahi íminecapaequeneha ena ecutiqueneana púchuquiána tayehe eta títucacareana. Ímijachavahi yátupiquenehi eta religiósohéirahi eta epamisiravahi eta ítauchira eta vanairipi eta ecamavahuirá me Viya eta diésmuri tayehe eta sucurecana. Ecunachacarehi taicha éta. Váhisera epamicavahini eta táuriqueneana ticunachacarepanahi me Viya. Tatuparacahe emutu ájapanurahi; ecatiuchavacayarehi ena macatiuchavarahanahi; yátupina eta ítauchiraya tamutu eta íjarasiravahi; yátupina eta ecasiñavairaina me Viya. Tatuparacahehivare ecamavahu eta me Viya eta diésmuri. Éti éñamavahi eta ítauchirahi eta ánichichana, étasera eta tisuapacarepanaqueneanahi táuriqueneana, tasapihahi vahi esuapahini\*.

<sup>25</sup> ¡Tétavicavahi eta apimirairahehi! Éti ímijachavahi yátupiquenehi religiósohehi, ecañamaracavahi eta ímiyaniravaya ítaucha eta eyeherepiana. Étasera eta esamureana, tétavicavahi eta tachipejivavacahi taicha eta ecaetemaraivana étapa eta íjarasiravahi icha tamutu eta ejamuraraivana. <sup>26</sup> ¡Tétavicavahi eta epuchuquiva eti fariséoana! Tamapurujihí eta religiósohéirahi. Tacamunuhi tativa esipaca eta esamureana, apaesa yátupinasarepa eta iúrivayare, tipachinainapa eta ítaresiraya.

<sup>27</sup> ¡Tétavicavahi eta ecatajivairaya, táichavenehi eta apimirairahehi, eti escribánoana étipa eti fariséoana! Éti ecuti eta covacha. Tiúrinahi te táinahu, téhesera te amahe távihi eta máeperejiqueneana. <sup>28</sup> Tacahehi eta ítaresirahi éti. Ticutimahinehi iúrihi te namirahu ena achaneana. Étasera te esamureana táurujisiavahi eta evainarajivana, tacutiquene eta apimirairahehi.

<sup>29</sup> ¡Páurehesamichapucaini eti escribánoana étipa eti fariséoana! ¡Chape-muriquene eta eviurevanahi! Eti, ímijachavaipahi puiti ecunachacarehi eta evarairahi échapajirica eyeheheacahi eta náecariana ena profetanaini matapiravarequeneanahi, nacaparuanahi ena iáchucanaveanaini éti. Épiyacavahi yátupiquenénahini eta iúrivahi. <sup>30</sup> Tásiha, ánivare ecahe: “Te vitiaripahini víti eta acane te ticaparecanapa ena viáchucanaveanaini, vahi vicuimicasiapavahini tayehe éta” ecahepa. <sup>31-32</sup> Étijivapa ímereuchavahi eta apimirairahehi, taicha puiti éti epanerechahi ecapacanuya, tacutihi eta napanereruanahi ena iáchucanaveanaini. Tásiha, ecuticacayare eta naviurevahi ena iáchucanaveanaini.

<sup>33</sup> ¡Éti tachichanaveanatataji eta quichare, tétavicavahi eta evainarajivahi! ¡Váhiquene ticaitechémahi eta ícuñaya te infierno! <sup>34</sup> Nímicaecherachayare

\* **23:23-24** Ani tacahe eta mayeherepi ema Jesús te máechajiriruva: “Eti ecatiijica eta chupi; ejiricasera eta camello”.



eta evainarajivahi. Nuvanecayare napauchahe ena nuchanerana. Éna, timetacaheanayare eta mapanereruana ema Tata. Tímitucaheanayareva tamutu eta nímiturapiana. Nasapihayare vahi esuapaimahi éna. Éna, yátupihí náituca. Émepururecayaresera éti eta náitupajjiasiravahi éna. Esapihainapa, éti ecapacavacainapa éna; ena apamuriana éméttacayare te crusu. Tásiha, ena apamuriana éstacavacainapa te iúrujisirarevana. Éhicarairicavacainapa te jácani avasareana najunaiyayarepahi.

<sup>35</sup> Tásiha, eta ecapasiravacainapa ena nuvaneruanahi, étinapa tamuriacayare eta naviurevanahi namutu ena ticapacanahi ena achaneana matapiravarequeneanahi. Ema Abel máinapuiruhi nacaparuhi, máetaviuchainihi eta máuriva. Émapa ema máequenereruhi Zacarías (machichainihi ema Berequíás), ema nacaparuhi te tamirahu eta Templo. Camurianahisera ena apamuriana náumurivanainihi. <sup>36</sup> Nutupiruva numetacahe puiti: Étinapa tamuriacayare tamutu eta náepeniranahi. Títecapainapa eta ícuñayare eti achaneana ítareruanahi puiti —macahepa ema Jesús.

*Ema Jesús ticatisamurevahi táichavenehi eta namasuapajiraivahi ena achaneana ticavasanahi te Jerusalén*

*(Lc 13.34-35)*

<sup>37</sup> Tacahe, ema Jesús tiápechavava máechajicavacapa ena achaneana. Ánipa macahe, taicha eta macatisamureravahi:

—¡Tétavicavahi nucatisamureravahi ícha étisami eti tachichanaveanahi te juca viávasa Jerusalén! Ena iáchucanaveanaini, éna ticapapajicanahi ena profetana mavaneruanahi ema Tata. Puiti étipavapa evaraha ecutiya ena iáchucanaveanaini. Ichapemurihinéhi eta níchuirahéhi éti, iúrujiacanuhini, tácutihini eta varayu te tacurujimuriha eta tachichanaveana eta te tapava. Váhisera ávarahahíni. <sup>38</sup> Ímahainapasera puiti eta íchararacavayare. Ticaqui-paicasiyare tamutu eta epenana, étiripa ticuchucaheanainapa. <sup>39</sup> Numetacahévane puiti vaipa iápechavaimahi ímahanu, tiámainucavainapa te ítsivachapa eta epanereruana, evarairayare ejacapanu. Ecahénapa: “Ichape eta vicunachiravihi píti vanairucaquenévihí me Viya” ecahénapa.

## 24

*Ema Jesús máimereucharipa eta táquipaisiravaya eta Templo*

*(Mr 13.1-2; Lc 21.5-6)*

<sup>1</sup> Tacahe, ema Jesús tiúchucapa tayehe eta Templo, tiyanayarepaini. Vítisera víti máimitureana vémeñahavapa eta mayehe. Eta viáramirahi, vímechapa eta táurinaqueneana mari tayehe eta anuquehe peti te Témplosami. <sup>2</sup> Émasera ema Jesús tijicapahavipa:

—Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járajapayare eta sáchezare ticaqui-paicasiyare tamutu eta juca Templo. Téjanerepaicainapa tamutu eta juca táurinaqueneanahi ímahaqueneanahi puítí —máichahavipa.

*Tatarihiyare eta ecutiarareanaya te tánehipaicha eta táichecuiraya*

*(Mr 13.3-23; Lc 21.7-24; 17.22-24)*

<sup>3</sup> Tásiha, viyanapa tayehe eta cerro Olivoquiji, víputsicavapa. Te vítecapapa, téjacapa ema Jesús. Tásiha, víti máimitureana viyaserecapa:

—Vivaraha pimetacahavi. ¿Tájamuhupuca eta náimiaquipaisirayare eta Témplosami? ¿Jararihiyarepuca eta ecutiarareyare eta piápechiravayare píteca, étapa eta táitauchirayare eta táequenereruhi mapanereru ema Viya? —víchapa.

<sup>4</sup> Tásiha, ema Jesús máichahavipa:

—Ecuneuchavaicha yátupina, machu navayuacahe, taicha nárájapayare ena tépiyacavanayarepahi tímivasichavanayare nuyehe. <sup>5</sup> Nacaheyarepahi éna: “Nútiripa Cristo”. Nasapiha navayuacayare ena camuriana achaneana.

<sup>6-7</sup> Énerichuvare esamairiricayare eta táehacacairayare eta ichapequeneana avasareana. Ticanarajiricacanainapa eta te avasareana tayerehiqueneana, énerichuvare ticauyayacarenapa guerraina eyehe éti. Váhiserá ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecuirayare. Énerichuvare tatiarihiyareva eta ichape ecuhamuhuyareva te avasareana. Tatiarihiyareva eta ichape tayamurisiranaya eta apaquehe te jácani távihanapahi táetupiaruyare. <sup>8</sup> Tamutu eta juca ecutiarareanayare eta táepaniravayare eta nátajivanayare ena achaneana.

<sup>9</sup> Tásiha, eti nuchaneranahi, ticianacaheanainapa ena achaneana, táichaveneyare eta éhisiranuhi. Tipanajiricaheanainapa te tamutu avasareana. Ticaratacaheanayareva. Ticapacaheanayareva. <sup>10</sup> Tásiha, nararihinapa camurianaya ena tínajicavanayare eta náehisiranuhi. Tásiha, ticianacaheanainapa éti yátupiquene eta éhisiranuya. Tíjararecaheanainapa éti. <sup>11</sup> Natiarihinavarepa nácani tépiyacavanayare mavaneruana ema Tata. Tamutusera eta náimiturapiana náepiyahiraivayarechucha, camurianayare ena navayuaruanayare. <sup>12</sup> Énaripa ena arajuruana, tétavicavainapa eta namasuapajiraivaya, vaipa napícauchaimahi ema Viya. Camurianayare éna vaipa témunarahianáimahi. <sup>13</sup> Étiserá nuchaneranahi, te ecamichahi tamutu, ímiyanavahivare eta éhisiranuhi te táitavapa tamutu, nucuchucuhaheyare núti.

<sup>14</sup> Énerichuvare, eti nuchanerana ecametarairuyare te tamutu avasareana, taicha nuvaraha náecha namutu ena achaneana. Ímitucavacayarehi eta najacapacarevahi me Tata namutu ena téneuchavanahi, étapa eta apamuriana nímiturapiana. Te ítecapapa te tamutu eta avasareana, nápechavayare nuchava.

<sup>15</sup> Numetacahevanevare eta apana. Járájapayare eta sache táíñehiquenezare. Tímerecavaya ema achane váinarajiquene, máechajisihaquenehi ema víyahaini profeta Daniel. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuanayare eta májurehi ema víyahaini Daniel.) <sup>16</sup> Tásiha, te ímahapa eta juca, esamairicapapuca, táuricapa etatajipa ejunavane, éti etiarihiqueneanahi te Judea. Ecaijuheyare eta te céroana, étaina eyumuru-siavaina. <sup>17</sup> Nácani tiávihanahi te nayehe canchón te nasamairicapuca eta juca téchacarehi, táuricapa najunavanepa. Vaipa táuricahini nasiapanumahini te napenana, navehahini jácani náeñamaqueneanainihi. <sup>18</sup> Nácani tachimaruaruanayare te vámahi eta téchacarehi, táuricapa vaipa nacuchava tayehe eta avasare, tayanapane náeñamahi eta nayereruvana. <sup>19</sup> ¡Páureanasami nácani esenana tachimaruaruanayare, nácani ticajarianahipuca, nácani esenana ticachichanahi eta amuya tiájicachaha! <sup>20</sup> Eta tacahe, eyaseacayare ema Viya tacuija táichejicahe\*; váhivare tacuchimaracahe eta ichape tiquiva te achene te eyanapapuca ejuna. <sup>21</sup> Te jena sácheanayare, tétavicavayare eta nacatajivairayarehi ena achaneana. Tájina tácutimahi eta táíñehivayare eta nacatajivairayare, te táepaniravahi eta náitairesirahi ena achaneana te

\* **24:20** Ema Jesús máechajisihahi eta ticasarahimuhu, tiquivamuhuhivare te jena mávasa Judea. Máechajisihahivare eta nayeherépi ena israelítana eta váhiquene náisapavahini tiyanana tipaicana te jácani sávarumuhua.

juca apaquehe. Te táequenénapa eta tíñehi, tájinainapa tácutimahi. <sup>22</sup> Nájina tacaitiruimahi eta nacatajivairayarehi ichape. Macaichecavaneyaresera ema Viya eta masemavahi ema maca achane váinarajiquene, mavarairahi ema Viya macuchucuhavaca ena machanerana manerejiruana, majapanuqueneanahivare. Taicha te vahi macucaicheca ema Viya, máitamurihahipucaini macapapajicavaca namutu ena achaneana ema maca achane.

<sup>23-24</sup> Énerichuvare te tánehipaicha eta juca, natiarihinapa ena tivayuarahiana tépiyacavanayare Cristo tímivasichavanainapa núti. Natiarihivare ena tímicutijiricavanayare profetana mavaneruinahini ema Viya. Áninapa nacaheyare: “Yare, éhicayare ema Cristo. Matiarhipahi te juca vitaracu”. Ena apamuriana ánivare nacaheya: “Náepiyahiraivahi éna. Ema Cristo mávihahi te viávasa víti”. Étisera vahi ecusuapavaca. Eta navarairahi tivayua-caheanaya eti machanerana ema Tata, náituruequenehayare naicha eta ichapequeneana tiáramicareana ecutiarareanayare. Camurianasamiyare ena navayuaruanayare. <sup>25</sup> Étisera vahi tivayua-caheanaimahi taicha numeta-cahevanehi puiti. <sup>26</sup> Te náichahepuca: “Ímaha máenahi ema Cristo ánaqui te mávapahi apaquehe”, vahi ecuyana. Étaripa te náichahepuca: “Mararhipa jácani tayumurevaquenehi cuarto. Vicarichu víti vímatihi eta mávihahi”, váhiquenevare ecusuapavaca. <sup>27</sup> Taicha te yátupinapa eta nítesirayare núti, nuctiyare eta tájahúchirava títecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerejirunuhi ema Viya. <sup>28</sup> Vahi ecueñamava távihapuca nítecapihaya. Núti nítecapauchaheya te jácani iávihahi éti†.

*Eta machavirayare ema Manerejiruhi ema Viya  
(Mr 13.24-27; Lc 21.25-33; 17.26-30, 34-36)*

<sup>29</sup> Tacahe, te táitavapa eta juca nacatajivairaya ena achaneana, enévanénapa témahainapa eta sache. Étaripa eta caje, témahainavarepa. Témiricanainapa eta jarairiquiana. Étaripa eta tiávihanahi te anuma vímaimahaqueneanahi énerichuvare tiyamuricanainapa, tiyejejecavanainapa. <sup>30</sup> Tásiha, náimahainapa te anuma eta nícutiara núti Manerejirunuhi ema Viya. Tíyahanainapa eta napisira namutu ena achaneana távacuanahi eta avasareana te apaquehe. Tásiha, tímahanuanainapa núti. Tiámanuinapaipa eta úcaji eta núcupaisirayare. Tétavicavayare eta nujaraivayarepahi, níñehinapaipa. <sup>31</sup> Nuvanecaya ema Arcágele, muracayare eta macachujairayapahi, apaesa ena ángeleana nacurujicainapa namutu ena nuchanerana nunerejiruanahi, tiásihanayare te tamutu eta juca apaquehe.

<sup>32</sup> Tiuri puiti, nuvaraha nímicutichinahe eta jácani yucuqui. Eta táitsivachiravavacapa eta tapacajiana, te ímahapa eta tajimuyairapa eta tatavaqui, tiúchucayarepa eta tapacajianaya arairu, tímaticarehi tiánehiripa eta únemuhuirayarépa. <sup>33</sup> Ene tacahehi, te ímahayarepa tacaecherapa eta júcana ecutiarareana, ímatiacainapa eta tánehirainapa eta nuchavira. <sup>34</sup> Numeta-cahevanecha: Vuíchaha títavanaimahi ena achaneana náitareruanaihaha te táitecapapa eta júcana ecutiarareanayare. <sup>35</sup> Títavainapa eta anuma étapa eta apaquehe. Tativayaresera títauchava tamutu eta numetaruheanahi.

<sup>36</sup> Eta juca tiáramicareyarechucha. Nájina téchaimahi tájamuhuyarepuca eta táitauchiravayare, énaripa ena ángeleana vahi náechahini. Nútivanerécahipucáini néchahini. Macarichu ema Tata, ema téchahi. <sup>37-38</sup> Tacutiyare eta

† **24:28** Te máechajiriruvahi ema Jesús, áni macahehi: “Te jácani mávihahi ema máepenaquene, eta távihayare eta sipuquiana”. Eta juca mayehehi proverbio, tatiarihi eta tacayemaquenehi tayumurevahi.

acane eta nájahúchiravahi tépenana ena achaneana machamurianaini ema Noé. Ena nani tinicairihianarinecha, náematanerinecha térana, tímarerecanahi ena nachichanaveana. Vahi téñamavanaimahi eta náimairahi ema Noé eta masiapirahi tayehe eta ichapequene pacure. <sup>39</sup> Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sáchezare. Vahi natsecavahini tayehe eta nuchaviraya. <sup>40</sup> Te jena sácheanayare, natiarihiyare ena apinana ajairana ticaematanenahi te isaniti, ema émana tiáramicareyare tiára. Ema apana manasinapa. <sup>41</sup> Tacutiquene, apinanahipuca ena esenana cáemataneanahi tiyuvarecanahipuca. Énerichuvare esu ésuna tiáramicareya tiára. Esu apana sunasinapa.

<sup>42</sup> Eta tacahe, etsecavahi ecauneuchava éti machu vahi ecunecapauchava eta nítésirayarehi nuti Iáquenu. <sup>43</sup> Nuvaraha ácaicutiaraquenéna. Machu ácutiriana mácani achane námeyeruhi ena tiámerahiana. Tájina máechapiavahini tájahapuca hóravayarehi eta náitecapauchiraya te mapena. Te máechapucaini, ticauneuchavaipahini éma, váipasare nacuameyechahini. <sup>44</sup> Eta tacahe, éti ecuneuchavayare tamutu sácheana, taicha vahi échahini tájamuhuyarepuca eta nuchavirayare nuti Manerejirunuhi ema Viya, machu iáramecariana.

*Nararihi ena músuana tiúriana. Nararihivare ena músuana máurirahana.*  
(Lc 12.41-48)

<sup>45</sup> Tiuri, nuvaraha nímicutichinaheyare eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava ema máquenu matuparacahi ema empleado eta máijarasiraya eta tinicacareana ena apamuriana machamusuvanahi. <sup>46</sup> Tétavicava eta máuricacarevaya ema maca ticatuparahahi, te tamutuhi máítauchahi jácani machimampirana ema máquenu. <sup>47</sup> Németeaca, eta tamutuirahi tiuri eta machimampirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tiúrihi eta máitauravahi. <sup>48</sup> Téhesera váhipuca tiuri eta mapanereruana ema mácani empleado, máimijachaichucha tiyereyarehi eta máitecapirayarehi ema máquenu. <sup>49</sup> Tásiha, macaetemajiricavacapuca ena machamusuvanahi. Máichapapuca eta piesta, tinahacavapa téra macachanevacahi ena macutiqueneana téarahiana, téniricapa. <sup>50</sup> Tásiha, vaipa manecapauchavahini te títecapapa ema máquenu. Machimaracapa ema empleado eta mamapachichijisiraipa eta máimahaqueneana. <sup>51</sup> Eta tacahe, ema máquenu macavanairipinapa náestacayare muraca. Tájina najapanuhini, tayanapane máiyahainepuca, macapitiquiahechavainepuca éma. Tásiha, machu ácutihini ema maca empleado máurirahahi, machu ecaquipaicasisami eta te yucu infierno.

## 25

*Ena Jesús máimicutichina ena diésqueneana amaperuana esenachichana*

<sup>1</sup> Puiti nuvaraha nímicutichinaheyare nayehe ena tiúchucuhanaya ticachanenuanayare eta néjasihaya eta návacureya, énapa ena vahi ticachanenuanaimahi. Ena nani nacutihi ena diésqueneana esenachichana amaperuana. Ticuchapanahi ena araimanayare, nácapirayare te nasamapa eta náitecapiraya. Tiámauchavavacapaipa eta namicahuana lámparinana. <sup>2-4</sup> Ena cincoqueneana, téchemarahianahi. Tiámauchavavacapahi eta nabotellana eta aceite natseruvapahi. Ena apamuriana cincoqueneanahivare máechemarahana mapanererureana. Vahi námauchavapahina eta nahaceitayarehi. Tásiha, tájinapa naviyahini. <sup>5</sup> Tacahe, vahi náitecapavanehini ena araimana.

Navarahaipahi tímacana éna. Tavehapa eta ichapu, tímacanapa. <sup>6</sup> Tacahe, te enumuhupa yati nasamapa ema tipiaracahi. Ánipa macahe: “¡Nárajapa ena araimanayare! ¡Yare iácapa!” nacahepa. <sup>7</sup> Téhepucanapa namutu ena esenachichana. Náetupiricapa eta namicahuana. <sup>8</sup> Tásiha, ena cincoanavare tiájicuvacaipahi eta namicahuana. Tiyaseserecanapa eta aceite. Ánipa nacahe: “Ecatajicahavi ecajihavi eta eyehe aceite, taicha tiájicuvacaipahi eta juca vimícahuana, vémahequenehaipa” nacahepa. <sup>9</sup> Énaserá ena cincoqueneana najicapapa: “Vahi víjaracahémahi machu véchuriaca víti apanava. Vahi várataimahi. Tiúripana eyana evachareca eta ehaceitena” nacahepa. <sup>10</sup> Tásiha, tiyananapa tivacharepananayarehi eta aceite. Eta nayerevapahi, títecapananecha ena araimanayare. Tisiapanapa te tajuhe te távihayarehi eta piesta. Náehicapa ena cincoana natseruvanahi te távihayarehi eta piesta. Tacahe, ticaeratapa eta tapaja. <sup>11</sup> Te tiyerepa, títecapanapa ena apamuriana esenachichana. Náehahamecapa eta tapaja. Ánipa nacahe: “Tata, tata, pivejieuquenehahavi. Vivaraha visiapa” nacahepa. <sup>12</sup> Émasera ema arayanayare majicapapa: “Eti, ¿nájahahhipuca? Vahi nímatihe. Németeaca vahi étina tavanaranaina eta peti” máichavacapa ema arayanayarehi.

<sup>13</sup> Tacahe, ema Jesús máichahavipa:

—Éti, vahi ecucuti ena máechemarairahana. Ecutiyaresera ena téchemarahiana. Ecuneuchavaicha éti, machu vahi ecunecapauchava eta jácani sácheyare eta nuchavirayare núti Manerejirunuhi ema Viya.

*Éma Jesús máimicutichinavaca ena achaneana ticaijaracasianahi eta maplatane ema achane rico*

<sup>14</sup> Puiti nuvaraha nímicutichinahe tayehe eta níjarasiraheya eti nuchanerana eta evacurecana taicha eta táurirahi eta ecaemataneasiranuhi. Matiaríhi ema achane rico. Tiyanayarehi te apana avasare. Máichuhavacapa ena mapanana mamusurana. Máijaracapa eta maplatane.

<sup>15</sup> Éma achane máimatívacahi eta náechemaraivahi ena mamusurana. Éma émana máijaracapa cinco millone. Éma apana máijaracapa apina millone. Éma apana máijaracapa étana millone. Nacaejapacayare eta plata. Tásiha, ema rico tiyanapa te macaijuheyarehi te apana avasare. <sup>16</sup> Tacahe, ema tijacapahi eta cinco millone, macaemataneacapa eta plata. Macaejapacapa eta plata. Diez millonepa maicha eta maplatane eta macaejapasirahi. <sup>17</sup> Éma apana, ema tijacapahi eta apina millone, énerichuvarepa macaejapacapa eta plata. Títucavavare éma eta cuatro millone eta plata. <sup>18</sup> Émasera ema tijacapahi eta étanaichu millone, vaipa macaejapacahini eta plata. Máecarapa eta plata, mapisirahi eta macaetehahini.

<sup>19</sup> Tiyere eta mapairirisirahi ema náejaharu. Téhesera te tichavapa, mayaserecavacapa eta plata máijararuanahi éma. <sup>20</sup> Tacahe, tínapucapa ema tijacapahi eta cinco millone. Máijaracapa ema máquenu eta máiturevahi. Ánipa macahe: “Tata, píti píjaracanuhi cinco millone eta plata. Júcahisera cinco millonevare eta táejapasirahi”. <sup>21</sup> Éma máejaharu majicapapa: “Tiuri, nuchicha. Tájiina táichava. Tétavicava eta piúriava. Pítauchahi eta pícaemataneasirahi eta nuplatane. Puiti vahi támapurujimahi eta piúrivahi tayehe eta juca ánimurichichahi níjararuvíhi. Nutuparacavinapa eta camuriquene. Puiti pisipainapa eta nuyehe. Piúrisamurereacaváinapa”. <sup>22</sup> Tásiha, títecapavarepa ema apana ema tijacapahi eta apina millone eta plata. Máichavarepa: “Tata, júcahi eta apina millone eta plata píjararunuhi. Júcahivare eta apinavare millone eta táejapasirahi”. <sup>23</sup> Éma máejaharu majicapavarepa: “Tiuri, nuchicha. Tétavicava eta piúriava píti apana. Puiti, váhivare támapurujimahi eta piúrivahi



tayehe eta juca ánimurichichahi níjararuvihi. Nutuparacavinapa eta camuripanaquene. Puiti pisiapainapa eta nuyehe. Piúrisamurereacaváinapa”.<sup>24</sup> Tásiha, títecapavarepa ema tijacapai eta étana millone. Máichapa ema máejaharu: “Tata, núti nímativihi eta pimajapanuraivahi. Piverejicanuyarehi eta táejapasirayarehi eta piplatane. Pítahacanuyarehiva eta nématanevachahi.”<sup>25</sup> Eta nupisirahi nácaetehahini eta piplatane, nécarapa. Puiti, júcahi nímicahava tamutu eta piplatane”.<sup>26</sup> Ema máejaharu majicapapa: “Tétavicava eta pisunsuva, piti plújutataji. Te pímatinuhipuca eta numajapanuraivahi, nítaharahi eta apaematanevacha, téhevare pímiachahi nuverejicaviyare eta táejapasirayarehi eta níjararuvihi nuplatane; <sup>27</sup> váhiyapa pinacapai te banco eta nuplatane. Puiti váequeneipahini puiti eta táejahacaripahini eta nuchaviraipahi”.<sup>28</sup> Tásiha, máichavacapa ena apamuriana mamusurana natiarihiqueneanahi: “Everejica ema mácatataji eta plata. Íjaraca ema ticayehehi eta diez millone.”<sup>29</sup> Taicha, mácani máituruequenehahi eta macaemataneasirava, tatuparacahi eta nímicatasiraya. Ticayeheyare camuripana. Énaserá nácani vahí náiturequenehahini eta nacaemataneasirava, ticaverejicasianayarehi eta nájaracasianahi.<sup>30</sup> Émechareca muraca ema maca musu máurirahataataji. Vahi ecujapanu, tayanapane máiyahainepuca, macapitiquiahechavainepuca. Tásiha, iáquijica eta te cuarto tamapicujuhequenepanahi” macahepa ema achane rico.

*Ena achaneana, te jena sácheyare ticayaseserehianainapa, étapa tiámavacaya eta náitátirahi ena apamuriana, ticaevatanainapa tayehe eta návihayare*

<sup>31-33</sup> Te nuchava nuti Manerejirunuhi ema Viya, néjacainapa eta te nuyehe trono tacapicahuquene, Réynuinapa. Tásiha, névatacaya ena nuyeheana ángeleana nacurujicavacaya te numirahu namutu ena achaneana te avasareana. Tásiha, núti nunerejicavacainapa ena yátupiqueneanahi nuchanerana. Nunacainapa te nuvaure. Tásiha, ena vahí nuchaneranainahini nunacainapa te sapa.<sup>34</sup> Tásiha, nuti Rey ánipa níchayare ena nuchanerana tiávihanayarehi te nuvaure: “Yare, eti iúricacareanahi manerejiruanahi ema Tata. Níjaracahénapa eta etuparahayare, ícuchihi mayehe ema Tata acane te tépanavainapa eta apaquehe.”<sup>35</sup> Taicha te ímahanuhi eta nécuavahi, éti énicanuhi. Numaunepahi, éti íjaracanuhi néra eta une. Tájina nítecapihahini te nupaisihapai, éti íjaracanuhi eta nítecapihayare.<sup>36</sup> Tájina numuirihainapahini, éti emuriachanuhi. Nucajumahi, éti ípuchapananuhi. Nucaeratahi te cárcel, éti ejirapananuhivare”.<sup>37</sup> Tásiha, ena níchuhaqueneanahi tijicapapanainapa: “Tata, ¿tájamuhu vímahavihi pécuahapai, tásiha vénicavipa? ¿Tájamuhuvare vímahavihi pimaunepahi, tásiha víti vésichavipa eta une? <sup>38</sup> ¿Tájamuhuvare vímahavihi te pípaisirana tájina pítecapihahini, tásiha, víti víjaracavipa eta pítecapihahi? Váhivare vímahavihini mamuriarevinahini, tásiha víti vimuriachavipa. <sup>39</sup> ¿Tájamuhuvarehipuca picajumahi, tásiha víti vípuchapanavipa? ¿Tájamuhuvarehipuca picaeratahi, tásiha víti véjirapanavipa?” náichanupa.<sup>40</sup> Tásiha, nuti Rey nujicapainavarepa: “Nutupiruva numetacahe: Nútira íjaracanuhi tamutu eta ejapanuraivahi, ímicatasiravacahi ena echamuriana nuchaneranahivare, ena nani namaesachaqueneanahi najacapahini ena apamuriana ena achaneana” níchavacapa.

<sup>41</sup> Tásiha, ena tiávihanahi te sapa, níchavacainapa: “Étiserá évuishi te numirahu, eti masupajirairahana ecaviurevanahi. Eyana tayehe eta yucu, acanevacahéna eta ecaicuñaira eta emuruiraya, máicuchihi ema iáquenuhi ema Váinaraji énapa ena majupahana ángeleanainihi.”<sup>42</sup> Taicha te nécuahapai, éti vahí íjaracanuhi eta nunica. Numaunepahi, váhivare ésichanuhi

une. <sup>43</sup> Étaripa te nupaisiranapahi, váhivare íjaracunuhini eta nítecapihahini. Néchurihavare eta numuirihá, váhivare íjaracunuhini numuirihainahini. Nucajumahivare, nucaeratahare, váhivare éjirapananuhini” níchavacainapa éna. <sup>44</sup> Tacahe, éna náichanupa: “Tátachicha, ¿tájamuhu vímahavihi pécuhapahi, pimaunepahi, pipairiricapahi, mamuriarevihi, picajumapahi, picaeratahi, eta jácani vimáimicatasirávihipuca?” <sup>45</sup> Nuti Rey nujicapainavarepa: “Nutupiruva numetacahe: Éti, vahi ejapanunuhini, taicha vahi ájapanuvacahini apaesainahini ena nani nuchanerana emaesachaqueneanahi”. <sup>46</sup> Emutu éti eyanayare tayehe eta ecaicuñaiyayare máitavacayare. Énaserá ena nunerejiruana, matapiravareanahi. Nánavacainapa tayehe eta táurivayare eta náitaresira, máitavacacayareva.

## 26

### *Napanerechaipahi ena tuparairucana eta nacaratasirayare ema Jesús (Mr 14.1-2; Lc 22.1-2; Jn 11.45-53)*

<sup>1</sup> Te titapiricapa eta juca máimiturapianahi, máichahavipa viti máimitureana:  
<sup>2</sup> —Écharichuhi éti eta apinarine sache eta Pascuáiraya. Tásiha, núti Manerejirunuhi ema Viya, ticaratacanuanainapa témetatarecanuanainapa —máichahavipa.

<sup>3</sup> Tiuri, ena tuparairucana énapa ena aquenucarahana, énapa ena escribanoana ticurujicacanaripahi te tajuhe eta mayehe palacio ema Caifás, ema corregidor. <sup>4</sup> Tacahe, náechajisihaipahi eta nacaratasirayare ema Jesús. Navaraha éna navayuacayarehi eta nacaratasirayare, nacapasirayarehi. <sup>5</sup> Tipicacavanarichuchasera. Ánipa nacahehi eta náechajiriruvahi:  
 —Vuíchaha vicucarataca éma achichu juca piéstairaya. Taicha camurianyarehi ena achaneana, machu tájahapuca náicharachavi taicha navaraha-yarehi nacatiucha éma. Vicuchapasera nayana —nacahepa.

### *Esu esena tíamasichahi ema Jesús te táijiyequene perfume (Mr 14.3-9; Jn 12.1-8)*

<sup>6</sup> Tacahe, ema Jesús, tiyanapa tichava eta te avasarechicha Betania. Náichuhasivahi eta manisiraya te mapena ema achane ticaijare Simón ema leprosoinihi. <sup>7</sup> Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Táetaviuchahi eta tasivachavahi. Supauchapa éma. Sujucusicapa te machuti eta táetaviurehi eta táijiyeva. <sup>8</sup> Eta náimairahi ena nuchamuriana máimitureana ema Jesús, váiparinehi náuricahini eta suémepuresirahi eta tasivachaquene perfume sujucusisirahi ema Jesús. Ánipa nacahehi:

—¿Tájaha tacayema suémepureca eta juca tasivachaquenehi perfume?  
<sup>9</sup> Tiúripanahipucani víjararecahini eta juca táijiyemaquenehi. Vivehahini eta camuriquene plata; tásiha, vímicatasihahini ena páureana —nacahepa.

<sup>10</sup> Émasera ema Jesús máimatihí eta napanereruana. Tacahe, máichahavipa: Ésamirica esu suca esena. Tétavicavahi eta táuriva eta suíchiranuhi. <sup>11</sup> Ena páureanasami, tamutuchucha sácheana eta ecachaneravacayare éna. Ímicatayarehi te jácani ecaimahaquenérana. Nútisera vahi nánasiquenémahi eta eyehe. <sup>12</sup> Eta juca sujucusisiranuhi eta perfume, sucainapucahi ésu eta sujíyechirahi eta náquehe tayeheyarehi eta nucaecarasirayare. <sup>13</sup> Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

*Eta máijararesirahi ema Júlasí ema Jesús*  
(Mr 14.10-11; Lc 22.3-6)

<sup>14</sup> Ema Júlasí, émarichu vichamurinihi éma vidocenénihi apóstole mayehe ema Jesús. Tiyanapa téchajiripanavahi nayehe ena tuparairucana. <sup>15</sup> Ánipa máichavacahi:

—Te yátupihipuca evarahahi ecaratata ema Jesús, núti nímechaheyare. Nucamunuhisera néchayare ¿áyanayarepuca eta evachachanuyare eta nímechiraheyare eta mávirare? —máichavacapa.

Tacahe, éna náijaracapa eta treinta reale. <sup>16</sup> Jéhevarepasera ema Júlasí matanucaipa eta máicharacayarehi eta máijararesirayarehi ema Jesús.

*Ema Jesús máenimurihapa ena máimitureana*  
(Mr 14.12-25; Lc 22.7-23; Jn 13.21-30)

<sup>17</sup> Tacahe, títecapapa eta piesta Pascua, étaripa eta tínapuca sache eta semana vinicahi eta pan mayehere levadura. Viti máimitureana viyaserecapa ema Jesús:

—¿Távihapuca pivarahahi vácaijuhe eta vétupirisiavahini eta vinisirayare eta uvesachicha eta viyeherepi? —nacahepa.

<sup>18</sup> Éma tivanecahavipa:

—Eyana tayehe eta Jerusalén, te mapena ema nímaticasare. Ani íchayare: “Ema maestro tivanecahavihi eta piyehe. Ani macahehi: Tiánehipa eta nítavirayare eta nématanehi. Te pipena eta nunisihayare eta uvesachicha eta viyeherepi, nénisihayare ena nímitureana” íchayare.

<sup>19</sup> Tacahe, tiyananapa ena máimitureana. Étapaichuhi náichahi eta máimiturapianahi. Tinahacavanapa náetupiricahi eta naniruyare tayehe eta Pascua.

<sup>20</sup> Tacahe, te jena yátiquenehi ema Jesús, ténicahavipa viti dócequeneana máimitureana. <sup>21</sup> Te vinicaripahi, máichahavipa éma:

—Jéhesareinehi, te etaracu éti, mararihi ema émana tíjararecanuyare —máichahavipa.

<sup>22</sup> Tacahe, víti ichaperinehi eta máimipanereresirahavihi eta juca máichirahavihi. Vimutu viyaserecapa éma:

—¿Nútichupuca, Tata, jácani? —víchavacapahi víti éma.

<sup>23</sup> Tásiha, éma máichahavipa:

—Mácani néniruyare eta pan néchipaejiruhi te juca nuplatura, émara ema tíjararecanuyare. <sup>24</sup> Tacahe, núti Manerejirunuhi ema Viya, éta paichuhi eta nacapasiranuyarehi, táitauchiravayarehi eta nuyehe eta táechajiriruvahi eta Sagrada Escritura. ¡Páuresamisera ema tíjararecanuyare! Tiúripaichuhi-pucani vahi macuchuahini te sujuhe esu maena —máichahavipa.

<sup>25</sup> Tacahe, téchajicapa ema Júlasí:

—Maestro, ¿nútipuca jácani níjararecaviyare?

Tásiha, ema Jesús majicapapa:

—Pítisami —máichapa.

*Ema Jesús tímechahavi eta macaejasiraya eta matratune arairu mayehe ema Maiya*  
(1 Co 11.23-26)

<sup>26</sup> Tásiha, eta vinisirahi, mavehapa eta pan ema Jesús. Mahasulupayachapa ema Viya. Mayuvetucapa, tíjarachavivacapa viti máimitureana. Tásiha, máichahavipa:

—Eta juca neche. Enica —macahepa.

<sup>27</sup> Tacahe, mavehavarepa eta vasu vérirare, mahasulupayachavarepa ema Viya. Tásiha, tíjarachavivare. Máichahavipa:

—Era eta juca ámutu éti. <sup>28</sup> Taicha eta juca eta nítine, táepusiruvayare eta nucaepahairayare eta epecaturana emutu eti achaneana, esimutuque-neyarehi. Étarichuvare táicutiarayare eta nufirmachirayare eta arairu matratune ema Vicaiyaquene, nucaejasirayava eta matratune apaesa ámutu ejacapacare mayehe. <sup>29</sup> Nutupiruva numetacahe: Vaipa nápechavaimahi nérahivaréni eta juca tachi eta uva. Tiámainucava te táitauchavapa eta nusiapiraya eta nucavacuréraya, nucajupahairaya ema Tata Nucaiyaquene. Te jena sache, níjaracaheya vérainapa eta aramaruama. Vicajupahainapa ema Tata.

*Emá Jesús máimereucha ema Pedro tépiyacavayare vahi máimati ema Jesús (Mr 14.26-31; Lc 22.31-34; Jn 13.36-38)*

<sup>30</sup> Tásiha, eta vítanerirapa, vijirapa eta jirasare eta vihasulupayachirahi ema Viya. Te vítapiricapa, viyanapa vicaijuhe eta te huerta Getsemaní távihahi eta táemiripaisinehi eta cerro ticaijare Olivoqui. <sup>31</sup> Eta vipaisirapahi, ema Jesús máichahavipa:

—Puiti juca yati ejunijicanuyare emutu éti. Ejunaracayare. Tásiha, títauchavayarehi eta máechajiriruvahi ema Tata eta te Sagrada Escritura: “Nísapayare nacarataca ema Pastor, nacapasirasamiyare. Tásiha, tijunaracanainapa eta uvesana macurujiruanainihi” macahepa. <sup>32</sup> Téhesera te néchepucapa te nécari, nínapucainapa te Galilea. Ánaqui nucuchapiaheyare éti —máichahavipa ema Jesús.

<sup>33</sup> Tásiha, ema Pedro majicapapa:

—Tayanapanepuca, Tata, najunaracapuca ena apamuriana, nútisera vahi nujunaimahi —máichapa.

<sup>34</sup> Ema Jesús máichavarepa:

—Nutupiruva numetacavi piti Pedrosami: Puiti juca yati, te tamirahuinapaichaha eta táechajisirayare eta varayu, mapahe eta pépiyasiravayare vahi pímatinu —máichapa.

<sup>35</sup> Ema Pedro macahevarepa:

—Tayanapanepuca pímicapacanu, váhiquenesera népiyacavaimahi vahi nucuimativihini, váhivare nínajiacavimahi —máichapa.

Viti apamuriana étarichuvare tacahehi eta véchajiriruvahi.

*Emá Jesús tiyujaraca te Getsemaní (Mr 14.32-42; Lc 22.39-46)*

<sup>36</sup> Te vítecapapa víti tayehe eta huerta Getsemaní, máichahavipa ema Jesús:

—Éjacachaha eta ani te juca. Ecuchapanuchaha. Núti nuyanayare ánaquipana, nuyujaracayare —macahepa.

<sup>37</sup> Mapananaichu ena mámaqueneanahi: ema Pedro, ema Juan émapa ema Jacobo. Ema Jesús, ichape eta máeñamiravahi te masamure, ticatisamurevapa. <sup>38</sup> Tásiha, máichavacapa:

—Tétavicava eta táeñamirava muraca eta nusamure. Tavaraha ticapacanu. Ácahéchaha ani te juca. Váhisera ecuimaca. Ecauneuchanuhi —máichavacapa.

<sup>39</sup> Tásiha, tipaipanapa ánaquipanachíchahi. Tiáquipaicavapa máetipaisinapa, macaítecapa eta mamira te apaquehe. Eta mayujarasirahi, ánipa macahe:

—Tátachicha Nucaiyaquene, picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera nútí eta nítauchiraya eta pivarahaquenehi píti —macahepa.

<sup>40</sup> Tásiha, téchepucapa. Tichavapa eta te návihahi ena mapanaqueneana máimitureana. Máimaharinehi éna, tímacanaripa. Macajamicapa ema Pedro. Tásiha, máichapa:

—Váiparinehi ímicatacanuhini ejaneacavahini étanainahipucaini hora ácahehini. <sup>41</sup> Éjamiuchava. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

<sup>42</sup> Tásiha, tiápechavavarepa tiyanavarepa ema Jesús. Apihepa eta mayuja-rasirahi. Ánipa macahe:

—Tátachicha Nucaiyaquene, váhini tacuitauchavaini eta níchavaquenevayare. Tásihasera, níjaracava núti eta nítauchiraya eta pivarahaquenehi puiti. Nísapava nacapacanu —macahepa.

<sup>43</sup> Tásiha, tichavavare eta viyehe viti máimitureana. Tímahahavipa víti vímamurihaipa taicha taveharipa eta ichapu eta viúquihana. <sup>44</sup> Tacahe, mapahequenepa tichavapa tiyujarapana. Étarichuhi eta máechajiriruvanahi.

<sup>45</sup> Te tichavapa, téchajicahavipa:

—¿Iápechavapa ímaca? ¿Vuíchahapuca enaracahini? Jéhesare, puiti títecapapa eta nutuparahahi nacaratasiranuyare ena ticitianacananahi. <sup>46</sup> Ávane ema tíjararecanuyare. Échepuca. Viyana viácapavaca —máichahavipa.

### *Nacaratacapa ema Jesús*

*(Mr 14.43-50; Lc 22.47-53; Jn 18.2-11)*

<sup>47</sup> Téchajiricavaichaha ema Jesús, macahepainecha ema Júlasí, ema vichamurinihi. Mámamurihapaipahi ena camuriqueneana achaneana suntaruana. Ticaepuchiriquianapaipahi, éta pa eta nayeheana espada. Éna, vanairucanahi nayehe ena aquenucarahana. <sup>48</sup> Ema Júlasí, tatiarihihi eta máicutiarayarehi eta náimatirayarehi ena suntaruana ema Jesús. Ani macahehi eta máechajiriruvahi ema Júlasí:

—Ecunenuyare. Ema nétserareruyare, éma ecaratacaya —macahepa.

<sup>49</sup> Tacahe, ema Júlasí témeñahavapa mayehe ema Jesús. Máichapa:

—Yátiheipa, tata Maestro —máichapa.

<sup>50</sup> Tásiha, máetserarecapa. Ema Jesús majicapapa:

—Piti nímiturevihi, ¿tájaha tímitecavi? —máichapa.

Tásiha, ena suntaruana enevanepa nacaratacachi, napresuchapa. <sup>51</sup> Ema émana vichamuri mavehapa eta mayehe espada. Mayuchatipaisinapa eta machaca ema mamusura ema aquenuca Caifás. <sup>52</sup> Tásihasera ema Jesús macatiuchaichucha. Ánipa maicha:

—Pinaca te tatumaramuhi eta piyehe espada. Taicha namutu nácani ticaparecanahi tayehe eta espada, énerichuvare nacaheyare, espada eta ticapacayare. <sup>53</sup> Váhipuca pecha te návarahahini núti nuyaseacahini ema Tata, puítinaichuhini macucupaicahini ena 80,000queneana ángeleana. <sup>54</sup> Váhisera nuvaraha nuyaseaca. Tatuparacahi títauchavayarehi eta táechajiriruvanahi eta Sagrada Escritura eta níchavaquenevayarehi —tásiha, máichavacapa ena suntaruana—. <sup>55</sup> ¿Tájaha tacayema ecasiña eta espada, ecaepuchiriquipaipahivare eta ecaratasiranuyare, tímicutijiricavapa námerahihini? Étayapasica capejuca tamutuhi sácheana nucachanehehi nímitucahehi tayehe eta Templo. Váhivare epatsicavahini ecaratacanuhini. <sup>56</sup> Títauchavahisera tamutu eta juca taicha tacahehi eta náechajiriruvahi ena profetanaini, tayehe eta Escritura táechajisihairanuhi —macahepa.

Tacahe, viti máimitureana vimutu vijunaracapa, vinaquicapa ema Jesús.

### *Nacatupihapa ema Jesús te namirahu ena tuparairucana*

*(Mr 14.53-65; Lc 22.54-55, 63-71; Jn 18.12-14, 19-24)*



<sup>57</sup> Ena ticaratacanahi ema Jesús námapa te mamirahu ema Caifás, ema corregidorhi te jena áñohe. Natiarihivare ena escribánoana énapa ena aquenucarahana. <sup>58</sup> Ema Pedro, máehiequenehapahi, mayerehipahisera. Te náimisiapapa, tisiapavarepa éma te tajuhe eta canchón mayehe ema Caifás. Téjacaipahi macachanevacaipahi ena suntaruana, mavarairahi máimahayarehi tájahapuca eta náicharacayarehi ema Jesús. <sup>59</sup> Tacahe, ena tuparairucana énapa ena aquenucarahana natanucaipahi ena tépiyaequenehanayarehi ema Jesús, navarairahi tatiarihiyarehi eta tiviuchayarehi eta máepeni-rayare. <sup>60</sup> Váhisera náichimavahini, camurianahinéni ena tépiyaequenehanahi. Tisiapananechase ena apinana tépiyaequenehanayarehi. <sup>61</sup> Ánipa nacahe:

—Ema maca achane visamahi víti eta mavarairahi máquipaica eta Templo mayehe ema Viya tacapicahuquenehi. Tásiha, máimichavayarehiji macaechepuca te mapanaquenenaji sache —nacahepa.

<sup>62</sup> Tacahe, ema corregidor téchepurucainehi. Mayaserecapa ema Jesús. Ánipa maicha:

—¿Tájaha tacayema vahi pijicapavaca ena nani eta pépiyaequenehi? ¿Yátupipuca eta nacayemaquenehi? Taicha vímahavi vahi picatiuchavahini — máichapa.

<sup>63</sup> Émasera ema Jesús vahi majicapavacahini. Tásiha, mápechavare mayasereca ema corregidor:

—Pímaha puiti, nuyaserecaviyare. Vahi nuvaraha pépiyahirahi. Némechavi máimahavihi ema Viya. Pátupiruva pimetacahavi te yátupihipuca pítiquenehi Cristo, Machichaquenevihi ema Viya — máichapa.

<sup>64</sup> Tacahe ema Jesús majicapapa:

—Yátupi núti Cristonuhi. Nuti Manerejirunuhi ema Viya. Tásiha, numeta-caheyare eta apana. Járjapaya eta sáheyare ímahanuyare eta néjasirayare te mavaure ema Viya máitupajjiáruvaquenehi. Ímahanuyareva núti eta núcupaisirayareva násihairayare te anuma, támiranuyarepahi eta úcaji — macahepa.

<sup>65</sup> Tacahe, ema corregidor eta masamirahi, tise marinehi ichape. Tivetsayujiacavapa eta mamuiraha eta masemanevahi. Tásiha, macahepa:

—¡Tétavicavaipa eta maviurevahi ema maca taicha macaecaahihi ema Viya! ¡Puiti émaquenepa visama éma tépiyacavahi Machicha ema Viya! ¡Váipa tácomesa vitanucahini ena testigoanainahini! ¡Puiti esamaripa éti eta juca macayemaquenehi! <sup>66</sup> ¿Tájaha vícharacayare puiti ema maca? —macahepa.

Tásiha, najicapapa éna:

—¡Ticaviurevapa! ¡Étaina táimicapaca! —nacahepa.

<sup>67</sup> Tacahe, náehavacapa ema Jesús. Nátutuquichapa. Náehamirahavare. <sup>68</sup> Tásiha, náichapa:

—Vímahasejicacha, te yátupihipuca pítihí Cristo. Te pijarauquipuca, pímatihaviyare nájahahipuca ema téhamirahavíhi —nacahepa.

*Ena Pedro tépiyacavapa vahi máimati ema Jesús  
(Mr 14.66-72; Lc 22.56-62; Jn 18.15-18, 25-27)*

<sup>69</sup> Tiuri, ema Pedro, matiarhichahahi eta te canchón. Téjacaipahi tiásacavahi. Tacahe, sucahepaipahi esu mavanara ema corregidor. Suímahapa éma. Tásiha, suíchapa:

—Németeaca pítirichu ñímiture eñi Jesús eñi ticavasahi te Galilea —suíchapa.

<sup>70</sup> Émasera majicapapa:

—Vahi nímati ema péchajisihaquenehi. ¿Távihapuca pímatinenuhi píti? — máichapa.

<sup>71</sup> Tásiha, mavarahapa tiúchucavaneyarehini. Suímahavare esu apana vararaca. Suíchavacapa ena natiarihiqueneanahi:

—Eñi ñica achane éñirichu ñichamuri eñi Jesús Nazareno. Nímahahi ñicachanepahi —suíchavacapa.

<sup>72</sup> Tiápechavavarepa ema Pedro téchajica, ánipa macahe:

—Nujuracha te emirahu. Váhiquene nímati ema píchaquenehi —macahepa.

<sup>73</sup> Te tiyererehachichavarepa, náimahavarepa ena apamuriana. Náichavarepa:

—Yátupiquene pítirichu machamuri ema maena Jesús, taicha eta péchajisira éta tímereuchavihi —náichapa.

<sup>74</sup> Tásiha, macahevarepa:

—Máicuñacanuine ema Viya te vahi nucucahe yátupina. Váhiquenesera nímati ema achane échajisihaquenehi —macahepa.

Tásiha, enurujipa téchajicanecha eta varayu. <sup>75</sup> Te masamapa eta varayu, enevanepa máechahi ema Pedro eta máichirahi ema Jesús: “Te tamirahuina-paichaha eta táechajisirayare eta varayu, píti mapaheyare eta pépiyacavayare vahi pímatinu”. Tásiha, tiúchucavanepa ema Pedro. Tíyahavanepa taicha máimativanepa eta táichapevahi eta máejecapiravahi.

## 27

### *Námapa ema Jesús te mamirahu ema Pilato*

*(Mr 15.1; Lc 23.1-2; Jn 18.28-32)*

<sup>1</sup> Te tijararahipa, tiúrujicavanapa namutuyaréni ena tuparairucana énapa ena aquenucarahana. Ticaechacasipa eta náimicapasirayarehi ema Jesús. <sup>2</sup> Nacuchucapa ticaitihapaipa eta námirapahi te mamirahu ema Poncio Pilato, ema aquenucahi prefectohiquene.

### *Eta macapasiravahi ema Júlasí*

<sup>3</sup> Tacahe, ema Júlasí eta máimairahi eta táichapevahi eta macatajivairahi ema Jesús étapa eta nacapasirayarehi, ichaperinehi ticatisamurevahi taicha eta máejecapiravarihi. Tiyanapa máimichavapanahi eta treinta reale eta plata mavachahi nayehe éna. <sup>4</sup> Tásiha, máichavacapa:

—Néjcapavahi ichape eta níjararesirahi ema maca achane matapirava-requene. Nuvaraha nímichavaya eta nuvachainihi —máichavacapa éna.

Énaserá najicapapa:

—Jéhepuca, vahi vecha víti. Péchaquenevaichuhi píti —náichapa.

<sup>5</sup> Émasera ema Júlasí máquijimirauchavacapa eta te tajuhe eta Templo návihahi éna. Tásiha, tiúchucapa. Tiyanapa. Táichavenehi eta macatisamurevairahi, tichumucavapa.

<sup>6</sup> Ena tuparairucana navehapa eta plata. Tásiha, nacahepa:

—Vahi táuricahini víyaracuhahini eta juca plata tayehe eta caja vinaquisirareva taicha mavachaequeneya eta máepenirayarehi ema maca achane —nacahepa.

<sup>7</sup> Tásiha, eta plata máimichavaquenehi ema Júlasí, napanerechaipa eta navacharesirayarehi eta apaquehe nacaecarasirareyare ena apavasanana. Eta juca apaquehe naseresirarehi ena típuarecarahiana eta yupi. <sup>8</sup> Puiti éta ticaijarehi “Apaquehe máitinevacha ema Jesús”. <sup>9-10</sup> Tacahehi eta táitauchiravahi eta májurehi ema víyaraha profetaini Jeremías. Ani tacahehi: “Navehapa eta treinta reale eta plata. Ena tuparairucana navacharecapa eta

apaquehe nayehe ena típuarecarahiana. Tacahe eta juca mametasiranuhi ema Viya eta náichirayarehi eta juca” macahepa ema víyarahaini Jeremías.

*EMA PILATO MAYASERECAPA EMA JESÚS*  
(Mr 15.2-5; Lc 23.3-5; Jn 18.33-38)

<sup>11</sup> Ema Jesús ticayaserehipa te mamirahu ema aquenucahi Pilato. Ánipa macahe eta mayaseresirahi:

—¿Jéhesareji réyvihí píti nayehe ena pijaneanana israelítana? —máichapa.

Ema Jesús majicapapa:

—Pitupiruvahi eta juca piyaseresiranuhi. Yátupihí eta nurreyvahi —máichapa.

<sup>12</sup> Tásihasesa, te nametauchaipa ena tuparairucana, vahi majicapavacahini ema Jesús. <sup>13</sup> Tacahe, ema Pilato máichapa:

—¿Vahí péchajiuchava eta juca nametauchiravihí? Camurihí eta piviuervana eta nayehe —máichapa.

<sup>14</sup> Émasera ema Jesús váhiquene majicapahini. Tásiha, ema Pilato máramipa eta mamajicapirahi. Váipa máitucacarehini.

*EMA PILATO MACAVANAIRIPIPA ETA NÁETATASIRAYA EMA JESÚS*  
(Mr 15.6-15; Lc 23.13-25; Jn 18.38-19.16)

<sup>15</sup> Tiuri puiti, tatiaríhi eta mayeherepi ema Pilato, te Páscuamuhuana, macaiticayarehi ema émana preso, mácani nayasearuyarehi ena achaneana.

<sup>16</sup> Tiuri, matiaríhi ema achane ticaijare Barrabás, ichape eta maviurevahi.

<sup>17</sup> Eta náurujisiravahi ena achaneana, mayaserecavacapa ema Pilato:

—¿Nájahapuca ema eyasesereruyare ema nucaitiruya? ¿Émapuca ema Barrabás, téhesera émapuca evaraha nucaítica ema Jesús, ema ticaijare Cristo —máichavacapa. <sup>18</sup> (Taicha máimatiacaripahi eta nametauchahi ema Jesús ena tuparairucana taicha nacapinaruhi éma.)

<sup>19</sup> Eta máejasirahi ema Pilato tayehe eta mávacure, suímimetarecapa esu mayena: “Vahí picuimisiapava ñiyehé eñi ñira achane matapiravare taicha yati tametasiranuhi eta nuvapure eta ñíchararacavayare éñi” sucahepa.

<sup>20</sup> Énasera ena tuparairucana énapa ena aquenucarahana náimitumurihapa ena achaneana nayaseserecahi ema Barrabás, émainahini máuchucuha. Tásiha, nayaseserecapa máepenahini ema Jesús. <sup>21</sup> Máechajimurihavarepa ema Pilato, mayaserecavacapa:

—¿Nájahasica ema evarahaquenehi nucaítica? —macahepa.

Éna najicapapa:

—¡Émaina máuchucuha ema Barrabás! —nacahepa.

<sup>22</sup> Ema Pilato mayaserecavarepa:

—¿Tájahasica nícharacaini ema Jesús ticaijare Cristo?

Éna najicapapa:

—¡Pémetatareca te crusu! —nacahepa.

<sup>23</sup> Ema Pilato máichavacavarepa:

—¿Tájaha tacayemahi eyaseacahi eta németatasiraya ema maca? ¿Tájahasica eta maviurevahi? —máichavacapa.

Énasera tipiararemurihanavare muracapana:

—¡Pémetatareca te crusu! —nacahepa.

<sup>24</sup> Tacahe, máimahapa ema Pilato eta vahi máiturucahini macatiuchahini, taicha ena achaneana tivayuchavapaichucha eta nasemanevanahi. Tacahe, máemepanapa eta une, ticasipavahupa te namirahu ena achaneana. Tásiha, máichavacapa:

—Nuvaraha nímerecava te emirahu vahi nútiparacaina eta máepeniraya ema maca achane matapiravarehi. Éti échinavayarehi —máichavacapa.

<sup>25</sup> Tásiha, najicapapa namutu ena achaneana:

—Vítinarine vicatapurava, énapa ena vichichanaveana. Vítinarine taeha eta máepeniraya ema maca achane —nacahepa.

<sup>26</sup> Tacahe, ema Pilato macavanairipipa nacaitica ema Barrabás. Tásiha, macavanairipipa náestaca ema Jesús; tásiha náetatacayarevare te crusu.

*Nacavayumarajipa ena suntaruana ema Jesús  
(Mr 15.16-20; Jn 19.1-3)*

<sup>27</sup> Tásiha, ena suntaruana námapa ema Jesús tayehe eta náestasihayarehi te távirarehi eta guardia. Nachayacapa ena camuriqueneana suntaruana náumurivana. <sup>28</sup> Navejamuhiacapa eta mamuiriha. Namuriachapa eta muíriare títsime. <sup>29</sup> Náitsamemacapa eta itapepi eta majarapiyarehi náicha. Nanacavarepa te machuti. Náimicaratacavarepa eta curina te mavahu vaure, matsucurúpayarehiji. Eta nacavayumarajirahi, náepuyumirauchapajicacha. Ánipa nacahe:

—Tata, ¡pítitataji nayehevihíji Rey ena israelítana! —náichapa.

<sup>30</sup> Tásiha, nátutuquichapa. Náetetuvauchapa eta matsucurupahi, náepuchi-sicapa tayehe. <sup>31</sup> Te tamutupa eta nacaecahijirisirahi, navejamuhiacavarepa eta mamuiriha títsime. Namuriachapa eta mamuirihaichu. Tásiha, námapa tayehe eta macaetataiyayarehi.

*Náetatacava ema Jesús te crusu  
(Mr 15.21-32; Lc 23.26-43; Jn 19.17-27)*

<sup>32</sup> Eta napaisirapahi te calle, nácapajicapa ema achane ticaijare Simón ticavasahi te Cirene. Napamicapa éma manaracuha eta macurusura ema Jesús. <sup>33</sup> Tacahe, nacaitecapapa tayehe eta masihi nacaetatairare ticaijare Gólgota. <sup>34</sup> Ánaquipa náesichinehi ema Jesús eta vino tisucareama ticasi-riquiama eta ipuruji. Te masamaecapa ema Jesús, vaipa mávarahahini máerahini.

<sup>35</sup> Te náitauchapa eta náetatasirahi ema Jesús, ena suntaruana nasuerte-hachapa eta mamuiriha eta náijarajirisiracacahi. Tacahehi eta táitauchiravahi eta májurehi ema víyarahaini profetaini David. Ánipa tacahe: “Tíjarajiricacanapa eta numuirihaini. Nasuertehachapa eta náijarasiricacairahi”. <sup>36</sup> Tásiha, najaneacapa ema Jesús ena suntaruana. <sup>37</sup> Te tápusi eta macurusura, tatiarihihi eta ajureca táechajisihahi eta tiviuchahi. Ani tacahehi eta ajureca: “Ema Jesús, Rey nayehe ena israelítana”.

<sup>38</sup> Natiarihihivare ena apinana tiámerahiana. Ticaetatanahivare te machacaya, ema émana te mavaure, ema apana te masapa. <sup>39</sup> Tásiha, ena tiánucumi-rauchanapahi, tépiupiusicavanapaipa eta nacaecahirapaipahi éma. <sup>40</sup> Ánipa nacahe:

—¡Pítitataji! Picahechajiriruvahi eta piáquipaisirayarehíji eta Templo, pirátahahivaréji pímuchava picatupiha eta arairu Templo te mapanayarericuhíji sache. Puiti vivaraha vímaha eta pítupajijiasiravahi, te yátupipuca Machichavi ema Viya. Piúcupaica te jara crusu. ¡Picatiuchava pítijivaina! —náichapa.

<sup>41</sup> Énerichuvare ena tuparairucana nacaecahijiricavare, énapa ena es-cribánoana énapa ena fariséoana, énapa ena apamuriana aquenucarahana. Náichajiricacapa:

<sup>42</sup> —Ema mácacacha, macahehi eta máechajiriruvahi eta marátahairahíji macatiuchavaca ena apamuriana achaneana. Tásiha, puiti váhivare marátahahini émajivainahíni macatiuchavahini eta te jara mávihahi. Te yátupinahíni Réyinaíni viyehe viti israelítana, macatiuchavaipahini, ¿masi? Máucupaicari-pahini te jara crusu, ¿masi? Visuapasarepaini eta vímairainahini. <sup>43</sup> Téhevare te yátupihipuca ticasíñavahi me Viya, vivaraha vímaha macuchucuha éma puítinaríchu, te yátupihipuca máemunacahi éma. Taicha macahehi eta máechajiriruvahi eta machichairahi ema Viya —nacahepa.

<sup>44</sup> Ena tiámerahiana ticaetatanahivare te machacaya, énerichuvare nacaecahivare éna apanavare.

*Eta máepenirahi ema Jesús*

*(Mr 15.33-41; Lc 23.44-49; Jn 19.28-30)*

<sup>45</sup> Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. <sup>46</sup> Tásiha, te las trespa sache, tipiaracapa muraca ema Jesús, ániapa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

<sup>47</sup> Tacahe, ena natiarihiqueneanahi ena tísamanahi, ánivarepa nacahe:

—Esama ema maca achane mapiaracahi ema víyarahaini profeta Elías —nacahepa.

<sup>48</sup> Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca ema Jesús, machuchujicayarehi. <sup>49</sup> Énaserá ena apamuriana, ánivarepa nacahe:

—Ésamiricachucha. Vímahayare te títecapayarepuca macatiuchapana ema Elías —nacahepa.

<sup>50</sup> Tásiha, tiápechavavarepa tipiaraca muraca ema Jesús. Tásiha, tépenapa.

<sup>51</sup> Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. Tiyayacarepa eta apaquehe. Étaripa eta ichapepuhiqueneana mari téjepuichavacavare. <sup>52</sup> Étaripa eta ecariana téjiacavacapa. Téchepucanavarepa ena náepenaqueneana ena tisuapajirahianahi mayehe ema Viya. <sup>53</sup> Tásiha, te mapanaquenepa sache, téhevare te táequenepa eta máechepusirahi ema Jesús te máecari, éna apanavare tiúchucanapa tayehe eta náecariana. Tásiha, tisiapanapa tayehe eta avasare Jerusalén. Tichavanapa te napenana. Ichapemurianahi ena achaneana tímahanahi éna.

<sup>54</sup> Tacahe, ena tijanearecanahi, émapa ema nacapitara, te náimahapa eta tayayacarevahi eta apaquehe, étapa eta apamuriana tiáramicareanahi, ichaperinehi eta napisirahi. Tásiha, nacahepa:

—Yátupiquenerichuyapa Machicha ema Viya ema maca —nacahepa.

<sup>55</sup> Natiarihivare ena camuriana esenana. Tímararacanahi te tiyerehi. Ena nani esenana, éna téhicanahi ema Jesús. Téchapajiricanapahi ema Jesús eta mapaisirapahi te másihapa te Galilea. <sup>56</sup> Nacarichusera ticajuanahi eta náijaruana esu María Magdalena, ésupa esu apana María, maena ema José émapa ema Jacobo. Sutiarihivare esu mayena ema Zebedeo, náena ena nuchamurianahi ema Juan émapa ema Jacobo, apóstoleanahi.

*Nacucupaicapa te crusu ema Jesús, náecarayarepa*

*(Mr 15.42-47; Lc 23.50-56; Jn 19.38-42)*

<sup>57</sup> Matarihivare ema achane rico ticaijare José. Ticavasahi te avasare Arimatea. Émarichuhi téhichi ema Jesús. <sup>58</sup> Te capererehipa, eta máimairahi



máepeníraipahi ema Jesús, tiyanapa mayehe ema Pilato. Mayaseapanahi eta máquehe ema Jesús, mavarairahi máecarayare. Tacahe, ema Pilato macavanairipipa náisapahini eta náecarairaya. <sup>59</sup> Nacucupaicasarepa eta máquehe ema Jesús tayehe eta crusu. Náyuruacapa tayehe eta tijapuquene sávana. <sup>60</sup> Nanacapa tayehe eta máecari máemepiyareruhi máecariyahini ema José. Eta juca ecari, nasecajueruhi eta mari. Najihachapa tayehe eta tajitacarequene márime. Te náitauchapa, tiyananapa. <sup>61</sup> Esu María Magdalena, ésupa esu apana María, téjacanahi éna, náimarararacaipahi eta ecari.

### *Ticavanahianapa ena suntaruana najaneaca eta ecari*

<sup>62</sup> Tásiha, te apanapa sache tiyananavarepa ena tuparairucana mayehe ema Pilato. <sup>63</sup> Náechajicapa ema Pilato. Ánipa nacahe:

—Tímitecahavihi, tata, vimetapanavi eta máechajiriruvahi ema Jesús te achanerichaha eta máechepusirayarehiji te máecari te mapanaquenénapaji sache. <sup>64</sup> Puiti, vivarahahi picavanairipihini náeratahini muraca eta tapaja eta máecari, mapanainavare sache eta najaneasirayare ena suntaruana. Machu nayana te yati námechapana eta máquehe ena máimitureana. Machu nácaheriana “Técheputaripa te máecari”. Tásiha, ena achaneana nasuapainapapuca, náimijachainapa yátupi. Tisuapacarepanainapapuca tayehe eta máichaqueneanahi te achanerichaha —náichapa.

<sup>65</sup> Ema Pilato máichavacapa:

—Tiuri, níjaracahe ena nusuntarurana. Eyana iama. Evaneca najaneacacuenéna. Nachujichacuenéna muraca eta máecari —máichavacapa.

<sup>66</sup> Tacahe, tiyananapa nachujichapa muraca eta ecari. Nanacapa eta táicutiaranayarehi. Tásiha, najaneacahi ena suntaruana.

## 28

### *Eta máechepusira ema Jesús te máecari (Mr 16.1-8; Lc 24.1-12; Jn 20.1-10)*

<sup>1</sup> Te apanapa sache te tijarahichichapa eta lumíncuquenehi, tiyanapa esu María Magdalena, sucachanehi esu apana María, náimahapanayarehi eta ecari. <sup>2</sup> Tíjuhúchavapa tiyayacarehi eta apaquehe. Émahi ema ángele eta máucaupaisirahi te anuma. Te máitecapauchapa eta ecari, máequehepuichapa eta mari tajihainihi eta máecari. Máejahamecapa eta mari. <sup>3</sup> Tétavicava eta majaraivahi, tivayuhauquirahi. Eta mamuirihá, tétavicavavare eta tajapuva. <sup>4</sup> Eta náimairahi ena suntaruana, tiáquipapaicavanapa, tiyayacareanapa eta napisirahi. Tiánehini tépenaracana. <sup>5</sup> Tásiha, ema ángele máechajicavacapa ena esenana. Ánipa macahe:

—Vahi ecupicanu. Núti néchahi eta etanusirapahi ema Jesús ema macaeta-taquenénihi. <sup>6</sup> Májinaipahi eta te tajuhe eta máecari. Técheputaripahi taicha tacahehi eta máechajiriruvahi. Yare, ímaha eta juca mávinénihi. <sup>7</sup> Eyana púitinarichu, emetapanavaca ena echamurianahi máimitureana eta máechepusiraipahi tayehe eta máecari. Énerichuvare emetacavaca tiyanayare ema Jesús eta te Galilea. Ánaqui macuchapiaheyare emutu éti. Eta tímitecanuhi núti numetapanahayarehi —máichavacapa.

<sup>8</sup> Tacahe, ena esenana tiyananapa tichavanahi tijunaparacanapaipa eta nametasirayarehi ena nachamuriana. Tipicanapaipa, tásihasera tacachanepahi eta náurisamurevapahi ichape. <sup>9</sup> Eta najunapirapahi, tíjuhúchavapa tímercava ema Jesús eta nayehe. Máechajicavacapa. Témeñahavanapa éna eta mayehe. Tépuycanapa natsiucapavachapa. <sup>10</sup> Éma máichavacapa:

—Vahi ecupicanu. Eyana emetapanavaca ena apamuriana echamuriana nímitureanahi. Eyanayare emutu te Galilea. Ánaqui nucuchapiaheyare — máichavacapa.

*Eta nametarapianahi ena suntaruana*

<sup>11</sup> Eta najunapirapahi ena esenana, ena suntaruana tijanearecanainihi tiyananapa éna, nametapanavacayarehi ena tuparairucana tamutu eta náimahaqueneanahi. <sup>12</sup> Tacahe, ema corregidor ticurujiricapa namutu ena apamuriana aquenucarahana, mavarairahi téchajiricavana napane-rechayare eta náicharacavayarehi. Jéhesare, navachachavacapa eta camuriquene plata ena suntaruana. <sup>13</sup> Tásiha, náimitucavacapa, ánipa náicha:

—Te natiarihinapuca nayaserecahe, ecaheyare: “Tiyananahi ena máimitureana ema Jesús te yátimuhu; námechapanahi eta máquehe. Ticamapuravanahi eta vímasirahi víti” ecaheyare. <sup>14</sup> Émaripa ema aquenuca te máechapuca, vímaharinépa víti. Vitanucayare eta vivayuarasirayare, apaesa tacuija eviurevaina éti —náichapa.

<sup>15</sup> Tacahe, ena suntaruana najacapapa eta plata navachahi. Tiyananapa. Jéhesare, étapaichuhi náechajisihapahi eta náimitucasivahi. Puíticha, ena israelítana, tanasirichuhi tacahehi eta nametarapi, te natiarihi ena tiyase-recana.

*Ema Jesús mavanemurihapa ena máimitureana eta náimituresihaya te tamutu avasareana*

*(Mr 16.14-18; Lc 24.36-49; Jn 20.19-23)*

<sup>16</sup> Ene tacahehi eta viyanirahi viti óncequeneana apóstoleana tayehe eta Galilea te cerro taicha tacahehi eta mametarapihi éma Jesús. <sup>17</sup> Tacahe, te vímahapa ema Jesús, vépuyumurihavanépa. Vimutu vitsiucapa. Natiarihisera ena vuíchaha nasuapapajicahini. <sup>18</sup> Tásiha, ema Jesús témeñahavapa eta viyehe. Máichahavipa:

—Ema Tata te anuma tituparacanuhi núti néchayare tamutu te anuma étapa te juca apaquehe. <sup>19</sup> Eta tacahe, eyanayare puiti epaicayare tamutu eta avasareana. Ímitucayare ena achaneana, nuchaneranaina éna apanavare. Ícachasicavacayarepahi te máijare ema Tata, nútipa nuti Machicha émapa ema Espíritu Santo. <sup>20</sup> Ímitucayareva eta nasuapiraina éna apanavare tamutu eta nímiturapianahi eta eyehe. Núti, tayanapane nuyerehehi, nímicata-caheyaresera. Níjaracahénapaipa eta nítupajijiasirava. Tamutu sácheana nucachanehevacyarehi. Váhiquene nujunijiacahéimahi —máichahavipa.

Tamutupa eta juca nájuchaquenehi eta níimahaquenehi nuti Mateo.

## **Ema San Marcos májuequenehahi eta máichararacavahi ema Jesucristo, ticajare puiti eta EVANGELIO SEGÚN SAN MARCOS**

<sup>1-3</sup> Nuparapenaveana, puiti nuvaraha numetacahe eta máitaresirahi ema Jesucristo, Machicha ema Viya, te títecapauchahavipa te vitaracu. Ichape-rinehi eta viúricacarevahi puiti taicha eta mametasirahavihi eta táurina-quehehi máechajiriruvana ema Viya.

Ánaquiaparipahi eta áñoana acane, ema Viya mametacapa ema víyarahaini profeta Isaías eta mapanereruhi, eta mavanésirayare ema Machicha te juca apaquehe. Éma, tímitecahi ticatiurahiyarehi. Énerichuvare matiarhi-yareva ema apana achane máichuhaqueneyarehi ema Viya. Macametarairu-yarehi, máetupiricavacayare ena achaneana, náinajisirayarehi eta tamauri-queneana napanereruana apaesa táuri eta najacapirayare ema Machicha ema Viya.

*Ema Juan Tícachasiricarahi tépanavapa ticametarairu eta máechajiriruva ema Viya nayehe ena vámahicuruhana*

*(Mt 3.1-12; Lc 3.1-9, 15-17; Jn 1.19-28)*

<sup>4</sup> Tiuri, te táequenepa eta juca, camuriquenehi áñoana, tiúchucapa ema achane ticajare Juan. Éma, máichuhaquenehi ema Viya eta macametarairuirayare, máetupiricavacayare ena achaneana. Tacahe, masuapahi eta matuparahahi. Tiyanapa vámahicuruhapa. Vaipa avasarecuruhainaini. Ticametarairupaipa nayehe ena macutiqueneana vámahicuruhana. Ánipa macahehi eta máimituresirahi:

—Ítsivacha eta epanereruana. Éneuchava mayehe ema Viya, apaesa maperdonachahe eta epecaturana. Te éneuchavapa, núti nícachasicahénapa, apaesa etsecavaipa eta ejacapirayare ema Cristo —máichavacapa ema Juan.

<sup>5</sup> Tacahe, nárajapapa napaucha ena achaneana ticavasana eta te ichape avasare Jerusalén étapa eta apamuriana avasareana te táunavahi eta provincia Judea. Eta nametauresiravaipa ena achaneana, navarairaiipa náinajica eta napecaturana, ema Juan máicachasicavacapaipa tayehe eta cajacure Jordán.

<sup>6</sup> Ema Juan, vanairucahi me Viya, profetahi éma. Eta macamuirihairahi eta náitsameru tajiya eta náitatuquene ticajare camello. Eta máitijuhe, vácapi jayumepi. Eta manicasareanahi eta tsacara. Eta máitiverahi eta mápama.

<sup>7</sup> Ániyare macahe eta macametarairuirahi:

—Ávanepaipahisera mácani yátupiquene Cristo. Éma, tiápajuponavahi nuyehe núti eta mapicauchacarévahi. Váiparinehi nácutisamimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami. <sup>8</sup> Yátupi núti nícachasicahéhi te une, te éneuchavapa mayehe ema Viya. Émainapa, tícachasicahénavarepa eti ecasiñavanahi mayehe éma, tíjaracahénasarepa ema Espíritu Santo —macahepa ema Juan.

*Eta macaicachasirahi ema Jesús*

*(Mt 3.13-17; Lc 3.21-22)*

<sup>9</sup> Te jena sácheana eta mávihairarichaha ema Juan te cajacure Jordán, títecapapa ema Jesús. Másihapahi te avasare Nazaret te tinapaica eta Galilea. Tásiha, ema Juan máicachasicapa ema Jesús. <sup>10</sup> Te tamutupa, te tiúcupaicapa

eta te une ema Jesús, tíjahúchavapa máimaha téjiacahi eta anuma. Máimaha-varepa ema Espíritu Santo ticutipahi eta paluma. Máucupauchapa ema Jesús, mávahácapa éma. <sup>11</sup> Tacahe, nasamapa eta mahu ema Viya tásihaquenehi te anuma. Ani macahehi eta nasamirahi:

—Pítira nuchicha némunaruquene. Núrisamurecha piyehe —macahepa.

*Emá Váinaraji Satanás mavarahapa macaitsamaraji ema Jesús*

*(Mt 4.1-11; Lc 4.1-13)*

<sup>12</sup> Tacahe, ema Espíritu Santo eta mávahásamurechirahi, enurujipa máimitucaipahi ema Jesús eta mayaniraya te mávapahi apaquehe. <sup>13</sup> Eta mayerevahi ema Jesús cuarenta sácheana. Tásiha, ema Satanás macaitsamarajipa, mavaraha macaetema ema Jesús. Váhisera máratahahini. Tatiarivare eta sárareana eta te mávihahi ema Jesús. Te tamutupa, ena ángeleana náechapajiricahi éma.

*Emá Jesús tépanavapa ticametarairu*

*(Mt 4.12-17; Lc 4.14-15)*

<sup>14</sup> Tacahe, te jena sácheana, nacaratacapa ema Juan. Námapa te tiyerehi. Tacahe, tiyanapa tichavahi ema Jesús eta te provincia Galilea. Tépanavapa ticametarairu. Máichuhavacapa ena achaneana náehicayarhi ema Viya.

<sup>15</sup> Ánipa tacahehi eta mametarapi:

—Éneuchava mayehe ema Viya. Ítsivacha eta epanereruana. Taicha puiti tíchuhahénapa ema Viya. Tiánehipa eta sáchezare títecapauchahénapa eyehe ema ticatiuchaheyare. Aquenucayare mavaneruhi ema Viya, éma téchaheyare. Ichape eta iúricacarevaya te esuapa eta nímiturapiana —macahepa.

*Emá Jesús máichuhavaca ena cuátroqueneana ténicarahiana, máimitureanayarehi*

*(Mt 4.18-22; Lc 5.1-11)*

<sup>16</sup> Tacahe, eta mapaisirapahi ema Jesús te tachausi eta cáquiure Galilea, máimahavacapa ena apinana ajairana, ema émana ticaijarehi Simón Pedro émapa ema maparape Andrés. Eta náematanerepi ena nani, ténicarahianahi. Náquijierecahi eta nayutahe. <sup>17</sup> Tacahe, ema Jesús máichavacapa éna:

—Yare, éhicanu. Núti níjaracaheya eta apana ématanerepiyare. Éti ítucavaparacahi eta jímana; tacaheyare eta ítusiravayareva ena achaneana, machaneranyare ema Viya —máichavacapa.

<sup>18</sup> Enevanepa náinajicahi éna eta náenisirahi. Tiyananapa náehicapa ema Jesús.

<sup>19</sup> Ánaquipanavarepa máimahavarepa ena apinana ticaparapecacanavare ema Jacobo émapa ema Juan. Téjacanahi te napacure. Matiarihivare ema naiya Zebedeo. Náititijiricahi eta nayutaheana. <sup>20</sup> Ema Jesús máichuhavarepa ena apinana. Tásiha, náehicavarepa. Najunijicapa ema naiya Zebedeo. Manasipa éma te pacure, macachanehi ena mamusurana.

*Emá Jesús máimijunapa ema éreana tiávahácainihi ema achane*

*(Lc 4.31-37)*

<sup>21</sup> Tacahe, títecapanapa tayehe eta avasare ticaijare Capernaum. Eta juca sache sávarumuhuhi, tiyanapa ema Jesús eta te náurujisirareva ticaijarehi sinagoga. Máimitucavacapa ena tiúrujicavanahi. <sup>22</sup> Ichape náramihi ena achaneana eta máimiturapianahi táicha vahi nasamasarénahini. Tétavicavahi eta máitusirahi mayunapaicahi tamutu. Tétavicavahi eta tasuapacarevahi eta máimiturapiana.

<sup>23</sup> Te nataracu ena náurujiruvanahi, matiarihivi ema émana achane mávaháruhi ema éreana. Tipiararecapa, ánipa macahe:

<sup>24</sup> —Núti nímativi. Pítira Sántoquenevihi. Machichaquenevihi ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca pijararecahaviyare —macahepa ema achane.

<sup>25</sup> Tacahe, ema Jesús macajachapa ema éreana. Ánipa maicha:

—¡Pámatina! Piyana pijunijica ema maca achane —máichapa.

<sup>26</sup> Tacahe, ema achane tíjahúchavapa tíaquipaicava, tiyayacarepa. Tipiara-recapa muraca maicha ema éreana eta majunijisirayarehi ema achane.

<sup>27</sup> Tásiha, náraminehi ichape ena natiarihiqueneanahi. Tiyaserejiricanapa, ánipa nacahe:

—¿Tájahasica tacayema eta juca? Ema maca Jesús, tétavicava eta máitupaji-jiásiravahi, maratahahi máquijica ena éreanana. Tásiha, ichape eta napisirahi ema. Vahi nácapaemachahini. Tamutupa arairu eta máimiturapianahi ema maca —nacahepa.

<sup>28</sup> Tacahe, nasamairiricapa namutu ena achaneana eta juca máichaqueneanahi ema Jesús. Énaripa ena ticavasanahi te avasareana eta te táunavahi eta Galilea.

*Ema Jesús macanaraca esu máimase ema Pedro*

*(Mt 8.14-15; Lc 4.38-39)*

<sup>29</sup> Tacahe, te tiúchucanapa tayehe eta náurujisirareva, tiyanapa ema Jesús te napena ema Pedro ema Andrés. Náehicavarepa ena apinana ema Jacobo émapa ema Juan. <sup>30</sup> Sutiarihihi esu máimase ema Pedro. Sunasiqueneipahi tívecahi, ticajumahi ésu eta muraca fiebre. Nametacapa ema Jesús eta sucajumairahi esu esena. <sup>31</sup> Tásiha, mapauchapa. Macaratavauchapa, macaeche-pucapa ésu. Táetaviacavaneinehi eta fiebre. Tacahe, suéchapajiricapa ema Jesús, énapa ena máimitureana.

*Camuriana ena macanararuapanahi ema Jesús*

*(Mt 8.16-17; Lc 4.40-41)*

<sup>32</sup> Te jena cáperehiquénehi, te téricapa eta sache, ena achaneana námavacapaipa eta mayehe ema Jesús namutu ena nacajumaqueneana énapa ena návaháruanahi ena éreanana. <sup>33</sup> Jéhesaréinehi, namutu ena achaneana ticavasanahi tayehe eta avasare tiúrujicavanapa te tapaja eta peti. <sup>34</sup> Camuriana ena macanararuana tayehe eta apanapane jumareana. Maveranavare ena váinarajiana máquijiruanapahi te náqueheana ena achaneana. Váhiserá máisapahini náechajicahini ena éreanana, taicha náimatihí éna eta émairahi ema Cristo.

*Tamutu avasareana te Galilea mapaica ema Jesús*

*(Lc 4.42-44)*

<sup>35</sup> Tacahe, te tijararahipa, téchepucavanepa ena Jesús. Tiyanapa eta te mayujarasirare. <sup>36</sup> Te téjamicapa ema Pedro, májinaripa ema Jesús. Tásiha, tiyananapa nacapayacapa éma eta te mayujarasirare eta te mávapahi apaquehe. <sup>37</sup> Te náitecapauchapa, náichapa:

—Namutu ena achaneana titanucavianahi —náichapa.

<sup>38</sup> Tásiha, máichavacapa ema Jesús:

—¡Páureanasami! Nuvarahapasera viyanayare tayehe eta apana avasareana apaesa nucametarairu taicha nutuparacasivaichuhi níchuhavacaya namutu ena achaneana náehica ema Viya —máichapa.

<sup>39</sup> Tacahe, ema Jesús tiyanapa tipaica tayehe eta avasareana te Galilea. Ticametarairupaipa eta te náurujisirarevana. Énerichuvare nayanau-chapaipa ena achaneana návaháruanahi ena éreanana, máquijicavacapaipa ena éreanana.



*Ema Jesús macanaraca ema émana achane leproso  
(Mt 8.1-4; Lc 5.12-16)*

<sup>40</sup> Tacahe, te apanapa sache, títecapapa ema émana achane macajumaquene eta lepra. Mapauchapa te mamirahu ema Jesús, máepuyumirauchapa. Tásiha, máichapa:

—Tata, nucasiñavahi eta piyehe, picanaracanupaini —máichapa.

<sup>41</sup> Tacahe, ema Jesús tijimuyainehi majapanuinehi. Manacapa eta mavahu. Máichapa:

—Nuvaraha nuncanaracavi. Tájinapa píchiravaina puiti —máichapa.

<sup>42</sup> Enevanepa tinaraca. Vaipa leprósoinahíni. <sup>43</sup> Tacahe, ema Jesús máevatacapa ema achane. Matuparacapa ichape vahi macumetajirica. Ánipa máicha:

<sup>44</sup> —Pímaha, piyanayaresera pímerrecava nayehe ena tuparairucana, apaesa náimamacavi. Énainapa timetajiricanayare eta yátupirahi pinaraca, pipachihapa. Nacuijasera picumetacavaca eta nútirahi nuncanaracavi. Tásiha, piyanayareva me Viya. Picamavahuyarepahi eta pihapulupayachirayare taicha eta macanarasiravihi —máichapa ema Jesús.

<sup>45</sup> Tacahe, tiyanapa ema achane. Timetajiricapaipasera, mametacapa namutu ena achaneana eta máichavaquenevahi. Eta tacahe, ema Jesús vaipa máimerrecavahini te avasareana taicha enevaneyarehi náurujiaca ena achaneana tímarahijiana. Tacarine tiyanahi tayehe eta nájinricha achane-nahichaini. Énasea ena achaneana tiyananaichucha napauchahi. Tiásihana tayehe tamutu avasareana.

## 2

*Ema Jesús macanaraca ema émana achane macajumaquene eta mura-  
caquiha*

*(Mt 9.1-8; Lc 5.17-26)*

<sup>1</sup> Tacahe, te apanavarepa sache, tichavapa ema Jesús eta te Capernaum. Eta nasamairirisirahi eta matiarahiraripa éma, títecapanapaipa ena achaneana, camuriqueneana. <sup>2</sup> Tiyututucavanapa eta te peti mávihahi éma. Tájinapa táviravainahini eta te tapajachacaya. Ema Jesús máimitucavacaipa eta nacaijuheraya me Viya. <sup>3</sup> Tacahe, títecapanavarepa ena apamuriana, námaphi te áchuji ema achane muracaha. Cuátroana ena tímanapahi. <sup>4</sup> Váhisera náitecapauchahini eta te mávihahi ema Jesús, taicha eta nayututusravahi ena achaneana. Tacahe, navetatamaequechapa eta peti eta te máinahu te manapaicahi ema Jesús. Te náitauchapa navetataca, nacajuchuchucapa ema macajumaquene eta te áchuji te mamirahu ema Jesús. <sup>5</sup> Te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi nucaepahainavipa —máichapa.

<sup>6</sup> Tacahe, énerichuvare natiarihivare téjacanahi ena escribánoana. Napanerequenehapa eta macayemaquenehi ema Jesús. Tásiha, tisemanarinehi. <sup>7</sup> Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuana. ¡Tétavicava eta matapirava! Taicha macarichu ema Viya marataha macaepaha eta pecatuana. Nájina apanaina tiratahaina ticaepahaina eta pecatuana” tacahehi eta napanereruana. <sup>8</sup> Enurujipa ema Jesús máimararacavacahi eta nasamureana étapa eta napanereruanahi éna. Tacahe, máichavacapa:

—¿Tájaha tacayema téjecapava eta epanereruana? <sup>9</sup> Tájina tájejavaina eta níchirahi ema maca: “Nucaepahainavipa eta pipecaturanahi”. Májejarrepánapuca níchahini: “Nucanaracavipa. Péchepuca, piveha eta pímacaraji, piyana pipaica”. <sup>10-11</sup> Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti, nuchicha, nuvanecavi péchepuca. Piveha eta jara piyereruva. Piyana te pipena —máichapa ema Jesús.

<sup>12</sup> Enevanerinehi téchepuca ema macájumaquenéni. Mavehapa eta mayereruva. Tipaicapa te namirahu ena achaneana. Tiyanapa tiúchucapa. Eta náimairahi, ichape eta náramirahi namutu ena natiarhiqueneanahi. Tétavica-vainehi eta nacunachirahi ema Viya. Ánipa nacahe:

—¡Tétavicava táramicareva eta máichaqueneana ema Viya! ¡Asulupaya, Tata! ¡Vahi vímahasarénahini! —nacahepa.

*Ena Jesús máichuha ema achane ticaijare Mateo, mayehyare apóstole  
(Mt 9.9-13; Lc 5.27-32)*

<sup>13</sup> Tiuri, te apanapa sache, tiyanavarepa ema Jesús te tachaui eta cáquiure. Náitecapauchavarepa namutu ena achaneana eta mayehe. Tásiha, máimitucavacapa.

<sup>14</sup> Tacahe, te tiápechavapa tipaica ema Jesús, máimahapa ema Mateo, machicha ema Alfeo. (Ena Mateo ticaijarehivare Leví.) Tétacahi eta te macatuparahaiyahi eta macobradesirahi eta impuesto.

—Yare, péhicanu —máichapa ema Jesús.

Tacahe, ema Mateo enevanepa tiyana máehica ema Jesús.

<sup>15</sup> Te jena sácheana, ema Mateo téniricapa eta te mapena. Mámapa ema Jesús énapa ena máimitureana. Camuriqueneana ena téhicanahi ema Jesús. Natiarhivare maverana ena macutiqueneana ema Mateo ticobrarerarahiana tayehe eta impuesto. Maveranahivare ena apamuriana máemuncasareana ema Mateo. Tiúrisamureanahi eta nanisirahi. <sup>16</sup> Títecapanavarepa ena apanamuri achaneana: ena escribánoana énapa ena fariséoana. Eta náimairahi eta macachanérahahi ema Jesús ena máichuhaqueneana ema Mateo, nacaecahipa. Ánipa nacahe nayehe ena máimitureana:

—¿Tájaha tacayema tísapava ema eyehe maestro macachanevaca eta manisirahi ena nánitátajiana ticobrarerarahiana eta impuesto? ¡Tétavicavahi eta nacapecaturaravahi! —nacahepa.

<sup>17</sup> Te masamapa ema Jesús eta náechajiriruvanahi, máichavacapa:

—Ena ticajumanahi, tétavicavahi eta nacamunuirahi ema médico. Énasera ena majumareanahi vahi nácamunui mahi ema médico. Puítisera, eta tímitucanuhi núti nutanucayare namutu ena tisipecaturana apaesa náeneuchavahini, náinajica eta napecaturana. Nácani matapiravareanahi vahi nasamavahini nácamununuhini —máichavacapa.

*Nayaserecapa ema Jesús tayehe eta ayuna  
(Mt 9.14-17; Lc 5.33-39)*

<sup>18</sup> Tacahe, te apahevarepa, ayunanahi ena máimitureana ema Juan. Ayunahivare ena fariséoana. Náitecapauchapa ema Jesús ena apamuriana achaneana témejecapavarahiana. Nayaserecapa:

—¿Tájaha tacayema vahi naháyunachahini ena pímitureana? ¿Tájaha tacayema vahi nácutihíni ena máimitureana ema Juan énapa ena fariséoana? —náichapa.

<sup>19</sup> Majicapapa ema Jesús:

—Nímicutichinahe puiti. Vahi táuricaimahi ayúnanáinahíni nácani ticaichu-hacasianahi tinicanaya nayehe ena araimana. Tiúrisamureanayarehi taicha matiarhihi ema arayena. Vahi táuricahini ayúnanáinahíni. Téhesera te tépenapuca éma, jéhesare ticatisamurevanayare. Tacutiquene, vuíchaha táuricaimahi ayunanainahini ena nímitureana. <sup>20</sup> Járjapainapasera eta sáchezare, ticaverejicasianayare, taicha ticaratacanuanainapa ena ticapacuanayare núti. Jéhevarepa ayunanainapa.

<sup>21-22</sup> Esamanuchaha. Eta juca eta nímiturapianahi, amairiha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherepiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tauriqueneanahi —máichavacapa ema Jesús.

*Ena fariséona náimipicauchahi eta nayeherepiana tayehe eta sávarumuhuana. Émasera ema Jesús máimereuchahi émarichu téchahi eta nayeherepiana ena achaneana eta sache nanarasirayare*

*(Mt 12.1-8; Lc 6.1-5)*

<sup>23</sup> Eta jena sávarumuhu, tiyanapa tipaica ema Jesús. Mámamurihapa ena máimitureana. Témehicavanapa ena fariséoana. Náetavivijicapaipahi eta isanitia. Tacahe, eta napaisirapahi, ena máimitureana navechuqui-hapaipahi étajavapahi eta trigo. Navepiraquihapaipa, tépurajacachavanapaipahi. Tinicanapaipa. Tísapacareichucha éta, taicha técuhanapahi. <sup>24</sup> Énaserá ena fariséoana eta náimararasirapahi, tise manapaipa. Ánipa naicha ema Jesús:

—Pímaha ena pímitureana. Ticaemataneanapaichucha eta navepiraquirapahi eta trigo puiti juca sache tétavicavahi eta tacapicahuquenehi. Vahi tísapacarémahí eta juca nacaematanerahi puiti —náichapa.

<sup>25</sup> Tacahe, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyahaini David eta mapaisirapahi técuhanapaipa énerichuva ena téhicanapahi. <sup>26</sup> Te émarichaha ema Abiatar náquenumurihi ena tiyujaracarahiana, ema David tisiapapa eta te mapena ema Viya. Tiyaseserecapa eta manicayarehi. Náijaracapa eta pan tacapicahuquenehi nanacasarehi te mamirahu ema Viya. Nanicasarehi ena tiyujaracarahiana, émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

<sup>27</sup> Tímiyanava eta mametasirahi éna:

—Ema Viya máepiyacahi nativa ena achaneana. Te táequenepa, máimijarechinapa eta sache nanarasiraya ena achaneana, tiúrichayarehi éna. Vahi étainahini témepiyaca eta tihapapiricavacayare éna. <sup>28</sup> Tiuri puiti, numetacahayare: Núti Manerejirunuhi ema Viya, nútirichu néchahi eta sache nanarasiraya ena achaneana —máichavacapa.

### 3

*Ema Jesús macanaraca ema achane tépenavahu*

*(Mt 12.9-14; Lc 6.6-11)*

<sup>1</sup> Tacahe, te apanavarepa sávarumuhu, tiyanavare ema Jesús, tisiapahi eta te náurujisirareva. Matiarhihivare ema émana achane vaipa tayamuricahini eta mavahu, tépenavahuipa. <sup>2</sup> Natiarhihivare ena fariséoana, ena ticanarajiricanahi ema Jesús. Náimararacapa éma te macanaracayarepuca ema achane

eta te jena sache tacapicahuquenehi. Natanunuiricahi eta tiviuchayarehi ema Jesús. <sup>3</sup>Tacahe, máichapa ema Jesús ema achane:

—Yare, pitupihayare ani te namirahu ena achaneana —máichapa.

<sup>4</sup>Tacahe, máichapa ena achaneana:

—Núti nuvaraha epanerechaya. Puiti juca sache sávarumuhuhi, ¿tájahapuca táurica eta víchayare? ¿Tísapacarepuca vicha eta táuriqueneana? ¿Étapuca víchayare eta tauriqueneana? ¿Táuricapuca vípuchavaca ena achaneana? ¿Vicaparecapuca? —máichavacapa.

Énaserá títaminamurianarinehi. <sup>5</sup>Tacahe, ticatisamurevarine ema Jesús eta muracairahi eta nasamureana. Tacahe, tisemamajuhepa eta máesenimurihairahi éna. Máichapa ema achane macajumaquene:

—Nímaha. Picjaruvauchava, pímechanu eta pivahu —máichapa.

Eta máimeresirahi eta mavahu ema achane, enevanepa tinaravauchavanepa. <sup>6</sup>Énaserá ena fariséoana, tisemarinehi eta náimairahi eta juca máichaquenehi ema Jesús. Tiyananapa tisamacacana nayehe ena políticoana, machanerana ema Herodes, taicha navaraha nacapacaya ema Jesús.

### *Títécapanapa ena camuriqueneana achaneana*

<sup>7</sup>Émasera ema Jesús tiyanapa térajicavapa eta te mávapahi apaquehe eta te tachausi eta cáquiure. Mámapa ena máimitureana. Náehicavare ena ichapemuriqueneana achaneana ticavasanahi eta te provincia Galilea. <sup>8</sup>Jéhesare, te nasamairiricapa eta máichaqueneanahi ema Jesús, títécapanapa ena ichapemuriqueneana achaneana. Tiásihanahi eta te avasare Jerusalén, eta te provincia Judea, eta provincia Idumea, eta provincia Siria, étapa eta avasareana te apachara eta cajacure Jordán. <sup>9</sup>Tásiha, ema Jesús mavanecapa ena máimitureana natsesinahini étasina pacure apaesa vahi nacutupiaraca ena ichapemuriqueneana achaneana.

<sup>10</sup>Taicha camuriana ena macanararuanapahi. Namutu ena nacajumaqueneana témeñahavanapahi tiyumususujicavanapahi eta náemeñahairavaya, taicha navarahahi náemamacayare. <sup>11</sup>Jéhesare, ena éreanana tiávahácanahi ena achaneana, te náimahapa ema Jesús, tíaquipaicavanapa te mami- rahu éma. Tipiararecanapa:

—¡Pítira Machicha ema Viya! —náichapa.

<sup>12</sup>Mavanecapasera máecatihavacapa nacuija nacumetaraina taicha vuíchaha mávarahahini náimatihíni ena achaneana eta émaquenérahí Machicha ema Viya.

### *Ema Jesús manerejica ena dócequeneana apóstoleana (Mt 10.1-4; Lc 6.12-16)*

<sup>13</sup>Tacahe, tiyanapa ema Jesús eta te mávapahi apaquehe máripahi. Mámamurihapa ena ánimuriana máimitureana. <sup>14</sup>Tacahe, ánaqui manerejicavacapa te nataracu ena dócequeneana mayeheanayarehi apóstoleana. Vaipa najuni-jiacaimahi éma, macachaneyarehi tamutu sácheana. Matuparacavacapa eta nacametarairuirayare. <sup>15</sup>Máíjaracavacapa ena dóceana eta naratahairayarehi ticanararecana ena nacajumaqueneana, náimijunairayareva ena éreanana tiávahácanahi ena achaneana.

16-19 Eta juca náijareana ena manerejiruanahi\*: Ema Pedro (éma ticaijarevare Simón), ema Jacobo, ema maparape Juan, ema Andrés, ema Felipe, ema Bartolomé, ema Mateo, ema Tomás, ema apana Jacobo, ema Tadeo, ema apana Simón, émapa ema Júlasí Iscariote (ema tíjararecahi ema Jesús).

*Ena escribánoana téjcapavanahi eta náimijachirahi ema Jesús mávaháruhi ema Váinaraji Satanás*

*(Mt 12.22-32; Lc 11.14-23; 12.10)*

<sup>20</sup> Tacahe, tichavapa ema Jesús, énapa ena mayeheana apóstoleana te napena. Tiápechavanavarepa tiúrujicavana ena achaneana. Tásiha, vaipa náitujicavahini tinicana taicha tétavicavahi eta nasimutuvahi ena achaneana. <sup>21</sup> Énasera ena maparapenaveana ema Jesús, te nasamairiricapa, tiyananapa náepanayarehini éma, taicha náimijachaipahi máurishi éma.

<sup>22</sup> Énerichuvare natiarihipa ena escribánoana, tiásihanahi te Jerusalén. Náepiyaequenehapa ema Jesús, ánipa nacahepa:

—Ema maca Jesús, vémeteaca majupaha ema náquenumurihi ena éreanana, émaripa ema Satanás. Táitusiava máijaracahi eta máitupajijiasiravahi eta macuchusirahi ena éreanana —nacahepa.

<sup>23</sup> Tacahe, ema Jesús máichuhavacapa ena ticaecahirahianahi. Eta máimitusiravacahi, máimicutichinapa. Ánipa máichavaca:

—Éti, téjcapavahi eta epanereruana ímijachanuhi majupahanuhi ema Satanás. Ímijachapuca ticatianacacanahi ena éreanana. Váhisera énena tácahe.

<sup>24</sup> Tacutihi ena machanerana ema gobierno. Éna, vahi típutsimuriavanaimahi apinainahipucaini partido. Te típutsimuriavanapa, énajicacaini tiáquipaicacana. <sup>25</sup> Émaripa mácani achane te camurianahi ena machichanaveana, váiparinehivare típutsimuriavanaimahi, náehajiricacahini, énajicacahini náquipaicacahini. <sup>26</sup> Ene macahehi ema Váinaraji Satanás, váiparine máisapahini típutsicacana ena machanerana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi.

<sup>27</sup> Macutihi ema mácani achane tume. Te macaratacahi eta mataquiriqui eta majaneasirahi jácani macayehequeneana, nájina tiámeyechaimahi. Tacamunuhi nacaratacanumayare, náitiacanumayarehi ema túmequenehi achane. Jéhesare, náituruyechasareyarepa eta máimahaqueneana. Ene nucahehi núti, túmepananuhi mayehe ema maca Satanás.

<sup>28</sup> Puiti nutupiruva numetacahe: Tiperdonachacareanayare ena achaneana eta napeaturana, tamutu jácani náechajisihaira eta táíñemahiqueneana. <sup>29</sup> Jararihisera eta epecatura vahi tiperdonachacaremahi. Eti ímijachahi ema Satanás ema tiávahácanuhi. Ichape eta éjcapiravahi, taicha ema tiávahácanuhi nuti, émaquenehi ema Espíritu Santo. Éti epanararacaripa éma. Tásiha, máitavacaca eta etapiravanaya —máichavacapa ema Jesús.

<sup>30</sup> Tacahehi eta máechajiriruvahi taicha eta nacahechajiriruvairahi: “Ema maca Jesús, majupaha ema Satanás”.

\* **3:16-19** Ena nani apinana ajairana ema Jacobo émapa ema Juan, naparapecahahi, machichanaveanahi ema Zebedeo. Émasera ema Viáquenu Jesucristo máimararacahi eta náchanevana, máimativacahi éna. Manacapa eta náchucarapianahi “Boanerges”. (Eta táechajiriruvahi eta juca, Tijuricati eta náechajisira, téyayarasianavare.) Matiarihivare ema apana achane ticaijarehivare Jacobo. Ema maiya ticaijarehi Alfeo. Matiarihivare ema apana ticaijarehivare Tadeo. Eta tápipine eta máijare Lebeo, éta pa Judas. Tacahe, mapana eta máijare. (Pitanuca te Lucas 6.16 éta pa te Mateo 10.2.) Ema apana Simón, tímaticarehi ema, náumurivainihi ena revolucionárioana ticaijareanahi “cananístana”. Navaraha náquijica ena extranjeranoana romanoana.



*Suítecapauchapa esu maena ema Jesús énapa ena maparapenaveana  
(Mt 12.46-50; Lc 8.19-21)*

<sup>31-32</sup> Tacahe, te apanapa sache, tiúrujicavanavarepa ena camuriqueneana achaneana te tajuhe eta peti. Téjacanapa te machacaya ema Jesús. Títecapanecha esu maena énapa ena maparapenaveana. Nanasipasera te aneca taicha tiyututucavanahi ena achaneana. Navarahahi náechajicayarehi éma. Tásiha, nametacapa ena apamuriana ema Jesús, ánipa naicha:

—Esu pémunaruquenehi pena, énapa ena piparapenaveana nararihi ani te aneca. Navarahahi téchajicaviana —náichapa.

<sup>33</sup> Majicapapa éma:

—Yátupi némunacavacahi esu meme, énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi.

<sup>34</sup> Tacahe, máesenimuríhapa ena máimitureana ena téjacanahi te machacaya. Tásiha, macahepa:

—Ena nani ena némunaruanahivare. <sup>35</sup> Taicha namutu nácani ticaemata-neacanahi ema Tata, énahi ena némunarqueneanahi —máichavacapa.

## 4

*Eta máimicutichinaquenehi evaraqui tacaevaquenehi te apanapanenéji máteji te apaquehe*

*(Mt 13.1-9; Lc 8.4-8)*

<sup>1</sup> Tacahe, te apanapa sache, tiápechavavare tímitureca ema Jesús te tachausi eta cáquiure. Tásiha, camurianapahivare ena achaneana títecapauchanahi éma. Eta navayuchiravaripa ena achaneana, ema Jesús tíavacuhapa tayehe eta pacure, tiápajuecavapa apaesahi. Téjacapa eta máimituresirahi. Ena achaneana nanasipa tayehe eta te tachausi. <sup>2</sup> Camuri eta máimicutichaqueneanahi eta máimitusiravacahi. Ánipa macahe:

<sup>3</sup> —Esamararacanuchaha. Matiarihihi ema émana achane. Tévacahi te máesane. <sup>4</sup> Eta mapaisirapahi, témiricapaipa eta evaraqui te achene. Táimahapa eta cáyure, tanicapa. <sup>5</sup> Eta mayeherepi éma eta máevasira, máevajajapaicapaica eta apaquehe. Tásiha, eta apamuri evaraqui témiricapa te váhirichu tamitutihini eta máteji taicha máripahi eta apaquehe. Tímarucavanepanéni táicha. <sup>6</sup> Téhesera te tíjurepa eta sache, tacapajicapa; taicha vaipa táuparevacahíni. <sup>7</sup> Tacahe, eta apana evaraqui témiricapaipa te tapare eta itapequiji. Tiúrinahinéni eta táimarusira, étasera eta itape tacachuricapa eta tajurusirahi. Táemuriachapa eta sucureca. Tanasipa, vaipa tacahihini. <sup>8</sup> Tacahe, eta apamuri evaraqui témiricapaipa te tiúrina máteji. Tijurucarahihi eta táimarusira. Ichapemurihi eta tahi. Eta étana, ticahipa apaesasajiruichucha. Eta apana, ticahipa tatarerrehapanapa. Eta apanavare, ticahivare tétupicavapanapa. <sup>9</sup> Esamararacanu emutu éti. Te evarahapuca ecaicutiara, tavaraha eta epanerechinavaya —macahepa ema Jesús.

*Ema Jesús máitametacavaca ena máimitureana eta juca máimiturapi  
(Mt 13.10-23; Lc 8.9-15)*

<sup>10</sup> Tacahe, te najunijicapa ena apamuriana achaneana, témeñahavanapa eta mayehe ema Jesús ena dócequeneana apóstoleana énapa ena apamuriana máimitureana. Nayaserecapa tájahapuca tacayemahi eta máimicutiarachiravacaichucha eta máimitusiravacahi ena achaneana. <sup>11</sup> Tacahe, majicapapa éma:

—Ema Tata tituparacanuhi nítametacahere éti eta juca mapanereruana táequenereruana tayehe eta macuchucuirahere eti achaneana. Mavarahahi ímatiequenehaya éti. <sup>12</sup> Énasera ena apamuriana achaneana nímicutiarachinavacaichucha, apaesa vahi máejerarémahi eta nacaicutiarairaya

eta nasamaquenehi. Tavaraha napanerechinavaya. Eta nacaicutiarairaya, náitsivachahini eta náitairesira, apaesa naperdonachacarepaini — máichavacapa ema Jesús.

<sup>13</sup> Énerichuvare máichavarepa:

—Éti, ¿vuíchaha íturuequeneha eta juca nímicutichaquenehi? Tavaraha eta epanerechinavaya éti apanava apaesa íturuequeneha eta apamuriana nímicutichaqueneanahi. Tiuri, numetacahe: <sup>14</sup> Eta evaraqui eta máevaruhi ema achane tacutihi eta nímiturapiana. <sup>15</sup> Natiarihi ena achaneana nacuti eta apaquehe muracapahi te achene, te táemirishahi eta evaraqui. Ena nani nasamararacahi eta nímiturapiana. Émasera ema Satanás macamitisicavanepa eta nasamaquenehi. <sup>16</sup> Natiarivare ena apamuriana achaneana, nacutihi eta máteji máripahi. Te nasamararaca eta nímiturapiana, natupiruvanehinéni nasuapa, tiúrisamureanainehi. <sup>17</sup> Váhisera náratahahini nacaravahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi, taicha vahi nacamichahini jácani nacatajivairanahi. Váhivare túmesamureanainahini te tatiarihipa eta jácani nacatichaira ena achaneana táichavenehi eta náehisiranuhi. <sup>18</sup> Natiarivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana. <sup>19</sup> Napaneréquenehahinéni, tahapapiricavachisera eta jácani táicharacavayare eta náitairesira. Tavayuacavacavare eta tájiparacana, najamurachahi tamutu. Tahapapiricavare eta navarairahi tirricuchavana. Tamutu eta juca táemetavichahi eta navarairahi téhicanuana. Tamapurujihíni eta najacapirahi eta nímiturapiana. <sup>20</sup> Natiarihisera ena apamuriana achaneana nacuti eta tiúrina máteji. Éna, nasamararacahi náunacahi yátupi eta nímiturapiana. Tájinavare náichiravainahíni eta náehisiranuhi. Ichape eta nacaemataneasirahi ema Viya. Nararihi ena apaesarichu eta nacaemataneasirahi. Nararivare ena apamuriana, nativarerehapanapa eta nacaemataneasirahi. Tásiha, ena apamuriana, ichapemuripanapa eta nacaemataneasirahi ema Viya —máichapa ema Jesús.

*Ema Jesús tímitureca eta apamuriana yátupiqueneana  
(Lc 8.16-18)*

<sup>21</sup> Tímiyanava eta máimituresirahi, ánipa macahe:

—Te viyustaca eta vimícahu, váiparinehi táuricaimahi vijihapaicahini, vinacahivarepucaini te tápecu eta vétsatsame vímasirarehi. Tacamunuhi vinacayarehi te anuquehe. <sup>22</sup> Jéhesare, tayanapanepuca nacayumuruqui, tamutuyarehisera ticaechera jácani tayumurevanahi. Tájina tépacuchaimahi jácani najajairuvanahi. Tamutuyarehi téchacareya. <sup>23</sup> Te evarahapuca ecaicutiara, tavaraha eta epanerechinavaya.

<sup>24-25</sup> Máichavarepa:

—Tacamunuvare epanerecha yátupina eta esamaqueneana. Te apaesarichuhi eta epanerechirahi, apaesarichuvare eta ecaicutiarairaya. Te esuapa yátupina eta nímiturapiana, ema Espíritu Santo tímitucaheya tamutu eta tacayemaquenehi. Jéhehare, tímitucaheyare éma eta apamuriana yátupiqueneanahi. Énasera nácani vahi návarahahini napanerecha, váhivare nasuapa, énajivayare tíchavana ticaverejicasianaya eta nasamaqueneanahi.

*Ema Jesús máimicutiarachava eta táimarusira eta evaraquiiana*

<sup>26</sup> Máichavacavarepa:

—Nuvaraha nímicutichinahe eta nímiturapiana nuti Manerejirunuhi ema Viya. Te yátupihi eta nasuapirahi eta nímiturapiana ena achaneana, náitsiva-chainapa arairuinapa eta napanereruana étapa eta nayeherepianaya eta náitaresira. Tacutihi eta máevaraqui mácani achane. Tévacahi te máesane. Tásiha, tinaracapa, macuchapayarepa eta tacahirayare eta máevaraqui. <sup>27</sup> Tímarucapa eta evaraquiiana. Tijurucavare. Ema achane, tájina macaicutiarahini eta táimarusirahi. Váhivare macaicutiarahini eta tajurusirahi. <sup>28</sup> Taicha eta apaquehe, éta ticaimarucahi. Tacuchucahi tativa eta tapacaji, táehicapa eta tanaqui. Te ticahipa, tiúchucapa eta tapiraqui. <sup>29</sup> Te tiyahapa eta tahi, ticaechatijipa te tumare, taicha étainapa eta tacavehasiraya —macahepa ema Jesús.

*Emá Jesús máimicuticha eta taqui eta mostaza  
(Mt 13.31-32; Lc 13.18-19)*

<sup>30</sup> Ánivare macahe:

—Puiti nuti Manerejirunuhi ema Viya, nímicutichinahe eta ichapemurivaya eti íjaracavanahi éhicanu. <sup>31</sup> Ecutiya eta ánichichaquene taqui eta sucureca ticaijare mostaza. Éta juca, ániqutitavacapaná eta taqui te tamutu eta evaraquiiana tatiarihiqueneanahi tayehe eta juca apaquehe. <sup>32</sup> Téhesera te ticaevapa, tijurucapa eta tiápajucavahi ichapepana tayehe eta apamuriana sucurecana. Tatiarihi eta ichapetavavaca. Tásiha, tacapenajicapa eta cáyureana —macahepa ema Jesús.

*Camuri eta máimicutichaqueneana  
(Mt 13.34-35)*

<sup>33</sup> Ani tacahe tamutu eta máimitusiravacahi ena achaneana. Camuriana eta máimicutichaqueneanahi. Tamutuhi ticaicutiaracarevaca nayehe ena tivarahanahi náituruequeneha. <sup>34</sup> Tájina étahena te tímitureca, vahi macunacahini eta máimicutichira. Téhesera te macarichupa ema Jesús énapa ena máimitureana, máimicaecherachapa tamutu eta máimicutichinaqueneanahi.

*Emá Jesús macaesamirica eta une eta táepacusirahi étapa eta técatícava  
(Mt 8.23-27; Lc 8.22-25)*

<sup>35-36</sup> Tacahe, te jena sache, eta máejasirahi ema Jesús te pacure, tímiturecahi. Te cápereichichapa, máichapa ema Jesús ena máimitureana:

—Viyanaya viánueca te apachara —máichavacapa.

Tacahe, ticametavanapa nayehe ena achaneana. Tásiha, námapa ema Jesús eta te pacure. Náehicapa ena apamuriana te pacure eta napaisirapahi. <sup>37</sup> Te ítipierecanapa, tachimaracapa eta muraca técatícava. Tépacucapa ichape eta cáquiure. Tisiapapaipahi eta une tayehe eta pacure. Tiánehipaipahi tacaericavaca. <sup>38</sup> Émasera ema Jesús, tímacapaichucha te tahivu eta pacure te machunusi. Tásiha, nacajamicapa éma. Ánipa náicha:

—¡Tata maestro! ¡Picatiuchahavi, véricainapa! ¿Váhipuca péñamava eta viyehe? —náichapa.

<sup>39</sup> Tásiha, enurujipa téchepuca éma. Titupihapa. Mavanecapa eta técatícava étapa eta une. Ánipa macahe:

—¡Pámatina, pésamiricava! —máichapa.

Tacahe, tíchecapa eta técatícava. Tésamiricavapa eta une. Tésamiriecavapa tamutu.

<sup>40</sup> Tacahe, máichavacapa ena máimitureana:

—¿Tájaha tacayema epica? ¿Váhipuca ecasiñavahini eta nutiarahirapahi eta eyehe? —máichavacapa.

<sup>41</sup> Ena máimitureana, tétavicavainehi eta náramirahi. Tiyaserecapanapa, ánipa nacahe:

—¡Tétavicavapa eta máitupajjiasiravahi ema maca vimaestro! ¡Jéhesare, yátupiquene eta émairahi machichahi ema Viya! ¡Taicha tamutu tasuapahi, macamatinacahi eta técativava étapa eta une eta táepacusirahi! —nacahepa.

## 5

*Ena achane návaháruhi ena ichapemuriqueneana éreanana  
(Mt 8.28-34; Lc 8.26-39)*

<sup>1</sup> Títecapanapa te apachara eta cáquiure eta te apaquehe ticaijare Gadara.  
<sup>2</sup> Ánaqui tatiarihi eta ecariana. Tacahe, te tiúcupaicapa ema Jesús eta te pacure, tiúchujicavanepa ema émana achane návaháruhi ena éreanana. <sup>3</sup> Éma másihapahi eta te ecari, taicha macapenajuechavacahi eta covachana. Nájina náratahahini náitiacahini éma. Étaripa eta ichapepi cadena, vahi táratahahini.  
<sup>4</sup> Taicha máejeharipa nacaratata. Náitijivauchahi te cadena. Nanacavare eta grillo te mapiqui. Émasera mavenarurujica eta cadena, mavenarucavare eta mayehe grillo. Jéhesare, nájina naratahahini namansuchahini ema maca achane. <sup>5</sup> Eta máitaresirahi, eta mávirarehi tayehe eta ecari étapa eta mávapahi te anuqueheana mari. Tamutu sácheana, yátiana, tipiararerecachi éma. Tijarachava te márijahiana. <sup>6</sup> Tacahe, tiyerehipaichaha máimahapa ema Jesús, tijunapapa mapauchapa. Máepuyumirauchapa.

<sup>7-8</sup> Ema Jesús, eta máimairahi ema achane, máichapa:

—¡Pijunijica ema maca achane, piti éreana! —máichapa.

Tipiararecapa muraca eta majicapirahi ema achane. Ánipa macahe:

—¿Tájaha picha píteca pipauchanu, piti Jesús, Machichaquenevihi ema Viya? ¡Pájapanunu, vuíchaha picuvanecanu ánaqui te nucaicuñaiyayare! —macahepa.

<sup>9</sup> Tacahe, ema Jesús mayaserecapa ema éreana. Ánipa maicha:

—¿Tájaha píjare píti?

Majicapapa éma:

—Núti nucaijare “Nacapenaharu ena ichapemuriqueneana éreanana”. Jéhesarehi, ichapemurihavihi víti. <sup>10</sup> ¡Pájapanuhavisera! Te piáquijicahaviya-repuca, ¡vahi picuevatacavahi viyanaya te tiyerehi! —nacahepa ena éreanana tiávahácanahi ema achane.

<sup>11</sup> Tiuri puiti, tatiarihihivare eta camuriqueneanahi cúchiana. Tinihicanahi ánaqui te táemiripaisine eta masihi. <sup>12</sup> Tacahe, ena éreanana tiyaseuchavanapa mayehe ema Jesús. Ánipa nacahe:

—¡Picatajicahavi! Pévatacavahi eta te távihahi eta jena cúchiana. Písapahavi visiapahacavaca eta jénana —náichapa.

<sup>13</sup> Tacahe, ema Jesús macuchuchujicavacapa eta te máquehe ema achane, máisapapa nasiapahacavaca eta cúchiana. Tatiarihi cútimahi apina mil eta cúchiana. Tacahe, te tasamapa eta cúchiana eta nasiapahasiravacahi ena éreanana, tijunaparacanapa témiririjicanapa te tachausi eta cáquiure. Téririjicanapa tamutu.

<sup>14</sup> Natiarihihisera ena tijaneacanainihi eta cúchiana. Te náimahapa, tíramecanarinehi. Tiyananapa tijunapanapaipa, timetajiricanapaipa nácani nácapajiruvanapahi, étapa te avasare namutuvare nametaca. Tiáramicaréinehi nayehe ena achaneana. Tiyananapa náimahapana tájahapuca eta táichavaquenevahi eta cúchiana. <sup>15</sup> Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema

Jesús. Tájinaripahi máichiravainahini. Ticamuirihaipahivare. Tásihasera, tipicanarinehi ena achaneana. <sup>16</sup> Tavetijipa te náitametacapa ena tímahanahi eta táichavaquenevahi eta cúchiana te macuchuchujicavacapa ena éreanana ema Jesús. <sup>17</sup> Tacahe, nayaseacapa ema Jesús váhini macuitecapauchavacaini tayehe eta návasahi éna, machavavanehini te másinehi.

<sup>18</sup> Tacahe, te tiávacuhayarepa ema Jesús, ema achane manararuhi tiyaseserecapa eta mavarairapa máehica ema Jesús. <sup>19</sup> Émasera, vahi máisapahini. Ánipa maicha:

—Piyanchucha pichava nayehe ena pijaneanana te piávasa. Pimetacaya eta macanarasiravihi ema Viya taicha eta majapanuiravihi —máichapa ema Jesús.

<sup>20</sup> Tacahe, tiyanapa tichava ema achane. Timetajiricapaipasera mametacavacapaipa eta máichaquenehi ema Jesús mayehe. Náraminehi namutu ena ticavasanahi eta te provincia ticajare Decápolis.

*Ema Jesús macanaraca esu machicha ema Jairo, ésupa esu apana esena sucajumaquenehivare*

*(Mt 9.18-26; Lc 8.40-56)*

<sup>21</sup> Tiuri, tichavavarepa tiánueca ema Jesús te apachara. Te títecapapa, náurujiacavanepa ena ichapemuriqueneana achaneana te mávinehi te tachausti eta cáquiure. <sup>22</sup> Tacahe, títecapapa ema émana achane ticajare Jairo. Ema maca achane, tétavicavahi eta mapicauchacarevahi. Tupairucahi tayehe eta náurujisirareva. Te máitecapauchapa, tépuyucapa te mamirahu ema Jesús. <sup>23</sup> Mayaseacapa, ánipa máichapa:

—Tátachicha, surarihi esu nuchichasami, ticajumahi. Puiti téñamajiricavaipa ésu. Picatajicanupaini, tata. Pinasinanu eta pivahuana suyehe apaesa sunaraca —máichapa.

<sup>24</sup> Tacahe, masuapapa ema Jesús. Tiyanapa máehicahi ema achane. Náehicavarepa ena camuriqueneana achaneana. Náevatajiricanecha éma.

<sup>25</sup> Tásiha, te nataracu sutiarhipahivare esu esena sucajumaquenehi. Doce añoripahi eta sucajumairahi táichirahi eta suítine. <sup>26</sup> Ichaperipa eta sucatajivairahi taicha camurianaripa ena típuchanahi médicoana. Títaharipa eta suímahaqueneanainihi. Tájinasera vahi suátivarehini. Suáviraparasia-vaichuhi suvayuhapaichucha eta sujuma. <sup>27</sup> Ésu, sutanucapaipahi ema Jesús, susamairiricahi eta tiáramicareana máichaqueneanahi. Supauchapa suéhiqecuchapaipahi te maquecu. <sup>28</sup> Taicha tacahehi eta supanereruhi: “Taratachuchaini némamajiacahini eta ñimuiriha, németeaca nunaracapa-pucaini”, sucahesamurepa. <sup>29</sup> Tacahe, suémamajiacapa eta tacheyarapi eta mamuiriha. Jéhesaréinehi, enurujipa tíchea eta suítine. Tisamavapa ésu eta sunarasiraipahi tayehe eta sujumainihi.

<sup>30</sup> Émasera ema Jesús macaicutiaravanepa eta sutiarahirahi esu tacanararuhi eta máitupajijiasiravahi. Enurujipa téviurucavahi te namuri ena ichapemuriqueneana achaneana. Ánipa macahe:

—¿Nájaha témamajiacanuanahi?

<sup>31</sup> Tacahe, ena máimitureana náichapa:

—Tata, téñatuhejiricacanahi namutu eta achaneana taicha ichape eta nasimutuvahi. Piyaserecahavirichahava nájahapuca ena témamajiacavianahi —náichapa.

<sup>32</sup> Émasera ema Jesús máesenimurihapa, matanucapa nájahapuca ena témamajiacanahi. <sup>33</sup> Tásiha, supauchapa esu esena. Tiyayacarepaipa taicha



tipicaripahi. Taichasuéchahi eta suíchaquenehi ésu. Suépyumirauchavanepa te mamirahu. Sumetacapa tamutu. <sup>34</sup>Tásiha, máichapa ema Jesús:

—Tiuri, nuchicha. Pinaracapa puiti táichavenehi eta picasiñairanuhi. Vaipa picueñamava eta pichaviraya te pipena. Vaipa tichavaimahi eta pijumainihi —máichapa.

<sup>35</sup>Téchajiricavaichahahi ema Jesús eta suyehe esu esena, títecapananecha ena tiásihanahi te mapena ema Jairo. Nametacavanepa:

—Esu pichicha tépenasamipahi. Vaipa picucamesa ema Maestro —náichapa.

<sup>36</sup>Émasera ema Jesús vahi masuapahini eta nametasirahi. Mavara-haichucha tiyana. Tacahe, máichapa:

—Vahi picueñamava, piti Jairo. Pácasíñavachucha eta nuyehe —máichapa.

<sup>37</sup>Tacahe, ema Jesús vaipa máisapahini náehica ena apamuriana achaneana. Nacarinepa ema Pedro, ema Jacobo, émapa ema Juan. <sup>38</sup>Te títecapanapa te mapena ema Jairo, máimahapa ema Jesús ena achaneana vaipa náituca-carahahíni, tijajamurianaripahi eta náiyairahi. Tipiararecanaripahi muraca.

<sup>39</sup>Émasera ema Jesús eta masiapirahi, máichavacapa:

—¿Tájaha tacayema eta iúrujiricavahi eta ani, íyaharacavapa? Vahi ecuiyaha. Esu suca amaperu, váhinéni suépenahini. Tímacarichucha ésu —máichavacapa.

<sup>40</sup>Énasera ena achaneana nacaecahirichucha éma, técavanapa. Tacahe, ema Jesús macuchucavacapa te aneca namutu. Tacahe, tisiapapa te suávihahi esu amaperu, émapa ema suiya, ésupa esu suena, énapa ena mapanana máimitureana. <sup>41</sup>Tacahe, macaratavauchapa ésu. Máichapa:

—Nuchicha, néchajicavi. Péjamicá, péchepuca —máichapa.

<sup>42-43</sup>Enurujipa esu amaperu téjamicapa, téchepuca. Tipaicapa te namirahu. Ichaperinehi eta náramirahi ena tímahanahi. Tásiha, ema Jesús mavane-cavacapa náijaraca eta sunica esu amaperu. Matuparacavarepa muraca eta vahi nacuechajisiha eta náimahaquenehi. Esu amaperu, dóceripahi eta suhañora.

Tacahe, tiyanapa ema Jesús. Tichavapa te mapena.

## 6

### *Tichavapa ema Jesús te mávasa Nazaret*

(Mt 13.53-58; Lc 4.16-30)

<sup>1</sup>Tacahe, te apanapa sache, tiyanavarepa tipaica. Tichavapa tayehe eta mávasa Nazaret, mámamurihapaipa ena máimitureana. <sup>2-3</sup>Tacahe, te jena sache sávarumuhuquene, tiyanapa tayehe eta náurujisirareva nayujarasirare ena achaneana. Tímiturecapa. Camuriana ena tisamararacanahi. Ichape eta tahapasamurechiravacahi ena achaneana. Váhisera návarahahini nasuapahini. Náepururichucha éma. Ánipa nacahe:

—¿Távihapuca mavínehi eta júcana máimiturapianahicacha ema máca? ¡Témunahiricavapa títipajijiacavaipahíjicacha! ¿Távihásica macaravahuinehi eta máichirayare eta tiáramicareana? Vivaraha vímaha víti apanava eta máichaqueneanahíji visamaiririruanahi. Taicha vímatihí ema maca. Carpintérochucha éma. Vímatihivare esu maena María. Vímatihivare ema maparape Jacobo\*, émapa ema José, émapa ema Judas, émapa ema

\* **6:2-3** Ema maca achane, ticajarehi Jacobo te náechajiriruva ena israelítana. Te véchajiriruva, ticajarehi Santiago. Mapaenumavahi máehica ema Jesús te táequenepa eta máechepusirahi te máecari ema Viáquenu.

Simón. Vímatihivare ena esenana maparapenaveanahi, ticavasanahi ani —náichacacapa.

<sup>4</sup> Ema Jesús máimatihí eta napanereruanahi. Tásiha, máichavacapa:

—Tatuparaca epicauchahaviya vimutu viti mavaneruana ema Viya. Étiserá eti nujaneananahi ecavasanahi eta te juca viávasa, étipa eti nuparapenaveana, vahi epicauchanuhini —máichavacapa.

<sup>5-6</sup> Éma, ichape eta máramirahi eta namasuapajiraivahi éna. Eta tacahe, tájina máimerecachaini eta tiárami careana. Tacarichu eta macanarasirahi ena nacajumaqueneana eta máemamamahásiravacahi te mavahuana. Vahi camurianainahíni ena macanararuanahi.

*Ema Jesús mavanecavacapa ena dócequeneana apóstoleana napaicayare tamutu avasareana, ticametarairuanayare*

*(Mt 10.5-15; Lc 9.1-6)*

Tacahe, ema Jesús tiyanapa mapaicahi eta avasareana máimitucavacapa ena achaneana.

<sup>7</sup> Étana sache, macurujimurihapa ena dócequeneana mayeheana apóstoleana. Tacahe, máijaracavacapa eta náitupajijiasiravayare naratahairayare náquijica ena éreanana. Tacahe, mavanecapa tiyanana eta te apanapaneana avasareana, apinanayarepahi eta napaicayarepahi.

<sup>8</sup> Matuparacapa, ánipa máichavaca:

—Tájina iámaimahi eta eyereruvana eta epaisiraya. Váhivare ecuama eta enirurucuha te alforja, étapa eta plata. <sup>9</sup> Étanarichuvare iámayare eta emuiriha. Tacarichu iámaya eta eyupairiqui. Ecaeparupevayaresera. <sup>10</sup> Te ítecapapa tayehe eta jácani peti ítecapihaya te jácani avasare, ánasi tayehe. Te iúchucayarepa eta te jena avasare, epaenumava ejunijica eta ítecapihahi. <sup>11</sup> Te váhipuca nacujacapahe te jácani avasare, váhivare nacubaraha nacusamahe, iúchucavaneyare. Étatapevachavanumayaresera eta máteji te ívapeana. Táicutiarayare eta máicuñasiravacayare ema Viya taicha eta namavarairahi najacapahehíni. Nutupiruva numetacahe, te táitecapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinarajiqueneana ticavasanaini te Sodoma étapa eta Gomorra —máichavacapa ema Jesús.

<sup>12</sup> Tacahe, tiyananapa ena dóceana. Ticametarairuana eta tacamunuirayarehi eta náeneuchiravaya ena achaneana, náinajica eta napecaturana.

<sup>13</sup> Náimijunavacapaipa ena éreanana tiávahácanahi ena achaneana. Camurianahivare ena nacanararuana tayehe eta najumanaini, nacapajasisirapahi te nachuti eta aceite.

*Ema Herodes masamairiricapa eta máichaqueneanahi ema Jesús*

*(Mt 14.1-2; Lc 9.7-9)*

<sup>14</sup> Tacahe, ema Herodes ema aquenucahi tayehe eta Galilea masamairiricavarepa eta máichaqueneanahi ema Jesús, taicha náechajisihahi namutu ena achaneana. Nararihi ena téjecapavanahi eta napanereruana, ánipa nacahe:

—Ema maca Jesús, ¿váhipuca émaina ema Juan Tícachasirícarahíni macaparuhi ema Herodes? Tichavahichupuca títareca. Étapuca tacahehi puiti maratahahi maicha eta tiáramicareana —nacahepa.

<sup>15</sup> Nararihisera ena apamuriana nacahepa:

—Émapuca ema víyarahaini profeta Elías, téchepucahi.

Ena apamuriana nacahepa:

—Émarichuhi profeta, macutiquenehi ena náinapureanáini antivuanaini. Váhiserá téchepucaimahi éma —nacahepa.

<sup>16</sup> Émasera ema Herodes, eta masamairirisirahi, macahepa:  
—Németeacahi ema maca émaripa ema Juan, ema nímiyuchatipiquenurehi, téchepucahipuca te máecari —macahepa.

*Eta táichararacavahi eta máepenirahi ema Juan  
(Mt 14.3-12)*

<sup>17-18</sup> Eta macapasirahi ema Herodes ema Juan, ani tacahe eta táichararacavahi: Te jena año, ema Herodes mavehahi esu Herodías, esu machine-nahi, mayenahi ema maparape Felipe. Máiminajicapa ema suima. Tacahe, ema Juan macajachavacapa éna eta naviracacairahi. Éta tamicatichahi ema Juan, sucatichapa esu Herodías. Tásiha, ema Herodes máeratacapa te cárcel ema Juan, macavanairipipa náitiaca te carenapi. <sup>19</sup> Esu Herodías, tétavicava eta sucatichirahi ema Juan. Suvarahahi sucapaca éma. <sup>20</sup> Váhisera suratahahini, taicha matsirihacahi mapicauchahi ema Herodes ema Juan, taicha máechahi tétavicava eta máurivahi ema Juan. Máimatihivare eta mavaneruhi ema Viya. Eta tacahehi, macatiuchahi éma apaesa tacuija suícharaca ésu. Táitusiava, ema Herodes máuricapa masamararacahi eta máimiturapiana ema Juan; váhisera máituruequenehahini tájahapuca máichararacavayarehi. <sup>21</sup> Tacahe, eta te jena yati ticajaremuhupa ema Herodes, sucamapurapa esu Herodías eta máepiyasirahi eta ichape piesta ema Herodes. Máichuhapa ena máevanachana énapa ena oficiáleana, énapa ena ticaimahaqueneana ticavasanahi tayehe eta Galilea. <sup>22</sup> Te tinicanapa téranapa, esu suchicha esu Herodías tisiapapa eta te návihahi ena achaneana. Esenachicharipa ésu. Tírimaicapa te namirahu. Ema Herodes máuricainehi ichape, énapa ena machimarana. <sup>23</sup> Tacahe, ema Herodes máichapa ésu:

—Nujuracha te pimirahu. Piyaseacanu tájahapuca eta pivarahaquenéna. Núti níjaracaviyare jácani piyasearunuyare, tayanapane vácuticaca eta nímaahaqueneana —máichapa ésu.

<sup>24</sup> Tacahe, tiyanapa tiúchucapa esu amaperu. Suyaserepanapa esu suena, ánipa suícha:

—¿Tájahapuca eta nuyaseacaini eñi ñina Herodes? —sucahepa.

Tásiha, suíchapa esu suena:

—Piyaseacaya eta ñichuti eñi Juan, puítinarichu ñíjaracavi —suíchapa.

<sup>25</sup> Enurujipa tichava tisiapa esu amaperu eta te mávihahi ema aquenuca Herodes. Suyaseacapa éma, ánipa suícha:

—Nuvaraha píjaracanu puítinarichu eta ñichuti eñi Juan eñi tícachasiricarahi. Píjaracanu te curuja —suíchapa.

<sup>26</sup> Tásiha, eta masamirahi eta juca suyasearuhi ema rey Herodes, ichape-rinehi eta mapanereresirahi. Váhisera mávarahahini mavayuacahini ésu táicha nasamaripahi ena machimarana eta máijarasirayarehi eta suyasearuyarehi ésu. <sup>27-28</sup> Tacahe, enurujipa mavaneca ema suntaru eta te cárcel. Mayuchatipiquenuhapaná ema Juan. Tacahe, mámapaipahi eta machutini te curuja. Máíjaracapa esu esena amaperu. Tásiha, suíjarapanapa esu suena.

<sup>29</sup> Te nasamairiricapa ena máimitureana ema Juan, tiyananapa náepanapa eta máquehéni, náecarapanapa.

*Ema Jesús máitaparahavacahi máenicavaca ena camuriqueneana achaneana  
(Mt 14.13-21; Lc 9.10-17; Jn 6.1-14)*

<sup>30</sup> Tacahe, tichavanapa tiúrujicavana ena apóstoleana mayehe ema Jesús. Nametacapa tamutu eta náichaqueneanapahi éta eta najacapirahi ena achaneana eta náimiturapianahi. <sup>31</sup> Tacahe, máichavacapa ema Jesús:

—Tiuri. Tájina táichava. Puiti viyana vácarichu eta te mávapahi apaesa vinaraca ánipina —máichavacapa.

Taicha vahi téjiacavana ena achaneana. Tévacajiricacanahi tiyanana. Vahi náitujicavahini nanicanumahini ena apóstoleana émapa ema Jesús. <sup>32</sup> Tacahe, tiyananapa te pacure, tiávacuhanapa. Nacaijuhepa te mávapahi apaquehe. <sup>33</sup> Énaserá ena achaneana nanecapaichucha eta nayanirahi. Camurianahi ena tímatianahi. Tacahe, tiyananapa tijunapanapaipa, nametapanayarehi ena apamuriana achaneana. Tásiha, tiúrujicavanapa ena tiásihana te tamutu avasareana. <sup>34</sup> Te tiúcupaicapa ema Jesús, máimahapa ena camuriqueneana achaneana natiariripahi. Tétavicavainehi eta majapanuiravacahi, taicha nacutihi eta uvesana nájina tijaneacaina. Tacahe, máimitumuriharipa. Camuri eta máimiturapiana. Tiuna eta máimitusiravacahi. <sup>35</sup> Te cáperehipa, ena máimitureana napauchapa éma. Náichapa:

—Cáperehipa juca sache. Tiyerehivacahi eta pétiana. <sup>36</sup> Tacahe, táuricapa pimetacavaca ena achaneana nayanapa, navachareca eta nanica te jácani isanitiana, avasarechichanapuca te víchacayarahanahi. Taicha ani, tájina naviyaimahi eta nanicahini —náichapa.

<sup>37</sup> Majicapapasera éma:

—Íjaraca étina eta nanica.

Éna náichavare:

—¿Pivarahapuca viyana vivachareca eta pan? Tacamunuhi vácayehhini eta camuri plata apaesa námütupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —nacahepa.

<sup>38</sup> Tacahe, mayaserecapa ema Jesús:

—¿Áyana eta pan ecayehe puiti? Eyana ímaha.

Te náechapa, nametacapa:

—Cínochichaichu eta pan, apiquipa eta jima jitaruca —nacahepa.

<sup>39</sup> Tacahe, macavanairipipa náejahahacapaicahini namutu te mujípahi, náijamuripaichuhi. <sup>40</sup> Tacahe, téjahapaicanapa ena achaneana. Náijamuripaichuhi eta náejasirahi. Cincuantanapahi, ciéntoanapahi. <sup>41</sup> Tacahe, ema Jesús mavehapa eta cincoquene pan étapa eta apiqui jima. Máesenicapa eta te anuma. Mahasulupayachapa ema Viya. Mayuvetutujicapa eta pan, tásiha máijaracapa ena apóstoleana. Éna, náijaracapa ena achaneana. Énerichuvare mayuvetutuhesinavare eta apiqui jima. Tisimurivacapaipa eta náijaraca. <sup>42</sup> Tacahe, námutu tinicana, tisatueanapa. <sup>43</sup> Tásiha, nacaemacharichahavare eta doce saye ichapehiana táinicachavacaichahava eta náemacharajiana eta pan étapa eta jima. <sup>44</sup> Camuriana ena máeniruanahi. Te nataracu, natiaririhini ena cinco mílqueneana ajairana.

*Éma Jesús mapaicaeca eta une*  
(Mt 14.22-27; Jn 6.16-21)

<sup>45</sup> Te tamutupa, enevanepa mavanecahi ema Jesús tiávacuhana eta te pacure ena máimitureana. Tínapucanayarehi tiánuecana te apachara eta te avasare Betsaida. Émasera ema Jesús manasiyarehi máevatamurihanumayarehi ena achaneana.

Tásiha, tiyananapa ena máimitureana. <sup>46</sup> Tacahe, te tamutupa eta macame-tavairahi ema Jesús nayehe ena achaneana, tiyanapa tiápanahi tayehe eta anuquehe mari. Tiyujaracayarehi tayehe.

<sup>47</sup> Tacahe, te tiúyatipa jena yati, ema Jesús manasirichaha macarichuhi eta te anuquehe mari. Éna máimitureana itupierecanaipa tayehe eta cáquiure.

<sup>48</sup> Tásiha, tachimaracavacapa eta muraca técatícava, nácapaquihipaipahi. Te

tijararahipa, ema Jesús máimahapa eta nanausirapahi muraca. Tacahe, tiyanapa macapayamuriha. Mapaicaecapaipa eta une. Máetavicavacapai-pasera. <sup>49</sup> Éna máimitureana tipicanarinehi eta náimairahi eta mapaicaesirapahi eta une, náimijachaipahi cunare. <sup>50</sup> Tipiararecanapa namutu eta náimairahi. Máechajicavanepasera éma. Ánipa maicha:

—Vahi ecupica. Nútichucha. Étumechava —máichavacapa.

<sup>51</sup> Tacahe, mapauchapa éna. Tiávacuhapa nayehe. Tacahe, tíjahúchavapa tíhecapa eta técativava. Náramirinehi ichape ena máimitureana. <sup>52</sup> Taicha vuíchaha nacaicutiarahini eta tacayemaquenehi eta macaejapasirahi eta pan, eta táimereuchirahi éma eta vanairucairahi me Viya. Muracasamuremuriarichaha.

*Éma Jesús macanaraca ena nacajumaqueneana ticavasana te Genesaret (Mt 14.34-36)*

<sup>53</sup> Tacahe, te apanapa sache, tiápechavanavarepa tiánuecana eta cáquiure. Títecapanapa eta te avasare ticaijare Genesaret. <sup>54</sup> Te tiúcupaicanapa, náitiacapa eta napacure. Éna natiarihiqueneanahi náimativanepa ema Jesús. <sup>55</sup> Tásiha, tiyananapa tijunapana timetajiricanayarehi tayehe tamutu eta avasarechichana tachacayarahanahi. Tacahe, tiúrujicavanapahi ena achaneana te jácani máitecapihapahi ema Jesús. Námavacapaipahi eta te áchuji ena nacajumaqueneana. <sup>56</sup> Énerichuvare, te jácani mayanipahahi te acheneana téhepuca cálleana, nanaquipaicapahi ena nacajumaqueneana. Tacahe, nayaseacapahi éma máisapirainahini náemamajiaca eta tacheyarapi eta mamuiraha. Tacahe, nácani témamajiacanapahi, enevanepaipa tinaracanapahi.

## 7

*Éma Jesús mametaca ena achaneana eta timaeperajicarahi (Mt 15.1-20)*

<sup>1</sup> Tiuri, te apanapa sache, náitecapauchapa ena apamuriana fariséoana énapa ena escribánoana, tiásihanahi tayehe eta Jerusalén. Témeñahavanapa eta mayehe ema Jesús. <sup>2</sup> Te nataracu ena máimitureana ema Jesús, nararihi éna vahi nacasipavahunumahini eta nanisirahi. Tacahe, ena fariséoana, eta náimairahi eta namaitauchirahi eta nayeherepihi, ichaperinehi eta nasemanevahi, taicha náimijarechahi “máeperaji” eta juca. <sup>3</sup> Taicha namutu ena israelítana, napicauchahi eta nayeherepiana ena náchucanaveanaini, navetijipa ena fariséoana. Te vahi ticasipavahunumanahi, váhivare náisapaimahi tinicana. Taicha éna vahi návaraha tánasihíni eta tachipejihini ánichichainahini, taicha tipicanahi tamaeperajicahini eta náchanevana. <sup>4</sup> Étaripa násihapahipuca te mercado, te plázapuca, te títecapanapa te napena, ticasipavahunayarehi. Maverá eta apamuri nayeherepianahi tipicauchacareanahi nayehe, étaripa eta nasipasiraparaca eta náereresiana, étaipa eta jarra, étaipa eta návacuruhiana étaipa eta catre náimasirare.

<sup>5</sup> Tacahe, nacajachapa ema Jesús ena fariséoana énapa ena escribánoana. Ánipa náicha:

—Pímaha. Éna pímitureana vahi náitauchahini eta viyeherepi. Namaeperajicapa eta náchanevana eta nanisirahi taicha vahi nacasipavahunumahini. ¿Tájaha tacayema vahi napicauchahini eta viyeherepi nanaquiruhi ena viáchucanaveanaini? ¿Étaserapuca tacahehi eta pímitusiravacahi? — náichapa.

<sup>6</sup> Tacahe, majicapapa ema Jesús, ánipa maicha:



—¿Éti ecaijarehi apimirahe! Tatupiruvahi eta máechajiriruvahi ema Viya, téchajisiahehi éti eta te Sagrada Escritura. Ánipa macahe: “Ena nani achaneana, tétserajicanuanahi te najaca; váhisera táetupicavahini te nasamureana. <sup>7</sup> Téneuchavanahi eta nuyehe, tamapurujihisera eta náeneuchiravahi. Nacaerajicahivare eta nuvanairipiana; tasapihapa náimicapicauchahi eta nayeherepiana táuchurechucha te napanereruana ena náchucanaveánaini” macahepa ema Viya. <sup>8-9</sup> Ichape eta éjecapiravahi éti, taicha tasapihapa epicauchahi eta eyeherepiana. Étasepa eta mavanairipi ema Viya, vaipa epicauchahini. Tasapihapa épuruhi eta mavanairipiana taicha tivayuacahehi ichape eta ítauchirahi eta eyeherepiana. <sup>10</sup> Émarichuhi ema víyahaini Moisés tiájuchahi eta mavanairipi ema Viya eta viyehe: “Pipicauchaya pémunacayareva ema piya ésupa esu pena”. Jucarihi eta apana vanairipi: “Mácani tiúmehahi ema maiya ésupa esu maena, vahi tijapanucarémahi nacapacayarehi”. <sup>11-12</sup> Étisepa vahi epicaucha eta júcana vanairipiana mayehe ema Viya. Taicha te mararhipuca mácani achane ticamavahupuca me Viya eta máimahaqueneanahi, eta ímiturapi éti “Vaipa tatuparacaimahi ema achane eta máimicatasiraya ema maiya ésupa esu maena”. <sup>13</sup> Ani tacahehi eta ecaepahaira eta tasupacarevahi eta mavanairipiana ema Viya. Tasapihapa, ímicapicáuchahi eta eyeherepianachucha. Jararihivare eta apamuriana eta éjecapiravanahi tavasiqueneanahi —máichavacapa ema Jesús.

<sup>14</sup> Tacahe, máichuhapa ena achaneana, náurujicava eta máimitusiravacayare. Tásiha, máichavacapa:

—Nuvaraha esamanu yátupina, apaesa ácaicutiara. <sup>15-16</sup> Tájina timaeperajicaina eta viáchanevana te vahi vicasipavahunumahi te vinicayare. Vahi étaparacaina eta vinicaqueneana. Étasepa eta jácani evainarajivana táuchureanapuca te ejaca, étapa eta evainarajipanereruana; jéhevare éta timaeperajicahéhi —máichavacapa.

<sup>17</sup> Tacahe, te tiyanaracanapa ena achaneana, macarinepa ema Jesús énapa ena máimitureana, nayaserecapa máitametacavacahini eta máimiturapi.

<sup>18</sup> Tacahe, máichavacapa:

—¿Énerichuvare éti mapanererurehe? ¿Váhipuca ácaicutiarahini eta juca? Tamutu eta juca tasiapaqueneanahi te vijaca vinicasareanahi, vahi timaeperajicahavimahi, taicha vahi tasiapa te visamure. <sup>19</sup> Tatupiruhi te vijuhe. Tásiha, te tiúchucapa eta, apanapa eta táuchusihahi —máichavacapa ema Jesús. (Eta máichiravacahi eta juca, máimicaecherachapa eta táurivahi tamutu eta tinicacareana.)

<sup>20</sup> Macahevarepa:

—Étasepa jácani panererucana tamauriqueneana, te náisapavapuca ena achaneana, étara timaeperajicavacahi éna. <sup>21-22</sup> Taicha te amahe eta nasamureana napanerechahi eta tamauriqueneanahi. Ema achane mapanerechahi maveha esu apana esena mayena ema apana achane. Esu esena supanerechahivare suveha ema apana achane suima esu apana esena. Éna amaperuana napanerechahi eta natuhusivaya. Nácani tipanerechanahi eta ticaparecana, tiámerecana, tivayuarecana, téchajihihana. Te nasamureana, najamuracha eta apayeheana, ticapinarurahiana, tétserajicavana eta nasiñavairahi. Mapicaurairahana, camuriqueneana eta napanereruana máecharaireana. <sup>23</sup> Tamutu eta juca panererucana tamauriqueneana tiásihahi te nasamureana. Jéhesare, eta júcana eta timaeperajicahi eta náchanevana ena achaneana —máichavacapa ema Jesús.

*Esu ésuna esena apavasana sucasiña ema Jesús  
(Mt 15.21-28)*

<sup>24</sup> Tacahe, tiyanavarepa tipaica ema Jesús, énapa ena máimitureana. Nacaijuheyarehi eta avasareana táunavanahi eta provincia Siria. Tásiha, títecapanapa te jácani peti. Váhisera mávarahahini náechahini ena apamuriana achaneana eta matiarahirahi. Tásihasera náecharichucha éna. <sup>25</sup> Tacahe, susamairicapapa esu ésuna esena. Ésu, apavasanahi, sirofeníciana. Eta suéchejiriruva eta griego. Esu suchicha mávaháruhi ema émana éreana. <sup>26</sup> Títecavanepa esu, suépuyumirauchapa te mamirahu ema Jesús. Tiyaseuchavapa mayehe ema Jesús eta máimijunijicahini ema éreana suyehe esu suchicha. <sup>27</sup> Tacahe, máichapa esu:

—Nativaya néchapajiricavaca ena nujaneanana. Taicha vahi táuricahini ásapihahíni néchapajiricahehini éti apavasanana, émétaficahini ena nujaneanana —máichapa.

<sup>28</sup> Esu esena sujicapapa:

—Énehineni tacahehi, tátachicha. Yátupihí vahi pijaneananuinahini. Pájapanunusera, picatajicanuchuchaini. Víti apanava vácasíñavahini eta piyehe eta vítátijivairaina —suíchapa.

<sup>29</sup> Tacahe, máichapa ésu:

—Tiuri eta péchajiriruva. Piyanapa pichava te pipena. Táichavene eta picasiñairanuhi, nímijunijicaripa ema éreana suyehe esu pichicha —máichapa.

<sup>30</sup> Tacahe, tichavapa ésu te supena. Suchimapapa tívecahi esu suchicha te sucamane. Jéhesaréinehi, májinaripa ema éreana, majunijiacaripa ésu.

*Ema Jesús macanaraca ema túhuquiña upa*

<sup>31</sup> Tacahe, tiyananavarepa tipaicana najunijicapa eta provincia Siria. Nánucuhapa eta provincia ticaijare Decápolis. Tacahe, títecapanapa eta te tachausi eta cáquiure Galilea, te tinapaica te táuchusine sache. <sup>32</sup> Tacahe, ena achaneana námapa ema émana achane mayehe ema Jesús. Túhuquiña, úpavare ema achane. Náechajiuchapa eta manaca eta mavahu mayehe ema achane, macanarasirayarehi. <sup>33</sup> Tacahe, ema Jesús mañajichapa ema achane nayehe ena achaneana. Manacapa eta masuveraqui te maquiñana. Tacahe, tiátutuquivauchavapa. Tásiha, máemamacapa eta manene ema achane. <sup>34</sup> Tacahe, máesenicapapa te anuma. Tiúmitipa. Tacahe, máichapa:

—¡Téchujihapa eta piquiñana!

<sup>35</sup> Enurujipa tisamarahipa ema achane. Tijimuyapa eta manene, tiúripa téchejica. <sup>36</sup> Tacahe, máimichavapa ema achane nayehe ena majaneanana. Matuparacapa éna eta nacuija nametaca. Énasera timetajiricanaichucha. <sup>37</sup> Tétavicava eta náramirahi ena nametaruanahi. Ánipa nacahe:

—Tétavicava táuricacareva tamutu eta máichaqueneanahi ema Jesús. Téchajicanapahi ena úpana, tisamarahianavarepa máicha ena túhuquiñana —nacahepa.

## 8

*Ema Jesús tiápechava máenica ena achaneana  
(Mt 15.32-39)*

<sup>1</sup> Tacahe, eta juca sácheanahi tiúrujicavanapa ena ichapemuriqueneana achaneana te mávihahi ema Jesús. Mapanaripa sache nacahehi ena achaneana, tájinaipa nanicahini. Tacahe, máichuhavacapa ema Jesús ena máimitureana. Máichapa:

<sup>2</sup> —Nujapanuvaca ena nani achaneana, taicha mapanaripahi sache puiti eta nacahehi eta viyehe. Tájinaipavare naviyahini nanica. Téchurihanaripa eta nanicaquene. <sup>3</sup> Te névatacavaca nayana te napenana, machu náquipaicava te achene taicha vaipa túmevacaimahi eta náecuavahi. Taicha natiarihi ena tiásihanahi te tiyerehiana. Vénicavacayare —máichapa.

<sup>4</sup> Tacahe, najicapapa ena máimitureanahi. Ánipa naicha:

—¿Távihapucaini viviyahini eta vénisihayarehi ena nani camuriqueneana achaneana? Eta te juca mávapahi vamáhi, tájina vítusiávámahi eta tinicareana —nacahepa.

<sup>5</sup> Tacahe, mayaserecapa éna. Ánipa máicha:

—¿Áyanachaha eta pan eta íamaqueneanapahi?

—Jucarihi siéterine —náichapa.

<sup>6</sup> Tacahe, macavanairipipa eta náejahapaimuriahini namutu ena achaneana. Tacahe, mavehapa eta siétequene pan, mahasulupayachapa ema Viya te anuma. Tásiha, mayuvetucavacapa, máijaracapa ena máimitureana. Éna, náijaracavacapa ena achaneana. <sup>7</sup> Tatiarihihivare eta ánimurichicha eta jímachichana. Mahasulupayachavare ema Viya tayehe eta jima. Tacahe, mavanecavarepa eta náijarasiravacayare ena achaneana. <sup>8</sup> Tacahe, tinicanapa namutu, tísatuheanapa. Tacahe, nacurujicapa eta náemacharájiana. Siete sáyericahahivare eta náemachana. <sup>9</sup> Eta nasimutuvahi ena tinicanahi táetavica eta cuatro mil achaneana. Tacahe, te tamutupa eta juca, máevatamuríhasarepa ema Jesús ena achaneana nayanaya nachava te napenana. <sup>10</sup> Enurujipa tiávacuhanapa te pacure ema Jesús énapa ena máimitureana. Tiyananavarepa. Tiánuecana nacaijuhepa eta te avasare ticaijare Dalmanuta.

*Ena Jesús macajachavaca eta namasuapajiraivahi ena fariséoana  
(Mt 16.1-4; Lc 12.54-56)*

<sup>11</sup> Tacahe, titecapanapa ena apamuriana fariséoana. Tépanavanapa nacana-rajirica ema Jesús. Eta navarairahi náimiaquipaicayarehi, nayaseacapa máimerecaini eta tiáramicareana, máimerecavahini te yátupihipuca vanairucahi me Viya. <sup>12</sup> Tásiha éma, tichuruamichavarine muraca. Tacahe, máichavacapa:

—¿Tájaha tacayema eti achaneana eyaseacanu nímereca eta tiáramicareana? Núti nímatihe. Vahi esuapanuimahi te nímerecapucaini eta tiáramicare. Tásiha, váiparine étina tatuparaca ímahahini eta tiáramicareana —máichavacapa.

<sup>13</sup> Tacahe, majunijicavacapa éna. Tiyanavarepa tiávacuha te pacure. Tiyananapa tiánuecana te apachara eta cáquiure.

*Ena Jesús máimicuticha eta levadura eta apimirairanahi ena fariséoana  
(Mt 16.5-12)*

<sup>14</sup> Tiuri puiti, náemitisicahi ena máimitureana eta nanirurucuha. Tatiarihihisera eta étanahi pan eta te pacure. <sup>15</sup> Eta nayanirahi, máimitumurihapa ema Jesús éna. Máichavacapa:

—Tímaticarehi eyehe eta levadura eta tasisijisira tamutu eta masa. Tacutirichu eta tapareasirahi eta apimirairavacahi ena fariséoana étapa eta tacañamarasira eta ecaimahaquenerayare. Vahi ecucuti ena políticoana. Échapaváicha tayehe, machu éhica éna —máichavacapa.

<sup>16</sup> Tacahe, náichacacapa ena máimitureana. Ánipa nacahe:

—Tímicajachahavihi eta vémitisisirahi eta pan. Eta tacahe, macahehi tayehe eta levadura.

17 Éma máimatiacavacapa. Tásiha, máichavacapa:

—¿Tájaha tacayema ecahechajiriruvahi eta émitisisirahi eta pan? ¿Vuíchahacaru ácaicutairahini? ¿Tájinacaruichaha epanereruina éti? ¿Muracachutihichaha? 18 Tamapurujichuchapuca eta ímairahi eta níchaqueneana. ¿Vuíchahacaru ácaicutiarahini? Tamapurujipuca eta esamirahi eta nímiturapiana. 19 ¿Váhivare échahini eta nucaejapasirahi eta cíncoquene pan, naniruhi ena cinco mílqueneana achaneana? ¿Áyanahi sáyeana eta náemacharajiana evehaqueneanahi? —máichavacapa.

Tacahe, najicapapa:

—Doce sáyeana.

20 —Étapa eta siétequene pan naniruhi ena cuatro mílqueneana achaneana, ¿áyanahivare sáye eta náemacharajianahi evehaqueneanahi? —máichavacapa.

Najicapavare:

—Siete sáye —náichapa.

21 Tacahe, máichavacapa:

—¿Vuíchahacaruva ácaicutiara? —máichapa.

*Éma Jesús macanaraca émana achane púchuqui eta te avasare Betsaida*

22 Tiuri, títecapanapa eta te avasare Betsaida. Ánaqui, námapa éma achane púchuqui. Náechajiuchapa éma eta macanarasiraya éma Jesús. 23 Tacahe, éma Jesús macaratavauchapa éma púchuqui, mámapa te tachachacu eta avasare. Tacahe, mayajihauquichapa eta máture eta te máuquihana. Tásiha, manacapa eta mavahuana eta te machuti. Tásiha, mayaserecapa:

—¿Pímairicapapa? —máichapa.

24 Tacahe, téseninicapa éma púchuqui. Macahepa:

—Nímairicapapa apaesa. Éta nímairahi ena achaneana, ticutimahichuchasera yucuquiana, tiyamuricanahisera —máichapa éma púchuqui.

25 Tacahe, éma Jesús mápechavare manaca eta mavahuana eta te máuquihana éma púchuqui. Te mavehapa eta mavahuana, yátupipa tijarahipa eta máimairirisirahi. Tamutupa máimaha. 26 Tacahe, éma Jesús máevatacapa éma púchuquinihi, mayanapa te mapena. Máichapa:

—Píyanapa pitupiru te pipena. Váhisera picusiapa eta te jena avasare eta piyanihaya —máichapa.

*Éma Pedro máimereucha éma Jesús émairahi éma Cristo  
(Mt 16.13-20; Lc 9.18-21)*

27 Te táequenepa eta juca, tiyanavarepa tipaica éma Jesús, énapa ena máimitureana. Nacaijuhepa eta te avasarechichana tachacaya eta ichape avasare ticaijare Cesarea, máepiyaruhi éma rey Felipe. Éta napaisirapahi, mayaserecapa ena máimitureana. Ánipa maicha:

—¿Tájaha nacayema ena achaneana eta nuyehe? ¿Nájahanuhipuca náimijachanuhi núti? —máichavacapa.

28 Tacahe, najicapapa:

—Éna apamuriana náimijachavihi téchepuca éma Juan Tícachasiricarahini. Éna apamuriana tímijachavianahi éma víyarahaini profeta Elías, téchepucahi éma. Éna apamuriana tímijachavianahivare éma mácani apana profetaini antívuini, téchepucahi —náichapa ena máimitureana.

29 Tacahe, tiápechavavare mayaserecavaca:

—Étiyapa, ¿nájaha ímijachanuhi núti?

Majicapavanepa éma Pedro:

—Pítira yátupiquenévivi Cristo —macahepa.

<sup>30</sup> Tacahe, matuparacapa muraca éna, nacuija nacumetaca eta émairahi ema Cristo.

*Ema Jesús tímereuchava eta máepenirayare  
(Mt 16.21-28; Lc 9.22-27)*

<sup>31</sup> Tacahe, tépanavapa máimitucavacahi eta táichararacavayare eta máepenirayare. Ánipa maicha:

—Nutí Manerejirunuhi ema Viya, nutuparahaichuhi ichapemuri eta nucatajivairayare. Tépurunuanayare ena tuparairucana énapa ena aquenucarahana. Éna, tímicapacuanayareva. Mapanayareichuhisera sache eta nucaheyare eta népenirayare. Tásiha, nuchavayarehi néchepuca —macahepa.

<sup>32</sup> Máimicaecherachapa eta macayemaquenehi. Tacahe, ema Pedro máiputsiacapa ema Jesús. Ánaqui macajachapa, máijarasiravahi eta mapanereruhi. <sup>33</sup> Tacahe, téviurucavapa ema Jesús. Máesenicapa ena apamuriana máimitureana. Tásiha, macajachavarepa émapava ema Pedro. Máichapa:

—Píti, téjecapavahi eta pipanereruhi. ¡Pínajica eta juca tauriquenehi! Pivarahapa pihapapica eta mapanereruhi ema Viya. Eta juca pipanereruhi tacutihi eta mapanereruanahi ema Satanás, énapa ena machanerana — máichapa.

<sup>34</sup> Tacahe, máichuhavacapa ena máimitureana énapa ena apamuriana achaneana. Máichavacapa éna:

—Nácani navaraha náehicanu, tacamunu náinajica tamutu eta tihapapirica eta náehisiranuhi. Nacaravahuyareva eta nímiturapiana. <sup>35</sup> Nácanisera téñamanahi eta náitaresira, tiávamirahuanaya eta náehisiranu, énajivayare ticamitiequenehavanaya eta náitaresira. Énaserá nácani yátupi tíjaracavana téhicana eta náehisiranuhi, étapa eta námirahi eta tíurina échajirirucava, tayanapane táimicapacavacupuca, éna títujicavanayare tiúchucuhayare eta náitare-siranaya. <sup>36</sup> Énerichuvare nácani tacaéñamararuanahi eta nacaimahaqueneíraya te juca apaquehe, tíñehiyare eta náitaresira taicha eta tacaéñamarasiravacahi tahapapiricavacahi tayehe eta náuchucuirayarehini. Tiyananainapa eta te yucu nacaicunaiyayare. <sup>37</sup> Taicha vahi máratahaimahi mácani achane mavachachahini eta máurivaya te apana vítaresira. <sup>38</sup> Énaripa nácani titsirihanapuca téhicanuana, náimitsirihapuca eta nímiturapiana te namirahuana ena achaneana mapicauruirahana pecatumareana, núti apanava nutsirihayareva nayehe ena nani. Nucaerajicainapa ena nani, nutí Manerejirunuhi ema Viya, te táitecapapa eta sáchehare nuchavirayare aquenucanuinapaipa. Te jena sáchehare, námainapaipa núti eta majaraiva ema Tata, nucachanénapaipa ena sántoqueaneana ángleana.

## 9

<sup>1</sup> Énerichuvare máichavacapa:

—Nutupiruva numetacahe: Puítiripa te etaracu éti etiaríhi éti vahi épenavanémahi, ímahanunumaya eta táepaniraya eta nítipajijiasiravahi eta nucaturahairahi aquenucanuya me Viya —máichavacapa.

*Ema Jesús tihapamaichava eta máimahi  
(Mt 17.1-13; Lc 9.28-36)*

<sup>2</sup> Tiuri, sáisipa sache eta nanasirahi ánaqui. Tacahe, ema Jesús manaquicavacapa ena máimitureana. Nacarinehi máma ema Pedro, ema Jacobo, émapa ema Juan. Tiyananapa eta te étana mari anuquehepana. Nacarichu éna. Eta ánaqui, náimahapa tihapamaichavahi eta máimahi ema Jesús te namirahu éna.



Tétavicavapa eta tajapuvahi tajararasirahi tamutu eta máquehe. <sup>3</sup> Eta mairiha, táetaviucha eta tajanunumesirahi. Nájina tiratahaina tépachinacha tajanunumecahini náicha eta muíriare. <sup>4</sup> Tacahe, tiáramicarenavarepa tímerecavana ena apina ajairana: ema víyahaini profeta Elías émapa ema víyahaini Moisés. Téchajiricavanaripahi mayehe ema Jesús. <sup>5</sup> Tásiha, ema Pedro tímisiapavapa, téchajicapa ema Jesús. Ánipa macahe:

—Tata Náquenu, tétavicavapa táuricacareva eta viávihairahi eta ani. Tiúripanahipucaini vépiyacahini eta epenahuinapachuhini. Pipenahuinarichuhini píti, mapenainarichuhivaréni ema Moisés, émapaini ema Elías —máichapa.

<sup>6</sup> Váhinéni máimatiequenehaini ema Pedro tájahahipuca eta mavarahaquenehi macayema. Namutu tíñacavana ichape ena mapanana máimitureana. <sup>7</sup> Tacahe, tiáramicarevarepa eta úcaji táepacúmurihahi éna. Nasamavarepa eta mahu ema Viya tayehe eta úcaji. Ánipa macahe:

—Ema maca, ema yátupiquenehi nuchicha némunarquenehi. Éma esuapayare —macahepa.

<sup>8</sup> Tíjuhúchavavarepa, te náesenicavarepa, macarinehi ema Jesús. Nájinaripa ena apinana náimahaqueneanahi.

<sup>9</sup> Tacahe, te tichavanapa tiúcupaicanavarepa, ema Jesús matuparacavacapa éna. Ánipa maicha:

—Vuíchaha ecumetajirica eta juca ímahaquenehi puiti. Tiámainucava te néchepuca te nécari núti —macahepa.

<sup>10</sup> Tásiha, nasuapa eta matupararuhi. Napanerequenehahisera eta macayemaquenehi. Tiyaserejiricacanapa:

—¿Tájahapuca tacayemarihi eta máechepusirayare te máecari? —nacahepa.

<sup>11</sup> Te tichavanapa tayehe eta anuquehe mari, nayaserecapa éma, ánipa naicha:

—Ena escribánoana tímitucanahi eta machavirayare tiápechavaya títareca ema víyahaini Elías, tínapucayarehi eta pímeresiravayarehi píti Cristo. ¿Énapuca téjecapavanahi ena escribánoana? —náichapa.

<sup>12-13</sup> Majicapapa ema Jesús:

—Yátupi, ema víyahaini Elías títecapayarehi, máetupiripanayarehi tamutu. Nútisera numetacahe: Títecaripahi ema Elías, váhisera náimatihini ena escribánoana. Váhivare najacpahini ena tuparairucana éma. Nacatianacahisera nacapacahi éma, tacuti eta táechajisihaqueneanahi eta Sagrada Escritura eta máichavaquenevayarehi éma. Ene nucaheyare núti Manerejirunuhi ema Viya. Ticianacanuanayarehivare, tépurunuanayarehi. Ichape eta náemecatajichiranuyare eta náimicapasiranuya, tacutihi eta táechajisihaquenehi eta Sagrada Escritura eta nuyehe —máichapa ema Jesús.

*Ema Jesús macanaraca ema amaperu mávaháruhi ema éreana  
(Mt 17.14-21; Lc 9.37-43)*

<sup>14</sup> Tacahe, te tichavanapa éna te návihahi ena apamuriana máimitureana, natiarihihi ena camuriqueneana achaneana te nachacaya. Natiarihihivare ena apamuriana escribánoana, nacanarajiricavacahi ena máimitureana. <sup>15</sup> Eta náimairahi ema Jesús, náraminehi ena achaneana. Tijunaparacanapa namutu náechajipanaya. <sup>16</sup> Te títecapanapa te návihahi ena máimitureana, ema Jesús mayaseremurihapa éna. Ánipa maicha:

—¿Tájaha eta ecanarajiricavacahi ena nani escribánoana? —máichapa.

<sup>17</sup> Tacahe, tiúchujicávanepa ema émana achane. Majicapapa, ánipa maicha:

—Tata maestro, picatajicanu. Námapahi piyehe ema maca nuchichasami. Éma, vahi téchajica maicha ema éreana. <sup>18</sup> Mavarahapa jácani ema éreana,

máijahúchava máquipaicahi ema nuchicha. Tásiha, ema amaperu ticarisa-sajacapa, tinirataquiahechavapa muraca. Tivirajipa máicha ema éreana, muracaquihavarepa. Nuyaseacahi ena pímitureana eta náimijunairayarehini ema éreana. Váhisera náratahahini —máichapa ema achane.

<sup>19</sup> Tacahe, máichapa ema Jesús:

—¡Tétavicava emasuapajiraivavaca eti achaneana! ¡Cúverarecachasicaini eta nucamichirahénahini! Iáma ani ema amaperu —máichapa.

<sup>20</sup> Tacahe, náepanapa ema amaperu. Te máimahapa ema éreana ema Jesús, enurujipa macaeñamaca ema amaperu. Tacahe, tiáquipaicavapa te apaquehe. Téchariripáicavapa ticarisasajacapa. <sup>21</sup> Tacahe, mayaserecapa ema Jesús ema maiya ema amaperu. Macahepa:

—¿Tiyereripahipuca eta juca máichavaquenevahi? —macahepa.

Majicapapa ema achane:

<sup>22</sup> —Te amuyarichaha. Máejeharipa máquipaica ema mara éreana te yucu téhevare une, taicha mavaraha macapaca éma nuchicha. Pítisera, te piratahapucaini, pájapanuhavini picatajicahavisamíni —macahepa ema achane.

<sup>23</sup> Majicapapa ema Jesús:

—¿Tájaha picayemaquene eta píchanuhi eta te nuratahahipucaini núti? ¡Pítinapucaini, te pirataha! ¡Pácasiñanu! ¡Tamutu títujicacare te ecasiña eti achaneana! —máichapa ema Jesús.

<sup>24</sup> Enurujipa majicapa ema achane. Tijaranu eta majicapirahi, ánipa macahe:

—¡Nucasiñavi, tata! ¡Pímicatacanu eta néchuriasirahi eta nucasiñairavaina piyehe! —macahepa.

<sup>25</sup> Tacahe, máimahapa ema Jesús ena achaneana tiúrujicavanaripa mayehe. Tásiha, macajachapa ema éreana, ánipa maicha:

—¡Piti váinaraji, piti pétuhuquiñarahi, úpahi pícha éma! Núti nuvanecavi: ¡Pijunijicayare ema maca amaperu! ¡Vaipa picuchavaucha ema maca! —máichapa ema Jesús.

<sup>26</sup> Tacahe, tipiararecapa ema éreana. Mavayuyujicapa tiyayacare ema amaperu máicha. Tacahe, majunijiacapa ema amaperu. Éma amaperu ticutipa máepenaquene. Tacahe, nacahepa ena achaneana:

—Tépenasamipa —nacahepa.

<sup>27</sup> Tacahe, ema Jesús macaratavauchapa, macaechepucapa ema amaperu. Tacahe, titupihapa ema amaperu, tiúripa. Tájina máichava.

<sup>28</sup> Tacahe, te táequenepa, náiputsiacapa ema Jesús ena máimitureana. Nayaserecapa:

—¿Tájaha tacayemahi eta vahi váratahahini vicuchuahini ema éreana mayehe ema amaperu? —náichapa.

<sup>29</sup> Tacahe, majicapapa éma:

—Éma maca éreana, muracapanahi éma. Eta ecuchusiraina ena nani macutiqueneanahi tavaraha íchanumayare eta eyujarasiraina étapa eta íchiraya eta ayuna —máichapa.

*Tiápechavavare ema Jesús tímereuchava eta máepenirayarehi  
(Mt 17.22-23; Lc 9.43-45)*

<sup>30</sup> Tacahe, tiyananavarepa tipaicana. Nánucuhapa eta provincia Galilea. Vahi mávarahahini ema Jesús eta nasamairiricahini ena achaneana eta nánucuirahi éna, machu nahapapiricapucaini eta máimitusiravacahi ena máimitureana. <sup>31</sup> Eta máimitusiravacahi, ánipa macahe:

—Nutí Manerejirunuhi ema Viya, járajapainapa eta sáchezare eta máijara-siránuya mácani achane nayehe ena ticatianacuananahi. Ticaratacanuanayare, ticapacuanayareva. Téhesera te mapanaquenénapa sache eta népeniraya, néchepucayare —macahepa.

<sup>32</sup> Énasera ena máimitureana váhiquene nacaicutiarahini eta macayemaquenehi. Natsirihacapasera nayaserecaini.

*¿Nájahapuca ema apóstole ticapicahupana?  
(Mt 18.1-5; Lc 9.46-48)*

<sup>33</sup> Tacahe, títecapanapa eta te avasare Capernaúm. Te peti náitecapihahi, mayaserecavacapa ena máimitureana. Ánipa macahe:

—¿Tájahapuca eta ejicapaemaracacahi eta epaisirapahi te achene? —macahepa.

<sup>34</sup> Tásiha, vahi najicapahini, taicha vahi návarahahini náimereuchavahini eta najicapaemajiricacairapahi eta nájahairayarepuca mácani ticapicahupanahi. <sup>35</sup> Tásiha, téjacapa ema Jesús. Máichuhamuripa ena dócequeneana eta napauchirayare náejaca eta te machacaya. Tacahe, máichavacapa:

—Nácani navarahahi ticapicahupananayare te etaracu, tavaraha náechapajiricavaca namutu ena nachamuriana. Nacachuricayare eta náemunaraivahi nayehe ena apamuriana —máichavacapa.

<sup>36</sup> Tacahe, máichuhapa ema émana amaperuchicha. Majupacapa te nami-  
rahu éna. Tacahe, máichavacapa:

<sup>37</sup> —Nácani tijacapanayare ena amaperuana níchavenénahi núti, ena nani yátupi náimerecaya eta náemunasiranuhi núti taicha tímicutijiricavahi nútinahini najacapa. Taicha nácani tijacapanuanahi núti, énerichuyareva tacahehi eta najacampirahi ema Ticachichanu, ema tivanecanuhi —máichapa.

*Tímicatacavahianahi nácani vahi ticatianacaviana  
(Lc 9.49-50; Mt 10.42)*

<sup>38</sup> Tacahe, ema Juan mametacapa, ánipa máicha:

—Tata maestro, vímahahi ema émana achane máquijicavacahi ena éreanana te píjare ticutirinehi pítinahini píjaraca eta máitupajijiasiravahi. Tásihasera vicavacahi éma, taicha vahi viúmurivainahini —máichapa ema Juan.

<sup>39</sup> Émasera ema Jesús máichapa:

—Vahi ecucavaca éma. Taicha te máichahipuca ema mácani eta tiáramicare, mámapicahi eta níjare, vahi macaecahinuhini. <sup>40</sup> Tímicatacavahianahi nácani vahi ticatianacavianahi. <sup>41</sup> Jéhesare, nácani ticumpirachaheana eta une éti étaripa táichavenera eta étirahi nuchaneranairaheni nuti Cristo, vahi námapurujimahi. Yátupihí ticavachaequeneanayarehi éna —macahepa.

*Ichape eta máicuñayare mácani tímiaquipaica te pecatu ena amaperuana*

<sup>42</sup> Tímiyanava eta máimituresirahi ema Jesús, ánipa macahe:

—Tacutiquene mácani tímiaquipacaya nácani ena téhicanuanahi mánsuque-  
neanahi. Tiúripanahipucaini táijahúchavahini máepenahini mativainahini éma. Váhirichupucaini macucaicuñahini, taicha vahi macuimiaquipacahini ena téhicanuanahi —macahepa.

*Ecunevaicha ichape, machu náepujuquichahe eta te yucu máemahacacaquene  
(Mt 18.6-9; Lc 17.1-2)*

<sup>43-48</sup> Énerichuvare máichavacapa:

—Jéhevare, te tavarahapuca táimipeaturachaheyare eta evahu, tapamisi-  
rahénapapuca íchayare eta tauriqueneana, tiúripana eyuchatica, apaesa

vahi tacuímíáquipaicahe tayehe eta pecatu. Étaripa eta ívape, te tavarahapuca támahe íchayare eta tamauriqueneana, tiúripa eyuchaticavare, apaesa vahi tacuímíáquipaicahe tayehe eta pecatu. Étaripavare eta iúquiha, te táimiaquipaicahepuca tayehe eta pecatu, tavarairahi táimahayare eta tamauriqueneana tájiparacana, tiúripa evecuhauquichava. Taicha tiúripa eta ejacapacarehi éti eta esiapiraina eta te mávasa ema Viya, tayanapane táejicavapuca eta iáquehe. Páurehesamisera éti, te náepujuquichahepuca eta te yucu infierno, tayanapanéni tamutuchahahini eta iáquehe. Taicha ánaqui máemahacacaquenehi eta yucu. Máitavacaca eta ecatajivairanayare. <sup>49</sup> Tacuti eta vépurarajica eta icheve eta viniru, ene nacaheyare ena tiyana te yucu, ticaepuraracasianayare tayehe eta yucu.

*Vahi ecuisapa táepaha eta ecamunucarevahi*  
(Mt 5.13; Lc 14.34-35)

<sup>50</sup> Eta icheve, tétavicavahi eta táurivahi, taicha ticamunucarehi. Ene ecaheyare éti eta ecamunucarevahi eta nayehe ena achaneana. Váhi tacuepaha eta ecamunucareva. Vahi ecucuti eta tajachira eta icheve, taicha tájina eta táichevavainahini. Tacuijavare tahapapicahe eta iúrivahi —máichapa ema Jesús.

## 10

*Ema Jesús tímíturacahi, máechajisihahi mácani achane tínajicahi esu mayena*  
(Mt 19.1-12; Lc 16.18)

<sup>1</sup> Tacahe, tiyananavarepa tipaicana te tinapaica te vana. Nánucuhapa eta provincia Judea. Tásiha tiánuecanapa eta te apachara eta cajacure Jordán. Ánaqui tiápechavanavare tiúrujimuriavana ena ichapemuriana achaneana te jácani máitecapihapahi ema Jesús. Tásiha, tímíturacavare éma, taicha tacahehi eta mayeherepihi. <sup>2</sup> Tacahe, náitecapauchapa ena apamuriana fariséoana. Natanucahi eta ticaviureyarehi ema Jesús. Ánipa náicha:

—Vivaraha pimetacahavi ¿te táuricapuca máinajica ema achane esu mayena?

<sup>3</sup> Tásiha, ema Jesús mayaserecavarepa ema apana:

—¿Tájahasica eta tacayema eta mavanairipi ema víyarahaini Moisés? — máichapa.

<sup>4</sup> Najicapapa éna:

—Ema víyarahaini Moisés máisapahi ema suima máejerare eta máinajisira esu mayena. Macavanairipiser májucha eta ajureca tayehe eta náinajicacaira. Tásiha, eta máijarasirahi ésu eta juca ajureca, máinajica ésu. Tásiha, vaipa mayenainahini —nacahepa ena fariséoana.

<sup>5</sup> Tacahe, ema Jesús máichavacapa éna:

—Ena iáchucanaveanaini, te jácani eta nasemairahi, náinajica ena nayanana. Ema víyarahaini Moisés máisapahi tínajicacana táichavenehi eta namuracasamurevanahi éna, vahi náimitucacarehini táicha. <sup>6</sup> Váhisera máuricahini ema Viya eta náinajicacahini. Taicha te tépanavainapa acane, ema Viya máijaracahi ema achane ésunayareichuhi esu mayenayare. Esu esena émanayareichuvare ema suímayarehi. <sup>7-8</sup> Ani tacahe eta mavanairipi ema Viya: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa títáticacanayare. Eta navehacacairahi, tímicutijiricavaipa étanarinehi eta náqueheana” tacahepa. Éna, tímicutijiricavainapa émanainarichuhini te peti. Étanarichu eta napanereruana. Vaipa

táisapacarehini eta náinajicacairahini. <sup>9</sup> Eta tacahe, mácani máinajicahi esu mayena, éma máepuruhi eta juca mavanairipi ema Viya —máichavacapa.

<sup>10</sup> Te táequenepa, nacarichuipahivare ena tayehe eta peti náitecapihahi, ena máimitureana nayaserecapa ema Jesús tayehe eta juca máechajiriruvanahi.

<sup>11</sup> Tacahe, máichavacapa éna:

—Te máinajicapuca esu mayena mácani achane, eta maviraya esu apana esena, ticapecaturaipa éma me Viya. Ichapevare eta máejecapiravahi suyehe.

<sup>12</sup> Tacutiquene súcani esena, te suínajicapuca ema suima, eta suviraya ema apana achane, ticapecaturaipavare ichape ésu —máichavacapa.

*Éma Jesús mayujaraucha ena amuyana*

*(Mt 19.13-15; Lc 18.15-17)*

<sup>13</sup> Tacahe, ena achaneana námavacapaipahi ena amuyana eta mayehe ema Jesús. Navarahahi máemamahacavacayarehi éna, mayujarauchavachivaréni. Énase ena máimitureana vahi náisapahini. Nacaichepaicapa ena tiámanapahi ena amuyana. <sup>14</sup> Te máimahapa ema Jesús eta nacaichepaisirahi, tisemapa. Tásiha, máichavacapa ena máimitureana:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna. <sup>15</sup> Nutupiruva numetacahe: Nácani vahi nácutihini ena amuyana eta nasuapajiraiva, vahi nuchaneranimahi —macahepa.

<sup>16</sup> Tacahe, majupacavacapa ena amuyana. Máemamasicavarepa, mayujarauchavacapa.

*Éma achane rico téchajiricava mayehe ema Jesús*

*(Mt 19.16-30; Lc 18.18-30)*

<sup>17</sup> Tiuri, te apanapa sache, tiyananavarepa. Eta napaisirapahi, macahepaipa ema émana achane. Tijunapaipahi. Matupiru máepuyumiraucha te mamirahu ema Jesús. Mayaserecapa, ánipa maicha:

—Tata maestro, piti piúriquene ¿Tájahapucaini eta nícharacavahini eta nítujisiravaina me Viya máichecuaraquirénahini eta nítaresira? —máichapa.

<sup>18</sup> Éma Jesús majicapapa:

—¿Tájaha tacayema pímijsarechanu “Piti piúriquene”? Mararihi ema Viya. Jéhevare éma, tétavicavahi eta máurivahi. <sup>19</sup> Téhesera te pivarahapuca pecha eta apana vítaresira, pisuapayarehi eta mavanairipiana ema Viya. Piti pímatipa eta júcana: “Vahi picucapareca. Váhivare picuveha esu esena apayena. Váhivare picuamereca. Nacuija pépiyáequeneruina. Váhivare picuvayureca. Pipicauchayareva ena ticachíhavianana” —máichapa.

<sup>20</sup> Tacahe, majicapapa ema achane:

—Tata, tamutu eta juca vanairipiana nusuapahi nítauchahi eta námape-  
ruvahi, puíticha juca ajairairanuipa —macahepa.

<sup>21</sup> Tacahe, ema Jesús máimmaracapa ema achane, máemunacainehi. Tásiha, máichapa:

—Jucarihichaha eta pítauchaquenyare. Piyana, píjararecaya tamutu eta pímahaqueneana. Tásiha, píjaracavacapa ena páureana. Jéhevare eta, pijacapayare eta pímahaquenyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

<sup>22</sup> Tásiha, témahasamurerinehi ema achane taicha eta macayemaquenehi ema Jesús. Ichaperinehi eta mapanereresirahi, taicha mavayuchahi eta macaimahaquenerahi. Macatiequeneharinehi tamutu. Tiyanachucha.



<sup>23</sup> Tacahe, máesenicapa ema Jesús ena máimitureana natiarihiqueneanahi te machacaya. Tacahe, máichavacapa:

—Yátupiquenehi máitujiana eta nájarasiravainahini eta náehisiranuinahini ena rícoana eta nasiapirainahini te anuma —máichapa.

<sup>24</sup> Ena máimitureana náramine eta nasamirahi eta máechajiriruvana. Tásiha, mápechavacapa máicha:

—Nuchichanaveana, esamanu. ¡Máitujiquenehi eta nájarasiravainahíni téhicanuana ena ticasíñanahi eta nacaimahaquenerahi! <sup>25</sup> Eta juca tímicitijiricavahi eta vipera camello, máitujíhi tánucuhahini te támicuejehe eta parirapa. Ene nacahehi ena rícoana —macahepa.

<sup>26</sup> Tásiha, náramine ena máimitureana, eta nasamirahi eta juca. Náichapa:

—¡Tétavicavahi eta tamaitujicacarevahi! ¡Nájina títujicavaimahi náuchucuhahini!

<sup>27</sup> Tacahe, máimararacavacapa ena máimitureana. Tásiha, máichavacapa:

—Nájina émanaina achane émajivainahíni ticuchucuhava. Émasera ema Viya, macarichu marataha ticuchucureca. Taicha tájina máemejerachaque-nénahini ema Viya, tamutu marataha —máichapa.

<sup>28</sup> Tacahe, máichapa ema Pedro:

—Vítisera, Tata, vinaquicahi tamutu eta vicayehequeneana, vivarairahi véhicavi —máichapa.

<sup>29</sup> Ema Jesús majicapavarepa:

—Nutupiruva numetacahe: Namutu nácani nanaquicahi eta napena, najunijicahivare ena ticachichana\*, ena naparapenaveana, ena nachichanaveana; etapa eta nayehe apaquehe, te nanaquicahi táichavenehi eta náehisiranuhi, etapa eta námirayare eta tiúrina echajirirucava; <sup>30</sup> tiápajucavainapa camuripanayare ena naparapenaveanayare ajairana, esenana, énapa ena náenanaveanayare, énapa ena nachichanaveanayare. Camuripanayareva eta náitsirijisiravayare. Ticaticacareanayaresera nayehe ena apamuriana achaneana. Énerichuvare níjaracavacaya eta nápechiravayare títarecana. Máichecuaraquirenapa eta náuricacarevanayare. <sup>31</sup> Maverahesera eti etiarihiqueneanahi puiti, váhirichuhi ecapicahuhini. Te jena sácheyare, ichapepainenapa eta ecapicahuiraya. Éna puiti ticapicahuanahi, te táitauchavapa te jena sácheyare, énapavainapa téquenehanayare —máichavacapa ema Jesús.

*Ema Jesús tíapechavavare máechajisiha eta máepenirayarehi (Mt 20.17-19; Lc 18.31-34)*

<sup>32</sup> Te apanavarepa sache, tiyananavarepa tipaicana. Nacaijuhepa eta te Jerusalén. Tínapucapaipa ema Jesús te namirahu ena máimitureana. Náramipaipahi éna. Natiarihivare ena tipicanapaipahi. Tacahe, ema Jesús mañajichamuripa macaetavajimurihavarepa ena dóceana apóstoleana. Mametacavacapa eta jácani máichararacavayarehi éma. <sup>33</sup> Máichapa:

—Ímaha puiti, viyanainapaipa vicaijuheyare eta Jerusalén. Ánaqui nucaijararecasiyare nuti Manerejirunuhi ema Viya. Ticaratacanuanayare ena tuparairucana. Tímicapacuanayarehi, taicha tíjararecanuanayare nayehe ena suntaruana romanoana. Éna, nájina najapanuquenéna. <sup>34</sup> Ticaecahinuanayare. Tiátutuquichanuanayareva. Téstacuanayareva. Tásiha, ticapacuanainapa. Tásihasera, te mapanaquenénapa sache néchepucainapa te nécari —máichavacapa.

\* **10:29** Te jácani apanana versiónéana, tatiarihi te juca lista eta táechajiriruva: “ena nayanana”. Tájinasera nalistanahini te libro antivupanahi. Eta tacahehi, vímatiequeneha vahi manacahini ema Marcos. Mácani apana achane mavejuchahipuca te Lucas 18.29.

*Ena Jacobo émapa ema Juan nayaseacapa ema Jesús eta macájupahávacahini éna*

*(Mt 20.20-28)*

<sup>35</sup> Tacahe, te apanapa sache, témeñahavanapa ema Jesús ena apinana ticaparapacacana ema Jacobo émapa ema Juan. Náichapa:

—Tata maestro, vivaraha picatajicahavihini eta viyasearuviyare —nacahepa.

<sup>36</sup> —¿Tájaha ecamunu? —máichapa ema Jesús.

<sup>37</sup> Najicapapa éna:

—Te jena sáchezare te péjacapa te piávacurezare aquenucavirayare, vivaraha picajicahavivareni te pichacaya, pijupahahavinahini, véjacaini te pivare, ema émana te sapa —náichapa.

<sup>38</sup> Tacahe, majicapapa ema Jesús:

—Éti, vahi ímati tájahapuca eta nátajivayare nácani nujupahanayare. ¿Eratahayarepuca ecamicha eta íchavaquenevayare ecatajivairayare, te ecutinuyarepuca eta nucamichirayare nútí? ¿Váhivarepuca epicayare ticapacaheana tacuti eta nacapasiránuyare nútí? —máichapa.

<sup>39</sup> Ena najicapapa:

—Viratahayare vicamicha. Váhivare vipicaimahi.

Tásiha, máichavacapa:

—Yátupi ichape eta ecatajivairaya, vicuticacaya eta nacapasirahaviyare.

<sup>40</sup> Étapasera eta nucajasiraya ena nujupahanayare, vaipa nútímahí necha. Ena Tata Nucaiyaquene, émahí tinerejicayarehi éna nujupahanayare —máichapa.

<sup>41</sup> Tacahe, te náechapa ena apamuriana apóstoleana, tsemamajuheanapa nayehe ena apinana. <sup>42</sup> Tásiha, máichuhamuripa namutu. Máichavacapa:

—Écharichuhi éti ena aquenucana tayehe eta avasare, muraca eta nacavnairipira. Énaripa ena tuparairucana, tétavacavahi tisuapacareanahi eta nacavacurerahi. <sup>43</sup> Váhiserá ecucahe éti nayehe ena echamuriana. Mácani tímerecavahi ticapicahupana, tacamunuhi máitativacayare ena apamuriana. <sup>44</sup> Te etiarihivarepuca éti evarahahi ínapuca, tacamunuhi ímerecavayare navanarahayare ena echamuriana. <sup>45</sup> Ecutinuyare nuti Manerejirunuhi ema Viya. Vahi étaina tímitecanu nucaitaticasihini. Nútíyarehi nútítíhe éti. Énerichuvare níjaracavayarehi nímicapacava íchaveneyarehi éti camuriqueneanaya nucuchucureanayare —máichavacapa.

*Ena Jesús macaimairirica ema púchuqui ticajare Bartimeo*

*(Mt 20.29-34; Lc 18.35-43)*

<sup>46</sup> Tiuri, títecanapa eta te avasare Jericó. Te apanapa sache tiyananayarepa. Náehicapaipa ena camuriqueneana achaneana. Te achenechacaya, matiaríhihi ema achane púchuqui. Ticajare Bartimeo, machicha ema Timoteo. Téjacahi tiyaseserecahi limosna. <sup>47</sup> Te masamapa eta mánuoirapahi ema Jesús Nazareno, tipiaracapa. Ánipa macahe:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuíni!

<sup>48</sup> Tacahe, nacavacapa camuriana ena natiaríhiqueneanahi. Náichapa:

—Pámatina. Vaipa picupiaraca —náichapa.

Émasera tipiaracaichucha:

—¡Tátachicha Jesús! ¡Pítiqueneripa yátupiquenévi Cristo! ¡Picatajicanupaini pájapanunuini! —macahepa.

<sup>49</sup> Tacahe, tícheapaica titupihapa ema Jesús. Máichapa:

—Íchuha ema mara.

Tacahe, náichuhapa ema púchuqui. Náichapa:

—¡Pétumechava! Péchepuca, taicha tíchuhavipa ema Jesús —náichapa.

<sup>50</sup> Eta mananesirahi ema púchuqui, macamiricapa eta máepacuha. Téchepucapa, tiyanapa mapauchahi ema Jesús. <sup>51</sup> Tacahe, mayaserecapa ema Jesús ema púchuqui. Ánipa máicha:

—¿Tájaha picamunu nuyehe?

Majicapapa éma:

—Tátachicha, nuvaraha picaimairiricanupaini —macahepa ema púchuqui.

<sup>52</sup> Tacahe, máichapa ema Jesús:

—Tiuri, nuchicha. Táichavenehi eta picasiñairanuhi, pinaracapa puiti. Tiúrinapa eta piyaniraya pipaisiraya —máichapa.

Enurujirinehi tímairirica. Tacahe, máehicapa macachanepaipa ema Jesús eta mapaisirapahi te achene.

## 11

*Títecapapa ema Jesús eta te Jerusalén*  
(Mt 21.1-11; Lc 19.28-40; Jn 12.12-19)

<sup>1</sup> Tacahe, te apanapa semana tiyananavarepa. Tétavajicanaya tayehe eta avasarechichana ticaijare Betfagé étapa eta Betania, te tachacaya eta cerro ticaijarehi Olivoquiji. Tiánehanapa eta te Jerusalén. Ánaqui, ema Jesús mavanecapa ena apinana máimitureana. <sup>2</sup> Ánipa máicha:

—Eyanayare eta te jena avasarechicha Betfagé. Te ítecapapa ánaqui, ímahayare ticaitihahi eta burrico. Eta jena sárare mávaequehéchaha. Nájinaichaha ticaperainahi. Evejapuacayare, iáminanuyare eta ani. <sup>3</sup> Te natiarihinapuca náeñama, emetacayare eta nucamunuirahi núti. Vahi táyeréimahi vímichavavaneyare —máichavacapa.

<sup>4</sup> Tacahe, tiyananapa ena vanairucanahi. Jéhesare, nachimapapa eta burrico. Ticaitihahi eta te calle te tapajachacaya eta peti. Tacahe, navejapuacapa. <sup>5</sup> Náichapasera ena ticayeheana:

—¿Tájaha tacayema iámayare eta viyehe burrico?

<sup>6</sup> Tacahe, najicapapa éna, nametacapa eta máimiturapihi ema Jesús. Tásiha, náisapapa eta námirahi eta burrico. <sup>7</sup> Tacahe, te títecapanapa te mávihahi ema Jesús, náepacamaequechapa eta náepacuhana. Tásiha, ticaperapa ema Jesús.

<sup>8</sup> Tacahe, tiúrujicavanapaipa ena achaneana. Camuriana éna tiácapanahi, náepacapaicapaipa eta namuirihana eta te mayanihayarepahi éma. Ena apamuriana navehapa eta cáchipaca. Nanacavare te achene. <sup>9</sup> Ena tínapumirauchanapaipahi énapa ena téquenehanapahi, namutu tipiaracanapaipa. Ánipa nacahe:

<sup>10</sup> —¡Yare, Tata! ¡Píti yátupiquenévihi Cristo, réyvihi viyehe! ¡Asulupaya! ¡Vanairucaquenévihi píti me Viya! ¡Ichape eta vicunachiravi píti! ¡Asulupaya me Viya te anuma! ¡Viva ema Viáquenu! ¡Viva! —nacahepa.

<sup>11</sup> Tacahehi eta máitecapirahi ema Jesús eta te Jerusalén. Matupirupa tiyanahi te Templo. Te tamutupa máimahahi, tiyanapa tichava te Betania, namutupaichu ena dóceana apóstoleana, taicha cáperehichicharipa.

*Ema Jesús májiquiha eta yucuqui ticaijare higo taicha máhiriquirehi*  
(Mt 21.18-19)

<sup>12</sup> Te apanavarepa sache, te yáticarahi, tichavanavare te Jerusalén. Eta najunijisirahi eta Betania, técuhaipahi ema Jesús. <sup>13</sup> Eta máimairahi tiyerehi eta étana yucuqui ticaijare higo. Ticainapucavahi ticápácaji. Tacahe, ema

Jesús tiyanapa máimahapana te ticahhipuca. Téhesera te máitecapauchapa, máimahainehi tájina táhinahini. Tacarichuhi eta tapacajiana, taicha vúichaha tacahirainahini. <sup>14</sup> Tacahe, máichapa ema Jesús eta higo:

—¡Piti pépiyainapa eta máhiriquireviyare! —macahepa.  
Nasamararacahi ena máimitureana.

*Ena Jesús macuchuchujicavaca ena títjararecanahi eta sárareana, cáyureana te tajuhe eta Templo*

*(Mt 21.12-17; Lc 19.45-48; Jn 2.13-22)*

<sup>15</sup> Tacahe, te títecapanapa te Jerusalén, tiyananavarepa eta te Templo. Máimaharinehi ema Jesús ena achaneana títjararecanahi eta sárareana, cáyureana. Ena apamuriana tivacharecanahi. Natiarihivare ena títsiriperecarahiana eta taplataneana eta apanapane avasareana. Tásiha, macuchuchujicapa namutu. Máequehepuichinavacapaipa eta namesarana étapa eta nasiyana. <sup>16</sup> Nájinavare máisapaquenénahini eta nánucuhahini eta canchón tayehe eta Templo, námaphini jácani eta nájarareruanahi. <sup>17</sup> Tásiha, máimitucavacapa ena natiarhiqueneanahi. Ánipa máicha:

—Ena Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana tiásihana te tamutu avasareana” macahepa. Étisera eti tíamerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichapa.

<sup>18</sup> Ena ticatianacanahi ema Jesús, te nasamairicapa eta juca máechajiriruvanahi, tiseanapa. Tásiha, natanucapa eta jácani náicharasirayare eta náimicapasirayarehi éma. Taicha napicarinehi éma, taicha náimahahi tétavicavahi eta masuapacarevahi eta nayehe ena achaneana.

<sup>19</sup> Tacahe, te cáperehichicharinehi, tiyanavarepa ema Jesús, tiúchuca eta te Jerusalén.

*Tiájiriquipa eta yucuqui higo*

*(Mt 21.20-22)*

<sup>20</sup> Tacahe, te yáticarhipa, eta nachaviravarepa eta te Jerusalén, náetavicapapahivare eta yucuqui higo. Náimahainehi tiájiriquipahi éta. <sup>21</sup> Tacahe, téchavapa ema Pedro eta máechajiriruvanahi ema Jesús cape sache. Tásiha, máichapa:

—¡Pímaha, tata! ¡Tiájiriquipa eta higo eta pévajiriaruhi!

<sup>22</sup> Majicapapa ema Jesús:

—Ácasiñava yátupina eta me Viya. <sup>23</sup> Jéhesare, éti apana esamacareyareva, te yátupina eta écasiñavairaina eta me Viya. Tájina émitucaimahi. Eratahayareva ecayejecca eta cerro te apachacaya, tájina iávamirahuimahi te esamureana.

<sup>24</sup> Tacahe, numetacahe eta juca: Te eyaseacapuca ema Viya eta jácani, ecasiñava mayehe. Vahi ecueñamava eta ejacapirayare. Tásiha, títjaracahéna éma tamutu eta eyasearuanaya. <sup>25</sup> Énerichuvare, eta eyujarasiraina, eperdonacha éti nácani nájecapavaquenehi eta eyehe. Eperdonachavaca apaesa maperdonachahevare eta éjecapiravana ema Tata Ecaiyaquene te anuma. <sup>26</sup> Téhesera vahi eperdonachahi, váhivare tiperdonachahemahi eta éjecapiravana ema Tata Ecaiyaquene te anuma —macahepa ema Jesús.

*Nayasereca ema Jesús nájahhipuca tituparacahi éma*

*(Mt 21.23-27; Lc 20.1-8)*

<sup>27</sup> Tiuri, títecapanavarepa eta te Jerusalén. Natupiruvarepa tiyanana te Templo. Te mapairirijuecharipa ema Jesús eta Templo, napauchapa ena ticatianacanahi éma. <sup>28</sup> Nayaserecapa éma, ánipa naicha:

—Píti, vahi vitupararuvinahini víti eta píchirahi eta júcana. ¿Nájahasica tímitucavihi? ¿Nájaha tituparacavianahi eta juca píchaqueneanahi? — náichapa.

<sup>29</sup> Tacahe, majicapapa éma:

—Núti apanava nuvaraha nuyaserecahe. Ejicapanuyaresera apaesa numetacahe eta nucatuparahairahi eta níchirahi eta júcana. <sup>30</sup> ¿Nájahapuca tivanecahi ema Juan eta máitesirahi máicachasirisirayare? ¿Émapuca ema Viya tivanecahi, émajivahipuca eta máitesirahi? Ejicapanu —máichavacapa.

<sup>31</sup> Váhisera náituruequenehahini eta najicapirayarehi. Tiácapaemajiricanapa, ánipa nacahe:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, ema macahénapapuca: “Tásiha, ¿váhiyapa esuapahini éma?” <sup>32</sup> Váhivare táurica víchahini: “Émajivaichucha eta máitesirahi”. ¿Tájahapuca vicayemayare eta vijicapirayare? —náechajiricacapa.

Nacahehi éna, taicha napicaracahi eta jácani náicharasirahipuca ena apamuriana achaneana, taicha namutuhi náimijachahi ema Juan profetaquenehi yátupiquene mavaneruhi ema Viya. <sup>33</sup> Tacahe, najicapapa ema Jesús:

—Vahi vecha víti —nacahepa.

Ema Jesús máichavarepa:

—Énerichuvare núti, vahi numetacahemahi nájahapuca ema tituparacanuhi —máichavacapa.

## 12

*Ema Jesús máimicutichina ena pártirárioana máurirahana  
(Mt 21.33-46; Lc 20.9-19)*

<sup>1</sup> Tacahe, tépanavavarepa tímitureca eta juca máimicutichaquenehi. Ánipa macahe:

—Matiarihi ema achane. Camuri eta máevaru uva te máesane, manaruacahivare eta masucure. Máepiyacavarepa eta nacaticaresihayare eta tachi eta uva. Máepiyacavare eta torre, nápanihayare eta najaneasirayare eta máevaru.

Tásiha, máijaracapa ena achaneana, pártirárioanayarehi. Taicha tiyanayarehi ema achane te apana avasare. <sup>2</sup> Tacahe, te tiyahapa eta uva, máimivanerecapa ema mamusura mayaseapanavacayarehi ena pártirárioanahi eta tatucachaqueneharehi éma. <sup>3</sup> Énaserá ena pártirárioana tisemauchavannahichucha. Nacaratacapa náehapa ema vanairucahi. Tichavapa éma, tájina náijaracahini. <sup>4</sup> Tacahe, tiápechavavare mavaneca ema apana mamusura. Váhivare nasuapahini éma. Natupisicapa eta te márijahiana, najarasicapa. Náumehavarepa éma vanairucahi. <sup>5</sup> Tacahe, ema achane mavanecavarepa ema apana mamusura. Tásiha, ena pártirárioana nacapacapa éma. Vuíchaserá masemahini ema achane. Ticayehehi paciencia. Máimivanerecapa ena apamuriana, camurianapa. Énerichuvare, tiápechavanapa náehavacavarepa. Nacapacavacapa ena apamuriana.

<sup>6</sup> Tacahe, matiarichahasera ema apana mavaneruyare. Émajacaruvapa máevataca ema machicha máemunaruquenehi. Máimijachaipahi émainhipucaini napicauchahini. <sup>7</sup> Énaserá ena pártirárioana, te náimahapa ema machicha ema achane, ánipa nacahe: “Émainapapuca ticayeheyare ema



maca. Yare, vicapaca éma apanavare, apaesa tánasipa viyehe tamutu. Tájina máicharachavimahi ema achanenavaji” nacahepa. <sup>8</sup> Tacahe, nacaratacapa ema machicha. Nacapacapa éma, náquijicapavarepa eta máquehe te aneca tayehe eta úvaquiji.

<sup>9</sup> Puiti, nuyaserecaheyare: ¿Tájahapuca máicharacavacayare ema achane ticayehe eta úvaquiji? Jéhesare, vaipa macayehehine paciencia. Títecavanénapa macapapanavacayarepa ena pártirárioanahi máurirahanahi. Tásiha, máijara-cainavarepa eta úvaquiji ena apamuriana pártirárioanayareva.

<sup>10-11</sup> Nuvaraha epanerechapaini eta tacayemahi eta Sagrada Escritura, apaesa ácaicutiara éti. Ani tacahehi: “Ena tépiyarecarahiana eta Templo, tasapiha náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapa eta te táicuchihi eta tatuparahahi. Tacapicahuquenehi puiti. Táitusiava tétavicavahi eta vicunachirahi víti ema Viya” tacahehi eta Sagrada Escritura. Nuvaraha ecaicutiaraya — máichavacapa ema Jesús.

<sup>12</sup> Tacahe, ena ticatianacanahi ema Jesús, eta nasamirahi, tisemanarinehi taicha tímatiacavanapa eta énairahi tayunacavaca eta máimicutichiravacahi. Eta nasamirahi, tisemanarinehi. Navarahapa nacaratacayarehíni. Tipicacavanachuchasera nayehe ena achaneana, nacatiuchahini ema Jesús. Tacahe, najunijiacapa éma, tiyananapa natanuca eta táicharacavaya eta nacaratasi-rayare éma.

*Navaraha náemejecapavacha ema Jesús tayehe eta impuesto  
(Mt 22.15-22; Lc 20.20-26)*

<sup>13</sup> Tacahe, ena ticatianacanahi ema Jesús navanecapa ena témejecapacachanayare apaesa étainahipucaini taviuchahini ema Jesús. Natiarihi ena tinerejicavanahi ena fariséoana. Natiarihivare ena políticoana. <sup>14</sup> Te náitecapauchapa, ánipa nacahe:

—Tata maestro, vímatihi eta tatupiruvairahi tiuri eta juca pímiturapianahi. Vahi pipicacaracavahini eta péchajisihairahi eta náichavaquenevahi nácani achaneana, tayanapanepuca aquenucahi. Taicha pivaraha náehicahini namutu eta táurinaquene achene ticaijuhe me Viya. Vivarahahisera viyaserecaviyare eta pipanereruhi: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machane-rahávihi ema Viya, ¿masi? —nacahepa.

<sup>15</sup> Máimativanehisera ema Jesús eta apimirairavacahi éna, navarairahi ticaviureyarehi éma. Tásiha, ema máichavacapa:

—¿Tájaha tacayema evaraha ímiaquipaicanu? Nímahaseji, iáminanu étapena eta reale —macahepa.

<sup>16</sup> Éna náijaracapa eta reale. Tásiha, máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador —nacahepa.

<sup>17</sup> Tacahe, máichavarepa:

—Tiuri. Táuricahi íjaraca ema Presidente Emperador eta juca mayeherichuhi éma. Tásiha, íjaracavare ema Viya eta mayeherichuhivare éma — máichavacapa.

Te nasamapa ema Jesús eta majicapiravacahi, náramipa eta máitupajijiasiravahi.

*Nayasereca ema Jesús náichararacavayarepuca ena náepenaqueneana eta náechepusirayare*

*(Mt 22.23-33; Lc 20.27-40)*

<sup>18</sup> Nacahepaipavare ena apamuriana achaneana. Saducéoanahi. Ena nani saducéoana, apanahi eta náimiturapiana. Éna, vahi nasuapa eta náechepusirayare ena náepenaqueneana. Tiyananapa náimahapanahi ema Jesús. Ánipa nacahe:

<sup>19</sup> —Tata maestro, ema víyahaini Moisés manaquicahi eta ajureca máechajiriruvahi eta viyehe: “Te máepenaquenehahipuca ema achane esu mayena, tásiha, nájinahipuca manaquiequeneruvainahini machichainahini, te matiarhihipuca mácani maparapehi, mavehayare esu machine-naequenéni, apaesa émainapuca macachicha eta suyehe, máitsivainahini ema maparapeni”. <sup>20</sup> Tacutiquene te natiarhihipuca ena siétequeneana ticaparapejiricacana, te títauchavapa ema náechavimuri. Máepenaquenehapasera esu mayena. Nájinahi machichainahini. <sup>21</sup> Tacahe, ema maparape máitauchavare esu machinena. Énerichuvarasera máepenaquenehavare, nájinavare machichainahini. Ema émana maparape máitauchavare ésu. Énerichuvarare máepenaquenehavare. <sup>22</sup> Namutu ena siétequeneana navehahi ésu, tásihasera náepenaquenehapaichucha, nájinaquene émanainahini mácachichahini eta suyehe. Te táequenepa, tépenapa esu esenaini. <sup>23</sup> Tacahe puiti, te apanapapuca eta náitaresirayare ena nani, ¿nájahapuca ena siétequeneana éma yátupiquenehi suímaquenehi esu esena, taicha ena siétequeneana namutuhi suímanarihi? —náichapa.

<sup>24</sup> Tásiha, ema Jesús majicapavacapa:

—Éjecapava éti. ¿Tájaha tacayema vahi evaraha ácaicutiarahini eta táimiturapi eta Sagrada Escritura? Váhivare evarahahini esuapahini eta tamutuirahi marataha ema Viya. <sup>25</sup> Ánaqui te apana náitaresiraya, vaipa nácamunuimahi esu esena. Énaripa ena esenana váipavare nácamunuimahi ema ajaira. Nacutinapa ena ángeleana tiávihanahi te anuma eta vahi náitauchacacahini. <sup>26</sup> Éti, váhivarepuca ácaicutiara eta yátupirahi eta vahi táepenahini eta náchanevana ena náepenaqueneana. Váhipuca ácaicutiara eta máechajiriruvana ema Viya májuchaqueneanahi ema víyahaini Moisés. Te juca Sagrada Escritura, eta te libro ticaijare Éxodo, téchajicapa ema Viya. Ánipa macahe: “Nútira yátupiquenenuhi Viya, macasiñaquenehi ema Abraham, ema Isaác émapa ema Jacobo” macahepa ema Viya. <sup>27</sup> Nutupiruvahi numetacahe: Ema Viya, éma téchahi eta náitaresirana ena téhicanahi, tayanapane tépenanaripapuca. Eta náchanevana, tímiyanavanarichucha títareca te mamirahu éma. Éti, ichape eta éjecapiravahi —máichavacapa ema Jesús.

*Eta tisuapacarepanahi te mavanairipiana ema Viya*

*(Mt 22.34-40)*

<sup>28</sup> Tacahe, matiarhihivare ema émana escribáno. Masamararacahi eta nacanarajirisiracacahi. Máimativanepa eta táurivahi eta majicapirahi ema Jesús. Tásihasera, tíjaracavahi mayasereca ema Jesús, ánipa maicha:

—Tata, nuvaraha pimetacanuini ¿tájahapuca eta vanairipi tisuapacarepanahi tayehe eta mavanairipiana ema Viya? —macahepa.

<sup>29</sup> Majicapapa ema Jesús:

—Eta máechajiriruva ema Viya te Sagrada Escritura, ani macahehi: “Esama, emutu eti achaneana israelítana. Nuti Viya, nucarichuhi nuti Iáquenu. Nacuija apanaina iáquenuina esiñarajina. <sup>30</sup> Tásiha, yátupina eta émunasiranuina nuti Iáquenu, táunasiraina te esamureana. Yátupina eta

ecachanevairanuina núti. Epanerecha eta nímiturapiana tamutu sácheana, yátiana. Yátupina eta ecaemataneasiranu te tamutu eta ítupajijiasiravana”.

<sup>31</sup> Jararihivare eta apana táehiruhi eta juca, ánivare tacahe: “Pémunacayare ema piparaepiyahi, tacuti eta pémunasiravahi píti”. Eta juca apinaquene vanairipi, tacachurica eta tasuapacareva tamutu eta apamuriana vanairipiana —macahepa ema Jesús.

<sup>32</sup> Tacahe, máichapa ema escribáno:

—Yátupiquene, tata maestro, tétupicavahi eta péchajiriruva. Yátupihi eta macarichuirahi ema Viáquenu, eta nájinairahi apanainahini Viáquenuinahini.

<sup>33</sup> Yátupihivare tavaraha eta vémunasiraina ema Viáquenu, etapa eta viúnasirayare te visamure, etapa eta vipanerechiraina eta máimiturapiana tamutu sácheana, etapa eta vicaemataneasiraina éma te tamutu eta vítupajijiasiravana, etapa eta vémunasiraina ema viparaepiyahi. Jéhesare, eta táuriva eta vémunasirahi táetavicahi eta táuriva eta víjaracasichira eta sárareana eta víjuchaqueneana eta me Viya. Táetavichivare tayehe eta táuriva tamutu eta apamuriana viámavahuana eta me Viya —máichapa ema escribáno.

<sup>34</sup> Ema Jesús máimatiequenehapa eta táuriva eta majicapira ema achane. Tásiha, máichapa:

—Píti piánehi eta píjarasiravaina eta péhisirayare ema Viya —máichapa.

Tacahe, nájinapa nájaracavahini nayaserecahini ema Jesús eta náemejcapavachirayarehi éma.

*Ema Cristo, yátupihi mámariequenénihí ema rey David, Víyahivare éma (Mt 22.41-46; Lc 20.41-44)*

<sup>35</sup> Tacahe, ema Jesús tímiyanava tímiturecahi, eta máejasirahi eta te Templo. Ánipa macahe:

—Ena escribánoana, ani tacahehi eta náimiturapiana: “Tiúchucayare ema Cristo, mámariequeneyare ema víyarahaini rey David” nacahehi. <sup>36</sup> Yátupihi ema Cristo achanequenehi eta máimahi taicha mámariequenénihí ema víyarahaini David. Nuvarahasera epanerechaya eta juca máechajiriruvahi ema David te májurehi Salmo, ani macahehi: “Ema Viya máichapa ema Tata Náquenu Cristo: Yare péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. <sup>37</sup> Ema David, eta máimijarechirahi ema Cristo, “Tata Náquenu”, ¿tájahapuca eta macayemaquenehi? Núti németeaca Víyahivare ema Cristo. ¿Tájaha íchahi éti? —máichavacapa.

Ena camuriqueneana achaneana náuricahi eta nasamararaca eta máimiturapiana ema Jesús.

*Ema Jesús máimereuchavaca eta náejecapiravana ena escribánoana (Mt 23.1-36; Lc 11.37-54; 20.45-47)*

<sup>38</sup> Tímiyanavahi eta máimituresirahi ema Jesús, ánipa macahe:

—Échapavayare éti, machu éhica eta nayeherépiana ena escribánoana taicha tétavicavahi eta apimiranairahi éna. Tétavicavahi eta náurisirahi éna tiúmajihána, navarairahi ticunachacareanayarehi nayehe ena achaneana eta nareligiósovanahi. Navarahavare ticapicahuanayarehi eta náechajisiraya ena achaneana te jácani nácapajisihapahi éna. <sup>39</sup> Tacutiquene tinerejiurucavana eta táurinaqueneana téjasihacareana, te tiyanana te viúrujisirarevana. Étaripa te nanisirana, ticaejacavanavare te jácani tiávihanahi eta tiúrinisipana tinicacare. <sup>40</sup> Tacutiquene naverejicavare eta nacayehequeneana ena tépenaimana, nájina najapanuquenéna. Tásiha, tépiyacavanapa religiósanahi, tiúpiemána eta nayujarasira, namavarairahi tácaecherahini

eta náichiraqueneanahi eta tauriqueneana. Énaserá tiápajucavanahi eta náicuñayayare muraca —macahepa ema Jesús.

*Eta sunaquiruva esu máimaru tacachuricahi eta nanaquiruvana ena apamuriana achaneana*

*(Lc 21.1-4)*

<sup>41</sup> Eta máejasihahi ema Jesús, mávihahi te tamirahu eta chapamana eta nanacacuirarehi eta plata námavahuana ena achaneana. Máimararaca ena camuriqueneana eta nanacacuirá eta námavahuana. Natiaríhihi ena rícoana, tinaquicavanapahi eta ichapemuripanavaca. <sup>42</sup> Tacahe, títecapapa esu esena suépenaimaquene, páurehi ésu. Sunaquicahi eta apipechichahi eta suplata, váhirichu tasivachahini. <sup>43</sup> Tásiha, ema Jesús, eta máimairahi eta juca, máichuhamuripa ena máimitureana. Ánipa maicha:

—Ímaha esu suca esena páurechicha. Ácuneucha eta suémunasirahi ema Viya. Jéhesare ésu, tímepañavahi eta sunaquiruva, sucachuricavacahi namutu ena apamuriana achaneana. Ichaperinehi eta sucunachacarevahi me Viya. <sup>44</sup> Taicha namutu éna, tacarichu nanaquicahi eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunícavachayahíni —máichapa.

## 13

*Ema Jesús máimereucharipa eta táquipaisiravaya eta Templo*

*(Mt 24.1-2; Lc 21.5-6)*

<sup>1</sup> Tacahe, tiyanayarehini ema Jesús, énapa ena máimitureana. Eta náuchusiraya tayehe eta Templo, máichapa ema émana máimiture:

—¡Tata maestro! ¡Ímaha eta juca máriana! ¡Tétavicava eta táichapeva! ¡Tétavicava táurinava eta juca peti! —macahepa.

<sup>2</sup> Ema Jesús majicapapa:

—Tamapurujiyare eta juca táurinava eta pétisami ímahaquenehi puiti. Nutupiruva numetacahe: Járájapayare eta sáchezare ticaquipacasiyare tamutu eta juca Témplosami. Téjanerepaicainapa tamutu eta juca táurinaqueneanahi ímahaqueneanahi puiti —máichapa.

*Tatiarihiyare eta ecutiarareanaya te tánehipaicha eta táichecuiraya*

*(Mt 24.3-28; Lc 21.7-24; 17.22-24)*

<sup>3</sup> Tacahe, tiyananapa eta te cerro ticaijare Olivoquiji, távihahi te apacharahi eta te tatavarapihi te tamirahuhi eta Templo. Te téjacanapa nacarichuhi eta te jena quinta, nayaserecapa eta macayemaquenehi. Matiaríhi ema Pedro, émapa ema Jacobo, émapa ema Juan, émapa ema Andrés. Ánipa náicha:

<sup>4</sup> —Vivaraha pimetacahavi. ¿Tájamuhupuca eta náimiaquipaisirayare eta Témplosami? ¿Jararihiyarepuca eta ecutiarareyare te tánehipaicha eta táitauchiravayare eta apana péchajisihaqueneana? —náichapa.

<sup>5</sup> Tacahe, majicapapa ema Jesús:

—Ecuneuchavaicha yátupina, machu navayuacahe, taicha nárájapayare ena tépiyacavanayarepahi tímivasichavanayare nuyehe. <sup>6</sup> Nacaheyarepahi éna: “Nútiripa Cristo”. Nasapiha, navayuacayare ena camuriana achaneana.

<sup>7-8</sup> Énerichuvare esamairiricayare eta táehacacairayare eta ichapequeneana avasareana. Ticanarajiricacanainapa eta te avasareana tayerehiqueneana, énerichuvare ticauyayacarenapa guerraina eyehe éti. Váhisera ecuarameca eta esamairirisiraya, taicha ene tacaheyare eta táepaniravayare eta ecutiarareanayare. Vuíchahasera étaimahi eta táichecuirayare. Énerichuvare tatiarihiyareva eta ichape tayamurisiranaya

eta apaquehe te jácani távihanaya táitupiaruanayare. Tatiarihiyareva eta ichape ecumahuyareva te jácani avasareana. Ichape eta nacatajivairayare ena achaneana. Tamutu eta juca ecutiarareanayare eta táepaniravayare eta nátajivanayare ena achaneana.

<sup>9</sup> Tásihasea eti nuchaneranahi, ecuneuchavayare, étumechavayare. Taicha natiarihiyare ena ticatianacaheanayare táichavenehi eta éhisiranuhi. Ticaratacaheanainapa, ecayaseserehinapa nayehe ena juéseana. Téstaheanainapava eta te náurujisirarevana. Tásiha, etiarhiyare éti tiámaheanaya te namirahu ena aquenucana, téhevare te namirahu ena Presidenteana gobiernonahi, ecaviurevayare táichavenehi eta éhisiranuhi. Esapihasera éti, ecamapuravainapa échajisianuyare. <sup>10</sup> Énerichuvare, éti nuchanerana ecametarairuyareva eta tiúrina echajirirucava nayehe ena achaneana tayehe tamutu avasareana te juca apaquehe. Te ítecapapa te tamutu, tépanavayarehi eta táichecuiayare. <sup>11</sup> Tacahe, te jácani nacaratacapapuca, námahe te namirahu ena aquenucana, vahi ecueñamava tayehe eta jácani échajiuchiravayare, ecatiuchiravaya. Échajisihaya eta échajirirucavana májjararuheyare ema Espíritu Santo te jena sache. Taicha máimahaheinapa. Tíjaracaheyare eta ítusirayare échajica. Vahi étijivaimahi eta échajisiraya.

<sup>12</sup> Natiarihiyareva nácani achaneana tíjararecanaya ena naparapequeneana, navarairahi náimicapaca táichavenénahi eta náehisiranuhi núti. Natiarihiyareva ena nácani náiyana, navarahayareva nájjarareca ena nachichanaveana táichevenehi eta náehisiranuhi núti. Natiarihiyareva nácani nachichanaveana nacanarainapa ena náiyana, náimicapacainapa táichavenehi eta náehisiranuhi núti. <sup>13</sup> Namutuyaréni ena achaneana ticatianacaheanayare táichavenénahi eta éhisiranuhi. Téhesera ecamichahi tamutu, ímiyanavahi eta éhisiranuhi te táitavapa tamutu, núti nucuchucaheyare.

<sup>14</sup> Numetacahevanevare eta apana. Járjapayare eta sache táíñehiqueneyare. Tímerecavayare ema achane váinarajiquene. Mavanecayare ena machanerana náechipejisirayare eta tacapicahuquenehi Templo, nacuchucavacayare ena téhicanahi ema Viya. (Nácani navaraha nacaicutiara eta juca, tacamunuhi ticaravahuyare eta májurehi ema víyarahaini profetaini Daniel.) Tásiha te ímahapa eta juca, esamairicapuca, táuricapa etátájipa ejunavane, eti etiarhiqueneanahi te Judea. Ecaijuheyare eta te céroana, étaina eyumurusavaina. <sup>15</sup> Nácani tiávihanahi te nayehe canchón te nasamairicapuca eta juca téchacarehi, táuricapa najunavane. Vaipa táuricahini nasiapanumahi te napenana, navehahini jácani náeñamaqueneanainihi. <sup>16</sup> Nácani tachimararuanayare te vámahí eta téchacarehi, táuricapa vaipa nacuchava tayehe eta avasare, tayanapane náeñamahi eta nayereruvana. <sup>17</sup> ¡Páureanasami nácani esenana tachimararuanayare nácani ticajarianahipuca, nácani esenana ticachichanahi eta amuya tiájicachaha! <sup>18</sup> Eta tacahe, eyaseacayare ema Viya tacuija táichejicahe; váhivare tacuchimaracahe eta ichape tiquiva te achene te eyanapapuca ejuna\*. <sup>19</sup> Te jena sácheanayare, tétavicavayare eta nacatajivairayarehi ena achaneana. Tájina tácutimahi eta táíñehivayare eta nacatajivairayare, te táepaniravahi eta máepiyasirahi ema Viya eta juca apaquehe. Te táequenenapa eta tíñehiyare, tájinainapa tácutimahi. <sup>20</sup> Nájina tacaitiruimahi eta nacatajivairayarehi ichape. Macaichecavaneyare ema Viya eta masemavahi ema maca achane váinarajiquene, mavarairahi ema

\* **13:18** Ema Jesús máechajisihahi eta ticasarahimuhu, tiquivamuhivare te jena mávasa Judea taicha ticajeraequenehi eta napaisirahi.



Viya macuchucuhavaca ena machanerana manerejiruana, majapanuque-  
neanahivare. Taicha te vahi macucaicheca ema Viya, máitamurihahipucaini  
macapapajicavaca namutu ena achaneana ema maca achane.

<sup>21-22</sup> Énerichuvare te tánehipaicha eta juca, natiarihinapa ena tivayua-  
rahiana tépiyacavanayare Cristo tímivasichavanainapa núti. Natiarshivare  
ena tímicutijiricavanayare profetana mavaneruinahini ema Viya. Áninapa  
nacaheyare: “Yare, éhicayare ema Cristo. Matiarhipahi te juca vitaracu”.  
Ena apamuriana ánivare nacaheya: “Náepiyahiraivahi éna. Ema Cristo  
mávihahi te viávasa víti”. Étisera vahi ecusuapavaca. Eta navarairahi tivayua-  
caheanaya eti machanerana ema Tata, náituruequenehayare naicha eta  
ichapequeneana tiáramicareana ecutiarareanayare. Camurianasamiyare  
ena navayuaruanayare. <sup>23</sup> Tásiha, ecuneuchavaya nayehe. Numetacahe-  
vanehi puiti apaesa écharipa —máichapa.

*Eta machavirayare ema Manerejiruhi ema Viya*  
(Mt 24.29-35, 42-44; Lc 21.25-36)

<sup>24</sup> Máichavarepa ema Jesús:

—Te jena sácheanayare te táequenénapa eta jena nacatajivairayare ichape  
ena achaneana, eta sache témahainapa, étaripa eta caje váipavare tijara-  
himahi. <sup>25</sup> Témiricanainavarepa eta jarairiquiana. Étaripa eta tiávihanahi te  
anuma vimaimahaqueneanahi, énerichuvare tiyamuricanainapa, tiyejeje-  
cavanainapa. <sup>26</sup> Nupaenumavainapa níteca nuchava núti Manerejirunuhi  
ema Viya. Namutu tímahanuanayare eta núcupaisirayare. Tiámanuinapaipa  
eta úcaji. Tétavicavayare eta nujaraivayarepahi, níñehinapaipa. <sup>27</sup> Tacahe,  
nuvanecainapa ena ángeleana nacurujicayare namutu ena nuchanerana  
nunerejiruanahi, tiásihanayare te tamutu eta juca apaquehe te jácani  
návihahi.

<sup>28</sup> Tiuri puiti, nuvaraha nímicutichinahe eta jácani yucuqui. Eta táitsiva-  
chiravavacapa eta tapacajiana, te ímahapa eta tajimuyairapa eta tatavaqui,  
tiúchucayarepa eta tapacajianaya arairu, tímaticarehi tiánehiripa eta únemu-  
huyarepa. <sup>29</sup> Ene tacahehi, te ímahayarepa tacaecherapa eta júcana  
ecutiarareana, ímahayarepa eta tánehirainapa eta nuchavira. <sup>30</sup> Numetaca-  
hevanecha: Vuíchaha títavanimahi ena achaneana náitarerunaichaha te  
táitecapapa eta júcana ecutiarareanayare. <sup>31</sup> Títavainapa eta anuma étapa eta  
apaquehe. Tativayaresera títauchava tamutu eta numetaruheanahi.

<sup>32</sup> Eta juca tiáramicareyarechucha. Nájina téchaimahi tájamuhuyarepuca  
eta táitauchiravayare, énaripa ena ángeleana vahi náechahini. Nútivanerécahi-  
pucaini néchahini. Macarichu ema Tata, éma téchahi.

<sup>33</sup> Eta tacahe, etsecavahi ecaunehivare éti, eyujarauchavayareva. Taicha  
vahi echa eta tájamuhuyarepuca eta nítésirayarepa. <sup>34-36</sup> Tamutu eta juca  
nímicutichinahe eta máichaquenehi ema mácani achane eta te tiyanayare  
tipairirica. Te tiyanayarépa, máijaracavaca namutu ena mamusurana eta  
náemataneana, matuparacavacapa eta najaneasirayarehi tamutu. Tacahe,  
matuparacavarepa ema tijanearecarahi eta tapaja, macuneyarehi eta jácani  
hora machavira ema máquenu, téhepuca timapicucuhupa, téhepuca enumuhu  
yati, téhepuca tijararahiyarepa, téhepuca yáticarahi. Ene ecaheyare éti.  
Ecauneya machu níjahúchava nítecapauchahe, machu nuchimaracahe ímaca-  
caruhi. Taicha vahi échaimahi tájamuhupuca nítecapayare nuti Iáquenu. <sup>37</sup> Eta  
juca numetaruheanahi puiti, nuvaraha emetacayarevare ena echamuriana,  
apaesa ecauneyare emutu —máichapa ema Jesús.

## 14

*Napanerechaipahi ena tuparairucana eta nacaratasirayare ema Jesús  
(Mt 26.1-5; Lc 22.1-2; Jn 11.45-53)*

<sup>1</sup> Tacahe, apinarinecha sache eta piesta ticajare Pascua, eta náepanavaira eta semana eta nanisirahi étachucha pan mayehere levadura. Tacahe, ena tuparairucana énapa ena escribánoana navarahaipaicha náimicapaca ema Jesús. Tásiha natanucahi eta táicharacavaya eta nacaratasirayare. Váhisera navaraha eta nanecapahini ena achaneana. <sup>2</sup> Ánipa nacahe:

—Vuíchaha vicucarataca éma achichu juca piéstairaya. Taicha camuriana-yarehi ena achaneana, machu tájahapuca náicharacahavi taicha navaraha-yarehi nacatiucha éma. Vicuchapa nayanana —nacahepa.

*Esu esena tíamasichahi ema Jesús te táijiyeamaquene perfume  
(Mt 26.6-13; Jn 12.1-8)*

<sup>3</sup> Tacahe, ema Jesús tiyanapa tichava eta te avasarechicha Betania. Máichuhaquenehi eta mananisiraya mayehe ema achane ticajare Simón ema leprosoinihi. Tacahe, eta manisirahi, sucahepaipahi esu ésuna esena. Suámapahi eta perfume te bótechicha. Ticajare nardo eta juca tíjiyema amairiama. Táetaviuchahi eta tasivachavahi. Supauchapa ema Jesús. Suvechujihapa eta bótechicha, tásiha, suépusasicapa eta táijiyeamaquene perfume. <sup>4</sup> Natiarihiserá ena váhiquene náuricahini eta suémepuresirahi eta tasivachaquene perfume, suámasichirahi ema Jesús. Ánipa nacahe:

<sup>5</sup> —¿Tájaha tacayema suémepurureca eta juca tasivachaquenehi perfume? Tiúripanahini víjararecahini eta juca táijiyeamaquenehi. Vivehahini eta camuriquene plata, tásiha, vímicatasihahini ena páureana. ¡Máechemarairahahi esu suca esena! —nacahepa.

<sup>6</sup> Émasera ema Jesús máuricapa eta suíchaquenehi. Ánipa máicha:

—Ésamirica esu suca esena. ¿Tájaha tacayema ecaecahihi éti esu suca? Tétavicava eta táuriva eta suíchiranuhi. <sup>7</sup> Ena páureanasami, támutuchucha sácheana eta ecachaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi eta eyehe. <sup>8</sup> Esu suca suíchahi eta suímirataharuvahi. Eta juca suépusahasiranuhi eta juca perfume. Sucainapucahi ésu eta suíjiyechirahi eta náquehe tayeheyarehi eta nucaecarasirayare. <sup>9</sup> Nutupiruva numetacahe: Nácani ticametarairuanayare eta tiúrina echajirirucava, náechajisihayarevare eta juca suíchaquenehi esu suca esena. Témechanayare suyehe te tamutu avasareana te juca apaquehe —macahepa.

*Eta máijararesirahi ema Júlasí ema Jesús  
(Mt 26.14-16; Lc 22.3-6)*

<sup>10</sup> Tacahe, tiyanapa ema Júlasí, émarichuhi nachamuri ena dócequeneana apóstoleana. Mapauchapa ena tuparairucana, téchajiripanava eta máijararesirayare ema Jesús eta nayehe. <sup>11</sup> Tacahe, tiúrisamureanarine ichape eta nasimirahi eta mavarairahi máijararecayare ema Jesús. Tásiha, nametacapa eta náijarasirayarehi eta plata. Tásiha, jéhevarepa ema Júlasí matanucaipa eta máicharacayarehi eta máimicaratasirayarehi ema Jesús.

*Ema Jesús máenimurihapa ena máimitureana  
(Mt 26.17-29; Lc 22.7-13; Jn 13.21-30)*

<sup>12</sup> Tacahe, títecapapa eta piesta Pascua, te tépanavahi eta semanahi nanicahi eta pan mayehere levadura. Étarichuhi eta sáche nacapasihahi eta

uvesachicha naniruyarehi te yátipa. Ena máimitureana nayaserecapa ema Jesús:

—¿Táviha pivarahahi vácaijuhe eta vétupirisiava eta vinisirayare eta uvesachicha eta viyeherepi? —macahepa.

<sup>13</sup> Tacahe, mavanecapa ena apinana máimitureana. Máichavacapa:

—Eyana tayehe eta Jerusalén. Te ítecapayarepa tayehe, iácapajicayare ema émana achane tiámapahi eta une te yupi. Éhicayare éma. <sup>14</sup> Eta te peti masiapihayare, éti apana esiapayareva. Tásiha, emetacayare ema ticayehe eta peti, ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. <sup>15</sup> Tásiha, éma tímechahénapa eta ichape cuarto te anuquehe piso. Táuriquenéipahi eta jácara téjasihacareana, tacaetupirihiqueripa. Tásiha, étupiricapa eta viniruyare eta ánaqui —máichapa ema Jesús.

<sup>16</sup> Tacahe, tiyananapa nacaijuhe te Jerusalén ena apinana vanairucana. Jéhesareinehi náimahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayehe eta Pascua.

<sup>17</sup> Tacahe, te yátipa títecapapa ema Jesús macachanepaipa ena apamuriana apóstoleana. <sup>18</sup> Eta náejasiraripahi tinicanaripa, máichamuripa éna ema Jesús:

—Jéhesareinehi, te etaracu éti, mararihi ema émana tíjararecanuyare, émarichu tinicahi nucachanehi —máichapa.

<sup>19</sup> Tacahe, ichaperinehi eta máimipaneresiravacahi éna eta juca máichiravacahi. Nayaserecapa ena émanapachu, ánipa náicha:

—¿Nútichupuca jácani? —macahepa ema émana.

—¿Nútichupuca? —macahevarepa ema apana.

<sup>20</sup> Tacahe, majicapapa ema Jesús:

—Ema émana te etaracu eti dócequeneana. Mácani néniruyare eta pan néchipaejiruhi te juca nucuruja, émara ema tíjararecanuyare. <sup>21</sup> Nuti Manerejirunuhi ema Viya, étapaichuhi eta nacapasiranuyarehi, títauchavayarehi eta nuyehe eta táechajiriruvahi eta Sagrada Escritura. ¡Páuresamisera ema tíjararecanuyare! ¡Muracayare eta máicuñayare! ¡Tiúripanaichuhini te vahi macuchucahini te sujuhe esu máena! —macahepa.

*Ema Jesús máimereuchahi eta macaejasiraya eta arairu matrature ema Maiya*

*(Mt 26.26-29; Lc 22.14-20; 1 Co 11.23-26)*

<sup>22</sup> Tacahe, eta nanisirahi, mavehapa eta pan ema Jesús. Mahasulupayachapa ema Viya. Mayuvetucapa máijaracavacapa ena máimitureana. Tacahe, máichavacapa:

—Eta juca néche. Enica —macahepa.

<sup>23</sup> Tacahe, mavehavarepa eta vasu náerirare, mahasulupayachavarepa ema Viya. Tásiha, máijaracavarepa ena máimitureana. <sup>24</sup> Te náerapaipahi, máichavacapa:

—Eta juca eta nítine. Éta táepusairuvayare étarichuvare táicutiarayare eta nufirmachiraheyare eta arairu matrature ema Vicaiyaquene, nucaejasirayareva eta matrature apaesa ejacapacare mayehe, ichapemurivayarepahi éti. <sup>25</sup> Jéhesaréinehisera, numetacahe: Vaipa nápechaváimahi nérahivaréni eta juca tachi eta uva, tiámainucava te táitauchavapa eta nusiapiraya eta nucavacureiraya, nucajupahairaya ema Tata Nucaíyaquene. Te jena sache, níjaracaheya vérainapa eta aramaruama —máichapa.

*Ema Jesús máimereucha ema Pedro tépiyacavayare vahi máimati ema Jesús*  
*(Mt 26.30-35; Lc 22.31-34; Jn 13.36-38)*

<sup>26</sup> Eta náitanesirapa, tijiranapa eta jirasare eta nahasulupayachirahi ema Viya. Te títapiricanapa, tiúchucanapa, nacaijuhepa eta te huerta Getsemaní tiávihihi eta táemiripaisinehi eta cerro ticaijare Olivoquiji. <sup>27</sup> Eta napaisirapahi, máichavacapa ema Jesús:

—Puiti juca yati ejunijicanuyare emutu éti, taicha epicayare eta náicharasiranuyarehi. Tásiha, títauchavayarehi eta máechajiriruvahi ema Tata eta te Sagrada Escritura: “Nísapayare nacarataca ema Pastor, nacapasirayaresami. Tásiha, tijunaracanainapa eta uvesana macurujiruanainihi” macahepa. <sup>28</sup> Téhesera te néchepucapa te nécarí, nínapucainapa nuyanainapa te Galilea. Ánaqui nucuchapiaheyare éti —máichapa ema Jesús.

<sup>29</sup> Émasera ema Pedro máichapa:

—Tayanapane, Tata, najunijicavipuca ena apamuriana, nútisera vahi nujunijicavimahi —máichapa.

<sup>30</sup> Ema Jesús máichavarepa:

—Nutupiruva numetacavi pítisami Pedro: Puiti juca yati, te apíhénapa eta táechajisirayare eta varayu, mapahe eta pépiyasiravayare vahi pímatinu —máichapa.

<sup>31</sup> Ema Pedro tijaranurusi eta majicapirahi. Ánipa macahe:

—Tayanapanepuca pímicapacanu, váhiquesera népiyacavaimahi vahi nímativi, váhivare nínejacavimahi —máichapa.

Étarichuivare tacahehi eta náechajiriruvahi ena apamuriana máimitureana.

### *Ema Jesús tiyujaraca te Getsemaní*

*(Mt 26.36-46; Lc 22.39-46)*

<sup>32</sup> Tacahe, titecapanapa eta te quinta Getsemaní. Tacahe, máichamuripa ena máimitureana:

—Éjacaichaha eta ani te juca. Ecuchapanuchaha. Núti nuyujarapanayare —máichapa.

<sup>33</sup> Tacahe, mámapa ánaquipana ema Pedro, émapa ema Jacobo, émapa ema Juan. Tépanavapa téñamava eta masamure, taicha muraca eta máichavaquenévayarehi. <sup>34</sup> Tacahe, máichavacapa éna:

—Tétavicava eta táeñamirava muraca eta nusamure. Tavaraha ticapacanu. Ánasichaha ani te juca. Váhisera ecuimaca. Ecuneuchanuhi —máichavacapa.

<sup>35-36</sup> Tacahe, tipaipanapa ánaquipanachichahi éma. Tiáquipaicavapa eta te apaquehe. Eta mayujarasirahi, ánipa macahe:

—Tátachicha Nucaiyaquene, píti pirataha tamutu. Picatajicanupaini. Váhini tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera nútí eta nítauchiraya eta pivarahaquenehi píti —macahepa.

<sup>37</sup> Tásiha, téchepucapa. Tichavapa eta te návihihi ena máimitureana. Máimaharinehi éna, tímacanarichucha. Máichapa ema Pedro:

—Piti Simón, ¿pímacarichucha? ¿Tájaha tacayema pímacahi? Váiparinehi pímicatacanuhini pijaneacanhini étanainahipucaini hora pácahehinehi.

<sup>38</sup> Éjamiuchava. Eyujarauchava apaesaina. Eyaseaca ema Viya eta etumevaina apaesa vahi macuiturucahe ema Satanás. Yátupihinéni eta iáchanevana taratahahi ticaratacava. Étasera eta éche máteji, vahi taratahaimahi ticaratacava —máichapa.

<sup>39</sup> Tacahe, tiápechavavarepa tiyana tiyujaraca. Eta mayujarasirahi, étarichuva eta máechajiriruvanahi. <sup>40</sup> Tásiha, tichavavanepa eta te návihihi ena máimitureana. Máimahavarepa tímacanaripavare, taicha muracaripa

eta náechapune. Tájnavare nacayemahini táichavenehi eta natsirirahi. Tac-  
ahe, tiyanavarepa tiyujarapana. <sup>41</sup> Te mapahequenepa eta mayujarasirahi,  
tichavapa. Máichavacapa:

—¿Iápechavaipava ímaca? ¿Vuíchahapuca enarahacaquenénahini? ¡Taratapa!  
Jéhesare, puiti títecapapa eta nutuparahahi nacaratasiranuyare ena ticatiana-  
canuanahi. <sup>42</sup> Ávane ema tíjararecanuyare. Échepuca. Viyana viácapavaca —  
máichavacapa.

*Nacaratacapa ema Jesús*

(Mt 26.47-56; Lc 22.47-53; Jn 18.2-11)

<sup>43</sup> Téchajiricavaichaha ema Jesús, macahépainecha ema Júlasí. Mámamu-  
rihapaipahi ena camuriqueneana suntaruana. Ticaepuchiriquianapaipahi,  
étapa eta nayeheana espada. Éna, vanairucanahi nayehe ena ticatianacanahi  
ema Jesús. <sup>44</sup> Ema Júlasí, tatiarihihi eta máicutiarayarehi eta náimatirayarehi  
ena suntaruana ema Jesús. Ani tacahehi eta máechajiriruvahi ema Júlasí:

—Ecunenuyare. Ema nétserareruyare, éma ecaratacaya. Machu ecaítica,  
muraca eta ecaratásiraina —máichavacapa.

<sup>45</sup> Te títecapanapa, mapauchapa ema Júlasí ema Jesús. Máichapa:

—Yátiheipa, tata Maestro —máichapa.

<sup>46</sup> Tásiha, máetserarecapa. Tacahe, ena suntaruana enevanepa nacara-  
tacahi. <sup>47</sup> Tacahe, ema émana apóstole, eta máimaira nacaratasirahí ema Jesús,  
mavehapa eta mayehe espada. Máquijica eta machaca ema mamusura ema  
aquenuca Caifás. <sup>48</sup> Émasera ema Jesús máichavacapa ena suntaruana:

—¿Tájaha tacayema ecasiña eta espada, ecaepuchiriquipaipahivare eta  
ecaratasiranuyare, tímicutijiricavapa námerahihini núti? <sup>49</sup> Étayapasica cape  
juca tamutuhi sácheana nucachanehehi nímitucahehi tayehe eta Templo.  
Váhivare epatsicavahini ecaratacanuhini. Tacahehisera éta, títauchavayarehi  
tamutu eta téchajiriruvana eta Sagrada Escritura —máichavacapa.

<sup>50</sup> Tacahe, tijunaracanapa namutu ena apóstoleana nanaquicapa ema Jesús.

<sup>51</sup> Matiarhivare ema émana amaperu achane. Téhicapahi. Ticaepacuhapahi  
eta te sávana. Tacahe, nacaratacavarepa éma apana. <sup>52</sup> Tijunahisera manaqu-  
icapa eta máepacuhainihi sávana. Tiyanapa mamuriarepaipa.

*Nacatupihapa ema Jesús te namirahu ena aquenucarahana*

(Mt 26.57-68; Lc 22.54-55, 63-71; Jn 18.12-14, 19-24)

<sup>53-55</sup> Tacahe, nacaítecapapa ema Jesús te mapena ema corregidor. Ema  
Pedro, máehiequenehapahi éna, mayererehipahisera. Títujicavapa tisiapa eta  
te canchón tayehe eta mapena ema corregidor. Tásiha, téjacapa macachane-  
muripa ena suntaruana, tiásacavahi eta te yucu. Váhisera náimatihini éma. Tac-  
ahe, tíurujicavanapa namutuyaréni ena apamuriana tuparairucana énapa  
ena aquenucarahana énapa ena escribánoana. Napanerechaipa, natanu-  
nuicaripa eta ticaviureyarehi ema Jesús. Náichuhapa ena tépiyaequeneha-  
nayarehi eta matapiravayarehi náicha, navarairahi náimicapacayarehi éma.  
Váhisera náichimavahini eta maviurevainahini. <sup>56</sup> Camurianahinéni ena  
tépiyaequenehanahi éma, váhisera tácuticacahini eta nacayemaqueneanahi.  
<sup>57</sup> Titupihanavarepa ena apamuriana tépiyahirahianayarehi. Ánipa macahe  
ema émana eta máepiyahiraivahi:

<sup>58</sup> —Núti nusamahi ani macahehi ema maca: “Núti nuvetataicayare  
eta juca Templo náepiyaruhi ena achaneana. Tásiha, te mapánaquenénapa  
sache, nímiclavayare nucatupiha eta apana Templo. Váipasera tácutimahí  
eta náepiyaruhi ena achaneana”. Eta juca nusamaquenehi eta máechajiriru-  
vanahi ema Jesús —macahepa ema tépiyahirahi.



<sup>59</sup> Váhiquesera tácuticacahini eta máechajiriruvanahi nayehe ena apamuriana.

<sup>60</sup> Tacahe, ema corregidor téchepucapa eta mayaseresirayarehi ema Jesús. Ánipa maicha:

—¿Tájaha tacayema vahi pijicapavaca ena nani eta pimetauchacasivahi? ¿Yátupipuca eta nacayemaquenehi? Taicha vímahavi eta vahi picatiuchiravainahini —máichapa.

<sup>61</sup> Émasera ema Jesús vahi majicapavacahini. Timatinaichucha. Tásiha, mápechavare mayasereca ema corregidor:

—Nuvaraha pimetacanu. ¿Píti pímiachavahíjicacha pítihi Cristo ema vicuchapaquenehi, Machicha ema Viya? —máichapa.

<sup>62</sup> Tacahe, ema Jesús majicapapa:

—Yátupi nuti Cristonu. Nuti Manerejirunuhi ema Viya. Tásiha, numeta-caheyare eta apana. Járajapaya eta sácheyare ímahanuyare eta néjasirayare te mavaure ema Viya máitupajijihacuenehi. Ímahanuyareva núti eta núcupaisirayareva, násihayare te anuma, támiranuyarepahi eta úcaji —máichapa.

<sup>63-64</sup> Tacahe, ema corregidor eta masamirahi, tise-marinehi ichape. Tivetsayujicavapa eta mamuiraha eta masemanevahi. Tásiha, macahepa:

—¡Émaquenepa visama ema maca tépiyacavahi Machicha ema Viya! Tétavicaivaipa eta maviureva taicha macaecaíhi ema Viya. Vaipa tácomesa vitanucahini ena testigoanayare. Puiti esamaripa éti eta juca macayemaquenehi. ¿Tájaha vícharacayare puiti ema maca? —macahepa.

Tacahe, namutupa najicapa:

—¡Ticaviurevaipa! ¡Étaina táimicapaca! —nacahepa.

<sup>65</sup> Tacahe, nátutuáca éma. Náepacauquichavarepa, tásiha, náehamirahavarepa te mamira. Tásiha, náichapa:

—Te yátupihipuca pítihi Cristo, pímatinuyare nájahanupuca nuti néhavihi. ¡Pimetacahavi! —náichapa.

Énapa ena suntaruana, te námapaipahi, náehavarepa. Ichape eta náichirahi.

*Éma Pedro tépiyacavapa vahi máimati ema Jesús  
(Mt 26.69-75; Lc 22.56-62; Jn 18.15-18, 25-29)*

<sup>66</sup> Tiuri, ema Pedro, matiarhichahahi eta te canchón. Tacahe, sucahepaipahi esu mavanara ema corregidor. <sup>67</sup> Suímahapa ema Pedro, tiásacavahi. Suímararacapa eta mamira. Tásiha, suíchapa:

—Németeaca pítirichu ñichamuri eñi ñica Jesús, eñi nazareno —suíchapa.

<sup>68</sup> Émasera majicapapa:

—Vahi nímati ema péchajisihacuenehi. ¿Távihapuca pímatinenuhi píti? —máichapa.

Tacahe, tiyanapa éma eta te portón. Téchajicavanepa eta varayu.

<sup>69</sup> Suímahavarepa tiápechava esu esena. Sumetacavacapa ena natiarhiqueneanahi, suíchapa:

—Éñi ñica eñi nachamuri ena téhicanahi eñi Jesús —suíchapa.

<sup>70</sup> Tiápechavavarepa ema Pedro tépiyacava vahi máimatihini ema Jesús. Tacahe, te tiyererehachhavare, ena natiarhiquenehi náichapa ema Pedro:

—Yátupiquene pítirichu machamuri ema maena Jesús, taicha eta péchajisira, tímaticarehi eta piásihairahi te Galilea —náichapa.

<sup>71</sup> Tacahe, majicapapa:

—Máicuñacanuíne ema Viya, te vahi nucucahe yátupina. Váhiquesera nímati ema achane échajisihacuenehi —macahepa.

<sup>72</sup> Enurujiapa tiápechava téchajica eta varayu. Tíjahúchavapa téchava ema Pedro eta macayemaquenehi ema Jesús: “Te tamirahuinapaichaha eta apíhequenéna téchajica eta varayu, píti mapahenaripa eta pépiyacavayare vahi pímatinu”. Eta máechavairahi ema Pedro, tépanavapa tíyaha.

## 15

*Námapa ema Jesús te mamirahu ema Pilato*  
(Mt 27.1-2, 11-14; Lc 23.1-5; Jn 18.28-38)

<sup>1</sup> Te tijarahipa, tiápechavanavarepa tiúrujicavana namutuyaréni ena aquenucarahana, taicha náichuhaqueneanahi ena tuparairucana, éna escribánoana. Tiyaserejiricacanapa tájahapuca eta náichararacayarehi ema Jesús. Tacahe, nacuchucapa ticaitihapaipa eta námirapahi te mamirahu ema Prefecto Poncio Pilato. Eta máimairahi ema Pilato ema Jesús, mavarahapa máimatiyarehi éma. <sup>2</sup> Tacahe, mayaserecapa:

—¿Yátupisareji réyvihi píti nayehe ena pijaneanana israelítana? —máichapa. Ema Jesús majicapapa:

—Pétupicavahi eta juca piyaseresiranuhi. Yátupihi eta nurreyvahi —máichapa.

<sup>3</sup> Tásiha, ena tuparairucana nametauchaipa ema Jesús, camuri eta maviurevahi náicha. <sup>4</sup> Tacahe, mápechavare mayasereca ema Pilato. Máichapa:

—¿Vahi péchajiuchava eta juca nametauchiravihi? Camuri eta piviuerevahi náicha —máichapa.

<sup>5</sup> Émasera ema Jesús váhiquene majicapahini. Tásiha, máramipa ema Pilato.

*Ema Pilato macavanairipipa eta náetatasiraya ema Jesús*  
(Mt 27.15-26; Lc 23.13-25; Jn 18.38-19.16)

<sup>6</sup> Tiuri puiti, tatiarihi eta mayeherepihi ema Pilato te Páscuamuhuana. Macaiticayarehi ema émana preso mácani nayasearuyarehi ena achaneana.

<sup>7</sup> Tacahe, natiarihihi eta te cárcel ena ajairana ticaeratanahi. Ichape eta naviurevahi ena téhajiricacarahiana te revolución, nacapasirapahi ena achaneana. Te namuri, matiarihihi ema achane ticaijare Barrabás. <sup>8</sup> Tásiha, ena achaneana nayaseacapa ema Pilato máichahini eta mayeherepi. Ánipa náicha:

—Vivaraha picha eta piyeherepi te Páscuamuhuana —náichapa.

<sup>9</sup> Tacahe, mayaseremurihapa ema Pilato:

—¿Evarahapuca nucaitica ema eyehe Rey, iáquenumuri eti israelítana? —macahepa ema Pilato. <sup>10</sup> (Taicha ema Pilato máimatiacaripahi eta nametauchirahi ema Jesús ena tuparairucana taicha nacapinaruhi éma.)

<sup>11</sup> Énasera ena tuparairucana náimitumuriharipa ena achaneana, eta nayaseasirayarehi émaina máuchucuha ema Barrabás.

<sup>12</sup> Tacahe, ema Pilato mayaseremurihavare. Máichapa:

—¿Tájahasica nícharacayare ema Jesús ema íjarechaquenehi Rey iáquenumuri eti israelítana? —máichamuripa.

<sup>13</sup> Éna, tipiaracanapa eta najicapirahi:

—¡Pémetatareca te crusu! —nacahepa.

<sup>14</sup> Tásiha, mápechavarepa mayaseremuriha, ánipa máicha:

—¿Tájaha tacayemahi eyaseacahi eta németataresiraya ema maca? ¿Tájahasica eta maviurevahi? —máichapa.

Énasera tipiaracanavare muracapanapa:

—¡Pémetatareca te crusu! —nacahepa.

<sup>15</sup> Ema Pilato mavarahahi tiúriyarehi nayehe ena achaneana. Tacahe, mavanecapa ena suntaruana, ánipa maicha:

—Ecaiticaya ema Barrabás. Émasera ema maca Jesús, iámayare, éstacayare. Étatacayareva te crusu —máichavacapa.

*Nacaecahijiricava ema Jesús ena suntaruana  
(Mt 27.27-31; Jn 19.1-3)*

<sup>16</sup> Tacahe, ena suntaruana námapa ema Jesús tayehe eta náestasihayarehi te távirarehi eta guardia. Náimichuhavarepa namutu ena apamuriana suntaruana náumurivana. <sup>17</sup> Te náitauchapa eta náestahirahi éma, namuriachapa eta muíriare mularume. Náitsamemacapa eta itapepi eta majarapiyarehi. Nanacapa te machuti. <sup>18-19</sup> Nacavayuemarajipa. Náepuyumirauchavarepa, ánipa náicha:

—Tata, ¡pítitataji nayehevihíji Rey ena israelítana! —nacahepa.

Náepuchisicapa eta te machuti tayehe eta curinaqui. Nátutuácavarepa. <sup>20</sup> Tacahe, te títavanapa eta nacaetemajirisirahi, navejamuhiacapa eta mularume. Nanacavarepa eta mamuirihachu. Tásiha, námapa tayehe eta macaetataiyayarehi te crusu. Náetatacapa ema Jesús te crusu

*(Mt 27.32-44; Lc 23.26-43; Jn 19.17-27)*

<sup>21</sup> Eta napaisirapahi te calle, nácapajicapa ema achane ticaijare Simón. Éma, másihapahi te máesane. Napamicapa éma manaracuha eta macurusura ema Jesús. (Ema maca Simón, máuchusinehi te jena avasare Cirene. Éma, máiyahi ema Alejandro émapa ema Rufo.)

<sup>22</sup> Tacahe, nacaitecapapa tayehe eta masihi nacaetatairare ticaijare Gólgota. <sup>23</sup> Ánaquipa náesichinehi ema Jesús eta vino ticasiriquiama eta ipuruji tisucareama ticaijare mirra. Váhisera máerahini. <sup>24</sup> Tacahe, náetatacapa éma te crusu. Ena suntaruana, nasuertehachapa eta mamuirihaini eta náijarajirisiracacayare.

<sup>25</sup> Te náetatacapa éma, las nuéveripa eta yáticarahi. <sup>26</sup> Te tápusi eta macurusura, tatiarihivare eta ajureca táechajisihahi eta tiviuchahi eta máepeni-rayarehi. Ani tacahehi eta ajureca: “Ema Rey nayehe ena israelítana”. <sup>27</sup> Natiarihivare ena apinana tiámerahiana. Ticaetatanahivare te machacaya, ema émana te mavaure, ema apana te sapa. <sup>28</sup> Tacahe, tamutu títauchavahi eta táechajiriruvana eta Sagrada Escritura, ani tacahe: “Náimijachahi ema nachamurihi ena namauriqueneana”.

<sup>29</sup> Tacahe, ena tiánucumirauchanapahi, tépiupiusicavanapaipa eta nacaecahirapaipahi ema Jesús. Ánipa nacahe:

—¡Pítitataji! Picahechajiriruvahi eta piáquipaisirayarehíji eta Templo, piratahahivaréji pímicava picatupiha eta arairu Templo te mapanayarericuhíji sache. Puiti vivaraha vímaha eta pítupajijasiravahi. <sup>30</sup> Piúcupaica te jara crusu. ¡Picatiuchava pítijivaina! —náichapa.

<sup>31</sup> Énerichuvare ena tuparairucana nacaecahijiricavare, énapa ena escribánoana. Náichajiricácapa:

—Ema mácacacha, macahehi eta máechajiriruvahi eta maratahairahíji macatiuchavaca ena apamuriana achaneana. Tásiha, puiti váhivare máratahahini émajivainahini macatiuchavahini eta te jara mávihahi. <sup>32</sup> Te yátupinahini Cristo, Reyinahini viyehe viti israelítana, macatiuchavaipahini, ¿masi? Máucupaicaripahini te jara crusu, ¿masi? Visuapasarepaini eta vímairainahini —nacahepa.

Ena tiámerahiana ticaetatanahivare te machacaya, énerichuvare nacaecahihivare éna apanavare.

*Eta máepenirahi ema Jesús  
(Mt 27.45-56; Lc 23.44-49; Jn 19.28-30)*

<sup>33</sup> Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. <sup>34</sup> Tásiha, te las trespa sache, típiaracapa muraca ema Jesús, ánipa macahe:

—Elí, Elí, ¡lama sabactani! —te véchajiriruva, ani tacahe: “¡Tata Nucaiyaquene! ¡Tata Nucaiyaquene! ¡Vahi picujunijicanu!”

<sup>35</sup> Tacahe, ena natiarihiqueneanahi ena tisamanahi, ánivarepa nacahe:

—Esama. Ema maca achane mapiaracahi ema víyahaini profeta Elías —nacahepa.

<sup>36</sup> Ema apana tiyanapa tijunapahi máepanapa eta machuchujiruyarehi eta tisisica vino. Máitiacapa te tiúqui curinaqui. Máimicapayacapa eta majaca, machuchujicayarehi. Tacahe, máichapa:

—Ésamiricachucha. Vímahayare te títecapayarepuca macatiuchapana ema Elías —máichapa.

<sup>37</sup> Tacahe, tiápechavavarepa típiaraca muraca ema Jesús. Tépenapa. <sup>38</sup> Tásiha, tíjahúchavapa tétsayumecapa eta cortina tayehe eta Templo. Tépanava te anuquehe, tíchecuha te apaquehe. <sup>39</sup> Tásiha, ema nacapitara ena suntaruana romanoana, eta matupihairahi máimararasirahi te mamirahu ema Jesús, masamirahi eta mapiarasirahi, ánipa macahehi:

—Yátupiquenerichuyapa Machicha ema Viya ema maca —macahepa.

<sup>40</sup> Tacahe, natiarihihivare ena esenana. Náimararacahi, nayererehihisera. Te nataracu, sutiarihini esu María Magdalena, esu Salomé, ésupa esu apana María. (Esu suca María, máenahi ema Jacobochicha émapa ema José.) <sup>41</sup> Ena nani esenana ena náumurivana ena téhicarairicanapahi téchapajiricanapahi ema Jesús eta mapaisirapahi te másihapa te Galilea. Natiarihivare ena camuriana apamuriana esenana náitecapaquenehi te Jerusalén, téhicanapahi éma.

*Nacucupaicapa te crusu ema Jesús, náecarayarepa  
(Mt 27.57-61; Lc 23.50-56; Jn 19.38-42)*

<sup>42-43</sup> Matiarihihivare ema achane ticaijare José\*. Ticavasahi te Arimatea te Judea. Éma, tétavicavahi eta mapicauchacarevahi. Masuapahi ema Jesús eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarahana. Tacahe, te cáperehipa eta jena sáchequenehi, tétumechavapa ema José tiyanapa eta me Pilato, mayaseapanahi eta máquehe ema Jesús, mavarairahi máecarayare. Tacahe, tiyayauchavapa taicha téricayarepahi eta sache. Vahi táisapacarehíni náecararecahíni te yátimuhu, váhivare táisapacarehíni máejamiacahíni te jena sávarumuhu. <sup>44</sup> Máraminehi ema Pilato eta máijahúchiravahi tépenavane ema Jesús. Tásiha, máimichuhapa ema nacapitara. Te títecapapa ema nacapitara, mayaserecapa te yátupihípuca tépenaripa ema Jesús. <sup>45</sup> Tásiha, eta mametasirahi ema nacapitara eta máepeniraipahi ema Jesús, máisapapa ema Pilato eta máquehe ema Jesús. <sup>46</sup> Tacahe, tiyanapa ema José. Mámapa eta tiúrina sávana mavachareruhi. Tásiha, macucupaicapa eta máquehe ema Jesús. Náyuruácapa tayehe eta sávana. Náiyaracuhapa tayehe eta máecari eta te mari nasecajueruhi. Tásiha, najihachapa te tapaja eta

\* **15:42-43** Ema maca José, vahi émaina ema maparape ema Jacobo ema táechajisiquenehi te versículo 40. Váhivare émaina ema José ema suima esu María, máenahi ema Viáquenu Jesucristo. Ema maca José, tatiarihi eta mávacure tayehe eta Cabildo te Jerusalén. Émasera vahi máimicasiapavahini nayehe ena ticatianacanahi ema Jesús. (Pitanuca te libro Lucas 23.51.)

máecari eta ticheyarama mari tajitacarequene. <sup>47</sup> Sutiarihihivare esu María Magdalena ésupa esu apana María†. Náimarahahi, náimatipa eta nanasihahi eta máquehe ema Jesús.

## 16

*Eta máechepusira ema Jesús eta te máecari  
(Mt 28.1-10; Lc 24.1-12; Jn 20.1-10)*

<sup>1</sup> Tacahe, te jena sache sávaruquenehi, téricaipa eta sache, tiyanapa esu María Magdalena, ésupa esu Salomé, ésupa esu apana María. Tivacharecanapa eta tíjyequene perfume nayariasihayare eta máquehe ema Jesús. <sup>2</sup> Tásiha, te apanapa sache, lumíncuquenehi, nayatirupa tiyanana eta te máecari. Te tiúchucapa eta sache, títécapanapaipa éna eta te máecari. <sup>3</sup> Eta napaisirapahi, tiyaserejiricacanapaipa. Ánipa nacahe:

—¿Nájahapapucaini náequehepuichinahavini eta tajiha eta ñécari eñi Viáquenu eta mari tajitacarequene? —nacahepa.

<sup>4</sup> Te títécapanapa, náimahapa eta márime tájinaripahi te tapajacura eta máecari. <sup>5</sup> Tásiha, tisiapanapa. Ánaqui náimahapa ema émana amaperu achane, mávihahi te vaure. Eta mamuiraha, tétavicava eta tajapuva. Tiáramecanarinehi ena esenana. <sup>6</sup> Ema amaperu achane máechajicavacapa:

—Vahi ecupica. Éti etanucapahi ema Jesús Nazareno, ema macaetataquenenahi. Májinaripahi, taicha ticaechepucasiripa. Yare, ímaha. Júchahi eta mávinehi. <sup>7</sup> Tiuri puiti, eyana emetaca ema Pedro, tásiha, namutu ena apamuriana echamuriana. Emetacavaca tiyanayare ema Jesús eta te Galilea. Ánaqui macuchapiaheyare emutu éti. Échavarichuhipuca eta macayemaque-  
neanahi te achanerichaha —máichavacapa ema ángele.

<sup>8</sup> Tacahe, tiúchucanapa eta te máecari. Tiyananapa tijunapanapaipa. Tiyayacareanapaipa taicha eta náramirahi. Eta nayanirahi, nájina nametaruinahini taicha eta napisirahi.

*Tímerecavapa ema Jesús suyehe esu María Magdalena  
(Jn 20.11-18)*

<sup>9</sup> Tiuri, eta máechepusirahi ema Jesús te máecari te jena lumíncuquenehi te yáticarahichicha, sutivapa máimeresiavahi suyehe esu María Magdalena. (Esu suca María, esu máepachiaruhi ena siétequeneana éreanana te suáquehe.) <sup>10</sup> Tacahe, tiyanapa ésu, sumetapana ena suchamurianahi. Éna, tétavicavahi eta napanereresirahi, tíyahanahi eta nacatisamurevairahi. <sup>11</sup> Váhisera nasuapahini eta sumetarapihi esu María eta máechepusiraipa, machaviraipahi títareca, étapa eta máimeresiravahi eta suyehe.

*Tímerecavapa ema Jesús nayehe ena apinana máimitureana  
(Lc 24.13-35)*

<sup>12</sup> Te táequenepa eta juca, tímerecavavarepa ema Jesús nayehe ena apinana máimitureana eta napaisirapahi, nacaijuheirahi eta avasarechicha te tachacaya eta Jerusalén. Tiápamaichavahisera eta mamira. Vahi náimatívanehini éma. <sup>13</sup> Téhesera náimatipa éma, majunijiacavacapa. Tacahe, tichavavaneanapa nametapana ena apamuriana nachamuriana. Váhiquenevaresera nasuapahini ena apinana, eta nametasirahi.

*Tímerecava ema Jesús nayehe ena mayeheana apóstoleana  
(Lc 24.36; Jn 20.19-21)*

† 15:47 Esu suca María, esu táechajisihaquenehi te versículo 40. (Te pivaraha pecha pitanuca Juan 19.25.)



<sup>14</sup> Tiuri, te táequenepa, tiúrujicavanahi eta nanisirahi ena óncequeneana apóstoleana. Tacahe, tíjahúchavapa tímerecava ema Jesús eta nayehe. Macajachamurivarepa eta namasuapirahi eta nametarapianahi ena tímahanahi éma eta máechepusiraipahi.

*Matuparaca ema Jesús ena apóstoleana*  
(Mt 28.16-20; Lc 24.37-49; Jn 20.22-23)

<sup>15</sup> Tacahe, máichavarepa:

—Eyana epaica te tamutu eta avasareana eta te juca apaquehe. Ecame-tarairuyare eta tiúrina echajirirucava nayehe namutu ena achaneana.

<sup>16</sup> Nucuchucuhavacayare namutu ena tisuapajirahianaya, ena ticaicachasianaya. Énaserá éna vahi tisuapanaya, ticaicuñanayare taicha tanasirichuhi eta napecaturana.

<sup>17</sup> Ena tisuapajirahiana náimerecayare eta juca tiáramicareana: Náimijunijicayare ena éreanana nayehe ena achaneana, taicha námamicayare eta níjare. Náitucayare téchajicana tayehe eta apanana échajirirucavana namaitucaqueneanainihi. <sup>18</sup> Te nacaratacahipuca eta quichareana, tájina táicharacaimahi. Te téranahipuca eta venéno, tájinavare náichavaimahi. Nanacayare eta navahuana nayehe ena nácani nacajumaqueneana, tásiha, tinaracanayare éna —macahepa.

*Eta mayapirahi ema Jesús te anuma*  
(Lc 24.50-53)

<sup>19</sup> Tacahe, te títavapa tamutu eta mametarapianahi ema Viáquenu Jesús, tiyanapa tiyapa te anuma. Ema Viya macaejacapa ema Machicha te mavaure.

<sup>20</sup> Tacahe, tiyananapa eta te tamutu avasareana ena máimitureana. Ticame-tarairuanapaipa eta tiúrina echajirirucavana. Ichape eta máimicatasiravacapahi ema Viáquenu. Tétávicavahi tajacapacarevahi máicha, eta náimiturapianapahi. Taicha máijaracavacapahi eta náimeresirapahi eta tiáramicareana ticunachacareanahi.

Tamu tupa.

## **Ema San Lucas májuequenehahi eta máichararacavahi ema Jesucristo, ticajare puiti eta EVANGELIO SEGÚN SAN LUCAS**

<sup>1-3</sup> Némunaruquene nuparape Teófilo, nucajurevi puiti apaesa pecha píti apanavare eta juca néchaqueneanahi núti. Ichapemurianahi ena vichamuriana tiájuequenehanahi tayehe eta máicharacavahi ema Viáquenu Jesucristo. Tásiha puiti, núti apanavare nájuequenehavare. Nucaejarusinahi tamutu eta nájuequenehairahi, taicha tamutuhi nucayasesereru nayehe ena tinecapaequenehanahi, tímahanahi eta apaicafe eta táepaniravahi eta máitaresirahi ema Viáquenu. <sup>4</sup> Núti nuvaraha nímimatichavi apaesa yátupina pecha tamutu eta juca piáravahuanahi.

*Ema ángele macametarapi eta máuchusirayare ema Juan Tícachasiricarahiyare*

<sup>5</sup> Cape juca viásinequenehi te émarichaha ema Aluresi aquenucahi, réyhi tayehe eta jena provincia Judea, matiarihivare ema émana achane, ticajare Zacarías. Éma, náumurivanahi ena ticajareana Abías. Eta náematanerepi éna, náechapajirica eta námavahuasana ena achaneana tayehe eta Templo. Esu mayena ema Zacarías ticajaruhi Elisabet, mámariequenehihi ésu ema víyahaini Aarón. <sup>6</sup> Ema maca Zacarías ésupa esu mayena, tájina náichiravainahini te mamirahu ema Viya. Tamutuhi náitaucha eta mavanairipiana ema Viáquenu. Tacahe, tájina náechajisiequenehahini nayehe ena achaneana. <sup>7</sup> Nájinasera nachichainahini, macheruhi esu Elisabet eta suítaresira. Váipavare ticachichanaimahi taicha ichavicanaripahi.

<sup>8-10</sup> Te jena sache, náichuhapa ema Zacarías eta masiapirayare tayehe eta Templo te Jerusalén, taicha áñopahi eta masiapirayare. Tacahe, ticátuparácasipa éma. Émapa táetupiacahi eta máematanerepiyarehi máijuchayarehi eta incienso te táinahu eta mesa náijuchirarehi, taicha tacahehi eta nayeherepini ena israelítana. Tacahe, ema Zacarías tisiapapa te tajuhe eta cuarto tacapicahuquenehi, máijuchapa eta incienso. Macarichusera tísapacarehi tisiapa. Ena apamuriana achaneana nanasipa te aneca, tiyujaracanaripa éna. <sup>11</sup> Tiáramicarepa tímerecava ema émana ángele te mamirahu ema Zacarías. Mavaneruhi ema Viáquenu. Titupiharipa ema ángele te vaure tayehe eta mesa náijuchirarehi eta incienso. <sup>12</sup> Tiáramecarine ema Zacarías eta máimairahi ema ángele. <sup>13</sup> Émasera ema ángele máechajicapa:

—Vahi picupica, Zacarías —máichapa—. Ema Viya masamahi eta piyaseserepihi píti eta mayehe. Puiti esu piyena Elisabet ticachichayare. Juan eta máijareyare ema echichayare. <sup>14</sup> Ichapeyare eta piúrisamurevayare te máuchucapa ema echichayare. Énaripa ena achaneana, ichapeyareva eta náurisamurévaya taicha eta máuchusirayare. <sup>15</sup> Numetacavi: Ema pichichayare, ichapeyare eta macunachacarevayare mayehe ema Viya. Píti, vahi písapaimahi tera eta vino, étaripa eta apamuriana téracareana muracqueneana. Taicha éma, eta máuchusirayare, mávaháruyarepahi ema Espíritu Santo. <sup>16</sup> Éma pichichayare, éma tétupiricayare eta táurivayare eta napaneruana ena pijaneanana israelítana, tachavirayare eta nasuapirayare ema Viya. <sup>17</sup> Éma maca pichichayare, éma títapumirauchayarepahi ema Viáquenu. Macutiyare eta máitupajijiasiravaini ema víyahaini profeta Elías. Ichapeyare eta máitusirayare eta macajimuyasirayare eta nasamureana ena

achaneana apaesa tachava eta nasuapiraina ema Viya, tácuti eta nasuapajiravainihi ena náchucanaveanainihi. Énaripa ena váinarajipanereruana, tisuapajirahianayareva máicha. Mametacavacayare ena achaneana natsecavaipa eta najacapirayare ema Viáquenu —máichapa ema ángele.

<sup>18</sup> Tásiha, ema Zacarías majicapapa. Ánipa macahehi:

—Páurenusami, vaipa numaitacavaimahi nucachichahini, ésuripa esu nuyena. Ichavícahavipa víti. Váhicha nusuapapajica eta juca vicachichairayarepuca —máichapa.

<sup>19</sup> Émasera ema ángele máichavarepa:

—Núti nucaijare Gabriel. Núti mavanerunuhi ema Viya. Nutuparacasivaichuhi eta numetasiraviyare eta juca ecachichairayare. Piúriháine ichape nahini eta piúrisamurevainahini. <sup>20</sup> Puítisera úpaviyare. Eta ecutiarareyare piyehe taicha eta pimasuapiranuhi. Tiámáinucava te tátauchavapa eta juca numetaruvihí, péchajicainavarepa —máichapa ema ángele.

<sup>21</sup> Tacahe, ena achaneana nanasiqueneanahi te aneca nacuchaparairicaipaicha ema Zacarías, náramipa eta mayerevaipahicha te tajuhe. <sup>22</sup> Jéhesareinehi, te tiúchucapa ema Zacarías, vaipa máechajicahini. Námatiacapasera éna, eta máechajisirahi ema Viya te tajuhe. Tisuveverecapaipahi éma eta mavarairahi máimicutiarachavaca ena achaneana eta yátupirahi masamaquenehi. Úpapaipahi éma.

<sup>23</sup> Tacahe, te títauchavapa tamutu eta jena sácheanahi eta matuparacasivahi, tiyanapa ema Zacarías tayehe eta mapena. Nueve caje eta mayerevayarehi eta mamaechajisirayarehi. <sup>24</sup> Tásiha, esu mayena Elisabet, ticajaripa ésu. Váipasera súchuchurecahini te supena. Váhivare sumetajiricahini. Tiámáinucavapa te títauchavayarepa eta cíncoquenehi caje eta sucajarirahi. <sup>25</sup> Tétavicaivahi eta súrisamurevahi eta susamiravahi ésu. Ánipa sucahe:

—Ichape eta ñijapanuiranuhi eñi Viya, tíjaracanuhi eñi nuchichayare. Váipasare nayunacaimahi ena achaneana eta numacheruvahi —sucahepa.

### *Éma ángele macametarapi eta máuchusirayare ema Jesús*

<sup>26</sup> Tacahe, te sáisiquenepa caje, ema Viya mápechavare mavaneca ema ángele Gabriel tiúcupaica tayehe eta avasare Nazaret, tayehehi provincia eta Galilea.

<sup>27</sup> Máucupauchapa esu amaperu esena ticaijaru María. Ésu, tájina suímatiyahini ema ajaira. Matiarhipasera ema suímayarehi, ema ticaijare José. Téjacaripahi eta natratune. Ésu, mámariequenéinihi ema víyarahaini rey David. <sup>28</sup> Tacahe, ema ángele máucupauchapa ésu tayehe eta suávihahi. Máichapa ésu:

—Pícharacava, María. Piti manerejiruvihí ema Viya. Tétavicavahi eta piúricarevayare taicha ichape eta majapanuiravihí éma Viya. Picachuricahi namutu ena apamuriana esenana —máichapa.

<sup>29</sup> Ésusera tíramecainehi eta máechajisirahi ema ángele. Supanerequenehainehi tájahhipuca tacayemahi eta máechajisirahi ema ángele. <sup>30</sup> Émasera ema ángele máichavarepa:

—Vahi picupica, María. Piti manerejiruvihí ema Viya. <sup>31</sup> Numetapanavihí puiti eta picajarirayare. Ajairayare ema pichichayare. Jesús eta máijareyare.

<sup>32</sup> Tétavicavaya eta napicauchirayare ena achaneana taicha Machichayarehi ema Viya. Ichapequenyare eta aquenucairayare éma taicha ema Viya manacayareva eta mávacureyare aquenucaiyare. Macutiyarehi eta aquenucairahi ema máchucaini David. <sup>33</sup> Éma téchayarehi namutu ena pijaneanana israelítana. Máepenacacayare eta aquenucairayare —máichapa ema ángele.

<sup>34</sup> Tásiha, esu María, sujicapapa:

—¿Tájahasica táicharacavayare eta juca? Taicha núti nájinaichaha nímainahini —suíchapa.

<sup>35</sup> Émasera ema ángele máichavarepa:

—Picachichayare taicha eta máitupajjiasiravahi ema Viya. Timicauchaviyare eta majaraiva, tásiha, tisiapahacavinapa ema Espíritu Santo. Eta tacahe, ema amuya pínaruyare, sántoyare éma, taicha machichayarehi ema Viya. Náimatiyare namutu eta machichairahi ema Viya. <sup>36</sup> Picutiyare esu pijaneana Elisabet, énerichuvare ticajaripahi ésu. Tayanapanehi ichavichicharipahinéni ésu, macheruinihinéni. Sáisiripasera caje eta sucajarirahi puiti. <sup>37</sup> Taicha ema Viya, tájinaquene máemáituca éma —máichapa ema ángele.

<sup>38</sup> Tacahe, esu María sujicapapa:

—Núti ñivanaranuichuhi eñi Viya. Nutiarahi puiti. Ñímahanuinepa éñi, eta ñícharacanuyare te ñivanairipiana —suíchapa ema ángele.

Tacahe, eta masamirahi ema ángele, tiyanapa tichavahi.

### *Esu María suéjirapanapa esu sujaneana Elisabet*

<sup>39</sup> Tacahe, te jena sácheana titátájipa esu María tiyana tayehe eta avasarechicha te tataracucujianahi eta márijuecu tayehe eta provincia Judea, suávasahi esu sujaneana Elisabet émapa ema Zacarías. <sup>40</sup> Te títecapapa esu María tayehe eta napenahi, suéchajicapa esu Elisabet. <sup>41</sup> Te susamapa esu Elisabet eta suahu esu María suéchajisirahi, tiyamuricainehi eta amuya te sujuhe esu Elisabet, enevanepa mávahácahi ésu ema Espíritu Santo. <sup>42</sup> Tacahe, téchajicapa muraca esu Elisabet, suíchapa:

—Píti, tétavicavahi eta piúricacarevahi ñicha eñi Viya. Picachuricahavihi vimutu viti esenana. Éñiripa eñi pichichayare, tétavicavahivare eta ñicunachacarevaya. <sup>43</sup> Nusapihasamipa núti péjirapananuhi piti ñénaviyarehi eñi Náquenu. <sup>44</sup> Te nusamapa eta pياهو eta péchajisiranuhi, tiyamuricainehi te nujuhe eñi nuchicha, taicha eta tiúrisamuréinehi éñi. <sup>45</sup> Tétavicava eta piúricacarevaya píti taicha eta pisuapajiraivahi ñe Viya. Títauchavainapa tamutu eta ñimetarapihi eñi Viáquenu eta piyehe —sucahepa esu Elisabet.

<sup>46</sup> Tacahe, esu María sujicapapa:

—Ichapemurihi te náchaneva eta nucunachirahi eñi Viáquenu. <sup>47</sup> Taicha tétavicavapa eta táurisamureva eta nusamure ñicha eñi Viya Ticatiurahiquene eta nuyehe. <sup>48</sup> Taicha éñi, vahi ñépurunuhini páurenuhinéni nútisami. Tétavicavahisera eta ñijapanuiranuhi nuti ñivanarahi. Nútupa ñinerejicanuhi, tásiha, ichapenapapuca eta nacapinarunuiraya namutu ena achaneana natiarihiquenehi puiti, énapa ena arajuruanayare. “Tétavicavapa eta súricacarevahi esu María” nacáhénapapuca. <sup>49</sup> Tétavicavapa eta ñítupajjiasiravahi eñi Viya, tíjaracaruhi eta núrivyarehi ñicha. Jéhevare éñi, Sántoquenehi eta ñijare. <sup>50</sup> Eta tacaheyare eta ñijapanuirahaviyare puiti, énapa namutu ena arajuruanayare, nácani tipicauchanayare éñi.

<sup>51</sup> Eñi Viya, ñíjaracayare eñi nuchichaya eta ñítupajjiasiravaya ichape. Tásiha, ñicaerajicavacaya ena ticasiñavavairicana, énapa ena váinarajipaneruranahivare. <sup>52</sup> Nácani aquenucana nacatianacainapapuca, ñicapaquechavacayahisera éñi. Nasapihapa ena páureanasamihí, ñinerejiruanaya éna, ñijupahanayare. <sup>53</sup> Yátupiya eta ñíjarasiravacayare eta táetaviuchiraya eta náuricacarevaya namutu ena ticasiñavanayare ñiyehe. Énasera ena tímijachavanahi tájinahini nácamunuhini, ñicaerajicavacaya namutu.

<sup>54-55</sup> Eñi Viya acane tíjaracavahi ñiyehe eñi viáchucaini Abraham énapa ena ñíámariéqueneana, eta ñíjarasiravacainapa eta táetaviuchiraya eta náuricacarevanaya. Vahi ñémitisicaimahi eñi Viya eta ñéchajiriruvahi ñíjararuvahi.

Puiti, eñi nuchichaya tiámayarepahi tamutu eta viúricacarevanaya viti israelítana. Máitavacacayarehi éta —sucahepa esu María.

<sup>56</sup> Tásiha, sunasipanapa esu María te supena esu Elisabet. Mapana caje eta suyerevahi. Te táequenepa, tichavavarepa te supena.

### *Eta máuchusira ema Juan*

<sup>57</sup> Tacahe, títauchavapa eta sucajera esu Elisabet. Suínacapa ema suchicha. <sup>58</sup> Tiyananapa ena sujaneanana énapa ena suchacayapenanahi, náejirapana ésu. Táicha eta nasamairirisirahi eta súrivahi maicha ema Viya eta majapanuirahi ésu. Tiúrisamureanarinehi namutu. <sup>59</sup> Tacahe, te óchoquenepa sache eta máuchusirahi ema amuya, nayanauchapa ena najaneanana, namarcachapanyarehi ema amuya; taicha tacahehi eta nayeherepihi. Tásiha, navarahapa nanacayarehi eta máijareyarehi Zacarías, mámapicayarehi eta máijare ema máiya. <sup>60</sup> Ésusera esu maena ema amuya vahi suvarahahini. Suíchavacapa:

—Juan eta ñíjareyare.

<sup>61</sup> Tásiha, éna nacahepa:

—¿Tájaha tacayema? Namutu ena pijaneanana, nájina ticaijarena eta Juan —nacahepa.

<sup>62</sup> Tásiha, éna náimicutiarachinapa eta nayaseresirahi ema Zacarías tájahapuca eta máijareyarehi maicha éma. <sup>63</sup> Tacahe, ema Zacarías tiyaseserecapa eta táblamechicha, májuchihayarehi eta máijareyarehi ema machicha. Eta ajureca, ani tacahehi: “Juan eta máijareyare”. Tésenijiricacanarinehi éna taicha eta máijareyarehi ema amuya. <sup>64</sup> Tásiha, tíjahúchavapa tichavapa eta máechajisira ema Zacarías. Macunachapa ema Viya eta máurisamurevahi. <sup>65</sup> Ichape eta tiáramicarehi nayehe ena natiarihiqueneanahi. Nasamairiricavanepa namutu ena távacuanahi eta avasarechichana tayehe eta provincia Judea. Náechajisihapa eta juca nasamaiririruanahi. <sup>66</sup> Namutupa napanerequenehahi. Nácani tisamairiricanapahi, tiyaserejiricacanaripa. Ánipa nacahe:

—¿Cañarihi tacayemaquenehi eta juca máuchusirahi ema amuya? —nacahepa.

Tásiha, ema amuya, tétavicavahi eta majaneasirahi ema Viya eta majurusirapaipahi.

### *Eta majirarapi ema Zacarías*

<sup>67</sup> Tacahe, eta jena sáchequenehi eta macamarcairahi ema amuya, étaripa eta nanasirahi eta máijareyarehi, téchajicapa ema Zacarías. Macunachaipa ema Viya, taicha mávahácaripa ema Espíritu Santo. Ánipa macahehi:

<sup>68</sup> —Tétavicavapa eta macunachacareva ema Tata Vicaiyaquene, ema véhiruhi vimutu viti israelítana. Taicha tijapanuhavihi vimutu viti machaneranihi, ticuchucuhahaviyarehi. <sup>69</sup> Tíjaracahaviyarehi puiti ema yátupique-neyare eta macatiuraivaya, ema manerejiruhi te namuri ena mámariequeneanainihi ema David, ema mavanarainihivare ema Viya. <sup>70</sup> Títauchavaipahi eta náechajiririvanahi ena santo profetanaini acane, eta nametacasivanahi me Viya. <sup>71-73</sup> Taicha tacahehi eta matratunehi ema Viya mayehe ema viáchucaini Abraham. Ema Viya tíjaracahavi eta majapanuiravacayarehi ena viáchucanaveanaini, énapa ena ticachichahaviana, vítipa puiti. Énerichuvare tíjaracavahi eta mamaemisisiraya eta macatiuchirahaviyare nayehe ena



ticatianacahavianahi. <sup>74</sup> Ema Cristo manerejiruhi ema Viya, ticatiuchahaviyarehi taicha mamavarairahi vipicahini, nacuijahivaréni ena nahapapicahavihini eta vicaemataneasirayarehi éma. <sup>75</sup> Eta mavarahaquenehi tiúriyare eta vítaresirayarehi tamutu sácheana, tájina víchiravaimahi te mamirahu éma.

<sup>76</sup> Pítiripa, piti nuchicha, píchuarecasivaichuhi mayeheviyare profeta ema Tata Vicaiyaquene taicha píti pínapumirauchayarepahi ema Viáquenu Cristo. <sup>77</sup> Pétupiricayarehi eta nasamureana ena achaneana, yátupinapa machaneranyarehi éna. Pímitucayareva nácaicutiaraya eta mavarairahi ema Viya macatiuchavacayare, macaepahairayarehivare eta napecaturana. <sup>78-79</sup> Puítiripa, eta máemunasirahavihi ema Viya, macucupaisinahavihi te anuma ema Machicha. Éma, tímimaticahavinapa eta majaraiva ema Tata Vicaiyaquene étapa eta táuriquene achene ticaijuhe mayehe. Máetucarácavacayare eta nasamureana ena ticatisamureanahi, nácani tépenanyarehíni — macahepa ema Zacarías.

<sup>80</sup> Tacahe, ema amuya eta majurusirahi, tiámavapahi eta masuapajiraivahi mayehe ema Viya. Váhivare étainahini te tajuhe eta avasare eta majurusinehi. Vámahicuruhahi eta majurusirahi. Tiámainucava te ajairapa, tímerecavapa nayehe ena majaneanana israelítana, tépanavapasera ticametarairu.

## 2

### *Eta máuchusira ema Jesús (Mt 1.18-25)*

<sup>1-3</sup> Tacahe, te jena áñoanahi cape juca viásinequenehi te émarichaha aquenucahi ema Emperador Augusto, matiarihivare ema apana achane ticaijare Cirenio, majupahahi ema Augusto. Prefectohi éma, tayehe eta avasareana. Ticaijare Siria eta mávihahi\*. Tacahe, te jena sácheana, ema Augusto macavanairipipa nacuchuca eta vantu eta nacatupairayare namutu ena achaneana te avasareana. Tacahe, tiyananapa ena achaneana te návasanapachu te náuchusineana eta nacatupairayarehi. Nasuapayarehi eta vanairipí. Táinapuiruhi censo maicha ema Emperador Augusto.

<sup>4-5</sup> Tacahe, tiyananapa ema José. Mámapa esu mayena María. Ticajaripaipa ésu. Tacahe, tiúchucanapa éna tayehe eta avasare ticaijare Nazaret te Galilea. Nacaijuhepa eta avasare ticaijare Belén te Judea, eta mávasainihi ema aquenucaini rey David. Étarichuvare mávasahi ema José, taicha ema José mámariequenehi ema David. Tiyananapa ticatupanayarehi.

<sup>6-7</sup> Tacahe, títecapanapa te Belén. Tájinaipasera táviravainahini eta te pétiana eta náitecapihahini taicha camuriqueneanahi ena achaneana náitecapaqueneanahi. Tacahe, tisiapanapa eta te peti tapena eta sárareana. Tacahe, esu María tiyuriticavaipa eta sucajera eta suínasirayarehi. Tacahe, títacapa jena yati. Suínacapa ema amuya ema suárachichahi. Tacahe, suáyuruacapa eta te mámaratataji pañal. Sucaivecapa ema amuya alauchu.

### *Ena pástulérwana ticametacasianapa nayehe ena ángeleana*

<sup>8</sup> Te vamáhi te tachacaya eta avasare Belén, natiarihini ena pástulérwana. Éna, najaneacahi eta nayeheana uvesana te jena yátiquenehi. <sup>9</sup> Tiáramicarepa tímerecava ema ángele mavaneruhi ema Viya. Jéhesare, tamicauchamurinehi ena pástulérwana eta majaraivahi éma. Tiáramecanarine éna. <sup>10</sup> Tásihasera, ema ángele máichavacapa:

\* **2:1-3** Te jena año, matiarihivare ema ichapequenehi aquenuca ticaijarehi Aluresi. Éma, reyhi tayehe eta departamento Judea.

—Vahi ecupica. Yare, jucarihi eta tímitecanuhi núti numetapanaheyare. Tétávicava táurismurécarevaya nayehe namutu ena achaneana. <sup>11</sup> Puiti te jena avasare Belén, mávasaini ema rey David, tiúchucaipa ema Ticatiurahiyare eyehe emutu éti. Éma, ticaijare Cristo Viáquenu. <sup>12</sup> Eta tacahe, nímicucutiarachinaheyare eta ímairaya: Echimapayare ema amuya ticayuruhahi te mámaratataji pañal. Tívecahi eta te tajuhe eta peti tapena eta sárareana — máichavacapa ema ángele.

<sup>13</sup> Tásiha, tíjahúchavapa tímerecavana ena camuriqueneana ángeleana eta te mávihahi ema émana ángele. Najirahi eta alabanza eta nacunachirahi ema Viya te anuma. Ánipa nacahe:

<sup>14</sup> ¡Tétávicavapa eta vicunachirahi ema Viya vimutu viti viávihanahi te anuma! ¡Jéhevare puiti, tiúricavanainapa ena achaneana te juca apaquehe, ena manerejiruanahi macatajiruanahi ema Viya! ¡Tájinainapa náichiravaimahi! —nacahepa.

<sup>15</sup> Tacahe, tiyananapa ena ángeleana, tichavana te anuma. Tásiha, náichacacapa ena pástuléruana:

—Yare, viyana te Belén. Viyana vímahapana eta juca mametaruhavihi ema ángele mavaneruhi ema Viya Viáquenu —náichacacapa.

<sup>16</sup> Tacahe, titátájianapaipahi tiyanana. Jéhesareinahi, te títecapanapa, nachimapainehi esu María émapa ema José. Matiarihisaréipahi ema amuya. Tívecahi éma eta te tajuhe eta peti tapena eta sárareana. <sup>17</sup> Te náimahapa tamutu, tépanavanapa náemechapa. Amairipahipa naecha eta mametarapianahi ema ángele eta máuchusiraipahi ema amuya. <sup>18</sup> Tacahe, náraminehi namutu ena achaneana eta nametarapianahi ena pástuléruana. <sup>19</sup> Tásihasera, esu María supanerequenehainehi te susamure tamutu eta juca susamaqueneanahi. <sup>20</sup> Tacahe, ena pástuléruana tichavanapa tayehe eta te najanearesihahi eta uvesana. Nacunachainehi ema Viya te anuma táichavene eta máechajiriruvahi ema ángele, táichavenevare eta náimairahivare ema amuya alauchu. Éta paichuhi tacahehi eta macayemaquenehi ema ángele.

### *Námapa ema amuya Jesús te Jerusalén, náimerepana tayehe eta Templo*

<sup>21</sup> Te óchoquenepa sache eta máuchusirahi ema amuya, namarcachapa éma taicha tacahehi eta nayeherépi ena israelítana. Tacahe, nanacapa eta máijareyare Jesús. Eta máijare máimijarechaquenehi ema ángele te sucajariyarepa esu maena María.

<sup>22-24</sup> Tacahe, te cuarentaquenepa sache eta suínasirahi esu María, tiyananapa te Jerusalén. Eta tímiyanavacahi éna, náimerepanayarehi ema amuya mayehe ema Viya Viáquenu. Taicha ema Viya macavanairipihi eta te Sagrada Escritura eta májurehi ema víyarahaini Moiséini, ánipa tacahehi: “Te ajairapuca ema mácani suárachicha esu esena, ímerecayare nuyehe; íjaracanuyare taicha nícuchichuhi ema”. Énerichuvare náitauchayarehi eta juca apana vanairipi tayehe eta napachihairaina ena esenana eta te táequenerapa eta náinasira. Ánipa macahe: “Esu súcani esena arainacahi, suíjaracasichanupana eta apihina paluma símarrune; te váhipuca, apina paluma suítatiqueneana, amairuhichichanasera”.

<sup>25</sup> Tiuri, matiarihihhi te Jerusalén ema émana achane ticaijare Simeón. Tétávicavahi eta máuriva. Tipicaurahi éma. Émarichu mávaháruhi ema Espíritu Santo. Ticuchapavaipahicha ticaimairuvaipaicha éma eta máimatiraya ema Cristo, éma ticaurismurerahi nayehe ena achaneana majaneanana israelítana. <sup>26</sup> Taicha ema Espíritu Santo mametacaripahi ema Simeón

eta vuíchaha tépenavanemahi éma, táicha máimatinumayarehi ema Cristo mavaneruyarehi ema Viya.

<sup>27</sup> Tiuri, te jena sache, ema Espíritu mavanecapa ema achane Simeón mayana eta te Templo. Tacahe, títecapanapa ena ticachichana ema Jesús. Námapaipa ema amuya. Náitauchayarehi eta vanairipiana taicha eta máuchusirahi ema suárachichahi. <sup>28</sup> Tacahe, te máimahapa ema Simeón ema amuya, mavehapa, majupacapa. Tásiha, macunacharinehi ema Viya te anuma. Macahepa ema Simeón:

<sup>29-30</sup> —Tiuri puiti, Tata Náquenu te anuma, nuvarahapa nunaraca te juca apaquehe, nuti pivanarahi. Taicha núrismurepa eta nímairaipa ema Cristo. Éta paichuhi eta pimetarunuhi. Nímatipa ema Ticatiurahiqueneyarehi, ema pivaneruhi pitupararui. <sup>31</sup> Éma, tímaticareya picha nayehe ena achaneana ticavasanihi eta te tamutu avasareana. <sup>32</sup> Ticunachavanarinehi ena pinereji ruana israelítana. Tíjarahinevare te nasamure eta nacunachirahi. Éma, timicauchavacaya ena apamuriana achaneana apavasana apaesa náimatiyare ema Viya —macahepa ema Simeón.

<sup>33</sup> Náraminehi ena ticachichana eta máechajiriruvanahi ema Simeón mayehe ema amuya.

<sup>34</sup> Tacahe, ema Simeón mayaseacapa ema Viya eta náurivaina éna. Tacahe, máichapa esu María esu maena ema amuya Jesús:

—Pímaha. Ema maca amuya, matuparacasivaichuhi me Viya eta máimitu-resirayare eta máechajiriruvana ema Viya. Natiarihiyaresera camuriana ena vijaneanana israelítana éna jivayare tíchavanayare, taicha náepuruyare ema pichicha, nacatianacayareva. Tásiha, natiarihiyarevaresera ena apamuriana vijaneanana tinaracanayare tíuricavanayare taicha eta nacasiñairaya éma. <sup>35</sup> Étainapa tacaetheraiyaya eta napanereruanapachu te nasamureana. Énerichuvare, numetacavi piti María: Ichape eta picatisamurevayare, taicha pímahayare eta táíñehiqueneyare máicharacavayare ema pichicha. Tímicutijiricavayare tayuvaracahini eta pisamure eta tumare —máichapa ema Simeón.

<sup>36</sup> Tiuri, sutiarhihivare esu ésuna esena ichavicachicha. Ticametarairurahi ésu. Ticaijaruhi Ana. Ema suíyaini ticaijaréni Fanuel. Ésu, mámariequenehi ema víyahaini Aser. Eta suámaperuvahi ésu, siete año eta sucachanerahi ema suímaini. <sup>37</sup> Tásiha, ochenta y cuatro añoripahi eta suépenaimavahi. Sunasiquenehi sucapenahi ésu eta te Templo. Tamutuhi sácheana, yátiana, tiyujaracahi ésu. Suhayunachahivare. <sup>38</sup> Tacahe, ema Simeón téchajiricavainirichaha, títecapanecha esu Ana. Eta suímairahi ema amuya Jesús, sucunacharinehivare ésu apanahivare, suhasulupayachapa ema Viya máichavene ema amuya. Tásiha, sucametarairupa mayehe ema amuya. Suéchajisihahi éma nayehe ena tisuapajirairahana ticuchapanahi eta máitecapirayare te Jerusalén ema Cristo.

### *Tichavanapa eta te návasa Nazaret*

<sup>39</sup> Tiuri, náitauchapa tamutu eta mavanairipiana ema Viya eta te Sagrada Escritura. Tacahe, tichavanapa eta te Nazaret te Galilea, te návasaichuhi éna. <sup>40</sup> Tacahe, ema amuya Jesús tíurijuruhi. Túmehi. Téchemarahihi, tamutu maecha, taicha mamunavahi me Viya.

### *Ema Jesús téchajiricava nayehe ena máestroana*

<sup>41</sup> Tiuri, tamutu áñoana te Páscuamuhuana, eta nayeherepi ena ticachichana ema amaperu Jesús, tiyananayarehi tayehe eta avasare Jerusalén. <sup>42</sup> Tacahe, ema Jesús, te macayehepa doce año, tatuparacaripahi ena ticachichana

náimerepanayarehi éma, námayarehi tayehe eta Jerusalén, náimimatichayarehi eta piesta ticaijare Pascua.

<sup>43</sup> Tiuri, te jena táequenerapa eta piesta, tichavanapa te napena. Tíminasichavapasera ema amaperu Jesús eta te Jerusalén. Eta napaisirapahi te achene, vahi náejacavanehini ena ticachichana, <sup>44</sup> taicha náimijachahi matiarhipahi éma te namuri ena achaneana nacachanequeneanapahi. Étanaripahi sache eta napaisirahi, napaenumavapa náejacahi éma. Te jena cáperehiquenepa, natanucapa te namuri ena najaneanana nacachanequeneanapahi. <sup>45</sup> Májinasera náichimavahini. Tacahe, tichavanavarepa te Jerusalén, natanupanayarehi éma. <sup>46</sup> Tacahe, te jena mapanaquenepa sache eta natanusirahi, napaenumavapa náetupiacahi ema Jesús tayehe eta Templo. Macachanemurihi, téjacahi te namuri ena máestroana. Masamararacavacahi, mayaseremurihavacahivare éma apanavare. <sup>47</sup> Ichaperinehi eta náraminehi namutu eta náimairahi eta máechemaraivahi, taicha táurivapahi eta majicapiravacapahi éna, taicha eta máechemaraivahi. <sup>48</sup> Tacahe, tiáramivanarinehi ichape ena ticachichana te náetupiacapa. Tásiha, suíchapa esu maena:

—Nuchicha, ¿tájaha tacayema píchahavihi? Ichapemuri eta vicañamarasiravahi pícha. Vitanujiriricavihi, núti éñipa eñi piya —suíchapa esu maena.

<sup>49</sup> Tacahe, ema Jesús majicapapa:

—¿Tájaha tacayema, meme, eta etanujiricanuhi? ¿Váhipuca échahini éti eta návihairahi eta ani? Níchayare eta máemataneana ema Tata —macahepa ema Jesús.

<sup>50</sup> Énasera vahi nacaicutiarahini eta macayemaqueneanahi ema nachicha Jesús. <sup>51</sup> Tacahe, tiyanapasera tichavana te návasahi Nazaret. Ema Jesús, tisuapajirahihi nayehe ena ticachichana. Esu maena María tamutuhi supanerequenehahi te susamure eta juca susamaqueneanahi.

<sup>52</sup> Tacahe, ema Jesús tijurucapaipa, tijuruhacapaipavare eta máquehe, tacachanepahisera eta máitupajijiasiravahi. Máimicatacachi ema Viya. Tétavicavahivare eta náemunasirahi éma, ena achaneana.

### 3

*Ema Juan Tícachasiricarahi tépanavapa ticametarairu eta máechajiriruva ema Viya nayehe ena vámahicuruhana*

*(Mt 3.1-12; Mr 1.1-8; Jn 1.19-28)*

<sup>1</sup> Tacahe, eta máepeniraipahi ema aquenucaini Augusto, tisiapapa ema Tiberio máitsivaquenehi. Émapa Emperadorhi. Quince añoripahi eta macatuparahairahi. Ema Poncio Pilato, émaripa prefectohi tayehe eta departamento Judea. Tásiha, ema Herodes Antipas, machicha ema Aluresini, prefectohivare tayehe eta departamento Galilea. Ema maparape Felipe, prefectohivare éma, tayehe eta departamento Iturea étapa eta Traconite. Ema Lisanías, prefectohivare tayehe eta departamento Abilina. <sup>2</sup> Te Jerusalén, ema Caifás, corregidorhi. Énerichuvare tipicauchacarehi ema Anás, pasado corregidor, máimachuca ema Caifás.

Tacahe, te jena sácheanahi, ema Juan machicha ema víyarahaini Zacarías, ajairaripa. Manasirichahahisera tayehe eta mávapahi majurusinehi. Tásiha, ticametacasipa ema Juan eta mayehe ema Viya eta macametarairuirayarepa eta máechajiriruvana.

<sup>3</sup> Tacahe, tiyanapa tipaicahi ema Juan tayehe eta avasarechichana tiávihanahi te tachausi eta cajacure Jordán. Mametacavapaipa ena achaneana. Ánipa maicha:

—Ítsivacha eta epanereruana. Éneuchava mayehe ema Viya apaesa maperdonachahe eta epecaturana. Te éneuchavapuca, núti nícachasicahénapa —máichapa.

<sup>4-6</sup> Ema maca Juan, émaripa ema máechajisihaquenehi ema Viya eta te Sagrada Escritura, taicha ánaquiaparipahi eta áñoana acane, ema Viya mametacapa ema víyahaini profeta Isaías eta mapanereruhi, eta mavanesirayare ema Machicha te juca apaquehe. Eta tímitecahi ticatiurahiyarehi. Énerichuvare matiarhiyareva ema apana achane máichuhaqueneyarehi ema Viya. Macametarairuyarehi, máetupiricavacayare ena achaneana, náinajisirayarehi eta napanereruana tauriqueneana, apaesa táuri eta najacapirayare ema Machicha ema Viya. Tacamunuhivare yátupina eta nacasiñairavayarehi mayehe, náinajicayarehivare eta nacasiñavavaisirahi, étapa eta navayuaravahi. Nasapihahi tijapanurahianainapa éna. Tásiha, te máitecapapa ema ticatiurahiyarehi, éma máimimatichainapa namutu eta najacapacarevaya me Viya namutu ena ticasínavana mayehe.

<sup>7</sup> Tacahe, ena achaneana tiyananapaipa napauchapaipa ema Juan, navarahapa ticaicachasianayare eta mayehe. Tásiha, éma máichavacapa:

—¿Tájaha tacayema eta epauchiranuhi, eti tachichanaveanatataji eta quichare? Esamairiricahipuca eta járajapairayarepa eta táíñehiqueneyare ecuñaraqui. Evarahahipuca iúchucuhayare. <sup>8</sup> Tiuri puiti, te evarahapuca eta iúchucuha, yátupina tátupiruva eta epanereruana. Ímrecava eta ínajisiraya eta epecaturana. Váhivare ecucajamurava eta mámariequenérahehi ema viáchucaini Abraham. Taicha tayanapane mámariepuca éma, váhisera iúchucuhaimahi te vahi ecuitsivacha eta epanereruana. Ema Viya, tájina máemaitucaimahi éma. Te mavarahapuca, vahi máejecarachaimahi máepiyaca achaneanaina eta juca mari, mavarairainahi yátupina ena mámariequeneanaina ema Abraham. <sup>9</sup> Ecauneuchava, taicha tiánehipa títecapauchahere eta ecuñaraqui nayehe ena achaneana máitucarahanahi téneuchavana, váhivare náitsivachahini eta napanereruana. Tímicutijiricavaipa te máechucayarepa ema achane eta yucuqui máhireana; tásiha, máijuchainapa tamutu. Ene nacaheyare ena máeneuchavarahana —máichavacapa ema Juan.

<sup>10</sup> Tásiha, ena achaneana nayaserecapa:

—¿Tájahasica eta vícharacavayare eta viúrivaina?

<sup>11</sup> Ema Juan majicapapa:

—Ecajirahiyare. Mácani tatiarihi apina eta macamisa, májaracasichayarehi eta étana mácani tájina macamisaina. Énaripa nácani ticaniruanahi, nacajiyareva nácani tájina naviyahini eta nanicaquene —máichavacapa.

<sup>12</sup> Te jena sácheana, náitecapauchavare ema Juan ena ticobrarecarahiana eta impuesto. Navarahapa ticaicachasianayarehi. Nayaserecapa ema Juan, náichapa:

—Maestro, ¿tájahapuca vícharacavaini eta viúrivainaini víti apanavare? —náichapa.

<sup>13</sup> Majicapapa ema Juan:

—Vaipa ecuapechava ecuvayuyujica eta ecobraresira, tátupiruva jácani tavanairipihini eta ley —máichapa.

<sup>14</sup> Énerichuvare náitecapauchavare ena suntaruana. Nayaserecavare ema Juan, náichapa:

—Víti apanavare, ¿tájahapucaini vícharacavayare eta viúrivaya? —nacahepa.

Máichavacapa éma:



—Vaipa ecuverejica eta náimahaqueneana ena achaneana. Váipavare ecuipicarareca. Nacuijapa ecuepiyequeneha. Tarataripa tacurisamu-rechahe eta evachasana —máichavacapa.

<sup>15</sup> Ena achaneana ticunevanaripaicha eta mayehe ema Juan, náimijachaipahi émaripa ema Cristo nacuchapaquenehi, cátiurahiyarehi. Váhisera námutuimahi. <sup>16</sup> Tásihasea ema Juan máichavacapa:

—Yátupi núti níchasticahehi te une. Ávanepaipahisera mácani yátupiquene Cristo. Éma, tiápajupanavahi nuyehe núti, eta mapicauchacarevahi. Váiparinehi nácutinasimahi eta máitupajijiasiravahi. Váiparinehivare nácaemuñavaimahi macamusuranuhini nuti páuresami. Te yátupina ecasiñava mayehe, tícachasticaheyareva; tíjaracaheyareva ema Espíritu Santo. Téhesera vahi ecucasiñavapuca mayehe, tícuñacaheyare tayehe eta táijurequene yucu. <sup>17</sup> Puiti éma márajapainapa tinerejiricainapaipa nácani yátupiqueneanahi téhicanayare. Máunacainapa éna. Ticutinapa mácani achane te tiácatayajiricahi eta arusu. Máunacainapa. Tásiha, máquijicapa eta tapiraquiji, máijuchayarepa te yucu. Eta nacaheyare ena máurirahanahi, tíjuanáinapa te yucu, máitavacacayarehi eta tamuruira —máichavacapa ema Juan.

<sup>18</sup> Tacahehi eta juca máechajisiravacahi ema Juan. Ichape eta maconsejachiravacahi ena achaneana, máimitusiravacahi eta máechajiriruva ema Viya. <sup>19</sup> Émaripa ema Herodes Antipas ema aquenucahi, maconsejachahivare vahi macuimiyana macuveha esu Herodías, mayenahi ema maparape Felipe. Váhivare macuimiyana macuquicha eta apamuriana táíñemahiqueneana máichaqueneana. <sup>20</sup> Émasera ema Herodes vahi masupahini. Masapiharichucha tisemahi, máimicaratacapa ema Juan, macasiapayarehi te cárcel.

### *Eta macaicachasirahi ema Jesús*

*(Mt 3.13-17; Mr 1.9-11)*

<sup>21</sup> Tiuri, te tamirahupaichaha eta macaeratairaya ema Juan, tímiyanavai-chahahi máicachasicavacahi ena achaneana. Étana sache, máitecapachapa ema Jesús, mavarairahi ticaicachasi éma apanavare. Tacahe, te tamutupa eta macaicachasirahi, mayujarasirahi. Tijahúchavapa téjiaca eta anuma. <sup>22</sup> Tiúcupaicapa ema Espíritu Santo, mavasimahipaipa eta paluma eta máimahi. Matupiruruchapa te mápusi ema Jesús. Tásiha, nasamapa eta mahu ema Viya te anuquehe. Ánipa macahehi:

—Pítira nuchicha némunaruquene. Núrisamurecha piyehe —macahepa.

### *Ena achaneana máchucaqueanaini ema Jesús eta acane*

*(Mt 1.1-17)*

<sup>23</sup> Tiuri, ema Jesús, macayeheripahi treinta año te tinacuchavapa tímiturecachi nayehe ena achaneana. Éma, náimijachaquenehi machicha ema José. Ema máiyainihi ema José, ema Elí.

<sup>24</sup> Ema máiyainihivare ema Elí, ema Matat.

Ema máiyainihivare ema Matat, ema Leví.

Ema máiyainihivare ema Leví, ema Melqui.

Ema máiyainihivare ema Melqui, ema Jana.

Ema máiyainihivare ema Jana, ema José.

<sup>25</sup> Ema máiyainihivare ema José, ema Matatías.

Ema máiyainihivare ema Matatías, ema Amós.

Ema máiyainihivare ema Amós, ema Nahum.

Ema máiyainihivare ema Nahum, ema Esli.

Ema máiyainihivare ema Esli, ema Nagai.

- 26 Ema máiyainihivare ema Nagai, ema Maat.  
Ema máiyainihivare ema Maat, ema Matatías.  
Ema máiyainihivare ema Matatías, ema Semei.  
Ema máiyainihivare ema Semei, ema José.  
Ema máiyainihivare ema José, ema Judá.
- 27 Ema máiyainihivare ema Judá, ema Joana.  
Ema máiyainihivare ema Joana, ema Resa.  
Ema máiyainihivare ema Resa, ema Zorobabel.  
Ema máiyainihivare ema Zorobabel, ema Salatiel.  
Ema máiyainihivare ema Salatiel, ema Neri.
- 28 Ema máiyainihivare ema Neri, ema Melqui.  
Ema máiyainihivare ema Melqui, ema Adi.  
Ema máiyainihivare ema Adi, ema Cosam.  
Ema máiyainihivare ema Cosam, ema Elmodam.  
Ema máiyainihivare ema Elmodam, ema Er.
- 29 Ema máiyainihivare ema Er, ema Josué.  
Ema máiyainihivare ema Josué, ema Eliezer.  
Ema máiyainihivare ema Eliezer, ema Jorim.  
Ema máiyainihivare ema Jorim, ema Matat.
- 30 Ema máiyainihivare ema Matat, ema Leví.  
Ema máiyainihivare ema Leví, ema Simeón.  
Ema máiyainihivare ema Simeón, ema Judá.  
Ema máiyainihivare ema Judá, ema José.  
Ema máiyainihivare ema José, ema Jonán.  
Ema máiyainihivare ema Jonán, ema Eliaquim.
- 31 Ema máiyainihivare ema Eliaquim, ema Melea.  
Ema máiyainihivare ema Melea, ema Mainán.  
Ema máiyainihivare ema Mainán, ema Matata.  
Ema máiyainihivare ema Matata, ema Natán.
- 32 Ema máiyainihivare ema Natán, ema David.  
Ema máiyainihivare ema David, ema Isaí.  
Ema máiyainihivare ema Isaí, ema Obed.  
Ema máiyainihivare ema Obed, ema Booz.  
Ema máiyainihivare ema Booz, ema Salmón.  
Ema máiyainihivare ema Salmón, ema Naasón.
- 33 Ema máiyainihivare ema Naasón, ema Aminadab.  
Ema máiyainihivare ema Aminadab, ema Aram.  
Ema máiyainihivare ema Aram, ema Esrom.  
Ema máiyainihivare ema Esrom, ema Fares.  
Ema máiyainihivare ema Fares, ema Judá.
- 34 Ema máiyainihivare ema Judá, ema Jacob.  
Ema máiyainihivare ema Jacob, ema Isaac.  
Ema máiyainihivare ema Isaac, ema Abraham.  
Ema máiyainihivare ema Abraham, ema Taré.  
Ema máiyainihivare ema Taré, ema Nacor.
- 35 Ema máiyainihivare ema Nacor, ema Serug.  
Ema máiyainihivare ema Serug, ema Ragau.  
Ema máiyainihivare ema Ragau, ema Peleg.  
Ema máiyainihivare ema Peleg, ema Heber.  
Ema máiyainihivare ema Heber, ema Sala.
- 36 Ema máiyainihivare ema Sala, ema Cainán.

Ema máiyainihivare ema Cainán, ema Arfaxad.  
 Ema máiyainihivare ema Arfaxad, ema Sem.  
 Ema máiyainihivare ema Sem, ema Noé.  
 Ema máiyainihivare ema Noé, ema Lamec.  
<sup>37</sup> Ema máiyainihivare ema Lamec, ema Matusalén.  
 Ema máiyainihivare ema Matusalén, ema Enoc.  
 Ema máiyainihivare ema Enoc, ema Jared.  
 Ema máiyainihivare ema Jared, ema Mahalaleel.  
 Ema máiyainihivare ema Mahalaleel, ema Cainán.  
<sup>38</sup> Ema máiyainihivare ema Cainán, ema Enós.  
 Ema máiyainihivare ema Enós, ema Set.  
 Ema máiyainihivare ema Set, ema Adán.  
 Ema Adán macaepiyaquenepa me Viya.

## 4

### *Ema Váinaraji Satanás mavaraha macaitsamaraji ema Jesús (Mt 4.1-11; Mr 1.12-13)*

<sup>1</sup> Tacahe, ema Jesús, mávahácaripa ema Espíritu Santo. Tásiha, ema Espíritu Santo eta mávasamurechirahi, máimitucaipahi eta mayanirayarehi te mávapahi apaquehe. Majunijicayarehi eta cajacure Jordán. <sup>2</sup> Cuarenta sache macahehi tayehe. Tájinavare manicahini eta jena sácheanahi. Técuhasamurepa. <sup>3</sup> Tacahe, ema Váinaraji témeñahavapa mayehe. Mavarahapa macaetemayarehi. Ánipa maicha:

—¿Péculhapa píti? Tacahe, pivaneca eta juca mari táepiyacava pan, taicha píti machichavihi ema Viya, ¿masi? —máichapa.

<sup>4</sup> Ema Jesús majicapapa:

—Váhipuca pecha eta táechajiriruvahi eta Sagrada Escritura, ani tacahehi: “Vahi tácarichuimahi eta tinicacare ticaitarecayare ena achaneana. Tacachaneyarehi eta máechajiriruva ema Viya. Jéhevere, éta ticaitarecarahiyare” —macahepa.

<sup>5</sup> Tacahe, ema Váinaraji mámvarepa te táinahu eta anuquehe mari. Tíjahúchavapa máimecha tamutu eta ichapequeneana avasareana te juca apaquehe ticutirinehi tacachacayajiricacahini taicha eta máitupajijiasiravahicacha ema Váinaraji. <sup>6</sup> Tásiha, máichavarepa ema Váinaraji:

—Núti níjaracaviyare tamutu eta juca avasareana. Ichape eta napicau-chiraviyare, nacunachiraviyareva ena achaneana. Pítina náquenuvina ena távacuanahi eta avasareana. Taicha núti néchavacahi éna. Nútivare nécha mácani nuvarahaqueneyare níjaraca. <sup>7</sup> Pépuyucanumasera te numirahu pítsiucanu apaesa níjaracavisarepa tamutu —máichapa.

<sup>8</sup> Émasera ema Jesús majicapapa:

—Pévuishatataji piti Satanás te juca numirahu. Váhipuca pecha eta táechajiriruvahi eta Sagrada Escritura. Ani tacahehi: “Macarichu ema Viya vépuyumirauchaya. Macarichuvare vicaemataneacayare” tacahepa. Váhiquene táurica nucaemataneacavihini —máichapa ema Jesús.

<sup>9</sup> Tacahe, vahi máevuishahini ema Váinaraji. Mámvare te avasare Jerusalén. Máimiapanapa te táinahu eta Templo. Tásiha, máichavarepa:

—Te yátupina machichavina ema Viya, písapavayare pémirica te anuquehe. Tájina píchavaimahi eta pémirisirayare. <sup>10</sup> Pécharichuhi eta táechajiriruva eta Sagrada Escritura, ani tacahe: “Ema Viya mavanecapa ena mayeheana

ángeleana téchapajiricavianayare, énevaneyarehi tijaneacaviana. <sup>11</sup> Tiámavianayare te navahuana, apaesa vahi picucayutetu eta máriana eta te pipaisirana” tacahepa. Tásiha, németeaca tijaneacavianayare puiti, vahi náisapaimahi picajara te pémirica —máichapa ema Váinaraji.

<sup>12</sup> Tacahe ema Jesús majicapavarepa:

—Énerichuvare ani tacahe eta Sagrada Escritura: “Vahi picaitsamara-jimahi ema Viya taicha éma Piáquenu” —máichapa.

<sup>13</sup> Tacahe, tiyanapa ema Váinaraji. Majunijicapa ema Jesús taicha tímaha-vaipahi vahi máiturucahini macaetema. Mavarahahisera tichavayarehi tíapechavayarehi macaetemapana.

*Ema Jesús tépanavapa ticametarairu*

*(Mt 4.12-17; Mr 1.14-15)*

<sup>14-15</sup> Tacahe, tépanavapa ema Jesús mapaica eta avasareana tayehe eta provincia Galilea. Ichape eta máitupajijiasiravahi taicha mávahácapahi ema Espíritu Santo. Tímiturecapaipa tayehe eta náurujisirarevana te avasareana. Ichapemuri eta nacunachirahi namutu ena tisamararacanapahi. Nasamairiricavarepa ena apamuriana achaneana ticavasanahi te tachacaya eta avasareana.

*Tichavapa ema Jesús te mávasa Nazaret*

*(Mt 13.53-58; Mr 6.1-6)*

<sup>16</sup> Tásiha, tiyanavarepa te avasare Nazaret te majurusinehi. Te jena sache sávaru, tiyanapa tayehe eta náurujisirareva nayujarauchirare ena achaneana, taicha tacahehi eta mayeherepihi. Titupihapa ema Jesús, táicutiarahi eta mavarairahi téchajicureca eta Sagrada Escritura. <sup>17</sup> Náichuharsarepa eta máechajicuresiraya. Náijaracapa eta libro májurehi ema profetaini Isaías. Te mavejiacapa eta libro, matanucapa eta máechajicureyarehi. Ani tacahehi eta táechajiriruvanahi: <sup>18</sup> “Tiávahácanuhi ema Espíritu Santo. Taicha manerejirunuichuhi núti ema Viya Viáquenu eta numetasiravacayare ena páureana eta juca máemunasiravacahi éma, máimicatasirayareva. Eta tímitecanuhi nuncanaracayare ena ticatisamurevanahi. Nucaititijicayareva ena máerataruanahi ema tivayuarahi Satanás. Nucaimairiricayareva ena púchuquiana. Nucuchucuhayareva ena ticatajivanahi, níjaracaya eta náuricacarevaya. <sup>19</sup> Numetacayareva járajapainapa eta sácheyare tamutuiraya máetupirica ema Viya, tamutuina pa tíurisamurécarepa máicha” tacahehi eta Sagrada Escritura eta máechajicurehi.

<sup>20</sup> Te tamutupa eta máechajicuresirahi ema Jesús, máeratacapa eta libro. Máimichavapa mayehe ema tijanearecarahi eta líbroana. Téjacavarepa ema Jesús. Náimararacaripa ena achaneana natiarihiqueneanahi. <sup>21</sup> Tacahe, tépanavapa téchajica ema Jesús:

—Nútiripa ema táechajisihaquenehi eta juca libro. Tímitecanuhi numetacahé eta máemunasirahehi ema Viya —macahepa.

<sup>22</sup> Tacahe, náramipa namutu ena achaneana. Ánipa náichacaca:

—¡Tétavicavahi tapachinava eta máechajiriruvanahi ema maca! Émachuchasera ema machicha ema Joséini ema carpintéroini. ¿Tájahasica eta juca? —nacahepa.

<sup>23</sup> Émasera ema Jesús máichavacapa:

—Németeaca éti váhirichuhi esuapapajicanuhini. Tásiha, evaraharinepuca íchanuyare: “Te yátupina píturequeneha, pípuhavaca ena ticajumanahi te juca. Vímahaséji piápechavavare picuchuca te juca piávasaichu tacuti eta

pímereruhi te avasare Capernaum” íchanuyare. <sup>24</sup> Nutupiruvasea numetacahē: Tatuparaca eta epicauchirahaviya vimutu viti mavaneruana ema Viya. Étisea eti nujaneananahi ecavasanahi eta te juca viávasa, vahi epicauchanuhini, váhivare ejacapanuini. Ecuti ena achaneana acane eta náepuruirahi ena apamuriana profetana mavaneruanahi ema Viya. <sup>25</sup> Eta tacahe, eta máimairahi ema Viya eta náepuruiravacahi, tivanecavaca ena profetana nayana napauchayare ena apavasanana. Acane, te matiarhichaha ema profetaini Elías, mapana año y medio vahi taquivahini, tásiha, ichapevare eta ecuha. Németeaca núti camurianahi nácani ena tépenaimana israelítana. <sup>26</sup> Váhisera étainahini macavanahiyahini me Viya ema Elías eta nayehe ena majaneananahi. Ánaqui te avasare Sarepta tachacayahí eta avasare Sidón, étapa macavanahiyahí máitecapihayare suyehe esu ésunahi esena apavasana tépenaimahi. Ésupa máimicataruhi táichavenehi eta susuapajiraivahi me Viya. <sup>27</sup> Énaripa ena israelítana nacajumaqueneana eta lepra te jena sácheanahi te matiarhichaha ema profetaini Eliseo. Váhivare énainahini macanaracahini ena majaneanana. Masapihapa macanaracahi ema apavasanaquenehi ticajare Naamán, ticavasahi te Siria. Ema Naamán, tinaracaripa eta majuma, táichavenehi eta masuapajiraivahi —máichavacapa ema Jesús.

<sup>28</sup> Tacahe, eta juca máichiravacahi ema Jesús, tiseanapa ena natiarhiqueneanahi. <sup>29</sup> Tásiha téchepumurihanapa éna. Nacuchucapa ema Jesús te tachachacu eta avasare, te tachausi eta táupenaquene, navarahapa nacamiricayarehi éma. <sup>30</sup> Émasera tichavapa mánumurihapaipa éna. Tiyana, majunijicavacapa.

*Éma Jesús máimijuna ema éreana tiávahácainihi ema achane (Mr 1.21-28)*

<sup>31</sup> Tacahe, títecapapa ema Jesús tayehe eta avasare Capernaúm te Galilea. Tamutu sávaruana tiyanapa tayehe eta náurujsirareva ena achaneana, tímíturapanaya. <sup>32</sup> Ichape náramihi ena achaneana eta máimiturapianahi taicha tétavicavahi eta máitusirahi mayunapaicahi tamutu. Tétavicavahivare eta tasuapacarevahi eta máimiturapiana.

<sup>33</sup> Étana sávaru, matiarhihi te namuri ema émana achane mávaháruhi ema éreana. Tipiararecahi, ánipa macahe:

<sup>34</sup> —Núti nímativi. Pítira Sántoquenevihi. Machichaquenevihi ema Viya. Pésamiricahavipaini, piti Jesús Nazareno. Váhini picuesirujicahavini. Pivarahainapapuca picajanerepaicahaviyare —macahepa ema achane.

<sup>35</sup> Tacahe ema Jesús macajachapa ema éreana. Ánipa maicha:

—¡Pámatina! ¡Piyana pijunijica ema maca achane! —máichapa.

Tásiha, tíjahúchava tiáquipaicavapa te apaquehe ema achane. Tásiha majunijicapa ema éreana. Tájinasea máichavahini ema achane. <sup>36</sup> Náraminehi ichape namutu ena achaneana eta náimairahi. Tiyaserejiricanapa:

—¿Tájahasica tacayema eta juca? Ema maca Jesús, tétavicava eta máitupajijiásiravahi, maratahahi máquijica nácani éreanana. Tásiha, ichape eta napisirahi éma. Vahi najicapaemachahini. Tamutupa arairu eta máimiturapianahi ema maca —nacahepa.

<sup>37</sup> Enevanevarepa naecha namutu ena achaneana eta juca máichaqueaneanahi ema Jesús. Énaripa ena ticavasanahi te avasareana eta te provincia Galilea.

*Éma Jesús macanaraca esu máimase ema Pedro (Mt 8.14-15; Mr 1.29-31)*



<sup>38</sup> Te tiúchucapa ema Jesús tayehe eta náurujsirareva, tiyanapa te mapena ema Simón Pedro. Te tisiapapa, náechajiacapa ema Jesús máimaharine esu máimase ema Pedro. Ticajumahi ésu eta muraca fiebre. <sup>39</sup> Tásiha, mapauchapa ema Jesús. Máquijisinapa eta muraca fiebre. Tinaracavanepa ésu, téchepucavanepa. Suéchapajiricapa éma, énapa ena máimitureana.

*Camuriana ena macanararuanapahi ema Jesús*

*(Mt 8.16-17; Mr 1.32-34)*

<sup>40</sup> Te jena cáperehiquenehi, te téricapa eta sache, ena achaneana námavacapaipa namutu ena nacajumaqueneana eta mayehe ema Jesús. Apanapaneneji eta najumanapahi éna. Manacapaipa eta mavahu te náinahuana, macanaracapaipahi. <sup>41</sup> Maveranavare ena éreanana máquijiruanapahi te náqueheana ena nacajumaqueneana. Tipiararecanapaipa eta náuchusi-rapahi. Ánipa nacahe:

—Pítira Machichaquenevi ema Viya.

Émasera ema Jesús vaipa máisapahini náimiyanavahini napiaraca éma, taicha náimatihí éna eta émairahi ema Cristo.

*Tamutu avasareana te Galilea mapaica ema Jesús*

*(Mr 1.35-39)*

<sup>42</sup> Te apanapa sache, te tijarahipa, tiyanapa ema Jesús te mávapahi. Natanucapasera ena achaneana. Náetupiasirapa éma tayehe eta mávihahi. Navarahapa náiminasichayahini. Vaipa náisapahini mayanahini. <sup>43</sup> Émasera ema Jesús máichavacapa:

—Nutuparacasivaichuhi eta nuyanirayare tayehe eta apana avasareana taicha nuvanahirichuhi eta níchuiravacaya ena achaneana náehisiraina ema Viya apaesa macuchucuhavaca —máichavacapa.

<sup>44</sup> Tacahe, tiyanapa tipaica ticametarairupaipa te náurujsirarevana tayehe eta avasareana te Galilea.

## 5

*Tiáramicarepa eta náitusiravahi eta jima*

*(Mt 4.18-22; Mr 1.16-20)*

<sup>1</sup> Te jena sácheanahi, ema Jesús mávinehi te tachausi eta cáquiure ticaijare Galilea. Títecanapa ena camuriqueneana achaneana. Váipanecha náratavahini, tipamihejiricanapa eta navarairahi nasama eta macametarairuirahi ema Jesús eta máechajiriruvana ema Viya.

<sup>2</sup> Máimahapa ema Jesús eta apisi pacure te tachausi. Ena ticayeheana eta pacureana, tisipajiricanahi eta ichapequeneana nayutaheana. <sup>3</sup> Tacahe, ema Jesús tiávacuhapa tayehe eta mapacurehi ema Simón Pedro. Mavanecapa máevataeca apaesachicha eta pacure. Téjacapa ema Jesús eta te pacure, tépanavapa máimitucavacapa ena achaneana. <sup>4</sup> Te títapiricapa eta máimitusravacahi, máichapa ema Pedro:

—Tata, iama eta juca epacure tayehe eta táupenamaiya. Iáquijieca eta jara eyutahe —máichapa.

<sup>5</sup> Ema Pedro majicapapa:

—Maestro, tamutu yati vinajuiricahi, tájinasera vítucavahini. Tavetijipa puiti eta tajarahiraripa. Nusuapavisera eta juca pivanesiranuhi, náquijiecaya eta nuyutahe —máichapa.

<sup>6</sup> Jéhesaréinehi, te nachurucapa eta yutahe, tiyututucavaipahi eta jímana. Vaipa táratavahini ténarujicapa eta ichape yutahe taicha eta tajitacareva eta jima. <sup>7-10</sup> Natiarihisera te apana pacure ena nachamuriana: ema

Jacobo émapa ema Juan. Tacahe, návehauquichapa tímícatacanayarehi. Te títecapanapa, náinicachapa eta apisiquene pacure. Tiánehirichahavare vahi tárata vayarehini taicha eta tajitacarevahi, téricayarepaini eta pacure. Ichape eta náramesirahi namutu taicha eta náimairahi eta camuriquene jímana. Tásiha, ema Pedro máepuyumirauchapa ema Jesús. Máichapa:

—Tata, pítiyara yátupiquenévihi Viáquenuvi. Váhicha nímiuriacava nutupihamirauchavi núti. Nucapecaturarahiquenehi —máichapa.

Matiarihihi ema Jacobo émapa ema Juan, machichanaveana ema Zebedeo. Machamurianahi ema Pedro. Énerichuvare tiáramecanarinehi éna, énapa ena apamuriana natiarihiqueneanahi. Émasera ema Jesús máichapa:

—Vahi picupica, Simón. Pínajicainapa puiti eta juca pématanerepini. Núti níjaracaviya eta apana pématanerepiyare. Pitanucainapa ena achaneana nuchaneranaya —máichapa.

<sup>11</sup> Tacahe, te nachurupaicapa eta napacureana te tiájipahi, étapa nanaquisinehi. Tiyananapa náehicapa ema Jesús.

*Ema Jesús macanaraca ema émana achane leproso*

*(Mt 8.1-4; Mr 1.40-45)*

<sup>12</sup> Tacahe, eta mánuoirapaipahi ema Jesús eta avasarechicha, mácapajicapa ema émana achane macajumaquenehi eta lepra, tamutu eta máquehe. Eta máimairahi ema Jesús, máitecapauchapa. Tépuycapa te mamirahu. Máichapa:

—Tata, nucasiñavahi eta piyehe, picanaracanupaini.

<sup>13</sup> Majicapapa ema Jesús:

—Nuvaraha nuncanaracavi. Tájinapa píchiravaina puiti —máichapa.

Manacapa eta mavahu. Énevanerinehi témitiacahi eta majumainihi.

<sup>14</sup> Matuparacapasera ema Jesús. Ánipa máicha:

—Pímaha, nacuija picumetaca eta nútirahi nuncanaracavihi. Piyanavaresera pímerrecava nayehe ena tuparairucana, apaesa náimamacavi. Énainapa timetajíricanainapa eta yátupirahi pinaraca, pipachihairapa. Piyanayareva me Viya. Picamavahuyarepahi eta pihapulupayachirayare taicha eta macanarasiravihi —máichapa ema Jesús.

<sup>15</sup> Tásihasera, náechapa namutu ena achaneana te avasareana eta máitupajijiasiravahi ema Jesús. Nayanauchapaipa ena camuriqueneana achaneana, navarairahi nasamararacayarehi, macanarasiravacayarehiva tayehe eta najumana. <sup>16</sup> Émasera ema Jesús, majunijimuriahachucha. Tiyanapa tayehe eta mávapahianahi apaquehe. Ánaqui mayujarasihayarehi.

*Ema Jesús macanaraca ema émana achane macajumaquene eta mura-caquiha*

*(Mt 9.1-8; Mr 2.1-12)*

<sup>17</sup> Étana sache ema Jesús tímíturacahi te tajuhe eta peti, camuriana ena achaneana. Natiarihihivare ena fariséoana tépiyacavana religiósoana, énapa ena escribánoana, tímatiana eta nayeherepiana ena israelítana. Éna, tiásihanahi te Jerusalén, ena apamuriana tiásihanahivare te avasarechichana tayehe eta Galilea, étapa te Judea. Ema Viya máimicatacachi ema Jesús eta macanarasiravacayarepahi ena nacajumaqueneana. <sup>18</sup> Títecapanavarepa ena apamuriana, námaphi te áchuji ema achane muracaha. Navarahainipa nacasiapa te tajuhe te mávihahi ema Jesús. <sup>19</sup> Étasera eta nayututusiravahi ena achaneana, vahi náitujicavahini nasiapahini. Tímipanerechavanapasera

náimiapanapa te tamaequehe eta peti. Navetatamaequechapa eta peti te manapaicahi ema Jesús, nacajuchucupa ema macajumaquene. <sup>20</sup> Tacahe, te máimahapa ema Jesús eta nacasiñavairahi eta mayehe, máichapa ema macajumaquene:

—Tiuri, nuchicha. Eta pipecaturanahi, nucaepahainavipa.

<sup>21</sup> Ena escribánoana énapa ena fariséoana, eta napanerequenehairahi eta macayemaquenehi ema Jesús, tiseanmarinehi. Ánipa nacahe te nasamureana: “Ema maca tímijachavaipapuca Viya eta macaepahairayaréji eta pecatuaana. ¡Tétavicava eta matapírava! ¡Taicha macarichu ema Viya marataha macaepaha eta pecatuaana!” tacahehi eta napanereruana.

<sup>22</sup> Émasera ema Jesús máimatihí eta napanereruana. Máichavacapa:

—¿Tájaha tacayema téjecapavahi eta epanereruana? <sup>23</sup> Tájina táejeravaina eta níchirahi ema maca: “Nucaepahainavipa eta pipecaturanaini”. Máejera-repánapuca eta níchahini: “Péchepuca, piyana pipaica”. <sup>24</sup> Tiuri puiti, nuti Manerejirunuhi ema Viya, nímereuchavainapa eta nuratahairahi nucaepaha eta pecatu te juca apaquehe. Ímararacanu —tacahe, máichapa ema macajumaquene—. Puiti nuchicha, nuvanecavi péchepuca. Piveha eta jara piyere-ruva. Piyana te pipena —máichapa ema Jesús.

<sup>25</sup> Enevanerinehi téchepuruca ema macajumaquenéni. Mavehapa eta mayereruva. Tipaicapa te namirahu ena achaneana. Tiyanapa te mapena. Ichaperinehi eta macunachirapahi ema Viya. <sup>26</sup> Ichaperinehivare eta náramirahi namutu ena natiarihiqueneanahi. Tétavicavarinehi eta nacuna-chirahi ema Viya, napicaucharinehivare. Ánipa nacahe:

—Tétavicavapa táramicareva eta juca vímahaquenehi puiti —nacahepa.

*Ena Jesús máichuha ema Mateo, mayehyare apóstole  
(Mt 9.9-13; Mr 2.13-17)*

<sup>27</sup> Te táequenepa eta júcana, ema Jesús tiúchucapa. Eta mapaisirapahi, máimahapa ema achane ticaijare Mateo. (Ticaijarehivare Leví.) Téjacahi éma eta te macatuparahaiyahi eta macobraresirahi eta impuesto.

—Yare, péhicanu —máichapa ema Jesús.

<sup>28</sup> Enurujipa téchepucahi ema Mateo. Manaquicapa tamutu eta matuparahainihi. Tiyanapa máehicahi ema Jesús.

<sup>29</sup> Tacahe, te jena sácheanahi, tépiyarecapa eta piesta ema Mateo te mapena. Máichuhapa ema Jesús eta máenirisirayarehi, énapa ena camuriqueneana macutiqueneanahi ticobrarerecarahiana impuesto, énapa ena apamuriana máemunacasareana ema Mateo. <sup>30</sup> Natiarihihivare ena máimitureana ema Jesús. Tásiha títecapanavarepa ena fariséoana énapa ena escribánoana. Eta tímiyanavacahi, ticaecahirecanayarehi. Ánipa náichavaca ena máimitureana:

—¿Tájaha tacayema ecachanemuri eta enisirahi ena nánitatajiana ticobrarerecarahiana eta impuesto? ¡Tétavicavahi eta nacapecaturaravahi! —nacahepa.

<sup>31</sup> Émasera ema Jesús, te masamairiricapa eta náechajiririvanahi, máichavacapa:

—Ena majumareanahi vahi nácamunuimahi ema médico. <sup>32</sup> Núti, vahi étaina tímitecanu nutanupanavacayare nácani matapiravareanahi. Eta tímitecanuhi núti nutanupanavacayare ena tisipecaturanapanahi apaesa náitsivacha eta napanereruana, náeneuchavapa me Viya —máichapa ema Jesús.

*Nayaserecapa ema Jesús tayehe eta ayuna  
(Mt 9.14-17; Mr 2.18-22)*

<sup>33</sup> Tiuri, nayaserecavare ena achaneana ema Jesús:

—¿Tájahapuca tacayema vahi ayúnanainahíni ena pímitureana? Énayapasica ena máimitureana ema Juan náichahi eta muraca ayuna eta nayujarasirana. Énaripa ena fariséoana, énerichuvare. Tásiha, ena pímitureana píti tinicanahi, téranahivare —náichapa.

<sup>34</sup> Majicapapa ema Jesús:

—Nímicutichinahe puiti. Vahi táuricaímahi ayúnanainahíni icha ena íchuhaqueneanahi tinicanayare nayehe ena araimana. Tiúrisamureanayarehi taicha matiaríhihi ema arayena. Tájina táuricahini ayúnanainahíni. Téhesera te tépenapuca éma, jéhesare ticatisamurevanayare. Tacu-tiquene, vuíchaha táuricaímahi ayúnanainahíni ena nímitureana. <sup>35</sup> Járájapainapasera eta sáchezare, ticaverejicasianayare, taicha ticaratacanuanainapa ena ticapacuanayare núti. Jéhevarepa ayunanainapa. <sup>36-38</sup> Esamanuchaha. Eta juca eta nímiturapianahi, amairíha arairu. Mavaraha ema Viya arairuyare eta eyeherepianayare eti nuchanerana. Vaipa tácuticacaimahi eta nayeherépiana ena apamuriana achaneana. Eta ítusirahi éti eta nímiturapiana, tavaraha ínajica eta ichasi eyeherepiana tauriqueneanahi. <sup>39</sup> Ticajerasera eta náinajisírahi ena achaneana eta nayeherépiana tauriqueneana. Apaesachícharichu eta navarairahi naicha eta juca arairu nayeherépianayare. Namutuyaréni navaraha náimiyánava eta nayeherépiana tásihaqueneanahi eta napanereruana ena náchucanaveanaini —máichavacapa ema Jesús.

## 6

*Ena fariséoana náimipicauchahi eta nayeherépiana tayehe eta sávarumuhuana. Émasera ema Jesús máimereuchahi émarichu téchahi eta nayeherépiana ena achaneana eta sache nanarasirayare*

*(Mt 12.1-8; Mr 2.23-28)*

<sup>1</sup> Eta jena sache sávaruquenehi, tiyanapa tipaica ema Jesús. Mámamuríhapa ena máimitureana. Témehicavanapa ena fariséoana. Náetavivijicapaipahi eta isanítiana. Tacahe, eta napaisirapahi, ena máimitureana navechuquiha-paipahi étajavapahi eta trigo. Navepiraquihapaipa, tépurajacachavanapaipa. Tinicanapaipa. Tísapacareichucha eta nanisira, taicha técuhanahi. <sup>2</sup> Tacahe, eta náimararasirapahi ena fariséoana, tise-manapaipa. Ánipa naicha:

—¿Tájaha tacayema vahi epicaucha éti eta juca sache tacapicahuquenehi? Écharichuhi éti vahi tísapacarémahí eta vicaematane-rahi puiti. Eta juca evepiraquihapahi eta trigo, ticaijare ecaematanehi —náichapa.

<sup>3</sup> Tásiha, majicapavacapa ema Jesús:

—Németeaca éti vahi ecaicutiara eta tacayemaquene eta Sagrada Escritura, eta máichavaquenevahi ema víyarahaini David eta mapaisirapahi técuha-paipa, énerichuvare ena téhicanapahi. <sup>4</sup> Écharichuhi éti te masiapapa eta mapena ema Viya, tiyaseserecapa eta manicayarehi. Náijaracapa eta pan tacapicahuquenehi nanacasarehi te namirahu ema Viya. Nanicasarehi ena tiyujaracarahiana émasera ema David vahi tátuparacahini manicahini. Étasera eta máecuavahi, manicapa eta pan, énapa ena macachanequeneanapahi.

<sup>5</sup> Tiuri puiti, numetacaheyare: Nuti Manerejirunuhi ema Viya, nútirichu néchahi eta sache nanarasirayare ena achaneana —máichapa.

*Ena Jesús macanaraca ema achane tépenavahu*

*(Mt 12.9-14; Mr 3.1-6)*

<sup>6</sup> Tiuri, te apanapa sávaru, tiyanavarepa ema Jesús tayehe eta náurujisireva. Tímiturecavarepa. Tásiha, matiaríhihi ema émana achane, ticajumahi

eta mavahu váure. Vaipa tayamuricahini, tépenavahuhi. <sup>7</sup> Natiarihihivare ena escribánoana, énapa ena fariséoana. Náimaharipahi ema Jesús te macanaracayahipuca ema macajumaquene eta jena sache tacapichahuquenehi. Natanunuiricahi eta tiviuchayarehi éma. <sup>8</sup> Émasera ema Jesús máimatihí eta napanereruana éna. Tacahe, máechajicapa ema achane ticajumavahuhi. Máichapa:

—Yare, pitupihayare ani te namirahu ena achaneana —máichapa.

Tásiha, titupihapa ema achane te namirahu. <sup>9</sup> Tásiha, máichavacapa ema Jesús:

—Nuvaraha epanerechaya. Puiti juca sache sávarumuhuhi, táuricahi víchaya eta táuriqueneana, ¿masi? Táuricahi vípuchayare ena nacajumaqueneanahi, ¿masi? ¿Ímijachapuca tiúriyare eta víchirayare eta tamauriqueneana, vicaparecapuca ena achaneana? ¿Tájahasica eta epanerechahi? —máichavacapa.

<sup>10</sup> Tacahe, ema Jesús máesenimurihapa ena achaneana. Tásiha, máichapa ema achane macajumaquene:

—Nímaha, picajaruvauchava pímereca eta pivahu —máichapa.

Eta máimeresirahi eta mavahu ema achane, enevanepa tinaravauchavanepa. <sup>11</sup> Tacahe, tisemanarinehi ena fariséoana eta náimairahi. Tásiha, tiyaserejiricanapa:

—¿Tájahapuca vícharacaini ema mácatataji eta táimicaviúchaini? —nacahepa.

*Ena Jesús manerejica ena dócequeneana apóstoleanayarehi  
(Mt 10.1-4; Mr 3.13-19)*

<sup>12</sup> Te jena sácheanahi, tiyanapa ema Jesús tayehe eta tápusi eta márijuecu. Tamutu eta jena yati tiyujaracahi me Viya. <sup>13</sup> Te tijarahipa, máichuhavacapa namutu ena máimitureana. Manerejicapa ena dócequeneana mayeheanayarehi apóstole. <sup>14-16</sup> Ena nani ena manerejiruanahi: ema Pedro (éma ticaijarevare Simón), émapa ema maparapeichuhi ticaijare Andrés; émapa ema Jacobo\* émapa ema maparape Juan; émapa ema Felipe; émapa ema Bartolomé; émapa ema Mateo; émapa ema Tomás; émapa ema apana Jacobo; émapa ema apanavare Simón; émapa ema Judas; émapa ema Júlasí Iscariote (ema tíjararecahi ema Jesús).

*Ena Jesús máimitucavaca ena camuriqueneana achaneana  
(Mt 4.23-25)*

<sup>17</sup> Tacahe, tichavapa ema Jesús, énapa ena máimitureana. Te tachachacu eta mari táinunapahinepa, émapa nacainunainehi ena camuriqueneana achaneana. Ena nani tiásihanahi eta te avasare Jerusalén, eta te provincia Judea, émapa eta provincia Siria. Eta tímitecanahi éna, navarahahi nasama ema Jesús eta máimiturapiana, navarahavare macanaracavacahini tayehe eta najumana. <sup>18</sup> Ena ticatajivanahi návaháruanahi ena éreanana, macanaracavacapasera ema Jesús. <sup>19</sup> Namutu ena achaneana navarahahi náemamahaca ema Jesús taicha náechahi tinaracanayarehi eta najumana eta náemamahasirayare taicha títipajjiacavahi éma.

\* **6:14-16** Ema apana Jacobo machichahi ema Alfeo. Ema apana Simón, tímaticarehi éma, náumurivainihí ena revolucionárioana ticaijareanahi “cananístana”. Navaraha náquijica ena extranjeroana romanoana, énaripa nacapaquerecavacahi ena israelítana. Eta májuchirahi ema Lucas, ani macahehi: “...ema Judas mayehe ema Jacobo...”. Váipasera vecha te machichahipuca ema Jacobo, téhevare maparapehipuca. Véchahisera eta mapapirahi eta májare ema Judas. Ticaijarehi Lebeo émapa eta Tadeo. (Te pivaraha pécha, pitanuca te Mateo 10.3 émapa te Marcos 3.16-19.)



*Emá Jesús máimitucahi nayehe ena ticunachacareanahi me Viya  
(Mt 5.1-12)*

<sup>20</sup> Tacahe, máesenimurihapa emá Jesús ena máimitureana. Máichavacapa:

—Éti ímatihi eta tacamunuqueneanahi eta iáchanevana, tétavicavahi eta iúricacarevayarehi taicha máejerare eta ejacapirayare eta máechajiriruva emá Viya, machanerahérayarehi. <sup>21</sup> Eti ejamurachahi puiti eta itaresirahi eta matapiravarecare te mamirahu emá Viya, tétavicavahi eta iúricacarevayarehi taicha t́jaracaheyare éma eta evarahaquenehi.

Eti íyauchavanahi puiti taicha eta epecaturana, tétavicavahi eta iúricacarevayarehi. Títecapainapa eta evapinavairaya, écavainapa, taicha eperdonachacareya me Viya.

<sup>22-23</sup> Eti nuchaneranahi, járajapainapa eta sache ticatianacaheanainapa ena achaneana, navarahainapa tiáquijicaheana. Tipanararachaheanainapa. Nacatianapicainapa eta íjareana. Eta juca náichiraheyarehi, táichavenehi eta éhisiranuhi nuti Manerejirunuhi emá Viya. Váhisera ecuarami eta juca. Ene nacahehi eta nacatajivairahi ena profetanaini. Te ticatianacaheanahi, ¡ecurismurechavachucha, evapinavavare! ¡Tétavicava eta iúricacarevaya taicha ejacapainapa eta ícuchirichuhi te anuma!

*Emá Jesús máimitucahi nayehe ena tavayuaruanahi eta tájiparacana*

<sup>24</sup> Tacahe, emá Jesús máechajicapa ena apamuriana achaneana, tímicutijiricavahi natiarihihi te mamirahu, tiyerehianahisera éna. Ánipa máicha:

—Eti evapinavapa eta ecaimahaquenerahi, páurehesamiyare éti. Tíchechuhainapa eta evapinairavainihi.

<sup>25</sup> Páurehesami eti esatuheherecanahi, taicha ichapenapa eta écuhairaya.

Páurehesami eti ecasamureana eta piesta, écarairicavahi, taicha ichapeyare íyairaya, ecatisamurevainapa.

<sup>26</sup> Páurehesami eti namunaneanahi ena achaneana. Eta tacahehi eta nacunachiravacahi ena profetana tépiyacavanahi tímijachavana mavanaranahi emá Viya, tivayuarahianahisera.

*Vémunacayare ena ticatianacahaviana  
(Mt 5.38-48; 7.12)*

<sup>27</sup> Puítiripa eti esamanuanahi, numetacahe: Émunacayare ena ticatianacaheana. Ímereca eta iúriya nayehe ena ticaticahaheanahi. <sup>28</sup> Eyaseaca emá Viya eta nayujarahuina nácani téchajicanahi eyehe. Eyujaraucha ena tiúmehaheanahi. <sup>29</sup> Te máehahepuca mácani achane te emira, vahi ecujicapa. Íjaracasera eta étachacaya eta emira. Te naverejicahepuca eta esacu, ísapayare. Te naverejicahevare eta ecámisa, énerichuvare ísapayare. <sup>30</sup> Énaripa nácani tiyaseacaheanahi eta ecajirayare, íjaracaya. Te naverejicahepuca eta ímahaqueneana, vahi ecucamesa eta náimichaviraina. <sup>31</sup> Numetacahe eta apana: Te evaraha eta náuriraya ena achaneana eta eyehe, tituparacahe iúriyare éti eta nayehe.

<sup>32</sup> Éti, tájina ecunachacarevaimahi eta me Viya, te nacarichuhi émunaca nácani témunacaheanahi éti. Apanasica témunarahiana ena máimatirahanahi emá Viya. <sup>33</sup> Tacutiquene, tájinavare ecunachacarevaimahi me Viya, te tacarichuhi icha eta táuriqueneana nayehe ena tiúrianahi eyehe. Apanasica títsirijicavanahi ena máimatirahanahi emá Viya. Tituparacahe ecachuricavacayare eta iúriya. <sup>34</sup> Téhevare nacarichupuca íjaraca nácani títsirijicavanahi te ticapucaheana, tájinavare tacunachacarevaina eta me Viya. Apanasica ena máimatirahanahi emá Viya t́jaracana ena títsirijicavanahi te ticapurecana.

<sup>35</sup> Étiserá émunacayare ena ticatianacaheana. Íchayareva eta táuriqueneana

nayehe namutu. Íjaracavare nácani ticapucaheana. Vahi ecucuchapa eta náitsirijirápiyare. Máimaharine ema Viya. Éma tíjaracaheyare eta táitsivayarehi eta iúriivanahi. Eta tacahehi eta ímereuchirava eta machichaheira ema Tata Vicaiyaquene. Taicha éma, tétavicavahi eta máuriva nayehe namutu ena váinarajiqueneana énaripa ena máechavarahanahi eta máemunasiravacahi éna. <sup>36</sup> EJapanurahiyareva, ecutiyare eta majapanuirahavihi ema Tata Vicaiyaquene.

*Éma Jesús tímitucavahi eta vahi vicucune eta nájecapiravana ena apamuriana achaneana; vítinasera vicuneuchava (Mt 7.1-5)*

<sup>37</sup> Vahi ecunemahi eta nájecapiravana ena apamuriana achaneana, váhivare ecucaecahivaca, machu étina táimicuñacahe me Viya. Te máejecapavapuca mácani achane, vahi ecubaraha macaicuñavane, apaesa vahi macuicuñacahe éti ema Viya. Eperdonacha ena téjecapavana eyehe apaesa maperdonachahe ema Viya. <sup>38</sup> Ecajirahiya nayehe ena achaneana. Éma Viya títsirijicavayare eyehe. Tímepanávainapa eta máíjararuheyare éma. Te iúrihi éti nayehe ena achaneana, ema Viya, tétavicavayarehi eta máurivaya eta eyehe éti.

<sup>39</sup> Tacahe ema Jesús, ánipa tacahe eta máimiturapi, máimicutichirahi:

—Váiparinehi tichurucacanaimahi ena apinana púchuquiana, taicha tiáquipaicavanayarehi te pusu. <sup>40</sup> Émaripa mácani amaperu te escuelahipuca, váiparinehi macachuricaímahi mácani mayehe maestro. Tapaenumava te máitucapa, macutisarepa ema mayehe maestro.

<sup>41</sup> Vahi táurica eta ecunerahi eta ánichichaqueneana nájecapiravana ena apamuriana achaneana. Tituparacahe ecuneuchava eta táichapeva eta éjecapirava étijiva. <sup>42</sup> Vahi tituparacahemahi étupirica eta jácani ánichichaquenehi májecapiravahi ema eparaepiya. Tájina eviyahini eta econsejarapínahini. Ichapesera eta tatuparasirahehi étupirica eta éjecapiravanahi éti. Tapaenumava eta étupirisirapa eta íchavaquenévanihi, táuricapaini econsejacha ema eparaepiya tayehe eta máichavaquenévahi.

*Éma Jesús máimicuticha nayehe ena achaneana eta tacahirahi eta yucuquiana (Mt 7.17-20; 12.34-35)*

<sup>43</sup> Tacutiquene tímaticarehivare eta táhiana eta yucuquiana. Jararihi eta tinicacareana. Jararihivare eta vahi tánicacare. <sup>44</sup> Énerichuvare eta yucuqui tímaticarehi eta táurinivare eta táhi. Étaripa eta sitavere, váiparinehi tiúchucaímahi eta táhihini narasahinahipucaini. Tásiha, eta ijicaqui váiparinehivare tacahimahi eta tahi cachicheruhinahini. <sup>45</sup> Ene nacahe nácani tiúriana achaneana tatupiruvahi eta náechajirisirava taicha tiúrihi eta nasamure. Nácanisera achaneana váinarajipanereruana, vahi tiúrimahi eta náechajirisirava. Tíñemahipivacahi taicha eta tavayuchahi eta tavainarajiva eta nasamure.

*Éma Jesús máimicuticha ena tisuapajirahiana énapa ena masuapajirairahana (Mt 7.24-27)*

<sup>46</sup> ¿Tájaha tacayema eta échajicanu éti, “Tata náquenu” ecahepa; tásiha vahi esuapahini eta nuvanairipiana?

<sup>47</sup> Nácani tisuapanuanahi náitauchahivare eta nuvanairipianahi, téchemarahianahi táicha. Nuvaraha nímicutichinahe éna. <sup>48</sup> Nacutiyarehi mácani títuca ticatupiareca peti, manacayarehi eta túmeana yucuqui emuruquiana. Tiúpenavacahi máicha eta masucuqueruana. Jéhesare te járajapapa eta muraca

técaticava, tiámaquiha eta tiquiva, tisiama eta une, váipasera tacaeyacahini eta peti, taicha máetupiricahi eta máepiyasirahi. <sup>49</sup> Nararihivare ena tépiyacavana tisuapanuana, váhisera náitauchahini eta nuvanairipiana. Éna nacutihi ema máitucaraha tépiyareca peti. Vahi manacaimahi eta túmeana yucuqui, váhivare táusiapirahini máicha. Te járajapapa eta muraca técaticava, tiamavarepa eta une, tacajimuyapaicapa eta apaquehe. Tíjahúchavapa tiáquipaicava eta peti, témitiequenepa tamutu —máichavacapa ema Jesús.

## 7

### *Éma Jesús macanaraca ema mamusura ema capitán romano*

*(Mt 8.5-13)*

<sup>1</sup> Tiuri, te títapiricapa ema Jesús eta máimitusiravacahi ena achaneana, tichavapa eta te avasare Capernaúm. <sup>2</sup> Matiarihahi ema achane apavasana. Comandante éma nayehe ena suntaruana romanoana. Capitán eta mávacure. Ticajumahi ema mamusura. Tiánehiripahi tépena. Ichaperinehi eta máeñamiravahi taicha máemunaruquenehi ema mamusurahi. <sup>3</sup> Tacahe, te masamairicapa ema capitán eta matiarahirahi ema Jesús, máevatacavacapa ena náiyamurianahi ena israelítana náichuhapanayarehi ema Jesús, macanarasinapanahini ema mamusura. <sup>4-5</sup> Tacahe, te náitecapauchapa ema Jesús ena vanairucanahi, nayaseacapa, ánipa naicha:

—Mararihi ema capitán te viávasahi. Ichapemuri eta máimicatasirahavihi. Máemepiyarecavare eta ichape peti eta viúrujisirareva eta viyujarasirarehi. Tásiha puiti, tivanecahavihi víchuhapanávi picatajicahini picanarasinapanahini ema mamusura. Tatuparacahi pímicatacaini ema maena —náichapa.

<sup>6</sup> Tacahe, ema Jesús tísapavapa tiyana, máehicavacapa éna. Étasera te tiánehianapa eta mapena, mavanecavacapa ema capitán ena máimaticasareana, nametapana ema Jesús. Ánipa naicha:

—Tata Jesús, eta juca máechajiriruvahi ema capitán: “Tata, vahi picucaéñamacava eta pítesiraina eta nuyehe, taicha vahi táuricahini pisiapauchanusa-mihini te nupena. <sup>7-8</sup> Eta tacahe, vahi nupatsicavahini nútijacarúvainahini níchuhapanávi. Németeaca tarataharichu picavanairipi eta picanarasiraya ema numusura. Taicha núti nusuapahi te tivanecanuana ena anuquehepananahi eta nuyehe. Nútiripa nusuapacarehivare nayehe ena nusuntaruranahi. Te nuvanecavaca, téhevare níchuhavacapuca, tisuapanuanahi. Te nuvanecapuca ema nuvaneru, enurujipa tisuapanuvane” macahepa.

<sup>9</sup> Te masamapa ema Jesús eta juca, ichaperinehi márami eta yátupirahi macasiñavairahi eta mayehe. Máichavacapa ena téhicanapahi:

—Numetacahe: Nájina nímaha émanaina vijaneana israelíta mácutini ema maca achane apavasana eta macasiñavairahi eta nuyehe —máichavacapa.

<sup>10</sup> Tacahe, nacarinepa tichavanahi ena vanairucana. Te títecapanapa, náimarinehi ema macajumaquenehini, tinaracaripa.

### *Éma Jesús macaechepuca ema amaperu máepenaquenehi, suchicha esu esena suépenaimaquene*

<sup>11</sup> Te táequenepa eta juca, tiyanavarepa ema Jesús tayehe eta avasare ticaijare Naín. Náehicapahivare ena máimitureana, énapa ena camuriqueneana achaneana. <sup>12</sup> Te títecapanayarepa te avasare nácapajicavacapa ena achaneana tiámanapahi ema máepenaquene, náecarayarehi. Camuriana-pahivare ena achaneana téhicanapahi. Éma máepenaquenehi, macarichuhi

suchichahi esu esena suépenaimaquenehi. <sup>13</sup> Eta máimairahi ema Viáquenu, majapanurinehi esu esena. Tásiha, máichapa:

—Vahi picuiyaha —macahepa.

<sup>14</sup> Tásiha, mapauchapa ena tiámanapahi ema máepenaquene. Titupihanapa éna. Máemamahicapa eta macajone. Tásiha, macahepa:

—Nuchicha, núti nuvanecavi, péchepuca —macahepa.

<sup>15</sup> Enevanerinehi téchepucapa ema amaperu máepenaquenénihi. Téchajicapa ema amaperu. Tásiha, ema Jesús máijaracapa esu maena. <sup>16</sup> Tacahe, ichaperinehi tiáramicarehi eta juca nayehe ena camuriqueneana achaneana. Ánipa nacahe:

—Tétávicava eta macunachacareva ema Viya. Jéhevare ema maca achane yátupiquene profeta, mavaneruhi ema Viya. Tétávicavapa táurisamurecareva eta máuchusirahi te vimuri —nacahepa.

Ena apamuriana ánivare nacahe:

—Ema Viya tiúcupauchahavihi tímicitapanahávihi viti machaneranahi —nacahepa.

<sup>17</sup> Eta juca máichaquenehi ema Jesús, téchacarevanepa tamutu avasareana te návasanahi ena israelítana. Títecavarepa te táyerehiqueneana avasareana.

*Ena Juan Tícachasiricarahi mavanecavacapa ena máimitureana  
(Mt 11.2-19)*

<sup>18</sup> Énerichuvare ema Juan, te mávihahi te cárcel, masamairiricapa eta juca taicha nametacapa ena máimitureana. <sup>19</sup> Tacahe, máevatacapa ena apinana, nayaserepanayarehi ema Jesús te yátupihipuca émaripahi ema Cristo ema macuchapaquenehi. <sup>20</sup> Tacahe, ena vanairucanahi me Juan náitecapauchapa ema Jesús. Nayaserecapa, ánipa náichahi:

—Ema viáquenu Juan tivanecahavihi viyaserepanaviyare te yátupihipuca pítiripahipuca Cristo ema vicuchapaquenehi. ¿Téheserapuca vímiyanavayarepuca vicuchapa? —náichapa.

<sup>21</sup> Eta náitecapauchirahi ema Jesús, éma ticanararerecaichahahi ena nacajumaqueneana, énapa ena nacajaraqueneana. Máquijicavare ena éreanana tiávahácanahi nácani achaneana. Macaimairiricavare ena maveraqueneana púchuquiána. <sup>22</sup> Tacahe, ema Jesús majicapavacapa ena vanairucanahi me Juan. Máichavacapa:

—Nuvaraha ímararacaya eta níchaqueneana puiti. Nucaimairiricavacaipa ena púchuquiána. Nímipaisiraipa ena masariana. Nucanaracavacaipa ena leprósoana, énapa ena túhuquiñana. Nucaechepusiravacaipavare ena náepenaqueneanaini. Énerichuvare níchuhahi ena páureana náeneuchava apaesa náuchucuha. Tásiha, eyana emetaca ema Juan tamutu eta níchaqueneanahi.

<sup>23</sup> Vaipa macueñamava ema Juan eta nuyehe. Tétavivavapa eta máuricacarevahi éma, te ticasíñavahi eta nuyehe —máichavacapa ema Jesús.

<sup>24</sup> Tacahe, tichavanapa ena vanairucanahi me Juan. Tásiha, tépanavavarepa téchajica ema Jesús, máechajisihapa ema Juan. Ánipa macahe eta mametasiravacahi ena achaneana:

—Nuvaraha epanereuchayare ema Juan. Te jácani vuíchaha nacaratacaini éma, te eyanapa te mávapahi apaquehe te mávihahi, ¿tájaha eta epanereruana tayehe eta macametairuirahi? Éti ímijachavaipapuca mamapachichijiririvaichucha eta máechajisirahi tacutihi te vímararaca eta taflurena eta acutena te tacayamuririjicahi eta técativava. <sup>25</sup> Ímijachaipavarepuca tavayuaruhi ema tiúrinanácavayarehi eta macamuirihairahi. Écharichuhi éti mácani tiúrinanacavahi, píncanillahi eta máitairesira, váiparinehi tiúchucaimahi te sache, váhivare

tiyanaimahi te mávapahiana apaquehe. Manasiqueneyarehi te jácani tiúrina peti. <sup>26</sup> Nuyaserecahe: ¿Nájahapuca ímijachahi éma? ¿Ímatihipuca eta profetairahi éma? Núti numetacahe: Matupiruvahi eta macametarairuirahi ema Juan. Mavaneruhi ema Viya eta yátupiquenehi profetahi éma. Nájina mácutihini ena apamuriana profetana. <sup>27</sup> Ema maca Juan émara máechajisihaquenehi ema Viya eta te Sagrada Escritura, ánipa macahehi: “Nuvane-cayare ema tñapumírauchaviyarepahi ema ticametarairuyarepahi, apaesa natsecavapaipa ena achaneana eta najacapiraviyare” tacahepa eta Sagrada Escritura. <sup>28</sup> Núti nutupiruva numetacahe: Ema maca Juan, nájina mácuti nayehe ena achaneana. Tétavicava eta macunachacarevahi. Iápajupana-vahisera eta ecunachacarevahi eti nuchaneranahi, apaesachicharipa eta ecaicutiarairahi eta mapanereruanahi ema Tata. <sup>29</sup> Ena achaneana, énaripa ena tisipecaturarahianaini, náimatiacahi ema Juan eta mavanecasivahi me Viya. Nasuapahivare eta mametarairuana ema Juan. Eta tacahe, ticaicachasianapa mayehe. <sup>30</sup> Énaserá ena fariséoana énapa ena máestroana, éna máisapavarahanahi nacaicachasihini mayehe ema Juan. Témpururecavanaripa eta náurivayarehini maicha ema Viya.

<sup>31-32</sup> Etiarihihi eti achaneana puiti juca sácheana, eta emasuapajiraivahi, nímicutihinahesa ena amaperuana tiútseruanahi. Apapipijichucha eta nacayemaqueneanapahi. Ema apana macahepauca: “Vépiyacapa eta piéstachicha”. Énaserá ena apamuriana vahi náisapavahini. Tásiha, ema apana macahepuca: “Vépiyacapa eta ecari”. Váhivaresera náisapavahini. <sup>33</sup> Ema Juan Tícachasiricarahi, te tímerecavapa, muraca eta máimiturapianahi. Eta manicasareana, vahi tácutihini eta nanicasareana ena achaneana. Nararihisera te emuri ena tépiyaequenehanahi éma. Náimijachahi mávaháruhi ema éreana. <sup>34</sup> Núti Manerejirunuhi ema Viya, eta nítecapauchirahepa, nucachaneheripa eti achaneana eta enisirahi. Etiarihihivaresera eti épiyaequenehanuhi: “Ímaha ema maca, cánisiuquitataji, cávahárasí. Macachanevacapaipa ena cóbrarecarahianatataji énapa ena apamuriana nasipeaturarahiqueneanahi”. <sup>35</sup> Éti épiyacavapa épururahi, ticutirinehi yátupinahini échemarahihini. Tétavicavahisera eta éjecapiravahi taicha eta emasuapajiraivahi. Te yátupihipucaini échemarahihini, ímatinuhini eta nucavanahirahi eta me Tata\*.

*Ema Jesús ticaichuhacasihi te mapena ema fariseo ticaijarehivare Simón*

<sup>36</sup> Matiarhihi ema achane ticaijarehi Simón, fariséohi éma. Macumpirachapa ema Jesús, manipana te mapena. Masuapahisera ema Jesús. Tiyanapa. Te tiúripa eta tinicacare, téjacapa te mesa. <sup>37</sup> Susamairiricapa esu ésuna esena tisipecaturarahinihi eta matiarhirahi ema Jesús te mapena ema fariseo. Tásiha, tiyanapa supauchahi ema Jesús. Suámapaipa eta bótechicha. Tínicapahi eta tájiyequene perfume tasivachaquenehi. <sup>38</sup> Tépuycapa te máivapeana ema Jesús. Tíyahacavapa, táetsipapapevachapa eta sutsera. Suájahapa te suchutimaca. Tásiha, suépusapevachavare eta suámaquenepahi perfume, sutsiucapevachavare. <sup>39</sup> Tacahe, eta máimairahi ema fariseo eta juca, mapanerequenehapa. Téchajicapa te masamure: “Te yátupinahini profetainahini ema maca, máimatiacaripahini esu suca esena eta susipeaturaraivatatajihi. Vahi táuricahini suémamacahini” macahesamurepa. <sup>40</sup> Émasera ema Jesús masamahi eta mapanereruhi ema fariseo. Máichapa:

\* **7:35** Eta juca mayeherepi proverbio ema Jesús te máechajiriruva, ani tacahe: “Eta téchemarahicare, éta nacunachihayare namutu ena tachichanaveana”. Tatiarihi eta tacayemaquenehi tayumurevahi.



—Simón, jucarihi nuvaraha numetacaviya.

Ema fariseo majicapapa:

—Nímahaseji, pimetacanu, maestro —máichapa.

<sup>41</sup> Tacahe, ema Jesús máimicutiarachinapa, máichapa:

—Natiarihi ena apinana ajairana ticanteveanahi mayehe ema rico. Ema émana ticantevehi quiniento; ema apana ticantevehi cincuenta. <sup>42</sup> Tacahe, vahi náratahahini navachachahini eta nanteveana. Tásiha, maperdonachavacapa ema rico ena apinana. Tiuri puiti, nuyaserecaviyare. Ena nani apinana, ¿nájahapuca ema témunacapanahi ema rico? —máichapa.

<sup>43</sup> Majicapapa ema Simón:

—Ticutimahi ema tisintevapanahi.

Tacahe, máichapa ema Jesús:

—Pímahaipajira.

<sup>44</sup> Tacahe, ema Jesús máimararacaripahi esu esena. Tásiha, máichapa:

—Pipanereaca esu suca esena. Puítihi, te nusiapapa te pipena, vahi pímisipacahini eta nívape. Ésusera esu suca esena tisipapevachanuhi te sutsera, tiájapevachanupa te suchutimaca. <sup>45</sup> Píti vahi pitsiucanuhini eta pijacapiranuhi. Ésusera, ichapemurihi eta sutsiucapevachiranuhi. <sup>46</sup> Váhivare piámasichanuhini eta aceite eta pijacapiranuhi. Ésusera esu suca esena tisipapevachanuhi eta te táijiyequene perfume. <sup>47</sup> Yátupi tisipecaturainihi esu suca. Numetacaviyaresera, nuperdonacharipahi ésu tamutu eta supecaturanaini. Eta tacahe, ichape eta suímeresirahí eta yátupirahi eta suémunasi-ranuhi. Nácanisera apaesarichuhi eta napecaturanaini, apaesarichuhivare eta náemunaraiva, taicha apaesarichuhivare eta najacapirahi eta nayehe perdón.

<sup>48</sup> Tacahe, ema Jesús máichapa esu esena:

—Vahi picueñamava, nuperdonacharipa tamutu eta pipecaturanainihi.

<sup>49</sup> Tacahe, ena natiarihiqueneanahi chimaracanahi náejaruanahi te mesa nacahepa te nasamureana: “¿Nájahapuca ema maca ticaemuñavahi marataha maperdonacha eta pecatua?” —nacahepa.

<sup>50</sup> Émasera ema Jesús máichapa esu esena:

—Táuricapa piyana. Yátupi eta piúchucuhairaya táichavenehi eta picasiñairanuhi.

## 8

*Natiarihihivare ena esenana títátianapahi ema Jesús te mapaisihapahi tayehe eta avasareana*

<sup>1</sup> Te táequenepa eta juca, tiyanavarepa ema Jesús, tipaichi tayehe eta tasimutuqueneana avasarechichana. Ticametarairupahi eta máechajiriruva ema Viya eta náuchucuirayare ena ticasíñavanahi mayehe, machaneranyarehi. Náehicapahivare ena dócequeneana apóstoleana. <sup>2</sup> Énerichuvare náehicapahi ena esenana máepachiaruanahi nayehe ena éreanana tiávahácanainihi. Sutiarihipahi esu María Magdalena, máepachiaruhi nayehe ena siétequeneana éreanana tiávahácanainihi ésu. Natiarihihivare ena apamuriana esenana macanararuanahi tayehe eta apanapanenejiqueneanahi najumainihi. <sup>3</sup> Sutiarihipahi esu Susana, ésupa esu Juana, mayena ema Chuza. (Ema Chuza, mayehehi empleado ema Herodes, téchahi tamutu eta máimahaqueneana ema Herodes.) Maveranahivare ena apamuriana esenana, tiámauchavanapahi eta nirure, náitátirapahi ema Jesús, énapa ena apóstoleana.

*Eta máimicutichaquenehi evaraqui tacaevaquenehi te apanapaneneji máteji te apaquehe*

*(Mt 13.1-9; Mr 4.1-3)*

<sup>4</sup> Te jena sácheanahi, camuriana ena achaneana tiyananapaipa napaucha ema Jesús. Tiásihanapahi te avasareana. Te máimahapa éma ena camuriqueneana, máechajicavacapa; máimicutiarachinapa eta máimitusiravacahi. Ánipa máicha:

<sup>5</sup> —Matiarihi ema émana achane. Tévapanahi te máesane. Tásihasera, eta mapaisirapahi témiricapaipapuca eta evaraqui te achene. Eta nanucuiraparacahi ena achaneana, nácatayacapaipa eta evaraqui táemiriruanapahi. Táimahapa eta cáyure, tanicapa. <sup>6</sup> Tásiha, eta apana evaraqui témiricapa te máripahi apaquehe. Tímarucainipa, tásihasera tájijicapa eta sache taicha muracapahihi eta apaquehe. <sup>7</sup> Eta apana evaraqui témiricapa te taparereji eta itapequiji. Tiúrinainihi eta táimarusira, étasera eta itape tacachuricapa eta tajurusirahi, táemuriachapa. <sup>8</sup> Eta apana evaraqui témiricapa te tiúrina máteji. Tijurucarahihi eta táimarusira. Tiúrinahivare eta tahi. Táijaracahi ichapemuri eta tahi —macahepa.

Te titapiricapa ema Jesús eta máechajirisiravacahi, máichavacapa:

—Te evarahapuca ecaicutiara, tavaraha eta epanerechinavaya —macahepa.

*Ema Jesús máitametacavaca ena máimitureana eta juca máimiturapihi*  
*(Mt 13.10-23; Mr 4.10-20)*

<sup>9</sup> Tacahe, ena máimitureana nayaserecapa ema Jesús tájahapuca tacayemahi eta máimicutichaquenehi mayehe ema tévacarahi. <sup>10</sup> Émasera máichavacapa:

—Ema Tata tituparacanu nítametacaheyare éti eta juca mapanereruana táequenereruana. Mavarahahi ímatiequenehaya éti. Énasera ena apamuriana achaneana nímicutiarachinavacahi, apaesa vahi máejerarémahi eta nacaicutiarairaya eta nasamaquenehi. Tavaraha napanerechinavaya. Te vahi yátupina eta navaraira nasuapa, váhivare nacaicutiaraimahi eta nímiturapiana.

<sup>11</sup> Étara eta juca tacayemaquenehi: Eta evaraqui tímicutijiricavahi eta máechajiriruva ema Viya eta nímiturapianahi. <sup>12</sup> Natiarihi ena achaneana nasamaripahinéni eta nímiturapianahi, émasera ema Váinaraji vahi máisapahini tánasihini te nasamureana. Enevanehi macamitisicavaca eta nasamaquenehi, mamavarairahi nacasiñanuhini apaesa nucuchucuhavacayarehini. Éna, nacutihi eta máteji muracapahi te achene. <sup>13</sup> Natiarihivare ena apamuriana achaneana, nacutihi eta máteji máripahi. Te nasamararaca eta nímiturapiana, nasuapa, tiúrisamureanarinehi. Váhisera naratahahini nacaravahuhini yátupinahíni. Vahi nácutihíni eta evaraqui tiúparehi. Ánipirichu eta náehisirahi. Tínejicavanávane taicha eta náimairavahi eta nacatajivairahi. <sup>14</sup> Natiarihivare ena apamuriana achaneana nacuti eta máteji te távihahi eta itapequiji. Énerichuvare nasamararacahinéni eta nímiturapiana. Napaneréquenehahinéni, tahapapiricavacahisera eta jácani táicharacavayare eta náitaresira. Váhivare náinajicahíni eta tacañamarasiravaca eta tájiparacana, étapa eta navarairahi tirricochavana. Váhivare náinajicahini eta náichirahi eta tauriqueneana. Tamutu eta juca táemetavicahi eta navarairahi téhicanuana. Tamapurujihíni eta najacahirahi eta nímiturapiana. Tájina vahi nacaemataneacahini ema Viya. <sup>15</sup> Natiarihisera ena apamuriana achaneana nacutihi eta tiúrina máteji. Éna, nasamararacahi eta nímiturapiana, náunacahi yátupi te

nasamureana. Tájnavare náichiravainahíni eta náehisiranuhi. Ichape eta nacaemataneasirahi ema Viya. Vahi nayacujimahi.

*Ena Jesús máimicutiarachava eta lámpara eta máimituresira  
(Mr 4.21-25)*

<sup>16</sup> Ánivare macahe:

—Súnsuanahi nácani tiyustacanahi eta lámpara namicahuyarehi, tásihasera, najihapaicapapucaini, nanacavarepucaini te tápecu eta náetsatsame náimasirare. Vahi tamicauchaimahi. Tacamunuhi nanacayarehi te anuquehe. Jéhesare ticaecherasareyarepa tamutu apaesa nácani tisiapanapahi, tímairicanayarepahi. <sup>17</sup> Tayanapanepuca ticayumuruquianahi, tamutuyarehisera ticaechera jácani tayumururevanahi. Tájina tépacuchaimahi jácani najajairairuvanahi. Tamutuyarehi téchacareya.

<sup>18</sup> Eta tacahe, ecaquiñaicha yátupina eta juca. Taicha mácani máitururuequenehahi yátupi, tiápajucavayarehi eta máitupajijiasiravayarehi. Mácanisera apaesarichuhi eta máitucaquene, te váipa mapanerequenehahini, máemitisi-cayarehi eta máitucaquenénihi.

*Suítecapauchapa esu maena ema Jesús énapa ena maparapenaveana  
(Mt 12.46-50; Mr 3.31-35)*

<sup>19</sup> Tacahe, esu maena ema Jesús énapa ena maparapenaveana títecapanapa te peti te máimituresihahi ema Jesús. Váhisera náitujicavahini nasiapahini taicha tiyututucavanahi ena achaneana. <sup>20</sup> Nametacapasera ena apamuriana achaneana ema Jesús:

—Esu pémunaruquenehi pena énapa ena piparapenaveana nararihi ani te aneca, navarahahi téchajicaviana —náichapa.

<sup>21</sup> Émasera majicapavacapa:

—Yátupi némunacavacahi esu meme énapa ena nuparapenaveana. Nararihisera ani te juca nuchacaya ena némunaruanahivare, nuparapenaveanahi. Taicha tisuapajirahianahi éna tayehe eta máechajiriruvana ema Viya, ticaemataneacanahivare éma —máichavacapa.

*Ena Jesús macaesamirica eta táepacusirahi eta une étapa eta técaticava  
(Mt 8.23-27; Mr 4.35-41)*

<sup>22</sup> Étana sache, ema Jesús tiávacuhapa eta te pacure. Tásiha, máichavacapa ena mayeheana apóstoleana:

—Viyana, viánueca te apachara —máichavacapa.

Tacahe, tiyananapa tiánuecanayarehi. <sup>23</sup> Eta napaisirapahi, ema Jesús tívecapa tímacapaipahi. Tacahe, járajapainapa eta muraca técaticava. Tépacucapa muraca eta cáquiure. Tasiapauchapaipa eta une te pacure. Tipicanapa ena máimitureana, taicha tímatiacavanapa eta náecharisiravayarehi. <sup>24</sup> Tacahe nacajamicapa ema Jesús, náichapa:

—¡Maestro! ¡Maestro! ¡Péjamica! ¡Pímaha vécharicavainapa taicha eta tépacuca!

Enevanepa téchepucapa ema Jesús. Macamatinaçapa eta técaticava étapa eta táepacusirahi eta une. Tésamirieçavapa tamutu. <sup>25</sup> Tacahe, máichavacapa ena máimitureana:

—¿Tájaha tacayema vahi ácasíñavahini eta nutiarahirapahi eta eyehe? —máichavacapa.

Énasera tiáramecanapa. Tésenijiricacanapa, tásiha nacahepa:

—¡Tétavicavapa eta máitupajijiasirava! ¡Jéhesare, yátupiquene eta émairahi machichahi ema Viya! Taicha eta mavanairipi, tamutu tasuapahi eta técaticava étapa eta une —nacahepa.

*Éma achane návaháruanahi ena ichapemuriqueneana éreanana  
(Mt 8.28-34; Mr 5.1-20)*

<sup>26</sup> Tacahe, títecapanapa te apachara tayehehi apaquehe eta provincia Gadara. Te apachara tacanaraipahi eta provincia Galilea. <sup>27-29</sup> Te tiúcupaicapa ema Jesús, énapa ena máimitureanahi, máuchuichavacapa ema émana achane. Éma maca achane mávasaichuhi tayehe eta juca avasare Gadara. Tájinapasera máimatiyahini mayanahini te peti taicha namaurishichaipahi ena camuriqueneana éreanana tiávahácanahi. Ánaquiaparipa eta návahásirahi. Nametapanéni ena achaneana nacaratata. Náitiaca te ichapepi carena étapa te enure, te náimahavarepa tacananesica naicha ena tiávahácanahi. Émasera, tétavicavaipahi eta matumevahi. Mavechuquimurivare eta carena máitihanahi. Tijunavare, tivanavarehi te mávapahiana naicha ena éreanana. Macapenajuechavacahi eta ecariana. Mamuriarehi eta máitare-sirahi.

Tacahe, te máimahapa eta matiarahirahi ema Jesús, mapauchapa. Tépuycapa te mamirahu. Éma Jesús mavanecavacapa ena éreanana náinajiacapa ema achane. Éma achane tipiararecapa. Ánipa macahe:

—¿Tájaha picha píteca pipauchanu, piti Jesús, Machichaquenevihi ema Viya? ¡Pájapanunu vuíchaha picuvanecanu ánaqui te nucaicuñaiyayare! — máichapa.

<sup>30</sup> Tacahe, ema Jesús mayaserecapa:

—¿Tájaha píjare píti?

Éma achane majicapapa:

—Núti nucaijare “Nacapenaharu ena ichapemuriqueneana éreanana”.

Éma, tacahehi eta majicapirahi ema Jesús taicha camurianahi ena tiávahácanahi. <sup>31</sup> Tacahe, ena éreanana nayaseacapa ema Jesús vahi macuaquijicavaca te táupenaquene pusu náicuchihi návihayare éna. <sup>32</sup> Tatiarhivare eta camuriqueneana cúchiana. Tinihicanahi te táemiripaisine eta masihi. Éna éreanana nayaseacapa ema Jesús máisapahini nasiapahacavaca eta cúchiana. <sup>33</sup> Tacahe, ema Jesús macuchuchujicavacapa te máquehe ema achane, máisapahivare nasiapahacavaca eta cúchiana. Te tasamapa eta cúchiana eta nasiapahasiravacahi ena éreanana, tijunaparacanapa témiririjicanapa te tachausi eta cáquiure. Téririjicanapa tamutu.

<sup>34</sup> Natiarhivare ena tijaneacanainihi eta cúchiana. Te náimahapa, tiáramecanarinehi. Tiyananapa tijunapanapaipa timetajiricanapaipa nácani nácapajiruvanapahi, étapa te avasare namutuvare nametaca. <sup>35</sup> Tiáramicaréinehi nayehe ena achaneana. Tiyananapa náimahapana tájahapuca eta táchavaquenevahi eta cúchiana. Te títecapanapa, náimahapa ema achane návaháruinihi ena éreanana. Téjacaripahi te máivapechacaya ema Jesús. Tájinariipahi máichiravainahini. Ticamuirihaipahivare. Tásihasera, tipicanarinehi ena achaneana. <sup>36</sup> Tavetijipa te náitametacapa ena tímahanahi eta macuchuchujisirahi ena éreanana te máquehe ema achane. <sup>37</sup> Tacahe, te nasamairiricapa, namutu ena achaneana ticavasanahi te Gadara, vaipa napatsicavahini máitecapauchavacahini ema Jesús taicha náeñamaipahi tácahémahivaréni eta apamuriana náitátiqueneana. Nayaseacapa ema Jesús machavahini te másinehi. Tacahe, tiávacuhavarepa éma, tichavavarepa. <sup>38</sup> Tacahe, ema achane mayaseacainipa ema Jesús máisapahini máehica. Émasera máévatacaichucha machava te mapena. Ánipa maicha:

<sup>39</sup> —Piyanchucha pichava te pipena. Pimetajiricaya eta majapanuiravihi ema Viya eta macanarasiravihi —máichapa.

Tacahe, tiyanapa tichavahi ema achane. Mametacavacapaipa namutu eta macanarasirahi ema Jesús.

*Ema Jesús macanaraca esu machicha ema Jairo, ésupa esu apana esena sucajumaquenehivare*

*(Mt 9.18-26; Mr 5.21-43)*

<sup>40</sup> Te títecapavarepa ema Jesús te apachara, enevanepa nácapahi ena ichapemuriqueneana achaneana taicha nacuchaparairicaipahicha. Tiúrisa-mureanarinehi eta náimairahi éma. <sup>41</sup> Títecapavarepa ema émana achane ticaijare Jairo. Ema maca achane, tuparairucahi tayehe eta náurujsirareva tayehe eta jena avasare. Tacahe, ema maca achane tépuyucapa te mamirahu ema Jesús. Mayaseacapa macatajicahini mayanahini te mapena, macanarasinapanahini esu machicha. <sup>42</sup> Taicha ésunaracavahi esu machichahi. Doce añoripahi eta suhañorahi. Téñamajiricavaipahi ésu, taicha eta sujuma. Tacahe, tiyanapa ema Jesús, máehicapa te mapena. Náehicavarepa ena camuriqueneana achaneana. Váipanecha náratavapahini eta napaisirapahi.

<sup>43</sup> Sutiarihipavare esu apana esena, sucajumaquenehivare. Doce añoripahi tayerevahi eta suhitiarevahi. Ichapemuripa eta sutanusirahi ena médicoana, váhisera sucanaracahini ésu. <sup>44</sup> Tépiyayacavapa témeñahava te maquecu ema Jesús. Suémamajiacapa te tacheyarapi eta mamuiraha. Enevanerinehi tinaraca ésu. Tícheapa eta suítine.

<sup>45</sup> Émasera ema Jesús masamarichucha eta suémamajiasirahi. Macahepa: —¿Nájaha témamajiacanuanahi? —macahepa.

Nájina tísapavaina.

Émasera ema Pedro énapa ena machamuriana náichapa:

—Maestro, pímaharichuhi eta nasimutuvahi ena achaneana. Tiyututuavanahi te pichacaya. Váiparinehi tímaticarémahi nájahapuca nácani témamajiacavianahi —náichapa.

<sup>46</sup> Émasera ema Jesús macahevarepa:

—Nacañárihi témamajiacanuanahi taicha nusamavahi núti eta nuncanarasirahi eta jumare táichavenehi eta nítupajijiasiravahi —macahepa.

<sup>47</sup> Ésusera esu esena, tímatiacavapa eta máimatirahi ema Jesús eta suémamajiasirahi, tiyanapa supauchahi. Tépuycapa te máivapechacaya. Tiyayacareripa eta supisirahi. Sutupiruvapasera timetaurecavahi eta ésuirahi témamajiacahi. Ánipa sucahehi:

—Tata, nútira némamajiacavihi, nuvarairahi nunaraca tayehe eta nujumahi. Nusamavaipasera eta nunarasirahi —suíchapa.

<sup>48</sup> Tacahe, ema Jesús, máichapa esu esena:

—Tiuri, nuchicha, pinaracapa puiti táichavenehi eta picasiñairanuhi. Vaipa picueñamava eta pichaviraya te pípena —máichapa.

<sup>49</sup> Téchajiricavaichahahi ema Jesús eta suyehe esu esena, títecapanecha ema émana achane tiásihahi te mapena ema Jairo. Mametacapa:

—Esu pichicha tépenasamipahi. Vaipa picucamesa ema Maestro —máichapa.

<sup>50</sup> Émasera ema Jesús, te masamapa, máichapa:

—Vahi picuarameca, váhivare picueñamava. Pácasiñava eta nuyehe. Tinarcayareichu esu pichicha —máichapa.

<sup>51</sup> Tacahe, tiyanavanepa ema Jesús. Te títeapanapa, vaipa máisapahini ema Jesús nasiapanahini ena achaneana. Nacarichu tisiapanahi ema Pedro, ema



Jacobo, ema Juan, émapa ema suiya esu amaperu, ésupa esu suena. <sup>52</sup> Natiarihihisera ena achaneana te tajuhe. Tíyahanaripa éna. Te máimahavacapa ema Jesús, máichavacapa:

—Vahi ecuiyaha. Váhira suépenahini esu suca amaperu. Tímacarichucha — máichavacapa.

<sup>53</sup> Técanarichuchasera eta mayehe éma, taicha náimahahi eta suépeniraipahi. <sup>54</sup> Tacahe, ema Jesús macaratacapa eta suvahuana. Tásiha, máichapa:

—Nuchicha, nuvanecavi: Péjamicá, péchepuca — máichapa.

<sup>55</sup> Tacahe, esu amaperu tichavapa títareca. Tásiha, téchepucavanepa. Ema Jesús mavanecavacapa ena ticachichana náíjaraca eta sunica. <sup>56</sup> Ichaperinehi eta náramirahi ena ticachichana. Émasera ema Jesús matuparacavacapa vahi nacuehajisiha eta náimahaquenehi.

## 9

*Ema Jesús mavanecavacapa ena dócequeneana apóstoleana, napaicayare tamutu avasareana*

*(Mt 10.5-15; Mr 6.7-13)*

<sup>1</sup> Ema Jesús macurujimurihapa ena dócequeneana mayeheana apóstoleana. Tacahe, máíjaracavacapa eta náitupajijiasiravanayare naratahairayare náquijica ena éreanana, naratahairayareva nacanaraca nácani nacajumaqueneanahi. <sup>2</sup> Tásiha, ticavanahianapa ticametarairuanayare eta tacamunucarevayarehi náeneuchiravayarehi ena achaneana, náinajisiraina eta napecaturana, náehica ema Cristo. Ticanararecanayarepahivare nácani nacajumaqueneanahi. <sup>3</sup> Eta mavanesisrayacahi, máichavacapa:

—Tájina íámamahi eta eyereruva. Váhivare ecucayupairiquipahi. Tacuijavare ecanirurucuhaina te alforja. Étaripa eta plata, tacuijavare iama. Étanainarichu eta emuiriha íamayare. <sup>4</sup> Enasinumayarepahisera te jácani peti nayehe ena tiúrihi eta najacapiraheya. Tiámainucava te táitecapa eta eyanirayareva. <sup>5</sup> Téhesera nacuijapuca nacubaraha najacapahe tayehe te jácani avasare, váhivarepuca nacubaraha nasama eta emetarairuya, iúchucavanepa. Étatapevachavanumayaresera eta máteji te ívapeana. Táicutiarayare eta máicuñasirayare ema Viya taicha eta namavarairahi najacapahehini — máichavacapa.

<sup>6</sup> Tacahe, tiyananapa ena apóstoleana. Tamutu napaica eta avasarechichana. Ticametarairuanapaipahi eta máechajiriruva ema Viya, eta viúchucuiraya majacapirahaviyare éma. Ticanararecanapaipavare ena nacajumaqueneana nácani náetupiaruanapahi.

*Ema Herodes masamairiricavare tamutu eta juca máichaqueneanapahi ema Jesús*

*(Mt 14.1-12; Mr 6.14-29)*

<sup>7</sup> Tacahe, ema aquenucahi Herodes masamairiricavare tamutu eta tiáramicareana máichaqueneanahi ema Jesús. Váipasera máitucacarehini. Taicha masamairiricahi náimijachahiji émahí ema Juan téchepucahi te máecari. <sup>8</sup> Ena apamuriana náimijachahivare téchepuca ema antivuíni profeta. Ena apamuriana náimijachahivare ema Elías. <sup>9</sup> Émasera ema Herodes macahepa:

—Nútijacaruvahisera nucavanairipi náechatinuca ema Juan, eta máepenirahi. Puiti, ¿nájahapuca ema maca nusamaiririruasaparacahi eta máichira eta tiáramicareana? Nuvarahasa nímatini ema mácara — macahepa.

*Ema Jesús máitaparaha máenicavaca ena camuriqueneana achaneana*  
*(Mt 14.13-21; Mr 6.30-44; Jn 6.1-14)*

<sup>10</sup> Tacahe, tichavanapa ena apóstoleana eta napaisirahi. Nametacapa ema Jesús tamutu eta náichaqueneanapahi. Tásiha, éma mámamurihavacapa te mávapahi, tinapaicahi eta avasare Betsaida. <sup>11</sup> Téhesera náechavarepa ena achaneana eta macaijuhehi ema Jesús, tiyananavarepa nacapayacahi. Émasera majacapavacaichucha, máimitumuriharipavare tayehe eta náitairesira ena machaneranahi ema Viya. Macanaracavare ena nacajumaqueneanahi.

<sup>12</sup> Te náimahapa ena apóstoleana cáperehiyareipahi, témeñahavanapa eta mayehe ema Jesús. Tásiha, náichapa:

—Táuricapa pivanecavaca ena achaneana nayanapa natanuca eta nanisiha étapa eta náimasihaya te avasarechichana tachacayarahanahi eta juca viávihihi, taicha ani, tajina náviyavaimahi eta te juca —náichapa.

<sup>13</sup> Tásiha, ema Jesús majicapapa:

—Étina, íjaraca eta nanica.

Énasera náichavarepa:

—Tájina viviyaimahi eta nanicahini ena nani achaneana. Jucárihinéni cinco eta pan, apiquipa jima jitaruca. Váiparinehisera nárataimahi. Tayanapanpane tatiarihinapucaini eta vivacharesihahini eta tinicacare, váiparinehivaresera nárataimahi ena nani camuriqueneana achaneana —náichapa.

<sup>14</sup> Ena achaneana, cinco mil eta náichapemurivahi ena ajairana, énarichahavare ena esenana, énapa ena amaperuana.

Tásiha, ema Jesús máichavacapa:

—Evaneca náejahapaicavaca ena achaneana. Cincuentavacainapahi eta náiputsitsisiravaina —máichavacapa.

<sup>15</sup> Énepasera tacahehi naicha ena apóstoleana. Tásiha, ticaejarecanapa namutu. <sup>16</sup> Tacahe, ema Jesús mavehapa eta cincoquene pan étapa eta apiqui jima. Másenicapa te anuma. Mahasulupayachaipa ema Maiya eta máenisiravacayarehi ena camuriqueneana achaneana. Mayuvetutuhecavacapa, máíjaracapa ena apóstoleana. Náíjaracapasera namutu ena achaneana. <sup>17</sup> Namutupa tinicana, tisuhevacapa. Váhicaruvare náitahini eta tinicacare. Dócehi saye ichapehiana tínichi eta náemacharájiana.

*Ena Pedro máimereucha ema Jesús eta émairahi Cristo  
(Mt 16.13-19; Mr 8.27-29)*

<sup>18</sup> Étana sache, ema Jesús énapa ena máimitureana tíápechavare típutsiacavana, tiyananapa tayehe eta nayujarasihayarehi. Te títavanapa eta nayujarasirahi, éma mayaserecavacapa:

—¿Tájaha nacayema ena achaneana eta nuyehe? ¿Nájahapuca náimijachanuhi éna? —macahepa.

<sup>19</sup> Éna najicapapa, ánipa naicha:

—Ena apamuriana náimijachavihiji téchepuca ema Juan Tícachasiricarahini. Ena apamuriana tímijachavianahi ema víyarahaini profeta Elías, téchepucahi éma. Ena apamuriana tímijachavianahivare ema mácani apana profetaini antivui, téchepucahi —náichapa.

<sup>20</sup> Ena Jesús mápechavare mayaserecavaca éna:

—Étiyapa, ¿nájaha ímijachanuhi núti?

Ena Pedro majicapapa:

—Pítira yátupiquenevi Cristo, piásihaquenehi me Viya —macahepa.

*Ena Jesús tímereuchava eta máepenirayarehi  
(Mt 16.20-28; Mr 8.30-9.1)*

<sup>21</sup> Tásiha, matuparacavacapasera ema Jesús nacuija nacumetaca eta émairahi ema Cristo. <sup>22</sup> Tásiha, máichavarepa:

—Tacamunuichaha eta ichapemuriyare eta nucatajivairaya, nuti Manerejirunuhi ema Viya. Tépurunuanayare ena tuparairucana énapa ena aquenucarahana énapa ena escribánoana. Éna, tímicapacuanayareva. Mapanaya-reichuhisera sache eta nucaheyare eta népenirayare. Tásiha, nuchavayarehi néchepuca —máichavacapa.

<sup>23</sup> Tásiha, máimitucavacahi namutu ena achaneana, ánipa máichavaca:

—Nácani navaraha náehicanu, tacamunu náinajica tamutu eta tihapapiricana eta náehisiránuhi. Nacaravahuyareva eta nímiturapiana. Náíjaracavavare eta táimicapasiraina eta náehisiránuhi. <sup>24</sup> Nácanisera téñamanahi eta náitairesira, tiávamirahuanaya eta náehisiránuya, énajivayare ticamitiequenehavanaya eta náitairesira. Énaserá nácani yátupihi tíjaracavana téhicanuana, tayanapane táimicapacavacapuca eta náehisiránuhi, éna títujicavanayare tíuchucuhanayare eta náitairesiranaya. <sup>25</sup> Énerichuvare nácani tacáeñamaruanahi eta nacaimahaquenéirayare te juca apaquehe, tájina náimaeque-nehaimahi, taicha eta tacaéñamarasiravacahi tahapapiricavacahi tayehe eta náuchucuirayare. <sup>26</sup> Énaripa nácani titsirihanapuca téhicanuana, náimitsirihapuca eta nímiturapiana, núti apanava nutsirihayarevare nayehe ena nani. Nucaerajicainapa ena nani, núti Manerejirunuhi ema Viya, te táitecapapa eta sácheyare nuchavirayare aquenucanuinaipa. Te jena sácheyare, námainapaipa núti eta nujaraiva, étaripa eta majaraiva ema Tata. Nucachanénapaipa ena sántoqueneana ángeleana. <sup>27</sup> Nutupiruva numetacache: Puítiripa te etaracu éti, etiaríhi éti vahí épenavanéimahi, ímahanumayare eta nucatuparahairahi aquenucanuya nuti Manerejirunuhi ema Viya —tacahepa eta máimituresirahi ema Jesús.

*Ema Jesús, tihapamaichava eta máimahi*  
(Mt 17.1-8; Mr 9.2-8)

<sup>28</sup> Tiuri, te táequenepa eta óchoquenehi sache, tiyanapa ema Jesús, tiápanahi te anuquehe mari. Tiyujaracayarehi. Mapananarichusera ena mámaqueneanahi: ema Pedro, ema Jacobo, émapa ema Juan. <sup>29</sup> Tacahe, eta mayujarasirahi ema Jesús énapa ena mámaqueneanahi, tíjahúchavapa tísvachavahi eta máimahi ema Jesús. Apaimahipa eta mamira étaipa eta mamuiríha. Tétaví-cavapa eta tajapuvahi tajararasirahi tamutu eta máquehe. <sup>30</sup> Tásiha, tírami-careanavarepa tímerecavana ena apinana ajairana. Téchajiricavanaripa mayehe ema Jesús. Ema émana, émahí ema víyarahaini Moisés. Ema apana, ema víyarahaini profeta Elías. <sup>31</sup> Tétavícaipaíhivare tajararasirahi eta te natupíhaiyahi. Náechajisíhíhíahi eta macatajivairayarehi máepenirayarehi ema Jesús tayehe eta avasare Jerusalén. <sup>32</sup> Tavarahaípaíchanéni tímaca ema Pedro énapa ena apinana machamuríanahi. Téhesera te náimáhapa eta tíjaracachi te nachacaya, témitiacarinehi eta náechapuneana. Náimararacarípaíhi eta majaraivahi ema Jesús, énapa ena apinana ajairana tíucupauchanahi. <sup>33</sup> Tacahe, te máimáhapa ema Pedro eta nachavirayarepa ena nani apinana, témeñahavapa. Tásiha, macahepa:

—Tata Maestro, tétavícaipa táurícareva eta víávíhairahi eta ani. Tiúripa-nahípucaíni vépiyacahíni eta epenahuínapachuhíni. Pipenahuínaríchuhíni píti, mapenainaríchuhívaréni ema Moisés, émapaini ema Elías —máichapa.

Váhinéni máimatíequenehahíni ema Pedro tájahahípuca eta mavaraha-quenehi macayema. <sup>34</sup> Tacahe, eta máechajírísíraváíchahíhi, tíjahúchavapa

tiúcupaicaahi eta úcaji, tamuichavacapa ema Jesús énapa ena apinana ajairana.

<sup>35</sup> Tásiha, nasamarinehi eta mahu ema Viya, tayehe eta úcaji. Ánipa macahe:

—Ema maca ema yátupiquenehi nuchicha némunarquenehi. Éma esuapayare —macahepa.

<sup>36</sup> Te tímatinapa eta mahu ema Viya nasamaquenehi, náimahapa ema Jesús, macarineipahi. Nájinariipa ena tiúcupauchanahi.

Tacahe, ena mapanana apóstoleana, tiyerehi eta namametasirahi ena apamuriana nachamuriana eta náimahaquenehi.

*Ema Jesús macanaraca ema amaperu mávaháruhi ema éreana  
(Mt 17.14-21; Mr 9.14-29)*

<sup>37</sup> Te apanaquenepa sache, tiúcupaicanavarepa tayehe eta anuquehe mari návinehi. Natarihipavare ena camuriqueneana achaneana. Te náimahapa ema Jesús, tiyananapa nácapahi. <sup>38</sup> Matiarihahi ema émana achane te namuri ena camuriqueneana achaneana. Tipiaracapa muraca éma, ánipa macahe:

—Tata maestro, picatajicanupaini pípuchinanuini ema maca nuchicha. Émanaracavahi te numirahu. <sup>39</sup> Mávaháruhi ema éreana. Macapiarare-recahi técharipaicavavare ticarisasajacavare. Ichapemuri eta macatajivaira máicha. Vahi mávaraha máinajia. <sup>40</sup> Néchajiacaripahinéni ena pímitureana. Váhisera náratahahini nacuchuca ema éreana tiávahácahi ema nuchichasami —máichapa ema achane.

<sup>41</sup> Tásiha ema Jesús majicapapa:

—¡Tétavicava emasuapajiraivavaca eti achaneana! ¡Cúverarecaichapucaini eta nucamichirahenahini! Píama ani ema pichicha.

<sup>42</sup> Témeñahavainipa ema amaperu, tápechavarepa tacañamacahi tiáquipaicavapa, técharipaicavaipavare. Émasera ema Jesús, máquijicapa ema éreana, muracapavare eta macajachirahi. Tásiha, májaracapa ema maiya, tinara-caipahi. <sup>43</sup> Náramirinehi ena achaneana taicha eta tamutuirahi marataha ema Viya, máitupajijiasiravahi.

*Tiápechavavare ema Jesús tímereuchava máepenirayarehi  
(Mt 17.22-23; Mr 9.30-32)*

Nanasirichahahi napanerequenehahi ena achaneana eta juca náimahaquenehi. Ema Jesús mápechavare mametacavaca ena máimitureana. Ánipa macahehi:

<sup>44</sup> —Ecaquiña yátupina eta juca numetaruheya. Váhivare ecuemitisica. Núti Manerejirunuhi ema Viya, járajapainapa eta sáchezare tíjararecanuyare mácani achane nayehe ena ticatianacuananahi. Ticaratacuanayareva —máichavacapa.

<sup>45</sup> Énasera ena máimitureana váhiquene nácaicutiarahini eta macayemaque-  
neanahi. Taicha émarichuhi ema Viya tíjaracahi eta vuíchaha nácaicutia-  
raimahi. Váhivare napatsicavahini nayaserecahini tájahapuca tacayemahi eta  
máichiravacahi.

*¿Nájahapuca ema apóstole ticapicahupana?  
(Mt 18.1-5; Mr 9.33-37)*

<sup>46</sup> Te táequenepa eta juca, ena apóstoleana ticapinarujiricacanapa nájaha-  
hipuca ema ticapicahupanahi. <sup>47</sup> Émasera ema Jesús máimatiacavacapa eta  
náechajiriruvanahi. Máichuhapa ema émana amaperuchicha, macatupihapa  
te namirahu. <sup>48</sup> Tásiha, máichavacapa ena apóstoleana:

—Nácani tijacapanayare ena amaperuana níchavenéinahi núti, ena nani  
yátupi náimerecayare eta náemunasiranuhi núti taicha tímicutijiricavahi  
nútinahini najacapa. Taicha nácani tijacapanuanahi núti, énerichuvare

tacahehi eta najacapirahi ema Ticachichanu, ema tivanecanuhi. Nácani náechapajiricayare namutu ena nachamuriana, náemunasiravacahivare, énahi ena ticapichupananayare te etaracu —macahepa.

*Nácani vahi ticitianacahaviana, éna tímicatacaviana  
(Mr 9.38-40)*

<sup>49</sup> Tacahe ema Juan mametacapa, máichapa:

—Tata Maestro, vímahahi ema émana achane máquijicavacahi ena éreanana te píjare ticutirinehi pítinahini píjaracahini eta máitupajjiasiravahi. Tásihasera, vicavacahi éma, taicha vahi viúmurivainahini —máichapa.

<sup>50</sup> Émasera ema Jesús máichapa:

—Vahi ecucavaca éma. Taicha nácani vahi ticitianacahavianahi, éna tímicatacaviana —macahepa.

*Ema Jesús macajachavaca ema Jacobo émapa ema Juan*

<sup>51</sup> Te jena sácheanahi tiánenehipaipa titecapa eta mayanirayarehi ema Jesús te anuma. Tásiha, tíjaracavaichaha eta mayaniranumayare te Jerusalén.

<sup>52</sup> Macavanairipipa tiyanana ena tínapumirauchanayarepahi. Titanucanayarehi eta máitecapihayare tayehe eta jácani avasare. <sup>53</sup> Énasera ena samaritanoana vahi návarahahini najacapa taicha náimahahi éna eta matupiruirapahi te Jerusalén. <sup>54</sup> Tacahe, ena apinana apóstoleana, ema Jacobo émapa ema Juan, tistemamajuheanapa eta namajacapirahi ema Jesús. Tacahe, náichapa éma:

—Tata Viáquenu, ¿pivarahapuca viyasesereca táemirica eta yucu tiásiha te anuma? Étaina táitapaimuriha ena náenatatajiana, tácuti eta máichaquenehi ema profetaini Elías —náichapa.

<sup>55</sup> Tacahe, ema Jesús máimararacapa éna. Tásiha, macajachavacapa, máichapa:

—¿Tájaha tacayema vahi tétupicava eta epanereruana? Ticutipa vahi mávaháruhénahi ema Espíritu Santo. <sup>56</sup> Vahi étaina tímitecanu nícuñacavacayare ena achaneana, nuti Manerejirunuhi ema Viya. Tímitecanuhi nucuchucuhavacayare éna —máichavacapa.

Tásiha, tiánucuhanapa te apachacaya te apanahivare avasare.

*Vínajicayare tamutu, te vivaraha véhica ema Jesús  
(Mt 8.19-22)*

<sup>57</sup> Eta napáisirapahi te achene ema Jesús énapa ena máimitureana, nacainunapa ema émana achane, mavarahapa máehica. Ánipa macahehi:

—Tata, núti apanavare nuvaraha néhicavi te jácani pivarahaqueneyare piámianu.

<sup>58</sup> Ema Jesús, ánipa tacahehi eta majicapirahi:

—Tamutu eta sárareana ticapenavaca. Énerichuvare eta cáyureana tamacajipachuvare. Nútisera núti Manerejirunuhi ema Viya, tájina nuviya nusiapihahini —máichapa.

<sup>59</sup> Te apanavarepa sache, máichuhapa ema Jesús ema apana máimiture apóstoleyare. Tásiha, ema majicapapa:

—Tata, nuyaseacavi písapanuhipucaini nuchava te nupena. Nucuchapanumayarehini eta máepeniraya ema ticachichanu, nécaranumaya. Tásiha, nucapayacavipa néhicaviya —macahepa.

<sup>60</sup> Ema Jesús majicapapa:

—Pésamirica náecaracacaichaha ena máecharaireana. Tájina tájjaracavimahi eta juca tihapasamurerecavihi. Yare, péhicanu. Níjaracaviyare eta pémataneyare. Picametarairuyare eta máechajiriruvana ema Viya —máichapa.

<sup>61</sup> Matiarihivare ema apana énerichuvare macahehi:



—Tata náquenu, núti nuvaraha néhicavi. Písapanusera nucametavapana-numaya te nupena —macahepa.

<sup>62</sup> Ema Jesús majicapavare:

—Mácani achane tipaicapahi téyarecapahi vahi tichavaequenehavaimahi mámarairicahini eta mámaquene. Ene picaheyare piti, vahi pichavaequenehavaimahi tayehe eta tájiparacana. Taicha vahi nuvaraha mácani tñajicavahi eta macametarairuira eta máechajiriruvana ema Viya —máichapa.

## 10

*Ema Jesús mavanecavaca ena setentaqueneana, títiturecanayare*

<sup>1</sup> Te táequenepa eta júcana, ema Viáquenu Jesucristo manerejicavarepa ena setentaqueneana apamuriana máimitureanahivare. Tiyananapa ticametarairuanayarehi te avasareana mapaisineanapahi éma. Apinanavacapahi eta napaisirayare éna. <sup>2</sup> Máichapa eta matuparasiravacahi:

—Tétavicavapa eta vicamunuirava ena tímicatacavahanaya tayehe eta juca vématanerepihi. Eyaseacayaresera ema Tata Vicaiyaquene máijaracahavi ena náimicatacavahi. Eta juca tímicutijiricavahi mácani achane eta macamunuiravahi ena tímicatacana eta máechatijisiraya eta maharusura.

<sup>3</sup> Puiti, névatacaheyare eyana epaica. Nararihisera ena achaneana váinara-jiqueneanahi étupiaruanayare. Éna nacutihi eta sárare táíñehiqueneanahi. Étisera ecutiyahehi eta uvesachicha eta tamansuvahi. <sup>4</sup> Eta epaisirayare, tájina íámaimahi eta tarera, váhivare íámaimahi eta billetera. Váhivare íámaimahi eta eparupeva. Eyaiyauchavayarepahisera eta epaisirayarepahi te achene. <sup>5</sup> Te jácani peti ítecapihayarepahi, ani tacaheyare eta échajisirayare ena achaneana: “Ema Viya, tiúrichaheyare éti te juca peti”. <sup>6</sup> Nararihiyare ena achaneana navarahaya eta náurivaya mayehe ema Viya. Eta échajisiravacayare, tatupiruvaya me Viya máijaraca eta náurivaya. Téhesera vahi nacvaraha najacapahe, vahi ecucañaamacava nayehe, taicha énapa téchinavana. <sup>7-8</sup> Te jácani avasare, jácani peti eta najacapiahepuca, enasipanayare tayehe eta peti ítecapihahi. Vahi ecuepuru jácani tinicacareana náeniruheanayare. Étaripa jácani náesiruheanayare. Éti, táitsivayare eta ecaemataneasiranuyarepahi. Váhivare ecupamirahapahi ímacacuhapahi eta pétiana. <sup>9</sup> Ecanaracayarepahi ena nacajumaqueneana natiarhiqueneanahi. Tásiha, emetacavacapaipa námutu ena achaneana eta núcupaisiraripa nuti Cristo, nútirichuhi ema nacuchapaquenehi. Nucuchucuhavacayare namutu ena téneuchavana, ticasíñavanavare eta nuyehe nuti Mavanerunuhi ema Viya. <sup>10</sup> Téhesera nacuija nacujachapahe te jácani avasare ítecapihayarepahi, iúchucavanepa te calle. <sup>11</sup> Ánipa ácahe: “Vétatapevachavahi eta juca tavaparú támaquenehi eta vívape. Eta juca táicutiarahi eta máicuñasiraheyare ema Viya taicha eta emavarairahi ejacapahavihini. Vivarahasera vimetacahe eta máucupaisiraripa ema Cristo, émarichuhi ema vicuchapaquenehi, ema Mavaneruhi ema Viya. Macuchucuhahini éti, te éneuchavahini, ácasíñavahini mayehe” íchavacayare éna. <sup>12</sup> Jéhesare, te táitecapapa eta juicio, tiápajucavainapa eta náicuñayare. Tacachuricayare eta nacaicuñairayare ena achaneana váinara-jiqueneana ticavasanaini te avasaréni Sodoma —máichavacapa ema Jesús.

*Eta táicuñayare eta návasana ena achaneana masuapajirairahana (Mt 11.20-24)*

<sup>13</sup> Tacahe, ema Jesús máechajicahi ena apamuriana achaneana, tímicutijiricavahi natiarihinahini te mamirahu. Ánipa macahe:

—¡Páurehesami eti nujaneanana ecavasanahi te avasare Corazín étipa eti ecavasanahi te avasare Betsaida! Ichape eta ícuñayare taicha eti ímaharipa tamutu eta tiáramicareana níchaqueneanahi te emirahu, váhisera ávarahahini éneuchavahini. Ena nani achaneana ticavasanahi te Siria, apavasanáhinéni, tétavicavahinéni eta namaurivahi, németeacasera núti téneuchavanavanehini eta náimairahi eta níchaqueneanapahi. Enévanénahini náimerecavahini yátupi eta náeneuchiravainahini. <sup>14</sup> Tásiha puiti, muracapanayare eta ícuñayare éti, taicha eta emavarairahi éneuchava. Tacachuricayare eta nacaicuñairaya ena achaneana apavasanana ticavasanahi te Siria.

<sup>15</sup> Étiripa eti ecavasanahi te avasare Capernaúm, tamapuruji eta nímitusirahehi étapa eta ímairahi eta tiáramicareana níchaqueneanapahi. Eti ecasiñavavaicahi, ímijachaipapuca eta ticayapaheyare te anuma. Ichapesera eta etsirihacarevayare, taicha épujuquichavayare eta te yucu taicha vahi éneuchavaimahi éti —macahepa.

<sup>16</sup> Tacahe, tiápechavavare máimitucavaca ema Jesús ena máimitureana, ánipa macahe:

—Nácani tisuapaheanayare, ticaecheranahi eta nasuapiranuyareva núti. Énasera nácani tépuruheanayarepahi, ticaecheranayareva eta náepuruiranuhi núti. Ene tacahehi eta náepuruiravare ema Tata tivanecanuhi —máichavacapa ena máimitureanahi eta napaisirayare.

#### *Tichavanapa ena setentaqueneana vanairucanahi*

<sup>17</sup> Tacahe, tichavanapa ena setentaqueneana. Tiúrisamurereacavanapaipa eta náitecapirahi. Ánipa nacahe:

—Tata Viáquenu. Vítauchaipa eta pivanairipi. Viratahahivare viáquijicavaca ena éreanana taicha eta vipiarasirahi eta píjare —nacahepa.

<sup>18</sup> Ema Jesús majicapavacapa:

—Tájinarinehi matumevaimahini ema Satanás eta viáquiquijisirapahi ena majupahana. Taicha ema Espíritu Santo tímechanuhi eta nunecapirahi eta máquipaisiravahi ema Satanás, tacutihi eta térameca eta tájiahúchiravahi eta macaquijirahi te anuma. <sup>19</sup> Táitaurevaquene núti, ichape eta nujaneasirahehi. Tayanapanepuca iácatayaca eta quichare, alacránpuca, tájinasera táicharachémahi. Eta juca ítupajijiasiravaya níjararuhehi, tacachuriaca eta máitupajijiasiravahi ema Váinaraji Satanás, énapa ena majupahanahi. <sup>20</sup> Váhisera ecucasiñavavaica eta eratahairahi iáquijica ena éreanana. Iúrisamurereacavasera eta táejasiraipa te anuma eta elistana.

#### *Ema Jesús tiúrisamuréinehi mayehe ema Maiya (Mt 11.25-27; 13.16-17)*

<sup>21</sup> Tacahe, enévanehinehi táitecapauchahi ema Jesús eta máurisamurevahi maicha ema Espíritu Santo. Tásiha, macahepa:

—Tata Nucaiyaquene, tétavicava eta nucunachiravi. Jéhevare píti táquenuvahi eta anuma étapa te juca apaquehe. Títauchavaipa eta pipanereruhi. Vahi písapahini náitucahíni eta júcana ena achaneana tímijachavanahi téchemarahiana. Énapasera píjaracahi ena nani téhicanuanahi, tájinhinéni náechemaraivainahini. Puiti nasapiharipahi nacachuricahi ena títupajijiacavanahi. Tétávicavahi eta táurivahi eta pipanereruhi, piti Tata Nucaiyaquene.

<sup>22</sup> Tacahe, ema Jesús máichavacapa ena achaneana:

—Ema Tata Nucaiyaquene, ema tíjaracanuhi eta nútiraya néchaya tamutu. Nájina náratahaimahi énajivainahini náimatihini ema Tata. Nucarichu nuti néchinavahi ena nímatiruanayare éma. Taicha núti yátupihí eta nímatirahi

ema Tata Nucaiyaquene; tacutiquenehi eta yátupirahivare eta máimati-ranuhi éma —macahepa.

<sup>23</sup> Tacahe, mañajichamuripa ena máimitureana, máichavacapa:

—Tétavicavahi eta iúricacareva éti taicha tíjaracahehi ema Viya eta juca ímairahi puiti eta níchaqueneanahi. <sup>24</sup> Jéhesare, numetacahe: Acane ichape-muriana ena víyarahánaini profetana énapa ena réyeánaini, tétavicavahi eta navarairahi tímatinuana, navarairahivare náimaha eta juca níchaqueneanahi ímahaqueneanahi. Navarahahivare nasama eta nímituresirahi. Váipasera nacapayacahini —máichavacapa.

*Éma Jesús máimicuticha, máechajisihahi ema achane máuriquenehi, samarítánohi. Tijapanurahi mayehe ema émana achane macajaraquenehi, tayanapane vahi émainahini majaneanainahini.*

<sup>25</sup> Matiarihíhi ema achane, maestro tayehe eta mavanairipiana ema víyaraháini Moisés. Tiyanapa matanucahi ema Jesús, téchajiricavayarehi eta mayehe. Mavarahahi macaicutiarayare. Máichapa:

—Tata maestro, ¿tájahapucaini nícharacavaini eta níturusirayare eta núchucuirayare te apana vítaresira? —macahepa.

<sup>26</sup> Éma Jesús majicapapa:

—¿Tájahasica tacayemahi eta táechajiriruvahi eta Sagrada Escritura? ¿Tájaha tacayemahi eta pisamirahi eta péchajicuirahi? —macahepa.

<sup>27</sup> Tásiha, ema maestro majicapapa:

—Ani tacahehi eta néchejicuirahi: “Macarichu ema Viya pémunacayare te pisamure. Macarichuvare éma piáchanevaqueneya. Píjaracayare tamutu eta pitumeva eta picaemataneasirayare. Éma pipanerechayare tamutu sácheana. Pémunacayareva ema piparaepiyahi tácuti eta pémunasiravahi píti”.

<sup>28</sup> Éma Jesús majicapapa:

—Tétupicava eta juca pijicapiranuhi. Te pítaucha eta juca, piúchuchayare.

<sup>29</sup> Émasera ema maestro vahi mavarahahini apaquehereruinahini. Máichapa:

—¿Nájahasica ema nuparaepiyahi? —macahepa.

<sup>30</sup> Éma Jesús máichavarepa:

—Nímicutichinaviyare eta juca. Matiaríhi ema émana achane. Tipaicahi te achene, másiha te Jerusalén. Tiyanayarehi te Jericó. Eta mapaisirapahi te achene, náuchujiuchapa ena tiámerahiana. Náepuchiricanumapa. Tiánehi nacapacayaréni. Námeychapa eta mámaqueneanapahi étapa eta mamuiríha.

<sup>31</sup> Tásiha, macahepaipa ema émana tiyujaracarahi. Máimahapa ema achane te apaquehe te achenechacaya. Váhisera májapanuhini máichejiuchahini. Máetávicaichucha.

<sup>32</sup> Tásiha, macahepaipavare ema apana achane. Éma, téchapajiricahi eta Templo. Énerichuvare te máimahapa, máetávicaichuchavare.

<sup>33</sup> Tacahe, macahepaipavare ema apana achane. Éma, indigenahi samaritano. Éma, te máimahapa ema macajaraquenehi, majapanurinehi.

<sup>34</sup> Tíchechanumapa éma, témeñahavapa. Máipuchapa te aceite étapa eta alcohol eta majarana. Máepacuchavacapa te amarataaji. Tásiha, manaracuhapa manacaquechapa eta te maperapahi cavayu. Mámapa eta te máitecapihayarehi. Máipupuaracaipahi.

<sup>35</sup> Te apanapa sache, tiyanayarepa ema samaritano. Tivecuacavapa aPIPE eta maplatane. Mavachachapa ema ticapenahi eta peti. Tásiha, máichapa: “Picatajicanu. Péchapajirisinánu ema maca achane. Te tatiaríhinapuca eta macamunuirava, píjarasinánuya. Nímahavirine nu-

vachachavi te nuchava” máichapa. <sup>36</sup> Tiuri puiti, nuyaserecaviyare píti.

¿Nájahapuca ena nani mapanaqueneana ema témunacahi ema maparaepiya najararuquenehi ena tiámerahiana? —máichapa ema Jesús.

<sup>37</sup> Ema maestro majicapapa:

—Ema témunacahi ema maparaepiya, ema tijapanuhi —macahepa.

Ema Jesús máichapa:

—Pímahaipajira, ene picaheyare piti apanava. Pijapanurahiyare —máichapa.

*Ema Jesús máejirapanavaca te napena esu Marta ésupa esu María*

<sup>38-39</sup> Tímiyanavavarepa eta mapaisirahi ema Jesús. Máitecapauchapa eta avasarechicha suávasa esu ésuna esena ticaijaruhi Marta, ésupa esu suparape ticaijaruhi María. Mayanauchapa te supena esu Marta. Tétávicavahisera eta táurivahi eta najacapirahi éna. Tacahe, esu María téjacapa te máivapechacaya ema Jesús. Susamararacaripa eta máimiturapiana éma. <sup>40</sup> Ésusera esu Marta tahapapiricaichucha eta sucaparujirahi, taicha eta suénisirayare ema Jesús. Tacahe, esu Marta tisemamajuhерipa eta suímairahi esu suparape suéjarasirahi. Tacahe, suíchapa ema Jesús:

—Tata Náquenu, picatajicanupa. Pivanesinanu esu suca nuparape súimicatcanuichu apaesaina tayehe eta ematanecana —suíchapa.

<sup>41</sup> Tásiha, ema Jesús majicapapa:

—Páurevisami piti Marta, tétavicavapa tahapapirisiravi eta pématanerepiana. <sup>42</sup> Tituparacavi pínajica eta tihapapiricavihi. Picaravahu eta máechajiriruva ema Viya. Esu suca piparape María tétupicavahi eta supanereru. Suvarahahi suítucayare. Eta tacahe, tisamararacanuhi. Nájina tiverejicaimahi eta suvarahaquenehi suítuca —máichapa.

## 11

*Ema Jesús tímitucavahi eta viyujarasiraya*

*(Mt 6.9-15; 7.7-11)*

<sup>1</sup> Tacahe, te jácani apanapa sache, ema Jesús mávihahi eta te mayujarasirarehi. Te títayujarápa, témeñahavapa ema émana máimiture, máichapa:

—Tata Viáquenu, pímitucavahi eta viyujarasirayare víti apanavare, tácuti eta máimitusiravacahi ema Juan ena máimitureanahi —macahepa.

<sup>2</sup> Tásiha, ema Jesús máimitucavacapa:

—Ani tacaheyare eta eyujarauchiravaina: Tata Vicaiyaquene, piti piávihahi te anuma, vipicauchahi yátupi eta píjare. Vivaraha ichapeina eta tasuapacarevaina eta pivanairipiana nayehe namutu ena achaneana ani te apaquehe, tacuti eta nasuapiravihi ena ángeleana te anuma. <sup>3</sup> Pájapanuhavi píjaracavahi puiti juca sache eta vicamunuqueneana vinicaquenerepiana.

<sup>4</sup> Pájapanuhavivare piperdonachavahi eta viviurevana piyehe. Víti apanava viperdonachavacaripa namutu ena ticaviurevanahi viyehe. Vahi picuisapavahi vicha eta tauriquene. Picatiuchavahi mayehe ema Váinaraji. Tacaheya eta eyujarauchiravaina.

<sup>5</sup> Máichavare ema Jesús:

—Tiuri, nímicutichinaheya puiti. Matiarahi ema émana achane. Tacahe, máitecapauchahi ema apana achane máitunacasarehi te enumuhu yati. Viajéropahi éma. Émasera ema avasarecuruhahi, tájina maviya eta máenicahini. Tásiha, mayana mayehe ema apana máitunacasarehivare. Máichainapapuca: “Picatajicanu, nucapucavi mapanaina pan. <sup>6</sup> Taicha títecapauchanuhi ema nítunacasare viajéropahi. Tájinasera nuviya nucumpirachahini”. <sup>7</sup> Tacahe, ema macaijuhequenehi váhipuca macujapanuhi,

macahénapapuca: “Vahi picujarareca eta néchapune. Pésamirisinanuvare eta tapaja tacaerataquenehi. Tímacanahivare ena nuchichanaveana. Vahi nítujicava néchepuca níjaracavihini eta pivarahaquenehi” macahenapapuca.  
<sup>8</sup> Máitunacasarequenénihipuca éma, váhisera máipurajihini máechepucahini máíjaracahini eta mayasesereruhi. Téhesera te tímiyanavapuca mapiararaca ema ticamunuvahi, németeaca tipamicavayarehi téchepuca, máíjaracayarehi eta macamunuquenepahi.

<sup>9-10</sup> Eta tacahe, numetacahe: Échajica ema Tata Vicaiyaquene. Eyaseacayare eta ecamunuqueneana. Éma, tijapanurahi. Tisamaheyare, tíjaracaheyareva. Vahi ecuyacuji eta eyaseasiraina. Téhevare tatiarihinapapuca eta jácani íchiraya ichapehi eta tacajeravaya, eyaseacayare máíjaracahehini eta ítupajijiasiravaya. Éma, tíjaracaheyare. Te jararihipuca eta táichejimiráuchahe, éma macaevuisihainaheyare. <sup>11</sup> Eta juca tímicutijiricavahi te natiarihipuca ena echichanaveanahi éti, te tiyaseacaheanapuca eta pan nancayare, váiparinehi táuricaimahi íjaracahini éti eta márijahi, tímicutijiricavaipa ecavijaruhini ena echichanaveana. Étaripa te tiyaseacaheanapuca eta jima, váhivare táuricaimahi íjaracahini eta quichare. <sup>12</sup> Étaripa te tiyaseacaheanapuca eta varayuha, váhivare táuricaimahi íjaracahini eta sáse. <sup>13</sup> Étiarihi éti vahi ecajirahihini nayehe ena achaneana. Iúrihisera nayehe ena echichanaveana. Ítucahi íjaracavaca jácani nayasearuheanahi táuriqueneana. Mavetiji ema Tata Ecaiyaquene tiávihahi te anuma. Éma, vahi ticavijaruheimahi eta te eyaseserepiana. Tíjaracaheyarehi tamutu eta eyasearuana, émaripa ema Espíritu Santo tiávahácaheyarehi —macahepa ema Jesús.

*Ena achaneana téjcapavanahi eta náimijachirahi ema Jesús mávaháruhi ema Váinaraji Satanás*

*(Mt 12.22-30; Mr 3.19-27)*

<sup>14</sup> Te apanaquenepa sache, ema Jesús macanaracahi ema achane, úpainihi eta máitaresira taicha eta mávahásirahi ema éreana. Tacahe, eta máuchusirapa ema éreana te máquehe ema úpainihi, tiúripa téchajica. Ichaperinehi nárami ena achaneana. <sup>15</sup> Natiarihihisera ena apamuriana achaneana, ánipa nacahehi:

—Ema maca Jesús, vémeteaca majupahahi ema Satanás, ema náquenuhurihi ena éreanana. Máíjararuhi jácani eta máitupajijiasiravahi eta macuchusiravacahi éna —nacahepa.

<sup>16</sup> Nararihihivare ena apamuriana achaneana váhivare nasuapapajicahini ema Jesús. Eta tacahe, navarahapa nacaicutiarayarehi, nayaseacapa macuchucahini eta tíramicare, máimereuchayare eta émairahi Cristo mavaneruhi ema Viya. Váhisera nasuapayarehini. <sup>17</sup> Émasera máimatihini eta napanereruana eta namasuapirahi. Máichavacapa:

—Nímicutichinahe puiti ena machanerana ema gobierno. Éna, vahi típutsimurihacacanaimahi apinainahipucaini partido. Te típutsimuriacacanapa, énajicacai papucaini tiáquipaicacana. Émaripa mácani achane te camurianahi ena machichanaveana, váiparinehivare típutsimuriavanaimahi náehajiricacahini, énajicacahini náquipaicacahini. <sup>18</sup> Ene macahehi ema Váinaraji Satanás, váiparinehi máisapahini típutsicacana ena machamuriana, taicha mavarahahi tisimutuanayarehi éna, tímiyanavayarehi eta nacaetemajirisirahaviyarehi. Éti ímijachaipa nútirichuhi machamuri ema Satanás, táichavenehi eta nuratahairahi nucuchucavaca ena éreanana. <sup>19</sup> Tájina vahi étupicavahini éti eta juca epanereruana. Te émahipuca tímicatatanuhi ema Satanás, énerichuhivare éti máimicataruanahivare jácani éma, eta ecuchusiravaca ena



éreanana. Epanerechinávanuma. <sup>20</sup> Émaquenehisera ema Viya, tíjaracanuhi eta juca nuratahairahi nucuchucavaca ena éreanana. Eta juca étara ícutiaraya éti eta matuparasiranuhi ema Viya eta nútirayare necha tamutu. Nútiripara nuti ecuchapaquenehi.

<sup>21</sup> Tacutiquene mácani achane tume. Te macaratacahi eta mataquiriqui eta majaneasirahi jácani macayehequeneana, nájina tiámeyechaimahi. <sup>22</sup> Téhesera macahepaipa mácani achane túmepanahi mayehe, maverejicayare eta mataquiriquini macasiñaquenehi. Máitiacavane. Tásiha, émapa técha tamutu eta majanearuinihi ema achane. Ene nucahehi núti, túmepananihi mayehe ema maca Satanás.

<sup>23</sup> Te vahi ecuehicanu, ecucaemataneacanu, éta tímereuchaheya machamurihehi éti ema ticatianacanuhi. Masapiha ímicatacahi éma eta macaetemajirisiranuhi.

*Éma Jesús máimicutichinahi ena masuapajirairahanahi mayehe (Mt 12.43-45)*

<sup>24</sup> Tímiyanava eta máechajirisiravahi ema Jesús, ánipa macahe:

—Énerichuvare éti ecuti mácani achane máinajiruhi ema émana éreana. Éma éreana tiyanainapa matanucainapa eta jácani masiapihayarehi. Éta mamaichimavira eta mavarahaquene, mapanerechayarehi tichava. Macahénapapuca: “Nuyanayare nuchava, nusiapahacayareva ema návaháruinihi”. <sup>25</sup> Te títecapapa ema éreana mayehe ema achane mávaháruinihi, máimahapa ema achane máinajicaripa tamutu eta mapecaturana, vuíchahasera máehicahini ema Viya. <sup>26</sup> Tásiha, tiúrisamurepa ema éreana. Tásiha, tíchuarecapa ena siétequeneana machamuriana. Váinarajipanána éna. Nasiapahacainavarepa namutu éna. Jéhesare, tiápajucavapa eta mavainarajiva ema paure achane —máichavacapa ema Jesús.

*Viúriyare te visuapa eta máechajiriruva ema Viya*

<sup>27</sup> Mapaenumavahi títapirica ema Jesús eta juca máechajiriruvanahi, tipiaracapa esu ésuna esena te namuri ena achaneana. Ánipa sucahehi:

—¡Tétavicavapa eta sucunachacarevahi esu pena, táichavenehi eta suínasiravihi, suájisiravihi eta sucajurusiravihi! —sucahepa.

<sup>28</sup> Éma Jesús majicapapa:

—¡Tiápajucavayaresera eta nacunachacarevayarehi namutu ena tisamanayare eta máechajiriruvanahi ema Viya, yátupiyarehi eta nasuapirayareva! —máichapa.

*Éma Jesús macajachavaca eta namasuapajiraivahi ena achaneana (Mt 12.38-42; Mr 8.12)*

<sup>29</sup> Tacahe, títeparacanapaichucha te machacaya ema Jesús ena camuriqueneana achaneana. Tásiha, eta máimitusiravacahi, máichavacapa:

—Nararihi ena achaneana puiti juca náetaviuchahi eta navainarajivana taicha vahi návarahahini nasuapa eta yátupirahi mavanerunuhi ema Viya. Tiyaseacuanahi nímechayarehi eta tiáramicare táicutiarahi eta mavanesiranuhi ema Viya. Váhisera nímechaimahi. Tacarichu náimahayare eta níchararacavaya tacuti eta máichararacavahi ema profetaini Jonás. <sup>30</sup> Éma profetaini Jonás yátupihahi ecutiararehi éma eta mavanesarahi ema Viya nayehe ena achaneana ticavasanahi te avasare Nínive. Éne nucahehi nuti Manerejirunuhi ema Viya, ecutiararenuhi puiti eyehe eti achaneana.

<sup>31</sup> Tacutiquene, esu reina Seba eta acane, te susamairiricapa eta máitupajijiasiravahi yátupi ema Salomón. Ésu, tayerehiquenehineni eta suávasa, tiyanahisera sucapayaca ema Salomón taicha suvarahahi susamayarehi éma. Tacahe, te táitecapapa eta sácheyare téchepucanaya namutu, suyaseacainapa ésu eta nacaicuñahini ena nani máetupicushmanahi puiti. Sucáhénapapuca: “Táuricapa nacaicuñahini ena nani máetupicushmana, tájinapa náetseraruina nasamaripa ema Cristo, ema títupajijiápanavahi mayehe ema Salomón, tásiha vuíchahacaruva nasuapa” sucahénapa jácani. <sup>32</sup> Tacutiquene ena achaneana ticavasanahi acane te Nínive. Tisipecaturarahiana éna. Natupiruvahisera nasuapa eta mametarairu ema Jonás. Téneuchavavaneanahi. Tásiha, nacahe-  
napapuca te jena sácheyare: “Táuricapa nacaicuñahini ena nani maparajuruana ema Cristo, taviuchahi eta namasuapirahi éma. Taicha éma máuriquene-  
panahi mayehe ema Jonás” nacahe-  
napa. Eta máimiturapiana ema Jesús, tamichahu eta vítaresira

(Mt 5.15; 6.22-23)

<sup>33</sup> Tímiyanava eta máechajirisirava ema Jesús, ánipa macahe:

—Súnsuanahi nácani tiyustacanahi eta lámpara namicahuyarehi, tásihasera nanacapapucaini te jácani tayumururevahi cuarto, najihapaicapucaini te cajune. Tacamunuhi nanacayarehi te anuquehe. Jéhesare, tamicauchasarepa tamutu apaesa tímairicanapaipa nácani tisiapanapahi. <sup>34</sup> Ene ecahehi éti, eta esuapirahi eta nímiturapiana, tétavicavahi eta tamicauchiraya eta iáchanevana. Tímijunijicayare eta emaurivahi. Téhesera vahi esuapahini, tétavicavahi eta tamapicuvahi eta iáchanevana. Tanasipa tamutu eta tamaurivahi. <sup>35</sup> Eta tacahe, machu ecainajiruva tayehe eta juca esamaqueneanahi ímahaqueneanahivare, machu tayanariana te timapicu eta iáchanevana. <sup>36</sup> Téhesera yátupina esuapa eta nímiturapiana, tétavicavaya eta tamicauchiraheya tayehe eta ítaresiranahi. Tásiha, vahi eyaseacanuimahi nímechahe eta tiáramicareana —macahepa.

*Ema Jesús máimereuchavaca eta nájecapiravana ena fariséoana énapa ena escribánoana*

(Mt 23.1-36; Mr 12.38-40; Lc 20.45-47)

<sup>37</sup> Tacahe, te títapiricapa ema Jesús eta máechajisirahi, témeñahavapa ema émana fariseo. Macumpirachapa tinipanayarehi te mapena. Masuapahisera ema Jesús. Tiyana te mapena ema fariseo. Te tiúripa eta tinicacare, téjacapa ema Jesús te mesa. <sup>38</sup> (Tiuri, ena fariséoana, jucarihi eta nayeherepi te tinicanayare, tayanapanehipuca tipachivahuanahi, ticasipavahunumanyarehisera. Eta juca nasipavaurusiravahi, namavarairahi náechipejicahini eta náchanevana.) Émasera Jesús, vahi masipavaurucavanumahini. Tacahe, máraminehi ichape ema maca fariséo eta mamaitauchirahi eta nayeherepianahi éna. <sup>39</sup> Émasera ema Viáquenu Jesús máichapa:

—Eti fariséoana, eta eyeherepiana, ecaeñamaracavahi esipacanuma eta enisirareana étapa eta érirareana, emavarairahi táetseraruinahini tasiapahini eta pecatu te iáquehe. Étisera iápajupanavahi eta tachipejivahi eta iáchanevana táichavene eta evainarajivana, étapa eta tavayuasirahehi eta ejamurachirahi tamutu. <sup>40</sup> ¡Tétavicavasamihi eta tamuracavahi eta esamureana! Ema Viya vahi tácarichu máimaha eta te iáquehe eta tiávihi te ínahu. Énerichuvare máimahahi eta tiávihanahi te amahe esamureana. Éma yátupihhi eta máimatirahehi. <sup>41</sup> Tatuparacahi eJapanurahiya nayehe ena ticamunuvanahi. Tátupiruva te esamureana te échajiricava apaesa tacuijasarepa tachipejivaina eta iáchanevana.

<sup>42</sup> ¡Páurehesami eti fariséoana! ¡Tétavicavahi eta tamuracavaya eta ícuñayare! Éti ímijachavahi yátupiquenehi eta religiósóhérahi eta epamisirava eta ecamavahuirahi me Viya eta diésmuri tayehe tamutu eta évaraqui. Ecunachacarehi taicha éta. Váhisera ecatiuchavacahini ena achaneana páureana macatiuchavarahana. Váhivare émunacahini ema Viya. Yátupi tituparacahehi eta ecamavahu eta diésmuri íamavahuana. Énerichuvare tituparacahehi eta eJapanuraivaya, yátupinavare eta émunasiraina ema Viya.

<sup>43</sup> ¡Jucarihivare eta apana tiviuchahehi eti fariséoana! ¡Tétavicava eta esiñavavaisirahi! Emetapa evaraha tipicauchaheana, ticaejacaheana te táurinaquene siya eta te iúrujisirarevana. Evarahavare tipicauchaheanayarehi eta náechajisirahéana te cálleana.

<sup>44</sup> ¡Jucarihivare eta apana tiviuchahehi eti escribánoana, étipa eti fariséoana, táichavenehi eta apimirairahehi! Ímijachavahi epicauchacarehiji. Étisera eta eyeherepiana, émejecapavacha ena achaneana eta náehisirahi ema Viya. Páureanasami éna. Váhi náimatiequenehahini eta náejecapiravahi táichavene eta evayuasirahi eta ecaetemairavacahi —máichavacapa ema Jesús.

<sup>45</sup> Matiarhivare ema émana maestro eta mavanairipiana ema Moisés. Máichavarepa:

—Tata maestro Jesús, eta piyunasiravaca ena fariséoana, tétavicavapa tayunasirahavihi víti apanavare viti máestroana. ¿Pivarahapuca vicaviurevahivareni víti? —máichapa.

<sup>46</sup> Tacahe, ema Jesús majicapapa:

—¡Eti apanavare eti máestroana, tétavicavahivare eta eviurevahi! ¿Tájaha tacayema epamicavacahi ena apamuriana achaneana eta júcana eyeherepiana tacajeraqueneana? Nájinapa tiratahaimahi títaucha. Apanasica éti váhivare ítauchahini.

<sup>47-48</sup> ¡Jucarihivare eta apana tiviuchahehi eta tamuracavaya eta ícuñayare! Éti ecáijare apimirana, taicha ímijachavahi machanerahe ema Viya eta eyehehearasirahi eta náecariana ena profetanaini nacaparuanahi ena iáchucanaveanaini. Puiti étarichuhi tacahehi eta epanereruanahi eta evarairahi ecapacahavi viti mavanaranahi ema Viya taicha eta épuruirahi eta vímiturapianahi táuriqueneanahi. <sup>49</sup> Ema Viya, acane tímatihehi eta ecutirayarehi eta napanereru ena iáchucanaveanaini ticapacanahi ena profetanaini. Eta tacahehi eta máechajiriruvanahi: “Nuvanecayare ena profetana; tásiha, nuvanecayareva ena apóstoleana. Váhiquesera nasuapaimahi ena tisamanayarehi eta náimiturapianaya ena nuvanarana. Napanajiricavacayarechucha ena nuvanaranahi. Natarihiyareva ena nacapacayarepahi” macahehi ema Viya. <sup>50-51</sup> Eta tacahe, numetacahe núti: Eti nujaneanana israelítana etiarihiqueneanahi puiti, ecaicuñayare, taicha timuriacahehi eta naviurevahi ena iáchucanaveanaini taicha eta nacapapajisiravacahi ena profetanaini. Acane te tépanavainapa eta apaquehe, ema Abel máinapuiruhi nacaparuhi. Máequeneruhi nacaparuhi ema maca Zacarías, ema nacaparuhi te tamirahu eta Templo. Camurianahisera ena náumurivanaini. Puiti étipa tamuriacahi eta ícuñayare naicha ena iáchucanaveanaini.

<sup>52</sup> ¡Páurehesamichapucaini eti máestroana! ¡Camuriquenehi eta eviurevanahi! Tamapurujipa eta ímatiequenehairainihi eta yátupiqueneana títuacáreana, taicha vahi esuapaimahi, váhivare éhicaimahi. Éti tásihahi íchejimiráurucavacahi ena tivarahanahi tisuapanaya, náehicaya ema Viya —máichavacapa ema Jesús.

53-54 Tacahe, eta nasamirahi ema Jesús ena fariséoana énapa ena máestroana, tiseanmarinehi eta mayehe. Tépanavanavarepa náitsamarareca eta nayasesirapahi, navarairahi nasama te máejecapavahipucaini eta macayemaque-  
neanapahi, navarairahi eta tiviuchayarehi éma.

## 12

*Ema Jesús vahi mávaraha apimirahávina*  
(Mt 10.26-31)

<sup>1</sup> Tacahe, te jena sácheanahi, títeparacanapaichucha ena camuri-  
queneana achaneana. Tiyututucavanapa. Énaserá ena máimitureana ema  
Jesús návihahi te machacaya. Tásiha, máichavacapa namutu:

—Tímaticarehi eyehe eta levadura eta tasisijisirahi eta masa. Tacutirichu  
eta tapareasirahi eta apimirairanahi ena fariséoana. Échapavaicha éti, machu  
napareacahe éna. <sup>2-3</sup> Ema Viya tímararacahehi tamutu eta íchaqueneanahi,  
tayanapanenénipuca eyumurucavaquenénapuca te timapícu. Tisamahe-  
hivare tamutu eta échajiriruvanahi. Tímatihivare tamutu eta epane-  
reruana. Te jácani sácheyare ticaecherayare tamutu, tétavicavaya eta etsiri-  
hairaya taicha eta emaurivanahi —macahepa.

<sup>4</sup> Étiripa eti némunacasareana, numetacahe: Vahi ecupica nácani nacapa-  
capuca eta iáquehe, tacarichusera náituruequenehayare. <sup>5</sup> Numetacaheva,  
macarichu ema Viya epicayare, taicha macarichu éma téchahi eta ítaresirana.  
Jéhevare, éma maratahahi macamítiequeneha eta iáchanevana tayehe eta  
táiñehiquene yucu infierno, te ecainajiruva táichavenehi eta episirapuca eta  
nacapasiráhena. Jéhevare, éma epicayare.

<sup>6</sup> Nímicutichinahe eta cáyurechicha. Éti ímijachapapuca vahi tasivachahini  
éta. Téñamacareanahisera me Viya. Éma, téchavacahi eta táitaresiranahi.  
<sup>7</sup> Evetijipa éti, éñamacarepanahi me Viya. Éma téchahehivare tamutu eta  
ítaresirana. Váiparinehi témitisicahémahi. Eta tacahe, vahi ecueñamava éti  
tayehe eta ítaresirana, taicha tétavicavahi eta emunavahi éti mayehe. Éma,  
máimatihí eta tatupa eta echutimacana. Vímereuchavayarehi eta véhisira ema  
Jesús

(Mt 10.32-33; 12.32; 10.19-20)

<sup>8</sup> Numetacahe puiti, nuti Manerejirunuhi ema Viya: Namutu ena  
tímereuchavanahi eta náehisiranuhi te namirahu ena achaneana, núti  
apanavare nímereuchaya eta nuchanerairavacahi éna te namirahu ena  
ángeleana mayeaneanahi ema Tata. <sup>9</sup> Nácanisera vahi návarahahini náimereu-  
chavahini eta náehisiranuhi, núti apanava nímereuchaya eta vahi nuchanera-  
nainahini éna te namirahu ena ángeleana mayeaneanahi ema Viya.

<sup>10</sup> Namutu nácani ticaecahinuanahipuca nuti Manerejirunuhi ema Viya,  
tiperdonachacareana. Nácanisera nacaecahipuca ema Espíritu Santo, vahi  
tiperdonachacareanaimahi éna.

<sup>11</sup> Jararihiyare eta sácheanayare tíamaheanaya te namirahu ena nacapi-  
tarana eta te náurujisirarevana, énapapuca ena tuparairucana, énapapuca ena  
juéseana te jácani avasareana eta nayaseseresiraya. Váhisera ecueñamava  
tayehe eta jácani ecatiuchiravayare. <sup>12</sup> Ema Espíritu Santo tímitucaheyare eta  
táurivayare eta ecayemayare te jena sache ecayaseserehinapa —macahepa.

*Vahi táurica tahapasamurechahavi eta vímahaqueneanayare*

<sup>13</sup> Matiaríhi ema achane te namuri ena camuriqueneana achaneana.  
Máechajicapa ema Jesús. Máichapa:

—Tata maestro, pímicatacanu, pimetaca ema nuparape máijaracanu eta nuyehe parte eta nímaequeneruyare eta máimahaquenéni ema ticachichanuini —macahepa.

<sup>14</sup> Ema Jesús majicapapa:

—Nuchicha, ¿tájaha tacayema pivaraha pinacanu juésnuyare eta eyehe? Vahi nútina néchaheyare tayehe eta máimahaqueneanaini ema ticachichahéni —máichapa.

<sup>15</sup> Énerichu máichavacavare ena apamuriana achaneana:

—Échapavavare éti apanavare, machu émunahiricava, ejamurarahi tayehe eta tímahacareana. Taicha eta tímahacareana te juca apaquehe, vahi étaina ticaitarecaheyare. Vahi táeñamacarehini.

<sup>16</sup> Tacahe, máimicutiarachinavare:

—Matiarihi ema achane ricu. Ichape eta máesane. Tiúrina eta máevaru.

<sup>17</sup> Tacahe, ema ricu mapanerechapa, ánipa tacahe eta mapanereru:

“Ániquehepa eta juca névaru, tájinapa núnasiha. ¿Tájahapuca nícharacaya?

<sup>18</sup> Tiúripanapuca nuvetataha eta núnavarahi nujanejuecha. Ichapepanainapa

nicha eta táitsivaya. Tiúripanainapa, apaesa táirijica tamutu eta néchatijiru

étapa eta apamuriana nucayehequeneana. <sup>19</sup> Tásiha, nucahénapa: Jéhevare

puiti tétávicavapa eta núrivayare. Tájinapa níchiravaimahi. Ichapemurihi

eta núnaru. Taratahaquene juca áñoanayare. Nucanaracavaya nútí. Tamutu

sache tiúriya eta nunisira, néraya. Ichape eta núrisamurevaya” macahepa

ema ricu. <sup>20</sup> Tásihasera ema Viya máichapa ema achane: “Tétávicava eta

pisunsuva, piti achane. Puiti jena yati pépenaya. Tájina vahi pítapanaimahi

eta juca piúnarui”. <sup>21</sup> Ene nacahe ena achaneana ticurujiricana

eta náimahaqueneana nayechiravarichu. Vahi nápanerechahini

naicha eta táuriqueneana tacunachacarehini me Viya taicha tétávicavahi

tahapasamurechirahi eta nacaimahaquenéraya.

*Ema Jesús tímitucahavi eta majaneasirahavihi ema Viya*

*(Mt 6.25-34)*

<sup>22-24</sup> Te apahequenepa, ema Jesús máichavacapa ena máimitureana:

—Étisera, nuvaraha ácasiñava yátupina mayehe ema Viya. Vahi ecucaeña-

maracavavaicha tayehe eta enicaquenerepi étapa eta emuiriharapi puiti juca

ítaresiraichaha. Eta enicaquenerepi étapa eta emuiriharapi, tájina táeñama-

vacarevaina. Ímararacarichuhi eta cáyureana. Vahi tacañamaracavahini

tayehe eta tanicaquenerepi. Vahi táevacahini, váhivare táechatijiricahini,

táunacahipucaini eta tanicaqueneyare. Émasera ema Viya máechapajiricahi

máijarasirahi tamutu eta tanicaquenerepiana. Evetijipa éti, iápajupanavahi

eta éñamacarévhahi me Viya tayehe eta cáyureana. <sup>25</sup> Vahi táuricahini eta

ecaeñamaracavahini eta júcana. Eyehe éti, nájina naratahahini étijivainahini

ecajurucavahini, tayanapane te tihapasamurechahehipuca. <sup>26</sup> Vahi étiji-

vaimahi íturucava ecajurucavahini, váhivare táuricahini ecaeñamaracavahini

tayehe eta júcana.

<sup>27</sup> Ímararacarichuhi eta tajurusirahi eta flúreana, vahi tacañamaraca-

vahini tacaematanehini, táijururecahipucaini. Táitsivahisera, te tépunehapa,

tétávicavahi táurinavahi eta taflurene. Nájina nácuti eta nacamuirihaira

eta táurinava, émaripa ema víyarahaini rey Salomón eta tajananusira eta

macamuirihairahinihi. <sup>28</sup> Apanasica ema Viya máijaracahi eta táurinavahi,

áni pirichuhinéni eta táítaresirahi. Evetijipa éti eta máechapajirisirahehi,

máijarasiraheyarehi eta emuiriharapi eti achaneana. ¿Tájaha tacayema vahi

ácasiñavahíni eta mayehe? <sup>29</sup> Eta tacahe, vahi ecucaeñamaracavaicha tayehe



eta enicaquenerepiana étaripa te échuririacapuca eta une érayare. <sup>30</sup> Ena apamuriana achaneana te juca apaquehe, ichapemurihi eta tacañamara-siravacahi eta júcana. Vahi nácasíñavahini mayehe ema Viya, nacuchapahipucaini eta máijararuyarehi éma. Étiserá, ecasíñavayarehi eta matiarihirahi ema Ecaiyaquene. Máimatíhi éma tamutu eta ecamunuiravanahi. <sup>31</sup> Eta tacahe, tativayare íjaracava ecaemataneacaya ema Viya, ecasamureraya eta ítauchirayare tamutu eta mavarahaqueneanahi. Máimaharinepa éma. Tíjara-caheyare tamutu eta ecamunuqueneana.

*Te vicajirica eta vímahaqueneana, vijacapyare eta táitsivayare ánaqui te anuma (Mt 6.19-21)*

<sup>32</sup> Vahi ecupica, eti nuchichanaveana. Tayanapane vahi camurihénahini, eti máichuhaqueneanahi ema Ecaiyaquenehi. Éma téchahehi. Eta tacahe, tétavícvahí eta mavapínairavahí eta majacapírahehi, machaneraheya. <sup>33</sup> Tacahe, te ecaimahaquenepuca, íjararecayare eta ímahaqueneana. Íjaracayare nácani ticamunuvanahi. Tásiha, ema Viya máimahainepa, éma tíjara-caheyare eta táitsivayare ánaqui te anuma. Máitavacacainapa eta ecaimahaqueneraya. Tájínava-repa tévajaicavaimahi. Váhivare táeñamavacare ánaqui taicha nájinapa tíámeyechahemahi, váipavare cachusirimahi eta ímahaqueneanayare. <sup>34</sup> Éti, te ecasamurepuca eta ímahaqueneanahi te juca apaquehe, evarahahi enasiyare te juca. Vahi ávarahahini ejunijicahini eta ímahaqueneana. Téhesera te ecasamurehichapuca eta ícuchiana te anuma, ánaqui evarahayare eyanavaneyare.

*Yátupina eta vicuneuchiravaina*

<sup>35</sup> Éti, yátupina eta ecuchapiranuya eta nuchaviraya. Etsecavaya tamutu sácheana. <sup>36</sup> Ácutíhi nácani achaneana músuana titsecavanahi te tapaja navejieuqueraya ema náquenu eta machaviraipahi másihairahi mayehe ema arayenahi. Te máehahamecapa eta tapaja, enevaneyarepa éna navejieuquenehayare. <sup>37-38</sup> Tayanapane enumuhupuca yati, tijararahipuca eta machavirayarehi ema náquenu. Tétavícvasera eta náuricacarevahi ena músuana eta machimapirahi ema náquenu eta nacuchapirahi, te vahi náimacaequenehahini. Nutupiruva numetacahe: Yátupinasarepa eta máurisamurevayare ema náquenu, macaejacavacainapa te mamesara, máenicavacainapa. Émajacaruvainapa máechapajiricavacayare. <sup>39</sup> Nuvaraha ácaicutiaraquenéna. Machu ácutiriana mácani achane námeyeruhi ena tíamerahiana. Tájina máechapiavahini tájahapuca hórayarehi eta náitecapauchiraya te mapena. Te máechahipucaini, ticuneuchavaipahini éma, váipasare nacuameyechahini. <sup>40</sup> Eta tacahe, éti écaunechavayare tamutu sácheana, taicha vahí échaimahi tájamuhuyarepuca eta nuchavirayare nuti Manerejirunuhi ema Viya, machu íárameca —macahepa.

*Nararihi ena músuana tíuriana. Nararihivare ena músuana máurirahana (Mt 24.45-51)*

<sup>41</sup> Tacahe, ema Pedro mayaserecapa. Ánipa maicha:

—Tata Náquenu, eta juca pímicutiarachaquenehavíhi, ¿vieveheyarechuchapuca viti dócequeneana, téhesera vimutupuca viti véhicavianahi? — macahepa.

<sup>42</sup> Tacahe, ema Viáquenu majicapapa:

—Nímicutichinahepa eta apana. Macañárihipuca ema empleado máetaviuchahi eta máitupajijiasiravahi. Tisuapajirahivare éma. Ema máquenu tiyanayarehi te apana avasare. Táitusiava matuparacahi ema empleado

eta máijarasiraya eta tinicacare ena apamuriana machamusuvanahi. <sup>43</sup> Tétavicava eta máuricacarevaya ema maca ticatuparahahi, te tamutuhi máitaucha jácani machimampirana ema máquenu. <sup>44</sup> Németeaca, eta tamutuirahi tiuri eta machimampirahi, matuparacainapa éma téchayarehi tamutu eta máimahaqueneana. Eta tacahe, nuvaraha ácutipaini ema maca empleado tiúrihi eta máitauraiva. <sup>45</sup> Téhesera, váhipuca tiuri eta mapanereruana ema mácani empleado, máimijachaichucha tiyereyarehi eta máitecapirayarehi ema máquenu. Tásiha, macaetemajiricavacapupuca ena machamusuvanahi, énapa ena vanaracanahi. Máichapupuca eta piesta, téniricapa térapa, ticavahapa. <sup>46</sup> Tásiha, vaipa manecapauchavahini te títecapapa ema máquenu. Tásiha, machimaracapa ema empleado eta mamapachichijisiraipa eta máimahaqueneana. Eta tacahe, ema máquenu macavanairipinapa náestacayare muraca, taicha eta mamasuapajiraivahi.

<sup>47</sup> Tacutiquene mácani musu, te máechahi eta mavarahaqueneanahi ema máquenu, tásiha vahi máitauchahi eta mavanahianahi éma, muracayarehi eta macaicuñairayare. Ticaestayarehi éma. <sup>48</sup> Mácanisera musu, te vahi máechahi eta tacayemaqueneana, tásiha téjecapavapa, éma apaesayaréchu eta máicuñayare. Étipa eti ecaimitucasianahi eta yátupiqueneanahi, tatuparacahi ímitucavacayare ena apamuriana achaneana. Núti, ánaquiaparipa eta nímitu-siráhehi; tásiha puiti, étipa táehanacahi eta juca ímituresirayare.

*Ena achaneana nacatianacainapa ena téhicanaya ema Jesús  
(Mt 10.34-36)*

<sup>49-50</sup> Núti, eta nítesirahi te juca apaquehe, tímitecanuhi eta népeniraya. Yátupiyare eta nucatajivairayare, naicha ena ticatianacanuana. Éti apanava, ticatianacaheanayare táichaveneyarehi eta éhisiranuhi núti. Tímicutijiricavayarehi te tipaica eta yucu, eta tamuruira eta muiji. Eta juca, nuvarahaquenehi táitauchavavanehini. <sup>51</sup> Éti ímijachaipapupuca eta nítesirahi te juca apaquehe, tájina tácyemacarémahí, ímijachaipavarepuca tiúricavacareyarehi nícha. Váhisera ene tacahe. Táichaveneya eta éhisiranuhi, ena achaneana tépuruheanaya térajicavanaya eyehe. <sup>52</sup> Taicha puiti juca vicaijuheyare, te natiarihinapupuca te étanahi peti mácani achane, esu mayena, esu machicha, ema machicha, ésupa esu chínenaca. Te mapananahipuca ena téhicanuanahi, tásiha apinanahipuca ena ticatianacanuana. Téhesera apinanahipuca ena téhicanuanahi, mapananahivarepuca ena ticatianacanuana. <sup>53</sup> Mácani achane, súcani esena, te natiarihi ena nachichanaveana, nacatichayarehi ena ticachichanahi táichaveneyarehi eta náehisiranuhi éna. Mácani apana achane masuapajirairahahi, súcani esena, nacatichayarehi ena nachichanaveana táichavenehi eta náehisiranuhi, énapa ena nachinenanaveana.

*Ena achaneana timasuapanahi eta máimeruana ema Viya  
(Mt 16.1-4; Mr 8.11-13; Mt 5.25-26)*

<sup>54</sup> Tacahe, ema Jesús máechajicapa ena achaneana:  
—Te ímaha timapicurume, émeteacaripa tiquivayare. Ene tacahehi. <sup>55</sup> Técativapupuca te vana, émeteacaripa váipavare tiquivaimahi\*. Énevare tacahehi. <sup>56</sup> ¡Eti masuapajirairahana! ¡Yátupihinéni ímatiequenehahi te tiquivayare, váhisera ávarahahini ímatiequeneha eta máimeruhehi ema Viya, te juca sácheana nucachanerahehi!

<sup>57</sup> ¿Tájaha tacayema vahi ávarahahini éhica eta juca yátupiqueneana?  
<sup>58-59</sup> Járjapainapa eta sache ticaicuñanainapa namutu ena achaneana.

\* **12:55** Te jena avasare Judea, te táerisine eta sache eta tásirareasa eta tiquiva. Étasera eta táchusiha eta técativava te vana, tájijicahi tamutu, taicha tijuruhimuhivare.

Tacamunurichu etanucayare puiti ema Viya, ecasiñayare ecuchucuiyavaina. Eta juca tímicutijiricavahi mácani achane te ticametauchacasiya. Tatuparacahi tativaya máetupiricanumaya eta mayaseasirayare perdón ema timetauchahi, mapurare vuíchaha masiapahini te cárcel. Taicha te masiapapa, ticajeraequenénapa eta máuchucuiraina. Numetacahehi puiti: Te jácani esiapa eta yucu infierno, váhiquene iúchucaimahi éti —máichavacapa ema Jesús.

## 13

### *Tavaraha náeneuchava ena achaneana*

<sup>1</sup> Étarichu te jena sache, títecapanavarepa ena apamuriana achaneana. Nametacaipa ema Jesús eta táíñehiquene máichaquenéhi ema Pilato, étaripa eta máimicapasiravacahi ena tiyujaracanahi te jena Templo te Jerusalén. Ánivare nacahe:

—Ena nani, galiléoanahi éna. Tépenanapa te tachacayanahi eta sárareana nacaparuanahi námavahuásanahi. ¿Étapuca eta nasipeaturaivahipuca tímicapacavacahi? —nacahepa.

<sup>2</sup> Tacahe, ema Jesús máichavacapa:

—Éti ímijachaipa táimicaparuhi eta nasipeaturaivanahi ena nani nayehe ena apamuriana najaneananahi te Galilea. <sup>3</sup> Nútisera numetacahe: Váhira étainahi táimicapacahini eta nasipeaturaivanahi. Vahi étaparacaina. Tacamunusera éneuchavavane éti, machu tájahúchava eta épenira, machu ácuti éna. <sup>4</sup> Némechahe ena nani diéciochoqueneana tacaparuanahi eta táevajaisiravahi eta torre tayuchamarainihi te calle Siloé. Ímijachapapuca táimicapacavacahi eta táichapevahi eta naviureva, navetijipapuca nayehe ena apamuriana ticavasanahi te Jerusalén. <sup>5</sup> Nútisera numetacahe: Váhira ichapena eta naviureva ena apamuriana. Étiripa, te vahi ecueneuchava, énerichuvare tijahúchavaya eta épenira —macahepa.

### *Ema Jesús máimicuticha eta yucuqui máhiriquire*

<sup>6</sup> Eta máechajirisirahi ema Jesús, máimicutijirichinapa. Ánipa macahehi:

—Matiarihihi ema achane. Tatiarihihi eta masucure higo. Máhiriquirehisera. <sup>7</sup> Tacahe, máichapa ema mamusura: “Mapanapa año vahi ticahi eta juca nusucure. Péchupaicayare puiti taicha tiápitaváiricaipa eta te juca isaniti” macahepa. <sup>8</sup> Émasera ema musu majicapapa: “Tiúripanapucaini, tata, vicuchapaichahaini étanainavaréni año. Nuvaraha némurinahechayare eta máteji apaesa tacahipapucaini. <sup>9</sup> Téhesera váhiquenénaichapuca tacucahi, néchupaicasarepa” macahepa ema musu.

### *Ema Jesús macanaraca esu esena tépiñumaiquehe*

<sup>10</sup> Te apanapa sávaru, ema Jesús tímiturecavarepa tayehe eta náurujisireva. <sup>11</sup> Sutiarihihi esu esena mávaháruhi ema éreana, tépiñumaiquehehi eta suítaresira. Vahi táurihini sutupinahahini. Diéciocho áñoripa eta sucajumairahi. <sup>12</sup> Te máimahapa ema Jesús, máichuhapa. Tacahe, supauchapa. Máichapa ésu:

—Páurevi piti esena, picajumahi. Puítisera pinaracainapa —máichapa.

<sup>13</sup> Tacahe, ema Jesús manacapa eta mavahuana te suápusi. Enevanepa titupinahahi ésu, tinaracapa eta sujumainihi. Ichaperinehi eta sucunachirahi ema Viya. <sup>14</sup> Matiarihihivare ema táquenuruhahi eta náurujisireva. Eta máimarahi eta juca, tisemarinehi taicha eta macanarasirahi ema

Jesús esu sucajumaquene te jena sache sávaru tacapicahuquenehi. Tásiha, máichavacapa ena achaneana:

—Saisi sache tatuparaha eta vicaemataneraya, énerichuvare eta nacaipui-rayareva ena nacajumaqueneana. Puítisera juca sache, vahi táuricahini nacaipuhini taicha tacapicahuquenehi —macahepa.

<sup>15</sup> Tásiha, ema Viáquenu Jesús, majicapapa:

—¡Tétavicavahi eta tamuracava eta esamureana! Te ticaitiquihi eta epera te jácani sache sávaru, evejapuacayarehi eta ésichirayare eta une, tayanapane tacapicahuquenehinéni eta sache. <sup>16</sup> Suvetijicha esu suca esena vícutiquenehi achane, mámariequenehi ema viáchucaini Abraham, ticatajicacarehi eta nuncanarasirayarehi tayehe eta máitiarapi ema Satanás. Taicha dieciocho añoripahi eta máecájumachirahi ésu. ¡Táuricahi nuncanaracayarehi puiti juca sache tacapicahuquenehi! —máichapa ema Jesús.

<sup>17</sup> Eta nasamirahi ema Jesús, namutu ena ticitianacanahi titsirihana-rinehi. Énaserá ena apamuriana achaneana tiúrisamureanarinehi, taicha eta náimairahi eta táuricacarequeneana máichaqueneanahi ema Jesús.

*Éma Jesús máimicuticha eta taqui eta mostaza  
(Mt 13.31-32; Mr 4.30-32)*

<sup>18</sup> Ánivare macahe ema Jesús:

—Puiti nuvaraha nímicutichinahe eta nímiturapiana nuti Manerejirunuhi ema Viya. <sup>19</sup> Tacutihi eta ánichichaquene taqui eta mostaza. Te máevacapa ema achane te máesane, tiúnarahiyarehi eta tajurusira. Tásiha, járajapainapa eta cáyureana, ticamacajiyarehi te tatavana eta sucureca.

*Éma Jesús máimicutichavare eta lévadura  
(Mt 13.33)*

<sup>20</sup> Ánivare macahe ema Jesús:

—Nímicutichinaheyareva eta apana. <sup>21</sup> Eta nímiturapiana tacutihivare eta lévadura. Esu súcani esena tiúrihi eta tasisijisira eta suyehe lévadura te tamutu eta suépiyaruhi masa, tayanapane apinapucaini arroba eta suyehe jarina, tasihajicahisera. Jéhesare, tiápucayarehi tiuri —macahepa.

*Vicamesavayare visiapa te tapaja ánicurichu  
(Mt 7.13-14, 21-23)*

<sup>22</sup> Éma Jesús tiyanavare tipaica. Máimitucavacahi ena achaneana te jácani avasare máitecapihapahi. Macaijuhehi eta Jerusalén, váhisera máitecapavanehini. <sup>23</sup> Matiarihíhi ema tiyaseserecahi éma, ánipa maicha:

—Tata Viáquenu, ¿váhipuca camurihavianainaya viti viúchucuhanaya? —máichapa.

Tásiha, éma majicapapa:

<sup>24</sup> —Vahi táechacare te ánimuriheanayareichupuca eti esiapanaya eta mávasa ema Viya. Étisera tacamunu epamicava esiapaya puiti. Vahi ecuyacuji. Taicha camurianayare ena apaesachicharichu eta navarairahi tisiapanaya, váhisera títujicavanaimahi. <sup>25</sup> Taicha járajapainapa eta sácheyare, nératacainapa eta tapaja. Tásiha, ítecapapapuca éti, éhahamecapa eta tapaja, epiaracanupa: “Tátachicha, pivejieuquenehahavi”. Tásiha, nujicapahénapa núti: “¿Nájahahesica éti? Vahi nímatihe. Váhivare nuchanerahénahi éti”. <sup>26</sup> Tásiha, ejicapanuinapapuca: “Vítirichu picachanequeneanahi te mesa eta vinisirahi. Pímitucahavíhivare te plaza te jena viávasa”. <sup>27</sup> Tásiha, nujicapahénavarepa: “Esamanuripa, vahi nuchanerahéna éti. Évuisiha eta te juca, emutu eti ícharahianahi eta tamauriqueneana” níchahénapa. <sup>28</sup> Járajapainapa

eta sache ímahainapa te tajuhe eta mávasa ema Viya te návihahi ena viáchuca-naveanainihi: émaripa ema Abraham, ema Isaac, ema Jacobo, énapa namutu ena profetana. Étisera enasinapa te aneca. Tétavicavaya eta íyauchiravaya, ecapitiquiahechiravaya taicha eta ecatisamuréravaya étapa eta etsiriraya eta emasiapirahi. <sup>29</sup> Nasapiha tisiapanaya ena camuriqueneana achaneana tiáshayanare te tamutu avasareana te juca apaquehe. Tétavicavainapa eta náurisamurevaya. <sup>30</sup> Tásiha, te jena sáchezare, nácani téquenehanahi puiti, nasapihainapa tisiapanayare. Étisera eti ínapureanahi puiti, étinavarepa vahi ítujicavaimahi esiapa —máichapa ema Jesús.

*Ena Jesús ticatisamureva náichavene ena achaneana ticavasanahi te Jerusalén*

*(Mt 23.37-39)*

<sup>31</sup> Tacahe, te jena sáche, títecapanapa ena fariséoana te mávihahi ema Jesús. Náichapa:

—Piyana. Pitátájiva piúchuca eta te juca. Taicha ema Herodes mavaraha ticapacaviyare —nacahepa.

<sup>32-33</sup> Émasera ema Jesús majicapapa:

—Eyana emetaca ema mácara ticaetemarhiquene. Vahi típicararecanuimahi núti eta juca mametarapihi. Nunasiyarechaha puiti, nucanararecanumayare ena nacajumaqueneana énapa ena návaháruanahi ena éreanana. Núti jucarihi eta nématanerepipahi eta tímipaicanupahi puiti juca sácheana, nítauchanumayare tamutu. Vahi émainayare técha eta népeniraya. Yátupisera eta Jerusalén návasahi ena ticapahianahi ena profetanaini.

<sup>34</sup> Tétavicavahi eta táimicatisamurechiranu eta viávasa Jerusalén. Nama-puruji ena tachichanaveanasami. Éna, ticapapajicanahi ena profetanaini mavanaranahi ema Tata. Puiti navarahainapa nútípavaya ticapacanuana. Ichapemurinehi eta níchuiravacahi éna, náurujiacanuhini tacutihini eta varayu te tacurujimuriha eta tachichanaveana te tapava. Váhiquesera návarahahíni. <sup>35</sup> Náimahainapasera eta náichararacavayare. Ticaquipai-casiyare tamutu eta napenana. Táimijunavacainapa éna eta napisiraya. Numetacahevane puiti: Eta nínajiasiravacainapa, vaipa tímahanuanaimahi. Tiámainucavainapa te náitsivacha eta napanereruana, navarahainapa tijacapanuana. Nacahénapa: “Ichape eta vicunachiravi píti vanairucaquenévihime me Viya” nacahénapa.

## 14

*Ena Jesús macanaraca ema achane tiámaquiape*

<sup>1</sup> Tacahe, te jena sache sávaruhi, ema Jesús ticaichuhacasihi tinipanaya te mapena ema émana náiyamuri ena fariséoana. Ticaichuhacasianahivare ena apamuriana fariséoana, énapa ena máestroana tayehe máimiturapiana ema Moiséni. Navarahahi nacaicutiarayarehi ema Jesús. <sup>2</sup> Tíjahúchavapa tímercava te nataracu ema émana achane macajumaquene. Tiámaquiapevacahi éma. <sup>3</sup> Ema Jesús, eta máimairahi ema macajumaquene, mayaserecavacapa ena natiarihiqueneanahi:

—¿Táuricapuca vicanaracavaca ena nacajumaqueneana puiti juca sávarumuhuirahi tacapicahuquenehi? —máichapa.

<sup>4</sup> Énasera vahi najicapahini, timatinanarichucha. Tásiha, ema Jesús macaratavauchapa ema macajumaquene. Eta macaratavauchirahi, enévanepa tinaraca. Tacahe, máevatacapa mayana te mapena. <sup>5</sup> Tásiha, máichavacapa ema Jesús:



—Nímicutichinahe puiti. Éti, németeaca májina émanaina achane vahi macujapanuhini eta mapera burro, mavuiyerapuca, te tiáquiipaicavahi te pusu te jena sache tacapicahuquenehi. Eta máeñamirahi, tipatsicavayarehi macaechepupana eta paure sárare, tayanapanehinéni eta sache tacapicahuquenehi —máichavacapa.

<sup>6</sup> Énaserá vahi napatsicavahini najicapahini. Timatinanarichucha.

*Eta maconsejarapianahi ema Jesús*

<sup>7</sup> Eta máimararasiravacahi ema Jesús ena macumpirachaqueneanahi ema fariseo, énajivahi tinerejiuchavana eta náejasihayarehi tiúriapanana. Tacahe, ema Jesús maconsejachavacapa, ánipa máichavacahi:

<sup>8</sup> —Te natiarihinapuca nacumpirachahe, vahi ecainapupuicavaimahi ecaejacava tayehe eta téjasihacareana taicha tijuricati eta máejasihayarehi mácani ticapicahupanahi eyehe éti. <sup>9</sup> Taicha ema téniricahi, éma ticaejarecayarehi, tijuricati macaechepucavi te péjasihahi macaejasihayarehi mácani apana. Titsirihacarepahi eta macaejacavihini te náequenemuri.

<sup>10</sup> Te ecaichuhacasipuca, ecaejacavaya te náequenemuri, apaesa ema téchahi tíchuhahénapa ticaejacaheyare te návihahi ena típicauchacareanapanahi. Tásiha, ecunachacarénasarepa nayehe ena natiarihiqueneana.

<sup>11</sup> Taicha nácani ticasiñavavaicanahi tímijachavanahi ticapicahuana, ema Viya máimicatsiriacavacayarehi. Nácanisera mánsuanahi eta náitaresira, ichapeyare eta nacunachacarevayare me Viya.

<sup>12</sup> Ema Jesús maconsejachavare ema fariseo, ema ticumpirarecahi:

—Píti apanavare, te péniricayare, vahi nacucarichu píchuhavaca ena pémunacasareanahicha, ena piparapenaveanapuca énaripa ena rícoana, táichavenénahi eta pivarairainahi títsirijicavanaya eta piyehe. <sup>13</sup> Píchuhavacayareva ena páureana, nácani nacahe mahianahi: túpúpavaquiána, masariana, púchuquiána. <sup>14</sup> Taicha ena nani, vahi títsirijicavanaimahi eta piyehe. Táitsivasera tétávicavayare eta piúricarevayare píti eta pijacapirayare eta píchuhihi te jena sáchezare picachanevacayare ena náuriqueneanahi macaechepureana ema Viya —macahepa.

*Ema Jesús máimicutichinavare ema achane tíchuhavacahi ena achaneana, máeniruanayare*

<sup>15</sup> Tacahe, eta nasamirahi ema Jesús ena natiarihiqueneanahi te mesa, téchajicapa ema émana. Ánipa macahehi eta mayehe ema Jesús:

—Tétávicavayare eta viúricarevaya te visiapapuca eta mávasa ema Viya, vinicayare te mamesara —macahepa.

<sup>16</sup> Tásiha, ema Jesús majicapapa, máichapa:

—¡Jéhesare, te esiapapapucaya! Nímicutichinahe puiti. Matiarihihí ema émana achane téniricahi eta ichapemuriquene tinicacare. Camuriana ena máichuhaqueneanahi. <sup>17</sup> Te máimahapa tiúripa eta tinicacare, mavanecapa ema mamusura mametacavaca náitecapa ena nacaichuhacasiqeneanahi taicha tiúriripahi eta tinicacare. <sup>18</sup> Namutusera natanucapa eta náetseraruyarehi. Ema apana ánipa macahehi: “Vuíchaha nítujicavaimahi níteca. Nuyananumayare nímahapanayare eta nuvachareruhi apaquehe”.

<sup>19</sup> Ema apana énerichuvare, ánivare macahe: “Picatajicanuchaha. Vuíchaha nítujicavaimahi níteca, taicha nuyananumayare nímahapanayare eta cinco yúntaquene vuiye nuvachareruanahi”. <sup>20</sup> Ema apana ánivare macahe: “Nupaenumava nítauchavahi eta nuvehacacairahi. Eta tacahe, vahi nítujicavaimahi níteca”. <sup>21</sup> Te tichavapa ema musu vanairucahi, mametacapa ema máquenu eta namaitujisiravavacahi títeca ena máichuhaqueneanahi.

Tásiha, tise mapa ema máquenu. Máichavarepa ema musu: “Tiuri, piyana puítirichu te plaza étapa te cáleana. Píchuhavaca ena páureana, ena masariana, ena púchuquiana, nácani pétupiaruanayare nacahemahiqueneanahi”.<sup>22</sup> Tacahe, te tichavavarepa ema musu, mametacapa ema máquenu, máichapa: “Tata, nítaucharipa eta juca pivanairipihi. Jucarihichahasera eta juca téjasi-hacareana”.<sup>23</sup> Tacahe, ema máquenu máichavarepa: “Piyavare puítirichu te isanítiana. Píchuhavaca ena achaneana, nácani piácapajiruanayarepahi te achene. Picamesavaca náiteca, apaesa nayuriticava eta juca téjasi-hacareana mávacuanaichahahi. <sup>24</sup> Nuse macarupa puiti. Nájinava néniruimahi ena náinapureanahi níchuhagueneanahi” macahepa ema téniricahi —máichapa ema Jesús.

### *Vahi máejeraréna eta véhisiraya ema Cristo*

<sup>25</sup> Te jena sácheana, camuriana ena achaneana téhicanahi ema Jesús. Tásihasera, éma máesenimurihapa. Máichavacapa:

<sup>26</sup> —Te etiarhipuca éti evarahanayare éhicanu, tacamunu epamicavaya yátupina eta éhisiranuya. Nútinapa émunacapanayare, németavicainapa eta émunasiravacaini ena ticachichaheana. Mácani achane németavicayareva eta máemunasiraini esu mayena, machichanaveanapuca, maparapenaveanapuca. Váipavare éñamaimahi eta ítaresira. Téhesera apaesarichupuca eta émunasiranuyare, vahi táuricaímahi éhicanuhini. <sup>27</sup> Ecatajivayare taicha eta éhisiranuyare. Te epicahipuca íjaracava muraca, táimicapacahepuca eta éhisiranuhi, tiúripaichu vahi ecuehicanu. <sup>28</sup> Tacutiquene te epanerechahipuca éti épiyarecayare eta anuquehe peti apinapuca piso, vahi táuricahini émunanasicavahini enahahajisiravainarichuini ecaematane, epanerechanumayarehi áyanayarehipuca egastaruya ítauchirainahi eta evarahaquenehi épiyaca. <sup>29</sup> Vahi ácaemuñavaimahi épiyareca eta tiúrina peti, te vahi áratahaimahi ítaucha. <sup>30</sup> Tásiha, nacahénapapuca ena ticaecahiheanayare: “Ímahapa, váhira máratahahini máítauchahini eta jena peti, táurinaqueneya-rehíji. Tíjaracavasamipa. Ichape eta mamelaya” nacahenapapuca. <sup>31</sup> Émaripa mácani rey, te tise mahipuca, mavarairahi máichayare eta guerra, macanayarehi mácani apana rey camuripananahi ena machanerana, mapanerechanumayarehi te maratahayarepuca macanara taicha éma vahi camurianainahini ena machanerana. <sup>32</sup> Eta máimairahi vahi máratahayarehi, váhivare tíjaracavaimahi máehacacahini. Tásiha, máimivanerecainapa mayehe ema mánarayarehini táitavapa eta semanerehi, vaipa nacupanerechahini. <sup>33</sup> Ene ecahehi éti. Eta evarairahi éhicanu, epanerechanumayarehi eta ínajisirayare tamutu, eratahairayarepa yátupi eta éhisiranuyare. Taicha te vahi eratahayare, vahi ecucaemuñava éhicanuhini.

<sup>34</sup> Eta icheve, tétavicavahi eta táurivahi taicha eta tacamunucarevahi. Étasera eta tajachira eta icheve, tépurucarepahi. <sup>35</sup> Tájinapa tacamunucarevainahini. Ticaquijiyarepa. Ene nacahehi ena tínajicavana eta náehisiranuhi. Nacutihi eta tajachira eta icheve. Te evarahapuca ecaicutiara, tavaraha eta epanerechinavaya —macahepa.

## 15

### *Ema Jesús máimicutichinahi te témitiaca étana uvesa (Mt 18.10-14)*

<sup>1</sup> Tiuri, te jácani sácheana, títecaparacavarepa ena achaneana te mávihahi ema Jesús. Camurianapahi éna. Natiarhipahi ena cóbrarécarahiana eta impuestoana. Namutu éna, ichape eta náepurucarevahi nayehe ena fariséoana.

Émasera ema Jesús, vahi máepuruvacahini. Tásiha, témeñahavanapa éna te machacaya, taicha navarahapa nasamararacayarehi éma. <sup>2</sup> Natiarihipa-hivare ena fariséoana énapa ena máestroana. Ena nani, vahi náuricahini eta macachaneiravacahi ema Jesús ena nani achaneana. Ánipa nacahe:

—¡Vahi tiuri eta máichaquenehi ema maca! ¡Namutuchucha majacapavaca ena nacahequetátájiana ticajachahacareanahi! ¡Nasapihapa macachanevacahi eta nanisirahi ena nánitatajiana! —nacahepa.

<sup>3</sup> Tacahe, te masamapa ema Jesús eta juca, máimicutichinavacapa eta máimitusiravacahi. Ánipa máichavaca:

<sup>4</sup>—Esamanuchaha. Nímicutichinaheya puiti. Matiarahi ema émana achane. Ticayehehi eta cien uvesa. Te témitiyechapuca eta étana, ema achane tiyanayarehi matanuca eta táemitiaruhi. Eta máeñamiravahi, majunijicayarehi eta apamuri noventa y nueve uvesa te majaneasihahi. <sup>5</sup>Jéhesare, te máichimavapa eta táemitiaruhi, tichavapa tiúrisamurepaipa. Mámapaipa te machepe. <sup>6</sup> Te títecapapa te mapena, máichuhapa ena machacayapenana májiriareana. Tacahe, máichapa éna: “Yare, éti apana iúrisamurevare nuyehe núti. Taicha níchimavaipahi eta uvesa táemitiaruhi” máichapa ena májiriareana.

<sup>7</sup> Tiuri, núti numetacahe eta juca: Énerichu ema Viya te anuma tiúrisamurevare nayehe ena achaneana tiúritaresiranahi, taicha tájina náejecapiravainahini. Tétavicavainehisera eta máurisamurevahi ema Viya nayehe nácani achaneana tímatianahi eta nacapecaturairahi, tásiha téneuchavanapa, náinajicapa eta napecaturanaini —macahepa ema Jesús.

#### *Éma Jesús máimicutichinahi eta táemitiaru étana reale*

<sup>8</sup> Tímiyanava eta máechajirisirava ema Jesús, ánipa macahe:

—Nímicutichinaheya eta apana. Sutiarihi esu ésuna esena. Ticayehehi eta dies reale eta tijapu plata. Te témitiyechapuca eta étape, tinanesiyarehi sutanucayarehi eta táemitiaruhi. Eta sutanusirayare, suyustacainapa eta sumicahu. Supihicainapa tamutu eta te tajuhe eta supena. <sup>9</sup> Te suíchimavapa, tiúrisamurénapa. Suíchuhavacainapa ena suchacayapenana suájiriareana. Tacahe, suíchavacainapa éna: “Yare, éti apana iúrisamurevare nuyehe núti, taicha níchimavaipa eta reale nucamitiaruhi” suíchavacainapa esu esena ena suájiriareana. <sup>10</sup> Tiuri puiti, núti numetacahe eta juca: Éne macahehi ema Viya. Tétavicavainehi eta máurisamurevaya te namuri ena ángeleana eta máeneuchiravapa mácani achane cápecaturarahini, máinajisiraipahi eta mapecaturanaini —macahepa ema Jesús.

#### *Éma Jesús máimicutichinahi ema émana achane amaperu tacamitiriaru eta matuhusiva*

<sup>11</sup> Tímiyanava eta máechajirisirava ema Jesús, ánipa macahe:

—Matiarihahi ema émana achane. Apinanahi ena machichanaveana. Ajairana. <sup>12</sup> Étana sache, máichapa ema maiya ema émana machicha amuyapana: “Tata, picatajicanupa, píjaracanu puiti eta nuyeheyare tatucachequenenuyare eta picayehequeneana” máichapa. Tacahe, tísapavapa ema naiya. Máijaracavacapa eta máimahaqueneana ena apinana machichanaveana. <sup>13</sup> Tacahe, étarichuhi te jena sácheanahi, tétupiricavapa ema amaperu, tiyanavanepa. Mámapa tamutu eta mayehechiravaripahi máijararuhi ema maiya. Tiyanapa te apana avasare tayerehiquene. Eta ánaqui, máitaiyahi tamutu eta máimahaqueneanaini. Tamutupa mamapachichijica. <sup>14</sup> Tacahe, eta jena sácheana, táitecapauchapa eta ecuha eta avasare mávihahi ema amaperu.

Tacahe, namutu ena achaneana tayehe eta te avasare téchurihanapa eta tinicacare. Tivayuchavapa eta ecuha. Ema amaperu títarahaipahi eta máimahaqueneanaini. Tásiha, tájinapa maviyahini eta manica. <sup>15</sup> Tásiha, ticaquenurecapa mayehe ema émana achane. Tacahe, ema máquenuhi mavanecapa ema amaperu eta majaneasinaya eta cúchiana eta te máesane. <sup>16</sup> Ichapesera eta máecuavahi. Majamurachainehi manicahini eta taniru eta cúchiana, taicha nájina náitátihini éma. <sup>17</sup> Tacahe, téquécavapa eta mapanereruanahi. Tipanerequenehavapa émajiva. Ánipa tacahehi eta mapanereruhi: “Namutu ena mavanarana ema tata, tiúrihi eta nanisira. Nútisera ani ticapacanuinapa eta nécuava. <sup>18</sup> Níjaracava, nuyana nuchava eta me tata ticachichanu. Tásiha, níchayare éma: Tátachicha, nucapecaturaipa mayehe ema Viya étapa eta piyehe piti tata. <sup>19</sup> Tayanarinepuca táimicutijiricavainepuca vahi pichichanuina. Picatajicanusera. Pijacapanu, nímiáquenuchavarine piyehe piti tata. Nácutirine ena pivanarana. Níchayare ema tata”. Tacahepa eta mapanereruhi ema amaperu achane.

<sup>20</sup> Tásiha, tiyanapa tichava eta me maiya. Te tiánehipa títecapa ema amaperu, máimahapa ema maiya. Enurujipa máimativane. Ichaperinehi eta majapanuirahi. Enurujipa tiyana tijunapa mácapa. Majupahacapa ema machicha. Máetserarecapa eta máurisamurevahi. <sup>21</sup> Émasera ema amaperu, téchajicapa. Ánipa maicha: “Tátachicha, nucapecaturapa mayehe ema Viya étapa eta piyehe piti tata. Tásihasera, tayanarinepuca táimicutijiricavainepuca vahi pichichanuina” máichapa. <sup>22</sup> Émasera ema maiya, mavaraha máimerecaya eta yátupirahi eta majacapirahi ema machicha. Vahi máicuñacahini. Tásiha, mavanecapa ena mavanarana. Máichapa: “Etátájirica, iama eta muíriare tiúrinapana. Emuiriacha ema maca nuchicha. Iama eta tiúrinapana surtija; masurutijaina. Iámavare eta tiúrinapana eparupeva, máeparupevaina. <sup>23</sup> Énerichuvare épana eta jena mamona tiújepana. Ecapaca, vinica. ¡Víchayare eta piesta! Viúrisamurevaina eta máitecapirahi ema maca nuchicha. <sup>24</sup> Taicha éma, tímicutijiricavahi eta máepenaquenénahini ema maca, puítisera tiúchujicapa tichavapa ani nuyehe. Máemitiaruhi te numirahu, puítisera nímahapa éma” macahepa ema maiya. Tacahe, ichape eta náurisamurevahi namutu. <sup>25</sup> Tiuri, ema émana machicha máechavihi tiyanahi te isaniti. Te tichavapa, te tiánehipa eta napena, masamapa eta piesta te tajuhe. <sup>26</sup> Tásiha, máichuhapa ema émana nacajurure. Mayaserecapa: “¿Tájaha tacayema eta juca piesta?” macahepa. <sup>27</sup> Tacahe, máichapa ema macajurure: “Ema piparape títecapahi. Tásiha, ema piya máimicapacapa eta étana mamona tiújepana. Ichape eta piesta, taicha eta máurisamurevahi ema piya eta máitecapirahi ema piparape” máichapa ema macajurure. <sup>28</sup> Tacahe, tise marinehi ema maparape. Vaipa mávarahahini masiapahini. Tacahe, te máechapa ema naiya, tiúchucapa. Macamesapa macasiapa. <sup>29</sup> Majicapapasera ema machicha, ánipa maicha: “Pímaha, tata. Ánaquiapapa eta nítatíravihi núti. Tájina nímatiyahini nácapaemachavihini te pivanairipiana. Tásihasera, tájina píjaracanuhini eta étanainahini chívachichainapucaini eta nunicahini nucapiestarahipucaini núti, nácachanehini ena nájiriareana némunacasareana. <sup>30</sup> Tásiha, puiti pímicapacainehi eta mamona tiújepana, taicha eta máitecapirahi ema émana pichichatataji. Ema mácatataji títahacavahi eta píjararuinihi picayehequeneanainihi náichavenehi ena esenana túhusiana” máichapa ema machicha. <sup>31</sup> Tacahe, ema maiya máichapa: “Pímaha, nuchichachicha, píti ánaquiaparipa eta péjahasiranuhi. Tásiha, tamutu eta nucayehequeneanahi, piyeheanahivare píti. <sup>32</sup> Puítisera,

táuricaichucha vicha eta piesta eta viúrisamurevainahi, taicha tímicutijiricavahi eta máepenaquenénahini ema maca piparape, puítisera tiúchujicaipa, tichavapa éma. Ema máemitiaruhi te vimirahu, puítisera viápechavavarepa vímaha éma” máichapa.

Tacahehi eta máechajiriruvanahi ema Jesús nayehe ena achaneana.

## 16

*Eta máimituresirahi ema Jesús, máimicutichina ema capataz timapachichijicahi eta máimahaquene ema máquenu*

<sup>1</sup> Ema Jesús ánvare macahehi eta máimitusiravacahi ena máimitureana:

—Nímicutichinahe eta apana. Ema achane rico, matiaruhihi ema mayehe capataz, téchahi tamutu eta máimahaqueneana ema máquenu. Tásiha, masamairicapá ema máquenu eta mamapachichijisiraipahi eta máimahaqueneana. <sup>2</sup> Tacahe, ema máquenu máichuhapa. Mayaserecapa: “¿Tájaha tacayema eta juca? Nusamauchavihi eta pimapachichijisirahi eta nímahaqueneana”. Émasera ema capataz tájina maviyavahini macatiuchiavahini taicha yátupihí eta máejecapiravahi. Tacahe, ema máquenu máichapa: “Tiuri, vitupaequenehayare tamutu taicha vaipa nuvaraha pímiyanava eta nuyehe”. <sup>3</sup> Tacahe, ema capataz ichaperinehi eta mapanereresirahi taicha eta máuchusiraya. Tásiha, macahepa te mapanereruana: “¿Tájahainapapuca nícharacavayare puiti? Ema náquenu ticuchucanuina tayehe eta juca nématanerepihi. Ichape eta nutsirihacarevayare taicha vahi núrihahini nucaematanehini eta ísaniti, váhivare nuratahaimahi eta tamuracava eta emataneca. Titsirihacarehivare nuyaseserecáhini eta nunicaquene. <sup>4</sup> Tiuri, áni nucaheyare. Némeñahavayare nayehe ena ticanteveanahí mayehe ema náquenu, tiámainucava te nítucavapapucaini eta nítatijiyavayare” macahepa te mapanereruana.

<sup>5</sup> Tacahe, máichuhavacapa namutu émanapahi ena ticanteveanahi mayehe ema máquenu. Tacahe, mayaserecapa ema máinapuiruhi: “¿Péchapuca áyana eta pintevehi mayehe ema náquenu?” <sup>6</sup> Tacahe, ema ticantevehi majicapapa: “200 lata eta aceite comer eta nuntevehi mayehe”. Tacahe, ema capataz máichapa: “Júcahi eta piyehe vale pifirmarúhi. Puítinarichu vítsivachaya eta apana vale. Vaipa pivachachaimahi tamutu. Cien latainarine eta pinteveyare” macahepa. <sup>7</sup> Tacahe, mayaserecavare ema apana: “¿Pítiyapa péchapuca áyana eta pintevehi?” Ema ticantevehi majicapapa: “Séisicientohi tarera eta trigo eta nuntevehi mayehe”. Tacahe, ema capataz máichavarepa: “Júcahi eta piyehe vale pifirmarúhi. Vítsivachaya eta piyehe vale. Vaipa pivachachaimahi tamutu. Quinientorine tarera eta pinteveyare”. Ene tacahehi eta máichirahi nayehe ena apamuriana ticanteveanahi, máitsivachirapaipahi eta nayeheana váleana. <sup>8</sup> Tacahe, te máechapa ema máquenuini eta máichaqueneanahi ema mayeheni capataz eta macatiuchiravahi, ániapa macahe: “Tétavicavapa eta máitusirahi masámápuha ema maena nuyeheni capataz” macahepa ema máquenuini. Ene nacahehi ena achaneana máimati- rahanahi ema Viya. Éna tiápajupanavanahivare eta náitusirahi eta tayanirava. Nacachuricahi ena téhicanahi ema Viya, taicha tavayuacavacahi eta tájiparacana.

<sup>9</sup> Puiti numetacaheyare eti nímitureanahi: Eta ítaresirahi te juca apaquehe tauriquenehi, te ecaimahaquenehipuca, ecajiyare te napauchahepuca ena ticamunuvanahi. Tacahe, te ítecapapa te mávasa ema Viya, tiúriyare eta ítecapiraya, ánaqui ejacapainapa eta táitsivayare.



<sup>10</sup> Taicha nácani tiúrihi eta náechapajirisirahi jácani ánichichaquenehi, ene tacaheyarehi eta táurivayare eta náechapajirisirayare eta camuriquenehi. Nácanisera vahi tiúrihi eta náechapajirisirahi jácani ánichichaquenehi, éneyareichuhivare vahi tiúrimahi eta náechapajirisirayare eta camuriquenehi. <sup>11</sup> Taicha te vahi tiúrihi eta ítauchirahi eta ecatuparahairahi échapajiricaya eta tímahacareanahi eta te juca apaquehe, ema Viya vahi tituparacahémahi eta tímahacareana yátupiqueneana te anuma. <sup>12</sup> Eta tacahe, ítaurahiya tayehe jácani apayeheana apaesa máijaracahe ema Viya eta ícuchihi, taicha eta máimairahi éma eta íturaivahi éti.

<sup>13</sup> Éti, eta ítaresirahi, vahi táuricahini apinanainahini ena iáquenuana. Taicha émunacapanayarehi ema émana, tisuapacarepanayarehivare. Tásiha, ema apana, apaesarineya eta émunasiraina, váipainapa tisuapacaremahi éma. Ene tacahehi eta juca ímahaqueneana, vahi ecuisapa tahapasamurerecahehinehi eta plata, machu tahapapiricaheriana eta émunasirahi ema Viya, étapa eta ecaemataneasirahi éma —máichavacapa ema Jesús ena máimitureana.

*Éma Jesús maconsejachapa ena fariséoana  
(Mt 19.1-12; Mr 10.1-12)*

<sup>14</sup> Natiarihihivaresera ena fariséoana. Nasamararacahi eta juca máimiturapianahi ema Jesús. Tásiha, nacaecahirichuchasera eta nasamirahi éma. Taicha tétavicavahi eta tavayuasiravacahi éna eta tímahacareana. <sup>15</sup> Tacahe, ema Jesús máichavacapa:

—Éti épiyacavahi iuri eta ímairavahi nayehe ena achaneana. Émasera ema Viya máimatihinehi eta esamureana. Macatianacahi ichape éma eta apimiráhérahinehi.

<sup>16</sup> Numetacahevare eta apana: Ema víyarahaini Moisés, énapa ena víyarahaini profetana tínapucanahi eta náechajisihinehi tayehe eta nítésirayarehi nuti Cristo ecuchapaquenehi. Puiti ichape eta navapinairavahi ena camuriqueneana téhicanuanapaipa. Éti apana, tituparacahe éhicanuyareva.

<sup>17</sup> Numetacahe puiti: Váhiquene títavaimahi eta tasuapacarevahi eta máechajiriruvana ema Tata. Máichecuaraquire éta, tayanapanehipuca táitava eta anuma étapa eta juca apaquehe. <sup>18</sup> Éti, eta ímiturapi, ísapahi mácani achane máquijica esu mayena, tásiha, ísapahivare maveha esu apana esena. Nútisera numetacahe: Mácani achane, te máinajicapuca esu mayena, tásiha maveha esu apana esena, éma ticapecaturaipahi me Viya. Tacutiquene mácani apanavare achane mavehapa esu esena máinajiruhi ema suima, énerichuvare ticapecaturahivare me Viya taicha ésu, matiarihichahinehi ema suímaquenehi —máichavacapa.

*Éta macatajivairahi ema rico étapa eta máuricacarevahi ema paure ticaijare  
Lázaro*

<sup>19</sup> Tacahe, ema Jesús máimitucavacavare ena achaneana. Ánipa macahe:  
—Nímicutichinahe eta apana. Matiarihinehi ema émana achane. Mavayuchahi eta marricuva. Tétavicavahi táurinavahi eta macamuirihaira. Tijanunuhacanecha. Tamutuhi sácheana máicha eta táurinaquene piesta. <sup>20</sup> Tásiha, matiarihivare ema apana achane paure ticaijare Lázaro. Ticajumahi. Amairihinehi carachachaha eta majuma. Téjahapairicahinehi éma tamutu sácheana te mapajacura ema rico. <sup>21</sup> Ema maca paure tiyaseserecanehi manicayare eta máemacharajiana ema rico. Tájinasera náijaracaimahi. Tavetijipa, vahi túmenahinehi ema paure. Vaipa maratahahinehi macatiuchavahinehi eta táeverasirahinehi eta tamucuna eta macarachana. <sup>22</sup> Étana sache titecapapa eta máepenirahinehi ema paure. Nárajapapa ena ángeleana;

náepanapa eta máchaneva ema Lázaro, námapa tayehe eta paraíso mávihahi ema viáchucaini Abraham. Tacahe, te táequenepa, tépenavarepa ema rico. Tiúrinavare eta náecarirahi. <sup>23</sup> Eta máepenirahi éma, tiyanapa tayehe eta macatajivaiyarehi. Tásiha, te téjamiháuquichapa, máimahapa eta mávihahi ema Abraham, émapa ema Lázaro te machacaya. Mayerehivacahisera eta máimairahi. <sup>24</sup> Tacahe, tipiaracapa ema rícoini: “Tata Abraham, pájapanunu. Picatajicanu, pivanesianuini ema Lázaro máechipaicaini apaesachichaini eta mavauqui te une. Máecasarechapanaini eta nunene. Taicha tétavicavahi eta numaunevahi eta te juca nucatajivaiyahi tayehe eta juca návihahi táijurequene yucu” máichapa. <sup>25</sup> Émasera ema Abraham majicapapa: “Vahi nuvanecaimahi. Péchavachucha, nuchicha, te achanevichaha, tétavicavahi eta piúricacarevahi. Tájina pácamunuhini eta pítaresirahi. Ánipasera picatajivaiyahi. Émasera ema maca Lázaro, ichapemurihi eta macatajivairahi te achanerichaha. Puítisera vaipa macatajivahini. Puiti éma, majacaparipahi eta máuricacarevahi. <sup>26</sup> Tacutiquirene máitujihini eta mánucuirainahini eta ára piyehe. Pítiripa váhivare pítujicavaimahi pítecapauchahavi ani te juca viávihahi víti, taicha jucarihi eta tíchejimirauchahavihi eta viánucuirainahini tacutihi eta tiúchausi cajacure. Máitujihini eta mayanahini” macahepa ema Abraham. <sup>27</sup> Tacahe, ema rícoini máichavarepa: “Tiuri, te váhipuca títujicacarehi, picatajicanusera. Pivanesianuini mayana ema Lázaro te nupena. <sup>28</sup> Mametapaninanuini ena cincoqueneana nuparapenaveana. Maconsejachapanavacaini eta náeneuchiravainaini éna, apaesa váhini nacuitecahini tayehe eta juca návihahi núti nucatajivaiyahi”. <sup>29</sup> Émasera ema Abraham máichavarepa: “Éna, narataha téchajicurecana, ticaravahuanayare eta Sagrada Escritura. Te nasuapahivarepuca eta tavanairipianahi, vahi tisiapanaimahi eta te jara ecuñaraqui piávihahi píti”. <sup>30</sup> Ema rícoini majicapavarepa: “Táitaurevaquene ene tacahehi, tata Abraham. Tiúripanahiserahipucaini mayanahini ema émana máepenaquenehi eta nayehe ena nuparapenaveana, mametapanavacahini. Németeaca téneuchavavaneanapaini”. <sup>31</sup> Ema Abraham máichavarepa: “Te váhipuca nacusuapahini eta Sagrada Escritura, tacaheyarehi eta namasuapirayare mácani máechepurehi máepenaquenehi” macahepa ema Abraham.

## 17

### *Ichape eta máicuñayare mácani tímiaquipaica te pecatu ena amaperuana (Mt 18.6-7; Mr 9.42)*

<sup>1</sup> Te táequenepa, ema Jesús mametamurihavarepa ena máimitureana. Ánipa macahe:

—Yátupi eta vahi téjiacavaimahi eta tímiaquipaicayare tayehe eta pecatu ena achaneana. Ichapesera eta náicuñayare nácani táemesiavanayare náimiaquipaisiraya nácani apamuriana tayehe eta pecatuna. <sup>2</sup> Mácani tímiaquipaicaya ema émana amaperu, tiúripanahipucaini máepenahini mativainahini éma. Váhirichupucaini macucaicuñahini; taicha vahi macuimiaquipacahini ema amaperu tayehe eta pecatu. <sup>3</sup> Eta tacahe, échapavaya éti machu ímiaquipaica ena amaperuana.

### *Tatuparaca viperdonacha ena téjecapavana viyehe (Mt 18.21-22)*

Numetacahe eta apana: Te máejecapavapuca ema piparape eta piyehe, piconsejachaya. Téhesera máeneuchava eta piyehe, piperdonachaya éma.

<sup>4</sup>Tayanapane siétehénapuca máejecapava te étana sache, máeneuchavasera eta piyehe, tituparacavi piperdonachayare —macahepa ema Jesús.

*Tamutuyare virataha te yátupihí visuapa ema Viya*

<sup>5</sup>Tiuri, ena apóstoleana nayaserecapa ema Jesús:

—Tata Viáquenu, picatajicahavi. Pímitucahavi apaesa tajurucapaipaini eta vicasíñairavahi mayehe ema Viya. Vivaraha ichapenaini eta vicasíñairavaya eta mayehe —nacahepa.

<sup>6</sup>Tacahe, ema Jesús majicapavacapa:

—Vahi tácomesa ichapenahini eta ecasiñairavahi mayehe ema Viya. Tayanapanepuca ánichichainarichu eta ecasiñairavahi, tácutipuca eta táquichicha eta mostaza, tamutuyare erataha. Étaripa eta jácani yucuqui, te evarahapuca ecayejeca, eratahayarehi. Te íchapuca: “Piyejecava eta te juca, piyana pisucuchava te cáquiure”; tásiha, eta yucuqui tisuapaheyarehi. Tiyejecavainapa tayehe eta cáquiure.

*Tatuparaca vítauchayare eta vicaemataneasirayare ema Viya*

<sup>7</sup>Étaripa ema mácani achane te ticamusurahi, te másihapaipapuca ema musu te vámahí eta majaneasirahi eta vaca, te tísahhipuca, te títecapapa te peti, ema máquenu váiparinehi matátáuchaimahi máepiyaca eta tinicayare eta máenisiraya ema musu. <sup>8</sup>Matátáuchayarechucha mavaneca ema musu émaina máepiyaca eta tinicacare, máenicayare ema máquenu. Tásiha, máichainapuca: “Tiuri, nítanesipa. Pítipavapa pinica”. <sup>9</sup>Váiparinehivare mahasulupayachaimahi ema mamusura eta máitauchirahi eta mavanhianahi. <sup>10</sup>Ene ecahehi éti, ecuti ema musu. Te ítauchapa tamutu eta evanhiana me Viya, ecahenapa: “Viti músuanahi vahi vicunachacarémahi. Tacarichuhi vicha eta vivanhianahi” ecahenapa —máichavacapa ema Jesús.

*Ema Jesús macanaracahi ena diésqueneana leprosoana*

<sup>11</sup>Tímiyanavavare tipaica ema Jesús, macaijuhepa eta Jerusalén. Máetaví-cavacapaipa eta avasareana te provincia Galilea étapa eta Samaria. <sup>12</sup>Te máítecapauchapa eta apana avasarechicha, tiúchujicanapa ena diésqueneana ajairana ticajumana eta lepra. Nacapayacapa éma. Váhisera náemeñahavahini éna, nayerehichucha. <sup>13</sup>Tacahe, napiaracapa ema Jesús:

—Tata Jesús Nazareno, pájapanuhavi. Picatajicahavi, picanaracahavi eta vijuma —náichapa.

<sup>14</sup>Tacahe, ema Jesús máesenicavacapa. Tásiha, máichavacapa:

—Eyana, ímrecava te namirahu ena tuparairucana apaesa náimamaracahe. Énainapa nametajirica eta iúri vaipa, enarasiraipahi eta ejumanainihi —máichavacapa.

Nasuapavanehi éna. Tásiha, eta nayanirahi, tinaracanapaipa. <sup>15</sup>Tacahe, ema émana, eta máimairavahi eta manarasiraipahi, tichavapa te mávihahi ema Jesús. Tipiaracapaipahi muraca eta macunachirahi ema Viya. <sup>16</sup>Matupirupa tépuyucahi te mamirahu ema Jesús. Tétipaicapa macaítecapa eta mamira te apaquehe, mamaverarasiravahi eta mahasulupayachirahi ema Jesús. Ema maca achane, indigenahi samaritano. <sup>17</sup>Tacahe, ema Jesús máichapa:

—Ticutimahi diésnahi ena nuncanararuanahi. ¿Tájahapuca tacayemahi vahi nachavahini ena apamuriana nuévequeneana? <sup>18</sup>Macarichuhi tichava ema maca apavasaguesamihí, macunachapaipa ema Viya.

<sup>19</sup>Tacahe, ema Jesús máichapa ema achane:

—Péchepuca, piyana pichava. Pinaracaipasera táichavenehi eta picasiñairanuhi —macahepa.

*Eta ecutiarareanaya eta máitesiraya ema Cristo  
(Mt 24.23-28, 36-41)*

<sup>20</sup> Tiuri, ena fariséoana nayaserecavare ema Jesús tájamuhuyarepuca eta máitecapiraya ema Cristo nacuchapaquenehi. Éma, majicapavacapa:

—Eta máitecapiraya ema ecuchapaquenehi, tájina metárapimahi eta máimeresiravaya éma. Vahi tácajerahini eta ímairaya. <sup>21</sup> Nájinavare timetajiricaimahi eta máitecapiraya taicha matiarhipahi éma puiti ani. Nútiripa — máichavacapa.

<sup>22</sup> Tacahe, máichavacapa ena máimitureana:

—Tatiarihiyare eta sáchevayare ichapeyare eta ecaimairunuiraya. Tétavacavaya eta evarairaya íjahúchavayare ímahanu nuti Manerejirunuhi ema Viya eta nuchaviraya. <sup>23</sup> Te navayuaracahepuca nacahenapuca: “Émaripa ema vímahaquenehi ánaqui”. Ena apamuriana nacahénavarepuca: “Émaripa ema maca vímahaquenehi puiti eta ani”. Váhisera ecusuapavaca éna. Váhivare ecuehicavaca. <sup>24</sup> Taicha te táitauchavapa eta nítecapiraya núti, nucutiyare eta tájahúchirava títecapa eta térameca. Namutuyare ena achaneana te juca apaquehe tinecapanuanayare. Tacaheyare eta nuchavirayare nuti Manerejirunuhi ema Viya. Ticaecherayaresera, tájina vahi máchasimahi. <sup>25</sup> Tativayaresera nucatajivanumayare ichape. Tépurunuanayare ena achaneana natiarihiqueneanahi puiti. <sup>26-27</sup> Tacutiyare eta acane ena achaneana machamurianaini ema Noé. Ena nani tinicairihianarinecha, náematanerinecha, térana, tímarerecanahi ena nachichanaveana. Vahi téñamavanaimahi eta náimairahi ema Noé eta masiapirahi tayehe eta ichape pacure. Tájina vahi natsecavahini eta táitecapauchirayarehi eta ichape une. Tacahe, eta táemirisirapa eta ichapequene tiquiva, tacapapajicavacahi namutu éna. Ene nacaheyare ena achaneana te jena sácheyare. Vahi titsecavanaimahi tayehe eta nuchaviraya. <sup>28</sup> Tacutiquene ene nacahevare acane ena achaneana ena machamuriana ema Lot. Tinicairihianahivare éna, téraracavanahivare. Étanecha napanerechahi náijarareca eta náevavareruana. Ena apamuriana natanujiricarinecha eta nacamunuqueneanahi. Tépiyare-recanarichucha pétiana. Vahi naéñamavahini tayehe jácani ecuñaraquiya. <sup>29</sup> Téhesera te majunijicapa ema víyarahaini Lot eta avasare Sodoma, tíjahúchavapa tiquivapa eta yucu ticasiriqui azufre tiásihahi te anuma. Tacapapajicavacapa. <sup>30</sup> Ene tacaheyare eta nusacherayare nuti Manerejirunuhi ema Viya eta nuchaviraya.

<sup>31</sup> Te jena sácheyare, nácani tachimararuanayare te aneca, vahi táuricaimahi nasiapahini te napena navehanumahini jácani náeñamaqueneanahi náimahaqueneana. Énaripa ena napaiririruanahi te vamáhi, váhivare tichavaequenehavanaimahi náepanahini eta náeñamaqueneanahi. <sup>32</sup> Écharichuhi eta acane eta suíchararacavahi esu mayenaini ema Lot. Ésu, tétavicavahi eta suéñamaequenehairahi eta suímahaqueneana sujuniruanahi. Táichavenehi eta suvarairahi tichava, ésujivapa ticamitiequenehava\*. <sup>33</sup> Nácani téñamanahi eta náitaresira, tahapapiricarinecha eta tájiparacana te juca apaquehe, éna témitiequenehanaya eta náitaresira. Énasera nácani tahapapiriruanahi eta náehisiranuhi, tayanapanepuca táimicapacavaca, éna títujicavanayare tíuchucuhanayare eta náitaresiranaya.

\* **17:32** Ema Viya mavanecahi ena apinana ángeleana, nametapana ema Lot eta máicuñasirayarehi eta avasare Sodoma. Ésusera esu mayena ema Lot, ticametacasihineni eta sujunairayare sucachanyarehi ema suima, sucatiequeneharichucha eta suímahaqueneanainihi. Étapa tiviuchahi sunasipa te achene, tépiyavapa icheve máripuhi.

<sup>34</sup> Numetacahevanecha: Te jena yátiyare, te apinanahipuca nácani natiari-hiqueneanahi te tajuhe peti, émanayare ema níchuhaqueneyare, ema apana manasiyare. <sup>35</sup> Tacutiquene, apinanahipuca ena esenana tiyuvarecana-hipuca. Énerichuvare ésuna esu níchuhaqueneyare. Esu apana sunasiyare. <sup>36</sup> Te apinanahipuca ena ajairana te vámahi, éneyareichuvare émana ema níchuhaqueneyare. Ema apana manasiyareva —máichapa ema Jesús.

<sup>37</sup> Eta nasamirahi ena máimitureana, nayaserecapa:

—Tata Viáquenu, ¿távihapuca táitauchiavayare eta juca pimetarapianahi? —nacahepa.

Majicapapa éma:

—Vahi ecueñamava eta távihapuca nítecapihayare. Núti nítecapauchaheya te jácani iávihahi éti† —máichavacapa.

## 18

*Ema Jesús máimicutichinavare ema juez ésupa esu tépenaima*

<sup>1</sup> Ema Jesús máimitucavacavare ena máimitureana vahi nacucainajiruva eta nayujarasirana. Tímiyanavanaya, tayanapane vuíchaha najacapavanehini eta nayasearuanahi. <sup>2</sup> Eta máimicutichinahi, ánipa máichavacahi:

—Matiarihi ema achane. Juézhi tayehe eta avasare. Éma, tájina vahi mapicauchahini ema Viya. Nájnavare mapicauréna ena achaneana. <sup>3</sup> Sutiari-hivare tayehe eta avasare esu ésuna esena suépenaimaquenehi. Suchavaurui-ricahi ema juez taicha eta sumetauchirahi ema sucatianaruhi. <sup>4</sup> Émasera ema juez vahi masupahini eta sumetauresirahi ésu. Váhisera sucainajiruvahini. Tásiha, mapanerequenehapa macahepa: “Núti néchinava. Nájina nárataha napamicanuhini. Váhivare tipamicanuimahi ema Viya. <sup>5</sup> Ésusera esu suca esena, nuyacujipa eta suchavauruirisiranuhi. Nícharinepuca eta suvaraha-quenehi, apaesa vaipa sucuápechava suiteca” macahepa ema juez.

<sup>6</sup> Puiti, nuvaraha ecaicutiaraquenehaicha eta juca nímiturapihi mayehe ema juez mapicauruiraha eta macatiuchirahi esu suca esena táichavenehi eta suchavauruirisirahi éma. <sup>7-8</sup> Ene macahehi ema Viya. Vahi máyererejimahi eta macatiuchirahevaneya eti manerejiruanahi, esamacareyarehi taicha eta emacainajiruvairahi eta eyujarasirainahi tamutu sácheana, yátiana. Étaripa te táitecapa eta nuchavirayare nuti Manerejirunuhi ema Viya, németeacahi natiarihiyareichaha nuchimapaqueneanaya ena vahi ticainajiruvanahi eta nayujarasira, nacutihi esu suépenaimaquene eta sumacainajiruvairahi —máichavacapa ema Jesús.

*Ema Jesús tímitucahavi vahi vicasíñavavaicaimahi, váhivare vépururahimahi*

<sup>9</sup> Ema Jesús apanavare eta máimicutichinahi eta máimituresirahi, nayehe ena tímijachavanahi tiúriana, tájina náichiravainahi; náepuruvacahisera ena apamuriana achaneana. Tacahe, máichavacapa:

<sup>10</sup> —Nímicutichinahe eta apana: Natiarihi ena apinana ajairana te Templo. Téneuchavanahi. Ema émana achane, fariséohi éma. Ema apana, tisipecaturarahi éma. <sup>11</sup> Ema fariseo, eta macasiñavavaisirahi, témeñahavapa tayehe eta cuarto tacapicahuquenehi te Templo. Ánipa macahehi eta mayujarasirahi: “Nuhasulupayachavi, Tata Dios, eta núrivahi te pimirahu. Vahi nácutihini ena apamuriana achaneana tiámerahianahi, tisipecaturanahi, esenamareana-hivare. Váhivare nácutihini ema mácatataji te juca nuchacaya. <sup>12</sup> Píti pímatinuhi

† **17:37** Te máechajiriruvahi ema Jesús, ani macahehi: “Te jácani mávihahi ema máepenaquene, éta távihayare eta sipuquiana”. Eta juca mayehehi proverbio, tatiarihi eta tacayemaquenehi tayumurevahi.



eta apiheirahi áyunanu te semanana. Níjaracavivare eta plata nuganareruasa. Te nuganachahipuca eta dies peso, étanahi peso eta níjaracaviparaca. Téhesera cien pésohipuca eta nuganareruhi, dies pésohivare eta níjaracavi. Vahi nuyavanahini eta námavahuásana eta piyehe” macahepa.

<sup>13</sup> Émasera ema apana achane vahi máemeñahavahini. Tiyerehichucha eta máeneuchiravahi. Váhivare mapatsicavahini máesenicahini te anuma. Téhatupachavahisera eta máeneuchiravahi. Ánipa macahehi: “Tata Dios, nucatisamureva ichape eta nucapecaturairahi piyehe. Pájapanunusera piperdonachanu eta nupecaturana” macahepa ena achane.

<sup>14</sup> Tiuri, nutupiru numetacahe: Ema maca achane, eta machaviraipahi te mapena, tijacapacaréinehi me Viya taicha yátupihi eta máeneuchiravahi. Émasera ema fariseo vahi majacapacarehini. Taicha nácani ticasiñavavai-canahi, tímijachavanahi ticunachacarehi, éna tépurucareanayarehi me Viya. Nácanisera ena tiyaseacanahi ema Viya eta májapanuiravacaina, yátupihi tijacapacareanayarehi mayehe —macahepa ema Jesús.

*Ema Jesús mayujaraucha ena amuyana*  
(Mt 19.13-15; Mr 10.13-16)

<sup>15</sup> Tacahe, ena achaneana námavacapaipahi ena amuyana eta mayehe ema Jesús, navarairahi máemamahacavacayarehi éma. Énasera ena máimitureana vahi náisapahini, nacaichepaipa ena tiámanapahi ena amuyana. <sup>16</sup> Émasera ema Jesús máichuhavacaichucha ena amuyana. Tásiha, ena máimitureana máichavacapa:

—Ésamiricachucha ena amuyana, náitecaichaha eta nuyehe. Vahi ecucaichepaica éna. Taicha ena nuchanerana nuti Cristo nacutiyarehi ena nani amuyana eta nasuapajiraiva éna. <sup>17</sup> Nutupiruva numetacahe: Nácani vahi nácutihi ena amuyana eta nasuapajiraiva, vahi nuchaneranaimahi éna —macahepa ema Jesús.

*Ema achane rico téchajiricava mayehe ema Jesús*  
(Mt 19.16-30; Mr 10.17-31)

<sup>18</sup> Matiarahi ema achane. Náiyacararipahi ena achaneana. Témeñahavapa mayehe ema Jesús, mayaserecapa:

—Tata maestro, piti piúriquene. ¿Tájahapucaini eta nícharacavaini eta nítuji-siravaina me Viya máichecuaraquirénahini eta nítaresira? —máichapa.

<sup>19</sup> Ema Jesús majicapapa:

—¿Tájaha tacayema pímijsarechanu “Piti piúriquene”? Mararihi ema Viya. Jéhevare éma, tétaficavahi eta máurivahi. <sup>20</sup> Téhesera te pivarahapuca pecha eta apana vítaresira, pisuapayarehi eta mavanairipiana ema Viya. Píti pímatipa eta júcana: “Vahi picuveha esu esena apayena. Vahi picucapareca. Vahi picuamereca. Nacuija pépiyaequeneruina. Pémunacaya ena ticachichavianahi” —máichapa.

<sup>21</sup> Tacahe, ema achane majicapapa:

—Tamutu nusuapahi eta juca vanairipiana eta námaperuvahi, puíticha juca ajairanuirapa —macahepa.

<sup>22</sup> Tásiha, ema Jesús máichavarepa:

—Jucarihichahasera eta pítauchaqueneyare. Píjararecaya tamutu eta pímahaqueneana. Tásiha, píjaracavacaya ena páureana. Jéhevare éta, pijacapayare eta pímahaqueneyare te anuma, táitsivayare. Te tamutupa eta juca, pítecavanepa péhicanu —máichapa ema Jesús.

<sup>23</sup> Te masamapa ema achane eta juca macayemaquenehi ema Jesús, ichaperinehi eta mapanereresirahi, taicha mavayuchahi eta marricovahi. Macatiequeneharinehi tamutu. Tiyanapa tipanererecapaipa. <sup>24</sup> Eta máimairahi ema Jesús eta mapanereresirahi, máichavarepa:

—Yátupiquenehi máitujihí eta náijarasiravainahini eta náehisiranuinahini ena rícoana eta nasiapirainahini te anuma. <sup>25</sup> Esamanuchaha. Eta juca tímicutijiricavahi eta vípera camello, máitujihí tánucuhahini te támicuejehe eta parirapa. Ene nacahehi ena rícoana —macahepa.

<sup>26</sup> Tacahe, ena tisamararacanahi, ánipa tacahehi eta nayaseresirahi:

—¡Tétavicavahi eta tamáitujicacarevahi! ¡Nájina títujicavaimahi náuchucuhahini!

<sup>27</sup> Ema Jesús majicapavacapa:

—Nájina émanaina achane émajivaimahi ticuchucuhava. Macarichu ema Viya marataha ticuchucuhahe —macahepa.

<sup>28</sup> Émaripa ema Pedro máichavarepa:

—Vítisera, Tata, vinaquicahi tamutu eta vicayehequeneana, vivarairahi véhicavihi.

<sup>29</sup> Ema Jesús majicapavarepa:

—Nutupiru numetacahe: Namutu nácani nanaquicahi eta napena, najunijicahivare ena ticachichana, ena naparapenaveana, nayenanapuca, nachichanaveanapuca, táichaveneyarehi eta náehisiranuyare; <sup>30</sup> jararihiyare eta táitsivayare te juca apaquehe eta náimahaquenyare. Nararihiyarevare ena achaneana téchapajiricanayareva. Tásiha, tavetijinapa te náitecapapa te apana náitaresiraya, máichecuaraquirenapa eta náuricacarevaya —macahepa ema Jesús.

*Ema Jesús tíapechavavare máechajisiha eta máepenirayare  
(Mt 20.17-19; Mr 10.32-34)*

<sup>31</sup> Ema Jesús máiputsiamurihapa mámamurihapa ena dócequeneana máimitureana. Tásiha, máichavacapa:

—Ímaha puiti, viyanainapa vicaijuhénapaipa te Jerusalén. Ánaqui táitauchiavayare tamutu eta nájucunachaqueneanahi ena profetanaini eta níchararacavayarehi núti Manerejirunuhi ema Viya. <sup>32</sup> Ánaqui nucaijararecasiyare núti nayehe ena apavasaqueneana romanoana. Énainapa ticaecahijiricanuanayare, ticaetemajiricanuanaya, tiátutuquichanuanayareva. <sup>33</sup> Téstanuanayareva. Tásiha, ticapacuanainapa. Tásihasera te mapanaquenénapa sache, néchepucainapa te nécari —máichavacapa.

<sup>34</sup> Énaserá ena máimitureana vahi nacaicutiarahini eta juca mametasiravacahi. Váhivare náimatiequenehahini tájahapuca eta máechajisihahi taicha vahi náemetecahini énemahinahíni náichahini ema Jesús.

*Ema Jesús macaimairirica ema achane púchuqui ticavasa te Jericó  
(Mt 20.29-34; Mr 10.46-52)*

<sup>35</sup> Tacahe, te tiánehipa títecapa ema Jesús tayehe eta avasare Jericó. Matiaríhi ema achane púchuqui, téjacahi te achenechacaya tasiaparacuhi eta avasare. Tiyaseserecachi eta limosna. <sup>36</sup> Te masamavacapa ena camuriqueneana achaneana tiánucuhanapaipa, macayasesererupa ema púchuqui tájahahipuca eta téchacarehi. <sup>37</sup> Nametacapasera eta émairahi tiánucuhayarehi ema Jesús Nazareno. <sup>38</sup> Tacahe, tipiaracapa ema achane púchuqui:

—¡Tátachicha Jesús! ¡Pítiqueneripa yátupiquenévihi Cristo! ¡Picatajicanupaini! ¡Pájapanunu! —macahepa.

<sup>39</sup> Ena achaneana títapumiráuchanapahi ema Jesús navarahapa nacama-tinacayarehini. Émasera tipiararecaichucha:

—¡Tátachicha Jesús! ¡Pítiqueneripa yátupiquenévihi Cristo! ¡Picatajica-nupaini! ¡Pájapanunuini! —macahepa.

<sup>40</sup> Tacahe, ema Jesús te macanarapa, tíhecanumapa. Macavanairipipa náepana ema púchuqui. Te nacaitecapa, mayaserecapa:

<sup>41</sup> —¿Tájaha picamunu nuyehe?

Ema púchuqui majicapavarepa:

—Tátachicha, nuvaraha picaimairiricanupaini —macahepa.

<sup>42</sup> Ema Jesús máichapa:

—Tiuri, nuchicha. Táichavenehi eta picasiñairanuhi, pinaracapa puiti — máichapa.

<sup>43</sup> Jéhesareinehi, títahúchavapa timairirica ema púchuqui. Tásiha, tiyanapa máehica ema Jesús tiúrisamurepaipa. Macunachapaipavare ema Viya. Énapa ena achaneana tímararacanahi eta manarasirahi, ichaperinehi eta nacuna-chirahi ema Viya.

## 19

### *Ema Zaqueo mavarahahi máimati ema Jesús*

<sup>1-2</sup> Tacahe, eta máitecapiraipa ema Jesús te tajuhe eta avasare Jericó, matiarahi ema achane rico, ticaijare Zaqueo. Nacapitarahi ena cóbrarecarahiana eta impuesto. <sup>3</sup> Te masamairiricapa eta émairahi ema Jesús títecapapahi, mavarahapa máimatiyarehi. Étasera eta máichipichuvahi éma, vahi márata-hahini máimahahini ema Jesús te namuri ena camuriqueneana achaneana. <sup>4</sup> Tásiha, tijunapapa eta te mayanihayarepahi ema Jesús. Tiápanapa te yucuí, máimarasarépahi ema mavarahaquenehi máimati. <sup>5</sup> Tacahe, te macapecupa ema Jesús eta yucuí mávihahi ema Zaqueo, máesenicapa ema Jesús te anuquehe. Tásiha, máichapa:

—Zaqueo. Yare, piúcupaica, taicha puiti nuvarahahi nunasinumayare te pipena —máichapa.

<sup>6</sup> Tacahe, ema Zaqueo titátájipa tiúcupaicapa. Tiúrisamuréinehi eta majac-pirahi ema Jesús. <sup>7</sup> Eta náimairahi ena achaneana eta juca, téchajicanapa mayehe ema Jesús. Náichapa:

—Émamesapa máitecapauchayarehi ema maca ticapecaturahitátáji — nacahepa.

<sup>8</sup> Te téjacanapa te tajuhe, témeñahavapa ema Zaqueo te mamirahu ema Jesús. Tásiha, macahepa:

—Pímaha, Tata Náquenu. Núti néneuchavapa me Viya. Puiti níjaracayare ena páureana ticutimuriacaca eta nímahaqueneana. Nímichavayareva te natiarihipuca ena nucaetemaqueneanahi, cuátrohénapasera eta táitsivayare eta nímichavaqueneya —máichapa.

<sup>9-10</sup> Tásiha, ema Jesús majicapa:

—Nímahapa puiti eta yátupirahi eta péneuchiravahi eta pipecaturana, taicha pivarahahi pímuchavayare eta plata picaetemareranahi. Tásiha puiti, pijac-pacarepa me Viya. Vaipa pémitiequenémahi. Taicha píti picutipa ema viáchucaini Abraham eta macasiñavairahi mayehe ema Viya. Píti nuchane-ravipa, picutipa ena apamuriana nucurujiruanahi. Taicha éta tímitecanuhi nuti Manerejirunuhi ema Viya —macahepa ema Jesús.

*Ema Jesús máimicutichinava ema príncipe eta májjarasirahi ena machanerana eta maplatane, apaesa nacajurucayarehi*

<sup>11</sup> Tacahe, ena achaneana, eta náimairahi eta mánehiraripa eta Jerusalén, náimijachaipahi étapa tímiyanayare éma, eta máimeresiravayare eta marreyvayarehi. Tacahe, ema Jesús máimatiacaripa eta napanereruanahi. Tásiha, máimitucavacapa eta apamuri máimicutichinapa apaesa nácaicutiara eta tayerevaichaha eta marreyvayarehi. <sup>12</sup> Máichavacapa:

—Matiarihihi ema achane. Ichape eta mapicacarevahi. Tiyanayarehi te apana avasare tayerehiquene. Eta tímiyanayarehi ánaqui máepanihayarehi eta mávacureyarehi eta marreyvayarehi tayehe eta mávasa. Eta machavi-rayarepa, téjacayarepa éma. <sup>13</sup> Te tiyanayarépa éma, máichuhanumapa ena diésqueneana machanerana. Májaracavacapa étapevaca eta maplatane tasiva-chaquenehi. Tásiha, máichavacapa: “Ecajurucayare eta juca nuplatane. Te nuchava, táimecavaipa eta tachichanayare”. <sup>14</sup> Tacahe, tiyanapa ema reyyarehi tayehe eta macaijuheyarehi. Te máequenepasera, tsemamurianapa ena majaneanana. Ánipa nacahe: “Vahi vávaraha émaina viyehéna rey ema maca” nacahepa. Náimivanerecapa eta comisión, nayaseserecayare vahi nacuijaraca eta mávacuréna. <sup>15</sup> Ticamesavauchuchasera majacapaichucha eta mávacurehi. Te tichavapa te mávasa, téjacapa émapa reysi. Tásiha, máichuavacapa ena machanerana májararuanahi eta maplatane. Mayaserecapa te tímecavaipahipuca eta tachichanahi. <sup>16</sup> Tiyanapa ema émana tímerecavapa. Máichapa: “Tata náquenu, eta piplatane píjararunuhi tímecavaipa eta tachichanahi. Diésripa eta tajurusirahi”. <sup>17</sup> Ema rey majicapapa: “Tiuri, nuchicha. Tájina táichava. Tétavicava eta piúrive. Puiti vahi támapurujimahi eta piúrivehi tayehe eta juca ánichichaquenehi níjararuvahi. Puiti níjaracaviyare pituparahaya nujupahaviya. Píti táquenuya eta diésquene avasareana”. <sup>18</sup> Tímerecavavarepa ema apana mamusura. Máichapa: “Tata náquenu, eta píjararunuhi piplatane, tímecavaipahi cinco eta tajurusirahi”. <sup>19</sup> Majicapavarepa: “Tiuri, nuchicha. Tájina táichava. Tétavicava eta piúrive. Puiti nunacaviyare aquenucaviya tayehe eta cincoqueneana avasareana”. <sup>20</sup> Tímerecavavare ema apana mamusura. Máichapa: “Tata náquenu, júcahi eta piplatane. Vahi nucajurucahini. Núnacaichucha, nítipuichahi te pañuelo. <sup>21</sup> Taicha nupicahi nácaetehahini, machu pícuñacanu. Pétaviuchahi píti eta pivainarajiva, taicha píti pivehahi eta nématanevachayaréni”. <sup>22</sup> Tacahe, ema rey máichapa ema machanera: “Eta juca péchajiriruvahi, éta tímicaecherachavihi eta pépiyahiraivahi. Piplujuvahi eta tíchavihi. <sup>23</sup> Te pímatinuhipuca eta nuvainarajivahi, eta nuvehairaya eta pématanevacha, étapa eta nícuñasiraviyare te picamitiacapuca, váhiyapa pinacapai te banco eta nuplatane. Étainahini tajurusihahini apaesainahini nímaequenéhahini puiti”. <sup>24</sup> Tásiha, máichavacapa ena apamuriana: “Everejica ema maca eta nuplatane. Íjaraca ema ticajurucahi eta diéspequene”. <sup>25</sup> Éna nacahevarepa: “Tata viáquenu, tímecavaipahinéni diéspepahi eta tajurusirahi”. <sup>26</sup> Ema rey majicapavarepa: “Tiuri numetacaheya: Nácani ticajurucanahi camuri, nujanechinayare eta apana. Nácanisera tájinaquenehi nacajururénahini, nuverejicayare eta níjaracasinihi. <sup>27</sup> Énasera ena ticatianacananahi éna vahi najacapanuhini eta nurreyvahi, íáminanuyare ani te numirahu. Ecapapajicavaca éna”.

<sup>28</sup> Tacahe, te tamutupa eta juca máimituresirahi, ema Jesús tímiyanavavarepa tipaica. Macaijuhepa eta te Jerusalén. Tínapucapa ena máimitureana.

*Títecapapa ema Jesús eta te Jerusalén  
(Mt 21.1-11; Mr 11.1-11; Jn 12.12-19)*

<sup>29</sup> Te apanapa semana, tiyananavarepa. Te tiánehipa eta avasarechichana Betfagé étapa eta Betania, tacanaraipahivare eta masihi ticaijare Olivoquiji, tíchecanumanapa. Mavanecapa ema Jesús ena apinana máimitureana.

<sup>30</sup> Máichavacapa:

—Eyanayare eta te jena avasarechicha Betfagé. Te ítecapayarepa, ímahayare eta burrico ticaitihahi. Eta jena sárare mávuéquehéchaha, nájinaichaha ticaperainahi. Evejapuacayare, íáminanuyare eta ani. <sup>31</sup> Te natiarihinapuca náeñama, emetacayare eta nucamunuirahi núti —máichapa.

<sup>32</sup> Tacahe, tiyananapa ena vanairucanahi. Jéhesaréinehi étapaichuhi eta mametarapihi éma. <sup>33</sup> Te navejapuacaripa eta burrico, ena ticayeheana nayaserecápa:

—¿Táviha íámihayare eta viyehe burrico?

<sup>34</sup> Éna najicapapa:

—Ema maena Viáquenu macamunuhi —nacahepa.

<sup>35</sup> Tacahe, náisapapa eta námiraya eta burrico. Te náitecapauchapa ema Jesús, náepacamaequechapa eta náepacuhana. Tásiha, ticaperapa ema Jesús. <sup>36</sup> Te náimahapa ena achaneana tiúchujicapaipahi ema Jesús, náimativanepa. Tiyananapa nácapahi éma. Tépacapairicanapaipa te mamirahu eta náepacuhana te mayanihayarepahi. <sup>37</sup> Eta napaisirahi, témiricanapaipa te tachausi eta cerro ticaijare Olivoquiji. Namutu ena máimitureana téhicanahi ema Jesús tipiaracanapaipa eta náurisamurevahi taicha eta náimahaque-  
neanahi tiáramicareana máichaqueneanahi éma. Ichape eta nacunachirahi ema Viya. <sup>38</sup> Ánipa nacahehi eta napiarasirapahi:

—Yare, Tata, ¡Piti réyquene, vanairucaquenévihí me Viya! ¡Asulupaya! ¡Puiti, te anuma vicuticacahi eta viúrisamurevahi víti te eta juca apaquehe! Tétávicava eta vicunachira ema Viya eta macatajisirahavihi —nacahepa.

<sup>39</sup> Tacahe, eta nasamirapahi ena fariséoana natiarihiqueneanahi eta napiarasirapahi ena achaneana, náechajicapa ema Jesús:

—Tata maestro, picamatínacavacaichu ena nani pímitureana —náichapa.

<sup>40</sup> Ema Jesús majicapavacapa:

—Tiuri, numetacahe puiti. Te namatinapuca ena nani, táitsivasera étainapa tipiaracaya eta máriana —macahepa.

<sup>41</sup> Tacahe, títecananapa te tápusi eta cerro Olivoquiji. Ticaeherapa eta Jerusalén. Eta máimairahi ema Jesús eta avasare, tíyahapa táicha. <sup>42</sup> Macahepa eta máiyairahi:

—Páurevisami piti návasasami Jerusalén. Te nácaicutiaraini apaesachichainaini ena pichichanaveanahi eta nuvarairahi nucuchucuhavaca núti. Puiti juca sache nutiarihiraripa ani piyehe, náurihainehi nácamapuravahini eta náuricacarevahini. <sup>43</sup> Taicha járajapayare eta sáchezare táetaviuchavaya eta nacatajivairaya ena pichichanaveana náicha ena piánaranaya tichayacavianayare. Téhavianainapa, tájinapa piviyavaimahi picatiuchia-vaimahi. <sup>44</sup> Témetapaicavianainapa te apaquehe. Nacapapajicavacainapa ena pichichanaveana. Tájina nacaemachaquenémahi eta peti. Tamutuyare náquipapaica. Eta piviorevaya, eta juca pimajacapiranuhi eta néjirairavihi nuti mavanerunuhi ema Viya —macahepa.

*Ema Jesús macuchuchujicavaca ena tíjararecanahi eta sárareana, cáyureana te tajuhe eta Templo*

*(Mt 21.12-17; Mr 11.15-19; Jn 2.13-22)*

<sup>45-46</sup> Tacahe, te apanapa sache, tiyanapa ema Jesús. Tisiapahi te Templo. Máimaharinehi ena achaneana tíjararecanahi eta sárareana, cáyureana. Tásiha, tise mapa. Eta macuchuchujisiravacahi, máichavacapa:



—Ema Tata Nucaiyaquene, ani macahehi eta máechajiriruvahi te Sagrada Escritura: “Eta nupena tacarichu táicuchihi eta nayujarasirareya ena achaneana” macahepa. Étisera eti tiámerahiana ecasiapavapa eta te juca. Emaeperajicapa eta tacapicahuirahi. ¡Eyana iúchucatataji! —máichavacapa.

<sup>47</sup> Eta manasiquenerahi ema Jesús, tamutuhi sácheana tímitureca tayehe eta Templo. Énasepa ena tuparairucana énapa ena escribánoana, napane-rechaipahi eta navarairahi nacapaca ema Jesús. <sup>48</sup> Váhisera napatsicavahini taicha natiarihi ena camuriqueneana achaneana tisamararacanahi eta máimiturapiana éma. Váhivare náisapaimahi náichahini ena ticatianacanahi.

## 20

### *Nayasereca ema Jesús te vanairucahipuca me Viya* (Mt 21.23-27; Mr 11.27-33)

<sup>1</sup> Étana sache tímiturecaichaha ema Jesús tayehe eta Templo eta máechajiriruva ema Viya. Títecaparacanapa ena tuparairucana, énapa ena aquenucarahana, énapa ena escribánoana. <sup>2</sup> Nayaserecapa ema Jesús:

—Píti, vahi vitupararuvinahini víti eta píchirahi eta júcana. ¿Nájahasica tivanecavihi? ¿Nájaha tituparacavihi picha eta juca píchaqueneana? —náichapa.

<sup>3</sup> Ema Jesús majicapavacapa:

—Núti apanavare nuvaraha nuyaserecahe. Ejicapanuyaresera.

<sup>4</sup> ¿Nájahapuca tivanecahi ema Juan eta máitesirahi eta máicachasirisirahi? ¿Émapuca ema Viya tivanecahi, émajivahipuca eta máitesirahi? —máichavacapa.

<sup>5</sup> Váhisera náituruequenehahini eta najicapirayarehi. Tiácapaemajiricanapa. Ánipa nacahe eta náechajiriruvanahi:

—¿Tájahasica vicayemayare eta vijicapirayare ema maca? Te vémunahacava vicha: “Mavaneruhi ema Viya”, éma macahénapapuca: “Tásiha, ¿váhiyapa esuapahini éma?” <sup>6</sup> Téhesera vácahepuca: “Émajivaichucha eta máitesirahi”, ticauyayacareipa nacapacahavi ena achaneana te márijahiana, taicha náechahi éna émairahi ema Viya tivanecahi ema Juan —náechajiricacapa.

<sup>7</sup> Tacahe, ánipa nacahehi eta najicapirahi ema Jesús:

—Vahi vecha víti —nacahepa.

<sup>8</sup> Ema Jesús máichavarepa:

—Énerichuvare núti, vahi numetacahémahi nájahapuca ema tituparacanuhi —máichapa.

### *Ema Jesús máimicutichina ena pártirárioana máurirahana* (Mt 21.33-44; Mr 12.1-11)

<sup>9</sup> Tacahe, ema Jesús tépanavavarepa máimitucavaca ena achaneana. Ánipa tacahehi eta máimiturapiana:

—Nuvaraha nímicutichinaheya, tatiarihi eta isaniti amairiha úvaquiji, masucurehi ema émana achane. Tiyanayarehisera ema ticayehe, tipairiricayarehi te apana avasare. Tacahe, matuparacavacapa ena tírehanayarehi te áñoana eta mayehe uva. Partidoyarepa eta majunijisirayarehi.

<sup>10</sup> Tacahe, te títecapapa eta caje tayairahi eta uva, máimivanerecapa ema mamusura mayaseapanavacayarehi ena pártirárioanahi eta tatucacheque-neyarehi éma. Énasepa ena pártirárioanahi, tájina nájjaracahini. Tisemau-chavanarichucha, náehapa ema vanairucainihi. <sup>11</sup> Tásiha, ema ticayehe máevatacavarepa ema apanavare mamusura, mayaseapanavacayarehi éna.

Énerichuvaresera náumehavarepa ema vanairucainihi, náehavarepa. Tájina náijarachahini. <sup>12</sup> Tásiha, ema ticayehe vahi macainajiruvahini. Máevatacavarepa ema apanavare mamusura. Énerichuvare náehavarepa ema vanairucainihi. Najarachapa, náquijicapa.

<sup>13</sup> Tacahe, ema ticayehe tipanererecaripa: “¿Tájahasica nícharacavayare?” macahepa. “Nuvanecapuca mayana émajacaruvaina ema nuchicha némunaruquenehi. Tatiarihi te émainapapuca napicaucha te náimahapa”. <sup>14</sup> Tacahe, te náimahapa ema machicha, navetijichucha eta nasemirahi. Tímitujiricanaripa. Ánipa nacahe: “Émainapapuca ticayeheyare ema maca. Yare, vicapaca, apaesa tánasipa tamutu vítinapa vicayehe”. <sup>15</sup> Tacahe, nacaratacapa éma, nacuchucapa eta tayehe eta isaniti, nacapacapa.

Puiti nuyaserecaheyare: ¿Tájahapuca máicharacavayare ema achane ticayehe eta úvaquiji? Jéhesare, vaipa macayehehinehi paciencia. <sup>16</sup> Títecavanénapa macapapanavacayarepa ena pártirárioanahi máurirahanahi. Tásiha, máijaracainavarepa eta úvaquiji ena apamuriana pártirárioanayareva — macahepa ema Jesús.

Tacahe, ena tisamararacanahi, ánipa nacahehi:

—Viti vicatajicacare, vahi vácutihini ena nani máurirahana —nacahepa.

<sup>17</sup> Ema Jesús máesenimurihavacapa. Tásiha, máichavacapa:

—Jéhepuca, németeacaserá vuíchaha ácaicutiarahini eta tacayemaquenehi eta Sagrada Escritura. Éta, áni tacahehi: “Ena tépiyarecarahiana eta Templo, tasapihá náepuruhi eta mari táicuchihi tatumearayare eta peti, taicha vahi náimatihini. Émasera ema Viya macaitecapapa eta táicuchihi eta tatuparahahi. Tacapicahuquenehi puiti” tacahehi eta Sagrada Escritura. <sup>18</sup> Puiti, núti nucutihi eta ichape mari náepuruquenehi. Eti epurunuanahi, iáquipaicavayare évetutujicayare. Tichimaracaheyare eta muraca ecuñaraqui taicha eta emavarahairahi éhicanu —máichavacapa.

<sup>19</sup> Ena tuparairucana navarahapa náijahúchayarehini nacarataca ema Jesús, taicha tímatiacavanapa éna eta énairehi tayunacavaca eta máechajiriruvana ema Jesús. Váhisera napatsicavahini taicha návamirahuhi ena camuriqueneana achaneana.

*Navarahahi náemejecapavacha ema Jesús tayehe eta impuesto  
(Mt 21.45-46; 22.15-22; Mr 12.12-17)*

<sup>20</sup> Tacahe, náimivanerecapa ena apamuriana ajairana tépiyacavanayarepahi tiúriana te mamirahu, navarairahi natanucayare eta tímicaviuchayarehi. Énayarepa timetauchanavarehi mayehe ema aguenucahi prefecto Poncio Pilato. <sup>21</sup> Tacahe, nayaserecapa éma, ánipa nacahe:

—Tata maestro, vímatihini eta tatupiruvairahi tiuri eta juca pímiturapianahi. Nájinavare pinerejiruinahini ena achaneana, taicha pívarahahi náehicahini namutu eta táurinaquene achene ticaijuhe me Viya. <sup>22</sup> Vivarahahisera viyase-recaviyare: ¿Táuricahipuca vivachacha eta viyasehana impuesto mayehe ema Presidente Emperador romano? Taicha víti, machanerahavihi ema Viya, ¿masi? —náichapa.

<sup>23</sup> Ema Jesús máimatiacavacapa eta tamaurivapahi eta napanereruana. Tacahe, máichavacapa:

—¿Tájaha tacayema evaraha ímiaquipaicanu? <sup>24</sup> Nímahaseji, iáminanu étapena eta reale.

Éna náijaracapa. Tásiha, ema máichavacapa:

—¿Nájaha ticaijare eta juca? ¿Nájahavare ticavasimahi eta juca mirare eta te juca reale? —máichavacapa.

Éna najicapapa:

—Mayehe ema Presidente Emperador.

<sup>25</sup> Tacahe, éma máichavacapa:

—Tiuri. Táuricahi Íjaraca ema Presidente Emperador eta juca mayeherichuhi éma. Tásiha, Íjaracavare ema Viya eta mayeherichuhivare éma — máichavacapa.

<sup>26</sup> Váhiquesera náratahahini náimiaquipacahini eta nayaseresirahi te namirahu ena achaneana. Táitsivahi ichape eta náramirahi eta táurivahi eta majicapiravacahi. Timatinanapa tésamiricavanapa.

*Nayasereca ema Jesús náicharacavayarepuca ena náepenaqueneana eta náechepusirayare*

*(Mt 22.23-33; Mr 12.18-27)*

<sup>27</sup> Nacahepaipavare ena apamuriana achaneana. Saducéoana. Ena nani saducéoana, apana eta náimiturapiana; váhi nasuapa eta náechepusirayare ena náepenaqueneana. Éna natanucahi eta táetseraruvayahi. Tacahe, nayaserecapa ema Jesús:

<sup>28</sup> —Tata maestro, ema víyahaini Moisés manaquicahi eta ajureca máechajiriruvahi eta viyehe: “Te máepenaquenehahipuca ema achane esu mayena, tásiha, nájinahipuca manaquiequeneruvainahini machichainahini; te matiarhihipuca mácani maparapehi, mavehayare esu machine-naequene, apaesa émainapuca macachicha eta suyehe, máitsivainahi ema maparapeni”. <sup>29</sup> Tacutiquene te natiarhihipuca ena siétequeneana ticapara-pejiricacana, te títauchavapa ema náechavimuri, máepenaquenehapasera esu mayena. Nájinahi machichainahini. <sup>30</sup> Tacahe, ema maparape máitauchavare esu machinena. Énerichuvaresera máepenaquenehavare, nájinavare machichainahini. <sup>31</sup> Ema émana maparape máitauchavare ésu. Énerichuvare máepenaquenehavare. Namutu ena siétequeneana navehahi ésu, tásihasera náepenaquenehapahi, nájina émanainahini mácachichahini eta suyehe. <sup>32</sup> Te táequenepa, tépenapa esu esenaini. <sup>33</sup> Tacahe puiti, te jéhesarepuca tichavanayare títarecana te táequenénapa eta náepenirahi ena nani, ¿nájahapuca ena siétequeneana éma yátupiquenehi suímaquenehi esu esena? Taicha ena siétequeneana namutuhi suímanarihi —náichapa.

<sup>34</sup> Tacahe, ema Jesús majicapavacapa:

—Ena ajairana te juca apaquehe natuparacasivaichuhi títauchavanayare suyehe esu esena. <sup>35</sup> Ánaquisera te apana náitairesira, nácani ticatuparahanayare eta nasiapirayare te anuma te náechepucapa, vaipa nácamunuimahi esu esena. Énaripa ena esenana, vaipa nácamunuimahi ema ajaira. <sup>36</sup> Taicha vaipa tíápechavaimahi tépenana. Nacutinapa ena ángeleana eta namaepena-cacairahi. Yátupinapa machichanaveanainapa ema Viya, taicha éma ticaeche-pucavacahi.

<sup>37</sup> Émaripa ema víyahaini Moisés timetacahavi eta májurehi eta yátupirahi eta vahi tánasi tépena eta náchanevana ena náepenaqueneana. Te máimahapa ema Moisés eta yucuqui timurujihí, eta macametacasiyahi mayehe ema Viya eta émarichuhi ema macasiñaquenehi ema Abraham, ema Isaac, émapa ema Jacobo. <sup>38</sup> Taicha ema Viya, ema téchahi eta náitairesirana ena téhicanahi, tayanapane tépenanaripa. Namutu ena, tímiyanavarichucha títareca eta náchanevana te mamirahu éma —macahepa ema Jesús.

<sup>39</sup> Tacahe, ena escribánoana, ena natiarhiqueneanahi náichapa ema Jesús:

—Tétupicava eta juca péchajiriruva, tata maestro —nacahepa.

<sup>40</sup> Váipasera nacaemuñavahini nápechavahini nayasereca.

*Ena Cristo, yátupiquenehi Viya. Mámariéquenenihsera ena rey David*  
(Mt 22.41-46; Mr 12.35-37)

<sup>41</sup> Ena Jesús máichavacavarepa:

—Éti ecahehi eta échajiriruvahi: “Tiúchucayare ena Cristo, mámariequenezare ena víyarahaini rey David” ecahehi. <sup>42</sup> Yátupihi ena Cristo achanequenehi eta máimahi taicha mámariequenehi ena víyarahaini David. Nuvarahasera epanerechaya eta juca máechajiriruvahi ena David te májurehi Salmo, ani macahehi: <sup>43</sup> “Ena Viya máichapa ena Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. <sup>44</sup> Ena David, eta máimijarechirahi ena Cristo: “Tata Náquenu”, ¿tájahapuca eta macayemaquenehi? Nutupiruva numetacahe: ena Cristo yátupiquenehi Viya éma. ¿Tájaha íchahi éti? —máichavacapa.

*Ena Jesús máimereuchavaca eta nájecapiravana ena escribánoana*  
(Mt 23.1-36; Mr 12.38-40; Lc 11.37-54)

<sup>45</sup> Namutu ena achaneana nasamararacahi ena Jesús eta máechajisiravacahi ena máimitureana. <sup>46</sup> Ánipa macahehi eta nayehe:

—Échapavayare éti, machu éhica eta nayeherepiana ena escribánoana. Navarahavare ticapicahuanayarehi eta náechajisiraya ena achaneana te jácani nácapajisihapahi éna. Tacutiquene tinerejiurucavana eta táurinaqueneana téjasihacareana te tiyanana te viúrujisirarevana. Étaripa te nanisirana, ticaejacavanavare te jácani távihahi eta tiúrinisipana tinicacare. <sup>47</sup> Tacutiquene naverejicavare eta nacayehequeneana ena tépenaimana, nájina najapanuquenéna. Tásiha, tépiyacavanapa religiósoanahi, tiúpiemana eta nayujarasira, namavarairahi tácacherahini eta náichira eta tamauriqueneana. Énaserá tiápajucavanahi eta nacaicuñairaya muraca.

## 21

*Eta sunaquiruva esu máimaru tacachuricahi eta nanaquiruvana ena rícoana*  
(Mr 12.41-44)

<sup>1</sup> Ena Jesús máimamararacahi ena rícoana eta nanaquisirava eta plata tayehe eta chapama nanaquisirareva eta námavahuana mayehe ena Viya. <sup>2</sup> Énerichuvare máimahavare tinaquicava esu ésuna esena suépenaimaquene. Páurequenehi ésu. Sunaquicahisera eta apipechichahi eta suplatane. <sup>3</sup> Tacahe, ena Jesús macahepa:

—Ímaha esu suca esena páurechicha. Ácuneucha eta suémunasirahi ena Viya. Jéhesare ésu, tímepanávahi eta sunaquiruva, sucachuricavacahi namutu ena apamuriana achaneana. <sup>4</sup> Taicha namutu éna tacarichu nanaquicahi eta náemacharajiana naplataneana. Ésusera esu suca páurehinéni, sunaquicahisera tamutu eta sucayehequenehi. Suítahi eta sunicavachayahini —macahepa.

*Ena Jesús máimereucharipa eta táquipaisiravaya eta Templo*  
(Mt 24.1-2; Mr 13.1-2)

<sup>5</sup> Natiarihihi ena téchajisihanahi eta Templo. Náechajisihahivare eta táurinaqueneana tayereruvana nanaquiruanahi ena achaneana, étapa eta táurinavavacahi eta máriana tayeheanahi. Ichapemurihi eta táejeravahi te nacaematanénapa. Tacahe, ena Jesús máichavacapa:

<sup>6</sup> —Járajapayare eta sáchevayare ticaquipaicasinapa tamutu eta juca Témplosami. Téjanerepaicainapa tamutu eta juca táurinaqueneanahi ímahaqueneana puiti —macahepa.

*Tatiarihiyare eta ecutiarareanaya te tánehipaicha eta táichecuiraya*  
(Mt 24.3-8; Mr 13.3-8)

<sup>7</sup> Tacahe, nayaserecapa ema Jesús. Náichapa:

—Tata Maestro, ¿tájamuhuyarehipuca eta náimiaquipaisirayare eta Témplosami? ¿Jararihiyarepuca eta ecutiarareyare eta apana péchajisihaqueneana? —náichapa.

<sup>8</sup> Ema Jesús máichavacapa:

—Ecuneuchavaicha yátupina, machu navayuacahe, taicha nárájapayare ena tépiyacavanayarepahi tímivasichavanayarepahi nuyehe. “Nútiripa Cristo” nacahénapa. Ena apamuriana nacahénapa: “Táitecapaquenepa puiti eta sache”. Váhisera ecusuapavaca, váhivare ecuehicavaca. <sup>9</sup> Étaripa te esamairiricapuca eta guerra, revoluciónpuca, váhivare ecuarameca. Taicha eta táinapuarauianayarehi eta júcana ecutiarareanayare, vuíchahasera étaimahi eta táichecuiraya.

<sup>10</sup> Ánivare macahe:

—Téhacacayareva eta ichapequeneana avasareana. Ticanarajiricacainapa eta apamuriana. <sup>11</sup> Tatiarihiyareva eta ichapeyare tayamurisirana eta apaquehe. Te avasareana tatiarihiyare eta ecuhamuhuyareva, jumare-muhuyareva. Te anuma tímerecavainavarepa eta ichape ecutiarareya, tiámayare eta ecuñaracuyare.

*Ena achaneana napanajiricainapa ena téhicanahi ema Viáquenu*  
(Mt 24.9-28; Mr 13.9-23)

<sup>12</sup> Tativanumayaresera tipanajiricaheanayare éti, táichavenénahi eta éhisiranuhi nútí. Ticaratacaheanayare, tiámaheanayare te náurujisirarevana, ecayaserehinapa nayehe ena juéseana. Ecaevatainapa te cárcel. Tásiha, etiarihiyare eti tiámaheanaya te namirahu ena aquenucana, téhevere te namirahu ena Presidenteana gobiernonahi, ecaviurevayare táichavenehi eta éhisiranuhi. <sup>13-14</sup> Étumechavasera. Te námahepa te ecayaserehiyaya, ecamapura-vainapa échajisianuyare. Váhi ecueñamava eta ecayemayare ecatiuchiravaya. <sup>15</sup> Nímahahéinepa nútí, níjaracaheyare eta ítusirayare ecatiuchava. Nájina ácutimahi eta ítupajijiasiravaya. Ichape ecachuriacayare ena iánaranaya. <sup>16</sup> Etiarihiyare éti énajacaruvainapa ena ticachichaheana tíjararecaheanaya énaripa nácani eparapeanapuca, énajacaruvayareva tíjararecaheana, énayarepaichupuca ena ejaneanana, ítunacasareana. Enerejicavainapa eti nacapuruanaya. <sup>17</sup> Namutu ena acha neana ticitianacaheanayare táichavenénahi eta éhisiranuhi. <sup>18</sup> Tayanapanesera nacapacahepuca, nímahahéinepasera nútí. Vahi émitiequenémahi. Étaripa eta echutimacana, tájinavare témitiequenémahi. <sup>19</sup> Téhesera ecamichahi tamutu, ímiyanavahi eta éhisiranuhi, nútí níjaracaheyare eta ítaresiraya.

<sup>20</sup> Te ímahapa ena suntaruana nachayacapa eta Jerusalén, étanaquene-yarehi ejército eta náichapemurivaya, étainapa ícutiaraya eta táitavirayare eta avasare. <sup>21</sup> Tásiha, te ímahapa eta juca, táuricapa etátájinapa ejuna, eti etiarihiqueneanahi te Judea. Ecaijuheyare eta te céroana, étaina eyumurusivaya. Nácani tiávihanahi te tajuhe eta avasare Jerusalén, tavarahaipahi náuchucavane tayehe. Nácani tiávihanahi te vámahiana, vaipa távarahahini nachavahini tayehe eta avasare. <sup>22</sup> Taicha táitecapauchainapa eta tasacherayarehi eta tacaicuñairaya, títauchavainapa eta tametarapi eta Sagrada



Escritura. <sup>23</sup> ¡Páureanasami nácani esenana tachimararuanayare, nácani ticajarianahipuca, nácani esenana ticachichanahi eta amuya tiájicachaha! Támairijicainapa eta nacatajivairayare namutu ena achaneana tiávihanahi te Jerusalén taicha eta náicuñayare. <sup>24</sup> Natiarihi ena tépenanaya te guerra, ena apamuriana nacaratatajicainapa prisionéroanainapa. Námavacainapa te apanaqueneana avasareana. Ema Viya máisapainapa tisiapana te Jerusalén ena apavasaqueneana. Énapa téchanayare eta Jerusalén. Tiámainucava te máicutichapa ema Viya, macuchucavacainavarepa.

*Eta máitesiraya ema Manerejiruhi ema Viya  
(Mt 24.29-35, 42-44; Mr 13.24-37)*

<sup>25</sup> Tacahe, tímerecavanainapa eta ecutiarareyare te sache, te caje, étapa te jarairiquiana. Tipicanainapa ena achaneana te juca apaquehe. Tiáramecanainavarepa taicha eta nasamirayare eta muracaquene táepacuruha eta ichapequene une. <sup>26</sup> Ena achaneana tiáquipaicavanainapa eta napsiraya, taicha eta náimairayare eta ecutiarareanayare, váhisera náimatiequenehaimahi tájahapuca eta náichararacavayarehi. Énerichuvare tiyejecavavacainapa eta tiávihanahi te anuquehe anuma. <sup>27</sup> Nupaenumava nítecainapa nuchava núti Manerejirunuhi ema Viya. Namutu tímahanuanayare eta núcupaisirayare. Tiámanuinapaipa eta úcaji. Níñehinapaipa eta táetaviuchirayare eta nujaraivayarepahi. <sup>28</sup> Te ímahapa tanacuchavapa eta juca ecutiarareanayare, evapinavainapa éti taicha tiánehiripa eta nítecapiraya nucatiuchiráheyare.

<sup>29</sup> Máimicutirachinavare eta máimituresirahi. Ánipa macahe:

—Ecauneyare eta jácani yucuqui. <sup>30</sup> Te ímahapa tísvachavavacapa eta tapacajiana, tiánehiripa eta únemuhuyareipa. <sup>31</sup> Ene tacahehi, te ímahayarepa, ímatiacainapa eta tánehiraripa eta nitesirayare. <sup>32</sup> Numetacahevanecha: Vuíchaha títavanaimahi ena achaneana náitarerunaichaha te táitecapapa eta juca ecutiarareanaya. <sup>33</sup> Títavayarepa eta anuma étapa eta apaquehe. Tativa-yaresera títauchava tamutu eta numetaruhehi.

<sup>34</sup> Échapavaicha, machu tachimaracahe eta jena sache, vahi ecucuti ena tavayuaruana eta téracare, machu muracachutihéna táicha. Vahi ecueñamava eta ítaresira, machu tahapapicahe eta éhisiranuhi. <sup>35</sup> Eta táitecapauchirayare eta sache nuchavirayare tímicitijiricavahi eta táijahúchirava eta táeratasirava eta trampa. Ene nacaheyare ena achaneana te tamutu avasareana eta namanecapauchiravaya. <sup>36</sup> Eta tacahe, etsecavaicha yátupina. Eyuja-rauchavahi támutu sácheana, apaesa túmehénapa eta ecamichiraina tamutu eta juca táichararacavayare, apaesa tacuija ecuichiravaina eta ítecapauchiranuya te numirahu nuti Manerejirunuhi ema Viya —macahepa ema Jesús.

<sup>37</sup> Tiuri, tamutu sácheana tiyana eta te Templo ema Jesús. Tímiturecahi. Te yátivare tiyanavare te avasarechicha Betania te táequenehi eta cerro Olivoquiji. <sup>38</sup> Ena achaneana, tamutu yáticarrahiana, tiyanana te Templo, titsecavanaripa eta nasamararasirayare éma.

## 22

*Napanerechapa eta nacaratasiraya ema Jesús  
(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Tamirahupaipaicha eta piesta ticaijare Pascua, eta náepनावaira eta semana eta nanisirahi étachucha pan mayehere levadura. <sup>2</sup> Tacahe, ena tuparairucana énapa ena escribánoana, navarahaichaha náimicapaca ema

Jesús. Tásiha, natanucahi eta náicharacayare eta nacaratasirayare. Návami-rahuhisera ena achaneana.

<sup>3</sup> Tacahe, ema Satanás mávahácapa ema émana máimiture ticaijare Júlasí. Émarichuhi nachamurihi ena dócequeneana apóstoleana. <sup>4</sup> Tacahe, ema maca Júlasí tiyanapa matanupanavacahi ena tuparairucana, énapa ena nacápitárana ena suntaruana tayehe eta Templo. Téchajiripanavayarehi nayehe, mametacavacaipa eta táicharacavayarehi eta máijararesirayarehi ema Jesús eta nayehe. <sup>5</sup> Tiúrisamureanarinehi eta mametasiravacahi éma. Nametacapa eta náijarasirayarehi eta plata. <sup>6</sup> Tacahe, éma majacapavacapa eta naplatane. Tásiha, máichavacapa:

—Tiuri, núti népanaheyare te nímahapa nacuijapa ena achaneana te machacaya. Námahénapa tayehe eta mávihahi éma —máichavacapa.

*Ema Jesús mavanecahi ena apinana máimitureana, natsecayare eta naniruyare tayehe eta Pascua*

*(Mt 26.17-25; Mr 14.12-21; Jn 13.21-30)*

<sup>7</sup> Títecapapa eta sache táepaniravahi eta semana tapiestara eta nanisiraya eta pan mayehere levadura. Étarichuvare eta jena sache ticaijare Pascua, nacapasiraya eta uvesa ticaijare cordero pascual, nanisirayare te jena yati. <sup>8</sup> Ema Jesús mavanecavacapa ena apinana máimitureana, ema Pedro émapa ema Juan. Máichavacapa:

—Eyanayare étupiripanaya eta viniruyare tayehe eta Pascua.

<sup>9</sup> Éna nayaserecapa:

—¿Táviha pivaraha vétupirisihaya?

<sup>10</sup> Ema Jesús majicapavarepa:

—Eyanayare tayehe eta avasare. Te ítecapayarepa tayehe, íacapajicayare ema émana achane tiámapahi eta une te yupi. Éhicayare éma te peti masiapihayare. Éti apana esiapayareva. <sup>11</sup> Emetacayare ema ticayehe eta peti. Ani íchayare: “Ema viyehe Maestro tivanecahavihi viyaserepanavi pímechahavi eta cuarto vinisihayare eta uvesachicha eta viyeherepi, vicachaneyare éma” íchayare. <sup>12</sup> Éma, tímechahénapa eta ichape cuarto te anuquehe piso. Táurique-néipahi eta jácara téjasihacareana. Tásiha, étupiricapa eta viniruyare —máichavacapa ema Jesús.

<sup>13</sup> Tiyananapa ena vanairucanahi. Jéhesaréinehi, náimahapa étapaichuhi eta macayemaqueneanahi ema Jesús. Tacahe, náetupiricapa eta naniruyare tayeheyarehi eta Pascua.

*Ema Jesús máenimurihapa ena máimitureana*

*(Mt 26.26-29; Mr 14.22-25; 1 Co 11.23-26)*

<sup>14</sup> Tacahe, te hórapa eta nanisirayarehi, téjacanapa te mesa ema Jesús énapa ena apóstoleana. <sup>15</sup> Eta máenisiravacapa, máichavacahi éna:

—Ichapemuri eta nuvarairahi nucachanehe eta nunisirayarehi eta juca téqueneha nénisirahahi puiti eta juca yati páscuairahi, mapurare vuíchaha táitecapahini eta népenirayare. <sup>16</sup> Tásiha, numetacahevaneya puiti, vaipa nápechavaimahi nunica eta Pascua, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

<sup>17</sup> Tacahe, mavehapa eta vasu náerirare, mahasulupayachapa ema Viya. Tásiha, macahepa:

—Era eta juca. Ecajijiricaca. <sup>18</sup> Puiti numetacahevane: Vaipa nápechavaimahi nera eta juca tachi eta uva, tiámainucava te táitauchavapa eta nusiapiraya eta nucavacureraya, nucajupahairaya ema Tata —macahepa.

<sup>19</sup> Tacahe, mavehavarepa eta pan, mahasulupayachavarepa ema Viya. Mayuvetuhecapa, máijaracavacapa ena máimitureana. Tásiha, máichavacapa:

—Eta juca neche. Enica. Étivenehi níjararecavahi eta népenirayare. Eta juca apajarahiyare te apaquehe, te étipava énicaca, éta témechaheyare nuyehe — máichavacapa.

<sup>20</sup> Énerichuvare, te tínesianapa, mavehavarepa eta náerirare vasu. Máichavacapa:

—Eta juca vino, táicutiarahi eta nítine táepusairuvaya íchavene éti, nufirmachirayare eta arairu matratune ema Vicaiyaquene, nucaejasirayareva eta matratune apaesa ejacapacareya mayehe.

<sup>21</sup> Puítisera, ani te etaracu, mararihi ema tíjararecanuyare. <sup>22</sup> Yátupiquenehi eta nacapasiranuyarehi, taicha tacahehi eta mapanereruhi ema Tata eta nuyehe nuti Manerejirunuhi éma. Páuresamisera ema tíjararecanuya — macahepa.

<sup>23</sup> Tacahe, ena máimitureana tiyaserejiricacanapa:

—¿Nájahapuca mácani te vitaracu ema tíjararecaya ema Viáquenu? — nacahepa.

*Ena Jesús máimitucavaca eta nacapichuirayare ena téchapajiricanahi ena nachamuriana*

<sup>24</sup> Te táequenepa, tiácapaemajiricanapa ena máimitureana tayehe eta nájahayarepuca ema íchapequenepanaya aquenuca te nataracu te náejasiraya te návacureanayare. <sup>25</sup> Te máechapa ema Jesús, ánipa máichavaca:

—Ena réyeana énapa ena aquenucana te ichapequeneana avasareana nacaetemajiricavacahi ena achaneana, navarairahi ticapichuanayarehi.

<sup>26</sup> Étisera vahi táuricaímahi ene ácahehíni. Téhesera evarahahipuca ecapichahu, vahi ecasiñavaimahi. Ecutiyare ema amaperu eta mamansuvahi. Tacutiquene nácani tivanecanahi, tatuparacavacahi téñamavanayare eta náechapajirisiravacayare ena nachamuriana. <sup>27</sup> Eta nayeherepi ena achaneana, ichape eta napicauchirahi ema ténicahi eta tinicacare. Énasera ena vanairucana téchapajiricanahi eta mesa, vahi nacapichuhíni. Puítisera, nímitucaheyare eta juca arairu nuvanairipi. Puiti ímahanuipa eta nítátirahehi. Nuvaraha ecutinuya. Ítaticacayare éti.

<sup>28</sup> Éti, ímararacanuhi eta náichiranuhi ena ticatianacanuani. Váhisera ejunijicanuhíni. <sup>29</sup> Eta tacahe, níjaracaheyare núti eta etuparahanayare ecutinuyare núti eta nucatuparahairaya mayehe ema Tata. <sup>30</sup> Éjacainapa tayehe eta ecatuparahairaya. Étinapa evanerecaya nayehe ena dócemuriqueneana ena vijaneanana israelítana. Ecachanenuinavarepa te mesa eta enisiraya ánaqui te nucatuparahairayare — máichapa.

*Ena Jesús máimereucha ema Pedro eta máepiyasiraya vahi máimati ema Jesús (Mt 26.31-35; Mr 14.27-31; Jn 13.36-38)*

<sup>31</sup> Ena Viáquenu máichapa ema Pedro:

—Nuchicha Simón, péchapavayare. Ena Satanás, ichape eta mavarairahi ticaicutiarahayare tiáquipaicaheyare emutu éti. <sup>32</sup> Nútisera nuyaseuchahehi me Tata, pítipa, apaesa vahi tacuemitica eta péhisiranuhi. Piáquipaicasamiyaresera. Tichavayaresera eta picasiñairanuya, tásiha pétumechavacainavarepa ena apamuriana pichamuriana — máichapa.

<sup>33</sup> Éma Pedro majicapapa, máichapa:

—Tata Náquenu, tájina vahi nujunijicavímahi. Níjaracava néhicavi tayehe eta cárcel. Te nacapacavipuca, núti apanavare níjaracavavare nacapacanu apaesa nácachanevi — macahepa.

<sup>34</sup> Ema Jesús majicapapa:

—Numetacavivaneya, Pedro. Puiti jena yati, te tamirahuinarichaha eta táechajisiraya eta varayu, piti mapaheyare pépiyacavayare vahi pímatinu, eta picatiuchiravayare pítijiva —máichapa.

*Puiti etserereacavainapa*

<sup>35</sup> Tacahe, ema Jesús mayaserecavacavarepa ena máimitureana. Máichavacapa:

—Te nuvanecahénapa epaica, nutuparacahehi vahi ecuama eta tarera, eta billetera, eta eparupevana, ¿yátupihi, masi, vahi ecamunuvapahini?

Ena najicapapa:

—Tájina vácamunuipahini.

<sup>36</sup> Tásiha, máichavacavarepa:

—Puítisera mácani ticatarerahi, tiúripanahi mámayare eta matarera, étapa eta mayehe billetera. Émaripa mácani tájinahi mayehénahi espada, tiúripanahi máijarareca eta masacu, mavacharesihaya eta mayeheyare espada. <sup>37</sup> Tacahe numetacahévanécha. Ena achaneana nacatianacahaviya muraca. Títauchavainapa eta táechajiriruvanahi eta Sagrada Escritura eta níchararacavayarehi: “Timicutijiricavahi námerahihini náicha”. Tamutu títauchavayarehi eta tacayemaqueneanahi eta Sagrada Escritura eta nuyehe —macahepa.

<sup>38</sup> Tacahe, ena máimitureana náichapa:

—Tata Viáquenu, jucarihi apinahi eta espada.

Éma majicapavacapa:

—Tiuri, tarataquene.

*Ema Jesús tiyujaraca te Getsemaní*

*(Mt 26.36-46; Mr 14.32-42)*

<sup>39</sup> Tacahe, tiúchucapa ema Jesús, énapa ena máimitureana, tiyananapa tayehe eta huerta Getsemaní tiávihahi te táemiripaisinehi eta cerro ticaijarehi Olivoqui, eta mayujarasirarehi éma. <sup>40</sup> Te títecapanapa tayehe eta Getsemaní, máichavacapa:

—Eyujarauchava. Eyaseaca ema Viya eta étumevaina apaesa vahi macuiturucahe ema Satanás —máichapa.

<sup>41</sup> Téracijpanavapa apaesa ema Jesús eta nayehe. Cincuenta metro eta mayerehinévacahi. Tépuycapa. <sup>42</sup> Eta mayujarauchiravahi, ánipa macahe:

—Tátachicha Nucaiyaquene, picatajicanupaini. Nuyaseacavi vahi tacuitauchavaini eta níchavaquenevayare. Váhini picuisapaini eta nucatajivairaya. Níjaracavasera núti eta nítauchiraya eta pivarahaquenehi píti eta nuyehe —macahepa.

<sup>43</sup> Tacahe, tiáramicarepa máucupaucha ema émana ángele tiásihahi te anuma. Máetumechapanayarehi. <sup>44</sup> Ichape eta máeñamiravahi eta mayujarasirahi. Témiricapa eta máepatsure tacasiriqiuamapahi eta máitine. Cuájuuamapaipa eta táemirisirahi te apaquehe.

<sup>45</sup> Te títapiricapa eta mayujarasirahi, téchepucapa. Tiyanapa te návihahi ena máimitureana. Máimahainehe éna, tímacanaripahi táichavenehi eta nacatisamurevairahi. <sup>46</sup> Tásiha, máichavacapa:

—¿Tájaha tacayema ímacaichucha éti? Échepuca. Eyujarauchava apaesaina. Eyaseaca ema Viya eta étumevaina apaesa vahi macuiturucahe ema Satanás —máichavacapa.

*Nacaratacapa ema Jesús*

*(Mt 26.47-56; Mr 14.43-50; Jn 18.2-11)*

<sup>47</sup> Tacahe, téchejiricavainirichaha ema Jesús, títecapananecha ena camuri-queneana suntaruana. Máinapumirauchavacapaipahi ema Júlasí. Témeñahavapa eta mayehe ema Jesús. Máetserarecapa. <sup>48</sup> Tásiha, ema Jesús máichapa: —Júlasí, ¿tájaha tacayema pétserarecanu eta píjarasesiranuhi nuti Manerejirunuhi ema Viya? —máichapa.

<sup>49</sup> Tacahe, ena máimitureana natiarihiqueneanahi, eta náimairahi ena camuriqueneana suntaruana, nayaserecapa ema Jesús. Ánipa nacahe: —Tata Viáquenu, ¿vicatiuchava te espada?

<sup>50</sup> Tásiha, ema émana mavehapa eta mayehe espada. Mayuchatipaisinapa eta machaca tinapa te vaure ema mamusura ema aquenuca Caifás. <sup>51</sup> Ema Jesús máicha nuti Manerejirunuhi ema vacapa:

—Ésamiricavachucha —macahepa.

Tásiha, ema Jesús mavehapa eta machacaini ema achane, máimichavapa máipistaca, tinaracavanepa. <sup>52</sup> Tásiha, máichavacapa ema Jesús ena tuparairucana natiarihiqueneanapahi eta nacaratasirahi éma, énapa ena aquenuca-rahana, énapa ena oficiáleana tayehe eta Templo. Macajachavacapa:

—¿Tájaha tacayema ecasiña eta espada, ecaepuchiriquipahivare eta etanusiranupahi, tímicutijiricavapa námerahihini nútí? <sup>53</sup> Étayapasica cape juca tamutuhi sácheana nucachanehehi tayehe eta Templo. Váhivare epatsicavahini ecaratacanuhini. Étisera iúricapuca eta tamapicuvahi eta yátimuhuhi eta íchirahi eta tauriqueneanahi taicha mávaháruhehi ema Satanás. Máisapaquenéhevarepa ema Tata eta ecaratásiranuyarehi —máichavacapa.

*Ema Pedro tépiyacavapa vahi máimati ema Jesús*

*(Mt 26.57-58, 69-75; Mr 14.53-54, 66-72; Jn 18.12-18, 25-27)*

<sup>54</sup> Tacahe, nacaratacapa ema Jesús. Námapa te mapena ema corregidor Caifás. Émasera ema Pedro máehiequenehavacapaipa. <sup>55</sup> Ánaqui te tajuhe te canchón, ticamururecanapa eta yucu násasiavayarehi. Téjamurihanapa te tachacaya eta yucu. Téjacavarepa ema Pedro te namuri. <sup>56</sup> Sucahepaipahi esu sirvienta, suímahapa ema Pedro eta máejasirahi te tachacaya eta yucu. Suímararacaripahi. Tásiha, suíchapa:

—Eñi ñica achane éñirichu ñichamuri eñi Jesús.

<sup>57</sup> Émasera ema Pedro tépiyacavapa vahi máimati. Máichapa:

—Pímaha, esena, vahi nímati nútí ema píchaquenehi.

<sup>58</sup> Te tiyererehachichavare, máimamarácaripavare ema apana. Máichapa:

—Piti pítirichu machamurivi ema maca.

Ema Pedro majicapavarepa:

—Vahi, tata. Vahi machamurinuina —máichapa.

<sup>59</sup> Te hórapapuca eta táetavisiravahi, máimahavarepa ema apana, máimatipa eta máechajirisirava ema Pedro. Máichapa:

—Yátupiquene pítirichu machamuri ema maena Jesús, taicha eti ecavasana te Galílea, tímaticarehi eta échajisira —máichapa.

<sup>60</sup> Ema Pedro majicapapa:

—Vahi nímati, tata, nájahapuca ema maena píchaquenehi —macahepa.

Tacahe, téchajiricavainirichaha ema Pedro, énevanepa téchajicanecha eta varayu. <sup>61</sup> Ema Viáquenu máesenicapa ema Pedro. Enévanerinehi téchava ema Pedro eta mametarapianahi ema Viáquenu eta máichirahi: “Te tamirahuinarichaha eta táechajisirayare eta varayu, píti mapaheyare pépiyacavayare vahi pímatinu”. <sup>62</sup> Tásiha, tiúchucavanepa ema Pedro. Tíyahapa taicha máimativanepa eta táichapevahi eta máejecapiravahi.



*Nacaecahijiricapa ema Jesús*  
(Mt 26.67-68; Mr 14.65)

<sup>63</sup> Ena suntaruana tijaneacanahi ema Jesús, nacaecahijiricapa éma. Náehararacapa. <sup>64</sup> Náitiuquichavare. Náehamirahavare. Tásiha, náichapa:

—Vímahasejicacha, te pijarauquipuca, pímatihaviyare nájahapuca ema téhamirahavíhi —nacahepa.

<sup>65</sup> Ichapemurivare eta napanararachirahi éma.

*Nacatupihapa ema Jesús te namirahu ena aquenucana*  
(Mt 26.59-66; Mr 14.55-64; Jn 18.19-24)

<sup>66</sup> Te tijarahipa, ticurujicacanapa ena tuparairucana, énapa ena aquenucarahana, énapa ena escribánoana. Námapa ema Jesús, nacatupihapa te namirahu. Nayaserecapa:

<sup>67</sup> —Viyaserecaviyare. ¿Pítisaréji Cristo, ema vicuchapaquenehi? —náichapa.

Majicapapa ema Jesús:

—Tiuri, te numetacahe eta nútirahi, éti vahi esuapanuimahi. <sup>68</sup> Téhevare nímechahepuca eta ícutiaraina eta nútirahi, éti váhivare esuapanuimahi. Énerichuvare váhivare ecaiticanuimahi. <sup>69</sup> Étainapasera nucaijuhayare te anuma nuti Manerejirunuhi ema Viya eta néjasirainapa te mavaure ema Tata, máitupajijihaquenehi éma —máichapa éma Jesús.

<sup>70</sup> Nayaserecavare namutu, náichapa:

—Tacahe piti, ¿pímijachavapuca machichavi ema Viya?

Ema majicapavacapa:

—Yátupi machichanu —máichapa.

<sup>71</sup> Tacahe, éna nacahepa:

—Vaipa tácomesa vicayasesereruhini ena testígoana. Émaquenepa visamahi puiti eta juca máechajiriruvahi, étapa ticaviureya —nacahepa.

## 23

*Námapa ema Jesús te mamirahu ema Pilato*  
(Mt 27.1-2, 11-14; Mr 15.1-5; Jn 18.28-38)

<sup>1</sup> Tacahe, téchepumurihanapa namutu. Námapa ema Jesús te mamirahu ema Pilato. <sup>2</sup> Te nacaitecapa, náepiyaequenehapa éma. Ánipa nacahe:

—Viámapahi ema maca achane ani te pimirahu. Mavarahahi mahapapisinahaviyare ena vichaneranahi. Énerichuvare macahehi váhiji táurica vivachachahini eta impuesto mayehe ema viyehe Presidente Emperador. Énerichuvare, macahevare eta émairahíji Cristo, ema réy-yarehíji —náichapa.

<sup>3</sup> Tásiha, ema Pilato mayaserecapa ema Jesús:

—¿Yátupisareji réyvihí píti nayehe ena pijaneanana israelítana? —máichapa.

Ema Jesús majicapapa:

—Pitupiruvahi eta juca piyaseresiranuhi. Yátupihí eta nurreyvahi —máichapa ema Jesús.

<sup>4</sup> Tacahe, ema Pilato máichavacapa ena tuparairucana énapa ena achaneana natiarihiqueneanahi:

—Tájina maviurevaina eta nímairahi ema maca achane —máichavacapa.

<sup>5</sup> Énasera nayurucapa muraca ema Pilato. Ánipa naicha:

—Ema maca, ichape eta mahapapisirahi eta napanereruana namutu ena achaneana vijaneanana israelítana, énaripa ena ticavasanahi te Galilea étapa ani te juca Jerusalén —náichapa.

*Ema Jesús námavare te mamirahu ema Herodes*

<sup>6</sup> Eta masamiravacahi ema Pilato, macayasesererupa te étahipuca te Galilea macavasahi ema Jesús. <sup>7</sup> Te nametacapa eta étairahi macavasa ema Jesús, macavanairipipa ema Pilato nama mayehe ema Herodes, aquenucahi tayehe eta Galilea, taicha ema Herodes matiarhihi tayehe eta Jerusalén eta jena sácheana páscuairahi. <sup>8</sup> Tacahe, tiúrisamuréinehi ema Herodes eta máimairahi ema Jesús. Ichapemurihi eta mavarairahi máimati taicha masamairiricahi tamutu eta tiáramicareana máichaqueneanapahi ema Jesús. Mavarahainehi títahúchava máimahahini eta jácani tiáramicare. <sup>9</sup> Ichapemurihi eta mayaseseresirahi. Émasera ema Jesús, tájina vahi majicapahini. <sup>10</sup> Natiarihipahivare ena tuparairucana. Tétavicavahi eta nasemanevahi eta náepiyaequenehairapahi. <sup>11</sup> Tásiha, ema Herodes énapa ena masuntarurana, ichaperinehi eta náepuruirahi. Tacahe, ema Herodes mavehapa eta mamuirihaini manaquiriaruvaipahi, táepahamequeneripahi eta tajanunumesirainihi. Mamuriachapa ema Jesús. Táicutiarahi eta nacaecahirahi éma. Tásiha, macavanairipivarepa ema Herodes námichava te mamirahu ema Pilato. <sup>12</sup> Ema Herodes émapa ema Pilato ticatianacacanainihi eta náitairesirahi. Étasera te jena sáchequenehi tichavapa eta náemunasiracacahi.

*Ema Pilato macavanairipipa eta náetatasiraya ema Jesús*  
(Mt 27.15-26; Mr 15.6-15; Jn 18.39–19.16)

<sup>13</sup> Tacahe, ema Pilato eta máimairahi námichavirahi eta mayehe, macurujimurihapa ena tuparairucanahi énapa ena achaneana. <sup>14</sup> Tacahe, máichavacapa:

—Eta iámirapahi ema maca achane te numirahu, ímijachahi mahapapicavaca ena achaneana. Nútiserá námahahi tájina maviurevainahi eta nuyaseseresirahi te emirahu eta ímijachaquenehi eta máejecapiravanahi.

<sup>15</sup> Émaripa ema Herodes máimichavavare eta ani nuyehe taicha tájinavare máimahahini eta máejecapiravainahini. Étainahipucaini taviuchahini táimicapahini. <sup>16</sup> Tiúriserapuca námivanereca macaemecharahi, tásiha, nucaiticapa —máichavacapa.

<sup>17</sup> Eta mayeherepi ema Pilato te Páscuamuhuana te áñoana macaiticayarehi ema émana preso te jena sáchequenehi. <sup>18</sup> Tacahe, ena achaneana vahi návarahahini máuchucuhahini ema Jesús. Tipiaracanapa muraca. Ánipa nacahe:

—Vahi vávaraha máuchucuha ema maca. Émaina máuchucuha ema Barrabás —nacahepa.

<sup>19</sup> Ema Barrabás te cárcel mávihahi. Táimicuñaruhi eta máichirahi eta revolución étapa eta macapahivahi. <sup>20</sup> Émasera ema Pilato mavarahaichucha macaiticayarehi ema Jesús. Mayaseremurihavarepa. <sup>21</sup> Énasera muracapanapaichucha eta napiarasirahi:

—¡Pémetatareca te crusu! ¡Pémetatareca te crusu! —nacahepa.

<sup>22</sup> Mapahequenepa eta mayaseseresiravacahi éma:

—¿Tájasica eta maviurevahi ema maca? Núti tájina námaha maviurevainahi táimicapahini. Tiúriserapuca námivanereca macaemecharahi, tásiha, nucaiticapa —máichavacapa.

<sup>23</sup> Énasera títitujiricanapa eta napiarasiraina nayaseasiraina eta macaetatairaya te crusu. <sup>24</sup> Jéhesaréinehi, ema Pilato masuapavacapa eta nayasearapihi ena tuparairucana. <sup>25</sup> Émapa tiúchucuhahi ema Barrabás ema nayasesereruhi, táimicuñaruhi eta máichirahi eta revolución étapa eta macapahivahi. Macavanairipipa táitauchava eta navarahaquenehi éna, eta nacapasiraya ema Jesús te crusu.

*Náetatacapa ema Jesús te crusu*  
(Mt 27.32-44; Mr 15.21-32; Jn 19.17-27)

<sup>26</sup> Tacahe, námapa ema Jesús tayehe eta macaetataiyayarehi. Eta napaisirapahi te calle, nácapajicapa ema achane ticajare Simón ticavasahi te Cirene. Éma, másihapahi te máesane. Napamicapa máevachacaya manaracuhayarehi eta macurusura ema Jesús, máehicapaipahi te máequene ema Jesús.

<sup>27</sup> Ichapemuriana ena achaneana téhicanapahi. Énaripa ena esenana, tipiararecanapaipa eta náiyairapahi taicha eta nacatisamurevahi, náimararasirahi eta máejapanuravapahi éma. <sup>28</sup> Máesenimurihapa éma. Máichavacapa:

—Vahi ecuiyauchanu, eti esenana tachichanaveanahi eta Jerusalén. Étina íyauchava, náichavenénahi ena echichanaveana. <sup>29</sup> Taicha tatiarihiyare eta sáchevayare nacapacayarevare ena. Ichape eta nacajapanuravairaya eta nacapasiraya. Tásiha ecahénapa: “Tétavicavapa náuriva ena esenana macheruana. Nájina náimipanererecchini”. <sup>30</sup> Tásiha, ena achaneana, eta napisirayare, tijunanainapa te céroana, tásiha, nacahénapa: “Tiúripanapucaini viyumurucavahini eta te juca cerro.” Ena apamuriana nacahenavarepapuca: “Étapucaini te juca simena viyumurusivahini”. <sup>31</sup> Apanasica núti ichapemuri eta nucatajivairahi, tájinahinéni taviuchanuhini. Navetijiyarecha éta nátajivayare ena echichanaveana\* —máichavacapa.

<sup>32</sup> Énerichuvare natiarihipahivare ena apinana tiámerahiana macutique-  
neanayarehi ema Jesús eta macaetatairayare. <sup>33</sup> Tacahe, nacaitecapapa tayehe eta masihi nacaetatairare ticajarehi Calavera. Náetatacapa te crusu ema Jesús, énapa ena apinana tiámerahiana. Ema émana nanacapa te mavaure, ema apana te sapa. <sup>34</sup> Te náetatacapa ema Jesús, macahepa eta máechajiriruvahi:

—Tata, piperdonachavaca ena nani, taicha vahi nácaicutiarahini eta juca náichiranuhi —macahepa.

Tacahe, ena suntaruana nasuertehachapa eta mamuirihaini eta náijarajiriracacahi. <sup>35</sup> Natiarihihi ena achaneana tímararacanahi tamutu. Énaripa ena tuparairucana natiarihihivare. Nacaecahijiricaripa éma. Ánipa nacahe:

—Ema mácacacha, macahehi eta máechajiriruvahi eta maratahairahíji macuchucuhavaca ena apamuriana achaneana. Tásiha puiti, vivaraha vímaha máimereuchava eta máitupajijiasiravahíji, te yátupihpuca Cristo éma, Manerejiruhíji ema Viya —nacahepa.

<sup>36</sup> Énerichuvare ena suntaruana nacaecahijiricahivare éma. Navarahapa náesichayarehi eta tasisiru vino. <sup>37</sup> Náichapa éma:

—Te yátupinapuca piti reyvihi nayehe ena israelíta, pítijivaina picuchuhava —náichapa.

<sup>38</sup> Tatiarihihivare eta ajureca nanacaquenehi te tachutisi eta macurusura. Eta juca ajureca tacajuquenehi te náechajiriruva te griego, te latín, téhapa hebreo. Ani tacahehi eta táechajiriruvahi: “Ema maca ema Rey nayehe ena israelítana”.

<sup>39</sup> Ema émana tiámerahi macaetataquenehi te machacaya, énerichuvare éma macaecaíhi. Ani macahehi:

—Te yátupinapuca pítiquenehi Cristo, picuchuhava pítijivaina. Tásiha, picuchucuhavivare víti apana —máichapa.

<sup>40</sup> Émasera ema apana macaetataquenehi macahepa:

\* **23:31** Eta juca mayeherepi proverbio ema Jesús te máechajiriruva, ani tacahe: “Te náichahi eta juca eta náimairahi eta yucuquí vérepacavacaichahahi, tétavicavahi eta navairahi náquipaica te tájiquipa”. Tatiarihi eta tacayemaquenehi tayumurevahi.

—Váhipuca pipicahini píti ema Viya. Váhipuca péchahi étarichuhi viávacuha víti eta juca vícuñahi. <sup>41</sup> Víti, vivachachahi eta juca vitapiravahi taicha ichapequenehi eta véjecapiravanahi. Émasera ema maca Jesús, ticatajivahi tájinahinéni taviuchahini.

<sup>42</sup> Tacahe, máichapa:

—Tata Jesús, péchanupaini te péjacapa tayehe eta piávacureya —máichapa.

<sup>43</sup> Ema Jesús majicapapa:

—Numetacavivane, puiti píti nucachaneviyare te paraíso —máichapa.

*Eta máepenirahi ema Jesús*

*(Mt 27.45-56; Mr 15.33-41; Jn 19.28-30)*

<sup>44-45</sup> Tacahe, te las dócequenepa, témahapa eta sache. Timapicupa tamutu eta apaquehe. Mapana hora eta tamapicuirahi. Étarichuhi eta jena máepenirahi éma, tijahúchavapa tétsayumeca eta tayehe cortina eta Templo. Ticutimecaca eta taetsayumesirahi. <sup>46</sup> Ema Jesús tipiaracapa:

—Tata, pijacapinanu eta náchaneva —macahepa.

Te títapiricapa, tépenapa.

<sup>47</sup> Tacahe, ema nacapitara ena suntaruana romanoana, tipicarinehi eta máimairahi eta júca. Éta pa macaicutiarapa, macunachapa ema Jesús, ánipa macahe:

—Yátupiquenéichuyapa ema maca achane matapiravarehi —macahepa.

<sup>48</sup> Namutu ena achaneana natiarihiqueneanahi, eta náimairahi eta júcana, ichaperinehi eta napisirahi. Téhatupachávanapáipa eta nacatisamurévairahi. <sup>49</sup> Énasera ena téhicanapahi ema Jesús te másihainapa te Galilea, énapa ena esenana, namutuhi nanecapararecahi eta juca táichavaquenevanahi. Nayererehihisera eta náimararasirahi.

*Nacucupaicapa te crusu ema Jesús, náecarapa*

*(Mt 27.57-61; Mr 15.42-47; Jn 19.38-42)*

<sup>50-51</sup> Matiarihivare ema achane ticaijare José. Ticavasahi te Arimatea te Judea. Tipicaurahihi éma. Tétavicavahivare eta máuriva. Masuapahi ema Jesús, eta émairahi ema Cristo mavaneruhi ema Viya, étaripa eta émairahi ema téchayarehi namutu ena achaneana. Ema maca José, náumurivahi ena aquenucarahana, váhisera mapauchavacahini ena machamurianahi tayehe eta juca náichaqueneanahi tamauriqueneanahi. <sup>52</sup> Te cáperehichichapa, eta máimairahi máepeniraipahi ema Jesús, tiyanapa mayehe ema Pilato, mayaseapanahi eta máquehe ema Jesús, mavarairahi máecarayare. <sup>53</sup> Te tichavapa, macucupaicapa eta máquehe tayehe eta crusu. Máyuruacapa eta te sávana tijapu. Náiyaracuhapa tayehe eta máecari eta te mari nasecajureruhi. Nájinaichaha nacaecarasihini tayehe. <sup>54</sup> Titatajianapa taicha cáperehichichapahi. Taicha vahi táisapacarehini náecararecahini te yati, váhivare te tijarahiacaimahi taicha sávarumuhuyarepa.

<sup>55</sup> Ena esenana téhicanapahi ema Jesús te másihainapa te Galilea, tiyananapa tayehe eta máecari, náimatiyarehi eta mávihahi. <sup>56</sup> Te náimatipa, tichavanapa te napena. Natsecapa eta perfume mayajihayarehi. Tinaracanasera te jena sáchequenehi, napicauchahi eta tapicauchacarevahi.

## 24

*Eta máechepusirahi ema Jesús te máecari*

*(Mt 28.1-10; Mr 16.1-8; Jn 20.1-10)*

<sup>1</sup> Te apanapa sache, te tijarahichichapa eta lumíncuquenehi, tiyananapa ena esenana tayehe eta máecari. Námapaipa eta perfumeana náicurevanahi,

nacachanevacapaipa ena apamuriana esenana. <sup>2</sup> Te títecapanapa tayehe eta ecari, náimaharinehi eta ticheyame mari tajiainihi eta ecari, téquehepuichavaipa. <sup>3</sup> Tisiapanapa éna, náejiacainehi eta máquehe ema Viáquenu Jesús. Májinaripahi. <sup>4</sup> Tiáramecanarinehi eta náejasirahi. Váipa náimatieque-nehahini tájahahipuca eta máichararacavahi. Tásiha, tiáramicarepa náimahahi ena apinana ajairana titupihanahi te nachacaya. Tijanunucavacahi eta namuirihana. <sup>5</sup> Eta náramesirahi éna, tétipaimurihanapa. Énase ena ajairana náimahaqueneanahi náichapa:

<sup>6-7</sup> —Éti ímijachaipupuca manasihi tépenahi ema Jesucristo, Manerejiruhi ema Viya. Májinaripa, tichavaripahi títareca. Échavarichuhipuca eta macayemaqueneanahi te achanerichaha te manasiquenerichaha te Galilea. Macahehi eta máechajiriruvahi eta nacaratasirayarehi ena ticatianacanahi éma, náetatasirayarehiva te crusu. Técheputayarehisera te mapanaquenénapa sache —nacahepa ena ajairana.

<sup>8</sup> Tacahe éna, enurujirinehi náechavane eta máechajiriruvanahi ema Jesús. <sup>9-10</sup> Te tichavanapa te napena, nametacapa ena óncequeneana apóstoleana, énapa ena apamuriana nachamurianahi. Te nataracu ena esenana tímahanahi ena ángeleana, sutiarhipahi esu María Magdalena, esu Juana, ésupa esu apanavare María, máenahi ema Jacobo. <sup>11</sup> Énase ena apóstoleana vahi nasuapahini, náimijachaichucha náepiyahiraivahi namaurishivahi ena esenana.

<sup>12</sup> Tiyanavanepase ena Pedro tayehe eta ecari. Tijunapapapahi. Te títecapapa, máimahapa tacarinehi eta sávana. Mapanerequenehainehi eta juca táichararacavahi. Tacahe, tichavavarepa.

*Tímerecavapa ema Jesús nayehe ena apinana máimitureana te táchehu ticaijuhe eta avasarechicha Emaús (Mr 16.12-13)*

<sup>13</sup> Étarichu te jena sáchequenehi, tipaicanapahi te achene ena apinana máimitureana ema Jesús. Násihahi éna te Jerusalén nacaijuheyarehi eta avasarechicha Emaús. Once kilometro eta tayerehivahi. <sup>14</sup> Eta napaisirapahi nacasamurepaipahi eta nasamairiruhi. Téchajiricavanapaipa. <sup>15</sup> Eta náechajisihairapahi eta juca táichararacavanahi, tiáramicarepa macapayamurihapa ema Jesús, macachanevacapaipa. <sup>16</sup> Énase vahi náimatihini, taicha éma vahi máisapahini náimati. <sup>17</sup> Tacahe, ema Jesús mayaserecavacapa:

—¿Tájahasica eta juca échajisihapahi eta epaisirapahi? ¿Tájaha eta tímipane-rerecahepahi? —máichavacapa.

<sup>18</sup> Ema émana ticaijarehi Cleofas majicapapa:

—Namutu ena achaneana náechahi eta juca táichararacavahi te Jerusalén puiti juca sácheanahi. ¿Picarichuhipuca píti vahi péchahini eta juca, eta piávihairahi te Jerusalén?

<sup>19</sup> Éma máichavarepa:

—¿Tájahasica eta téchacarehi?

Éna náichapa:

—Émara véchajisihapahi eta máichavaquenévhahi ema Jesús Nazareno, ema profeta máuriquenehini nayehe ena achaneana. Tamutuinihi tiuri eta máimiturapiana, tétávicavahivare eta máitupajijiasiravahi taicha ema Viya, éma tíjaracahi tamutu. <sup>20</sup> Énase ena tuparairucana te viávasa, éna tíjararecanahi nayehe ena apavasanana taicha navarahahi náimicapaca. Tásiha, náetatacapa te crusu. <sup>21</sup> Víti ichapemuri eta vicasiñavairainihi eta mayehe. Vicuchapavainihi eta macatiuchirahaviyarehi vimutu viti



israelítana. Tamapurujipasera puiti, taicha tépenapa éma. Puiti mapanaripa sache eta táetávisiravahi eta juca. <sup>22</sup> Icháquenesera te yáticarahichichapa, ticamecahavianapa ena esenana vichamurianahi eta nayatiruirahi tiyanana tayehe eta máecari. <sup>23</sup> Vaipa nachimapahini eta máquehe. Májinaipahi. Te tichavanapa, timetacahavianaipa eta náimairahi ena apinana ángeleana. Nametacavacapaji eta machaviraipahi títareca ema Jesús.

<sup>24</sup> Tásiha, tiyanavaneanapa ena apamuriana vichamuriana tayehe eta ecari. Jéhesaréinehi májinaipa ema Jesús, étarichuhi eta nacayemaqueneanapahi ena esenana —náichapa.

<sup>25-26</sup> Ema Jesús máichavacapa:

—Tétávicavapa tájinaira ácaicutiaraquenéna eti páureana. Váhivarepuca ácaicutiarahini eta náechajirivanahi ena profetanaini tayehe eta tacaheyarehi eta macatajivairayarehi ema Cristo eta máepeniranumaya, tásiha tichavayarehi títareca. Váhivarepuca ácaicutiarahini eta tacaheyarehi eta mápanirayarehi tichava éma te mávasa anuma —máichavacapa.

<sup>27</sup> Tásiha, mametacavacapasera tamutu eta táechajirivanahi eta Sagrada Escritura, eta táechajisihairahi éma. Tépanavapa tayehe eta májureanahi ema víyarahaini Moisés; étapa eta apamuriana nájureanahi ena profetanaini.

<sup>28</sup> Títecapananecha tayehe eta avasarechicha nacaijuhequenepahi. Mavarahapa ema Jesús majunijicavacayahini. <sup>29</sup> Énasera nacumpirachapa máehicavacahini te napena. Náichapa:

—Pácaherine eta ani viyehe, taicha yátinapa eta jena —náichapa.

Tásiha, ema Jesús manasipa tisiapapa eta nayehe. <sup>30</sup> Te tiúripa eta tinicacare, mavehapa eta pan, mahasulupayachapa ema Viya, mayuvetucapa, máijaracavacapa éna. <sup>31</sup> Enévanerinehi náimativanepa éma. Émasera tíjahúchavapa témitiacahi te namirahu. <sup>32</sup> Tésenijiricacanapa éna. Tásiha, nacahepa:

—¿Tájaha tacayema eta vahi vímativanehini ichaquene te achene te ticapayacahavipa éma? Étapa eta vicachaneraipahi, váhivare vímatiacavanehini, véjapusamurechapaipahinéni eta visamiravahi eta máimitusirahavipahi tayehe eta Sagrada Escritura —nacahepa.

<sup>33</sup> Tacahe, enévanepa téquequecavanahi tichavana te Jerusalén. Te títecapanapa, tisiapanapa tayehe eta návihahi ena óncequeneana apóstoleana énapa ena apamuriana nachamuriana. <sup>34</sup> Ánaqui ticametacasianaripavare éna. Nacahevarepa ena apóstoleana:

—Yátupi eta máechepusiraipa ema Viáquenu. Máimaharipa ema Pedro —nacahepa.

<sup>35</sup> Ena apinana najicapavarepa:

—Énerichuvare víti vímahaipavare éma, te achene eta vipaisirapahi. Váhisera vímativanehini. Tapaenumava te mayuvetucapa eta pan, vímatipa éma —náichapa.

*Tiápechavavare tímerecava ema Jesús nayehe ena máimitureana  
(Mt 28.16-20; Mr 16.14-18; Jn 20.19-23)*

<sup>36</sup> Tacahe, téchajiricavanarichaha éna, tíjahúchavavarepa tímerecava ema Jesús te namuri. Máechajicavacapa, ánipa macahe:

—Íchararacava, nuchichanaveana.

<sup>37</sup> Énasera típicanarichucha, náimijachaichucha cunarehi éma. <sup>38</sup> Émasera ema Jesús máichavacapa:

—Vahi ecupicanu. Étumecha eta esamureana. <sup>39</sup> Ímaha eta juca nuvahuana étapa eta nívapeana. Émamahacanu apaesa écha eta nútiquenériahi. Eta cunare,

tájina táechena, tájinavare táperaina. Vahi tácutihini eta nucaqueherahi núti — máichavacapa.

<sup>40</sup> Tacahe, eta máichiravacahi, ticajaruvauchavaipa eta mavahuana, étapa eta máivapeana. <sup>41</sup> Vuíchahasera nasuapahini éna, tiúrisamureanaripahinéni eta náimairahi, tacachanehisera eta napisirahi. Eta tacahe, máichavarepa:

—¿Jararihi nunica?

<sup>42</sup> Éna náijaracapa eta nájimarú jima, étasipa vasu eta mápama. <sup>43</sup> Majacapavacapa éma, tinicapa te namirahu éna. <sup>44</sup> Tásiha, máechajiricavacapa:

—Éta juca níchavaquenevahi, étara eta numetaruhehi cape juca nucachanejiricahéichahahi. Eta tacaheyarehi eta táitachiravayarehi eta májuchaqueneanahi ema víyarahaini Moisés núti táechajisihaquenehi. Étape eta nájuchaqueneanahivare ena profetanaini, étape eta Salmo.

<sup>45</sup> Máemechavacaipahi eta táechajiriruvana eta Sagrada Escritura. <sup>46</sup> Tásiha, máichavarepa:

—Étara eta juca tacajuqueneanahi eta népenirayarehi nuti Cristo. Néchepucayarehisera tayehe eta nécari te mapanaquenepa sache. <sup>47</sup> Étayaréichuhivare iámapiçayare eta níjare eta ímituresiraya ena achaneana ticavasanahi te tamutu avasareana. Étaripa te juca Jerusalén, emetacavacayare ena achaneana eta náeneuchiravaina apaesa macaepaha ema Viya eta napeçaturana. <sup>48</sup> Éti, nutupararuheya eta ímituresiraya eta júcana. <sup>49</sup> Enasiyarechahasera ani te juca Jerusalén. Tiámainucava te máitecapauchahevacaipa ema Espíritu Santo nuvaneryare, máijararunuyarehi ema Tata. Éma, tíjaracheyare eta ítipajiasiravanayare —máichapa.

*Eta mayapirahi ema Jesús te anuma*  
(Mr 16.19-20)

<sup>50</sup> Te títapiricapa eta máimitusiravacahi, mámamurihapa te tachachacu eta avasare Jerusalén, te tachacayahi eta avasarechicha Betania. Macanuquechapa eta mavahuana, mayujarauchavacapa éna. <sup>51</sup> Te títapiricapa eta mayujarauchiravacahi, timutserahavapaipa ticanuquechavapaipa eta mayapirahi te anuma. <sup>52</sup> Eta náimairahi éna eta macanuquechiravapaipahi, tépuyumurihanapa eta nanecapararesirahi eta mayanirahi. Tásiha, tichavanapa tayehe eta Jerusalén. Tiúrisamureanapaipa. <sup>53</sup> Tájina vahi náejiacavahini tayehe eta Templo. Tiyujarauchavanaparacahi eta nacunachirahi ema Viya.

Tamutupa eta juca numetasiravihi puiti.

## **Éma Apóstole Juan májuequenehahi eta máichararacavahi ema Jesucristo, ticajare puiti eta EVANGELIO SEGÚN SAN JUAN**

<sup>1</sup> Éta acane, te táepaniravahi tamutu, matiarhiqueneípahi ema Jesucristo, ema Tímimatirahi me Viya\*. Éma, macachanehi ema Maiya eta máitare-sirahi, Víyahivare éma apanavare. <sup>2</sup> Éna apinana, nacuticacahi eta napane-reruana. <sup>3</sup> Éta táepaniravahi eta acane, émaríhi ema Cristo ticaemata-neacahi tamutu eta tatiarhiqueneanahi puiti, máitachirahi eta mapane-reruanahi ema Maiya. Tájina máejequeruinahini, nájinavare apanainahini náepiyacahini eta tatiarhiqueneana. <sup>4</sup> Émarichuhivare ticaitarecavahi viti achaneana. Émarichuvare tinacapa te viáchanevana eta tamichahu eta vítaresirahi. <sup>5</sup> Éma tímiyanava tímicauchahavi taicha mavaraha máimijunijisi-nahivare eta tamapícu te viáchanevana. Nararhisera ena vahi náurichahini eta mamicauchinavaca. Navaraha nacaemaha eta mamicauchiravacahi.

<sup>6</sup> Tacahe, te máimahapa tiuri, ema Jesucristo tiúcupaicapa te juca apaquehe. Tiáchanechavapa. Yátupiquenehi achane, macaechehi eta veche viti achaneana. Ticasiriquihavihi te jena áñoanahi majurusirahi. Matiarhivare ema apana achane ticajarehi Juan Tícachasiricarahi. Tacahe, ema Viya, te máimahapa tiuri, ticavanahipa ema Juan. <sup>7</sup> Máinapumirauchayarehi eta macametairuyare eta máimeresiravaya ema Cristo, ema namicahuyare nácani ticasíñavanayare mayehe. Ehanéchavapa. Yátupiquenehi achane, macaechehi eta veche viti achaneana. Ticama Juan mametacayarehi ena achaneana natsecava eta najacapiraya ema Cristo. <sup>8</sup> Éma Juan, vahi émainahini tímícauchamurimahi ena achaneana. Émahisera ticametairurahiyarehi eta máucupaisirapa ema tiámahavihi eta yátupiqueneana mapanereruanahi ema Viya. <sup>9</sup> Éma maca máechajisihaquene ema Juan, éma yátupiquenehi eta mamicauchirahivarehi vimutu viti achaneana, taicha tímieche viti achaneana. Ticatucavahi eta mapanereruana ema Viya.

<sup>10-11</sup> Éma Jesucristo, émahí acane tépiyacahi tamutu eta apaquehe, énapa ena viáchucanaveanaini. Puíticha éma téchahavi vimutu. Téhesera te tiúcupaicapa éma, namaimatiquenehi ena achaneana Viáquenuirahi éma, váhivare navarahini najacpahini éma. <sup>12</sup> Natiarhisera ena tinerejicavanahi tijacapanahi, téhicanahi éma. Éna nani, ichaperinehi eta macunachiravacahi táichavene eta nacasiñairavahi mayehe. Éna, yátupiqueneripa machichanaveanahi ema Viya. <sup>13</sup> Éta macachichairahavihi ema Viya víti, émahí ema Viya tinerejicavahi táichavene eta vicasiñairavahi mayehe. Vahi étaparacainahipucaini eta náehisirainahipucaini ena ticachichahaviana. Váhivare étaparacainahipucaini vivarahahipucaini ichape víti. Váhivare étaparacainahipucaini ichapenahipucaini eta mavarairahini mácani apana achane.

<sup>14-17</sup> Viti véhicanahi ema Jesús eta matiarhirahi te juca apaquehe, yátupi eta vímatirahi éma. Vímahahi te viúquihana. Vímativarepa eta másihairahi te

\* **1:1** Éma Apóstole Juan, te májuchapa eta juca libro, manacahi amairiha te letra griega λογος (eta táechajicuirava: “logos”). Éta tacayemaquene te véchajirirupa: “Tímimatirahi me Viya”. Étarichueche viti achaneana. Ticavare tacahe eta táechajisihaquene eta apamuriana libroana te castellanorupi, ani tacahehi: “la Palabra” étapa “el Verbo”.

anuma, eta émairahi ema macarichuquenehi Machicha ema Viya. Yátupihivare eta víyairahi éma, macutihi ema Maiya. Éma, tímimatirahi me Viya, taicha éma máimerecahi eta máetaviuchirahi eta máemunasirahavihi, máimechirahavihivare eta yátupiqueneana mapanereruana ema Maiya. Ema víyarahaini Moisés ticatuparahahi me Viya eta máimitusirahavihi viti achaneana eta vanairipiana. Émasera ema Jesucristo ticatuparahahi me Maiya eta máimitusirahavihi eta máemunasirahavihi, étapa eta máechajiriruvana yátupiqueneana ema Viya. Ema Cristo, tétavicavahi eta máuriva eta viyehe vimutu. Eta majaneasirahavipahi, tíjaracahavihi eta vitumevahi te tamutu sácheana. Émaripa ema Juan, ani macahehi eta máechajisihairahi ema Jesús: “Émara ema maca ema néchajisahaquenehi eta eyehe cape juca. Yátupi núti nínapucahi eta núchusirahi, émasera matiarhiqueneipahi eta acane, májinanuichahahi núti. Eta tacahe, típicauchacarepanahi eta nuyehe” macahepa.

<sup>18</sup> Yátupiquene nájina náimatihini eta máimahi ema Viya. Émasera ema macarichuquene Machicha, tímimaticahavihi eta máuriva ema Maiya taicha étaquenehi másiha te masamure ema Maiya.

*Éma Juan Tícachasiricarahi timetacavacahi ena achaneana tayehe eta máimeresiravayarehi ema Jesucristo*

*(Mt 3.11-12; Mr 1.7-8; Lc 3.15-17)*

<sup>19</sup> Tacahe, te jena sácheana, ena tuparairucanahi ticavasanahi te Jerusalén navanecapa ena náevanachana†, nayanaucha ema Juan Tícachasiricarahi. Éna, nayaserecapa, ánipa nacahe:

—Tamutu arairuhi eta pímiturapiana. ¿Pítinaripa ema Cristo vicuchapaquenehi? —nacahepa.

<sup>20</sup> Matupiruvapa eta majicapiravacahi. Ánipa macahe:

—Núti mavanerunuhi ema Viya. Váhisera nútina ema ecuchapaquenehi ema ticaijare Cristo —macahepa.

<sup>21</sup> Tacahe, nápechavarepa nayasereca:

—¿Nájahavisica píti? ¿Pítipuca picaijare Profeta Elías? ¿Pichavahi eta te juca apaquehe? —náichapa.

Émasera majicapavarepa:

—Vahi nútina.

Tásiha, nápechavarepa nayasereca:

—¿Nájahavisica píti? ¿Pítipapuca ema apana profeta vicuchapaquenehi? —náichapa.

Émasera majicapavarepa:

—Vahi nútina.

<sup>22</sup> Tacahe, náichavarepa:

—¿Nájahaviquenesica píti? Pimetacahavichucha te nájahavipuca píti. Vi-varaha véchayare, apaesa vimetacavaca ena tivanecahavianahi —náichapa.

<sup>23</sup> Tacahe, ema Juan majicapavarepa:

—Nútichucha máechajisahaquenehi te ajureca ema víyarahaini profeta Isaías. Núti nucametarairuhi nayehe ena achaneana vámahicurúhana. Níchuavacahi éna apaesa natsecava eta jácani máitecapiraya ema Viáquenu —macahepa.

<sup>24</sup> Natiarihivare ena navaneruanahi ena fariséoana. <sup>25</sup> Nayaserecavarepa éna apanava:

† **1:19** Ena nani vanairucana, nararihihi ena tiyujarahiana te Templo, énapa ena téchapajirahiana eta tayereruvana eta Templo te Jerusalén.

—¿Tájahasica tacayemahi eta pícachasirisirahi ena vijaneanana, te váhipuca pítinahíni ema Cristo, váhivare pítinahíni ema profeta Elías, váhivare pítinahíni ema apana profeta vicuchapaquenehi? Ena vijaneanana vahi tácamunuhini nacaicachasihini. Énaserá ena apavasanana, jéhesare tacamunu eta nácaicachasivaca —nacahepa.

<sup>26</sup> Tacahe, éma majicapavacapa:

—Tiuri, núti yátupi nícachasicavacahi te une ena achaneana, apaesa natsecava eta jácani máitecapiraya ema vicuchapaquenehi. Matiarhipasera puiti te vitaracu. Étiserá vahi ímatihini éma. <sup>27</sup> Tímerecavavanénapa. Ticunachacarepanayaresera eta nuyehe. Váiparinehi nácutisamimahi eta máitupajijiasiravahi. Váiparinehivare nácaemuñavaimahi macamusuranuhini núti páuresami —máichavacapa éna ema Juan.

<sup>28</sup> Eta mávihahi ema Juan máicachasirisinehi ticaijare Betábara, te apachara eta cajacure ticaijare Jordán, tinapaicahi te táuchusine eta sache. Eta nayaseresinepanahi ena vanairucanahi.

*Ena Juan máimicaecheracha ema Jesús eta émairahi ema Cordero, vanairucahi me Viya*

<sup>29</sup> Te apanapa sache, máimahapa ema Juan eta mapauchirapaipahi ema Jesús. Tacahe, máichavacapa ena achaneana:

—Ímaha, márajapa ema Cordero, matapiravarequene éma, vanairucahi me Viya. Éma, táimicaparuyare eta maçaepahairayare eta vipecaturana viti achaneana te juca apaquehe. <sup>30</sup> Émara ema maca ema néchajisihaquenehi eta eyehe cape juca. Núti nínapucahi mayehe éma, émasera matiarhihiquenéipahi eta acane, májinanuichahahi núti. Eta tacahe, tipicauchacarepanahi eta nuyehe. <sup>31</sup> Nútiripa néchajisihahi éma, vuíchahasera nímatihini. Numetacahehisera eti nujaneanana israelítana eta ecaicachasiraina apaesa etsecavahi eta ejacapiraina éma te jácani máimerecavapa. <sup>32</sup> Tacahe, cape sache, títecapauchanupa ema Jesús, mavarairahi nícachasicayare éma. Tásiha, te viúcupaicapa te une, nímahapa ema Espíritu Santo eta máucupaisirahi te anuma, ticutiparine eta paloma. Masiapahacapa ema Jesús. <sup>33</sup> Tacahe, te nímahapa, nupaenumavapa nímati éma eta émairahi ema vicuchapaquenehi Cristo, taicha ema Viya tímitucanupa eta máicutiarayare. Ani macahehi: “Te pímaha ema Espíritu Santo máucupaucha te mápusi mácani achane, pímatiya eta émairahi ema Nuchicha nuvaneruhi. Éma, tíjaracahevacyare ema Espíritu Santo, tisiapahacahevacyainapa éti achaneana. Nuchaneraheinapa éti” máichanupa ema Viya. <sup>34</sup> Tásiha puiti, nímatipa éma. Táitusiava numetacahe puiti eta émairahi ema Cristo, Machicha ema Viya —máichavacapa ema Juan.

*Ena náinapuiruana máichuhaqueneana ema Jesús ena máimitureanaya*

<sup>35</sup> Tacahe, te apanavarepa sache, ema Juan matiarihivi tayehe eta mávira-reasahi, vítipa viti apinahavi máimitureanahi. <sup>36</sup> Tásiha, máimahapa ema Jesús tíanucuhapaipahi. Tacahe, ema Juan máichahavipa:

—Ímaha. Ema maena Jesús, émahi ema Cordero matapiravarequene, vanairucahi me Viya —macahepa.

<sup>37</sup> Tacahe, eta vímairahi viti apinahavi máimitureana ema Juan, viyanapa véhicahi ema Jesús. <sup>38</sup> Tásiha, ema Jesús téseniequenehavapa. Máimahapa eta véhisirapahi. Tiyaserecavavipa:

—¿Tájaha ecamunu nuyehe? —máichahavipa.

Víti vijicapapa:

—Tata maestro, ¿távihapuca eta pítecapirare?



<sup>39</sup> Ema Jesús tijicapahavipa:

—Yare, ímaha apaesa ímativa.

Tacahe, viyaninapa vímatipa eta mávirarehi. Vítaipahi eta jena sache eta viávihairahi eta mayehe, taicha las cuátroripahi sache te vítecapapa ánaqui.

<sup>40-41</sup> Andrés máijare éma nuchamuri téhicapahi ema Jesús. Tacahe, eta máurisamurevahi ema Andrés, tiyanavanepa matanucahi ema maparape Simón Pedro. Te máichimavapa, máichapa:

—Vímaharipa ema vicuchapaquene Mesías ema Cristo —macahepa.

<sup>42</sup> Tacahe, ema Andrés tichavapa mámapa ema maparape Simón eta te mávihahi ema Jesús. Te náitecapauchapa, ema Jesús máesenicapa ema Simón. Tásiha, máichapa:

—Piti Simón, machichavihi ema Jonás. Nútisera nítivachaya eta píjare. Núti nájarechaviya Pedro, táichavenihi eta pétaviuchirayare eta pitumeva — máichapa ema Jesús.

*Ema Jesús máichuhapa ema Felipe émapa ema Natanael*

<sup>43</sup> Te apanapa sache, ema Jesús mavarahapa tiyanayarehi te tinapaica eta Galilea. Tásiha, macainunapa ema Felipe. Tásiha, máichapa:

—Yare, péhicanu.

<sup>44</sup> Eta mávasahi ema Felipe eta te avasare ticaijare Betsaida, étarichuvare mávasahi ema Andrés émapa ema Pedro. <sup>45</sup> Tacahe, ema Felipe tiyanavarepa, matanucahi ema Natanael. Te máetupiacapa, máichapa:

—Vímaharipa ema achane máechajisihaquenehi te libro májuchaquenehi ema víyarahaini Moisés, émarichuvare éma táechajisihaquenehi eta libro nájureanahi ena profetanaini. Ema ticaijarehi Jesús, machicha ema José. Ticavasahi te Nazaret —macahepa.

<sup>46</sup> Tásiha, ema Natanael majicapapa:

—Váiparinehi étainahini máuchusinehini ema achane tiuri tayehe eta avasare Nazaret —macahepa.

Tásiha, ema Felipe máichavarepa:

—Viyana, apaesa pímati —máichapa.

<sup>47</sup> Tacahe, te náitecapauchapa, ema Jesús máimararacaripa ema Natanael. Tásiha, macahepa:

—Nímativi eta pipanereru. Píti yátupiquenevi israelíta. Tétavicavahi táurivahi eta pítaresirahi. Vahi pítuca pivayuaeca —máichapa. <sup>48</sup> Tásiha, ema Natanael majicapapa:

—¿Táviha pímatinenuhi?

Ema Jesús máichapa:

—Núti nímativipahi te vuíchaha máetupiacavihinini ema Felipe eta máichuiraviyarehi, te piáviharipa te tápecu eta yucuqui higo.

<sup>49</sup> Tacahe, ema Natanael masuapavanepa ema Jesús. Máichapa:

—Tata Maestro, pítiripa píti yátupiquene Machicha ema Viya. Píti yátupiquenévivare Reyvihi viyehe viti israelítana. Núti njaracavapa néhicaviya — máichapa.

<sup>50</sup> Ema Jesús majicapapa:

—Étachucha eta juca níchiravihi eta nímairavihi te tápecu eta yucuqui, pipatsicavapa píjaracava péhicanuya. Vahi tácarichu eta juca. Pímahayareva eta apana tiáramicareanapana tayehe eta juca.

<sup>51</sup> Tásiha, ema Jesús máichahavipa vimutu:

—Éti ímahayare eta anuma téjiacayare, énapa ena ángeleana tiúcupauchanuanayare núti Manerejirunuhi ema Viya —máichahavipa.

## 2

### *Natiarihi ena araimanayarehi eta te avasare Caná*

<sup>1</sup> Te mapanaquenepa sache eta táetavisiravahi, natiarihi ena araimanahi eta te avasare Caná te tinapaica eta Galilea. <sup>2</sup> Tásiha, esu maena ema Jesús, ánaqui suávinehi taicha sucaichuhasiquenehi ésu. Énerichuvare ticaichuhasihivare ema Jesús, vítipa viti máimitureana.

<sup>3</sup> Tacahe, ema arayenahi tacaimamarapa téchuriacapa eta máeresahi vino. Esu maena ema Jesús suíchapa ema suchicha:

—Téchuriacanapa eta náeresahi.

<sup>4</sup> Tásiha, ema Jesús majicapapa:

—Picatajicanu, mémechicha. Vuíchaha picucamesanu. Nímahaine núti te táuripa. Nútipa néchinava —máichapa.

<sup>5</sup> Tásiha, suíchavacapa ena tésiricanahi:

—Tiuri, ñímaháinepa éñi. Esuapayare éti eta ñivanairipiana —suíchapa.

<sup>6</sup> Tacahe, tatiarihihi eta sáisihi ichapehiana tinajana, márihiana. Nayupisareana ena israelítana tayehe eta nayeherepiana. Eta táichapehivavacahi eta tinajana, cíncohi lata eta tacavacu. <sup>7</sup> Tacahe, ema Jesús mavanecavacapa ena tésiricanahi:

—Eyana eyereca eta une. Ínicachayare eta juca tinajana —máichapa.

Tacahe, náinicajicavacapa éna eta tinajana.

<sup>8</sup> Tásiha, ema Jesús mavanecavacapa:

—Tiuri puiti, eveha ániamaína, eyana íjaraca ema téchapajirica eta juca piesta —máichavacapa.

Tacahe, tiyananapa éna, náijarapanahi. <sup>9</sup> Mavehapa masamaecapa eta une, vínoripahi éta. Váhisera máechahini éma távihahipuca tásihahi éta. Nacarichu ena tésiricanahi náechahi eta únerahi.

<sup>10</sup> Tacahe, ema téchapajiricahi eta piesta máichuhapa ema arayenahi. Máichapa:

—Namutu ena achaneana te térana, tativa naera eta tiúriamapana vino. Tapaenumava te ticavahahasianapa, náerapa eta vino váhipanaichu táuriamahini. Pítisera, apana eta pipanereruhi. Tiúrihi eta vino píjararuhavihi tativa. Puítisera eta juca vino, tétavicavahi eta táuriamavahi. Tacachuricarinehi tamutu —máichapa.

<sup>11</sup> Eta juca táinapuiruhi tiáramicare máimerecachi ema Jesús, tayehe eta avasare Caná. Ichaperinehi eta viáramirahi viti vinecapanahi eta juca máimeresirahi eta máitupajijiasiravahi. Tacahe, ichaperinehi eta visuapirahi viti máimitureanahi.

<sup>12</sup> Te táequenepa eta juca, viyanavarepa te apana avasare ticaijare Capernaum. Vimutupaipa, esu maena, ena maparapenaveana, vítipa viti máimitureana. Vinasípa jácani sácheana eta ánaqui. Vipaenumava viyanaya te Jerusalén.

### *Ema Jesús macuchuchujicavacapa ena tíjararecanahi eta sárareana, cáyureana te tajuhe eta Templo*

*(Mt 21.12-13; Mr 11.15-18; Lc 19.45-46)*

<sup>13</sup> Tacahe, eta jena sácheanahi, tiánehiripa eta Pascua, vipiestarahi viti israelítana. Ema Jesús tiyanapa tayehe eta avasare Jerusalén, vítipa viti máimitureana. <sup>14</sup> Te vítecapapa, viyanapa visiapahi tayehe eta Templo. Máimahainehi ema Jesús ena tísiriperecarahiana eta plata, énapa ena tíjararecanahi eta vuíyeana, eta uvesana, étapa eta palómana. <sup>15</sup> Eta máimairahi éna, máepiyacapa eta machicute. Máquijimuríhapa eta naplataneana te apaquehe.

Máequehepuichavacapa eta namesarana. Macuchuchujicavacapa namutu,

étapa eta sárareana nájarareruanahi. <sup>16</sup>Tásiha, máichavacapa ena tíjararecanahi eta paloma:

—¡Ecuchuca eta júcana eta te juca mapenahi ema Tata! ¡Vahi étaina ícuchina éti íjararecana eta tájiparacana! —máichavacapa.

<sup>17</sup>Tacahe, viti máimitureana, eta vímairahi eta juca, enevanerine véchava eta táechajiriruva eta Salmo tayehe eta tamuracavahi eta máichararacavahi ema víyarahaini David táichavenehi eta máetaviuchirahi eta máimipicauchirahi eta, mapena ema Viya.

<sup>18</sup>Jéhesare, enurujipa títecapanapa ena tuparairucana. Nayaserecapa éma:

—¿Tájaha tacayema eta picuchusiravaca ena vichamuriana? Pímijachavahipuca vanairucavi me Viya. ¡Pímechahavi eta tiáramicare te yátupihipuca pivanahi eta juca! —náichapa.

<sup>19</sup>Ema Jesús majicapavacapa:

—Te íáquipaicayarepuca éti eta juca templo, nútisera nucaecheputa te mapanaquenéna sache —máichapa.

<sup>20</sup>Ena tuparairucana najicapavarepa:

—Cuarenta y seis año eta tayerevahi eta náepiyaresirahi eta Templo. ¡Tétavicavahi eta pisiñavavaisirahi picaemuñavayarehi picaecheputayare te mapanaquenéna sache! —nacahepa.

<sup>21</sup>Eta máichiravacahi ema Jesús, máechajisihahi éma eta táechepusirayare eta máquehe. <sup>22</sup>Eta tacahe, te tiyerehi, te táequenepa eta máechepusirapa ema Jesús te máecari, véchavahi viti máimitureana eta juca mametarapihi tayehe eta máechepusirayarehi. Eta tacahe, visuaparinehi eta táechajisihairahi eta Sagrada Escritura eta mayehe.

### *Ema Jesús máimati eta napanereruana ena achaneana*

<sup>23</sup>Eta manasiraichahahi ema Jesús te Jerusalén, te Páscuamuhu, camurihi eta tiáramicareana máichaqueneanahi. Camurianahivare ena achaneana tímahanahi. Tásiha, nasuapahi eta émairahi ema Cristo nacuchapaquenehi.

<sup>24</sup>Émasera vahi macasiñavahini eta nayehe taicha máimativacahi éna, vuíchaha yátupinahini eta náehisirahi éna. <sup>25</sup>Taicha éma, tétavicavahi eta máitupajijiasiravahi, máimatirahi tamutu eta napanereruana ena achaneana te amahe eta nasamureana.

## 3

### *Ema Nicodemo máejirapana ema Jesús*

<sup>1</sup>Matiarihi ema achane téhicarairicahi ena fariséoana. Ticaijare Nicodemo. Ema maca achane, tétavicavahi eta macunachacarevahi taicha máestrohi éma. <sup>2</sup>Tacahe, eta jena yátiquenehi, ema Nicodemo tiyanapa mapaipiuchapanapahi ema Jesús. Tacahe, eta náechajirisiravahi, macahepa ema Nicodemo:

—Tata maestro, véchahi eta vanairucavihi me Viya eta juca pítesirahi pímitusirahavipanahi. Taicha nájina apanaina achane títuruequenehaimahi eta juca tiáramicareana píchaqueneanahi píti —macahepa.

<sup>3</sup>Ema Jesús majicapapa:

—Puiti numetacavi eta juca yátupiqueneana: Nácani navarahaya títuji-cavana tisiapana tayehe eta mávasa ema Viya, tacamunuhi náitsivachayare eta náitaresira. Te vahi yátupina eta nájarasiravaina eta máitsivachiravaca ema Espíritu Santo, vahi títuji-cavanaimahi tisiapana eta te mávasa ema Viya. Tímicutijiricavayarehi tiápechavanayarehi tiúchucana —máichapa.

<sup>4</sup>Tacahe, ema Nicodemo vahi mácaicutiarahini eta máichirahi ema Jesús. Váhisera macuchapaimahi eta máitametasirahi ema Jesús. Ánipa macahe:

—Váiparinehi vichavaimahi eta amúyahavinahíni viti ichasiana, vichavahivarepucaini visiapahini te sujuhe esu ticachichahavi —macahepa.

<sup>5-6</sup> Majicapavare ema Jesús:

—Pisamanuchaha. Te tiúchuca eta amuya te sujuhe esu taena, tímaticarehi eta machichairahi ema suima. Tacutiquenehi, nácani mávaháruana ema Espíritu Santo, tiápechavanayare tépanava eta náitairesiranayare, taicha machicharipahi. Nutupiruva numetacavi: Nacarichu ena machichanaveana ema Espíritu Santo tisiapana eta mávasa ema Viya. Te tacuija eta machichairahéna éti, tájina vahi ítujicavaimahi esiapa. <sup>7</sup> Vahi picuarami eta juca níchiravihi: Táitaurevaquene ticachichaheyarehi ema Espíritu Santo.

<sup>8</sup> Eta juca tímicutijiricavahi eta técatícava, tacarichu visama eta tacaemaira. Váhisera tácaecherahini. Ene nacahehi ena mávaháruanaipa ema Espíritu Santo. Nanasirichu eta náimahi. Ticaitsivaipasera eta náitairesira —máichapa ema Jesús.

<sup>9</sup> Tásiha, ema Nicodemo mápechavarepa mayasereca:

—¿Tájahasica tacayema eta juca?

<sup>10</sup> Ema Jesús máichavarepa:

—Tétavicavahi eta picunachacareva píti, taicha tiúrihi eta pímitusiravacahi ena vijaneanana. Tasapihasera vahi pímatiequenehahini eta júcana. <sup>11</sup> Pisamanuchaha. Yátupiquene eta numétasirávihi. Tatupiruvahi eta néchajisihahi eta táichararacavanahi te anuma taicha nímahaipa. Étisera vahi esuapanuimahi eta numetasirahehi eta nímahaqueneanahi. <sup>12</sup> Te cape juca sácheana, nímicutichinahehi eta táichararacavanahi te juca apaquehe tayehe eta táichararacavanahi te anuma. Étisera vahi esuapanuhini. Tavetijipa eta emasuapiranuya te nutupiruvahi numetacahe eta táichararacavanahi te anuma. <sup>13</sup> Nuti Manerejirunuhi ema Viya, nucavasahi núti te anuma. Tásiha, núcupaicahi eta numetasiraheya. Nájina apanainahini mácani mametacahéhini eta táichararacavanahi te anuquehe, taicha nájina nayanahini nápanahini te anuma, eta jácani náimatihini.

<sup>14</sup> Acane, eta napaisira ena viáchucanaveanaini eta te mávapahi apaquehe, táechucapahi eta quichareana ena masuapajirairahanapahi mayehe ema Viya. Tacahe, ema víyarahaini Moisés máepiyacahi eta metal eta táimahi eta quichare. Manacahi te anuquehe eta te yucuqui. Tásiha, ena achaneana táechureana eta quichare, te náesenica eta quichare máepiyaru ema Moisés, tinaracanapahi, vahi náepenapahíni. <sup>15</sup> Ene nucaheyare núti apana, tinacuanayareva te anuquehe. Eta níchararacavayare apaesa nucuchucuhapahi namutu ena nácani ticasiñanuanayarepahi. Tásiha, máichecuaraquirenapa eta náitairesirayare. Tájina ticamitiequenehavacaimahi.

*Ema Viya, tétavicavahi eta máemunasirahavihi*

<sup>16</sup> Taicha ema Viya, tétavicavahi eta máemunasirahavi viti achaneana te juca apaquehe. Eta máemunasirahavi, máijaracahi ema macarichuquenehi Machicha eta máucupaisirahi eta ani viyehe. Mavarahapa tíjaracahaviya máichecuaraquirénapa eta vítaresiraya vimutu viti vicasiñanahi éma. Tájina ticamitiequenehahavimahi. <sup>17</sup> Taicha ema Viya, vahi tácahehíni eta mapanereruhi eta máucupaisirahi ema Machicha máicuñacahavihini viti achaneana. Étasera eta tímitecahi éma, ticuchucuhahaviyare vimutu. <sup>18-19</sup> Taicha nácani ticasiñanayare ema Machicha ema Viya, vahi ticaicuñanaimahi. Nácanisera vahi nácasíñahini éma táimicuñacavacayarehi eta naviurevanahi éna. Taicha vahi náuricahini eta tamícauchiravacahi eta majaraiva ema Cristo táucupairuhi te juca apaquehe. Étachucha náurica eta

timapicu taicha vahi návarahahini tácaecherahini eta náichirahi eta tamauriqueneana. <sup>20</sup> Taicha nácani tíchanahi eta tamauriqueneana, nacaticha eta majaraiva ema Viya. Váiparinehi napauchaimahi, namavarairahi tacaecherahini eta náichirahi eta tamauriqueneana. <sup>21</sup> Énaserá ena tisuapanahi yátupi eta máechajiriruva ema Viya, náuricayarehi napaucha eta majaraiva. Jéhesare ticaecheranasarepa eta machaneranaripahi ema Viya.

*Éma Juan Tícachasiricarahi tíápechavavare máechajisihahi éma Jesús*

<sup>22</sup> Te táequenepa eta juca, tiyanavarepa ema Jesús, tayehe eta avasarechichana te táunava eta provincia Judea. Véhicahi viti máimitureana. Vinasipa jácani sácheana eta ánaqui. Viti máimitureana vícachasiricaripa ena achaneana tivarahanahi náehicaya ema Jesús. <sup>23</sup> Tásiha, ema Juan tícachasiricahivare te jena Enón tachacayahi eta Salim, taicha ánaqui tatiarihihi eta une. Ena achaneana napauchahi éma. Jéhesare máicachasicavacapaipahi ena tivarahanahi náinajicayare eta napecaturana. <sup>24</sup> (Eta juca máichahi ema Juan tamirahupaichaha eta jena sache eta náeratasirayarehi éma.)

<sup>25</sup> Tacahe, te jena sácheana, ena religiósosana tiyananapa náimiyusemacavacapa ena máimitureana ema Juan, nametacahi eta vicachurisiravacahi viti máimitureana ema Jesús taicha tíápajumuriavanapanahi ena vícachasiruanahi. <sup>26</sup> Tacahe, eta nasemirahi ena máimitureana ema Juan, tiyananapa nametapanahi éma. Náichapa éma:

—Tata maestro, pímahaini ema maena péchajiriruhi cape te tachausi eta juca cajacure Jordán. Éma Jesús pímijsarecha Cristo, tícachasiricahi puiti éma. Jéhesare, namutuyarehini náehica éma —náichapa.

<sup>27</sup> Tásiha, ema Juan majicapavacapa:

—Vahi ecueñamava. Éma Viya, éma téchahi eta máijarasirahi eta máitucaquenehi nácani manerejiruana. Németeaca tíjaracahi ema Viya eta máitupajijiasirava ema maca Jesús. <sup>28</sup> Éti échavahi eta numetasirahehi eta vahi nútinahini ema Cristo. Yátupisera nucavanahini eta nínapumirauchirayarapahi éma, numetacavaca ena achaneana natsecavahi. <sup>29</sup> Núti nímicutijirisihahe: Te natiarihi ena araimanahi, namutu ena nacaichuhasiqueneana tíúrisamureanahi eta náimairahi ena araimana. Nacunachahi ema arayena. Ene nucaherihi núti eta núrismurevahi eta nímairahi puiti eta nacunachirahi ema Jesús. <sup>30</sup> Éma, te jácani mapaisihayarepahi, tíápajucavayarepaipa eta macunachacarevaya. Éma, mapaenumavapa tépanava eta macaemataneasira ema Viya. Núti núrismurehi tayehe éta. Núti, tíánehipa eta nítauchirainapa eta nématane. Tásiha, váhirichu nucunachacare núti —macahepa ema Juan.

*Éma Jesús másihaquenehi te anuma*

<sup>31</sup> Éma Jesús, máimatirinehi tamutu eta táichararacavanahi te anuma taicha másihaquenehi éma te anuma. Víti achaneana viávihahi vicavasanahi te juca apaquehe, vímatihi étachucha eta táichararacavanahi te juca apaquehe. Émasera ema Jesús, eta másihairahi te anuma, tímatihi tamutu, tíápajupanavahi eta máitupajijiasiravahi. Ticachuricahavihi. <sup>32</sup> Éma, tímitecahi eta mametasirahavi tamutu eta máimahaqueneanahi étapa eta masamaqueneana te anuma. Nájinayarénisera nasupahini eta macayemaqueneanahi. <sup>33</sup> Vítisera viti visuapanahi eta mametarapiana, vímatihi eta yátupihí eta máechajiriruvana ema Viya mámaqueneanahi ema maca Jesús. <sup>34</sup> Taicha éma, vanairucahi me Viya, máechajisihayarehi eta máechajiriruvana ema Viya. Énerichuvare tétavicavahi eta máimicatasirahi ema Espíritu Santo taicha



mávahácahi éma. <sup>35</sup> Ema Vicaiyaquene máemunacahi ema Machicha. Eta tacahe, matuparacahi eta émairayarehi téchayare tamutu. <sup>36</sup> Eta tacahe, nácani ticasíñanayare ema Machicha, máichecuaruireyare eta náitaresiraya. Namutusera ena macasiñarahanahi ema Machicha ema Viya, vahi títarecainimahi, taicha tanasihi eta naviurevana táichavenehi eta napecaturanahi. Ticaicuñanayarehi máitavacac ayare.

#### 4

*Ema Jesús tiánucuha eta provincia Samaria. Ánaqui máechajicahi esu ésuna esena.*

<sup>1-3</sup> Tacahe, camurianahi ena tivarahanahi tíjaracavanaya náehicaya ema Viáquenu. Tásiha, viti máimitureana vícachasicavacahi éna. Émasera ema Jesús vahi máicahasiricahini. Camuripanana ena vícachasiruana nayehe ena máicahasiruana ema Juan. Tacahe, ena fariséoana nasamairiricapa. Náramipa. Navanecapa ena tiyaserecanaya. Tacahe, te tisamauchavapa ema Jesús eta napanereuchirahi, majunijicapa eta Judea. Tiyanapa tichavahi tayehe eta Galilea, vítipa víti.

<sup>4</sup> Eta vipaisirapahi te achene, viánucuhapaipa eta te provincia Samaria. <sup>5-6</sup> Te la dócepa te sache eta vítecapirahi te távihahi eta nória máepiyaruhi ema víyarahaini Jacob. Máíjaracasicharipahi ema machicha José eta juca mayeheni apaquehe. Eta nória, tachacayahí eta avasarechicha ticaijare Sicar. Tacahe, eta mavitairapaipahi ema Jesús, tíchecanumapa te tachausi eta nória. <sup>7-8</sup> Eta víchesirahi, viyanapa viti máimitureana vivacharepanayarehi eta tinicacare te avasare. Macarichuipahi ema Jesús. Sucahepainecha esu ésuna esena indigenahi samaritana tícapanayarehi. Tacahe, máechajicapa ema Jesús:

—Nuchicha, picatajicanu picajinu une —máichapa.

<sup>9</sup> Tásiha, esu esena sujicapapa:

—Píti israelítavíhi. ¿Tájaha tacayema piyaseacanu eta une, nuti samarítanenuhi, vahi pijaneananuinahini? —suíchapa. (Ani tacahehi eta suéchajiririrahi, taicha ena israelítana énapa ena samarítanoana vahi náurianacacahini.) <sup>10</sup> Tásiha, ema Jesús majicapapa:

—Te pímatihini eta mavarahaqueneanahi tíjaracavi ema Viya, téhevere pímatinuhivaréni núti nuyaseacavíhi eta une, németeaca piyaseacanuipahíni eta une ticaitarecarahi. Tásiha, núti níjaracavíhíni —máichapa.

<sup>11</sup> Tásiha, esu esena suíchapa:

—Tata, tíúpenahi eta juca nória. Píti, tájina enurena piviyahini eta une. ¿Távihasica tásihayare eta une ticaitarecarahi eta pivarahaquenehi píjaracanu?

<sup>12</sup> Eñi viáchucaquenéni Jacob, vímaequenéhahi eta juca nória ñépiyaruhi. Nérirarénihí eñi énapa ena ñichichanaveana. Énerichuhi táerihahi eta ñiyeheana sárareana. ¿Píti pímiyachavapuca picuchucahíni eta tíúriamapana une? —suíchapa.

<sup>13</sup> Ema Jesús majicapavarepa:

—Namutu nácani térana eta juca une tíápechavanayarehi timauneanaya.

<sup>14</sup> Nácánisera téranayare eta une níjararuyarehi núti, vaipa tíápechavanaimahi timauneana. Taicha tacajurucayarehi eta náuricacareva. Tíúrinainavarepa eta náitaresira. Ticaitarecavacayare máepenacacayare —máichapa.

<sup>15</sup> Tacahe, esu esena, eta susamirahi eta máechajiririvanahi, suíchapa:

—Tata, píjaracanupaini eta une ticaitarecarahi, apaesa vaipa nucuapechavaini numaune. Váipavare nucuitechahini eta te juca nória népanahini une —suíchapa.

<sup>16</sup> Ema Jesús majicapavarepa:

—Piyana, píchuhapana ema pima. Piáma eta ani.

<sup>17</sup> Ésusera sujicapapa:

—Nájina nímaina.

Tásiha, ema Jesús máichapa:

—Pitupiruva eta juca pimetasiranuhi eta nájinairahi pímainahini.

<sup>18</sup> Cíncoanapaipahi ena pímanaveanainihi. Tásiha puiti, ema picachanequenehi váhivare pímainahini. Pitupiruvahi eta péchajiriruvahi —máichapa.

<sup>19</sup> Tacahe, tiáramecarinehi esu esena eta susamirahi éma eta máichirahi. Tásiha, suíchapa:

—Tátachicha, németeacavihi eta pítiquenéravihi profeta. Nuvaraha pimeta-canuya puiti, ¿távihapuca eta yátupiquene viyujarasirareyarehi? <sup>20</sup> Taicha ena viáchucanaveanaini samaritanoanaini eta nayujarasiraréni eta te juca táinahu eta cerro. Puíticha tanasirichuhi eta viyujarasirarehi. Étisera eti israelítana, eta emetarapi eta viyujarasirareyare ñe Viya téhenapa te Jerusalén —suíchapa.

<sup>21</sup> Ema Jesús mametacapa:

—Nutupiruva numetacavi, nuchicha, ánipa táenasihayare puiti váipa tácomesaimahi íteca eyujaraca me Tata te juca táinahu eta cerro étaripa eyana-hipucaini te Jerusalén. Tamutuina eta táurivayare eta eyujarasihayare.

<sup>22</sup> Eti samaritanoana, apaesachicharichu eta ímatirahi ema Tata eyujaraurehi. Vítisera vímatihi ema viyujaraurehi, taicha viti israelítana víti vicutuparahahi viámayare eta máechajiriruvana ema Tata eta macuchucuirayare namutu ena achaneana ticasíñavanahi mayehe. <sup>23-24</sup> Numetacaviya eta apana: Ema Tata, tiávihi te anuma, jéhevare éma, yátupiquenehi Viya. Vahi mátejinahini eta maeche macutihini viti achaneana. Eta tacahe, nácani tiyujaracana mayehe, tatupiruvayarehi eta nasamure, tisuapajirahianahivare tayehe eta máechajiriruana. Vahi tácomesaimahi ticasíñarajiana. Eta juca tacaheyarehi eta mavarahaqueneanahi ema Tata eta eyujarasirayarehi —máichapa.

<sup>25</sup> Tásiha, esu esena suíchapa ema Jesús:

—Téchacarehi eta ñítecapirayare te juca apaquehe eñi Cristo, ñivaneruya eñi Viya. Téchacarehivare eta ñimetasirahaviyare tamutu eta yátupiqueneanahi. ¿Píti, péchapuca tájamuhuyarepuca eta ñítecapihayare?

<sup>26</sup> Ema Jesús majicapapa:

—Nútira nuti mavanerunuhi ema Viya. Nútira ecuchapaquenenuhi —máichapa.

<sup>27</sup> Tásiha, vítecapanecha viti máimitureana. Tacahe, viáraminehi eta máechajiriruvahi eta suyehe esu esena indigenahi. Vivarahahi viyasereca esu esena tájahapuca suvaraha eta mayehe. Vivarahahivare viyasereca ema Jesús tájaha tacayema eta máechajisirahi esu esena. Váhisera vipatsicava viyaserecahini.

<sup>28</sup> Tásiha, esu esena sunaquicapa eta suyupi. Tijunapapa tiyana te avasare, sumetapanavacapa ena achaneana. Te títecapapa, suíchavacapa:

<sup>29</sup> —Yare, ímahaya eñi achane profeta. Ñímatihi tamutu eta níchaqueneanahi néjecapiravanahi. Tamutuhi ñicuchuchujisinánuhi. Núti németeaca éñiripa eñi Ñivaneruhi eñi Viya, éñiripavare eñi vicuchapaquenehi ticaijare Cristo —suíchapa.

<sup>30</sup> Ena achaneana sumetaruanahi tiyananapa náehica esu eta te mávihahi ema Jesús, náimahapanayarehi. <sup>31</sup> Eta nayerevapaichaha ena achaneana suíchahaqueneanahi esu esena, viti máimitureana víchuhapa ema Jesús tinicanumayarehi. Víchapa:

—Tata maestro, yare pinicanuma, apaesaina piávamina.

<sup>32</sup> Tásiha, éma tijicapahavipa:

—Núti, jucarihi eta tinicacare tanicasarehi eta náchaneva emáimatiéque-  
néruhi éti —máichahavipa.

<sup>33</sup> Tásiha, véjcapavasamurepa víti. Víchacacapa:

—¿Náenicaipapuca jácani?

<sup>34</sup> Ema Jesús máimatihí eta vipanereruanahi. Máichahavipa:

—Eta ticaitarecanuhi núti, eta nítauchirahi eta mavanairipiana ema Nu-  
caiyaquene, taicha nuvaraha nítauchaya tamutu eta nucaemataneasira éma.

<sup>35</sup> Eta viyeherepi te véchajiriruva: “Puiti vítapa eta vévasirapa eta trigo,  
cuátroyare caje eta vicuchapira eta vicurujisiraya” vicahehi. Puítisera nu-  
metacahe núti: Vaipa táyeremahi eta vicurujisirainapa. ¡Ésenica puiti te ach-  
ene! Nárajapa ena achaneana ena névaraquianahi. <sup>36</sup> Ema Tata tíjaracaheya  
eta ícuchiyare te ímicatacanuyare eta vicurujisira ena nani achaneana apaesa  
náuchucuhayare, máichecuaraquireyare eta náítaresira. Tásiha, tétavicavaya  
eta viúrisamureva vimutu: éti, nútípa. <sup>37</sup> Ena achaneana, ticatisamurevanahi  
eta náechajirisira: “Vítira vévacahi eta vépane; apanapasera ema ticurujica”  
nacahehi. <sup>38</sup> Vítisera te juca vivapinavayare. Núti níchuhahahi eta ecuru-  
jisiraya eta névaruhi. Énerichuvare nararihihi ena tínapucanahi viyehe eta  
nacaematanerahi eta juca. Puiti vivapinavaya eta vícuchiyare taicha vicuti-  
cacahi eta vicaemataneasirahi ema Viya —máichahavipa ema Jesús.

<sup>39</sup> Ena ticavasanahi te jena avasare, camuriqueneanahi ena tisuapanahi  
eta émairahi Mavaneruhi ema Viya táichavenehi eta suíchirahi eta macuchu-  
chujisinaquenehi tamutu eta suíchaqueneanahi. <sup>40</sup> Tásiha, tiyananapa tíacapa-  
haviana. Te títecapanapa, émaquenepa nasamahi. Tásiha, náechajicapa mánasi-  
panahini nayehe. Masuapahisera ema Jesús. Apina sache eta mayere-  
vahi, vítípa. <sup>41</sup> Tacahe, eta manasipanairahi tayehe eta avasare, namutupa  
nasamahi eta máimiturapiana. Tacahe, camurianainehi ena tisuapanahi,  
téhicanahivare éma. <sup>42</sup> Tásiha, náichavarepa esu esena:

—Puiti émaquenepa visamahi. Vaipa tácarichuhini visuapahini eta pimeta-  
rapihi. Véchapa víti apanava eta émaquenérahí ema Cristo, ema vicuchapa-  
quenehi, ema ticuchucuhahaviyare vimutu víti achaneana —náichapa.

*Ema Jesús macanaraca ema machicha ema aquenuca majupahahi ema rey*

<sup>43</sup> Te táequenepa eta apinaquenehi sache, tiyanavarepa ema Jesús;  
macaijuhe eta te provincia Galilea. Véhicapaichuhivare víti apanava.

<sup>44</sup> Eta mayanirayarehi eta Galilea, vahi mácasíñavahichaini eta  
masuapacarevainahini nayehe ena achaneana. Émarichuhi, ani macahehi  
eta máechajiriruvahi: “Mácani profeta, vahi tivapinavanahi eta najacapirahi  
ena achaneana te mávasa”. <sup>45</sup> Téhesera te máitecapauchapaipa ema Jesús eta  
avasarechichana tinapaicanahi te Galilea, namutu najacapahi. Taicha  
náimatípa éma taicha náimahapa eta tíáramicareana máichaqueneana te  
mávihaipe te Jerusalén te jena piéstairahi eta Pascua.

<sup>46</sup> Tásiha, tíapechavavarepa mayanaucha ema Jesús eta avasare Caná, te  
máepiyasinehi vino eta une. Te apanahivare avasare ticaijare Capernaúm,  
matiaríhihi ema majupaha ema rey. Macajumaquenehi ema machicha.

<sup>47</sup> Te masamairiricapa ema achane eta máitecapiraipahi ema Jesús te Caná,  
tiyanapa matanupanahi. Eta máichimavapa, mayaseacapa eta macatajicahini  
máehicavanehini te mapena, macanarapanahini ema machicha taicha ema  
macajumaquene tíánehirípa tépenayarehini. <sup>48</sup> Émasera ema Jesús máimatípa  
eta masamure ema achane, tásiha, máichapa:

—Éti vahi esuapanuimahi, te vahi nímechahehi eta tíáramicareana —  
máichapa.

<sup>49</sup> Émasera ema achane máichapa:  
—Picatajicanuchucha, tátachicha. Péhicanu, machu máepenacaru ema nuchichasami —máichapa.

<sup>50</sup> Ema Jesús majicapapa:  
—Tiuri, piyana. Vahi picueñamava, ema pichicha vahi tépenaimahi. Máenahi tinaracaipahi nícha —macahepa.

Tacahe, ema achane masuapapa eta máichirahi ema Jesús. Tiyanapa tichavahi te mapena. <sup>51</sup> Te tiánehipaipahi títecapa te mapena, nácapapa ena macajurureana. Náichapa:

—Tata, ema pichicha tinaracaipahi.

<sup>52</sup> Tacahe, ema mayaserecavacapa:

—¿Tájaha hora te tinaracapa ema nuchicha?

Éna náichapa:

—Cape te la una te cáperehi, táetaviacapa eta fiebre —nacahepa.

<sup>53</sup> Tásiha, ema achane máechapa étairaichuhi eta hora eta mametasirahi ema Jesús eta manarasiraipa ema machicha. Tacahe, ichaperinehi eta masuapirahi éma, énapa éna machichanaveanahi te peti, eta émairahi ema Cristo, Mavaneruhi ema Viya.

<sup>54</sup> Eta juca eta tápinanehi eta tiáramicarehi máichaquenehi te Galilea, te táequenepa eta machavirahi eta te Judea.

## 5

*Ema Jesús macanaraca ema achane macajumaquene eta muracaquiha, ema tiávihahi te tachacaya eta noque ticaijare Betesda*

<sup>1</sup> Te táequenepa eta juca, tatiarihihi eta apana piesta eta viúrujisirávana te Jerusalén. Tiyanavarepa ema Jesús. <sup>2</sup> Te jena viávasa, tatiarihihi eta ichape tapaja náimisipirare eta uvesana nacaparuasana. Tatiarihihivare eta ichape noque vímijarechahi Betesda. Ticayehehi cinco eta cúlerureana. <sup>3-4</sup> Eta návihahi ena nacajumaqueneana púchuquiána, masariana, énapa ena muracaquihana. Namutu éna, ticuchapanahi eta macayamurisira eta une ema ángele. Tásiha, namutu tiyanana téchipapaicavana te une, taicha tímijachavana mácani tínapuca téchipaicava, tacanaracayarehi eta jácani majuma. <sup>5</sup> Tacahe, matiarahi ema achane macajumaquene. Tréintayocho áñoripahi eta macatajivairahi. <sup>6</sup> Tacahe, te tisiapapaipahi ema Jesús, máimahapa ema achane macajumaquene tívecahi. Máimativare eta tayerevaipahi eta macajumairahi. Mayaserecapa:

—¿Pivaraha pinaraca, nuchicha? —máichapa.

<sup>7</sup> Tásiha, ema achane majicapapa:

—Nuvaraha, tata. Nájinasera ticasiapanuimahi tayehe eta noque, te tiyamuriéca eta une. Ticachuricanuanaparaca ena apamuriana nucuti-queneana nacajumaqueneana —máichapa.

<sup>8</sup> Tacahe, ema Jesús máichapa:

—Pécheputa, piveha eta pímacaraji. Piyana pipaica —máichapa.

<sup>9</sup> Tásiha, eta máichirahi ema Jesús, enevanerinehi tinaraca ema achane. Mavehapa eta máimacaraji. Tiyanapa tipaica. <sup>10</sup> Eta sache manarasirahi ema achane, sávarumuhuhi. Ticapicahuhi eta jena sache nayehe ena israelítana. Tacahepa, te náimahapa ena tuparairucana, nacajachapa éma. Ánipa ná icha:

—¿Tájaha tacayema vahi pipicaucha puiti juca sache tacapicahuquenehi? Vahi vísapa piámahini eta pímacaraji puiti juca —náichapa.

<sup>11</sup> Ema achane majicapavacapa:

—Vahi nútina tásiha. Ema maca achane ticanaracanuhi, tivanecanuhi. Máichanuhi: “Piveha eta pímacaraji. Piyana pipaica” —máichavacapa.

<sup>12</sup> Tásiha, éna nayaserecapa:

—¿Nájahasica ema tivanecavihi pipaica eta piámirapahi eta pímacaraji? —náichapa.

<sup>13</sup> Émasera ema achane vaipa máimatihini eta máijare ema ticanaracahi. Váipavare náetupiacacarehini ema Jesús te namuri ena camuriqueneana achaneana taicha tiyanaripahi. <sup>14</sup> Téhesera te táequenepa, tiyanapa ema achane eta te Templo. Ánaqui títecapavarepa ema Jesús. Te máimahapa ema Jesús ema achane macanararuhi, máichapa:

—Pímaha, vaipa picuapechava picucapecatura, machu tachavauchavi eta pijuma, máchuvare pávetiji —máichapa ema Jesús.

<sup>15</sup> Tacahe, eta máimatirapa, ema achane tiyanapa mametapanavaca ena tuparairucana eta émairahi ema Jesús ema ticanaracahi. <sup>16-18</sup> Eta tacahe, ena tuparairucana tise manapa. Ichaperinehi eta nacatianasirahi ema Jesús táichavenehi eta macanarasirahi te jena sache sávarumuhuhi tacapicahuquenehi. Tásiha, títeapanapa, éna ticaratacanayarehini ema Jesús. Émasera máimatihi eta napanereruana. Tacahe, máichavacapa:

—Ema Tata tamutuchucha sache ticaematane. Ene nucaheyarehi nuti apana. Nítauchayare eta mavanairipiana —macahepa.

Eta nasamirahi ena tuparairucana eta máichiravacahi, navetijipaicha eta nasemirahi. Navarahapa nacapacavaneyarehi éma. Eta tiviuchahi eta macanarasesirahi te sávarumuhuana, náimijachirahi máepuruhi eta nayeherepi. Tavetijipaicha eta máimicaecherachiravahi Machichairahi ema Viya, Viyairahi ema apana.

### *Ema Jesús macatuparahaquenehi me Maiya*

<sup>19</sup> Énerichuvare ema Jesús máichavacapa:

—Nutupiruva numetacahe: Nuti Machicha ema Viya, eta nutuparahanahi mayehe, váiparinehi nútijiricavaimahi nícha jácani nuvarahaqueneanahi. Núti nímatiequenehahi tamutu eta máematanerepihi ema Ticachichanu. Étayareichuhi níchayarehi nútí. <sup>20</sup> Taicha yátupihi eta máemunasiranuhi ema Ticachichanu. Eta tacahe, tímechanuhi tamutu eta máematanerepiana. Énerichuvare tíjaracanuyareva eta nímechiraheya eta apamuri tíramicareana. Tíápajucavayare eta táramicarevayare, apaesa íramirineyare, epicayareva. <sup>21</sup> Ema Tata marataha macaechepuca ena náepenaqueneana, máimichavayarehi macaitarecavacaya. Énerichuva nuti Machicha, nuratahavare nucaitareca nácani nuvarahaqueneanaya, níjaraca eta náitaresiraya. <sup>22</sup> Nucatuparahahivare mayehe ema Tata eta nímainaya eta nacaicuñairayare namutu ena náejecapavaqueneanahi. Vaipa émainahi tícuñareca éma. <sup>23</sup> Taicha mavarahahi epicauchanu nuti Machicha, tácutirichu eta epicauchirahi ema Tata. Nácanisera vahi tipicauchanuanahi nútí, váhivare napicauchaimahi ema Tata.

<sup>24</sup> Yátupiquenevare numetacahe eta juca apana. Nácani ticaquiñanayare tisuapanayare eta néchajiriruvana, nasuapavare eta nucavanahirahi mayehe ema Tata, éna títarecanayare, vaipa ticaicuñanaimahi. Taicha éna, tíuchucuhanaripa tayehe eta náicuñayaréni te yucu. Náicuchihi eta náitaresiraya. <sup>25</sup> Tacutiquene nutupiruva numetacahe nuti Machicha ema Viya. Táitecapaquenepa puiti juca sácheana, tisamanuanayare ena achaneana, tayanapane tépenahi eta náchanevana. Te nasuapajirahipuca, nucaitarecavacayare eta náchanevana. <sup>26</sup> Taicha ema Tata namutuhi marataha macaitareca.



Ene tacahe eta máijarasiranuhi núti Machicha eta namutuyareva nurataha nucaitarecavaca. <sup>27</sup> Énerichuvare tituparacanuhi eta nícuñasiravacaya-rehivare taicha yátupiquenenuhi manerejirunuhi. <sup>28</sup> Vahi ecuarami eta juca numetasirahehi. Járájapa eta sácheyare eta nasamirayare namutu ena náepenaqueneana eta nahu núti. <sup>29</sup> Técheputanainapa namutu te náecariana. Nácani tíchanahi eta táuriqueneana, títarecanainapa. Énaserá ena tíchanahi eta tamauriqueneana, ticaicuñanainapa.

*Éma Jesús máimereca eta macavanahirahi me Viya*

<sup>30</sup> Núti vahi nútijiricaváimahi nícuñareca. Nucuchapayarehi eta mavanairipi éma Tata, éma tivanecanuhi. Tacahe, te nícuñareca, vahi numapachichijicaimahi, tatupiruvayarehi nícha. Taicha tacahehi eta mavarahaquenehi éma Tata. <sup>31</sup> Te nácarichu núti nútijiruvainachuchaini eta nímere-ruanahi, vahi tácomesahini esuapanuhini. <sup>32</sup> Váhisera nucarichuimahi, taicha matiarihíhi éma apana títametasinanuhi, émaripa éma Juan Tícachasiricarahi. Nímatihi núti eta matupiruvahi eta máichaqueneanahi eta tímereuchanuhi. <sup>33</sup> Éti ecavanairipipa nayasereca éma Juan te nájahanuhipuca núti. Matupiruvahisera éma eta majicapiravacahi eta nútiqueneipahi éma ecuchapaquenehi. <sup>34</sup> Váhisera étaparacaimahi eta juca eta matiarahirahi éma tímereuchanuhi. Éta ticamunucarepanahi eta esuapiranuina apaesa iúchucuhaiya éti nicha núti. <sup>35</sup> Éma Juan tímicutijiricavahi tímícauchahehi tayehe eta mametarapihi eta eyehe, te jena sácheanahi esamararasirahi éma. Iúrisamureinehi ichape, taicha eta tamicauchirahehi eta máechajiriruva. <sup>36</sup> Váhisera mácarichu eta máimicaecherachiranuhi éma Juan. Jararihi eta apana táimicaecherachiranuhi, tiápajupanavahi eta táramicareva. Taicha núti nicha eta nématanerepiana máijararunuhi éma Tata. <sup>37</sup> Émaripa éma Tata tivanecanuhi. Éma, vahi macutihémahi éti achaneana. Vahi esamahini eta mahu, váhivare ímahaimahi eta máquehe. Téhesera te jena Sagrada Escritura, timetacahehi eta nítecapiraya. <sup>38</sup> Éti vahi evarahahini esuapanuhini nuti mavaneruhi éma. Éta tímereuchahehi eta váhivare iúnacahini eta máechajiriruvana te esamureana. <sup>39</sup> Éti, tamapurují eta ecaravahirahi eta Sagrada Escritura. Ímijacharipapuca eta ticaitarecaheyarehi. Váhisera ímatiequenehahini, váhivare ácaicutiarahini eta nútirahi táechajisihahi núti nucaitarecayarehi. <sup>40</sup> Tacutiquene vahi ávarahahini epauchanuhini éti, níjaracahehini eta ítaresiraya máitavacacainahini.

<sup>41</sup> Núti vahi nácomesa nacunachanuhini ena achaneana. <sup>42</sup> Títecapa, nímatihavacahi emutu éti eta émaemunasirahi éma Viya. <sup>43</sup> Núti nuvanecasivarichuhi me Tata eta nítesirahi. Étisera vahi esuapanuhini, váhivare ejacapanuhini. Téhesera te máitecahini mácani apana achane, tímijachavapuca Cristo éma ecuchapaquenehi, masapihapucaini éma tisuapacarehini eta eyehe. <sup>44</sup> Éti, vahi esuapanuhini taicha eta evarairahi ecunachacareva ena achaneana. Esapihachucha éti vahi ávarahahini ecunachacare me Viya. <sup>45</sup> Váhisera nútinayare numetauchahe eta me Tata. Máimahaherinepa éma Moisés. Éma timetauchaheyare. Éti ímijachavahi ticuchucuchaheyare eta evarairahi ítaucha eta mavanairipiana éma. Tamapurujihisamisera. <sup>46</sup> Te yátupinahini esuapahini eta mametarapiana éma Moiséini, esuapanuhivarepucaini núti táechajisihaquenehi eta májureanahi éma Moiséini. <sup>47</sup> Váhisera esuapahini eta májuchaqueneanahi éma. Tavetijipa eta emasuapiranuhi eta juca numetarapiana eyehe —macahepa éma Jesús.

## 6

*Éma Jesús máitaparajahi máenicavaca ena camuriqueneana achaneana*  
(Mt 14.13-21; Mr 6.30-44; Lc 9.10-17)

<sup>1-4</sup> Te táequenepa, te jena sácheana tiánehipa eta Pascua, vipestarasahi viti israelítana. Émasera ema Jesús, tiyanavarepa tiámahavivare eta viánuecahi eta cáquiure Galilea (ticaijarehivare Tiberias). Camurianasera ena achaneana tipaicanapahi téhicanapahi éma, taicha eta náimairahi eta tiáramicareana máichaqueneanahi eta macanarasiravacahi ena nacajumaqueneana. Te vítecapapa te apachara, viyanapa te jácani anuquerehi mávapahi. Tacahe, véjacapa vinaracayarehi. <sup>5</sup> Téhesera te máimahapa ema Jesús ena camuriana achaneana eta náitecapauchirahi, máichapa ema vichamuri Felipe:

—¿Távihapucaini vivacharesihaini eta tinicacare vénisihahini namutu ena nani achaneana? —máichapa.

<sup>6</sup> Eta juca mayaseresirahi étachuchanéni eta mavarairahi éma macaicu-tiarayarehi te tájahapuca macayemayarehi ema Felipe. Taicha ema Jesús máechahi eta máichaquenyarehi. <sup>7</sup> Tásiha ema Felipe majicapapa:

—Tacamunuhi vácayehhini eta camuri plata apaesa namutupaini vítaparahahini vénicahini apaesainahini návaminahini. ¡Vahi taratahahini eta dies mil páneana! —macahepa.

<sup>8</sup> Tásiha, téchajicapa ema nuchamuri Andrés, maparapehi ema Pedro. Máichapa:

<sup>9</sup>—Mararihi ani ema émana amaperu tiámapahi eta cíncochichapahi eta pan, apinapa eta jima. ¡Váiparinehisera nárataimahi ena nani camuriqueneana achaneana! —macahepa.

<sup>10</sup> Émasera ema Jesús máichahavipa:

—Evaneca náejahapaica námutu ena achaneana —macahepa.

Taicha tiúrinapahichíchahi eta apaquehe, muíjipahihivare. Cinco mil eta náichapemurivahi ena ajairana. Vahi náimitupachahini ena esenana énapa ena amaperuana. <sup>11</sup> Tacahe, ema Jesús mavehapa eta páneana. Te tamutupa eta mahasulupayachirahi ema Viya, tíjaracahavipa. Véniricapa víti, víjaracavacapaipa eta pan étapa eta jima. Tisimurivacapaipahi eta víjaraca. <sup>12</sup> Tinicanapa namutu. Tisatuheanapa, nacaemacharichahavare. Tásiha, ema Jesús máichahavivarepa:

—Ecurujica eta náemacharajianahi, machu támapuruji —macahepa.

<sup>13</sup> Tásiha, víti vicurujicapa eta pan náemacharajianahi. Táinicachaichahavare eta dócehiquene ichapehiana saye. <sup>14</sup> Tacahe, eta náimairahi ena achaneana eta juca máichaqueneanahi ema Jesús, ichaperinehi nárami. Tásiha, nacahepa:

—Émaripa ema maca profeta ema vicuchapaquenehi máiteruyarehi te juca apaquehe —nacahepa.

<sup>15</sup> Eta tacahe, navarahapa námayarehini nayeheyarepa rey. Émasera máimatipa eta napanereruhi. Tacahe, térajicavavarepa eta nayehe. Tiyanapa macarichuhi te tápusi eta cerro.

*Éma Jesús mapaicaeca eta une*  
(Mt 14.22-27; Mr 6.45-52)

<sup>16</sup> Tacahe, te jena cáperehichichapa, viyanapa viti máimitureana tayehe eta cáquiure. <sup>17</sup> Te vítecapapa, viávacuhapa te pacure. Viánuecayarehi te apachara. Vicaijuheyarehi eta avasare Capernaum. Tivehahavipa eta yati eta viánuesirahi. Éma Jesús májinahi macachanehavipahini. <sup>18</sup> Eta vipaisirapahi, tachimaracapa eta muraca técticava. Tépacucapa muraca eta cáquiure.

19 Cinco kilómetroipahi eta viyerehivahi, vétupiecapaipahi, te vímahapa ema Jesús. Mapaicaecapaipahi eta une, tipauchahavipaipa. Víti vipicapa eta vímairahi. 20 Émasera máichahavipa:

—Vahi ecupicanu. Nútichucha.

21 Tacahe, vímatipa éma. Viúrisamuréinehi eta vijacapirahi eta mávacuirapa eta te vipacure. Tásiha, vítecapanecha eta te vicaijuheyarehi.

*Ena achaneana natanujiricaipahi ema Jesús*

22 Te apanapa sache, ena achaneana manaquiruanahi ema Jesús, natanujiricaipahi éma. Náimatiacapa eta vicarichuirahi viánueca víti máimitureana. Tájinahivare apanainahini pacure. 23 Tásiha, tacahepainecha eta apana pacureana, nayehehi ena tiásihanahi te avasare Tiberias. Títecapanapa te tachacaya eta nanisinehi eta pan ena camuriqueneana achaneana. 24 Tacahe, ena achaneana eta namaimairahi ema Jesús vítipa víti máimitureana, tiávacuhanapa te pacureana. Tiyananapa ticapayacahavianayarehi te Capernaum, natanusirapahi ema Jesús.

*Ema Jesús ticaitarecarahi*

25 Te títecapanapa ena achaneana te apachara, náetupiacapa ema Jesús. Tásiha, nayaserecapa:

—Tata maestro, ¿tájamuhu pítecapahi eta ani? —náichapa.

26 Ema Jesús majicapavacapa:

—Nutupiruva numetacahe: Eti etanucanupahi táichavenehi eta nénisirahehi nésatuhechirahehi. Váhisera ácaicutiarahini eta nímechirahehi eta tiáramicareana. 27 Eti tamapurujipa eta ecañamarasiravahi etanuca eta enicaquenerepi taicha títavayarehi. Tatuparacahisera etanucayare eta tinicacare ticaitarecaheyarehi, máitavacacahi éta. Étara eta juca níjararuheyarehi nuti Manerejirunuhi ema Viya. Éta tímereuchanuhi eta yátupirahi nuvanecasivahi eta mayehe ema Tata —máichavacapa.

28 Tacahe, éna nayaserecapa:

—¿Tájahapucaini eta mavarahaqueneanahi ema Viya eta vicaematanea-sirahi éma? —nacahepa.

29 Ema Jesús majicapavacapa:

—Eta mavarahaqueneanahi ema Viya íchaqueneyare, esuapanuyare nuti mavanerunuhi —macahepa.

30 Tásiha, ena nayaserecavarepa:

—¿Tájahasica eta tiáramicare pímechahaviyare apaesa visuapavipa? Vi-varaha vímaha. 31 Eta acane ema víyahaini Moisés tíjaracavacahi ena viáchucaequeneanaini tinicanahi eta ticaijare maná, ánaqui te apaquehe mávapahi. Taicha tacahehi eta táechajiriruvahi eta Sagrada Escritura ani tac-ahehi: “Máenicavacahi eta tinicacare tiásiha te anuma”. Piti, ¿pímijachavapa pirataha picachurica ema víyahaini Moisés? —nacahepa.

32 Ema Jesús majicapavacapa:

—Nutupiruvavare numetacahe. Éti, ichape eta éjecapirava. Ema víyahaini Moisés, vahi émainahini macucupaicahini eta maná. Ema Tata, émahí ticucupaicahi eta maná. 33 Jararihi eta apana numetarapi eyehe: Puiti ema Tata mavaraha máijaracaheya eta yátupiquenehi tinicacarehi. Étaripa tinicacarehi tiásihahi te anuma ticaitarecavacayarehi namutu nácani tijacapanaya. Étara eta tímitecanuhi —macahepa.

34 Tásiha, najicapapa éna:

—Tata maestro, piyaseasinahavi ema Viya máijaracahavipaini máejehainahini eta tinicacare péchajisiquenehi —náichapa.

<sup>35</sup> Tásiha, éma máichavarepa:

—Nútira eta yátupiquene tinicacare nucaitarecaheyarehi. Eta tacahe, nácani tisuapanuanayare, vaipa tiápechavanaimahi técuhana. Váipavare timaunea-naimahi. <sup>36</sup> Étaserá eta níchaquene, ímahanuipaneni éti, váhisera esuapanuhini. <sup>37</sup> Nuvaraha ácaicutiaraquenéna yátupina. Namutu nácani tipauchanuanayare, núti vahi névatajicavacáimahi taicha tásihaquenéichuhi me Tata eta máijarasiranuhi éna. <sup>38</sup> Taicha núti, eta núcupaisirahi te anuma, tímitecanuhi nítauchayarehi eta mavanairipiana ema Tata. Vahi nútijiriruvainahini eta nítesirahi níchayarehi eta nuvarahaquenénahini núti. <sup>39-40</sup> Eta mavarahaquenehi ema Tata eta mavanésiranuhi, nucaitarecayarehi nácani máijararunuanayarehi éma. Nácani tésenicanuanayare nuti Machicha, tisuapanuanayarevare, máichecuaraquireyare eta náitaresiraya te nucaechepecapá éna te náecariana te jena sache táitecapapa eta népaníravacayare. Váhiquene nucamitiacaimahi ema émanaimahi —máichavacapa.

<sup>41</sup> Tásiha, nararihi ena ticaecahirahiana eta máichiravacahi ema Jesús eta émairahi eta yátupiquene tinicacare, máucupairuhi te anuma, ticaitarecarahiyare. <sup>42</sup> Ánipa náichacacahi:

—Tépiyahirahipa ema maca. Víti, vímatihí ema maiya, ticaijare José. Énerichuvare vímatihivare esu máena. ¿Tájaha tacayema eta macahechajiriruvahi eta másihairahi te anuma? —nacahepa.

<sup>43</sup> Ema Jesús máichavacapa:

—Ámatina. ¿Tájaha tacayema épururahi? <sup>44</sup> Nacarichu témunahiricavanaya tipauchanuana nácani máichuhaqueneanahi ema Tata. Eta tacahe, ena máichuhaqueneanayarehi éma, nucaechepecavacayare núti te táitecapapa eta sache népaníravacayare núti. <sup>45</sup> Taicha tacahehi eta májurehi ema profeta víyahaini Isaías, ani tacahehi: “Náimitucasivayareichuhi me Viya namutu ena achaneana”. Tacahe, namutu ena máimitureana ema Tata, énara tipauchanuanayare puiti. <sup>46</sup> Tayanapane váhihinéni náimahaimahi eta mamira ema Tata. Nucarichu núti nímahapa éma taicha étaquenehi eta násinehi eta mayehe. <sup>47</sup> Nutupiruvahi numetacahe: Nácani tisuapanuanayare, níjaracayare eta náitaresirayare máitavacacayare. <sup>48</sup> Núti, yátupiquenehi eta nucaitaresiravacahi ena ticasiñavanahi eta nuyehe tacuti eta tinicacare tacaitarecahi eta viáqueheana. <sup>49</sup> Éti, ena iáchucanaveanaini tinicanahi eta maná te mávapahi apaquehe. Váhisera náitarecahini. Namutuhi tépenaracánahi. <sup>50-51</sup> Nácánisera tinicanahi eta néche, vahi tépenanaimahi. Taicha núti núcupaicaripa te anuma. Eta neche, yátupiquenehi tinicacarehi ticaitarecarahi. Nácani tinicanayare eta neche, máichecuaraquireyare eta náitaresiraya. Núti níjaracayare eta neche taicha nuvaraha tacaitarecavacahini namutu ena achaneana —máichavacapa.

<sup>52</sup> Tásiha, ena natiarihiqueneana tiácapaemajiricacánapa. Ena apamuriana, ánipa nacahe:

—¿Tájahapuca macayemahi eta máijarasirahavi eta maeche viniruyarehi?

Ena apamuriana, ánipa nacahe:

—Vaipa tétupicava eta juca mapanereruhi. Mavaraha vinicayarecacha eta máechenaváji —nacahepa.

<sup>53</sup> Émasera ema Jesús máichavarepa:

—Nutupiruva numetacahe: Te épuruhipuca enica eta neche, nuti Manerjirunuhi ema Viya, te épuruhivarepuca éra eta nítine, vahi ítarecaimahi. <sup>54</sup> Taicha nácani tinicanayare eta neche, téranayareva eta nítine, éna máichecuaraquireyare eta náitaresira. Tásiha, núti nucaechepecavacayare te

náecariana te jena sache népaníravacayare. <sup>55</sup> Taicha eta neche yátupiquenehi tinicacare tacaitarecarahi. Énerichuhi eta nítine, yátupiquenehivare téracare ticaitarecarahi. <sup>56</sup> Esamanuchaha. Nácani tinicanayare eta neche, téranayareva eta nítine, éna tiávahácanuanayarehi núti. Tásiha, núti návahácavacayareva éna. <sup>57</sup> Taicha ene nucahehi núti, tiávahácanuhi ema Tata. Tásiha, núti návahácahivare éma. Máitavacacahi eta máitaresira. Éma ticaitarecanuhi. Tivanecanuhivare nucaitarecaheyarehi. Tásiha, nácani tinicanayare eta neche, máitavacayare eta náitaresira nícha. <sup>58</sup> Núti núcupaicahi te anuma eta níjarasiraheyarehi eta juca yátupiquenehi tinicacare. Vahi tácutihi eta maná nanicaquenehi ena iáchucanaveanaini éti. Tépenaracanárichuchaséra. Énaserá ena tinicanayare eta neche, máichecuaraquireyare eta náitaresiraya —máichavacapa.

<sup>59</sup> Tamutu eta juca máimiturapiana ema Jesús te mávihaipahi te náurujisirareva ticajare sínagoga tayehe eta jena avasare Capernaum.

### *Tacarichu eta máimiturapiana ema Jesús ticaitarerahi te visuapa*

<sup>60</sup> Tacahe, ena téhicanahi ema Jesús, eta nasamirahi eta juca máimiturapianahi, camuriana ena vaipa návarahahini náehica. Ánipa nacahe:

—Ticajerapicha eta vicaicutiarirainahini eta juca máimiturapiana. Nájinavare tisuapanaimahi —nacahepa.

<sup>61</sup> Émasera ema Jesús máimatihí eta napanereruanahi eta namavarairaripa náimiyanavahini náehicahini. Tacahe, máichavacapa:

—Páurehehi éti eta evaraha ínajica eta éhisiranu taicha eta emacaicutiarairahi eta nímiturapianahi. <sup>62</sup> Németeaca ímiyanavaichucha eta emasuapajiraivahi, tayanapanepuca ímahanupuca eta nárairaya nuchavirayarehi te anuma, te návinehi acane, taicha núti Manerejirunuhi ema Viya. <sup>63</sup> Ácaicutiara eta nucayemaquenehi. Vahi étaparacaini eta néchaquene. Eta juca nímiturapiana, te esuapapa, étara ticaitarecaheya taicha yátupiquenerihi. <sup>64</sup> ¡Páurehehi eti váhiquenehi evarahahini esuapanu! —máichavacapa.

Eta juca macayemaqueneanahi ema Jesús, matupiruvahi eta máichiravacahi taicha máimatipahi eta napanereruana ena tijunijiacanayarehi, émapa ema tíjararecayarehi. <sup>65</sup> Tacahe, máichavacapa:

—Puiti, evaraha ínajicanu. Eta tacahehi eta níchirahéhi: “Nacarichu témunahiricavanaya tipauchanuana nácani máichuhaqueneanahi ema Tata” —máichavacapa.

<sup>66</sup> Eta nasamirahi eta nacayemaqueneanahi, tínajicavanapa ena camuriqueneanainihi. Vaipa náimiyanavahini náehicahini ema Jesús. <sup>67</sup> Tacahe, tíyaserecavipa viti dócequeneana máimitureanahi. Máichavipa:

—¿Evarahainapapuca ejunijicanuyare éti apanavare?

<sup>68</sup> Tacahe, ema Simón Pedro majicapapa:

—Tata maestro, vahi vijunijicavimahi, taicha nájina pácuti eta péchajiriruvana. Tétavacavahi eta tacaitarecaravahi. <sup>69</sup> Vítí vitupiruvahi eta visuapiravíhi. Véchahivare eta yátupiquenéravíhi Cristo, Machichaquénévíhi ema yátupiquenehi Viya —máichapa.

<sup>70</sup> Ema Jesús majicapapa:

—Dócehehinéni eti nunerejiruanahi. Mararihiserá ema émana te etaracu, ema mávaháruhi ema Váinaraji —máichavipa.

<sup>71</sup> Ema Jesús, máechajisihahi ema Júlasí. Taicha ema Jesús máimatihí eta émairayarehi tíjarareca, tayanapane éma vidocenéníhi viti apóstoleana.



## 7

*Ena maparapenaveana ema Jesús váhivare nasuapa*

<sup>1</sup> Tacahe, ema Jesús tímiyanapaipahi tipaicaipahi eta avasareana te tinapaica eta Galilea. Vahi mavarahahini machavahini tayehe eta avasareana tinapaica eta Judea, taicha ena tuparairucanahi te Jerusalén napane-rechaipahi nacapacayarehi éma. <sup>2</sup> Tacahe, te jena sácheanahi, tiánehipa eta vapiestara viti israelítana eta vicapenahuiyavacahi eta viyusujiana. Étahi eta vítecapihavacahi te Jerusalén, vihasulupayacha me Viya eta macajurusinahavihi eta visucureana te véसानeana. <sup>3</sup> Tiuri puiti, natiarihihi ena maparapenaveana ema Jesús. Tacahe, náichapa éma:

—Te pímiyachava pítira máestrovi, vahi pánasi eta te ani. Piyana te Judea, apaesa ena pímitureana tiávihanahi ánaqui náimaha eta píchaqueneanayare. <sup>4</sup> Taicha te pivarahahipuca náimativi ena achaneana, tacamunuhi pímercava yátupina te namirahu namutu. Vahi picuyumuruca eta pítucaqueneana — náichapa.

<sup>5</sup> Taicha ena maparapenaveana váhiquenevare nasuapahini éma. <sup>6</sup> Tacahe, ema Jesús máichavacapa:

—Vuíchaha táitecapauchanuhini eta nuyanirayare te Jerusalén. Étiserá tamutuchucha tiuri eta eyaniraina. <sup>7</sup> Nútiserá ticatichanuanahi ena achaneana táichavenehi eta nímereuchiravacahi eta náichaqueneana tamauriqueneana. Étiserá vahi ticatichaheanaimahi taicha tájina taviuchahehini. <sup>8</sup> Te evarahapuca, eyana éti te piesta. Nútiserá vuíchaha nuyanaimahi taicha vuíchaha táitecapauchanuhini eta nuyanirayare —máichavacapa.

<sup>9</sup> Máevatacahi ema Jesús ena maparapenaveana, émasera ticaequenehavapa. Manasipanaichaha te Galilea.

*Ema Jesús tiyanarichuchanéni tayehe eta piesta*

<sup>10</sup> Te tiyananapa te piesta ena maparapenaveana ema Jesús, énerichuvaréni éma tiyanavarepa. Váhisera máimerecavahichaini. <sup>11</sup> Énasera ena tuparairucana natanucaipa éma, te jena piéstaquenehi. Tásiha, nacahepa:

—¿Macáñárihipucacacha ema mácani achane? —nacahepa.

<sup>12</sup> Énerichuvare ena achaneana natiarihiqueneanahi te piesta, náechajisihahi éma. Ánipa nacahehi: “Vahi tiuri ema maena achane. Macaetemavaca ena achaneana”. Ena apamuriana ánivare nacahe: “Tiúrihi ema maca. Vémeteaca tétavicava eta máurivahi”.

<sup>13</sup> Váhisera nacuchujipicahini eta nacayemaqueneanahi taicha tipicacarcavanarichucha nayehe ena tuparairucana.

<sup>14</sup> Te enumuhuquenepa eta piesta, mapaenumavapa tímercava ema Jesús. Tiyanapa tisiapahi tayehe eta Templo. Tinahacavapa tímiturecahi. <sup>15</sup> Ichape eta náramirahi ena tuparairucana, eta náimairahi eta máitusirahi yátupi. Tásiha, ánipa nacahehi:

—Ema maca vahi vímiturenahini. ¿Táviha maviyahi eta máitucaquenehi ema maca? Vahi mávamirahuini eta máimitusiravacahi ena achaneana — nacahepa.

<sup>16</sup> Émasera ema Jesús máimatihini eta napanereruanahi. Tacahe, máichavacapa:

—Vahi nútijiriruvaina nuvehahini te nuchuti eta juca nímiturapianahi. Ema Tata tivanecanuhi, émahini tituparacanuhi eta nímitusiraya eta máimiturapiana. <sup>17</sup> Te etiarihinapuca eti evarahahi ítaucha eta mavanairipiana ema Viya, ímatiacavaneyare eta juca nímiturapianahi étairahi tiásihahi eta me Viya. Vahi nútijiricávainahini eta nímitusirahi. <sup>18</sup> Mácani achane émajiricavahi téchajisihava, mavarairahi ticunachacareyarehi. Nútiserá, eta nuvarairahi

ecunachayare ema Tata tivanecanuhi, vahi népiyahirahimahi. Nutupiruvahi néchajisiha eta yátupiqueneana tisuapacareana.

<sup>19</sup> Échavarichu éti eta májjarasirahehi ema víyahaini Moisés eta mavanairipiana éhiruyarehi. Váhisera ítauchahini éti émanainahini. ¿Tájahasica eta nuviureva eta evarairahi ecapacanuya? —máichavacapa ena tuparairucana.

<sup>20</sup> Ena achaneana najicapapa:

—¡Péjcapava píti eta pipanereru! ¡Máurishivipapuca píti! ¿Nájaha ticahehi eta vivarairahi vicapacavi? —náichapa.

<sup>21</sup> Ema Jesús tímiyanava téchajiricava nayehe ena tuparairucana, ánipa máicha:

—Táichavenehi eta nípiresirahi te jena sache tacapicahuquenehi sávarumuhuquenehi, éta tiviuchanuhi ichape eta eyehe. <sup>22</sup> Étiyapa epamicavahi eta emarcachiraya mácani amuya ajaira te óchopa eta masacherahi, tayanapane sávarumuhupuca. Taicha ichape evaraha ítauchayare eta mayeherepini ema víyahaini Moisés. (Váhisera émainahini máinapuchahini manacuchahini eta juca eyeherepi. Ema viáchucaini Abraham énapa ena machichanaveana tínapucanahi nanacucha eta viyeherepiyarehi.) <sup>23</sup> Te tiúrihi ímaha eta emarcachirahi mácani amuya alauchu te sávarumuhuana, ítauchirapaipahi eta mavanairipi ema Moisés, tatuparacahe vahi ecusemahini eta nuyehe táichavenehi eta nuncanarasirahi ema maca achane te sávarumuhu. <sup>24</sup> Vahi ecuémunanásicava eta epanereruana. Epanerechinava tayehe eta táuriqueneana. Ácaicutiara eta táurivahi eta vicanarasirahi ena achaneana, tayanapane eta sávarumuhupuca —máichavacapa.

*Ema Jesús máechajisihapa eta másinehi*

<sup>25</sup> Tacahe, natiarihi ena tinerejicavana ena ticavasanahi te Jerusalén, nacahepa éna:

—Ema maca, émara ema natanujiriruasa ena tuparairucana, ema navarahaquenehi nacapaca táichavenehi eta máimijachirava ema Cristo mavaneruhi ema Viya. <sup>26</sup> Ímahasera éma, vahi mapicacaracavahini eta macametarairuirahi te juca Templo. Nájinavare ena tuparairucana nájjaracavahini nacaratcahini. Nájinavare nacamatinaahini. ¿Nasuaparipapuca puiti éna, eta émairahi ema Cristo? <sup>27</sup> Vémeteacaseru vuíchaha émaina ema Cristo, taicha vímatihi ema maca, étapa eta máuchusinehi. Te máitecapa ema yátupiquene Cristo, nájina téchaimahi távihapuca eta máuchusihayare —nacahepa.

<sup>28</sup> Émasera ema Jesús máimatihini eta napanereruana. Tásiha, muracapanapa eta máechajisirahi eta te Templo máimituresirahi. Ánipa macahe:

—¡Éti ímijachava ímatinuhi, étapa eta núchusinehi! ¡Váhisera ímati eta tímitecanuhi! ¡Váhivare ímati ema Eternoquenehi, ema tivanecanuhi! Núti, vahi nútijiriruvainahini eta nítesirahi. <sup>29</sup> Nútisera nímatihi éma taicha étaquenehi násinehi eta mayehe eta nítecapauchirahehi —máichavacapa.

<sup>30</sup> Eta nasamirahi éna tuparairucana, tiápajupanavahi eta nasemanevahi. Navarahapa nacaratacayarehini, náeratacayarepaini, vuíchahasera máisapahini ema Viya eta nacaratasira éma. <sup>31</sup> Natiarihisera camuriana ena tisuapanahi. Tásiha, nacahepa:

—¡Víti vémeteaca émaripa ema Cristo ema maca! ¡Taicha nájina mácuti eta máichirahi eta tiáramicareana máichaqueneanahi ema maca! —nacahepa.

*Ema tuparairucana náevatacapa ena suntaruana nacaratapanayarehi ema Jesús*

<sup>32</sup> Ena fariséoana nasamaemachapa ena achaneana eta nacunachirahi ema Jesús. Tásiha, napanereuchavanepa ticurujicacanapa ena tuparairucana.

Náevatacapa ena suntaruana nacaratapanayarehi ema Jesús te Templo te mávihahi. <sup>33</sup> Tacahe, ema Jesús máichavacapa ena suntaruana:

—Vuíchaha tituparacahe eta ecaratacanuhini. Yátupisera ánipirine eta nucaheyare eta eyehe. Tásiha, nuchavainapa mayehe ema tivanecanuhi.

<sup>34</sup> Éti, etanucanuinapa, váhisera íchimavanuimahi. Taicha vahi ítujicavaimahi ecapayacanu te návihayare núti —máichavacapa.

<sup>35</sup> Tacahe, ena ticatianacanahi tiyaserejiricacanapa. Ánipa nacahe:

—¿Távihapapuca macaijuhénapa eta vaipa viratahaimahi vicapayacaimahi víti? ¿Mavarahapuca tiyanayare te tayerehiquene avasare, macapayacaya ena vijaneanana israelítana tiávihanahi te tayerehiquene? ¿Mavarahapuca máimitucayare ena apavasanana? <sup>36</sup> ¿Tájahapucáji tacayemahi eta juca máechajiriruvahi eta vaipa viratahaimahi vicapayaca te jácani macaijuheyare? —nacahepa.

*Tétavicavayare eta viúricacarevana maicha ema Jesús, tacutiya eta ichape cajacure táuchurehi eta máriana. Ticaitarecahaviya éma.*

<sup>37</sup> Te jena téquenaha sache eta piéstairahi, tímahacarepana eta jena sache. Tiyanavarepa ema Jesús te namuri ena achaneana. Titupihapa, téchajicapa muraca. Ánipa macahe:

—Te natiarihinapuca nácani timauneanahi, náitecapauchanu. Núti níjarcayare eta náerayare nácani tisuapanuanayare —macahepa.

<sup>38</sup> Taicha ani tacahehi eta Sagrada Escritura: “Ema Mavaneruhi ema Viya, tétavicavaya eta viúricacarevana máicha, tacutiya eta ichape cajacure táuchurehi eta te máriana. Ticaitarecahaviya éma” tacahepa. <sup>39</sup> Eta juca macayemaqueneanahi ema Jesús, máimicaecherachahi eta masiapahasiravacayarehi ema Espíritu Santo te nasamureana nácani tisuapanayarehi éma. Vuíchahasera táitauchavahini, taicha vuíchaha machavahini mápanahini te mávasa te anuma ema Jesús.

*Apanapanepa eta napanereruanahi ena achaneana mayehe ema Jesús*

<sup>40-43</sup> Tacahe, ena achaneana apanapanepa eta napanereruana mayehe ema Jesús. Ena apamuriana achaneana, nacunachapa éma. Ánipa nacahe:

—Yátupiquene ema maca achane, émaripa ema profeta ema vicuchapaquenehi máiteruyarehi.

Ena apamuriana, ánvare nacahe:

—Émaripa ema maca ema Cristo.

Énaserá ena apamuriana, téjecapavanarichucha. Ánipa nacahe:

—Galileo ema maca Jesús. Váiparinehiséra étainahi máuchusiha ema Cristo tayehe eta avasare Galilea. Taicha eta Sagrada Escritura táechajisihahi ema Cristo émayarehi mámariequeneyarehi ema víyahaini Rey David. Téhesera te avasare Belén eta máuchusihayare, étaichuhi te mávasahi ema víyahaini Rey David —nacahepa.

<sup>44</sup> Natiarihivare ena apamuriana navarahaichucha náemeratacayarehi, váhisera napatsicavahini nacaratacahini.

*Ena tuparairucana vahi náurica eta nasuapirahi ema Jesús ena achaneana*

<sup>45</sup> Tacahe, ena suntaruana vanairucanahi tichavanapa nayehe ena tivanecanahi tuparairucanahi. Vahi nájaracavahini nacaratacahini éma. Tacahe, náichapa ena tuparairucana:

—¿Tájaha tacayema vahi íámapahini éma?

<sup>46</sup> Ena suntaruana najicapapa:

—Víti vahi vipatsicavahini vicaratacahina éma, taicha tétavicava eta máitupajijiasirava ema maca. Émahipuca ema Cristo vicuchapaquenehi. Nájina mácuti eta máechajisira ema maca achane —nacahepa.

<sup>47</sup> Tacahe, ena fariséoana náichapa:

—¡Éti apanavare ísapavaipahi tivayuaracahe ema mácara! <sup>48</sup> Nájina émanaina ema tuparairuca viyehe viti nasuapahini ema máenataaji. Váhivare émanaripa vichamuri fariséo, vahi masuapahini. <sup>49</sup> Énase ena nani achane-tatajiana máimatirahanahi eta viyehe ley, náehicávanetatajipa. Táurica nacaicuñahini táicha —nacahepa.

<sup>50</sup> Matiarihivare ema Nicodemo, ema tipaipiuchahi ema Jesús te jena yátiquenehi. Fariséohivare éma. Máichavacapa:

<sup>51</sup> —Váiparinehi vétavicaimahi eta viyehe ley vítijiricavahini vicapacahini ema achane. Tacamunuhi véchanumayarehi eta maviurevahi —macahepa.

<sup>52</sup> Éna najicapapa:

—Vémeteaca píti apanavare pijaneanahipuca éma, pítirichupuca galiléovihi. Vivanecavi péchajicuha eta Sagrada Escritura apaesa pecha vahi étaimahi te Galilea máuchusihayare ema profeta Cristo vicuchapaquene —nacahepa.

<sup>53</sup> Tacahe, te títapiricanapa eta náechajisihairahi ema Jesús, téjanerecanapa. Tiyanaracanapa te napenana.

## 8

### *Esu esena ticayepahi*

<sup>1</sup> Ema Jesús májinaripahi. Tiyanaripa te tachachacu eta avasare, te cerro ticaijarehi Olivoquiji. Tatiarihahi eta avasarechicha ticaijarehi Betania, eta máitecapihahi éma. <sup>2</sup> Te apanavarepa sache, te tijarahichichapa, tiyanavarepa éma tayehe eta Templo. Téjacapa éma, tímiturecapa. Namutu ena achaneana tiyananahi napauca, nasamararacayarehi éma. <sup>3</sup> Tacahe, sutiarihahi esu esena ticayephipuca, esu suvehahi ema apana achane. Ena escribánoana énapa ena fariséona, eta náimereuchirahi ésu, námapa te mamirahu ema Jesús te namurihi ena achaneana. <sup>4</sup> Tacahe, náichapa ema Jesús:

—Tata maestro, esu suca esena nachimaracahi ticayepahi, suvehahi ema apana achane. <sup>5</sup> Eta viyehe ley májjararuhavi ema víyarahaini Moisés, tímitucahavihi vicapacayarehi eta vitupisisirayare te márijahiana nácani ticapecaturanahi. ¿Tájahapuca picayema píti? —nacahepa.

<sup>6</sup> Éna nayaseserecahi ema Jesús, taicha natanucahi eta tiviuchayarehi éma. Émasera ema Jesús tétipaicapa tiájupairicapa te apaquehe te mavauqui. <sup>7</sup> Énase tímiyanavanarichucha nayaseserecahi. Tacahe, máesenimurihapa. Máichavacapa:

—Te etiarhipuca éti mapecaturareanahi, enerejicava ínapuca eyuca esu suca esena —máichavacapa.

<sup>8</sup> Tacahe, tétipaicavarepa tiájupairicavarepa éma. <sup>9</sup> Eta nasamirahi eta juca, téchavanarichuhinéni eta napecaturana. Titsirihacavanapa. Tásiha, tímutesrahavanapa tiúchuchujicana. Nativapa tiúchucanahi ena ichavicapanana. <sup>10</sup> Te máesenicavarepa ema Jesús, nájinaripahi éna. Sucarineipahi esu esena. Tásiha, máichapa esu esena:

—Nuchicha, tiyananapa namutu ena timetauchavianahi. ¿Nájinapa apanainahini ena navaraha ticapacaviana?

<sup>11</sup> Tásiha, ésu suíchapa:

—Nájina, tata.

Éma máichavarepa:

—Núti apanavare, váhivare nímicapacavimahi. Piyana pichava. Váipasera picuapechava picuquicha eta pecatu —máichapa.

*Éma Jesús, éma namicahu éna achaneana*

<sup>12</sup> Te táequenepa eta juca, tépanavavarepa tímitureca éma Jesús. Máichavacapa éna achaneana:

—Nútira numicauchahehi eti achaneana te juca apaquehe. Eta tacahe, nácani téhicanuanayare, vahi téjecapavanaimahi. Taicha eta nímiturapiana, étapa tímícauchavacahi. Tásiha, nacatichainapa eta timapicu, vaipa napauchaimahi —máichavacapa.

<sup>13</sup> Tásiha, éna fariséoana natiarihipahivare. Tacahe, náichapa:

—Pítijiváichucha péchajisiavahi. Tájina pisuapacarevaina.

<sup>14</sup> Éma Jesús majicapavarepa:

—Tisuapacare eta juca néchajiriruvana, tayanapane nútijivahi néchajisiava. Taicha nímatihi nutuparahaichuhi eta nímeresiravayare. Nímatihivare eta nucaijuheyare. Étiserá vahi ímatihini távihapuca eta násinehi, váhivare ímati eta nucaijuheyare. <sup>15</sup> Éti étachucha éhícahi eta nayeherepiana nanacacueaneana éna iáchucanaveanaini. Étasera tíchahehi eta épuruiranuhi. Nútiserá vahi népuruhéimahi éti. <sup>16</sup> Jéhevareséra, te jácani sáchezare, népuruhepapuca táichavenehi eta emasuapirahi, tatupiruvayarehi eta népuruiraheya taicha vahi nácarichuimahi népuruhe núti. Matiaríhi éma Tata tivanecanuhi. Éma apana máimahahi eta emasuapajiraivahi. Tépuruheyarehivare éma. <sup>17</sup> Te eyeherepi éti, te natiarihipuca apinana éna títametacarahiana, te ticuticanahi eta náechajiriruva, tisuapacareanayarehi éna. <sup>18</sup> Ene nucahehi núti. Yátupíhi eta numetarapiana. Émapa éma Ticachichanuhi, éma títametacahehi eta yátupirahi eta numetarapiana —máichavacapa.

<sup>19</sup> Énasera nayaserecavarepa:

—¿Távihasica mávihahi éma ticachichavihi?

Éma Jesús majicapavarepa:

—Éti vahi ímatinu. Váhivare ímatimahi éma Ticachichanu. Te ímatinuhini, ímatipahivareini éma Ticachichanu —máichavacapa.

<sup>20</sup> Éta juca eta máechajiriruvana éma Jesús eta máimituresirahi tayehe eta Templo. Éta máejasinehi te tachacaya eta nanasirareana eta námavahuana. Nájinasera napatsicavahini nacaratacahini taicha vuíchaha máisapavacaimahi éma Vía eta nacaratasirainahini éma.

*Éma Jesús tímereuchavapa eta émairahi Cristo*

<sup>21</sup> Éma Jesús tíápechavavare mametacavaca:

—Puiti tiánehipa eta nuyanirayare. Éti etanucanuinapa. Váhisera íchimanuimahi. Émepenainapa eta epecaturana. Tímicuñahezare te infierno taicha vahi ecamapuravahini eta nutiaríhirahi, esuapanuhini. Taicha vahi ítujicavaimahi ítecapa te návihaya núti —macahepa.

<sup>22</sup> Tásiha, éna ticatianacanahi náichacacapa:

—Mavarahainapuca ticapacavayare. Táitusiava macahehi eta máechajiriruvahi eta váhiji viratahaimahi véhica éma. ¿Távihapuca eta macaijuheya? —nacahepa.

<sup>23</sup> Éma Jesús máichavarepa:

—Éti tayehehi eta apaquehe. Nútiserá tayehenuhi te anuquehe. Éta iávasahi éti te apaquehe iávihahi. Núti návasaichuhi te anuquehe. <sup>24</sup> Éta tacahe, numetacahenumahi eta tanasinapa eta epecaturana te épenapa. Taicha te



vahi esuapanuhini eta nútiquenériahi ema ecuchapaquenehi, tanasiyare eta epecaturana te épena —máichavacapa.

<sup>25</sup> Tacahe, nayaserecapa éna:

—Piti pímiyachava mavaneruhi ema Viya. ¿Nájahavisica pítinavají?

Ema máichavarepa:

—¿Áyahapapuca numetacahe? <sup>26</sup> ¡Tétavicavahi eta tamuracavahi eta esamureana! Tavaraha muraca eta nucajachiraheya. Vuíchahasera nicha. Émasera ema tivanecanuhi, tatupiruvahi eta máechajiriruvana. Eta tacahe, eta néchajiriruvana nútí eyehe eti achaneana, étarichuhi eta nusamaque-  
neanahi mayehe —macahepa.

<sup>27</sup> Énaserá váhiquene nácaicutiarahini eta mametasiravacahi eta mayehe ema Maiya. <sup>28</sup> Tásiha, máichavarepa:

—Jéhevaesera te ecatupihanupa te anuquehe, tapaenumavainapa ímatinuyare eta nútiquenerahi ema Cristo ecuchapaquenehi. Ecaicutiarayareva yátupíhi nímitucahe eta máimiturapiana ema Tata. Vahi étaina nuviyahini te nuchuti nútijiriruvainahini. <sup>29</sup> Puíticha, ema Tata ticachanenuhi, vahi majunijiacanuhini, váhivare nácarichuhini taicha nítauchaipahisera nútí eta mavarahaqueneanahi éma —máichavacapa éna.

<sup>30</sup> Eta nasamirahi ena achaneana eta mametarapianahi, ichaperinehi eta nasuapirahi ema Jesús ena camuriqueneana achaneana.

*Tímaticareana ena mavanarana ema Viya énapa ena tavanarana eta pecatu*

<sup>31</sup> Tacahe, ema Jesús máichavacapa ena tisuapanaripahi. Máichavacapa:

—Te ímiyanava ecaratacava eta esuapirahi eta nímiturapiana, éti yátupiquenehe nímiturehehi. <sup>32</sup> Tásiha, ímatinapa eta yátupiqueneana táuriqueneana. Vaipa vanaracahémahi éti —máichavacapa.

<sup>33</sup> Nararihihisera ena ticanarajiricanahi éma. Náichapa:

—Viti mámariequeneháviní ema viáchucaini Abraham. Tájina vímatiyahini eta vítaresirahi nacavanarahavihini. ¿Tájaha tacayema eta picahéhi vaipa vanaracahavimahi? —nacahepa.

<sup>34</sup> Ema Jesús máichavarepa:

—Nutupiruva numetacahe: Namutu nácani tíchanahi eta pecatu, tavayuaruanahi éna. Nacutihi ena vanaracana taicha tétavicava eta tavayuasiravacahi. <sup>35-36</sup> Ímijachavaipahi machichahehi ema Viya. Váhisera tacahehini, taicha tavayuaruhehi eta pecatu. Nútisera nuti Machicha ema Viya nuratahahi nucuchucahe. Vaipa vanaracahémahi. Vaipa tivayuacahémahi eta pecatu. Jéhesare, yátupina eta machichaheraya, máichecuaraquireyare éta. <sup>37</sup> Néchahivare nútí eta mámariequenehérahí ema viáchucaini Abraham. Epanerechaichuchasera ecapacanu, taicha ecaticahi eta nímiturapianahi.

<sup>38</sup> Nútí néchajisihahi eta máimechaqueneánuanahi ema Tata. Étisera étachucha íchahi eta mavanairipianarichuhi ema ticachichahe —macahepa.

<sup>39</sup> Éna najicapapa:

—Viti machichaequeneánaichaha ema viáchucaini Abraham —nacahepa.

Ema Jesús máichavarepa:

—Te yátupinahini machichaequenehénahini ema Abraham, ecutihini éma eta yátupirahi eta macaemataneasirahi ema Viya. <sup>40</sup> Esapíhahi éti, epanerechaichucha ecapacanu. Ema Abraham, vahi tácahehini eta mapanereruhi éma. Nútí numetacahehi eta yátupiqueneana mapanereruana ema Viya. Váhisera esuapanuimahisami. <sup>41</sup> Éti ícharichucha eta máichaqueneasahi ema ticachichahe —máichavacapa.

Ena najicapavarepa:

—Víti vahi apáchichahávina. Émanaichu ema ticachichahavi, ema Viya —nacahepa.

<sup>42</sup> Ema Jesús majicapavarepa:

—Te yátupinahini machichahenahini ema Viya, etupiruvaipahini émunacanu. Taicha núti étaquenehi násiha me Viya. Vahi nútijiruvainahini eta nítésirahi puiti. Nuvanecasivahi mayehe. <sup>43</sup> ¿Tájaha tacayema vahi árataha ecaicutiara eta nímiturapiana? Étaserapuca eta emavarairahi esama. <sup>44</sup> Nútisera nímicaecherachinaheyare ema ticachichahe. Émara ema Váinaraji. Ema téchahehi, taicha evarahahi íchayare eta máichaqueneana éma. Taicha éma, ticapahi eta máítaresirahi te tépanavainapa. Váhiquene mávarahahini máehicahini eta yátupiqueneana. Étachucha máurica tivayuarereca. Tépiyahirahipaipa. Máurihayapara eta máimahi. Éma, náiyahi ena tépiyahirahiana. <sup>45</sup> Eta echichairahi ema maca tépiyahirahi, váhiquenehíni esuapa eta juca nímiturapiana yátupiqueneana. <sup>46</sup> Éti, ímijachanupuca jararihi eta néjecapiravahi. Nutupiruvahinenisera eta numetasirahehi eta yátupiqueneana. ¿Tájaha tacayema vahi esuapanu? <sup>47</sup> Taicha nácani mayeheanahi ema Viya, náuricayarehi nasamararaca eta máechajiriruvana ema Viya. Étiserá vahi machichahénahini ema Viya. Eta tacahe, vahi iúricahini esamararacahini eta máechajiriruvana numetaruheanahi —máichavacapa.

*Te májinaichahahi ema Abraham, manasiqueneripahi ema Cristo*

<sup>48</sup> Tacahe, ena ticatianacanahi náichavarepa:

—Piti achane picahequetatajichucha. Yátupiquenehi mávaháruvahi ema Váinaraji. Táitusiava, máurishivihi máicha —nacahepa.

<sup>49</sup> Ema Jesús majicapavarepa:

—Vahi máurishinuinahini. Eta juca nucaemataneasirahi ema Tata, nuvarairahi ecunachayare éma. Étiserá épurunuichucha. <sup>50</sup> Núti vahi nucunachavaimahi. Matiarhisera ema ticunachanuhi. Éma téchahavihi, te nútipuca nétupicavahi eyehe, téhesera étihipuca. <sup>51</sup> Nutupiruva numetacahe: Nácani tisuapanayare eta numetarapiana, máepenacacanayare éna —máichavacapa.

<sup>52</sup> Najicapavarepa ena ticatianacanahi:

—Jéhevare puiti, vímatiacavipa eta pimáurishivaquenehi. Apanasicáji ena profetana tépenanahi, émapa ema Abraham. Tásiha puiti, picahechajiriruvavare eta nácani tisuapanayare eta pimetarapiana máepenacacanayarehi. <sup>53</sup> Pivarahapapuca picachuricayare ema viáchucaini Abraham, apanasica ema tépenahi, énapa ena profetanaini. ¿Nájahavisica piti pivayuyuacavapa? —nacahepa.

<sup>54</sup> Ema Jesús majicapavarepa:

—Tájina nucunachacarémahi, te nútijiricavaríchuchapuca nucunachavahi. Mararihiserá ema Tata ticunachanuhi, ema ímijachaquenehi ema ecasiña éti. <sup>55</sup> Éti ímijachavahi ímati éma. Váhinéni ímatihini. Jéhevare núti nímatihini éma. Téhesera numetacahehini eta numaimatirahi, népiyahirahiripapucaini nácutiherípahíni éti. Étaserá yátupiquenehi eta nímatirahi éma, nusuapahivare eta mavanairipiana. <sup>56</sup> Ema víyarahaini Abraham ema iáchucaini, tétavicavahi eta máurismurevahi eta máimatiranuhi núti —máichavacapa.

<sup>57</sup> Tacahe, ena ticatianacanahi náichapa:

—¡Vuíchaha pácayehe cincuenta áñoinal! ¡Picaemuñavapa pímati ema víyarahaini Abraham!

<sup>58</sup> Ema Jesús majicapavare:

—Nutupiruva numetacahe: Májinaichahahi ema Abraham, nunasiquene-ripahi núti —máichavacapa.

<sup>59</sup> Tacahe, tiápajucavapa eta nasemanevahi. Navehapa eta márijahiana, nayucayarepaini éma. Tiúchucapasera éma eta te Templo. Tiyanapa tiyumu-rucavapa.

## 9

### *Ema Jesús macanaraca ema achane máimiuchurehi eta mapuchuquiva*

<sup>1</sup> Tacahe, eta mapaisirahi ema Jesús te tajuhe eta avasare, máetupiacapa ema achane máimiuchurehi eta mapuchuquivahi. <sup>2</sup> Eta véhisirapahi ema Jesús viti máimitureana, viyaserecapa éma:

—Tata maestro, ¿tájahapuca tiviuchahi ema maca eta mapuchuquivahi te tiúchucainapa? ¿Énapuca tiviuchanahi ena ticachichana, téhesera mapecaturai-chuhipuca éma? —vicahepa.

<sup>3</sup> Tacahe, tijicapahavipa:

—Váhinéni étaina taviuchahini eta mapecatura éma. Énaripa ena ticachichana, váhivare énaparacaina. Matuparahaichuhi me Viya, mavarairahi nímerecayarehi puiti eta máitupajijiasiravahi ema Tata. <sup>4</sup> Núti apanava nucamapurayare eta sache níchirayare eta máematanerepiana ema Tata eta mavanésiranuhi taicha járajapavare eta yati nájina ticaematanena. <sup>5</sup> Ticamapuravacarerichaha eta nutiarihirahi te juca apaquehe nuti namicahuhi ena achaneana —macahepa.

<sup>6</sup> Tásiha, tiátutuicapa te apaquehe ema Jesús. Máepiyacapa eta tiúrajichicha te matuture. Mayajihauquichapa ema púchuqui. <sup>7</sup> Tásiha, máichapa:

—Piyana picasipauquipana tayehe eta noque ticaijare Siloé —máichapa. (Te véchajiriruva, eta Siloé ticaijare Vanairuca.)

Tacahe, ema púchuqui tiyanapa ticasipauquipanahi. Tíjahúchava tímairirica. Tichavapa te mapena. <sup>8</sup> Náraminehi ichape ena machacayapenanahi énapa ena tímatianahi eta mapuchuquivainihi. Tásiha, nacahepa:

—Vímatihi ema émana limosnerohi púchuquihí. Émasera ema maca achane tímairiricahi. ¿Apanapuca éma? —nacahepa.

<sup>9</sup> Najicapapa ena tímatianahi yátupi:

—Émara ema maca.

Ema apana, macahevare:

—Vahi émaina. Mavasichucha.

Émasera ema achane púchuquiníhi máichavacapa:

—Nútira núti púchuquinuinihi —macahepa.

<sup>10</sup> Tásiha, nayaserecapa ema achane:

—¿Tájaha pícharacavahi eta pímairisirahi? —náichapa.

<sup>11</sup> Éma majicapapa:

—Ema maena achane ticaijare Jesús máepiyacahi eta tiúrajichicha. Tásiha, tiyajihauquichanupa. Tivanecanupa nucasipauquipana te noque Siloé. Te nuyanapa nucasipauquipanahi, nímairiricarinéhi —máichavacapa.

<sup>12</sup> Éna náichapa:

—¿Táviha ema mácara achane?

Éma majicapapa:

—Jéhepuca, vahi nécha.

### *Ema tuparairucana navaraha náecha eta manarasirahi ema púchuquiníhi*

<sup>13-14</sup> Tacahe, nasamairiricapa ena fariséoana eta manarasirahi ema púchuquiníhi. Tásiha, nacavanairipipa náepana ema púchuquiníhi, taicha

natanucahi éna eta tiviuchayarehi ema Jesús. Ichaperinehi eta nacatiasirahi éma táichavenehi eta máipuresirahi te jena sache sávarumuhuquenehi. <sup>15</sup> Te títecapapa ema púchuquinihi, nacatupihapa éma te namirahu. Nayaserecapa tájahahipuca táicharacavahi eta máimairirisiraipahi. Éma, máichavacapa:

—Ema achane típuchanuhi tiyajihauquichanuhi eta mátuture. Tásiha, nucasipauquipa. Nímairiricapa —macahepa.

<sup>16</sup> Nararihi ena nacahepa:

—¡Ema mácara achane vahi machaneraina ema Viya, taicha vahi mapicauhahini eta sávarumuhuana tacapicahuquene!

Ena apamuriana, ánivare nacahe:

—Váiparinehisera máituruequenehaimahi maicha eta tiáramicareana te yátupinahini macapecaturarahihíni —nacahepa.

Tacahe, apanapanenejiana eta napanereruana.

<sup>17</sup> Tásiha, nápechavare nayasereca ema achane:

—¿Tájaha picayema píti mayehe ema achane ticaimairiricavihi?

Éma, máichavacapa:

—Núti németeaca émahí ema profeta.

<sup>18</sup> Énaserá ena tuparairucana váhiquene nasuapahini eta émairahi ema púchuquini. Tásiha, náimichuhapa ena ticachichanahi. <sup>19</sup> Nayaserecapa:

—Vivaraha viyaserecahe: ¿Yátupihí eta máimiuchurehi eta mapuchuquiva ema pichicha? ¿Tájaha táichararacavahi eta máimairirisirahi puiti?

<sup>20</sup> Ena ticachichanahi najicapapa:

—Yátupi ema maca ema vichicha. Máimiuchurehivare eta mapuchuquivainihi. <sup>21</sup> Váhisera véchahini tájahapuca táicharacavahi eta máimairirisirahi. Váhivare vecha nájahapuca ticaimairiricahi. Émaina eyasereca. Ajairaripa éma. Émapa téchinavahi eta mametasiraheyare —náichapa.

<sup>22</sup> Tacahehi eta najicapirahi taicha tipicanahi éna nacaicuñahini, nacaquijihivaréni te náurujisirarevana taicha ena ticatianacanahi ema Jesús nacuchucapa eta vantú, nacavanaripirapa nacuija nasuapa ema Jesús émairahi ema Cristo. <sup>23</sup> Eta tacahehi eta náichirahi: “Émaina eyasereca. Émapa téchinavahi”.

<sup>24</sup> Tacahe, ena tuparairucana nápechavare náicha ema achane púchuquini. Ánipa nacahepa:

—Pátupiruva pimetacahavi te máijarepuca ema Viya eta pinarasirahi. Vítisera vímatihí ema maena achane tisipecaturarahi —nacahepa.

<sup>25</sup> Éma majicapavarepa:

—Jéhepuca, vahi necha núti te tisipecaturarahihipuca éma. Tacarichu néchahi eta nupuchuquivainihi nuti, puítisera nímairiricaripa máicha —macahepa.

<sup>26</sup> Nápechavare nayasereca éna:

—¿Tájaha máicharacavihi eta macaimairirisiravihi?

<sup>27</sup> Majicapavarepa éma:

—Cápachi numetacaheripa. Vuíchahacaru esuapanu. ¿Evarahahipucasera éhicayare éma éti apanavare? —máichavacapa.

<sup>28</sup> Tacahe, nacajachapa éma:

—¡Pítisera péhicaipahi éma! Vítisera véhicahi ema víyarahaini Moisés. <sup>29</sup> Taicha véchahi eta máechajisihahi ema Viya ema Moisés. Émasera ema máenatajají, vahi vecha távihapuca másiha —nacahepa.

<sup>30</sup> Ema achane majicapavarepa:

—¡Tájina échaquenéna éti páureanasami! Vahi ímatiequeneha távihapuca másihahi ema ticaimairiricanuhi. <sup>31</sup> Váhipuca echa váiparinehi tisamacaremahí mayehe ema Viya mácani achane ticapecaturarahi. Nacarichu tisuapacareanahi nácani títauchanahi eta mavanairipianahi ema Viya. <sup>32</sup> Váhivare visamairirica nácani nacaimairiricahini ema mácani máimiuchurehi eta napuchuquiva. <sup>33</sup> Núti németeaca te tacuijahini eta vanairucairahi me Viya ema maena achane, váhiva macuratahahini maicha eta tiáramicareana máichaqueneanahi —máichavacapa.

<sup>34</sup> Tacahe, tisemanapa éna eta máichiravacahi. Nacahepa:

—¡Píti pétaviurequenehi eta picapeaturaivahi! ¡Éta tiviuchavihi! ¡Puiti pisapihapa pivarahaya pímitucahavi víti! —náichapa.

Tásiha, nacuchucapa éma.

*Ena tépiyacavanahi púchuquiana taicha eta namasuapajiravahi*

<sup>35</sup> Ema Jesús masamairiricapa eta náquijisirahi ema máipuchaquenehi. Tásiha, te macainunavarepa, máichapa:

—¿Pisuapapuca píti ema Machicha ema Viya?

<sup>36</sup> Ema achane majicapapa:

—Pimetacanupaini, tata. ¿Nájahapuca ema Machicha ema Viya, apaesa nusuapahini? —macahepa.

<sup>37</sup> Ema Jesús majicapapa:

—Nútiripara nuti pímahaquenehi, nuti péchajirunuhi.

<sup>38</sup> Tacahe, ema achane tépuyucapa te mamirahu ema Jesús. Tásiha, máichapa:

—Nusuapavi, Tata —macahepa.

<sup>39</sup> Ema Jesús máichavarepa:

—Núti tímitecanuhi te juca apaquehe, nímimatichayare ena máimatirahanahi eta yátupiqueneana máechajiriruvanahi ema Viya, apaesa náimatiequeneha. Eta juca tímicutijiricavahi nucaimairiricayarehi nácani púchuquianahi tayehe eta máechajiriruvanahi ema Viya. Nácanisera tímijachavanahi téchemarahiana, nímahaya te najacapapuca eta nímiturapi, tísapavanayarepuca eta nucaimairirisiravacayare. Téhesera vahi nacuisapava, tiápajupanavainapa eta napuchuquivayare. Étapa naviurevayarehi —macahepa.

<sup>40</sup> Tacahe, ena fariséoana natiarihiqueneanahi te machacaya, eta nasami-rahi, nayaserecapa:

—Píti pímiyahaviripapuca púchuquihavihi. ¡Váhira púchuquihavinahini! —nacahepa.

<sup>41</sup> Ema Jesús majicapavacapa:

—¡Éti épiyacavahi púchuquihe! Taicha vahi evaraha esuapanuhini. Tásiha, tanasipa eta eviurevahi táichavenehi eta epecaturana. Te yátupinahipucaini esuapanuhini, tacuijahini taviuchahehini —máichavacapa.

## 10

*Ena Jesús tímicaecherachava eta majaneasirayare ena téhicanahi éma*

<sup>1-2</sup> Tacahe, ema Jesús máechajisihahi eta tajaneacasiva eta uvesa, máimicutichirahi eta macatiuchirahi ena téhicanahi éma. Ánipa macahe:

—Nutupiruva numetacahe: Mácani tijanearecahi eta uvesa, tétavicavahi eta máechapajirisirayarehi. Te yátiana, máimisiapayarehi te tapena, tásiha, máeratacapa eta tapajacura eta majaneasirahi, apaesa tájina tacuquichiravaina. Taicha nararihi ena tiámerahiana, ticaetemarahanavare. Navarahahi ticayumuruquianayarehi eta nasiapirayarehi te tapena eta uvesa,



námehayarehi. <sup>3</sup> Émasera ema pástulero, te yáticarahi mavejiéquenehahi eta tapaja, máichuhahi eta tájareana eta uvesana. Eta máichuirahi, tiúchuchujicapaipa táehicapaipa, taicha táimatiahuchahi ema pástulero. <sup>4</sup> Éma, máinapumi-rauchapaipa eta mayeheana uvesa. Táehimurihapaipa tamutu eta uvesana, taicha táimatihahi eta mahu. <sup>5</sup> Váiparinehiséra táehicaímahi mácani apanaquene achane. Tavarahayarehi tijunaracana taicha vahi táimatiahuchahini ema apanaquene —máichapa ema Jesús.

<sup>6</sup> Ema Jesús máimicutichinahi eta juca. Váhisera nácaicutiarahini éna eta máimitusiravacahi.

*Ema Jesús ema yátupiquenehi tijaneacahavahi taicha máuriquenehi éma*

<sup>7</sup> Ema Jesús mápechavaca máimitucavaca. Ánipa macahe:

—Nutupiruva numetacahe: Núti nímicutijiricavahi tapajacurahahi eta tapena eta uvesa te tanarasirarehi éta. <sup>8</sup> Tínapumirauchanuanahi ena tépiyacavana máestroana, váhisera máimitureanainahini ema Viya. Tiámerahianachucha éna, ticaetemarrahiana. Váhisera táehicaímahi eta uvesana taicha vahi táimatiahuchahini éna. <sup>9</sup> Núti nujaneacavacahi ena nuchanerana, nucutihahi eta tapena eta uvesa. Nácani ticasiñavana eta nuyehe, nucatiuchayarehi núti. Tájina náichavaimahi, tájinavare náechuricaímahi. Néchavacahi núti.

<sup>10</sup> Ema tiámerahi, tímitecahi éma tiámerecayare, ticaparecayare. Macaejane-repaicayareva. Nútisera tímitecanuhi níjaracayare eta náitaresiraya. Máitavacacayare eta náuricacarevayare nícha. <sup>11</sup> Énerichuvare núti yátupiquenehi eta nujaneasiravacahi ena nuchanerana, tacutihahi eta majaneasiravacahi mácani achane eta mayeheana uvesa. Núti níjarareca eta nítaresira eta nucatiuchiravacahi. <sup>12</sup> Mácanisera tuparairucachucha, vahi macatiuchaimahi eta uvesa. Te máimahapa eta tinicarahi sárare, tijunayarehi. Vahi tipatsicavaimahi macatiucha eta uvesa, taicha vahi mayehenahini. Tacahe, eta tinicarahi ticapuravainapa tacapacayare eta uvesa. Eta tacaitiruana, téjanerepaicanapa. <sup>13</sup> Ema maca achane tijunaya taicha vahi téñamavaimahi tayehe eta uvesa. Éma tímijachavahi majaneacavaca, étachuchasera macunehi eta mavacha.

<sup>14-15</sup> Núti yátupiquenénu pastulérunu taicha tiúrihi eta nujaneasiravaca ena nuchanerana. Tímatinuhivare ema Tata, tacutihahi eta nímatirahahi núti éma. Énerichuvare tacahehi eta nímatiravacahi ena nuchanerana. Éna tímatinuanahivare. Eta néñamairavacahi, núti nímiararecavahi eta nítaresira náichavenehi éna. <sup>16</sup> Nararihivare ena apamuriana nuchanerana. Váhisera ánina nacavasa. Nucurujicavacayaresera, népanayareva. Tisuapanuanayareva namutu. Étanayaréichupa eta náumuriva. Nucarinenapa núti néchavaca.

<sup>17</sup> Ema Tata, yátupihahi eta máemunasiranu taicha nímiararecachi eta nítaresira náichavenehi ena nuchanerana. Nuchavayaresera nítareca. <sup>18</sup> Nájinanéni napamicanuhini eta nísapiravaya ticapacanuana. Níjararuvahi núti eta nacapasiranuya. Taicha nutuparahaichuhi me Tata núti néchinavayarehi. Níjararuvayare. Tásiha, nuchavayareva nítareca —máichavacapa.

<sup>19</sup> Eta nasamirahi ena achaneana eta juca máechajiririvanahi ema Jesús, típutsimuriavavacavarepa. <sup>20</sup> Natiarihahi ena ticatianacanahi. Nacahepa:

—¿Tájaha tacayema esuapa ema mara? Máurishi éma, mávahárupuca ema Váinaraji —nacahepa.

<sup>21</sup> Énasera ena apamuriana, ánivare nacahe:

—Te yátupinahini mávaháruinahini ema Váinaraji, vahi macuratahahini macaimairirica ema púchuqui. Nájinavare mácuti eta máechajisira —nacahepa.

*Ena tuparairucana vahi návarahahini najacapa ema Jesús*

<sup>22</sup> Te jena sácheanahi diciembrequenehi eta ticasarahimuhuana te Jerusalén, ena achaneana napiestachahi eta año táepaniravahi náetupirica eta Templo. <sup>23</sup> Ema Jesús matiarhihi te tajuhe eta te Templo te tayehe eta alar máepiyaruihí ema Reyni Salomón. <sup>24</sup> Te náimahapa ena ticitianacana, nachayacapa ema Jesús. Tásiha, náichapa:

—¿Tájaha tacayema pímpanererechahavihi? Pátupiruvapa pimetacahavi te yátupivihpuca pítiqunehi Cristo —náichapa.

<sup>25</sup> Ema Jesús majicapavacapa:

—Cápachi numetacahepahi. Vuíchahacaru esuapanu. Eta juca níchaque-  
neanahi ímahaqueneanahi tásihaqueneanahi me Tata, étaripara tímereu-  
chanuhi. <sup>26</sup> Étiserá váhiquene esuapanu. Taicha vahi étinahíni nuyehé-  
henahini uvesa. <sup>27</sup> Eta nuyehéana uvesa tímatiahuchanuanahi éta. Núti  
apanavare nímativacahivare. Eta tacahe, téhicanuanahi. <sup>28</sup> Níjaracavacaya-  
resera núti eta náitaresirayare máichecuaraquireyare. Váhiquene náimahahini  
eta náicuñayaréni. Nájinavare tiverejicanuanaimahi ena nujanearuanahi.  
<sup>29</sup> Taicha máijjararunuanahi ema Tata. Éma, nájina ticachuriacainahini.  
Nájinavare tiratahaimahi tiverejicaimahi ena majanearuanahi. <sup>30</sup> Taicha núti  
éma ema Tata vicuticacahi eta vítupajijiasiravavacahi —máichavacapa.

<sup>31</sup> Tacahe, ena ticitianacana natanucapa eta márijahiana. Navarahapa  
natupisicayarehini ema Jesús. <sup>32</sup> Máichavacapasera éna:

—Ichapemurihi eta níchirahi eta táuriqueneana ímahaqueneanahi, máijara-  
ruanahi ema Tata. ¿Étaserapuca tivichanuhi eta evarairahi etupisicanu te  
márijahi?

<sup>33</sup> Tacahe, najicapavarepa:

—Vahi étaparacaina eta píchirapuca jácani táuriqueneanahi. Eta tivichavihi  
pímijachiravahi machichavi ema Viya. Pítirichuhi vicutiquenehi achane.  
¡Pítiserá pímiachavaipahi Víyavi! —nacahepa.

<sup>34</sup> Ema Jesús majicapavarepa:

—Eta ajureca te Salmo, vahi ímatiequenehanahi eta táechajisiaherahi  
eta macayemaquenehi ema Viya: “Víahehi nícha eti nunerejiruheanahi”.  
<sup>35</sup> Véchahi eta tacayemaquenehi eta ajureca, vahi tépiyahirahimahi. Taicha  
tamutu eta táechajiriruvana eta Sagrada Escritura táechajisihairahi eta juca  
máechajiriruvanahi ema Viya. Nácani nacatuparahahi me Viya, éma tímija-  
rechavacahi “Víanahi”. <sup>36</sup> Nútiripa puiti, nuvetijipa nímiarechacare “Viya”  
taicha émarichu ema Viya tinerejicanuhi, tivanecanuhi eta núcupaisiraya  
te juca apaquehe. <sup>37-38</sup> Núti nítaucharahi eta mavanairipiana ema Tata  
tivanecanuhi. Tásiha, tatuparacahe esuapanuvaneyarehi. Tayanapane  
vahi tisuapacarehi eta nímiturapiana eta eyehe, étapaseraini esuapahini eta  
tiáramicareana níchaqueneanahi. Étara tímereuchanuhi eta mávahásiranuhi  
ema Tata, návahásirahivare núti apanava éma —máichavacapa.

<sup>39</sup> Tacahe, tiápechavanavarepa navaraha nacaratacayarehini ema Jesús,  
napresuchayarehini. Émasera tiúchucavanepa.

<sup>40</sup> Tásiha, tiyanavarepa ema Jesús te tinapaica te apachara eta cajacure  
Jordán. Manasipanapa eta te avasarechicha Betábara te máicachasirisinehini  
ema Juan. <sup>41</sup> Camuriana ena achaneana tiyanaracanahi eta mayehe. Tásiha,  
nacahepa éna:

—Ema víyahaini Juan, tayanapanehi tájina máimerechahini eta tiáramicareana, yátupihisera eta profetairahi éma, taicha tamutupa eta mametarapiana mayehe ema maca Jesús, vímaharipa puiti eta yátupiqueneanahi —nacahepa.

<sup>42</sup> Tacahe, ánaqui camurianahi ena achaneana tisuapanahi ema Jesús, téhicanahivare.

## 11

### *Eta máepenira ema Lázaro*

<sup>1</sup> Matiarahi ema achane ticaijare Lázaro. Éma, máemunacasarehi ema Jesús. Ticavasahi tayehe eta avasarechicha ticaijare Betania, návasahivare ena maparapenaveana, esu María ésupa esu Marta. Te jena sácheana, ticajumahi muraca ema achane. <sup>2</sup> (Esu suca María, ésuhi esu tisipapevachahi ema Jesús tayehe eta táijiyequenehi perfumeama. Suájapevachahivare te suchutimaca.) <sup>3</sup> Tacahe, ena náni apinana esenana ticaparapecacana náimivanerecapa, nametapanayarehi ema Jesús eta macajumairahi muraca ema Lázaro. <sup>4</sup> Te máechapa ema Jesús, macahepa:

—Eta juca jumare, vahi títaimahi ema Lázaro. Matuparahaichusera me Viya, mavarairahi nímereca eta máitupajijiasirava éma, nímeresirayareva eta nítupajijiasiravahi nuti Machicha, apaesa nacunachahavi ena achaneana —macahepa.

<sup>5</sup> Jéhesare, ema Jesús yátupihi eta máemunasirahi ema Lázaro, énapa ena esenana maparapenaveana. <sup>6</sup> Váhisera mayanavanehini máimahapanahíni ema máemunacasare. Manasirichaha apinahi sache. <sup>7</sup> Tásiha, te apanapa sache, ema Jesús máichahavipa viti máimitureana:

—Viyana vichava te Judea.

<sup>8</sup> Víti vijicapapa:

—Tata maestro, cáperichaha ena ticatianacavianahi navarahahi ticapacaviana. Tásiha, puiti pivarahaichaha piyanayare ánaqui nayehe —víchapa.

<sup>9</sup> Ema Jesús máechajisihahi eta mavanecasivahi. Máichahavipa:

—Vahi táeñamavácarehini. Yátupi eta sache ticayehe doce hora. Te vipaica te sáchemuhu, vahi vicáyutetuímahi taicha vímairiricahi tayehe eta tijarahi.

<sup>10</sup> Nácanisera tipaicanahi te yátimuhu, ticayuteterejianayarehi taicha vahi náimairiricahini. Ema Tata tijaneacanuhi núti taicha nítauchahi tamutu eta mavarahaqueneana. Vahi máisapahini jácani náichanuhini; tapaenumava máimaha tiuri —macahepa.

<sup>11</sup> Tacahe, te táequenepa, macahevarepa:

—Ema vémunacasare Lázaro máenahi tímacahi. Nuyanayaresera nucajampayanayare.

<sup>12</sup> Víti víchapa:

—Tata, te tímacahipuca éma, étapa táicutiarahi eta mativareraya —víchapa ema.

<sup>13-14</sup> Víti vímijachaichucha yátupihi tímaca. Tásiha, ema Jesús matupirupa timetacahavihi:

—Tépenaipa ema Lázaro. <sup>15</sup> Núrisamuresera eta májinanuirahi eta ánaqui. Tiúripanaya eta eyehe taicha ímahaya eta níchaqueneyare apaesa esuapanu. Puiti viyanaya vímahapanayare —macahepa.

<sup>16</sup> Tacahe, ema vichamuri Tomás máichahavipa viti machamuriana:

—Viyana víti apanavare. Te nacapacapuca éma, nacapacahavirineva víti apanava —máichahavipa ema Tomás. (Tatiarihivare eta máchucarapi Chame.)

*Ena Jesús, ena téchahi eta macaechepusirayare ena náepenaqueneana, máimichavayare macaitareca*

17-18 Tiuri, viyanapa vicaijuhe eta avasarechicha Betania. (Eta Betania tachacayahí eta Jerusalén, apina kilómetro y medio eta tayerehivahi.) Tásiha, te viánehipaipa, timetacahavianapa cuátroripa sache eta náecarairahi ena Lázaroini. 19 Camurianahichahasera ena achaneana te napena ena maparapenaveana, esu Marta ésupa esu María. Nacamitisiripanahi apaesa vahi nacuiyaharacavaicha ena apinana. 20 Tacahe, te suéchapa esu Marta eta máitecapirayarehi ena Jesús, tiyanapa suácapahi. Ésusera esu María sunasirichuhi te tajuhe eta peti. 21 Te suéchajicapa esu Marta ena Jesús, sumetacapa eta máepenirahi ena suparapeini. Tásiha, suíchapa:

—Tátachicha, te pitirihinahini eta ani, vahi ñicuepenahini eñi nuparapeini. 22 Váhisera néñamava. Nucasiñavihi eta piyehe. Pímahainepa píti eta pícharacaya eta piyaseasirayare eñi Viya —suíchapa.

23 Ena Jesús majicapapa:

—Tiuri eta péñamirahi ena piparape. Váhisera picupica. Tichavayare títareca te pimirahu —máichapa.

24 Esu Marta suíchavarepa:

—Yátupi, Tata, néchahi eta ñichavirayare títareca te táitecapapa eta sáchezare náechepusiraya ena náepenaqueneana —sucahepa.

25 Ena Jesús máichavarepa:

—Jéhevare núti, nucaitarerahi nácani nucaechepureanaya. Táitusiava nu-metacavi: Nácani tisuapanuanayare, tayanapanepuca nápena, nucaitarerecayaresera núti. 26 Ene ecaheyare éti éhicanuanahi, tayanapanepuca épenayare, nútisera nucaitarecaheyare. Tásiha, tájinapa tímiapéchaimahi épenahini. ¿Pisuapanupuca eta níchiravihi? —máichapa.

27 Ésu sujicapapa:

—Nusuapavi, Tata. Pítira yátupiquenévihi Cristo, Ñichichavi eñi Viya. Pítiripa píti vicuchapaquenévihi píteruyarehi te juca apaquehe —suíchapa.

*Ena Jesús tíyaha te tachacaya eta máecari ena Lázaro*

28 Te títapiricapa eta suéchajisirahi esu Marta mayehe ena Jesús, tiyanapa suíchuhapanahi esu suparape María. Sujajaicapa, ani tacahehi eta suíchirahi:

—Eñi Maestro ñirarihi eta ani. Ñicavanairipi piyanayaréji —suíchapa.

29 Te susamapa esu María eta matiarahirahi ena Jesús, téchepurucavanepa. Tiyanavarepa suácapahi. 30 Taicha ena Jesús vuíchaha máitecapahini te napena. Manasirichuhi eta te suácapinehi esu Marta. 31 Eta náimairahi ena suchimarana eta suéchepusirahi súchusirahi esu María, tiyananapa náehieque-nehahi. Náimijachahi éna tiyanayarehi ésu te máecari ena suparapeini, tíyahapanayarehi.

32 Tacahe, te suítecapauchapa ena Jesús, esu María sutupirupa tépuyucahi te máivapechacaya. Tásiha, suíchapa:

—Tátachicha, te pitirihinahini eta ani vahi ñicuepenahini eñi nuparapeini —suíchapa.

33-35 Tásiha, tíyahapa esu María, énapa ena téhicanapahi ésu. Eta máimairahi ena Jesús eta náiyairahi, ticatisamurevavarepa éma apanavare. Tíyahavarepa. Tásiha, mayaserecapa:

—¿Táviha écarihahi? —máichapa.

Ena najicapapa:

—Yare, Tata, píamaha.

<sup>36</sup> Tacahe, ena natiarihiqueneana eta náimairahi eta máiyairahi ema Jesús, téchajicacanapa:

—Piáha. Tiyahavaréra éma apanava. Tétavicavahipucáji eta máemunasirahi —nacahepa.

<sup>37</sup> Ena apamuriana, ánivare nacahe:

—Ema maca ticaimairiricahi ema púchuqui. ¿Tájahapuca vahi macanarahini ema Lázaroinisami, apaesa vahi macuepenahini? —nacahepa.

*Eta máechepusira ema Lázaro te máecari*

<sup>38</sup> Tacahe, ichape eta macatisamurevairahi ema Jesús. Mapauchapa eta ecari nasecajueruhi te mari. Tatiarihivare eta márime tajihajacahi eta tapajacura eta ecari. <sup>39</sup> Tacahe, ema Jesús mavanecavacapa:

—Ecaerajica eta jara tachujihí eta máecari.

Ésusera esu Marta suíchapa:

—Tata, németeaca tijecheripa jácani taicha cuátrorípahi sache eta ñépenirahi —sucahepa.

<sup>40</sup> Ema Jesús máichavarepa:

—Cápachi numetacavipa, te pisuapanu yátupina, pímahayare eta macunachacarevahi ema Viya taicha nímerecaya eta tamutuirahi marataha — máichapa.

<sup>41</sup> Tacahe, nacaerajicapa eta márime. Tásiha, ema Jesús máesenicapa te anuma, tiyujaracanumapa:

—Tata, nuhasulupayachavi eta pisamiranuhi. <sup>42</sup> Váhiquene péñauchanu eta jácani nuyasearuviana. Puiti nuyaseacavi eta pítupajijiásirava, apaesa náimaha ena nani achaneana natiarihiqueneanahi, apaesa nacunachavi. Náechavare eta pítirahi pivanecanu —macahepa éma.

<sup>43</sup> Te títapiricapa eta mayujarasirahi, máimarracapa eta ecari. Tipiaracapa muraca, ánipa macahe:

—Lázaro, péchepuca eta te jara piávihahi. Yare, piúchuca —máichapa.

<sup>44</sup> Tacahe, ema máepenaquenénihí tiúchucapa. Mámapaichuhi eta máyuruhanahi étapa eta máepacamirahi. Tásiha, ema Jesús mavanecavacapa naveruruaca eta máyuruhanahi, apaesa tiyanayarepa te peti.

*Ena tuparairucana napanerechapa nacaratacayarehi ema Jesús*

*(Mt 26.1-5; Mr 14.1-2; Lc 22.1-2)*

<sup>45</sup> Tacahe, ena suchimaranahi esu María, eta náimairahi eta juca máichaquenehi ema Jesús, camurianarinehi ena tisuapanahi éma.

<sup>46</sup> Natiarihisera ena apamuriana tiyananapa nayehe ena fariséoana ticatianacahahi ema Jesús. Eta namaurisirahi eta juca, tiyanana nametapanavaca ena tuparairucana. <sup>47</sup> Tacahe, ena tuparairucana náimichuhapa namutu ena juéseana, ticurujicacanapa. Tásiha, nacahepa:

—¿Tájaha vícharacavayare, tátanaveana? Ema maena achane Jesús, tétavicavahi eta máitupajijiásiravahi máichahi eta tiáramicareana. <sup>48</sup> Vahi táuricahini vísapahini máimiyannahini máitarecahíni, machu námaturiana náehica ena achaneana, masapihainapapuca nasuapayare éma. Machu ena aquenucana romanoana náimijachinapapuca tatiarihiyare eta tíñepiyare. Tisemanainapapuca. Nárajapainapapuca eta ani. Náquipaisinahavinapapuca eta viávasa. Nasapihainapapuca tiverejichavianayare eta viávacureanahi —nacahepa.

<sup>49</sup> Matiarihíhi ema achane ticaijarehi Caifás. Émahí ema ichapequenehi tiyujaracarahi te jena áñohí. Tacahe, máichavacapa éna:



—Éti vahi ímatiequeneha eta víchararacavayare. <sup>50</sup> Németeaca núti tiúripana máepena ema émanaina achane mavachareca eta náitaresiraina namutu ena apamuriana achaneana —máichavacapa.

<sup>51</sup> Eta juca máechajiriruvahi ema Caifás, váhinéni étainahini táichahini eta máechemaraivahíni éma. Étahi eta émairahi ema ichapequenehi tiyujaracarahi te jena áñohi. Manacasamureruichuhi ema Viya eta máechajisihahi eta máepenirayare ema Jesús náichavene ena israelítana. <sup>52</sup> Étasera juca máepenirayarehi ema Jesús, mavacharecainapa eta naviurevahi namutu nácani machaneranayarehi ema Viya te apanapanenequeneana avasareana. Vahi tácarichuhini eta naviurevana ena israelítana. Taicha te táequenéna, mavarahahi macurujimurihayarehi, étamurianayarehi namutu éna.

<sup>53</sup> Tacahe, tacutipa eta napanereruhi ena tuparairucana eta nacapasi-rayare ema Jesús. <sup>54</sup> Eta tacahe, ema Jesús vaipa máimerecavahini eta te Jerusalén. Majunijicapa eta Judea. Tiyanapa eta te mávapahi apaquehe tachacaya eta avasare ticajare Efraín. Manasipanapa ánaqui, vítipa viti máimitureana.

<sup>55</sup> Tacahe, semanayare eta Pascua, vipiestara viti israelítana. Namutu ena achaneana tiávihana te apanana avasareana tiyanaracanapa tayehe eta Jerusalén. Tisipahacavanayarehi taicha náimijachahi ani tacahehi tacuija nacuquichiravaina eta náimeresiravayare me Viya. <sup>56</sup> Tacahe, ena achaneana nacunepaipahi te Jerusalén ema Jesús. Eta návihairahi te Templo, téchajiricacanaripa. Ánipa nacahe:

—¿Tájaha ecayema? ¿Títecayarepucáji ema Jesús puiti juca piéstaya? —nacahepa.

<sup>57</sup> Énaripa ena tuparairucana tivanerecanapa ena ticuneyanayare ema Jesús. Te matiarihinapuca, nametapanayarepa ena tuparairucana. Tásiha, éna náimicaratacayarepa.

## 12

### *Esu María susipapevacha ema Jesús te perfumeama (Mt 26.6-13; Mr 14.3-9)*

<sup>1</sup> Séisirinehi sache eta piéstayarehi eta Pascua. Tichavavarepa ema Jesús tayehe eta avasarechicha Betania, mávasahi ema Lázaro, ema macaechepurehi te máecari. Tacahe, ena máemunacasareana tiúrisamureanarinehi eta náimairahi eta máitecapirahi ema Jesús eta nayehe. <sup>2</sup> Ticacherujianapa náenicayarehi. Ema Lázaro macachanehi te mesa eta nanisirahi. Esu Marta téchapajiricavacahi. <sup>3</sup> Tacahe, esu María suámapaipa eta táijiyequene perfumeama te bótechicha. (Te navírare eta juca perfumeama te nasucure ticajare nardo.) Tétavicavahi eta tasivachavahi. Ticutiamacacahi te botella eta tasiavamahi. Tacahe, suépusapevachapa ema Jesús, suájapevachapa te suchutimaca. Enevanerine táinicajuecha eta peti eta táijiyevahi. <sup>4</sup> Matiarihini ema vichamuri Júlasí. Ema maca émarichu tíjararecayarehi ema Jesús. Témechajicavapa éma:

<sup>5</sup> —¿Tájaha tacayema váhivaréyapa tacaijararecasihini eta juca tasivachaquenehi perfumeama? Vivehahini eta camuriquene plata, tásiha, vímicata-sihahini ena páureana —macahepa.

<sup>6</sup> Ema maca Júlasí, vahi étainahini eta majapanuirainahini ena páureana. Étachuchanéni mavarairahi mayumuruca eta plata, taicha ema tiámerahihi. Títecapa émarichuhivare tiúnarecarahi eta plata. <sup>7</sup> Tacahe, ema Jesús máichapa:

—Pésamirica esu suca esena. Suíchachaha ésu eta suvarahaquene taicha nícumunuichuhi eta juca tayeheyarehi eta nécarí. <sup>8</sup> Ena páureana, tamutuchucha sácheana eta ecachaneravacayare éna. Te jácani ávarahapapuca ímicatacayare, nararihi ena ticamunuana. Nútisera vahi nánasiquenémahi eta eyehe —macahepa.

*Ena Lázaro, navarahavare nacapaca*

<sup>9</sup> Tacahe, camuriana ena tisamairicanahi eta matiarahirahi ema Jesús te Betania. Tiyananapa náimahapanayarehi. Énerichuvare náimahapanayarehiva ema Lázaro, ema máechepurehi te máecari. <sup>10</sup> Tacahe, ena tuparairucana napanerechavarepa nacapacayarehi ema Lázaro. <sup>11</sup> Taicha émavenehi tíchahi eta nasuapiraipahi ema Jesús ena camuriqueneana achaneana. Vaipa nasuapahini eta navanairipiana ena tuparairucana.

*Títecapapa ema Jesús te Jerusalén*

*(Mt 21.1-11; Mr 11.1-11; Lc 19.28-40)*

<sup>12</sup> Te apanapa sache, ena nani achaneana táimiyanaqueneanahi eta piéstayarehi eta Pascua, nasamairiricapa eta máitecapirayarehi ema Jesús tayehe eta avasare. <sup>13</sup> Tiúrisamureanarinehi. Eta náurisamurevahi, navehapa eta tajuru eta cáchipaca. Tiyananapa nácapahi éma. Eta napiarasirapahi, ánipa nacahe:

—¡Yare, Tata! ¡Piti yátupiquenévihi rey viyehe viti israelítana! ¡Asulupaya! ¡Piti vanáirucaquenévihi me Viya! ¡Ichape eta vicunachiravi piti! ¡Viva ema Viáquenu! ¡Viva! —nacahepa.

<sup>14</sup> Ema Jesús ticaperapahi eta burricu eta masiapirahi, taicha ene tacahehi eta táechajiriruvahi eta Sagrada Escritura: <sup>15</sup> “Eti ecavasanahi te Jerusalén, vaipa ecupica, taicha márjapa ema eyeheyare Rey. Tímaticareyarehi éma, ticaperayare eta burricuchicha. Mámapahi eta iúritaresirayare” tacahehi eta Sagrada Escritura.

<sup>16</sup> Eta juca ajureca eta vimacaicutiaraquenehi viti máimitureana. Tapaenu-mava te máechepucapa ema Jesús, vicaicutiarahi eta tacayemahi eta Sagrada Escritura, táechajisihairahi éma, étapa eta tamutu eta apamuriana máichararacavanahi.

<sup>17</sup> Tiuri puiti, ena apamuriana achaneana tímararacanaripa ema Jesús eta macaechepusirahi ema Lázaro te máecari, náechajisihairahi éna eta náimahaquenehi. <sup>18</sup> Eta tacahe, camuriqueneanahi ena achaneana tiyananahi nácapahi éma, taicha navarahahi náimati ema tíchahi eta tiáramicare. <sup>19</sup> Tásiha, eta náimairahi ena fariséoana eta camurianairahi ena tiácapanahi, náichacacapa:

—¡Váhichara víturucaimahi taicha tétavicavahi eta nasimutuvahi ena téhicanahi éma!

*Ena apavasaqueneana navarahavare náimati ema Jesús*

<sup>20</sup> Natiarshivare ena apamuriana achaneana apajuecuruhana tayehe eta Jerusalén. Énerichuhi éna tímitecanahi tiyujarapananahi te jena piéstairahi. <sup>21</sup> Tiyananapa napauchahi ema vichamuri Felipe. Ánipa tacahe eta nayaseasirahi:

—Tata, víti apanava vivaraha vímati ema Jesús —nacahepa.

<sup>22</sup> Tacahe, ema Felipe tiyanapa mametacahi ema Andrés. Tásiha, ena apinana tiyananapa nametapanahi ema Jesús. <sup>23</sup> Tásiha, ema Jesús máichavacapa:

—Jéhevare puiti, tiánehipa eta népeniraya nuti Manerejirunuhi ema Viya. Nápechavayaresera nítareca, apaesa nucunachacareyare eyehe. <sup>24</sup> Nutupiruva numetacahe: Te vahi vicuevaca eta evaraqui te apaquehe,

vahi téjapacaimahi. Tanasiyareichuhi eta tasimutuva eta evaraqui. Téhesera vévacahi, tétavicavaya eta táejapasiraya. <sup>25</sup> Nácani téñamavanahi eta náitairesira, tiávamirahuana eta náehisiranu, énajivayare ticamitiequenehavanayare eta náitairesira. Nácani tíjaracavanayare eta náehisiranuyare, tájinavare vahi náeñamavahini eta náitairesira te juca apaquehe, tiúchucuhanayare éna. Máichecuaraquireyare eta náitairesirayare. <sup>26</sup> Énerichuvare nácani tivarahanayare ticaemataneacanua, tacamunu tímerecavanayare yátupi eta náehisiranuhi. Tásiha, núti nucaejacavacayare éna te néjasihayare núti. Ena nani, tétavicavayare eta macunachirayare ema Tata.

*Éma Jesús tímereuchava eta máepeniraya*

<sup>27</sup> Éma Jesús táimipanererecahi eta máepenirayare. Ánipa macahehi eta máechajiruvahi:

—Tiánehinapa eta népeniraya. ¡Chape eta nupisirahi! ¿Tiúripuca nuyaseaca ema Tata macatiuchanuini apaesa vahi nucucatajivaini? ¡Váhiquene nuyaseacaimahi, taicha núti tímitecanuhi te juca apaquehe eta népeninavacaya ena achaneana!

<sup>28</sup> Tacahe, macahevarepa:

—Tata, pímereca eta pítupajijiásirava apaesa nacunachavi ena achaneana — macahepa.

Tásiha, tíjahúchavapa nasamahi eta mahu ema Viya te anuma. Ánipa macahe:

—Nímerecaripa eta nítupajijiásiravahi. Jéhesare, nápechavayareva nímerecayare — macahepa.

<sup>29</sup> Tacahe, ena achaneana natiarihiqueneanahi nasamahi eta máechajisirahi ema Viya. Váhisera nácaicutiarahini, náimijachaichucha tirureca. Tásiha, ena apamuriana, ángelepuca éma téchajicahi nacahevare.

<sup>30</sup> Éma Jesús máichavacapa:

—Vahi nútivenéna eta juca esamaquenehi. Éma Tata tímisamahehi, mavarairahi esuapayare. <sup>31</sup> Achichu juca sácheanayare, ticapacuanainapa ena achaneana téhicanahi ema Váinaraji. Eta nacapasiranuya, tacaviureyare namutu ena achaneana te juca apaquehe eta náicuñayare. Eta népenirayare nuvachachainapa eta nuratahairaya nucuchucuhavaca nácani ticasiñavanahi nuyehe. Téquecavanainapa eta nuyehe ena machaneranainihi ema Váinaraji. <sup>32</sup> Eta tacahe, te nacatupihanupa te anuquehe te crusu, te nacaicutiarapa ena achaneana apanapanenejiana eta nasamairirisiraya, énajivainapa tipauchanuanaya téhicanuanainapa — máichavacapa.

<sup>33</sup> Eta juca máichiravacahi ema Jesús, mavarahahi nacaicutiarayarehi eta táichararacavayarehi eta máepenira. <sup>34</sup> Tacahe, ena achaneana tisamararacanahi najicapapa éma:

—¿Tájahasica tacayema eta péchajisihahi eta pépeniraya te crusu? Viti vímijachaipahi pítiripa ema Cristo, piti Manerejiruvahi ema Viya. Víti visamahi eta Sagrada Escritura te náechajicaha máichecuaraquireyarehi eta máitairesiraya ema Cristo. Vahi vicaicutiarahini — náichapa.

<sup>35</sup> Éma Jesús máichavacapa:

—Ecamapurava esamararacanu mapurare nutiarichaha eta eyehe. Numicauchahechaha taicha ánipirine eta juca ímairanuyare apaesa vahi ecucayutete tayehe eta timapicu. Taicha nácani tájinahi náechaquenénahi, ticayutetuanayare. <sup>36</sup> Esuapanu eta juca numicauchaherichaha apaesa ímiturecaya éti apanava, íamayare eta juca tajarahiquene — máichapa.

Te títapiricapa ema Jesús eta máichiravacahi, tiyanapa majunijimurihapa. Vaipa máimerecavahini eta nayehe.

*Tétavicava eta namuracasamurevanahi ena ticavasanahi te Jerusalén*

<sup>37</sup> Ichapemurihi eta náimairahi ena ticavasanahi te Jerusalén eta tiáramicareana máichaqueneanahi ema Jesús, váhiquenesera nasuapahini éna. <sup>38-39</sup> Étahisera tacahehi títauchavayarehi eta májuchaqueneanahi te ajureca ema profetaini Isaías tayehe eta tamuracavahi eta namasuapirayare. Ani tacahehi eta táechajiriruvahi: “Tata Viáquenu, nájina ticaicutiaranaina eta péchajiriruvanahi vímiturapianahi víti. Píti pímerocaripahi eta pítupajijiasiravahi, váhiquenesera nasuapavihini”.

Énerichuvare ani tacahehi eta májuchaqueneanahi ema Isaías: <sup>40</sup> “Ema Viya, eta máimairahi eta namuracasamurevanahi, máisapahi tiápajucava eta namasuapajirairavahi, tímicitijiricavahi púchuquiana éna. Váhiquene tétupirismurechavanaimahi. Váhivare navarahaimahi nacasiñavahini me Viya, apaesa macanaracavacahini” tacahehi eta májuchaquenehi ema víyahaini Isaías. <sup>41</sup> (Ema profetaini Isaías, tiáramecachi eta máimairahi te mavapure eta táetavisiraya eta majaraiva ema Cristo, étapa eta masantuvahi eta te máejasihahi.)

<sup>42</sup> Nararihihisera ena aquenucarohana tinerejicavanaripahi ena tisuapanahi. Váhisera návarahahini náimerecavahini eta náehisirahi, napisirahi nacaquijihini eta te návacureana. <sup>43</sup> Taicha étachucha náuricahi eta nacunachacarevahi nayehe ena nachamuriana, ena fariséona. Tasapihaichucha náepuruhi eta nacunachacarevayahini me Viya.

*Tímicuñarahi te vahi visuapa eta máechajiriruvana ema Jesús*

<sup>44</sup> Ema Jesús tijaranupa eta máechajisiravacahi ena achaneana. Máichavacapa:

—Nácani navarahahi tisuapanuana, tímaticareanaripa eta nasuapirahivare ema Tata, ema tivanecanuhi. <sup>45</sup> Tacutiquene nácani tímatinuanahi eta nímiturapiana, náimatipahivare eta mapanereruana ema Tata. <sup>46</sup> Taicha núti yátupiquenénuhi eta numicauchiravacahi ena téhicanuanahi te juca apaquehe. Váipasera tavehaimahi eta timapicu. <sup>47-48</sup> Tacutiquene núti, vahi étaina táimitecanuhini te juca apaquehe eta nícuñacahehinehi eti achaneana. Eta tímitecanuhi, nucuchucuhaheyarehi. Nácanisera nasamairiricaripahinénuhi eta néchajiriruvana, váhisera nasuapanuhini, nasapiha tépurunuanahi, muracayarehi eta náicuñayare. Eta náepuruirahi eta néchajiriruvana, étaripa tiviuchavacainapa te jena sáchezare nacayaseserehipa te mamirahu ema Viya. <sup>49</sup> Taicha vahi nútijiriruvainahini eta nímituresirahi. Ema Tata tivanecanuhi, éma tíjaracanuhi eta nímiturapianayarehi. <sup>50</sup> Eta tacahe, numetacahehi puiti tamutu eta numetacasivanahi. Vahi nuhapapicaimahi, taicha nímatihitacaitarecayarehi nácani tisuapanahi eta máimiturapiana ema Tata — macahepa.

## 13

*Ema Jesús, masipapevachavacapa ena máimitureana*

<sup>1</sup> Tiuri, te jena sácheanahi tamirahupaipahi eta Pascua, ema Jesús máecharipa táitecapauchayarepa eta majunijisirayarehi eta juca apaquehe. Tiyamayarepa mayehe ema Maiya. Tétavicavahi eta máemunasirahavihi viti máimitureana. <sup>2-4</sup> Jéhesare ema Júlasí, máimipanerecharipa ema Váinaraji eta máíjararesirayarehi ema Jesús. Émasera ema Jesús, máecharipa eta machavirayarepa mayehe ema Maiya taicha eta másinehi. Émarichuhi ema Maiya tíjaracahi eta tamutuirayarehi máituruequeneha. Tacahe, te

jena yati, eta máenisirahavihi viti máimitureana, téchepucapa ema Jesús. Tivejamuhiacavapa eta mamuiriha. Tiáyuruñequechavapa te mayehe paño.  
<sup>5</sup> Tásiha, majucuhapa eta une te bañadora. Tépanavapa tisipapevachahavihi eta vívapeana viti máimitureana. Mavehavarepa eta paño, tiájapevachahavipa.

<sup>6</sup> Tásiha, te macapayacapa ema Pedro, éma vahi máisapavahini eta masipapevachira eta máivape. Máichapa:

—Tata maestro, vahi táurica eta pisipapevachiranuhini núti —macahepa.

<sup>7</sup> Tásiha, ema Jesús majicapapa:

—Páuresamivihi píti. Vuíchaha picaicutiarahini eta tacayemaqueneanahi eta juca. Achichuinapasera picaicutiarainapa.

<sup>8</sup> Ema Pedro máichavarepa:

—Nútisera, vahi pisipapevachanuimahi.

Ema Jesús máichavarepa:

—Te vahi nucusipapevachavi, vaipa pítiparacaimahi eta nuyehe.

<sup>9</sup> Tacahe, ema Pedro máichapa:

—Tata, vahi tácarichuimahi pisipaca eta nívapeana. Énerichuvare eta nuvahuana étapa juca nuchuti.

<sup>10</sup> Tásiha, máichavarepa ema Jesús:

—Nácani nacaviravahi vahi tácomesaimahi tiápechavana ticasipana. Tacarichu ticasipayarehi eta náivapeana. Éti, epachihavacaripa; váhisera ámutuhini epachihahini —máichapa.

<sup>11</sup> Ema Jesús máichahavihi eta juca vahi vámutuhini vipachihahini taicha máimatihí ema tíjararecayarehi.

<sup>12</sup> Te títavapa eta masipapevachirahavihi, ticamuirihavarepa eta mamuiriha. Tásiha, téjacapa te mesa. Máichahavipa:

—¿Ímatiequenehapuca éti eta juca níchirahéhi? <sup>13</sup> Eti ímijarechanu “Tata Maestro”. Étipicahisera, taicha yátupiquenénuhi eta numaestravahi. <sup>14</sup> Eta níchirahéhi núti emaestro nusipapevachirahéhi, ene ecaheyare éti eta ítare-siraya. Esipapevachacayare eta ívapeana. <sup>15</sup> Éhicayare eta juca níchaquenehi. Étayareichu eta nímitusirahéhi. <sup>16</sup> Nutupiruva numetacahe: Ema musu vahi macachuricaímahi ema máquenu. Émaripa ema vanairucahi váhivare macachuricaímahi ema tivanecahi. <sup>17</sup> Te yátupina ecaravahuinapa eta juca nímiturapiana, tájina íchiravaimahi. Ecnachacareyareva eta ítauchiraya tamutu.

<sup>18</sup> Néchahinéni núti vahi ámutuhini esuapanu. Nímatihéhvare eti yátupiqueneana nunerejiruanahi. Títauchavayarehisera eta táechajiriruvahi eta Sagrada Escritura, ani tacahehi: “Ema néniruasahi, masapihahi ticatiana-canuhi”. <sup>19</sup> Puiti nucaínapucava numetacahe apaesa te táítauchavapa eta juca numetarapi, ímatinuínapa nuti yátupiquenénuhi Cristo. <sup>20</sup> Nutupiruva numetacahe: Nácani tijacapaheanayare éti nuvaneruana, ticaecheranahi eta najacapiranuhi núti apana. Énerichuvare, najacapahivare ema Tata Nucaiya quene.

*Ema Jesús máechajisíha eta máijararesirayare ema Júlasí  
 (Mt 26.20-25; Mr 14.17-21; Lc 22.21-23)*

<sup>21</sup> Te títapiricapa eta máichirahavihi ema Jesús, téñamavaípa te masamure eta máijararesirayarehi ema émana vichamurihi. Tacahe, matupiruvapa máichahavihi:

—Nutupiruva numetacahe: Mararihi ani te etaracu ema tíjararecanuyare —macahepa.



<sup>22</sup> Tacahe, viáramecarinehi eta máichirahavihi. Véseniuquijiricacapa. Vahi vímatihini nájahahipuca ema máichaquenehi. <sup>23</sup> Nutiarhisera nuti nachamuri máemunarupananuhi ema Jesús. Nucachacayahi éma eta véjasirahi te mesa. <sup>24</sup> Tacahe, ema Pedro tiúmatsiuquichanupa nuyaserecahini nájahahipuca ema máichaquenehi ema Jesús. <sup>25</sup> Tásiha, núti nujajaicapa ema Jesús:

—Tata, ¿nájahasica ema píchahi?

<sup>26</sup> Tásiha, tijicapanupa:

—Nuyuvetumecaya eta pan, néchipaejicaya. Ema níjararuyare, émara ema tíjararecanuyare —macahepa.

Tacahe, máechipaejicapa eta pan, máijaracapa ema Júlasí. <sup>27</sup> Jéhesaréinehi, ema Váinaraji enevanepa mávahácahi éma. Tásiha, ema Jesús máichavanepa:

—Júlasí, eta juca pipanereruhi, táitachavavanepa puítinaichu —máichapa.

<sup>28</sup> Váhisera vácaicutiarahini eta juca máichirahi ema Jesús ema Júlasí. <sup>29</sup> Vímjachahichucha eta mavacharesirayarehivare eta tinicacare tayeheyare eta piesta, mácajihivarepucaini ena páureana, taicha émahí técha eta tarera máunasirarehi eta plata eta matesorerovahi. <sup>30</sup> Te títanésipa ema Júlasí eta manisirahi eta pan, tiyanapa tiúchucahi. Tijunijicahavipa te jena yátiquenehi.

### *EMA JESÚS MACAVANAIRIPIPA ETA VÉMUNASIRACACAYARE*

<sup>31</sup> Eta máuchusiraipa ema Júlasí eta viyehe, ema Jesús máichahavipa:

—Títecapapa puiti eta táitachiravayare ímahainapa éti eta máitupajijiasirava ema Viya étapa eta nítupajijiasiravayare núti Manerejirunuhi éma. Éti ecunachahavinapa. <sup>32</sup> Nímerecainapa eta máitupajijiasiravahi ema Tata, ema apana máimerecayareva eta nítupajijiasiravahi nuti Machicha. Puiti juca sácheanayare títauchavainapa. <sup>33</sup> Nuchichanaveana, ánipirine eta juca ecachaneranuyare. Tásiha, nuyanainapa. Éti, etanucanuinapa; vuíchahasera ítuji-cavaimahi ecapayacanu. Étarichuhi eta numetarapihi nayehe ena ticatianacanuana eta níchiravacahi vahi títuji-cavanaimahi ticapayacanuana. <sup>34</sup> Puiti nunaquicayare eta juca arairu nuvanairipi eta eyehe. Émunacacayarehi ena echamuriana. Ecutinuyarehi eta némunasiráhehi núti. Ene ecaheyare éti apanavare. <sup>35</sup> Te yátupina émunacaca, eta tímatiacahanayare ena achaneana étirahi eti nímitureanahi —máichahavipa.

### *EMA JESÚS MÁIMEREUCHA EMA PEDRO ETA MÁEPIYASIRAVAYA VAHI MÁIMATI EMA JESÚS*

*(Mt 26.31-35; Mr 14.27-31; Lc 22.31-34)*

<sup>36</sup> Tásiha, ema Pedro mayaserecapa:

—Tata Maestro, ¿távihainapa picaijuheya?

Ema Jesús majicapavarepa:

—Eta nucaijuheya puiti, éti vuíchaha ítuji-cavaimahi éhicanu. Ecapayacanu-yaresera. Váhivare ánasimahi éti. Vuíchahasera tíjahúchavaimahi —máichapa.

<sup>37</sup> Ema Pedro majicapavarepa:

—¿Tájaha tacuichavaini vahi nucuratahahini néhicavi, Tata? Núti níjaracava népena píchavenénahi píti —máichapa.

<sup>38</sup> Tacahe, ema Jesús máichapa:

—Píti, pími-jachavapuca píjaracava pépena eta picatiuchiranuya. Numetacavisera: Puiti juca yati, te tamirahuinarichaha eta táechajisiraya eta varayu te tijararahi, píti mapaheyare pépiyacavayare vahi pímatinu, eta picatiuchiravayarehi píti —máichapa.

## 14

### *Éma Jesús, jéhevare éma téhicacare eta vítecapiraya me Viya*

<sup>1</sup> Vahi ecueñamava éti. Ácasiñava eta me Viya; ácasiñavavare eta nuyehe. <sup>2</sup> Taicha ánaqui te mávasa éma Tata, camuri eta tiáviravacare iávihayare éti, taicha ícuchihi éti. Tacahe, tatuparacahi nuyanayare nétupiricayare eta iávihayare. <sup>3</sup> Te táuripa eta iávihayare, nútijapainavarepa nuchavainapa népanahénapa apaesa ácachanenu éti tayehe eta návihayare nútí. <sup>4</sup> Eti ímatiripa eta nucaijuheya. Ímatipahivare eta achene nuyanihayare.

<sup>5</sup> Tásiha, éma Tomás majicapapa:

—Tata, váhira vímati távihapuca eta picaijuheyare; váhivare vímati eta achene piyanihayare —macahepa.

<sup>6</sup> Éma Jesús majicapavarepa:

—Nútira néhicacare. Nútirichuva nuti yátupiquenénuhi. Nútivare nucaitarerahi, nájina apanaina ácasiñaimahi eta ítecapirayare me Tata. <sup>7</sup> Eta ímatiranuipa nútí, ímatiripahivare éma Tata, taicha ímahanuripa puiti eta juca nuchachanérahehi —macahepa.

<sup>8</sup> Éma Felipe máichapa:

—Tata, pímechahavipaini éma Viya apaesa viúrisamurepaini eta vímatirainahini.

<sup>9</sup> Éma Jesús majicapavarepa:

—Ánaquiaparipa eta picachaneranuhi, piti Felipe, vuíchahacaruvare pímatinu. Eti ímahanuripahi, ímatinuijavare yátupihí. Tímicutijiricavaipahi émainahini ímararacahini éma Tata. ¿Tájaha tacayema pivarahaichahavare nímechavi éma Tata? <sup>10</sup> ¿Váhipuca pisuapanuhi eta mávahásiranuhi éma Tata, tásiha, étapa eta návahásirahivare nútí apanava? Eta juca nucayemaqueneanahi, vahi nuvehaqueneanaina te nuchuti. Étara eta mávahásiranuhi éma Tata, títauchavahi eta mavarahaqueneanahi. <sup>11</sup> Esuapanu eta návahásirahi nútí éma Tata, étapa eta mávahásiranuhivare éma. Te vuíchahapuca esuapanuhini eta numetarapi, étavanerécainaséra esuapa eta tiáramicareanahi níchaqueneanahi. <sup>12</sup> Nutupiruva numetacahe: Nuyanainapa eta me Tata. Eta tacahe, éti yátupi eta esuapiranuhi, nítivahe éti. Níjaracahe eta eratahairaya ecuchuca eta tiáramicareana, ecutinuyare. Níjaracahevare eta eratahairaya ímitupirucha eta náchanevana ena achaneana. Jéhesare, eta juca tiápajupanavayare eta tacunachacareva tayehe eta tiáramicareana íchaqueneanayare. <sup>13-14</sup> Nútí níjaracaheyareva tamutu jácani eyasearunuanayare te níjare, taicha nuvaraha ichape eta ecunachirayare éma Tata.

### *Éma Jesús macametarapi eta máucupaisiraya éma Espíritu Santo*

<sup>15</sup> Eta esuapiranuhi tímereuchaheya eta yátupirahi eta émunasiranuhi. <sup>16</sup> Tásiha, nútí nuyaseacainapa éma Tata máevataca éma Espíritu Santo. Éma, tímicatacaheyare, ticurismurechaheyareva. Yátupiquenevare eta mávahásiraheyare eta ítaresirayare. Vahi tínajiacahémahi. <sup>17</sup> Éma, tímitucaheyare, máitametacayare tamutu eta yátupiqueneanahi tásihaqueneana eta me Tata. Énasera ena achaneana, vahi ticaijaracasianaimahi, taicha vahi návarahahini najacpahini éma. Eta namaratahairahi náimaha éma, náimijachahi vahi máimaticarehíni éma. Étisera ímatiyare éma, taicha máitavacacayare eta mávahásiraheyare. <sup>18</sup> Nútí, váhivare nujunijiacahémahi. Nuchavayare eyehe, ecachanenuyareva. <sup>19</sup> Puiti juca sácheanayare, ena achaneana vaipa tímahanuanaimahi. Étisera ímahanuparacaya, taicha nuchavayarehi

nítareca. Éti apanavare ítarecayareva nícha núti. <sup>20</sup> Te nuchavapa nítareca, échavainapa éti eta mávahásiranuhi ema Tata, échavainavarepa eta návahásirahevare núti, éti apana iávahácanuhivare. <sup>21</sup> Nácani náimatiyare eta nuvanairipiana, náitauchayareva, éta tímicaecherachayare eta yátupihí eta náemunasiranuhi. Tásiha, ichapeyare eta namunavayare me Tata táichavenénahi eta náemunasiranuhi. Núti apanavare ichapeyareva eta némunasiravacayare. Tásiha, nímercavayareva nayehe —macahepa.

<sup>22</sup> Ema Tadeo máichapa:

—¿Táicharacavayare, Tata, eta vicarichuirayare pímercava eta viyehe; tásiha, ena apamuriana achaneana, vaipa tímahavianaimahi? —macahepa.

<sup>23</sup> Tacahe, ema Jesús majicapapa:

—Nácani témunacanuanayare, nasuapayare eta nuvanairipianahi. Tásiha, ema Tata, tétavicavayarehi eta máemunasiravacaya. Tásiha, vítijapainapa viávahácavacayare éna. <sup>24</sup> Nácánisera vahi témunacanuanaimahi, váhivare nasuapaimahi eta nuvanairipiana. Eta juca esamaqueneanahi puiti, vahi tásihaquenenahini te nuchuti. Tásihaquenehi me Tata, ema tivanecanuhi.

<sup>25</sup> Nucamapurava numetacahe puiti taicha ánipirine eta juca nucaheyare eta eyehe. <sup>26</sup> Émasera ema Espíritu Santo mavaneruyare ema Tata níchavenénahi núti, ema tímicatacaheyare, ticurisamurechaheyareva. Énerichu tímitucaheyare, témechaheyare tamutu eta juca numetarapiana eyehe.

<sup>27</sup> Puiti nucametavaya eta eyehe. Nuvarahasera tacuijahini íchiravainahini, ecanarasiraina eta epanereruana. Núti vahi nácutinuhini ena apamuriana achaneana eta nujunijisiraheya. Vahi ecuvayuchava eta éñamavairaina. Váhivare ecupica. <sup>28</sup> Puiti numetacahepa eta nuyanirayare; tásiha, étapa eta nuchavirayare eta eyehe. Eta tacahe, te yátupina émunacanu, evapinavayarehi nuyehe núti eta nuchavirainapa mayehe ema Tata, nápechavaya nucachane éma tayehe eta máetaviuchirahi eta majaraivahi étapa eta máitupajijiasirava. <sup>29</sup> Nucametarapivane eta juca, apaesa te ímaha táitauchavapa, esuapainapa yátupi.

<sup>30</sup> Ánipirine puiti eta juca néchajirisiravahi eta eyehe taicha ávanepaipa títecapa ema Váinaraji eta mavarairahi tíaquipaicanuyare. Éma, yátupihí táquenuhi eta juca apaquehe. Váhiquenesera títahacanuimahi núti. <sup>31</sup> Nuvarahasera náimatiya ena achaneana eta némunasirahi yátupi ema Tata; tásiha, nítauchaparacahi tamutu eta mavanairipiana. Échepuca. Viyana viyejecava eta te juca —máichahavipa.

## 15

### *Eta táenaqui eta uva étapa eta tasimutuquene eta tatavavajiana*

<sup>1</sup> Núti nucutihi eta sucureca uva. Étiripa éti ecuti eta tatavana. Ema ticachichanu tímicutijiricavahi ema tijaneacahi eta sucureca. <sup>2</sup> Éma máechuca eta máhiriquerehi tatava. Máepachiacavare eta apana tatava eta ticahirisi apaesa tacahipana. <sup>3</sup> Eti epachihavacaipahi taicha eta nímiturapiana emetacasilanahi. <sup>4</sup> Eta tacahe, ímiyanavayare eta iúrujiasiranuyare taicha eta návahásirahehi núti, apaesa ácuti eta tatava ticahiriqui. Taicha te viyvetuca eta tatava eta uva, vaipa ticahimahi. Ene ecahehi éti, te vahi ecuimiyana iúrujiacanu, tájina vaipa ecaemataneacanuimahi.

<sup>5</sup> Nápechava nímicutichinahe puiti. Núti nucutihi eta táenaquihi. Éti tímicutijiricavahi nutavahehi. Te ímiyanava iúrujiacanu, ichapemuriyarehi eta ecaemataneasiranuya. Téhesera ácarichu éti, tájina eratahaquenémahi ícha. <sup>6</sup> Nácani

tijunijiacanuanayare, ticutianayare te ticaechu eta tatava. Tiájiquiyarehi. Tásiha, nacurujicainapa, náijuchainapa te yucu.

<sup>7</sup> Ímiyanava yátupina eta iúrujasiranu. Yátupinavare eta itauchiraina eta nímiturapiana. Tásiha, te eyaseacanupuca jácani evarahaqueneanahi, núti níjaracaheya. <sup>8</sup> Nuvaraha ímerezavaya eta táurivayare eta ecaemataneasiranu, apaesa tétavicavainapa eta macunachacarevaya ema Tata. Tásiha, ecaecheraipahi eta yátupirahi nímiturehe. <sup>9</sup> Ímiyanava eta iávahásiranu taicha tétavicavahi eta némunasirahehi tacuti eta máemunasiranuhi ema Tata. <sup>10</sup> Eta ímiyanirava itauchapaipa eta nuvanairipiana, tijurucapaipa eta ímatirahi eta némunasirahehi. Tacuti eta nítauchirahi núti eta mavanairipiana ema Tata, nímatipaipa eta máemunasiranuhi éma. <sup>11</sup> Eta juca nímicutiarachirahi, nuvaraha íápajuca eta iúrisamurevahi tásihaquenehi eta iávahásiranuhi núti. Ecutinuya eta núrismurevahi. <sup>12</sup> Nápechahe numetacahe eta juca nuvanairipi eta eyehe: Yátupina eta émunasiracacaina. Ácutinu eta némunasirahehi núti. <sup>13</sup> Ena achaneana, te navarahahi náimerecaya eta náemunasirahi nácani náemunaruanahi, natanucayarehi náíjaracasicha. Nácani tíjararecavanapuca eta náepenirahi énavenehi ena náemunacasareana, éna yátupihi náimereca eta náemunasirahi. Ene nucahehi núti, níjararecavayare eta népeniraya íchavene eti némunacasareanahi. <sup>14</sup> Jéhevare, éti yátupiquenehi némunacasareanahi, eta itauchirahi eta nuvanairipianahi. <sup>15</sup> Vahi vánaracahéna nuyehe, taicha ena vanaracanahi vahi náimatimahi eta mapanereruanahi ema náquenu. Étiserá némunacasareanahi. Eta tacahe, numetacahe tamutu eta mapanereruana ema Tata. <sup>16</sup> Vahi étinahini enerejicanuhini eta éhisiranuhi. Núti nunerejicahehi. Puiti nutuparacahe, nuvaraha táuri eta ecaemataneasiranu eta epaisiraya eta ecametarairuirayare. Nuvaraha ecajimuyacahini ena achaneana náehicanuhini. Yátupina eta ímitusiraina apaesa náimiyanava eta náehisiranuhi. Tásiha, ema Tata tíjaracaheyare tamutu eta eyasearuanayare te níjare. <sup>17</sup> Nuvaraha itaucha eta juca nuvanairipiana. Yátupina émunacaca.

*Ena achaneana ticianacaheanayare tacutiyare eta nactianasiranuhi núti*

<sup>18</sup> Puiti numetacahevare, te nactianacahe ena achaneana, échavayare éti vahi étinahini nactianaca. Núti nactianacahi. <sup>19</sup> Taicha, te étainaichahini iávacuhahini eta tayeherepiana eta apaquehe, ena achaneana témunacaheanaripahini, tacutihini eta náemunajirisiracacahi éna. Étasera eta nunerejisirahehi te nataracu ena achaneana, étapa tiviuchahehi eta nactianasirahehi taicha ínajicaipa eta máeperajiquene tayehe eta apaquehe. <sup>20</sup> Échavavare eta juca numetaruhehi: “Vahi másapihaimahi ticaemunacasi ema musu mayehe ema máquenuhi”. Núti ticianacanuanahi; ene ecaheyarehi éti, eta nactianasiraheyareva. Vahi nasuapahini eta nímiturapiana. Váhivare nasuapaimahi eta ímiturapiana éti apanava. <sup>21</sup> Eta éhisiranuhi núti, étaripa tiviuchaheyare tamutu eta juca nactianasiraheinapa táichavenehi vahi náimatihini ema Tata tivanecanuhi.

<sup>22</sup> Tacuijarichuhipucaini naviurevainahini éna, te vahi nucuitechahini eta nímitusiravacahini. Tépurunuanahiséra, náepuruhivare eta nímiturapiana; tásiha, tétavicavahi eta naviurevanahi. <sup>23</sup> Taicha nácani ticatichanuanahi núti, nactianacahivare ema Tata. <sup>24</sup> Énerichuvare tacuijahini taviuchavacahini te vahi nucuimerecachini eta tíamicareana níchaqueneanahi. Mamaratahaquenehi máichahini mácani apana achane tacutihini eta níchaqueneanahi núti. Étasera náimaharipahi, váhiquenesera nasuapahini. Nasapiha ticianacanuanarichucha, nactianacahivare ema Tata. <sup>25</sup> Étasera

tacaheyarehi eta táitachiravayarehi eta táechajiriruvana eta Sagrada Escritura te Salmo, ani tacahehi: “Tájina taviuchanuhini eta nacatianasiranuhi”.

<sup>26</sup> Étiserá, mararihiyare ema tímícatacaheyare, ticurísamurechaheyareva. Te nítecapauchayarepa ema Tata, nuyaseacaya mavaneca ema Espírítu Santo. Éma, te máítecapapa, tímereuchaheyare eta yátupiqueneana. Tímereuchanuyareva núti eta eyehe. <sup>27</sup> Éti apanavare ímereuchanuyareva taicha tiyereripahi eta ecachaneranuhi, tépanavapa te nunérejicahénapa.

## 16

<sup>1</sup> Núti numetacahe eta juca apaesa vahi ecuarami eta nacatianasirahe, váhivare ecuinajicava eta éhisiranuhi. <sup>2</sup> Taicha tiáquijicaheanayare tayehe eta viúrujisirarevana. Énerichuvare navarahayare ticapacaheana. Éna, náimijachayarehi tiúriyarehi eta náichirayare te mamirahu ema Viya. <sup>3</sup> Éna, náichayare eta juca táichavene eta namáimatirahi ema Tata, váhivare náimatinuhini núti. <sup>4</sup> Numetacahe eta juca apaesa te táítecapapa eta íchavaquenevaya, vaipa ecuarameca. Échainapa eta numetasirahehi.

### *Ema Espírítu Santo tímícatacahavihi*

<sup>5</sup> Puiti tiánehinapa eta nuyaniraya nuchava eta me Tata. Eta nucachaneirahehi, ticatianacanuanahi núti ena achaneana. Puítiserá eta májinairanuyare, ticatianacaheanainapa éti. Eta juca tacahehi, nupaenumava numetacahehi puiti. Étiserá németeaca vuíchaha ecaicutiara eta numetarapi, taicha váhivare eyaserecanuhini eta nítametasirayare, étahinéni eta nucaijuhayare. <sup>6</sup> Esapihá éti ecatisamurevahí taicha eta juca numetasirahehi eta nuyaniraya. <sup>7</sup> Tayanapane vahi eyaserecanuhini, nutupiruvasea numetacahe: Tatuparacahi eta nuyaniraya nuchava mayehe ema Tata, taicha te vahi nucuyana, vahi títecaimahi ema nuvaneruya. Éma tiúrichaheyare, tímícatacaheyare, ticurísamurechaheyareva. <sup>8</sup> Énerichuvare ena achaneana te juca apaquehe, manacasamurechaya eta nacatuparahairahi náichayarehi eta táuriqueneana, náehicanuvare núti. Manacasamurechavacayareva éna eta náimatiraina eta nasipeaturaravahi. Taicha te vahi nacuvaraha náinajica eta tauriqueneana, téhevare vahi nacuvaraha náehicanu núti, ticaicunainapa te yucu. <sup>9-10</sup> Ema Espírítu Santo manacasamurechavacayare ena achaneana eta najacapacarevaya me Tata nácani ticasíñavanapuca eta nuyehe, taicha nuyanaya eta me Tata, néchajiuchavacayare éna. (Vaipa ímahanuimahi éti.) Nácaniserá vahi nasuapanuhini núti, tanasiquenehi eta napecaturanahi. <sup>11</sup> Manacasamurechavacayareva ema Espírítu Santo eta yátupina táiturevayare éna eta máicuñayare ema Váinaraji náehiruhi te juca apaquehe. Éna apanava náepujuquichainapa tayehe eta yucu infierno.

<sup>12</sup> Maverachahaneni eta juca nuvarahaqueneanahi numetacahe. Váhisera eratahaimahi ecaicutiara puiti. <sup>13</sup> Téhesera máítecapapa ema Espírítu Santo, éma tiámayarepahi eta yátupiqueneana numaimitureheanarichaá, émainapa tímitucaheyare. Taicha mametacasivahi eta máechajisiraheyare, énerichuvare timetacaheyareva eta íchavaquenévanayare. <sup>14</sup> Ichapenapa eta nucunachacarevayare máicha. Émainapa timetacaheyare eta nuvanairipianayarehi eyehe. <sup>15</sup> Taicha ema Tata tituparacanuhi eta nútirayarehi nécha tamutu. Eta tacahe, eta juca mametarapianayare ema Espírítu Santo tásihaqueneanayare nuyehe.

*Vahi tánasimahi ecatisamureva. Tichavayare eta iúrisamurevaya*



<sup>16</sup> Ánipiyareichusera eta emaimairanuyare. Téhesera táequenénapa, iápechavainavarepa ímahanuyare. Taicha nuyanayarepa te mávihahi ema Tata.

<sup>17-18</sup> Tacahe ena apamuriana nuchamuriana tiyaserecanuana:

—¿Tájahapuca tacayema eta juca mametarapihi, eta macahehi ánipirine eta vimaimarayare, tásiha, te táequenénapa viápechavainavarepa vímaha? ¿Tichavavanepuca eta mayanirayare eta me Maiya? ¿Váhipuca mánasimahi eta machaviraya? Váipavare vácaicutiara eta ánipirine eta macaheyare eta viyehe —nacahepa.

<sup>19</sup> Ema Jesús macaicutiaravacahi eta navarairahi nayasereca. Máichavacapa:

—Núti numetacahehi eta ánipirine eta emaimairanuyare. Tásiha, te táequenénapa eta emaimairanuyare, iápechavainavarepa ímahanuya. Eta juca emacaicutiaraquenehi. <sup>20</sup> Tásiha puiti, nutupiruva numetacahe eta íyahairainasamipa éti, ejapanuvairayareva. Énaser ena apamuriana achaneana, tiúrisamureanainapa éna. Tásihasera te táequenénapa, vaipa íyahaimahi. Tétavicasera eta iúrisamurevainapa eta táitsivaya. <sup>21</sup> Eta juca tímicutijiricavahi te tínacayare esu esena. Ánipichuhi eta sucatiruhavahi taicha eta suínasirayarehi. Téhesera te tamutupa eta suínasirahi, suémitisicainapa eta sucatiruhavainihi. Tiúrisamuréinapa eta suímairahi eta suchicha, tajurusirayarehi te juca apaquehe. <sup>22</sup> Ene ecaheya éti, ecatisamurehi puiti, ánipirichusera. Téhesera te viápechava vímahacacaya, tétavica eta iúrisamurevaya. Nájinainavarepa tihapapicahémahi eta iúrisamureva.

<sup>23</sup> Te jena sáchezare, vahi nútimahi eyaserecanu. Émasera ema Tata eyaserecayarehi. Éma, tíjaracaheyarehi tamutu jácani eyasearuanayare te níjare. <sup>24</sup> Puíticha tájinaichaha eyasearapinahini me Tata te níjare. Ticamunucarehi eyaseacayare. Éma tíjaracahénapa. Étainapa ticurismurerecaheyare ichape.

### *Numetacahe eta nucapaquechiravacayare ena nánaranayare*

<sup>25</sup> Núti nímicutichinahehi eta juca numetasirahehi. Téhesera te táequenénapa, nutupiruvainapa numetacaheyare eta yátupiqueneana mapanereruanahi ema Tata. <sup>26</sup> Te jena sache, eyaseacainapa ema Tata te níjare. Váipayare tacamunuimahi nuyaseuchahe eta mayehe. <sup>27</sup> Taicha émaripa ema Tata témunacahehi éti, táichavénehi eta émunasiranuhivare nútí. Éti esuaparipa eta yátupirahi eta mavanésiranuhi ema Tata. Tíjaracahénavanepa eta eyasearuanayare. <sup>28</sup> Núti, eta násihahi mayehe eta nítesirahi te juca apaquehe. Puítisera nujunijicainavarepa eta apaquehe, nuchavainavarepa mayehe ema Tata —máichahavipa.

<sup>29</sup> Tacahe, viti máimitureana víchapa:

—Jéhevare puiti pitupiruvapa eta péchajisihahi. Vaipa pímicutiarchinahávihi. <sup>30</sup> Vímativarepa eta yátupirahi pímatiequeneha tamutu. Jéhesare, pímatiequeneha tamutu eta vipanereruana, étaripa eta juca vivarairahi viyaserecaviyare. Visuaparipa puiti eta yátupiquenéravihi Machichavi ema Viya —víchapa.

<sup>31</sup> Tacahe, ema Jesús máichahavipa:

—Jéhepuca eta esuapiranu puiti. <sup>32</sup> Puítisera juca yati, títecapainapa eta éjanerepáisirayare éti. Ejunijicanuinapa, nucarichuinapa nútí. Matiarhiyaresera ema Tata. Éma, ticachanenuyare. <sup>33</sup> Numetacahevare tamutu eta juca apaesa vahi ecuarameca. Ácasiñava yátupina nuyehe apaesa tacuija

ecuichiravaina, tayanapane ecatajivayare muraca te juca apaquehe. Ácasiñavahisera eta nuyehe, taicha núti máijjararunuhi ema Tata eta nucapaquemurihairayare namutu ena nánaranahi —máichahavipa.

## 17

*Eta mayujarasirahi ema Jesús, mayaseuchavacahi me Maiya eta náurivaina ena máimitureana*

<sup>1</sup> Te títapiricapa ema Jesús eta máechajisirahavihi viti máimitureana, tépanavapa tiyujaracahi. Máesenicapa te anuma. Ánipa macahe:

—Tata Nucaiyaquene, títecapauchanupa puiti eta táitauchiravayare eta pipanereruana. Nuvarahasera nuncunachacaréni eta piyehe, tácutini eta nuncunachiravihi píti. <sup>2</sup> Yátupihí eta píjarasiranuhi eta aquenucairanuyare, te namirahu namutu ena achaneana. Nucaitairesirayarehivare namutu ena píchuhaqueneanahi píjararunuanahi. <sup>3</sup> Níjaracayare eta náitairesirayare máichecuaraquireyare ena píjararunuanayare apaesa náimativi, píti Tata yátupiquenévihi Viya, nútipa núti Jesucristo, núti pivanerunuhi te juca apaquehe. <sup>4</sup> Núti nímerecahi ne achaneana eta picunachacarevahi. Nítauchaipahi tamutu eta pivanairipianahi pivarahaquenehi níchayarehi. <sup>5</sup> Puítisera nuchavainavarepa eta piyehe. Píjaracanuyare eta nuchavirayare te pijaraivahi. Néjacainavarepa te pivaure tayehe eta návinehi acane te tépanavainapa eta apaquehe.

<sup>6</sup> Nítamuturucaripahi eta nímitusiravacahi ena píchuhaqueneanahi píjararunuanahi píti. Nímimatichavacahivare eta piúrivahi píti. Yátupihisera eta pichichanaveanahi éna, taicha nasupahi eta nímiturapiana píjararunuanahi núti. <sup>7</sup> Náecharipahi tamutu eta juca nímiturapiana tásihaqueneanahi piyehe. <sup>8</sup> Náecharipahivare eta yátupiquenérahi eta pivanesiranuhi. Eta tacahe, natupiruvahi najacapa eta nímitusiravacahi eta péchajiriruvana.

<sup>9</sup> Eta tacahe, puiti nuyaseacavi, Tata, eta pijaneasiravacaina ena píjararunuanahi téhicanuanahi, taicha pichaneranahi éna. Vahi énaina nuyaseuchavaca ena masuapajirairahanahi te juca apaquehe. <sup>10</sup> Núti néchahi eta piyeheravacahi éna. Eta tacahe, néñamavahi eta nayehe, nuyehéanaipahi éna. Yátupihí eta náimatiranuhi eta pivanerunuhi, tásiha ticunachanuanahi ichape.

<sup>11</sup> Puiti núti nujunijicavacainapa ena píjararunuana. Énaserá nanasiyarechaha te juca apaquehe. Nútisera nútijapainapa eta piyehe. Tata Nucaiyaquene, píti yátupiquenévihi eta pisantuvahi. Nuyaseacavi pijaneasinanuvacachucha éna, apaesa náimiyanavahi eta náurujiasiracacaina, návahásiracacayare nácutihini eta viávahásiracacahi víti. <sup>12</sup> Núti nímitatichavihí píti eta nayehe, étapa eta píjare, apaesa yátupina eta náehisiravina. Ichapemurihi eta nujaneasiravacahi éna eta nucachaneravacaichaha. Eta tacahehi, vahi náinajicavahini eta náehisirahavihi. Émanarichu ema téjecapavahi, ema tijararecanuyare. Étasera tacaheyarehi eta táitauchiravayarehi eta Sagrada Escritura.

<sup>13</sup> Puiti nútijapainapa, Tata, tayehe eta jara piávihahi. Eta nucachaneravacaichaha éna, numetacavacahi eta pipanereruana, taicha nuvaraha vácuticacahini eta viúrisamurevaina. <sup>14</sup> Taicha ena achaneana te juca apaquehe, ichapemurihi eta nacatianasiravacahi táichavenehi eta najacapirahi eta péchajiriruvana nímitusiravacahi. Éna, vaipa náehicahini eta tayeheana eta juca apaquehe, ticutinuanaripahi núti eta numaehisirahi eta tayeheana eta te juca apaquehe. <sup>15</sup> Vahi nuyaseacavi eta piviravacainahini te juca apaquehe. Nuyaseacavi núti eta picatiuchiravacainahini mayehe ema

Váinaraji. <sup>16</sup> Taicha yátupihí éna vaipa tayeheanainahini eta juca apaquehe, ticutinuanaripa núti vahi tayahenuinahini eta juca apaquehe. <sup>17</sup> Píjaracavacahini eta náurivainahini eta piyehe, náitusirainahini cápachi eta péchajiriruvana yátupiqueneana. <sup>18</sup> Píti pivanecanuhi nímiturecayarehi eta péchajiriruvana nayehe ena achaneana te juca apaquehe. Tásiha, núti nuvanecavacayareva ena nímitureana, náimituca ena apamuriana achaneana. <sup>19</sup> Puiti, eta némunasiravacahi éna, níjararecava núti, nítauchayare eta pivarahaquenehi. Nuvaraha ene nácahehíni éna, yátupinahini náijaracavahini eta nacaemataneasiraviyarehi. Yátupinahivaréni nasuapa eta péchajiriruvana yátupiqueneana.

<sup>20</sup> Váhivaresera nacarichuhi éna nuyaseuchavacahi eta piyehe. Énerichu nuyaseuchavaca ena tisuapanayare eta táunavayare eta áñoana, ena tijacapanayare eta péchajiriruvana. <sup>21</sup> Nuyaseacavivare váhini tacuitavahini eta náurujiasiracacayare éna. Píjaracahivaréni, Tata, te nasamureana eta návahásirahavinahini tácutihini eta viávahásiracacahi víti. Náurujiasirahavinavare víti, apaesa ena achaneana te juca apaquehe náimatihini yátupina eta pivanesiranuhi.

<sup>22</sup> Núti níjaracavacaipahi éna eta náitupajijiasiravacayarehi tamutuira-yarehi narataha. Vicutihí víti eta tamutuíra virataha. Návahácacahini éna, vácutihini víti eta viávahásiracacahi. <sup>23</sup> Píti piávahácanuhi núti. Tásiha, núti návahácavacahi éna apaesa yátupinahini éna étanainarichuyare eta napanereruana, apaesa ena apamuriana achaneana te juca apaquehe étainahini náimatiarainahini eta pivanesiranuhi, éta pa eta pémunasiravacahi ena nímitureana tacutihí eta pémunasiranuhi núti.

<sup>24</sup> Tata Nucaiyaquene, píti píjaracanuhi ena nani píchuhaqueneanahi. Nuyaseacavi puiti eta nucachaneravacainahini tayehe eta návihayare núti. Náimahahini eta nujaraiva píjararunuhi taicha eta pémunasiranuhi te tépanavainapa eta tacaepiyairahi eta apaquehe. <sup>25</sup> Tata Nucaiyaquene, píti yátupiquenévihi eta pisantuvahi. Ena achaneana te juca apaquehe vahi náimativihini. Nútisera nímativíhi. <sup>26</sup> Ena nani píjararunuanahi nímitichaviripahi. Tétavicavahi eta pémunasiranuhi. Tásiha, nuvaraha yátupina nasamava eta táetaviuchirahi eta pémunasiravacahi taicha éna tiávahácanuanahi núti.

## 18

### *Títecapanapa ena ticaratacanaya ema Jesús (Mt 26.47-56; Mr 14.43-50; Lc 22.47-53)*

<sup>1</sup> Te títapiricapa ema Jesús eta mayujarasirahi, tiyanapa tiámamurihahavipa te apachara eta tatavarapi ticaijare Cedrón. Ánaqui tatiarihi eta huerta ticaijare Getsemaní. Visiapapa tayehe. <sup>2</sup> Tacahe, ema Júlasí máimatihí eta juca viávirarehi taicha ichapemurihi eta vicachanerahi ema Jesús tayehe eta huerta. <sup>3</sup> Tacahe, te jena yátiquenehi, títecapapa ema Júlasí. Mámamurihapaipahi ena oficialeana énapa ena camuriqueneanahi suntaruana romanoana, vanairucanahi éna nayehe ena tuparairucana, taicha napamicavacahi ena fariséoana. Ticamicahuanapaipahi. Ticaepuchiriquianapaipa, éta pa eta nayehe espada. <sup>4</sup> Émasera ema Jesús máecharipa eta nacaratasirayarehi. Tacahe, mácapavacapa éna. Máichavacapa:

—¿Nájaha etánuca?

<sup>5</sup> Ena najicapapa:

—Ema Jesús Nazareno vitanucapahi.

Éma máichavarepa:

—Nútira etánurepahi.

Ena Júlasí mapauchapa, máetserarecapa. Tásiha, titupihachaha te machacaya. <sup>6</sup> Eta majicapirahi ena Jesús, máichirahi: “Nútira etánurepahi”, tiáquipaimuriavanapa ena suntaruana te apaquehe. <sup>7</sup> Tásiha, mayaserecavarepa ena Jesús:

—¿Nájaha ena etánucapahi?

—Ena Jesús Nazareno —najicapavarepa.

<sup>8</sup> Éma, máichavarepa:

—Cápachi numetaca heripahi nútihira etánurepahi. Te nútichucha etánucanupahi, ísapayare nayana ena nani —máichavacapa.

<sup>9</sup> Étapaichuhi eta máechajiriruvahi ena Jesús te tiyujaracaipa nájina émanainahini náemitiachini te namuri ena máijararuanahi ena Maiya. <sup>10</sup> Tacahe, ena Pedro, tatiarihihi eta mayehe espada te mañahe. Mavehapa, máechuchacachapa eta machaca te vaure ena achane ticaijare Malco, mavanarahi ena aquenuca Caifás. <sup>11</sup> Émasera ena Jesús macahepa:

—Pinaca te tatumaramuhi eta piyehe espada. Vahi pihapapicaimahi eta táitachiravaya eta mavarahaquenehi ena Tata, taicha nutuparahaichuhi mayehe eta juca nucatajivairaya —macahepa.

*Nacaratacapa ena Jesús, námapa te mamirahu ena corregidor  
(Mt 26.57-58; Mr 14.53-54; Lc 22.54)*

<sup>12</sup> Tacahe, ena suntaruana émapa ena comandante nacaratacapa ena Jesús, náitijivauchapa. <sup>13</sup> Tiyananapa námapa te mapena ena Anás. Étarichu mapena ena Caifás, taicha ena maca Anás máimachucahi ena Caifás, émapasera tuparairucahi te jena añohe máitsivaequenehi ena máimachuca. <sup>14</sup> Ena maca Caifás, émarichuvare ticaechajiriruvahi eta máepenirainahini ena émana achane tivachachayarehi eta náitaresirana namutu ena achaneana.

*Ena Pedro tépiyacavapa vahi máimati ena Jesús  
(Mt 26.69-70; Mr 14.66-68; Lc 22.55-57)*

<sup>15</sup> Ena Pedro, nútipa nuti Juan viyanapa véhiequenehapaipa ena Jesús. Nusiapapa nútí te tajuhe eta canchón mapenahi ena aquenuca Anás, taicha náimaticasarenuhi ena mavanarana. <sup>16</sup> Émasera ena Pedro manasipa te aneca te tapajachacaya. Tásiha, néchajiacapa esu vanaracahi téchahi eta tapaja, sucasiapahini ena Pedro. <sup>17</sup> Tásiha, esu suyaserecapa ena Pedro, ánipa suicha:

—¿Pítirichu jácani apanava ñímiture eñi ñica Jesús?

Ena Pedro majicapapa:

—Vahi nútina.

<sup>18</sup> Tásiha, eta jena yátiquenehi táetaviuchahi eta tacasaraivahi. Ena mavanaranahi ena Anás, énapa ena suntaruana ticamururecanapa eta yucu, násasiavayarehi. Eta náurujasiraipahi eta yucu, titupihapavare ena Pedro te nachacaya, másasiavahivare.

*Ticayaseserehipa ena Jesús te mamirahu ena Anás  
(Mt 26.59-66; Mr 14.55-64; Lc 22.66-71)*

<sup>19</sup> Tacahe, ena Anás mayaserecapa ena Jesús áyananapuca ena téhicanahi éma, tájahahivarepuca eta máimiturapihi eta nayehe. <sup>20</sup> Ena Jesús majicapapa, ánipa macahe:

—Núti vahi nuyumurucavahini eta nímituresirahi. Nímerecavahi te namuri namutu ena achaneana te viúrujisirarevana, etapa te Templo. Éta

nímituresirareanahi. <sup>21</sup> ¿Tájaha tacayema piyaserecanu núti? Piyaserecapaini ena tisamararacananahi. Énaina nametacavi eta nímiturapianahi núti —macahepa.

<sup>22</sup> Matiarihahi ema émana suntaru te machacaya. Eta masamirahi eta máechajiriruvahi ema Jesús, máehamirahapa éma. Tásiha, máichapa:

—¿Tájaha tacayema tíñemahi eta pijicapirahi ema aquenuca macapicahuquenehi? —máichapa.

<sup>23</sup> Tacahe, ema Jesús majicapapa:

—Váhira táíñemahihini eta nujicapirahi ema aquenuca eta taviuchanuhini. ¿Tájaha tacayema péhanu? —macahepa.

<sup>24</sup> Tacahe, ema Anás máevatacapa mayehe ema Caifás, émarichuhi corregidor. Ticaitihapaipahi eta námirapahi éma.

*Éma Pedro tíápechavavare tépiyacava vahi máimati ema Jesús  
(Mt 26.71-75; Mr 14.69-72; Lc 22.58-62)*

<sup>25</sup> Tacahe, ema Pedro manasirichuhi titupihahi te tachacaya eta yucu, tíásacavahi éma. Nayaserecavarepa nápechahi:

—¿Pítirichu jácani máimiture ema maca achane? —náichapa.

Éma Pedro majicapapa:

—Vahi nútina —macahepa.

<sup>26</sup> Tásiha, matiarihivare titupihahi ema mavanarahi ema aquenuca, macheji ema máechatichacaruhi ema Pedro. Tacahe, éma téchajicapa, máichapa:

—Núti németeaca nímahavihi picachanehi éma tayehe eta huerta te vicarata-sinehi ema maca —máichapa.

<sup>27</sup> Émasera ema Pedro macahevarepa:

—Váhiquene nímati éma —macahepa.

Tásiha, enurujipa téchajicanecha eta varayu.

*Éma Jesús námapa te mamirahu ema Pilato  
(Mt 27.1-2, 11-14; Mr 15.1-5; Lc 23.1-5)*

<sup>28</sup> Te jena yáticarahi, te tijarahipa, nacuchucapa ema Jesús te mapena ema Caifás. Námapa tayehe eta palacio mávihahi ema Pilato. Váipasera nasiapahini ena tuparairucana. Náimichuhahi ema Pilato. Nanasipa te aneca, namavairairahi náechipejicavahini eta nanisirayarehi eta cordero pascual te jena sache. <sup>29</sup> Tacahe, ema Pilato tiúchucapa, máechajimurihapa éna. Máichavacapa:

—¿Tájaha eta maviurevahi ema maca achane íamaquenepahi eta ani nuyehe? —macahepa ema Pilato.

<sup>30</sup> Éna najicapapa:

—Jucarihi eta maviurevahi. Eta tacahe, viámapahi eta piyehe.

<sup>31</sup> Tásiha, ema Pilato, máichavacapa:

—Eyana iama. Étina ícuñaca ema maca, taicha jararihi eta eyeherepichuhi eti israelítana —máichapa.

Éna najicapapa:

—Étasera víti, vaipa ísapahavihini vítaucha eta viyeherepi vímicapaca mácani ticaviurevahi, vitupisica te márijahi. Émasera ema maca vivaraha máepena. Vivaraha pémetatacaini te crusu —nacahepa.

<sup>32</sup> Tacahehi eta táitauchiravapaipa tamutu eta máechajiriruvanapahi ema Jesús eta máepenirayarehi te crusu.

<sup>33</sup> Tisiapavarepa ema Pilato te tajuhe. Máichuhapa ema Jesús. Tacahe, mayaserecapa:



—¿Yátupisareji réyvihi píti nayehe ena pijaneanana israelítana? — macahepa.

<sup>34</sup> Ema Jesús máichapa:

—¿Pitupiruvahipuca eta juca píchiranuhi, pivarairahi pecha te yátupihipuca eta nurreyvahi? ¿Pitanucahipucasera eta nuviurevayare, picutihipuca eta napanereruhi ena nujaneanana israelítana? —máichapa ema Jesús.

<sup>35</sup> Ema Pilato majicapavarepa:

—Vahi nímati eta epanereruana eti israelítana. Énarichuhi ena pijaneanana ena tuparairucana, éna tiámavianapahi eta ani nuyehe. ¿Tájaha eta piviorevahi eta nayehe? —máichapa.

<sup>36</sup> Tásiha, ema Jesús majicapavarepa:

—Jéhesare, jararihi eta návacurehi; váhisera étaina te juca apaquehe. Te étainahini te juca apaquehe eta návacurehi, téhacacauchanuanaripahini ena nímitureanahi, váhivare nacucaratacanuhini ena ticatianacananahi. Taicha yátupiquenehi eta návacurehi, vahi étaina te juca apaquehe —macahepa.

<sup>37</sup> Tacahe, ema Pilato mápechavarepa mayasereca:

—Tacahe, ¿yátupihi eta pirreyvahi? —máichapa.

Ema Jesús majicapapa:

—Yátupi réynuhi núti. Eta núcupaisirahi, núchucahi te juca apaquehe, nímiturecayarehi eta yátupiqueneana. Nácani tisuapajirahianayare, nasamararacayare eta yátupiqueneana —macahepa.

<sup>38</sup> Tacahe, ema Pilato macahevarepa:

—¿Píti pímiyachava pímati eta yátupiqueneana? Núti, németeaca nájina narataha náimatimahi eta yátupiqueneana —macahepa.

*Ema Pilato macavanairipipa náetataca ema Jesús te crusu  
(Mt 27.15-31; Mr 15.6-20; Lc 23.13-25)*

<sup>39</sup> Te tamutupa eta mayaseresirahi, tiúchucavarepa ema Pilato. Máechajimurihapa ena ticatianacananahi ema Jesús:

—Tájina maviurevaina ema maca achane eta nímairahi núti. Étisera jucarihi eta eyeherepi te Páscuamuhuana eta nucaitisirayare ema émana presu. ¿Evarahapuca nucaítica ema eyehe Rey, iáquenumuri eti israelítana? —máichavacapa éna.

<sup>40</sup> Énasera tipiararecanapa eta najicapirahi:

—¡Vahi vivaraha picaitica ema maca! ¡Émaina picaitica ema Barrabás! —nacahepa.

Ema Barrabás táemerataruhi eta máetaviuchirahi eta mámeraivahi.

## 19

<sup>1</sup> Tacahe, ema Pilato macavanairipipa náestaca ema Jesús. <sup>2</sup> Tásiha, ena suntaruana navehapa eta épire itapepi, náitsamemacapa. Nanacapa te machuti ema Jesús, majarapiyarehiji náicha. Namuiriachavarepa eta muíriare mularume. <sup>3</sup> Tásiha, nachayacapa éma, nacavayumarajipa nacaecahijiricapa. Ánipa nacahe:

—Tata, ¡pítitataji nayehevihiji Rey ena israelítana! —nacahepa.

Náehamirahavare te mamira.

<sup>4</sup> Ema Pilato tiápechavarepa tiúchucahi. Tásiha, máichavacapa ena achaneana:

—Nímereca te emirahu ema maca achane. Nuvarahasera ácaicutiaraini eta tamajinairahi maviurevainahini eta nímairahi núti —máichavacapa.

<sup>5</sup> Tacahe, nacuchucapa ema Jesús, mámapaipa eta itapepi te machuti, majarapihi náepiyarui éna, étapa eta namuriarui mularume. Tásiha, máichavacapa ema Pilato:

—Mácaripa ema maca achane. Ticaemecharáhiripa, ticaestaripavare. Maratapa —macahepa.

<sup>6</sup> Te náimahapa ena tuparairucana énapa ena nasuntaruana, tipiaracanapa: —¡Pémetatareca te crusu! ¡Pémetatareca te crusu! —nacahepa.

Ema Pilato máichavacavare:

—Núti tájina maviurevainahini eta nímairahi. Étina écha eta iámairaya éma. Étina émetatareca te crusu —máichavacapa.

<sup>7</sup> Éna najicapavarepa:

—Ichape eta maviurevahi ema maca eta viyehe, taicha tímijachavahi Machicha ema Viya. Vivaraha máepena, taicha váhiquene vísapahini eta juca —nacahepa.

<sup>8</sup> Eta masamirahi ema Pilato eta machichairahipuca ema Viya ema Jesús, ichaperinehi eta mapisirahi. <sup>9</sup> Tisiapavarepa tayehe eta mayehe palacio. Máichuhavarepa ema Jesús. Mayaserecavarepa:

—¿Nájahavisica píti? ¿Távihasica eta piásinehi? —macahepa.

Émasera ema Jesús, tájina vahi majicapahini.

<sup>10</sup> Tásiha, ema Pilato máichavarepa:

—¡Vahi pivaraha pijicapanu! Péchapuca píti eta nuratahairahi nucuchuhavi, énerichuvare nuratahavare nucavanairipi náetatacavi te crusu —macahepa.

<sup>11</sup> Ema Jesús mapaenumavapa majicapa:

—Váhiquene piratahaimahi pítijiva pémetatarecanuhini te crusu. Émasera ema Tata tituparacavihi, mavarairahi títauchava eta mavarahaqueneanahi. Eta tacahe, ichape eta napecaturana ena tíjararecanuanahi eta piyehe. Píti váhipanaichuhinéni eta pipecaturahi eta píchiranuhi —macahepa.

<sup>12</sup> Tacahe, ema Pilato mavarahainipa macuchucuhayarehini ema Jesús. Énasera ena tuparairucana tipiaracanavarepa:

—¡Te picaitica ema maca, vépiyaequenehaviyare mayehe ema ichapequene aquenuca Emperador! ¡Ema maca achane macatianarui ema Emperador taicha tímijachavahi rey! —nacahepa.

<sup>13-14</sup> Tacahe, te masamapa ema Pilato eta náechajiriruvahi éna, tiyanapa te anuquehe, téjacapa tayehe eta máejasirare apaesa namutuyarepa náimaha. (Eta mávacurehi, amairiha máripahi. Eta jena sache, viérnesi táequenereruhi eta Pascua.) Tacahe, tiánehiripa las dóceyarehi eta sache macavanairipipa nama ema Jesús. Tásiha, máichavacapa ena achaneana:

—¡Mácaripa ema eyehe Rey! —macahepa.

<sup>15</sup> Énasera tipiaracanavarepa:

—¡Pémetatarecavane! ¡Máepenavanepa! ¡Váhiquene vivaraha ema maca! —nacahepa.

Tásiha, ema Pilato máichavarepa:

—¡Vahi németatarecaimahi ema eyehe Rey! —macahepa.

Énasera ena tuparairucana najicapavarepa:

—¡Nájina apanaina viyehena Rey! ¡Macarichu ema Emperador! —nacahepa.

<sup>16</sup> Tacahe, ema Pilato máisapapa. Máijaracavacapa ena masuntarurana eta náetatasirayare ema Jesús. Jéhesaréinehi námapa éma.

*Náetatacapa te crusu ema Jesús**(Mt 27.32-44; Mr 15.21-32; Lc 23.26-43)*

<sup>17</sup> Tacahe, náijaracapa ema Jesús eta macurusuraya. Tiúchucapa éma, mámapaipahi te majihu. Námapa eta te Calvario (te hebreo ticaijare Gólgota). <sup>18-19</sup> Tásiha, ema Pilato máepiyacapa eta ajureca eta táechajiriruvahi, ánipa tacahehi: “Ema Jesús Nazareno, Rey nayehe ena israelítana”. Te tápusi eta macurusura nanacapa eta juca ajureca. Natiarihivare ena apinana ticaetatanahivare te machacaya. Émasera ema Jesús, te enumuhu mávihahi. <sup>20</sup> Camuriana ena achaneana téchajicuhanahi eta ajureca, taicha eta macaetataiyahi ema Jesús tacachacayaichuhi eta avasare. Eta ajureca, te hebreo, te griego, téhepa latín. Mapana eta táechajiriruvanahi. <sup>21</sup> Eta tacahe, ena tuparairucana tiyananapa mayehe ema Pilato nayaseapanahi máitsivachahini eta ajureca. Éna navarahahi áni tacaheyarehi eta ajureca: “Ema maca tímijachavahi Rey nayehe ena israelítana”. <sup>22</sup> Émasera ema Pilato máichavacapa:

—Eta ajureca nunacaquenehi, nájina tihapapicaimahi —macahepa.

<sup>23</sup> Te náitauchapa ena suntaruana eta náetatasirahi ema Jesús, nasuertehachapa eta mamuiriha nayehe ena cuátroqueneana. Navehavarepa eta apana mamuiriha. Étasera tájina taparinahini, amairijuheichucha eta it-sameruca. <sup>24</sup> Vaipa návarahahini navetsayucahini. Tásiha, nasuertehachavarepa, náimairayarehi nájahayarehipuca mácani tivecuhayarehi.

Tacahehi eta táitauchiravahi eta Sagrada Escritura eta táechajiriruvahi: “Ticajiricacanapa eta numuirihaini. Nasuertehachavare eta apana numuiriha”. Jéhesare, tacahehi naicha ena suntaruana.

<sup>25</sup> Te tápecu eta macurusura ema Jesús, sutiarihahi esu maena, ésupa esu mápenaru, ésupa esu apana María mayena ema Cleofas, ésupa esu María Magdalena. <sup>26</sup> Tacahe, te máimahapa esu maena eta sutiarahirahi te machacaya, nútupa nuti máimiturehi máemunaruquenehi, ánipa máicha ésu:

—Mémechicha, márahi ema nítisivayare ema pichichayare. Éma títativiyare.

<sup>27</sup> Tásiha, énerichuvare tituparacanuvarépa nútí:

—Némunacasare, nutuparacavi esu meme. Esu pényare. Pímainanu —máichanupa.

Jéhesaresera, nútí Juan ichaperinehi eta nujacahirahi esu maena. Námapa te nupena.

*Eta máepenirahi ema Jesús**(Mt 27.45-56; Mr 15.33-41; Lc 23.44-49)*

<sup>28</sup> Tacahe, eta máimairahi ema Jesús eta táitauchiravaripa tamutu eta táechajiriruvanahi eta Sagrada Escritura, ánivare macahehi:

—Tétavicava eta numauneva —macahepa.

<sup>29</sup> Tatiarihahi eta tisisica vino te tinaja. Náechipajicapa eta machuchujiruyarehi. Náimicapayacapa tayehe eta majaca te tiúqui curina. <sup>30</sup> Tacahe, machuchujicapa ema Jesús eta tisisica vino. Tásiha, macahepa:

—Jéhevare púiti, títauchavapa tamutu —macahepa.

Tásiha, téyusicapa. Tépenapa.

*Ema émana suntaru mayuvaracapa te machene ema Jesús tayehe eta lanza*

<sup>31</sup> Tacahe, ena tuparairucana vahi návarahahini nánasihini ena ticaetanahi te crusu te jena sache sávaru páscuairahi. Tacahe, tiyananapa mayehe ema Pilato, nayaseapanahi macavanairipihini eta nacavetupaiquechavacayarehi apaesa náepenavanehini. Navarahahi náecarávane, taicha tétavicavahi eta tacapicahirahi nayehe éna eta jena sácheana páscuairahi. <sup>32</sup> Jéhesaréinehi, tiyananapa ena suntaruana, nacavetupaiquechavacapa ena apinana

tiámerahiana nacaetataquenehi te crusu te machacaya ema Jesús. <sup>33</sup> Tásiha, éneyareichuhivaréni ema Jesus. Téhesera te náitecapauchapa, náimahapa eta máepeniraipahi. Tacahe, vaipa nacavetupaiquechahini éma.

<sup>34</sup> Táitsivahisera ema émana suntaru mayuvaracapa te machene tayehe eta lanza. Enevanepa tiúchucahi eta iti étapa eta une. <sup>35</sup> Núti Juan nájuequenehahi tamutu eta juca, nímahaqueneanahi. Nuvaraha nítametacahe tamutu. Yátupihivare eta numetasirahehi, taicha nuvaraha esuapahini éti apanavare. <sup>36</sup> Títauchavahi eta juca táechajiriruvahi eta Sagrada Escritura: “Tájina vahi nacavetucaimahi eta máperana”. <sup>37</sup> Jararihivare eta apana Escritura, ánivare tacahe: “Náimahayare ema najarachaquenehi”.

*Nacucupaicapa te crusu ema Jesús, náecarayarepa  
(Mt 27.57-61; Mr 15.42-47; Lc 23.50-56)*

<sup>38</sup> Te tamutupa eta juca, matiarhihi ema achane José, ticavasahi te Ari-matea. Émarichuhi tisuapajirahihi mayehe ema Jesús. Váhisera máimerecavahini, mapisiravacahi ena machamuriana aquenucarahana. Tiyanapa éma mayaseapanahi ema Pilato eta máquehe ema Jesús. Tacahesera ema Pilato máisapapa. Tiyanapa ema José, macucupaipanapa eta máquehe ema Jesús. <sup>39</sup> Émapa ema Nicodemo macachanehi, ema téjirapanahi ema Jesús te jena yátimuhuquénehi. Mámapahi éma eta treinta kilo eta perfume mayajihayarehi. <sup>40</sup> Tacahe, ema José émapa ema Nicodemo navehapa eta máquehe ema Jesús, náyuruacapa eta te sávana tijapu táurinaquenehi. Nayajihacavarepa tayehe eta tájiyequene perfume. Tacahehi eta viyeherepi te vécarayare ena náepenaqueneana. <sup>41-42</sup> Tacahe, te tachacaya eta máepeninehi ema Jesús, tatiarihihi eta huerta te távihahi eta mari natsecajueruhi ecariyare tacutihi eta covacha. Nájinaichaha nacaecarasihini tayehe. Étapa náecarihahi eta máquehe. Tiputuvahuanapa taicha cáperehichicharipahi. Vahi táisapacarehini náecarahini te yati, váhivare táisapacarehini te apanapa sache taicha sávarumuhuiipahi.

## 20

*Eta máechepusira ema Jesús te máecari  
(Mt 28.1-10; Mr 16.1-8; Lc 24.1-12)*

<sup>1</sup> Tacahe, te jena sache lumincuquenehi, te tijararahichichapa, tiyanapa esu María Magdalena tayehe eta máecari. Timapicuichaha te suítecapauchapa eta ecari, suímahapa tájinaripahi eta márime tajihainihi eta tapajacurahahi eta ecari. <sup>2</sup> Te suímahapa, tichavavanepa tijunapapaipahi. Suíchuhapanayarehi ema Pedro nútipa nuti Juan. Timetacahavipa ésu:

—Námechapa jácani eta ñáquehéni eñi Viáquenu. Vaipa vecha távihahipuca nanasihahi —sucahepa.

<sup>3-4</sup> Tacahe, núti émapa ema Pedro viúchucapa viyanapa vijunapapaipahi. Nucachuricapa ema Pedro. Nítecapavanepa núti tayehe eta máecari ema Viáquenu. <sup>5</sup> Nétipaicapa. Nujiñañajuechapa. Tacarinehi nímaha eta máyuruhanainihi. Váhisera nusiapahini. <sup>6-7</sup> Te títecapapa ema Pedro, tisiapapa éma tayehe eta ecari. Máimahapa eta máyuruhanainihi. Tanasirinecha enurujuhahi, étapa eta mamuhisiequene ema Jesús. <sup>8</sup> Tacahe, nusiapavarepa núti tayehe eta ecari. Nímahapa eta táichararacavahi. Tásiha, ichaperinehi eta nusupirahi. <sup>9</sup> Vipaenumavapa vicaicutiarahi eta táechajiriruvahi eta Sagrada Escritura, eta máechepusirayarehi ema Viáquenu te máecari. <sup>10</sup> Te tamutupa eta vímairahi, vichavapa te vipena.

*Éma Jesús tímerecavapa suyehe esu María Magdalena  
(Mr 16.9-11)*

11 Esu María Magdalena, énerichuvare tiápechavaripa tichava eta te máecari. Sunasipa, tíyahaipa. Tásiha, tétipaicapa sujiñañacahi te tajuhe. 12 Tiáramicarepa suímaha ena apinana ángeleana, tijapumuirihavacahi. Téjacanahi éna te tajuhe eta máecarini. Éma émana te tanapainihi eta machuti, éma apana te máivape. 13 Tásiha, ena ángeleana nayaserecapa ésu:

—¿Tájaha ticaiyacavi, nuchicha? —náichapa.

—Ticaiyacanuhi eta námechirahi eta ñaquehe eñi Viáquenu. Vahi nécha távihapapuca nanasihahi —sucahepa.

14 Te títapiricapa eta suíchiravacahi, téviurucavapa, suímaharinehi éma Jesús. 15 Tásiha, éma apanava mayaserecapa:

—¿Tájaha ticaiyacavihi, nuchicha? ¿Nájaha pitanucahi? —máichapa.

Ésusera suímijachaichucha éma tijanearecarahi eta huerta. Tásiha, suíchapa:

—Tata, te pítihipuca piámahi eta ñaquehe eñi Viáquenu, picatajicanu pimeta-canu távihapuca pinasihahi. Nuvaraha námayare núti —suíchapa.

16 —¡María! —máichapa.

Suésenicainehi ésu. Supaenumavapa suímatihí éma. Tásiha, suíchapa:

—¡Pítiquenehi, Tata Náquenu!

17 Tásiha, éma Jesús máichapa:

—Vahi picuemamahacanu, taicha vuíchaha nápanahini te mávihahi éma Tata. Piyana pimetacavaca ena apamuriana nímitureana eta nápanirayare mayehe éma Tata, Ecaiyaquenéhivare éti apanava —máichapa.

18 Tacahe, esu María Magdalena tiyanapa sumetapanavacahi ena suchamuriana eta suímairahi éma Jesús, étape eta mametarapianahi.

*Tímerecava éma Jesús nayehe éna máimitureana  
(Mt 28.16-20; Mr 16.14-18; Lc 24.36-49)*

19 Étarichu te jena sáchequenehi lumincuquene, yátiripahi, viúrujicavahi viti máimitureana éma Jesús te tajuhe eta peti. Vérateaquenerecavahi taicha eta vipisirahi éna tuparairucana. Tiáramicarepa titupihahi éma Jesús te vimuri. Téchajicahavipa:

—¿Ícharacava, nuchichanaveana? —máichahavipa.

20 Tásiha, tímehahavipa éta majarana te mavahuana étape te machene. Tacahe, viti ichaperinehi éta viúrisamurevahi éta vímairahi éma. 21 Tásiha, máichahavipa:

—Vahi ecueñamava. Núti, mavanerunuhi éma Tata núcupaicayare te juca apaquehe, nímitucaheyarehi éti. Puiti nuvanecaheyare núti ímitucavacayarehi éna achaneana, apaesa náehicanuhini éna apanava —macahepa.

22 Tásiha, tiáchajuacahavipa víti. Tásiha, máichahavivarepa:

—Táuri éta ejacapurina éma Espíritu Santo éta máitecapauchiraheya, mávahásiraheya. 23 Éma, tímítucaheya éta ítametasiravacaya éna achaneana éta naperdonachacarevahi me Viya éna téneuchavanahi. Te vahi nacuaraha téneuchavana, tanasiyare éta naviurevana taicha éta napecaturana —macahepa.

*Éma Tomás vahi masuapa éta máechepusiraipahi éma Jesús*

24 Te jena sache éta máimeresiravahi éma Jesús éta viyehe, májinahi éma vichamuri Tomás. 25 Tásihasera, éna apamuriana vichamuriana nametacapa éma éta vímairaipahi éma Jesús. Émasera macahepa:



—Vahi nusuapa. Téhesera te nímaha eta majara te mavahu taicha eta clavo, nímisiapavare eta nuvaquui tayehe eta majara te machene, tapaenumava nusuapayare eta máechepusiraipahi —macahepa.

<sup>26</sup> Te óchopa sache eta táetavisiravahi, viúrujicavaipavare te viúrujisirareva. Matiarhipahi ema Tomás te vimuri. Tásiha, tiáramicarevarepa tímerecavahi ema Jesús. Titupihahi te vimuri. Téchajicahavivarepa.

—Ícharacava, nuchichanaveana —macahepa.

<sup>27</sup> Tásiha, máichuhapa ema Tomás:

—Yare, nuchicha —máichapa—. Pímaha eta nujarana te nuvahuana. Pímisiapa eta pivauqui eta te juca nuchene, apaesa pisuapanu.

<sup>28</sup> Tacahe, ema Tomás majicapapa:

—Tátachicha, piti yátupiquenévi Viya. Tétavicavahi eta nucasiñairavihi —máichapa.

<sup>29</sup> Ema Jesús majicapapa:

—Nuchichasami Tomás, pipaenumava pisuapanu eta pímairanuipahi. Tétavicavasera náuricacareva nácani tisuapajirahianahi vahi tácomesahini náimahanuhini —macahepa.

### *Nuvaraha esuapa eta juca libro nájurehi*

<sup>30</sup> Jucarihichahavare eta apamuriana tiáramicareana máichaqueneanahi ema Jesús, eta vímahaqueneanahi viti máimitureana. Váipasera tamutuhini tacajuhini te juca libro. <sup>31</sup> Nuvarahasera ácaicutiara eta nájureanahi apaesa esuapahini ema Jesús eta émairaquenehi Cristo, Machichaquenehi ema Viya. Taicha te esuapapuca éma, máitavacacayare eta ítaresirayare.

## 21

### *Tiápechavavare tímerecava ema Jesús nayehe ena siétequeneana máimitureana*

<sup>1-4</sup> Tiuri, te táequenepa eta juca, viyanapa víti te Galilea, vicuchapayarehi ema Jesús. Ánaqui matiarihahi ema Pedro, ema Tomás, ema Natanael, ema nuparape Jacobo, nútipa nuti Juan. Natiarihivare ena apinanahi vichamuriana. Tacahe, ema Pedro máichahavipa:

—Nuyanayare nénipanayare te cáquiure —macahepa.

Tásiha, víti vijicapapa éma:

—Véhicaviyare víti apanava —víchapa.

Tacahe, te vítecapapa, viávacuhapa tayehe eta pacure. Vénicaipahi te jena yátiquenehi. Tájinasera vítucavahini. Te tijárahichichayaréipa, vímahapa ema Jesús. Titupihapahi te tachaui. Váhisera vímativanehini. <sup>5</sup> Tásiha, téchajicahavipa:

—¿Ícharacava, nuchichanaveana? ¿Tájina ítucava eta jima? —macahepa.

Vijicapapa víti:

—Tájina vítucava —víchapa.

<sup>6</sup> Tásiha, éma tivanecahavipa viáquijieca eta viyehe tarrafa te apachacaya eta pacure tinapaicahi te vaure.

—Eta ítusiavayare eta jima —máichahavipa.

Visuapahisera víti. Tásiha, te vichuruecapa eta viyehe tarrafa, vaipa víchinahini taicha táetaviuchahi eta camurirahi eta jima. Tijitacarenecha.

<sup>7</sup> Tásiha, nútí níchapa ema Pedro:

—¡Émara ema Viáquenu! —níchapa.

Masaminenurichuhi ema Pedro eta níchirahi, ticamuirihavanepa taicha tivejamuhiacavahi éma eta mamuiriha. Tépuhecavapa, mavarairahi macapayacavaneyarehi ema Viáquenu. <sup>8</sup> Víti apamuriana vipauchapa

eta tachausi. Vichuruecapaipahi eta viyehe tarrafa; tincapaipahi eta camuriquene jima. Cien métrorichuhiserapuca eta viyerehirahi eta tachausi. <sup>9</sup> Te viúcupaicapa te tachausi, vímaharinehi tatiarihihi eta yucu, étapa eta jima jitaruca, étapa eta pan. <sup>10</sup> Tásiha, ema Jesús máichahavipa:

—Iáma eta ítrevahi jima —máichahavipa.

<sup>11</sup> Ema Pedro machurupaicapa eta tarrafa. Vímaharinehi eta ichapemuriquene jima. Ciento cincuenta y tres eta tasimurivahi. Váhisera táetsayucahini eta viyehe tarrafa. <sup>12</sup> Tásiha, tíchuhahavipa ema Jesús:

—Yare, enica —macahepa.

Tásiha, viyanapa víti, vinicayarehi. Váhisera vipatsicavahini viyaserecahini te nájahhipuca éma taicha tétavicavahi eta viáramesirahi. Vímatiacahisera eta émairahi ema Viáquenu. <sup>13</sup> Tásiha, ema Jesús témeñahavapa. Mavehapa eta pan. Tíjaracahavipa. Étapa eta jima táimaquiquenepa, tíjaracahavivarepa.

<sup>14</sup> Eta juca eta mapahequenepa eta máimeresiravahi ema Jesús eta viyehe eta máechepusirahi te máecari.

*Ema Jesús mavaraha macaicutiara te yátupipuca máemunaca ema Pedro*

<sup>15</sup> Te vítanésipa eta vinisirahi, ema Jesús mayaserecapa ema Pedro. Ánipa máicha:

—Píti Pedro, nuvaraha nuyaserecavi: ¿Picachuricapuca píti ena nani apamuriana eta pémunasiranuhi? —máichapa.

Éma majicapapa:

—Némunacavi, Tata. Pécharichuhi píti jácani némunasiravihi —macahepa.

Ema Jesús máichavarepa:

—Tiuri, te yátupihpuca pémunacanu, nuvaraha pijaneasinanuvaca ena téhicanuanayare, taicha vahi náitucahini nacatiuchavahini. Téñamacareanahi —macahepa.

<sup>16</sup> Te táequenepa, mápechavare mayasereca:

—Pedro, nuvaraha nuyaserecavi: ¿Yátupi eta pémunasiranuhi? —máichapa.

—Némunacavi, Tata. Pécharichuhi píti eta némunasiravihi —máichapa ema Pedro.

Ema Jesús máichavarepa:

—Tiuri, te yátupipuca pémunacanu, pijaneasinanuvaca ena téhicanuanahi —macahepa.

<sup>17</sup> Te táequenevarepa, mapahequene mayasereca:

—Pedro, ¿yátupi eta pémunasiranuhi? —máichapa.

Émasera ema Pedro titsirihapa taicha mapaheripa eta mayaseresirahi. Majicapavarepa:

—Pécharichuhi, Tata, eta némunasiravihi —macahepa.

Tásiha, máichavarepa ema Jesús:

—Tiuri, te yátupihpuca pémunacanu, pijaneasinanuvacayare ena téhicanuanahi. <sup>18</sup> Nutupiruva numetacavi: Éta piámaperuvahi, píti péchinavahi eta pítaresirahi. Picamuirihahi, piyanahivare te jácani pivarahaqueneanahi picaijuhe. Jácanisera áñoanayare eta pichávicavaipa, apanainapa eta pítaresirayare. Apanainapa ena timuriachavianayare, taicha títijivauchavianayare, tásiha tiámavianainapa te jácani pimavarahaquenénihi picaijuhe —máichapa.

<sup>19</sup> Eta juca máichirahi ema Jesús, mavarairahi máiminecapaequenehayarehi eta máichararacavayarehi eta máepenirayare ema Pedro. Tétavicavainapa eta macunachacareva ema Viya maicha ema Pedro, taicha vahi téquecavaimahi eta máimairahi eta macatajivairaya. Tásiha, máichavare ema Jesús:

—Piti Pedro, tacuija tahapapiricahini eta pítauchira tamutu eta nutuparasiravianahi —máichapa.

*Eta táichecuine eta májurehi ema Juan, máemunaruquenehi ema Jesús*

<sup>20</sup> Tásiha, téseniequenehavapa ema Pedro, tímahanupa eta néhiequenehairapahi nuti máemunarunuhi ema Jesús. (Nútirichu núti nuyaserecahi te mesa te nájahahipuca ema tíjararecayarehi.) <sup>21</sup> Eta máimairanuhi ema Pedro, mayaserecapa ema Jesús tájahapuca eta níchararacavayarehi núti apana. Ánipa macahe ema Pedro:

—Tata, ¿tájahapuca máicharacavayare ema apanava ema maca?

<sup>22</sup> Ema Jesús majicapapa:

—Núti nécha. Te nuvarahapuca máitareca máimahayare eta nápechiravayare nuchavirayare, vahi tacuimipanerecavi. Pítisamisera, pítaucha tamutu eta nutuparasiraviana. Tacuija tahapapiricahini eta péhisiranuhi.

<sup>23</sup> Tacahe, ena nuchamuriana, ichaperinehi eta napanerequenehairahi eta numaepenirayarehi. Váhisera mametacahini eta numaepenirayarehi. Tacarichu macahehi: “Te nuvarahapuca núti máitareca máimahayare eta nápechiravayare nuchavirayare, vahi tacuimipanererecavi” macahepa.

<sup>24</sup> Nuparapenaveana, núti yátupiquenenuhi eta máimiturenuirahi ema Jesús. Nutupiruvahi néchajisiha te juca nájurehi eta yátupiqueneana nímahaqueneanahi.

<sup>25</sup> Jucarihichaha eta apamuriana máichaqueneanahi ema Jesús. Váipasera támutuhini nájuequenéhahini, taicha tétavicavahi eta táichapemurivahi. Te vítametacapucaini tamutu eta máichaqueneanahi, váipapuca vicuratahahini vítuca, namutuhinéni ena achaneana te juca apaquehe tiájuequenerahiana.

Tamutupa eta juca nájurehi.

## **Emá San Lucas májuequenehahi eta náichararacavahi ena Apóstoleana eta náehisirahi emá Jesucristo, ticaijare LOS HECHOS**

<sup>1</sup> Piti Teófilo, títecapáuchaviripa eta táinapure nájure tayehe eta máichavaqueneváhi emá Jesucristo te títecapapa te juca apaquehe. Nájuchahi tamutu eta máichaqueneanahi, étapa eta máimiturapianahi. <sup>2</sup> Nararihihi ena manerejiruana apóstoleana. Émaripa emá Espíritu Santo máimicatcaahi eta matúparasíravacahi éna. Nájuchavarepa eta mayapirahi te anuma. Puiti nímiama-recavare eta piyehe eta juca nájure, apaesa pímati tamutu eta téchacareana tayehe eta máichavaqueneváhi emá Jesús. <sup>3</sup> Te táequenepa eta máepenirahi, téchepucapa te máecari, tiápechavavare títareca. Tásiha, cuarentaquenehi sache eta macáchanéravacaríchaha ena máimitureana. Máimerecahi ichape eta machavirahi títareca. Máimitucavacahi éna, eta táichararacavayare eta náehisirayare emá Viya ena achaneana te tamutu avasareana.

*Emá Jesucristo mametaca eta máucupaisirayare emá Espíritu Santo*

<sup>4</sup> Te jena sache, macáchanevacaríchaha ena apóstoleana, mametacavacapa. Ánipa maicha:

—Vahi ecújúnijica eta juca viávasa Jerusalén. Ecuchapayare eta táitauchiravayare eta máijararuvahi emá Vicaiyaquene. Étaripa eta juca numetarpianahi. <sup>5</sup> Échavarichu emá Juan, máicachasicavacahi te une ena achaneana. Étiserá, puiti juca sácheanayare, tiúcupaicayare emá Espíritu Santo. Emá tícachasicaheyare, tiávahácahénapa —macahepa emá Jesús.

*Eta mayapira emá Jesús te anuma*

<sup>6</sup> Tacahe, nayaserecapa ena tiúrujíacanáhi emá Jesús. Ánipa naicha:

—Tata Viáquenu, ¿puítinaríchu píjaracahavi viti israelítana eta vítináini vigóvernachacáca te juca viávasa? —nacahepa.

<sup>7</sup> Emá Jesús majicapapa, ánipa maicha:

—Vuíchaha táechacare. Vahi tatuparaca étinahíni echa tájahapuca sáchevayare, tájahapuca cájevayare títauchavaya. Taicha tayumururevahi eta juca maicha emá Tata Vicaiyaquene. Macarichu éma máituruéqueneha eta juca. <sup>8</sup> Jucaríhisera eta ítucaquenezare. Emá Tata tíjaracaheyare emá Espíritu Santo, tiávahácaheyare tímicatacaheyare. Tacahe, échajisianuínapa núti. Tamutuyare avasareana eta epaisiha, te Jerusalén, te Judea, te Samaria, étapa te jácani tayerehiqueneana avasareana tayehe te juca apaquehe —máichapa emá Jesús.

<sup>9</sup> Tacahe, te títavapa eta máechajirísiravahi, tiyanapa tiyapa te anuma. Tacahe, ena máimitureana náimararaequenehaipa eta mayanirahi. Táepacuchirahi eta úcaji. Vaipa macaecherahini te anuquehe. <sup>10</sup> Eta mayanirahi emá Jesús te anuma, náimararacáichaha ena máimitureana. Tacahe, tiáramicareanapa tímerecavana ena apinana ángeleana. Tijapumuirihavaca. <sup>11</sup> Tacahe, náichapa ena ángeleana:

—¿Tájaha íchahi ímararacahi eta anuma, eti máimitureana emá Jesús? Puiti enecapararecahi emá Jesús eta majunijisiraheripa, mayanirapa te anuma. Vimetacahe: Te jácani sáchezare, emá Jesús tichavayare te juca apaquehe. Tiúcupaicayare tacutiyaichu eta mayanirahi —náichavacapa ena ángeleana.

*Nanerejicapa emá Matías, máitsivayarehi emá Júlasi*

<sup>12</sup> Tiuri, eta návihairahi te anuquehe masihi ticaijare Olivoquiji. Tachacayahi eta Jerusalén, apina kilómetro eta tayerehivahi. Tiyananapa tichavana tayehe eta avasare. <sup>13</sup> Te títecapanapa te avasare, tisiapanapa te peti apina piso, eta náitecapihahi. Tiápananapa te téqueneha piso. Natiarihihi ema Pedro, ema Jacobo, ema Juan, ema Andrés, ema Felipe, ema Tomás, ema Bartolomé\*, ema Mateo, ema apana Jacobo, ema Simón, émapa ema Judas. <sup>14</sup> Natiarihivare ena maparapenaveana ema Jesús, ésupa esu maena María, énapa ena apamuriana esenana. Tamutu sácheana, ena nani tiúrujicavanahi eta nayujarasirahi.

<sup>15</sup> Tacahe, te jena sácheana, ena náurujiರುವanahi náetavicahi ciento veinte eta nasimutuva ena máimitureana ema Jesús. Tacahe, téchepucapa ema Pedro te namuri, titupihapa. Máichapa:

<sup>16</sup> —Nuparapenaveana, ema víyarahaini David macaimitucasiquenehi mayehe ema Espíritu Santo, ánaquiríchaha eta añoana eta matiarahiraya ema Júlasí, ema tínapumiráuchaya ena suntaruana nacaratacaya ema Jesús. Títauchavapa eta mametarapihi ema Espíritu Santo. <sup>17</sup> Taicha ema Júlasí, émainichuhi vichamurini tayehe eta juca vématanerepihi —macahepa ema Pedro. <sup>18</sup> (Émasera ema Júlasí ticapacavahi tichumucavapa. Tiáqui paicavahiséra eta máquehe. Tiúchumuriapa eta maturupiana. Te táequenepa, navehapa eta mavachainihi eta máijarasesirahi ema Jesús. Navacharecapa eta apaquehe. <sup>19</sup> Te náechapa ena ticavasana te Jerusalén, nanacapa eta táijarehi Acéldama. Eta ticaijarehi puiti “Apaquehe máitinevacha ema Jesús”.)

<sup>20</sup> Tímiyanava eta máechajisirahi ema Pedro, ánipa maicha:

—Ema víyarahaini David májucunachahi eta mametarapiana ema Espíritu Santo eta te Salmo. Áni macahehi: “Machu nacuija nacusiapa eta mapena majunijiruipa nácani macutipanereruana eta mavainarajiva”. Ánivarepa macahe: “Tatuparacahi masiapaya ema apana achane máitsivaya te mávacu-rénihí” macahepaji ema Espíritu Santo.

<sup>21-22</sup> Tacahe, tituparacahavi vinerejicayare ema apana, máitsivaina ema Júlasí, apaesa vahi macuejiacava te vimuri viti dócequeneana. Máimicatacahavi eta véchajisiha eta máechepusirahi ema Jesús. Nararihi ani te vitaracu ena vichamurianahi te juca añoana te matiarihichaha ema Jesús te vimuri. Ena ticachanehavianahi te ticaicachasinapa ema Jesús me Juan. Vahi najunijicahavihini. Natiarihiquenehi te tiyapapa ema Jesús te anuma —macahepa ema Pedro.

<sup>23</sup> Tacahe, ticanerejianapa ena apinana: ema ticaijare Matías, émapa ema apana ticaijare José Barsabás (énerichuvare náimijarechahi Justo). <sup>24-25</sup> Tacahe, tiyujaracanapa, ánipa nacahe:

—Tata Viáquenu, piti pímati eta visamureana vimutu. Pímechahavi nájahapuca ema tiuri nayehe ena nani apinava vinerejiruanahi máitsivayare ema máemitiaruhi apóstoleni Júlasí, táimicuñaruhi eta mapecatura —nacahepa.

<sup>26</sup> Tacahe, nasuertehachapa ena apinana. Tatocachapa ema Matías. Tásiha, natuparacapa eta mávacureyare nachamurirayarehi ena apamuriana apóstoleana.

\* **1:13** Ema Bartolomé ticaijarehivare Natanael. Ema apana Jacobo, machichahi ema Alfeo (váipasera véchapirica eta máitaresira ema Alfeo). Ema Simón, nachamurinihi ena revolucionario ticaijareana “cananístana”. Ena nani cananístana nacanarajiricahi ena apavasanana romanoana, navairairahi náquijica, nacuchucayare te návasa Judea. Ema maca Judas, matiarihí ema maparape ticaijarehivare Jacobo, váhisera nachamurinahini ena apóstoleana. Ema maca Judas, mapanahi eta máijare: eta Tadeo étapa eta Labeo, étapa eta Judas. (Te pivaraha pecha, pitanuca te libro Marcos 3.18 étapa te Mateo 10.3.)



## 2

### *Eta máucupaisirahi ema Espíritu Santo*

<sup>1</sup> Tiuri, títecapapa eta sache napiestara ena israelítana ticaijarehi Pentecostés. Tiúrujicavanahi ena apóstoleana énapa ena apamuriana nasimutuvaqueneana máimitureana ema Jesús. <sup>2</sup> Tacahe, tiáramicarepa eta ticaema te anuquehe tiásiha te anuma ticutipahi eta muraca técticava. Ticaemapa muraca te táinahu eta peti návihahi éna. <sup>3</sup> Tacahe, tiáramicarepa tímerecava eta tacuti eta tanene eta yucu. Tijarahivacapa te nápusiana namutu ena náuruji-ruvanahi. <sup>4</sup> Tacahe, ena mávahácavacaripa ema Espíritu Santo. Tiáramicareanapa apáechajiríruvavacapa taicha eta mávahásiravacáipahi ema Espíritu Santo. <sup>5</sup> Te jena sache, natiarihivare ena camuriqueneana israelítana te Jerusalén tiásihana te tamútuyaréini avasareana. Tipicaurahianahi tayehe eta nayehe religión. <sup>6</sup> Te nasamapa eta tacaemairahi te anuquehe, ticuruji-cacanapa ena achaneana. Náraminehi ichape táichavenehi eta nasamirahi ena apáechajiríruvavacarípahi.

<sup>7</sup> Ichaperinehi nárami. Tacahe, náichacacapa:

—¿Tájaha tacayema eta juca? Ena nani, váhira vichamurianaina tayehe eta avasare viávihahi. Ticavasana te Galilea ena nani. <sup>8</sup> Tásihasesa, náitucahivare eta véchajiriruvapachu vímiuchurehi víti. ¿Tájahapapuca tacayema eta juca? <sup>9</sup> Camuriana eta véchajiriruvana taicha víti viásihahajíruanahi te apanapanejiana avasareana. Nararihi ena tiásihana te Partia, te Media, te Elam, te Mesopotamia, te Judea, te Capadocia, te Ponto, te Asia, te Frigia, te Panfilia, te Egipto. <sup>10</sup> Nararihivare ena tiásihana te Cirene te Libia. Nararihivare ena tiásihana te Roma, ena yátupi-queneana israelítana énapa ena tépiyacavanaripa israelítana. <sup>11</sup> Nararihivare ena tiásihana te Creta etapa te Arabia. Vimutusera visama eta véchajiriruvapachu. ¿Tájahapuca tacayema? Ena nani téchajicanahi timetacahavianahi eta táuricacarequeneana tásihaqueneanayare me Viya. Vicaicutiarahi tamutu taicha téchajicanahi te véchajiriruvapachu —nacahepa.

<sup>12</sup> Namutu napanerequenehahi. Vaipa náimatihini tájahapuca tacayema. Tiyaserejiricacanavarepa:

—¿Tájahapuca tacayema eta juca? —nacahepa.

<sup>13</sup> Natiarihiserá ena apamuriana nacaecahirichucha, ánipa nacahe:

—Nacavaqueneana ena nani —nacahepa.

### *Ema Pedro máechajicapa ena achaneana*

<sup>14</sup> Tacahe, titupihapa ema Pedro te namirahu ena achaneana. Natiarihivare ena óncequeneana apóstoleana. Téchajicapa muraca ema Pedro eta máechajisirahi, ánipa macahe:

—Tátanaveana nujaneanana, emutu eti ecavasana te juca Jerusalén, ecatajicanu esamanuchaha. Ácaicutiaraquenéna eta juca nucayemayare. <sup>15</sup> Eti ímijachahi vicavahaqueneana. Vahi vicavahaquenéna. Tapaenumava las nuéverava yáticarahi. Écharichuhi éti vahi vítuca vera viti israelítana te yáticarahi.

<sup>16</sup> Eta juca ímahaquenehi iáramiquenehi puiti, eta tacaheyarehi taicha mametarapihi ema Viya mayehe ema víyahaini profeta Joel. Tásiha, ema Joel májucunachapa eta mametarapihi ema Viya, ánipa tacahe: <sup>17</sup> “Jararihiya eta sácheanaya níjaracayare ema Espíritu Santo nayehe namutu ena achaneana. Tásiha, ena echichanaveana, ajairana énapa ena esenana, nacametaruinapa eta néchajiriruva. Ena amaperuana, níjaracayare eta náechirayare eta táicharacavayare. Ena ichavicachichana ticametacasianayare te navapure.

<sup>18</sup> Taicha nuvanecayare ema Espíritu Santo, níjaracayare mávahácavaca

namutu ena nuchanerana. Tasiha, nacametarairuinapa eta néchajiriruva tásihaquenehi nuyehe. <sup>19</sup> Te juca anuma nímerecayare eta tiáramicareana. Te juca apaquehe nucuchucayare eta ecutiarareanaya, apaesa ímatinu nuti nucarichu nurataha nicha tamutu. Nucamiricaya eta ecuñaraqui. Tépusaicavayare eta náitine ena achaneana váinarajiqueneanahi. Nucamiricayare te avasareana eta yucu étapa eta ichape quijare. <sup>20</sup> Eta sache, nucaemahayare eta tajaraiwa. Énerichuvare nítivachayare eta táimahi eta caje. Ítimeyare nícha. Tásiha, títecapainapa eta nusacherayare nuchaviraya nuti Iáquenu. Te jena sáchezare, ichape eta napisirainapa ena achaneana taicha nícuñacavacainapa namutu ena ticapecaturarahianaichaha. <sup>21</sup> Étisera eti ecasiñanuhi échajicanuhi eta te níjare nuti Iáquenu, nucuchucuhaheyare” macahepa ema Viya.

<sup>22</sup> Tiuri puiti, nuparapenaveana nujaneanana, esamavare eta juca apana numetaruheyare. Ímatihi ema Jesús Nazareno. Ema maca ajaira, mavaneruhi ema Viya. Écharichuhi éti eta tiáramicareanahi máichaqueneanahi ema Jesús. Ema Viya máijaracahi eta máitupajijiásiravayare, mavarairahi máimerecayarehi te emirahu eta émairahi mavaneru ema Viya. <sup>23</sup> Tiyerehichahahi eta juca, ema Viya mapanerecharipahi eta máicharacavayarehi ema Machicha. Eta tacahe, máisapahi eta íjararesirahi ema Machicha nayehe ena váinarajiqueneana achaneana. Éma, émetataruhi te crusu. Éma, ímicaparuhi. <sup>24</sup> Émasera ema Viya macaechepucahi ema Machicha. Macaitarecahi tayehe eta máepenirahi, taicha vahi mávarahahini mánasihini máepenahini. <sup>25</sup> Ema víyarahaini rey David timetacahavihi eta te Salmo eta máechajiriruva ema Jesús. Ánipa macahe: “Tata, piti pímararacanuhi eta picáchanéranuhi. Piti pijaneacanuhi te nuchacaya. Pétumechanuhi tamutu sácheana. <sup>26-27</sup> Tacahe, núrismure ichape. Nuvarahavare nujirauchaviyare néchajisihaviyare. Núti, te népenapa, tájina néñamavaimahi, taicha nucasiñavahi piyehe eta pímuchavirayarehi piáchanechanu. Vahi písapaimahi témitiequeneha eta náquehe nuti pichicha pémunaruquenehi. <sup>28</sup> Piti píjaracanuhi eta picaechepusiranuyarehi te nécari, nápechiravayarehi nítareca. Tásiha, nuvapinavayare eta nutiarirayare te pimirahu” tacahepa eta Salmo.

<sup>29</sup> Nuparapenaveana, véchahi vimutu eta máepenirahi macaecarasirahi ema viáchucaini David, taicha vímaharichaha puiti eta máecari. <sup>30</sup> Ema víyarahaini David, yátupiquenehi profeta. Macuchapahi eta táitauchiravayare eta mametacasivahi me Viya, eta matiarahirayarehi ema émana mámaríequeneyarehi ema ticaijareyarehi Cristo ema téjacayarehi te trono. Máitsivayarehi ema máchucaini. <sup>31</sup> Ema Viya máimechahi ema David eta máicharacavayarehi ema Cristo máechepusirayarehi te máecari. Tacahe, ema David májucunacharipa eta vahi tánasimahi tépena eta máchaneva ema Cristo; váhivare témitiequenehaimahi eta máquehe. <sup>32</sup> Puíticha, ema Viya macaechepucahi ema maca Jesús. Tásiha, viti véchajisihahi eta juca taicha vímahaquenehi eta mápechiravahi títareca. <sup>33</sup> Tacahe, ema Maiya macayapapa te anuma ema Machicha, macaejacaripa te mavaure. Tacahe, máijaracaripa ema Espíritu Santo ema máitsivayarehi taicha ema matuparaharichuhi. Tacahe, ema Jesús máevatacapa ema Espíritu Santo eta viyehe. Étara eta juca ímahaquenehi puiti, esamaquenehi eta máucupaisirahi ema Espíritu Santo.

<sup>34-35</sup> Vahi ecuimijachahini émainahini ema David mápanahini te anuma. Émahisera téchajisihahi eta matiarahirayarehi ema apana tiápanayarehi te anuma. Ánipa macahehi: “Ema Viya máichapa ema Tata Náquenu Cristo: Yare, péjaca te nuvaure, eta picuchapihayare eta nucaepuyusiraya te pimirahu ena

ticatianacavianahi, máichapaji ema Viya”. Étara eta juca macayemaquenehi ema víyahaini David.

<sup>36</sup> Tiuri puiti, emutu eti nujaneanana israelítana, nuvaraha ímatiyare ema Jesús émetataruhi, émara ema Viáquenu, émairahivare ema Cristo, maicha ema Viya —macahepa ema Pedro eta máechajiriruvahi.

<sup>37</sup> Tacahe, eta nasamirahi eta juca ena achaneana, ichaperinehi eta náeñamiravahi te nasamureana. Tásiha, nayaserecapa ema Pedro énapa ena apamuriana apóstoleana, ánipa nacahe:

—Viparapenaveana, ¿tájahapuca vícharacavaini víti? —nacahepa.

<sup>38</sup> Tacahe, ema Pedro majicapapa:

—Ítsivacha eta juca ítaresiraina te mamirahu ema Viya. Eta íjarasiravaya mayehe ema Jesucristo, ecaicachasiya emutu éti. Tásiha, ema Viya macaepahainapa eta epecaturana. Tíjaracahénavarepa ema Espíritu Santo. <sup>39</sup> Taicha ema Viya mavarahahi tíjaracaheyare ema Espíritu Santo emutu éti énapa ena echichanaveana énapa ena apavasanana, namutupa nácani manerejiruanahi máichuhaqueneanahi ema Viya, tayanapane ticavasanahi te tiyerehiqueneana avasareana —macahepa ema Pedro.

<sup>40</sup> Tacahehi eta juca máechajiriruvanahi ema Pedro. Ichape eta maconsejahiravacahi, ánivarepa máichahi:

—Ácaijuhe ema Jesús. Ínajica eta eváinarajivana. Érajicava nayehe ena tíchana eta tamauriqueneana —macahepa.

<sup>41</sup> Tacahe, natiarihi ena tisuapanahi eta máechajiriruvahi. Enevanepa ticaicachasiana éna. Mapanaqueneana mil ena tisuapajirahianahivare.

### *Eta náitaesirahi ena náinapureana téhicanahi ema Cristo*

<sup>42</sup> Ena achaneana, eta nasamarasirahi eta náimiturapiana ena apóstoleana, ichaperinehi nasuapa. Tásiha, tiúririnehi eta náitaesirana. Náemunacaine ena nachamuriana. Tamutu sácheana ticurujicacanahi eta nayujarasirayarehi étapa eta nanisirayarehi eta pan táicutiarahi eta máepenirahi ema Viáquenu. <sup>43</sup> Ichape eta náramirahi ena achaneana, taicha náimaharipa eta tiáramicareana náichaqueneana ena apóstoleana, máimicatasiravacahi ema Viya. <sup>44</sup> Namutu ena tisuapajirahiana tiúrujicavanaparácahi ticajicacanahi eta náimahaqueneana. <sup>45</sup> Te náimaha ema mácani nachamuri ticamunuvahi, náijarareca eta náimahaqueneana. Tásiha, náijaracapa eta plata ema ticamunuvahi, náimicatasihayare. <sup>46</sup> Tamutu sácheana tiúrujicavanahi eta te Templo. Tásiha, te napenana tíchuhacacanahi ténicacacanahi. Ticachanecacahanahivare eta nanisirahi eta pan táicutiarahi eta máepenirahi ema Viáquenu. Náurisamurevahi, táurivaipahi te nasamureana. <sup>47</sup> Najiraucha nacunachahi ema Viya. Tacahe, namutu ena apamuriana achaneana napicauchahi éna. Tásiha, tamutu sácheana ema Viya máichuhavacahi ena apamuriana tisuapanavare.

## 3

### *Eta manarasirahi ema achane masarini*

<sup>1</sup> Tiuri, étana sache, te las trespa cáperehi, ema Pedro émapa ema Juan tiyananapa tisiapanayarehi eta te Templo. Te jena hora, las trésqunenepa sache, hora eta nayujarasira ena israelítana. <sup>2</sup> Matiarahi ema achane masari. Máimiuchurehi eta mamásariva. Tamutu sácheana nanapana eta te Templo. Nanaquica eta te ichapepana tapaja ticaijare Tiúrinapana, mayaseseresihayarehi eta limosna nayehe nácani achaneana tisiapanapahi. <sup>3</sup> Tacahe, ema

masari, te máimahavacapa tisiapanayarehi ema Pedro ema Juan, mayaseacavacapa eta limosna. <sup>4</sup> Tacahe éna, náesenicapa ema masari. Tasiha, máichapa ema Pedro:

—Pímararacahavi.

<sup>5</sup> Tacahe, máimararacaripahi. Máimijachaipa nájaracayarehi eta plata. <sup>6</sup> Tásiha, ema Pedro máichapa:

—Tájina nuviya eta plata níjaracavihini. Jucarihiserá eta juca nucatajicaviyare. Nucanaracaviyare. Táichavene eta máitupajijiásirava ema Jesucristo ema Nazareno, nuvanecavi: Pécheputa, pipaica —máichapa.

<sup>7</sup> Tacahe, ema Pedro machuruvauchavanepa te mavahu vaure, macaecheputa. Énevanerínehi túmevaca eta mapaiqueana eta mayucarana. <sup>8</sup> Tacahe, ema masarini títahúchavapa titupiha, típaicapa. Tacahe, tisiapanapa te Templo máehicavacapaipa éna. Máeteresinapaipa eta mapaisirapahi. Macunachapaipa ema Viya, mahasulupayachavare eta macanarasirahi. <sup>9</sup> Namutu ena achaneana náimararacahi eta mapaisiraipahi, macunacharinehi ema Viya. <sup>10</sup> Te náimatipa ena achaneana ema masarini, ichaperinehi eta náramirahi. Ánipa nacahehi:

—Ánaquiaparipa eta mayaseseresirahi eta limosna ema maca, máejasiraparaca te tapaja ticajare Tiúrinapana taicha eta mamasarivahi. Puítisera típaicapa, téterecavarepa. ¿Tájahapuca máicharacavahi eta manarasirahi? —nacahepa.

### *Ticametarairu ema Pedro te Templo*

<sup>11</sup> Tacahe, ema masarini vaipa máinajiacavacahini ema Pedro ema Juan. Tacahe, náurujiacapa namutu ena achaneana te návihahi ena apóstoleana te tajuhe eta Templo, te tayehe eta alar máepiyarui ema reyni Salomón. <sup>12</sup> Tacahe, eta máimairahi ema Pedro ena achaneana náramirahi eta juca, máichavacapa:

—Tátanaveana, nujaneanana israelítana. Iáramihi éti eta juca víchirahi víti. Ímijachapa vítijivahi vicanaraca ema maca achane masarini. Ímijachapapuca víti vítupajijiacavahi táichavene eta víjarasiravahi mayehe ema Viya. Éta juca ánira tacahehi, vahi vítina vicanaracahini ema maca. Ema ticanaracahi, émaquenehi ema Jesús Nazareno, <sup>13</sup> taicha ema Viya\* tíjaracahi eta tamutuirayare marataha ema Machicha Jesús. Émara ema maca Jesús ema épuruquenehi éti, íjarareruhi mayehe ema aquenuca apavasajuecu Pilato. <sup>14</sup> Éma, mavarahahineni macaitica ema Jesús, étisera vahi ávarahahini máuchucuhahini ema máuriquenénihi yátupiquenehi santo. Masapihapa eyaseserecahi máuchucuha ema ticapahi. <sup>15</sup> Tásiha, émapa ímicapacahi ema Ticaitarecavahi. Émasera ema Viya macaecheputa te máecari. Véchajisihahi víti éma taicha vímahaquenehi eta mápechiravahi títareca. <sup>16</sup> Puiti, ímararacahi eta manarasirahi ema maca masarini. Éta juca eta tímicaecherachahi eta machavirahi títareca ema Jesús. Taicha émahí ema tíjaracavahi eta vítupajijiasiravahi eta vicanarasirahi ema maca achane, táichavenehi eta vicasiñairahi éma.

<sup>17</sup> Tiuri puiti, nuparapenaveana, éti ímicapacahi ema Jesús taicha vahi ímatihini eta émairahi ema Cristo ema vicuchapaquenehi. Énaripa ena tuparairucana eyehe, váhivare náimatihini éma. <sup>18</sup> Étasera tacaheyarehi eta juca

\* **3:13** Ema Pedro téchajicahi te náechajirirua ena israelítana, máimijarechirahi ema Viya: “ema nacasiñaquehehi ena viáchucanaveanaini ema Abraham, ema Isaac, ema Jacob, énapa ena apamurianaini viáchucanaveanaini”.

taicha máechajiriruvaichuhi ema Viya nametacasivahi ena profetana eta macatajivairayarehi ema Cristo.

<sup>19</sup> Tásiha puiti, éneuchavainapa ecáijuhénapa ema Viya, apaesa macaepaha éma tamutu eta epecaturana. Énerichuvare ema Viya técasarechaheyarepa éti. <sup>20</sup> Ene ecahehi etsecava ejacapayare ema Jesucristo te machavapa. Éma, iáquenuyare taicha manerejiruhi ema Viya te tépanavainapa tamutu. <sup>21</sup> Ema maca Jesucristo puiti téjacahi te anuma. Jararihiyaresera eta sache eta machavirayare, máetupiricayareva tamutu. Ánaquiaparipa, eta juca mametarapihi ema Viya nayehe ena mayeheana santo profetanaini eta náimitusirayare ena achaneana. <sup>22</sup> Ema émana víyarahaini profeta ema Moisés, mametacahi ena viáchucanaveanaini, ani macahehi: “Ema Viya Dios tivane-canuhi núti numetacaheyare eta máechajiriruva. Títecayare ema apanayare profeta mavaneruyareva ema Viya, tacutiyare eta mavanesianuhi núti. Éma, tiúchucayare te namuri ena viámariequeneana. Tatuparaca nasuapayare tamutu eta mavanairipianayare. <sup>23</sup> Taicha ema Viya máimicapacayare namutu ena masuápajiráirahánayare mayehe ema profeta máiteruyarehi, taicha mamavarahahi nacasiapahini ena machanerana” macahepa ema Moisés.

<sup>24</sup> Namutu ena apamuriana profetana, émaripa ema Samuél énapa ena náequeneruana profetana, náechajisihahi eta juca vímahaqueneanahi puiti juca sácheana. <sup>25</sup> Ánaquiaparichaha, te vuíchaha máuchuchahini ema víyarahaini Moisés, ema Viya mametacaipa ema viáchucaini Abraham, ánipa macahe: “Nunerejicayare ema émana piámariéquene tiúchucayare. Éma, tíjaracaya eta táurivaya eta náitaresiraya namutu ena achaneana apánapanenéjiqueneána te juca apaquehe” macahepa ema Viya. Tiápechava mametacaipa étarichuhi máechajiriruvana mayehe ema machichaini Isaac, énapa ena mámarina-veánaini. Puiti títauchavaripa eta juca máechajiriruvaichuhi ema Viya. Tásiha puiti, éti tituparacahehi ínapucayare ejacapa eta máijjararuheya ema Cristo, taicha étirichuhi israelítahehi. Ímatihivare eta apamuriana máechajiriruvana ema Viya, nájuchaqueneana ena víyaranaini profetana. <sup>26</sup> Tásiha, eta macaechepusirahi ema Viya ema Machicha Jesús, tivanecahavipa vimetac-ahe éti. Te ecasiñavapuca eta mayehe, máquijisinaheyare eta evainarajivana. Tíjaracahenapa eta iúricacarevayare —macahepa ema Pedro.

## 4

### *Ema Pedro émapa ema Juan námaqueneanahi te namirahu ena tuparairucana*

<sup>1</sup> Téchajicanarichaha ema Pedro ema Juan te namirahu ena achaneana, títecapanapa ena tuparairucana, énapa ena tímiturecarahiana ticaijareana saducéoana. Námapahivare ema náquenuruha ena tasuntarurana eta Templo. <sup>2</sup> Tisemanapa taicha vahi náuricahini eta nasamairirisirahi ena apinana apóstoleana náimitusirahi ena achaneana. Vahi náuricahini eta nametasirahi eta yátupiquenerahi eta máechepusirahi ema Jesús te máecari, mápechiravahi títareca. <sup>3</sup> Tacahe, nacaratacavacapa, náimisiapavacapa te cárcel. Váipasera nacayaseserehahini, taicha cáperehichícharínehi. Tiámainucavapa te apanapa sache, nacuchucavacaya ticayaseserehianayarehi. <sup>4</sup> Camurianasera ena tisuapanahi táichavenehi eta nasamararasirahi eta náechajiriruvahi ena apóstoleana. Eta natupahi ena téhicanaripa ema Viáquenu Jesucristo cinco mil ena achaneana ajairana. Camurianavare ena esenana énapa ena amaperuana. <sup>5-6</sup> Te apanaquenepa sache, ema corregidor Caifás ticurujicapa ena apamuriana aquenucarahana tayehe eta ichapequene cabildo te



Jerusalén. Natiaríhivare ena escribánoana. Matiaríhivare ema Anás ema pasado corregidorhi, énapa ena machichanaveana: ema ticaijarehivare Juan émapa Alejandro. Natiaríhivare ena apamuriana machichanaveana.

<sup>7</sup> Tacahe, náemepanapa ema Pedro ema Juan te cárcel. Nacatupiacapa te namirahu, nayaseserecapa. Ánipa naicha:

—Éti, vahi vituparacahehine eta ímitusirahi eta juca. ¿Nájaha tivanecahehi icha eta juca? ¿Nájaha ema tíjaracahehi eta ítupajijiasiravahi? —nacahepa.

<sup>8</sup> Tacahe, ema Espíritu Santo máimicatcahi ema Pedro eta majicapirahi ena tiyaserecanahi, ánipa macahe:

—Tátanaveana juéseana, tátanaveana víyacárana te juca viávasa. <sup>9</sup> Evaraha echa eta juca táuriqueneana táicharacavahi eta vicanarasirahi ema maca achane macajumaquenenihi. <sup>10</sup> Vimetacaheyare puiti. Vivaraha vémechaheyare, eti énapa namutu ena achaneana te juca viávasa Israel. Ema maca achane, ímahaquenehi eta manarasirahi. Vivaraha vímimatichahe eta máitupajijiasirava ema Jesucristo ema Nazareno tacanaracahi eta vipiarasirahi te máijare. Éma, émetatáruhi te crusu, ecaparuhi. Émasera ema Viya macaechepucahi te máecari. <sup>11</sup> Éti, épuruhi ema Jesús, ema manerejiruquenehi ema Viya. Puiti, ecutipa ena máitucarahana tépiyarecana peti, te náepurupuca eta tatumequene esuiqui táesuiquirayarehini eta peti. <sup>12</sup> Macarichu ema Jesucristo eta marataha eta macatiuchirahaviya macuchucuirahaviyarehi. Taicha ema Viya manerejiruhichuhi ema Jesús eta macuchucuirahaviyare. Nájina apanaina manerejiruinahi te vimuri viti achaneana eta te juca apaquehe —macahepa ema Pedro.

<sup>13</sup> Tacahe, ena tuparairucana náraminehi eta náitusirahi téchajicana ema Pedro ema Juan. Náichacacapa:

—¡Tájina vahi napicacaracavahine eta viyehe! Ena nani tájina náitucaquenéna eta letra. Máiturereanahi. Tájina náimatiyahine eta viyehe escuela. ¿Májaracavacahipuca ema Jesús eta náitupajijiasiravahi te macachanevacachaha ema? —náichacacapa.

<sup>14</sup> Tájina naviyahine nacayema taicha matiaríhi ema achane masarini, titupihahi te namirahu. Taicha náimahahi eta yátupirahi eta manarasirahi. <sup>15</sup> Tacahe, navanecapa eta nacuchusiraya ena apóstoleana eta te náuruji-siavahi. Nanasipa ena aquenucana téchajiricavanaripa. <sup>16</sup> Ánipa nacahe:

—¿Tájaha vícharacavayare nayehe ena nani? Taicha namutu ena achaneana ticavasanahi te juca Jerusalén náechahi eta náichirahi ena nani eta tiáramicare. Tásiha, vahi visuapacaremahi te vépiyaequenehavacapuca. <sup>17</sup> Váhisera távaraha vísapa náimiyanova náimitureca nayehe ena achaneana. Vípícararecavacaya apaesa vahi nacuimiyanova náechajisiha eta máechepusirahipuca ema mácanínnavaji Jesús —nacahepa.

<sup>18</sup> Tacahe, nacasiapavarepa ema Pedro ema Juan. Navanecapa éna, ánipa naicha:

—Vahi vivaraha ímiyanova échajisiha eta juca, váhivare ecuimitureca nayehe ena achaneana eta máechepusirahipuca ema Jesús —náichapa.

<sup>19</sup> Najicapapasera ema Pedro ema Juan, ánipa naicha:

—Esamahavichaha. Ema Viya timetacahavi eta véchajisiháirayare. Étisera ecatichapa véchajisiha éma. Émaquenehisera tisuapacarepanahi eyehe éti. Epanerecha yátupina. <sup>20</sup> Vítí, vahi vimatinaimahi eta véchajisiháiraya tamutu eta juca vímahaqueneanahi visamaqueneanahivare mayehe ema Jesucristo —nacahepa.

<sup>21</sup> Tacahe, ena tuparairucana eta nasamirahi eta namasuapirahi, tisem-anapa. Tacahe, náipicararecapa. Tájnapasera náicharachini. Nacaiticapa taicha tájina naviurevainahini jácani táimicuñacahini. Taicha namutuhi ena achaneana nacunachahi ema Viya táichavenehi eta náimahaquenehi. <sup>22</sup> Cuarenta áñoripa eta mahañora ema maca achane masarini. Tétavicavahi eta tiáramicarevahi eta manarasirahi maicha ema Vi ya.

*Ena téhicana ema Jesús tiyaseserecana eta natumesamurevaina*

<sup>23</sup> Eta náuchucuiraripa ema Pedro émapa ema Juan, tiyananapa eta te návihahi ena nachamuriana. Nametacapa tamutu eta nacatianasirahi ena tuparairucana. <sup>24</sup> Te náechapa, ena nachamuriana tiyujaracanapa namutu. Ánipa nacahe eta nayujarasirahi:

—Tata Viáquenu, píti pépiyacahi eta anuma, eta apaquehe étapa eta ichapequene une mar. Pétupiricahi tamutu eta juca vímahaqueneanahi puiti. <sup>25</sup> Píti pimetacahi ema víyahaini David pivanarainihi eta májucunachiraya eta te Salmo. Ani tacahehi eta májurehi: “Tatiarihiya eta avasareana, ena achaneana navarahaya nacanara ema Viya. Énaparichu ena nujaneanana, énerichuvare napanerechaya nacanara ema Viya. Máetupicushiana éna. <sup>26</sup> Ena réyeana te juca apaquehe títsecavanayare eta nacanarairayare. Énaripa ena aquenucarahana nacapanereruya nacanaraya ema Viya, nacanarayeva ema Cristo manerejiruhi éma” tacahehi eta májurehi ema David.

<sup>27</sup> Étaripa te juca viávasa, ticuticacahi eta napanerechirahi ema Herodes Antipas, ema Poncio Pilato, ena apavasanana, énapa ena vijaneanana israelítana, navarairahi nacapaca ema sántoquene pichicha Jesús, ema pinerejiruquenehi. <sup>28</sup> Títauchavahi naicha eta juca pipanereruana étairayarehi tacaheyarehi eta péchajiriruvana. <sup>29</sup> Pítisera, Tata Viáquenu, pímararachavihi puiti eta náichirahavihi viti pivanaranahi. Píjaracahavisera vitumesamurevaina eta véchajisihairaya eta péchajiriruva. <sup>30</sup> Píjaracahavi eta vítupajijjá-siravaina viratahairaina vicanaraca ena nacajumaqueneana, vímeresiraina eta tiáramicareana táichavenehi eta vicasiñairahi ema sántoquenehi pichicha Jesús —nacahepa.

<sup>31</sup> Te títapiricanapa eta nayujarasirahi, tíjahúchavapa tiyayacare eta apaquehe návihahi éna. Tacahehi eta mávahásiravácachivare namutu ema Espíritu Santo. Váipasare napicacaracavahini eta náechajisirahi eta máechajiriruva ema Viya.

*Ticajicacanahi tamutu eta náimahaqueneana*

<sup>32</sup> Namutu ena nasimutuvaqueneana tisuapajirahianahi, ticuticacahi eta napanereruana eta nacajicacairahi. Namutu nácani téchanahi eta náimahaqueneana nacayehequeneanahi, vahi nayavanihacacahini. Tatupiruvahi te nasamureana eta nacajirahi. <sup>33</sup> Tacahe, tímiyanavanahi ena apóstoleana eta náechajisihairahi eta máechepusirahi ema Viáquenu Jesucristo. Tisuapacarepaicha eta náimiturapianahi. Máimicatavacachivare ema Viya ena téhicanapahi ema Jesús. Namutu éna, típicauchacareanahivare ne achaneana. <sup>34</sup> Nájina émanáinahíni te nataracu máemepaurechavahíni. Taicha ena ticayeheana apaquehe, pétipuca, náijararecapaipa. <sup>35</sup> Tásiha, náijaracavare eta plata ena apóstoleana. Tásiha, ena apóstoleana náijaracavacavare nácani páurepananahi.

<sup>36</sup> Matiarihivare ema achane ticaijare José. (Éma máuchurehi eta te tiúrupuhi te mar ticaijare Chipre.) Ema maca José náumurivaichaha ena levítana. Ena apóstoleana nanacapa eta máijarehi Bernabé (te véchajiriruva ticaijare

Ticaurisamurerahi). <sup>37</sup> Ema maca máijararecapa eta mapenapahini. Tásiha, máijaracapa eta plata ena apóstoleana.

## 5

### *Eta mapecaturahi ema Ananías ésupa esu mayena Safira*

<sup>1</sup> Matiarihivare ema achane ticaijarehi Ananías ésupa esu mayena ticaijaru Safira. Énerichuvare náijararecapa éna eta nayehe apaquehe napenapahini. <sup>2</sup> Ema maca achane macaerajicapa ticutimuriahacaca eta plata tavachahi eta mayehe apaquehe. Esu mayena suéchahi eta mayumurusirahi eta ticutimuriahacaca eta plata.

Tacahe, te títecapapa ema achane nayehe ena apóstoleana, máichapa:

—Níjararecahi eta nuyehe apaquehe. Júcahi tamutu eta plata tavachahi —macahepa.

<sup>3</sup> Tásiha, ema Pedro máichapa:

—Píti, Ananías, ¿tájaha tacayema písapavahi ticaetemavi ema Satanás? Pipanerechaipa pivayuaracayare ema Espíritu Santo eta piyumurusirahi ticutimuriahacaca eta tavachahi eta piyehe apaquehe. <sup>4</sup> Pímaha, Ananías. Piyeherichuhi eta apaquehe píjarareruhi. Nájina tipamicavinahi eta pinaquisiravaya. Puiti eta juca píjarasiravahi pinaquicava, pépiyahirahipaipa pímiyahahi tamutu eta juca plata tavachahi eta piyehe apaquehe. Pátupiruvapaini eta pivarahaquenehi pinaquica. Émasera ema Viya máimararacahi eta juca pépiyahiraivahi. Vahi vítinahini pivayuaracahini —máichapa ema Pedro.

<sup>5</sup> Te masamapa ema Ananías eta juca, tiáquipaicavapa, matupiru tépena. Te nasamairiricapa ena achaneana, namuturinehi tipicana ichape. <sup>6</sup> Tacahe, nararihi ena natuparaháichuhi técararecana. Navehapa eta máquehe ema Ananías. Náyuruacapa. Námapa te ecari, náecarapanapa.

<sup>7</sup> Te táequenepa eta mapanaquene hora, títecapapa esu Safira, mayena ema Ananías. Vuíchaha suéchahini eta máicharacavahi ema suima eta máepenirahipahi. <sup>8</sup> Tacahe, ema Pedro mayaserecapa, ánipa maicha:

—Pimetacanu. Eta juca plata mámaquenepahi ema pima, ¿étahipuca tamutu eta tavachahi eta eyehe apaquehe? —máichapa ema Pedro.

Tásiha, sujicapapa:

—Eta tavachahi tamutu —suíchapa.

<sup>9</sup> Tacahe, ema Pedro máichapa:

—¿Tájaha tacayema ecuticacahi eta juca épiyahiraivahi evayuarasirahi ema Espíritu Santo? Ávane tichavana ena técarapananahi ema pímaini. Tásiha, puiti pítipavayare tiámavianayare —máichapa.

<sup>10</sup> Tacahe, eta máichirahi ema Pedro, enevanepa tiáquipaicavahi ésu te máivapechacaya ema Pedro. Tépenavarepa. Te tichavanapa ena técarapananahi ema suímaini, náimaharinehi ésu tépenaipavare. Navehavarepa esu, námavarepa náecarapana te machacaya ema suímaini. <sup>11</sup> Te nasamairiricapa namutu ena achaneana, ichaperinehi eta napisira ema Viya, navetijipa eta napisirahi ena téhicanahi ema Cristo.

### *Máijaracahi ema Viya ena apóstoleana eta náimeresiraya eta tiáramicareana*

<sup>12</sup> Tacahe, ena apóstoleana, ichape eta máijarasiravacahi ema Viya eta náimeresirayare eta tiáramicareana te namirahu ena apamuriana achaneana. Ticurujicacánahivare tamutu sácheana ena tisuapajirahiana te náurujisirareva te tajuhe eta Templo, te tayehe eta alar máepiyaruihi ema reyni Salomón. <sup>13</sup> Namutu ena apamuriana achaneana

máehicarahanaríchaha ema Jesucristo, vahi napatsicavahini nacanara taicha namutu napicauchahi. <sup>14</sup> Camurianapaipasera ena ajairana énapa ena esenana ena téhicanapaipahi ema Jesús. <sup>15</sup> Camurianaipa ena nacanararuanapáipahi ena apóstoleana. Tacahe, námavacapahi ena apamuriana nacajumaqueneana, nanaquicapaipa te calle mayanihayarehi ema Pedro. Eta máetavisirayarehi éma, távichayare eta macuna, tacanaracayarehi eta najumana. <sup>16</sup> Énerichuvare, títecapanapa te Jerusalén ena achaneana tiásihana te avasareana nachacayarahanahi. Námapahi ena nacajumaqueneana énapa ena návaháruana ena éreanana. Namutu ena nani tinaracanapahi tayehe eta náichavaquenévanahi.

### *Naémeratacapa ema Pedro émapa ema Juan*

<sup>17</sup> Váipasera máuricahini eta juca ema corregidor, énapa ena machamuriana. (Saducéonahi éna.) Tisemanarinehi táichavenehi eta náehisirahi ena camuri-queneana achaneana eta náimiturapihi ena apóstoleana. <sup>18</sup> Tacahe, nacavainairipipa nacaratajica ena apóstoleana. Náimisiapapa te cárcel, ticaeratanapa. <sup>19</sup> Émasera ema Viya majaneacavacahi éna. Te jena yati, mavanecapa ema mayehe ángele. Mavejiapana eta cárcel návihahi éna. Mavanecapa náuchuca, ánipa maicha:

<sup>20</sup> —Eyana ímerecava te jena Templo. Emetaca ena achaneana eta mavarairahi ema Viya máitsivachaya arairuya eta náitairesirayare ena téhicanaya ema Jesucristo —máichavacapa ema ángele.

<sup>21</sup> Náuchusihapa ena apóstoleana te cárcel, timapicucuhichaha te tiyananapa tayehe eta te Templo. Tinahacavanavarepa tímiturecana.

Tacahe, te jena yáticarahi ema corregidor mavanecapa ena comisarioana máimichuhapa namutu ena apamuriana tuparairucana énapa ena náiyacarana israelítana. Te tiúrujicavanapa namutu, nacavanairipipa náepana ena apóstoleana eta te cárcel. <sup>22</sup> Te títecapanapa te cárcel ena suntaruana, navejiacapa eta tapaja. Nájinari pahisera. Tacahe, tichavanapa nayehe ena náquenuruhana. Nametacapa eta nájinari pahihahi ena apóstoleana. <sup>23</sup> Tacahe, náichapa:

—Te vítecapauchapa eta cárcel, vímahapa tanasihi ticaeratahi eta tapaja. Natiarihivare ena séntinélana tijaneacanahi eta tapaja. Tacahe, te vivejiacapa eta tapaja, nájina émanainahini vichimapahini te tajuhe —nacahepa ena vanairucana.

<sup>24</sup> Te máechapa ema corregidor, énapa ena machamuriana tuparairucana, émapa ema náquenumuri ena tasuntarurana eta Templo, náamirinehi ichape. Tacahe, náichacacapa:

—¿Tájaha tacayema eta juca? Vaipa vímatiequeneha. ¿Tájahapuca vícharacavaya? —náichacacapa.

<sup>25</sup> Téchajiricavanarichaha éna, títecapanecha ema émana achane. Mametacavacapa éna. Ánipa macahe:

—Ena naena ajairana érataruanahi te cárcel, náenahi ánaqui te Templo tímiturecanahi nayehe ena achaneana —máichapa.

<sup>26</sup> Tacahe, ema náquenuruha ena suntaruana, émajacaru vapa tiyana. Mámamurihapaipahi ena suntaruana, náepanayarehi ena apóstoleana. Jéhesare, námamurihapa, tájinasera náicharacapahini eta námirapahi taicha napicahi ena apamuriana achaneana natupisicavacahini te márijahiana. <sup>27</sup> Te nacaitecapapa, nacatupihapa te namuri ena tuparairucana. Tásiha, ema corregidor ánipa maicha:

28 —Víti vivanecahehi muraca eta vaipa ecuapechava ecuimitureca eta máechepusirahipuca ema Jesús, tasiha, éti ímiyanavarichucha ímitureca. Namutupa ena achaneana tayehe eta juca viávasa Jerusalén náitucapa eta ímiturapiana éti. Visapihapa evaraha vítiyare táecatiha eta máepenirahi ema achane Jesús. ¿Tájaha tacayema vahi esuapahavihini? —macahepa.

29 Tacahe, ema Pedro énapa ena apamuriana apóstoleana najicapapa, ánipa naicha:

—Tatúparáca mativayare visuapa ema Viya. Éma tisuapacarepana eyehe éti. 30 Víti, véhicahi ema Viya, émarichuhi nacasiñaquenehi ena viáchuca-naveanaini. Émahi ema ticaechepucahi ema Jesús, ema ímicaparuhi eta émetatasirahi te crusu. 31 Tásiha puiti, ema Viya máunacahi te anuquehe anuma. Macaejacahi te mavaure tayehe eta trono. Máijaracaripa eta matuparahayarehi Aquenucayarehi Ticatiurahiyareva. Taicha mavarahahi ema Viya vimutuyare viti israelítana véneuchavaya mayehe, apaesa éma tiperdonachahaviyare tamutu eta vipecaturana. 32 Víti véchajisihahi eta juca taicha vímahaquenehi eta mápechiravahi títareca. Víti véchajisihahi maicha ema Espíritu Santo máijararuhavihi ema Viya viyehe viti visuapana éma — náichapa ena apóstoleana.

33 Te nasamapa eta juca ena aquenucana, tisemanapa. Navarahapa nacapacavacayarehini. 34 Matiarihihisera te nataracu ema achane ticaijare Gamaliel. Ema tuparairucahi doctrinero fariseo. Ema maca achane ticapicahuhi nayehe namutu ena achaneana. Tacahe, titupihapa te namirahu. Macavanairipipa náuchucachaha ánipina ena apóstoleana. 35 Tacahe, máichavacapa ena machamuriana aquenucarahana:

—Tátanaveana, nujaneanana israelítana. Échapava eta evarahaquenehi íchaya nayehe ena nani achaneana. 36 Échapuca éti cape juca táitaresirahi, téchepucahi ema émana achane ticaijare Teudas. Éma macahehi eta máitupajijiásiravahi. Tásiha, camuriana ena achaneana téhicanahi. Cuáttrocientoanahi ena ajairana ena machaneranahi. Tásihasera, nacapacahi ena mánarana. Tásiha, namutu ena téhicanainihi téjanerepaicanahi. Títavapa tamutu. 37 Tásiha, te táequenevarepa, te jena sache eta nacatupairahi ena achaneana, téchepucavarepa ema apana ema ticaijare Judas, ema ticavasa te Galilea. Camurianavare ena téhicanahi. Énerichuhivareséra nacapacahi ena mánarana. Namutuhivare téjanerepaicana ena téhicanainihi. 38 Tiuri puiti, esamanu eta juca numetaruheya. Ésamiricachucha ena nani achaneana. Vahi ecuimicasiapava nayehe. Taicha eta juca náichaquenehi te nayehechuchapuca éna, títavayarehi. 39 Téheserapuca mayehihi ema Viya, vahi eratahaimahi ecamitiaca. Échapavachucha. Machu ecucaemuñava ecanara ema Viya —máichavacapa.

40 Tacahe, tésamiricavanapa namutu. Náimisiapavarepa ena apóstoleana. Náestacavacapa. Tásiha, navanecavarepa eta vaipa nacuapechava nacuechajisiha eta máechepusirahi ema Jesús. Tásiha, nacaiticavacapa. 41 Tacahe, tiúchucanapa ena apóstoleana te náurujisiavahi ena tuparairucana. Tiúrisamureanapáichucha eta nacaestairahi. Ánipa nacahe:

—Ema Viya máimarracahi eta vicamichirahi tamutu eta náimicatsiriasirahavihi táichavene eta véhisirahi ema Jesús —nacahepa.

42 Váhiquene nacatsimavahini. Tímiturecanáichucha tamutu sácheana, náechajisihahi ema Jesucristo. Tímiturecanahi te Templo étape te pétiana.



## 6

### *Ticatuparacasiana ena siéteana ajairana*

<sup>1</sup> Te jena sácheana, eta nasimutuvaipa ena téhicanahi ema Jesús tisiapanapaipa ticajanemurianapaichucha. Natiarihivare ena israelítana, apáechajiríruvanarípa éna. Natiarihihi ena páurepanana te nataracu énapa ena máimaruana. Ena nani najacapahi eta nayehe ración tamutu sácheana. Étana sache, ena nani apáechajiríruvanarípa vaipa náurisamurehini taicha vaipa nácuticacahini náechapajirícahina ena máimaruana. Ánipa nacahe:

—Váipa nácuticacahini eta najacapirahi eta tinicacare ena vijaneananarichuhi máimaruana —nacahepa.

<sup>2</sup> Tacahe, ena dócequeneana apóstoleana nacurujicapa namutu ena téhicanahi ema Jesús. Tásiha, náichapa:

—Vahi táuricahini víchepaichahini eta vicametarairuira eta máechajiriruva ema Viya. Ticaichepairicahavipa eta víjarasirahi eta tinicacare ena vichamuriana. <sup>3</sup> Tiuri puiti, nuparapenaveana, tacamunu vinacayare siéteanaina ena ajairana te emuri éti, nácani ímatiqueneana tiúriana achane, téchemarahiana náimatiequeneha tamutu, mávaháruanahivare ema Espíritu Santo. Énaina vituparaca naicha eta juca. <sup>4</sup> Taicha víti vímiyanavayare viyujaraca vímiturecayare eta máechajiriruva ema Viya —náichapa ena apóstoleana.

<sup>5</sup> Tacahe, namutu navaraha eta náechajiriruvahi. Tacahe, ticanerejianapa ena ticatuparahanayare. Navehapa ema Esteban, achane tiuri, tisuapajirahiquene mayehehi ema Viya, mávaháruhivare ema Espíritu Santo. Navehavarepa ema Felipe, ema Prócoro, ema Nicanor, ema Timón, ema Parmenas, émapa ema Nicolás\*. <sup>6</sup> Tacahe, náichuhapa te namirahu ena apóstoleana. Tásiha, nanacapa eta navahuana te nachutiana, nayujarauchapa, náijarasihapa eta náematanerepiyarehi.

<sup>7</sup> Tiuri, eta nasamirahi eta máechajiriruva ema Viya, camurianapaipaicha ena téhicanahi tayehe eta avasare Jerusalén. Tisimutuanavare ena tiyujararahiana israelítana náunacaipa te nasamureana eta náehisiraipa ema Jesucristo.

### *Eta nacaratasirahi ema Esteban*

<sup>8</sup> Tiuri, ema Viya máimicatacahi ema maca Esteban. Máijaracahivarehi eta ichape eta máichirahi eta tiáramicareana te namirahu ena achaneana.

<sup>9</sup> Tatiarihivare te Jerusalén eta apana náurujisirareva. Tiúrujicavanahi ena israelítana prisionéroanaini náuchucureanapasera. Éna tiásihanahi te apanana avasareana, te Cirene, te Alejandría, te Cilicia, étapa te Asia. Nácapaemajiricapa ema Esteban te yátupihpuca ema Jesús émaquenehi Cristo. Vahi nasuapahini taicha tétavicavahi eta namasuapajiraivahi. <sup>10</sup> Ema Espíritu Santo máijaracahi ichape ema Esteban eta máitusiraya téchajica. Eta tacahe, vahi náratahahini nacachuriaca éma. Tisemanapa eta máitahasiravacahi. <sup>11</sup> Tacahe, náimitucapa ena apinana ajairana navachachaqueneanahi eta náepiyequenehairaya ema Esteban. Ánipa naicha eta náimitusirahi:

—Visamahi ema maca macaecaichihi ema víyarahaini Moisés, macaechivare ema Viya —náichapa.

<sup>12</sup> Tacahehi, eta nacaechepusirahi eta semanere nayehe ena achaneana, énapa ena aquenucarahana, énapa ena escribánoana. Náimiyusemacavacapa.

\* **6:5** Ema maca Nicolás, ticavasainihi eta te avasare Antioquía eta máachusinehi. Éma, apavasanahi, máehicahinihivare eta nayeherepiana ena israelítana. Tásiha puiti, máehicaipa ema Jesucristo.

Tásiha, nacaratacapa ema Esteban. Námapa ticayaserehiya te namirahu ena tuparairucana. <sup>13</sup> Tásiha, náichuhavare ena apamuriana tépiyaequenehanaya. Ánipa nacahehi eta náepiyahiraivahi:

—Ema maca achane vahi máituca timatina macaecahi eta viyehe Santo Templo. Máepuruvare eta viyeherepiana. <sup>14</sup> Énerichuvare macahehi ema Jesús Nazareno máquipaicayareji eta Templo, máitsivachayarehiji eta viyeherepiana máijararuhavihi ema víyarahaini Moisés —náichapa ena tépiyahiraianahi.

<sup>15</sup> Tacahe, namutu ena natiarihiqueneanahi náejaruanahi náimararacaripa ema Esteban. Eta mamira macavasirahi ema ángele.

## 7

### *Eta maconsejarapi ema Esteban*

<sup>1</sup> Tacahe, ema corregidor mayaserecapa ema Esteban, ánipa maicha:

—¿Yátupihi ene picahehi eta juca nametarapianahi ena nani? —máichapa.

<sup>2</sup> Tacahe, majicapapa ema Esteban, ánipa maicha:

—Tátanaveana, nuparapenaveana. Esamanuchaha. Eta acane, ema Viya tiúcupaicahi másihahi te mávasa anuma. Tímerecavapa mayehe ema viáchucaini Abraham. Ema Abraham, mávihaichaha te tinapaica te apaquehe ticaijare Mesopotamia, ticaijarevare Caldea. Vuíchaha mayanahini macavasahini te Harán. <sup>3</sup> Máechajicahi ema Viya ema Abraham, ánipa maicha: “Pijunijica eta juca piávasa, énapa namutu ena pijaneanana. Piyana eta te apana apaquehe. Núti níjaracaviya eta arairu piávasaya” máichapa ema Viya. <sup>4</sup> Tacahe, ema Abraham masuapapa; tiúchucapa eta te tinapaica te Caldea. Tiyanapa eta te avasare Harán. Te táequenepa eta máepenirahi ema máiyaini, mavanecapa ema Viya ema Abraham máiteca eta te juca apaquehe viávihahi puiti víti. (Te jena áñoana ticaijarehi Canaán.) <sup>5</sup> Tájinasera máijarahini mayehenahini apaquehe, ánicuchicháinahipucáini. Mametacahisera eta máijarasirayarehi eta mayeherehi apaquehe. Taicha eta apaquehe máijarayarehi nayeheyarehi ena machichanavequeneana te maépenapa ema Abraham. Nájinarichahasera machichanaveanainahini te jena áñoanahi. <sup>6</sup> Énerichuvare mametacahi ema Viya, ánipa maicha: “Ena pichichanavequeneanayare ticavasarecanaya nayehe ena apavasajuecuana. Ticatajivanayaresera naicha ena napaureanaya. Nacajireyare. Cuatrociento áñooyare eta náichirayare. <sup>7</sup> Nútisera, níjaracayare eta náicuñayare ena achaneana te jena avasare nácani ticajireanayare ena pichichanavequeneanayare. Tásiha, te táequenepa, nucuchucuhavacainapa. Tásiha, títecanainapa ani te juca najirauchihanuyare” máichapa ema Viya.

<sup>8</sup> Ema Viya mafirmachapa eta matratune eta máitauchirayarehi eta juca máechajiriruvahi mayehe ema Abraham. Énerichuvare mavanecapa ema Abraham timarcachavayare, máicutiarayarehi eta macasiñavairahi me Viya. Namarcachayareva namutu ena machichanaveana ajairana, énapa ena mámariequeneana ajairana. Eta tacahehi, te óchoquenepa sache eta máuchusirahi ema Isaac machicha ema Abraham, mamarcachapa. Énerichuvare, máichahi ema Isaac te macachichapa ema Jacob. Ema Jacob, énerichuhivare máichavacapahi ena dócequeneana machichanaveana, ena víyanaveanaini víti. <sup>9</sup> Ema José, nacapinaruhi ena maparapenaveana taicha máemunacapanahi ema naiya. Eta tacahe, náijararecapa ena maparapenaveana nayehe ena apavasanana. Tásiha, éna náequcapa náijararecapa

mayehe ema ticavasa te apana avasare Egipto. Émasera ema Viya majaneacahi ema amaperu José. <sup>10</sup> Macatiuchahivare tayehe eta macatajivairana. Máijarahivare eta máitucaqueneyare. Ema rey aquenucahi tayehe eta Egipto máemunacahi ema José. Máimatiacahi eta máitusirahi. Eta tacahe, ema rey macajupahahi eta majaneasirahi tamutu eta máimahaqueneana. Aquenucahi máicha, nayehe namutu ena ticavasana te Egipto.

<sup>11</sup> Tásiha, te jena añoanahi, táitecapauchapa eta ecuha te tamutu eta avasareana tayehe eta táunavahi eta Egipto étapa eta Canaán. Tétavicavahi eta nacatajivairahi ena achaneana. Tásiha, ena viáchucanaveanaini, tájina naviyahini eta nanicaquene. <sup>12</sup> Émasera ema Jacob te masamairiricapa eta tatiarirahahi eta tinicacare te Egipto máunarui ema rey, máevatacapa ena machichanaveana eta navacharepana eta tinicacare. Te téchuriacनावare eta tinicacare, mápechavarepa máevataca ena machichanaveana. <sup>13</sup> Te apihequenepa eta nachavirahi, ema José tímimatichavapa nayehe ena maparapenaveana. Tacahe, ema rey mapaenumavapa máimati énairehi maparapenaveana ema José. <sup>14</sup> Tacahe, ema José máimichuhapa ema maiya Jacob énapa ena natiarirahiqueneanahi te mapena. Setenta y cincoqueneana eta nasimutuva éna. <sup>15</sup> Tacahehi eta mayanirahi ema Jacob macavasairahi tayehe eta te Egipto. Étapa máepenihahi. Te táequenepa, étarichuvare náepenihahi ena machichanaveanaini viáchucanaveánaini. <sup>16</sup> Váhisera nacaecarasihini eta náperanaini te Egipto. Nacayejecapa eta nacaecarasirahi eta te ecari te tachachacu eta avasare Siquem te tinapaica eta Canaán. Étarichuhi eta máecari ema Abraham\*.

<sup>17</sup> Tiuri, tiánehipa eta máitauchirayarehi eta máechajiriruvahi ema Viya matratunehi mayehe ema Abraham, ánaquiaparíhaha eta añoana eta máíjarasirayarehi eta apaquehe nayeheyarehi ena machichanavequeneana. Ena nachichanaveana ena viáchucanaveanaini, ánaquipa náejapasihahi te Egipto. <sup>18</sup> Tayerevahi eta año, titupihapa ema apana rey te Egipto. Éma arairuhi rey, vaipa macapayacahini máimatihini ema José. Váipavare mávarahahini maecha eta manaquiruanainihi máemataneanainihi ema José. <sup>19</sup> Masapihapa macatianacavacahi ena viáchucanaveanaini taicha eta náejapasirahi éna. Macaetemajiricavacapa. Macavanairipipa eta vahi nacueperajica ena amuyana ajairachichana náuchusiravanahi. Najunijica apaesa vahi nacuitareca. <sup>20</sup> Tacahe, te jena sácheanahi, tiúchucapa ema amuya alauchu Moisés. Ema Viya máemunacahi ichape ema maca amuya. Mapana caje eta nacajurusirahi ena ticachichana te napena. <sup>21</sup> Te náimahapa téchemarahipaipa ema amuya, vaipa mayumurucacarehini. Tacahe, nayumurucapa ema amuya te pacurechicha te curichepiraquiana távihahi te cajacure. Ésusera esu machicha ema rey suíchimavapa, suvehapa. Ésupa ticajurucahi suchichayarehi. <sup>22</sup> Tacahe, ema amaperu Moisés ticaimitucasipa tamutu eta náitupajijiásiravanahi ena ticavasanihi te Egipto. Tacahe, ichape eta máitupajijiásiravahi eta máechajisirapahi étapa eta máemataneapianahi. <sup>23</sup> Te ticayehepa cuarenta año ema Moisés, mavarahapa tiyana máejirapanavaca ena majaneanana israelítana. <sup>24</sup> Te

\* **7:16** Ánaquiaparipa tatiarirahi eta avasareni Siquem, návasa ena mámariequeneana ema achane ticajare Hamor. Te tachacaya eta jena avasareni, tatiarirahi eta mari enurujuhe. Tacahe, ánaquiaparipa ema Abraham mavacharecapa eta apaquehe táimivehapa eta mari enurujuhe, mavarairahi sucaecarasiyarehi esu mayena Sara, énapa namutu ena machichanaveana. Émaripa étarichuyareva nacaecarasiyahi. Ena machichanaveana ichapemurirahi añoana eta náechapajirisirahi eta ecari, taicha étarichuyarehi nacaecarasiyarehi éna, énapa ena apamuriana mámariequeneana ema Abraham.

títecapapa ema Moisés, máimahapa ema émana achane ticavasa te Egipto téhararecahi, máehahi ema majaneana ema Moisés. Tacahe, macatiuchapa ema majaneana. Émapa títsirijiequenehahi. Macapacapa ema ticavasa te Egipto. <sup>25</sup> Eta mapanereruhi ema Moisés, mavarahahi nacaicutiarayare ena majaneanana eta mavaneruirahi me Viya eta macuchucuiravacayarehi eta te nacatajivairahi. Váhisera nácaicutiarahini éna. <sup>26</sup> Tacahe, te apanaquenepa sache, ema Moisés máimahapa téhacacanahi ena apinana majaneanana. Mavarahapa macaichepaica. Máichapa: “¿Tájaha tacayema éhacaca éti? Ímaha eparapecahi” máichapa. <sup>27</sup> Tacahe, ema túmepanahi mayehe ema apana, máevatajicapa ema Moisés, máichapa: “¿Tájaha tacayema pímiapiava píti eta viyehe? ¿Nájahapuca tivanecavihi juéseviyarehi eta viyehe, viáquenumuriviyarepuca víti? <sup>28</sup> ¿Pivarahapapuca picapacanuyareva núti, tacutiyarepuca eta picapasirahi cape ema egipcio?” máichapa. <sup>29</sup> Te masamapa ema Moisés eta náechirahi ena achaneana émairahi ticapaca, tiyanapa tijunahi eta te apaquehe ticaijare Madián. Ánaquipa eta máerajisiavahi máitatijiyavahi. Mavehapa esu mayena, ticaparapepa. Apinana ena machichanaveanahi ajairana suyehe esu mayena.

<sup>30</sup> Te cuarenta áñoa eta mávihairahi ánaqui, te étana sache, tipairiricahi te mávapahiana apaquehe tachacaya eta cerro ticaijare Sinaí, majanearesirahi eta uvesana. Tacahe, tiúcupaica ema Viya eta te távihahi eta chéyaraji yucuqui. Timurujirinehi eta yucuqui maicha ema Viya. Váhisera táijuchahini táitahini eta tapacajiana. <sup>31</sup> Eta máimararasirahi eta juca ema Moisés, máramirinehi. Tiyanapa mapaucha, máimatiyarehi. Te macachacayapa, masamapa eta mahu ema Viya. Ánipa máichahi: <sup>32</sup> “Nútichucha Viya nacasiñaquenehi ena piáchucanaveanaini. Nútirichu macasiñaquenéni ema Abraham, ema Isaac, émapa ema Jacob” máichapa ema Viya. Tacahe, ema Moisés tiyayacareinehi eta mapisirahi. Vaipa mapatsicavahini máimararacahini. <sup>33</sup> Tásiha, ema Viya máichavarepa: “Pivejuchupevachava eta péparupeva taicha santo eta juca apaquehe piávihahi piácatayapairuhi. <sup>34-35</sup> Pisamanuya puiti, jucarihi numetacaviyare. Núti nímararacahi eta nacatajivairahi ena nuchanerana tiáviahani te Egipto. Nusamahi eta náiyairahi. Nuvaraha nucatiuchavacayare. Eta tacahe, núcupaica numetapanaviya. Nuvanecaviyare puítirichu piyana tayehe eta Egipto, picuchucuhavacayarehi” máichapa ema Viya.

Tacahehi eta matuparasirahi ema Moisés mayehe ema Viya, mavaneruhi náquenumuriyarehi ena majaneanana, macuchucuhaya éna eta te nacatajivaiyahi. Étasera te títapucainapa vahi náesachahini éma. <sup>36</sup> Tásiha, émarichuhi ema maca Moisés macuchucuhavacapa namutu ena majaneanana tiásihanahi te Egipto. Eta macuchucuiravacahi, máimerecahi eta tiáramicareana te jena avasare Egipto, etapa eta te mar ticaijare Títsiama Une, etapa te mávapahiana vámahi. Cuarenta año macahehi ema Moisés eta máichirahi eta juca. <sup>37</sup> Émarichuva ema Moisés ticaechajiriruvahi nayehe ena majaneanana israelítana eta máuchusirayarehi ema profetayare. Máichapa: “Ema Viya Dios tivanecanuhi núti numetacaheyare eta máechajiriruva. Títecayare ema apanayare profeta mavaneruyare ema Viya, tacutiyare eta mavanesianuhi núti. Éma, tiúchucayare te namuri ena viámariequeneanayarehi. Tatuparaca nasuapayare tamutu eta mavanairipianayare” macahehi ema Moisés. <sup>38</sup> Émarichuvare ema Moisés, ema máichuhaquenehi ema ángele tiápanaya eta te jena cerro Sinaí, nacuchapirahi ena achaneana machamuriana te vámahi. Tasiha, máechajicahi ema Viya ema Moisés. Te títapiricapa ema

Viya, ema Moisés tiúcupaicapa, mametacavacapa ena achaneana tamutu eta mametacasivanahi me Viya. Énerichuvare ema Moisés májuchapahi te libro eta mavanairipiana ema Viya, tisuapacareanahi viyehe viti israelítana véhicanaya. <sup>39</sup> Eta mávihairahi ema Moisés te cerro, vaipa náimahahini ena viáchucanaveanaini. Tásiha, vaipa návarahahíni náehicahíni éma. Navarahapa tichavanayarehi te Egipto. <sup>40</sup> Tacáhénapa, te náichapa ema Aarón: “Vivaraha pépiyasinahavi eta visiñarajina táinapumirauchahaviya, taicha vaipa vecha tájahapuca máicharacavahi ema Moisés, ema ticuchucuhahavihi tayehe eta viávinénihí te Egipto” náichapa. <sup>41</sup> Tacahe, náepiyacapa eta nasiñarajiyarehi, amairiha oro, tavasimahi eta torillo. Napiestachayarepa eta náepiyaruhi nasiñaraji. Tacahe, ticaparecanavare eta vaca; náijaracasichahi eta nasiñaraji eta námavahuhi, náimicutichaipa ema Viya. Ténicanapa. Tiúrisamureanapa eta náimairahi táurinavahi eta nasiñaraji náepiyaruhi. <sup>42</sup> Émasera ema Viya, eta máimairahi eta juca, vaipa máuricahini. Tásiha, vaipa majaneacavacahini éna. Váhisera máicunacavanehini. Máisapapa ticasiñarajiana, téneuchavanapa te tamirahu eta nasiñarajiana. Tásiha, tamutupa nacasiñaraji eta jarairiquiana. Taicha ánipa tacahehi eta Sagrada Escritura nájurehi ena profetana. Ánipa maicha ema Viya: “Émitisicanuhi núti, eti israelítana. Vaipa nútinahini ácasíña eta jena cuarentaquenehi año te mávapahi vámahí. <sup>43</sup> Étapa ecasiñahi épuyumirauchahi eta esiñarajiana ticaijare Moloc. Énerichuvare ecasiñahi eta jarairiqui ticaijare Renfán. Eta ecaparuhi, vahi nútinahini íjaraca. Étapa íjaracahi eta esiñarajiana. Éti, éperajiricapa eta esiñarajiana te tayeheana trono tapenahuana épiyaruhanahi. Eta tacahe, nucajanerepaicaheya te apachacaya apaquehe ticaijare Babilonia” máichapa ema Viya.

<sup>44</sup> Te jena mávapahi vámahí ema Moisés mavanecapa ena viáchucanaveanaini náepiyaca eta mapenayarehi máucupaisirareyarehi ema Viya. Mavecunaruhi eta tiáviha te anuma máimechaquenehi ema Viya. Étarichu náunasirare eta ajureca tiáma eta mavanairipiana ema Viya. <sup>45</sup> Te tépenapa ema Moisés, máevachacapa ema Josué émapa máitsivahi téchapajiricayarehi ena achaneana. Tacahe, tiyananapa mámamurihapa ema Josué. Ena achaneana námaphi éna eta mapena máucupaisirare ema Viya. Nacaijuhepa eta apaquehe natuparahahi. Natiarhisera ena achaneana ticavasana tayehe. Váhisera tácajerahichaini eta náitahasiravacahi ena nánaranahi taicha ema Viya máimicatavacahi. Tacahe, tayerevahi eta áñoana ena náeperajicahi eta mapena ema Viya. Te tijurucapa ema rey David, ticatuparahapa, machimapapa eta tatiaririchaha. Émapavavare máechapajirica. <sup>46</sup> Taicha ema maca rey David máemunaruhi ema Viya. Tacahe, ema David mavarahapa tépiyarecaya eta mapenaya ema Viya amairihayarepa mari. <sup>47</sup> Váhisera táitauchahini eta mapanereruhi ema David, taicha ema Viya vahi máisapahini. Émapa títauchahi ema machicha ticaijare Salomón. Émapa tépiyacahi eta Templo.

<sup>48</sup> Tiuri puiti, numetacahevare, ema Viya ticavasahi te anuquehequene anuma. Vahi títecaimahi macapena te témploana vépiyaruanasamí viti páureanasami achaneana. Taicha ema Viya máichapa eta máechajiriruva: <sup>49</sup> “Te anuma táviha eta nuyehe trono néjasihahi. Ánaqui tásiha eta nuvanairipiana tayehe te juca apaquehe. Núti vahi nácamunu eta peti te juca apaquehe. Núti vahi nácamunu eta nunarasirarena. <sup>50</sup> ¿Váhipuca échava eta nútirahi népiyaca tamutu eta juca ímahaqueneanahi te juca apaquehe?” macahepa ema Viya eta máechajiriruvahi.

<sup>51</sup> Puítiripa eti esamararacanuanahi, ¿tájaha tacayema éhichi eta námura-



casamurevanaini ena iáchucanaveanaini? Váhivare ávarahahini esama puiti eta máechajiriruvahi ema Viya táichavenehi eta evainarajisamurevavacahi étapa eta emasuapirahi ema Espíritu Santo. Éti, eta epanereruana tacuti eta napanereruana ena iáchucanaveanaini eta navainarajivana. <sup>52</sup> Éna, náemecatajivachahi namutu ena profetanaini. Nacapacavacahi nácani téchajisihanahi eta máitesirayarehi ema Cristo. Tásiha puiti, eta máitesiraipa ani, épururipa éma, masapihapa íjararecahi ímicapacahi éma taicha tétavicavahi eta máurivahi. <sup>53</sup> Étaripa eta mavanairipiana ema Viya, ángeleana ena tíjarapanahi ema Moisés. Échajicuhapahinéni éti, esamaripahinéni; váhiqueneséra esuapahini —máichapa ema Esteban eta maconsejachiravacahi.

*Eta máepenira ema Esteban*

<sup>54</sup> Te nasamapa ema Esteban eta máichirahi, tisemanarinehi. Tinicavarinenehi eta nasemaneva. <sup>55</sup> Émasera ema Esteban vahi mapicaracavacahini éna taicha mávaháruhi ema Espíritu Santo. Máesenicapa te anuma. Máimaharine eta majaraiva ema Viya, émapa ema Jesús titupihahi te vaure tinapaicahi eta majaraiva ema Viya. <sup>56</sup> Tacahe, ema Esteban máichavacapa ena achaneana natiarihiqueneanahi:

—Ésenica te anuquehe. Núti nímahahi eta anuma téjiacahi. Émapa ema Jesucristo, máenahi titupihahi te mavaure ema Maiya —máichavacapa ema Esteban.

<sup>57</sup> Énasera eta nasemanevahi, tichujiquiñahavanapa. Tijajamurihanapa náetereuchapa namutu. <sup>58</sup> Nacaratacapa, námapa te tachachacu eta avasare. Ánaqui eta natupisisihayarehi nacapasihayarehi te márijahiana. Ena téhanahi nanaquicapa eta náepacuhána, natuparacapa ema nayehi comisario ticaijarehi Saulo. <sup>59</sup> Tacahe, nanahacaripa natupisicahi ema Esteban. Tiánehiripa nacapaca. Émasera tiyujarauchavaichaha. Ánipa macahehi:

—Tata Náquenu Jesús, pijacapinanu eta náchaneva.

<sup>60</sup> Eta máquipaisiravahi, tépuyucapa tipiaracapa muraca. Ánipa macahe:

—Tata, piperdonachavaca ena nani eta juca náichiranuhi napecaturahi —macahepa.

Te títapiricapa eta mayujarasirahi, tépenapa.

## 8

*Ema Saulo mapanerecha mapanajiricavaca eta macatichiravacahi ena téhicanahi ema Jesús*

*(Hch 22.6-16; 26.12-18)*

<sup>1-2</sup> Ema maca Saulo, eta mapanereruhi tacutihi eta napanereruana ena ticapacanaahi ema Esteban. Tiúrisamurepa éma. Natiarihivaresera ena apamuriana ajairana tiúripanereruanahi. Navehapa eta máquehe ema Esteban, náecarapanapa. Tíyahanapa ichape eta nacatiequenerahi. Étarichu te jena sache tépanavanapa napanajiricavaca muraca ena téhicanahi ema Jesús tayehe eta avasare Jerusalén. Téjanerecanapa náicha, ena camuriqueneana. Tiyananapa te apana avasareana tinapaica te Judea étapa te Samaria. Énasera ena apóstoleana nanasirichuhi te Jerusalén.

<sup>3</sup> Tacahe, ema Saulo, ema náinapuaquipahi ena tipanajiricanahi ena téhicanahi ema Jesús. Tisiapanapaipa te napenana. Nacaratacavacapaipa ena nachimapaqueneanapahi ajairana, esenana. Nachururupaicavacapaipa eta námirapahi te cárcel.

*Ema Felipe ticametarairu te avasare Samaria*

<sup>4</sup> Te jácani avasareana náitecapihapahi ena najunaqueneanahi, tímiyanavanarichucha ticametarairuana eta máimiturapiana ema Jesucristo. <sup>5</sup> Ema maca Felipe majunaquenehivare. Títecapapa eta te avasare ticaijare Samaria. Tacahe, ticametarairupa nayehe ena achaneana eta náehisiraya ema Jesús, émairahi Cristo ema nacuchapaquenehi. Tiúrujicavanapa ena achaneana. <sup>6</sup> Namutu nasamararacahi eta macametarairuirahi ema Felipe. <sup>7</sup> Taicha náimahapa eta macanarasiravacahi ena nacajumaqueneana camuriqueneana: ena muracaquihana, ena tiyayacareana, énapa ena masariana. Camuriana ena éreanana máimijunaqueneanahi te náquehe ena achaneana návaháruanahi. Tipiárarecanapáipa eta náuchusirapahi. <sup>8</sup> Eta tacahe, ichape-rinehi eta náurisamurevahi ena achaneana tayehe eta jena avasare.

<sup>9</sup> Te jena avasare Samaria, matiarihahi ema émana achane ticaijare Simón. Iápemarehi éma. Ánaquiaparipa eta macaetemajirisiravacahi ena achaneana. Títupajijiácavahi tépiyacava éma. <sup>10</sup> Namutuhi ena nasimutuvaqueneana achaneana énapa ena ticaimahaqueneana nasamararacahi nasuapahi eta macayemaqueneanahi. Nacunacharinehi, ánipa nacahe eta náechajiriruvahi:

—Ema maca achane títupajijiácavahi ichape maicha ema Viya —nacahepa.

<sup>11</sup> Ánaquiaparipa eta mavayuarasiravacahi éna, tayehe eta mahiápemarevahi. Eta tacahe, napicauchahi éma. <sup>12</sup> Téhesera nasamapa ema Felipe, nasuapapa eta nasamirahi eta máechajiriruva ema Viya. Náehicapa eta mametarairuhi mayehe ema Jesús eta émairahi Cristo, ema nacuchapaquenehi. Tacahe, camuriana ena ajairana énapa ena esenana ena ticaicachasianahi taicha eta nasuapirahi ema Jesús. <sup>13</sup> Émaripa ema iápemaréni Simón, masuapavare éma. Ticaicachasivarepa. Máehicapa macachanepaipa ema Felipe. Ichape máramipahi eta ichapequeneana tiáramicareana máichaqueneánapahi ema Felipe.

<sup>14</sup> Tiuri, te Jerusalén, nasamairiricapa ena apóstoleana eta náehisiraipahi ema Jesús ena achaneana ticavasanahi te avasare Samaria. Tásiha, ticaevatavaneanapa ema Pedro ema Juan. <sup>15-16</sup> Tiuri, ena téhicanaripa ema Jesús, vuíchaha máucupauchahini ema Espíritu Santo, mávahácavacahíni éna. Tacarichuichaha eta nacaicachasirahi eta navarairahi náehica ema Viáquenu Jesús. Tásiha, te títetapanapa ema Pedro ema Juan, tiyujaracanapa nayaseacapa ema Viya máijarasiraina ema Espíritu Santo eta mávahásiravacaina ena téhicanaripahi. <sup>17</sup> Tacahe, ema Pedro émapa ema Juan nanacapa eta navahuana te nápusiana éna. Tacahe, ema Espíritu Santo mávahácavacaripa eta náemamachutíchiravacahi éna. <sup>18</sup> Tacahe, ema Simón eta manecapirahi eta mávahásiravacahi ema Espíritu Santo te náemamachutíchiravacahi éna, mavarahapa éma mavachachavaca ena apóstoleana. <sup>19</sup> Ánipa máichavaca:

—Íjaracanu núti apana eta nítusiraina eta ítucaquenehi, apaesa te nunaca eta nuvahuana te nápusiana ena nácani achaneana, máucupaicapaini ema Espíritu Santo, mávahácaini éna —máichavacapa.

<sup>20</sup> Tacahe, ema Pedro máichapa:

—Pémitiequenehaya píti étapa eta piplatane. Taicha píti vahi tiuri eta pipanereru. Pímijachahipuca vicavacharapiyare eta máijararuhaviana ema Viya. <sup>21</sup> Vahi pítiparacaina píti, taicha eta pipanereruana vahi tátupiruvahini mayehe ema Viya. <sup>22</sup> Pínajica eta pivainarajivana. Piyaseaca ema Viya, tijuricati tiperdonachavi eta taurivahi eta pipanereruhi píti. <sup>23</sup> Taicha nímatiacavihi eta pétáviuchirahi eta picapinaruraivahi. Eta juca picahehi taicha vahi tínajiacavimahi eta pivainarajiva —máichapa ema Pedro.

<sup>24</sup> Tacahe, tipicapa ema Simón. Ánipa maicha:

—Ímicatacanu éti, eyujarauchanu me Viya apaesa vahi tacuitauchava eta juca ecayemaqueneanahi —máichapa.

<sup>25</sup> Tacahe, ema Pedro ema Juan tinahacavanapa tímiturecana eta máimiturapiana ema Viáquenu Jesucristo. Te tamutupa eta náimituresirahi, tiyananapa tichavanayarepa te Jerusalén. Tétávajicanapa te avasarechichana tayehe eta Samaria. Ticametarairuanapa nayehe ena achaneana.

*Ema Felipe máimituca ema achane ticavasa te Etiopía*

<sup>26</sup> Tiuri, te jena sácheana, tiúcupaicapa ema émana ángele mavaneruhi ema Viya. Máechajicapa ema Felipe. Ánipa maicha:

—Felipe, pétupiricava, piyana te tinapaica te vana. Pivenacuhayare eta achene tiásiha te Jerusalén, tiyana te avasare Gaza. Pétavicayare eta mávapahiana vámahí —máichapa.

<sup>27</sup> Tacahe, tétupiricavapa ema Felipe, tiyanapa. Te achene ticainunacacana ema achane ticavasa te avasare ticaijare Etiopía. Ema maca achane\*, sujupaha esu Candace, reina tayehe eta apaquehe ticaijare Etiopía. Ema maca achane ema tijaneaca eta suímahaqueneana esu reina. Éma, másinehi te Jerusalén, máejirapanahi ema Viya. <sup>28</sup> Ema maca achane machavaquene-paipahi te mávasa. Eta mapaisirahi, téjacapahi te mayehe carro. Téchajicurecapahi eta Sagrada Escritura májure ema profetaini Isaías. <sup>29</sup> Tacahe, ema Espíritu Santo mametacapa ema Felipe, ánipa maicha:

—Pémeñahava te tachacaya eta jena carro —máichapa ema Espíritu Santo.

<sup>30</sup> Tacahe, te témeñahavapa ema Felipe, te macachacayapa eta carro, masamapa ema achane téchajicurecapahi. Tásiha, mayaserecapa. Máichapa:

—¿Picaicutiara eta jara péchajicurepahi?

<sup>31</sup> Ema achane majicapapa:

—Váiparinehi nucaicutiaraimahi taicha nájina nametacanupahini eta tacayemapahi. Te pítipuca píti pimetacanu, picatajicanu. Yare, piávacuha péjaca te juca nuchacaya —máichapa ema achane.

<sup>32</sup> Tiuri, eta máechajicurepahi ema achane, ani tacahehi: “Eta uvesa, te nacarataca nacapacayarepuca, vahi ticatiuchavaimahi. Te nachucamecapuca, váhivare tipiararecaimahi. Ene macahehi ema maca achane, vahi mácapauchavahini, váhivare máechajiuchavahini te námapa tayehe eta nacapasihayarehi. <sup>33</sup> Tétavicavahi eta nacatsirirairahi éma, tayanapane tájjanéni maviurevainahini. Nájnavare nacatiuchahini. Ena mámariequeneanaini, nájina náechajisihahini éna”.

<sup>34</sup> Tacahe, ema maca achane mayaserecapa ema Felipe. Máichapa:

—Picatajicanu pimetacanu. ¿Nájaha ema táechajisihahi eta juca libro májurehi ema profeta? ¿Ema táechajisihahi ema maca profeta, vahi apanapuca? —macahepa.

<sup>35</sup> Tacahe, ema Felipe tépanavapa mametaca ema táechajisihaquenehi eta libro. Mametacapa eta émairahi táechajisihahi ema Jesús, ema Cristo ema nacuchapaquenehi. <sup>36</sup> Tacahe, te máechapa ema achane, mapanerequenehinehi eta napaisirapahi. Tacahe, te nacapayacapa eta únecure, macahepa ema achane:

—Te juca jararihi une. Nuvaraha pícachasicanu —macahepa.

<sup>37</sup> Tacahe, ema Felipe majicapapa:

\* **8:27** Eunucohi ema maca achane.

—Tiuri, te yátupihipuca eta pisuapirahi te pisamure eta picasiñairaya ema Jesús, nícachasicavi —máichapa.

Majicapapa éma:

—Yátupi nusuapa ema Jesucristo eta émairahi machicha ema Viya —macahepa.

<sup>38</sup> Tacahe, macavanairipipa nacaicheca eta carro. Tiúcupaicanapa éna, tiyananapa te úneure. Tacahe, ema Felipe máicachasicapa ema achane.

<sup>39</sup> Te tichavanapa tayehe eta úneure, tíjahúchavapa témitiaca ema Felipe, taicha ema Espíritu Santo manaracuhapa. Váipa macaecherahihini. Váipavare máimahahini ema achane. Tímiyanavapasera tipaica ema achane. Tiúrisamurepaipahi. <sup>40</sup> Eta máucupaisinehi ema Felipe eta te avasare ticaijare Azoto. Tacahe, tétavajicapaipa eta te avasareana. Ticametarairupaipahi eta máitecapirapahi eta te apana avasare ticaijare Cesarea.

## 9

### *Ena Saulo masuapa eta máichuirahi ema Jesucristo (Hch 22.6-16; 26.12-18)*

<sup>1</sup> Tímiyanavarichucha ema Saulo eta mapánajirisiravácahi ena téhicanahi ema Jesús, mavarairahi máimicapacavacaya. Tiyanapa tiyasesereca eta órdeno mayehe ema corregidor tayehe eta Jerusalén. <sup>2</sup> Máichapa ema Saulo:

—Nuvaraha nuyanaya te jena avasare Damasco. Nuvarahavare píjaracanu eta órdeno, eta nucaratasiravacaina ena téhicanahicacha ema Jesús, namutu nácani nétupiaruanayarepahi ajairana, esenanapuca. Nutanucavacayare te náurujisirarevana ena vijaneanana. Préseanayarepahi eta námirayare eta te juca Jerusalén —máichapa.

<sup>3</sup> Tacahe, tiyanapa ema Saulo. Eta mapaisirapahi éma te achene, tiánehipa títecapa te avasare Damasco, tiáramicarepa eta majaraiva ema Viya tiásiha te anuma. Tamicauchapa éma. <sup>4</sup> Tásiha, tiáquipaicavapa eta mapisirahi. Tásiha, masamapa eta mahu ema Jesús. Máichapa:

—Saulo, Saulo, ¿tájaha tacayema picatianacanu pipánájiricanu? —máichapa.

<sup>5</sup> Majicapapa ema Saulo, mayaserecapa:

—¿Nájahavi piti Tata?

Majicapapa:

—Nutí Jesús. Núti picatianaruhi, eta pipanajirisiravaca ena téhicanuanahi. Pésamiricavachucha, taicha pítijivaichucha píchavahi. Vahi piúrimahi te pímiyanava picatianacanu. Péhicanusera píti —máichapa ema Jesús.

<sup>6</sup> Tacahe, ema Saulo tiyayacarenecha eta mapisirahi eta máechajisirahi ema Jesús. Macahepa:

—¿Tájahapuca eta pivarahaquene nítauchaquenéna piyehe, Tata? —máichapa.

Tacahe, ema Jesús máichapa:

—Péchepuca. Piyana pítecapa te jena avasare. Ánaqui mararihi ema timetacaviyare eta pítauchaqueneyare nuyehe —máichapa ema Jesús.

<sup>7</sup> Ena apamuriana ajairana macachanequeneanapahi ema Saulo, ichape eta tiáramecana. Taicha nasamahi ema téchajicahi, váhisera náimahahini.

<sup>8</sup> Tacahe, ema Saulo téchepecapa eta te máquipaisinevahi. Vaipa máimairiricahini. Tacahe, nachurucapaipahi eta nacaitecapiraya tayehe eta avasare Damasco. <sup>9</sup> Mapana sache eta mapuchuquivahi. Váhivare tinica. Tájinavare máerahini.

<sup>10</sup> Tiuri, eta te jena avasare Damasco, matiarihhi ema apana téhicaživare ema Jesús, ema ticajare Ananías. Émarichuvare máechajiruhi ema Viáquenu Jesús. Ániya tacahe eta máechajisirahi:

—¡Ananías!

Éma majicapapa:

—Nutiarihhi, Tata —macahepa.

<sup>11</sup> Tacahe, ema Viáquenu Jesús máichapa:

—Piyana pitupiruya te jena calle ticajare Titupina. Te jena mapena ema Judas, picayasesereruyare ema achane ticajare Saulo, ema tiásihahi te avasare Tarso. Puiti máenahi tiyujaracahi. <sup>12</sup> Núti néchajicahi éma. Numetacahi éma eta pítecapiraya mayehe. Nuvanecavi pinacaya eta pivahu te mápusi apaesa tachava eta máimairirisira —máichapa ema Jesús.

<sup>13</sup> Te masamapa ema Ananías, macahepa:

—Tata, namutu timetacanuana eta máichararacavanahi ema achane eta mavainarajivahi nayehe ena téhicaživana ticavasana te Jerusalén. <sup>14</sup> Éma, tímitecahi puiti eta ani, mámapahi eta órdena nájararuhi ena tuparairucana eta te Jerusalén eta máepanirahaviya mapresuchirahaviya vimutu viti véhicaživanahi —macahepa ema Ananías.

<sup>15</sup> Émasera ema Jesús máichapa:

—Piyanchucha, taicha ema maca, nunerejiruhichuhi núti. Nuvanarayarehi éma. Nuvanecayare mayana macametarairu eta níjare nayehe ena achaneana te apanana avasareana étapa eta nayehe ena vijaneanana israelítana. Nuvanecayareva máechajisiha eta níjare nayehe ena ichapequeneana aguenucana réyeana. <sup>16</sup> Núti nímechayare eta macatajivairayare ichape táichavenenahi eta máehisiranuyare —máichapa ema Jesús.

<sup>17</sup> Tacahe, masupahi ema Ananías. Tiyana tayehe eta peti mávihahi ema Saulo. Tisiapapa. Máechajicapa. Manacapa eta mavahu te mápusi. Tásiha, máichapa:

—Nuparape Saulo, ema Viáquenu Jesús tímeracavahi eta piyehe te achene te pítecaivana. Éma, tivanecanuhi níteca eta piyehe. Mavarahahi tichavayare eta píimairirisira. Mavarahavare tiávahácaviya ema Espíritu Santo —máichapa.

<sup>18</sup> Tacahe, enevanepa témitiaca eta tépacuchainihi eta máuquiha, téjami-hauquicha. Tichavapa eta máimairirisira. Tásiha, ema Saulo téchepucapa, matupirupa ticaicachasi. <sup>19</sup> Te tamutupa, tinicapa. Tichavapa eta matumeva. Manasipanapa jena sácheana nayehe ena machamurianarípahi téhicanahi ema Jesús tayehe eta avasare Damasco.

### *Tépanavapa ticametarairu ema Saulo*

<sup>20</sup> Tacahe, tépanavapa ticametarairu ema Saulo te náurujisirareva ena israelítana. Máechajisihapa ema Jesús émairahi Machicha ema Viya. <sup>21</sup> Namutu ena tisamararacanahi, ichaperinehi nárami. Tásiha, nacahepa:

—¿Tájaha tacayema? Émara ema maca ema tipánajirícavacahi ena téhicanahi ema Jesús, ena ticavasana te Jerusalén. Tímitecahi te juca eta mapresuchirapanavacayarehi ena apamuriana, mámamurihayarehi nayehe ena tuparairucana eta te Jerusalén. ¡Tásiha puiti, émarinechavare ticametarairuhi mayehe ema Jesús! —nacahepa.

<sup>22</sup> Émasera ema Saulo tiápajucavapanapa eta máitusira ticametarairu. Máimerecachi eta yátupiquenerahi ema Jesús émairahi ema Cristo, ema nacuchapaquenehi. Te tamutu eta náurujisirarevana ena israelítana eta te Damasco, macapaquechamuripa nácani ticatianacanahi eta véhiruhi.



*Émasero Saulo nacaratacayarepaini ena israelítana. Émasera tiyanapa tijuna.*

<sup>23</sup> Tayerevahi eta añoana,\* ena israelítana napanerechapa nacapacaya ema Saulo. <sup>24</sup> Émasera masamairiricapa eta náemauchirahi. Tamutu sácheana, yátiana nacunehi eta te acheneana máuchujisihayarehi, taicha ichape eta navarairahi nacapaca éna. <sup>25</sup> Énasera ena machamuriana náitucahi eta nayumurusirahi náiyaracuhapa eta te ichape saye. Náitiacapa te tiupi enure. Tacahe, nacajuchuchucapa eta te apachacaya eta yúchama. Tacahehi eta máitujisiravahi tijuna.

*Émasero Saulo títecaparipa te Jerusalén*

<sup>26</sup> Te títecapapa ema Saulo te Jerusalén, mavarahapa masiapamuriha ena náinapureanahi téhicanahi ema Jesús. Énasera napicarichucha éma, taicha vuíchaha nasuapahini eta máehisiraipa ema Jesús. <sup>27</sup> Matiarhisera ema achane Bernabé. Émapa tiámahi ema Saulo tímimatichahi nayehe ena apóstoleana. Mametamurihapa eta máichararacavahi ema Saulo eta máimairahi ema Viáquenu Jesús eta te achene, etapa eta máechajisirahi, máichuirahivare ema Saulo. Mametacavare eta yátupirahi máituca ticametairu ema Saulo mayehe ema Jesús eta te avasare Damasco. <sup>28</sup> Tacahe, ema Saulo manasipa te Jerusalén. Masiapamurihapa éna, énapa macachanejiricavacahi. Vahi mapícarácavahíni eta macametairuirahi mayehe ema Viáquenu Jesús. <sup>29</sup> Máechajiricavacapai ena israelítana† te jácani mácapajisihavacapai. Macanaraemachavacahi éna. Vahi náuricahini eta máimiturapianahi. Tisemanapa mayehe. Tásiha, navarahapa nacapacaya éma. <sup>30</sup> Nasamairiricapasera ena machamuriana. Tacahe, náevatacapa mayana tayehe eta te mávasa Tarso. Náehicapa ena apamuriana tinapananayarehi tayehe eta avasare Cesarea, etapa nachavinehi. Tiánucuhapa éma, tiyanapa macarichupa.

<sup>31</sup> Tacahe, tiúricavanapa ena náumurivana ena téhicanahi ema Jesús tiávihana te apanana avasareana tayehe te Judea, te Galilea, etapa te Samaria. Tásiha, tétumehacacanahi eta náimiyániravaya napicauchiraya ema Viáquenu. Máimicatamurihahivare ema Espíritu Santo. Eta tacahe, camurianapaipavare ena téhicanahi.

*Éta manarasirahi ema achane ticaijare Eneas*

<sup>32</sup> Tiuri, ema Pedro tiyanapa máejiravacapaipa ena machamuriana eta te avasareana. Títecapapa nayehe ena apamuriana machamuriana ticavasanahi eta te avasare ticaijare Lida. <sup>33</sup> Matiarihi ema émana achane ticaijarehi Eneas. Macajumaquenehi éma. Ocho añoaripahi eta macajumairahi. Vaipa táurihini tiyamuriaca, váhivare máechepucahini te macamane. Tacahe, máitecapauchapa ema Pedro. <sup>34</sup> Máichapa:

—Pésenicanu, Eneas. Ema Viáquenu Jesucristo ticanaracaviya. Puiti tájinapa eta pijumaini. ¡Pécheputa! —máichapa.

Tacahe, ema Eneas enevanepa técheputa. Tájinapa máichiravainahini. <sup>35</sup> Tacahe, náimahapa eta manarasirahi namutu ena ticavasanahi tayehe eta te avasare Lida énapa ena ticavasanahi te tachacaya ticaijare Sarón. Eta náimairahi, náinajicapa eta nayeherepianaini. Tásiha, náehicapa ema Viáquenu Jesús.

*Éta suápechirava títareca esu Tabita*

\* **9:23** Te pivaraha pecha, pitanuca te libro Gálatas 1.18. † **9:29** Ena nani, yátupiqueneanahi israelítanahi, náuchureanahisera te jácaniana apanana avasareana. Táitusiava, apaechajiriruvanaripa eta ticaijare griego. Puiti tichavanaripa eta te Jerusalén, návasahi ena ticachichanaini.

<sup>36</sup> Te jena sácheanahi, sutiarahi esu esena ticaijaru Tabita, eta suátserepihi Dorcas. Ésu, ticavasahi eta te avasare ticaijare Jope. Ésurichuhivare téhichi emá Jesús. Eta suítaresirahi esu suca esena, sucajivaca ena páureana eta suímahaqueneana. Tímicatarahi nayehe nácani ticaijuheanapahi. <sup>37</sup> Te jena sácheanahi, esu Dorcas ticajumapa. Suvayuhapa, tépenapa. Tacahe, navehapa, náicachapa eta suáquehe. Nacasiapapa te tajuhe te anuquehe téqueneha piso.

<sup>38</sup> Eta juca avasare Jope tachacayaichuhi eta apana avasare Lida, eta mávihahi emá Pedro. Nácharipahi eta matiarahirahi emá Pedro te Lida. Tacahe, navanecapa ena apinana ajairana, náichuhapanayare éma. Te náitecapauchapa, náichapa:

—Vivaraha viámavi puítirichu ánaqui te Jope. Pímahapanaini esu vémunarquenehi vichamuri Tabita. Tépenaipahi —náichapa.

<sup>39</sup> Tacahe, tiyanapa emá Pedro, máehicavacapa éna. Te títecapanapa, náimisipapa eta te tajuhe suávihahi esu Dorcas. Namutu ena esenana máimaruanahi, te náimahapa emá Pedro, náurujiacapa. Tíyahanapa, náimechapa emá Pedro eta namuirihana superiruanahi ésu te achanerichaha. <sup>40</sup> Tacahe, emá Pedro macavanairipipa náuchuca namutu. Tacahe, tépuyucapa éma, tiyujaracapa. Tacahe, máimararacaripa esu esena suépenaquene. Tásiha, máichapa:

—Tabita, péchepuca.

Tacahe, ésu téjamihauquichapa. Suímahapa emá Pedro. Téjahapaicapa.

<sup>41</sup> Tacahe, macaratacapa eta suvahu, macaechepucapa. Énevanepa máichuhavaca ena máimaruana énapa ena apamuriana machamuriana. Máimechapa eta suchaviraipa títareca. <sup>42</sup> Tacahe, náechapa namutu ena ticavasanahi eta te avasare Jope. Camurianarine ena tisuapanahi emá Viáquenu Jesús. <sup>43</sup> Emá Pedro manasipanapa jena sácheana tayehe eta avasare te mapena emá machamurihivare ticaijare Simón, náimijarechavare Suélareru.

## 10

### *Emá Viya mavaneca emá Pedro máimitupanayare emá Cornelio*

<sup>1</sup> Te jena avasare ticaijare Cesarea matiarahi emá émana achane romano ticaijare Cornelio. Militar emá achane. Eta mávacure emá capitán, comandante te étana compañía tayehe eta batallón ticaijare Italiano. <sup>2</sup> Emá maca achane mapicauchahi emá Viya. Tamutuhi sácheana tiyujarauchavahi. Máimitucavacahivare namutu ena machichanaveana énapa ena tiávihanahi te mapena. Énerichuvare máimicatacavacahi ena israelítana páurequeneana, máijaracahi eta camuri plata. <sup>3</sup> Te jena sache, las trésqunenepa cáperehi, emá Cornelio tiyujaracahi. Tíjahúchavapa máimaha máucupauchahi emá émana ángele mavaneruhi emá Viya. Máechajicapa emá ángele, máichapa:

—¿Pícharacava? Cornelio —máichapa.

<sup>4</sup> Tásiha, emá Cornelio tipicarinehi eta máimararasirahi emá ángele. Majicapapa:

—¿Tájaha pivaraha eta nuyehe, tata?

Tásiha, máichapa emá ángele:

—Tímitecanuhi numetacavi. Eta piyeheana oración piyujarauchiravana étapa eta pímicatasiravacahi ena ticamunuvana páureana, táitecapauchahi tamutu emá Viya. <sup>5</sup> Pímivanereca puiti náepana emá achane ticaijare Simón, eta máchucarapihivare Pedro. Emá tiávihahi puiti te jena avasare ticaijare

Joje. <sup>6-7</sup> Eta peti máitecapihahi mapena ema apanavare Simón ema náimijarechaqueneva Suélareru. Éta táviha eta peti mapenahi te tachausi eta mar. Ema maca Pedro ema timetacaviyare eta pítauchaqueneánayare —máichapa ema ángele.

Te tamutupa eta máechajisirahi ema ángele, tiyanapa tichava. Tacahe, máichuhapa ema Cornelio ena apinana mamusurana. Máichuhavare ema émana masuntarura. Énerichuvare tipicaurahi mayehe ema Viya, títaurahivare mayehe ema máquenuhi. <sup>8</sup> Tacahe, mametacavacapa eta mametarapi ema ángele. Tacahe, máevatacapa tayehe eta avasare Joje.

<sup>9</sup> Te apanapa sache, tiánehanapáipa ena vanairucana tayehe eta avasare. Te jena las dócequenepa sache, ema Pedro tiápanapa eta te téqueneha piso. Tiyujaracayarehi. <sup>10</sup> Técuháipaicha éma, taicha tájinarichaha manicahini. Vuíchaha náimaquerecahini eta tinicacare. Tacahe, eta mayujarasirahi máimahapa téjiacahi eta anuma. <sup>11</sup> Máimahavare eta tiúcupaicapahi eta te mávihahi éma, tacutiyaréni eta ichape sávana. Ticaitiapusivacapahi te esquinana. <sup>12</sup> Camuri eta sárareana, quichareana, cáyureana, támaqueneanapahi eta sávana, tamutu eta apánapanenéjiqueneána sárareana. <sup>13</sup> Tásiha, masamapa ema téchajicahi te anuquehe. Máichapa:

—Péhepuca, Pedro. Picapaca étanaina sárare. Pinica.

<sup>14</sup> Émasera ema Pedro, majicapapa:

—Vahi, Tata. Tituparacahavi vahi vicunicahini vinica viti israelítana eta juca sárareana vicajachaqueneana, vinicahini. Tájina nímatiya nunicahini eta juca —macahepa.

<sup>15</sup> Tiápechavavare máechajica ema Viya, máichapa:

—Vahi picuimijarecha ticajachacareana eta níjararuvianahi tinicacareana —máichapa ema Viya.

<sup>16</sup> Mapahe eta máechajisirahi ema Viya ema Pedro. Tacahe, tichavapa eta sávana tiápana te anuma. <sup>17</sup> Ema Pedro manasirichaha macájarasamúrehi eta mapanerechirahi tájahapuca tacayemahi eta máimahaquenehi. Títecapananecha te tapaja ena vanairucana mayehe ema Cornelio. Nacayasesserupaipa eta mapena ema Simón Suélareru. <sup>18</sup> Eta náitecapirahi, nacayasessererupa te étahipuca mávihahi ema Simón Pedro. <sup>19</sup> Émasera ema Pedro manasirichaha tipanererecarichaha taicha eta máimahaquenehi. Tásiha, ema Espíritu Santo máichapa:

—Nararihi te juca ena mapanana ajairana titanucavianapahi. <sup>20</sup> Piyana pímahavaca éna. Vahi picueñamava eta péhisiravacayare, taicha núti nuvanecavacahi éna —máichapa ema Espíritu Santo.

<sup>21</sup> Tacahe, masuapapa ema Pedro. Tiúchucapa tiyanapa nayehe ena titanucanapahi. Te máitecapauchavacapa, máichapa:

—Nútira etanurepahi éti. ¿Tájaha tímitecahehi?

<sup>22</sup> Tásiha, najicapapa éna:

—Tivanecahavihi ema capitán Cornelio. Ema achane tipicaurahi mayehe ema Viya. Títurahivare nayehe ena achaneana. Namutu ena israelítana napicaucha náemunacavare éma. Puiti víti, vítecapauchavipa, taicha cape juca, ema ángele mavaneruhi ema Viya mametapanahi ema Cornelio máimichuhavi píteca te mapena, apaesa masama eta pimetarapianaya —nacahepa éna.

<sup>23</sup> Tacahe, ema Pedro macasiapavacapa te tajuhe. Nanasipa jena yati mayehe ema Pedro. Te apanapa sache, tiyananapa. Náehicapa ema Pedro ena apamuriana machamuriana ticavasanahi te Joje.

<sup>24</sup> Te apanaquenepa sache, napaenumavapa títecapana te avasare Cesarea. Éma Cornelio macuchapaipahi te mapena. Tiúrujicavanaripa ena majaneanana énapa ena máemunacasáreana máichuhaqueneánahi. <sup>25</sup> Te títecapapa ema Pedro te mapena ema Cornelio, mácapapa máepuyumi-rauchapa matsiucayarepa. <sup>26</sup> Émasera ema Pedro máichapa:

—Péchepecachucha pitupiha. Vahi táuricachini pitsiucanu, taicha nútirichuhi picutiquenepi achane —máichapa.

<sup>27</sup> Te tamutupa eta náechajisirahi, tisiapanapa te tajuhe. Máimaharine camurianahi ena náurujiruvanahi. <sup>28</sup> Tacahe, ema Pedro máichavacapa:

—Écharichu éti eta viyeherepiana viti israelítana. Vahi tituparacahavi visiapamurihahe eti apavasanana. Émasera ema Viya tivanecanuhi eta vahi nucupica eta nusiapamurihairaheyare. Nájinavare nunerejiruimahi nácani ticajachacareana. <sup>29</sup> Eta tacahehi, nítecanepa. Tájina nácyemahini. Tiuri puiti, nuvaraha néchaya. ¿Tájahapuca eta tímichuhanuhi? —macahepa.

<sup>30</sup> Tacahe, ema Cornelio majicapapa:

—Cuátropa sache eta táetavisiravahi eta juca nímahaquenehi. Te jena cáperehi sache hora las tres, nútí nunasiquenehi te juca nupena. Ayunanuhi nuyujaracahivare. Tíjuhúchavapa tímerecava ema ángele. Tijanunuca eta mamuiriha. <sup>31</sup> Máichanupa: “Cornelio, ema Viya masamahi eta piyehena oración piyujarasirana. Táitecapáuchahívare eta pímicatasiravacahi ena ticamunuvana páureana. <sup>32</sup> Pímivanerecaya puiti náepana ema achane ticaijare Simón, eta máchucarapi naicha Pedro. Éma tiávihahi puiti te jena avasare ticaijare Jope. Eta peti máitecapihahi ema apanavare Simón ema náimijarechaqueneva Suélareru. Eta távihahi eta peti mapenahi te tachusi eta jena mar. Te máitecapapa ema Pedro, éma tímitucaviyare” máichanupa ema ángele. <sup>33</sup> Tacahe, enevanepa nímichuhavihi. Tájinasera táichiravainahini eta pítesirahi. Tímararacahávihi ema Viya eta juca viúrujisiravahi puiti. Vivaraha visamaviya tamutu eta pimetacasivanahi mayehe ema Viya —máichapa ema Cornelio.

### *Ticametarairupa ema Pedro te mapena ema Cornelio*

<sup>34</sup> Tacahe, tépanavapa ticametarairu ema Pedro. Ánipa macahe:

—Nucaicutiarapa puiti vahi vácarichu viti israelítana vijacapacare mayehe ema Viya. <sup>35</sup> Namutuchucha majacapavaca nácani típicauchanahi éma, tíchanahivare eta táuriqueneana. <sup>36</sup> Taicha cape juca ema Viya macaitecapahi eta máechajiriruva viyehe viti israelítana. Tivanecahavihi vimetacavacayare eta najacapacarevahi me Viya nácani ticasíñavanahi mayehe ema Jesucristo, maperdonachiraripa ema Viya eta napecurana. Émara Viáquenu vituparaha téchapajiricahaviya vimutu viti achaneana: viti israelítana, étipa eti apavasanana. <sup>37-38</sup> Écharichupuca éti eta táichararacavahi te viávasa Judea cape juca táitaresirahi. Te ticaicachasipa ema Jesús Nazareno mayehe ema Juan, máucupauchapa ema Espíritu Santo májjararuhi ema Viya. Mávahácapa éma, májjaracaripa eta máitupajjiásiravaya. Tacahe, tépanavapa ticametarairu nayehe ena achaneana ticavasana te Galilea. Te jácani mapaisihapahi, máichapahi eta táuriqueneana. Macanaracavacapahi ena nacatajivaqueneana mávaháruanahi ema Váinaraji. Maratahahi éma máichahi eta juca, taicha ema Viya máimicatacapahi. <sup>39</sup> Tiuri, víti véchajisiha eta juca, taicha vímahaquenehi tamutu eta máichaqueneanapahi ema Jesús tayehe eta mapaisineanapahi avasareana te Judea, etapa te Jerusalén. Énasera

ena tuparairucana nacaticahahi éma; náemetatarecapa te crusu eta náimica-pasirahi. <sup>40</sup> Émasera ema Viya macaechepecuahi te máecari te mapana-quenepa sache. Tásiha, máimerecavare te vimuri eta machavirahi títareca. <sup>41</sup> Vaipa námutihini ena achaneana náimahahini. Vítinecha vímahaparacahi viti manerejiruanahi ema Viya. Vinecapaequenehahi tamutu eta vicachanerahi ema Jesús te vinisirana. Tásiha puiti, vimetacahiva ena achaneana eta vímahaqueneanahi. <sup>42</sup> Taicha tivanecahavipa vicametarairuya. Vimetacayare eta émairahi ema Jesús viyeheyarehi Juez viti achaneana énapa ena náepenaqueneana. Taicha ema Viya ema tituparacahi eta mávacureyare juésyarehi. <sup>43</sup> Étaripa eta acane namutu ena profetanaini náechajisihahi ema Cristo. Ánipa nacahehi: “Namutu ena tisuapanaya ticasíñanaya ema Cristo, maperdonachavacayare ema Viya tamutu eta napecaturana táichavene eta nacasiñairaya ema Cristo”.

*Eta mávahásiravacahi ema Espiritu Santo ena apavasanana*

<sup>44</sup> Tímiyanavarichaha eta máechajisirahi ema Pedro, tiúcupaicapa ema Espiritu Santo. Mávahácapa namutu ena tisamararacanahi eta mametarairuhi ema Pedro. <sup>45-46</sup> Tíjuhúchavapa ena mávaháruanahi apáechajiríruvanapa. Nacunacharipa ema Viya. Nasamapa ena machamurianapahi ema Pedro tiásihanahi te Jope. Náraminehi éna eta mávahásiravacahi ema Espiritu Santo ena apavasananahi, taicha ena israelítana náimijachahi nacarichu ena mávaháruanahi ema Espiritu Santo. <sup>47</sup> Tacahe, ema Pedro máichavacapa:

—Tájina náechajisiacarevaimahi eta nacaicachasiraya ena nani, cápachi mávahácaripa ema Espiritu Santo vicutiripa víti eta mávahásirahavihi — máichapa.

<sup>48</sup> Tacahe, macavanairipipa nacaicachasi namutu te máijare ema Viáquenu Jesucristo. Te tamutupa, nayaseacapa ema Pedro vahi macuyanavanehini. Tacahe, manasipanapa te jena sácheana eta nayehe.

## 11

*Eta mametarapiana ema Pedro nayehe ena machamuriana te Jerusalén*

<sup>1</sup> Tacahe, téchacarevanepa te Jerusalén eta nasuapirahi ena apavasanana eta máechajiriruva ema Viya. Tásiha, napanerequenehapa ena apamuriana apóstoleana énapa ena náumurivana. <sup>2</sup> Tásiha, te títecapapa ema Pedro te Jerusalén, nacajachapa ena apamuriana máinajicarahanaichaha eta nayeherrepiana ena israelítana. <sup>3</sup> Ánipa naicha:

—¿Tájaha tacayema péjirapanavacahi ena apavasanana? ¡Písapavavare pinica te namesara! —náichapa.

<sup>4</sup> Tacahe, ema Pedro majicapapa mametacapa eta máichararacavahi eta mapaisirahi. Ánipa maicha:

<sup>5</sup> —Esamanuchaha. Te návihaipa te avasare Jope, nuyujaracaipahi. Nímahapa téjiacahi eta anuma. Nímahavare eta tiúcupaicapahi tiásiha te anuma tacutiyareni eta ichape sávana. Ticaitiapusivacapahi te esquinana. Títecapapa te návihahi núti. <sup>6</sup> Nímahapa eta apánapanenéjiqueneána sárareana támaque-  
neanapahi eta sávana. Tátiarihi eta táíñehiqueneana sárareana, quichareana, cáyureana. <sup>7</sup> Tacahe, nusamapa eta mahu ema Viya, máichanupa: “Pécheputa, Pedro. Picapaca étanaina sárare. Pinica”. <sup>8</sup> Nútisera nujicapapa: “Vahi, Tata. Tituparacahavi viti israelítana vahi vicunicahini eta juca sárareana vicajachaqueneana. Tájina nímatiya nunicahini eta juca”. <sup>9</sup> Tacahe, tiápechanuvare téchajicanu ema Viya, máichanupa: “Vahi picuimijarecha ticajachacareana eta níjararuvianahi tinicacareana” máichanupa. <sup>10</sup> Mapahe eta juca



máechajisiranuhi ema Viya. Te tamutupa, tichavapa tiyapa te anuma tamutu. <sup>11</sup> Étarichu jena hora, títecapanapa ena mapanana ajairana titanucanua-  
napahi eta te peti nítecapihahi núti. Mavaneruanahi ema émana achane  
ticavasahi te Cesarea. <sup>12</sup> Tacahe, ema Espíritu Santo tivanecanupa néhicavaca  
éna, taicha tájina táeñamavacarehini. Énerichuvare téhicanuanapa ena nani  
sáisiqueneana vichamuriana. Vimutuhi visiapa eta mapena ema achane.  
<sup>13</sup> Timetacahavipa éma eta máimairahi ema ángele tiúcupauchahi eta te mapena.  
Titupihahi te mamirahu. Tacahe máichapa: “Pímivanereca puiti náepana  
ema achane ticaijare Simón, eta máchucarapi naicha Pedro. <sup>14</sup> Ema maca  
Pedro, ema timetacaviyare eta piúchucuiraya, píti, esu piyena, énapa ena  
pichichanaveanahi” máichapa ema ángele. <sup>15</sup> Tacahe, népanavapa nímitu-  
cavaca ena náurujiruvanahi. Te néchajicaipa, tíjahúchavapa tiúcupaica ema  
Espíritu Santo nayehe éna. Mávahácavacapa tacutihi eta mávahásirahavihi  
víti te tépanavainapa. <sup>16</sup> Tacahe, enevanepa néchavahi eta mametaruhavihi  
ema Viáquenu Jesús. Áni macahehi: “Échavarichu ema Juan máicachasicahi  
te une ena achaneana. Étisera tiúcupauchahayare ema Espíritu Santo. Éma,  
tícachasicaheyare tiávahácáhénapa” tacahehi eta máechajiriruvahi. <sup>17</sup> Tiuri,  
ema Viya máijaracavacahi ena apavasanana ema Espíritu Santo táichavenehi  
eta náehisirahi ema Viáquenu Jesucristo, tacutihi eta máijarasirahavihi víti.  
Tásiha, váiparinehi nácapaemachaimahi núti eta mavarahaquenehi ema Viya  
—máichavacapa ema Pedro.

<sup>18</sup> Tacahe, ena ticajachanahi ema Pedro, te náechapa, timatinanapa.  
Nacunachainehi ema Viya, nacahepa:

—Yátupirichuhi eta majacapiravaca ema Viya ena apavasanana eta  
náeneuchiravaina. Nácutihavihiní víti eta visiapiyare te anuma, máichecua-  
raquirénapa eta vítaresiraya maicha ema Viya —nacahepa.

*Náhicavare ema Jesús ena achaneana ticavasana te avasare Antioquía*

<sup>19</sup> Te jena sácheana, te nacapacapa ema Esteban, napanajicavare ena  
apamuriana téhicanahi ema Jesús. Eta tacahe, tijunanapa. Téjanerepáicanapa  
tiyananapa te Siria, ena apamuriana tiyananapa te tiúrupuhi te mar ticaijare  
Chipre, ena apamuriana te avasare Antioquía. Te jácani náitecapihapahi,  
ticametarairuanapahi mayehe ema Jesucristo nayehe ena najaneanana is-  
raelítana. Vuíchaha nametacahini ena apavasanana. <sup>20</sup> Tásiha, títecapanapa  
ena apamuriana\* eta te avasare Antioquía. Énaserá ticametarairuanapa  
nayehe ena apavasanana. Nametacavacapa, ánipa naicha:

—Te esuapa éhica ema Viáquenu Jesucristo, éma ticuchucuhayare eta  
ícuñayaréni taicha eta epecaturana —náichapa.

<sup>21</sup> Ichape eta tasuapacarevahi eta nametarairuana taicha ema Viya  
máimicatavacahi. Eta tacahehi, nasuapahi ena camuriqueneana  
achaneana. Náinajicapaipa eta nayeherepiníhi tauriqueneana, náhicapa  
ema Jesús.

<sup>22</sup> Te nasamairiricapa ena nachamuriana ticavasananahi te Jerusalén  
eta juca téchacareanahi te avasare Antioquía, ticaevatapa ema Bernabé,  
mayana macacutiarapana te yátupihupuca. <sup>23</sup> Tacahe, te títecapanapa éma te  
Antioquía, máimahapa eta máimicatasiravacahi ema Viya. Tiúrisamureinehi.  
Maconsejachavacapa namutu éna eta náetumechiracacaina eta náehisirahi

\* **11:20** Ena nani téhicanahi ema Jesús, yátupihí israelítanahi éna. Náuchusinehiserá éna te apanana  
avasareana: te jena avasare Cirene, étapa eta avasareana táunavanahi eta tiúrupuhi ticaijare Chipre.

ema Viáquenu. Vahi nacucainajiruva te tatiarihinapuca jácani náichavaque-  
nevaya. <sup>24</sup> Taicha ema Bernabé, tétávicavahi eta máuriva. Mávaháruhivare  
ema Espíritu Santo. Tisuapajirahi éma. Tacahe, camurianahi ena tisuapanahi  
téhicanahi ema Viáquenu maicha ema Bernabé.

<sup>25</sup> Te táequenepa eta juca, ema Bernabé tiyanapa te avasare Tarso. Matanu-  
panapa ema Saulo. <sup>26</sup> Te máetupiacapa, mámapa te avasare Antioquía. Tacahe,  
nanasipa ánaqui. Étana año nacahe eta nacachaneravacahi ena nachamu-  
rianahi. Camuriana ena náimitureanahi. Te jena avasare Antioquía, táepani-  
nevahi eta nacaijarerahi cristianoana namutu ena téhicanahi ema Jesús.

<sup>27</sup> Te jena sácheana, natiarihihi te Jerusalén ena profetana máijararuanahi  
ema Viya eta máechajiriruvana. Tacahe, tiyananapa nacaijuhe te Antioquía.  
<sup>28</sup> Te títécapanapa, ema émana ticaijare Agabo titupihapa te namuri ena  
machamuriana. Macaimitucasiquenehi éma mayehe ema Espíritu Santo.  
Mametacavacapa eta tatiarihiyare eta ecuha te tamutu avasareana. (Eta juca  
táichavaquenevahi eta ecuha te avasareana te jena áñoanahi matupihairahi  
ema aquenucaini Emperador Claudio.) <sup>29</sup> Tacahe, ena téhicanahi ema Jesús  
ticavasana te Antioquía napanerechainapa náimiamarecaya eta nanaquiru-  
ana, náimicatasiraya ena nachamuriana ticamunuvanahi, énaripa ena ticava-  
sanahi te Judea. <sup>30</sup> Tacahe, tinaquiquicavanapaipa eta naratahaqueneya  
nanaquica. Tacahe, náimiamarecapa mayehe ema Bernabé émapa ema Saulo.  
Náijaracayarehi ena náiyarahana pastoreana. Énapa tíjaracanayarehi ena  
ticamunuvanahi.

## 12

### *Nacapacapa ema Jacobo. Náeratacapa ema Pedro.*

<sup>1</sup> Te jena sácheana, matiarahi ema rey ticaijare Herodes Agripa. Ema  
macavanairipipa nacaratacavaca ena tachutirihanapahi ena téhicanapahi  
ema Jesús, náemecharecavacapa. <sup>2</sup> Énerichuvare, máimicapacavare ema  
apóstole Jacobo maparapeni ema Juan. Nayuchatipiquenuhapa eta nacapa-  
sirahi. <sup>3</sup> Tacahe, ema rey, eta máimairahi náurisirahi ena ticatianacanahi ema  
Jesús, máimicaeratacavare ema Pedro. Te jena semanahi, napiestarahi ena  
israelítana eta nanisiraya eta pan mayehere levadura. <sup>4</sup> Eta nacaeratasirahi  
ema Pedro, náimisiapapa te cárcel. Navanecapa ena dies y seis suntaruana  
tijaneacanaya te machacaya. Cuátromurianahi ena patrullanahi. Ema  
Herodes Agripa, mapanerechahi macapacayareva ema Pedro te namirahu  
ena achaneana te táequeneraya eta napiestara. <sup>5</sup> Tacahe, ema Pedro, murac-  
ahi eta najaneasirahi te cárcel. Énasera ena machamuriana tiyujaracanahi me  
Viya. Nayaseacahi ichape eta nasamacarevaina máuchucuiraina ema Pedro.

### *Ema Viya macuchucuha ema Pedro tayehe eta cárcel*

<sup>6</sup> Tacahe, ema Herodes Agripa máijarechapa eta sache eta máemepaniraya  
te cárcel ema Pedro eta nacapasiraya te namirahu ena achaneana. Te  
jena yati tamirahupa jena sache, ema Pedro tímacahi te nachacaya ena  
apinana suntaruana. Ticaitiahi te apipi cadenana. Ena apinavare sun-  
taruana najaneacahivare eta tapaja. <sup>7</sup> Tíjuhúchavapa tímerecava ema ángele  
mavaneruhi ema Viya. Tijarahijuheinehi eta cárcel. Tacahe, ema ángele  
macayamuricapa ema Pedro. Macajamicapa. Ánipa maicha:

—Pedro, péjamica. Péchepuca —máichapa ema ángele.

Tíjuhúchavapa téjapumuriha eta cadenana máitihanahi te mavahu ema  
Pedro. <sup>8</sup> Máichavare ema ángele:

—Picapitijuechava eta pítiyuhe. Pinaca eta péparupevana.

Tacahe, ema Pedro masuapahi. Tacahe, ema ángele máichavarepa:

—Pinaca eta pépacuhasa. Yare, péhicanu —máichapa.

<sup>9</sup> Tacahe, ema Pedro máehicavanepa ema ángele. Ema Pedro váhi máimatihini eta máicharacavapahi, máimijacharichucha mavapure. <sup>10</sup> Tacahe, náetavicapa ena títapucana sentinélana, náetavicavare ena apamuriana. Títecapanapa eta te tapajacura eta cárcel. Eta tapajacura amairihahi fierro tijitacarehi. Témunahiricavapa téjiaca. Tiúchucanapa te aneca te calle. Te tiyerehianapa eta napaisirahi, majunijicapa ema ángele. <sup>11</sup> Tacahe, ema Pedro mapaenumavapa macaicutiara. Macahepa:

—Nímahapa puiti eta yátupirahi tijaneacanuhi ema Viya. Mavanecahi ema ángele ticuchucuhapananuhi eta macapasiranuyarehini ema Herodes énapa ena nujaneanana —macahepa.

<sup>12</sup> Tipanererecapaipa eta mapaisirapahi. Matupirupa te supena esu María, maena ema Juan ticaijarehi puiti Marcos. Éta, náurujisihavahi nayujarasihahi ena camuriqueneana machamurianahi. <sup>13</sup> Títecapapa ema Pedro te tapajacura eta nayehe canchón. Máehahamecapa eta tapaja. Tacahe, esu esena amaperu ticaijaru Rode, tiyanapa suímahapana nájahapuca ema téhahamecahi eta tapaja. <sup>14</sup> Suímatahuchavanepa ema Pedro, váhisera suvéjiáequenehahini eta súrisamurevahi. Tiyanapa tijunapa te tajuhe, sumetapanavacapa eta matiarahirahi ema Pedro te aneca te tapaja. <sup>15</sup> Énaserá vahi nasuapahini. Tacahe, náichapa:

—Máurishivipapuca píti.

Ésusera sumetacarichucha eta yátupirahi. Énaserá náichavarepa:

—¡Váhipuca émaina! Émapuca ema mayehe ángele ema tijaneacahi —nacahepa.

<sup>16</sup> Émasera ema Pedro tímiyanavarichucha máehahamecahi eta tapaja. Tacahe, tiyananapa navéjiáequeneha. Náimaharine émasarehi. Tiáramecanarinehi éna. <sup>17</sup> Émasera máimicutiarachapa te mavahuana eta namatina. Tacahe, mametacavacapa eta macuchucuirahi ema Viáquenu tayehe eta cárcel. Te tamutupa eta mametasiravacahi, máichapa:

—Emetapana ema Santiago\* énapa ena apamuriana vichamuriana —máichapa.

Tacahe, tiúchucapa tiyanapa te apana avasare.

<sup>18</sup> Te tijarahipa, ena suntaruana tinanesicarajianaipa taicha vahi náechahini tájahapuca eta máicharacavahi ema Pedro. <sup>19</sup> Tacahe, ema Herodes Agripa máimivanerecapa natanuca ema Pedro. Májinaserá náetupiacahini. Eta namaetupiasirahi, ticayaserehianapa ena suntaruana tijaneacana. Nájinaserá émanainahini nanecapahini eta máuchusirahi ema Pedro. Tacahe, macavanairipipa ema Herodes nacapacavaca ena suntaruana. Te tamutupa eta juca, tiyanapa ema Herodes te apana avasare Cesarea; étapa mávihahi.

### *Eta máepenirahi ema Herodes Agripa*

<sup>20</sup> Te táequenepa, ema Herodes Agripa tise mapa nayehe ena achaneana ticavasana te Tiro étapa te Sidón. Énaserá náimivanerecapa mayehe ema Herodes. Tiyaseserecanapa eta náurivaina mayehe éma. Taicha eta návasanahi táitecapauchahi eta tinicacare tiásihahi eta te mávasa ema rey. Tacahe, nacasiñapa ema Blasto, ema majupaha ema rey, máechajiuchavacaya eta náurivaina. <sup>21</sup> Tacahe, ema Herodes máijarechapa eta sache, máimichuhairaya

\* **12:17** Ema maca achane, maparapehi ema Jesucristo. Te náechajiriruva ena israelítana, ticaijare Jacobo. Te véchajiriruva ticaijarehi Santiago. Émarichuhi ema tiájucharahi eta carta ticaijarehi Santiago.

ena achaneana eta jena sáchequenehi. Ticamuirihapa ema rey eta mamuiriha tiúrina. Téjacapa ema Herodes te máejasirare. Téchajicapa. <sup>22</sup> Tacahe, ena achaneana eta nasamirahi éma, tipiaracanapa. Nacahepa:

—¡Ema maca téchajicahi váhiya achanena! ¡Viya ema maca! —nacahepa eta nacunachirahi éma.

<sup>23</sup> Tacahe, tíjahúchavapa ema émana ángele mavaneruhi ema Viya máijaracapa eta majumahi ema Herodes Agripa. Taicha ema Herodes tímijachavahi Viya, máuricaipahi eta náejirairahi natsiusirahi ena achaneana. Eta tacahe, tanicapa eta vusanuana te majuhe. Tacapacapa.

<sup>24</sup> Tacahe, tavetijipaipaicha camurianapaipa ena achaneana tisuapana eta máechajiriruvana ema Viya.

<sup>25</sup> Te títavanapa eta natuparahahi ema Bernabé ema Saulo, tichavana-varepa te avasare Antioquía. Námapa ema Marcos.

## 13

### *Éma Bernabé émapa ema Saulo tépanavanapa tipaicana ticametarairuanayare*

<sup>1</sup> Ena téhicana ema Jesús ticavasanahi te avasare Antioquía, natiarihi te namuri ena ticametarairurahiana eta máechajiriruva ema Viya. Tímiturahianahi éna. Natiarihichaha ema Bernabé émapa ema Saulo. Natiarihivare ema Simón (ema náimijarechavare Negro), émapa ema Lucio (eta máuchusinehi te avasare Cirene), émapa ema Manaén (ema machajuruhi ema Herodes Antipas, machicha ema Aluresini). <sup>2</sup> Étana sache, ticurujicanapa eta nayujarasirahi me Viáquenu. Náichahivare eta ayuna. Tacahe, máechajicavacapa ema Espiritu Santo. Máichapa:

—Ema maca Bernabé émapa ema Saulo, natuparahaichuhi ticametarairuanaya taicha nunerejiruanahi éna. Évatasinanuya puiti ena nani apinana —máichapa.

<sup>3</sup> Tacahe, titsecavanapa ena apinana eta napaisiraya. Te tamutupa, tíapechavanapa nahayunacha namutu. Eta nayujarauchirahi, nanacapa eta navahuana te nápusiana ena tipaicanyare. Nayaseacapa ema Viya eta táurivainapahi eta napaisiraya. Tacahe, ticametavanapa. Tiyananapa.

### *Éma Bernabé émapa ema Saulo tépanavanapa ticametarairuana te tiúrupuhi Chipre*

<sup>4-5</sup> Tacahe, ena nani ema Bernabé ema Saulo, mavaneruanahi ema Espiritu Santo, tiyananapa te puerto ticaijare Seleucia. Máehicapahivare ema Juan Marcos. Tímicatarecapahi nayehe. Tacahe, tíanuecanainapa nacaijuheya eta tiúrupuhi ticaijare Chipre. Te títecapanapa te puerto ticaijare Salamina, tiyananapa eta te náurujisirárevana ena israelítana (taicha tamutu avasareana tatiarihipahi eta nayehe sinagoga). Ticametarairuanapa eta máechajiriruva ema Viya. <sup>6</sup> Tamutu napaica eta táichapevahi eta tiúrupuhi. Títecapanapa te avasare ticaijare Pafos. Ánaqui matiarhihi ema émana israelíta ticaijare Elimas Barjesús. Iápemare ema maca. Tépiyahirahivare tímijachavahi máimati ema Viya. <sup>7</sup> Ema maca iápemare macachanejiricahi ema Prefecto Sergio Paulo. Ema maca Prefecto, téchemarahi. Tásiha, máimivanerecapa náichuhapana ema Bernabé émapa ema Saulo, taicha mavarahahi masamaya eta máechajiriruva ema Viya. <sup>8</sup> Émasera ema maca iápemare macatianacavacapa éna. Mayurucapa ema Prefecto eta vahi macusuapa eta máechajiriruva ema Viya. <sup>9</sup> Tacahe, ema Saulo (éma ticaijarehi puiti

Pablo), mávaháruquenehi ema Espíritu Santo, máimararacapa ema iápemare.  
<sup>10</sup> Tacahe, máichapa:

—¡Tivayuarahitataji matsiriarairaha! ¡Piti machicha ema Váinaraji! ¡Piti picatianaca tamutu eta táuriqueneana! Píti píchejimiráuchavacahi ena tivarahana téhicana ema Viáquenu. ¡Pínajica eta juca pivainarajivahi! <sup>11</sup> Puiti ema Viya tícuñacaviyare. Púchuquiviyare máicha. Tiyereyare eta vahi pímahaimahi eta tajaraiva eta sache —máichapa ema Pablo.

Jéhesaréinehi, tíjahúchavapa témaha eta máimairirisira, púchuquipa ema iápemare. Tacahe, matanucapa ena tichurucanaya te mavahu. <sup>12</sup> Te máimahapa ema Prefecto eta juca, tipicarinehi. Tásiha, masuapapa eta masamirahi eta náimiturapiana ena apóstoleana mayehe ema Viáquenu Jesús.

*Éma Pablo émapa ema Bernabé tiyananapa tayehe eta avasare ticaijarevare Antioquía Ichipichu*

<sup>13</sup> Tacahe, ema Pablo énapa ena macompañeroana tiávacuhanapa. Najunijicapa eta Pafos. Tiyananapa tayehe eta avasare Perge táunavahi eta provincia Panfilia. Te títecapanapa te Perge, eta jena sácheanahi, ema Juan Marcos majunijicavacapa éna. Tichavapa te Jerusalén. <sup>14</sup> Éna, tiánucuhanapa nacaijuhepa eta avasare Antioquía Ichipichu te tinapaica eta Pisidia. Te títecapanapa, te apanapa sache sávaru, tisiapanapa eta te náurujisirareva ena israelítana eta nayujarauchirahi. Téjacanapa. <sup>15</sup> Tacahe, tisiapanavarepa ena tuparairucana tayehe eta náurujisirareva. Náechajicuhapa ánipi eta Sagrada Escritura májurehi ema Moisés étapa eta nájurehi ena profetana. Te tamutupa eta náechajicuirahi, nayaserecapa ena araítecapianahi. Náichapa:

—Viparapenaveana, te tatiarihipuca eta échajisihayare consejo viyehe víti, táuricapa econsejachahavipa —náichapa.

<sup>16</sup> Tacahe, ema Pablo titupihapa. Macanuquechapa eta mavahuana eta máechajisirayarehi, mavarahahi tauri eta nasamiraina (taicha tacahehi eta nayeherepi). Ánipa macahe:

—Esamanuchaha, nuparapenaveana israelítana. Étipa eti epicaurahianahi mayehe ema Viya. <sup>17</sup> Éma Viya vicasiñaquenehi víti israelítana manerejicavacahi ena viáchucanaveánaini. Te návihaichaha te apanaquene avasare ticaijare Egipto, macaejapacavacahi ena nachichanaveana. Énerichuvare, te máiputsicavacapa te jena avasare návinénihi, máimerecapahi eta máitupajijiasiravahi máimicatasiravacapai éna. <sup>18</sup> Tásihasera, cuarenta año eta macamichirahi ema Viya eta náejecapirávana tayehe eta návihairahi te mávapahi vamáhi. <sup>19</sup> Te táequenepa, macamitiequenehavare eta siétequene avasareana ena apánapanéjiqueneána ticavasanainihi te Canaán. Tásiha, máijaracapa ena viáchucanaveanaini eta jena apaquehe natuparahaquenehi maicha ema Viya. <sup>20</sup> Tacahe, 450 año eta majaneasiravacahi, mavanecapa ena juéseanaya téchapajirícanayarehi. Tacahe, tiámainucavapa te tijurucapa ema profeta ticaijare Samuel, máequeneréruhi nayehehi juez. <sup>21</sup> Tacahe, éna nayaseacapa ema Viya ema nayeheyarehi rey. Tásiha, máijarasihapa ema Viya ema nayeheyarehi rey ticaijare Saúl, machicha ema Cis, mámariéquenéni ema viáchucaequenéni Benjamín. Cuarenta año eta macatuparahairahi. <sup>22</sup> Te táequenepa, ema Viya máitsivachapa ema Saúl. Ticaijarapa ema David, émapavapa reyhi. Taicha macahepa ema Viya: “Nímararacahi ema David, machicha ema Isaí, núrica eta máurivahi. Taicha máitauchayare tamutu eta nuvanairipianaya” macahepa ema Viya. <sup>23</sup> Tiuri, eta máechajiriruvahi ema Viya, matiarhiyare ema émana mámariequenehare ema maca David



tiúchucayarehi ema Ticatiurahiyare viyehe viti israelítana. Puiti vimetacahé eta máimeresiravaipa ema Jesús ema Ticatiurahiquene viyehe. <sup>24</sup> Te tamirahupaichaha eta máimeresiravayarehi ema Jesús, ticametarairuripa ema Juan nayehe ena achaneana vijaneanana israelítana. Mavanecapahi eta náeneuchiravaina náinajisiraina eta napecaturana, étapa eta nacaicachasiraina. Títecapapa eta sache máitauchiraipa ema Juan tamutu eta mavanhianahi me Viya. Ticametarairurichaha ema, máichavacapa ena achaneana: <sup>25</sup> “Ímijachaipapuca nútihí ema Cristo, ema vicuchapaquenehi. Váhira nútina. Títecapainapasera éma, téhicanupahi te néquene. Malayarinehi nútí nácutinasihini eta máitupajjiasiravahi éma. Váiparinehi nácaemuñavaimahi macamururuhini nuti páuresami” máichavacapa ema Juan.

<sup>26</sup> Esamanuchaha, emutu eti nujaneanana, eti nucutiqueneanahi eta mámariequenerahavihi ema viáchucaini Abraham, étipa eti apamuriana epicaurahianahi mayehe ema Viya. Ema Viáquenu tivanecahavi vimetacahéyare yátupina eta iúchucuirayare éti apanava, te ecasiñava me Jesús.

<sup>27-29</sup> Máchusera ácutihini ena tuparairucana te Jerusalén, énapa ena ticavasanahi te jena avasare. Tamutu eta sávaruana eta náurujisiravana, náechajicuhaparacahi eta libro nájuchaquenehi ena profetanaini. Váhiserá nácaicutiarahini. Eta tacahehi, vahí náimatihini ema Jesús eta émairahi Cristo. Váhivare najacpahini. Éma, tájinahinéni matapiravainahini taviuchahini eta táimicapahini. Énaserá nayaseacapa ema Pilato eta máimicapasiraya. Tacahepa masuapapa éma eta nayasearapihi. Tásiha, te títauchavapa eta nacapasirahi, ena máimitureana nacucupaicapa te macurusura, náecarapa. Tacahehi eta táitauchiravahi tamutu eta nametarapiana ena profetanaini eta máicharacavayarehi ema Cristo eta máepenirahi, taicha tacajuquenehi éta te Sagrada Escritura. <sup>30</sup> Émasera ema Viya macaechepucahi te máecari. <sup>31</sup> Tacahe, camuri eta sácheana máimeresiravahi ema Jesús nayehe ena máimitureana, ena nani macachanevacapahi te másihapa te Galilea, téhepa te tiyanapa te Jerusalén. Ena nani tímahanahi, énara ena téchajisihanahi puiti eta máechepusirahi.

<sup>32-33</sup> Acane, ema Viya macametarapihi nayehe ena viáchucanaveanaini eta macucupaisirayarehi ema Cristo. Títauchavaipahiserá puiti eta máechajiriruvahi taicha vímatiripa ema Cristo viti nachíchanavéqueneana. ¡Tímerecavaipa ema Jesús, émairahi yátupiquenehi Cristo manerejiruhi ema Viya! Máimerecavaipa ema Viya ema Jesús eta émairahi yátupiquenehi Cristo, taicha macaechepucahi te máecari. Étara tímitecahavi vimetapanahé eta juca táuriquene téchacareana. Étara tacayemaquenehi eta máechajiriruva ema Viya eta te Salmo 2, ánipa macahehi: “Pítira nuchichavi. Puiti jena sache, nímimatichaviyare nayehe ena achaneana eta nuchichairavihi eta nucaechepusiravihi te pécarí” máichapa. <sup>34</sup> Eta máechepusirahi ema Jesús te máecari, vaipa tíápechavaimahi tépena. Taicha máechajicahi ema Viya ena israelítana, ánipa máichahi: “Níjaracaheyare ema máuriquene Iáquenuyare. Éma ticatiuchaheyare tamutu sácheana. Máichecuaraquireyare eta ítaresiraya máicha, eta ecachanarayare éma. Taicha níjararuvahi eta juca néchajiriruvahi mayehe ema David” máichapa ema Viya. <sup>35</sup> Énerichuvare, acane ema Cristo macahehi eta máechajiriruvahi te apana Salmo: “Vahi písapaimahi témitiequeneha eta náquehe nuti pichicha pémunaruquenehi” máichapa. <sup>36</sup> Tiuri, ema David, yátupihí eta máechapajirisiravacahi ena machanerana. Te títecapapa eta matuparahahi mayehe ema Viya, tépenapa ema David. Tacahe, náecarapanapa éma. Tépacahicavahi eta máeche te máecari. <sup>37</sup> Émasera ema Jesús vahí táepachicavahini

eta máeche te máecari taicha macaechepucahi ema Viya. <sup>38</sup> Nuparape-naveana, nuvaraha numetacahe puiti apaesa ímatiéqueneha. Ema Viya mavaraha tiperdonachahe eta epecaturana te ácaseña ema machicha Jesús. <sup>39</sup> Viti israelítana, ichape eta véjecapiravahi me Viya taicha vimaitauchirahi eta viyeherepiana májararuhavihi ema Moisés. Téhesera véhica puiti ema Jesucristo, viperdonachacareya víti mayehe ema Viya. <sup>40</sup> Tásiha puiti, ecaunevayare éti, machu ácutiriana ena achaneanaini máechajiruanahi ema Viya eta acane. Ani máichahi: <sup>41</sup> “Ímahayare, eti épurunuanahi núti. Núti níchayare eta tíamicare te emirahu te juca sácheana. Te nímetacahepa eta juca, váhiquene esuapahini éti. Tásiha, tapaenumavainapa te ímahapa eta níchaqueneya, íáraminapa. Nímatihesera eta emásuapajiráivanahi. Épenainapa táicha” máichapa ema Viya.

<sup>42-43</sup> Te tamutupa eta máechajisirahi ema Pablo, nayaseacapa ena achaneana, áni naicha:

—Picatajicahavi. Piápechahavini pímitucahavi eta juca te apanainavare sávaru —náichapa.

Te tiúchucanapa eta te náurujisirareva, tiyananapa ena apinana apóstoleana eta te náitecapihahi. Náehicapa ena camuriana israelítana, énapa ena apavasanana tépiyacavanaripa israelítana taicha napicauchaipa ema Viya. Ticaimitucasianapa táurivaina eta najicapiraya eta máurivahi ema Viya, nacasiñairava me Machicha Jesús.

<sup>44</sup> Te apanavarepa sávaru, namutuyareni ena achaneana ticavasanahi te avasare tíurujicavana nasamararacayarehi eta máechajiriruva ema Viya mametarapiyarehi ema Pablo. <sup>45</sup> Énasea ena israelítana masuapajirairahanahi, te náimahapa eta natiarirahi ena apavasanana, tisemanapa eta mametasiravacahi ema Pablo eta najacapacarevahi me Viya éna apanava. Eta tacahe, nácapaemachapa ema Pablo, nacajachapa. <sup>46</sup> Te nasamapa ema Pablo émapa ema Bernabé eta náichirahi ena ticatianacanahi, tájina vahi nayútutuémahini. Náichavacapa:

—Tatuparacahi étivayarehi eti vijaneanana vímitucahe eta juca máechajiriruva ema Viya. Étisera vahi iúricahini eta esamirahi, váhivare ésachahini ésenica eta mávasa ema Viya. Tacahe puiti, énainarinepuca vímitucavacaya ena apavasanana. <sup>47</sup> Taicha víti vivanecasivahi me Viya. Vítauchayare eta juca mavanairipi, ani macahehi: “Nutuparacaviyare píti pipaicyare tamutu avasareana te juca apaquehe. Picametarairuyare eta néchajiriruvana nayehe ena achaneana eta nucuchuiraya nácani tisuapanuanaya” —macahepa ema Pablo.

<sup>48</sup> Te nasamapa eta juca ena apavasanana, tíurisamureanapa. Tásiha, nacahepa:

—Tétavicavapa táurinava eta juca máechajiriruva ema Viya —nacahepa.

Énerichuvare, nasuapapa ena máichuhaqueneanahi ema Viya eta náitare-siraya máichecuaraquireya te táequenenapa eta náepeniraya. <sup>49</sup> Tacahe, ena tisuapanaripa nacametarairuvare eta máechajiriruva ema Viya nayehe ena achaneana ticavasanahi te tachacayahana eta avasare Antioquía Ichipichu. <sup>50</sup> Nararihihisera ena ticatianacanahi ema Pablo émapa ema Bernabé. Israelítanahi éna. Tacahe, náimitucapa ena tuparairucana te avasare, énapa ena ésenana ticapicahucareanahi, téhicanahi eta nayeherepiana ena israelítana. Énerichuvare napamicapa ena achaneana, navarairahi náquijicaya tayehe eta avasare ena apóstoleana. Jéhesareinehi, ticaticacanapa eta nacatichiravacahi, nacuchucavacapa ena apinana. <sup>51</sup> Tacahe, eta nayanirayarepa

ena apóstoleana, náetapevachavaca eta náeparupevana te namirahu ena ticatianacanahi. Táicutiarahi eta namáimitucacárevahi éna, tájinavarepa tímiapachaimahi náimitucavacahini. Tacahe, tiyananapa nacaijuhepa eta te avasare Iconio. <sup>52</sup> Énaserá ena apamuriana téhicanaripa tímiyanavanapa eta nasuapirahi ema Viya. Tiúrisamureanahivare éna taicha eta mávahásirahi ema Espíritu Santo.

## 14

### *Ema Pablo émapa ema Bernabé títecapanapa eta te Iconio*

<sup>1</sup> Tacahe, títecapanapa ema Pablo émapa ema Bernabé eta te avasare ticaijare Iconio. Tiyananavare natupiru eta te náurujisirareva ena israelítana. Ticámetarairuanavarepa. Tacahe, camurianavare ena achaneana tisua-panahi eta nametarairuhi: ena israelítana énapa ena apavasanana. <sup>2</sup> Váhiserá téjiacavana ena apamuriana israelítana masuapajirairahanahi. Nayuruca-vacapa ena apamuriana achaneana apavasanahi. Navarahapa náimiyu-semacavaca. Navarahahivare ticuticacanayare nacatichavaca ena téhicanaripa ema Viya. <sup>3</sup> Eta tacahe, nanasipanapa ena apóstoleana. Vahi nayanavanehini. Tiyerehi eta náimituresirahi, taicha navarahahi náetume-chavacaya eta nacasiñairahi ema Viya. Tacahe, ema Viya máimicatavacahi. Máijaracahi eta náichiraya eta tiáramicareana. Eta juca, máicutiarahi eta mavanésiravacahi eta nacametarairuirayarehi eta majacapiravacahi nácani achaneana ticasiñavana mayehe. <sup>4</sup> Tásiha, típutsimurihavanapa ena achaneana ticavasanahi tayehe. Ena apamuriana náehicapa ena israelítana masuapajirairahana. Ena apamuriana náehicapa ena apóstoleana. <sup>5</sup> Tacahe, ticuticacanapa eta napanereruana ena apavasanana énapa ena israelítana énapa ena náquenuruhana, eta nacajachiraya ena apóstoleana. Navarahapa nacapacaya natupisicaya te márijahiana. <sup>6-7</sup> Énaserá, ema Pablo émapa ema Bernabé, te nasamairiricapa, tijunanapa nacaijuhepa eta te provincia ticaijare Licaonia. Ánaqui ticametarairuanapa tayehe eta avasare Listra, tásiha, tiyananavarepa te avasare Derbe, étapa te avasareana tachacayarahanahi.

### *Ema Pablo macanaracahi ema masari ticavasahi te avasare Listra*

<sup>8</sup> Te jena avasare ticaijare Listra, matiarihini ema émana achane masarihi eta máitaresirahi. Vahi táurihini tipaica, taicha máimiuchurehi eta mamasarivahi. <sup>9</sup> Macaheripa ticasamarahihi éma eta mametarairuhi ema Pablo. Tacahe, ema Pablo máesenicapa, máimatiacapa eta macasiñavairahi ema masari mayehe ema Viya macanarasirayarehi. <sup>10</sup> Tacahe, ema Pablo mapiaracapa: —Péchepeuca píti. Pétumecha eta jara piápeana. Pitupiha —máichapa.

Eta masamairahi eta juca ema masarini, enevanepa téchepuruca. Titupihapa. Tipaicapa. <sup>11</sup> Eta náimairahi ena achaneana eta macanarasirahi ema Pablo ema masarini, náraminehi ichape. Tipiaracanapa te náechajiriruvaichu, ánipa nacahehi:

—Viyana ena nani. Achanemahianahiséra eta náimahi eta náucupauchirahávihi. <sup>12</sup> Ema maca ticaijare Bernabé, émara Viya Júpiter. Ema maca apana ticaijare Pablo, émara Viya Mercurio taicha ema ticametarairurahi —nacahepa.

<sup>13</sup> Tiúri, tatiarihi eta peti te tasiaparacu eta avasare, mayujarasirarehi ema achane tavanarahi eta nasiñaraji ticaijare Júpiter. Tatiarihivare eta apina turu mamansurehi. Tacahe, ema maca achane máépanapa eta turu. Mayehehecapa eta flure taicha mavaraha macapacayarehi eta turu. Máijaracasicayarehi ema Pablo émapa ema Bernabé. Énerichuvare ena achaneana

navarahahi náejirayarehi ena nani apinana apóstoleana taicha náimijachaipa énaripa ena nasiñarajianahi. <sup>14</sup> Étasera te nasamairiricapa ena apóstoleana eta náichirayarehi, ichape eta náeñamirava. Tiúchucanapa, nasiapamurihapa ena achaneana. Tipiaracanapa, ánipa nacahe:

<sup>15</sup> —¡Tátanaveana, mémenaveana! ¡Váhirine táurihini eta juca íchirayare! Vítirichu ecutiqueneana achaneana. Tímitecahavihi vimetapanaha ínajica eta juca eyeherepianahi. Taicha vahi tiuri, tamapurujihí eta eyeheheasiraparacahi eta esiñarajiana. Ínajicaya eta juca. Éhicayaresera ema Viya, ema yátupiquenehi tisamahavi. Éma tépiyacahi eta anuma, eta apaquehe, eta ichapequene mar. Tétupiricahi tamutu eta vímahaqueneanahi puiti.

<sup>16</sup> Ánaquiaparipa eta macamichirahi ema Viya eta náichirahi eta navarahaqueneana ena achaneana. <sup>17</sup> Máimerecacinénisera eta émairahi tépiyaca eta juca táuriqueneana. Tíjaracahavihi eta tiquiva. Tiúrinachayare eta sucurecana vinicaqueneana máicha. Máijarasirahavihi tamutu eta vicamunuqueneana. Ticurisamurechahavivare. Eta tacahe, ímatiquenéha yátupina eta émairahi Viya esiñarajiya —náichapa ena apóstoleana.

<sup>18</sup> Eta tacahehi, nametacaripahinéni eta taurivahi eta juca navarahaquenehi naicha. Énasera ticamesavanarichucha eta navairahi ticaparecana eta túruana. Váhiqueneséra náisapahíni ena apóstoleana náichahini eta juca.

### *Natupisicapa te márijahiana ema Pablo*

<sup>19</sup> Tayerevahi eta sácheana, títecapanapa ena israelítana tiásihanahi te Antioquía Ichipichu étapa te Iconio. Éna ticatianacanahi ena apóstoleana. Nayurucavacapa ena achaneana, náimiyusemacavacapa. Eta nachimapirahi ema Pablo te calle, natupisisihapa te márijahiana. Náquipaicapa. Eta náimairahi máquipaisiravahi, náimijachaipapuca tépenahi. Nachururupaicapa náquijicayarehi te tachachacu eta avasare. <sup>20</sup> Tacahe, tiyananapa ena machamuriana ema Pablo, náimahapanayarehi. Te náitecapauchapa, náurujiacaripa. Émasera téchararahaipa téchepucapa. Máehicavacapa tiyanapa eta te máitecapihahi. Te apanapa sache, tiyananapa ema Pablo émapa ema Bernabé te avasare Derbe.

<sup>21</sup> Te títecapanapa tayehe eta avasare Derbe, nanasipanapa tayehe. Ticametarairuanahi eta máechajiriruva ema Viya. Camuriana ena tisua-panahi téhicanahi ema Jesús. Te tamutupa eta náimitusiravacahi, tiyananavarepa tichavanapaipa eta te avasareana náimituresinepahi eta te Listra, te Iconio, étapa te Antioquía Ichipichu. <sup>22</sup> Eta te juca avasareana, náimitucavarepa ena téhicanaripa ema Jesús. Náetumechavacapa eta táurivaina eta náehisiraya ema Viya. Náichavarepa:

—Vahi ecurameca eta nacatianasiráhe ena achaneana táichavene eta éhisira ema Viáquenu. Ecamichachucha tamutu. Échava eta esiapiraya eta mávasa ema Viya —náichapa.

<sup>23</sup> Énerichuvare, natanucapa ena nayeheanapachu pastor nácani náijamuripachu. Téchanayarehi eta nayujarasirana. Tacahe, natuparacapa eta návacureanaya. Te tamutupa eta natuparasiravacahi, tiyujaracanapa nahayunachavarepa, nayaseacapa ema Viya eta majaneasiraina táurivaina eta náehisiraya namutu ena ticasiñaripa ema Viya.

### *Ema Pablo, ema Bernabé tichavanavare tayehe eta avasare Antioquía*

<sup>24</sup> Tacahe, tiyananapa ema Pablo émapa ema Bernabé, tétavajicanapa eta te avasarechichana tayehe eta Pisidia. Náitecapirapa tayehe eta avasare

Perge táunavahi eta provincia Pamfilia. <sup>25</sup> Ticametarairuanapa eta máechajiriruva ema Viya nayehe ena achaneana ticavasana tayehe eta avasare. Te tamutupa eta nacametarairuirahi, tiyananavarepa nacaijuhepa eta Atalia. <sup>26</sup> Éta nāvacuinehi eta nánuesiraya eta mar, nacaijuhepa eta avasare Antioquía. Tichavanapa tayehe eta juca avasare náuchusinehi te ticavanahianapa mayehe ema Espíritu Santo. Étarichuvare nayujarauchinehi ena nachamuriana eta majaneasirayare ema Viya ena apóstoleana eta napaisirayare. Puiti eta juca náitauchaquenéipa eta náematanehi. <sup>27</sup> Eta náitecapiraipa, nacurujicapa ena nachamuriana. Nametacapa tamutu eta máimicatasiravacahi ema Viya tayehe eta napaisirapahi. Éta eta majacapiravacahi ema Viya ena apavasanana eta nasuapiravacahi nacasiñairahi éma. <sup>28</sup> Tacahe, ema Pablo émapa ema Bernabé, tiyerehi eta nanasirahi nacachaneravacahi ena nachamuriana.

## 15

### *Ticurujicacanapa te Jerusalén. Ticaechacasinapa eta panererucanahi.*

<sup>1</sup> Te jena sácheana, títecapana te Antioquía ena apamuriana israelítana, tiásihanahi te Jerusalén. Navarahapa nahapapiricavaca ena apavasanana téhicanaripa ema Jesús. Ánipa naicha eta náimituresirahi:

—Te evaraha iúchucuha eta ícuñayaréni, tacamunu ítauchayare eta mavanairipihí ema Moisés eta vicamarcairaya\* —nacahepa.

<sup>2-3</sup> Émasera ema Pablo, émapa ema Bernabé nacapaemachavacapa muraca ena tipamicanahi ena apavasanana eta nacamarcairahi. Ichape eta nacapaemachiracacahi. Tacahe, ena nachamuriana navarahahi náetupirica eta juca. Tásiha, natuparacapa ema Pablo émapa ema Bernabé, nayanahini eta te Jerusalén. Eta ánaqui, ticaechacasiyarehi nayehe ena apóstoleana énapa ena náiyarahanahi. Náevatacavare ena apamuriana téhicanayarepahi ena apinana.

Tacahe, eta napaisirapahi te achene, tétavajicanapaipahi tayehe eta avasarechichana táunavanahi eta Siria, éta te Samaria, nāvihahi ena apamuriana nachamurianahi. Nametacapaipa eta náinajisirahi ena apavasanana eta nayeherepianaini tauriqueneana, taicha eta náehisiraipa ema Jesús. Tacahe, ena nachamuriana, eta nasamairirisirahi eta juca, tiúrisamureanarinehi éna.

<sup>4</sup> Tacahe, eta náitecapirahi eta te Jerusalén ema Pablo émapa ema Bernabé, ena apóstoleana énapa ena náiyarahanahi pastoreanahi nacurujicapa ena nachamuriana eta najacapiraya ena araitecapianahi. Tacahe, ena apinana nametacapa eta máimicatasiravacapahi ema Viya eta napaisirapahi éna. <sup>5</sup> Natiarihivare ena religiósana téhicanarípahi ema Jesús. Titupihanapa éna. Téchajicanapa, ánipa nacahe:

—Táitaurevaquene tacamunurichu nacamarca ena apavasanana téhicanaripa ema Viáquenu Jesús. Tacamunuhivare nacaravahu náehica eta juca mavanairipianahi ema Moisés —nacahepa.

<sup>6</sup> Tacahe, te apanapa sache, tiúrujicavanapa ena apóstoleana énapa ena náiyarahanana. Navarahapa náetupirica eta juca. <sup>7</sup> Nacaemataneacaripa eta juca náechajisihahi. Tacahe, titupihapa ema Pedro. Máichavacapa:

\* **15:1** Eta mavanairipini ema víyahaini Moisés ticamarcanayarehi namutu ena amuyana ajairana israelítana. Éta tímereuchayarehi eta yátupiquenerahi israelítana. Te juca, ena napaipiruanahi tiásihanahi te Judea, navarahapa nacamesaequeneha nacamarcavaya ena ajairana ichanaruaripa, apavasananhivare.



—Nuparapenaveana, écharichuhi éti ánaquiaparipa eta manerejisiranuhi ema Viya eta nucametarairuya eta nayehe ena apavasanana eta náuchucuirayarehi táichavenénahi eta nasuapirayare ena apana. <sup>8</sup> Ema Viya máimatihí eta nasamureana ena apavasanana eta nasuapirahi. Tásiha, máimerecahi eta majacapiravacahi eta mávahásiravacahi ema Espíritu Santo tacutihí eta mávahásirahavihi víti. <sup>9</sup> Ema Viya, nájina manerejiruina eta máemunasiarahavi. Témunacahavihi vimutu: viti israelítana, énapa ena apavasanana. Eta tacahehi, masípasinavacarípa eta nasamureana éna táichavénéhi eta nasuapirahi. <sup>10</sup> Étiserá evarahapa épuruyare eta máichaqueneanahi ema Viya. Ticajeraequenepa eta véhisirainahini eta nayeherepiana ena viáchucanaveanaini. Énaripa vahi náitauchapahini tamutu eta nayeherepianapahi. Vítiripa váhivare váratahahini vítauchahini. Tacahe, váipa táuricahini vécatihavacahini ena vichamuriana apavasanana náichahini eta juca. <sup>11</sup> Vécharipahisera yátupi eta viúchucuiraya táichavénéhi eta macatajisirahavihi ema Viáquenu Jesucristo. Viti israelítana, vahi étaparacaina eta vicamarcairahi. Ena apavasanana, váhivare étaparacaina eta tájinairahini namarcainahini —máichapa ema Pedro.

<sup>12</sup> Tacahe, timatinanapa namutu. Nasamararacaripa ema Bernabé, émapa ema Pablo. Nametamurihapa eta máimechirahi ema Viya eta mavanésiravacahi éna, taicha máijaracavacahi eta náichirahi eta tiáramicareana te namirahu ena apavasanana. <sup>13</sup> Te títapiricanapa eta nametarapianahi, émapavapa ema Santiago téchajica. Macahepa:

—Nuparapenaveana, esamanuchaha. <sup>14</sup> Ema Simón Pedro timetacahviripa te tépanavainapa majacapavacainapa ema Viya ena apavasanana machaneranayarehi. <sup>15</sup> Eta juca eta náechajisihaquenehi namutu ena víyarahaini profetana. Émaripa ema víyarahaini profeta Amos májuchahi eta juca máechajiriruvana ema Viya, ani macahehi: <sup>16</sup> “Te táequenéna eta juca, nápechavaya núcupaicayare te juca apaquehe. Nétupiripanaya eta nupena táquipairuvahi. Tásiha, tiápechavanayare tiyujarauchanuanayare ena achaneana, tacutiyare eta náejirairanuhi ena machaneranaini ema rey David. Tisuapanuanayareva. <sup>17</sup> Énerichuvare títanucanuanayare namutu ena apavasanana. Nuchaneranayareva éna, taicha námayare eta níjare”. <sup>18</sup> Étara eta juca macayemaquenehi ema Viya. Ánaquiaparipa eta mavarairahi vicaicutiaraya eta juca.

<sup>19</sup> Tímiyanava eta máechajiriruvana ema Santiago, ánipa macahe:

—Tiuri, eta juca eta nupanereruhi núti: Tiúripana vésamiricavacachuca ena vichamuriana apavasanana náequeruvanaripa mayehe ema Viya. <sup>20</sup> Taratarichu vicajurevaca tametaca eta vaipa nacuapechava nacunica eta taeche eta sárare náijaracasiruana eta nasiñarajiana. Váhivare nacuveha súcani apana esena. Énaripa ena esenana, váhivare nacuveha ema apana achane. Váhivare nacunica eta taeche eta sárare namaechatinure. Étaripa eta táitine, váhivare nacunica. <sup>21</sup> Eta vimetacavacayare ena vichamuriana apavasanana eta juca, apaesa vahi nacusemaracavaca ena téhicanarichaha eta mavanairipiana ema Moiséini. Taicha ánaquiáparipa te avasareana eta náechajicuiraparacahi ena vijaneanana israelítana eta mavanairipiana ema Moiséini te náurujisiravana. Puíticha nararihichaha ena náimicapicaucharichucha —macahepa ema Santiago.

<sup>22</sup> Tacahe, ena apóstoleana, énapa ena náiyarahana, énapa ena náumurivana, tíurihi nasama eta mapanereruhi ema Santiago. Tacahe, ticavanahianapa ena apinana téchemarahiana ticapichuanahi, ema Judas Barsabás émapa

ema Silas. Éna téhicanayarehi ema Pablo émapa ema Bernabé eta nachaviraya te Antioquía. <sup>23</sup> Tiuri, eta juca táechajiriruvahi eta carta. Ani tacahehi:

“Vímiamareca eta juca véchajiriruva viti apóstoleana, énapa ena víarahana, énapa ena vichamuriana te juca Jerusalén. Vivaraha tativayare véchajicahe eti viparapenaveanahi te mavahuana ema Viáquenu: eti apavasanana tiávianahi te Antioquía, étipa eti tiávianahi te táunavanahi eta Siria étapa eta Cilicia. <sup>24</sup> Visamairiricahi eta nayanirahi ena tiásihanahi ani te juca. Tiávajiriricaheanapa. Navarahahi nahapapicayare eta epanereruana. Ticamesaheanahi ítauchayare eta mavanairipiana ema Moisés eta ecamarcairaya. Váhisera vanairucanaina eta viyehe eta náimitusirahehi eta juca. <sup>25-27</sup> Vévatacahi ema Judas émapa ema Silas, vanairucanahi viyehe. Éna, timetacaheanayare tamutu eta juca téchacareanahi viyehe. Ena nani téhicanapahi ema Bernabé ema Pablo, ena viparapenaveana vémunaruqueneana. Ema maca Bernabé émapa ema Pablo, tíjaracavanahi éna náepenacaya ema Viáquenu Jesucristo taicha eta nacametarairuirahi. <sup>28</sup> Áni te juca víti, vicuticacahi eta vipanereruanahi, máimitusirahavihi ema Espíritu Santo. Vahi vávarahahini tacajeraequenehini eta éhisirayare ema Viáquenu. <sup>29</sup> Tacarichu vimetacahe eta juca ticamunucarepana te mamirahu ema Viya:

1. Vahi ecunica eta taeche eta sárare nayujaraurehi ena achaneana te tamirahu eta nasiñarajiana.
2. Váhivare ecunica eta táitine eta sárareana.
3. Váhivare ecunica eta taeche eta sárare namaechatinure.
4. Váhivare ecuveha esu apana esena. Énerichuvare eti esenana, vahi ecuveha ema apana achane. Énerichuvare ímitucavaca ena echichanaveana tacuija eta natuhusivaina.

Te yátupina esuapa eta júcana, tájina íchiravaimahi te mamirahu ema Viya. Éma tímicitacaheyare tijaneacaheyareva tamutu sácheana. Tamutupa eta juca véchajiriruvanahi eta eyehe”.

<sup>30</sup> Tacahe, tiyananapa ena tiámana eta carta, nacaijuhepa eta Antioquía. Te títecapanapa ánaqui, nacurujicapa ena nacaijuhequeneanahi nachamuriana. Náijaracapa eta námaquenepahi carta. <sup>31</sup> Te najacapapa eta carta, navejiacapa. Náechajicuhapa te namirahu namutu ena nachamuriana. Tétavicavahi eta náurisamurevahi eta nasamirahi.

<sup>32-33</sup> Nanasipanapa jena cájeanahi ema Judas émapa ema Silas. Éna, énerichuvare eta títucanahi eta máechajiriruva ema Viya. Tiúrihi eta náimitusiravacahi ena nachamuriana. Naconsejachavacahi, náetumesámurechavacáinehi náicha. Te tamutupa eta náimituresirahi, tichavanayarepa nayehe ena tivanecanahi. Tacahe, ena nachamurianahi náechejemachavacapa. Nayaseacapa ema Viya táurivainapahi eta napaisiraina. <sup>34</sup> Émasera ema Silas mavarahapa manasiyare. <sup>35</sup> Énerichuvare, ema Pablo émapa ema Bernabé nanasivarepa tayehe eta avasare Antioquía. Tímiyanavanapa ena tímiturecana nayehe ena nachamuriana. Ticametarairuanavare nayehe ena apamuriana achaneana. Natiarihivare ena apamuriana tímicitacanahi.

### *Tiápechavánavare tiyanana ena apóstoleana te avasareana*

<sup>36</sup> Te táequenepa eta juca semanana, ema Pablo máichapa ema Bernabé:

—Viyanavare viápechava vipaica tayehe eta avasareana, véjiravacapahi ena vichamuriana te vipaisineanapahi cape juca te tínapucainapa viyanahi. Vímaha tájahapuca náicharacavahi —máichapa.

<sup>37</sup> Tacahe, ema Bernabé tísapavahi tiyana. Mavarahapasera mama ema Marcos. <sup>38</sup> Émasera ema Pablo vahi mávarahahini mayanahini ema Marcos. Taicha te títapucainapa tipaicana manaquimurihahi ema Marcos te avasare Perge tayehe eta Panfilia. Vahi máimicatacahíni tayehe eta náematanea-napahi. <sup>39</sup> Nacaemataneacaripa eta mamavarairahi mayanahini ema Marcos. Tacahe, títajicacanapa. Ema Bernabé tiyanapa, macachanehi ema Marcos. Tiávacuhanapa, nacaijuheyarepa eta tiúrupuhi Chipre. <sup>40</sup> Tacahe, ema Pablo mapanerechapa mámayare ema Silas. Te tétupiricavanapa, nayujarau-ghanumapa ena nachamuriana. Nayaseacapa ema Viya eta máimicatasirai-napahi eta napaisiraya. Ticametavanapa tiyananapa. <sup>41</sup> Eta napaisirapahi te achene tétavajicanapaipa tayehe eta avasarechichana Siria étapa te Cilicia. Náejiravacapaipa ena nachamuriana natiarihiqueneanapahi. Náetumesá-murechávacapáipahi.

## 16

### *Emá Timoteo máehicavacapa ema Pablo, ema Silas*

<sup>1</sup> Tacahe, ema Pablo émapa ema Silas náejiravacapaipa ena nachamuriana ticavasanahi te Derbe. Tásiha, tiánucuhanavarepa te Listra. Ánaqui te Listra matiarhihi ema Timoteo, suchicha esu ésuna esena israelíta, téhichivare ema Jesús. Émasera ema maiya, apavasanahi griego éma. Ema maca Timoteo émarichuvare téhichi ema Jesús. <sup>2</sup> Énerichuvare, nacunachahi eta máurivahi ena machamuriana ticavasanahi te Listra énapa ena ticavasanahi te Iconio. <sup>3</sup> Tacahe, ema Pablo mavarahapa mámayare ema Timoteo eta napaisiraya. Tacahe, mavanecapa macamarca\* apaesa tacuija nacucayema ena israelítana ticavasanahi tayehe eta napaisihayare. Taicha náimatihí éma eta machichairahi ema apavasanahi. <sup>4</sup> Tacahe, tiyananapa. Náejiravacapaipa ena nachamuriana te tamutu avasareana. Nametacapahi éna eta táechajiriruvapahi eta carta náimiamareruhivare ena apóstoleana énapa ena náiyarahana tiávihanahi te Jerusalén. <sup>5</sup> Ena nachamuriana, eta nasamirapahi eta mametarairu ema Pablo, tétumechacacanapaipa eta nasuapajirairavapahi. Tamutu sácheana ticajanemuriánapáichucha ena téhicanapahi.

### *Emá Viya máechajicahi ema Pablo mayana eta te Macedonia*

<sup>6</sup> Tiuri, ema Espíritu Santo mametacahi vahi nacuyana eta te tinapaicahi eta avasareana te Asia. Tásiha, náetavicapa eta avasarechichana táunavanahi eta Frigia (ticaijarehivare Galacia). <sup>7-8</sup> Nacaijuheyarehi eta provincia ticaijare Bitinia. Téhesera te tiánehianapa, ema Espíritu Santo mavanecavarepa vahi nacuyana tayehe. Tacahe, náetaviequenehapa. Tiánucuhanapa tayehe eta táunavahi eta Mísia. Náitecapirapa te puerto ticaijare Troas. <sup>9</sup> Te jena yati, máimahapa ema Pablo te mavapure ema émana achane ticavasahi te tinapaica te Macedonia. Titupihahiji éma. Máichapaji eta máechajisirahi:

—Picatajicahavi, piánueca te juca viávihi Macedonia. Pímicatapanahavi —máichapaji.

<sup>10</sup> Eta máimairahi ema Pablo te mavapure eta juca, enevanepa vétupiricavapa eta viyaniraya tayehe eta Macedonia, taicha vémeteacahi eta mavarairahi ema Viya eta viyaniraya eta ánaqui, vicametarairuirayare.

### *Títecanapa te avasare ticaijare Filipos*

\* **16:3** Eta juca nayeherepi eta nacamarcairahi ena israelítana, te tiúchuca ema amuya ajairachicha, te óchopa sache eta máuchusirahi, namarcachayarepa. Émaripa ema Timoteo ichanaruipahinéni. Émasera ema Pablo macavanairipipa macamarcahivaréni éma apanavare, apaesa tacuija nayunacahi ena israelítana.

<sup>11</sup> Tacahe, viávacuhapa eta te puerto Troas. Viyanapa tayehe eta tiúrupuhi ticaizare Samotracia. Te apanapa sache, vítecapapa te Neápolis. <sup>12</sup> Viúcupaicapa viyanapa te avasare Filipos. Eta juca avasare nayehe colonia ena romanoana. Eta ichapepanahivare tayehe eta avasarechichana tinapaicahi eta te tacunahu táuchusine eta sache eta Macedonia. Vinasipanapa tayehe te jena sácheana.

<sup>13</sup> Te jena sache sávaru, viyanapa eta te nayujarasirarehi te tachachacu eta avasare te tachaui eta cajacure. Véjacapa tayehe. Vicametarairupa nayehe ena esenana náurujiruvanahi tayehe. <sup>14</sup> Sutiarihi esu ésuna esena ticaizaruhi Lidia. Ésu, tiásihai eta avasare eta suchusinehi. Esu suca tíjararecarahi eta yéerucava sédana mularumeana. Ésurichu, tipicaurahi me Viya. Susamaracaripa eta mametarairuhi ema Pablo. Ema Viya mavejiasinaipa eta susamure sujacapirayarepahi eta mametarairu ema Pablo. <sup>15</sup> Enevanehi ticaicachasihi esu esena énapa namutu ena tiávihanahi te supena. Tacahe, suvarahapa tiámahavi eta te supena. Sucahepa:

—Te esuapapuca eta yátupirahi eta néhisirahi núti eñi Viáquenu Jesús, ítecapuchanupaini te nupena —sucahepa.

Tásiha, ticamesahavipa tiámahavi te supena. Tacahe, vísapavapa véhica.

<sup>16</sup> Te apana sache, te viápechavavarepa viyana tayehe eta nayujarasirare, vicainunapa esu ésuna amaperu mávaháruhi ema éreana. Tijarauquihi ésu máicha. Esu suca amaperu vanaracahi. Ichapemurihi eta plata suvachanahi, suíjaracapahisera ena suáquenuana. <sup>17</sup> Te tímahahavivare viánucuha, téhichavivare esu suca amaperu. Tipiaracapahi te véquene. Ánipa sucahe:

—Ena nani ajairana ñivanarana eñi Viya Viáquenu vimutu viti achaneana. Náechajisihavare eta eyehe eta achene ticaijuhe ñe Viya nayanihayare ena náuchucureanayare —sucahepa.

<sup>18</sup> Ichapemuri eta sácheana eta suéhicarairisirahavihi. Mapuñacapa ema Pablo. Téquerucavapa. Tásiha, máichapa ema éreana ema tiávahácahi ésu:

—Te máijare ema Náquenu Jesucristo, nuvanecavi piúchuca te suáquehe esu suca amaperu —máichapa.

Enevanepa tiúchuca ema éreana. Majunijiacapa ésu.

<sup>19</sup> Te náechapa ena suáquenuanahi, tiseanapa taicha tájinapa suviahini eta suplatanechihavacahini. Tacahe, nacaratacapa ema Pablo émapa ema Silas. Námapa te plaza te namirahu ena tuparairucanahi. <sup>20-21</sup> Tacahe, nametauchavacapa nayehe ena tuparairucanahi. Ánipa nacahe:

—Ena nani ajairana israelitanacacha. Nacaechepuca eta tamauriqueneana. Navarahapa tíminajicahaviana eta viyeherepiana. Navarahavare véhica eta vimaimatiequeneruhi viti romanoana. Váhivare táisapacarehini vítauchahini eta nayeherepianahi énatatajiana —náichapa.

<sup>22</sup> Tacahe, ena achaneana tiseanapa nayehe ema Pablo émapa ema Silas. Tacahe, ena tuparairucana juéseanahi nacavanairipipa navejamuhicavaca, náestacavacapa te yucuquipiana. <sup>23</sup> Te tamutupa eta náestasiravacahi, námapa te cárcel. Navanecapa ema nacapitara ena carceléroana máechapajirica muraca eta tapaja. <sup>24</sup> Te masamapa ema nacapitara eta navanairipihí, máimisiapavacapa tayehe eta téqueneha cuarto. Máeratapaiquechavacapa te cepo. Manacapa cantavu eta tapaja.

<sup>25</sup> Tacahe, eta jena enumuhuquenepa yati, eta nacaeratairahi ema Pablo émapa ema Silas, tijiranaichucha tiyujaracanahivare me Viya. Ena apamuriana présoanahi nasamararacaripa eta jirasare. <sup>26</sup> Tíjahúchavapa tiyamurica muraca eta apaquehe. Tiyamuricapa eta yúchamana. Tíjahúchavapa téjiacavaca eta tapajacurana eta cárcel. Téjapucapa eta cadenana

náitihanahi ena présuana. <sup>27</sup> Téjamiuchavapa ema nacapitara ena carceléroana. Máimaharine eta tapajana téjiacavacarihiri. Máimijachapa nájinaripahi ena présoanahi. Tásiha, mavehapa eta mayehe espada. Mavarahapa ticapacavayarehini táichavenehi eta mapisirahi. <sup>28</sup> Émasera ema Pablo mapiaracapa:

—Vahi picucapacava. Vitiaririchuhi vimutu. Nájina émanaina téjiacavaina —máichapa.

<sup>29</sup> Tacahe, ema nacapitara tiyaseserecapa eta namicahuyare. Tisiapapa máimamurihayarehi éna. Tiyayacarepainecha eta mapisirapahi. Tépuycapa te namirahu ema Pablo émapa ema Silas. <sup>30</sup> Máichuhavacapa éna, mámapa te mapena. Mayaserecavacapa:

—Tátanaveana, ¿tájahapucaini nícharacavaini eta núchucuirayare núti apana?

<sup>31</sup> Éna najicapapa:

—Pácasiña pisuapa ema Viáquenu Jesucristo. Tásiha, éma ticuchucuhaviyare píti, énapa ena pichichanaveana —náichapa.

<sup>32</sup> Tacahe, náimitucapa éma eta máechajiriruva ema Viya, énapa namutu ena tiávihanahi te mapena. <sup>33</sup> Étarichu jena yati ema nacapitara masipasinavacapa eta najarana ema Pablo émapa ema Silas. Tacahe, ticaicachasipa éma, esu mayena, ena machichanaveana, énapa ena apamuriana tiávihanahi te mapena. <sup>34</sup> Te táequenepa eta juca, mámamurihavarepa te mapena. Máenica-vacapa. Tiúrisamureripa éma, énapa namutu ena tiávihanahi te mapena, eta macuchucuiravacayare ema Viya eta nasuapiraipa.

<sup>35</sup> Te las nuépepa sache, ena juéseanahi navanecapa ena nasuntarurana nacuchupanavacayarehi ena náerataruanahi. <sup>36</sup> Tacahe, ema nacapitara ena cárceléroana máichapa ema Pablo:

—Jucarihi eta órdena nayehe ena juéseana eta nacaitisiraheya. Tiúripa eyana iúchuca. Vaipa táenamavacare —máichapa.

<sup>37</sup> Émasera ema Pablo máechajicavacapa ena suntaruana. Máichapa:

—Víti tavanarahavi eta Estado te Roma. Viávacuhahi eta ley. Vahi táuricahini náichahavihin ena juéseana ticaratacavahanapa téstacavahanapa te namirahu ena achaneana. Vahi nayaserecavahinumahini te tatiarhipuca eta viviurevahi. Tásiha puiti, navarahapa nayumurucayare eta nacuchusirahaviyare. ¡Vahi ene tácahe! Emetaca énaína náiteca nacuchupanahavi —máichapa ema Pablo.

<sup>38</sup> Tacahe, tichavanapa ena vanairucana. Nametacapa ena juéseana eta máechajiriruva ema Pablo. Ichaperine tipicana ena juéseana eta nasamirahi tavanaranairahi eta Roma. <sup>39</sup> Tacahe, tiyananapa ena juéseana nacuchupana. Tiperdonachavanapa nayehe. Náichapa:

—Ájapanuhavi. Eperdonachahavi eta juca víchirahehi. Ecatajicahavi, vahi ecumetauchahavi. Ájapanuhavichucha, tiúripanahipucáini iúchucaini eta te juca avasare viávihahi, apaesa náesamiricahepa ena iánaranahi —náichapa.

<sup>40</sup> Tacahe, te tiúchucanapa te cárcel ema Pablo émapa ema Silas, tiyananapa tichavana te supena esu Lidia, viávihahi víti. Vicurujicapa ena vichamuriana. Tásiha, náetumechavacapa, náimitusiranumapa eta náimiyavachucha eta nasuapajiraivaina mayehe ema Viya. Tásiha, tiyananapa.

## 17

### *Nacaehepuca eta semanere ena israelítana te avasare Tesalónica*

<sup>1</sup> Eta nayanirahi ema Pablo émapa ema Silas, tiánucuhanapa tayehe eta avasareana Anfípolis étapa te Apolonia. Títecanapa tayehe eta apanavare



avasare Tesalónica. Tatiarihihi ánaqui eta náurujisirareva ena israelítana. <sup>2</sup> Eta mayeherepihi ema Pablo, matupiru te náurujisirareva. Mapana sávaru eta macametarairuirihi nayehe ena achaneana. <sup>3</sup> Manerejicapahi eta te Sagrada Escritura eta máechajicurepahi. Máimitucavacahi eta máitesiraipahi ema Cristo. Ánipa máichavacahi:

—Tiyerehi eta vicuchapirahi eta máimeresiravayare ema Cristo eta viyehe viti israelítana. Tímitucahavihi eta Sagrada Escritura eta macatajivairayarehi, nacapacayarehi. Émasera téchepucayarehi te máecari. Puiti numetacahé: Nímatipa ema Jesús Nazareno, ema nacaparuihi. Téchepucaipahi éma. Eta juca tímicaecherachahi émahí ema Cristo —máichapa.

<sup>4</sup> Tacahe, tinerejicavanahi ena achaneana. Natiarihi ena tisuapanahi, náurujiacahi ema Pablo émapa ema Silas. Camurianavare ena griégoana apavasanana tipicauchanahi ema Viya, téhicanahivare. Énerichuvare ena esenana nayanana ena táiyarahana eta avasare tinerejicavanahivare ena téhicanahi. <sup>5</sup> Énasera ena apamuriana israelítana masuapajirairahanahi, ticapinaruanahi eta náimairahi ena camuriqueneanahi achaneana téhicanahi ena apóstoleana. Tisemasamureanarichucha. Nacurujiropa ena ajairana váinarajipanereruana, máematanereanahi te cálleana. Tíchuhajiricacanapa eta nacaechepusiraya eta semanere. Natanucapa ema Pablo émapa ema Silas, navarairahi nacaetemajiricavaca te namira ena achaneana. Tiyananapa eta te mapena ema Jasón. Náquipaicapa eta tapaja. Tisiapanapa. <sup>6</sup> Eta namaichimavirahi ema Pablo émapa ema Silas, nacaratacapa ema Jasón énapa ena apamuriana machamuriana. Nachururupaicavacapaipahi eta námirapahi te namirahu ena tuparairucanahi. Tipiaracanapa eta nasemanevahi, nacahepa:

—Títecapauchahavianahi ena nani achanetatajiana náitecapaurehavianahi. Najararecapahi eta viyeherepiana, nahapapicahivare eta napanereruana ena vijaneana. <sup>7</sup> Éna majacapaqueneanahi ema Jasón te mapena. Namutu ena nani nacaecahihi ema aquenuca viyehe Emperador romano, náepuruvare eta mavanairipiana. Náimijachahiji mararihi ema apana rey ticaijarehipuca Jesús —nacahepa.

<sup>8</sup> Te nasamapa eta juca, ena tuparairucana énapa ena apamuriana achaneana, napanerequeneháinehi. <sup>9</sup> Tájinasera apanainahini náicharachini, nayaseacapa nanaquica eta prenda eta náuchusirayare ema Jasón énapa ena machamuriana. Tiámainucava te náuchucapa te avasare ema Pablo ema Silas, náimichavayarepa eta prenda.

### *Éma Pablo, ema Silas títecapanapa te avasare Berea*

<sup>10</sup> Te jena yátiquenehi, ena vichamuriana námapa nayumurucapa eta nacuchusirahi ema Pablo émapa ema Silas tayehe eta avasare. Tiyananapa nacaijuhe eta avasare Berea. Te títecapanapa ánaqui, tiyananavare tayehe eta náurujisirareva ena israelítana. <sup>11</sup> Éna nani israelítana ticavasanahi te Berea, tiúripanereruanapana nayehe ena ticavasanahi te Tesalónica. Navapina éna, nasamararaca eta mametarairuhi ema Pablo. Tamutu sácheana nacaravahuhi eta Sagrada Escritura. Navarahahi náechayare te yátupihipuca eta mametarapihi ema Pablo. <sup>12</sup> Jéhesareinehi, camuriana ena tisuapanahi. Camurianavare ena apavasanana tisuapanahi. Te namuri, natiarihivare ena esenana ticapicahuqueneanahi, énapa ena ajairana. <sup>13</sup> Nasamairiricavarepasera ena israelítana ticavasanahi te Tesalónica eta macametarairuripahiva ema Pablo eta te Berea. Enevanepe tiyanana nacapayaca. Te títecapanapa, náimiyusemacavarepa ena achaneana. <sup>14</sup> Énasera ena machamuri-

ana ema Pablo enevanepa náevataca éma te tachausi eta mar. Nanasipasera te Berea ema Silas, ema Timoteo. <sup>15</sup> Ena tiámanahi ema Pablo, te títecapanapa te puerto, tiávacuhanapa tiyananapa tayehe eta avasare Atenas. Te títecapanapa, étapa nachavinehi ena tinapananahi ema Pablo. Tacahe, ema Pablo matuparacavacapa nametaca ema Silas, ema Timoteo nayanavane nacapayaca éma eta te mávihahi.

*Tímiturecapa ema Pablo te avasare Atenas*

<sup>16</sup> Eta macuchapiravacahi náitecapiraya ema Silas, ema Timoteo, vaipa máitucacarehini ema Pablo eta máimairavacahi ena achaneana nayeheheeracahi eta camuriquene nasiñarajiana. <sup>17</sup> Tacahe, tamutu sávaruana, tiyana eta te náurujisirareva ena israelítana. Máechajisihahi eta tiúrina échájirirucava nayehe éna, énapa ena apavasanana griego típicauchanahi ema Viya. Tamutuvare sache máechajisihahi éma te plaza nayehe ena achaneana natiarihiqueneanahi. <sup>18</sup> Natiarihihi ena ajairana ena téhicanahi eta máimiturapi ema ticaijare Epicuro, énapa ena apamuriana ticaravahuanahivare eta náimiturapijana ena estoicoana. Te jena sácheana, téchajiricavanapa mayehe ema Pablo. Váhisera nácaicutiarapahini eta macayemapahi. Nacahepa:

—¿Tájahasamipucara tacayemahicácha eta mapanereruhi ema maca?

Ena apamuriana ánivare nacahe:

—Ema maca ticametairurahi tayehe jácani apanavare masiñarajianarichu —nacahepa.

Nacahehi éna eta juca, taicha ema Pablo mametacavacahi eta máepenirahi ema Jesús étapa eta máechepusirahi, mápechiravahi títareca. <sup>19</sup> Tacahe, tiyananapa tayehe eta cabildo náurujisirareva ticaijarehi Areópago. Ánaqui nayaserecapa ema Pablo:

—Vivaraha vímati víti eta juca arairuhi pímiturapihi eta viyehe. <sup>20</sup> Taicha tiáramicarehi eta juca vimaimatiquenehi. Vivaraha véchayare tájahapuca tacayemahi eta juca —náichapa.

<sup>21</sup> Taicha ene nacahehi namutu ena ticavasanahi te Atenas, énapa ena náiteruanapahi. Náuricarinehi náechajisiha tamutu sácheana eta náimahaqueneana nasamaqueneanapahi arairuqueneana.

<sup>22</sup> Tacahe, ema Pablo titupihapa te namirahu te nayehe cabildo. Máichavacapa:

—Tátanaveana, eti ecavasana te juca Atenas. Nímararacahehi eta yátupirahi religiósohe. <sup>23</sup> Taicha te nítecapapa núti eta ani eyehe, nupaicahi tamutu eta eyujarasirareana. Nímahapa eta eyehe altar tatiarihihi eta ajureca ani tacahehi: “Ema Viya vimaimatiquene”. Tiuri, ema maca Viya eyujaraureasa emáimatiquénehi éti, émara ema Viya néchajisihaquenehi núti.

<sup>24</sup> Émara tépiyacahi eta apaquehe, étapa eta vímahaqueneanahi távaphianahi eta juca apaquehe. Émara téchahi ticavanairipihi te anuquehe étapa te juca apaquehe. Ema Viya vahi tácarichuimahi máucupaisihaya eta te vépiyaruanahi templo, taicha vahi mácamunu eta mapenainaichuhini eta te juca apaquehe. <sup>25</sup> Váhivare mácamunu vjaracasichahini eta viámavahu viti achaneana. Vítira vicamunuvahi eta mayehe. Éma, téchapajiricahavihi vimutu. Tíjaracahavihi eta táurivahi eta vítaresira.

<sup>26</sup> Acane te tépanavainapa tamutu, ema Viya máepiyacapa ema máinapuiru achane ticaijare Adán. Vimutu viti achaneana, mámariequenehavi ema Adán. Apánapanenéjihavihiséra maicha ema Viya. Tamutu eta apaquehe viávapaicahi máicha. Máimicutiarachapahisera eta táenasihayarepahi eta

viávasanapachuyarehi. Énerichuvare, máimicutiarachahivare eta táichecuyare eta vítaresirana. <sup>27</sup> Vitiarihisera viti achaneana vémitisicaipa ema Viya. Émasera mavarahahi vitanucayare. Váhinéni máyerehíhávihini. Titsecavahi éma te vichacaya. Mácani mavaraha matanuca, máichimavávanyarehi. <sup>28</sup> Taicha vítarecahi máicha, tímipaicahavihi, achanehavihi máicha. Émaripa éma ichapequene escribáno te emuri éti macahehi eta máechajiruvahi: “Viti achaneana cáitarecahavihi ema Viya”. <sup>29</sup> Víti vímatihí eta máchanechirahavihi ema Viya, macaitaresirahavihi. Viyamuricahi vipaicahi máicha. Tacahe, véjecapiravahi víti te vímijachapuca virataha viáchanecha eta visiñaraji. Vímivasichahineni eta jácani, váhisera tasamarahihini, váhivare tapaicahini, váhivare tayamurichápucaini. Tayanapanepuca táurina te vépiyaca eta óropuca, plátapuca, chínapuca. Váhivare váratahaimahi nacasiñacarehini vícha. <sup>30</sup> Te vicasiñarajhipuca eta vépiyaruana, vimáimatirarichaha. Ánaquiaparípa eta macamichirahi ema Viya ena achaneana eta nacasiñairahi eta nasiñarajiana. Puítisera vaipa macamicha eta juca. Tivanecahavipa vimutu viti achaneana vínajica eta juca, tátupiruvapa eta véneuchiravaina eta mayehe. <sup>31</sup> Taicha tatiarihiyarehi eta jena sáchezare máicuñacayare namutu ena tíchanahi eta juca. Tamutuina maétupiricayare. Mararihi ema achane manerejiruhi ema Viya, juéseyare eta viyehe. Éma, ticaijare Jesús. Ema Viya máimerecahi eta manerejisirahi ema Jesús juéseyarehi, taicha macaechepucahi te máecari te táequenepa eta máepenirahi —macahepa ema Pablo.

<sup>32</sup> Te nasamapa eta máechajisihairahi eta máechepusirahi te máecari ema Jesús, natiarihi ena nacaecahiríchucha. Énaserá ena apamuriana napanerequenehapa. Tacahe, náichapa:

—Téhenarinevare apahena péchajisihavare eta juca, apaesa visamavi —náichapa.

<sup>33</sup> Tacahe, tiúchucapa ema Pablo eta te náurujisirareva. Tiyanapa. <sup>34</sup> Natiarihisera ena apamuriana nasupahi náehicapa eta mametarapi ema Pablo. Matiarihíhi ema Dionisio táiyaraha eta nayehe cabildo, ésupa esu ésuna esena ticaijaru Dámaris. Natiarihivare ena apamurianahi.

## 18

### *Ema Pablo tiyanapa te avasare Corinto*

<sup>1</sup> Te táequenepa eta juca, tiyanapa ema Pablo. Tiúchucapa eta avasare Atenas. Ticaijuhe eta apana avasare ticaijare Corinto. <sup>2</sup> Ánaqui macainunapa ema émana israelíta ticaijarehi Aquila, ésupa esu mayena ticaijaru Priscila. Ema maca Aquila máuchusinehi te tinapaica eta departamento Ponto. Tayerevahisera eta áñoana, tiyananapa tayehe eta avasare Roma. Macáemataneínehi ánipihi. Émasera ema aquenucaini Emperador Claudio macavanairipipa náuchuca namutu ena israelítana eta te Roma. Tacahe, tiyanapa ema Aquila tayehe eta avasare Corinto, étapa macainunainehi ema Pablo. <sup>3</sup> Énapa mávayechavacahi ema Pablo. Ena nani ticiticacanáhi eta náematanerepiana tálabarteroana. Tímicatacacanapa eta nacaematanerahi.

<sup>4</sup> Tiuri, tamutu sávaruana ema Pablo tiyanahi tayehe eta náurujisirareva. Maconsejachavacahi ena achaneana. Macajimuyacahi eta nasamureana ena israelítana énapa ena apavasanana.

<sup>5</sup> Tacahe, napaenumavapa nacapayaca ema Silas émapa ema Timoteo, tiásihanahi te Macedonia. Eta natiaríhirahi éna, tépanavapa ema Pablo ticame-tarairu tamutu sácheana eta máechajiriruva ema Viya. Mavarahapa macajimuyacavacaya ena israelítana ema Jesús émairahi Cristo ema nacuchapaquenehi. <sup>6</sup> Natiaríhisera ena apamuriana masuapajirairahanahi. Nacatiacapa ema Pablo, napanararachavare. Tásiha, tétatajiacavapa ema Pablo eta máepacuhasa, táicutiarahi eta namaimitucacarevahi ena nani. Majunijicyarepa. Tásiha, máichavacapa:

—Étipa ecatapiravayare vaipa iúchucuhaimahi tayehe eta ecuñaraqui te apana vítaresira taicha eta emajacapirahi eta máechajiriruva ema Viya. Vaipa necha núti. Puiti juca nuyaninapa, nímiturecaya nayehe ena apavasanana —máichavacapa.

<sup>7</sup> Tacahe, tiúchucapa tayehe eta náurujsirarevahi. Tiyanapa te mapena ema apana machamurihi ticaijare Justo. Ánaquipa eta máimituresihahi. Ema maca Justo, vahi israelítana, mapicauchahisera ema Viya. Eta mapenahi te tachacaya eta náurujsirareva ena israelítana. <sup>8</sup> Matiaríhi ema apana achane ticaijare Crispo, tuparairucahi tayehe eta náurujsirarevahi. Masuapahi éma, ésupa esu mayena, ena machichanaveana, énapa ena apamuriana tiávihanahi te mapena. Camurianavare ena tisuapanahi ticavasanahi tayehe eta avasare Corinto eta nasamirahi eta máechajiriruva ema Viya. Namutu ticaicachasianahi. <sup>9</sup> Tacahe, étana yati, ema Viáquenu Jesús máechajicapa ema Pablo, ánipa maicha:

—Vahi picupica. Pímiyanavachucha picametarairu te juca avasare, <sup>10</sup> taicha camuriana ena nuchaneranaya. Núti nutiaríhiya te pichacaya. Tájina náicharacavimahi ena piánarana —macahepa ema Jesús.

<sup>11</sup> Tacahe, ema Pablo manasipa. Étana año y medio macahehi tayehe eta avasare Corinto. Tímiturecachi nayehe ena achaneana eta máechajiriruva ema Viya.

<sup>12</sup> Étasera jena sácheana matupíhairahi ema Prefecto ticaijare Galión. Aquenucahi éma tayehe eta avasare Corinto tayehehi capital eta departamento Acaya. Tiuri, ticurujicacanapa ena nacanarayarepa ema Pablo. Nacaratacapa námapa te mamirahu ema aquenuca, nametauchayarehi. <sup>13</sup> Tacahe, náichapa ema aquenuca:

—Ema maca achane macontracha eta viyeherepi. Ema máimitucavaca ena vijaneanana, náitsivachayare eta véjirairaya ema Viya —náichapa.

<sup>14</sup> Téchajiuchavayarepaini ema Pablo, émasera ema Galión macachuricapa. Máichapa ena israelítana:

—Tiuri, esamanuchaha éti. Te tíñehhipuca eta máejecapiravahi ema maca, ticaparecahipuca, núti apana nímisipavahini juésenuinahini eta eyehe eta nusamirahénahini. <sup>15</sup> Étasera echájrucavánachucha te máijare ema mácana apana, étapa eta eyeherepiana éti. Tájina táíñehicaréna eta juca. Vahi nímisipavaimahi núti, juésenuinahini tayehe eta juca. Ímahainepa éti —máichapa.

<sup>16</sup> Tacahe, máevatacavacapa náuchuca te mamirahu. <sup>17</sup> Tacahe, namutu ena apavasanana griégoana nacaratacapa ema Sóstenes, nacapitarahi ena israelítana. Náestacapa te mamirahu ema Prefecto Galión. Émasera váhiquene máimisiapavahini. Váhivare macatiuchahini. Ema Pablo tichavapa tayehe eta Antioquía

<sup>18-19</sup> Tiyerehichaha eta jena sácheana manasirarichaha ema Pablo. Te ticaicutiaravapa, mavarahapa tiyanaya eta te Jerusalén, tétavajisirayarepahi

eta te avasare Efeso, étapa te avasare Tiro, táunavahi eta Siria. Tásiha, ticame-tavapa nayehe ena machamuriana. Macachanevacapaipa ema Aquila ésupa esu mayena Priscila. Tiyanapa tipaicana eta te puerto ticaijare Cencrea. Te tiánuacanayarepa, ema Pablo ticachucasinumapa títahisinumapa eta machuti, máitauchirayarehi eta mayehe promesa. Te títecapanapa te avasare Efeso, nanasihayarehi ema Aquila ésupa esu Priscila. Te jena sache sávaru, tiyanapa ema Pablo tayehe eta náurujisirareva ena israelítana. Téchajiricavaipa nayehe, máimitusiravacahi éna. <sup>20</sup> Tacahe, éna navarahapa náiminasicha, émasera vahi máisapavahini. <sup>21</sup> Téhesera te ticametavapa nayehe, máichapa:

—Nuyanayare tayehe eta Jerusalén. Ánaqui nunarasihayare eta jena sácheana piéstairayare. Nuchavayaresera nímahapanaheyare éti, te mavaraha ema Viya tacuijaichu níchava —máichavacapa.

Tacahe, tívacuhavarepa. Majunijicapa eta Efeso. <sup>22</sup> Te títecapapa ema Pablo tayehe eta avasare Cesarea, tiánucuhapa tayehe eta Jerusalén. Máechajipánavacapa ena machamuriana. Te táequenepa, tiyanapa te avasare Antioquía. <sup>23</sup> Tiyerehi eta cájeana manasiranumahi tayehe eta avasare Antioquía. Tacahe, tiápechavavare tipaica. Máejiravacapahi ena machamuriana te jácani návihavacapahi tayehe eta avasarechichana te Galacia étapa eta Frigia. Maconsejachavacapahi ena machamuriana. Matiarahi ema Apolo te Efeso

<sup>24</sup> Te jena sácheanahi, títecapahi te avasare Efeso ema émana israelíta ticaijare Apolo. Éma máuchurehi te avasare Alejandría. Máituca ticametarairu éma. Máimativare yátupi tamutu eta Sagrada Escritura ticaijare Antiguo Testamento. <sup>25-26</sup> Mavapinahi éma tamutu, étaripa eta máechajisirana. Ema Apolo máitucahi eta máimiturapiana ema Juan Tícachasiricarahi eta máitecapirayare ema Cristo ema nacuchapaquenehi. Máechahi eta máicachasisírahi ema Juan ema Jesús, ema yátupiquenehi Cristo. Váhisera tamutuhini maecha eta máichavaquenevahi ema Jesús. Tamutu sávaruana, tiyanapa tayehe eta náurujisirareva ena israelítana. Ticametarairupa, vahi mapicacaracavahini. Ánipa macahe:

—¡Títecapaipa ema Cristo ema vicuchapaquenehi! Ema ticaijare puiti Jesús. Vétupiricavaya vimutu eta viyaniraya te Jerusalén. Ema véhicaya taicha ema viáquenuya —macahepa.

Étasesa te nasamapa ema Aquila ésupa esu Priscila, námapa éma te napena. Tásiha, náimitucapa tamutu eta apamuriana téchacareana mayehe ema Jesús. <sup>27</sup> Manasipanapa ema Apolo te jena cájeana. Tacahe, mavarahapa tiyanayare te tinapaica eta departamento Acaya. Tásiha, ena machamuriana náimicatapa. Ticajureanapa eta carta nayehe ena nachamurianahi tayehe eta avasareana macaijuheyarehi apaesa táuri eta najacapiraina. Te títecapapa éma tayehe eta Acaya, ichape eta máimicatasiravaca ena machamuriana taicha ema Viya máijaracahi eta máitupajijiasiravahi. <sup>28</sup> Máimitucahivare ena israelítana eta te náurujisiravana. Máiminecapáequenehávacahi tayehe eta Sagrada Escritura ema Jesús émahí ema Cristo ema nacuchapaquenehi.

## 19

### *Títecapapa ema Pablo te avasare Efeso*

<sup>1</sup> Tiuri, manasipa ema Apolo eta te avasare Corinto. Te jena sácheana, ema Pablo tiúchucahi eta avasareana táunavanahi eta Frigia. Eta mayanahapahi te achene te márijuecuana. Tacahe, títecapapa tayehe eta avasare Efeso. Te jena



avasare, natiarihihi ena apamuriana tisuapajirahianahi. Máimativacapaipa éna. <sup>2</sup>Tacahe, mayaserecavacapa:

—¿Mávaháruhépa ema Espiritu Santo te ecáijuhéinapa ema Viya? — máichavacapa.

Tásiha, éna najicapapa:

—Váhira visamairirica eta matiarahirahi ema Espiritu Santo.

<sup>3</sup>Mápechavare ema Pablo mayaserecavaca:

—¿Tájahasica tacayemahi eta ecaicachasirahi éti? —máichavacapa.

Éna najicapapa:

—Eta vicaicachasirahi véhicahi eta máimiturapianahi ema Juan Tícachasirarahi —náichapa.

<sup>4</sup>Ema Pablo mametacavacapa:

—Tiuri, yátupi ema Juan máicachasicavacahi ena achaneana eta náitsivachiraya eta náitaresirana. Énerichuvare, mametacavacahi eta nasuapirayare ema achane téhiequenehapahi éma. Puiti numetacahe: Ema maca téhiequenehapahi ema Juan ticaijare Jesús. Émaqueneripahi ema Cristo —máichavacapa.

<sup>5</sup>Tacahe, te nasamapa eta juca, navarahapa ticaicachasiana te máijare ema Viáquenu Jesucristo. Tacahe, ema Pablo máicachasicavacapa. <sup>6</sup>Tacahe, manacapa eta mavahu te nápusiana. Tásiha, tiúcupaicapa ema Espiritu Santo, mávahácavacapa. Témunahiricavanapa apáechajirírúvána. Ticametairuanapa eta máechajiriruva ema Viya. <sup>7</sup>Eta nasimutuvahi ena nani, dóceanahi ena ajairana.

<sup>8</sup>Tamutuhi sávaruana tiyana ema Pablo te náurujisirareva ena israelítana. Mapana caje ticametairuru nayehe ena achaneana. Vahi mapicacarcavahini eta macametairuirahi. Macajimuyacavacahi ena achaneana, náehisiráina ema Jesús, náimatiraina eta émairahi Cristo, ema nacuchapaquenehi. <sup>9</sup>Natiarihisera ena apamuriana murácasamuréanaríchucha. Váhivare návarahahini náehicahini ema Jesús. Te jácani náurujisiravana, nacaecahirichucha eta arairu máimiturapihi ema Jesús. Tacahe, ema Pablo térajicavapa eta nayehe. Máiputsimurihapa ena tisuapajirahianahi, mámamurihapa tayehe eta colegio máimituresirarehi ema ticaijare Tirano. Tacahe, ema Pablo tímiyanavapa tímitureca tamutu sácheana nayehe ena machamuriana. <sup>10</sup>Apina año eta máimituresirahi. Tacahe, ena máimitureanahi tiyananapa típaicana. Ticametairuanapaipa eta máechajiriruva ema Viya nayehe ena achaneana ticavasanahi eta te avasarechichana táunavanahi eta avasare Efeso, tayehehi capital eta departamento Asia. Tásiha, nasamairirícapa namutu ena achaneana: ena israelítana énapa ena apavasanana. <sup>11</sup>Ema Viya máimicatacahi ichape ema Pablo eta máichirayare eta tiáramicareana. <sup>12</sup>Ichapemuriana ena achaneana macanararuanapahi tayehe eta páñoana, camisapuca macaratajiruanapahi. Májaracavare nacaitecapaya nayehe ena nacajumaqueneana, tásiha tacanaracapaipa. Énerichuvare táquijicapahi ena éreanana.

<sup>13-14</sup> Te jena avasare, natiarihihi ena siéteana israelítana ticaparapejiricacana, machichanaveanahi ema ticaijarehi Esceva, náiyarahaini ena tiyujaracarahiana te Jerusalén. Tacahe, ena nani siétequeneana napaiririruanahi. Náitucahi naveha eta itiriji. Éna, eta navehairahi eta itiriji, navarahapa éna apanava napiaracayare eta máijare ema Jesús. (Váhisera náehicahini eta máimiturapiana.) Matiarihivare ema achane macajumaquenehi maicha ema éreana. Tacahe, te napauchapa ema macajumaquenehi, náichapa:

—Piti éreana, vivanecavi te máijare ema Jesús máechajisihaquenepahi ema Pablo. Piúchuca te máquehe ema maca macajumaquene —náichapa.

<sup>15</sup> Tásiha, ema éreana majicapapa:

—Nímati ema Jesús, émapa ema Pablo. Étisera vahi nímatihe. ¿Nájahahepuca? ¡Ásajipucaini nusuapahehini! —máichapa.

<sup>16</sup> Tacahe, ema achane mávaháruhi ema éreana majunauchavacapa éna. Máehavacapa máquipapaicavacapa namutu ena siétequeneana. Tiyananapa tijunana, najunijicapa eta mapena ema macajumaquene. Mamuiriareanapaipa, ticajaranapaipa. <sup>17</sup> Tásiha, téchacarehi eta juca nayehe namutu ena ticavasanahi tayehe eta avasare Efeso, énaripa ena israelítana. Te nasamairicapa, tipicanarinehi. Tásiha, nacahepa:

—Tétavicavapa tamutuirá tarataha eta máijare ema Jesús, náquenu ena nani —nacahepa.

<sup>18</sup> Tacahe, ena téhicanapaipa ema Jesús, te náurujisiravana te tiyujaracana, timetaurecavanapaipa tamutu eta nájecapiravana eta náitare-sirahi. <sup>19</sup> Natiarihi ena apamuriana ticaratacanahi eta iápemarecare. Námavacapaipa eta náitucaqueneanaini nasiñarajianainihi, nayehepuca libro. Náijuquechavacapaipa te namirahu ena nachamuriana. Vaipa nacatiequenehapahini. Natupaequenehapasera eta tavachanahi te navacharecainapa tacapayacahi eta \$b250,000. <sup>20</sup> Tacahe, ichape eta nasuapira ena achaneana eta máechajiriruva ema Viya. Camurianapaipa ena téhicanapahi.

<sup>21</sup> Te táequenepa eta juca, ema Pablo macahepa:

—Nuvarahapa néjirapanaya ena vichamuriana ticavasana te Macedonia énapa ena apamuriana ticavasana te Acaya. Tásiha, nánucuhayare te Jerusalén. Te tamutupa eta juca, nuyaninavarepa te Roma —macahepa.

<sup>22</sup> Tacahe, máevatacavacapa náinapuca ena apinana machamuriana ema Timoteo émapa ema Erasto. Tiyananapa tayehe eta Macedonia. Émasera manasipanarichaha tayehe eta Efeso.

### *Tisemamurianapa ena achaneana te avasare Efeso*

<sup>23</sup> Tacahe, te jena sácheanahi, tisemamurianapa ena apamuriana achaneana taicha camurianapaipa ena téhicanapahi ema Viáquenu Jesús. Áni tacahehi eta nasemirahi. <sup>24</sup> Matiarihahi ema achane ticaijare Demetrio. Ema maca achane, máepiyacahi eta suyehe trónochicha esu nasiñaraji ticaijaru Diana. Ticutihahi eta pétichicha eta táimahi eta templo suávihahi ésu. Amairihahi plata. Tiúrihi eta maganaresira éma, énapa ena apamuriana plateroana macutiqueneanahi. <sup>25</sup> Tacahe, macurujicapa ena apamuriana plateroana. Tásiha, máichavacapa:

—Tátanaveana, éti ímatihahi eta juca vématanerepihi, tiúrihi eta viganaresira. <sup>26</sup> Ímaharichuhi puiti éti, esamahivare ema maca Pablo macahehi eta máechajiruvahi ena nani visiñarajiana vépiyaruana viti achaneana váhiji yátupinahini vénainahini. Ichapemurianaripa ena tisuapanahi, taicha nasamaripa eta máimiturapiana namutuyareni ena achaneana ticavasanahi te juca viávasa Efeso, énerichuhivare ena ticavasanahi eta te avasarechichana táunavana eta Asia. <sup>27</sup> Ticauyayacarehi eta juca. Táemitiequenehahini eta juca táurivahi eta viganaresira. Étaripa eta templo suávihahi esu súrinaquene visiñaraji Diana témitiequenénapapuca, nacuijapapuca nacuechahi. Náemiticáinapapúca eta táurivainihi eta náejirairahi namutu ena achaneana te juca apaquehe —máichavacapa.

<sup>28</sup> Tacahe, eta nasamirahi ena apamuriana, tisemanarinehi, tipiarcana. Ánipa nacahe:

—¡Viva esu Diana visiñaraji viti efesioana! —nacahepa.

<sup>29</sup> Tacahe, tiseamuriana ena apamuriana achaneana. Apanapa eta napanerecha. Tiuri, natiarihihi ema Gayo émapa ema Aristarco, macompañeroana ema Pablo náuchureanahi eta te avasare Macedonia. Tacahe, ena achaneana nacaratacapa ena nani apinana. Námapa tayehe eta náurujisiráreva. <sup>30</sup> Émapa ema Pablo mavarahapa masiápamuriháyarehíni máechajicavacayarehi, énasera ena machamuriana vahi náisapahini. <sup>31</sup> Natiarihivare ena apamuriana, tuparairucanahi tayehe eta departamento Asia, mayeaneanahi amigo ema Pablo. Nacametarapipa vahi macuímisiápava. <sup>32</sup> Tacahe, eta náurujisirávahi tijajamurihanahi. Ema émana tipiaracahi, apanahi eta macayema. Ema apana, énerichuvare tipiaracahivare apanahivare eta macayema. Namutuyareni ena achaneana apápipijivácachucha eta nacayemaqueneana. Vahi náimatiéquenehahíni tájahapuca tacayemahi eta náurujisirávahi. <sup>33</sup> Tacahe, ena apamuriana israelítana náichuhapa ema Alejandro. Nametacapa eta táicharacávahi eta náurujisirávahi. Tacahe, navanecapa téchajica, maconsejachavacayarehi ena achaneana. Tásiha, ema titupihapa te namirahu. Máimicutiarachapa te mavahu namatinachaha. <sup>34</sup> Tásiha, náimativanepa ema émarichuhi israelítahi. Tépanavanavarepa tipiaracana. Apina hora nacahe eta napiarareresirahi:

—¡Viva esu Diana visiñaraji viti efesioana! —nacahepa.

<sup>35</sup> Tacahe, títecapanecha ema tayehehi alcalde eta avasare. Macamatina-cavacapa. Tásiha, téchajicapa. Ánipa macahe:

—Tátanaveana, mémenaveana. Emutu eti tachichanaveana eta juca viávasa Efeso. Nájina émanáina achane vahi macuechahini eta véchapajirisira vimutu eta templo suávihahi esu súrinaquene visiñaraji Diana, esu sucapicahuquenehi taicha eta juca mari suáquehehi ánaquiaparipa eta táemirisirahi te anuma. <sup>36</sup> Nájina tépuruina eta juca. Ésamiricavachucha. Vahi ecuijajahuchava. Epanerechinava te tiúriyarepuca. <sup>37</sup> Taicha ena nani ajairana ímaqueneanapahi, tájina natapiravainahini. Vahi nacaecahi esu visiñaraji, váhivare námeyecha ésu eta suyereruvana. <sup>38</sup> Tiuri puiti, ema Demetrio, énapa ena machamuriana, te navarahapuca timetaurecana, nararihi ena juéseana. Nacaunehi nácani timetaurecanaya. Táuchusihayare eta natapiravana. <sup>39</sup> Téheserapuca apana jácani evarahaquene, ticaechacasiyarehi te reunión tásihaqueneharehi viyehe viti tuparairucana. <sup>40</sup> Tíñehicare eta juca íchaquenehi. Náimijachaipa ena achaneana víchahi eta revolución puiti jena sache. Tijuricati natiarihi tiyaserecahávianaya eta táicharacavahi eta juca. Tájina viviyavaimahi —macahepa ema alcalde.

<sup>41</sup> Te tamutupa eta máechajisirahi, mavanecapa téjanerecana ena achaneana. Títavapa eta náurujisirávahi. Tacahe, téjanerecanapa ena achaneana, tamutupa eta nasemirahi.

## 20

### *Tiyanavare ema Pablo te departamento Macedonia étapa te Acaya*

<sup>1</sup> Tacahe, te táequenepa eta jácani sácheana, ema Pablo máichuhavacapa ena machamuriana, maconsejachavacapa. Tásiha, ticametavapa nayehe. Tiyanapa tiánueca macaijuhepa eta te departamento Macedonia.

<sup>2</sup> Máejiravacapaipa namutu ena machamuriana ticavasanapahi te avasarechichana. Máetumechavácapahi éna eta maconsejachiravacapahi, máitecapirapa tayehe eta avasare Corinto, táunavahi eta departamento Grecia (ticaijarehivare Acaya). <sup>3</sup> Ánaqui manasipanapa tayehe, mapana caje eta

mávihairahi. Tásiha, mapanerechaipa tiávacuhaya te pacure eta mánuesirayare macaijuheraya eta te Siria. Étasera te máechapa eta navarairahi nacapaca ena israelítana mánarana, téquecavapa eta mapanereru. Tiyanapa tipaica tichavapa tayehe eta Macedonia eta mávacuíyayarehi. <sup>4</sup> Eta machavirapa, náehicapa ena machamuriana ema ticaijare Sopater ticavasahi te Berea, ema Aristarco émapa ema Segundo ticavasanahi te Tesalónica, ema Gayo ticavasahi te Derbe. Máehicavare ema Timoteo. Natiarivare ema Tíquico émapa ema Trófimo ticavasanahi te tinapaica eta Asia. <sup>5</sup> Tacahe, títecapanapa te Filipos, návihahi núti. Tacahe, ena siétequeneana vichamuriana tínapucanapa tiyanana tiánuecanapa, nacaijuhepa eta apana puerto ticaijare Troas. Ánaquipa nacuchapiahavihi. <sup>6</sup> Tásiha víti, te táequenepa eta Pascua vinisirahi eta pan mayehere levadura, vipaenumavapa viúchuca tayehe eta Filipos. Viávacuhapa viyanapa. Cinco sache eta viánuesira. Vicápayamuríhapa te Troas. Vinasipanapa tayehe, siete sache vicahe.

### *Máejirapa ema Pablo ena machamuriana ticavasanahi te Troas*

<sup>7</sup> Te jena tínapuca sáche tayehe eta semana, tiúrujicavanapa ena vichamuriana. Viyuvetucayare, vinicayare eta pan táicutiarahi eta máepenirahi ema Viáquenu Jesucristo. Tacahe, ema Pablo maconsejachavacapa jena yati, taicha tiúchucayarehi te jena yáticarahi. Tiúnahi eta máechajisirávacahi. Te énumuhupa yati tímiyanavaríchaha téchajica. <sup>8</sup> Eta viúrujisirávahi te anuquehe peti te mapanaquene piso. Tatiaríhihi camuri eta namicahuana. <sup>9</sup> Matiarihihi ema émana amaperu ticaijare Eutico. Téjacahi éma eta te ventana. Tacahe, eta táunavahi eta máechajisirahi ema Pablo, ema amaperu téyucaipahi. Eta máimasirahi, tiáquipaicavapa te anuquehe ventana. Tacahe éna, tiúcupaicavaneánapa nacáechepupánayarehi. Éma tépenaripahi. <sup>10</sup> Tacahe, ema Pablo tiúcupaicapa, mapauchapa ema amaperu. Mayurata-nauchapa majupahacapa. Tacahe, máichapa ena machamuriana:

—Vahi ecueñamava. Tichavayare títareca —máichapa.

Jéhesaréinehi, tichavapa títareca ema amaperu. <sup>11</sup> Tacahe, tichavanavare tíapanana te náurujiávahi. Tacahe, tinicanapa. Tásiha, ema Pablo tijárahíácaríchaha eta máechajirísiravacahi. Te títapiricapa, tiyanapa. <sup>12</sup> Tacahe, te téjane-recanapa, námapa ema amaperu máitareruhi. Ichape eta náurisamurevapahi.

### *Tiúchucanapa tayehe eta Troas, nacaijuhepa te Mileto*

<sup>13</sup> Viti viávacuharipa, viyanapa vicainapucavahi tayehe eta apanavare puerto Asón eta mávacuíyayarehi ema Pablo, taicha ichape eta táepiñu. Émasera ema Pablo tipaicayarehi tímitupiruchavapa. <sup>14</sup> Te vítecapapa te Asón, tiávacuhapa éma. Tacahe, viyanapa vicaijuhehi eta apanavare puerto Mitilene. <sup>15</sup> Te apanapa sache viúchucavarepa tayehe, viánucuhapa te tachacaya eta tiúrupuhi ticaijarehi Quío. Te apanavarepa sache, vítecapapa te apanavare tiúrupuhi ticaijarehi Samos. Víchecapa tayehe, vinaracaniumapa eta te puerto ticaijarehi Trogilio. Te apanapa sache viyanavarepa, vítecapapa te puerto ticaijarehi Mileto. <sup>16</sup> Váipa vétavajicahini te Efeso, taicha ema Pablo vaipa mávarahahini váyereréjipahini eta vipaisirapahi te táunavahi te Asia. Taicha mavarahahi títecapavaneyare te Jerusalén, eta máimaiyayarehi eta napies-tara ticaijare Pentecostés. Éta tiámahaviyare te viratavayarepuca.

*Eta maconsejachira ema Pablo nayehe ena náiyarahana pastoreana ticavasana te Efeso*

<sup>17</sup> Etasera eta viávihairahi te Mileto, ema Pablo máimichuhavacapa ena náiyarahana pastoreana tayehe eta avasare te Efeso. <sup>18</sup> Te títecapanapa éna, majacapavacapa. Tásiha, tépanavapa máechajiricavaca, máichavaca:

—Éti ímatinuhi táichararacavahi eta nítaresirahi eta jena sácheana te nítecapauchahénapa. Tájina níchahini núti eta nuyehéchiravana. <sup>19</sup> Tájina vahi népiyacavahini aquenucanuinahini eta eyehe. Nucaemataneacahi ema Viáquenu. Vahi nusemaimahi tayehe tamutu eta níchavaquenévanahi naicha ena nujaneanana israelítana, navarairahi títaequenehanuana. Tasapiha ticaiyacanu naicha eta namásuapajiráivana. <sup>20</sup> Tamutu numetacahehi eta táuriqueneana tiúrichaheyare éti apanava. Nímitucahehi te jácani viúrujisirávana étapa te epenana. <sup>21</sup> Nuconsejachahivare namutu ena achaneana, eta náeneuchiravaina me Viya, eta náitsivachiraina eta náitaresirana, étapa eta nasuapiraina nacasiñairaina ema Viáquenu Jesucristo. <sup>22</sup> Puítisera nuyaninapa te Jerusalén. Taicha nuvanecasivahi mayehe ema Espíritu Santo. Vahi necha núti tájahapuca nícharacavaya eta ánaqui. <sup>23</sup> Tacarichu necha eta mametasiranuana ema Espíritu Santo. Tamutu eta avasareana nupaisihanapahi, timetacanupahi éma eta nucatajivairaya, napresuchiranuya te cárcel te Jerusalén. <sup>24</sup> Tájinasera vahi nupicacava. Tayanapanéine népenapuca, vahi néñama eta nítaresira. Nuvaraha nímiyanavaya eta núrivahi mayehe ema Viya. Nuvapinavahi eta nítauchiraya eta nutuparacasivahi mayehe ema Viáquenu Jesucristo. Taicha éma tituparacanuhi nucametarairuya eta máemunasirahavihi ema Viya vimutu viti achaneana.

<sup>25</sup> Numetacahe: Puiti juca nuyaniraya, vaipa iápechavaimahi ímahanu. Eti ínapureanahi nímitureanahi emutu éti te iávasanapachuhi. Nímitucahehi tamutu eta véhisiraya ema Viáquenu Jesucristo. <sup>26</sup> Eta tacahe, numetacahe puiti: Vaipa nútiparacáina te natiarihinapuca téjecapavanaya te etaracu éti. <sup>27</sup> Tamutuhi numetacahe eta mavarahaqueneana ema Viya. Tájina vahi nuyumurupicahini. <sup>28</sup> Tiuri puiti, ejaneacavayare éti, énerichuvare ejaneacayare ena iúmurivana taicha etuparahaipa mayehe ema Espíritu Santo eta ejaneasirayare ena manerejiruanahi ema Viáquenu, énavenehi tépenahi éma, máepusaicahi eta máítine. <sup>29</sup> Ecaunevaicha muraca, taicha puiti juca nujunijisiraheya, tijuricati títecanaya ena navarahaya témejecapávachacheánaya. Navarahaya ticajanerecaheanaya tacutiyare eta chuye tinicarahi te tacajanereca eta varayuana. <sup>30</sup> Énaparichu ena vichamuriana te etaracu, natiaríhiyare ena tímiturecanaya nahapapicayare témejecapávachanaya ena nácani apamuriana vichamuriana, navarairainahi éhicayare eta napanereruana. <sup>31</sup> Tásiha, ecaunevaicha yátupina. Échavayare eta mapanaquene año eta nutiarahirahi eyehe. Tamutuhi sácheana, yátiana nuconsejachahehi, émanapachuhi numetaca. Níyahasmurehi taicha eta nímairahehi.

<sup>32</sup> Puítisera, nuparapenaveana, nuyanainapa. Nuyáseuchahéyareséra me Viya eta majaneasiraheya. Ecaravahuirainapa yátupina eta máechajiriruvana ema Viya. Túmeheyarepaipa táicha. Ema Viya mavarahahi ímijuruchayare eta juca máechajiriruva; taicha mavaraha tíjaracaheya eta ícuchianahi te anuma eta iávihayare, ecachaneraya ena apamuriana masántuchaqueneánarípa. <sup>33</sup> Eta návihairahi eyehe, vahi nujamurachahini eta emuirihana étaripa eta plata íjaracanhini.

<sup>34</sup> Ímararacanuhi éti eta táichararacavahi eta nucaematanera. Nucaematanehi tiásihanahi te nuvahuana, nuviyahi eta nucamunqueneana, énapa ena tímicitacananahi. <sup>35</sup> Tamutu nímitucahehi tacaheyare eta vicáematanéraya, vímicatasirayareva ena ticamunuvana, nacajumaqueneana. Véchavayare tativa eta máechajiriruvahi ema



Viáquenu Jesucristo, ani macahehi: “Viúripanaya me Viya, te vicajirica eta vímahaqueneana nayehe ena apamuriana. Vahi vicujamuracha nájaracasichahavi” macahepa.

<sup>36</sup> Te tamutupa eta juca maconsejachiravacahi ema Pablo, tépuyucanapa namutu. Tiyujaracapa mayaseuchavacapa me Viya. <sup>37</sup> Tásiha, tíyananapa namutu, najupacapa náetserarecapa ema Pablo. <sup>38</sup> Tipanererecanaipa taicha eta mametasiravacahi váipa tiápechavanaimahi náimaha éma. Tásiha, tiyananapa nanapana eta te mávacuiyarehi.

## 21

### *Eta viyanirapa eta te Jerusalén*

<sup>1</sup> Te vijunijicapa ena vichamuriana, viávacuhapa viyanapa vitupiruru-chapaipa eta tiúrupuhi ticaijare Cos. Te apanapa sache vicaijuhepa eta tiúrupuhi ticaijare Rodas. Te apanavarepa sache viánucuhavarepa eta puerto ticaijare Pátara. <sup>2</sup> Éta vicainunainehi eta apana pacure tiyanayarehi tayehe eta apachara apanavare departamento Siria. Tacahe, viávacuhapa tayehe, viyanapa. <sup>3</sup> Eta vipaisirapahi, viánucuhapa eta tiúrupuhi Chipre tanapaicapahi te sapa eta viyehe. Vímiyanavachucha vipaica vítecapira te puerto ticaijarehi Tiro tayehe eta Siria. Taicha eta pacure véhirupahi tanaquicayarehi eta carga támaquenepahi tayehe eta puerto. <sup>4</sup> Éta vicainunainehi ena apamuriana vichamuriana. Vinasipanapa nayehe, siete sache vicahe. Te juca, ema Espíritu Santo mametacavacahi ena vichamuriana eta máichavayare ema Pablo te Jerusalén. Tacahe, nametacapa ema Pablo eta vahi macuitecapa te Jerusalén. <sup>5</sup> Téhesera tiúchucayarepa eta pacure véhirupahi, viyanapa te puerto. Téhicahavianapa namutu ena vichamurianahi, éna ena nayanana éna ena nachichanaveana. Tinapanahavianapa te pacure. Te vítecapapa te playa, vépuyucapa vimutu, viyujaracapa. <sup>6</sup> Te tamutupa, vémamavauchavacapa vicametavapa eta nayehe, viávacuhapa. Tásiha, tichavanapa éna te napenana.

<sup>7</sup> Eta viásihairahi te Tiro, vítecapapa te Tolemaida. Éta táenasihahi eta vipaisirahi te une. Viyanapa véchajicavacahi ena vichamuriana. Vinasipa étana sache eta nayehe. <sup>8</sup> Te apanaquenepa sache viyanapa vicaijuhepa eta avasare Cesarea. Te vítecapapa, viyanapa te mapena ema Felipe ema ticametarairurahi, ema nasietenehi ena nanerejiruanahi téchapajiricanahi eta nirureana nayeheana ena máimaruana. Vinasipa eta mayehe. <sup>9</sup> Ema Felipe, natiarihi ena cuátroana machichanaveana esenana, máimaruana-richaha. Ena nani májaracahi ema Viya eta náitusirahi ticametarairuana. <sup>10</sup> Eta jena sácheana viávihairahi mayehe ema Felipe, títecapapa ema émana profeta ticaijarehi Agabo. Éma tiásihahi te Judea. <sup>11</sup> Títecapauchahavipa tímahanahaviyarehi. Tacahe, mayaseacapa eta máitijuhe ema Pablo. Tásiha, títiapechavapa, éta eta mavahuana. Tásiha, macahepa:

—Ema Espíritu Santo ani macahehi eta máechajiriruvahi: “Ena vijaneanana te Jerusalén nacaratacayare ema ticayehe eta juca itijuere. Náitiacaya, nájararecayareva nayehe ena apavasanana” —macahepa ema Agabo.

<sup>12</sup> Tacahe, vimutu viti, éna ena ticavasanahi tayehe, viyaseacapa ema Pablo eta vahi macuyana te Jerusalén. <sup>13</sup> Émasera ema Pablo máichahavipa:

—¿Tájaha tacayema ímipanererecanu eta juca íyáuchiranuhi? Vahi nupica te náitiacanupuca. Núti níjaracava népena te Jerusalén máichavenénahi ema Viáquenu Jesucristo —máichapa.

<sup>14</sup> Te vímahapa vahi váratahahini víchejica, vísapapa tiyana. Vicahepa:

—Énenarinepuca tácahe, máimahavirinepa ema Viya —vicahepa.

<sup>15</sup> Te tamutupa, vétupiricavapa. Viyanapa te Jerusalén. <sup>16</sup> Téhicahavianapa ena vichamuriana ticavasanahi te Cesarea. Téhicahavipahivare ema vichamuri ticaijare Nasón. Ánaquiripahi eta máehisirahi ema Jesús. Éma, máuchurehi eta te tiúrupuhi Chipre. Tatiarihisera eta mapena te Jerusalén, eta vítecapihayarehi.

### *Éma Pablo máejirapanapa ema Santiago*

<sup>17</sup> Te vítecapapa te Jerusalén, ena vichamuriana tiúrisamureanaríne eta najacapirahavihi. <sup>18</sup> Te apanapa sache ema Pablo tiámahavipa, viúrujicavayarehi te mapena ema Santiago. Vichimapapa natiarihipa namutu ena víyarahana pastoreana. <sup>19</sup> Tacahe, ema Pablo máechajicavacapa éna. Mametacavacapa tamutu eta máimicatasirapahi ema Viya eta macametarairuirapahi nayehe ena apavasanana étapa eta máichirapahi eta tiáramicareana.

<sup>20</sup> Te nasamapa ena mametaruanahi, nacunacharinehi ema Viya. Tacahe, náichapa ema Pablo:

—Tétavicavapa táuriva eta juca pimetarapiana. Pímahapasera natiarihihira ena camuriqueneana ena vijaneanana téhicanahi ema Jesús. Énasea, muracagueneanahi religiósoanahi, téhicanahi eta mayeherepini ema Moisés. <sup>21</sup> Puiti, jucarihi eta pépiyaequenehi eta pihápapicahíji eta pímitusiravacahi ena vijaneanana ticavasanahi te avasareana estranjeroana. Pímitucavacahiji eta váhiji nacusupa eta mavanairipiana ema Moisés, váhivaréji nacumarcacha ena nachichanaveana ajairana, váhivaréji nacuehica eta viyeherepiana. <sup>22</sup> ¿Tájahapuca táicharacava eta juca? Tijuricati ena achaneana tiúrujicavnainapa, te nasamairiricapa eta pitiarihirahi. <sup>23</sup> Tiúripa eta juca píchayare. Nararihi te juca vitaracu ena cuátroana ajairana. Títáuchanapáipa eta nayehe promesa. <sup>24</sup> Pisipahacavaya, piámamuriha éna eta pímeresiravaya tayehe eta Templo. Pivachachinaya eta uvesa navehaqueneana apaesa éna náisapava nacachucasi eta nachutimacana. Eta táicutiarayare eta vahi yátupinahi eta pépiyaequenehi, apaesa naímahavi eta pipicauchirahi eta mavanairipiana ema Moisés. <sup>25</sup> Énasea ena vichamuriana apavasanana, vímiamarecaripa eta vicartane. Náecharipa eta vaipa étaparacáinahíni nayehe eta juca. Tacarichu vahi nacunica eta taeche eta sárare nayujaraurehi te tamirahu eta nasiñarajiana, váhivare nacunica eta táitine eta sárareana, váhivare nacunica eta taeche eta sárare namaechatinure. Énerichuvare vahi nacuveha esu súcaini apana esena. Énaripa ena amaperuana, tacuija eta natuhusivaina —náichapa éna pastoreana.

### *Nacaratacapa ema Pablo eta te Templo*

<sup>26</sup> Tacahe, ema Pablo tísapavapa. Te apanaquenepa sache, tisipahacavapa, énapa ena cuátroqueneana ajairana. Mámavacapa, tiyananapa te Templo. Nametapanayarehi ena téchapajicarahiana eta Templo, semanayareipahi eta nanaquisiravayare eta námavahuana. <sup>27</sup> Tacahe, te náitauchapa eta siete sache eta nasipahasiravahi, tichavanapa te Templo. Te jena sache, natiarihipavare ena apamuriana najaneanana tiásihanahi te tinapaica eta Asia. Eta mávihairarichaha ema Pablo te Templo, náimahapa éma. Tacahe, náimiyusemacapa namutu ena achaneana. Nacaratacapa ema Pablo. <sup>28</sup> Tipiaracanapa:

—¡Tátanaveana israelítana! ¡Yare, ímicatacavi! Émara ema maca achane ema tipaichi tamutu avasareana. Tímiturecapahi nayehe ena achaneana eta macontrachirahi eta viávasa. Énerichuvare macatianacahi eta mayeherepi ema Moisés, étapa eta juca viyehe Templo. Puiti

macasiapavare te juca Templo ema apavasanatataji. Majararecapa eta juca tacapichahuquenehi —nacahepa.

<sup>29</sup> Ena nayunacahi eta juca, taicha náimahahi te calle ema Pablo macachanepahi ema Trófimo ticavasahi te Efeso. Náimijachahi mámahi ema Pablo te tajuhe eta Templo.

<sup>30</sup> Tacahe, tijúnapacarajiánapáipa namutu ena achaneana te tajuhe eta avasare. Ena ticatianacanahi ema Pablo nacaratacapa éma, nachururupai-capaipe eta nacuchusirahi tayehe eta Templo. Tacahe, ena apamuriana náeratacavanepa eta tapajapura eta Templo. <sup>31</sup> Navarahapa nacapacavane-yarehini. Masámairiricavánepaséra ema comandante nayehe ena suntarurana, tatiarirahahi eta revolución te tajuhe eta avasare. <sup>32</sup> Tacahe, ema comandante máichuhapa ena masuntarurana énapa ena oficialeana. Tiyananapa tijunapanapaipa. Ena achaneana, te náimahapa eta máitecapauchirahi ema comandante, náinajicapa eta náehairahi ema Pablo. <sup>33</sup> Tacahe, ema comandante mapauchapa ema Pablo, macavanairipipa nacarataca, náitiacapa te apipi cadena. Tásiha, mayaserecapa te nájahhipuca, tájahapuca maviurevahi.

<sup>34</sup> Énaserá ena achaneana tipiaracanarichucha, apapipijipa eta nacayema. Vaipa mácaicutiarahini ema comandante tájahapuca eta nacayemahi taicha eta najajasirahi. Tásiha, macavanairipipa náma te cuartel. <sup>35</sup> Ticajerahisera eta nápanirapaipa te tayehe grada eta cuartel. Nanaracuhapa ema Pablo, taicha ena achaneana navarahaichucha nacapacavane. <sup>36</sup> Taicha namutu náehicapahi tipiaracanapaipa:

—Máepenávanetataji —nacahepa.

<sup>37</sup> Te tisiapanayarepa te tajuhe te cuartel, ema Pablo máichapa ema comandante:

—¿Písapanupuca néchajica?

Tacahe, ema comandante majicapapa:

—¡Jéhepuca, píti pítuca péchajica te véchajiriruva griego! <sup>38</sup> Tacahe, ¿váhiyara pítiema ema ticavasa te Egipto, ema tíchahi eta revolución ticaeteharecahi cape juca viásinequenehi, ema majunaquenehi tiámamuriahahi te mávapahi ena cuatro mílqueneana ticapahiana? —máichapa.

<sup>39</sup> Tacahe, ema Pablo máichapa:

—Vahi nútina, tata. Nútirichu israelítanu. Eta núchusine te Tarso. Tavanaranu eta ichape avasare capital te Cilicia. Picatajicanusera písapanu néchajicaya nayehe ena achaneana —máichapa.

*Téchajicapa ema Pablo te namirahu ena achaneana*

<sup>40</sup> Tacahe, ema comandante máisapapa téchajica. Titupihapa ema Pablo te tayehe grada eta cuartel. Tacahe, macanuquechapa eta mavahu, macamatinacapa ena achaneana. Te timatinanapa, tépanavapa téchajica eta náechajiriruva ena majaneanana, ánipa macahe:

## 22

<sup>1</sup> —Tátanaveana, nuparapenaveana. Esamanuchaha eta néchajisiraheya nucatiuchiravaya —macahepa.

<sup>2</sup> Tacahe, te nasamapa eta máechajisiravacahi te náechajiriruva, tésamiruriávanapa ticasamarahiana. Tinahacavapa téchajica ema Pablo, máichavacapa:

<sup>3</sup> —Nútirichu ejaneana, israelítanu. Eta núchusine te avasare Tarso tayehe capital eta Cilicia. Ánipasera nujurusinehi te juca viávasa Jerusalén. Ema tímitucanuhi ema víyacara Gamaliel. Nujuruchahi eta nupicauchirahi yátupi eta viyeherepi nájararuhavihi ena viáchucanaveanaini. Eta nítaresirahi,

nímicapicáuchahi ema Viya, tacutihi puiti eta ímicapicáuchirahi éti te juca sácheana. <sup>4</sup> Eta nítaresirahi, nucatianacavacainihi ena téhicanahi ema Jesús. Nupresuchavacahi nucasiapavacahi te cárcel ena ajairana énapa ena esenana. Nímicapacavacahi éna. <sup>5</sup> Tímatinuanarichuhi namutu ena aguenucarahana émapa ema corregidor. Taicha éna tíjaracuanahi eta órdena nayeheya ena vijaneanana ticavasanahi te Damasco, náimicatasiranuyare eta nucaratasiraya ena téhicanahi ema Jesús. Tacahe, nuyanapa népanavacayarehini éna, ticaemecharahianayarehi.

*Éma Pablo mametacavacapa eta máehisrahiva éma apanava ema Jesús (Hch 9.1-19; 26.12-18)*

<sup>6</sup> Tacahe, eta nupaisirapahi te achene, nánehiripa eta avasare Damasco. Te jena las dócequeneyárepa sache, tiáramicarepa eta tijarahi tímícauchanuhi tiásiha te anuma. <sup>7</sup> Náquipaicavapa te apaquehe. Nusamapa ema téchajicanuhi, máichanupa: “Saulo, Saulo, ¿tájaha tacayema picatianacanu pipánájiricanu?” <sup>8</sup> Tacahe, nuyaserecapa: “¿Nájahavi piti tata?” níchapa. Tásiha, tijicapanupa: “Nutu Jesús Nazareno, nuti picatianaruhi, eta pipánájirisiravaca ena téhicanuanahi” máichanupa. <sup>9</sup> Énerichuvare ena téhicanuanapahi náimahahi eta tijarahi tímícauchanuhi. Tiáramecanarinehivare éna apanava. Váhisera nácaicutiarahini ema téchajicanuhi. <sup>10</sup> Tacahe, nujicapapa núti: “¿Tájahasica níchayare, Tata?” Tásiha, ema Viya máichanupa: “Pécheputa, piyana pítecapa te avasare Damasco. Ánaqui mararihi ema timetacaviyare tamutu eta pématanerepiyare pítauchaquenéyare nuyehe” máichanupa. <sup>11</sup> Tásiha, púchuquinupa taicha eta tijarahi. Tacahe, ena nucompañeroanapahi tiámanuanapa tichurucuananapaipa te nuvahu, nacaitecapiranupa te avasare Damasco. <sup>12</sup> Eta ánaqui, matiaririhini ema émana vijaneana ticaijare Ananías. Títaurahi éma tayehe eta mavanairipiana ema Moisés. Namutuhi ena vijaneanana ticavasanahi te Damasco nacunachahi éma. <sup>13</sup> Títecapa ema Ananías, tímahapananuhi. Te títecapauchanupa, máichanupa: “Nuparape Saulo, tachava eta pímairisira”. Tacahe, tíjahúchavapa nímairisira. Nímahapa éma. <sup>14</sup> Tacahe, máichanupa éma: “Éma Viya nacasiñaquenehi ena viáchuca naveánaini, píti manerejiruvihini taicha mavarahahi tímimaticahaviya eta mapanereru. Énerichuvare mavarahapa tímimaticahavi ema máuriquene Cristo, émaquenehi téchajicavihini eta cape. <sup>15</sup> Péchajisihayare éma eta picametarairuirayare nayehe namutu ena achaneana picainunaqueneanaya. Pimeta-cayare eta juca pímairahi étapa eta pisamirahi éma. <sup>16</sup> Tiuri puiti, enevane picaicachasiya te máijare ema Viáquenu Jesucristo. Picasiñava mayehe eta tacasipairaya eta pipecaturana” máichanupa ema Ananías.

*Éma Pablo mametacavacapa eta macavanahirahi nayehe ena apavasanana*

<sup>17</sup> Tásiha, te nuchavapa ani te Jerusalén, nítecapa ani te juca Templo. Te nuyujaracaipa, tiápechanuvarepa téchajicanu ema Viya. <sup>18</sup> Eta nímairahi éma, máichanupa: “Piyayauchavayare eta piúchusiraya te juca Jerusalén, taicha vahi tisuapavianaimahi eta péchajisiháiranuya”. <sup>19</sup> Tacahe, núti níchapa: “Tiuri, Tata. Énasera, tímatinuanahi eta néstarasiravacahi nupresuchiravacahi ena téhicavianahi. Tamutuhi te náurujsirarevana nutanusihavacapahi éna. <sup>20</sup> Énerichuvare, te nacapacapa ema Esteban ema pivanarainihi, nutiaririhivare. Nímicatacahirivare ena ticapacanahi, nujaneasiravacahi eta namuirihana. Tijuricatipuca nasamararacanu eta numetasiravaca eta péchajisiranuhi” níchapa. <sup>21</sup> Émasera ema Viáquenu tipamicanuichucha: “Piyanaya-

resera. Núti nuvanecavi pipaicayare nayehe ena apavasanana ticavasanahi te tayerehiqueneana” máichanupa.

<sup>22</sup> Tacahe, ena achaneana, eta nasamirahi eta juca, vaipa návarahahini nasamararaca. Tisemanapaicha. Tipiaracanapa:

—Tiúripa máepenachucha ema maca achanetataji. Vaipa táuricahini máitarecaríchahahíni —nacahepa ena mánarana ema Pablo.

*Ena comandante macasiapapa te tajuhe ema Pablo*

<sup>23</sup> Muracapanapa eta napiarasira. Tivejamuhiacavanapa eta nacamisana eta nasemaneva. Navehavare eta máteji. Náevajasicapa ema Pablo.

<sup>24</sup> Tacahe, ema comandante macavanairipipa nacasiapa ema Pablo te tajuhe eta cuartel. Macavanairipivare náestaca, mavarairahi máimicaecherachaya ema Pablo eta maviurevahi, tájahapuca tacayemahi eta nasemirahi ena achaneana eta mayehe. <sup>25</sup> Étasera te náitiacayarepa eta náestasirayarehi, téchajiuchavanumapa ema Pablo eta mayehe ema nacapitara ena suntarua. Máichapa:

—Núti tavanaranuhi eta viávasa Roma. Picunevachucha, machu péjecapava eta péstasiranu, vuíchaha táimaticarehini eta nutapiravapuca —máichapa.

<sup>26</sup> Te masamapa ema nacapitara eta juca, tiyanapa mametaca ema comandante. Máichapa:

—Péchapavachucha eta pivarairahi pémostareca ema maena achane. Taicha tavanaráji eta Roma —macahepa ema nacapitara.

<sup>27</sup> Tacahe, ema comandante tiyanapa mapauchahi ema Pablo. Máichapa:

—¿Yátupisaréji tavanaravi eta Roma? —macahepa.

Ema Pablo majicapapa:

—Yátupi —máichapa.

<sup>28</sup> Tásiha, macahepa ema comandante:

—Núti, ichapemuri plata náquijica eta nusiapirayare eta tavanaranuirayare eta Roma. Píti, ¿tájahapuca eta pítujsiravahi eta pisiapirahi? —máichapa.

Ema Pablo máichavarepa:

—Núti tavanaranuhi eta Roma taicha étarichuvare náuchusinehi ena ticachichanuana —máichapa.

<sup>29</sup> Tacahe, térajicavanapa ena téstacanayarehini ema Pablo. Émaripa ema comandante, te máechapa eta tavanarairahi eta Roma, tipicarinehi eta máitiasirahi.

*Ena Pablo námapa te namirahu ena aquenucarahana*

<sup>30</sup> Te apanapa sache, ema comandante mavarahapa máechayare tájahapuca eta maviurevahi ema Pablo eta nayehe ena majaneanana. Mavejapuacapa eta cadenana máitihanahi. Macurujicapa ema corregidor énapa ena aquenucarahana. Tiyanapa mámahi ema Pablo, macatupihapa te namirahu.

## 23

<sup>1</sup> Tacahe, ema Pablo máesenimurihapa ena aquenucarahana, máichavacapa: —Nuparapenaveana. Núti eta nítaresirahi puíticha juca nucahehi, tájina níchiraváinahi eta nusamiravahi te mamirahu ema Viya —macahepa.

<sup>2</sup> Ema corregidor Ananías, tisemapa eta masamirahi eta máechajiriruvana ema Pablo. Macavanairipipa ena titupihanahi te machacaya ema Pablo. Máichapa:

—¡Ésapajacacha ema mácatátaji!

<sup>3</sup> Émasera ema Pablo majicapapa:



—¡Pítira téhaviyare ema Viya, táichavene eta apimirairavi! Te juésvihipuca píti eta péjasirahi eta te jara, tatuparacavi pímatinuma te tatiarihipuca eta néjecapirava apaesa pémehanu. ¿Tájaha tacayema eta juca pivanairípihi? — máichapa.

<sup>4</sup> Ena apamuriana achaneana natiarihiqueneanahi náichapa ema Pablo:

—¿Tájaha tacayema piácapaemacha ema corregidor, macapicahuquenehi tiyujaracarahi mayehe ema Viya? —náichapa.

<sup>5</sup> Ema Pablo majicapapa:

—Tátanaveana, eperdonachanu. Vahi néchahini eta émairahipuca corregidor, macapicahuquenehi tiyujaracarahi. Tájina nímatiya nucajachareca ena tuparairucana, taicha nusuapa eta máechajiriruva ema Viya. Ani tacahe: “Vahi picujacha mácani tuparairuca tayehe eta piávasa”.

<sup>6</sup> Tacahe, ema Pablo máimativacapa ena aquenucarahana, natiarihirahi ena saducéoana, énapa ena apamuriana fariséoana. Tásiha, tijaranupa eta máechajisirahi:

—Nuparapenaveana. Nútirichuvare fariséonu. Énerichuvare ena ticachichanuana fariséoanahivare. Ecatupiacanuhi te juca emirahu táichavenehi eta nucuchapirahi eta véchepusiraya te táequenenapa eta vépenira —máichavacapa.

<sup>7</sup> Te nasamapa eta juca, ena fariséoana énapa ena saducéoana típutsimuriávanapa, napanerequenehapa. <sup>8</sup> (Taicha ena saducéoana, vahi nasuapa eta náechepusiraya ena náepenaqueneana; váhivare nasuapa eta natiarihirahi ena ángeleana; váhivare nasuapa eta tatiarihirahi eta náchaneva ena náepenaqueneana. Énaserá ena fariséoana nasuapa tamutu eta juca.) <sup>9</sup> Tacahe, téchajicanapa muraca. Tacahe, te nataracu ena fariséoana, natiarihihi ena escribánoana. Téchepucana. Nacahepa:

—Ema maca achane, tájina matapiravaina. Éneserapuca táechajicahi eta máchaneva ema Jesús, ángelepuca mácani. Vahi vicucanara ema Viya —nacahepa.

<sup>10</sup> Tacahe, ichape eta semanere. Tíñepipa náicha. Tacahe, ema comandante, eta máimairahi eta nasemavahi, tipicanecha tájahapuca náicharachini ema Pablo. Tásiha, máimichuhavanepa ena suntaruana navehapa ema Pablo, náimijunijicapa te namirahu ena mánaranahi. Náimichavavárepa ema Pablo te cuartel.

<sup>11</sup> Tásiha, te jena yátiquenehi máechajicapa ema Viya ema Pablo, máichapa:

—Túmevinachucha, Pablo. Taicha tiúrihi eta péchajisihairahi eta níjare te juca Jerusalén. Puiti piyanayare eta te Roma, éneyareichu tacaheyare eta péchajisiraya —máichapa.

### *Napanerechapa eta nacapasiraya ema Pablo*

<sup>12</sup> Te apanaquenepa sache, natiarihihi ena apamuriana napanerechapa eta nacapasiraya ema Pablo. Nacahepa eta náechajiriruvahi:

—Tacamunurine máepenavane ema mácatátaji Pablo. Tásiha puiti, víti vinacaya eta juca vícutiaraya. Vuíchaha vinicaimahi, vuíchahavare véraimahi, machu vásapiha vicaicuña me Viya te vahi vicuitaucha eta juca vipanereruhi. Tiámainucava te víturucapa vicapaca ema maca, vinicapa —nacahepa.

<sup>13</sup> Náetavichipuca cuarentana ena ajairana, ena tíjaracavanahi ticaechajirivanahi eta juca. <sup>14</sup> Tacahe, tiyananavarepa nayehe ena tuparairucana. Náichapa:

—Víti víjaracavapa eta vítaequeneháiraya ema mácatátaji Pablo. Vinacaripa eta juca vícutiaraya. Vuíchaha vinicaimahi, vuíchahavare véraimahi, machu vásapiha vicaicuña me Viya te vuíchaha vicuitaucha eta juca vipanereruhi.

<sup>15</sup> Tacahe, puiti eti tuparairucana eyaseacayare ema comandante máma

achichu te emirahu, etanuca eta etseraruina macayaserehi ema Pablo eta juca máichavaquenévahi. Tásiha, víti vitsecavayare eta vicapasirayare éma te vímahapa máuchuca —náichapa.

<sup>16</sup> Tiuri, matiarahi ema suchicha esu maparape ema Pablo. Masamairiricapa eta juca. Tiyanapa te cuartel mametapana ema Pablo. <sup>17</sup> Tacahe, ema Pablo máichuhapa ema nacapitara ena suntaruana, máichapa:

—Piáma ema maca amaperu te mamirahu ema comandante. Jucarihi eta juca mametacaya —máichapa.

<sup>18</sup> Tásiha, ema nacapitara mámapa ema amaperu mayehe ema comandante. Máichapa:

—Ema máena macaerataquene Pablo tiyaseacanuhi náma eta piyehe ema maca amaperu. Jucarihiji eta timetacaviya —máichapa.

<sup>19</sup> Tacahe, ema comandante macaratavauchapa ema amaperu, mámapa máiputsiacapa. Tásiha, mayaserecapa, máichapa:

—¿Tájahasica eta pimetacanuya?

<sup>20</sup> Ema amaperu máichapa:

—Nararihi ena nujaneanana navarahahi nacapaca ema nécuca. Achichu tiyaseacavianayare piama éma te namirahu ena tuparairucana te cabildo. Nacaetseraruya ticayaserehiyare eta juca máichavaquenévahi. <sup>21</sup> Váhisera picusuapavaca taicha cuarentana ena ajairana ticuchapanahi te picuchucapa éma, nacapacayarepa. Taicha najurachahi eta nacapasiraya ema Pablo, tásiha napaenumavainapa te náitauchapa eta napanereruhi, tinipana-nainapa. Puiti éna, pítinecha nacuchapahi te pisuapayarepuca éna —máichapa ema amaperu.

<sup>22</sup> Tacahe, ema comandante macahepa:

—Tiuri, piyana te pipena. Nacuijaserá picumetaca eta juca pimetarunuhi —macahepa.

*Ema comandante máevatacapa ema Pablo mayehe ema Prefecto Félix*

<sup>23</sup> Tiuri, ema comandante máichuhapa ena apinana nacapitarana ena suntaruana. Máichapa:

—Etsecayare ena docientoana suntaruana tiámanaya eta espada, docientoanavare ena tiámanaya eta lanza, setentana ena ticaperanayarepahi. Enápanayare ema Pablo te Cesarea. Iúchuca puiti te las nueve yati.

<sup>24</sup> Énerichuva etsecayare étanaina cavayu maperainapahi ema Pablo. Táurisera eta iámirainapahi. Íjaracaya ema Prefecto Félix —máichavacapa.

<sup>25</sup> Tacahe, máimiamarecavarepa eta carta. Eta juca táechajiriruvapahi eta carta:

<sup>26</sup> “Nutí Claudio Lisias nímiámareca eta juca carta piyehe piti piúrique ne excelente aquenuca. Néchajicavinuma tativa.

<sup>27</sup> Jucarihi eta juca téchacarehi. Ena israelítana nacaratacahi ema émana achane ticaijare Pablo. Navarahahi nacapacaya. Étasera te néchapa nútí tavanarairahi éma eta Roma, nuyanapa námahi ena nusuntarurana nucatiuchapanapa. <sup>28</sup> Eta nuvarairahi necha eta maviureva, námapa te namirahu ena tuparairucana israelítana te juca.

<sup>29</sup> Nímahapa tájina matapiravainahini táimicapacahini táemeratacapiucáini te cárcel. Étachuchanéni puca tímicaticahi eta nayeherepiana.

<sup>30</sup> Tásiha, nusamairiricavarepa eta nacamesairayarehi nacapaca. Tacahe, nímiámarecapa puiti eta piyehe. Énerichuvare nuvanecahi ena timetauchanahi náiteca ara piyehe, étaina macayaserehiya.

Tamutupa eta juca néchajiririvanahi piyehe”.

<sup>31</sup> Tacahe, ena suntaruana náitauchahi eta vanairipi. Námapa ema Pablo te jena yati. Títecapanapa te avasarechicha ticaijare Antípatris. <sup>32</sup> Éta nachavinehi te apanapa sache ena suntaruana ena tipaicanapahi. Énase ena ticaperana tímiyanavánapa eta nanapaniraya ema Pablo. <sup>33</sup> Tacahe, te títecapanapa te Cesarea, náijaracapa ema prefecto eta carta, émapa ema Pablo. <sup>34</sup> Te tamutupa eta máechajicuirahi eta carta, ema prefecto mayaserecapa ema Pablo:

—¿Táviha eta piúchusine píti? —macahepa.

—Núti núchusine te Cilicia —máichapa ema Pablo.

<sup>35</sup> Tacahe, ema prefecto máichapa:

—Tiuri, véchayare te náitecapa ena piánarana —máichapa.

Tásiha, macavanairipipa macajaneha te palacio máepiyaruinihi ema ichav-  
icaini Aluresi.

## 24

### *Téchajiuchavapa ema Pablo te mamirahu ema Félix*

<sup>1</sup> Te táequenepa eta cincoquene sache, títecapanapa te Cesarea ena tuparairucana tiásihanahi te Jerusalén. Matiarihahi ema Ananías corregidorhi, énapa ena apamuriana náiyacaranahi. Matiarhipahiva ema abogado ticaijare Tértulo. Tiyananapa mayehe ema prefecto, timetaurecanapa. <sup>2</sup> Tacahe, náepanapa ema Pablo. Te títecapapa, tépanavapa téchajicapa ema Tértulo, ánipa macahe:

—Vihasulupayachavi, tátachicha Prefecto, eta viúrivahi pícha. Tájina víchiravainahini eta pítusirahi, pijaneacahavi eta juca aquenucairavihi eta viyehe. <sup>3</sup> Vimutu viti achaneana te avasareana, tamutuvare sácheana vicunachavihi. Vihasulupayachavihi, tátachicha Félix, eta piúrivahi eta viyehe. <sup>4</sup> Picatajicahavi, tata, pisamahavi. Vahi picuyacujihavi eta juca viyasearuvianaya. <sup>5</sup> Puiti vímatipa ema maca achametataji, tihapapirahi éma. Tamutu avasareana te jácani viávihapahi viti israelítana, mayurucavaca ena vijaneanana. Émarichuva tachutirihahi nayehe ena téhicana ema Jesús Nazareno. <sup>6</sup> Énerichuvare mavarahapa máechipejicayare eta tacapicahuquene Templo. Eta tacahehi vicaratacapa. Vícuñacayarehi taicha tacahehi eta tavesirahavihi eta viyehe ley. <sup>7</sup> Émasera ema comandante macatiuchapa tiverejimirauchahavipa taicha camuriana ena masuntarurana. <sup>8</sup> Tásiha, máichahavipa: “Te evarahapuca emetaucha ema maca, eyana te mamirahu ema viáquenuruha Prefecto” máichahavipa. Tiuri, puiti vitupiruvahi víti eta vimetasiravi. Te pivaraha, picayasesereru éma eta yátupirahi eta máichavaquenevahi ema maca eta vimetauchirahi puiti —macahepa ema Tértulo.

<sup>9</sup> Tacahe, ena apamuriana natiarihuqueneanahi, énerichuvare nacahehi:

—Yátupi eta juca máechajirivanahi —nacahepa namutu.

<sup>10</sup> Tacahe, ema prefecto máimicutiarachapa máechajiuchava ema Pablo. Tépanavapa téchajica ema Pablo, ánipa macahe:

—Tájina táichava néchajiuchavaya te pimirahu taicha néchahi núti ánaquíparipa eta juéseravihi tayehe eta viávasa. <sup>11</sup> Tiúripa picayasesereru. Núti, dóceravahi sache eta nítecapirahi te jena viávasa Jerusalén eta néjirairayarehi ema Viya. <sup>12</sup> Nájina nucájachaquenéna. Nájnavare nímiyusemaruina te tajuhe eta Templo, étaripa te náurujisireva ena nujaneanana. Téhepucaini cáleana nucajacharecahini. <sup>13</sup> Ena nani ticatianacanuana, tájina naviya náetseraruinahini eta nametauchiranuhi. Vaipa tisuapacareana. <sup>14</sup> Ena nani náimijachahi vahi nétupicava eta nímituresirahi. Nútisera nusuapa tacutihi eta nasuapirahi namutu ena viáchucanaveanaini. Émarichuhi nucasiñahi ema

Viya, ema nacasiñaquenehivare ena viáchucanaveanaini. Núti nusuapahi tamutu eta táechajiriruva eta Sagrada Escritura. <sup>15</sup> Núti nucasiñavahi mayehe ema Viya, nucuchapavahi eta véchepusiraya te vécarí vimutu viti matapiravareanahi, énapa ena ticatapiravana. Puiti, énaripa ena timetauchanuanahi ticutinuanahi eta nasuapirahi eta macaechepusiraya ema Viya ena náepenaqueneana. <sup>16</sup> Núti, eta nusuapirahi tamutu eta juca, vahi návarahahini néjcapavahini te mamirahu ema Viya. Váhivare návarahahini néjcapava te mamirahu ena achaneana.

<sup>17</sup> Tiuri, camuripa áñoana nupaisirahi. Tacahe, nuchavapa te návasa Jerusalén. Náminapahivare eta nanicavachaya ena nujaneanana páureana. Énerichuvare nucamavahupahiva me Viya. <sup>18</sup> Te tamutupa eta tacasipairahi eta náchaneva étapa eta nuvahuana, nuyanapa te Templo eta nunapanayarehi eta námavahuana me Viya. Eta návihairahi te Templo, tichimapanuanapa ena nujaneanana tiásihanahi te departamento Asia. Nájinasera achaneanahini nachimapanahini te nuchacaya. Váhivare náimahanuini nímiyusemacavacahini ena achaneana. <sup>19</sup> Ena nani nujaneanana tiásihanahi te Asia, énara títecanayarehini timetaurecana, te tatiarihinahipucaini eta nuviureva. <sup>20</sup> Piyasereca ena nani natiarihiqueneanahi puiti, te náimicaecherachapuca eta nuviurevahi te ticatupiacanuanapa te mamirahu ena tuparairucana. <sup>21</sup> Téheserapuca eta tímicaviuchanuhi eta numetasiravacahi éna: “Puiti juca sache ecatupihanuhi te juca emirahu táichavenehi eta nusuapirahi eta véchepusiraya te táequenénapa eta vépenira” níchavacapa núti —máichapa ema Pablo.

<sup>22</sup> Émasera ema Prefecto Félix máecharipahi tamutu eta náehisirahi ena achaneana ema Jesús, étapa eta táurivahi eta nayeherépiana. Tásiha, te tamutupa eta náechajirisiravahi, máichavacapa:

—Tiuri, tácaheine achichupaine vécha eta juca, te máitecapa ema comandante Lisias. Nuyaserecaya éma eta juca íchavaquenevahi éti —máichavacapa.

<sup>23</sup> Tacahe, ema prefecto Félix mavanecapa ema mayehe capitán máimichava te palacio ema Pablo. Macavanairipivare vahi nacuerataca, táuri eta manarasiraina. Táuri eta náechapajirisiraina ena vichamuriana, téjiranayarepahi.

<sup>24</sup> Te jena sácheana, tiyanapa ema Félix te apana avasare. Te tichavapa, mámapa esu mayena ticaijaru Drusila. Ésurichuhivare israelíta. Náimichuhapa ema Pablo, téchajiricavanayare. Tacahe, ema Pablo mametacavacapa eta táicharacavahi eta máehisirahi ema Jesucristo. <sup>25</sup> Eta máechajirisiravahi ema Pablo, máichavacapa:

—Te ecasiñava me Jesucristo, éhicavare eta máimiturapiana, tiperdonachaheyare ema Viya. Matapiravarehena te mamirahu. Énerichuvare, tiúrinapa eta ítaresiraya, eratahainapa ecaratacavayare. Puiti, táuricapa ecasiñavavane, taicha járajapa eta sácheyare nacayaserehirayare nácani ticatapiravanahi. Ticaicuñanainapa te yucu —máichavacapa ema Pablo.

Te masamapa eta juca ema Félix, tipicarinehi. Máichapa:

—Tiuri, taratapa puiti eta juca. Nuvarahasera nápechavaya nusamararacavi. Te apahenavare nímicuhaviyare —máichapa.

<sup>26</sup> Ema Félix ticuchapavahi te máijaracayarepuca eta plata ema Pablo eta máuchucuiraya. Eta tacahehi máimichuhaparacahi téchajiricavanayarehi. <sup>27</sup> Váhiserá máuchucuhahini ema Pablo, taicha ema Félix mavarahahi tiúriyarehi nayehe ena israelítana. Apina año eta tayerevahi. Ticaitsivanecha ema Félix. Tisiapapa ema Porcio Festo, émapavapa prefectohi.

## 25

### *Nacatupiacapa ema Pablo te mamirahu ema Festo*

<sup>1</sup> Te émapavapa aquenucahi ema Festo, te mapanaquenepa sache, tiyanapa te Jerusalén. <sup>2</sup> Tacahe, ema corregidor énapa ena apamuriana tuparairucanahi, ticurujicacanapa mayehe ema aquenuca Festo. Nametauchapa ema Pablo. <sup>3</sup> Nayaseacapa ema Festo macátajicavacahini eta máevataca te Jerusalén ema Pablo. Taicha navarahahi titsecavanayarehi te achene eta nacapasiraya. <sup>4</sup> Émasera ema Festo majicapapa:

—Tiuri, ema Pablo ticaeratahi te Cesarea. Núti achichupaichu nuyanayare nuchavaya tayehe. <sup>5</sup> Eta tacahe, te tatiarihipuca eta échaqueneanahi eti tuparairucana, tiúripana éhicanu te Cesarea apaesa vecha te ticaviureva-hipuca ema maena achane —máichavacapa.

<sup>6</sup> Te tiánehipa eta diésquene sache eta mávihairahi ema Festo te Jerusalén, tichavapa te Cesarea. Te apanapa sache téjacapa tayehe eta mávacure. Máimichuhapa ema Pablo. <sup>7</sup> Te títecapapa ema Pablo, tisiapapa te mamirahu ema Festo. Témeñahavanapa ena mánarana tiásihanahi te Jerusalén. Timetaurecanapa ema Pablo. Camuri eta májecapiravahiji. Ichape eta maviurevahiji nayehe. Tájinasera naviyahini eta náetserarúinahíni. <sup>8</sup> Émasera ema Pablo máichavacapa eta macatiuchiravahi:

—Núti tájina nutapiravaina tayehe eta nayeherepiana ena nujaneanana, étainapucáini eta Templo, émainahivarepucáini nucaecahi ema ichapequene aquenuca Emperador —máichavacapa.

<sup>9</sup> Émasera ema Festo, énerichuhivare mavarahahi tiúriyare nayehe ena israelítana. Tacahe, mayaserecapa ema Pablo:

—¿Pivarahapuca piyana te Jerusalén, étaina tacaechacasiya te numirahu eta juca píchavaquenévahi?

<sup>10</sup> Tacahe, ema Pablo majicapapa:

—Étaripa návihahi puiti te pimirahu píti viyehe juez manacaquenevihi ema Emperador. Pítipa tituparacavi picuchucuhanuyarehi taicha pécharichuhi píti tájina nuviurevainahini nayehe ena nujaneanana. <sup>11</sup> Téheserapuca nucaviurevahini, táimicapacanuríne eta nuviureva. Vahi nucatiuchavaimahi. Tájinasera nuviurevaina eta nametauchiranuhi ena nani. Váhivare tituparacavi píjararecanuhini eta nayehe ena nani. Téheserapuca te vahi picucaitanu, nuyasesereca puiti nuyana te mamirahu ema Emperador. Étaina nucametauchacasiya mayehe —máichapa ema Pablo.

<sup>12</sup> Tacahe, ema Festo macayasesererupa nayehe ena mayeheana abogado. Tásiha, máichapa:

—Píti Pablo, piyaseserecahi piyana te mamirahu ema Emperador. Nísapavi piyana —máichapa.

### *Títecapapa ema rey Agripa, ésupa esu Berenice*

<sup>13</sup> Te jena sácheana, títecapapa te Cesarea ema rey Agripa, ésupa esu Berenice. Náechajipanayarehi ema Festo. <sup>14</sup> Eta nanasiquenerahi te jena sácheana, ema Festo mametacapa ema rey eta máichavaquenévahi ema Pablo. Máichapa:

—Mararihi aní ema achane ticaeratahi ticaijare Pablo. Manaquiruhi ema Félix. <sup>15</sup> Te nuyanapa te Jerusalén, ena tuparairucana timetacananapa eta máichavaquenevahi, tiyaseacananapa eta nímicapasiraina. <sup>16</sup> Tásiha, núti nujicapavacapa: “Viti aquenucarahana tayehe eta Roma, vahi tituparacahavi vímicapacahini mácani ticametauchacasihi te vuíchaha ticamirahucacanahi ema mánarahi” níchavacapa. <sup>17</sup> Tacahe, te títecapanapa aní, vahi náyererejihini núti. Te apanaquenepa sache néjacavanepa te návacure,



nímichuhapa ema Pablo. <sup>18</sup> Núti nímijachapa ichape eta maviureva. Étasera eta nametauchirahi, tájina vahi táíñepihini. <sup>19</sup> Étachuchanénipuca tímica-viuchahi eta nayeheana religión. Émapa ema náehiruhi ticaijarehipuca Jesús, ema mácani tépenahi. Puítisera ema Pablo máechajisihahi eta mápechiravahi títareca. <sup>20</sup> Núti vahi nímatiequeneha eta táicharacavaya eta juca. Tacahe, níchapa ema Pablo: “¿Pivarahapuca piyana te Jerusalén, étaina tacaechacasiya eta juca píchavaquenévahi?” <sup>21</sup> Émasera tiyaseuchavapa eta mayaniraya te mamirahu ema Emperador Augusto. Tacahe, nímivanerecapa macajaneha tiámainucava te nítujicava nímivanerecapa nanapana mayehe ema Emperador —máichapa ema Festo.

<sup>22</sup> Tacahe, ema Agripa máichapa ema Festo:

—Núti apana nuvarahasa nusamaini ema mácara achane —máichapa.

Tacahe, ema Festo máichapa:

—Tiuri, achichu pisamaya éma.

<sup>23</sup> Tacahe, te apanapa sache tisiapanapa ema Agripa ésupa esu Berenice tayehe eta náejasirare ena aquenucana. Tiúrina eta náitecapira. Jánunuha-cavaca eta namuirihana. Énapa ena aquenucana tachutirihana nayehe ena militáreana énapa ena tuparairucana tayehe eta avasare. Tacahe, ema Festo máimichuhapa ema Pablo. <sup>24</sup> Tacahe, téchajicapa ema Festo, ánipa macahe:

—Tata Rey Agripa. Tátanaveana. Emutu eti etiariqueneanahi te juca viúrujisirávahi. Mácahi ema maca achane nametaurehi ena majaneanana eta nuyehe, ánaqui te Jerusalén, étapa ani te juca Cesarea. Nararihi camuriana navaraha náimicapaca ema maca. <sup>25</sup> Nútisera tájina nímaha matapiravaina táimicapacahini. Émasera tiyaseuchavapa tianayare te mamirahu ema Emperador Augusto. Nísapahisera mayana eta mayehe. <sup>26</sup> Vuíchahasera nucajurehini ema náquenu Emperador, taicha tájina nuviyahini eta matapiravainahini. Puítisera nucatupiha éma te pimirahu piti rey Agripa, étipa eti tátanaveana. Nuvaraha ímicatacanu eta táicharacavaya eta juca, apaesa nucajurepaini ema Emperador. <sup>27</sup> Taicha vahi tiuri vévatata ema présuhi te tájina matapiravaina —macahepa ema Festo.

## 26

*Éma Pablo téchajiuchavapa te mamirahu ema rey Agripa. Mametacavacapa eta máitaresirahi te vuíchaha máhichahini ema Jesús.*

<sup>1</sup> Tacahe, ema Agripa máichapa ema Pablo:

—Tiuri, nímaha péchajica —máichapa.

Tacahe, ema Pablo macanuquechapa eta mavahu. Tépanavapa téchajica, ánipa macahe:

<sup>2</sup> —Tiúrisamurécare eta nítujisiravahi néchajica te pimirahu, piti rey Agripa, eta nucatiuchiravaya núti apanava eta juca nametauchiranuhi ena nu-janeanana israelítana. <sup>3</sup> Núrismure ichape taicha píti pímatihí tamutu eta juca viyeherepiana viti israelítana, étapa eta véchapajirisirahi. Eta tacahe, nuyaseacavi puiti pisamanu eta nucayemaya. Pácayehe paciencia nuyehe.

<sup>4-5</sup> Eta námaperuvahi núti, fariséonuhi te návasa núchusinehi étapa te Jerusalén nujurusinehi. Néhicahi eta viyeherepiana viti israelítana eta nítaresirahi. Nucachanevacahi ena fariséoana ena tipícauchacareánapána. Namutu ena nuchajuruanahi tímatinuanahi eta nítaresirahi. Ena títameta-cavianaya eta nítaresirahi. <sup>6-7</sup> Puiti ticatupiacanuanahi te pimirahu, piti rey, táichavene eta vicuchapiravahi eta macaechepusirahaviya ema Viya te vépena, taicha tacahehi eta máechajiriruvahi nayehe ena viáchucanaveánaini.

Vimutu viti tachichanaveanahi eta viávapairu Israel, vimutu vicuchapavahi eta juca táitauchiravaya eta máijararuhaviya ema Viya. Eta tacahehi, tamutuhi sácheana, yátiana vítatíhi ema Viya, viyujaracahi mayehe. Táichavenehi eta nucuchapiravahi núti, timetauchanuanahi ena nujaneanana. <sup>8</sup> Tiuri puiti éti, németeaca tisuapacarehi eyehe eta macaechepusiraya ema Viya ena náepenaqueneana.

*Emá Pablo mametacavacapa eta mapánajirisíravaca ena téhicanahi ema Jesús (Hch 8.1-3; 9.1-2)*

<sup>9</sup> Nútiripa acane nímiyachahi nétupicava eta me Viya eta níchaqueneánahi nucatianasiravacahi ena téhicanahi ema Jesús Nazareno. <sup>10</sup> Eta juca níchirahi te Jerusalén. Tímícatacuananahi ena tuparairucana eta nucaratasiravacahi ena matapiravareanahi téhicanahi ema Jesús; nímiapijavacahi te cárcel. Eta nímairahi eta nacapasirayarepahi, néhícahi eta napanereru éna. <sup>11</sup> Ichape-murianahi ena nucarataruana. Némecharecavacapahi ena nétupiaruanapahi te náurujisirarevana. Níminajicavácapáipa eta náehisirahi ema Jesús. Nécatihavare eta náepuruiraya. Muraca eta nuvainarajichiravahi nayehe. Tamutuhi nutanusihavaca te apanaqueneana avasareana tayerehiqueneana.

*Emá Pablo mametacavarepa eta máehisiraípa éma apanava ema Jesús (Hch 9.1-19; 22.6-16)*

<sup>12</sup> Étarichuvare tímiyananuhi te avasare Damasco. Tivanecanuanapa comisiónnuhi ena tuparairucana; tíjaracuananahi eta órdena. <sup>13</sup> Tacahe, tata rey, te nánehipa te avasare, te jena sache las dócequenepa, tíjahúchavapa tímícauchanu eta majaraíva ema Viya, tiásiha te anuma. Tijarahipana tayehe eta sache. Timícauchanupa, énapa ena téhicanuanapahi. <sup>14</sup> Tacahe, viáquipáicavapa vimutu eta vipisirahi. Nusamapa ema Viya, téchajicanuhi te véchajiriruva viti israelítana. Máichanupa: “Saulo, Saulo, ¿tájaha tacayema picatianacuanuhi? Pésamiricavachucha, taicha pítijiváichucha píchavahi. Vahi piúrimahi te pímiyanava pipanajiricavaca ena téhicanuanahi” —máichanupa. <sup>15</sup> Tacahe, níchapa: “¿Nájahavi, piti Tata?” Tijicapanupa éma: “Núti Jesús. Núti picatianaruhi, eta pipanajirisiravaca ena téhicanuanahi. <sup>16</sup> Péchepuca, pitupiha. Núti nímerecavahi eta piyehe, taicha nunerejiruvíhi nuvanaraviya. Puiti numetacaviya eta juca pématanerepiyare eta nuyehe. Péchajisihayare eta níjare nayehe ena achaneana eta juca pímairanuhi puiti, étapa eta apamuriana nímerereruanayare. <sup>17</sup> Núti nucatiuchaviya te tájahapuca náicharacavi ena vijaneanana israelítana énapa ena apavasanana. Puiti nuvanecavihi péchajisihanuya eta nayehe ena apavasanana. <sup>18</sup> Pímitucavacayare eta mavanairipiana ema Vicaiyaquene. Nacaijuhe éma, apaesa náitujicava náimaha eta majaraíva. Náinajicapa eta náichaqueneasana te timapícu. Vaipa nacuehica ema Satanás. Ena tisuapanuanaya téhicanuanaya, nuperdonachavacaya eta napeaturana. Nasiapamuríhaya ena náinapureanahi nunerejiruana” máichanupa ema Jesús.

*Emá Pablo mametacavacapa eta masuapirahi eta matuparacasivanahi me Jesús*

<sup>19</sup> Tacahe, tata rey Agripa, nusuapahi núti ema Jesús eta mavanesianuhi. <sup>20</sup> Nucametarairupa tativahi nayehe ena ticavasanahi te Damasco. Te nuchavapa, étapa te Jerusalén, étapa te avasarechichana te Judea. Tásiha, núchucapa tayehe eta avasareana tayerehiqueneana nayehe ena apavasanana. Numetacavacapahi eta nácaijuhéraina ema Viya, náeneuchiravaina náitsivachiraina eta náitaresiraina, táuripa eta náitaresiraina. <sup>21</sup> Étara eta juca tivíuchanuhi nayehe ena nujaneanana eta nacaratasiranuhi te

Templo, navarairahi ticapacanuana. <sup>22</sup> Émasera ema Viya tímicatacanuhi. Puítirichucha tímicatacanuhi éma. Eta tacahe, nutiarhichucha puiti. Tásiha, vahi nuchávacuéjehavahíni nucametarairuyarechucha nayehe namutu ena achaneana, ena páureana énapa ena rícoana. Tájinasera vahi nuhapapicahini eta táechajiriruvanahi eta Sagrada Escritura eta táitauchiravayarehi eta macatajivairayarehi máepenirayarehi ema Cristo. <sup>23</sup> Tásiha, émayarehi títapuca téchepuca te máecari. Éta, táicutiarahi eta véchepusiraya víti apana te vécarí vimutu viti achaneana, viti israelítana énapa ena apavasanana. Tásiha, tivanecahavipa vimetacaya ena achaneana, apaesa nácasíñava mayehe éma.

*Éma Pablo mavarahapa macajimuyasamurechayare ema Agripa eta máehisiraya ema Jesús*

<sup>24</sup> Tímiyanavarichaha téchajica ema Pablo eta máechajiuchiravahi, témechajicavapa muraca ema Festo, macahepa:

—Máurishivipa pítí Pablo, táichavene eta pivayuchiravapa picaravahu. Éta timaurishichavihi.

<sup>25</sup> Émasera ema Pablo majicapapa, macahepa:

—Váhiya máurishinuina, tata aquenuca Festo. Nutupiruvahi eta juca nucayemaqueneanahi. Jéhevare eta yátupiqueneanahi. <sup>26</sup> Émaripa ema maca rey Agripa máimativare tamutu eta juca. Eta tacahehi vahi nupicacaracavahini eta néchajisirahi te mamirahu taicha nucasíñavahi núti eta máimatirahi ema. Namutuhivare ena achaneana náechahi, taicha tájina vahi tayumurucavahini. <sup>27</sup> Pítiripa pítí rey Agripa ¿pisuapahi jácani eta nacayemaqueneanahi ena profetanaini? Núti németeacahi pisuapahi pítí.

<sup>28</sup> Éma rey Agripa majicapapa:

—Picájimuyacayaréni eta nusamure. Núti apanavare néhicayare jácani ema Jesús.

<sup>29</sup> Tacahe, ema Pablo máichavarepa:

—Tiúripa pisuapavane puítinarichu, yátupina te pisamure. Nuyaseacaya ema Viya eta pisuapiraina. Énerichuvare nuyaseacayare eta esuapiraina emutu eti apamuriana eti esamararacananahi. Éhicavanéni ema Jesús, tácutihini eta néhisirahi núti. Váhisera nacuératatachéni, vahi ecucutinuhini núti eta nucaeratairahi táichavenehi eta néhisirahi ema Jesús —máichapa.

<sup>30</sup> Te nasamapa eta juca máechajiriruvahi ema Pablo, téchepucapa ema rey, ema prefecto, esu Berenice, énapa namutu ena natiarhiqueneanahi náejaruanahi. <sup>31</sup> Tásiha, tiyananapa típutsiacavanapa, náechajisihayarehi eta juca. Náichacacapa:

—Éma maca achane, tájina maviurevaina táimicapacahini. Váhivare táuricahini macaeratahini te cárcel.

<sup>32</sup> Éma Agripa mametacapa ema Festo:

—Tiúrihini picaitica ema maca achane te vahi macúyaseserécahini eta mayaniraya te mamirahu ema Emperador —máichapa.

## 27

*Ticaevatapa ema Pablo te Roma*

<sup>1</sup> Tiuri, matiarhihi ema capitán ticaijare Julio, nacapitarahi ena masuntarurana ema aquenucaini Augusto. Tacahe, te tiúripa eta napanereru eta náevatasirahaviya te Roma, natuparacapa ema Julio mámaya ema Pablo énapa ena apamuriana présoana. <sup>2</sup> Viávacuhapa te ichape pacure tíasihahi tayehe eta

puerto Adramitio. Tiyanayarehi te apanavare puértoana te Asia. Téhicahavipahi ema Aristarco ticavasahi te Tesalónica tayehehi capital eta departamento Macedonia. <sup>3</sup> Te apanapa sache, vítecapapa te puerto Sidón. Tacahe, ema Julio majapanupahi ema Pablo, máisapahi tiyana máejirapanavaca ena vichamuriana. Náechapajiricahi ema Pablo. <sup>4</sup> Te viásihavarepa te Sidón, vétavicapa eta tiúrupuhi Chipre tinapaicapahi te sapa, váipasare viácapapahini eta técativaca. <sup>5</sup> Tacahe, vijuchecherecapaipa eta mar te tachacayapahi eta Cilicia, étapa eta Pamfilia, vítecapirapa te avasare Mira tayehe eta Licia.

<sup>6</sup> Eta tayehe, viávacuhavarepa tayehe eta apanapa pacure máechajiaruhi ema capitán Julio. Eta juca pacure tiásihahi te avasare Alejandría. Puiti tacaijuheyarepa te Italia. <sup>7</sup> Te jena sácheana vahi vijuricatipahicháini eta vipaisira. Muracarichucha eta técativaca eta viácapirapahi. Muraca eta nacaemataneasirapahi, vítecapirapa te tánara eta puerto Gnido. Tacahe, vétavicavarepa eta puerto Salmón te tasumuqui eta apanavare tiúrupuhi ticaijare Creta. Viávicuchapáipa eta tiúrupuhi, étapa tiávichahávipahi tayehe eta técativaca. <sup>8</sup> Ticajerapahi eta vipaisirapahi. Vijúchecherecapáichucha, vítecapiravarepa tayehe eta apanavare puerto Buen Puertohiji eta ticaijare te tachacaya eta avasarechicha Lasea.

<sup>9</sup> Ticachurichavipa eta tiempo taicha eta viyérejevápahi. Tíñehiripa eta tapaisirava te mar, taicha tinacuchavaipa eta muracana técativaca. Eta tacahehi ema Pablo maconsejachavacapa, macahepa:

<sup>10</sup> —Tiuri, tátanaveana. Váipara tiuri vímiyanavahini vipaica, taicha tíñehicarepa vécharicava. Machu vicamitiaca eta pacure, eta carga, vítipa machu vérica —macahepa.

<sup>11</sup> Émasera ema capitán Julio, ema comandante tayehe eta pacure, émapa ema piloto vahi návarahahini nánasihini. Vahi nasuapahini ema Pablo. <sup>12</sup> Taicha vahi táurihini eta puerto, tájina távichahini tayehe eta muracana técativaca. Napanerechaichucha tiyananayare. Ánipa nacahehi:

—Vahi tiuri eta vánasi te juca. Viyanachucha tayehe eta apanavare puerto Fenice tayehe eta juca Creta. Tiúripa eta jena, távichahi tayehe eta muracana técativaca. Étaina vicuchapiha eta te táetupiricavapa eta sácheana —nacahepa.

### *Muraca técativaca te mar*

<sup>13</sup> Tacahe, tépanavapa eta técativacavahi te vana. Tiápajuecavanapa éna. Náimijachapa tímiyanavanayarehi tiuri eta náehisirayarepahi eta técativaca\*. Vahi náemeteacahini táequcavahini te cajaha. Viánehipaipa vicachacaya eta tiúrupuhi Creta. <sup>14</sup> Te ticaicutiaravapa, tíjahúchavapa téqucava, muracapa técativaca tiásiha te cajaha. <sup>15</sup> Tavehapa eta vipacure. Tiámahavipa. Viyerehipa eta tachausi. Navarahainipa náimichava eta pacure te tachausipahi, váhisera náratahahini. Tásiha, náisapapa tiámahavi eta técativaca. <sup>16-17</sup> Témetavichavipa te apachacaya eta tiúrupuhichícha ticaijare Clauda, étapa tiávichahavihi. Váiparichu muracainahini eta técativaca. Étapa víturusine vijataca eta étasi pacure vichururepahi. Vinacacuhapa te tajuhe eta ichapepana pacure. Ichapesera eta vicaemataneasirapahi. Tacahe, nánunuacapa eta pacure te enureana apaesa vahi tacuvejajuecha eta táepacuruha. Nacamiricapa eta ichapepana tavanterame tévatajicapahi eta pacure taicha napicahi támahini

\* **27:13** Acane eta ichapequeneana pacure, amairihaichaha te náurape eta napaisihahi te une. Camurianahi ena achaneana tinaucanapahi. Nacatupihavare eta ichapemequeneana sábanana tímecatayarepahi tévatajica eta técativaca.

eta técativava, táejahapaicahini eta pacure tayehe eta playa ticaijare Náecharisirareva. Tacahe, táevatajicapaipa eta vipacure, vétaviequenehairapa eta playa. <sup>18</sup> Tíñehichucha eta táepacuruhana. Eta napisirahi éna, náepuhecavacapa te une eta támaquenepahi. <sup>19</sup> Te mapanaquenepa sache, vivehavarepa eta apamuri támaqueneanapahi tayereruvanapaichuhi eta pacure, véchipaicavarepa. <sup>20</sup> Jéhesare, ichapemurihi eta sácheana vahi tacaecherahini eta sache, étapa eta jarairiquiana. Eta vímairahi vahi tarasahini eta muraca tépacuca, vaipa vémeteacavahini viúchucuhahini.

<sup>21</sup> Ichapemurihi eta sácheana tájina vinicahini. Tacahe, ema Pablo titupiha te vimirahu, máichahavipa:

—Tátanaveana, tiúripanáichuhipucáini esuapanuhini te vuíchaha viúchucuhahini tayehe eta Creta. Puiti vahi vicucatajivahini. <sup>22</sup> Puítisera, vahi ecupica, taicha nájina tépenaimahi. Técharicavayaresera eta pacure, témitiacaya. <sup>23</sup> Néchahi núti eta juca, taicha yati téchajicanuhi ema ángele mavaneruhi ema Viya, ema náquenuhi nucaematanearuhi. <sup>24</sup> Ani macahehi eta mametasiranuhi ema ángele: “Vahi picupica, Pablo. Vahi pépenaimahi. Énaripa ena nani picachanequeneanapahi, váhivare tépenanáimahi táichavenehi eta pitiarahirapahi eta nayehe. Picamesavayare pítecapaucha ema Emperador pitupihamiraureya” máichanupa ema ángele. <sup>25</sup> Eta tacahe, tátanaveana, túmehénachucha, taicha núti nucasiñavahi mayehe ema Viya. Nusuapahi eta mametarapiana ema ángele eta nuyehe. <sup>26</sup> Tiámahaviyaresera eta técativava tayehe eta tiúrupuhi —máichavacapa ema Pablo.

<sup>27</sup> Apinaquenepa semana eta támirahavipahi eta muraca técativava te ichapequenehi mar. Te jena enumuhuquenepa yati, ena marinéroana náimijachaipa tiánehianaripa eta tiájipahi taicha nasamahi eta cachuela te tachaui. <sup>28</sup> Náicutiecapa eta táupenava eta une. Náimahapa treinta y seis metro eta táupenavahi. Te tiyererehavare, náicutiecaparepa, veinte y siete metro eta táupenava. Náemeteacapa tiánehianaripa eta tachaui. <sup>29</sup> Tacahe, nacajuchucupapa eta cuatro ánclana te tahivu eta pacure, taicha napicahi táemestaquihahini eta vipacure tayehe eta máriana. Navarahaipaicha táijahúchavahini tijarahi. <sup>30</sup> Eta napisiraipaicha, ena marinéroana navarahapa tijunanayarehini, tijunijchavianayarepa. Nacucupaicapa eta étasi pacure vicavacurehi. Nacaetserarupa nacajuchucucayare eta apana ancla te tasumu eta pacure. <sup>31</sup> Ema Pablo máimatiaicavacapa eta navarairahi tijunana. Tacahe, mametacapa ema capitán Julio énapa ena masuntarurana. Máichavacapa:

—Te vahi nacunasi te juca pacure ena nani, éricayare éti, vahi iúchucuhaimahi —máichavacapa.

<sup>32</sup> Tacahe, ena suntaruana náechupicavacapa eta enureana táitihapahi eta étasi pacure. Náinajicapa te une.

<sup>33-34</sup> Te tijararahipa, ema Pablo tivanecahavipa vimutu vinicanuma. Máichahavipa:

—Enicanumapa apaesaina, taicha apinapa semana eta juca iávamina, emaimasirahivare. Tatuparaca enicanuma apaesa táetumechahe eta iávare-sirayare. Nájinasera témitiacaimahi te vitaracu —máichavacapa.

<sup>35</sup> Tacahe, te tamutupa eta mavanésiravacahi, ema Pablo mavehapa eta pan; mabendiciónchapa te vimirahu. Mavejecapa, tinicapa. <sup>36</sup> Vétumechavapa vimutu, vinicapa víti apanava. <sup>37</sup> Camurihavihi víti támaqueneanapahi eta pacure. <sup>276</sup> eta visimutuvapahi. <sup>38</sup> Te vítanésipa eta vinisirahi, navehapa ena marinéroana eta apamuri trigo, náquijicapa te une, navarairahi téchacayare eta támaquene eta pacure.



*Técharicavapa eta pacure*

<sup>39</sup> Te tijarahipa, ena marinéroana vahi náimativahini távihahipuca eta viávihi. Náimahapasera eta tachausi ticayehehi playa. Navarahapa náimipauchayare eta pacure, viúcupaisihayarehi te playa. <sup>40</sup> Tacahe, náechuacavarepa eta enureana ticaratacanahi eta ánclana. Tanasivacapa te amahe une. Nacaesimucavarepa eta tayeheana leme eta pacure. Tacahe, nacanunquechapa eta étana tavanterame ticarataca eta técatícava tiávihapahi te tasumu. Táimicatácapa eta napauchiraya eta playa. <sup>41</sup> Tiámahavipasera tayehe eta remanso. Vaipa táupenahini. Tásiha, ticaratacavahipa eta playa. Tachuchucapa eta tavaparú. Vaipa tayamuricahini. Tacahe, eta tamuracavahi eta tépacuca, tacavaracapa eta tahivu eta pacure. <sup>42</sup> Ena suntarúana navarahapa nacapacayarehi ena présóana, napisirahi náitujicavahini tijunana eta návaresiraya. <sup>43</sup> Émasera ema capitán Julio vahi máisapahini taicha mavarahahi macuchucuhayarehi ema Pablo. Macavanairipipa ena náitucanahi tiávarecana napaucha eta tachausi. <sup>44</sup> Ena apamuriana máitucarahanahi tiávarecana nayuratamecavacapa eta tabla, nacuchucuiyavahi te tiájipahi. Tacahehi eta viúchucuirahi vimutu.

**28***Ema Pablo máviihaipa te tiúrupuhi Malta*

<sup>1-2</sup> Tacahe, te vimutupa viúchucuhahi, tiúchujichahavianapa ena ticavasanahi tayehe eta tiúrupuhi. Timetacahavianapa eta táijarehi Malta eta viúcupaisihahi. Nacamuruequechapa eta yucu, tíchuhahavianapa viásacavayarehi taicha vicasarehavacaipahi taicha eta une étapa eta tiquiva. Énapa titátihavianahi. <sup>3</sup> Tacahe, ema Pablo tinerecapa eta yucuqui máijuquechapa. Tatiarihihipuca eta quichare te manereru. Tásiha, tiúchujicapa eta quichare, táimijunapa eta yucu. Táechucapa te mavahu ema Pablo. <sup>4</sup> Te náimahapa ena ticavasanahi tayehe eta tiúrupuhi eta táechusirahi ema Pablo te mavahu, nacahepa:

—Ema maca achane ticaviurevapuca jácani, ticáparecahíchupuca. Tiúchucuhahi te une, ánipasera taviyihahi te tiájipahi eta matuparahahi. Vaipa máuchucuhahíni —nacahepa.

<sup>5</sup> Émasera ema Pablo máquijipicapa te yucu eta quichare. Tájina máichavahini. <sup>6</sup> Tacahe, ena tímararacanahi nacuchapaipa máepenahini, támahipucahini eta mavahu. Eta náimairahi tájina máichavahini, napanerequenehapa.

—Viyachupuca ema maca —nacahepa.

<sup>7</sup> Te tachacaya eta vécharisinevahi, tatiarihihi eta barraca, maverahi eta pétiana napenanahi ena machaneranahi ema subprefecto, tuparairucahi tayehe eta tiúrupuhi. Ema ticaijarehi Publio. Émapa tíchuhahavihi téchapajiricahavihi eta jena mapanaquenehi sache. <sup>8</sup> Matiarihihivare ema maiya ema Publio. Ticajumahi éma, eta muraca fiebre. Tisacahivare iti. Tívecahi éma te matuleta. Tiyana ema Pablo, máejirapanahi. Tiyujaracapa, mayaseacapa ema Viya eta macanarasiraina ema macajumaquene. Tásiha, manacapa eta mavahu te máinahu. Jéhesare, tinaracapa ema achane. <sup>9</sup> Eta náimairahi ena apamuriana achaneana eta macanarasirahi ema macajumaquene, náepanavacapa ena apamuriana nacajumaqueneana. Macanaracavacapaipa ema Pablo. <sup>10</sup> Mapana caje eta viávihairahi tayehe eta tiúrupuhi. Ichaperinehi eta náitátirahavihi ena achaneana. Te viávacuhayarepa, tíjaracasichahávianapa eta vicamunuqueneánayarehi eta vipaisirayareva.

*Tímiyanavanavarepa eta napaisirahi, nacaijuherahi eta Roma*

<sup>11</sup> Tasiha, viávacuhavarepa tayehe eta apanavare pacure tachimararuhivare eta muracana técatícava tayehe eta puerto viávihahi. Eta juca pacure ticaijarehi Castor-Polux, Chámeana. Tiásihahivare te Alejandría. <sup>12</sup> Eta vipaisirahi, vítecapapa te apanavare puerto ticaijarehi Siracusa. Víchecapa tayehe mapana sache vicahe. <sup>13</sup> Te viyanavarepa, vijuchehecapaipa vítecapirapa tayehe eta puerto Regio. Te apanapa sache tépanavavarepa eta técatícava te vana. Tímicatacavipa eta vipaisirapahi. Te apanapa sache, vítecapapa tayehe eta puerto Puteoli. <sup>14</sup> Te jena avasare, vicainunapa ena apamuriana vichamuriana, tíminasichahavianapa. Étana semana vicahe eta nayehe. Tásiha, vipaicapa te tiájipahi, vicaijuhepa eta te Roma. <sup>15</sup> Ena apamuriana vichamuriana ticavasanahi te Roma tisamairirichavianaiapa eta vítecapirayarehi. Nárajapapa tiácapahavianahi te achene te apanahivare avasare ticaijarehi Foro de Apio. Énerichuvare ena apamuriana tiácapahavianahivare, ticuchapahavianaiapa tayehe eta apanahivare avasarechicha ticaijare Tres Tabernas. Te máimahavacapa ema Pablo, tiúrisamuréinehi naicha eta nácapirahavihi ena vichamuriana. Tétumechavapa ema apana. Mahasulupayachapa ema Viya. <sup>16</sup> Te vítecapapa te Roma, ema capitán Julio mahentregachapa ema comandante tayehe eta guardia ena présoana. Émasera ema Pablo náisapapa títecapapa te apana peti, matiarihisera ema émana suntaru tijaneacahi.

*Ema Pablo máimitucavacapai ena téjirapanana te máitecapihahi*

<sup>17</sup> Te mapanapa sache eta vítecapirahi te Roma, ema Pablo máimichuhavacapa ena náiyarahana ena israelítana ticavasanahi te jena avasare. Te tiúrujicavanapa, ema Pablo máichavacapa:

—Nuparapenaveana, tájinanéni nutapiravainahini. Tájinavare nícharacahini ena vijaneanana. Váhivare nucaecahi eta nayeherepianaini ena viáchucanaveanaini. Nucaeratahisera te Jerusalén, timetauchanuanahi te namirahu ena tuparairucana romanoana. <sup>18</sup> Eta nayaseresiranuhi, navarahineni ticaiticanuana taicha náimahahi éna tájina taviuchanuhini táimicapacanhini. <sup>19</sup> Énasera ena vijaneanana tuparairucanahi váhiquene návarahahini nacaiticanuhini. Eta tacahehi nuyaseserecapa núti étaina nucametauchacasiya te mamirahu ema Emperador. Tájinasera vahi numetauchaimahi ena nujaneanana ticaetemajiricanuanahi. <sup>20</sup> Eta tacahe, nímichuhahehi nuvarahahi nímatihyare éti, numetacaheyareva eta juca níchavaquenevahi. Ticaviurenuhi eta néhisirahi ema Cristo, ema vicuchapaquenehi vimutu viti israelítana, eta tímitiacanuhi puíticha te juca cadena —máichavacapa.

<sup>21</sup> Tásiha, ena náichapa:

—Tájina váhiya visamairiricavi. Váhivare vijacapa eta carta tiásiha te Judea táechajisihavihinini píti. Énapa ena vichamuriana israelítana tiásihanapahi eta ánaqui, váhivare náechajisihahini eta piviurevahipuca píti. <sup>22</sup> Vivarahasera visamavi puiti péchajisiha eta pipanereruanahi, taicha visamairiricahi eta nacatichirahi ena vijaneanana tiávihanapahi te avasareana eta juca arairuhi éhiruhi —náichapa.

<sup>23</sup> Tacahe, náijarechapa eta sache máechajisiraya. Te jena sache, títecapanapa ena camuriqueneana israelítana tayehe eta máitecapihahi ema Pablo. Tépanavapa te jena yáticarahi téchajicahi éma. Tiámainucava te cáperehichichapa títapiricapa eta macametarairuirahi eta máechajiriruva ema Viya. Máimivehapicapahi eta máechajicuirapahi eta Sagrada Escritura. Máimitucavacahi

éna eta náimatiraya ema Jesús eta émairahi Cristo, ema nacuchapaquenehi. Macajimuyacavacahi eta náehisiraina éma.

<sup>24</sup> Tásiha, típutsimurihavanapa ena tisamararacanahi. Natiarihihi ena apamuriana nasuapa eta macayemaqueneanahi ema Pablo. Natiarihisera ena apamuriana vahi nasuapahini. <sup>25</sup> Éna, vahi návarahapahini nasama, timutserahavanapaipa tiyanana. Tacahe, ema Pablo máichavacapa:

<sup>26-27</sup> —Machu ecucutihini ena viáchucanaveánaini acane. Matupiruvahi ema Espíritu Santo eta máechajisihavacahi éna te mametacapa ema víyahaini profeta Isaías. Máichapa: “Píyanapa pimetaca ena naena achaneana. Ani píchayare: Nímatihe éti eta emasuapajiravahi. Épiyacavahi religiósohehi; tétavicavahisera eta tamuracavahi eta esamureana. Eta juca emasuapajiravahi, tahapapiricahi eta ecaicutiarairahi eta numetarapiana étapa eta nímereuchaqueneana. Tájinapa táichahíni vicuchapahini eta éneuchiraváina, evarairapucaini ecasiñahini me Viya, apaesa macanaracahehini” máichapa ema Espíritu Santo.

<sup>28</sup> Ácaicutiaraquenéna éti, puiti juca vicaijuheya vimetacaya ena apavanana eta mavarairahi macuchucuhaya éna apana ema Viya. Tásiha, éna nasapihayare nasamararacayare —máichavacapa ema Pablo.

<sup>29</sup> Te tamutupa eta máechajisirahi ema Pablo, tiyananapa ena majaneanana, tiúmehavanapaipahi.

<sup>30</sup> Apina año macahehi ema Pablo tayehe eta máitecapihahi. Tamutu sácheana majacapavacahi ena tipaiuuchanapahi. <sup>31</sup> Máechajisihahi eta máechajiriruva ema Viya, máimitucahivare eta náehisiraina ema Viáquenu Jesús, émairahi yátupiquenehi Cristo. Nájina nacamatinacahini. Náisapahi ticametarairu.

Tamutupa eta néchajiriruvana eta piyehe.

## **Eta macartane ema Apóstole Pablo nayehe ena machamuriana ticavasanahi te Roma, ticaijare ROMANOS**

<sup>1</sup> Nuti Pablo, mavanaranuhi ema Viáquenu Jesucristo, manerejirunuhivare eta mayehenuyarehi apóstole. Tituparacanuhi eta nucametarairuyare eta mapanerechirahi ema Viya eta mavarairahi macuchucuhaya namutu ena ticasíñavanaya mayehe ema Machicha.

<sup>2</sup> Ema Viya, ánaquiaparipahi eta juca mametasiravacahi ena víyaranaini santo profetana eta mapanerechirahi eta macuchucuiraya ena achaneana. Tásiha, nájuequeneharipahivare éna. <sup>3</sup> Eta Sagrada Escritura táechajisihaipa ema Machicha ema Viya eta máucupaisirayarehi te juca apaquehe. Yátupiyarehi Crísto éma. Achanequenehi eta máimahi. <sup>4</sup> Natiarihiserá ena ticianacanáhi éma. Náimicapacahi éma. Émasera ema Espíritu Santo, tiáramicarehi eta macaechepusirahi éma te máecari. Éta tía tímereuchahi eta yátupiquenéráhi Machicha ema Viya. <sup>5</sup> Puiti ema Viáquenu Jesucristo tijapanunuhi eta matuparasiranuhi eta nuyaniraya nupaicaya te tamutu avasareana, nucametarairuyarehi eta najacapacarevayarehi me Viya namutu ena tisuapanayare, náehica éma. <sup>6-7</sup> Te namuri ena nasimutuqueneana, etiarihivare éti apanava. Tíchuhahehivare ema Viya, machanerayarehi ema Machicha Jesucristo, mavaraha tauri eta ecaemataneasiraya éma. Puiti nucajurehe eta juca nucartane emutu eti nuchamuriana ecavasanahi te avasare Roma, máemunaruqueneanahi ema Viya. Nuvaraha macatajicahehíni ichape ema Tata Vícaiyaquene, émapa ema Viáquenu Jesucristo; náijaracahéhíni táurivaina eta epanereruana.

### *Ema Pablo mapanerechaipa tiyanayare te Roma*

<sup>8</sup> Núti, tétavicavahi eta nucunachirahi ema Viáquenu Jesucristo, nuhasulupayachahi ema Viya íchavenehi emutu éti. Namutu ena achaneana te avasareana téchajisiaheanahi eta yátupiraripahi éhica ema Viya. <sup>9</sup> Núti nuvavinavahi eta nucaemataneasirahi ema Viya, eta nucametarairuirahi eta máimiturapiana ema Machicha Jesucristo. Ema Viya tímararacanuhi eta néñamiravahi eyehe éti. Núti, tamutu sácheana te nunarasirana, te néchepusirana, nuyaseuchahehi me Viya, máijaracahéhíni eta iúriváinahíni éti. <sup>10</sup> Nuyaseuchavahivare eta máisapiranuinahíni nítujisiravainahíni nu-paiuchahe. <sup>11</sup> Ichape eta nuvarairahi nímahe, nímicatacahehíni eta tajurusiraya eta íchanevana apaesa muracaquenénapaini eta éhisiraya ema Viya. <sup>12</sup> Éti apanava ímicatacanuhíni. Vétumejiricacahivaréni eta véhisirahi ema Viáquenu.

<sup>13</sup> Nuparapenaveana, nuvaraha numetacahe apaesa echa. Ichapemurihi eta nuvarairahi níteca nímahapanáhe. Puitícha, vuíchahasera nítujicava. Tijuricati nítupicavahíni eta nítesirainahíni eyehe, natiarihichuhipucaini nucajimuyacavacahíni eta nanerejisiravainahíni náehicahíni ema Viáquenu, tácutihíni te nupaicainapa te apana avasareana. <sup>14</sup> Taicha ichape eta néñamiravahi núti eta nucatuparahairahi nucametarairuirayare nayehe namutu ena achaneana te ichapeana avasareana énapa ena tiávihana te vámahiana,

ena tiávihana te isanitia. Nájina nunerejiruimahi. Namutuyare numeta-cavaca: ena cráyanana rícoana énapa ena páureana. <sup>15</sup> Tacahe, núti nutsere-reacavahi eta nupaipiuchiraheya te iávasa Roma, nuvarairahi nímitucahe eta máechajiriruva ema Viya tayehe eta véhiruhi.

*Vijacapacareipahi mayehe ema Viya táichavene eta vicasiñavairahi mayehe*

<sup>16</sup> Núti nuvavinavahi eta nímitusirahehi tayehe eta véhisirahi ema Cristo. Tájina vahi nutsirihahini, taicha tétavicavahi eta macasiñacarevahi ema Viya máitauchayare tamutu eta macuchucuirahavi. Éma, tétavicavahi eta mavarairahi nacasiñavahini ena israelítana eta mayehe, énapa namutu ena apamuriana achaneana. Tétavicavahi eta máitupajjiasiravahi máitsiva-chinahi eta náitairesirana, tamutupa arairuhi máicha. <sup>17</sup> Taicha ema Viya máimerecaripa eta vijacapacarevahi eta mayehe vimutu viti vicasiñavanahi mayehe. Tájinapa vácamunuhini. Tarataripa eta vicasiñavairahi mayehe. Tásiha, éma ticuchucuhaviripa. Taicha eta Sagrada Escritura, ani tacahehi eta táechajiriruvahi: “Nácani ticasíñavanahi eta me Viya, tijacapacareanahi, máichecuaraquireyare eta náitairesiraya táicha”.

*Ticaviurevana namutu ena achaneana táichavene eta nájecapiravana*

<sup>18-19</sup> Acane ema Viya manacasamurechahi ena achaneana eta matiarahirahi éma. Manacasamurechahivare eta máicuñasiraya namutu ena téjecapavanahi, máurirahanahi. Yátupihí eta nacaicuñairayare táichavenehi eta namasuapirahi eta yátupiqueneana, váhivare návarahahini náinajicahini eta navainarajivana. <sup>20</sup> Máimahasihinéni ema Viya Eterno eta viyehé, véchahisera eta matiarahirahi, taicha tamutu vímaha eta máepiyaruanahi, étaripa eta apaquehe étapa eta tatiariqueneanahi. Émarichuhi ema Viya téchapajiricahi tamutu eta táepaniravahi eta juca apaquehe, puíticha eta juca viávacurehi. Étara vímatiarahi eta matiarahirahi ema máitupajjiaruvaquenehi. Énaserá ena achaneana, vai návarahahini nacasiñavahini eta mayehe. Étapa naviurevahi éna. <sup>21</sup> Tamapurujihisera eta náimatirahi ema Viya, vahi návarahahini nasuapahini; váhivare napicauchahini. Váhivare nahasulupayachahini éma. Tétavicavahi eta tájecapiravahi eta napanereruana. Étachucha napanerechahi eta tájiparacana. Muracasamureanahivare. <sup>22</sup> Ticasíñavavaicanahi taicha tímijachavanahi títupajjiacavana. Tétavicavahisera eta namaiturerevanahi. <sup>23</sup> Vaipa najirauchahini ema Viya máepenacacahi. Váipavare mapicauchacarehini nayehe. Tásiha, náemitisicaipa éma. Nasapihapa najirauchahi eta nasiñarajiana achanemirana matumerairahanahi náipunechucha ena achaneana. Tamutuchucha nacasiñarajipahi cáyurepuca, quicharepuca, sáraremrapuca.

<sup>24</sup> Tacahe, eta máimairahi ema Viya eta náichirahi eta júcana, máisapapa éma. Máinajiacavacapa. Puíticha navaraharichucha tímianavana naicha eta natuhusivana titsiriacareanahi. Tavayuacahivare eta najamuraraivana tauriqueneana. Tétavicavahi eta namaeperajisiracacahi. <sup>25</sup> Tétavicavahivare eta náepuirahi ema Viya, émayarehi najiraureyarehini. Tasapihapa téjecapavanahi, eta náimijachirahi tiúripána eta najirauchira eta nasiñarajiana náepiyaruanahi. Tásiha, náemitisicapa ema yátupiquenehi. Jéhevaquenehi máichecuaraquireyarehi eta majirauchacareva. Amén.

<sup>26</sup> Eta tacahe, ema Viya macaerajicavacapa. Vaipa mávarahahini máemechavacahini. Máisapapa náichahi eta navarahaqueneanahi. Tásiha, tétavicavahi eta náichaqueneanahi. Nararihi ena esenana, énajicacapa náichacacahi eta napecaturana. Vaipa nácomesahini ema ajaira. <sup>27</sup> Énaripa



ena ajairana, nararihivare énajicacahi náichacacahi eta pecatuana. Vaipa nácomesahini esu esena. Navayuchaipa eta najamurachiracacahi. Váhiquene nátsirihahini. Táichavenehi eta nájecapiravahi, énajivapa tímitaequenehavana tayehe eta náicuñayare.

<sup>28</sup> Ena nani, ichape eta nacaerajisiravahi eta me Viya. Vaipa návarahahini náesenicahini éma. Váhivare návarahahini napanerechahini eta táuriqueneana. Tásiha, ema Viya máinajiacavacapa, vaipa émainahini máechavacahini. Máisapapa tímiyanavana eta náichirahi eta tájiparacana tamauriqueneana. <sup>29</sup> Tétavicavahi eta náepiyaresirahi eta napecaturana tamauriqueneana: Navehahi esu esena apayena. Ena amaperuana náichahi eta natuhusivanahi. Téharahiana nayehe nácani matapiravareanahi. Tamutupa navaraha nacayehe, cáetemarahiana, ticapinarurahiana, ticapahiana, tipiararecana te tisemana, tivayuarecana, sémarairihiana, téchejihiana. <sup>30</sup> Tíñemahi eta náechejisirana nayehe ena apana achaneana. Nacati-chavare ema Viya. Tiácapaemarahiana, cájamuravana, píncanillana, tisiñavavairicana. Tisipanerehiana eta náichirayare eta apana pecatu navarahaqueneana. Masuapajirairahanavare nayehe ena ticachichana. <sup>31</sup> Tímijachavanahi tétupicavana eta náichirahi eta tamauriqueneana. Tivayuarahiana eta náechajirisiravana. Vahi témunarahiana. Váhivare tiperdonarahiana, nájina najapanuquenéna. <sup>32</sup> Náechahinéni éna eta taurivahi eta júcana me Viya. Náechahivare éna, eta táimicapacasiravacayarehi, tímiyanavanarichuchasera eta náichirahi. Náimiaquipaicahi nácani apamuriana. Émasera ema Viya máitauchayarehi eta náicuñayare.

## 2

### *Ena Viya titupiruvahi eta máitauchirayarehi eta náicuñayare*

<sup>1</sup> Étiarhisera éti ímijachahi tájina eviurevaimahi eta vahi ácutimahi ena apamuriana máimatirahanahi ema Viya. Ímijachavahi tájina epecaturaina. Éti ecaecahivacahi ena tíchanahi eta tamauriqueneanahi. Váhiserá étupicavahini eta ecaecahirahi, taicha étirichuhi nacutiqueneanahi eta íchaqueneana. Énerichuhivare eti ecaviurevahivare. <sup>2</sup> Víti véchahi matupiruvahi ema Viya eta máicuñasiravacaya ena tíchanahi eta juca tamauriqueneana. <sup>3</sup> Étipa, éjecapavahi eta ímijachirahi ticaitcaheyare eta ícuñayare, eti ícharahiana eta tavasiqueneana ecutirichuhinéni ena ecaecahiqueneana. <sup>4</sup> Émasera ema Viya, tétavicavahi eta máurivahi eta eyehe. Vahi maícuñacahevanehini. Ticamichahehi, ticuchapahehivare, mavarairahi éneuchavahini eta mayehe, ínajicahini eta íchira eta tamauriqueneana. Tásiha, vahi ecuemepurureca eta máurivahi eta eyehe. <sup>5</sup> Taicha táíñehiqueneyare eta ícuñasamiyare éti, te vahi ecueuechava, ínajicavare eta tamuracavahi eta esamureana. Taicha evayuchapaichucha eta ecurumutusirahi eta etapiravana. <sup>6</sup> Taicha éma, matupiruvahi eta máíjarasirayare eta táitsivayare eta víchaquenepachu. <sup>7</sup> Vítiripa viti machanerana ema Viya, tíjaracahavinapa éma máíchequarquireyare eta vítaresiraya, taicha vivaraha puiti vicurisamurechaya éma, vímiyanavaya eta vivapinairavayare vicha eta táuriqueneana. Vicuchapavaya eta visiapiraya eta te majaraivahi, vicunachacareya mayehe, máíchequarquireya eta viúricacarevaya. <sup>8</sup> Muracainapasera eta máicuñasiravacaya namutu ena masuapajirairahanahi énaripa ena ticatianacanahi eta yátupiqueneana, tasapihahi náuricahi eta tamauriqueneanahi. Navayucharipa eta náimiyusemasirahi ema Viya. <sup>9</sup> Ichape eta nacatajivairaya, tíyahacavanayare namutu ena tíchanahi eta juca tamauriqueneana. Ticuticacanayare

namutu eta náicuñayare, ena israelítana énapa ena apavasanana. <sup>10</sup> Étiserá eti íchanahi eta táuriqueneana, tíjaracahénapa ema Viya eta iávihaya te majaraivahi. Tétavicavaya eta ecunachacarevaya mayehe. Tinaracainavarepa eta epanereresiranainihi. Ecuticacaya emutu eta iúricacarevaya. Eti israelítana, vahi ecachuricaimahí ena apavasanana.

<sup>11</sup> Ema Viya vahi manerejicaimahi ena máicuñaruanaya. Ticuticacayarehi máicha. <sup>12</sup> Nácani máimatirahanahi eta mavanairipiana ema víyarahaini Moisés, ticaicuñanayare. Énerichu nácani náimatihinénipuca, tavetijinapa ticaicuñanayare taicha vahi nasuapahini. <sup>13</sup> Taicha vahi tijacapacareanaimahi mayehe ema Viya nácani vahi náitauchahini eta nasamaqueneanahi. Tijacapacareanayaresera nácani títauchanahi típicauchanahi eta vanairipiana. <sup>14</sup> Nararihivare ena tinerejicavanahi ena apavasanana, váhinéni náimatihini eta vanairipiana, nasapihasera natupíruvahi te nasamureana eta náichirahi eta táuriqueneanahi, taicha yátupíhi eta nasuapirahi eta manacasamurechaquenehi ema Viya. <sup>15</sup> Éna, náimerecahi eta manacasamurechirahi ema Viya eta vanairipi te nasamureana. Énajivaya tisamavana te napanereruana eta táurivahi eta náichaqueneana, éta ticatiuchavacahi. Te téjecapavanapuca, tisamavanahivare eta taurivahi eta náichaqueneana. Tásiha, napicahi eta náicuñayarehi táicha. <sup>16</sup> Járjapa eta sáchevare, ticayaseserehianainapa namutu ena achaneana te mamirahu ema Viáquenu Jesucristo. Éma, máimatiya tamutu eta náichaqueneana tayumururevanahi. Étarichuhi eta numetarapihi te nucametarairupa.

*Ena israelítana, ena ticatuparahanainihi eta vanairipiana, váhisera náitauchahini*

<sup>17</sup> Étiserá eti israelítana, ímijachavahi yátupíhi ítaucha eta vanairipiana, ecunachavaipahi mayehe ema Viya. <sup>18</sup> Ímijachahivare ítuca eta mavarahaqueneanahi ema Viya. Énerichuvare eta vanairipi éhiruhi tímitucahehi eta enerejisirayare icha eta táuriqueneana. <sup>19-20</sup> Tétavicavaipahivare eta ecunachiravahi taicha ímijachavaripa ecaturaraha eta ímitusiraya ena apavasanana apaesa náesenicahini ema Viya, náimatiyareva eta máechajiriruvana, náinajicayareva eta napecaturana, váipavare nanasimahí eta te timapícu. Ímijachahivare ímatiequeneha tamutu eta vanairipiana, ítamuturusirahi tamutu eta tayeheana yátupíqueneana. <sup>21</sup> Éti evarahahípuca ímitureca. Tituparacahisera étivaya ítaurahi. Éti, ímiturecahi vahi nacuamereca ena achaneana; étiserá epanerechahi eta iámeresiraya. <sup>22</sup> Tacutiquene váhivare iúrica nacaesenarahini ena eparajairavana; étiserá epanerechahi eta ecaesenaraya. Ecatichavare eta nasiñarajiana; étiserá matsiriarairahahehi eta evehairahi eta táijaracasiana eta nasiñarajiana. <sup>23</sup> Ecunachavahi eta ímijachiravahi ítuca eta mavanairipiana ema Viya; étiserá tamutu sácheana íacatayayajicahi eta mavanairipiana. Tétavicavahi eta emapicauchirahi éma. <sup>24</sup> Ani tacahe eta Sagrada Escritura: “Ena achaneana vahi napicauchahini ema Viya íchavenehi éti israelítana” tacahepa.

<sup>25</sup> Eti ecunachavaipahi eta israelítairahéhi. Tacamunuhisera eta ítauchirainahini eta vanairipiana. Taicha eta juca emaitauchirahi, tímicutijiricavaichucha vahi étinahini israelítanainahéhi. <sup>26</sup> Ticachuricaheanaripa nácani apavasanana, nasapihaipa náitauchahi eta vanairipianahi. Ema Viya máimahahi eta táurivahi eta náitauchirahi, váhinéni israelítanainahíni éna. <sup>27</sup> Ena apavasanana títaurahanahi tayehe eta vanairipiana, éna

tiyaseserecanainapa eta ícuñayare emutu eti emaitauchanahi, émepuru-recavaipahi israelítairahehi, étapa eta ecaravahuirahi eta vanairipiana. <sup>28</sup> Váhivare étaimahi ecunachacarevaya eta ecamarcairahi te iáquehe eti israelítana. <sup>29</sup> Nácanísera yátupiquenehi eta nasuapajiraiva, jéhevare ena yátupiqueneanahi israelítana. Vahi tácomesaimahi ticamarcana te náqueheana, taicha éna yátupiquenehi te nasamureana námahi eta nacamarcairahi eta machanerairavacahi ema Viya. Vahi étaparacainahini eta nacaravahuirahipuca eta vanairipiana, étainapapucaini nacunachacarevainahini nayehe ena achaneana. Eta ticamunucarehi eta náitauchirayare eta mavanairipiana ema Viya. Étapa nacunachacarevaya eta mayehe.

### 3

#### *Ena israelítana tímijachavanahi nacarichu ticunachacareana*

<sup>1</sup> Eti nujaneanana ímijachavaipa ecunachacarehi taicha eta israelítairahehi, ecamarcairahivare te iáquehe. <sup>2</sup> Jéhesare, jararihi eta ecunachacarevahi, máicha ema Viya. Éma, matuparacavacahi ena viáchucanaveanaini eta náimituresirahi eta yátupiqueneana máechajiriruana, vítipa viti námariqueneana. <sup>3-4</sup> Tayanapane natiarihihi ena vijaneanana vahi náitauchahini eta natuparahahi, émasera ema Viya, váhiquene títavaimahi eta máitauchiraya tamutu eta máijararuvanahi eta nayehe. Taicha tétavicavahi eta máitauravahi éma. Tayanapanepuca natiarihi ena achaneana énaina náepiyahirahi, émasera ema Viya máitauchayare tamutu. Eta Sagrada Escritura, ani tacahe: “Tayanapane ena achaneana vahi navarahahini nasuapa eta pítauravahi, piti Tátachicha, tamutu sácheana pímerecahi píti eta pítauravahi. Tayanapane natiarihi námijachahi vahi tátupiruvahini eta píchaqueneana, tétavicavahisera eta pitupiruvahi te tamutu” tacahepa. <sup>5-6</sup> Vimutu vímati tétavicavahi eta majapanuravahi ema Viya. Németeacaserá etiarihi eti ímijachahi tiápajucavayarehi eta macunachacareva taicha eta esipeaturairavacahi. Ímijachavavare vahi tátupiruvahini eta masemairahi eta ecapeaturairahi. ¡Tétavicavahi eta éjecapiravahi! Ecuti ena achaneana mapanererureana. Ema Viya, tatuparacahi máicuñacavacayare namutu ena téjecapavanahi, taicha tétavicavahi eta masantovahi. <sup>7-8</sup> Ímijachavahi tísapacarehi eta épiyahiraiva, taicha ímijachavahi títametahe eta yátupirahi eta tátupiruvahi eta máechajiriruvana ema Viya. Ánipapuca tacahe eta epanereruana: “Ema Viya ticaijare tijapanurahi. Tacahe, tiápajucavayare eta macunachacarevahi éma, taicha táetaviuchayare eta majapanuirahavi eta máimairainapa eta vivayuchiravahi eta vivainarajivana. Tásiha, vahi tátupiruvahini eta mavarairahi tícuñacahavi, taicha tiápajucava eta macunachacareva vícha, ¿masí?” ecahepuca eta epanereru. Natiarihivare ena tépiyaequenehahavi námijachahiji tacahe eta vímiturapi viti apóstoleana. Muracayaresera eta náicuña namutu ena tacahehi eta napanereruana.

#### *Vimutu viti achaneana vicaviurevahi eta me Viya*

<sup>9</sup> Eti nujaneanana, vahi ecuimijachava viti israelítana viúripanahi nayehe ena apamuriana achaneana. Tájinaquene viúrivainahini te mamirahu ema Viya. Taicha vímatiequenehapa eta vimutuirahi vicaviureva me Viya viti achaneana, viti israelítana énapa ena apavasanana. <sup>10</sup> Eta Sagrada Escritura, ani tacahe: “Nájina náurihini, émanainahipucáini máurihini, ésunainahipucáini esena súrihini. <sup>11</sup> Nájnavare énajivainahini náimatihini ema Viya, váhivare navaraha náesenica ema Viya. <sup>12</sup> Namutuhi téjecapavana, namutuhivare

táquipaicahi eta tauriqueneana. Nájina náichahini eta táuriqueneana, émaninahipucaini máichahini. <sup>13-14</sup> Tíñemahipi eta náechejirisiravana. Tétavica-vavare eta navayuarai vanahi. Éna nacuti eta quichare téchurahi, tétavicavahi eta nacaetemaraiva. Náematanechucha namaldicióncha nácani apamuriana. <sup>15</sup> Apaesarichu nacamunu navarahaipavare ticaparecana. <sup>16</sup> Sirujiana eta náitaresirana, ticaetemarerecana. <sup>17</sup> Vahi natanucaimahi eta náurivainahini nayehe ena apamuriana. <sup>18</sup> Tájina vahi napicauchaimahi ema Viya” taca-hepa eta Sagrada Escritura.

<sup>19</sup> Nujaneanana, eti ímijachavaipapuca vahi étinahini táechajisiha eta Sagrada Escritura. Téchajisihahehisera, taicha eti iávacuhanahi eta vanairipiana. Emutuhi ecaviurevahi. Te jena sácheyare, vaipa ecatiuchavaimahi. Ematinainaripa emutu taicha eta eviurevanahi. Táurica eta ecaicuñairayare emutu. <sup>20</sup> Natiarihipucasera nácani tímijachavanaripahi tijacapacareana taicha navarahainapa náitauchaya eta vanairipiana. Váhiquenesera tijacapacareanaimahi me Viya, taicha vahi étaparacaimahi eta náitauchirahi. Taicha eta vanairipiana, tímimatichahavichucha eta vicapecaturairahi.

*Vijacapacarehi mayehe ema Viya táichavenehi eta vicasiñavairahi mayehe ema Machicha Jesucristo*

<sup>21</sup> Puítisera, ema Viya tímimatichahaviripa eta vijacapacarevayarehi eta viúchucuiraya. Vahi étaparacaina eta vivarairahipuca vítaucha eta vanairipiana. Tanasiqueneripa eta Sagrada Escritura, táechajisihaipahi eta máitecapiraya ema ticatiuchahaviya, vijacapacareya máicha. <sup>22</sup> Eta tacahehi puiti, yátupihí eta vijacapacarevahi vimutu viti vicasiñavanahi mayehe ema Jesucristo. Ema Viya vahi manerejicaimahi nácarichuhini ena tiúriana. Váhivare máepuruimahi ena achaneana tisipecaturanahi. Eta nacasiñairavahi eta mayehe, majacapavacahi namutu. <sup>23</sup> Taicha yátupihí eta vicapecaturairahi vimutu. Vimutu véchuriaca eta viúrivana, vijacapacaréni me Viya. Nájina émanáinahíni mátupiruhíni. <sup>24</sup> Étasera eta máemunasirahavihi ema Viya, tijapanuhavihi. Tijacapahavihi táichavenehi eta vicasiñairahi ema Machicha Jesucristo. Émapa tivachachinahavihi eta vitapiravana táichavenehi eta vipecaturana. <sup>25-26</sup> Ema Viya, tétavicavahi eta matupiruvairahi. Vahi macamichaimahi ena téjecapavanahi te machacaya. Tásihasesa, tijapanuhavihi. Máijararecahi ema Machicha eta mavachachirahi eta vipecaturana, vímicapacahi éma. Eta vicasiñaira ema Jesucristo, macaepahahi eta véjecapiravanahi vipecaturanahi. Tásiha, vijacapacarehi mayehe ema Viya.

<sup>27-28</sup> Tacahe, puiti visamaripahi eta majacapirahaviripa ema Viya, étachucha tíchahi eta vicasiñairahi ema Jesucristo. Vahi vétupicavahini eta vicasiñavavairisirahi eta vítauchiraipa eta vanairipiana. Váhiquenevare étaparacaina.

<sup>29-30</sup> Vahi ácarichuimahi eti israelítana ejacapacarehi me Viya. Énerichuvare tijacapacareanahi namutu ena apavasanana ticasiñanahi. Tijacapahavihi ema Viya vimutu viti vicasiñavanahi eta mayehe. <sup>31</sup> Váhivare ecuimijacha nútinahipucaini nímitucahe vaipa tasuapacarehini viyehe eta mavanairipiana me Viya. Viti véhicanahi ema Jesús, táitusiava vicarichuhi virataha vítaucha eta mavanairipiana ema Viya. Vahi vínajicaimahi.

## 4

*Vicutiyarehi ema víyarahaini Abraham eta macasiñavairahi mayehe ema Viya*

<sup>1-2</sup> Németeaca etiaríhi eti evarahaipa échajisiha ema viáchucaini Abraham. Evaraha ecunacha eta macaemataneasiranahi ema Viya, ímijachirahi éta

tíchahi eta majacapacarevahi me Viya. Ímijachahivare táuriha eta macasiñavavaisiravapuca éma. Numetacahesera: Eta majacapacarevahi me Viya, vahi étainahini táichahini eta macaemataneasirahi ema Viya. <sup>3</sup> Eta Sagrada Escritura, ani tacahe: “Ema Abraham, tétavicavahi eta macasiñavairahi me Viya. Eta tacahe, tijacapacaréinehi me Viya” tacahepa.

<sup>4-5</sup> Tiuri puiti, viti achaneana, te vicaematanerecahi, tatuparacahi ena vicaemataneyeruanahi eta navachachirahaviyarehi. Vahi tíjaracasichahivianaimahi eta najapanuirahavihini. Émasera ema Viya tijapanuhavihi, tijacapahavihi táichavenehi eta vicasiñavairahi eta mayehe. Vahi étapara-caimahi eta vicaemataneasirahi. <sup>6</sup> Énerichuva ema víyahaini David máechajisihahi eta náuricacarevahi ena ticapecaturarahiana eta majacapiravacahi ema Viya, tájina étaparacaina eta nacaemataneasirahi. <sup>7-8</sup> Ánipa macahehi: “Tétavicavapa eta náuricacarevahi nácani maperdonachaqueneanahi ema Viya eta napecaturanaini, tijacapahavihi tímicitijiricavaínehi tacuijahini véjecapiravainahini” macahepa.

<sup>9</sup> Tacahe, eta juca viúricacarevahi, vahi vácarichu vicituparahahini viti israelítana. Énerichuhivare tatuparacahivare ena apavasanana. Vécharipahi eta majapanuirahi ema Viya ema Abraham. Tacarichuhi eta macasiñavairahi, majacapahi ema Viya. <sup>10-12</sup> Ímijachaipapuca éti, eta majacapacarevahi ema Abraham tásihaquenehi eta macamarcairahi. Numetacahesera: Váhiquene étainahi táichahini eta macamarcairahi éma, taicha te táequenepa eta majacapirahi ema Viya, mapaenumavahi ticamarca ema Abraham. Éta pa tácutiarayarehi eta majacapiraipa ema Viya táichavenehi eta macasiñavairahi. Émara ema achane máinapuiruhi ticasíñavahi me Viya. Puíticha ema Abraham, émapa vicaiyaquenehi vimutu viti vicasiñavanahi me Viya, vijacapacareipa víti apanava. Tacamunui pasera vácuticacahini vicasiñavahini mayehe, viti israelítana étipa eti apavasanana.

*Ema Viya máitauchayare eta máijarasirahaviya eta vícuchihi táichavene eta vicasiñavairahi eta mayehe*

<sup>13</sup> Ema Viya tíjaracavahi eta máijarasirayare ema Abraham énapa ena mámariéqueneana tamutu eta apaquehe, návapairuyare. Máijaracayare táichavenehi eta macasiñavairahi ema Abraham. Vahi étaparacainahini eta masuapirainahini eta vanairipiana. <sup>14</sup> Taicha te tatiarihinahini eta náicuchihi ena títauchanahi eta vanairipiana, tamapurujipapucaini eta vicasiñavairahi, tamapurujipavarepucaini eta máijarasiravahi ema Viya eta majacapirahaviyare. <sup>15</sup> Taicha eta vanairipiana, étachucha támaparaucha eta náicuña ena téjecapavanahi. Tásiha, vimutu vicaicuchiyarehini eta vícuña, taicha vimutu véjecapavahi\*.

<sup>16</sup> Ema Viya, tétavicavahi eta majapanuraivahi. Tásiha, yátupi máitauchayare eta máijarasiravana nayehe namutu ena mámariéqueneana ema Abraham. Vahi nácarichuhini ena téhicanahi eta vanairipiana. Nayeheyareva namutu ena ticasíñavanahivare mayehe, ticutianahi ema Abraham eta macasiñavairahi. Eta tacahe puiti, eta vicaiyairahi vimutu víti ema Abraham te mavahuana ema Viya. <sup>17</sup> Taicha ema Viya, ánipa maicha ema Abraham: “Puiti nunacaviyare píti nacaiyaquenezare ena achaneana te camuriquene avasareana”. Tásiha, ema Abraham, ticasíñavahi muraca me Viya

\* **4:15** Ema Pablo te mayeherepi eta máechajiriruvana, ani macahe: “Te táviha tájina vanairipi, nájinavare ticaviurevahini eta nájecapira tayehe”. Étasera eta macayemaquenehi, ani tacahe: “Tatiarihi eta viviurevahi vimutu, taicha tatiarihi eta vanairipi te tamutu jácani vicaijuhepuca”.



eta máitauchirayare eta máijarasirayare ema machichaya, tayanapane eta mácheruanahi éma, ésupa esu mayena. Taicha ema Viya, tamutuhi máituruequeneha. Ema Abraham ticasiañavahivare eta majacapirayare eta máicuchihi, tayanapane tájinaichaha máimahahini.

<sup>18</sup> Ema Viya mametacavarepa ema Abraham eta macachichairayare, camurianayare ena mámariéqueneanayare. Eta nasimutuvayare, tamutu nacavasayarepahi, camurianayarehi eta návasanaya. Ema Abraham, ticasiañavahi eta táitauchiravayarehi tamutu. Ticuchapavaipa eta máuchusirayare ema machichayarehi. <sup>19-21</sup> Ema Abraham, ichavicaipa éma, cien año eta maháñora. Ésupa esu Sara, ichavicaipavare, macheruhivare. Vaipa náuriahini eta nacachichairayarehi. Váhisera máeñamavahini ema Abraham. Ticasiañavahi muraca eta mayehe ema Viya eta tamutuirahi máituruequeneha eta máitauchirayarehi tamutu eta máijarasiravanahi. Váhivare mapicacarahini. Eta macasiñavairahi, tétavicavahi eta macunachirahi ema Viya. <sup>22</sup> Eta tacahe, ichape eta majacapacarevahi me Viya táichavenehi eta macasiñavairahi muraca.

<sup>23</sup> Tacahe, eta vicaravahaira eta Sagrada Escritura, vímatiequeneha vahi mácarichuhini ema Abraham majacapacarehini me Viya. <sup>24-25</sup> Puiti, víti apanava vijacapacarehi me Viya eta vicasiñavairahi mayehe. Taicha ema Viáquenu Jesucristo táimicapacahi eta vipecaturana. Émasera ema Viya macaechepucahi ema Machicha te máecari apaesa vijacapacareyarehi mayehe vimutu viti vicasiñavanahi mayehe.

## 5

### *Tétavicava eta viúricacarevahi táichavene eta majacapirahavihi ema Viya*

<sup>1</sup> Puítiripa vijacapacareipa me Viya táichavenehi eta vicasiñavairahi eta mayehe. Tásiha, tétavicavaipa viúrivahi eta mayehe. Vaipa vipicacarahini tayehe eta vícuñayarehini, taicha ema vímicuñaruhi ema Viáquenu Jesucristo, macaepaharipa eta vícuñayarehini. <sup>2</sup> Máichavenehi ema Cristo, tétavicavahi eta majapanuirahavihi ema Viya. Tásiha, tijacapahaviripa táichavenehi eta vicasiñavairahi eta mayehe. Tamutu sácheana viúrisamurehi eta vicuchapiraipa eta vijacapirayare eta vícuchihi visiapirayare te majaraivahi ema Viya. <sup>3</sup> Te tatiarihinapuca eta vicatajivairayare, vivapinavachucha eta vicamichirahi taicha tétumechahaviya eta vímiyanirava véhica ema Viáquenu. <sup>4</sup> Táichavenehi eta vímiyanirava véhica, vijacaparipavare eta vitumevayare viratahairayare vicamicha tamutu. Tásiha, eta vicamichirahi tamutu, vicuchapainapa eta táitsivayare vícuchihi. <sup>5</sup> Tájina tímipanererécahavimahi taicha yátupiyarehi eta vijacapirayare eta vícuchihi. Vicasiñavahi mayehe ema Viya taicha tímimatichahaviripa te visamureana eta máemunasirahavihi máichavenehi ema máijarahavihi Espíritu Santo.

<sup>6</sup> Víti, tájina viviyaimahi eta vicuchucuiraváinahini. Émasera ema Cristo, te tiúrihi eta máimairahi, tíjaracavahi tépena víchavenehi víti máurirahanahi, eta macuchucuirahaviya. <sup>7</sup> Váhisera tácuticacahini eta visamureana viti achaneana. Vimutuhi véñama eta vítaresira. Téhesera tatiarahinapucaini eta véñamirainahini mácani achane máetaviuchahi eta máuriva, víjaracavapapucaini vépena eta vicatiuchirainahini éma. <sup>8</sup> Émasera ema Viya, tétavicavahi eta máemunasirahavihi, tayanapane eta vicapecaturarahirichahanéni. Máijararecahisera ema Machicha Jesucristo máepeninahavihi. <sup>9-10</sup> Tásiha puiti, vijacapacareipa me Viya táichavenehi eta vicasiñairahi ema

Jesucristo eta máepeninahavihi. Ichapehinéni eta véjecapiravahi, vimaesenisirahe ema Viya, mavarahahisera éma macaepahayarehini eta vícuñayarehini táichavenehi eta vipecaturana. Eta máepenirahi te crusu ema Machicha, puiti ema Viya tíchuhahavihi vipauchayare éma. Tájina vipicahini eta viávahásiraipa éma. Tásiha puiti, eta vicasiñavairahi eta mayehe, vaipa véñamavahini tayehe eta viúchucuirayare taicha eta máechepusirahi te máecari, eta tímicaecherachahi eta máitupajjiasiravahi eta macuchucuirahaviya. <sup>11</sup> Puiti, tétavicaivaipa eta viúrisamurevahi mayehe ema Viya máichavene ema Viáquenu Jesucristo. Tétavicaivahi eta viúrivahi mayehe.

*Éma Adán tímiaquipaicahavi vimutu. Émasera ema Cristo émapa ticuchucuhahaviyare.*

<sup>12</sup> Tacahe, ema Adán, ema máinapuiruhi achane tiávapaicahi eta juca apaquehe, éma tinacuchahi eta pecatu. Tásiha, táichavenehi eta pecatu, járajapapa eta vépenira, tavachaequenehi eta pecatu, taicha tímirijicahaviripa tayehe eta pecatu. <sup>13</sup> Te tájinaichaha májuchahini ema Moisés eta vanairipiana, tatiarhipahi eta pecatu te juca apaquehe. Étasera tamajinairaichaha eta vanairipiana, vuíchaha nacaviurevahini ena achaneana. <sup>14</sup> Namutusera ena mámariéqueneana ema Adán tépenanapaipahi taicha mámaparaucharipahi eta mapecatura éma, tayanapanepuca eta napecaturana vahi tácutihini eta mamasuapajiraivahi, tayanapanéhivare tájinaichaha eta vanairipi májurehi ema Moisés. Éma Adán, émapa ticaetehahavihi. Te táequenepa, márjapainapa ema apana, émainapa tétupiripanahaviyare. <sup>15-16</sup> Víti, tétavicaivaipahi eta visimutuvahi viti vicaicuñanayarehini tayehe eta ecuñaraqui te yucu infierno, étanaichuhinéni eta máejecapiravahi ema viáchucaini Adán. Émasera ema Viya, ichaperinehi eta majapanuirahavihi vimutu, mavarairahi ticuchucuhahaviyare máichavenehi ema Machicha Jesucristo. Tamuturipahi macaepahahi eta tasimutuqueneana vipecaturana. Tájina tavachaequenehahini. Tájinaavare jácani vicaemataneacaimahi. <sup>17</sup> Étanarichuhinéni eta pecatu máejecapiravahi ema émana achane, émaripa ema viáchucaini Adán. Tiámairijicahaviripasera eta vépeniraya vimutu. Émasera ema Viya tiápajucavaipa eta majapanuirahavihi. Tijacpahaviripa máichavenehi ema émanaquenerichuvare achane, ema Jesucristo. Tijaracahavinavarepa eta arairuyare vítaresirayare vimutu viti vicasiñavanahi eta mayehe.

<sup>18</sup> Eta mapecaturahi ema Adán, yátupi tiámaparáuchahaviripa vimutu eta vicaicuñairaya. Émasera ema Jesucristo, tájina matapiravainahini eta máitaresirahi. Éma, tiámaparáuchahaviripa eta vítaresiraya víti, vijacapacareipa me Viya. <sup>19</sup> Camurihavihi viti tacaerajiruanahi me Viya, táichavenehi eta mamasuapajiraivahi ema émana achane. Puítisera camurihaviripa viti vijacapacareanaripahi me Viya táichavenehi eta masuapajiraivahi ema apana achane Jesús, taicha tájina matapiravainahini eta máitaresirahi.

<sup>20</sup> Te táequenepa eta máejecapirahi ema Adán, ema Viya manaquicahi eta vanairipi. Éta tímítuchahaviyarehi eta tavayuchiravahi eta vipecaturanahi. Puíticha tiápajucavapaipaicha eta pecatu, émasera ema Viya tiápajucavaichucha eta majapanuirahavi. <sup>21</sup> Tacahe, eta pecatu, ichape eta támaparáuchirahavihi tayehe eta vépenira. Étasera eta majapanuirahavi ema Viya tiámaparáuchahaviripahivare eta vijacapacarevahi mayehe. Tásiha, píjaracahavinavarepa eta vítaresiraya máichecuaraquireyare máichavenehi ema Viáquenu Jesucristo.

## 6

*Puiti eta majacapirahavipa ema Viya, vikatuparahapa vitupiruvainapa eta vítaresiraya. Vínajicainapa eta pecatuana.*

<sup>1</sup> Tiuri puiti, németeaca etiarahi eti ímijachaipapuca tiúrihi vímiyanava vicha eta pecatu apaesapuca tácaecherapaipa eta táetaviuchirahi eta majapanuirahavi ema Viya. <sup>2-3</sup> Váhiquenesera táuricahini vímiyanavahini vicha. Taicha tépaharipa eta tapamisirahavini eta pecatu. Nuvaraha vahi ecuemitisica eta ímitucasivanahi. Eta vicaicachasirahi eta víjarasiravahi véhicaya ema Viáquenu Jesucristo, viúrujiacaripa éma. Tásiha, tímicutijiricavaipa vácachanehini eta máepenirahi, vépenahivaréni víti. Vaipa tárataha tipamicahavi eta pecatu. <sup>4</sup> Eta vicaicachasiraipa te une, tímicutijiricavahi vicaecarasihí, vicachanepa ema Cristo eta máepenirahi. Énerichuvare eta viúchusirahi te une, vicutipa éma eta máechepusirahi te máecari. Tanasiripa eta ichasini vítaresira. Tásiha puiti, arairupa eta vítaresirahi taicha máetaviuchirahi ema Viya eta macaemataneasirahavi tacuti eta ichape máitupajijiasiravahi te macaechepucapa ema Machicha. Vaipa táuricahini víchahini eta pecatu.

<sup>5</sup> Taicha eta viúrujasiraipa ema Cristo, vicutiripahi éma eta máepenirahi. Tásiha, étarichu vicaheyarehi víti apanava eta véchepusirayarehi, vicutiyarehi éma eta máitaresirahi, tájina matapiravainahini. Tásiha víti, arairuinapa eta vítaresira. <sup>6</sup> Tacutiquene, eta tamaurivainihi eta ichasini vítaresira tacapecaturaravainihi, tímicutijiricavahi te vicaquenureca. Tétavicavahi eta tacavanarairahavihi, tipamicahavihi eta víchirayarehi eta tamauriqueneana. Puítisera táecarasipa eta ichasi vítaresira, tacutihí eta náecarairaiipa ema Viáquenu Jesús. Vaipa tipamicahavimahi. <sup>7</sup> Taicha mácani achane eta máepeniraipahi, tícheaipahi eta macapecaturairahi. <sup>8-9</sup> Puiti vécharipa eta máechepusirahi te máecari ema Viáquenu Jesucristo, tájinapa tímiapachaimahi máepenahivaréni taicha tájinapa tárataha táimicapacahini. Ene vicahehi víti eta viúrujasirahi ema Cristo. Vécaraipahi eta tamaurivahi eta ichasihí vítaresirahi. Puiti, tamutupa ticaitsivahi. Vicutinapa éma eta vítaresirainapa. <sup>10</sup> Eta máepenirahi ema Cristo, éta tímicapacahi eta vipecaturana. Éma, vaipa tiápechavaimahi tépena. Tamuturipahi. Tásiha, eta máechepusiraipahi, máichecuarquirénapa eta máitaresira te mavaure ema Maiya. <sup>11</sup> Ene ecaheyare éti, écarainapa tamutu eta tapamisirahéni eta epecaturana. Puiti eta ítaresirainapa, macarichu ema Viya ecaematanearya, táichavenehi eta iúrujasirahi ema Viáquenu Jesucristo.

<sup>12-13</sup> Vaipa ecuisapa eta tapamisirahe eta pecatu. Váhivare ecusuapa jácani tajamurachaqueneanahi eta iáqueheana, taicha tétavicavahi eta tamaurivahi eta tajamurachaqueneanahi. Tímicutijiricavainapa épenaquene, vaipa échaimahi eta pecatu. Ítarecainapasera mayehe ema Viya, íjararecainapa eta iáqueheana mayehe. Ísapainapa ema Espíritu Santo tipamicahe eta ecaemataneasiraya ema Viya, eta íchiraya eta táuriqueneana. <sup>14</sup> Eta pecatu, vaipa ticavanarahémahi. Émainapasera puiti ema Viya, tímicatacáhénapa eta íchirahi eta táuriqueneana. Énerichuvare vaipa tácamunuhini eta táipicararesirahe eta vanairipiana apaesa vahi ecuquicha eta tamauriqueneana.

*Ena ticapecaturarahiana tímicutijiricavahi ena ticaquenurecana eta tapamisirahi eta náichirahi eta pecatu*

<sup>15</sup> Puiti, németeaca etiarihi eti ímijachahi tísapacarechaha eta vicapecaturaira taicha vaipa táipicararecahavihini eta vanairipiana. Étiserá, tétavica-vahi eta tájecapiravahi eta epanereruana. Ímipanapa eta majapanu-raivahi ema Viya. Vaipa epicauchahini. <sup>16</sup> Écharichuhi éti, te ímiyanavaya-rechuchapuca eta tapamisirahehi eta pecatuana, ecutirichahapuca mácani ticaquenurecahi, tipamicavayarehi eta masuapirayarehi ema máquenu. Ene ecahehi eta esuapiraichaha eta pecatu. Éta tiámaparáuchahehi eta esiapiraya te yucu infierno. Téheserapuca émainapa esuapaya ema Viya, tatupiruvainapa eta itaresiraya. <sup>17-18</sup> Nuhasulupayachasera ema Viya eta ínajisiraipa eta tapamisirahénihi eta pecatuana. Puiti tatupiruvaipa te esamureana eta esuapirahi eta véhiruhi ímitucasivahi. Puiti íjaracavainapa ecaemataneaca ema Viya, iávácuharipa eta táuriva eta itaresiraya. <sup>19</sup> (Nímicutichinahehi eta juca, taicha vahi máejerarena eta ecaicutiarairaina éta. Nuvaraha yátupina ecaicutiaraya.) Cape eta itaresirahi, étarichaha íjararecahi eta iáquehe tayehe eta tauriqueneana, étaviuchahi eta evainarajivanainihi. Puiti íjararecaya eta iáquehe íchayare eta táuriqueneana, táurivaya eta itaresira. Tacuija tahapapicahé eta ecaemataneasiraya ema Viya.

<sup>20</sup> Taicha cape juca itaresirahi étarichaha tipamicahehi eta epecaturana. Vuíchaha étainahini ecaemataneaca eta táurivaya eta itaresira. <sup>21</sup> Tájinavare ímaequenehahini eta íchirahi eta tauriqueneana. Puítiserá, tétavica-vahi puiti eta etsirihacarevahi tayehe, taicha ímatipa tiámaparáuchahehi eta esiapirayarehini te yucu infierno. <sup>22</sup> Puíti iúchurepa tayehe eta tapamisirahehi eta pecatu. Iávacuhaipa eta ecaemataneasiraya ema Viya. Jéhevere eta iúritaresirayare me Viya, máichecuaraquirenapa eta itaresiraya. <sup>23</sup> Eta víchirahi eta tauriqueneana, tacarichu tiámaparáuchahavi eta visiapirayarehi te yucu infierno. Émasera ema Viya mavaraha tíjaracasichahaviya eta vítaresirayare máichecuaraquireya, te yátupina eta vicasíñairayare mayehe ema Viáquenu Jesucristo.

## 7

*Viti véhicanahi ema Jesucristo, títavaripa eta tapamisirahavihi eta vanairipiana*

<sup>1</sup> Nuparapenaveana, écharichu éti eta yátupirahi tisuapacarehi eta vanairipiana nayehe ena achaneana, étachuchasera te títarecanarichaha. <sup>2-3</sup> Tímicutijiricavahi súcani esena sucachaneyarehi macarichuhi ema suima, vahi sucucaecahi éma, te jácani achanerichaha éma. Te suvehapuca ema apana achane, ticapecaturaipa ésu. Téhesera te tépenaipapuca ema suima, ésupa téchinava. Tísapacare suápechava suácaima mayehe mácani suvarahaqueneayare suímayare. Vahi pecatuina eta suápechiravayare ticaima.

<sup>4</sup> Ene ecahehi eti nuparapenaveana. Ema Cristo, máepeninahehi te crusu, macaepaharipa eta tapamisirahénihi eta vanairipiana. Puiti émapa téchahehi ema Cristo. Ecutiripa esu esena suépenaimaquene te tiápechava ticaima, tásiha apanapa ema téchahi ésu. Puiti mavanaraheripa ema Cristo, ema máechepu-requnehi te máecari. Mavarahahi ichapeyarehi eta ecaemataneasiraina eta mayehe ema Viya. <sup>5</sup> Taicha cape juca itaresiraichaha, esuapahi eta tavarahaqueneana eta iáqueheana. Te esamapa eta vanairipi tiápajucavahi eta evarairahi ícha eta tauriqueneana. Tásiha éta, tiámaparáuchahehi eta ícuchihi eta esiapirayare te yucu infierno. <sup>6</sup> Puítiserá vaipa tapamicahavihini eta vanairipiana. Puiti viúchucurepa eta ichasi vítaresiraini. Émapa

vicaemataneacayare ema Viya taicha tépanavaripa eta arairu vítaesira eta mávahásirahaviripa ema Espíritu Santo.

*Eta viáquehe tichurucavahi eta tavarairahi vicha eta tauriqueneana*

<sup>7</sup> Etiarihipuca eti ímijachahi tipamicahahi eta vanairipiana eta ecapecaturairaya. Váhiquenesera étaina. Vítiripa vahi vímatiequenehavanehini eta taurivahi eta vicapecaturairahi, te vuíchaha vímatihini eta vanairipiana. Vuíchahavare vímatihini eta taurivahi eta vijamurachirana eta apayehe. Eta vanairipi, ani tacahehi: “Vahi picujamuracha eta apayehe”.<sup>8</sup> Téhesera te vímatipa eta juca vanairipi, viápajucavapa vijamuracha tamutu eta vímahaqueneana tájiparacana. Te tacuijahini eta juca vanairipiana, váhirichuhini vicujamurachahini eta apayeheana.<sup>9</sup> Eta viámaperuvaichaha apaicape, vuíchaha vímatihini eta vanairipiana. Téhesera te vímatiequenehapa, visamavapa eta tatiarihipa eta véjcapiravahi eta vimaitauchirahi eta vanairipiana. Tásiha, véchapa eta vépenirayare, tatiarirahi eta vícuchihi eta vícuñayarehi.<sup>10</sup> Tacahe, víti vímijachaipahi viúchucuhayare te vítauchapapuca eta vanairipiana. Tájinachuchasera tájjaracahavihini eta viúchucuirainahini. Étachucha tiámaparáuchahavi tayehe eta vépenirayarehi.<sup>11</sup> Téhesera te amahe eta visamure, jararihi eta pecatu. Tavayuaracahavipaipa, tacamapurairavahi eta tatiarirahi eta vanairipiana, taicha tavaraha táimicacahavi.

<sup>12</sup> Nuvaraha numetacahe: Tiúrihisera eta vanairipi, sántohivare, tatupiruvahivare.<sup>13</sup> Németeacasera etiarahi eti ímijachapuca vahi tiuri eta vanairipi taicha támapiricahi eta vépenirayarehi. Vahi tacucahe eta epanereruana. Numetacahe: Váhiquene étainahini eta vanairipi támaparacahavihini eta vépeniraya. Étarichu eta vicapecaturairahi, etapa tiámaparáuchahavahi eta vépenirayarehi. Étasera eta vanairipi tímereuchahavi eta vimaurivahi víti te visamureana, tétavicavahivare eta vimasuapajiraivahi.

<sup>14</sup> Eta vanairipiana tavarahahinéni tímítupiruchahavi. Étasera eta veche máteji, tavayuararuchi eta tavarairahi víchaya eta tauriqueneana.<sup>15</sup> Taicha víti váhiquene vímatiequeneha tájahapuca eta vícharacavaya. Vahi véhicahini eta vipanerechaquenehi vivarahaquenehi vicha. Tasapihachucha víchahi eta vicatichaquenehi vimavarahaquenehi vicha.<sup>16</sup> Tatupiruvahi eta vanairipiana eta tametasirahavi eta vicaicuñairayare táichavenehi eta vipecaturana. Tásiha, te víchapapuca eta tauriqueneana, visamava te visamure eta taurivahi eta víchirahi, vémechaemachirava eta tametasirahavahi eta vicaicuñairayare.<sup>17</sup> Tatiarihi te viáchaneva eta pecatu. Tásiha, váipanéni vítijiricavahini víchahini eta pecatu. Étasera eta távahásirahavahi te visamure eta pecatu, etapa tipamicahavahi eta víchirayarehi eta tauriqueneana.<sup>18</sup> Véchahivare víti eta taurivainihi eta táitaresiraini eta viáquehe. Tétavicavahi eta tamasuapajiraivainihi. Tímicutijiricavaipa tichururerecavahi. Vivarahahinéni vétupiricavahini, váhiquenesera táisapahavihini eta viáquehe vétupiricavahini.<sup>19</sup> Te vivarahainipa vicha eta táuriqueneana, vahi váratahaimahi vicha. Étachucha víchahi eta tauriqueneana vimavarahaquenehi vicha.<sup>20</sup> Te víchahipuca jácani vimavarahaquenehi vicha, vaipa vítinahini tásihahini eta víchirahi, etapa eta pecatu tipamicahavahi, taicha tiávahácavahi víti.

<sup>21</sup> Te vivarahainipa vicha eta táuriqueneana, tasapihachucha eta pecatu tímiapitavairicavahi tíchejimirauchavahi. Eta tacahehi eta víchavaquenevahi.<sup>22</sup> Étasera eta viáchaneva, tétavicavahinéni eta tajamurachirahi víchahini eta mavarahaqueneanahi ema Viya.<sup>23</sup> Jararihisera eta pecatu te



amahe eta viáquehe. Ichapemurihi eta táehacacairahi tacanarahi eta paure viáchaneva. Tavaraha tíchejimirauchahavi apaesa vahi vicuitauchahini eta mavarahaqueneana ema Viya. Tétavicavahi eta táitiasirahavihi, tímicutijiricavaipa vicaerata.

<sup>24</sup> ¡Tétavicavapa eta véjapanuraivasamihi viti páureana! ¡Tacahehi eta víchararacavahi! Németeaca eta vipanereruanahi víti, ticutimahinepa nájinapa tiratahaimahi ticuchucuhahavi tayehe eta tavayuasirahi eta viáquehe eta pecatu, támirahaviyare tayehe eta vépenira. <sup>25</sup> ¡Mararihiserá ema Viáquenu Jesucristo! ¡Macarichu éma marataha ticuchucuhahavi tayehe eta juca tamauriqueneana! Puítiripa núti, ichape eta nuhasulupayachirahi ema Viya. Tétavicavahi eta nuvapinairavahi eta níchirahi eta mavarahaqueneanahi. Étasera eta ichasiqenetataji náquehe, ticavanaranuichucha tayehe eta pecatu.

## 8

### *Tiúriyarehi eta vítaresira taicha eta mávahásirahavihi ema Espíritu Santo*

<sup>1-4</sup> Puítisera témitiacaripa eta vícuñayarehíni viti viávahácanaipahi ema Cristo Jesús. Eta mávahásirahavihi ema Jesucristo, tiávahácaviripavare ema Espíritu Santo. Émapa, ticaepahahi eta tapamisirahavihi eta pecatu, étapa eta támaparauchirahavihi eta visiapiraya te yucu infierno. Ema Viya, eta máimairahi eta vimaetumechiravahi, vimaratahairahi vítauchahini eta vanairipiana, mavanecapa tiúcupaicahi ema Machicha, macaqueheyarehi eta juca viáquehe viti achaneana. Eta májjarasiravahi, macamitiequenehaipa eta tapamisirahavihi eta viáquehe eta vicapecaturairana. Puiti émainapa téchahaviyare ema Espíritu Santo. Véhicainapa eta mavarahaquenehi. Tásiha vínajicainapa eta visuapirainihi eta tavarahaqueneanainihi eta viáquehe tacapecaturaraivaini. Émapa tétumechahavihi eta vítauchiraya eta mavarahaqueneana ema Viya.

<sup>5</sup> Nácanisera nasuapahi eta tavarahaqueneana eta náquehe, étachucha napanerechahi eta náichiraya eta tamauriqueneana. Vítisera viti visuapanahi eta mavarahaqueneana ema Espíritu Santo étainapa vipanerechaya eta vicurismurechiraya ema Viya. <sup>6</sup> Nácani napanerechahi eta tavarahaqueneana eta náquehe, támaparaucharipa eta nasiapiraya te yucu. Vítisera viti vipanerechanahi eta mavarahaqueneanahi ema Espíritu Santo, viti vítarecayare. Viúrinapa mayehe ema Viya. <sup>7</sup> Nácani napanerechaichucha eta tavarahaqueneana eta náquehe, éna macatianaruanahi ema Viya. Taicha váhiquene návarahaimahi nasuapa eta mavanairipi. <sup>8</sup> Tacahe, éna étachucha nacurismurerechahi eta náquehe, vahi náitucahini nacurismurechahini ema Viya eta mavarahaquenehi.

<sup>9</sup> Puítisera éti, eta mávahásiraheripahi ema Espíritu Santo, vaipa étaimahi epanerecha eta tavarahaqueneanahi eta iáquehe. Étapa epanerechaya eta mavarahaqueneanahi éma. Nácani vahi mávaháruanainahini ema Espíritu Santo, váhivare machaneranainahini ema Cristo. <sup>10</sup> Étisera, eta mávahásiraheripa ema Cristo, tayanapane táicuchirichuhi eta iáquehe eta táepeniraya táichavenehi eta pecatu, étasera eta iáchaneva títarecayarechucha, taicha ejacaparéipahi me Viya. <sup>11</sup> Táichavene eta mávahásiraheripa puiti éti ema Espíritu Santo, ema Viya macaechepucayare eta iáqueheana, tayanapanepuca épenaquenénaripa. Tacutiyarehi eta macaechepusirahi ema Machicha Jesucristo te máecari. Éti iápechavayare ítareca maicha ema Espíritu Santo.

<sup>12</sup> Tacahe, nuparapenaveana, vikatuparahapa eta visuapiraya ema Espíritu Santo. Vaipa étaimahi visuapa eta tavarahaquene eta

viáquehe. <sup>13</sup> Taicha te étachuchapuca esuapa eta tamauriqueneana tavarahaqueneanahi eta iáquehe, tájinapa iúchucuiyaimahi, ecaicuchihi eta épeniraya. Téhesera éhichahi eta mavarahaquenehi ema Espíritu Santo, ínajicayareva eta íchira eta tavarahaqueneanahi eta iáquehe, ejacapainapa eta ícuchihi eta ítaresirainapa.

<sup>14</sup> Taicha vimutuhi viti visuapanahi ema Espíritu Santo, machichahaviripa ema Viya. <sup>15-16</sup> Émaripa ema Espíritu Santo timetacahaviripa eta machichairahaviripa ema Viya. Visamavaipa te amahe eta visamure. Éma, vahi tipamicahémahi. Váhivare típicararecahémahi tayehe eta ícuñayarehini. Tímimatichahénapasera eta yátupirahi macachichairahahi ema Viya. Tásiha, ecasiñavaipa eta mayehe ema Viya, émairaipahi ecaiyaquenehi. “Tátachicha Nucaiyaquene” ecaheyarehi. <sup>17</sup> Eta macachichahaviraipa ema Viya, vijacapainapa eta vícuchihi máijararuhaviya. Vicutinapa ema Cristo eta máijarasirahi eta máicuchihi éma. Puiti, eta vicatajivairahi te juca vítaresirahi, vicutihi ema Cristo eta macatajivairahi, tásiha, vicachanénapa éma tayehe eta mávihahi eta majaraivahi.

<sup>18</sup> Puiti németeacahi núti, tayanapane ichapepuca eta vicatajivairahi puiti juca sácheana, tájinachucha táichavahi taicha jararihiyare eta ichape táitsivayare, vijacapaya eta ichape viúricacarevaya te majaraiva ema Viya. <sup>19</sup> Jéhevare, tétavicavahi eta tajamurachacarevahi te táitecapapa eta sáchevare eta vímairaya eta vicuchapaquenehi eta tacaitsivairaya eta viáquehe vimutu viti machichanaveana ema Viya. <sup>20-22</sup> Tacutiquene te jena sáchevare vicuchapaquenehi, tamutuinaapa témitiacayare eta témecatajivachahavianainihi te juca apaquehe. Tamutuinaapa arairuyare, tétavicavainapa eta táurivaya eta apaquehe. Vímaha puiti ticatajivanahi tamutu te juca apaquehe: Eta sárareana, ticajumanahi, táepenanihi; étapa eta sucurecana. Eta tacatajivairahi tacutihi eta sucatajivaira esu súcani esena ticacatiruhahi eta suínasira. Étasera eta arairuyare apaquehe, ticaitsivainapa tamutu. Vaipa pecatupairemahí, tamicauchainevarepa eta majaraiva ema Viya eta viávihaya viti machichanaveanahi. <sup>23</sup> Ema Espíritu Santo máitsivacharipa eta viáchanevana. Vaipa táesachaimahi vicha eta pecatu. Váipavare víchaimahi eta tamauriqueneana. Tásiha, víti, ichaperipa eta vicuchapiraipaicha eta jena sáchevare eta tacaitsivairayare eta viáqueheana. Títauchavainapa eta macachichairahavinapa ema Viya. Yátupinapa mayehavinapa.

<sup>24-25</sup> Yátupihí puiti eta machichahavirahi ema Viya. Ichapevare eta vicasíñavahi eta mayehe eta vicuchapirahi eta viúchucuirayare te jena sáchevare. Vácamicha tamutu, vímianava eta vicasíñavairahi eta mayehe támutu sácheana. Tapaenumavainapa vímahainapa, tájinapa vicuchapaimahi.

<sup>26</sup> Énerichuvare, ema Espíritu Santo tímicatatahavíhi te tamutu eta vimaratahaqueneanahi. Tavetijí tímicatatahavíhi eta vimaitusirahi eta viyaseuchiravayarehi te viyujarasirana. Éma, tiyaseuchahavi te viáchanevana. Viúmitichahi taicha muraca eta vivarairahi eta mayasearuana. Vaipa virataha véchajicahini. <sup>27</sup> Émasera ema Viya máimatihí eta visamureana jácani vivarahaqueneana viyaseaca, étaripa eta mayasearapi ema Espíritu Santo. Taicha ema Espíritu Santo máimatihí eta mavarahaqueneanahi ema Viya, tásiha tiyaseuchahavíhi viti machaneranahi.

*Éma Viya mavaraha ticachanehaviyare víti te majaraivahi*

<sup>28</sup> Vécharipahivare tétavicavahi eta majaneasirahavíhi ema Viya vimutu viti vémunacanahi éma. Tayanapane vicatajivahipuca, éma tamutuhi tiuri máicha. Títauchavayare eta mapanereruana éma eta viúricacareyarehi

eta máichuirahavihi. <sup>29</sup> Acaneripahi eta máimatirahavihi, tinerejicahavipa machichahaviyarehi. Mavarahahi éma vicutiyare ema Machicha Jesucristo eta máurivahi. Tímicutijiricavayarehi viparapeya éma, véchavimurihi eta macachichairahavihi ema Viya. <sup>30</sup> Tásiha, te máimahapa tiuri, tíchuhahavipa viti manerejiruanahi. Eta visuapirahi vipauchaipa éma, tijacpahavipa. Tásiha, tíjaracahavipa eta vícuchihi eta visiapiraya tayehe eta majaraiva.

*Tájinaquene ticaerajicahavimahi mayehe ema Viya taicha yátupihí eta máemunasirahavihi*

<sup>31</sup> Tásiha puiti, nuvaraha yátupina eta ecaicutiarairaya eta juca: ¡Tétavicavahi eta macatiuchirahavihi ema Viya! Tájina táichava eta nacatianasirahavipuca nácani achaneana. ¡Váhisera nárataha ticapaquechahavianaimahi! <sup>32</sup> Eta majapanuirahavihi ema Viya, vahi mavayuacahini máíjararecapa ema Machicha eta nacapasirahi víchavenehi vimutu víti. Tásiha, mavetijinapa eta macatiuchirahaviyare puiti te tamutu eta jácani víchavaquenevana. <sup>33</sup> Puiti tájinapa viviurevaina táimicuñacahavihini viti manerejiruanahi, taicha ema Viya tépachiacahaviripa eta majacapirahavihi. <sup>34</sup> Tájinaqueneпа támicuñacahavimahi taicha ema Cristo máepeninahaviripa, tichavaripavare títareca. Puíticha téjacahi te mavaure ema Viya, téchajiurucaviripa éma. <sup>35</sup> Ema Cristo, tájinaquene vahi máinajicaimahi eta máemunasirahavihi. Tásiha, yátupina eta vicasiñairaina éma. Tayanapanepuca vicatajivahi, váhivarepuca vicuitucahi vétupirica eta víchavaquenevanahi, vicamichahisera máicha. Te vécuhapuca, te vítajihapuca, vahi vicainajirucahini máicha. Te típicararecahavianapuca, te tipanajiricahavianapuca, te navarahapuca ticapacahaviana, váhiquenesera vicainajiruvahini máicha. <sup>36</sup> Te tamutu eta juca, vicuti ena machanerana ema Viya ena táechajisihaquenenahi acane eta Sagrada Escritura, ani tacahehi: “Tamutu sácheana ena ticatianacanahi ema Viya titanucahavianahi viti machanerana, navaraha ticapacahaviyare. Tivapinavanahi eta nacapasirahavihi, ticuti ena ticaparecanahi eta vaca te náichayare eta ichape piesta”. <sup>37-39</sup> Váhiquenesera vipicaimahi eta náipicararesirahavianahi. Tétavicavahi eta máetumechirahavihi ema Jesucristo táichavenehi eta máemunasirahavihi. Tájinaavare tihapapicahavimahi eta véhisirahi éma. Núti nucasíñava ema Viáquenu eta majaneasirahaviya. Tájinaquene ticaerajicahavimahi eta máemunasirahavihi. Vahi étainapucaini eta vicatajivapuca eta vítaresira, étainapucaini eta vépenira, étainapucaini náipicararesirahavipuca puiti juca vítaresiraichaha, étainahipucaini táimipanerererecahavihíni, jácani víchavaquenevaya eta vítaresiraya. Tájinaquene vahi vipicahini eta tipicacareanahí te juca apaquehe, énainapucaini ena ichapemuriqueneana mayeheana ángele ema Váinaraji, étainahipucaini eta náíñehivanahi. ¡Tájinaquene ticaerajicahavimahi mayehe ema Tata taicha yátupihí eta máemunasirahavihi taicha viávahácahi ema Viáquenu Jesucristo!

## 9

*Ena israelítana, éna manerejiruanahi ema Viya*

<sup>1-3</sup> Nuparapenaveana, tétavicavahi eta némunasirahi ena nujaneanana israelítana. Eta tacahe, ichape eta náimipanerechiranuhi nucatisamurehivare, táichavenehi eta namaehisirahi ema Viáquenu Jesucristo. Táetaviucha eta néñamiravahi eta nayehe, nuvarahainehi níjararecavahini nuyanahini núti te jena yucu, apaesa vahi nacuyanahini éna. Énainahini náurihini éna mayehe ema Cristo. (Núti nutupiruva puiti juca numetasirahehi. Ema Espíritu Santo,

émaripa téchahi tamutu eta nupanereruanahi. Tímisamanuhi eta nétupirisirahi eta numetasirahehi.)<sup>4-5</sup> Tétavicavahi eta náuricacarevayarehini éna, taicha manerejiruanahi ema Viya, máichavenehi ema náchucaequenéni Israel, mavarairahi ema Viya machichanaveanayarehi. Ichapemurihi eta macachaneravacahi, máimechirahi eta majaraiva. Máijaracavaca eta matratune eta majaneasiravacayare. Máimimaticahivare eta mavanairipiana. Máimimaticahivare eta náechajisiraya émachuca te nayujarasirana. Mametacahivare eta máitesirayarehi ema ticatiurahiyare nayehe. Ena nani, tétavicavahi eta táurivahi eta náicuchiyarehini taicha manerejicavacahi ema Viya éna máumurivanarichuhi ema Cristo, najaneanarichuhi eta máucupaisirahi te juca apaquehe. Émasera, Víyahi éma. Puíticha émaripa téchahi tamutu. Máitavacacaipa eta vijirauchirahi. Amén.

<sup>6</sup> Tayanapane eta macatajisiravacahi ichape ema Viya ena nujaneanana israelítana, tamapurujisera, éna namutuyaréni témpururecavana. Vahi návarahahini náehica. Váhiserá étainahini táichahini eta mamaitauchirahi eta matratune ema Viya. Nasapihapa namapuruji namutuyaréni, vahi machichanaveanainahini ema Viya, táichavenehi eta namasuapajiraivanahi.<sup>7-9</sup> Nuvaraha némechahe eta manerejisirahi ema Viya ena apinana machichanaveana ema Abraham. Matiarihíhi ema Ismael, émapa ema Isaac. Ema Viya vahi manerejicahini ema Ismael, máijarasiravacayarehi eta náicuchihi ena mámaríequeneana. Macarichu ema Isaac, manerejiruquenehi ema Viya. Eta mametacasivahi ema Abraham eta me Viya, ani tacahehi: “Puiti juca cájeyare, níjaracaviyare píti ésupa esu Sara ema echichayare, ticaijareyare Isaac. Núti níjaracayare eta máicuchiyarehi ema Isaac, énapa ena mámaríequeneana” macahepa. Puiti nuvaraha ecaicutiaraya eta juca: Ema Viya máimijarechahi “nuchichanaveana” nacarichuhi ena navaraha najacapayare eta náicuchihi, nasuapirahi eta máijarasiravahi nayehe.

<sup>10</sup> Numetacaheyareva eta táicharacavahi eta macachichairahi ema Isaac ésupa esu mayena Rebeca. Chámeanahi ena náinapureanahi nachichanaveana.<sup>11-13</sup> Tacahe, vuíchaha náuchuchahini ena nani amuyana, tájinaichahavare napecaturainahini, táimaticarepahipucaini eta táuriva eta náichaquene. Te tiánehipa eta suínasirayare, ema Viya mametacapa esu Rebeca, ánipa macahe: “Chámeanayarehi ena pichichanaveana. Émasera ema tínapucayare tiúchuca, éma, mósoyare mayehe ema máti”. Éta paichuhi eta macayemaquenehi ema Viya te Sagrada Escritura, ani macahehi: “Némunacahi ema Jacob, máequenereruhi tiúchuca. Émasera ema Esaú, máinapurehi tiúchuca, vahi núrianaca éma” macahepa. Tacahe puiti, vímatiequenehaipahi eta táichararacavahi eta manerejisiravacahi ema Viya, máichuiravacahivare nácani mavarahaqueneana. Vahi étaparacainahini jácani táurivainahini eta náichaqueneana.

<sup>14</sup> Puiti, vahi ecuimijachahini vahi tétupicava ema Viya eta manerejisiravacahi ena achaneana. Váhiquenesera énéna tácahe.<sup>15</sup> Ema Viya mametacahivare ema Moisés, ani macahe: “Núti necha mácani nujapanuquenezare” macahepa.<sup>16</sup> Tacahe, vahi vámutu vácuticaca eta majapanuirahavi ema Viya máichuirahaviyarehi. Éma téchahi eta manerejisiravacahi nácani majapanuqueneana máichuhaqueneanayare. Vahi étainahini eta náimijachiravahi tíchuhacareana taicha eta náurivahíji, napamisirahipuca naicha eta táuriqueneana.<sup>17</sup> Ema Viya ánivare macahehi eta te Sagrada Escritura mayehe ema rey te avasare Egipto: “Núti nunacavihi eta piávacurehi pirreyvayarehi, taicha nímativi eta pimuracasamurevahi. Nuvarahasera núti níimimaticahivare eta tamutuiraahi nurataha nítupajijiasirava, apaesa táimaticare eta

níjare te tamutu eta juca apaquehe” macahepa ema Viya. <sup>18</sup> Tacahe, ema Viya manerejicahi nácani mavarahaqueneanayare máichuha. Máisapahisera ena masuapajirairahana tajurucachuchaini eta namuracasamurevahi.

<sup>19</sup> Németeaca, áninapapuca ecaheyare éti: “Ene tacahe jácani, ¿tájahapuca tacayema eta vicaviurevahi eta mayehe? Taicha vahi véchavahini eta víchirahi eta tauriqueneana. Émarichuhinéni tíchahavihi” ecahénapapuca éti. <sup>20</sup> Vahi tacucahe eta epanereruana. ¿Vahi epicahini iácapaemachirahi ema Viya? Eta cachapare mátejisi vahi táuricaímahi tácapaemachahini súcani tépiyacahi: “¿Tájaha tacayema pímpananajicanu eta pépiyasiranuhi, váhiyapa nuncunachacarehini eta pépiyasiranuhi?” vahi táichaimahi. <sup>21</sup> Esu típuarecarahi, ésu téchinavahi jácani táimahanayare eta suípune, suíchayarehi eta suícarahiyare, tásiha suépiyacavare eta suyehe vásenilla, tacahehi eta suvarahaquenehi.

<sup>22</sup> Tatuparacahi ema Viya máicuñacavaneya namutu ena achaneana váinarajiqueneana, máimitaequenehavacavane éna. Tatuparacahivare máimerecavane eta máitupajijiasirava étapa eta masemirahi tayehe eta namaurivahi. Tétavicavahisera eta macayehevahi paciencia. <sup>23</sup> Víti apana, ene tacahehi eta táetaviuchirahi eta majapanuirahavihi, máimerecahi eta táichapeva eta macunachacareva. Acaneripahi eta manerejisirahavihi eta vicachaneraya éma tayehe eta majaraiva. <sup>24</sup> Vahi vácarichuhini viti israelítana manerejiruhavihi; énerichuhi eti apavasanana manerejiruhehivare. <sup>25-26</sup> Eta Sagrada Escritura májurehi ema víyarahaini Oseas, eta máechajiriruva ema Viya, ema yátupiquenehi eta macasiñacarevahi, ani macahehi: “Núti nunerejicayare níchuhavacayare ena ichapemuriqueneana ena achaneana apavasanana. Tayanapane vahi náesenicanuhini cape eta náitaresirahi, tijacapacareanahisera nuyehe. Ichape eta némunasiravacayare taicha nuchichanaveanayarehi éna” macahepa. <sup>27</sup> Énaserá ena nujaneanana israelítana, ánimurianarichuhi ena tisuapanahi eta máichuarapi ema Viya. Nacuti éna ánimuriqueneana náechajisihahi ema víyarahaini profeta Isaías, ani macahehi: “Tétavicavahinéni visimutuva viti israelítana, ánimurihavirichuchasera viti viúchucuhanayare. <sup>28</sup> Ema Viya, vaipa macamichaimahi eta náejecapiravanahi ena achaneana. Tíjahúchavayarepa eta máicuñasirayare eta apaquehe. Máijahúchayarehi máitaequeneha tamutu”. <sup>29</sup> Ánivare macahehi ema Isaías: “Muracarinehi eta náquipaisirahi eta viávasa. Te tacuijahini eta majapanuirahavihi ema Viya viti vinerejiruanahi véhica éma, vítaequenehini vimutu. Nájina nánasihini te viávasa. Vicutiyaréni ena ticavasanahi te Sodoma, énapa te Gomorra, máitaequeneruanahi ema Viya, ema tétavicava eta máitupajijiasirava, máituruequenehahi tamutu” macahepa ema Isaías.

### *Ena israelítana, vahi návaraha náehica ema Jesucristo*

<sup>30</sup> Nuvaraha numetacahe eta juca, apaesa écha. Ena apavasanana nasapihahi tijacapacareanahi me Viya, váhinéni náesenicahini éma cape eta náitaresirahi. Tacarichusera puiti, táichavenehi eta nacasiñavairahi eta mayehe, tijacapacareanaripahi éna. <sup>31</sup> Énaserá ena nujaneanana, tímijachavanahi tijacapacareanayarehi me Viya táichavenehi eta navarairahi náehica eta vanairipiana. Váhisera najacapacarehini. <sup>32</sup> Taicha éna, náemepururecahi eta najacapacarevayarehini me Viya. Vahi návarahahini nacasiñavahini mayehe ema Machicha Jesús. Éna tímijachavanahi étachucha nacunachivahi



tayehe eta náitauchirahi eta navanesiracacanahi. Eta tiviuchahi eta nacatiasirahi muracaquenehi ema Viáquenu Jesús, vahi návarahahini nacasiñavahini eta mayehe. <sup>33</sup> Ema Viya, eta máechajiriruvana eta Sagrada Escritura, ani macahehi: “Puiti névatacaya ema Nuchicha Cristo nayehe ena israelítana. Nímahaya nájahapuca ticatianacanaya éma, énapa ena ticasiñavanayare eta mayehe. Nácani ticatianacanapuca, énajivayare ticamitiequenehavanayare, ticaicuñanayareva táicha. Nácanisera ticasiñavanayare eta mayehe ema nuvaneruyare, vahi máinajiacavacaimahi” macahepa ema Viya.

## 10

<sup>1</sup> Nuparapenaveana, tétavicavahi eta néñamiravahi nayehe ena nujaneana israelítana. Eta nuyaseserepi me Viya te nuyujarasirana, nuvarahahi náuchucuhahini. <sup>2-3</sup> Nucunachavacahi éna eta náetaviuchirahi eta napicau-chirahi ema Viya. Téjcapavanahisera éna eta táichararacavahi eta vijacapacareva me Viya. Éna, tímiuriacavanahi tiúrianahi, tímijachavanahi tijacapacareanahi me Viya táichavenehi eta náitauchirahíji eta vanairipiana. Vuíchaha náimatihini eta táichararacavayarehi eta najacapacareva eta nacasiñavairaya me Viya. Váhivare návarahahini nasuapahini. <sup>4</sup> Taicha ema Cristo macaepaharipa eta tasuapacarevahi eta viyehe eta mavanairipiana ema Moisés. Vaipa étaparacaina eta viúchucuiraya. Tacarichu eta vicasiñavairahi mayehe éma, vijacapacareyare me Viya.

<sup>5</sup> Émarichuhi ema Moisés, muracahi eta matuparasirahi ena achaneana, ánipa macahe: “Éti, tapamiruanahi eta ítauchirayarehi tamutu eta vanairipiana. Te yátupipuca ítauchahi tamutu sácheana, te tájinapuca eta éjcapiravainahi, tásiha ejacapacarenapa me Viya” macahepa. Nájinasera náratahahini náitauchahini eta vanairipiana. <sup>6-8</sup> Máejerarepanasera eta vijacapacarevahi me Viya táichavenehi eta vicasiñavaira eta mayehe. Vahi tácomesahini vitanupanahini ema Cristo te anuma, taicha tiúcupauchahaviripa éma. Váhivare tácomesahini vitanupanahini te máecari vicaechepupanahini éma, taicha téchepucaripahi éma. Tacamunuhisera eta vicasiñavairaina mayehe ema Cristo te visamureana. Eta vipiarasiraina eta máijare eta víjarasirava eta véhisirayare éma.

Tásiha núti, eta nucametarairuirahi, néchajisiha étachucha eta arairu véhiruhi eta majacapirahavihi ema Viya viti vicasiñavanahi eta mayehe. <sup>9-10</sup> Eta juca eta nímiturapi: Eta viúchucuiraya viti achaneana, tacamunuhi eta visuapiraina ema Viya eta macaechepusirahi ema Machicha te máecari. Éma, macaepahayare eta vipecaturana, te yátupina eta vicasiñavairahi te visamure ema Jesucristo. Tacamunuhivare yátupina eta víjarasiravahi véhica éma. Víchayarehi éma: “Núti níjaracavahi néhicavi, Tata Jesús. Pítipa náquenuvihi, péchanupa píti” vicahenapa.

<sup>11</sup> Eta Sagrada Escritura, ani tacahehi: “Nácani ticasiñavanayare mayehe ema nuvaneruyare, tájina náichiraváimahi. Tamutu tiúriyare eta náitaresira”. <sup>12</sup> Ema Viya, vahi máepuruimahi nácani ticasiñavanahi mayehe. Ticuticayarehi eta majacapiravaca ena israelítana énapa ena apavasanana, taicha émaichuhi ema Viáquenuhi vimutu. Tétavicava eta majapanuirahavihi, ticuchucuhaviya vimutu viti vicasiñavanahi mayehe. <sup>13</sup> Taicha ánivare tacahehi eta Sagrada Escritura: “Ema Viáquenu macuchucuhavacayare namutu nácani tipiaracanahi eta máijare táichavenehi eta nacasiñavairahi mayehe” tacahepa.

<sup>14</sup> Tásiha, eta náuchucuhairayare, tacamunu napiaracaya eta máijare ema Viáquenu táichavenehi eta nacasiñavaira mayehe. Táurivaina eta nasamirahi eta náimitucasivana. Tacahe, tacamunuhivare eta viyana vipaicayare viti

te tamutu avasareana eta vicametarairuiraya nayehe éna. <sup>15</sup> Émaripa ema Viáquenu, ichape eta máichuhairahavihi viti visuapajirahiana, mavaraha eta vicametarairuirayare. Títauchavayare eta tacayemaquene eta Sagrada Escritura, ani tacahehi: “Tétavicavahi eta náurisamurevana ena achaneana eta nasamirahi eta táuriquenehi máichuarapi ema Viya eta majacapiravacaya. Tásiha tiúriyare eta majacapirahavihi viti mavaneruana ema Viya” tacahepa.

<sup>16</sup> Váhisera námutihini nasuapahini eta juca arairuhi véhiruhi vímitucaquenehi. Ema Isaías, ani macahehi te Sagrada Escritura: “Tata Náquenu, ánimurianarichu ena tisuapanahi eta juca nímiturapiana nuvanahiana piyehe” macahepa. <sup>17</sup> Téhesera te táurihini nasama ena achaneana eta vímiturapiana mayehe ema Cristo, titupiruvanayarehi ticasiñavana mayehe.

<sup>18-19</sup> Esamanuchaha. Ena nujaneanana israelítana, tájina naviyahini nayunaca eta namacasiñavairahini mayehe ema Cristo. Nasamapa eta máechajiriruvana ema Viya, taicha te tamutu avasareana tisamacarepaipa. Eta Sagrada Escritura, ani tacahehi: “Tamuturipahi te juca apaquehe ticasamahui. Eta máechajiriruva ema Viya tamuturipahivare tacaitatapahihi te juca taquiñacucujiana te apaquehe” tacahepa. Náimatipavare. Váhivare návarahahini nasuapa. Eta máechajiriruvanahi ema Viya májurehi ema Moisés, ani macahehi: “Ímaha, eti israelítana. Nasapihaya nujacapavacayare nuti ena apamuriana achaneana, énaripa ena máesenicanurahanahi. Nuvaraha etsirihaini éti, éneuchavayare eta nuyehe” macahepa. <sup>20</sup> Jararihivare eta apana máechajiriruvahi, májurehi ema víyahaini Isaías, ani macahehi: “Núti nímercavaipa nayehe ena nani váhiquenehi náesenicanuhini, váhivare nacayaseseruruhini”. <sup>21</sup> Ánivare macahe ema Viya: “Tamutuhi sácheana eta níchuiravacahi ena nani israelítana. Tétavicavahisera eta namasuapajiraivahi. Vahi návarahahini nachavahini eta nuyehe” macahepa.

## 11

*Ánimurianarichu ena israelítana ena tisuapajirahianahi, macuchucureanayare ema Viya*

<sup>1</sup> Esamanuchaha. Nuvaraha vahi ecuimijachaimahi macaerajicavacahipuca ema Viya ena machanerana israelítana. ¡Váhiquene énéna tácahe! Éti ímatinuhi nútirichuhi israelítanuhi, mámariéquenenuhivare ema Abraham, émapa ema apanavare náchuca Benjamín. <sup>2</sup> Eta acane, tétavicavahi eta máemunasirahavihi ema Viya viti israelítana. Puíticha vahi máinajiacahavihini. Échava éti eta tacayemahi eta Sagrada Escritura eta máichavaquenevahi ema víyahaini profeta Elías. Ani tacahehi eta mametauresiravahi me Viya eta mayujarasirahi: <sup>3</sup> “Tátachicha Nucaiyaquene, ena nani apamuriana nujaneanana israelítana nacapapajicavacahi namutu ena piyeheana profetana nuchamuriana. Puiti navarahahivare ticapacanuana. Navetataicai-pavare eta pipena. Nucarinehi núti nítarecahi puiti” macahepa. <sup>4</sup> Tásiha, ema Viya majicapapa, ánipa macahe: “Vahi picarichuhini píti. Nararihi siete mil ena ajairana nujanearuanahi, ticasiñanuanahi. Vahi náisapavahini éna náepuyumirauchahini ema nasiñaraji Baál ena masuapajirairahanatatajiji” macahepa ema Viya. <sup>5</sup> Ene vicahehi víti, vahi vámutuhini viti israelítana masuapajirairahanahi me Viya. Vitiarihichaha ánimuriahavihi viti manerejiruanahi majapanuquenehavihi. <sup>6</sup> Numetacahe: Ema Viya, eta majapanuirahavihi viti israelítana, váhiquene táichavenénahini jácani víchirainahipucaini eta táuriqueneana. Jéhesare, tijapanuhavihi táichavenehi eta táetaviuchirahi eta máemunasirahavihi. Tájina étaparacaina eta víchirapuca eta táuriqueneana.

<sup>7</sup> Tacahe, vímaha puiti ena nujaneanana, ánimurianarichuhi ena ticasiañavanahi me Cristo, manerejiruanahi majacapaqueneanahi. Énasamisera ena apamuriana, vahi nacasiñavahini mayehe, muracanaichucha te nasamureana. Étapa tiviuchahi vahi tijacapacareanaimahi me Viya, tayanapane nácani navarahahi. <sup>8</sup> Títauchavapahi eta táechajiruvahi eta Sagrada Escritura eta nayehe. Émarichuhi ema Viya ticamitisicavacahi apaesa vahi nacucaicutiara eta máimiturapiana ema Cristo. Puíticha ene nacahehi. <sup>9</sup> Ema víyarahaini David, ánivare macahehi tayehe eta Sagrada Escritura: “Ena nani, ticasiañavavaicana eta tavayuchirahi eta náimahaqueneana. Ichapemurihi eta nacapiestarairana náenisiracacana. Ichapevaresera eta náichirahi eta tamauriqueneana. Puiti, Tátachicha, pítsivachayare eta náurisamurevahi. Járájpainapa eta pícuñasiravacayare. <sup>10</sup> Nuvaraha púchuquianaina pícha. Vahi nacucaicutiara eta náitaresira. Tacaetipapaicainapa eta tajitacareva eta napisirahi. Tájina nanarasiraimahi” macahehi ema David.

*Eta majacapirahi ema Viya ena apanapanenejiqueneana*

<sup>11</sup> Esamanuchaha. Nuvaraha vahi ecuímijacha tanasiyarehi eta náquipaisirahi ena nujaneanana. ¡Váhiquene énéna tácahe! Puítisera nasapiha ena apavasanana najacapacarehi me Viya, taicha mavaraha máimicatsiriacavaca ena israelítana, apaesa náeneuchavayare eta mayehe. <sup>12</sup> Puiti tijacapacareanahi me Viya namuturipa ena apanapanenejiqueneana achaneana te juca apaquehe, taicha eta náquipaisiravaipa ena nujaneanana. Puiti eti apavasanana, tétavicavahi eta iúricacarevaipa. Jéhesare tiápajucavapanayaresera eta iúricacarevaya éti, étapa eta náuricacarevayare éna, te nachavapa náeneuchava.

<sup>13</sup> Németeaca ímatinuhi núti eta nucatuparahairapa eta nímitusiraheyare eti apavasanana. Táitusiava puiti tétavicavahi eta nucunachiravahi eta nucaemataneasirahehi. <sup>14</sup> Numetacavacahi ena nujaneanana eta yátupirahi eta ejacapacareirahi me Viya, apaesa nímahahini éna, te najamurachayarpuca eta najacapacarevahi éna apanava, ticutiheanayarepuca éti. Nuvaraha nanerejicavahini nácani náeneuchavahini, apaesa náuchucuhayare. <sup>15</sup> Páureanasami éna eta náquipaisirahi. Esapihahi éti apanapanenejiqueneana te juca apaquehe, tétavicavahi táuriva eta ejacapacarevahi me Viya. Jéhesaresera, tétavicavapaini eta tajaraivainahini te visamure te nachavirainahini, náeneuchavapaini éna, náehicapaini ema Cristo. Tímicutijiricavapaini eta navayuchirahi eta náurisamureva ena achaneana te macaechepusiravacaya namutu ena náepenaqueneana tiúrianahi. <sup>16</sup> Eta natiarahirapa puiti ena nujaneanana tinerejicavanahi téhicana ema Cristo, németeaca namutuyare jácani náehicayare ena apamuriana.

Tacutiquene, viti machaneranahi ema Viya vicuti eta ichape yucuqui. Ema Abraham macutihi eta táquehequi. Viti israelítana mámariéqueneanaini vicutihi eta tatavavajiana. Ema viáchucaini majacapaqueneripa ema Viya. Tásiha, németeaca namutuyaréni ena nujaneanana, énerichuvare náeneuchavapapucaini nacasiñavahini me Viya te jácani sácheyare, apaesa najacapacarevarepaini éna apanava. <sup>17</sup> Puiti ena nujaneanana náquipairuvahi, vuíchaha nasiapahini eta náicuchihi te namuri ena machaneranahi ema Viya. Étipa eti apavasanana, esapihaipa machaneraheripa ema Viya. Tíjaraca heripa éma eta táuricacarequene iávihayarehini te majaraivahi eta náicuchinihi ena israelítana. <sup>18</sup> Puiti étipavaipahi machanerahehi ema Viya. Nutuparacahesera, vahi ecucasiñavavaica eta ítujsiravahi esiapa tayehe eta náicuchihi ena nujaneanana israelítana. Taicha vahi eachuriacavacaimahi éna eta

iúrivahinéni eta ejacapacarevahi me Viya. Vahi ecuemitisica eta esiapi-rahi táichahi eta náquipaisiravahi ena masuapajirairahana. Éti máetumecha-queneana ema Viya; vahi étina étumechahini éma.

<sup>19</sup> Váhivaresera ecupanerecha te esamureana: “Yátupi éna máquijicavacahi ema Viya eta namasuapajiraivahi. Tásiha, tinerejicahavipa víti, taicha viúripanahi víti eta máimairahavihi ema Viya” váhinéni tácahehine eta epanereru. <sup>20</sup> Tacahe, échapava éti apanava, machu ácutiriana ena nujaneanana. Éna, eta náquipaisiravahi tímicutijiricahi ticaechuanahi, táichavenehi eta namacasiñavairahi me Viya. Puiti étipa náitsivahi éna eta ecasiñavairahi mayehe. Váhisera ecucasiñavavaica. Ecuneuchava éti apanava. Epicaucha ema Viya. <sup>21</sup> Ena nujaneanana israelítana, éna títapucanayarehíni nasiapamuriha ena machanerana ema Viya. Váhisera nacasiñavahine eta mayehe. Éti apanava, tacamunuhivare ecasiñava eta mayehe apaesa esiapahine. <sup>22</sup> Tacahe, ticaecheravapa eta máurivahi ema Viya, étapa eta matupiruvahi. Tétavicavahi eta matupiruvairahi eta náerajisiravacahi ena masuapajirairahana. Tétavicavahivare eta máurivahi eta eyehe, eta ímiyaniravahi eta ecasiñavairahi eta máurivahi. Nácanisera vahi nacasiñaimahi, macaerajicavacayare. <sup>23</sup> Tiuri puiti, te náeneuchavapuca me Viya ena nujaneanana, nacasiñavahivarepuca mayehe, éma majacapavacayarehi éna, machichanaveanavarepa. Taicha éma, tétavicavahi eta majapanuirahi. <sup>24</sup> Taicha éti cape juca eta itaresira, énerichuvare masuapajirairahehi éti, emaesisirahi ema Viya, tásiha, tájinahinéni ejacapacarevainahine. Esapihasera éti esiapamuriharipa ena apamuriana machanerana ema Viya. Ene nacaheyarehi ena israelítana. Éna, te náesenicapa ema Viya, camuriqueneanayarehi ena ticasiñavanaya mayehe. Tisiapanayareva tayehe eta náicuchihi.

*Te namutupa ena apavasanana manerejiruanahi ema Viya, tapaenumavainapa náesenicayare ema Viya ena israelítana*

<sup>25</sup> Tiuri puiti, nuparapenaveana, vahi nuvaraha ecasiñavavaica eta ítupajijiasirava. Tásiha, nuvaraha numetacahe eta juca tayumururevainihi, máimimatichaquenénuhisera ema Viya. Eta namuracasamurevavacahi ena nujaneanana, vahi tánasimahi. Téhesera námutupa nasiapa ena apavasanana manerejiruanahi ema Viya, napaenumavainapa ena nujaneanana náesenicayare ema Viya. <sup>26</sup> Tacahe, eta nacasiñavaira me Viya, tiúchuchuanayare namutu éna. Títauchavayare eta máechajiriruvahi ema Viya te Sagrada Escritura, ani macahehi: “Nuvanecayare ema Ticatiurahiyare nayehe ena achaneana. Ticavacureyarehi te Jerusalén. Masipahacavacayare ena majaneanana israelítana eta navainarajivana, máitsivachirayareva eta náitare-sirana. <sup>27</sup> Núti nítauchayare eta nutratunehi nayehe eta népachiasiravacayare namutu eta napecaturana” macahepa.

<sup>28</sup> Tacahe, ena nujaneanana nacatianacapa puiti eta juca véhiruhi. Étasarepa ítujisiavayare éti. Émasera ema Viya máemunacavacarichucha, taicha manerejiruanahi ena náchucanaveanaini. <sup>29</sup> Taicha ema Viya, tamutu eta máijararuanahi, vahi máemepururecaimahi. Máítauchayarehiva tamutu eta máichuarapiana. <sup>30</sup> Éti acane eta itaresirana, vahi ávarahahine esuapahine ema Viya. Puítisera eta namasuapajiraivahi ena israelítana, ichaperipahi eta majapanuirahine éma. <sup>31</sup> Énerichuvare éna, te jena sácheyare, majapanuvacayarehi éna, tacuti eta majapanuirahine éti puiti. <sup>32</sup> Taicha ema Viya máimatihine eta emutuirahi emasuapajiraivahi éti apavasanana, vítipa víti israelítana. Mavarahasera vicuticacayarehi eta majapanuirahavihi vimutu.

<sup>33</sup> Ema Viya, ¡tétavicavahi eta majapanuraivahi eta viyehe, tavayuchahi eta viúricacarevahi máicha! ¡Tétavicavahivare eta máitupajijiasiravahi! ¡Tétavicavahivare eta macachuriasirahavihi eta máimatiequenehairahi tamutu! ¡Matupiruvahi éma tamutu eta manerejirisirahi! ¡Vahi víturuequenehaimahi vicaicutiara eta mapanereruana! <sup>34</sup> Taicha nájina tímatiequenehaimahi eta mapanereruana. Nájinavare náimitucahini éma. <sup>35</sup> Nájinavare náijaracasi-chahini tájaháinahipucáini, étanainahipucáini máitsirijicavacahipucaini eta máijarasirahi éma. <sup>36</sup> Taicha tamutu eta tatiarihiqueneanahi, tacarichu tásiha-queneanahi mayehe, étaripa eta víjararuanahi mayehe, mavaraha táitauchavapaini eta mapanereruanahi táuriqueneanahi. ¡Máitavacacahi eta vicunachirahi éma! Amén.

## 12

### *Vicatuparahahi yátupina víjaracava eta véhisira ema Viya*

<sup>1</sup> Tacahe, nuparapenaveana, nuvaraha ácaicutiara yátupina eta majapanuirahahi ema Viya. Eta táetaviuchirahi eta majapanuirahahi, ecaturarahahi íjaracava yátupina eta iáqueheana étapa eta iáchanevana eta éhisiraina émainachucha ema Jesucristo. Tacutihi eta iámavahuhi me Viya. Jéhesare, tétavicavaya eta ecurisamurechiraya éma tayehe tamutu eta ecaemataneasirana éma. <sup>2</sup> Énerichuvare eta itaresirana, vaipa ecuehica eta tayaherepi eta juca apaquehe. Ítsivachapasera eta epanereruana, apaesa támutupa apanainahi eta itaresiraina. Tásiha, ímatisarepa eta mavarahaqueneanahi ema Viya, ítucayareva icha eta táuriqueneana. Ecurisamurechayare éma eta íchira eta tatupiruvaqueneanahi.

<sup>3</sup> Núti mayehenuhi apóstole ema Viya. Tituparacanuhi numetacaheyare: Emutu éti, tátupiruva eta epanereruana tayehe eta ítucaqueneana máijararuheanahi ema Viya, apaesa tauri eta ecaemataneasiraina mayehe. Nacuija nacasiñavavaica. <sup>4</sup> Tacutihi eta viáquehe viti achaneana. Camurianahi eta táunavanahi, táematanepachuhivare. Vahi étainarichuhini eta táitucaqueneanahi. <sup>5</sup> Ene vicahehi víti. Camuriahavihi, étanaichuhisera eta viáquehehi eta viúrujasiracacahi eta véhisirahi ema Cristo, vímicatacaciairahi eta vicaemataneasirahi éma.

<sup>6</sup> Ema Viya, apanapanenejihi eta vítucaqueneana eta máijarasirahavihi eta vématanepachuyarehi máicha. Tacamunuhisera vahi vicuemepururecava eta vítucaqueneanahi máijararuhavianahi, apaesa táuri eta vicaemataneasiraya. Te tíjaracahavipuca éma eta vítusirayare vicametarairu, vijaneacavainapa, machu vihapapiricahini eta táimiturapiana eta véhiruhi. <sup>7</sup> Te tíjaracahavipuca eta vítusirayare vímicataca ena vichamuriana, tatupiruvayarehi te visamure eta vímicatasiravacaya. Nácani náitucahi tímiturecana, vahi nayacujimahi eta náimituresiraya. <sup>8</sup> Nácani náituruequenehahi eta náetumechiraya nácani apana, váhivare nayacujimahi. Nácani tíjaracasírecanahi eta náimahaqueneana, tátupiruvayarehi te nasamure eta nacajirahi ena ticamunuvanahi. Nácani cátiparahanahi téchapajiricarahianayare, tivapinavanayare eta náitauchirahi eta natuparacasivahi. Nácani tímicatacanahi ena tijapanucareanahi, tiúrisamureanaya eta náimicataresirahi.

*Eta viúrivahi nayehe ena achaneana ticaecherayare eta yátupirahi eta véhisirahi ema Viáquenu Jesucristo*

<sup>9</sup> Nuparapenaveana, yátupina eta émunasiracacaina ena echamuriana. Vahi apimirahemahi, ímijachava eta émunasiracaca. Evapinavaya eta íchira eta táuriqueneana. Épuruyare eta tamauriqueneana. <sup>10</sup> Tiápajucavainapa eta émunajirisiracacaina eta echamuricacairahi. Ecunachainapa namutu



ena echamuriana. Yátupina eta epicauchiracacahi. <sup>11</sup> Étumechavaina eta ecaemataneasirahi ema Viáquenu. Tavapinava eta esamureana. Tacuija eplujuvavacaina.

<sup>12</sup> Íúrisamurereacavayare eta ejacapiraya eta ecuchapaquenehi. Ecayehyare paciencia tayehe eta ecatajivairana. Vahi tacuechuquiha eta eyujarasirana.

<sup>13</sup> Ímicatajiricaca ena echamuriana, tayehe eta nacamunuiravana. Tiúriyare eta ejacapiracaca te epaipiuchacaca.

<sup>14</sup> Te natiarihinapuca nácani náehahe, napanajiricahepuca, eJapanuyare éna. Eyaseuchaya me Viya eta náuricacarevaina. Váhisera ecuyaseucha jácani náicuñavanéna.

<sup>15</sup> Te tatiarihinapuca jácani tiúrisamurecare nayehe nácani, éti apanava iúrisamureyareva. Téhesera te tatiarihinapuca eta ticatisamurecarehi nayehe nácani, eJapanuvacayare éna, íyahayareva éti apana.

<sup>16</sup> Ecurisamurechacacaya ena echamuriana. Vahi ecucasiñavavairica. Ácuticacahi nayehe ena mánsuanahi, váhivare ecucasiñava eta ítusirahi.

<sup>17</sup> Te tatiarihinapuca náicharacahe eta nacatichirahe, vahi ecuitsicava. Íchayaresera eta jácani táuriqueneanahi nayehe namutu ena achaneana.

<sup>18</sup> Nacuija ecucaticha. Te natiarihinapuca nactianacahe eyanauchayare te napena émemunacavayare apaesa vaipa nacucatichahe. <sup>19</sup> Némunarqueneana, te tájahapuca náicharacahe, vahi ecuitsicava. Cápachi mararíhi ema Viya, máimahainepa éma téchayare eta náicuñayare. Taicha ema Viáquenu, ani macahehi tayehe eta Sagrada Escritura: “Nímahainepa núti eta táitsivayare. Núti néchahi eta náicuñayare ena ticaviurevanahi eyehe” macahepa. <sup>20</sup> Ánivare macahe éma: “Te pímaha máecuhapahi mácani ticatiana-cavihi, pénicayare. Te mamaunepahipuca, pésichayare. Eta máimairainahi eta pémunasirahi, ticatisamurevainapa titsirihainapa” macahepa. <sup>21</sup> Vahi ecuisapava ítsicava eta náichiraheya te táíñehiqueneana. Étumechavasera eta íchiraya eta táuriqueneana. Éta ticaepahayare eta nasemaneva.

## 13

<sup>1</sup> Éti, emutu esuapajirahiyare nayehe ena tuparairucana, taicha éna manacaqueneanahi ema Viya eta návacureanahi. Nájina émanaina máemunasiricavahini. <sup>2</sup> Eta tacahe, nácani tiácapauchavanahi nayehe ena tuparairucana, tímicutijiricavahi nácapaemachahivare ema Viya. Jéhesare, ticaicuñanayarehi ena téjecapavanaripahi. <sup>3</sup> Taicha ena tuparairucana, vahi étaina tímica-cavacahi éna eta náipicararesiraya nácani tíchanahi eta táuriqueneana. Nácanisera ticaviurevanahi, táuricahi tipicanayarehi. Te evarahahipuca iúri nayehe, esuapajirahiya nayehe, tásiha, éna ticunachaheanainapa. <sup>4</sup> Taicha ema Viya, émahi macaejacavaca te návacureanahi, náurichayarehi ena achaneana. Téhesera ecaviurevahi, epicayarehi taicha éna vahi támapurujimahi eta nacatuparahairahi. Natuparacasivahi me Viya eta náicuñasirayare ena ticaviurevana. <sup>5</sup> Eta tacahe, tavarahaichu esuapajirahiyare nayehe ena tuparairucana, apaesa vahi nacuicuñacahe. Tavetijipa esuapajirahiyare taicha éti etuparacasivahi me Viya. <sup>6</sup> Tacutiquene tatuparacahehi eta evachachirayare eta impuesto. Taicha ena tuparairucana, natuparacasi-vaichuhi mayehe ema Viya, náitauchiraya eta nacaemataneasira éma.

<sup>7</sup> Tásiha, ítaurahiyare te jácani nayaseasiraheana eta cuota éta eta nayaseasiraheana eta impuesto. Epicauchavare nácani típicauchacareanahi. Émunacavare nácani témunacacareanahi. <sup>8</sup> Nacuija ecantevéya. Tituparacahe evachachavaneyare jácani entévehi nayehe. Tituparacahehare

émunacacayare ena echamuriana. Nácani títauchanahi eta juca náemunasira, náitauchahi eta mavanairipi ema Viya. <sup>9-10</sup> Te pémunarahihi píti nayehe ena achaneana piparaepiyanahi ticutiyarehi eta pémunasiravahi píti, vahi pipanerechaimahi picapinaru, váhivare picaparecaimahi, váhivare piámerecaimahi, váhivare pivehaimahi esu apana esena mayena ema apana achane, váhivare pépiyaequenerecaimahi. Taicha nácani témunarahianahi, vahi nacaetemaimahi ena naparaepiyana. Te yátupi eta émunaraivaya, máejerare eta ítauchirayare tamutu eta vanairipiana.

<sup>11</sup> Eta tacaheyare eta ítaresirayare. Vaipa véjecaracha eta sácheana. Vahi vímacacaracavaimahi. Vitsecavayarehisera taicha viánehipaicha eta jena sáchezare eta máitecapiraya ema véhiruhi. <sup>12</sup> Eta vicuchapiraipa eta machavirayare ema Viáquenu, tacutihi te vicuchapaipa te jena yati eta tijararahi. Puiti vímahapa eta tajarahiquene. Tásiha, ínajicapa eta íchaqueneanaini te timapicu. Puiti tiápajucavasera eta iúrivana, étapa eta íchaqueneanaina te tijararahi. <sup>13</sup> Ímicapicauchavayare eta ítaresirana. Iúrisiyare tamutu sácheana. Vahi ecavahaimahi. Váhivare ímisiapavaimahi nayehe ena ticapiestaranahi. Váhivare túhusihémahi. Vahi tivayuacahémahi eta tájiparacana. Vaipa iúmeharerecaimahi, váhivare ecapinarurahimahi. <sup>14</sup> Tásihasera, ímereca eta iúrivaina. Ácuti ema Viáquenu Jesucristo eta máurivahi éma. Vaipa ecusuapa eta tajamurachaqueneanahi eta iáqueheana. Váhivare ecupanerecha eta íchiraya éta.

## 14

### *Vahi ecucaecahi ena echamuriana*

<sup>1</sup> Te napauchahépuca nácani navarahahi tisiapamurihaheana, echamurianayare, vahi ecuepuruvaca. Ejanuvacasera eta ejacapiraya. Te jácani apaesarichuhi eta nacasiñavairahi mayehe ema Viáquenu, napicauchaichaha eta nayeherepiana ichasiana, vahi ecucapaemachahini éna. <sup>2-3</sup> Nararihi ena títuca nanica tamutu eta tinicacareanahi. Nararihivare ena apanahi eta nayeherepi, náimijachahi vahi tiuri nanica eta vaca. Tásiha, máechejirechucha eta nanica. Éna, vuíchaha muracanainahichaini tayehe eta véhiruhi. Eti ítuca enica tamutu, vahi ecuepuruvaca éna vahi tinicanahi eta vaca. Étipa eti máechejirehi eta enica, váhivare ecuepuruvaca ena tinicanahi tamutu. Taicha majacapaquenehevacaipahi ema Viya emutu. <sup>4</sup> Vahi ecuimijachavaimahi étinahi échavaca eyaseserecarahi ena machaneranahi ema Viya. Éma, téchavacahi ena mavanaranahi. Máimararacahi eta táurivahi náicha, macunachavacahi éna. Te váhipuca, émainahi techa eta máemechiravacaya.

<sup>5</sup> Tacutiquene váhivare ecuepurucaca tayehe eta sache iúrujisiravana eyujarasirana. Nararihi náimijachahi tiúripana te sávarumuhuana. Nararihivare tiúripanahi nasama te lumincumuhuana. Nararihivare tamutuchucha sácheana tiúrihi eta náimairahi. Étipa échinava eta sache éhiruyare. <sup>6</sup> Nácani tiyujarauchavanahi te jena sache, ena navarahahi napicaucha ema Viáquenu. Éna apamuriana, vahi tácomesahini nanerejicahini eta sache, éna apanava napicauchahi ema Viáquenu. Éna nacahehi nácani tamutuchucha nanicahi, eta napicauchirahi ema Viáquenu, nahasulupayachahi éma. Nácánisera náepuruhi nanica eta jácani tinicacareana, táchavenehivare eta napicauchirahi ema Viya, nahasulupayachavare éma. Tamutuhi tiuri naicha.

<sup>7-8</sup> Taicha vahi vítjiriruváinahini eta vítaresira. Émaripa téchahavihi ema Viáquenu. Émachucha vicaematanearuhi, visuapirayarehi éma te

tamutu. Étaripa eta vépenirapuca, váhivare vítijiruváinahíni véchinavahini. Émarichuhi téchahavihivare te tamutu. <sup>9</sup> Ema Jesucristo, tatuparacahi eta máepeninahaviyarehi, tiápechavayarehivare tichava títareca, apaesa émainapa Viáquenuya viti vítareruanaichaha, énapa ena náepenaqueneanaripa.

<sup>10</sup> Étisera, vahi étinahini tátuparacahehini échavaca eyaseserecarahi ena echamuriana. Váhivare étupicavahini eta épurujiisiracacahi. Échavarichu eta vimutuirayare vicayaseserehi te mamirahu ema Viáquenu Jesucristo. <sup>11</sup> Ema Viáquenu, ani macahehi te Sagrada Escritura: “Núti acaneripahi eta nítare-sirahi; puíticha máepenacacanuhibare eta nutiarahirayare. Tásiha, nútirichu nucatuparahahi nuyaseserecavacayare namutu ena achaneana. Namutu tépuyumirauchanuanayare te numirahu. Tímatinuanayare eta yátupirahi nútí tituparacanu júesnuhi nayehe, nuti Iáquenu” macahepa. <sup>12</sup> Tacahe, vimutu émanapachuhaviya vimetaurecava mayehe ema Viya. Éma máimatiya tamutu. Tájina virataha viyumurucahini.

### *Vahi ecuimiaquipaica ena echamuriana*

<sup>13</sup> Tásiha éti, vaipa ímijachavaimahi étinahi échavaca, eyaseserecarahi ena echamuriana. Táurisera eta ecachanéracacaina. Tasapihasera, te tamutu jácani íchaqueneana, étaviuchaya eta iúrivahi nayehe. Tacuija jácani táimiaquipaicavaca éna ícha. <sup>14</sup> Núti, eta mavanaranuirahi ema Jesucristo, numetacahe: Tájina eta tinicacareana tamaeperajicahavimahi eta vinisirahi. Nararhisera ena vichamuriana, tépuruana eta jácani tinicacareana, napisirahi eta tamaeperajisiravacayarehíji. <sup>15</sup> Tásiha, nuconsejachahe: Vahi ecuimiyusemaca ena nani, váhivare ecuacapaemachahini tayehe eta jácani tinicacare, machu ímicainajiruchavaca ena echamuriana mavachareruanahi ema Cristo eta máepenirahi. <sup>16</sup> Máchuvare émechajisiava tayehe eta ímatiquenehi tiúri. <sup>17</sup> Taicha eta véhiruhi ema Viya, vahi étaparacaina jácani vinicaquenerepiana, véraqueneana. Étaripa eta ticunachacarehi mayehe, eta víchirapaipa eta táuriqueneana, navetijiva nayehe ena vichamuriana. Mavarahivare vítucavahini tájina tahapapiricahini eta vicurujisiracacahi, apaesa táimiyavaini eta viúrisamureva vimutu, maicha ema Espíritu Santo. <sup>18</sup> Éti, te yátupina eta émunasiravacahi ena echamuriana tépuruanahi eta jácani tinicacare, tiúriyare eta ecaemataneasiraya ema Cristo. Tétavicavahi eta ecurisamurechirahi ema Viya, ecunachacarehivare nayehe ena achaneana.

<sup>19</sup> Tacahe, vitanucayare eta viúrivaya nayehe ena vichamuriana, apaesa vétumechacaca tayehe eta véhiruhi. <sup>20</sup> Vaipa iácapaemachacacaimahi tayehe eta jácani tinicacare. Váipavare ecuiputsicacaimahi, machu émitiaca eta echamuricacairahi eti majanearuanahi ema Viya. Yátupiquene eta táurivahi tamutu eta tinicacare. Tájina táimanéna. Énaserá nácani tépuruanahi jácani tinicacare, te nanicapuca, ticauyayacare táimiaquipaica tayehe eta pecatu. <sup>21</sup> Tiúripanaichu vahi ecunica eta vaca, váhivare ecuera eta cátsiama, machu étaina táimiaquipaicapuca ena echamuriana tayehe eta pecatu, máchuvare nacainajiruva eta véhiruhi. <sup>22</sup> Éti, yátupihí eta esuapirahi ema Viya tayehe eta tinicacareana. Ejaneacavasera te mamirahu éma. Tétavicava eta náuricacareva nácani náimatihí eta náurivahi te nasamure, vahi nacaecahirahihini énajivainahini. <sup>23</sup> Nácanisera tísapavanahi tinicana, tiávamirahuanahi, énajivapa tímiaquipaicavanahi eta nanisirahi, taicha vahi tátupiruvahini eta nanisirahi. Tamutu jácani vahi tátupiruvahi eta visamure eta víchira, pecatuanahi éta.

## 15

*Ecurisamurechaya ena eparaepiyana. Vahi étijiricavaimahi ecaurismurechava.*

<sup>1</sup> Tacahe, viti vímatianahi eta táurivahi eta vinisirahi eta jácani tinicareana, tituparacahaviripa véchapajiricavacaya ena vichamuriana tímijachanahi vahi táurihini eta nanisirapuca. Vácayehe paciencia nayehe. Vaipa vipanerechahini étachucha vicurismurechirava vítijiricáva. <sup>2</sup> Emutuchasera éti, ecurisamurechaya ena eparaepiyana. Éñamava éti eta náuricarevayare, apaesa tápajucavapaipa eta nasuapiraina eta véhiruhi. <sup>3</sup> Taicha ema Cristo, vahi mácarichuhini macurismurechavahini. Éma, ticurismurechahi ema Maiya te tamutu. Eta tacahe, nacatianacahi ena achaneana váinarajiqueneana. Tásiha, títauchavahi eta tametarapi eta Sagrada Escritura, ani tacahehi: “Núti nímiyanavahi eta nítauchirahi eta pivanairipiana eta nuyehe, tayanapane eta náumehairanuanahi ena piánaranahi” tacahepa eta Sagrada Escritura. <sup>4</sup> Ema Viya tivanecahi ena víyarahaini profetana nájuchahi eta máechajiriruvana te Sagrada Escritura. Éta, ticamapuravacareyarehi eta táimitusirahaviyarehi, apaesa táetumehavahi eta véhisira, tacurismurechahavinavare. Tímitucahavihivare yátupina eta vicasiñava me Viya eta máijarasiraparaca eta viúricacarevaya. <sup>5</sup> Puiti nuvaraha máijaracahehine ema Viya eta evarairahi ecutiya ema Jesucristo eta mapanereruana, étaripa vahi mácarichuhini macurismurechavahini. Ema Viya máetumehachehine emutu, macurismurechahevaréni te jácani íchararacavanapuca, apaesa táuri eta ecachanecacaira. <sup>6</sup> Nuvarahavare ácuticacahini eta epanereru. Tásiha, te iúrujisiravana, étanainarichuhini eta iáhuana eta ecunachirayare ema Viya, Macaiyaquene ema Viáquenu Jesucristo.

*Ema Pablo ticatuparahahi ticametarairuyare nayehe ena apavasanana*

<sup>7</sup> Tacahe, nuparapenaveana, ejacapacacayare eti echamuricanahi, apaesa macunachacarehi ema Viya nayehe namutu ena achaneana. Ecutiyare ema Viáquenu Jesucristo eta majacapirahavihi víti. <sup>8</sup> Écharichuvare eta máucupaisirahi éma te juca. Tétavicavahi eta mamansuvahi eta máimitusiravacahi ena majaneanana israelítana. Mavarahahi máimimatichavaca éna eta máitauravahi ema Viya tamutu eta máechajiriruvana máijararuvanahi nayehe ena viáchucanaveanaini. Váhiquene tivayuarahi. <sup>9</sup> Énerichuvare máimimaticahi ena apavasanana eta majapanuiravacahi ema Viya apaesa nacunachayarehi éna apanava éma. Títauchavayarehi eta máechajiriruvahi ema Cristo eta Sagrada Escritura, ani macahehi: “Puiti núti, énapa ena nuchaneranahi apavasanana vicuticacahi eta vicunachiravihi, piti Tata, vijirauchiravihi eta vipicauchiravihi”. <sup>10</sup> Te apana Escritura, ánivare tacahe: “Eti apavasanana, étipa eti israelítana, étamurihéipa ecuticacainapa eta iúrisamurevaya me Viya”. <sup>11</sup> Te apanavare Escritura, ánivare tacahe: “Étamurihénapa eta ecunachirahi ema Viya, eti apavasaqueneanahi. Váhivare ínajicahini eta ecunachiraya éma”. <sup>12</sup> Eta májurehi ema víyarahaini Isaías te Sagrada Escritura, ánivare tacahe: “Tíjahúchavainapa ema Cristo, te nájina nacuchapaimahi. Éma, aquenucayare nayehe ena apavasanana. Macarichuyare éma ticasañavanayare mayehe, eta nacuneraya éma” tacahepa.

<sup>13</sup> Ema Viya, tétavicavahi eta macunecarevahi, ticasañacarehivare. Tásiha puiti, tétavicavahi eta nuvarairahi máijaracahéni éti eta tavayuchiraina eta iúrisamurevaina, tavayuchirainavare eta ecasiñaira mayehe, apaesa tanaracaina tamutu eta epanereruana. Eta mávahásirahehi ema Espíritu

Santo, máetumechahéni muraca apaesa táetaviuchiravaya eta ecasiñavairayare mayehe ema Viya eta máijarasiraparaca eta iúricacarevaya.

<sup>14</sup> Tiuri puiti, némunarqueneana nuparapenaveana, nucasiñavahi núti eta eyehe, eta étaviuchiraipa eta iúri va étapa eta ímatiequenehairahi tamutu eta máimiturapiana ema Viáquenu. Yátupihivare ítucahi econsejachacaca. <sup>15</sup> Nucasiñahehivare eyehe puiti juca eta níjarasirava nucajurehe eta juca nucartane étapa eta juca táechajisihaqueneana, apaesa vahi ecuemitisica, taicha nutuparahahi me Viya eta nujaneasiraheya eti apavasanana. <sup>16</sup> Éma, tituparacanuhi eta nuyanirayare nupaipica te tamutu avasareana, nucametarairuiraya nayehe namutu ena achaneana eta najacapacareipahi me Viya eta nacasiñavairahi eta mayehe. Tituparacanhivare eta nujaneasiraheyare emutu eti esuapanahi éma. Tásiha, nuvaraha núti nímerecaheya te mamirahu ema Viya te jena sache ticutiyarehi námavahuhe. Éma tiúrisamurénapa eta majacapiraheya, taicha máepachiaruhéipahi ema Espíritu Santo.

<sup>17</sup> Eta mavanaranuirahi ema Jesucristo, nucunachava eta nucaemataneasirahi ema Viya. <sup>18</sup> Váhisera nucasiñavaimahi, nucuneuchavaimahi tayehe eta jácani nacaemataneasiranahi ena apamuriana mavanarana. Nútisera nítauchahi eta nucatuparahairahi me Cristo eta níminatichiravacahi ena apavasanana eta nasuapirahi ema Viya, náehisirapaipahi eta nímiturapihi étapa eta núrivahi eta nayehe. <sup>19</sup> Nímechavacahi ichape eta tiáramicareana eta nítupajjiasirava maicha ema Espíritu Santo. Tacahehi eta nítauchirahi tamutu eta nucametarairuirahi eta máimiturapiana ema Jesucristo. Tamutuhi nupaica, népanavahi te Jerusalén, níchecuhapa tayehe eta departamento Ilírico. <sup>20</sup> Taicha ichape eta nuvarairahi nítecapauchaya tamutu avasare, te jácani nájinaichaha nacametarairuhini. Nuvarahaya nucametarairuyare nayehe ena achaneana tájinahi nasamihahini eta máijare ema Cristo. <sup>21</sup> Nítauchahi eta táechajiriruvahi eta Sagrada Escritura, ani tacahehi: “Náechapa puiti eta máijare ema Cristo ena achaneana tájinaquenehi apaesainahini nasamairiricahini eta máijare. Náimatiequenehapa eta máimiturapi, éna eta namaitucaquenehi namasamaquenehivare” tacahepa.

### *Éma Pablo mapanerechapa tiyanayare te Roma*

<sup>22-23</sup> Ichapemurihi eta áñoana nuvarairahi nupaipiuchahe éti, nucachaneheya apaesaina. Váhisera nítujicava, taicha eta nupaipiuchirapahi eta apana avasareana. Púitiserá nítauchapa eta nupaisirahi tayehe eta avasareana. <sup>24</sup> Tásiha, puiti nupanerechahi nétavauchaheyare achichu juca, nuyaniraya te avasare España. Nuvaraha vicaurisamurechacacainapa. Te támutupa eta nucachaneraheya eta nétavauchiraheyare, németeaca ímicatacanuyare jácani eta nuyanirayareva. <sup>25</sup> Nuyanatumayaresera te Jerusalén. Nunapanumayare eta nanaquiruvana ena vichamuriana nayeheyare ena apamuriana vichamurianahivare ticavasanahi ánaqui. <sup>26</sup> Taicha ena vichamuriana te Macedonia, énapa ticavasanahi te juca Acaya, tinaquiquicavanahi eta náimicasihaya ena apamuriana vichamuriana páureana ticavasanahi te Jerusalén. <sup>27</sup> Tétavicavahi eta náurisamurevahi eta nanaquisiravahi, navarairahi títsirijicavanaya nayehe. Táurica eta juca náitsirijisiravaya, taicha ena nachamuriana israelítana tímimatichanahi ena apavasanana eta máimiturapiana ema Viáquenu. Tásiha puiti, énapavaya ena vichamuriana apavasanana, nacajiyare ena nachamuriana israelítana. <sup>28</sup> Tacahe, te támutupa eta níjarasiravacayare ena vichamuriana páureana eta nanaquiruvana ena nuchamuriana te juca, nuyaninavarepa nucaijuhe te España. Nétavajicainapasera eta ara eyehe. <sup>29</sup> Németeaca eta nítecapauchi-



raheya, ichapeyare eta viúrisamurevaya eta vétumechiracacayare taicha eta véhisirahi ema Cristo.

<sup>30</sup> Nuparapenaveana, nuyaseacahe te máijare ema Viáquenu Jesucristo étapa eta vémunasiracacahi maicha ema Espíritu Santo. Nuyaseacahe ímicatcanuhíni eyaseuchanu me Viya te eyujarasirana. <sup>31</sup> Eyaseacahini eta majaneasiranuhini eta nítecapauchiravacayare ena masuapajirairahanahi ticavasanihi te Judea. Étapa eta juca námaqueneyarepahi nanaquiruvanahi ena vichamuriana, táurihini eta najacapirayare ena vichamuriana ticavasanihi te Jerusalén. <sup>32</sup> Eyaseacahivaréni ema Viya máisapanuhini eta núrismurevainahíni eta nítecapauchiraheya, ímicatasiranuhíni eta nítujisiravaina nucachanehe. <sup>33</sup> Ema Tata Vicaiyaquene, tétavicava eta macanarasirahi tamutu eta vipanereruana. Nuvaraha puiti yátupina esamava eta macanarasirahehi éti. Amén.

## 16

*Ema Pablo máemehajirisihá te macartane namutu ena máimatiqueneana machamuriana*

<sup>1</sup> Nutuparacahe emutu échapajirisinanu eta suítecapauchiraheyare esu apana vichamuri Febe. Taicha ésu, tétavicavahi eta suítatiravacahi ena vichamuriana te avasare Cencrea. <sup>2</sup> Tauri eta ejacapiraina esu, evapinavayare te máijare ema Viáquenu Jesucristo. Ímrecayare eta yátupirahi eparapehivare ésu eta echamurirahi tayehe eta véhiruhi. Ímicatcacayare te jácani sucamunuiravana. Taicha ésu, camurianahi ena suímicataruanahi. Nútiripa, tétavicavahivare eta suímicatasiranuhi.

<sup>3</sup> Échajisinanuyare ema Aquila ésupa esu mayena Priscila. Vahi némitisicavaca éna eta nucachamurirahi tayehe eta vicaemataneasirahi ema Jesucristo. <sup>4</sup> Ena, vahi nacatiequenehahini eta náitaresirana eta nacatiuchiranuhi. Nuhasulupayachavaca éna. Énerichuvare nahasulupayachavare namutu ena apamuriana vichamuriana apavasanana. <sup>5</sup> Échajisinanuvare ena apamuriana vichamuriana tiúrujicavaráhianahi te napena ema Aquila ésupa esu Priscila. Échajisinanuvare ema némunarquenehi nítunacasare Epeneto. Éma títapucahi majacapahi ema Cristo apaicape te nuyanapa te Acaya. <sup>6</sup> Échajisinanuvare esu María. Nusamairiricahi eta ichapemurirahi eta suímicatasirahehi éti. <sup>7</sup> Échajisinanuvare ena nujaneanana Andrónico émapa ema Junias. Éna, nuchamurianainihi eta vicaeratairahi te cárcel. Tétavicavahi vémunasirahi éna viti apóstoleana. Éna, títapucanahi nuyehe eta náehisirahi ema Cristo.

<sup>8</sup> Échajisinanuvare ema Amplias, émarichuvare némunarquenehi eta véhisirahi ema Viáquenu. <sup>9</sup> Échajisinanuvare ema Urbano, ema vichamurihi tayehe eta vicaemataneasirahi ema Viáquenu Jesucristo. Échajisinanuvare ema némunarquene Estaquis. <sup>10</sup> Échajisinanuvare ema Apeles. Yátupihí éma eta máimeresirahi tiúrihi eta máehisirahi ema Cristo. Échajisinanuvare ena machichanaveana ema víyarahaini Aristóbulo. <sup>11</sup> Échajisinanuvare éma apanavare nujaneana Heredión. Énapa ena machichanaveana ema víyarahaini Narciso, tétavicavahi eta nasuapajiraivahi éna me Viáquenu Jesucristo. <sup>12</sup> Échajisinanuvare esu Trifena ésupa esu Trifosa. Énarichuvare ticaemataneacanahi ema Viáquenu. Échajisinanuvare esu vémunaruquene vichamuri Pérsida. Tétavicavahivare eta sucaemataneasirahi ema Viáquenu. <sup>13</sup> Échajisinanuvare ema Rufo. Éma, tétavicavahivare eta masuapirahi ema

Viáquenu. Échajisinanuvare esu maena. Ésu, tímicutijiricavahi mémenahini eta nuyehe ésu. <sup>14</sup> Échajisinanu ema Asíncrito, ema Flegonte, ema Hermas, ema Patrobas, ema Hermes. Échajisinanu ena vichamuriana tiúrujicavarahiana te napena. <sup>15</sup> Échajisinanu ena Filólogo, ésupa esu Julia, ésupa esu Olimpás émapa ema Nereo, ésupa esu maparape. Échajisinanuvare ena vichamuriana tiúrujicavarahiana te napena.

<sup>16</sup> Puiti eta néchajisirahehi emutu eti nuchamuriana, nuvaraha nétserarecahe emutu te máijare ema Cristo. Ani te juca, téchajicaheana namutu ena apamuriana vichamuriana te tamutu avasareana.

<sup>17</sup> Nuparapenaveana, nuvaraha ecuneuchavare nayehe ena tipanerechanahi típutsimurihaheana taicha navarahahi tihapapicaheana eta te éhiruhi. Ena nani nacatianacahi eta juca vímiturapihi iáravahui. <sup>18</sup> Érajicavayare eta nayehe, taicha éna vahi émainahini nacaemataneacahini ema Viáquenu Jesucristo. Énajivachucha navaraha tiúrichavana. Tétavicavahivare eta náitusirahi téchajiricavana. Títivehi eta náechajirisirava. Étachuchasera navarahahi tivayuarecana te nasamureana ena achaneana tijimuyapanereruana. <sup>19</sup> Namutuhi tímatiheana éti, náechahivare eta esuapajiraivahi. Eta tacahe, tétavicavahi eta núrismurevahi ícha. Ecajurucaseraini eta íchirahi eta táuriqueneana. Vahi ecuquicha eta tauriqueneana. <sup>20</sup> Nuti nucasiñavahi me Viya, máimicatasiraheya íputsicavaneya ena machanerana ema Satanás. Tásiha, tiúriyare eta íchararacavahi maicha ema Viya. Nuyaseacaparacavare ema Viáquenu Jesucristo táetaviuchahíni eta iúricacarevaya máicha.

<sup>21</sup> Téchajicahe ema Timoteo, ema nuchamurihi eta vicaemataneasirahi ema Viáquenu. Énapa ena nujaneanana: ema Lucio, ema Jasón, émapa ema Sosípater.

<sup>22</sup> Núti apana nuti Tercio, núti nájuchahi eta juca carta, néchajicahe núti apana te máijare ema Viáquenu Jesucristo.

<sup>23</sup> Téchajicahevare ema Gayo, ema nítecapaurehi te mapena. Étarichuhivare viúrujisirarevahi te viyujarasirana. Téchajicahevare ema Erasto, ema tayehehi secretario tésorerohehi eta te alcaldía. Téchajicahevare ema viparape Cuarto.

<sup>24</sup> Nuyaseuchaheparaca emutu éti me Viáquenu Jesucristo, táetaviuchahíni eta iúricacarevaya máicha. Amén.

*Eta táichecuaráqui eta macartane ema Pablo*

<sup>25-26</sup> Nuvarahahi vácuticacaini eta vijirauchira ema Viya. Éma, mavarahahi tétumechaheya tayehe eta éhisirahi ema Viáquenu Jesucristo. Eta tacahehi eta nucametarairuirahi, nímitucavacahi namutu ena achaneana eta majacapiravacahi ema Viya eta nacasiñavairahi me Machicha. Acane eta táepaniravahi eta apaquehe, ema Viya Eterno mapanerechapa eta majacapirayare namutu ena achaneana ticasañavanaya eta mayehe. Ena israelítana énapa ena apanapanenejiqueneana achaneana, namutu tijacapacareanayarehi. Étaripa eta náechajisihaqueneanahi ena víyarahánaini profetana tayehe eta Sagrada Escritura. Nájinasera nácaicutiarahini. Mapaenumavapa tímimatichanuhi núti ema Viya eta mapanereruhi.

<sup>27</sup> Ema Viya, ¡tétavicavahi eta máitupajijiasirava! ¡Macarichuhi tijirauchacarehi ticunachacarevare tayehe tamutu! ¡Máitavacacayarehi eta vihasulupayachirayare éma tivanecahavihi ema Jesucristo eta macuchucuirahaviyarehi! Amén. Tamutupa.

## **Eta macartane ema Apóstole Pablo nayehe ena machamuriana ticavasanahi te avasare Corinto, ticaijare 1 CORINTIOS**

<sup>1-2</sup> Nuti Pablo, mayehenuhi apóstole ema Jesucristo. Níchuarecasivaichuhi mayehe, manerejirunuichuhi ema Tata Vicaiyaquene, mavarairahi nímitucaya eta náechajiriruvana éna. Puiti nucajurehe núti émapa ema vichamuri Sóstenes, eta juca carta eyehe eti vichamuriana ecavasanahi tayehe eta avasare Corinto. Puiti éti iávaháruripa ema Viya taicha etupiruvahi esuapa eta máichuirahéhi éti apanava, mavarairahi émayarepa ema Machicha Jesucristo ecaemataneacayarehi. Ecutiripa ena apamuriana vichamuriana ticavasanahi te tamutu avasareana, taicha ecasiñavahi eta eyujarasirana eta mayehe. Vimutu víti, émanarichuhi ema Viáquenu Jesucristo ema visuapaquenehi. <sup>3</sup> Nuvaraha macatajicahehine ichape ema Tata Vicaiyaquene, émapa ema Viáquenu Jesucristo; náijaracahéhini táurivaina eta epanereruana.

### *Viúricacarepa ichape maicha ema Cristo*

<sup>4</sup> Núti nuhasulupayachaparaca ema Viya táichavene eta majapanuiraheripa. Eta iávahásirahi ema Jesucristo, íchaperinehi eta iúricacarevahi. <sup>5</sup> Tíjaraca heripa eta ítupajijiasiravahi eta échajisirana, échemaharipihi tamutu. <sup>6</sup> Écharipa eta numetacahequenehi eta máijarasiraheya ema Cristo eta iúrivaya. Puítipa tíjaraca heripahi. <sup>7</sup> Tamuturipa tíjaracahehi ema Viya. Tájinapa iátajivainahini eta ítupajijiasiravaipahi. Étanecha ecuchapayare eta jena sáchezare machavirayare ema Viáquenu Jesucristo. <sup>8</sup> Puiti ema Viya tétumechaheyare puiti juca vicaijuheyare eta ítaresiraya apaesa tacuija ecuavamirahu te jena sáchezare machaviraya ema Viáquenu Jesucristo. <sup>9</sup> Ema Viya vahi mahapapicaimahi eta mapanereruanahi. Yátupi eta máitauchirayarehi eta máichuirahéhi, mavarahahi iúrujicavayare ecachanenapa ema Machicha Jesucristo ema Viáquenu.

### *Vahi táurica vicaerajicaca*

<sup>10-11</sup> Nuparapenaveana, ¿tájahapapuca ecayema éti vaipa tétupicava eta epanereruana? Núti nusamairiricahi eta íputsiasiravavacaripa. Taicha tacahehi eta nametasiranuhi ena suchichanaveana esu vichamuri vénaraha Cloé. Nuparapenaveana, nutuparacaheyare te máijare ema Viáquenu Jesucristo, tácuticáca eta epanereruana. Nuvaraha étanainarichu eta epanereruana. Vaipa ecuiputsiacaca. <sup>12</sup> Taicha ani tacahehi eta nusamairirisirahehi. Ena apamuriana ánipaji nacahehi: “Víti viúripanahi viti véhicanahi ema Pablo”. Ena apamuriana énerichuvare nacahehiji: “Vítira viúripanahi viti véhicanahi ema Apolo”. Ena apamuriana énerichuvaréji nacahehi: “Jéhevaresera víti viúripanahi viti véhicanahi ema Pedro”. Ena apamurianavare nacahepaji: “Vítira viápajupanavahi viúripanahi viti véhicanahi ema Cristo”. <sup>13</sup> Váhira tiuri énenahini ácahehine, taicha ema Cristo vahi apapipijinahini eta máimiturapiana. Nuti Pablo, váhira nútinahini népenahini te crusu íchavenénahíni éti. Eta ecaicachasirahi, váhivare étainahini te níjare. <sup>14-15</sup> Tiúririchuhi vahi nútinahini nícachasicahéhini éti. Nájina tiyunacaimahi eta nútinahini nícachasicahéhini te níjare, náepiyaequenehanuhipucaini. Yátupi nícachasicavacahi

ema Crispo émapa ema Gayo. Téhesera te máijare ema Cristo eta nícachasisiravacahi. <sup>16</sup> (Néchavapasera eta nícachasisirahivare ema Estéfanos, énapa ena machichanaveana. Váipasera néchava nájahapuca nácani nícachasiruanahi.) <sup>17</sup> Ema Náquenu Jesucristo tituparacanuhi nucametarairuyare eta viúchucuirayare máicha. Váhira étainahini mavanecanuhini nícachasiricahini. Tacahe, tatupiruvahi eta nucametarairuirahi. Váhisera nuvayuyujicaimahi nútinapapucaini nápajucavahini eta nusupacareva, tásápihapapucaini vahi tacusupacarehini eta máepenirahi ema Cristo te crusu.

*Ema Viya máijaracahi ema Machicha Jesús eta máitupajjiasiravahi*

<sup>18</sup> Natiarihini ena achaneana náimijachahi súnsurupiana eta juca nucametarairuirahi eta viúchucuiraya taicha eta máepeninahavihi te crusu ema Viáquenu Jesucristo. Ena nani masupajirairahanahi énarataítuerevanayare eta ecuñaraqui. Vítisera viti macuchucureanayare, tiúrihi visama eta yátupiqueneana tásihaquenehi me Viya. <sup>19</sup> Ema Viya ani macahehi eta máechajiriruva eta te Sagrada Escritura: “Tamapurujihini eta náitucaqueneanaini ena títupajjihanihi, énaripa máehicanurahanahi. Súnsurupihini nuyehé eta náechemaraivanahi” macahepa.

<sup>20</sup> Eta tacahe puiti, tájina tacunachacarevainasami me Viya eta máitucaquenehi ema achane títupajjiacavahi, mácani máestropuca, tayanapane macarichuhi nayehe ena apamuriana tímatiequenehanahivare eta tayeheana eta juca apaquehe. Taicha tájina vahi étaparacaina mayehe ema Viya eta júcana taicha súnsurupianachucha eta mayehe éma. <sup>21</sup> Tamutusera eta mapanereruanahi ema Viya, tétavicavahi eta tapachinavavacahi. Éma, tivanecahavihi viti vicametarairuanayare. Nararihi ena tisuapanapahi eta vimetarairuana. Énaripa tiúchucuhanayarepahi. Tayanapane ena apamuriana náimijachahi súnsurupianahi eta vimetarairuana. Ena nani achaneana, tamapurujihini eta náechemaraivanahi, taicha vahi táimimatichavacahini me Viya. <sup>22</sup> Ena nani nujaneanana israelítana náepiyarichuhi tiyaseserecana, navaraha náimaha eta tiáramicareana tiásihana me Viya. Ena griégoana eta nayeherépi natanucahi eta tápajusiravaya eta náechemaraivaya. <sup>23</sup> Eta tacahe, vahi tasupacarehini nayehe eta vimetasirahi eta viúchucuirayare táichavene eta máepenirahi te crusu ema Cristo. Ena nujaneanana titsirihanahi eta juca, tásiha náepuru náehica éma. Ena apamuriana apavasanana náimijachaichucha súnsurupiana eta juca. <sup>24</sup> Natiarihiserá ena tisuapanapahi eta máichuirahi ema Viya, ena israelítana énapa ena apavasananahi. Náimatiripa ema Cristo, eta vanairucairahi mayehe ema Maiya taicha éma tíjaracahi ema Machicha eta máitupajjiasiravahi étapa eta matumeva. <sup>25</sup> Tayanapaneinesera te súnsurupihipuca nasama ena achaneana eta vimetarairuana, étasera tiápajucavahi tiúripanahi tayehe eta náitucaqueneanahi éna. Tayanapanevare náimijachahi mamaratahairainahi ema Viya, émahiserá túmepanahi nayehe namutu éna. <sup>26</sup> Ímativaichuhi, eti nuparapenaveana, te tíchuhahepa ema Viya, vahi ámutuhini ímatihini eta táichararacavahi eta ítaresirahi te juca apaquehe. Váhivarenéni ámutuhini tuparairucahevacaínahini. Váhivarenéni ámutuhini ecaimahaquenevacahini. <sup>27</sup> Tayanapane ena achaneana náimijachahepuca súnsuhéna éti, manerejiruhehisera ema Viya, taicha mavarahahi máimicatsiriacavacayarehi ena tímijachavanahi títupajjiacavana. Tinerejicahehi éti váhirichu túmejicuhénahini, mavarairahi máimicatsiriacavacayarehi ena tímijachavanahi túmejicua. <sup>28</sup> Tayanapane eta épurucarehi, náimijachavare máiturerehe, manerejiruhehisera ema Viya.

Eta tímicaecherachavacahi eta tájecapiravahi eta napanereruana mayehe ema Viya, taicha vahi énaina matanuca ema Viya ena títupajjiacavana, aquenucarahana, ticaimahaqueneanapuca. <sup>29</sup> Eta juca mapanereruhi ema Viya, mamavarairahi nacuija nacucasiñavavaica te mamirahu éma, náimijachirapuca matuparaca éma nayehe éna. <sup>30</sup> Puítisera éti, majacapaqueneanaripa ema Viya. Mávaháruhevarepa ema Jesucristo maicha ema Maiya. Tacahe, ichaperipa eta échemaraivahi máicha. Sántuheripa máicha, ecutipaipa eta masantuvahi éma. Iúchucurepaipahi tayehe eta ticaviurecarevana. <sup>31</sup> Tavaraha vítaucha eta táechajiriruvanahi eta Sagrada Escritura, ani tacahe: “Vahi vítijivaimahi vicunachava taicha eta vítupajjiasiravana. Éma vicunachayare ema Viáquenu taicha ema tíurichahavihi”.

## 2

### *Ema Pablo macametarairuhi eta máepenirahi ema Jesucristo te crusu*

<sup>1</sup> Nuparapenaveana, échavarichuhi te nítecapauchahénapa cape juca viásinequenehi. Eta nímitusirahehi eta máechajiriruva ema Viya, tíurihi eta níminecapaequenehairahehi, tamutuhi ticaicutiaracare eta néchajirisirahehi. Vahi tácajerapihini eta néchajirisirahehi. <sup>2</sup> Taicha nuvarahahi níminatichaheyare ema Jesucristo, nuvarahahivare yátupinahini ácaicutiara eta masivachaquenehi macatajivairahi éma eta máepenirahi te crusu íchavenehi éti. Eta tacahe, nupamicavahi núti eta nímitusirahehi. <sup>3</sup> Núti, te nímitucahénapa, vahi nítupajjihahini eta nusamiravahi. Nupícarácavahi támapurujihini eta nímitusirahehi. Ichape eta tayayacarevahi eta náquehe taicha eta néñamiravahi vahi tacusuapacarehini eta eyehe eta nímiturapiana. <sup>4</sup> Núti, vahi nácutihini mácani achane mavayuyupica eta máechajirisirava. Étisera ecaicutiaravanehi eta nímitusirahehi maicha ema Espíritu Santo. Ecaicutiaravanehi étairahi eta yátupiqueneana tásihaqueneana me Viya. <sup>5</sup> Taicha nuvarahahi yátupina muracaina eta ecasiñavairahi mayehe ema Jesucristo taicha ímatihí te esamureana eta yátupirahi másihairahi me Maiya. Vaipa ecuehica eta nayeherepianaini ena viáchucanaveanaini.

### *Ema Espíritu Santo tímimatichahavihi eta mapanereruana ema Viya*

<sup>6</sup> Étisera ánaquiaparipa eta éhisirahi. Ímatiequenehávacaripa. Tacahe, táuricapa puiti vímitucaca eta apamuri échajirirucava títucacareana ticajerarapianahi. Eta juca títucacareana tiásihanahi me Viya. Vahi tásihaquenehahini mayehe mácani vicutiquene achane. Énainahipucaini tásihahini nayehe ena ichapequeneana aquenucana, taicha vahi tánasimahi eta napanereruana éna. <sup>7</sup> Eta júcana títucacareana tásihaqueneanahi me Viya, mapanereruanahi te tépanavainapa acanevaca. Ánaquiaparipasera eta macaerajisirahini. Tapaenumavapa puiti máimicaecherachinahavihi viti achaneana, mavarairahi visiapaya tayehe eta mávasa anuma. <sup>8</sup> Ena aquenucanahi, vahi náimatihini eta mapanereruana ema Viya. Nájina émanainahini ema ichapequene aquenuca máimatihini. Taicha te náimatihini eta mapanereruana ema Viya, váhirichuhipucaini nacuémetatacahíni te crusu ema Viáquenu. Tájina náimatihini eta émairaquenehi Viya, tiásihahi te anuma. <sup>9-10</sup> Vítisera víti, máimitureanahi ema Espíritu Santo. Vímatihí eta mapanereruana ema Viya. Émahí ema tímimatichahavihi taicha macarichu máimatihí eta tayumurevanahi te mapanereruana ema Viya. Taicha ani tacahe eta Sagrada Escritura: “Tétavicavaya eta náuricacareva ena nani témunacanahi ema Viya.



Taicha májjaracavacaya eta náicuchihi natuparahahi maicha éma. Máimahasirichaha eta tacutiquenehi eta náuricacarevaya. Váhivare tisamairicacarehini eta tacutiquenehi te jácani tiyerehi avasareana. Nájina naratahahini náimijachaimahi eta táetaviuchiravaya” tacahepa eta Sagrada Escritura.

<sup>11</sup> Viti achaneana, vicarichu vecha eta vipanereruanapachu tásihaqueneanahi te visamureana. Nájina apanaina náratahahini naecha. Ene macahehi ema Espíritu Santo. Macarichu éma téchahi tamutu eta mapanereruanahi ema Viya, taicha émarichuhi máchanevahi. <sup>12</sup> Víti, tájina vahi vítijivainahini vímipanerechavahini mayehe ema Viya. Émasera ema Espíritu Santo tímitucahavíhi tamutu eta títuacareana tásihaqueneanahi me Viya, taicha mavarahahi véchayare. <sup>13</sup> Eta tacahe, eta juca vímiturapianahi tásihaqueneanahi mayehe ema Espíritu Santo. Vahi tásihaquenénahini te vipanereruana. Táitusiava, ena vímitureanahi natupiruvahi najacapa taicha mávaháruanahi ema Espíritu Santo.

<sup>14</sup> Énasera nácani achaneana vahi mávaháruanaina ema Espíritu Santo, vahi najacapaimahi eta máimiturapiana, taicha náimijachahi súnsurupiana. Váhivare nárataha nacaicutiarahini, taicha ticamunucarehi eta máimitusiravacainahini ema Espíritu Santo. <sup>15</sup> Vítisera viti yátupiqueneanahi mávaháruana, vicaicutiarahi tamutu eta máimiturapiana éma. Énasera ena máehicarahanahi, vahi nacaicutiaraimahi eta apanairaipahi eta viyeherepianahi víti. <sup>16</sup> Tacahehi eta táechajiriruvana eta Sagrada Escritura: “Nájina émanaina achane máemunahiricavahini máimatihini eta mapanereruana ema Viáquenu. Tavetijicha májina mácani máitucahini máimituca ema Viya eta mamaitucaqueneanapucaini” tacahepa. Nájnavare nácutihavíhíni víti vicaravahuquenehi eta máechajiriruanahi ema Cristo. Vímatiripa eta mapanereruana.

### 3

#### *Vimutu vicompañerocaca tayehe eta vicaemataneasirahi ema Viya*

<sup>1</sup> Nuparapenaveana, cape te nítecapauchahénapa, vahi tacajerapahini eta nímitusirahehi. Tacutihi te vicajuruca eta amuya, vépiyayasinahi eta vímitusira. Tativahi nímitucahe eta epaisirayare éhisirayarehi ema Jesucristo. Taicha éti vuíchaha támutuhini ínajicahini eta tajamurachaqueneana eta iáqueheana. Vuíchahavare éhichahini eta mavarahaquene ema Espíritu Santo. <sup>2</sup> Vahi námainunujicahehini eta nímitusirahehi. Éti ecutihi ena nácani amuyana tiájicanarichaha. Vahi námainucavahini nanicahini eta cheruji. Ene ecahehi éti, vahi iámainucavaimahi ácaicutiarahini támutuhini. Puítirichucha vuíchahavare áratahaimahi ácaicutiarahini eta apamuriana títuacareanahi murácapánahi. <sup>3</sup> Taicha éti vuíchaha támutuhini ínajicahini eta tajamurachaqueneana eta iáqueheana. Taicha ecapinarujiricacaichaha, ecatianajiricacaichaha, íputsimuriajiricacaichaha. Eta epanereruana ecutirichaha eta napanereruanahi ena apamuriana achaneana masuapajirairahanarichaha. <sup>4</sup> Éti épurujiricacahi nayehe ena echamurianahi, ánipa ecahe: “Víti viúripanahi viti véhicanahi ema Pablo”. Éti apamuri ecahepa: “Vítira viúripanahi viti véhicanahi ema Apolo”. Eta juca ecahehi, tacutirichaha eta napanereruana ena apamuriana achaneana masuapajirairahanarichaha.

<sup>5</sup> Váhira nútinayarehi éhica nuti Pablo. Váhivare émaimahi ema maca Apolo éhicayare. Vahi véhicacare víti, taicha mavanarahavichucha ema Viáquenu Jesús. Yátupi víti vímitucahehi. Tamutuhisera mayeheanahi ema Viya eta esamaqueneanahi. Ema Viáquenu tíjaracahavíhi eta vituparahapachuyarehi. <sup>6</sup> Yátupi nútí nínapucahi nímisamahehi eta máechajiriruva ema Viya.

Te néquenepa, títecapauchahepa ema Apolo, émapa títametacahehi tamutu. Émasera ema Viya, ema ticajurusinahehi eta esuapajiraivanahi. <sup>7</sup> Táitaurevaquene nútihinéni névacahi te esamureana eta echajirirucavana, tájinasera vahi nútina néchahe. Émaripa ema Apolo, ema títametacahehi, váhivare émaina téchahe. Émara ema Viya, ema téchahi tamutu eta juca. Éma ticunachacare. <sup>8</sup> Núti, émapa ema Apolo, vicuticacahi vínunahi eta vicaematane. Vituparahapachuhisera. Ema Viya tíjaracahaviya eta vícuchianapachu, te tiúrihi eta vicáematanérana. <sup>9</sup> Víti mamusurahavihi ema Viya. Éti ecutihi eta sucurecana eta macajurusirahehi ema Viya.

Eta éhisirahi ema Jesús tacutihi eta náepiyasirahi eta ichapequene peti. <sup>10-12</sup> Tativa, ema maestro tépiyarecarahi peti arquitecto, éma tinacucha eta labriyu eta tatumearaya eta yúchama. Tásiha, ena apamuriana máestroana, énapa tiúnachana eta yúchama éta pa eta tamaiquehe. Tiúriyare eta nacaemataneraya. Nanerejicayare eta táuriqueneana tasívachaqueneana, navarairahi tijanunucayarehi eta náematane. Váhiya nanacaimahi eta tíjuchacareana, yucuqui, muiji, cáchipaca; apaesa vahi tacuiju eta peti. Taicha títecyare máimahapanaya ema ticayeheyarehi eta peti. Tásiha, te máimahapa tiúrihi, mavachachainapa namutu ena ticaematanenanahi. Nuti manerejirunuhi ema Viya eta nímitichirahehi ema Jesucristo, éhicapaipa éma. Puíticha eta ecaijuherapaipa te anuma, nájina apanaina naratahahini námahehine. Macarichuhi marataha éma. Puiti, ena apamuriana mamusurana ema Viya tímitucahehi apaesa tajuruca eta esuapirahi. Tacamunusera tiúriyarehi eta náimitusiraheya. <sup>13-14</sup> Taicha tatiarihiyare eta sáchezare máimahayare ema Viya eta vémataneanapachu, te tiúripuca. Te tiúrihi eta vémataneanahi, ema Viya tíjaracahaviya eta táitsivayare eta vématanerepihi. Téhesera vahi táurihini, eta mayucune táijuchayarehi eta vémataneanahi. <sup>15</sup> Tacamitiequenehayare tamutu jácani tájina tacunachacarevainahini. Tájina táimaequenénaimahi. Yátupi viúchucuhahi víti, tájinasera vímaequenéhaimahi.

<sup>16-17</sup> Écharichuhi éti eta mávahásirahehi ema Espíritu Santo. Éti ecutihi mayehehi templo ema Viya, étarichuhi eta máucupaisirarehi máemunarquenehi. Éma, máicuñacayare muraca nácani tíjararecanahi éta. Táitusiava, ejaneacava éti, machu ejarareca eta iúrujasiracacahi, ímiyusemaca ema Viya.

<sup>18</sup> Vahi ecuejecapava eta ímijachirahi ímatipa tamutu eta juca vítaresirahi. Étiserá ecaravahuya eta me Viya. Éma, tímitucahe eta ítupajijiasiravanaya yátupiqueneana. Échemaraivaina máicha. <sup>19</sup> Taicha eta náitucaqueneanahi ena achaneana te juca apaquehe, súnsurupianachucha eta máimairahi ema Viya. Taicha eta Sagrada Escritura, aní tacahe: “Ena tímijachavanahi náimatiequeneha, énajivachucha tímiaqui paicavanahi maicha ema Viya, taicha eta namáetupisirávanahi”. <sup>20</sup> Ánivare tacahe eta Sagrada Escritura: “Ema Viya máimati eta napanereruana ena tímijachavanahi títupajijiacavana. Tájina eta tacunachacarevanahi eta mayehe”. <sup>21</sup> Táitusiava, vahi tiuri ecasiñavavaicahini. Vahi étupicava eta éhisiravacahi ena enerejiruanahi éhica. <sup>22</sup> Ecaravahuinasera tamutu eta vímiturapiana viti mavanaranahi ema Viya: ema Apolo, émapa ema Pedro, nútipa nuti Pablo. Ecamapurava eta ítaresiraichaña te juca apaquehe. Jararihiyarehi eta iúricacareva puiti éta pa eta sácheana vicajuhequeneana. Vaipa ecupica eta épeniraya. <sup>23</sup> Échava ema Viya ema téchahehi, taicha éti mayeheheripa ema Machicha Cristo.

## 4

*Eta nacatuparahairahi ena apóstoleana*

<sup>1</sup> Nuvaraha némechahe eta vikatuparahairahi viti mayeheanahi apóstole ena Cristo. Mamusurahavihi víti. Tivanecahavihi eta vímitusiraheyare eta mapanereruana ena Viya, eta tayumururevanainihi. <sup>2</sup> Puíticha, mácani ticatuparahayare tayehe eta ematanecana, tacamunuhi yátupiyare eta máitachiraina. <sup>3</sup> Natiarihipuca ena ticaunenuanahi te nítaurahihipuca. Étiripa, enevanehipuca ecaunenu. Núti, tájinavare tácyema te ticaunenuanahipuca. Németeaca nítauchapaipa tamutu eta nucatuparahairahi me Viáquenu. <sup>4</sup> Váhisera nucasiñavavaicahini, taicha néchahi ena Viáquenu, máimahahi éma tamutu eta nucaemataneasirahi éma, te tiúrihipuca, váhipuca. <sup>5</sup> Eta tacahe, vahi táuricahini tativainahini ecaunehini eta júcana, te vuíchaha ímatieque-nehahi. Ecuchapaya eta mápechiravayare títeca ena Viáquenu. Éma tímicae-cherachayare eta tayumururevahi te timapicu. Éma tímereuchahaviya eta vipanereruana te visamureanapachu. Tacahe, ena Viya ticunachahavinapa eta viúriivanahi.

<sup>6</sup> Nuparapenaveana, numetacahe eta juca eta tiúrichaheyare apaesa ácuti eta máuriva ena Apolo, ácutinuvare núti apana eta núrivahi, taicha étanarichuhi eta vímiturapianahi tayehe eta véhiruhi. Vahi táurica enerejicahini nácani émunaruanaya. Vácuticacaserá eta émunasirahavina viti vímiturahianahi. Nacuijavare épuruquenéna nácani tímiturahianahi. <sup>7</sup> ¿Tájaha tacayema ímijachavahi éti iúripana nayehe ena apamuriana? Tájina apanaina ecasiñavaiya, tacarichu ecasiñavaiyaya tayehe eta máijjararuheanahi ena Viya. Váchuripa tíjaracahe-ripa éma eta iúriivanahi, vahi étijivainahini iúrichavahini. Tásiha, ¿tájaha tacayema ecasiñavavaicarichucha éti?

<sup>8</sup> Éti, eta esamiravahi ecaemuñavaipa tímicutijiricavaipa ecayehehini tamutu, ecaimahaquenehini. Ímicutichavaipavare aquenucahenahini eta esamiravahi. Ímijachavapa vaipa nucamunucarehi eyehe. Jéhechapucaini malayarine yátupinahini aquenucahenahini apaesa viti apanava vémeñahavapaini eta eyehe. <sup>9</sup> Ímatirichu éti eta procesión náichaqueneasa ena tiverearecanapahi tayehe eta guerra. Nanacahi te náijiquimuri ena ticatuparahanahi eta náepeniraya taniruanayare eta sárareana. Ichape eta náimahacarevahi nayehe ena achaneana. Viti apóstoleana ticutimahi tinacahavi ena Viya eta vicutihi ena nani páureanasamí. Ichape eta vímahacarevahi nayehe ena achaneana, énapa ena ángeleana. <sup>10</sup> Viti apóstoleana, eta vicaemataneasirahi ena Cristo, tisunsuchahavianasamihiji ena achaneana. Étiserá étaviucharipahiji eta ítupajijiasiravahi tayehe eta títuacareana mayehe ena Cristo. Tacutiquene náimijachahivare matumerairahahavisami. Éti, tétavicavaipáji eta etumevavacahi. Tipicauchaheanaripáji ena achaneana. Vítisami tájinapa vipicauchacarevainahini nacahehi éna eta náechajiriruvahi. <sup>11</sup> Puítiripa vinasirichuhi eta vicatajivairahi eta vinicaquenerepi, eta vimauneva, étapa eta véchuriasirapa eta vimuiriharapi. Ena achaneana téhahaviana. Tájina viviyava vijunaiya. <sup>12</sup> Vicávitarcávahi te vivahuana eta vicaematamera. Ena achaneana ticajachachajicahaviana. Vítiserá tájina vácyemahini nayehe. Tiúrihi eta vijicapiravacahi éna. Tipanajiricahavianapa, vítiserá vicamichahi tamutu. <sup>13</sup> Tamutu sácheana téchajicanahi eta viyehe. Tíñemahi eta nacayemainahavi. Ichape eta vépurucarevahi nayehe. Vítiserá vicayehehi paciencia nayehe, viconsejachavacahi.

*Eta mahapasamuresiravahi ena Pablo nayehe ena machamuriana*

<sup>14</sup> Eta juca nucajureheirahi, vahi étaina nupanerecha nímicsiriacahe. Nuvarahahisera nuconsejachahevare. Tétavicava eta némunasirahehi, tacutirichu eta nucachichairahehi. <sup>15</sup> Tayanapane camurianahi ena eyeheanahi máestroana tímitucaheanahi eta éhisiraina ema Cristo, diez mílnáinahipucaini; nútisera tímicutijiricavahi nácarichuhini éyanuinahini maestro taicha núti nímimaticahahehi tayehe eta iúchucuirayare maicha ema Jesucristo. <sup>16</sup> Eta tacahe, nécatiacahehi eta éhisiraina eta núrivahi núti.

<sup>17</sup> Eta tacahe, névatacayare eta ara eyehe ema némunarunque nuchicha Timoteo. Éma, títaurahi eta macaemataneasirahi ema Viáquenu. Éma, tímitucaheyare, máemechiraheyareva eta tacayemaqueneana eta nímiturapiana eta véhisirahi ema Cristo. Táuriquenehi eta máimiturapiana taicha étarichuhi eta nímiturapihi nayehe ena vichamuriana te jácani nupaisineanapahi. <sup>18</sup> Etiarիրիրipapuca eti ecasiñavaripa eta numaitujisiravaripa néjirapanahini. Ímijachapapuca nupicahi. <sup>19</sup> Nuvarahapaicha núti nájahuchavahini nítecapauchahehini. Nucuchapahi eta nítujisiravainahini maicha ema Viáquenu. Te nítecapauchahepa, nímahainapa ena nácarana tisiñavavaicanahi, te yátupihipuca eta nacaemataneasirapa. Vahi tisuapacareimahi eta nacuna-chiravana te vahi náimicaecherachahini eta táurivahi eta nacaemataneasirahi ema Viya. <sup>20</sup> Taicha eta véhisirahi ema Cristo, tacamunuhi vítauchayare vicaemataneacayare. Vahi tácarichuimahiya eta véchajiriruvana. <sup>21</sup> Tiuri puiti, te ímiyanava ene ecahehi, némecharecaheyarehi te nítecapauchahepa. Téhesera te étupiricava eta epanereruana, ichape eta núrísamurevayarepahi eta nímairaheyare, nétserajicahénapa.

## 5

### *Ema Pablo mavaraha nacaerajica mácani téjecapavahi*

<sup>1</sup> Jucarihivare eta juca apana téchacarehi eta matiarիրիրahi ema émana echamuri téjecapavahi, tíñehicarehi eta juca máichaquenehi. Mavehahiji esu máenaharuva. ¡Váhicha tiuri eta juca máichaquenehi! Énaripa ena navayureva-queneana ticapecaturarahiana vahi náuricaimahi eta juca. <sup>2</sup> Esapihaichucha éti, ¡tétavicavahi eta tahapasamurechirahehi eta íputsimuricacairahi tásiha-quenehi eta ecasiñavavaisirahi! ¡Íúrihaipa etsirիրhapaini, táichavenehi eta máichaquenehi ema echamuri! ¡Íúrihaipavare étupiricahini ema maca! Taicha ema Viáquenu Jesús tituparacahavi vicuchucayare te vimuri nácani téjecapavanahi te vahi návarahahini náetupiricava. <sup>3-4</sup> Puiti, nuvaraha iúrujicavayare éti. Eyaseacayare ema Viáquenu Jesucristo máimicatacahe eta étupirisirayare eta juca. Núti apanavare, tayanapane eta nuyerehihehi, étasera eta náchaneva ticachaneheya. <sup>5</sup> Íchayare: “Te máijare ema Viáquenu Jesucristo, víti émapa ema Pablo, vicuchucavi te vimuri. Vaipa tijaneacavimahi ema Viya. Máimaha-vinepa ema Satanás, émainapa téchaviyare. Vivaraha pínajicaini eta juca pimaurivahi, apaesa táuchucuhaini eta piáchaneva te táitecapapa eta jena sácheyare machavirayare ema Viáquenu Jesús” íchayare.

<sup>6-7</sup> Éti, vahi táuricahini ecasiñavavaicahini. Tacamunu ecuchucavane ema mácara achane téjecapavahi apaesa vahi macupareacahe eti apamuriana, machu mámairijicahe. Taicha éma macutiripa eta levadura te nanaca te masa eta pan, tayanajicahi tamutu. Étisera, nuvaraha ecutiya eta pan mayehere levadura vinicasare te páscuamuhuana. Yátupiquenehi arairu taicha vahi tasisijicahini. Ene ecaheyare éti, vahi tépahaimahi eta iásinequenehi te arairuhepa tacuti eta épaniravahi te éhicainapa ema Jesucristo. Taicha éma,

tamutuhi mavachacha eta vímicapasirahi, macutihi eta uvesa eta vímijarare-sirahi. <sup>8</sup>Táitusiava puiti, vicutinapa ena nujaneanana israelítana eta nacaera-jisira eta levadura te napenana te páscuamuhuana. Tamutusera sácheana vicauneuchavaya tayehe eta tamauríqueneana, vahi pecatumarehavimahi. Tamutu sácheana eta juca vítaresirahi matapiravarehavinahi, tájinasarepa víchiravaimahi te mamirahu ema Viya.

<sup>9</sup> Cape eta nucartanehivare eyehe, nímimetacahehi eta tamaurivahi eta ecachanevacahini ena tíchanahi eta juca pecatuana tivehajiricacanahi: Súcani esena suvehahi ema apana achane, mácani achane mavehahivare esu apana esena. <sup>10</sup> Tiuri, nútí eta numetasirahehi, váhisera énáina nicha ena nani máehicarahanarichaha ema Viya ena nani tivehanahi esu apana esena apayena, énapa ena tavayuaruana eta plata, énapa ena tíámerahiana, énapa ena ticasíñarajiana. Ena nani, náetaviuchahi eta nasimutuvavacahi, tamutuhi návihávaca. Tacamunui papuca vérajicavahíni eta te juca apaquehe, apaesa vaipa nacuitecapauchahavihini. Váhira énáina níchaquenénahíni. <sup>11</sup> Mácanisera tímijachavahi echamuri, vahi nuvaraha ecachanejirica ema tivehahi esu esena apayena, émapa ema tivehahi esu esena amaperu máimaruchaha, émapa ema tavayuaruhi eta plata, émapa ema ticasíñarajiji, émapa ema titupiarahi, émapa ema ticavaharasi, émapa ema tíámerahi. Mácani echamuri, te ene macahehi, tájina vahi táuricahini ácachanevacahini te enisirana. <sup>12-13</sup> Vahi nútina tatuparaca eta nacayaseserehiyayare te numirahu ena anecaqueneanahi eta viyehe. Téhesera te mamirahu ema Viya eta nacayaseserehiraya. Éma téchavacahi éna. Étisera éti, échahi ena echamurianahi. Éti eyaserejiricacayare étijicacaya. Eta tacahe, ecaevisihayare ema mácara téjcapavahi te emuri.

## 6

### *Vahi táurica vimetauchacacahini te namirahu ena máehicarahanahi ema Viya*

<sup>1</sup> Énerichuvare nuvaraha numetacahe eta apana: Te natiarihinapuca ena echamurianahi navaraha timetauchacacana, vahi távaraha nayanahini nayehe ena tuparairucana máehicarahanahi ema Viya. Étarichu nacami-rahucacaiyayare te emirahu eti nachamuriana. <sup>2</sup> Tativayare échava eta machaneraherahi ema Viya. Étijivayarehi étupiricaca eta íchavaquenevanahi. Vahi étinayare etanuca ena masuapajirairahanahi taicha járajapayare eta sácheyare ticayaseserehianaya te emirahu éti ena masuapajirairahanahi. Puítisera eta íchavaquenevanahi ánichichaqueneanahi, éti tatuparaca étupiricaya. <sup>3</sup> Écharichu éti tituparacahaviyareva ticayaseserehianayareva ena ángeleana te vimirahu. Tacumapurujichapucaini eta tayeheanahi te juca vítaresirahi, vahi vicuituruequenehahini. <sup>4</sup> Puiti éti, te tatiarihipuca eta íchavaquenevahi tayehe eta juca vítaresira puiti, váhiquenesera etanucaimahi ena emetauresihahini nácani vahi énaparacaimahi nayehe ena echamurianahi. <sup>5-6</sup> Némechahe eta juca, nímaha te etsirihapuca. Váhiquene táuricahini mayanahini mácani vichamurihi matanucahini ena tuparairucana máehicarahanahi ema Viya. Tasapihahini étainahini mametauchihahini mácani machamurihi. Cúverarecapa nacuijahini te etaracu mácani émanainahini vahi macuituruequenehahini mayasesereca jácani téchacareanahi nayehe ena vichamuriana.

<sup>7</sup> Vahi táuricahini íchahini eta juca. Étijicacainahini eta echamuricacahi evarahapa ejararecaca. Tivarahacarepana eta eratahairaina ecamicha,



tayanapanerine ecatajivahi naicha, tiámeyechaheanapuca. <sup>8</sup> Étiserá etiva-vaicapa íchahi eta juca émecatajivachacacapa. Vahi táuricahini eta juca; násapíhahini énahini echamuriana ena etupiaruanahi.

<sup>9-10</sup> Váhipuca échahi éti eta namaitujisiravaya tisiapana te mávasa ema Viya ena tíchanahi eta tauriqueneana. Taicha yátupíhi eta namaitujisiravayare tisiapana ena ajairana tivehanahi esu apana esena apayena énapa ena vahi nayanacacaquenena, énapa nácani tivehana esu esena amaperu máimaruchaha. Énerichuvare ena esenana, váhivare títujicavanaimahi tisiapana te mávasa ema Viya, súcani tivehahi ema achane vahi suímaquenena, ésupa súcani amaperu esena namutuchucha suvehapahi. Váhivare títujicavanaimahi tisiapana ena nani tivehacacana ajairacacana, énapa ena nani ticasiñarajiana, ena nani tíamerahiana, ena nani ticapinarurahiana, ena nani ticavaharasiana, ena nani titupiarahiana, énapa ena nani nápicararecapahi eta námeresirayare. <sup>11</sup> Ene ecaheni éti eta iásinequenéni. Puítiserá títsivachavaipahi eta ítaresira, sántuheripa maicha ema Espíritu Santo, ecapacarepa mayehe ema Viya, máichavenéhi ema Viáquenu Jesucristo.

*Tiávahácahaviripa ema Espíritu Santo eta te viáquehe viti machanerana ema Viya; tásiha, tituparacahavipa tacuija eta vituhusivaina*

<sup>12-13</sup> Puiti jucarihivare eta numetacaheyare. Nararihipuca ena nacahehi: “Núti néchinava eta nítaresirahi. Eta náquehe tajarachahi eta tavarahaqueneanahi. Eta tinicacare táicuchihi eta viami. Eta viami tatuparahaichuhi tajacapaya eta vinicaqueneyare. Ene tacahe eta náquehe tavarahahi nuveha esu esena tacutihi eta viami tavarairahi tinica” nacahepa. Nútiserá te nupanereru, vahi énéna tácahe. Yátupi víti véchinavahi. Váhiserá távarahacarehini támutuhichaini víchahini eta tavarahaqueneanahi eta viáquehe, vivayuchahini víchahini eta tauriqueneana. Yátupi tísapacarehi eta vinisiraya eta tinicacareana. Tatiaríhiserá eta sáchehare, vaipa vácamunuimahi eta tinicacare, maicha ema Viya. Ema Viya máepiyacahi eta viáquehe, mavarairahi vicaemataneacayare éma. Émapa téchahavihi puiti eta juca vítaresirahi. Vahi étinahini táemepiyacahavihíni eta víchiraya eta pecatuana esenamarehavinahini. <sup>14</sup> Ema Viya macaechepucahi ema Viáquenu Jesús te máecari. Ene vicaheyare víti eta macaechepusirahaviyare víti apanava, taicha tétavícahahi eta máitupajijiasiravahi.

<sup>15</sup> Écharichuhi emutu éti, eta iáqueheana mayeheripahi ema Cristo. Émaripahi téchahehi. Etiaríhipucasera ímijachapuca táuricahini vímicachanechahini eta viáquehe tayehe eta suáquehe esu esena túhusi. Váiparinehi táuricaímahi. <sup>16</sup> Nuvarahavare némechahe, te mavehahi ema achane súcani esena túhusi, tiánecacahi eta náqueheana eta nacamujichiracacahi. Acane, ema Viya máijaracapa esu Eva mayehe ema Adán. Tásiha, eta Sagrada Escritura, ani tacahe: “Te tivehacacapa, tímicitijiricavapa étanarinehi eta náqueheana”. <sup>17</sup> Ene tacahehi eta vítaresira mayehe ema Viya, eta mávahásirahavi ema Viáquenu, eta viáchaneva tacachaneripa éma.

<sup>18</sup> Eta tacahe, ejaneacava yátupina, machu iáquipaicava tayehe eta túhusicare. Tamutu eta pecatuana náichaqueneanahi nácani achaneana, tajararecahi eta náchanepachu. Tavetijipa, mácani achane tivehahi esu esena vahi mayenaquenenahini máimijararecavare ichape eta máquehe. Ticajachacareinehi eyehe éti eta juca. <sup>19</sup> Écharichuhivare éti eta mávahásiraheripa ema Espíritu Santo eta te iáqueheana, taicha mavaneruichuhi ema Viya eta mávahásiraherehi ema Espíritu Santo. Vaipa étinahini écha eta iáqueheana. <sup>20</sup> Taicha mavachareruhehi ema Viya. Ichapemurihi eta macatajivairahi íchavenéhi éti.

Puiti, eta iáqueheana étapa eta iáchanevana mayeheripahi ema Viya. Tacahe, puiti, ejaneacavapa eta ítaresiranahi te namirahu ena achaneana, apaesa namutu nacunachaya ema Viya.

## 7

*Eta maconsejarapi ema Pablo nayehe ena máimaruana, énapa ena nacaimaqueneana*

<sup>1</sup> Tiuri puiti, nujicapaheyare eta juca eyaseresiranuhi te ecartane. Yátupi tiúrihinéni máyéñarénahini mácani achane. <sup>2</sup> Táichavenesera eta tavayua-raivahi eta pecatu, ticamunucarehi ena ajairana nayenapachuina, énaripa ena esenana ticamunucarehivare náimapachuina. <sup>3</sup> Mácani achane te sutiarihipapuca esu mayena, tacamunuhi máitauchayare eta máitátiraya máemunasiraya esu mayena. Ésuripa esu esena te ticaimaripapuca, énerichuvare suítauchayare eta suítátiraya suémunasiraya ema suima. <sup>4</sup> Taicha esu esena vaipa ésuinahini téchinava eta suáquehe. Émapa téchahi ema suima. Ene macahehi ema achane, váipavare émainahini téchinava eta máquehe. Ésuripahi téchahi esu mayena.

<sup>5</sup> Éti ecaimaqueneanaripa, vahi ecuepurucaca tayehe eta iánesiracacairana. Téhesera tatiarihinapuca eta eyujarauchiravayare me Viya, ecuticacahipuca eta epanereruhi, tísapacare ínajica ánipina eta iánesiracacana. Te táequenénapa, táuricavare echávauchacacavare, apaesa ema Satanás vahi macuiturucahe eta máimijamurachirahe ena apanana.

<sup>6</sup> Tiuri, eta juca numetasirahehi, vahi nútina nucavanairipi. Nísapasera eta énéna ácahe. <sup>7</sup> Nuvarahahinéni ácutinuhini nútí eta mayénarenuirahi. Víjaracasipachusera me Viya eta vítaresiraya. Nararihi ena ajairana máyénaireana eta náitaresira. Nararihivare ena esenana máimaruana eta náitaresira. Nararihivare ena apamuriana májjararuichu ema Viya ticaimana.

<sup>8</sup> Énaripa ena nácara vichamuriana máyénaireanachaha, énapa ena máimaruanchaha, énapa ena tépenaimana, tiúripanahinéni nánasihini máimaruainahini; nácutinuhini nútí. <sup>9</sup> Étasera te vahi náratahahi ticaratacavana, tacamunuichuhi ticaimanayare, apaesa vahi nacuepujuquichava tayehe eta pecatu.

<sup>10-11</sup> Tásiha puiti, nutuparacavacayare ena nacaimaqueneanaripa. Ema ajaira vahi macuinajica esu mayena. Esu esena váhivare sucuinajica ema suima. Eta juca vanairipi tásihaquenehi mayehe ema Viáquenu, vahi tásihaquenéna nuyehe nútí. Téhesera natiarihinapuca ena vichamuriana náinajicaca, vahi táuricahini nápechavahini nacaimahini, nacacachanehipucaini. Tacamunuhi tichavauchacacanayare tivehacacana.

<sup>12</sup> Tiuri puiti, tájinachaha vanairipina tásihaquenéna me Viáquenu tayehe eta náinajisiracaca ena nacaimaqueneana. Níjaracahesera eta juca nupanereru nútí. Te matiarhipuca mácani vichamuri esu mayena vuíchaha vichamurinahi, te tiúrihipuca eta nacachaneracacahi, vahi táuricahini máinajicahini ésu. <sup>13</sup> Énerichuvare, te sutiarihipuca súcani esena vichamuri ema suima vuíchahavare vichamurinahi, te tiúrihipuca eta nacachaneracacahi, váhivare táuricahini suínajicahini éma. <sup>14</sup> Taicha ema suima, ichape eta majapanucareva me Viya táichavenehi eta sucaimairahi esu mayena. Énerichuvare esu esena mayenahi ema vichamuri, ichape eta sujapanucareva me Viya táichavenehi eta mayenairahi ema achane vichamuri. Énaripa ena nachichanaveana majapanuhivare ema Viya náichavenehi ena ticachichana, vaipa náepurucarehini me Viya. <sup>15</sup> Téhesera mácani vuíchaha vichamurina suímahi

esu vichamurihi mavarahapuca máinajica esu mayena, suísaparine máinajica. Ema Viya vahi macavanairipi eta suíchejiricahini éma, mayanarine. Taicha ema Viya mavarahahi viúriyare, tacuijapa tahapapiricahavihi eta vipanereruana. Énerichuvare súcani esena vuíchaha vichamurinahi mayenahi mácani vichamuri, te suvarahapuca suínajica ema suima, énerichuvare máisaparinevare suyana. <sup>16</sup> Taicha piti esena, vahi pecha te pimaitacaya-repuca picajayayasamurecha ema pima eta máehisiraina ema Viya. Pítiripa piti achane, váhivare pecha te pimaitacayarepuca picajayayasamurecha esu piyena eta suéhisiraina ema Viya.

<sup>17</sup> Ema Viáquenu tíjaracahehi eta ématanerepianahi te tíchuhahenapa. Etuparahapachuhi eta ématanerepiya. Váhiserá ínajicaimahi, ímiyanavare ítauchaya eta etuparahanahi. Étara eta juca nuvanairipi nayehe ena vichamuriana ticavasanahi te tamutu avasareana. <sup>18</sup> Nácani ticamarcarnaripa te máichuhavacapa ema Viya, vaipa táuricahini nacaepahavahini eta nacamarcairahi. Nácani mámarcareanarichaha te máichuhavacapa ema Viya, vaipa táurica nacamarcahini. <sup>19</sup> Tájina vahi étaparacaina te vicamarcahipuca, étasera tivarahacarehi vicaemataneacayare eta mavarahaqueneanahi ema Viya. <sup>20</sup> Namutu nácani máichuhaqueneana ema Viya, vahi náitsivachaimahi eta náematanerepianahi náijaracahi te máichuhainapa ema Viya. <sup>21</sup> Te ecaque-nuhipuca éti te tíchuhahenapa ema Viya, vahi ecueñamava eta ecaque-nuirahi. Téhesera ímaha eta íuchucuiraina, tájinachucha táichava. <sup>22</sup> Taicha mácani achane músuhi eta máítaresira, tayanapanerine matiarihinahi ema máquenuinahí; téhesera te mamirahu ema Viya, tínunánaripahi mácani achane nájina máquenuinahini eta máítaresira. Puiti ena apinana mavanaranaripahi ema Viáquenu Jesucristo, taicha ticuticacarnaripa eta nacaemataneasiraipa éma. <sup>23</sup> Taicha mavachareruhehi ema Viya. Ichapemurihi eta macatajivairahi íchavenehi éti. Puiti machaneraheripa éma. Eta tacahe, te navarahapuca nayurucahe ena achaneana, vahi ecuisapava nahapapicahe eta ecaemataneasirayare ema Viya. <sup>24</sup> Eta tacahe, nuparapenaveana, ímiyanavayare ecaematane mayehe ema Viya. Ítauchayare eta ématanerepipachu íjaracasihi me Viya.

<sup>25</sup> Tiuri puiti, tájina vanairipina tásihaquenéna me Viáquenu nayehe ena amaperuana máyéna-reanarichaha énapa ena máimaruanachaha. Nútisera numetacaheya eta nupanereruhi. Nuvarahasera esuapanu taicha núti nucaimitucasiquenehi mayehe ema Viáquenu, táichavenehi eta majapanuiranuhi. <sup>26-27</sup> Puiti juca vítaresirahi, tétavicavahi eta vicatajivairahi. Eta tacahe, németeaca núti tíuririchu nánasi ena ajairana nayehe ena nayenana nácani nacayenaqueneanaripahi. Vahi nacuinajicaca. Énaripa ena máyéna-reanarichaha, vahi nacutanuca ena nayenaina. <sup>28</sup> Mácanisera sutiaríhi esu mayena, tájinachucha pecatuina eta mavirahi esu esena. Ésurípa súcani amaperu esena, te tatupiruvahi eta sucaimaira, tájinachuchavare pecatuina eta sucaimairahi. Táitsivasera ichapeyare eta nacatajivairaya eta náitátiracacaya, tavetijipa te natiarihinapa ena nachichanaveanaya. Eta tacahe, nuvaraha numetacahe apaesa vahi ecucatajivahini.

<sup>29</sup> Tiuri, nuparapenaveana, nuvaraha numetacahe ticutimahi ánipirine eta juca vítaresiraya puiti juca vicaijuheyare. Eta tacahe, táurica eta íjarasiravahi yátupina eta ecaemataneasira ema Viáquenu. Étirípa, éti natiaríhi ena eyenana, vahi tacucarichu eta ecaéñamasirava nayehe ena eyenana, énerichuvare me Viya. <sup>30</sup> Te jararihipapuca eta tacáiyasiráhe écatísamurepuca, vahi ecuisapa tahapapicahehíni eta ecaemataneasira ema Viáquenu.

Te jararihipapuca eta tacaursamurechirahe, váhivare ecuisapava tahapapicahehini. Te ecaimahaquenehipuca, tísapacare eta ecamapura eta ímahaqueneana eta máijararuhehi ema Viya, váhivare ecuisapa tahapapicahehini eta ecaemataneasirahi ema Viáquenu. <sup>31</sup> Nuvaraha táurihini eta ítaresirayare te juca. Váhisera ecuisapava ecucañamaracava eta ecayeheirayare eta ímahaqueneana te juca apaquehe. Taicha tamutuyarehi témitiaca te táitecapapa eta táitaviraya eta juca apaquehe.

<sup>32</sup> Eta tacahe, vahi nuvaraha ecañamaracava tayehe eta júcana, taicha mácani achane máyénarehi, tájina tahapapiricahini eta macaemataneasirahi ema Viáquenu, mavarahahi máicutichiravaya eta macurisamurechiraya ema Viáquenu. <sup>33</sup> Mácanisera achane te sutiarhipa esu mayena, ticañamaracavainapa taicha eta máitátirayare esu mayena, mavarairahi macurisamurechaya ésu.

<sup>34</sup> Ene nacahehi ena esenana. Vahi tácuticaca eta napanereruana suyehe esu esena sucaimaquene ésupa esu esena máimaruchaha. Taicha súcani máimaruhi tahapasamurechahi eta suítátiraya ema Viáquenu, suvarairahi suítauchaya eta mavarahaqueneana. Suíjaracayarehi ema Viya eta suáchaneva étapa eta suáquehe. Ésusera esu esena sucaimaquenepa tahapasamurechapa eta suítátiraya ema suima, suvarairahi sucurisamurechaya éma.

<sup>35</sup> Eta júcana nuconsejarapianahi eyehe, nuvaraha eta táurivaina eta ícharacavaya. Vahi nuvaraha nupamicahe tayehe eta tacajeraqueneana. Nuvarahasera tacuijahini eta tihapapicahe eta ítátirayare ema Viáquenu.

<sup>36</sup> Tiuri puiti, eta juca nuconsejarapi mayehe mácani achane te sutiarhipuca esu machicha esena máimaruchaha. Te tahapapiricaipapuca eta sucaimairayare esu machicha, táichavenehi eta suítanahasiraipa; te tiúrihi eta máimairahi, máisapayarehi ticaima esu machicha. Tatupiruvayaresera eta sucaparaperayare. Tájinachucha táimanena; váhivare pecatuina. <sup>37</sup> Mácanisera achane, te tájina máichiravainahini, nájnavare tipamicaimahi; te mavarahapapuca suánasi máimaruina esu machicha, tiúrihi maicha. <sup>38</sup> Tacahe, tiuri máichayare mácani achane máimachayarehi, tatuparacahi ticaparapeyare esu machicha. Mácanisera vahi máimachahini esu machicha, éma tiúripana maicha.

<sup>39</sup> Esu esena ticaima tatuparacahi suítauchayare eta suíjarasiravahi ticaima, sunasirichuya eta mayehe ema suima eta náitaresirana. Tiámainucava te táitecapapa eta máitaviraya ema suima, tiúchucuhapa ésu. Ésupa téchinava eta suítatesirayare. Tísapacarepa eta suápechava sucaima. Tacamunuhisera mácani vicutiquenehi vichamurihi tisuapajirahi me Viya. <sup>40</sup> Tiápajucavasera tiúripanaya te suánasipa máimaruina. Eta juca tásihaquenepa te nupanereru. Németeacahi núti tétupicavapahi eta nuconsejarapiana taicha mávahárunuhi ema Espíritu Santo.

## 8

*Éma Pablo mametacavaca eta nayaseresirahi te tiúrihipuca nanica eta tinicacareana tacayujarahuquene te tamirahu eta nasiñarajiana ena achaneana*

<sup>1</sup> Puiti numetacaheya eta táicharacavahi eta enisira eta tinicacareana nayujaraurehi te tamirahu eta nasiñarajiana ena achaneana. Yátupi vimutu vímatiequeneha tájinachucha táimanena eta juca. Váhisera vácasiñavaimahi eta vítusirahi. Tacamunuhisera tajurucaya eta vémunasiravaca ena vichamuriana, vímicatasiracacaya eta véhisira ema Viáquenu. <sup>2</sup> Taicha nararihi ena ticasiñavavaicanapa, tímijachavanapa náimatiequeneha tamutu. Eta juca náichahi táimerecachi vuíchaha náitucahini, vuíchaha nacapayayaracahini eta

mapanereru mácani yátupipa máituca. <sup>3</sup> Nácánisera yátupihi témunacanahi ema Viya, éta tímicaecherachahi eta machichanaveanairahi éma.

<sup>4</sup> Tiuri puiti, numetacaheyare eta juca nuconsejarapi tayehe eta juca enisirana eta tinicacareana tacayujarahuquenehi te tamirahu eta nasiñarajiana ena achaneana. Tájinchucha táichava, taicha eta nasiñarajiana vahi yátupinahini víyanainahini te juca apaquehe, taicha émanarichuhi ema yátupiquenehi Viya. <sup>5</sup> Ena achaneana náimijachahi camurianahi ena víyana te anuma, étaripa te juca apaquehe. Namaveracapa ena náquenuanahi nayeheanahi viya, camurianapa naicha eta nasiñarajiana. <sup>6</sup> Vítisera viti vímatiequenehanahi émanarichuhi ema Viya Vicaiyaquene te anuma. Ema Jesucristo, émanarichuhi ema Viáquenuhi. Ema Tata Vicaiyaquene mapanerechapa eta tatiarihiyare tamutu eta vímahaqueneanahi; vítipa vimutu achaneana, mavaraha vitiarihiya eta vicaemataneasiraya éma. Tásiha, ema Machicha tépiyacahi tamutu. Puiti émapa téchahavihi vimutu. Éma, tíjaracahavihi eta arairu vítaresira.

<sup>7</sup> Tisimutuanasera ena vahi náimatiequeneha eta juca. Énaripa ena vichamuriana, nararihi ena vuíchaha náemitisicahini eta navaraira napi-caucha eta nasiñarajianaini. Éna, tisamavanahi vaipa náetupicavanahi eta nanisirahi eta tinicacare tacayujarahuquenehi, vahi táuricahini eta nasamirahi. <sup>8</sup> Numetacahesera puiti, vahi étaparacaina eta tinicacare, vijacapacareyare me Viya táicha. Váhivare étaimahi tiúrichahavihi mayehe ema Viya, te vahi vinicahi. Váhivare tijararecahavimahi mayehe te tiúrihipuca eta vinisira. <sup>9</sup> Eta tacahe, ecauneuchava yátupina machu émejecapavacha ena apamuriana vichamuriana vuíchaha náimatiequenehahini eta júcana. <sup>10</sup> Étisera éti ímatiequeneanaripa, te ísapavayarehipuca enica eta tinicacare nayujaraureanahi te tamirahu eta nasiñarajiana; tacahe, te máimahahepuca ema echamuri, énerichuvare tísapavayarehi tinica. Táitsivahisera tipicacaracavahi jácani te masamure. <sup>11</sup> Eta tacahe, échapavaya éti tayehe eta ímatiequenehairaripa machu émejecapavacha ema echamuri mácani vuíchahapiravahi máimatiequenehahini eta júcana. Émarichuhi iúmurivahi eta mavacharesirahehi ema Cristo eta máepenirahi te crusu. <sup>12</sup> Éti, te ehapapicapuca eta táurivahi eta napanereruana ena echamuriana, éti ecapecaturaípa eta mayehe ema Cristo, taicha eta émejecapavachirahi ena echamuriana. <sup>13</sup> Ácutinu eta juca nuyeherepihi: Te nútinahipucaini némejecapavachaini mácani nuchamuri táichavene eta nunisirainahini eta vaca, váhirine nunicaimahi, apaesa vaipa nucuemejecapavachahini éma. Éti apanava, ene ecaheyare. Váhivare ecuemejecapavacha ena echamuriana.

## 9

### *Ema apóstole Pablo, tatuparacahi náitíyare ena máimitureana*

<sup>1</sup> Núti, nájina náquenuinahini te juca apaquehe. Yátupi apóstolenuhi mayehenuhi ema Viáquenu Jesucristo. Nucutinasivacahi eta návacurehi nayehe ena apamuriana apóstoleana taicha nímahaquenehi ema Viáquenu Jesús. Étiripa, etupiruvahi esuapanu eta nímitusirahehi. Éta tímereuchanuhi eta táurivahi eta nucaemataneasirahi ema Viáquenu. <sup>2</sup> Tayanapane nacañajivarinepuca nácani vahi tisuapapajicanuanahi eta apóstolenuirahi. Étisera esuapanuyarehi, taicha etiarahi eti nímitureanahi, étira ímereuchanuhi eta yátupirahi apóstolenuirahi mayehe ema Viáquenu. <sup>3</sup> Étara nucatiuchiavahi eta juca nayehe ena tépurujiricanuanahi.



<sup>4</sup> Éti tituparacahehinéni ítátinuhini núti tayehe eta nunicaquenerepi táichavenehi eta apóstolenuirahi. <sup>5</sup> Énerichuvare tituparacahehi ítátihiaréni te sutiarihinahini esu esena nuyenainahini, súcani nucutiquenehi tisuapajirahi. Tácutihini eta ítátiravacahi ena esenana nayanana ena apamuriana apóstoleana, émaripa ema Pedro, énapa ena maparapenaveanahi ema Viáquenu. <sup>6</sup> Éti, ímijachaipapuca núti émapa ema Bernabé, vicarichuhi vahi tatuparacahavihini eta ítátirahavinahini eta vicametarairuirahi. <sup>7</sup> Puiti nuvaraha nímicutiarachinaheyare eta nacaitaticasira ena ticaematanerahiana. Ani tacahe: Namutu ena suntaruana ticaitaticasianayarehi nayehe ena comandanteana. Énerichuvare, ema tisucurecahi eta tinicacare, tatuparacahi masamapuhayarehi eta tahi eta masucureanahi. Émaripa ticayehehi vaca tatuparacahi máerayarehi eta tacheneama eta mavacane. <sup>8</sup> Eta juca níchirahehi, vahi nácarichu núti nucapanereruhi eta júcana. Énerichuvare eta Sagrada Escritura májurehi ema Moiséni títametacahavihivare. <sup>9</sup> Ánipa tacahehi eta táechajiriruvahi: “Vahi picuitisumucha eta pivuiyera, te ticaematanepahi taicha técuhanapahi éta”. Táitaurevaquene ema Viya vahi tácarichuhini eta vuiye eta máechajisihahi. <sup>10</sup> Énerichuvare víti mayunacahi te máechajiriruvahi. Mavarahahi vicaenicasiyare vimutu viti vicaematanerahiana. Tacutihi mácani achane ticaematanerahi. Macaemataneacahi muraca eta máesane, mavarairahi máimaequenehayare eta távameanahi eta máesane. <sup>11</sup> Ene vicahehi víti eta vévasirahi eta máechajiriruva ema Viya te esamureana. Éta tiúrichahehi. Tásiha, éti ecutinapa eta sucureca tímecavahi eta táhi. Tájiha táichava eta ítátirahaviyarehi víti. <sup>12</sup> Ena apamuriana ticasiñavanahi eta eyehe. Tásiha éti, tiúrihi eta ítátirahi. Vivetijipa víti vítaticarehi eta eyehe.

Váhisera vávarahahini vicasiñavahini víti eta eyehe, viyaseacahehini eta ítátirahavinahini. Vicamichahi tamutu, vimavarairahi tatiarihinahini jácani apanainahini tahapapirichahini eta esamirayarehi eta máechajiriruva ema Cristo. <sup>13</sup> Écharichuhi éti eta mavanairipi ema Viya nayehe ena téchapajiricana eta mayehe Templo, nanicayarehi eta tinicacare námaqueneasana ena achaneana nájaracasiruanahi ema Viya. Cájaracasianayareva éna eta vaca táeche eta námavahuanahi ena achaneana. <sup>14</sup> Ene tacahehi eta mavanairipihi ema Viáquenu eta viyehe viti vicametarairuanahi eta tapachinaquene máechajiriruva, tituparacahavihi vijacapayarehi eta vinicaquene taicha eta vicametarairuirahi. <sup>15</sup> Nútisera tájiha nímatiyahini nuyaseacahehini eta ítátiranuinhahini. Étaripa puiti te juca nucartane, váhivare nuyaseacahe íjaracanhini. Nucamichahi tamutu. Tiúririnehipucaini népenavanehini, machu tachimaracanuvaru táitava eta juca núrismurevahi núti tamajinairahi nuyaseacahehini.

<sup>16</sup> Núti vahi étaparacaina nucasiñavahi taicha eta nucametarairuirahi. Nutuparahaichuhi eta juca. ¡Páurechichanusami te némunahacava níjajica eta juca nucametarairuirahi! <sup>17</sup> Taicha núti, vahi nútijivainahini níjaracavahini mayehe ema Viáquenu eta nucametarairuiraya, étapapucaini nujacapihahini eta nuvachayarehi eta mayehe. Nuvanecasivahisera me Viya eta matuparasiranuhi eta juca némataneyarehi. <sup>18</sup> Ichapesera eta nuvarairahi eta nucametarairuirahi, taicha tijarahi te nusamure eta nuratahairahi nucametarairu, tamajinairahivare nuyaseacahehini eyehe éti. Vahi nupamicahehini eta ítátiranuinhahini táichavenénahini eta nucatuparahairahi eta apóstolenuirahi.

<sup>19</sup> Nájinahinéni te juca apaquehe napamicanuhini eta nucaematanea-

sirainahini táichavénehipucaini jácani náitátiranuhini, énaínahipucaini náechanuhini. Nútisera njaracavahi nátauchayarehi tamutu eta nucamunucarevahi nayehe ena achaneana, apaesa étainahipucaini níturusihavacahini ena nasimutuvaqueneana, machaneranainahini ema Cristo. <sup>20</sup> Étaripa te nítecapauchavacavare ena nujaneanana israelítana, ichaperinehivare eta nupicauchiravacahi éna, apaesa najimuyasamurepapurucaini eta náehisirainahini ema Cristo, étainapapurucaini níturusihavacahini éna. Ena nani, ichape eta nasuapirahi eta mayeherepiana ema Moiséini. Tásiha, te nucainunavaca éna, tájinavare vahi nucaecahihini eta nayeherepihi, nupicauchahivare éna apanava. Váhineni nútíparacainahini tayehe eta náehiruhi. <sup>21</sup> Tatiarihiserá eta yátupiquenehi néhiruhi nuvanahihi mayehe ema Viya, máijjararunuhi ema Cristo. Énerichuvare te nucainunavaca nácani apavasanana máehicarahanahi eta mayeherepianahi ema Moiséini, váhivare nucaecahivaca. Nupicauchahivare éna, nuvarairahi nucajimuyasamurechavacahini éna apanava. <sup>22</sup> Te nucainunahivarepuca ena vichamuriana nácani vuíchahahi náitamuturucahini náimatiequenehahini eta véhisirahi ema Cristo, váhivare nucaecahivaca eta namáimatiequenehairarichaha. Ichaperinehi eta nujapanuiravacahi. Nímicatacavacapa, nuvarairahi náimatiequenehapaini yátupinahini eta véhiruhi. Namutu ena achaneana, nujapanuvacahi. Nutanucahi eta nucajimuyasihayare eta nasamureana apaesa nanerejicavapaini náehicahini ema Cristo, machaneranainahini éna. <sup>23</sup> Núti nátauchahi tamutu eta júcana apaesa najacapa eta tapachinaquene máechajiriruva ema Viya, apaesa vácuticacapaini vámutuhini vijacapa eta viúrivayare maicha ema Viya.

<sup>24-25</sup> Écharichuhi éti, ena ticavijarurahiana pelota, tijaneacavanayarehi muraca, ichape eta ticaravahunumanayare apaesa túmeanainapa eta naratahairaya navereasihaya ena nánaranayarehi. Te vahi najaneacavahini, vahi tiverearecanaimahi. Ene ecaheyare éti, ichape eta étumechiravayare apaesa tauri eta ecaemataneasiraya ema Viáquenu, ejacapihainasarepa eta etuparahahi mayehe. Eta navereareruanahi ena ticavijarurahiana, vahi tánasimahi. Témitiequenehavaneyarehi. Vahi tácutimahi eta vijacapaquenezare me Viya. Éta, tájinapa ticamitiequenehaimahi. <sup>26</sup> Nútiripa eta nucaemataneasirahi ema Viáquenu, ichape eta nupamisiravahi, taicha eta nímatirahi eta mavarahaquene. Vahi némepururecavaimahi. <sup>27</sup> Nucaratacavahi muraca. Vahi nusuapahini eta tajamurachaqueneana eta náquehe. Nupamicahi eta táemitisisirainahini eta tamauriqueneana, machu néjicapavapurucaini, tásiha váipapurucaini nucujacpahini eta nícuchihí. Ichape eta nutsirihacarevapapurucaini, tavetijipa eta camurianairahi ena nímitureana tayehe eta véhisira ema Cristo.

## 10

### *Ema Pablo maconsejachavaca vahi nacucuti ena ticasíñarajijiana*

<sup>1</sup> Nuparapenaveana, nuvaraha némechaheyare eta náichararacavahi acane ena viáchucanaveanaini máumurivanaini ema Moiséini. Eta náehisirahi éma, tatiarihi eta úcaji tímícauchavacapaihi namutu éna. Eta nánuesirahi eta mar ticaijarehi Títsiama Une, namutu náimahahi eta tájjivahi eta nánuesiraya. <sup>2</sup> Namutu ena nani tjaracavanahi eta náitauchiraya eta náehisiraya ema Moisés, eta nánuesirahi eta ichape une mar, náehisirahi eta úcaji\*. <sup>3</sup> Énerichuvare

\* **10:2** Ema Pablo máimicuticha eta nánuesirahi eta ichapequene mar, tímicutijiricavahi eta nacaicachasihini te une, étapa te jara úcaji.

namutu ticuticacanahi eta nanisirahi eta tinicacare tásihaquenehi me Viya. <sup>4</sup> Namutuhivare térana eta une tásihaquenehi me Viya. Eta juca une náeresaparacahi éna, táuchurehi tayehe eta mari, maicha ema Cristo. Émairahi ema títapumirauchapahi éna, máitátivacapahi eta napaisirapahi. <sup>5</sup> Tamapurujihisera eta majaneasiravacahi ema Viya. Vahi émainahini éma náesenicahini. Tájinachucha vahi nacaurisamurechahini éma. Eta tacahe, máicuñacavacapa ema Viya. Namutuyaréni tépenaracánahi tayehe eta mávapahi apaquehe. Tiúchucuhanahisera ena nachichanaveana.

<sup>6</sup> Ena viáchucanaveanaini, táimicuñacahi eta najamurachirahi eta tamauriqueneana. Étara eta juca ticauyayacarehi eta viyehe, énémahihávinahini víti apanavare vácutihini éna eta najamurachirahi eta tamauriqueneana. <sup>7</sup> Váhivare ecuicutipa éna eta nacasiñarajirana. Échava eta Sagrada Escritura ani tacahehi: “Ena achaneana náichapa eta napiestachirahi eta nasiñaraji. Ticaejacacanapa eta nanisiraya, téranapa. Téchepucanapa tírimaicana te tamirahu eta nasiñarajihí” tacahepa eta Sagrada Escritura. <sup>8</sup> Váhira énéna vicucahe víti. Váhivare vicuveha esu apana esena. Tacuija eta vituhusivaina. Machu vácutiriana éna eta nacaicuñairahi táichavenehi eta náichirahi eta juca tamauriqueneana. Tépenaracanapa. 23,000 achane ena tépenanahi te jena étanaquenehi sache. <sup>9</sup> Váhira vicuyururujica tayehe eta mapanereruanahi ema Viáquenu. Ena nani tiyuruchavanahi, vaipa nasuapahini ema Viya. Tásiha, máicuñacavacapa éma, táechucavacapa eta quichare. Tépenaracanapa. <sup>10</sup> Váhira tacucarasacava eta échajisirana mayehe ema Viya. Vahi ecucuti eta náejecapiravahi ena viáchucanaveanaini. Macapapajiruanahi ema ángele mavaneruhi ema Viya. <sup>11</sup> Tacahehira eta juca náichavaquenevahi ena viáchucanaveanaini. Púiticha tanasihi te ajureca téjacahi tamutu maicha ema Viya. Tamutu eta juca témechahavihi víti, ticatsimavacarehivare viyehe víti vinecapaequenehanahi eta juca táitavirainapa puiti juca sácheana vicaijuheyare. <sup>12</sup> Eta tacahe, vahi ecuimijachahini tájina tiáquipaichahena. Tatuparacahi ecauneuchavayare tayehe eta tamauriqueneanahi. <sup>13</sup> Puiti juca eta vítaresira, jararihi eta tavaraha témejecapavachahavi. Váhisera ecuaramihini, taicha eta tacahehi eta náichararacavahi namutu ena achaneana te juca apaquehe. Ecasíñavayaresera muraca mayehe ema Viya, taicha yátupi eta macasiñacarevahi. Éma, vaipa máisapaimahi távayuchavahichaini eta tapamisirahe. Jéhesare éma, tíjaracahénapa eta etumevayare, ecamichirayare tamutu.

<sup>14</sup> Tásiha puiti, eti nuparapenaveana némunaruqueneana, érajicavayare nayehe ena ticasiñarajijiana. <sup>15</sup> Éti ímatiequenehahi tamutu. Eta tacahe, numetacahe apaesa táuri eta epanerequenehairaya. <sup>16</sup> Étaripa eta juca vérasahi vimutu viyujaraureasahi te vinicayare, étarichuhi táicutiarahi eta máitine máepusairuhi te crusu ema Viáquenu Jesucristo. Étaripa eta pan vinicaqueneasa viyuvetuhejiricacahi, étarichuhivare táicutiarahi eta máeche ema Viáquenu. Eta vérirahi étapa eta vinisirahi, táicutiarahi eta viúrujasiracacahi te máijare, tásiha éma tiávahácahavihivare vimutu víti viúrujiacanahi éma. <sup>17</sup> Yátupi apanapanenejihavihi víti, visimutuvaqueneanahi. Émanarichuhisera ema viávaháruhi. Eta vinisirahi eta pan, étarichuhi te máijare eta viyujarauchirahi.

<sup>18</sup> Eta juca viúrujasiracacahi, vicutivacaipa ena nujaneanana israelítana. Éna, tiúrujiacacanahi eta nanisiraya eta tacayujarahuquenehi me Viya eta tinicacare, navarairahi mávahácavacaini ema Viya táichavenehi eta nanisira. <sup>19</sup> Tiuri puiti, vímatiequenehahi tájinachucha táimanéna eta vaca nayuja-

raurehi náijaracasiruhi eta nasiñaraji ena achaneana. Tacutirichu eta vaca mayujaraurehi. Taicha eta nasiñaraji, tájinachucha tasamacarevainahini. <sup>20</sup> Nuvarahasera némechahe, eta nayeherepiana ena nani máimatirahanahi ema Viya, énachucha náijaracasichahi ena éreanana eta tinicacare. Vahi émainahini ema Viya náijaracasichahini. Eta tacahe, vahi nuvaraha ímica-siapava éti eta nayehe, machu náimivehahe nayehe ena éreanana. <sup>21</sup> Vahi táurichahini apiquerehahavinahini: eta véhisirahi ema Viáquenu, tásiha véhica-hivarepucaini ena éreanana. Te enicayare eta tinicacare, te érayarepuca, tatupiruva eta ecurujisiracacaina mayehe ema Viya. Mácarichu émaina ecasiña. <sup>22</sup> Machu ímiyusemaca ema Viáquenu, taicha vahi áratahaimahi ecanara éma.

*Vímerecaya eta vémunaraivanaya nayehe ena vichamuriana*

<sup>23</sup> Yátupinéni víti véchinavahi, viyeherepipachuyarehi eta vinisiraya, váhisera tácuticacahini táetupicavahini mayehe ema Viya, váhivare tácuticacahini táimicatacavahini eta vipauchiraya ema Viya. <sup>24</sup> Tásiha, nuconsejachahe puiti: Vahi ácarichuimahi eti iúrichavayarehi; énerichuvare etanucayarehi eta táurichiravacayarehi ena apamuriana.

<sup>25</sup> Te enicayarepuca eta vaca tiásiha te mercado, vahi ecuavamirahu eta enisirayare, váhivare ecucamesa ecuecha te ticayujarahhipuca eta vaca, apaesa tacuija tahapasamurechahe. <sup>26</sup> Taicha ema Viáquenu, éma tépiyacahi eta apaquehe, étapa tamutu eta távapahianahi. Vituparahaichuhi eta vinisir-aya máicha.

<sup>27</sup> Títecapa te náichuhahepuca enica nácani vahi vichamurianainahini, te ísapavayarepuca tiámaheana, tiúrichucha enica eta náijararuheyare. Váhisera ecuyasereca te ticayujarahhipuca eta tinicacare. <sup>28-29</sup> Téhesera natiarihinapuca nácani tinecapaequenehanahi, te nametacahepuca eta nayujarauhichirahi te tamirahu eta nasiñaraji, tiúripa vahi ecunica, apaesa tacuija tahapasamurecha eta mapanereru ema timetacahehi. Éti, émitisicapuca eta epicauchirahi eta nasiñarajiana. Émasera ema echamuri, vuíchaha máemiti-sicahini. Tásiha, nuvaraha tacuija tahapapicahini eta mapanereruana icha éti.

<sup>30</sup> Téhesera etiarihinapapuca ecahe: “Vahi núrica nucarinepapuca núti tituparacanuhi nujaneacavayare apaesapuca vaipa nuchemejecapavacha eta mapanereru ema apana. Núti nuhasulupayachaparaca ema Viya eta nunisirayare” ecahepuca. <sup>31</sup> Tiuri puiti, nuconsejachaheya: Tamutu eta enisirana étapa eta érirana, étapa eta ecaematanerana, tiúriyare tamutu eta íchirayare te mamirahu ema Viya énapa ena achaneana. Jéhesare, ena achaneana nacunachainapa ema Viya taicha eta náimairaheyarehi tiúrihi icha tamutu. <sup>32</sup> Jéhesare, nájinapa émejecapavaruímahí, énaripa ena israelítana, énaripa ena apavasanana, navetijipa ena vichamurianahi, taicha viciticacahi eta machichairahavihi ema Viya. <sup>33</sup> Ácutinu núti eta nuyehe-repihi. Ichapemurihi eta nuvarairahi nucurismurechavaca namutu. Vahi nácarichuhini núti nutanucahini eta núrichiravayare. Énerichuva nutanucavare eta núrichiravacaya ena apamuriana, taicha nuvarahahi tauri eta náehisiraina ema Viya, náuchucuiraina éna apanavare.

## 11

<sup>1</sup> Núti puiti juca nítaresirahi, étapa nupanahi eta máitaresirahi ema Cristo. Nuvaraha éne ácahéni éti apanavare, epananuyare núti eta juca nítaresirahi.

*Esu esena témetserajicavaya nayehe ena suchamuriana te iúrujisiravana*

<sup>2</sup> Ichape eta nucunachahe eti nuparapenaveana, taicha eta emaemitisisiranuhi. Ímianavahivare éhica eta ímitucasivanahi nuyehe. <sup>3</sup> Nuvarahasera némechaheyare eta juca apanavare téchacarehi. Ema Tata Vicaiyaquene, éma machutirihahicha ema Cristo. Ema Cristo, émapa vichutirihahi vimutu viti ajairana. Ene nacahehi ena ajairana nacayenaqueneanapa, éna nachutirihahivare ena esenana nayenana. <sup>4</sup> Eta tacahe, viti ajairana vahi viúrihahini vicaepacasihini te viyujarauchavaya étaripa te vicametarairuyare. Taicha te vicaepacasihi, tímicutijiricavaipa vémpuruhi ema Cristo eta vichutirihairahi éma. <sup>5</sup> Ésusera esu esena tatuparacahi ticaepacasiyarehi te tiyujarauchavayare, étaripa te ticametarairuyare. Taicha te vahi ticaepacasihi, tímicutijiricavaipa suémepuruhi ema suima eta suchutirihairahi éma. Te vahi ticaepacasihi ésu, tímicutijiricavaipa sucachucasiquenénahini ésu. Sucutihi ena túhusiana. <sup>6</sup> Esu súcani esena vahi suávarahahini ticaepacasi, ésu tivaraha suchutiyare ema mácani ajaira. Tásiha, te suvarahapuca suácutihavi viti ajairana, tiúripanahi sucachucasipaini, suítahisivanepaini. Téhesera te tímitsiriacyarehipuca eta suítahisiraya, tiúripanaichuhi sucaepacasihini, suácutihini ena supáraesenávana. <sup>7-9</sup> Taicha te tépanavanainapa ena achaneana, ema máinapuiruhi ajaira vahi étainahini máuchusinénahini suyehe esu esena. Te mavahuana ema Viya máepiyasinehi ema ajaira. Ema Viya manacahi eta máimahi, mavasirichuhi eta máimahihi ema Viya. Eta máurinavahi tásihaquenehi me Viya. Ésusera esu esena suínapuiruhi, súchurepa esu te máquehe ema ajaira, étaripa eta súrinavahi tásihaquenehi mayehe. Eta témepiyacahi esu esena, macompañerayare ema ajaira, mayenayarehi ésu. Vahi ésuina esu suémepiyacahini ema ajaira eta sucaimairaya. Eta tacahe, eta viyujarauchiravana, viti ajairana tatuparacahavi vahi vicaepacasihini, taicha viti vicaquehehi ema Viya, vicuticacahi ema viáchucaini Adán. <sup>10</sup> Énaserá ena esenana, tatuparacavacahi ticaepacasianayare eta nayujarauchiravana, nacutiyarehi ena ángeleana ticaepacamiranahi te natupihamirauchayare ema Viya, navarairahi náimereca eta napicauchirahi. <sup>11</sup> Puítisera, eta juca vítaresirahi véhisirahi ema Viáquenu, ichapemurihi eta véjiasiraipa eta náitáti rahaviya ena esenana. Vítiripa ichapemurihivare eta náejiasirahavihi éna eta vítatiraya viti ajairana. <sup>12</sup> Esu esena, yátupihi eta súchusirahi ésu te maeche ema ajaira, puítisera viti ajairana éta viúchusihahi te sujuhe esu esena ticachichahavi. Viásihaquenehisera vimutu mayehe ema Viya.

<sup>13</sup> Nuvaraha epanerequenehaya yátupina eta juca. Németeaca nájina éti ímijachavahini tiúrihi esu súcani máepacasinávehi eta suyujarauchiravahi me Viya. <sup>14</sup> Viti ajairana véchahi eta tatsirihacarévahi viújjiquihini eta vichutimaca. <sup>15</sup> Suímiturevahisera esu súcani esena súrihahi tiújjiquiyarehi eta suchutimaca. Étara tiúrinachahi ena esenana. Náijaraichuhi éna eta nacaepacsiraya taicha natuparahaichuhi éna. <sup>16</sup> Te natiarihinapuca nácani vahi navaraha nasama eta juca nímiturapihi, tacamunuhi napanerechinavayare tativaina. Tájina vímatiyahini eta juca apayeherepi. Énaripa namutu ena vichamuriana, tájina apanaina nayeherepinahini.

*Ema Pablo macajachavaca eta namaetupisiravahi te tinicanayare eta tinicacare táicutiarahi eta máepeninahavihi ema Viáquenu*

<sup>17</sup> Tiuri puiti, numetacaheyare eta juca apana. Tájinapa ecunachacarevainahini nuyehe, taicha vaipa táetupicavahini eta iúrujisiravanahi eyujarauchiravana. <sup>18</sup> Jucarihisera eta juca ticatihi nuyehe. Nusamairicahi te iúrujisiravana íchirana eta culto, vaipa tacuticacahini eta epanereruana, íputsimuriavavacapa. Németeaca núti cañarihihi eta íchavaquenévhahi. <sup>19</sup> Páureshami



eta íputsimuriavairacacahi. Étainapasera ecaecheraiyaya eti yátupique-  
neanahi machaneranahi ema Viya, énapa ena vahi machaneranainahini.  
<sup>20</sup> Eta juca tíchahehi vaipa táetupicavahini te ecurujicaca enisirayare eta  
tinicacare táicutiara eta máepeninahavihi ema Viáquenu te crusu. Váipasera  
émainahini tatupiruruchahini. <sup>21</sup> Títecapa vaipa ecuchapacacahini. Nararihi  
ticainapupuiricavanapa tinicana nayéhechirávacapá. Tinahacavanapa  
térana técvahachávanapa. Nararihisera ena apamuriana técuhanaripaicha.  
<sup>22</sup> Tájinaapa táurivainahini eta juca íchaquenehi. Ticutipa tacuijaquenéahini  
epenainahini, étainapaini enisihahini érihahini. Tímicutijiricavaipa épuru-  
vacahi ena apamuriana machaneranahi ema Viya. Ímicatsiriavare nácani  
tájinaquenehi naviyavahini. Étupicavaipapuca eta juca ecahehi. Tájinaque-  
nepasera ecunachacarevaina eta nuyehe.

*Eta táetupisiravahi eta vinisirahi eta tinicacare táemechahavihi eta  
máepeninahavihi ema Viáquenu te crusu*

*(Mt 26.26-29; Mr 14.22-25; Lc 22.14-20)*

<sup>23</sup> Núti tatupiruvahi eta nucaimitucasirahi mayehe ema Viáquenu. Tásiha,  
étarichuhivare eta nímiturapihi eyehe. Taicha ani tacahehi eta nímitusi-  
rahehi: Te jena yátiquenehi te ticaijararecasiyarepa ema Viáquenu Jesús,  
mavehapa te mavahuana eta pan. <sup>24</sup> Te tamutupa eta mahasulupayachirahi  
ema Viya, mayuvetucapa eta pan. Tásiha, máichavacapa ena máimitureana:  
“Enica eta juca néche. Étivenehi nímiararecavahi eta népeniraya. Eta juca  
aparahiyare te apaquehe, te étipava énicaca, éta témechaheyare nuyehe”  
macahepa. <sup>25</sup> Te tamutupa eta nanisirahi, mavehavarepa te mavahuana  
eta máerirare, mahasulupayachavare ema Viya. Tásiha, máichavarepa ena  
máimitureana: “Era eta juca nítineama táepusairuvayare. Eta juca táicutiarahi  
eta nucaejasirayare eta arairu matratune ema Tata Vicaiyaquene eta eyehe,  
majacapiraheyare eti ecasiñanuanayare, arairupa eta éhiruyare. Eta íchira-  
paracayare te énicaca, éta témechaheya eta nuyehe” macahepa ema Viáquenu.  
<sup>26</sup> Puíticha tanasi eta juca. Aparahiyarehi viyehe. Te vénicaca étapa  
eta véshacaca, vémechacacahi ena vichamuriana eta máepeninahavihi ema  
Viáquenu. Tiámáinucava vicainajiruyare te mápechavavare máiteca.

*Tacamunu eta vipicauchirayarehi te vinicaya*

<sup>27</sup> Namutu nácani tinicanahi téranahi eta táicutiarahi eta máepeninahavi  
ema Viáquenu, te vahi tétupicavahi eta napanereruanahi, váhivare napicauchahini,  
ticapecaturanaripa éna. Náemepururecaripa eta máítine étapa eta  
máepenirahi. <sup>28</sup> Eta tacahe, nácani tinicanayare, tativanumayare tipanerea-  
cavanayare te tájinahipuca náichiravainahini te mamirahu ema Viya. Te  
tájinahini nasama, tísapavanayarehi eta nanisirayare, náerirayare. <sup>29</sup> Taicha  
te vahi tipicauchacarehi eta náimairahi eta máeche ema Viáquenu eta nanisi-  
rayare, náerirayare, énajivaichucha tíchavanahi, tímicuñacavanaripahi eta  
nanisirahi. <sup>30</sup> Étara tíchahehi eta juca táitusiava esimutupa eti ecajumanahi,  
tájinaapa tatumevainahini eta iáqueheana. Ena apamuriana tépenanapaipa  
táicha. <sup>31</sup> Téhesera vítijivahi vétupirica eta vítaresirahi, ema Viáquenu vahi tícuña-  
cavimahi. <sup>32</sup> Taicha mavarahahi vétupiricayarehi. Vaipa vicaicuñaimahi  
tayehe eta nacaicuñairayare ena apamuriana achaneana máimatirahanahi  
ema Viya.

<sup>33</sup> Eta tacahe, eti nuparapenaveana, te ecurujicacayare eta enisirayare,  
ecuchapacacayare apaesa ínuna eta enisirayare. <sup>34</sup> Téhesera matiarhipuca  
mácani técuhasamureripaicha, tiúripa manicanuma te mapena, apaesa

vaipa macuemeharecahe ema Viya taicha eta tamaetupisiravahi eta iúrujisiravahi. Étasea eta juca apamuriana téchacareanahi viyehe, nímaharinepa núti. Nétupiricaya te níteca eta ara eyehe.

## 12

### *Vimutu viti vítupajijiasiravapachuyare maicha ema Espíritu Santo*

<sup>1</sup> Nuparapenaveana, nuvaraha numetacaheyare eta apana téchacareana, apaesa yátupina ácaicutiara. Jucarihi apanapanenejihi eta vítupajijiasiravayare maicha ema Espíritu Santo.

<sup>2</sup> Écharichuhi éti, te vuíchaha émainahini éhica ema Viáquenu Jesucristo, ísapajiricavaichaha tipamicaheana éhica eta nasiñarajiana tájinaquenehi eta tajícaparaiváinahíni. <sup>3</sup> Nuvaraha némechaheyare eta juca ímatirayare nayehe nácani vahi mávaháruanaimahi ema Espíritu Santo. Te nacahepuca: “Másájitatajipucaini ema iáquenu éti”, te nacahepuca eta juca, ímativacaya éna. Taicha ena mávaháruanahi ema Espíritu Santo, nacarichu ena tatuparacahi náimatiyare eta aquenucairahi ema Jesús. Énasea ena vahi mávaháruanainahini ema Espíritu Santo vahi tatuparacahini nácahepucaini: “Ema Jesús émara Viya Viáquenuhi”.

<sup>4</sup> Víti mávaháruanahi ema Espíritu Santo, apanapanenejihi eta vítupajijiasiravana máijararuhavianahi. Émanarichuhisera éma. <sup>5</sup> Énerichuvare apanapanenejihi eta vémataneana máijararuanahi ema Viáquenu. Émanarichuhisera éma. <sup>6</sup> Te tamutu eta vicaemataneasira, ema Viya émarichuhi ema téchahavihi, tíjaracahavihi eta vitumevahi, viratahairaya vimutu. <sup>7</sup> Énerichuvare ema Espíritu Santo, víjaracasipachuhi eta vítupajijiasiravayare máicha, vímitusihayarehi eta tasimutuqueneanahi namutu ena vichamuriana. <sup>8</sup> Nararihi ena máimicatavaca ema Espíritu Santo eta náitusiraya téchajicana, náimituresiraya. Ena apamuriana máijaracavacavare máejerareyare eta nacaicutiarairaya eta mapanereruana ema Viya. Émanarichuhisera ema Espíritu Santo tíjaracahi eta juca. <sup>9</sup> Nararihivare ena máijararuanahi eta nacuchapirayare muraca eta nayasearuanahi ema Viya táichavene eta nacasiñavairahi eta mayehe. Nararihivare ena máijararuanahi eta nacanasirayare ena nacajumaqueneana. <sup>10</sup> Nararihivare ena máijararuanahi eta nacuchusiraya eta tiáramicareana. Ena apamuriana náijaraichuvare eta ticametacasianaya mayehe ema Espíritu Santo eta máechajiriruvanahi ema Viya. Ena apamuriana máijaracavare eta náimatiasiravaneya ena achaneana nájahapuca nácani mávaháruanahi ema Espíritu Santo, nájahavarepuca ena mávaháruanahi ena éreanana. Ena apamuriana máijaracavare eta tíuririchuya eta náechajisiraya eta apaechajiriruvana. Ena apamuriana máijaracavare eta náitusirayare, nápepica náechajisiha eta apaechajiriruva, trépeteanayarehi. <sup>11</sup> Tamutu eta juca máichaqueneanahi ema Espíritu Santo. Macarichuhi ema máitaparacahi máijaracavaca eta náitucaquenepachuyare namutu ena mavarahaqueneanahi máijaraca.

### *Émanarichuhi ema véhiruhi*

<sup>12</sup> Viti achaneana, apanapaneneji eta táijareana eta viáquehe. Tisimutuhi eta táitupajijiasiravana. Étanarichuhisera eta táuchusihahi te viáquehe. Ene tacahehi eta véhisirahi ema Viáquenu Jesucristo. Vimutu viti véhicanahi éma, apanapanenejihavihi, visimutuhivare. Émanarichuhisera ema véhiruhi. <sup>13</sup> Tacahe, vahi étaparacaina te israelítahávipuca, te apavasasajuecuhavihivarepuca, étaripa te máquenurehavhipuca. Téhesera te vicaichasipa eta

véhisirayare ema Viáquenu, étanarinépa eta vímahi maicha ema Espíritu Santo. Énerichuvare, eta mávahásirahaviripa, vicuticacaripa eta máecasarechirahavihi eta viáchanevana.

<sup>14</sup> Yátupi eta viáquehe vahi étanainarichuhini eta táimahianahi, étapa eta táitupajijiasiravanahi. <sup>15</sup> Étaripa eta vívape, vahi távasihini eta vivahu, váhivare tacuticacahini eta táitupajijiasiravanahi. Étarichuhisera táunavahi eta viáquehe. <sup>16</sup> Étaripa eta vichaca, vahi távasihini eta viúquiha. Étarichuhivaresera táunavahi eta viáquehe. <sup>17</sup> Váiparinehi táuricaimahahi amairihainahini eta viáquehe tacauquihahini. Tásiha, tacuijapucaini viquiñainahini, tacuijapaini visamaquenénahini. Váhivare táuricaimahahi amairihainahini eta viáquehe tacaquiñahini. Tásiha, tacuijapucaini visirinahini, tacuijapaini vijiurenahini. <sup>18</sup> Ema Viya manacahi eta táematánerepianayarepachuhi eta juca táunavanahi eta viáquehe. Taicha tacahehi eta mapanereruhi ema Viya te tépiyacahavinapa. <sup>19</sup> Vahi mávarahahini étanainarichuhini eta táitupajijiasiravainahini eta viáquehe, amairiquihahavinahipucaini. <sup>20</sup> Yátupi tisimutuhi eta táitupajijiasiravanahi eta viáquehe, étanarichuhisera eta táviahahi.

<sup>21</sup> Tamutu eta juca viáquehe ticamunujiricacahi. Étaripa eta viúquiha tacamunuhi eta vivahuana. Étaripa eta vichuti tacamunuhivare eta vívapeana, vipaisihayare. <sup>22</sup> Étaripa eta tiávihanahi te amahe vijuhe, matumearairahaipahi eta vímairahi, étahisera tiápajucavahi ticamunucarepanahi. <sup>23</sup> Jucarihi eta viáquehe ticutimahi vahi múnainahi eta vímairahi. Étahisera tiápajucavapanahi vimuriachahi. Jucarihivare eta viáquehe vaipa táuricahini vímereichahini. Tásiha, tiápajucavapanahi vépacurehi, viciuchahivare. <sup>24</sup> Jucarihivare eta apana táunavahi eta viáquehe ticutimahi vaipa vicamunuhi vépacuchahini. Tímererecavahi nayehe ena achaneana. Tamutu eta juca máepiyaruanahi ema Viya, máicuchahi eta táimahianapachuhi, mavarahahi tácuticacahi eta vémunasiraya tamutu eta táunavanahi eta viáquehe. <sup>25</sup> Eta tacahe, te vícaematane, tamutu eta viáquehe tiyamuricahi, tímicatajiricacahi. Ichapehi eta táejasiracacahi. Vahi táiputsiacacahini. <sup>26</sup> Étaripa te tatiarihipuca eta táichavaquenevahi eta táunavahi eta viáquehe, támairiacahi ticati eta viáquehe. Téhesera tatiarihipuca eta táurisamurevahi taicha eta táitupajijiasiravanahi, tamutuyarehi eta viáquehe tiúrisamure.

<sup>27</sup> Ene ecahehi éti eta éhisirahi ema Viáquenu Jesucristo. Eta iúrujisiravahi mayehe, ecuticacahi eta táunavanahi eta máquehe. <sup>28</sup> Énerichuvare, ema Viya tituparacahavipachu eta viávacurepachuhi, mavarairahi vijaneacahayare eti vichamuriana, machaneranahi. Tituparacahavihi viti apóstoleana vímahaheya, énapa ena profetana, énapa ena tímiturecarahianahi eta máechajiriruvana ema Viya, énapa ena títurequenehanahi nacuchuca eta tiáramicareana, énapa ena ticanararecanahi ena nacajumaqueneana, énapa ena tímictarahianahi nayehe ena nacamunuquenévana, énapa ena tiúrianahi eta nacavanairipirana, énapa ena tiúrichu eta náechajisiha eta apaechajiriruvana, énapa ena trépeteana títucanahi nápepica eta apaechajiriruvana. <sup>29</sup> Vahi étanainarichuhini eta viávacureanahi. Vahi vámutuhini apóstolehavinahini, vahi vámutuhini profetahavinahini. Vahi vámutuhini vímiturecahini. Vahi vámutuhini vicuchuca eta tiáramicareana. <sup>30</sup> Vahi vámutuhini vítupajijiacavahini vicanararecahini ena nacajumaqueneana. Vahi vámutuhini véchajicanahini te apaechajiriruvana. Váhivare vámutuhini trépetehavinahini. <sup>31</sup> Tiuri puiti, étipa tacamunu eyaseaca ema Viya máíjaracahe eta ítupajijiasiravaina eta ticamunucarepana. Jéhesare, nuvaraha nímitucaheyare eta apana táurinaquenepana. Esamanuchaha.

## 13

### *Eta ticamunucarepanahi eta vémunaraivaya*

<sup>1</sup> Vítiripa, te tacuijahipucaini eta vémunaraivainahíni, vaipa tisuapacaré mahi eta vimetarairuana. Vémunasiricavapa. Tayanapane vítucahipuca véchajica tamutu eta apaechajiriruvana, vácutipucaini eta náechajisira ena ángeleana. <sup>2</sup> Te tacuijahipucaini eta vémunaraivainahíni, tájinapa vicunachacaré mahi me Viya. Tayanapane vicametarairuhipucaini eta vimetacasivanahi te anuma, támutuhivarepucaini víturuequeneháini, étaripa te máijahúchapucaini macayejecahini ema Viya eta ichapequene mari táichavenénahíni eta viyaseasirainahini eta vicasiñavairainahini eta mayehe. <sup>3</sup> Tásiha, te tacuijahipucaini eta vémunaraivainahini, tájina vijacapacaré mahi me Viya táicha. Tayanapanevare vicajiricahipucaini tamutu eta vímahaqueneana te vipena, téhevare vísapapucaini náijuchaini eta viáquehe táichavenénahini eta namaurisirahi véhica ema Viáquenu. <sup>4</sup> Téhesera yátupihí vémunarahi, vicayeheyarehi paciencia, vijapanurahiyare. Vahi vicapinarurecaimahi. Váhivare píncanillahavimahi. Váhivare vicasiñavavaicaimahi. <sup>5</sup> Váhivare vicavapajaimahi jácani táíñemahiqueneana. Váhivare víverejimirauchaimahi ena apamuriana achaneana. Váhivare tijuricati visemaimahi. Váhivare viciatianarecaimahi. <sup>6</sup> Váhivare táuricahini vicaecahirahihini te vímaha nácani ticaejeanahi. Viúrisamuresera te vímaha ena achaneana tíurihi eta náitaresira. <sup>7</sup> Te yátupihí vémunarahi, vicamichayare tamutu. Vahi énevanémahi visuapa eta echajirirucavana náepiyapiruanahi ena achaneana. Vicuchapayarehi eta táetupirisiravayare eta panererucana. Vahi víjahúchavaimahi vínajicava, vicuchapínávayare. <sup>8</sup> Tájinapa títaimahi eta vémunaraivayare, vímiyanavainapa eta vítare siraya. Eta jena sácheanayare, vímatiequeneha tamutu. Vaipa vicamunu eta vimetacasivana eta metarapianayare tásihaqueneanayare me Viya. Tájinapa viátajivaimahi eta visamirayare eta apaechajiriruvana. Váipavare tácajeraimahi eta visamirayare vímatiequenehavanénapa. <sup>9</sup> Taicha puiti te juca vítaresirahi, apaesachicharichu eta vímatiequenehairahi, apaesachicharichu eta vítusirahi eta metarapiana tásihaqueneanahi me Viya. <sup>10</sup> Járajapainapasera eta sácheyare, vímatiequenehainapa yátupi eta mapanereruana ema Viya, eta vimáimatiequeneruanahi puiti. Vaipa vácamunu ena tímitucahaviana.

<sup>11</sup> Nímicutichavahi núti eta viámaperuvahi. Vuíchaha vítucahini vipanerereca, vimapachichijiricavaichaha. Téhesera te ajairahavipa, te esenapuca, títsivachavapa eta vipanereruana. Vínajicapa eta viámaperuvainihi. <sup>12</sup> Ene vicahehi víti eta juca vítaresirahi. Puiti vuíchaha támutuhíni vímatiequenehahini. Ticutirichaha te vímararacaicha eta vicuna te jácani ichasi espejo, vahi tacaecherahini. Járajapainapasera eta sácheyare ticaecherainapa tamutu. Puiti, ticajera eta vicaicutiarairahi víti. Ema Viya vuíchaha tímitucahávihíni tamutu eta mapanereruana. Téhesera te aparahinapa, tamutuya vicaicutiara máicha. Tacutirichu eta máimairahi puiti eta vipanereruana víti te amahe eta visamureana. <sup>13</sup> Puiti, eta juca vicaijuheya, vímiyanava vámutu muracaina eta vicasiñavairahi me Viya, váhivare vicuyacujihini eta vicuchapirapaipa eta viúrivainapaipa, tacuijavareni tahapapiricahini eta vémunaraivayare. Jéhesare, tiápajucavapanayarehi eta vémunaraiva. Étara ticunachacarepanahi me Viya.

## 14

### *Tísapacare eta náechajisiraya eta apaechajiriruvana*

<sup>1</sup> Tacahe, nuvaraha núti yátupina eta émunaraivaina. Nuvarahahivare eyaseaca ema Espíritu Santo eta ítupajijiasiravaina, étaripa eta ítusiraina ecametarairu eta máechajiriruva tásihaqueneanahi mayehe ema Viya. <sup>2</sup> Tájina táichava, nácani téchajicana ema Viya eta apaechajiriruva. Éma masamahi. Vítipasera viti apamuri vaipa vácaicutiarahini eta náechajiriruvahi. Yátupihipuca máimitureanahi ema Espíritu Santo, váhisera náimereuchavahini eta máimiturapihi éma. <sup>3</sup> Vahi tácuti nácani nacametarairuhi eta máechajiriruvana tásihaqueneanahi mayehe ema Viya, ticaicutiaracarehi tamutu eta nametarapianahi. Tatupiruvahi eta náimitusiravacahi ena apamuriana. Náetumechahi eta náchanevana eta nasuapiraina. Éta nacurisamurechihavacahi te jácani napanereresirana. <sup>4</sup> Ema mácani téchajicahi ema Viya te apaechajiriruva, mayehechiravarichuhi te máchaneva eta macajurusiraya eta masuapajiraivaya. Émasera mácani ticametarairuhi eta máechajiriruvana tásihaqueneanahi mayehe ema Viya, macajurusinahi eta nasuapajiraivayarehi ena machamuriana.

<sup>5</sup> Nuvarahahinéni núti ámutuhini ítupajijiacavahini maicha ema Espíritu Santo, échajicahipucaini te apaechajiriruvana. Tiápajucavahisera eta nuvarairahi ecametarairuhini eta máechajiriruvana tásihaqueneanahi mayehe ema Viya, taicha étara tiúripanahi eta juca tayehe eta échajisirainahini te apaechajiriruvana. Tiúrihinéni échajicahini, tacamunuhisera natiarihinahini nácani trépete, nametacavacasarepaini ena apamuriana eta tacayemaqueneanahi apaesa tajurusihapaini eta nasuapajiraivainahini. <sup>6</sup> Nútiripa, nuparapenaveana, nítecapauchahepucaini néjirapanahini, tásiha néchajicapahipucaini te apaechajiriruva eta eyehe, éti vahi ácaicutiaraimahi, váipavare tímicitacahémahi eta tajurusirainahini eta ecasiñavairahi me Viya. Tacamunuhi néchajicahini te échajiriruvaichu eta nímitusirahénahini, éti ecaicutiarasarepaini tamutu eta numetacasivanahi me Viya, étapa eta máimerechaquenenuhi, étapapuca eta máimatiquenahi, arairu eta viyehe.

<sup>7</sup> Eta juca tímicitijiricavahi te mapacharajihini eta masiviviripi ema ticasivivihini. Vaipa tacaicutiaracarehini tájahapuca eta masiviviripi. Émaripa ema violinista, váhivare ticaicutiaracarehini tájahapuca eta mapununerapi. <sup>8</sup> Énerichu tacutihini mácani cúrnetéru nayehe ena suntaruana, te váhivare ticaicutiaracarehi eta macachujairahi, váiparinehi tiúrujicavanaimahi ena suntaruana táichuhaqueneanahi, taicha vahi nácaicutiarahini. <sup>9</sup> Ene ecahehi éti, eta échajisirahi eta apaechajiriruva, nájina nacaicutiarahini. Tímicitijiricavaipa nacuijahini nasamararacahini eta échajisirahi. <sup>10</sup> Yátupi tisimutuhi eta apaechajiriruvana te juca apaquehe. Nayehepachuhisera nácani ticaechajiriruvanapahi. <sup>11</sup> Vítiripa te náechajicahavipuca ena extranjeroana te náechajiriruva, váiparinehi vácaicutiaraimahi. Énaripa váhivare ticaicutiarahavianaimahi viti. <sup>12</sup> Tiuri puiti, vahi tacumapuruji eta evarairahi ejaaca eta ítupajijiasiravanaya máijjaruheyarehi ema Espíritu Santo. Tiúripana eyasesereca eta ítusiraina ímitucavaca ena echamuriana apaesa tajurucapaipa eta nasuapajiraivaina éna apanava.

<sup>13</sup> Tásiha, mácani téchajicahi te apaechajiriruva, tacamunuhi mayaseacahini ema Viya eta máitusirainahini mametacavaca eta tacayemaquenehi eta máechajiriruvahi apaesa nacaicutiarasarepaini nácani tisamararacanahi. <sup>14</sup> Taicha eta viyujarasirahi viti te apaechajiriruvana, te vítapiricapa eta viyujarasirahi, vahi tánasihini véchavahini eta vicayemaqueneanapahi, vémitisicavanehi tamutu. <sup>15</sup> Eta tacahe, tiúripanahi viyujaraca te véchajiriruvaichu, tásihaqueneanahi te visamure. Te vijirayarepuca, tiúripanahivare te véchaji-



riruvaichuvare, tásihaquenénahivare te visamure, vicaicutiarasarepaipa eta vicayemaqueneanapahi. <sup>16</sup> Téhesera apaechajiriruvahi eta eyujarasirahi me Viya, yátupihi eta ecunachirahi éma. Énaserá ena tisamaracaheanahi vahi náehicaímahi eta eyujarasirahi náimicatasirahehíni eta nayujarasirahi; taicha vahi nácaicutiarapahíni eta ecayemaqueneanapahi. <sup>17</sup> Tiúrihinéni eta eyujaracasahi eta ehasulupayachirahi éma Viya, énaserá ena echamuriana vaipa táimicatacavacahíni eta eyujaracasahi. <sup>18</sup> Jéhevaresera núti, ichape eta nuhasulupayachirahi éma Viya taicha eta nítusirahi néchajica eta apaechajiriruvana. Nucachuriacahehi emutu éti. <sup>19</sup> Étaserá te nucametarairuyare te namuri ena vichamuriana, vahi nuvaraha nácuti ena tiúpiemana eta náechajisira te apaechajiriruvana. Núti ánipirichu te néchajica, tamutuhísera ticaicutiaracarehi nayehe ena nímitureanahi.

<sup>20</sup> Nuparapenaveana, éti vaipa amaperuhénahíni. Nuvaraha táuripaini eta epanereruana, eta íchirayare eta táuriqueneana. Nuvarahasera ácutihíni ena amaperuana vuíchaha náitucahíni naicha eta tamauriqueneana. Énenapaini ácahehíni éti. <sup>21</sup> Ema Viya, ani macahe eta te Sagrada Escritura: “Nutuparacayare ena apanaqueneana achaneana apaechajiriruana náimitureca eta nuvanairipiana eta nayehe ena achaneana távacuanahi eta avasare. Váhiquenesera nasuapaimahi” macahepa éma Viya.

<sup>22</sup> Tacahe, nácani tiyujaracanahi te apaechajiriruvana, táicutiarahi eta máijarasiravacahi éma Viya náichavenéhi ena máehicarahanarichaha éma Viáquenu. Jéhesare, tayuchusamurechavacayare eta nasamararasirahi. Énaserá nácani ticametarairuanahi eta máechajiriruvana éma Viya, tayuchusamurechavacayare ena téhicanahi éma Jesús, taicha ticaravahuanayare eta nasamararasirahi. <sup>23</sup> Étaserá te jácani iúrujisiravana, te eyujaracahipuca emutu te apaechajiriruvana, tásiha, te natiarihipuca nácani masuapajirairahanarichaha, ticaecahiheanayarehi éna, náimijachayarehi máurishihehi. <sup>24</sup> Tiúripanayare eta ecametarairuiraya emutu eta máechajiriruvana éma Viya, te échajiríruvaichu. Tásiha, te natiarihipuca te iúrujirisiravahi ena masuapajirairahanarichaha, ticatisamurevanayarehi taicha eta nasamararasiraya. Tipanerequenehanainapa eta nacapecaturairahi. <sup>25</sup> Tacahe, tímatiacavanainapa eta máimatirahi éma Viya tamutu eta napecaturana tayumurevanainíhi. Tépuycanainapa téneuchavanainapa mayehe éma Viya. Téchajisiaheanainapa: “Yátupiquenéyapa mávahácavacahi éma Viya ena nániana” nacahenapa.

### *Tacapicahu tamutu eta iúrujisiravana*

<sup>26</sup> Nuparapenaveana, áni tacaheyare eta iúrujisiravanayare. Enerejicava eti íputsiacavayare eta ejirairaya. Énerichuvare tinerejicavayare mácani tíjaracavayare éma tímiturecayare. Énerichuvare te matiaríhinapuca mácani mavarahahi ticametarairuyare eta mametacasivanahi me Viya, tájinachucha táichavahi. Tísapacarehivare eta échajisirayare te apaechajiriruvana. Tacamunuhísera matiaríhiyare éma trépeteyare. Tamutu eta júcana, étara ticajurucayare eta nasuapajiraivainapaipaicha ena echamuriana. <sup>27</sup> Téhesera te natiaríhinapuca apinana, mapananapuca ena tivarahanahi téchajicana te apaechajiriruva, tájinachucha táichava. Tísapacarechucha. Tévacajiricacanayarehísera te jácani náechajisirayare. Váhivare téjiacavaimahi éma nayeheyare trépete. <sup>28</sup> Téhesera nájinapuca naviyavahi éma nayeheyare trépete, tiúripanaichuhi vahi nacuechajica te apaechajiriruva te namuri ena echamuriana náurujiruvanahi. Tiúri, te navarahahipuca náechajica éma

Viya, tavarahahi nacarichuyarechucha eta náechajisiraya. <sup>29</sup> Nácani ticametarairuanayare eta máechajiriruvana tásihaqueneanahi mayehe ema Viya, te apinanahipuca, mapananahipuca, tájinachucha táichavahi, tiúrichucha. Ticamunucarehisera ena náurujiruvanahi tisamararacanahi napaneréque-nehayarehi tamutu eta nacayemaqueneanapahi ena ticametarairuanahi. <sup>30</sup> Téheserapuca matiarhihi mácani máejaruhi, ticametacasihiquenehi me Viya; tásiha mavarahapuca macuchujipica eta mametacativasahi, tísapacarechucha eta máechajisiraina. Macuchapavayaresera máitapiricanuma mácani máinapuiruhi téchajica. <sup>31</sup> Emutu eti ecametacasiqueneanahi eta máechajiriruvana ema Viya, ítsivajiricacayare. Émanainapachu mácani téchajicayare, apaesa ena ímitureanahi namutu nacaravahu, náetumechavahivare éna apanava. <sup>32</sup> Ena ticametarairurahiana tatuparacahi ticuchapavanayare. Vahi ticainapupuicavanaimahi. <sup>33</sup> Taicha ema Viya vahi mávaraha mapacharajinahini nácani ticametarairuanayare. Tásiha, éti ecaejarusinavayare apaesa ecurisamurecha ema Viya.

Táepiyarichuhi eta juca viyeherepi víti te viúrujisiravana. <sup>34</sup> Ena vichamuriana esenana timatinanayarehi. Vahi téchajicanaimahi. Nasamararasinavaichucha. Taicha suíjaraichuhi me Viya esu esena susamararasirayareichuhi. <sup>35</sup> Te tatiarhipuca eta suvarahaquenehi suecha esu esena, tiúripanahi te náitecapapa te napena suyaserecapa ema suima. Taicha vahi súrihahini esu esena sucayasesereruhini eta suvarahaquenehi suecha te namuri ena echamuriana.

<sup>36</sup> ¿Tájaha tacayema eta ecasiñavavaisirahi? Vahi étinahini ínapucahini mametacahehini ema Viya eta máechajiriruva. Váhivare ácarichuhini éti tatuparacahini eta ejacapirahi. <sup>37</sup> Te natiarhipuca nácani tímijachavannaripa náimatiequeneharipa tamutu eta máechajiriruva ema Viya, náimijachaipapuca mávahácavacaripa ema Espíritu Santo, tatuparacahi éna napáne-rechinávanumayare eta juca nájurehi eyehe, tásihaquenehi me Viáquenu, mavanairipichuhi éma. <sup>38</sup> Téhesera matiarhihipuca mácani tépuruyare eta juca numetarapianahi, émaina máepurucare, vaipa tisamacaremahi eta eyehe.

<sup>39</sup> Tiuri, nuparapenaveana, epamicavachucha ecametarairu eta máechajiriruva ema Viya. Tásiha, táuricachucha ísapa nácani téchajicanaparacahi te apaechajiriruva. <sup>40</sup> Tacapicahisera támutu eta iúrujisiravana. Ecaejarusina-  
navapahi tamutu eta íchaqueneanayare te iúrujisiravanahi.

## 15

### *Eta máechepusirahi ema Cristo te máecari*

<sup>1</sup> Nuparapenaveana, nuvaraha némechaheyare eta numetarairuhi eyehe eta máechajiriruvahi ema Viya tayehe eta viúchucuirayare. Étara táemesiavahi eta juca te esamainapa, etupiruvavanehi ejacapa. Puíticha tanasihi eta esuapirahi. <sup>2</sup> Tásiha, puiti iúchucuhapaipa táichavenehi eta ímianiravahi esuapa eta numetarairuanahi eyehe. Németeaca yátupihí eta íjarasiravahi eta éhisiraya eta juca esamaquenehi.

<sup>3</sup> Écharichuhi eta nímiturapianahi eyehe, étarichuhivare tacahehi eta nímitucativasahi. Eta júcana eta tisuapacarepanahi: Yátupirahi máepeninahavihi ema Cristo táichavenehi eta vipecaturana, émairahi ema táechajisahaquenehi eta Sagrada Escritura. <sup>4</sup> Eta náimairahi tépenapa éma, náecarapa. Técheputacahisera éma te mapanaquenepa sache, taicha tacahehi eta tametarapihi eta Sagrada Escritura, timetacahavihi tamutu eta máichararacavayarehi éma.

<sup>5</sup> Tímerecavahi mayehe ema vichamuri Pedro, énerichuvare ena apamuriana apóstoleana. <sup>6</sup> Tásihapa tímerecavavarepa nayehe ena quinientoqueneana

eta nasimutuvanahi ena vichamuriana. Puíticha nararihichaha maverana ena tímahanahi. Nararhipasera ena tépenanapaipahi. <sup>7</sup> Te táequenevarepa, tímerecavavarepa mayehe ema Santiago. Tásiha, tiápechavavarepa tímerecava nayehe namutu ena apóstoleana.

<sup>8</sup> Tásiha, te táequenevarepa eta júcana, tiápechavapa tímerecava nuyehe, nútupavapa nímahahi éma. Ichape eta táramicarevahi nuyehe eta máichuiranuhi nútí néquenereruhi mayehenuyarehi apóstole, tacuti eta táijahúchirava te tiújuçayare esu esena. <sup>9</sup> Ichapemurihinéni eta némpuruirávahi nútí nayehe ena apamuriana apóstoleana. Váhivare táuricachini apóstolenuinahini eta nímairavahi, taicha ichapemurihi eta nupanajirisirávacahi ena náinapureanahi machanerana ema Viya. <sup>10</sup> Tíchuhanuhisera ema Viya, taicha eta máemunasiranusamihi. Apóstolenuhi puiti eta mayehe. Váhiserá némpururecavahini eta máemunasiranuhi. Jéhevare nútí, nucachuricahi ena apamuriana apóstoleana. Ichapemuripanahi eta nucaemataneasirahi éma. Váhiserá níputsiaracavahini nútí. Eta máemunasiranuhi ema Viya, tímícatacanuhi eta nucaematanerahi. Tíjaracanuhihare eta nétumechiravahi. <sup>11</sup> Tájinasera vahi étaparacaina eta juca nájahapuca nácani ena ticaematanepanahi. Étarichuhi eta vímiturapiana eyehe, eta esuapaquenehi puiti.

#### *Tayanapane vépenaipapuca, véchepuçayarehisera*

<sup>12</sup> Víti vímitucaheripa eta máechepusirahi ema Cristo te máecari. Németecasera etiarihichaha eti vuíchaha esuapahini taicha nusamairiricahi eta ecahehiji: “Vahi téchepucanaimahi ena náepenaqueneana”. ¿Tájahapuca tacayema vuíchahacaruhi tasuapacarehini eyehe? <sup>13</sup> Éti éjcapavahi eta epanereruana. Ímijachaipapuca vahi máratahaimahi ema Viya mácaechepucavaca ena náepenaqueneana. Te vahi macuratahahini, váhivarepucaini macucaechepucaini ema Cristo te máecari. <sup>14</sup> Tacahe, te vahi macuechepucaini ema Cristo, váipapucaini tacusuapacarehini eta vímiturapianahi eyehe, tamapurujipapucaini eta esuapirahi. <sup>15</sup> Te yátupinahini vahi tacusuapacarehini eyehe eta náechepusirayare ena náepenaqueneana, váhivare tacusuapacarehini eta macaechepusirahi ema Viya ema machicha Cristo. Tímícutijiricavaipahini vépiyahirahihini vivayarerecaipapucaini víti te máijare ema Viya, taicha eta vímitusirahehi eta macaechepusirahi ema Viya ema Cristo. <sup>16</sup> Te yátupinapuca vahi tisuapacarehi eta náechepusirayare ena náepenaqueneana, váipavarepuca tásuapacarehi eta máechepusirahi ema Cristo. <sup>17</sup> Énerichuvare, te váhipuca tisuapacarehi eyehe eta máechepusirahi ema Cristo, tásiha énerichuvare váipapuca tisuapacarehivare eta macaepahaira ema Viáquenu eta epecaturana táichavenehi eta ecasiñairahi éma. <sup>18</sup> Te yátupinapuca vahi tisuapacarehi eta júcana, tímícutijiricavaipa témitiequeneanaripa ena náepenaqueneanahi téhicanahi ema Cristo te achaneanarichaha. <sup>19</sup> Te yátupinapuca vahi tisuapacarehi eyehe eta júcana, tamapurujiripa eta vijaneasiravahi eta vítaesirahi puiti juca táichavenehi eta vicuchapiravahi vivarairahi vicachane ema Cristo te apana vítaesira. Te vahi tacuitauchava eta juca, ichapeyare eta vicatisamurevairaya.

<sup>20</sup> ¡Yátupiquenehisera eta máechepusirahi ema Cristo te máecari! Tacahe, éma ecutiararehi viyehe eta véchepusirayare víti apanavare te vépenaripapuca. <sup>21</sup> Taicha eta vépenira manaquipairuhi ema máinapuiruhi ajaira te juca apaquehe ticaijare Adán. Ene macahehi ema Cristo, éma tinaquipaicahi eta máinapuisirahi tayehe eta véchepusiraya te vécarí. <sup>22</sup> Táichavenehi eta mámariequenerahavihi ema Adán, émapa tiámahavihi tayehe eta vépenira. Puítiserá táichavenehivare eta véhisirahi ema Cristo, émapa tiámahaviyare

tayehe eta viápechiravayare vítareca. <sup>23</sup> Yátupiquenehi táejarurevahi eta juca. Tínapucahi ema Cristo téchepuca. Éma ecutiararehi viyehe. Tásiha, te mápechavavare máiteca te juca apaquehe, énainapa téchepucanayare ena náepenaqueneanaripa machaneranahi. <sup>24-27</sup> Tacahe, tiánehinapa eta táichecuaraquiyare eta tauriqueneanahi te apaquehe. Taicha ema Cristo macamítiequenehinapa tamutu eta náitupajijiasiravanainihi ena táquenuruhanainihi eta tauriqueneana. Ema Viya máijaracayarehi eta matumevayare macapaquechirayarehi namutu ena mánaranahi, étainapa mácatayanusihavacayare. Tacahe, macaepahainapa eta vépeniraini. Nájinainapa tépenaimahi. Taicha ema Cristo matuparahaichuhi mayehe ema Maiya eta aquenucairayarehi, émayarehi téchayarehi tamutu. Taicha ánipa macahehi ema Viya eta te Sagrada Escritura: “Éma nutuparacahi téchayarehi tamutu”. <sup>28</sup> Tájinasera vahi ticasíñavavaicaimahi ema Cristo eta émairaipa técha. Te máimahapa támutupa máetupirica, macuchapainapa eta vanairipianayarehi mayehe ema Maiya, taicha éma tíjaracahi ema Machicha eta máitupajijiasirava. Tásiha, ema Cristo máimereuchainapa étairahi tásiha eta vanairipiana mayehe ema Maiya. Émarichuhi téchahi tamutu.

<sup>29</sup> Tiuri puiti, nararihi ena apamuriana ticaicachasianahi náitsivahi ena náepenaqueneanaripa, namavarairahi náemitiequenehahini tayehe eta náechepusirayare. Ena nani, muracahi eta nasuapirahi eta yátupirahi eta náechepusirayare ena náepenaqueneanaini.

<sup>30</sup> Nuvaraha ácutihavi víti eta vicasíñairavahi me Viya. Tayanapane ichape eta tacauyayacarevahi eta vépenirainahini puiti juca sácheana, vicamichahisera tamutu taicha vicuchapavahi eta macaechepusirahaviya ema Cristo.

<sup>31</sup> Nútiripa, nuparapenaveana, tamutuhi sácheana ticauyayacarehi eta népenirainahini. Ichape eta tapicacarevahi. Nucurisamurechavasera eta núrismurevahi icha éti eta iúrivaipahi mayehe ema Viáquenu Jesucristo. <sup>32</sup> Núti muracahi eta nusuapirahi eta véchepusiraya te vécariana. Te váhipuca nusupahini, vahi nacucanaranuhini te juca avasare Efeso. (Náetaviuchahi eta navainarajivanahi, nacutihi éna eta sárareana táíñehiqueneanahi.) Tájinachuchasera táimaequenénahini nuyehe eta nímiyanavayare eta nucatiuchira eta véhiruhi, te tacuija yátupinahini eta véchepusirayare te vépena. Nararihisera ena téjecapavanahi eta napanereruana. Tímijachavanahi vaipa téchepucanaimahi te náepenapa, taicha ani nacahehi: “Vicamapuravachucha puiti vera vinica, viúrisamureyare taicha achichupuca vépenacaru. Tásiha, útavainapa tamutu eta viyehe” nacahepa.

<sup>33</sup> Vahi tacucahe eta epanereruana éti. Taicha éna, vahi tétupicavahi eta nayeherepianahi. Ticauyayacarehi najarareca eta táurinavaipahi eta eyeherepiana. <sup>34</sup> Tátupiruvapa táuri eta ítaresiraina éti. Váipavare ecuquicha eta pecatuana. Taicha nararihi ena vuíchaha náimatihini ema Viya te emuri. Titsíriacareripahi eta nacasiriquirahehi eti machaneraqueneanahi ema Viya.

#### *Apanainapa eta vicaqueheyare eta véchepusirainapa*

<sup>35</sup> Németeaca núti nararihi vuíchaha nasuapahini. Navarahapuca tiyaserecanuanaya: “¿Tájahapuca náicharacavayare eta náechepusirayare ena náepenaqueneanaini? ¿Tájaimahinapapuca eta nacaqueherayare?” <sup>36</sup> Ena tiyaserecanuanaya, tájina náechaquenéna. Puiti, nuvaraha epanerequeneha. Nímicutiarachinaheyare tayehe eta evaraqui. Eta evaraqui váhira tímaruca te vahi véhuriachahini te apaquehe. Ene vicahe viti achaneana. Tínapuca eta vépenira étapa eta náecarairahavi. Tásiha, te táequenepa, vijacapaya eta viáqueheana arairuya. <sup>37</sup> Te vévacapa eta jácani evaraqui, véhuriachapa te

apaquehe. Te tinanapahi eta apaquehe, tímarucapa eta vévaraqui. Váhiserá étainahíni tachavahini táuchucahíni eta evaraquíhi. <sup>38</sup> Táquehepachuhi eta táimarúsirahi eta evaraquí maicha ema Viya. Vahi apaimamajinahini eta táimaru. <sup>39</sup> Étaripa eta veche viti achaneana, vahi távasimahihíni eta taeche eta sárare. Apanahi eta táimahi. Eta taeche eta cáyure, apanahivare eta táimahi. Eta taeche eta jima, énerichuvare apanahivare eta táimahi. <sup>40</sup> Énerichuvare, eta nacaquehera ena tiávihanahi te anuma, vahi távasihini eta vicaqueherahi viti viávihanahi te juca apaquehe. Apanahivare eta táurinavahi eta nacaqueherahi éna. Víti, apanahivare eta táurinavahi eta vicaqueherahi. <sup>41</sup> Énerichuvare nuvaraha ácaicutiara eta tajaraivahi eta sache, apanahivare eta táimahi. Vahi távasihini eta tajaraivahi eta caje. Étaripa eta tajaraiva eta jarairiquiana, apanahivare. Jararihivare eta tijarahipana vacahi tayehe eta apamuriana. <sup>42</sup> Ene tacaheyare eta vicaquehera viti te véchepucapa. Apanayare eta táimahi. Te vépenapapuca, ticaecarasiyarehi eta viáquehe, timuyuyarepa eta véche, tépachaicavayarehi. Téchepucayarehisera eta apana viáqueheyare eta máepenacacainapa. <sup>43</sup> Ticaecarasiyarehi eta viáquehe, taicha ticajachacarepuhapa eta véche. Téchepucayarehisera eta tapachinaqueneyare viáqueheyare. Ticaecarasiyarehi eta viáquehe, matumerrairahahi. Téchepucayarehisera eta viáquehe, tétavicavainapa eta tatumevayare. <sup>44</sup> Ticaecaracasiyarehi eta enaha viáquehe. Téchepucayarehisera eta viáqueheyare apaimahinapa, tijarahinapa eta vicaqueheraya vicutinapa eta macaqueherahi ema Cristo eta máechepusiraipa. Tanasiyareichuhi eta táimahi eta viáquehe, espírituinapasera.

<sup>45-46</sup> Eta Sagrada Escritura, tacahehi eta táechajiriruvahi: “Ema Adán, máinapuiruhi ajairahi máchaneruhi ema Viya”. Éma ticaejaparecachi eta vímarúsirahi viti achaneana, vicutihí éma eta vijurusirahi eta vítaresirahi. Tásiha, te táequenéna, ema apana ajaira ticaijare Cristo, émapa tíjaracahaviyare eta apanayare vítaresirayare, vicaquehenapa eta máquehe. <sup>47</sup> Ema ajaira máinapuiruhi, te ticaepiyainapa, máteji eta máquehehi. Éma, távapahiyarehi eta apaquehe. Émasera ema apana ajaira, mávasarichuhi te anuma. Éma Viáquenuhi.

<sup>48-49</sup> Viti achaneana, énerichuhivare mátejihi eta viáquehe, taicha mámariequenehavihi ema máinapuiru ajaira. Eta vicaqueherahi tavasimahihíni eta macaqueherahi éma. Tipachinayarehisera eta viáqueheyare, tacutiyare eta tapachinavahi eta macaqueherahi ema ticavasahi te anuma. Eta vicaqueherayare tavasimahiyare eta macaqueherahi ema ticavasahi te anuma, taicha machichahavihi viti.

<sup>50</sup> Nuvaraha níminecapáequenehahéyare, nuparapenaveana, eta veche máteji vahi étaimahi tisiapayare te mávasa ema Viya. Tínapucayarehi ticait-siva eta veche máteji, máepenacacayarehi éta. <sup>51</sup> Énerichuvare nuvaraha níminecapáequenehahéyare eta juca tayumururevainihí: Vahi vámutuimahi vépenayare viti vítareruanáichaha. Ticaitsivayaresera eta viáquehe, viti éna ena náepenaqueneanaripahi. <sup>52</sup> Ticaema eta chujare, tíchuhavinapa viti véhicanahi ema Cristo. Tíjahúchavainapa eta táitsivachiravainapa eta viáquehe viti vítareruanáichaha, tacutiyarechucha viúmatsisina. Tíjahúchavainavarepa téchepucanayare ena náepenaqueneana, máepenacacainavarepa éna. <sup>53</sup> Taicha tatuparahahi eta viáquehe ticait-sivayare, máepenacacainapa. Máichecuaráquirenapa eta vítaresiraya. <sup>54</sup> Te tamutupa eta táitsivachiravayare eta viáquehe, títauchavainavarepa eta tametarapianahi eta Sagrada Escritura: “Ema Viáquenu macaepahaipa eta vépeniraini”. <sup>55</sup> ¡Vaipa tápica-



carehi viyehe eta vépenirapapuca, taicha vahi vánasimahi vépena! ¡Yátupihí eta véchepusiraya te vécarí! <sup>56-57</sup> Eta tacahe, vihasulupayacha ema Viya, taicha éma ticatiuchahaviyare tayehe eta vépenira. Tájina vahi vémitiequenémahi, véchepucayarehisera máichavenehi ema Viáquenu Jesucristo. Tásiha, te jena sácheyare, vaipa vicapecaturaimahi. Váipavare vicaicuñaimahi táicha. Vaipa vépenaimahi.

<sup>58</sup> Táitusiava, eti némunaruqueneanahi nuparapenaveana, ímiyanavachucha eta étumechiravaina tayehe eta juca véhiruhi. Vahi tacuequequérecava eta epanereruana. Ecaemataneacaquenena yátupina ema Viáquenu, taicha écharichuhi éti vahi támapurujimahi eta ecaemataneasirahi éma.

## 16

### *Eta nanaquiruvanayare*

<sup>1</sup> Étasera eta juca enaquisiravayare eta nayeheyare ena vichamuriana ticavasanahi te Jerusalén, étarichu éhicayare eta nímitusiravacahi ena vichamuriana ticavasanahi te avasareana eta táichapevahi eta departamento eta Galacia. <sup>2</sup> Puiti, nuvaraha nutuparacaheyare: Te lumincumuhuana, íputsisinavayarepahi, émanapachu eta manaquiruvanayare. Étiserá échinavahi áyanahipuca jácani evachasanahi te semanamuhuana. Iúnasinávapaipa apaesa tacuijapa étaparacaimahi te nítecapauchahépa. <sup>3</sup> Te nítecapapa eta ara eyehe, vévatacapa ena enerejiruanahi éti nayana te Jerusalén. Éna tiámanayare eta enaquiruvanahi éti. Níjaracayaresera eta nucartane eta náimeraquiya-repahi. <sup>4</sup> Téheserapuca nútínapaichu návaraha nuyana apaesa nútínapaipa nácháchanenupahi ena vanairucanayare.

### *Ema Pablo mavarahapa tiyanaya máejirapanavacaya*

<sup>5</sup> Eta nítesirayare, nuvaraha nétavajicayarepahi te avasareana tayeheana provincia eta Macedonia, nítecapirainapa eta ara eyehe. <sup>6</sup> Nuvaraha nunasipanayare eta eyehe. Tijuricati nucuchapa eta táetavisirahavina eta muracana técatícava. Tijuricati ímicatacanupahi éti apanava eta nímiyaniravayare nupaica. <sup>7</sup> Taicha vahi návarahahini ánipinarichuhini eta néjirairaheyare. Nuvarahahi nunasipanayare. Émapasera téchanuyare ema Viáquenu. <sup>8</sup> Nuvarahahivaresera nunasipananumayare ani te juca Efeso. Tiámainucava te táetavicavapa eta piesta ticaijare Pentecostés, nútijapainapa. <sup>9</sup> Taicha nuvarahahi nucamapuravanumayare nucametarairu taicha camurianahi ena tivarahani tisamararacanuana. Énerichuvarésera nararihivare camuriana ena viánaranahi.

<sup>10</sup> Nutuparacaheya, te máitecapauchahépa ema Timoteo, tauri eta ejacapiraina. Échapajirisanuyare, taicha émarichuhi nucutiquenehi eta vicaemataneasirahi ema Viáquenu. <sup>11</sup> Nutuparacahevare nacuija nacuepuru éma. Ímicatacasera eta mapaisirayare éma apaesa máitecapauchanúvane, émapaicha nucuchapahi nútí, énapa ena apamuriana nuchamuriana te juca.

<sup>12</sup> Nuvarahahivaréni mayanahini ema vichamuri Apolo eta ara eyehe, máhicavacahini ena tiámanahi eta nucartane. Váhisera máisapavahini mayanahini puiti. Téhéñarínevare apahenavare, mayanapa.

### *Táichecuaraqui eta macartane ema Pablo*

<sup>13</sup> Ecuneuchava yátupina. Túmehénahi tayehe eta juca véhiruhi. Yátupina eta éjairavavacáina. Vahi ecupica eta vicatajivairanahi. <sup>14</sup> Eta émunaraivayare yátupina táuchurena te esamureana, étaina táemesiava tamutu jácani íchaqueneanayare.

<sup>15</sup> Puiti nuvaraha némechahe ena tínapucanahi téhicana ema Viáquenu te avasare Corinto, ema Estéfanos, esu mayena, énapa ena machichanaveana. Ichapemurihi eta náijarasiravahi eta náitátirahi ena apamuriana vichamuriana. <sup>16</sup> Puiti nuvaraha epicauchavaca esuapavaca ena nani. Énerichuvare epicauchavare esuapa ena apamuriana tímícatatahavianahi eta vicaemataneasirahi ema Viáquenu.

<sup>17</sup> Ichaperinehivare eta núrísamurevahi puiti eta náitecapauchiranuhi ema Estéfanos, ema Fortunato, émapa ema Acaico. Tímícutijiricavainehi ámutuhini ítecapauchanuhini éti eta nímairavacahi ena nani mapanana tíásihanahi eta ara eyehe. <sup>18</sup> Téchararahainehi eta nusamure, túmenuinevare eta nusamiravahi. Ene ecaheyare éti eta táetumechiravayare eta esamureana eta ímairainahi ena nani mapanaqueneana te nachavapa eta eyehe. Epicauchayare ena nani, émunasinavayare.

<sup>19-20</sup> Téchajicaheana namutu ena vichamuriana ticavasanahi tayehe eta avasareana te juca Asia. Téchajicahevare ema Aquila ésupa esu Priscila, énapa namutu ena tíúrujiricavanahi te napena, taicha énarichuhi vicutique-neanahivare eta véhisirahi ema Viáquenu. Te iúrujicavapa, ejupacacayare éti, táicutiarainahi eta émunajirisiracacahi.

<sup>21</sup> Nuti Pablo eta nímiamaresirahi eta néchajiriruva eta eyehe, nútijacarovapa nájucha eta táichecuaraquihi eta nucartane.

<sup>22</sup> Nácanisera máesacharahanahi ema Viáquenu náimainavapainepa éna eta náicuñayare te machavapa. ¡Tata Viáquenu, pítecávanéni!

<sup>23</sup> Nuyaseuchaheparaca me Viáquenu Jesucristo táetaviuchahíni eta iúricarevaya máicha. <sup>24</sup> Nuvaraha ejacapai ámutu eta némunasiráhevacahi máichavenehi ema Viáquenu Jesucristo. Tamutupa eta néchajiriruvanahi eyehe.

## **Eta macartane ema Apóstole Pablo nayehe ena machamuriana ticavasanahi te avasare Corinto, ticaijare 2 CORINTIOS**

<sup>1</sup> Nuti Pablo, mayehenuhi apóstole ema Jesucristo. Manerejirunuichuhi ema Tata Vicaiyaquene, mavarairahi nímitucaya ena achaneana eta máechajiriruvana éma. Puiti juca nucartane, nápechava nucajurehe núti, émapa ema viparape Timoteo. Véchajicahehi emutu eti machaneranahi ema Viya ecavasanahi tayehe eta avasare Corinto, énapa namutu ena vichamurianahi machaneranahivare ema Viya ticavasanahi te avasareana tayehe eta departamento Acaya. <sup>2</sup> Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Nájaracahehini eta táurivaina eta epánereruana.

*Tétavicavahi eta macurisamurechirahavi ema Viya, macaepahairahi eta vicatajivairanahi*

<sup>3</sup> Núti nuvaraha nucunachaparaca ema Viya Macaiyaquene ema Viáquenu Jesucristo. Taicha éma, Vicaiyaquenehivare víti. Tétavicavahi eta majapanuirahavihi, tétavicavahivare eta macurisamurechirahavihi. <sup>4</sup> Puiti éma, ticurisamurerechahavihi tayehe tamutu eta viátajivana, apaesa viratahahivaréni víti apanava vicurisamurechavacahivaréni nácani ticatajivannahivare, tacutihi eta macurisamurechirahavihi víti ema Viya. <sup>5</sup> Tayanapanehipuca ichapepuca eta vicatajivairahi eta véhisirahi ema Cristo, táetaviuchaquenehivare eta táichapevahi eta macurisamurechirahavihi ema Espíritu Santo májararuhavihi ema Cristo. <sup>6</sup> Yátupiquene ichape eta vicatajivairahi táichavenehi eta vímitusirahehi eta máechajiriruvana ema Viya, vivarairahi vétumechaheyare apaesa iúchucuhayare. Émapasera ema Viya ticurisamurechahavipa tayehe eta vicamichirahi tamutu. Taicha éma, mavarahahi ímatiequenehayare eta macurisamurechirahe éti apanava te tamutu jácani ecatajivairana. <sup>7</sup> Víti vicasiñavahi eyehe eta ecamichirayare taicha vicuticacahi eta vicatajivairahi étapa eta macurisamurechirahavihi vimutu.

*Eta macatajivairana ema Pablo*

<sup>8</sup> Nuparapenaveana, nuvarahavare numetacahe eta víchararacavahi víti tayehe eta jena avasare departamento Asia. Ichapemurihi eta vicatajivairahi. Tiánehipa véchurihayaréni eta vitumevanahi tayehe eta vicamichirana tamutu. Váipavare vémeteacahini viúchucuhahini tayehe eta vépenira. <sup>9</sup> Vicutiripa nácani nacaparuasana te navahu ena aquenucana. Ema Viya máisapapa eta juca, mavarairahi vaipa vítijivaimahi vicasiñava. Mavarahapa yátupina eta vicasiñairayarehi eta mayehe, taicha éma, macarichu maratahahi máimichava ticaitarechavi te vépenapapuca. <sup>10</sup> Cape juca ticatiuchahaviripa tayehe eta vépenirayarehini. Puíticha ticatiuchahavirichaha. Tétavicavainehivare eta vicasiñavairahi eta mayehe, vahi tísapahavimahi vépenávanehíni. <sup>11</sup> Tacahe, nuvaraha ímicatachavini eyujarauchahavini víti. Éti, németeaca camurihénapa éti eyujarauchahaviyare, camuriheyareva éti ehasulupayachainapa ema Viya eta máimianirava ticatiuchahavi.

*Ema Pablo vahi máitujicavavanehini mayanahini tayehe eta avasare Corinto*

<sup>12</sup> Visamavahisera víti eta vicunachiravahi eta tájinairahi víchiravainahini, váhivare apiapiemahavinahini. Sánturuhahaviripa te nataracu namutu ena

achaneana, evetijipa éti. Émahisera ema Viya tímicatacahavihi táurihi eta vítairesirahi táichavenehi eta máemunasirahavihi. Vahi vítijiriruvainahini eta vítupajijiasiravanahi. <sup>13</sup> Puiti, tacahehi eta nucartaneana. Vahi apiapiemanuinahini. Váhivare tácajerahini eta ímatiequenehairayare. <sup>14</sup> Éti, ímatiequenehapaipa eta nímiturapiana. Puiti nuvaraha esamayareva eta nuconsejarapiana apaesa vácuticaca vivapinacaca vítijicaca te jena sache te machavapa ema Viáquenu Jesucristo.

<sup>15-16</sup> Tacahe puiti, eta táinapuiruhi nupanereruhi, nuvarahahi néjirapanaherehinehi, nétavauchiraheyarehinehi te nuyanirayarehi tayehe eta departamento Macedonia. Tásiha, te nuchavayarepaini, nápechavavare néjirapanáhe, apiheyarehinehi eta nucurismurechiraheyarehinehi. Tacahe, te tamutuyarepa, ímicatacanupapucaini éti eta nuyanirayarevare tayehe eta departamento Judea. <sup>17</sup> Apanaripahisera eta nupanereruhi. Vuíchaha néjirapanahémahi. Váhivare nuvayuacahemahi eta nuvarairahi néjirapanaherehi. Nítauchayare núti. Vahi ímijachaimahi éti nucuti mácani achane te mapanerechahi, váhisera máitauchahinehi. <sup>18</sup> Núti nucasiñavahi eta máimatiranuhi ema Viya. Vahi nuvayuacahemahi éti. <sup>19</sup> Cape juca, te nímitucahepa núti, émapa ema Silvano, émapa ema Timoteo, vímimaticahenehi ema Jesucristo, Machichaquenehi ema Viya. Puiti ímatipa éma, tájinaquenehi mavayuaravaina éma. Núti apanava, tájina nuvayuacahenehi taicha mavanaranuhi núti. <sup>20</sup> Máichavenehi éma, títauchavahi tamutu eta mapanereruanahi ema Viya. Víti, te visamavaipa eta máijjararuvanahi ema Viya, vijirauchahi éma. Vicahehi: ¡Amén! ¡Vicasíñava vímahainapa eta máitauchirainapa! <sup>21-22</sup> Émaripa ema Viya témuracachahavihi eta viúrujasirahi ema Cristo, víti étipa éti. Timarcachahaviripahivare éma, táicutiarahi eta machichairahavipa, taicha manerejiruhavihi. Tíjaracahaviripavare eta mávahásirahavihi ema Espíritu Santo te visamureana, máitametasirahaviparaca títauchavaya tamutu eta viúricacareyarehi.

<sup>23</sup> Núti, vuíchaha nítecaimahi eta ara eyehe, taicha némunacahehi, numavarairahi nucarameacahehinehi éti. Ema Viya tímatinuhi eta nutupiruvairahi. <sup>24</sup> Vahi nuvaraha nupamicaherehi eta esuapiranuinahinehi nápepejicahehinehi, taicha éti muracahehinehi eta esuapirahi eta juca véhiruhi. Nuvarahahisera nímicatacahe eta tápajusiravaina eta iúrisamurevayare éti.

## 2

<sup>1</sup> Eta tacahe, vuíchaha nítecaimahi. Taicha vahi návarahahinehi nápechavahinehi némecatajivachahehinehi te esamureana eta néjirairaherehi. <sup>2</sup> Taicha te ecatisamureva nícha, tímaticaréipahi nájina ticurismurechanuimahi núti. Ecarichuyarehi éti ecurismurechanuyarehi. <sup>3</sup> Tacahe, eta táitsivahi eta néjirapanairahe, nucajurehepa eta táinapuiru nucartane, nuvarairahi ésamiricavayare apaesa vaipa nucatisamurevaimahi icha éti. Nuvarahahisera núsamurehinehi ícha. Tacahe, németeaca étiripa iúrisamurehivaréni ámutu eta nuyehe. <sup>4</sup> Jéhevare, te jena sache, te nucajurehepa eta nucartane, ichapehurihi eta nupanereresirahi, nucatisamurevahivare. Níyahacavahi ichape. Váhiserá étaparacainahinehi nuvaraha némecatajivachahehinehi te esamureana. Núti nuvarahahi ímatihinehi eta táichapevahi eta némunasirahehi.

*Ema Pablo máijjaracahi eta maconsejarapi eta naperdonachirayarehi ema téjicapavahi*

<sup>5-6</sup> Tiuri puiti, ema maca téjicapavahi máichahi eta pecatu, tétavicavahi eta ecatisamurevahi máicha. Núti apanavare nucatisamurevahivare. Váhiserá

táurica vivayuchava eta vémecharesira éma. Puiti, tarataharipa eta ecuchusirahi te emuri éti. <sup>7</sup> Puiti táurica eperdonachayare eta máichavaquenevahi. Ecurisamurechainapa éma apaesa vahi macuvayuchava eta macatisamurevahi, máinajicavapuca. <sup>8</sup> Nuvaraha puiti iápechavahini ímereca eta émunasirasamihi éma. Ejacapavare te emuri. <sup>9</sup> Eta tacahe, nucajurehi cape juca, nuvarairahivare nucaicutiaraha te esuapayarepuca eta nuvanairipianahi. <sup>10</sup> Núti nuperdonacharipa ema maca achane te máijare ema Cristo. Táurica eperdonachayareva, ecutiranuyare eta nuperdonachirahi. <sup>11</sup> Taicha te váhipuca vipardonachacacahi, tíñehicarehi macamapurava ema Satanás, taicha tímaticarehi eta mavarairahi tímiáquipaichaviyare.

### *Vaipa máitucacarahini ema Pablo*

<sup>12-13</sup> Núti, te nítecapapa eta te avasare Troas, nímijachahi nuchimapahini ema nuparape Tito. Tétavicava eta néñamiravahi, nuvarairahi néchayarehi tájahapuca eta íchararacavahi éti. Yátupihinéni natiarihíhi ena camuriqueneana ena tivarahanahi tisamana eta nímituresirahi eta máimiturapiana ema Jesucristo. Étaserá eta néñamiravahi eta eyehe émapa ema Tito, nucame-tavavarepa nayehe ena vichamuriana. Nuyanavarepa tayehe eta juca departamento Macedonia, nutanusirayare éma.

### *Ema Viya, tétavicavahi eta majaneasiravacahi ena mavanaranahi*

<sup>14</sup> Tásiha, tétavicavahi eta núsamurevahi eta nuchimahirahi ema Tito eta te juca. Puiti, ichape eta nuhasulupayachirahi ema Viya eta majaneasirahaviparaca, tíjaracahavíhivare eta máitupajijiasirava eta viratahairahi vicánara tamutu, táichavenehi eta mávahásirahavíhi ema Jesucristo. Tituparacahavivare vicametarairuyarehi eta máimiturapiana, mavarairahi tíúriyarehi eta nasamiraya namutu ena achaneana tacuti eta najiusira jácani táijiyequeneana. <sup>15-16</sup> Taicha eta vicametarairuirahi tímicutijiricavahi eta táijiyeva eta incienso, eta máijarasirahi ema Cristo te mamirahu ema Máiya. Tacapusisiacahi namutu ena tisamahaviana. Natiarihi ena masupajirairahana, náemitiaruanayare taicha namavarairahi nasupahini. Tijechehi eta najiusira tacutihi eta máquehe mácani máepenaquenehi. Natiaríhivare ena tisuapanapahi náuchucureanayarehi; ticutirinehi najiucahini eta táijiyequene. ¡Tétavicavahi eta néñamiravahi eta vikatuparahairahi! <sup>17</sup> Viratahasera vítaucha eta vituparahahi. Taicha víti, eta vicametarairuira, tájina vahi vicavacharapi eta máechajiriruva ema Viya, vétupiripicapahipucaini, vivarairainahini tajamurachacarehini, tácutihini eta náichira ena apamuriana tímijachavanahi yátupiqueneana mavaneruana ema Viya. Vítiserá yátupiquenehavihi mavanarahavihi ema Viya; vitupiruvahi eta vicametarairuira eta máimiturapi ema Cristo.

## 3

### *Viti vicametarairurahiana eta téqueneha matratune ema Viya*

<sup>1</sup> Vahi nuvaraha ímijachahavi eta vicunachiravainahini puiti. Váhivare vácutihini ena nácani apamuriana tímiturahianahíji, tipairirícana tíamanahi eta carta táechajisihahi eta nacunachacarevahi. Tájinavare vímatiyahini viyaseacahehíni víti eta carta vímeraquinapahini táechajisihahini eta ecunachirahavinahini. <sup>2-3</sup> Étiserá, tájina véñamiravaimahi eyehe. Taicha tímaticarehi te avasareana eta táurivahi eta ítaresirana éti, táichavenehi eta vinacasamurechirahéhi eta máechajiriruva ema Viya. Eta juca tímereuchahavi víti eta yátupirahi mavanarahavianahi ema Viya. Éti, ecutihi eta carta vímera-quianapahi. Émaquene ema Cristo, ema iájuchahi, taicha tíjaracahehi ema



Espíritu Santo máitsivachaheyarehi eta itaresirana, táuriyarehi eta esamureana. Arairuripa eta itaresirahi. Puiti juca eta itaresirahi, tájinapa étaparacaina esuapahini eta vanairipiana tacajuquenehi acane te márime tabla.

<sup>4</sup> Eta tacahe, tájina vahi néñamavaimahi tayehe eta apóstolenuirahi. Nétumechava ichape, taicha nusiñavahi eta manerejirunuirahi ema Cristo, máijarasiranuhivare ema Viya eta máitupajijiasiravana. <sup>5</sup> Taicha víti vahi vítijivainahini víjaracava eta vítupajijiasirava. Émaquenehi ema Viya tíjaracahavihi eta vitumevanahi eta vicaemataneasirahi éma. <sup>6</sup> Émaquenehi tituparacahavi vicametarairuyarehi eta arairu matratune. Vahi étainahini nupamicaheyare eta esuapirayarehi eta vanairipiana. Taicha eta juca arairu matratune ema Viya, tíjaracahehi emutu ema Espiritu Santo, máitsivachinaheyare eta itaresirana, arairuinapa. Étasea eta vanairipi tacarichu táimivanerecahi eta náepeniraya ena téjecapavana.

<sup>7</sup> Acane, te jena sache te tiúcupaicapa ema Moisés te cerro, mámapahi eta vanairipiana tacajuquenehi te márime tabla. Eta mamira, tétavicavahi eta tarapepesirapahi táichavenehi eta macachanerahi ema Viya. Ena achaneana, vaipa náratahahini náimararaca eta mamira. Ichapehinéni eta tapicauchacarevahi eta vanairipiana taicha tétavicavahi eta tarapepesirapahi eta mamira ema tiámapahi. Étasea eta mayerevapa, timutserahavapaipahi témitiaca eta tarapepesirahi. Eta vanaripiana, tacarichuhi táimicapacahi nácani téjecapavanahi. <sup>8</sup> Étasea eta arairu matratune ema Viya, eta nucametarairuquenehi puiti, tétavicavahi eta tápajusiravahi eta tasuapacarevahi taicha tiámahavihi eta mávahásirahavihi ema Espiritu Santo. <sup>9</sup> Yátupihí eta tasuapacarevahi eta vanairipiana, tiápajucavahisera eta tasuapacarevapanahi eta máichuarapi ema Viya, vijacapacarehi mayehe táichavenehi éta. <sup>10</sup> Yátupi tirapepecahi eta mamira ema tiámapahi eta vanairipiana, váhisera étaparacainahini táurichahavihini. Jéhevarequenehi puiti, tétavicavahi eta viúrivahi maicha ema Espiritu Santo. <sup>11</sup> Eta tarapepesirahi eta mamira ema Moisés, timutserahavapaipahi témitiaca. Eta juca táicutiarahi eta ánipirichuhi eta tasuapacarevayarehi eta mavanairipiana. Étasea eta juca máichuhairahavi ema Viya, tiápajucavahi eta tasuapacarevahi taicha máichecuaraquireyarehi eta viúrivaya táicha.

<sup>12</sup> Étavenehi eta vicasiñavairahi vímahayare eta juca sache vicuchapaquenehi, viti matupararuana vétumechavahi eta vicametarairuirana. <sup>13</sup> Váhi vácutihini ema víyahaini Moisés, tépacamirahavahi te páñome, tiúriyarepa eta náimararasirayarehi ena machamuriana. Váipasare nanecapahini te timutserahavapa eta táemahairapahi eta tarapepesirahi eta mamira, táicutiarahi eta táepahairaya eta tapamisirahavini eta vanairipiana eta vítauchirayarehi. <sup>14-15</sup> Puíticha ena nujaneanana israelítana vahi nácaicutiarahini eta juca. Tacahe, te náechejicuha eta ichasiquene matratune ema Viya tacajuquenehi eta te libro májurehi ema Moisés, vuíchaha nácaicutiarahini. Tímicutijiricaváichucha táepacuchahi eta máepacamirahi ema Moisés. Ticajeraichucha eta nacaicutiarairayarehi. <sup>16</sup> Mácanisera achane, esenapuca, tíjaracavapa eta máehisirayarehi ema Viáquenu, ichapenapa eta macaicutiarairayare. Tájinapa táepacaquiñahaimahi. <sup>17</sup> Jéhesare, ema Viáquenu tíjaracahavisarepa ema Espiritu Santo. Tásiha, vaipa vipicacaracavahini eta vipauchiraya éma. Yátupina eta vivapinairavahi maicha ema Espiritu Santo. <sup>18</sup> Tacahe, vimutu viti véhicanahi ema Viáquenu vicutiripa eta espejo eta tarapepesirahi eta tajaravahi eta sache. Víti, yátupihí vímerecahi eta máurivahi ema Viáquenu. Vaipa vicaepacamirahini. Eta tacahe, víti puiti tiápajucavainapaipa eta

vicutirayare ema Viáquenu taicha tiápajucavahi eta majaraivahi te visamureana. Étavenehivare eta mávahásirahavihi ema Espíritu Santo máijjararuihi ema Viáquenu.

#### 4

<sup>1</sup> Eta tacahe, váhiquene viyacujiequenehavaimahi eta vicametarairuira, taicha ema Viya tímechahavihi eta máemunaraiva eta matuparasirahavihi eta juca vicaemataneasirayarehi éma. <sup>2</sup> Víti, tájina vímatiyahini viyumurujiricahini eta víchaqueneana. Váhivare víchahini eta titsirihacareana. Váhivare viútserurupinahipucaini vihapapicahipucaini eta máimiturapiana ema Viya, taicha vivaraha vicurisamurechaya éma. Tamutuhi véchajisihahi eta yátupi-queneana. Jéhesare, vivaraha nacaicutiarahini ena achaneana eta vímiturapianahi tásihaqueneanahi me Viya. <sup>3-4</sup> Nararihisamisera nácani vahi nacaicutiarahini eta vímiturapiana, taicha ema Váinaraji, tacaiyaquenehi eta juca apaquehe, éma tépacaquiñahavacahi éna. Taicha vahi mávarahahini náimatiequenehahini eta máimiturapiana ema Jesucristo, tétavicavahi eta tajarahiquenériahi taicha émaquenehi macunaquenehi ema Viya. Táitusiava éna, vaipa nácaicutiarahini eta vímiturapi. Náemitiaruanayarehi tayehe eta ecuñaraqui táicha. <sup>5</sup> Te vicametarairu víti, vahi vítinahini vicunachavahini, vivarahahini éhichahivi. Vivarahahisera esuapahini ema Jesucristo, ecaquenuyarehivare éma. Víti vanairucahavichucha eta eyehe, taicha vicaemataneacahi ema Jesús. <sup>6</sup> Ema Viya, te máepiyacainapa eta juca apaquehe, macavanairipipa tatiarihiyarehi eta tijarahi, témitiacayarepa eta timapicuquenénihini. Ene macahehi eta viyehi. Tímimaticahávihini eta majaraiva ema Machicha. Tétavicavahi eta tajaraivahi te visamureana. Éma, tímimaticahavipaipahi eta máetaviuchaquenehi máurivahi ema Viya.

*Puiti eta vítaresirahi, vímrecavaya yátupihini eta vicasiñairahi eta macatiuchirahavipaipa ema Viya*

<sup>7</sup> Eta juca véhiruhi vímiturapianahi, tétavicavahi eta tacunachacarevahi. Vahi vítinahini vicunachacarehini. Taicha viti páureanasami, vicutichucha eta muñeca náipune. Émasera ema Viya máimerecachi eta máitupajijiasiravahi, máijjarasirapa eta tatumevayarehi eta viáquehe. Váhisera vítijivainahini. <sup>8</sup> Táichavenehi eta vicametarairuira, tatiarihihi jácani víchavaquenévahi; ticatiuchahavíhisera ema Viya apaesa viúchucuhaparaca. Ichapevare jácani eta táimipaneresirahavihi; vicasiñavahisera eta majaneasirahavihi ema Viya. <sup>9</sup> Tipanajiricahavianahi ena viánarana, váhisera tijunijiacahavimahi ema Viya eta majaneasirahavihi. Tayanapane nachururupaicahavihini, émasera ema Viya vahi máisapaimahi ticapacahaviana. <sup>10-11</sup> Tamutu te jácani vicaijuheanapahi, natiarihi ena navaraha ticapacahaviana táichavenehi eta véhisirahi ema Jesús. Tamutu sácheana viámarairicapahi eta vépenira, vicutihini ema Jesús eta napanereuchirahi éma. Émarichuhisera ema Jesús máechepurequenehi. Éma máimerecachi eta máitupajijiasirava eta macuchucuirahavipaipahi tayehe tamutu eta víchararacavaqueneanahi. <sup>12</sup> Tayanapane víti viámarairicahi eta vépenira táichavenehi eta vímituresirahi, táitsivahisera eja-capahi éti eta tamaichecuaraquireyarehi eta ítaresira táichavenehi eta esuapirahavihi. <sup>13</sup> Ema víyarahaini David, ani macahehi eta máechajiriruvana eta te Salmo: “Núti nucasiñavahi mayehe ema Viya, tásiha vahi nupicacaracavahini eta néchajisirayare mayehe” macahepa. Énerichuhi vicahehi víti puiti. Vicasiñavahi mayehe eta macatiuchirahaviyare. Táitusiava, vahi

vipicacaracavaimahi eta vímituresiraya. <sup>14</sup> Taicha véchahi eta macaecheput-sirahaviyarehi ema Viya, vicutiyarehi eta macaecheputsirahi ema Machicha Jesús te máecari. Tásiha, étamurihavinapa, éti apanavare, eta vímeresiravayare te mamirahu éma. <sup>15</sup> Tamutu eta juca víchavaquenevanahi, támahi eta iúrivayarehi. Vicamichahi tamutu, taicha vivarahahi eti esimutuquenevanahi ejacpahini eta iúrivayare máijararuhehi ema Viya, apaesa ámutuhivaréni eti esimutuquenevanahi ehasulupayachahini éma, ecunachahivaréni.

<sup>16</sup> Eta tacahe, váiparinehi vicainajiruvaimahi. Tayanapanepuca tivitaji eta viáquehe, étasera eta viáchaneva tétavicavaichucha eta tatumeva tamutu sácheana. <sup>17</sup> Taicha eta viátajivanahi puiti juca vítaresiraichaha, vahi táunacacare. Técaticavánachucha, tiánucuhávanepa. Énerichuvare, jararihi eta táitsivahi, taicha vijacapai eta táetaviuchiravaya eta viúricacarevayare. Puiti tájina tácutimahi eta viúricacarevaya, taicha máichecuaraquirénapa éta. <sup>18</sup> Eta tacahe, vahi vipicacaracavaimahi eta viátajivanahi, taicha vahi táunacacarehini. Vicasiñavahisera mayehe ema Viya eta máimisipirahaviya eta te mávasa anuma. Tásiha, máichecuaraquirénapa eta viúricacarevaya eta viávihairaya tayehe.

## 5

<sup>1</sup> Vimutuhi vímati te náquipaicapuca eta viáquehe, tépenayarehi éta. Taicha éta, vahi muracainahini. Tacutihi te viáquipaica eta peti. Máejerarehi vicha taicha vahi muracainahini. Jararihisera eta viáqueheyarehi te anuma vícuchihi mayehe ema Viya. Éta, nájinapa tiratahaimahi tiáquipaica taicha máepiyaruhi éma. <sup>2</sup> Puiti, tétavicavahi eta tacatajivairahi eta viáquehe. Tamutuhi tasama. Eta tacahe, vivarahainehi tájahúchavahini tacaitsivahini eta viáqueheyare te anuma. <sup>3</sup> Taicha vicamunurinehi eta arairu viáquehe, apaesa vahi vitsirihaimahi eta vicachanerayare ema Viáquenu taicha vicutiyare éma. <sup>4</sup> Puiti eta juca vítaresiraichaha, tamutuhi tasama eta viáquehe. Ichape-murihi eta táimipaneresirahavihi. Váhisera étainahini eta vivarairainahini vépenávane, étasera vivarairahi tacaitsivahini eta viáquehe arairuinahini. <sup>5</sup> Tacahe, ema Viya tamutuhi máicucha eta táichararacavayare te apana vítaresira. Puiti tíjaracahavivare ema Espíritu Santo. Émapa títametacahaviparaca eta vijacapirayare eta vícuchianahi.

<sup>6-7</sup> Tacahe, núti vahi nupicahini eta népenirayarepuca, taicha ichape eta nucasiñavairahi mayehe ema Viya. Tájina vahi néñamavaimahi mayehe eta máijarasiranuinapa eta arairu náquehe, tayanapanane vuíchaha nímahahini. Eta táimiyansiravaya eta nítaresirahi, nuyerehi eta nícuchihi náqueheyare. <sup>8</sup> Nuvarahainehisera tájahúchavahini tacaitsivahini eta juca náquehe, nuyanasarepaini nucachanehini ema Viáquenu. <sup>9</sup> Eta tacahe, vivaraha ichapemurihi eta vicurisamurechirahi eta vicaemataneasira ema Viáquenu puiti juca vítaresiraichaha. Tásiha éma, tiúrisamureyare eta viyehe te vímercavainapa te mamirahu. <sup>10</sup> Taicha vimutu vímercavayare te mamirahu ema Cristo te mávacureyare. Ánaqui tímaticareyare tamutu eta víchaquenevanapachuhi puiti juca vítaresiraichaha, te víchahipuca eta táuriqueneana, te étahipuca eta tamauriqueneana. Te víchahipuca eta táuriqueneana, vijacapainapa eta vícuchianapahi.

*Ema Viya mavaraha vipauchayarehi éma, macaepahairaya eta vipicacarasiravahi eta vícuñayare*

<sup>11</sup> Nútisera, ichape eta nupicauchirahi ema Viya. Eta tacahe, nímiyanava numetacavacahi ena achaneana eta mayehe, taicha nuvarahahi námutihini napicauchahivaréni éma. Émasera, tétavicavahi eta máimatiranuhi táurivahi

eta nupanereruana eta nucaemataneasirahi éma. Puiti nuvaraha échahivaréni éti apanava eta táurivahi eta nupanereruana. <sup>12</sup> Tacahe, eta juca néchajisihahi, vahi nútinahini nucunachavahini. Nuvarahahisera nucunachacarehini eta eyehe, apaesa áratahahini ecamatinaca ena tímijachavanahi náimatiequeneha. Váhisera yátupinahini táuchurequenénahini te nasamureana. <sup>13</sup> Éna, tépiyaequenehanuanahi, máurishinuhíji náicha, taicha ichape eta nuvapinairavahi eta nucaemataneasirahi ema Viya. Tiúrihisera eta nuchuti. Nuvarahaparaca ichapenaini eta iúricacarevaina éti. <sup>14-15</sup> Núti nímatihí eta táetaviuchirahi eta máemunasirahavihi ema Cristo, taicha máepeninahavihi te crusu. Vimutu viti achaneana vituparahaichu vépenirapachu. Mavachachaipasera tamutu ema Cristo. Eta tacahe, tatuparaca vítsirijicava vicaemataneaca éma. Tásiha puiti, viti machanerahavipa. Vaipa vítijiricavaimahi. Émapa téchahi eta vítaresira, taicha eta machavirahi títareca. <sup>16</sup> Eta tacahe, viti véhicanaripa ema Cristo, étainapa vipanerechayare eta vítsivachiraipa eta vítaresira. Vaipa véhicaímahi eta apana panereruca tayeheanahi te juca apaquehe. Étaripa cape juca viásinequenehi váhirichu visuapapajicahini ema Cristo, vímijacharichucha éma vicutihí viti achaneanasami. Puítisera vaipa tácahehi eta vipanereruana. Visuapahi émairahi Machichaquenehi ema Viya. <sup>17</sup> Puítiripa viti viúrujiacanahi ema Cristo, apanahaviripa. Vínajicaipa eta viyeherepinihí tauriqueneana. Tamutupa arairuhi puiti eta viyeherepiana.

<sup>18-19</sup> Ema Viya, tétavicavahi eta máurivahi eta viyehe. Éma, mavarahahi vipauchayarehi éma. Mavarahahivare macaepahayarehini eta vipicacarasiravahi eta vícuñayare táichavenehi eta vipecaturana. Tásiha, mavaneca ema Machicha Jesucristo apaesa macaepahayarehi eta vipecaturana vimutu viti vicasiñavana eta mayehe, vaipa máecharairicaimahi. Tásiha, tájina eta vipicacarasiravaimahi eta vícuñainahini. Tásiha puiti, ema Viya tituparacahavipa viti véhicanahi eta víchuhairavacayare namutu ena apamuriana achaneana, apaesa éna apanava nacasiñavavare eta mayehe, váipavare tipicacaracavanaimahi eta mayehe. <sup>20</sup> Tacahe, víti mavaneruhavihi ema Cristo víchuhavacayarehi namutu. Tímicutijiricavaipa émaquenénahini máechajicavacahini ema Viya. Puiti viyaseacavacahi namutu nacasiñava mayehe ema Jesucristo; váipavare tipicacaracavanayarehini eta náicuñainahini náicuchiyaréni. <sup>21</sup> Ema Cristo, tájina mapecaturainahini. Étasera mavarairahi ema Viya viúchucuhayare víti, émapa ema Cristo tamuriacahi eta vipecaturana. Puiti, tájinasarepa víchiravaimahi, tájinavarepa viviurevaina te mamirahu ema Viya vimutu viti viúrujiaruanahi ema Cristo.

## 6

<sup>1</sup> Tásiha, nútí mavanaranuhi ema Viya, nuyaseacaheyare ímianava tauri eta éhisirahi éma. Vahi ecuemepurureca eta máemunasirahehi, majacapirahéhivare. <sup>2</sup> (Taicha ani macahehi eta máechajiriruvahi tayehe eta Sagrada Escritura: “Nuchicha, tétavicava eta pisamacarevayare eta nuyehe te pipiaracanu. Nucatiuchavivaneyare” macahepa. Jéhesare, puiti juca sache ticamapuracarehi eta epiarasirayarehi éma, ejacapacarechaha me Viya mapurare achanehechaha. Esamacarechaha puiti, taicha ema Viya mavaraha ticuchucuhaheyare eta te ícuñayaréni taicha eta epecaturana.)

<sup>3</sup> Núti nuvaraha nacuija nacaecahini eta vématanerepi viti apóstoleana. Eta tacahe, nupamicavahi nútí tiúriyare eta nuyeherepiana. <sup>4</sup> Eta tacahe, ichape eta néchampiravahi te nímitureca. Nímerecavahi yátupi eta mavanarairanuhi ema Viya. Ichapemuri eta nucamichirahi eta nucatajivairana, eta

néchuriasirana, étapa eta tacajeravana eta nítátijirísirava. <sup>5</sup> Vahi nucainjiruvaimahi táichavene eta náestasaranuhi ena nánarana, náeratasiranuhivare, tájinanéni viviurevainahini. Te apana avasareana timurijiacanuanahi taicha eta nasemanevahi. Eta nítátijirisiravahi, ichape eta tamuracavahi eta nucaematanerahi. Camurihivare eta numacaimasiravahi. Camurihivare eta nécuava eta nupaisirana. <sup>6</sup> Éti ímatinuhi yátupihi eta táurivahi eta nítaresira. Ímatinuhivare eta nucaimitucasihí mayehe ema Jesucristo. Táichavenehi eta mávahásiranuhi ema Espírítu Santo, nucayehehi eta paciencia nayehe namutu, nujapanurahihivare. Yátupiquenehi eta némunaraivahi. <sup>7</sup> Nímitucahi eta yátupihí máimiturapiana ema Viáquenu. Énerichuvare ema Viya tímica-tacanuhi tayehe eta máitupajjiasiravahi te tamutu eta nucametarairuirahi eta máechajiriruvahi, étapa eta nucatiuchirahi eta véhiruhi. <sup>8</sup> Eta nupaisirapaipahi, natiarihihi ena ticunachanuanahi, tiúriemanahi eta nuyehe. Natiarihihivare ena tépurunuanahi, tíñemahipivare eta nacayemaquene eta nuyehe. Natiarihihivare ena tímijarechanuana tépiyahirahi. Nutupiruvahisera tamutu eta nítaresirahi. <sup>9</sup> Natiarihivare ena vahi tisuapanuanaimahi, taicha tépuruanahi eta apóstolenuirahi. Natiarihisamivaresera ena tisuapanuana taicha tisamairiricanuanahi eta yátupirahi eta nímiturapiana. Tatiarihihivare te tiánehipa eta népenirayaréni. Núchuchahisera, maicha ema Viya. Natiarihihivare ena téhanacanuana muraca. Váhisera máisapavaca ema Viya eta nacapasiranuinahini. <sup>10</sup> Tatiarihihivare te nucatisamurevahi ichape. Nútisera nucurisamurereacavahi tamutu sácheana. Páurenuhi eta náimairanuhi ena achaneana. Ichapemurianahisera ena níjararuanahi eta tacaimahaquenehi eta náchanevana. Ani, tájina nímahaquenéna. Téhesera apana nítaresira, tétavicavaya eta nucaimahaqueneraya.

<sup>11</sup> Nuparapenaveana némunaruqueneana, nutupiruvahi te nusamure eta juca nuconsejarapianahi eyehe. <sup>12</sup> Vahi nuvaraha ecuimijachahini nínajiacache eta némunasirahehi. Németeacahisera éti ínajiacanuhi eta émunasiranuhi. <sup>13</sup> Éti, ecutihí nuchichanavehénahini eta némunasirahehi. Nuvaraha tachavahini eta émunasiranuhi, esuapiranuhivaréni.

### *Viti, tiávahácavahi ema Viya taicha machanerahavihi*

<sup>14</sup> Nuparapenaveana, vahi ecuávahácavaca nácani máehicarahanahi ema Viáquenu. Étaripa te arayenaheyare, vahi ecuveha nácani máehicarahanahi. Taicha téjecacayarehi eta panererucana. Viti véhicanahi ema Viáquenu, tatupiruvahi eta vipanereru. Énasera ena máehicarahanahi, tavayuacahi eta tauriqueneana. Viti viúricahi eta tijarahi; énasera náuricahi eta timapicu. <sup>15</sup> Taicha víti, mávaháruhavihi ema Cristo. Váiparinehi vicachanémahi ema Váinaraji. Tásiha, te viávahácavaca ena masuapajirairahana, tiápitavairicanahi eta véhisirahi ema Viáquenu. <sup>16</sup> Énerichuvare, tiávahácavahi ema Viya, émaripa ema Vicaiyaquene. Taicha ani macahehi: “Núti návahácavacaya ena téhicanuanahi. Néchavacayareva éna, taicha éna yátupiqueneanahi nuchaneranahi” macahepa. Eta tacahe, váhiquene táuricahini eta vicasiapiravahini eta nayehe ena vahi machaneranainahini ema Viya, taicha apanahi ema nasiñarajihí. <sup>17</sup> Taicha acane macavanairipipa ema Viya, ani macahehi: “Érajicava eta te namuri ena vahi nuchaneranaina, machu napareacahe eta namaeperajivana éna. Tacahe, éti nujacapaheyarehi. <sup>18</sup> Núti yátupiquenénuyarehi Ecaiyaquenenuhi. Éti nuchichanaveanahi” macahepa ema Viya máitupajjihaquenehi.



## 7

<sup>1</sup> Tacahe, némunaruqueneana nuparapenaveana, vahi távarahahini vínajicavahini tayehe eta juca vicuchapaquenehi puiti. Tacahe, vépachinachayarehi tamutu eta viáquehe étapa eta viáchaneva. Víjaracavayarehi tamutu te visamureana me Viya taicha eta vipicauchirahi éma.

*Eta máurisamurevahi ema Pablo táurivaipa eta náitairesira ena machamuriana*

<sup>2</sup> Nuparapenaveana, nuvaraha ímiyanavahini esuapanuhini. Taicha nájinahi te etaracu éti nacatajivahini náinajicavahini níchavenénahini núti. Nájinavare nucaetemaquenénahini, nímipananájicavacahipucaini. <sup>3</sup> Váhivare nuvaraha nucajachahe puiti. Nutupiruvahi eta numetasirahehi cape juca: “Tétavicavahi eta nucasamurerahehi. Tájina ticamitisicanuimahi, tayanapanepuca népena”. <sup>4</sup> Ichape eta nucasíñavairahi eta eyehe, nucunachahehi eta ecurisamurechiranuhi. Tayanapanehinéni ichape eta nucatajivairahi, tétavicavahisera eta étumechiranuhi ecurisamurechiranuhi.

<sup>5</sup> Étaripa te nítecapapa tayehe eta Macedonia, tájina nunarasirainahini. Ichape eta nucatajivairahi naicha ena ticitianacuanahi. Ichaperinehivare eta néñamiravahi eta eyehe. <sup>6</sup> Émasera ema Viya tétavicavahi eta máetumeraivahi nayehe nácani téñamavasamureanahi. Nútiripa nétumechavainehi maicha éma, eta nímairapa máitecapauchiranuhi ema Tito. <sup>7</sup> Tavetijipa eta mametasiranupa ema Tito eta ecurisamurechirarinehi éma. Timetacanutvare ichape eta éñamiravahi eta nuyehe; evarairaipacha ímahanu; ichapevare eta evarairahi esuapanu eta étupirisirahi ema maca achane téjecapavahi. ¡Eta juca, tétavicavainehi eta ecurisamurechiranuhi!

<sup>8</sup> Ichapehinéni eta táimipaneresirahehi eta nucartane. Nútiripa, ichaperinehivare eta táimipaneresiranuhi nucatisamurevahi te nucajurepa. Némitisicapasera puiti, taicha ánipi eta táimipaneresirahehi. <sup>9</sup> Puítisera, tétavicavainehi eta núrismurevahi ícha, eta táetaviasiraheripahi eta ecatisamurevahi. Eta núrismurevahi, vahi étainahini taicha eta ecatisamurevahi. Núti núrismurevahi taicha títsivachavaipahi eta táurivaipahi eta epanereruana, evarairahi ecurisamurecha ema Viya. Eta tacahe, víti tájinapa vácyemahini eta eyehe. <sup>10</sup> Taicha tatiarihíhi eta jácani máijararuhi ema Viya, táimipaneresirahehi, mavarairahi eta éneuchiravaya tayehe eta ejacapiravahi apaesa macuchucuhahe. Eta ecatisamurevahi tiámahi eta iúricarevaya. Énasera ena apamuriana achaneana tayehe eta juca apaquehe, yátupi ticatisamurevanahi, váhisera náeneuchavahini eta me Viya. Éta, tiáma eta náepenira. <sup>11</sup> Étisera, ¡tétavicavahi eta iúrivahi tásihaquenehi eta ecatisamurevairahi! Enevanerinehi ínajicahi eta éjecapiravahi taicha evarahahi ímiyanava ecurisamurecha ema Viya. Ichaperinehi eta nucunachirahehi taicha epicauchainehi ema Viya tayehe eta juca íchavaquenévahi. Evarahainehi níjahúchavahini nítecahinehi eta eyehe nímicatacahehinehi. Étisera enevanepa ecurujicacahi taicha eta esemanevahi maicha ema téjecapavahi te etaracu. Enevanepa émecharecapa éma. Ímrecavahi eta tamajinairahi éjecapiravainahini éti. <sup>12</sup> Núti, te nucajurehénapa eta táinapure nucartane, vahi émainahíni máimipanererecanuhini ema téjecapavahi, váhivare émainahíni máimipanererecanuhini ema maiya, émaripa ema majarareruhi. Íchavenehi éti eta ímipanereresiranuhi te nucajurehénapa, nuvarairahi ímereuchavayarehi eta yátupipapuca eta esuapiranuinahinehi te mavahuana ema Viya. <sup>13</sup> Eta tacahe, tétavicavainehi eta étumechiranuhi núti eta nusamairisirahehi eta esuapiranuipa.

Tavetijipa eta núrismurevapa eta táurivahi eta ejacapirahi ema Tito. Tétavicavahi eta máurismurevapahi ícha éti eta ésamirisiravaipa. <sup>14</sup> Váhirichu támapurujihini eta nucunachirahehi mayehe ema Tito eta núrismurevahi ícha éti. Puítiripa, ímereuchavapa yátupihí eta ecunachacarevahi. <sup>15</sup> Éma, tiápajucavapaipa eta máemunasirahehi éti. Máecharairicahi eta táurivahi eta ejacapirahi éma, esuaparinehivare, táichavenehi eta emansuiravahi étapa eta epicauchirahi ichape ema Viáquenu. <sup>16</sup> Núti apanavare, tétavicavahivare eta núrismurevahi ícha éti. Nucasiñavahi táimiyana eta esuapiranuina te tamutu.

## 8

### *Tatupiruvayare te visamure te vivaraha vicajirica*

<sup>1</sup> Tiuri puiti, nuparapenaveana, vivaraha vimetacahe eta nanaquisiravahi ichape ena apamuriana vichamuriana ticavasanahi te avasareana tina-paica te juca Macedonia. Éna, nasuapavanepa eta manacasamurechirahi ema Viya eta nacajirisirayarehi. <sup>2</sup> Ichapemurihinéni eta náichirahi ena ticatianacanahi náemepaurechavacahi, váhisera náinajicavahini. Tivapinavannarichucha. Tatupiruvahi te nasamureana eta náijarasirahi eta nanaquiruvana. Páureanahinéni, tímecavahisera eta nanaquiruvana, ticutirine rícoanainahini. <sup>3</sup> Núti néchajisihahi eta juca taicha nunecapaequenehahi eta tápajusiravahi eta nanaquiruvana. Vahi náeñamahini, náijaracahi jácane nacayehequene. Vahi vipamicavacahini víti. <sup>4</sup> Énaserá, ichapemurihivare eta nayaseasirahavihi vísapahini tinaquicavana éna apanava, navarairahi nacajiyare ena vichamuriana ticavasanahi te Jerusalén. <sup>5</sup> Éna, náetaviuchahi eta navapinairavahi. Tínapucapa tinaquicavanahi eta nacaemataneasirahi ema Viya, navarairahi nacurismurecha éma. Tásiha, étapa eta náicurehi ena vichamuriana. <sup>6</sup> Eta nímairahi núti eta navapinavairahi eta nacajirisiraya, nupanerechahi nuvanecaya ema Tito machava máiteca eta ara eyehe apaesa táitauchavapaini eta enaquiruvanahi éti apanava. Cape juca épaniravainapa. Puiti ítauchavanepaini. <sup>7</sup> Taicha éti, ichapemuri eta ecasiñavairahi me Viya. Tétavicavahivare eta échemaravahi. Camurihevare éti ímiturahiana. Evapinavahivare eta ecaemataneasirahi ema Viya. Tétavicavahivare eta émunaraivahi eta viyehe. Eta tacahe, táurica tápajucavahivaréni eta enaquiruvana ecajirisiraya.

<sup>8</sup> Váhisera nupamicahe eta nuanesirahénahini. Nuvarahahisera ímatiequenehahi eta navapinaraivahi ena apamuriana vichamuriana apaesa ímrecahini éti apanava eta yátupiquenérahí émunaraivahi. <sup>9</sup> Ímatirichuhi éti eta máemunasirahavihi ema Viáquenu Jesucristo. Éma, tamutu tiúricacarehi te mávihahi te anuma, tájinahinéni mácamunuhini. Étivenehisera tiúcupaicapa te juca apaquehe. Páurehi éma eta máitaresirahi apaesa éti ejacapahini eta iúricacareva maicha éma.

<sup>10-11</sup> Németeaca táurica ítauchavanéni eta juca enaquisiravahi, váchupa épanavaqueneripahi cape año. Táimiyana eta evapinairavayarehi eta ítauchiraya eta enaquiruvanayare tásihaquenehi eta jácane tatiarhiqueneanahi ecayehequeneanahi. <sup>12</sup> Etiarihi erataha enaquica apaesachicha. Etiarhivare erataha iápajucava eta enaquisiravahi. Etiarihi erataha enaquica camuri. Tacamunuchucha tátupiruva te esamureana, evapinavahi eta enaquiruvaya apaesa tijacapacareya mayehe ema Viya.

<sup>13</sup> Vahi nuyaseacahe échuriahahini éti táichavénehanahini eta ímicatasirayare ena apamuriana. <sup>14</sup> Nuvarahahisera ímrecavahini eta ímicatasiravacayare ena vichamuriana. Puiti ecaimahaquenevacahi, eratahahi ecajirica ena

náechuriaruanahi. Tijuricati te apana año, étipavainapapuca échuriaca. Éna títsirijicavanainapa eta eyehe, énapavainapa tinaquicavanayare. Ene tacaheyare eta ítaresirayare, ecuticacayare. Nacuija nacucatajiva tayehe eta ecamunuqueneana. <sup>15</sup> Vítauchayare eta tacayemaquenehi eta Sagrada Escritura, ani tacahe: “Namutuhi ticaniruana. Nájina nácatajivahini, nájinavare náechuriacahini, váhivare náemepururerecahini” tacahepa.

*Éma Tito énapa ena apinana vanairucanahi mayehe éma Pablo*

<sup>16</sup> Núti nuhasulupayachahi éma Viya eta manacasamurechirahi éma Tito máeñamiravahi eta eyehe, tacutihi eta nusamure néñamiravahi eta eyehe.

<sup>17</sup> Éma, matupiruvahi tijicapenuhi eta nutuparasirahi téchapajiricaheyare. Ichape eta mavarairahi téjirapanaheyare, taicha tétavicavahi eta máemunasirahéhi.

<sup>18</sup> Eta mayanirayare éma Tito eta ara eyehe, vévatacayare macachanepahi éma apana vichamurivare. Tímaticarehi éma eta macunachacarevahi te jácani máimituresirapahi nayehe ena vichamuriana tayehe eta véhiruhi. <sup>19</sup> Éma maca nerejihi ne vichamuriana eta máimicatasiranuyare eta vipaisirayare, víjarasirayare ena vichamuriana eta enaquiruvanahi. Víchahi eta juca, vivarairahi vicurismurechaya éma Viáquenu. Vímereuchaheyareva eta evapinairavahi éti ecajiraivahi. <sup>20-21</sup> Taicha núti eta viámirayare eta ichapequene enaquiruvana, nuvaraha nímerecayare eta táuriva eta víchira, apaesa vahi nacuechajisianu nácani achaneana. Éma Viya tímararacanuhi eta táuriva eta nupanereruana. Nuvarahavare tiuri eta náimairahi ena vichamuriana.

<sup>22</sup> Énerichuvare vévatacayareva éma apanavare vichamuri. Éma, ichapemurihi tímereuchava eta mavapinairahi eta macaemataneasirahi éma Viáquenu. Puiti éma, tivapinavavarepa eta máitecapauchiraheya, taicha macasiñavahi eta máimatirainapa eta evapinavahi eta ecajiraivahi éti.

<sup>23</sup> Núti nuvarahahi náimatiyarehi namutu éma Tito, eta émairahi nujupaha tayehe eta juca vématanerepi. Vicuticacahi eta vicaemataneasirahe, véchapajirisirahehi éti. Étaripa te nacayasesererupuca nayehe ena apinana vichamuriana macachanequeneanayarehi éma Tito, énerichuvare emetacayare eta nerejianahi ena apamuriana vichamuriana, táichavenéhi eta táurivahi eta nacaemataneasirahi éma Cristo. <sup>24</sup> Nuvarahahi ímerecavayare eta nayehe ena nani apinana vichamuriana eta yátupirahi eta émunaraivahi, apaesa ecurismurecha namutu ena vichamuriana te nasamairiricapa, náimatirayare vahi támapuruji eta nucunachirahehi.

## 9

*Tiúripa vivapinavayarehi eta vinaquisiravana nayeheyare ena vichamuriana*

<sup>1</sup> Tiuri puiti, núti nímatihiripahi eta evapinairava tayehe eta ecajirisira nayeheyarehi ena vichamuriana ticavasanahi te Jerusalén. Vaipa tácamunucarehini nápepejiricahehini. <sup>2</sup> Ichapemurihi eta nucunachirahehi nayehe ena vichamuriana ticavasanahi te juca Macedonia. Numetacavacahi eta evapinairavahi eta épaniravahi enaquicava cápequenerípahi te apanahi año. Tacahe, eta nasamairirisirahi eta evapinairavahi éti, éna apanava tivapinavavarepa ichape. <sup>3</sup> Eta tacahe, névatacachi puiti ena nani mapanana vichamuriana, apaesa vahi ecuvayuaracanu. Vahi tacumapuruji eta nucunachirahehi eta enaquisirava. Nuvaraha tatsecavaipa támutu te nítecapuchahepa. <sup>4</sup> Tijuricati náhicanupahi te níteca ena vichamuriana ticavasanahi te juca, tacuijarichaha tatsecavahi machu átsirihacare,

machu támapurujipa eta nucunachirahehi. Váipasare ecuimicatsiriacanú núti apanava. <sup>5</sup> Tásiha, tacahehi eta nupanereruana eta névatasirahi puiti ena nani vichamuriana, náinapumirauchanu náitecapauchahe, náimicatacahe eta ecurujisirayare eta enaquiruvana. Nuvaraha evapinavayarehi eta enaquisiravahi. Nájina vahi náimijachanu nútinachucha nupamicahe.

<sup>6</sup> Némechaheyare jucarihi eta échajirirucava, ani tacahehi: “Mácani achane ánicuchicharichu eta máesane máevaruhi, ánimurichicharichu eta mavehayare eta távame eta máesane. Mácanisera ichapepana eta máesane, ichapemurivare eta távame mavehaqueneyare” tacahepa. <sup>7</sup> Namutu nácani tinaquicavanayare, tavarahahi tatupiruvayarehi te nasamureana eta nanaquisiravaya. Vahi nacatiequenehaimahi, taicha nájina tipamicaimahi. Taicha ema Viya, tétavicava eta máemunasirahi mácani tatupiruvahi eta máijaracasi-resirahi. <sup>8</sup> Ecasiñavaya yátupina mayehe ema Viya, taicha éma, tétavicavahi eta máitupajijiasiravahi. Mavarahahi tíjaracaheya tamutu eta ecamunqueneana. Vaipa échuriahaimahi maicha éma. Ecayehenasarepa eta ímicatasiravacaya nácani apamuriana ticamunuvanahi. <sup>9</sup> Ecutiyarehi ema achane tiuri, ema táechajisihahi eta Sagrada Escritura, ani tacahehi: “Ema achane tíurihi ticunachacarehi me Viya, tivapinavahi eta macajiraparacahi ena páureana. Tájina vahi téchuriacaimahi eta macajirisira te tamutu eta máitare-sirahi” tacahepa. <sup>10</sup> Ema Viya, émahí ema tinaquicahi eta evaraquiana. Éma, macaejapacahivare eta tinicacare, etapa viáchanechiavayarehi. Ene macaheya eyehe éti. Tíjaracahepa eta enaquisiravaya, tímicutijiricavahi eta táejapasira eta evaraquí. Éma, ticajurucayareva eta enaquiruhi apaesa camurianaina ena ecatajiruanayare. <sup>11</sup> Tásiha, ema Viya tíjaracahenapa eta ímahaqueneanayare apaesa ímiyanavayarehi íjaracasireca. Puítiripa eta viámaqueneyare enaquiruvanahi nayehe ena vichamuriana, ichape eta nahasulupayachirayarehi ema Viya. <sup>12</sup> Taicha eta ímicatasiravacahi ena vichamuriana, ecuchucuhavacayarehi tayehe eta nacamunuiravahi. Tásiha éna, tiápajucavainapa te nasamureana eta nahasulupayachirayarehi ema Viya. <sup>13</sup> Ichapeyarehivare eta najirauchirayarehi ema Viya, nacunachirayareva éma. Eta evapinairavahi eta ecajirisirahi eta ímeresiravahi eta esuapirahi yátupi eta véhiruhi, étaripa eta máimiturapihi ema Cristo. Tímereuchahehivare eta iáchanevahi nayehe nácani ticamunuanahi. <sup>14</sup> Tásiha, tiyaseuchaeanainapa me Viya te nayujarasirana. Ichape eta náemunasiraheyarehi, navarairayareva náimahahevane táichavenehi eta ísirijisiravahi eta máemunasirahehi ema Viya.

<sup>15</sup> ¡Tétavicavahi eta viúricacarehi maicha éma! ¡Tájinapa viviya apanaina vácayema eta vihasulupayachira ema Viya táichavenehi eta juca víjaracasi!

## 10

### *Yátupi eta masuapacarevahi eta apóstolériahi ema Pablo*

<sup>1</sup> Nuti Pablo, yátupiquenénuhi eta apóstolenuira. Puiti nuyaseacahe eta ímatiranuína eta némunasirahehi. Nucutihi eta máemunaraivahi ema Cristo etapa eta majapanuraivahi. Etiarihipuca eti ímijachahi népiyacavahi nuri te emirahu; tásiha, te nuyerehihehare, tétavicavahíji eta nuvainarajivahi mapicaurairahanuhíji. <sup>2</sup> Puiti nutuparacahe: Étupirisamurechavaipahini te tamirahu eta nítecapauchiraheya, apaesa vahi tacuitauchava nucusemaracahehini. Ena nani náimijachahi nucutihi mácani achanetataji, étachucha

nutanuca eta nuvarahaquenehi. Nucamatinacavacayaresera te nítecapauchahépa. <sup>3</sup> Yátupi ecutiquenenuhi achanenuhi. Váhisera nácutihini ena apamuriana ajairana náipicararecanuma eta náeharaivana, navarairahi tisuapacareanayarehi. <sup>4</sup> Taicha núti vahi néhacacaimahi te nuvahuana, tájinavare nácasíñaimahi. Mararihisera ema Viya ema tíjaracanuhi eta nítupajijiasiravaya nucamatinasihayare éna. Ema Viya, nájina ticachuricaimahi. <sup>5</sup> Eta tacahehi eta nucaepahairahi eta semanereana, ena ticasíñavavaicanahi, tímijachavanahivare ena téchinavanahi, vahi návarahahini máimicatacavacahini ema Viya. Váhivare návarahahini náesenicahini éma. Níturucayarehisera nácani muracapanereruanahi eta nasuapiraina yátupi ema Cristo. <sup>6</sup> Nucuchapahesera eta yátupina eta esuapajiraivaina. Tásiha, te nítecapa, nímiratahacava eta nítivachirayare eta napanereruana ena masuapajiraيرانahi. Te váhipuca náeneuchava, némechavacayare.

*Natiarihi ena tímijachavanahi apóstoleana, tímicutichavanahi ema Pablo*

<sup>7</sup> Éti ímijachaipapuca tájinaquenénuhi nítupajijiasiravainahini, eta ímairanuhi eta nímahisami. Németeacavare natiarihi ena ticunachavanahi machaneranahi ema Cristo. Nuvarahasera námatinuhini eta machanerairanuhi núti apanava. <sup>8</sup> Natiarihipapuca náimijachaipapuca vahi nétupicavahi núti eta nupamisirahehi eta esuapiranuhi. Váhisera nutsirihahini taicha yátupihini nutuparahaichuhi eta návacure apóstolenuhi. Taicha ema Cristo mavarahahi nétumechaheyare eta éhisirahi éma. Tájina vahi nucamitiequenehahémahi núti. <sup>9</sup> Numetacahehi eta juca, váhisera tácarichuimahi nípicararecahehini te juca nucartane. Tamutuyare títauchava te nítecapauchahépa. <sup>10</sup> Ena nacahehi eta náechajiriruvahi: “Vahi ecusuapa eta macartane. Tayanapane muracapahi eta táechajiriruvana, émasera tájina mamuracavaina. Énerichuvare muracacaema eta máechajisira” nacahepa. <sup>11</sup> Éna náimijachahi tacarichuhi muraca eta táechajiriruvahi eta nucartane. Tímahanuanayaresera te váhipuca nusuapacarehi te nítecapauchahépa eta ara eyehe.

<sup>12</sup> Núti vahi nímicutichaimahi nayehe ena tímijachavanahi ticunachacareanapanahi. Ena nani énajiricavaichucha ticunachavana, tímijachavanahi nájina ticachuricanaina éna. Súnsurupichucha eta juca náichaquenehi. <sup>13</sup> Nútisera vahi nútijivaimahi nucunachavahini. Émayarehi ema Viya ticunachanuyarehi, taicha éma tíjaracanuhi eta nusuapacarevahi eta eyehe, tásihaquenehi eta níjarasirahehi eta táurinaqueneana máechajiriruvana ema Cristo. <sup>14</sup> Váhivare nétaviviriacavahini eta nusuapacarevahi eta eyehe. Nútihinéni nínapucahi te nítecapauchahénapa te nímitucahepa eta máechajiriruva ema Cristo. Tacahe, tituparacanuhi eta esuapiranuyarehi. <sup>15</sup> Váhivare nucunachavaimahi tayehe eta apaematanehi násapihahipucaini. Nuvarahasera tápajucavaini eta esuapajiraivaina mayehe ema Cristo. Nuvarahavare nímitucaheyare eta apamuriana yátupiqueneana, nítauchiraina eta nucatuparahairahi me Viya. Tájina vahi nétaviviriacavahini eta nusuapacarevahi eta eyehe. <sup>16</sup> Núti, váhiquene nímicasiapavaimahi te jácani avasare nacementarairuquenéipa nácani apana, nucunachiravayarepuca tayehe eta táitaurevapaipa apaemataneanahi.

<sup>17</sup> Numetacahe: Nácani tímijachavanahi ticunachacareana, yátupinahiseráini eta nacunachacarevaina mayehe ema Viya. <sup>18</sup> Taicha mácani achane, te yátupihini eta macunachacarevahi, vahi émajivaimahi ticunachava. Émayarehi ema Viya ticunachayarehi.



# 11

## *Ichape eta máñamiravahi ema Pablo nayehe ena machamuriana*

<sup>1</sup> Tiuri puiti, nuvaraha ecamichaini eta juca nucayemaqueneanayare eta eyehe. Ticutiyaere súnsurupiana. Nuvarahasera ítasamahini. <sup>2</sup> Puiti, tétavica-vahi eta néñamiravahi ícha éti, tásihaquenehisera me Viya. Nucutiripa mácani achane suiya esu amaperu eta majaneasirahi ésu. Taicha nuvaraha táurihini eta majacapiraheyare ema Cristo te jena sácheyare. Ácutihini súcani esena amaperu te sutupiruvahi eta sucaimaira, tájinasarepa mácayemahini ema suima. <sup>3</sup> Eta néñamiravahi eyehe, nuvarahahi ecuijahini iáquipaicava, ecucamitiequenehahini eta táurivahi eta éhisirahi ema Cristo. Vahi ecucuti eta suáquipaisiravahi esu vénarahaini Eva, maicha ema Váinaraji Satanás. <sup>4</sup> Ímicatisamurechanuhi eta esuapiravanehi ena tépiyahirahiana, apapipahi eta nametarairu tayehe eta náuchucuiraya. Núti, émahí ema Jesucristo ema néchajisihahí. Énasera, apanahi ema náechajisihahí. Émaripa ema Espíritu Santo, váhivare émainahini náechajisihahini éna. Apanachucha ema nacasiñahi. Éti ejacaparipahi ema yátupiquenehi Espíritu Santo. <sup>5</sup> Núti németeaca vahi ticachuricanuanaimahi eta nucametarairuira ena tímijachavanahi apóstolequeneana ticametarairurahianahíji náichava. <sup>6</sup> Tayanapanepuca táepurucarehi nayehe eta néchajisirasami, étasera eta nítupajijiasirava, tamutuhi nímatiequeneha. Ímatinuhi éti tayehe tamutu jácani nímitusiraheana níchaqueneanahi.

<sup>7</sup> Etiarhisera puca éti ímijachahi néjcapava eta némepaurechiravahi. Táitusiava népurucarehi eyehe, ichaperipahisera núríchaheripahi éti. <sup>8</sup> Váhivare nuyaseacahehipucaini eta nunicaquenerepi eta nímitusirahehi. Yátupi tíjaracuanahi ena apamuriana vichamuriana eta nénisiavayare. <sup>9</sup> Tásiha, te nítahapa eta plata, váhivare nuyaseacahehini eta nunicaquene. Taicha ena vichamuriana ticavasanahi te provincia Macedonia náimiamarecahi eta nucamunuqueneanahi. Tacahe, nujaneacavahi, vahi nuyaseacahehini éti. Váhivare nuyaseacahémahi puiti. <sup>10</sup> Jéhesare, nájina tiratahaimahi tihapapica eta nucunachacarevahi tayehe eta tájina nucobrachirahehini eta nímitusirahehi emutu eti ecavasanahi te Acaya, taicha yátupihí eta nímatiequenehairahi tamutu eta yátupiqueneanahi máimiturapiana ema Cristo. <sup>11</sup> Eta juca nucayemaqueneana, vahi ímijachaimahi étainahipucaini táichanu eta numaemunasirahénahini. Ema Viya máimatihí eta yátupirahí némunacahe.

<sup>12</sup> Énesera nucaheyare núti. Váhiquene nuyaseacahémahi. Nímiyanavaya eta nujaneasirava apaesa tacuija naviya eta taviuchanu nayehe ena tímijachavanahi tímiturahiana nácutinuhini eta apóstolenuirahi núti. Taicha navarahahi ticunachacareanayarehi tímicutichavanayarehi eta nucunachacarevahi núti. <sup>13</sup> Éna, tépiyacavanahi apóstoleana. Tivayuarahianasera eta náitaresirahi. Váhiquenevare vanairucanaimahi me Viáquenu Jesucristo. <sup>14</sup> Éna nani, vahi tíáramicareana éna eta navayuraivahi, taicha ema Satanás, yátupiquenehi náquenu éna, tépiyacavahi macuti ema ángele vanairucahi me Viya, mavarairahi tivayuareca. <sup>15</sup> Ene nacaheyarehi ena nani mavanaranahi ema Satanás, tépiyacavanapahi pastoreana náuriqueneana. Járajapayarhisera eta sácheyare najacapirayare eta náicuñayare táichaveneyare eta juca náimiaquipaisirahéhi.

*Ichapemuri eta macatajivairahi ema Apóstole Pablo taicha eta macametarairuirahi*

<sup>16</sup> Nuvaraha nápechava numetacahe: Vahi ecusuapa eta náimijachiranuhi máurishinu. Te etiarhipuca éti ímijachanu máurishi, ecayehe paciencia eta nuyehe. Ecamichanu eta juca nuncunachiravasamipaini apaesachichainahini nácutipaini eta nacunachiravahi ena apamuriana. <sup>17</sup> Tájina mavanairipina ema Viáquenu tayehe eta vicunachacarevahi. Tíchanuhisera nuncunachava taicha éti ímijachanu máurishinuhi. <sup>18</sup> Táichavenehisera eta nusamairirisirahi eta nacunachiravahi eyehe eta náitupajijiasiravahíji, énenapa nucaheyare núti eta nuncunachirava. <sup>19</sup> Éti, ímijachavahi ichape eta échema-raivavacahi. Evapinavahisera eta esuapirahi eta nayaseasirahehi ena máurishiana. <sup>20</sup> Ecamichahivare tamutu eta napamisirahe ítaucha eta tivita-careana vanairipiana. Tiverejicaheanahi eta ecayehequeneana. Tiyurucageana éhicavaca éna. Tasapihapa éti ecamichahi tamutu eta juca. <sup>21</sup> Núti, tétavicavahi nutsirihahi énemahínuhinahini nácahehine. Te ímijachahipuca tíúrihi tamutu eta juca náichirahehi, eperdonachanuhini vahi níchahine éta.

Ena nani ticunachavanahi eta náurivahi. Núti apanava núriha eta nuncunachiravayarehi, tayanapane ímijachanupuca máurishinuhi. <sup>22</sup> Éna ticunachavanahi énaírahi hebreo israelítana. Núti apana hebréonuvare, israelítanuvare. Énerichuvare núti mámariequenenu ema viáchucaini Abraham, nucutirichuhivare éna. <sup>23</sup> Éna, tímijachavanahi mavanarana ema Cristo. Nútisera, jéhevarequenenuhi mavanaranuhi ema Cristo. Nápapujanavahi núti eta nayehe. (Máurishinuhi eta nímaíravahi eta juca nuncunachiravahi.) Jéhevare núti nápapujanavahi eta nucaemataneasirahi ema Viya, nuchachuricavacahi namutu éna. Eta juca nucaemataneasirahi me Viya, témestacanuhi, témerat-acanuhivare. Énerichuvare ichapemurihi eta táimicapasiranuyarehini. Ena nani nánarana, vahi náichahine, nájina nacatianacavacahine. <sup>24</sup> Tacutiquene cíncohevare nucaesta naicha ena nujaneanana israelítana te jácani nupaisiranapahi. Mapana arroba eta náestasiranuhi. <sup>25</sup> Mapahevare tépuchiricanuanahi. Étahevare tiyucararacuanahi te márijahiana. Mapahevare térica eta pacure tiámanupahi. Tásiha, étanavare sache étanapa yati nucahehi te táinahu eta une te ichapequene mar. <sup>26</sup> Ichapemurihivare eta nupaisiranahi. Nímahavahivare eta táíñehicarevahi eta tamuracava tajunapirahi eta une te ichape cajacure. Nupicacavahivare naicha ena tiámerahiana. Tipanereuchanuanapahi ticapacuanana ena nujaneanana, énapa ena apavasana. Tamutuhi náemauchianupahi te jácani avasare, téhepa te mávapahi apaquehe, éta pa te jácani nupaisirana te une tayehe eta pacure. Énerichuvare témauchuanana ena tímijachavanahi nuchamuriana táichavenehi eta népiyaequeneanahi. <sup>27</sup> Ichapemuri eta nucaemataneahi. Nucatajivahi muraca. Ichapemurihivare eta numacaimarasiravahi. Nucatajivahivare tayehe eta nécuava éta pa eta numauneva. Ichapemurihivare eta nuchamichira eta ayunanuiranuhi. Nucatajivahivare taicha eta ticasarahi. Néchurihavare eta numuiriharapi.

<sup>28</sup> Tayanapaneinesera eta nucatajivairahi ichape, nímiyanavahisera eta néñamiravahi ícha emutu eti nuchamuriana te tamutu avasareana, nuvarairahi tacuijahine tahapapiricahehine tayehe eta éhisirahi ema Cristo. <sup>29</sup> Te etiarhipuca eti vahi túmehénahine eta éhisirahi ema Viáquenu, ichaperinehi eta néñamiravahi núti. Tacutiquene te etiarhipuca éti náimiaquipairuhehi, tétavicavahi eta nutsirirahivare, nusemasamurevarepa.

<sup>30</sup> Téhesera tatiarhipuca eta nacunachiravahi, núti apanavare nuncunachavavare. Étasera numaitupajijiasiravahi, étachucha ticunachacarehi eta nuyehe. <sup>31</sup> Émasera ema Tata Vicaiyaquene, Maiya ema Viáquenu Jesucristo,

máimatihí éma eta tatupiruvairahi eta nucayemaqueneanahi te juca nucartane. Éma, máitavacacahi eta majirauchacarevahi.

<sup>32</sup> Tacutiquene te návihaipahi te Damasco, ema tuparairucahi tayehe, majupahahi ema rey Aretas, máimivanerecahi ena séntinelana te tapajana tayehe eta avasare, mavarairahi ticaratacanuana. <sup>33</sup> Énaserá ena nuchamuriana tinacacuhanuana tayehe eta ichape saye túmehi, ticuchucanuana te tiupi enure te apachacaya eta yúchama tayehe eta avasare. Tacahehi eta núchucuirahi. Vaipa nacaratacanuhini.

## 12

### *Éma Pablo mavapuchahi tímerecava éma Viya*

<sup>1</sup> Yátupi tájina nuvehaimahi eta nútijivairahi nucunachava. Numetacahyaresera eta nímairahi te nuvapure máechajisiranuhi éma Viáquenu. <sup>2-3</sup> Catorce áñoa eta táetavisiravahi eta nímairahi tiámanuana tímipairicanuanahíji te anuma te mávasa éma Viya. Váhisera necha te étahipuca eta náquehe námapahi eta nuyanirahi, te étachuchapuca eta náchaneva. Émasera éma Viya, éma téchahi eta níchararacavapahi eta mámiranuhi te mávasa anuma. <sup>4</sup> Ánaquí nusamapa eta mahu. Timetacanupa eta téchacareanahi tayumuru-revahi. Váhisera táisapacarehini numetajiricahini. <sup>5</sup> Étapapucaini nucunachiravahini tayehe eta nímaquenehi nusamaquenehivare, taicha tímimatichanuhi éma Viya. Váhisera nucunachavaimahi tayehe. Núti nucunachavahi tayehe eta numáitupajijiasiravahi. Étachucha nucasíñavaiyahi tayehe. <sup>6</sup> Yátupihinéni eta nucunachacarevahi. Váhisera nucajamuravahini, taicha tájina nímatihini nutanuca eta nacunachiranuhini ena achaneana. Nuvarahasera nanecapaequenehahini eta táurivahi eta nítaresirahi.

<sup>7</sup> Tétavicavahi eta tiáramicare eta nímaqueneana te anuma. Tásiha, éma Viya vahi mávarahaimahi nucasíñavavaicahini eta nímairahi. Máisapahi éma Váinarajiquene Satanás técajumachanuhi, cútirine tatiarihinahini itape tayuvaraca te neche. Taicha éma Viya mavaraha vahi nucuvayuchava eta nucunachacarevaina. <sup>8</sup> Mapahe eta nuyaseasirahi éma Viya eta macanarasiranuinahini eta nucatiruhavahi. <sup>9</sup> Émasera éma Viya, ánipa máichanuhi: “Vuíchaha nuncanaracavimahi. Nujapanuvisera. Níjaracaviyare ichape eta pitumevaya, tayanapane eta pimaitupajijiasiravahi. Taicha nuvaraha náimatiyarehi ena achaneana eta nútupajijiasiravahi piyehe” máichanupa. Eta tacahe, núrismuréchucha puiti eta tamajinairahi eta nútupajijiasiravainahini apaesa máimerecavahini éma Cristo eta máijarasiranuhi eta máitupajijiasiravahi. <sup>10</sup> Tásiha, nuvapinavahi puiti eta napanajisiranuhi, nucatajivairahi náicha, náumehairanuhivare táichavenehi eta mavanarairanuhi éma Cristo. Nuvapinavahivare eta numaitupajijiasiravahi étapa eta néchuriasirana, taicha eta nímairavahi tamajinairahi nútupajijiasiravainahini, nútisera nusamavahi eta nutumevapaipaicha maicha éma Viáquenu.

### *Éma Pablo tétavicava eta máeñamiravahi nayehe éna machamuriana*

<sup>11</sup> Yátupi puiti eta néchajisiavairahi nucatiuchiravahi, tímicutijirícavaipa máurishinuínahini. Íchavenehisera éti, taicha éti tatuparacahi ecatiuchanuyarehini, váipasare nucuechajisiavahini nútí, vahi nútijivainahini nucunachavahini. Navetijisera éna tímijachavanahi apóstoleanahíji éna éhiruanahi, jéhevare éna, tájinaquenepa nacunachacarevaina. <sup>12</sup> Nímerecavahisera eta eyehe eta yátupiquenénuirahi apóstolenu eta nucaemataneasirahehi. Tayanapane camuri eta nucatiruhavana, nucamichahisera tamutu. Nímechaheripahinéni eta tiáramicareana níchaqueneanahi, maicha

ema Espíritu Santo. Éta tímicaecherachanuhi eta yátupiquenénuirahi apóstolenu. <sup>13</sup> Ena apamuriana vichamuriana te apana avasareana ticajinuanahi éna eta nucamunuqueneanahi. Étisera, tájina vahi nuyaseacahehine étainahipucaini eta nunicaquene, nítecahipucaini íjaracanuini. ¡Váhisera ecusema eta juca numaitecapauchirahihi!

<sup>14</sup> Puiti nutserereacavaipa eta mapaherayarepa níteca eta ara eyehe, nupaipiuchiraheya. Váhivaresera nácamunuimahi ítátinuhini. Váhivare étaina nutanucapahini eta ecayehequeneana. Étiqenesera nucamunuhepahi eta esuapiranuinahini. Taicha nuchichanavehehi éti. Vahi étinayare ítátinu. Núti nítátiheyare taicha núti ecaiyaquenuhi. <sup>15</sup> Váhivare néñamiáhemahi eta nucayehequenehi eta nítátirahéyare. Váhivare nuyacujimahi eta nucaemataneasiraheyare táurivayare eta iáchanevana. Tayanapane váhipuca ecuemunajicanuhi, nútisera tétavicavahi eta némunasirahehi.

<sup>16</sup> Nararihivare ena téchajicanahi eta nuyehe. Ani tacahehi eta náechajiriruvahi: “Yátupi te tipaipiuchahavi éma, váhinenicacha tiyaseacahavi eta macamunuquene. Máitucasera eta mavereasirahaviya eta viplatane” nacahahi. <sup>17</sup> Eti ímatihí vahi énavanerecainahipucaini ena névataruasanahi eyehe, énainahipucaini navereacahehine níchavenénahine núti. <sup>18</sup> Te nuvanecapa ema Tito émapa ema macachanequenepahi, téjirapanaheanayarehi, ¡tájinavare mayaseacahehine éma! Taicha vicuticacahi víti eta viúrivahi eta eyehe, táichavenehi eta vémunasirahehi ichape.

<sup>19</sup> Eti ímijachaipapuca nutanucahi núti eta nucatiuchiravayarehi eta eyehe. Váhisera tácahehine. Vahi tácamunucarémahi eta nucatiuchiravaya taicha núti nutupiruvahi eta néchajisirahehi te mamirahu ema Viya étapa te máijare ema Cristo, nuvarairahi tajurucahine eta táurivaina eta iáchanevana, eti némunaruqueneanahi nuchamurichichana. <sup>20</sup> Núti, te níteca eta ara eyehe, nupicahi vahi núricaimahi ácahemahihíni eta nuchimapiiraheya: éhajiricacahipucaini, ecapinarujiricacahipucaini, esemajiricacahipucaini, íputsimuriácahahipucaini, épiyéquenerejiricacahipucaini, iúmehajiricacahipucaini, ecasiñavavairicahipucaini, váhipuca tacuaquejiricacahi eta epanereruana. Te ecahehipuca, vahi iúricaimahi némecharecahehine. <sup>21</sup> Nupicahisera nátsiriha-carehine núti mayehe ema Viya íchavenénahine éti, vuíchaha étupiricavahine eta nuchimapiiraheyare. Vahi nuvaraha ecaiyacanu éti enerejicavana éjecapavanahi, taicha eta ánaquiaparipahi eta émainajisiraichaha eta ecapecatuirairana. Ímianavaichucha eta esenamarahehi, étapa eta emapicaurahi-vaichucha.

## 13

### *Eta máipicarairesirahi ema Pablo eta táichecuaraqui eta macartane*

<sup>1-2</sup> Puiti mapahenapa eta néjirairaheya. Cape te nítesinehi, numetacahenehi nútijacaruvahi, camuriripa eta nuconsejachirahehi eti éjecapavanahi. Iúrihapaini ínajica eta emaurivana. Puiti te nucartane, nápechavahi numetacave emutu. Vaipa nucaiticaimahi nácani téjecapavanahi. Núti nétupiricavacaya. <sup>3</sup> Etiarihihi eti épurunuhi eta mavanesisiranuhi ema Cristo. Ímahayaresera ichape eta máimicatasiránuhi eta nétupirisiraheyare. Taicha éma, títupajjiacavahi eta máemecharesiraheya. Tipicacare eta máicuñaraqui. <sup>4</sup> Yátupi éma tísapavahi ticaetata, tímicutijiricavaipahi vahi macuratahahine ticatiuchava. Váhisera mánasihine máepenahine, tichavahi títareca puiti taicha eta máitupajjiasiravahi ema Viya. Ene nucahehi núti nísapayarehi, tímicutijiricavahi vahi nucuratahairainahine. Ímahanuyaresera eta máijarasiranuhi

eta máitupajijiasirava táichavenehi eta mávahásiranuhi eta nétupiricaheyarehi taicha nucatuparahahi eta nujaneasiraheyarehi emutu éti.

<sup>5</sup> Nuvaraha esamavayare étijiva, te yátuphipuca tiúrihi eta éhisirahi ema Viáquenu Jesucristo, te yátupipuca eta mávahásirahehi éma. Taicha éma mávahácavacahi namutu ena machichanaveana yátupiqueneana. Machu émepururecava eta íjarasiravahi éhica éma. <sup>6</sup> Nuvarahasera némechahe ímatinuhini yátupinahini eta mávahásiranuhi ema Cristo, jéhevare núti yátupiquenenuhi machaneranuhi. <sup>7</sup> Núti, ichape eta nuyujarauchirahehi, nuyaseacahi ema Viya eta étupirisiravayarehi apaesa tacuija eviurevaina mayehe. Ichape eta nuvarairahi íchahini eta táuriqueneana. Tayanapanerinehipuca náepurunuhini, nuvarahasera ímiyanavayare éti íchayare eta táuriqueneana. <sup>8</sup> Taicha núti nutupiruvahi nicha eta táuriqueneana yátupiqueneana. Váhiquene nísapavaimahi nuhapapica eta yátupiqueneana. Eta tacahe, yátupina ésamiricava. Vaipa ecucamesa eta nápepejiricahe numetacahe. <sup>9</sup> Ichape eta ecurisamurechiranuya te yátupinapa étupiricava. Étijivainapa eratahayare ecaratacava. Vaipa nútiparacaimahi eyehe. Puiti eta nuyasearapi núti me Viya, tamutuyarepa tichavaya eta táurivahi eta ítaresira. <sup>10</sup> Puiti nucajurehe eta juca carta, nucuchapavahi núti eta néjirairaheyare, támuturipahini étupirica apaesa tacuijahini nucucayema. Váhivare nucusemaini eyehe. Nuvarahasera nétumechaya eta iáchanevana. Étahi eta nutuparacasivanahi me Viáquenu eta apóstolenuirahi mayehe.

<sup>11</sup> Tiuri puiti, nuparapenaveana, ítátijirícavahi. Etanucayare eta táuriqueneana eta ítaresirana. Ecurisamurechacaca. Tacuijahini eta semanerena eta eyehe. Tácuticaca eta epanereruana. Májaracahehini ema Viya eta tanarasiraina eta iáchanevana, taicha tétavicavahi eta máemunaraivahi éma.

<sup>12</sup> Núti néchajicahe emutu. Nuvaraha nétserarecahevacayare táicutiarahi eta táetavisiravahi eta némunasirahehi te mavahuana ema Viáquenu. <sup>13</sup> Ani te juca téchajicaheana namutu ena vichamuriana.

<sup>14</sup> Nuyaseuchaheparaca emutu éti me Viáquenu Jesucristo táetaviuchahini eta iúricacarevaya máicha, evapinavavaréni taicha eta máetaviuchirahi eta máemunasirahehi ema Viya. Macurisamurechaheparacaini tamutu sácheana ema Espíritu Santo. Tamutupa eta néchajiriruvanahi eyehe.



## **Eta macartane ema Apóstole Pablo nayehe ena machamuriana ticavasanahi te Galacia, ticajare GÁLATAS**

<sup>1</sup> Nuti Pablo, yátupiquenenuhi mayehenu apóstole ema Jesucristo taicha manerejirunuhi. Ema Tata Vicaiyaquene ticutihi eta mapanereruhi ema Machicha eta máichuiranuhi. Puíticha émaquenehi ema Jesucristo tinacanuhi eta juca návacurehi apóstole, émarichuhi ema macáechepucasiquénehi te máecari. Vahi apanainahini achane ema tinacanuhi, énaiahipucaini ena nucutiqueneanahi apóstoleana nanacanuhi eta juca návacurehi. <sup>2</sup> Puiti nucajurehe eta juca carta eyehe eti nuchamuriana ecavasanahi tayehe eta avasareana tayeheana provincia eta Galacia. Téchajicaheana ena apamuriana vichamuriana te juca návihahi.

<sup>3</sup> Nuvaraha macatajicahehine ichape ema Tata Vicaiyaquene, émapa ema Viáquenu Jesucristo. Náijaracahehine eta táurivaina eta epanereruana. <sup>4</sup> Ema Viáquenu tíjaracavahi tépena te crusu taicha mavarahahi ticuchucuhahaviyare tayehe eta vícuñayarehine táichavene eta vipecaturana, macámitiásinaháviripahivare eta vijamurachirainihi eta tauriqueneana tayehe eta juca apaquehe. Eta tacahehi eta mapanereruhi ema Tata Vicaiyaquene. <sup>5</sup> ¡Máichecuaraquireyarehi eta vijirauchiraya éma! Amén.

### *Étanarichu eta doctrina véhiruhi, tájina apanaina*

<sup>6</sup> Ichaperinehi eta ímipaneresiranuhi. Váhicha németeaca ene ácahehine eti éhicahine eta apanaquene doctrina. Tasapihapa esuapahi eta juca, vaipa émainahine esuapa ema Viya. Ínajicavanepa eta esuapirainihi éma. Émepururecapa eta máichuirahéhi. Tasapiha émepururecapa eta máepeninahéhi ema Jesucristo eta máemunasirahéhi. <sup>7</sup> Nutupiruva numetacahe, tájina apanaina doctrinaina tácuti eta juca véhiruhi víti. Néchahi eta juca íchararacavahi éti, nararihi ena témejecapavachaheanahi, navarahahi nahapapicayare eta vímiturapianahi tásihaqueneanahi mayehe ema Cristo. <sup>8-9</sup> Víti vímitucaheripahi eta juca yátupiqueneana, étarichuhi eta máechajiriruva ema Viya. Cape juca, te viávihachaha eyehe, vimetacahévanéhi eta macatichira ema Viya eta apanapanequeneana doctrina nahapapiruanahi. Puiti nápechahevare numetacahe: Ticatichacareya me Viya nácani nahapapica eta vímitureheanaripa yátupiqueneanahi. Nútiripa, te nápechavahivaréni níteca eyehe, apánainapáipahivarepucaini eta nímiturapiana, ticatichanuhine ema Viya taicha eta nuhapapisirainahine eta máechajiriruvana. Téhevare máitecapucaini mácani émana máimicutichavapahine ema ángele másihaquenénahipucaini te anuma, te mavarahahivarepuca mahapapica eta vímitureheanaripa víti, énerichuvare macatichayarehi ema Viya.

<sup>10</sup> Nararihipuca ena témeteacananahi nuhapapicahi eta máechajiriruvahi ema Viya, étainahipucaini níturusahine ena achaneana, némemunasiravainahine nayehe. ¡Tájinasera vahi nuhapapicahine núti! Nutupiruvahi eta nímituresirahi taicha nuvarahahi nucurisamurechaya ema Viya, nímercavayarehi eta núriva eta mavanaranuirahi ema Jesucristo.

*Ema Pablo tímereuchava eta táchararacavahi eta masiapirahi apóstoleyare*

11 Nuvaraha numetacahe eti nuparapenaveana eta juca nucametarairuirahi, vahi tásihaquenénahi te nupanereru núti. 12 Váhivare nímitucasi-vainahi mayehe mácani apana achane nucutiquenehi apóstole. Émaquenehi tímitucanuhi ema Jesucristo.

13-14 Éti esamairiricanuhi jácani eta níchararacavahi eta nítaresirahi cape juca násinequenehi, te étarichaha néhicahi eta nayeherepiana ena israelítana náchucanaveanainihi núti. Núti, eta nujurusirahi, nímahahi eta tacapicahuirahi eta viyeherepiana. Ichapehi eta némuracachiravahi, nucachuricavacahi ena nuparajuruanahi. Nímicapicauchahi muraca, numavarairahi táemitiequenehini eta viyeherepianahi nanaquipairuanahi ena náchucanaveanaini. Eta tacahehi, ichapemurihi eta nupanajirisiravacahi ena machaneranahi ema Viya, nuvarairahi nucámitiéquenehavacayahíni eta náehisirahi ema Jesucristo. 15 Námavaqueneváhiséra eta manerejisiranuhi ema Viya, te vuíchaha núchucahini te sujuhe esu ticachichanu; tacahehi eta mapanereruhi eta máichuiranuyarehi, taicha eta máemunasiranuhi. 16 Tásiha, tímimatchanuhi ema Machicha, taicha mavarahahi nucametarairuyare nayehe ena apavasanana eta macuchucuirayare namutu ena tisuapana ema Machicha. Váhiserá nutanucahini nácani náimitucanuhini eta nucametarairuyare. Nájinavare nuyasereruina. 17 Váhivare nuyanahini te Jerusalén nutanupanahipucaini ena náinapureanahi apóstoleana. Téhechucha apaquehe Arabia nucaijuhehi. Émasera ema Jesús, éma tímitucanuparacahi. Te váchupa, nuchavavarepa te avasare Damasco. 18 Te mapanaquenepa año, nupaenumavapa nuyanahi te Jerusalén, etapa nímatinehi ema Pedro. Nunasipanapa quince sache nucahehi eta mayehe. 19 Émapa ema Santiago, maparape ema Viáquenu, ema nímahaquenehivare. Énasera ena apamuriana apóstoleana, nájina nímahavacahini. 20 (Puiti tímararacanuhi ema Viya, tájina vahi népiyahiraivaina eta juca nucáyemaqueneánapahi te juca nucartane. Nutupiruvahi eta numetasirahehi.) 21 Tájinasera vahi nucaimitucasihini nayehe taicha nuyanavanevarepa nucaijuhehi eta te Cilicia, nánucuhapa tayehe eta Siria. 22 Tacahe, ena vichamuriana ticavasanahi te Judea, váhivare náimatínuhini taicha vahi náyerehini tayehe. 23 Tisamairiricanuanahisera eta néquesiravaripahi. Ánipaji tacahehi eta nasamairirisiranuhi: “Ema maca Pablo tipanajiricahavihi cape juca viásinequenehi, ¡téquecavaripahi! Cape juca mavarahahi ticámitiéqueneháviyahíni eta juca véhiruhi. ¡Puiti émarinecha tétucaracavahi ticametarairuhi eta juca véhiruhi víti!” nacahepaji. 24 Tacahe, ichaperinehi eta nacunachirahi ema Viya níchavenehi núti eta néquesiravahi.

## 2

*Ema Pablo tímereuchava eta masiapamurihairapa ena apóstoleana, tásiha natupiruva najacapa éma*

1 Catorce áñoripa eta táetavisiravahi, nupaenumavapa nápechavahi nuchava te Jerusalén. Émapasera ema Bernabé nucachanehi, émapa ema Tito. 2 Taicha numetacasivahi me Viya te nuvapure eta nuyanirayarehi tayehe eta Jerusalén, véchajicacayare nayehe ena tachutirihanahi. Eta nítecapirapa, viúrujicavapa, énachuchasera vicachanehi ena tachutirihanahi. Tásiha numetacavacapa eta nímiturapianahi eyehe eti apavasanana etapa eta es-uapirahi. Taicha nuvarahahi ena vichamuriana israelítana najacapahehini eti apavasanana vichamurianaripahi. 3-4 Te jena, natiarihihi ena tépiyacavanahi vichamurianahi, tépiyahirahianapahi eta nasiapamurihairahavihi. Éna, navarahahi tipamicahavianayarehi eta vímitusirahe éti apavasanana

éhica eta nayeherépiana ena israelítana. Taicha tacahehi eta náechajiriruvahi éna, ítauchayahiji eta nayeherépiana éna, váhiji tacarichuimahi eta éhisirahi ema Jesucristo. Navarahahivare napamicayahini eta macamarca ema Tito, eta apavasanairahi éma. <sup>5</sup> Tájinasera vahi vísapavahini nacachuriacahavini, taicha víti vivarahahi tacuijahini tahapapicahini eta éhisirahi eta yátupiqueneana téhicacareanahi. <sup>6-9</sup> Tacahe, énaripa ema Santiago, ema Pedro, émapa ema Juan, énapa ena apamuriana náiyarahana ticutinuanahi eta nupanereruhi. Tájinavare vahi nametacanhini eta apamuriana téhcacareanahi nayehe. Étasera eta nasamiranuhi, náimativanepa eta émairahi ema Viya tituparacanhini eta nucametarairuiraya nayehe ena apavasanana. Nucutihi eta macatuparahairahi ema Pedro máimitusirayarehi ena israelítana. Ema Viya máijaracahi eta mávacurehi ema Pedro apóstolehi nayehe ena israelítana. Máijaracahivare eta máitupajjiasiravahi. Ene nucahehi núti tíjaracanhini eta návacurehi apóstolenuhi nayehe ena apavasanana. Tíjaracanhivare eta nítupajjiasiravahi. Eta tacahehi, náimatipa eta émairahi ema Viya tíjaracasichanhini eta juca nítucaquenehi. Tacahe, tíjupacahavianapa, núti émapa ema Bernabé. Eta juca náichirahavihi táicutiarahi eta náisapirahaviyarehi vímiyanava vímitucavacayare ena apavasanana. Éna, tímiyanavanayare tímiturecanahivare ena israelítana. (Tépurunuanarichuchapuca eta náimairanuhi. Tayanapanesera váhipuca nujacapacarehi nayehe eta apóstolenúirahi. Nútisera néchahi eta manerejisiranuhi ema Viya eta apóstolenúirayare.) <sup>10</sup> Tacarichu tituparacahavianahi eta vímicatasirayarehi ena páureana. Eta tacahehi puiti, nítauchahi núti eta nuvanecasivahi nímicatasiravacaya ena páureana.

### *Éma Pablo tímereuchava eta macajachirahi ema Pedro*

<sup>11</sup> Te táequenepa, te jena añoanahi, títecapauchahavipa ema Pedro te avasare Antioquía. Étasera eta mávihairahi viyehe, téjecapavainapa. Eta tacahe, nucajachapa éma. <sup>12</sup> Eta máitecapirapa ema Pedro, tájinaipa máichiravainahini eta masamiravahi eta macachanejirisiravacahi ena apavasanana vichamurianahi, tinicahi eta nayehe. Tacahe, te jena sácheana, títecapanapa ena máemunacasareanahi ema Santiago, israelítana vichamuriahivare. Te máimahavacapa ema Pedro, titsirihapa éma eta macachaneravacahi ena apavasanana vichamurianahi. Vaipa mávarahahini macasiriquivacahini. Tipicahi eta nacaecahirahi ena tímicapicauchanahi eta nayeherépianahi ena israelítana. <sup>13</sup> Tacahe, ena apamuriana israelítana vichamurianahi, énerichuvare éna náehicapa eta máejecapiravahi ema Pedro. Téracijavanavare éna apanava. Émaripa ema Bernabé máehicavarepa eta náejecapiravahi éna. <sup>14</sup> Tacahe, te nímahapa núti eta náejecapiravahi, vahi táurihini eta náichaquenehi, nucajachapa ema Pedro te namirahu ena vichamuriana taicha máejequihapa eta tavanairipihi eta yátupiqueneana máechajiriruvana ema Jesús. Níchapa ema Pedro: “¿Tájaha tacayema eta pitsirihahi ena vijaneanana israelítana eta picachaneravacahi ena apamuriana vichamuriana apavasanana? Pémitisicavapapuca eta israelítavirahi cape juca pítaresirahi, táitusiava eta picachanejiricavacahi ena apavasanana vichamurianahi. Tásiha puiti, eta pímaripa náitecapirahi ena vijaneanarichu násihaqueneanahi te Jerusalén, péquecavavarepa nayehe. Váipa pávaraha picachanehini ena apavasananahi vichamurianahi ticutiripahi eta vahi vichamurianainahini éna. Pivarahapuca náepiyacava israelítanáina éna apanavare” níchapa ema Pedro.

*Namutuchucha tijacapacareanaya me Viya nácani navarahaya téhicanayare ema Jesús*

<sup>15-16</sup> Tacahe, numetacavacapa namutu eta juca yátupiquenehi: Véchahi víti eta vahi tácomesaimahi vítauchahini eta nayeherepianaini ena viáchucanaveanaini. Tarataripahi eta véhisirahi ema Jesucristo, vijacapacaréipa vimutu eta mayehe ema Viya. Énaripa ena apavasanana, tayanapanehi náetaviuchahi éna eta nasipecaturaraivahi viyehe viti israelítana, títujicavanayarehisera tijacapacareanaya me Viya taicha eta náehisirahi ema Jesucristo. Tayanapane vítamuturucahipuca eta mavanairipiana ema Moiséini, tájina vahi vájacapacarémahí víti eta me Viya táicha. Vimutu vijacapacare eta me Viya táichave-nechucha eta véhisirahi ema Jesús.

<sup>17</sup> Natiarihipuca ena téjecapavanahi te napanereruana, ánipuca nacahehi eta náechajiriruvahi: “Yátupipucáji eta vijacapacarehi me Viya táichave-nechucha eta véhisiraya ema Cristo, vivetijinapaserapuca tiápajucavainapapuca eta visipecaturaivaya taicha vínajicainapa eta vanairipiana. Tacahe, émapapuca ema Cristo táemesiavaya eta vícapecaturaivaya” tacahenapapuca eta napanereruhi. Éna, tímápachichijíruvachucha te napanereruana. Ema Cristo váhiquene émaina tásiha eta pecatuana.

<sup>18-19</sup> Eta néhisirainihi apaicape eta vanairipiana, tájinachucha vahi táimicatacanhini eta nujacapacarevayarehi me Viya taicha váhiquene étaparacaina. Eta tacahe, nínajicahi eta néhisirainihi. Nímatiripasera eta nujacapacarevarehi me Viya táichavene eta nucasiñairahi eta mayehe. Puíticha tiúripa eta nítaresirahi me Viya. Tásiha, ichapenapahini eta néjecapiravaya núti apana, te nuchavapuca néhica eta mavanairipiana ema Moiséini. <sup>20</sup> Eta nusuapirahi eta máepenirahi ema Cristo te crusu, nujacapacarehi me Viya. Puiti, vaipa nútijivaina necha eta nítaresirahi. Émapa téchanuhi ema Cristo tamutu eta nítaresirahi. Émapa nucasiñahi taicha yátupíhi eta macasiñacarevahi taicha yátupiquenehi Machichahi ema Viya. Eta máemunasiranuhi, tímijararecavahi níchavenehi núti. <sup>21</sup> Vahi némepururecaimahi núti eta máemunasiranuhi ema Viya. Nararihisera ena tímijachavanahi tijacapacareana mayehe táichave-nechucha eta navairahi náitaucha eta vanairipiana. Ena nani, tímicutijiricavahi námepururecahi eta mapanereru étapa eta máemunasiravacahi. Tímicutijiricavahi námepururecavare eta máepenirahi ema Jesucristo te crusu.

### 3

*Tacarichuchucha eta vicasiñairahi ema Jesús, vijacapacaréipa me Viya*

<sup>1</sup> ¡Páurehechapucaini, eti nuparapenaveana gálatana! Ímijachaipapuca étupicavahi eta juca ecahehi. Ínajicavanepa eta éhisirainihi eta yátupiqueneanahi. Vímimatichaheripahi eta iúricacarevahi tásihaquenehi eta máepenirahi ema Viáquenu Jesucristo te crusu. ¿Tájaha tacayema émepururecahi eta juca iúricacarevayarehini? <sup>2</sup> Esamanuchaha, puiti nuvaraha numetacaheyare. Eta mávahásirahehi ema Espíritu Santo, éta tíchahi eta éhisirahi ema Jesucristo. Vahi étainahini taicha eta ítauraivainahipucaini eta vanairipiana. <sup>3</sup> ¡Tétavicavapa eta esunsuvavaca éti! Te épanavapa eta éhisirahi, tájinainiripahi íchiravainahíni máicha ema Espíritu Santo. Éma tétumechahehi. Puítisera éti evarahapa ínajicaya eta mávahásirahénihi, ímijachaipapuca eta ticuchucaheyare eta éjairavanahi. <sup>4</sup> Tamapurujinapapuca eta máimicatasirahehi ema Espíritu Santo. Németeacaserá núti vuíchaha émepururecavaimahi. <sup>5</sup> Ema Viya tíjaracaheripahi ema Espíritu Santo eta mávahásirahehi.

Tímechahehivare eta tiáramicareana. Étaripa macatajisirahehi táichavenehi eta ecasiñavairahi tayehe eta máechajiriruvana. Étaserá eta ítauráivainahipucaini eta vanairipiana, tájinainapa táimijaracahehíni.

<sup>6</sup> Énerichuvare macahehi ema viáchucaini Abraham. Ticasiñavahi éma tayehe eta máechajiriruvana ema Viya. Tásiha, ema Viya, ichape eta majacápirahi éma. Máemitisicahi tamutu eta máejecápiravanahi. <sup>7</sup> Puiti, yátupina ácaicutiara eta juca: Te yátupina vicasiñava me Viya, vijacápacareya mayehe, taicha vicutiyare ema viáchucaini Abraham eta macasiñavairahi me Viya. <sup>8</sup> Ema Viya mametacahi ema Abraham eta najacápacarevahi mayehe, nácani ticasiñavanayare éma. Áni macahehi eta máichirahi: “Tétavicavayare eta náuricacarevayare ena achaneana te tamutu avasareana nácani ticutivianayare eta picasiñairanuhi núti” máichapa ema Viya. <sup>9</sup> Tásiha, viti vicasiñanahi puiti, tétavicavayarehi eta viúricacarevayare, taicha vicutinapa ema Abraham eta macasiñairahi ema Viya.

<sup>10-12</sup> Natiarihisera ena tímijachavanahi tijacápacareanayare me Viya táichavenehi eta navarairahi náitamuturuca eta vanairipiana. Téjcapavana pahisera. Taicha ani tacahe eta vanairipi: “Tamutu sácheana ítauchayare tamutu eta juca vanairipiana. Te éjequiha apaesachichaina, éta tímicuñacahayare”. Váhiquenesera naratahahíni náitaucha tamutu eta vanairipiana. Eta tacahe, náviraichu ticaicuñaya, vahi tijacápacareanaimahi. Ánivare tacahe eta vanairipi: “Te ítamuturuca eta vanairipiana, máichecuaraquireyare eta ítaresirayare táicha”. Tásiha, vímatiequeneha eta juca: Eta náitamuturusira ena achaneana, éta tavaraha eta vanairipiana. Tájina étaparacaina eta nacasiñairava me Viya. Ánisera tacahe eta Sagrada Escritura: “Nácani ticasiñavanahi me Viya, tijacápacareanahi, máichecuaraquireyare eta náitaresiraya táicha”. Tásiha, nuvaraha ácaicutiara eta juca: Eta vijacápacarevahi tásihahi eta vicasiñavairahi me Viya. Eta vítauchirapuca eta vanairipiana, tájina étaparacainahíni tayehe eta vijacápacareva me Viya. <sup>13</sup> Ánivare tacahe eta Sagrada Escritura: “Mácani achane ichape eta maviureva, ticaetatacasiyarehi te yucuqui. Eta táicutiarahi eta máicuñasirayare ema Viya eta máchaneva”. Viti achaneana, ichape eta vícuñayarehíni taicha eta vimaitauchirahi tamutu eta vanairipiana. Émasera ema Jesucristo, tépeninahavihi te crusu, tamuriasirahi tamutu eta vícuñayarehíni víti. <sup>14</sup> Éma máichahi eta juca, mavarairahi eta iúricacarevayare eti apavasanana táichavenehi eta ecutirahi ema Abraham eta macasiñairahi ema Viya. Puiti, tétavicavahi eta viúricacareva vimutu, taicha tiávahácahavihi ema Espíritu Santo máijararuhavihi ema Viya táichavenehi eta vicasiñairahi ema Jesucristo.

*Tájinachucha tájaracahavi eta véhisirahi eta mavanairipiana ema Moiséini. Macarichu ema Viya tájaracahaviya eta viúricacarevaya.*

<sup>15</sup> Nuparapenaveana, nuvaraha nímicutiarachináheyare eta juca. Te matiarhipuca ema achane, te tépiyarecahi tratu mayehe ema apana achane, náfírmachayarehi eta natratunehi. Tásiha, náfírmacharipa eta natratunehi, vaipa táuricaímahi nacaepaha eta tacajuquenehi. Nájinapavare tihapapicaímahi. <sup>16</sup> Ene macahehi ema Viya eta matratunehi mayehe ema Abraham. Ani macahehi: “Níjaracaviyare píti eta piúricacarevayare. Énerichuvare níjaracayare eta máuricacarevayare ema piámariéqueneyare” macahepa ema Viya. Tacahe, émanarichuhi ema mámariequenehi ema táimijarechaquenehi eta matratune, vahi námutihini ena nasimutuvagueneanayarehi mámariequeneanayarehi ema Abraham. Émahi ema ticaijarehi Cristo. <sup>17</sup> Tiuri puiti, nuvaraha nímicacherachaya eta eyehe: Eta juca matratunehi ema Viya



mayehe ema Abraham, mafirmachaquenehi eta májjarasirayare eta náurica-carevaya nácani ticasiñavana eta mayehe. Étasera eta táetavisiravahi eta 430 añoripahi, te májuchapa ema Moiséini eta vanairipianahi, vahi macaepahahini ema Viya eta matratunehi, váhivare máitsivachahini eta májjarasirayarehi ema Jesús, mámariéquénehi ema Abraham. <sup>18</sup> Ema Viya mametacahi ema Abraham eta májjarasirayare eta máuricacarevayare, taicha eta máemunasirahi éma. Ene vicahehi víti. Ema Viya tíjaracahaviyare eta viúricacareva taicha témunacahavihi. Eta viúricacarevaya, vahi étainahini eta vítauchirainahipucaini eta vanairipiana. <sup>19-20</sup> Etiarihipuca eti evaraha eyaserecanu, ánipapuca ecaheya: “Te yátupipuca vaipa étaparacaina eta vítauchiraina eta vanairipiana, ¿tájahaserapuca tacayemahi eta mavanahirahi ema Viya májucha ema Moiséini eta juca mavanairipiana?” Tiuri, puiti numetacaheya: Yátupi ema Viya máimivanerecahi ema Moiséini májucha eta vanairipiana, taicha mavarahahi máimimaticayare ena achaneana eta taurivahi eta pecatuana. Téhesera te títecapapa ema Cristo, vaipa táimiyannahini tasuapacarehini eta mavanairipianahi ema Moiséini. Arairupa tamutu eta véhiruhi maicha ema Jesús. Yátupi ema Viya matupiruvahi eta máechajisirahi ema Abraham. Vahi máimivanerecahini ema Viya, émajacarúvahi éma, eta máechajisirahi. Émasera ema Moiséini macaimitucasiquenechucha nayehe ena ángeleana.

*Eta mavanairipiana ema Moiséini tivanecahavi vahi vicuquicha eta pecatuana taicha tíñehicarehi eta júcana mayehe ema Viya*

<sup>21</sup> Puiti németeaca etiarihichaha eti ímijachahipuca tacarichuhi téhicacarehi eta vanairipiana. Esamanuchaha. Váhiquene étaimahi vájacapacarehíni eta me Viya. Váhivare étainayare ticaitarecahaviyare. <sup>22</sup> Esama eta juca máechajiruvahi ema Viya eta te Sagrada Escritura, ani tacahe: “Náicuchirichuhi eta náicuñayarehi namutu ena achaneana taicha eta napecaturanahi” tacahepa. Jararihiserá eta viúchucuirayare taicha tíjaracavahi ema Viya ticuchucuhahaviyare vimutu viti vicasiñanaya ema Machicha Jesucristo. <sup>23</sup> Ánaquiaparipa eta tacaratasiravacahi eta mavanairipiana ema Moiséini nayehe ena israelítana náchucanaveanaini núti. Vahi táisapahini tasimutihichaini eta napecaturana. Tiámainucavapa te títecapapa ema Jesucristo, émapa tímitucahavihi eta arairuyarehi eta véhiruyare. <sup>24</sup> Táitaurevaquene eta mavanairipiana ema Moiséini eta típicararécahávihí tayehe eta táíñehicarevahi eta vicapecaturairana. Éta, tétupiricahavihi tacutihí mácani profesor eta máetupirisiravacahi eta napanereruana ena máimitureana. Ene tacahehi eta táechapajirisirahavihi eta mavanairipiana ema Moiséini. Puítisera eta máitecapiraipahi ema Jesucristo, émapa véhicayare, vijacapacarénapa me Viya taicha eta vicasiñairahi ema Jesús. <sup>25</sup> Puíticha, émainapa véhicayare éma, vaipa étaimahi véhica eta mavanairipiana ema Moiséini. <sup>26</sup> Puiti, eta ecasiñairapa ema Jesucristo, machichaheripa ema Viya. <sup>27</sup> Puiti, eta ecaicachahirahi te májare ema Jesucristo, tiávahácaheripa éma, éti ecutinapa eta máurivahi. <sup>28</sup> Tayanapané apavasasajuecuhehi éti; tayanapanehivare ecasiriquiquíjhi eti ajairana, ena esenana; tayanapanehivare músuanapuca, líbreanapuca. Téhesera te mamirahu ema Viya, étanarichuhi eta vímahí. <sup>29</sup> Puiti machichaheripa ema Cristo; tásiha, ecutiripa mámariequenehénahini ema Abraham. Ímaequeneharichucha eta matratunehi ema Viya eta májjarasiraheyare eta iúricacareyare táicha.

## 4

1-2 Esamanuchaha. Nuvaraha nímicutiarachináheyare. Te matiarhipuca ema achane camurihi eta máimahaqueneana te mapena, te matiarhipuca ema machicha, téhesera te amaperuríchaha éma, natiarihiyarehi ena téchapajiricanayare, énapa ena tímitucanayareva. Vahi náisapaimahi mamápachichijicaimahi eta máimahaqueneanahi ema maiya, tayanapane émahinéni ticayeheyare tamutu. Tiámainucavasea te máimahapa ema maiya eta máechemaravahi ema machicha, máisapainapa eta máemamaca eta máimahaqueneanahi. <sup>3</sup> Ene vicahehi víti cape juca viásinequene te vuíchaha vímatihini ema Cristo, vicutinihi ena amaperuana. Tipamicahavianahi véhica eta nayeherepiana ena viáchucanaveanaini. <sup>4</sup> Émasera ema Viya, te máimaha tiuri eta tátauchiravayarepa eta mapanereruhi, máevatacapa ema Machicha te juca apaquehe. Ema Jesús, tiáchanechavapa te sujehe esu maena. Eta máuchusirahi, vivasimahi eta vicaqueherahi viti achaneana. Eta majurusirahi, ticaravahupa eta viyeherepiana viti israelítana. <sup>5</sup> Eta tímitecahi éma, mavarahahi ticuchucuhahaviyare viti achaneana. Mavarahahivare vimutu vijacapacareyarepa me Viya, machichahaviyarepa. <sup>6</sup> Puiti, eta machichairaheripa ema Viya, tíjaracaheripa ema Espíritu Santo tiávahácheripa te esamureana. Émapa témechahehi mayehe ema Viya, tímitucahepa eta eyujarauchiravaya: “Tátachicha Vicaiyaquene” ecahenapa. <sup>7</sup> Tacahehira eta machichairaheripa, vaipa ísapaimahi nácani napamicahéhini tayehe eta nayeherepiana. Tíjaracaheripa ema Cristo eta iúrivaya, iúchucuirayare máicha.

### *Ema Pablo, nahapasamurechahi ena machamuriana*

<sup>8</sup> Cape juca iásinequenehi éti, vuíchaha ímatihini ema Viya, váhivare epicauchahini éma. Énachucha epicauchavacahi ena esiñarajiana. Tájina eratahaimahi émitisica eta eyujarauchirahi tayehe. Éna, vahi yátupinahini víyanainahini, váhivare távahácavacaimahi eta máchaneva ema Viya. <sup>9</sup> Puítisera, ímatipa ema yátupiquenehi Viya. Tásiha, énerichuvare éma tímatihévaca, esamacarepa mayehe, taicha machichaheripa. Tásiha puiti, ¿tájaha tacayema evarahavarepa echavayare eta ecasiñayare eta esiñarajiana? Eta ecasiñasanahi, tájina vahi tisamaheanaimahi, váhivare tímicatacaheanaimahi tayehe eta panererucana. ¿Tájaha tacayema ísapava napamicahé eta ítauchira eta nayeherepiana? <sup>10</sup> ¿Tájaha tacayema enasirichuhi epicaucha eta piéstamuhuana, étapa eta aracherumuhuana caje? <sup>11</sup> ¡Chape eta néñamiravahi eyehe! ¡Tájuricati támápurujipahi eta juca nímitusirahehi!

<sup>12</sup> Esamanuchaha, nuparapenaveana. Nuvaraha vácuticacahini eta vipanereruana. Váhini vicuehicaini eta nayeherepiana ena achaneana. Németeaca esuapanu taicha vahi eyacujiequenehanuhini. <sup>13</sup> Éti etupiruvahi ejacapanu cape te nítecainapa eta ara eyehe. Écharichuhi eta nucajumairapahi te nítecapauchahepa. Etupiruvahisera esuapa eta numetarairuhi eta eyehe. <sup>14</sup> Vahi ecaecahinuhini eta nucajumairapahi. Váhivare épurunuhini. Tiúrihi eta ejacapiranuhi tímicutijiricavainehi ángelenuinahini, Crístonuinahipucaini. <sup>15</sup> Ichape eta iúrisamurevahi te jena sácheana eta návihairahi eyehe. Nímatihitétavicavahi eta émunasiranuhi. Te nucamunuvahi, evarahahi íjaracanu eta ecayehequeneana. Tájina éñamahini. Ichape eta nucunachirahehi. Tacahe, máejeha néchajisihaha eta émunasiranuhi.

<sup>16</sup> Eti ímijachaipapuca nucatichirahehi eta numetasirahehi puiti eta juca yátupiqueneana. <sup>17</sup> Ena nani téchapajiricaheanahi, váhisera tátupiruvahini eta náemunasirahehi, navarairachucha típichasicahéanayare apaesa vahi ecusuapanu núti, eta vaipa ecuehicanuhi. Navarahahivare éhicayare eta

nayeherepiana apaesa é nainapa échapajiricayarehi. <sup>18</sup> Tiuri, núti vahi nucatcha eta ítatiraina ena apamuriana achaneana. Táuriserá eta náemunasiráhena tácuti eta némunasiráhehi núti. Éti apanavare evapinavayare tácutirichu te nutiaríhihi eyehe. <sup>19</sup> Nuchichanavechichana, tétavicavapa tacativa nusama taicha eta ímipaneresiranuhi. Ticutirinehi súcáni esena ticatiruhapa, taicha ticatihi susama eta amuya. Ene nucahehi núti eta nucatisamureravahi, néñamiravahi icha éti. Nuvaraha ácutini ema Cristo eta máurivahi. Tiámainucava te nímahahepa ecutinasipa éma eta máurivahi, núrísamurenapa ícha. <sup>20</sup> Eta tacahe, nuvarahanecha níjahúchavahini nítecapuchahe. Nútijacaruvainapáini néchajiricavahini eta eyehe eta nímitusirahenahini. Ichapemurihi eta ímipanererésiranuhi.

*Éma Pablo máimicuticha ena apinana machichana ema Abraham*

<sup>21</sup> Éti evarahapa éhica eta mayeherepianaini ema Moiséini, puiti nuvaraha níminecapaequenehaheya eta táechajiriruvahi eta Sagrada Escritura mayehe ema Abraham. <sup>22</sup> Táechajisihahi éma, apinanairahi ena machichanaveana ajairana. Éma máinapurehi machicha ticaijarehi Ismael, esu maena ticaijaru Agar. Éma máequenereruhi machicha ticaijarehi Isaac, esu maena ticaijaru Sara. Esu Sara, mayenaquenehi ema Abraham. Esu Agar, suvanarahi esu Sara. <sup>23</sup> Esu Agar, araitanaichahahi ésu, te sucachichainapa ema Ismael. Ésusera esu Sara macheruhi eta suítaresirahi. Étasera eta máitupajijiasiravahi ema Viya, máijaracapa ema suchichahi Isaac. Taicha ema Viya máechajicahi ema Abraham, ánipa macahe: “Esu piyena Sara ticachichayare. Ajairayare ema suchicha”. <sup>24-25</sup> Puiti, nuvaraha nímicutiarachinaheya nayehe ena nani apinana esenana. Esu Sara, tájina suímatiyahini eta vanaracacare, nájina nahapapiricahini ésu. Ene vicahehi víti eta véhisirahi ema Cristo, nájina tihapapiricahavimahi. Vahi suácutihini esu Agar, tapamicahi eta suématanerepí taicha sirvientahi ésu. Ene nacahehi ena israelítana náchucanaveanaini núti, napamicasivahi naicha tayehe eta nayeherepianaini. Étarichuhi eta vanairipiana májuchaqueneanahi ema Moiséini te mávihalpahi eta te anuquehe mari ticaijarehi Sinaí, táupahiva eta provincia Arabia, návasahi ena suámariqueneanaini esu Agar. Puíticha ena nujaneanana tachichanaveanahi eta Jerusalén nanasirichuhi eta tapamisiravacahi eta vanairipiana. <sup>26</sup> Jararihiserá eta apanahivare avasare ticaijare Jerusalén, tiávihahi te anuma. Víti tachichanaveanahi. Vaipa vítiparacainahini tapamicahavihini eta vanairipianaini. <sup>27</sup> Éma Viya máechajisihahi eta te Sagrada Escritura eta juca arairu Jerusalén. Máimicutichinahi esu ésuna esena. Ánipa macahe: “Piti esena macheruvinihi eta pítaresirahi, tájina vahi pímatihini eta tacativa eta amuya. Puítiserá tétavicavainapa eta piúrisamurevaya. Vaipa pánasimahi macheruvimahi taicha nárajapainapa ena pichichanaveanaya níjararuviyare núti. Picachuricainapa nácani esenana ticachicharahiana” —macahepa ema Viya.

<sup>28</sup> Nuparapenaveana, viti véhicanahi ema Jesus, vítira tachichahavianahi eta arairu Jerusalén, taicha vituparahaichuhi eta tachichairahaviyare tacuti eta sucatuparahairahi esu Sara mayehe ema Viya, eta sucachichairayare ema Isaac. <sup>29</sup> Tacahe, ema Ismael, suchicha esu Agar, macatianacapa ema amuya Isaac, ema suchicha esu Sara máijararuhi ema Espíritu Santo. Puíticha, tanasirichuhi eta nacatianasirahavihi ena téhicanahi eta vanairipiana vimutu viti mávaháruanahi ema Espíritu Santo. <sup>30</sup> Ánivarepa tacahe eta Sagrada Escritura: “Pivaneca esu Agar émapa ema suchicha, nayana náuchuca eta piyehe. Taicha vahi táuricahini mavehahini eta pímaqueneana

te táitecapapa eta pépeniraina. Macarichuyare ema pichicha suyehé esu piyenaquene tivehayare tamutu” tacahepa. <sup>31</sup> Nuparapenaveana, ene vicahehi víti. Vahi vácutihini ema suchicha esu sirvienta. Vicutihi víti ema Isaac eta tamajinairahi eta vipamicasivainahini eta vítauchiraya eta vanairipiana, maicha ema Jesús.

## 5

*Vímiyanavachucha véhica ema Jesús. Vahi vicuehica eta mavanairipiana ema Moiséini.*

<sup>1</sup> Puiti nuvaraha yátupina ácaicutiara eta macatiuchirahehi ema Cristo, eta vaipa étaparacainayare ítaucha eta vanairipiana. Váipavare ecuisapava te náviraichupuca napamicahé, taicha ticajerayare eta ítauchiraina, machu ajirehéna táicha. Étipasera tacamunu étumechava te nayehe ena nani.

<sup>2</sup> Nuti Pablo nutupiruva numetacahe: Te ísapavapuca namarcatchahe, tímicutijiricavahi tépurucarehi eyehe ema Cristo. Tímicutijiricahivare vahi márataha ticuchucahe éti. <sup>3</sup> Énerichuvare numetacahe: Namutu nácani ajairana tísapavanayare ticamarcana, tacamunuhi náitauchayare tamutu eta vanairipiana. Tájina ánichichaimahi nájequihaimahi éta. <sup>4</sup> Eti enerejiruvana éhica eta vanairipiana, ímijachaipapuca ejacapacareipa mayehe ema Viya. Émepururecaripasera eta máemunasirahehi ema Viya. Émepururec ahivare eta máimicatasirahehi ema Cristo. <sup>5</sup> Vítisera viti vicasíñanahi ema Jesucristo vicunearipa eta majacapirahaviya ema Viya máichavenehi ema Espíritu Santo eta mávahásirahavihi. <sup>6</sup> Eta mávahásirahavi ema Jesucristo, vahi étaparacaimahi eta vicamarcapucaini. Tacarichu ticamunucarehi eta vicasíñairayare yátupina éma, vémunarahinapa eta vítaresiraya.

<sup>7</sup> Éti, iúrinipahi eta éhisirahi ema Jesús. ¿Tájahaserapuca tacayemahi eta evarairahi ecainajiruva? Ísapavayarepa tiyurucaheana, tíminajicaheanayarépaini eta yátupiqueneanahi. <sup>8</sup> Éti máichuhaqueneanarichuhi ema Viya eta éhisiraya eta yátupiqueneanahi. Váhiquene mávarahahini ísapavahini nácani nahapapicahéhini. <sup>9</sup> Échapavaicha nayehe ena tiyururahiana, machu naporeacahe. <sup>10</sup> Nútisera nucasíñavahi eta me Viáquenu eta mamaisapiraheyare ínajicava. Németeacahi vahi ínajicaimahi eta nímiturapianahi. Émasera ema Viya téchahi eta juca náicuñayare nácani tivarahanahi tihapapicahéana.

<sup>11</sup> Esamanurichuhi, eti nuparapenaveana. Natiarihihipuca nácani tépiyaequenehanuanahi eta nupamisirahehi ecamarca eti nuchamurianahi apavasananahi. Étasera eta nímitusirahehi, tájina váhiquene nupamicahéhini eta ecamarcarayare. Nasapihapa ena nujaneanana israelítana tipanajiricanuanahi taicha vahi nupamicahéhini ecamarca. Étara tímiyusemacavacahi eta nasamirahi eta nucametarairuirahi eta viúchucuiraya táichavenehi eta máepenirahi te crusu ema Jesús. <sup>12</sup> Ena nani tipamicahéanahi ecamarca, ¡náechaticavaichaha énajivaina! ¡Nuvarahasa yátupinapaini náechatihicavaini!

<sup>13</sup> Taicha eti nuparapenaveana, vahi étaina tímichuhahehi mayehe ema Viya eta éhicayare eta mavanairipiana ema Moiséini. Váhivaresera étijiricavaimahi íchayarehi eta evarahaqueneanahi tauriqueneana. Ema Viya tíchuhahehi, mavarairahi étijivaya ítátijiricacayarehi taicha eta émunasiracacainahi. <sup>14</sup> Ema ticavanairipi, ánipa macahe: “Pémunaca ema piparaepiya tacuti eta pémunasiravahi píti” macahepa. Te vítauchapuca yátupi eta juca mavanairipi, vahi tácjera eta vítauchiraina jácani apana vanairipi. <sup>15</sup> Vahi táurica ecaticahajiricacahini. Váhivare táurica ecatianajiricacahini, machu étijivaina ecamitiequenehacaca.

*Emá Espírítu Santo tímícatacahavi eta vahi vicusuapa eta tajamurachaqueneanahi eta viáquehe*

16-17 Esamanuchaha. Emá Espírítu Santo mavaraha tímícatacahavi eta vahi vicusuapa eta tajamurachaqueneanahi eta viáqueheana. Étasera eta viáquehe vahi táisapa eta víchiraina eta táuriqueneana. Étachucha tavaraha vicha eta tajamurachaqueneanahi. Eta tacahe, ichapemurihi eta tacanarairahi emá Espírítu Santo. Tacahe, nécatiacachecha puiti eta esuapirainaicha eta mavarahaqueneanahi maicha emá Espírítu Santo eta eyehe. <sup>18</sup> Eta tacahe, éti, te émainapuca emá Espírítu Santo tímítucahe, máejeha eta íchiraina eta táuriqueneana. Vahi étaparacaimahi eta episira eta ícuñayarepuca, táichavenehi eta jácani éjecapiravanapuca tayehe eta vanairipiana.

<sup>19</sup> Tímaticareanahi eta tamauriquenehi eta náíchaqueneana ena tisuapanahi eta tavarahaquenehi eta náquehe: Navehapa esu apana esena, ésupa esu esena suvehapa emá apana achane. Ena amaperuana náíchahi eta natuhusivanahi. Nararihi ena tivehacacanahi ena nacutiqueneana ajairana. Tavayuasiravacahi eta najamuraraivanahi. <sup>20</sup> Natanucahi eta nasiñarajiyare. Nacaravahuhi eta iápemarecáre. Ticatianarecanahi tisemacacanahi. Téteajiricacanahi. Apaesarichu nacamunu tisemanaripavare. Énachucha navaraha tíducavana, nacachuriaracapa mácani achane. Típutsimuriávanapa nayehe nácani apamuriana. Vaipa navaraha tipauchacacana. <sup>21</sup> Ticapinarucacanapa. Ticapahianapa. Ticavaharasiavare. Piéstamareana. Tamutuchucha naicha eta tájiparacana. Puiti numetacachevare nápechava, tacutihi eta numetasirahehi cape juca viásinequenehi. Vahi títujicavanaimahi tisia-pana te mávasa emá Viya ena tíchanahi eta juca tamauriqueneanahi.

<sup>22</sup> Vítisera, tiávahácahavihi emá Espírítu Santo. Te vísapa éma, tíjaracahavihi eta vémunaravaya. Viúrisamurerecavayare, tinaracainapa eta vipanereruana máicha. Tíjaracahavi eta vicayeheraya paciencia. Vijapanurahiya máicha. Vicajiraivayareva máicha. Vítaurahiya. Vétaviuchaya eta viúrivayare. Tímícatacahaviya eta vijaneasiravaya apaesa vahi vicuquicha eta tamauriqueneanahi. <sup>23</sup> Te vítauchahi tamutu eta júcana, vicurisamurechahi emá Viya\*. <sup>24</sup> Tacahe, viti véhicanaripa emá Jesucristo, vaipa víchaimahi eta tamauriqueneanahi tajamurachaqueneanahi eta viáquehe. <sup>25</sup> Tásapihapuca, eta mávahásirahaviripa emá Espírítu Santo, vísapavaya vámutu eta mavarahaqueneana máichayare te viáquehe. <sup>26</sup> Vaipa táuricahini ecasiñavaicahini ecapinarujiricacahipucaini. Váhivare etanucaimahi eta semanere mayehe mácani echamuri.

## 6

### *Vímícatajiricacayare*

<sup>1</sup> Nuparapenaveana, te natiarihipuca ímaha téjecapavanahi ena vichamuriana, econsejachayare éti ímatiequeneharipa maicha emá Espírítu Santo. Táurisera eta échajirisiraina. Ecauneuchava éti apanava, machu iáquipaicava tayehe eta máquipaisiavahi emá echamuri. <sup>2</sup> Ímicatacaca eta ecatiuchiravaina eta jácani íchararacavanahi. Ene tacahehi eta ítauchirahi eta mavanairipi emá Viáquenu Jesucristo, étaripa eta vémunasiracacayarehi. <sup>3</sup> Taicha nararihi ena tímijachavanahi vahi tiáquipaicavanaimahi tayehe eta pecatuana. Vahi ecucahe éti. Vahi tacaemuñavacarehini, taicha eta juca vahi tánecapácare.

\* **5:23** Emá Pablo te mayeherepi eta máechajiriruvana, ani macahe: “Tájina jácani vanairipi tapamicahavihin vahi vícha eta juca táuriqueneana”. Étasera eta macayemaquenehi, ani tacahe: “Vicatuparaha víchayarehi tamutu eta juca táuriqueneana”.



<sup>4</sup> Váhivare tácaemuñavacare vácahehipucaini: “Núti, váhirichu nusipeatura. Núripana nayehe ena apamurirana”. Te viúrihipuca, vimatinairayarechucha. Víti véchinavahi eta viúrivahi eta vítaresirahi. <sup>5</sup> Véchaquenevapáchupa víti eta vítaresiraya mayehe ema Viya.

<sup>6</sup> Nutuparacahe eta apana. Ecajiyare eta ímahaqueneana mácani tímitucahe eta máechajiriruva ema Viya, taicha eyeheyarehi eta máimiturapiana eta tiúrichaheyarehi.

<sup>7</sup> Numetacahevare eta apana. Nuvaraha étupiricaya eta epanereruana. Machu ecatianaca ema Viya. Taicha te icha eta pecatuana, yátupiqueneyare eta ecamítiequenehavayare. <sup>8</sup> Te icha eta tájiparácana tavarahaqueneanahi eta iáqueheana, étarichuhi ticamítiequenehaheyare eta ítaresirana, tímicuñacaheyareva. Téhesera icha eta táuriqueneana mavarahaqueneanahi ema Espíritu Santo, yátupina táurina eta ítaresira. Ímahayareva eta iúchucuiraya, máichecuaraquirénapa eta iúricacarevaya. <sup>9</sup> Eta tacahe, vahi vicucainajiruva eta víchirahi eta táuriqueneana. Váhivare vicuyacujiequenehava eta vicuchapirahi eta vícuchihi mayehe ema Viya te táitecapapa eta jena sácheyare máijarasirahaviyare. <sup>10</sup> Táitusiava, te tatiarhinapuca eta vicamunucarevana nayehe ena achaneana, te vímahahipuca eta nacamunuiravahi, vítijivayare víchayare eta táuriqueneana nayehe. Tavetijipa te énahipuca tipauchahavianahi ena vichamurianahi tayehe eta juca véhiruhi, vicajiyarehi éna.

*Eta táichecuaraqui eta máechajiriruva ema Pablo*

<sup>11</sup> Ímaha ichapevacanecha eta juca nuletrana. Nuvahurupajipa núti eta juca nucajureirahehi éti. <sup>12</sup> Ena nujaneanana israelítana, tétavicavahi eta nasemanevahi viyehe víti vicametarairuhi eta viúchucuiraya táichavenehi eta máepenirahi ema Cristo te crusu. Tásiha, ena nani ticamesajiricaheanahi navaraha ecamarcaya, éna navaraha témemunacavanayare nayehe ena nujaneanana, apaesa vaipa nacupanajiricavaca. Navaraha nahapapicayarehi eta nasemaneva. <sup>13</sup> Navarahahivare ticunachavanayare eta nacamesairahehi ecamarca te iáquehe, náimiturehéna éti eta éhisiraina eta vanairipiana. Énayapasica vahi náitauchahini támutuhini eta vanairipiana. <sup>14</sup> Nútisera, eta nítaresirahi, nuvavinavahi ichape maicha ema Jesucristo, máepeninanuhi te crusu níchavenehi núti. Tacahe, núti apana nínajicaripa eta néhisirainahini eta tayeherepiana eta apaquehe. Vaipa nútiparacaina tayehe, taicha eta máepenirahi níchavenehi núti.

<sup>15</sup> Eta mávahásirahavihi ema Jesucristo, tamuturipa arairuhi eta vítaresira. Apanapa eta viyeherepiyare. Vaipa étaparacaimahi eta viyeherepiana ichasiqueneanahi, váhivare eta vicamarcapucaini te viáquehe. <sup>16</sup> Éti, te esupa eta juca nímiturapianahi eyehe, nuvaraha májapanuhehini ema Viya, máijaracahehini táurivaina eta epanereruana taicha eti yátupiquenehi machanerahehi ema Viya.

<sup>17</sup> Tiuri puiti, németeaca núti tájina táeñamavacarehíni eta esupajiraivahi eta nuyehe, váhivare ísapavahíni ena nácani ticamesajiricaheanahipuca éhica eta nayeherepiana. Núti, yátupiquenenuhi apóstolenuhi mayehe ema Viáquenu Jesús. Eta juca nujaranahi te náquehe, éta tímereuchanuhi eta yátupiquenérachi eta nucaemataneasirahi éma.

<sup>18</sup> Nuparapenaveana, nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.

## **Eta macartane ema Apóstole Pablo nayehe ena machamuriana ticavasanahi te avasare Efeso, ticaijare EFESIOS**

<sup>1</sup> Nuti Pablo, mayehenuhi apóstole ema Jesucristo, taicha manerejiru-nuichuhi ema Tata Vicaiyaquene, navarairahi nímitucaya ena achaneana eta máechajiriruvana. Tásiha puiti, nucajurehe eta juca carta eyehe eti nuchamuriana ecavasanahi tayehe eta avasare Efeso, taicha éti machane-raheripa ema Viya, táuriquenehi eta éhisirahi ema Jesucristo. <sup>2</sup> Nuvaraha macatajicahehíni ichape ema Tata Vicaiyaquene, émapa ema Viáquenu Jesucristo. Nájaracahehíni eta táurivaina eta epanereruana.

### *Tétavicavahi eta viúricacarevana táichavenehi eta viúrujasirahi ema Jesucristo*

<sup>3</sup> Núti nucunachaparaca ema Viya, ema Macaiyaquene ema Viáquenu Jesucristo taicha ichape eta máimicatasirahavihi táichavenehi eta viúrujasirahi ema Cristo. Puiti tachichahaviripa eta anuma. Ichape eta viúricacarevahi maicha ema Espíritu Santo. <sup>4-5</sup> Acane, te tamirahu eta táepaniravapa eta apaquehe, ema Viya tétavicavahi eta máemunasirahi namutu ena achaneana natiarihiqueneanayarehi. Tásiha, émajivapa manacahi eta mapanereruhi eta mavarahaquenehi, étarichuhi eta majacapirayarehi namutu ena ticasíñavanayare mayehe ema Machicha Jesucristo. Eta viúrujasirayare ema Jesucristo, yátupiqueneyarehi machichahavi, matapiravarehaviyarehi te mami- rahu, sántohaviyarevare. <sup>6</sup> Taicha mavarahahi vijirauchayare éma, vítsirijicavayarehi eta táetaviuchirava eta máemunasirahavihi. Mavarahahivare ichape eta viúricacarevana táichavenehi eta viúrujasiraya ema máemunaruquene Machicha. <sup>7-9</sup> Tásiha ema Viya, tiúrihi eta máimaira, máimerecahi eta máemunasirahavihi ichape. Tíjaracahavihi ema Machicha tépeninahaviyarehi eta macaepahairayare eta vipecaturana, viúchucuhayarehi máicha. Énerichuvare tíjaracahavivare eta véchemaraivaya vímatiequenehairaya ichape, taicha tímitucahavihi eta mapanereruana. Váhisera máimerecavanehíni eta juca mapanereruanahi acane; tapaemunava te tiúcupaicapa ema Machicha. Tivapinavahi éma eta máitauchiraya eta mapanereruanahi ema Maiya. <sup>10</sup> Tamutu eta juca mapanereruanahi títauchavayarepahi, jácani tatuparaquipahi. Te jena sáchezare manerejicaripa, ema Viya manacainapa ema Machicha Jesucristo aquenucaqueneyarehi, téchayarehi tamutu eta táichararacavana. Nasuapayarehiva namutu ena tiávihanahi te anuma, énapa ena tiávihanahi te juca apaquehe.

<sup>11</sup> Eta acane te tépanavainapa, ema Viya máetupiricapa eta mapanereruhi. Vahi máejequihahíni. Tásiha, manacapa eta mavarahaquenehi. Acane tinerejicahavihi machichahaviyarehi vimutu viti viúrujiacanayarehi ema Jesucristo, mavarairahi tíjaracahavi eta vícuchianahi. <sup>12</sup> Viti vínapuicanahi véhica ema Cristo, mavarahahi tiúriyare eta vítaesiraya, apaesa nacuna-chayare ema Viya ena apamuriana achaneana eta máimicatasirahavi ichape. <sup>13</sup> Tacutiquene éti, te tínapucainapa esama eta máechajiriruva ema Viya eta mavarairahi ticuchucuhahe, enévanehi éhicahi ema Cristo. Tásiha, eta iúrujasiraipa éma, tiávahácaheripavare ema Espíritu Santo. Émapa títame-tacahe eta machichairahepa ema Viya. Ema Espíritu Santo, ema vituparahahe vimutu viti vicasiñanahi ema Cristo. <sup>14</sup> Eta mávahásirahavihi éma,

títametacahaviparaca eta vijacapiraya eta vícuchianahi mayehe ema Viya te táitecapapa eta viúchucuiraya viti machichanaveanahi. Tásiha, tétavicavainapa eta vicunachirayare ema Viya taicha ichapequene eta máimicatasirahavihi.

*Te tiyujaraca ema Pablo, mayaseaca ema Viya eta náitupajijiasiravaina ena téhicanahi ema Jesús*

<sup>15-16</sup> Eta tacahe, núti néchahehi éti tamutu te nuyujarasirana, taicha nusamairiricapa eta yátupirahi éhica ema Viáquenu Jesucristo étapa eta émuna-jirisiracacahi emutu eti machanerana ema Viya. Nuhasulupayachahi ema Viya eyehe. <sup>17</sup> Éma, macaiyaquenehi ema Viáquenu Jesucristo. Máetaviurehi eta majaraiva te mávihahi te anuma. Nuyaseacahi máijaracaheni eta échemaraivainahini maicha ema Espíritu Santo, apaesa ímatiequenehahini yátupina eta emetacasivanaya eta mapanereruanahi ema Viya. Nuvaraha ímatipaipaichaini éma. <sup>18</sup> Nuyaseacahivare éma yátupina eta ecaicutiarairaya, eti máichuhaqueneanahi éma, eta táetaviuchirayarehi eta viúricacarevayare te jena sácheyare vicuchapaquenehi. Nuyaseacahivare ecaicutiaraya eta táetaviuchirayarehi eta táuricacarevayare eta viávihaya te anuma, vícuchihi viti machanerana ema Viya. <sup>19</sup> Nuvaraha ecaicutiaravare eta táetaviuchirahi eta máitupajijiasiravahi ema Viya, váhiquene tivitaimahi. Éma, macaemataneacahi eta vítaresira, mavarairahi viúripanayare viti vicasiañanahi mayehe. <sup>20</sup> Ema Viya máimerecachi eta máitupajijiasirava ichape te macaechepucapa ema Cristo te máecari, macaejacapa éma te mavaure tayehe eta anuma mávihahi puiti. <sup>21</sup> Ema Cristo, émaripa ichapequenehi aquenuca nayehe ena ángeleana. Tétavicavahi eta masuapacarevahi nayehe. Énerichuvare ena éreanana, mapamicavaca eta nasuapiraina. Éma, tétavicava eta macapicahuirahi. Nájina nácutihini éma. Nájinavare ticachuricaimahi. Apajarahiyarehi eta aquenucaira éma. <sup>22</sup> Ema Viya macaejacahi éma téchahi tamutu eta tatiarihiqueneana. Émaripa vicaiaquenehi vimutu viti machanerana. <sup>23</sup> Víti, eta viúrujasirahi éma, tímicutijiricavaipahi máquehehavihi te juca apaquehe. Vicaemataneacahi eta táuriqueneana tímicutijiricavahi émainahini macaematanehini, taicha tamutu eta víchaqueneanahi, éma téchahavihi, tétumechahavivare.

## 2

*Eta máemunasirahavi, ema Viya ticuchucuhahavihi tayehe eta vícuñayarehíni*

<sup>1</sup> Ema Viya tíjaracaheripa arairupa eta ítaresira. Tichavapa títareca eta iáchanavana, tacuti eta machavirahi títareca ema Cristo te máecari. Taicha éti, cape juca ítaresirahi, tímicutijiricavaichaha épenaquenénahíni táichavenehi eta evainarajivanaini étapa eta epecaturanaini. <sup>2</sup> Cape juca ítaresirahi éti, éhichivare eta tayaherepiana eta apaquehe, tauriqueneanahi. Esuapahivare eta mavarahaqueneana ema Váinaraji, éma mapamicavacahi ena achaneana masuapajirairahanahi me Viya. <sup>3</sup> Vimutu viti, tacahenihi eta vítaresirahi eta acane. Étachucha véhicahi eta tavarahaqueneana eta viáquehe. Vítijiricavaripahi víchahi eta tajamurachaqueneana eta viáquehe, étapa eta vipaneruana tauriqueneanahi. Ichapemurihi eta vímiyusemasirahi ema Viya, vicutihi ena apamuriana masuapajirairahanahi mayehe. <sup>4-5</sup> Tímicutijiricavaichaha vépenaquenénahini táichavenehi eta vipecaturanainihi. Tétavicavatera eta majapanuirahavihi ema Viya. Ichapevare eta máemunasirahavihi. Tíjaracahaviripa arairupa eta vítaresira táichavenehi eta viúrujasirahi ema Cristo. (Táichavenehi eta majapanuirahahi, ticuchucuhahavarehi.) <sup>6</sup> Puiti, eta viávahásirahi ema Cristo, yátupihí eta véchepusiraya, vicaicuchipa

eta macaejasirahavinapa tayehe eta viávacureyare te anuma, vicachaneya ema Cristo. <sup>7</sup> Eta juca émavenehi ema Viya, mavarahahi máimereca maverahi eta viúricacarevana máijararuhaviyare eta viyehe te jena sáchezare, taicha tétavicavahi eta máemunasirahavihi táichavenehi eta viúrujasirahi ema Jesucristo. <sup>8-9</sup> Taicha eta viúchucuirayare eta viápechiravaya vítareca, étavenehi eta majapanuirahavihi ema Viya. Vijacapacareripa eta mayehe, táichavenehi eta vicasiñairahi ema Jesús. Vahi étaparacaina tacuchucuhahavihini eta víchaqueneanahi, taicha vahi vítijivainahini váratahahini vijacapacarehini. Tacahehi éta, apaesa nacuija nacucasiñavavaica eta nacuchucuiravapuca. <sup>10</sup> Arairuinapa eta vítaresira maicha ema Viya. Émarichuvare ticajurucahavi eta véhisirahi ema Jesucristo, mavarairahi víchayare eta táuriqueneana. Eta víchirahi, vítauchahi eta mapanereruana acane.

*Eta véhisira ema Jesucristo, étamurihavinapa. Vaipa víputsimuriavavacaimahi.*

<sup>11</sup> Németeaca échavahi éti eta nacatianasiráhehi ena nujaneanana táichavenehi vahi éhichahini eta nayeherepiana. <sup>12</sup> Éti, cape juca, tájina ímatiyahini eta máimiturapianahi ema Jesucristo. Vuíchahavare ímatihini eta iúricacarevayarehi táichavenehi eta matratune ema Viya viyehe viti israelítana, taicha ticaerajicaheanahi te vimuri. Vuíchahavare ímatihini eta ícuchianayare máijararuheanaya ema Viya. Eta tacahehi, éti ímijachaipa vahi ejacapacare eta mayehe. Vuíchahavare ácasiñavahini eta mayehe. <sup>13</sup> Puítipasera eta éhisirahi ema Jesucristo, iúrujiacaripahi éma. Tásiha, émeñahavaipahi mayehe ema Viya, taicha ecasiñavahi eta máepeninahehi ema Jesucristo. <sup>14</sup> Énerichuvare, étavenehi eta viúrujasirahi éma, tihétamurichahaviripahi vimutu: éti apavasanana, vítipa viti israelítana. Vaipa víputsimuriavavacahini. Tímicutijiricavaipahi étanainehi eta viúchusine. Macaepaharipahi eta vicatianajirísiracacáinihi. <sup>15-16</sup> Eta máijararesirahi eta máquehe te crusu ema Jesucristo, macaepaharipavare eta tapamisirahavini véhica eta vanairipiana étapa eta nayeherepiana típicauchacareana. Puiti, vaipa étaparacainahini eta viúchucuiraya. Énerichuvare macaepaharipa tamutu eta vicátianajirísiracacáinihi táichavenehi eta apavasanahavirahi. Puiti vimutu viti véhicanahi ema Jesucristo, étamurihaviripahi máicha. Tájina víchiravaimahi. Táitusiava tiúrichahaviripa vimutu mayehe ema Viya.

<sup>17</sup> Eta tímitecahi ema Jesucristo, timetapanahavihi eta táurinaquene echajirirucava eta najacapacarevaya namutu ena achaneana. Éma, tiúrichahaviyarehi mayehe ema Viya vimutu: viti vínapucanahi vímati eta máechajiriruvana, étipa eti epaenumavahi ímati eta máechajiriruvana. <sup>18</sup> Puiti, eta viúrujasirahi ema Jesucristo, tiávahácahavihi ema Espíritu Santo. Tásiha, máichavenehi ema Espíritu Santo, vimutu vicuticacaipahi eta vipauchiraipa ema Tata Vicaiyaquene. <sup>19</sup> Eta tacahe, tájinapa táeñamacarehini eta ejacapacareva eta viyehe viti machanerana ema Viya. Esiapamuriahaviripahi víti. Tachichaheripa eta mávasa anuma. <sup>20-22</sup> Eta esiapamuriahavirahi te vimuri, nímicuticharipa te náepiyaca eta ichape peti. Ema Jesucristo, tétavicavahi eta máetumechirahavihi vimutu viti véhicanahi éma. Macuti eta tatumearaya eta yúchamana, eta manasirahi eta máimiturapiana. Tásiha, visiapa viti apóstoleana énapa ena profetana. Tacahe éti, eta esuapirahi eta vímiturapiana, esiaparipahivare. Ecuti eta labriyuana étapa eta yucuquiiana. Ema Espíritu Santo, tétavicavahi eta máitupajijiasiravahi tihétamurichahavihi. Vituparahapachuhi eta manasirahavihi. Máepiyacavacapaipa. Te máitauchapa tamutu, tétavicavainapa táurinavaya eta ichapequenehi templo, mapenayare ema Viáquenu, sántoquenehi.

### 3

*Ema Pablo, éma ticatuparahahi ticametarairuyare nayehe ena apavasanana*

<sup>1-2</sup> Németeaca nuti ímatiequeneharipa eta máetaviuchirahi eta máemunasirahehi ema Viya. Éma, tivanecanuhi níchuhaheya eti apavasanana, mavarairahi éhicayare ema Machicha Jesucristo. Eta juca nucametarairuirahi eta eyehe, étara tivianu puiti juca nucaeratairahi. Nútisera nuyaseuchaheparaca éti te nuyujarasirana. <sup>3-4</sup> Taicha ema Viya timetacanu-ripahi te nuvapure eta mapanereruhi tapaemunava téchacarehi. Puiti te juca nucartane, eta échajicuirá eta nájurehi, németeaca ímatiequenehayare tamuturipa nímatiequenehahi eta mapanereruhi ema Viya tayehe eta macuchusirahavihi ema Jesucristo. <sup>5</sup> Eta juca mapanereruhi ema Viya, nájina náimatiequenehahini cape juca tásinequenehi. Puítisera, ema Espíritu Santo tímechahaviripa viti mayeheana santo apóstoleana énapa ena profetana. <sup>6</sup> Ani tacahehi eta juca tayumururevanainihi: Eti apavasanana, éti apanavare ejacapacarehivare mayehe ema Viya maicha ema Jesucristo. Iúchucuhayare táichavenehi eta éhisirayare eta vimetarairuana. Esiapamurihahaviyare viti machanerana ema Viya. Étamurihviripa. Vicuticacainapa eta vícuchihi viti israelítana.

<sup>7</sup> ¡Tétavicavahi eta majapanuiranuhi ema Viya! Nútisamipa máichuhaquenehi eta nucametarairuyarehi eyehe. Tásiha éma, tétavicavahivare eta máetumechiranuhi te tamutu eta nucametarairuirahi. <sup>8</sup> Vahi németeacavahini nútinasamihini manerejica, taicha nararihihi ena titupajijiapanavanahi eta nuyehe. Tijapanunuhisera ema Viya. Nútisamipa manerejiruhi, mavarairahi numetapanaha eta máichuirahahi éti apana eti apavasanana, eta ejacapiraya eta táuricacarequene vícuchi maicha ema Cristo. Tétavicavaya eta viúricacárevayare. <sup>9</sup> Tacahehi eta mapanereruhi ema Viya eta viyehe acane te tépanavainapa máepiyacaya tamutu. Váhisera tájahúchavahini mametacahavihini. Tapaenumava timetacanuhi nútí, matuparasiranuhi eta numetasiraheyare tamutu. <sup>10-11</sup> Taicha mavarahahi natiarihiyare camuriayare ena tisuapanayare yátupi. Eta táurivayare eta náehisira, tímereuchayarehi eta máetaviuchirahi eta máitupajijiasiravahi ema Viya. Náraminehi ena aquenucanahi tiávihanahi te anuma eta náimairahi eta juca. Eta tacahehi eta mámirapahi ema Viáquenu Jesucristo tamutu eta mapanereruana eta acane ema Maiya. <sup>12</sup> Tásiha puiti, tájina táeñamavacarémahi eta vipauchira ema Viya. Vicasiñavahi eta mayehe, taicha ema Jesucristo émahí ema vicasiñasarequenehi. <sup>13</sup> Eta tacahe, nutuparacaheya: Vahi ecuinajicava eta juca éhiruhi, váhivare ecupica eta esamairirisirahi eta nucaeratairahi táichavenehi eta nucametarairuirahi eyehe. Evapinavasera eta nucamichirahi eta nátajivana, taicha nuvarahahi nímereca eta táetaviuchirahi eta némunasirahehi.

*Ema Pablo mayujaraucha ena machamuriana*

<sup>14</sup> Eta némechirana eta táetaviuchirahi eta máitupajijiasiravahi ema Viya eta juca mapanereruanahi, nútí népuyumiraucha ema Macaiyaquene ema Viáquenu Jesucristo, nucunachirahi éma. <sup>15</sup> Éma, Táiyaquenehi tamutu te anuma. Émarichuvare téchahi tamutu te juca apaquehe. <sup>16</sup> Nuyaseaca éma máijaracaheni éti, ichapenahini eta itupajijiasirava étapa eta etumevainahini te iáchanavana, maicha ema Espíritu Santo. Taicha ema Viya, tétavicava eta máitupajijiasirava, váhivare mayavanaimahi. <sup>17</sup> Nuyaseacavare yátupina eta ecasiñairaya ema Cristo, yátupinavare eta éhisiraina eta máimiturapiana. Túmeheyare eta émunaravahi. Tájina tihapapicahémahi



eta éhisirahi. <sup>18-19</sup> Nuyaseacavare ácutihini ena apamuriana echamuriana te tamutu avasareana, te yátupina ecaicutiara eta táichapevahi eta máemunasi-rahavi ema Cristo. Tájina títaina éta. Tayanapane vahi vicúcaicutiaraquenéna. Nuyaseacahivare yátupina émainahini ecasamure ema Viya.

<sup>20</sup> Tétavicavahi eta nucunachirahi ema Viya, taicha máituruequenehahi tíjaracahavi tamutu, máemetavicahi eta viyasearuanahi, etapa eta vipanerechirana. Tétavicava eta máitupajijiasirava ema Espíritu Santo eta máetupirisirahi eta visamureana. <sup>21</sup> ¡Vicunachaparacahini ema Viya vámutu viti véhicanahi ema Jesucristo! ¡Máichecuaraquirénapa eta vicunachira! ¡Amén!

## 4

### *Viúrujiacacahi maicha ema Espíritu Santo*

<sup>1</sup> Yátupi núti tipresuchanuhi puiti táichavenehi eta néhisirahi ema Viáquenu. Eta tacahe, nutuparacaheya: Tacuija íchiravaina eta ítaresira te mamirahu ema Viya; taicha éti máichuhaquenéherichuhi éma, mavarairahi machaneraheyare. <sup>2</sup> Yátupina eta emansuvaina, etapa eta iúrivaina. Ecayehe paciencia. Ecamichayare jácani te ticaviurevanapuca nácani echamuriana, táichavenénahi eta émunasiracacainahi. <sup>3-4</sup> Émanarichuvare ema tiávahácahe, émaripa ema Espíritu Santo. Ísapava eta macurujisirahehi. Tacuija íchiravaina eta iúrujisiravahi. Étanainarichuhi eta epanereruana. Taicha ema Viya tíchuhahehi. Puiti ecuchapahi eta iápechiravayare ítareca. <sup>5</sup> Émanarichuhi ema Viáquenu. Tacarichuhi véhica eta máimiturapiana. Étanarichuhivare eta vicaicachasira eta viúrujasira éma. <sup>6</sup> Émanarichuhivare ema Viya, Vicaiyaquenehi vimutu. Éma téchahavihi vimutu. Ticaemataneacahavihi vimutu. Émavare tijaneacahavihi vimutu.

### *Vítucaquenepachuhi maicha ema Espíritu Santo*

<sup>7</sup> Énerichuvare ema Cristo, éma tíjaracahavihi eta vítucaqueneyarepachu, jácani mavarahaquenehi. <sup>8</sup> Taicha eta Sagrada Escritura, ani tacahehi: “Te tiárapa éma te anuma, mámamurihapaipa ena macuchureanahi. Máijaracasiclavacapa eta náitupujijiasiravaya ena machanerana” tacahepa. <sup>9</sup> Epanerechaya puiti eta tacayemaquenehi eta márairahi. Eta juca tavaraha vicaicutiara eta máucupaisirahi tativa te juca apaquehe. <sup>10</sup> Te títauchavapa eta tímiucupaicahi, tiárapa tichavapa te mávasa anuma. Tichavavarepa eta émarayare técha tamutu. <sup>11</sup> Tásiha, ema Viáquenu tituparacahavi víti, tíjaracahavivare eta vítucaqueneanayarepachu. Taicha tinacahavipa eta viávacurepachuya apóstolehaviya viti manerejiruqueneanahi. Ena apamuriana, manacahivare profetanahi náimatiequenehayarehi eta mapanereruanahi ema Viya apaesa náitametacavaca ena vichamuriana. Ena apamuriana, manacavare ticametairurahianayare, náichuhayare ena achaneana náehica ema Viáquenu. Ena apamuriana, manacavacavare pastóreanayarehi, najaneacavacayare ena vichamuriana. Énapa ena apamuriana, manacavacavare máestroana, náimitucavacayare eta máimiturapiana ema Viáquenu. <sup>12</sup> Taicha éma, mavarahahi máetupiricayarehi tamutu te etaracu eti machanerana; mavarahavivare vitiarihiyare viti vítátijiricaheyare eti vichamuriana, vicajurusiraheyarehi eta éhisirahi éma. <sup>13</sup> Apaesa yátupina vácuti vámutu eta máurivahi ema Machicha ema Viya; táitecapavanevaréni eta sache eta viúrujisiravaya, tájinapa tahapapicahavimahi eta véhisirahi; vítamuturucaripahini tamutu eta vítucaqueneanahi tásihaqueneanahi me Cristo. Vácutipaini éma tamutu eta máitupajijiasiravahi. <sup>14</sup> Mavarahahivare vimutuyare vímatiequeneha.

Vaipa vácutimahi ena amuyana, témunanasiricavanarichaha éna. Tísapajiricavanarichaha navayuaca tayehe eta apana náimiturapiana ena títuruéquenehana tivayuarecana, napamisiravacahi namutu náéhica eta tamauriqueneana. <sup>15</sup> Eta tacahe, vétumechavayare eta véhisirahi eta máimiturapiana yátupiqueneana, yátupinavare eta vémunaraivahi, vicajurucacayarehivare eta viúruva, vicutiyare ema Viáquenu Jesucristo, taicha émahi ema téchahavihi. <sup>16</sup> Nímicutichahehi eta viáquehe. Camurihi eta táunavahi eta viáquehe; étanai-chuhisera. Camurihivare eta táitupajijiasiravanahi; tamutuhisera ticaematanehi, víchirahi eta vivarahaquenehi. Tájina vahi táejiacavahini. Tamutu tijaneacacahi. Ene vicahehi viti machaneranahi ema Jesucristo. Éma, tétumechahavihi vimutu víti. Eta viúrujasirahi mayehe éma, étamurihavihi. Vimutu vítucaquenepachuhi máicha. Vématanerepipachuhi máicha. Vijaneacacahivare. Vicajurucacapaipahi táichavenehi eta vémunasiracacahi.

*Apanainapa eta vítaresira taicha eta viávahásirahi ema Cristo*

<sup>17</sup> Eta juca numetarapiana eyehe, nutuparacahéicha taicha matupararunuhi ema Viáquenu. Nucavanairipipa puiti: Vaipa ecuapecha ecuquicha eta náichaqueneanahi ena máimatirahanahi ema Viya, náichahi éna eta náitaresirahi jácani tavarahaqueneanahi eta napanereruana súnsurupiana. <sup>18</sup> Tamutu eta napanereruana tétavicavahi eta tamapicuvahi. Vahi apaesainahini tavehahini eta tijarahi. Máecharaireanahi éna, táichavenehi eta tamuracavahi eta nasamureana. Váhiquene navarahaimahi napauca ema Viya apaesa macanaracavacahini éna. <sup>19</sup> Tájinapa apaesainahini náimatihini eta titsirihacare. Tíjaracavanapa tayehe tamutu eta najamuraraivana. Tétavicavahi eta navapinairahi náichahi eta tamauriqueneana tájiparacana. <sup>20</sup> Étisera vahi tacucahe eta ítaresiraya puiti eta éhisirahi ema Cristo. <sup>21</sup> Taicha németeaca yátupihi esamararacahi eta vímitusirahehi. Ímatiripahi eta táuriqueneanahi yátupiqueneanahi tásihaqueneanahi mayehe ema Jesucristo. <sup>22</sup> Tásiha puiti, vaipa ecuesacha echavaucha eta ítaresirainihi acane echipejiricavahi taicha tivayuacahe eta ejamurachirahi eta tamauriqueneana. <sup>23</sup> Puiti éti, ísapaya ema Espíritu Santo mávahácahe, máitsivachirayare eta epanereruana étapa eta ejamurachirana te iáchanevana. <sup>24</sup> Tásiha, apanainapa eta ítaresiraya. Yátupi eta ecaquehéraína ema Viya, ácutini éma eta máurivahi étapa eta masantuvahi.

*Étupiricayare tamutu eta ítaresirana*

<sup>25</sup> Tásiha puiti, vaipa épiyahirahimahi. Étupiruvayare tamutu eta échajirisiravaya nayehe ena echamuriana eparaepiyana, taicha étanarichuhi eta echamuriracacairahi, émanarichuhivare ema Viúrujiaruhi, ema Jesús.

<sup>26</sup> Te tatiarihipuca eta táimiyusemacahe, ejaneacavaicha machu ecapeatura. Te esemapuca, vahi tacunasi eyehe. Énevanéna eperdonachacaca. <sup>27</sup> Ecaunevayare, machu máiturucahe ema Váinaraji, táichavenénahi eta esemanevahi.

<sup>28</sup> Mácani tiámerahinihi, vaipa macuapechava macuamereca. Mácaematane apaesa macunachacare, apaesavare eta jácani máematanevachayare eta maviyihayare eta macajirayare ena ticamunuvanahi.

<sup>29</sup> Váhivare ecunacajacachava eta tájiparácana echájirirucavana tamauriqueneana. Tátupiruva eta échajirisiraváina apaesa étaina eyuchusiha eta nasuapiraina nácani tisamaheanayare, éta tétupirisamurechavacayare éna.

<sup>30</sup> Vahi ecuisapava ícha jácani tamauriqueneana, machu ímipanerereca ema Espíritu Santo, émaripa ema sántoquenehi, tiávahácaheripa éma. Eta mávahásirahehi tímicutijiricavaipahi eta ecamaracahi, taicha ímaticaréipahi

eta machanerahéirahi ema Viya; puíticha, étapa eta te tútecapapa eta jena sáchezare viúchucuirayare.

<sup>31</sup> Váipavare ecunaca eta semanereana. Váipavare ecatianarahimahi. Váipavare ecusemarairihi, váhivare ecuijajachava ecapiaracava. Vahi ecuichanareca. Ínajicaya éti tamutu eta júcana tamauriqueneana. <sup>32</sup> Táitsiva étaviuchayare eta iúrivayare nayehe nácani apamuriana, eJapanurahiyare. Te tatiarhipuca eta náejecapirava, eperdonachacayare taicha ene macahehi ema Viya eta maperdonachirahehi máichavenehi ema Cristo.

## 5

### *Tiúriyarehi eta náitaesirayare ena machichanaveanahi ema Viya*

<sup>1</sup> Puiti éti machichaheripahi ema Viya, máemunaruqueneheripa, tásiha ácutipa éma eta máurivahi. <sup>2</sup> Émunajiricacayare eta itaesaraya. Ecutiyare ema Cristo eta máemunasirahavihi. Éma, macurismurecharipa ema Maiya eta máimijararesiravahi víchavenehi víti, macutihi eta sárarechicha uvesa nacaparuhi eta námavahuhi me Viya.

<sup>3</sup> Eta machaneraheriripa ema Viya, vaipa táuricahini íchahini eta túhusicare. Tíñehi te mamirahu ema Viya. Váhivare ecupanerecha ícha jácani tiámanahi eta tamauriqueneana. Váhivare tacuvayuacahe eta tájiparácana. <sup>4</sup> Vahi ecunacajacachava eta échajirirucavana titsirihacarepiana, súnsurupiana, tájiparácaqueneana, taicha tájina tacunachacarévaina éta. Tamutusera eta échajisiranaya, amairipiquenéna eta ehasulupayachiraya ema Viya. Jéhevere, éta iúrihaquenehi. <sup>5</sup> Németeaca ímatiequeneharipa éti eta vahi tiúchucuhanaimahi nácani ticaecahicacanayare, ema achane te mavehapuca esu esena apayena, esu esena te suvehapuca ema achane apaima; nácanivare ena amaperuana tivehajiricacanahi; mácanivare achane mavehapuca ema maparajairava; nácanivare tijamurachana tamutu jácani náimahaqueneanahi. (Ena tavayucavacahi eta najamurachirana, énarichuhi ticasíñarajiana.) Namutu ena nani tímereuchavanahi vahi machanerainahini ema Cristo. Vahi tisiapanaimahi te mávasa ema Viya. <sup>6</sup> Tásiha éti, vahi ecuisapava nácani navaraha navayuacahe te náechajiriruva súnsurupiana, napamisiraheya ícha eta júcana tamauriqueneana, taicha eta júcana, éta tiviuchavacayare nácani masupajirairahanahi me Viya, muracayare eta náicuñayare. <sup>7</sup> Tásiha, ejaneacava, machu ácuti ena nani tíchanahi eta júcana tamauriqueneana.

<sup>8-9</sup> Échavaripa tacáhénihini eta itaesarahi acane étarichu íamapiricainihini iávacuhahi te timapicu. Puítisera eta iúrujasiraipa ema Viáquenu, tijarahiripa eta itaesarahi. Tásiha, ímerecayare eta emicauchirayare ena apamuriana achaneana, ímeresirayare eta iúriya, étapa eta tipachinaqueneana eta itaesarahi, étapa eta yátupirahi eta éhisirahi ema Viya. <sup>10</sup> Tamutu sácheana ecaravahuinavarepa eta mavarahaqueneanahi máuriruanahi ema Viáquenu. <sup>11-13</sup> Ejaneacava éti, machu iápechava ícha eta tamauriqueneana náichaqueneásahi ena achaneana te timapicu. Taicha tétavicavahi eta tatsirihacarevahi eta náichaqueneanahi eta nayumurusiravahi. Étisera ímitucavacayare éna. Emicauchayare eta taurivahi eta náichaqueneana, apaesa náimaha eta táíñehivahi eta náichaqueneanahi. Tásiha, natiarhipuca ena tivarahanaya náinajicayare. <sup>14</sup> Eta emicahuchiravaca éna, tacuti eta táechajiriruva eta jirasare, ani tacahe:

Pítisami pímicutijiricava pépenaquene taicha eta tavayuasiravihi eta pecatuana.  
Péjamiuchavaichu eta pímacacarasiravahi

te timapicu.

Písapava macaechepecavi ema Cristo, mavarahahi timícauchaviyare.

<sup>15</sup> Eta tacahe, yátupina eta ejaneasiravaina. Vahi ecucuti ena máecharaireana. Ímrecavaya eta ítupajijasiravahi. <sup>16</sup> Ecamapuravachaha tamutu sácheana eta ímitusiravacahi ena achaneana, taicha maverana ena tíchanahi eta tamauriqueneana. <sup>17</sup> Tacuija eta esunsuvanaina. Epanerechayare apaesa ácaicutiara yátupi eta mavarahaquenehi ema Viáquenu. <sup>18</sup> Vahi ecucavaha taicha éta ticauyayacarehi ticamitiacahe. Ísapavasera émaira máechahe ema Espíritu Santo tamutu eta ítaresira. <sup>19</sup> Eta ímiturapiyare nayehe ena echamuriana, eta salmo étapa eta jirasareana majirihuana ema Viya. Eta ecunachirainahi ema Viáquenu, iúrisamureyarehi eta ejiraira. <sup>20</sup> Ehasulupayachaparacaya ema Vicaiyaquenehi te máijare ema Viáquenu Jesucristo tayehe tamutu jácani íchararacavana taicha tásihaqueneanahi eta mayehe.

<sup>21</sup> Emutu éti, ímreca eta iúriya táichavenehi eta epicauchirahi ema Viya. Ísapava eta nacamunuirahahi ena echamuriana. Vahi étainachucha éhica eta evarahaqueneana.

*Ema achane ésupa esu mayena náimrecayarehi eta náuriva énajicacayarehi*

<sup>22</sup> Étiripa eti esenana ecaimaqueneanaripahi, tituparacahehi epicauchayarehi ena ímanaveana. Esuapajirahiyarehiva nayehe, tacutiyaichu eta esuapirahi ema Viáquenu. <sup>23</sup> Taicha mácani achane, tatuparacahi éma, téchaya eta máitátiraya esu mayena, tacutihi ema Jesucristo tatuparacahi éma téchahaviyarehi vimutu viti véhicanahi éma. Émarichuvare ema ticatiuchahaviya vimutu viti machaneranahi. <sup>24</sup> Tásiha, yátupihí eta vipicauchirahi visuapahi ema Cristo. Ene nacaheyarehi ena esenana, nasuapayarehi napicauchayarehi ena náimanaveanahi te tamutu.

<sup>25</sup> Étiripa eti náimanaveanahi, tituparacahehi émunacavacayare ena eyenana, tacutihi eta máemunasirahavihi ema Jesucristo viti machaneranahi. Éma, tímijararecavahi víchavenehi, <sup>26</sup> taicha mavarahahi tisantuchahaviyarehi. Tásiha, masipahasinahavipa eta viáchanevana eta visuapirahi eta máimiturapiana. Eta masipahasirahavi tacuti eta sucavira te une esu araimayare te tétupiricavapa tayehe eta sucaimarayare. <sup>27</sup> Taicha mavaraha tacuija víchiravaina viti machanerana te táitecapa eta sache vitupihamirauchirayare éma. Vétaviuchayarehi eta viúrinavaya. Tájina véchipejicaimahi, tájinavare tijararecahavamahi, apanaimahi víchava. Mavarahahivare tétavicavayarehi eta visantovaya. Yátupi matapiravarehaviya víti. <sup>28</sup> Ene ecaheyarehi eti náimanaveanahi, ímrecayarehi eta émunasirahi ena eyenana, tacutihi eta émunasirahi eta iáqueheana. Mácani máemunacahi esu mayena, tímicutijiricavahi eta máemunasiravahi éma. <sup>29</sup> Taicha viti achaneana, eta vítare-sirahi, váhiquene vicatichaimahi eta vécheana. Tétavicavahi eta vijaneasirahi, véchapajiricahi, vénichavare eta véche. Ene macahehi ema Cristo eta majaneasirahavihi, máechapajirisirahavivare viti machanerana. <sup>30</sup> Víti tímicutijiricava eta táunavanahi eta máquehe táichavenehi eta viávahásirahi éma. Vicutijiricavavare eta maeche, máperanavare. <sup>31</sup> Échavaya eta táechajirisirahi eta Sagrada Escritura, ani tacahe: “Mácani amaperu achane ésupa esu mayenayare, te ticaimanapa, tatuparacavacahi típutsicavanayarehi eta napenana ena ticachichana. Énajivainapa títáticacanayare. Eta navehacacairahi, tímicutijiricavaipa étanarinehi eta náqueheana” tacahepa. <sup>32</sup> Te juca tametarapi, jararihi eta tacayemaquene tayumurrevaquenehi. Puiti

nímitucahe: Viti machanerana ema Cristo, eta viúrujasirahi éma, étanamu-riháviripa tacuti eta étanarinehi eta náqueheana ena ticaimanahi. <sup>33</sup> Tásiha, nuvaraha yátupina ácaicutiara eta juca nucayemaquenehi. Tituparacahehi eti ajairana, yátupina eta émunasiraina ena eyenana tacuti eta émunasirahi eta iáquehe. Énerichuvare eti esenana, tituparacahehi epicauchayarehi ena ímanaveana.

## 6

### *Ena amaperuana, náimerecayarehi eta náuriva nayehe ena ticachichana*

<sup>1</sup> Étiripa eti amaperuana, yátupina eta esuapajiraivaina nayehe ena ticachichaheana, taicha tituparacahehi ene ecaheyarehi eta éhisirahi ema Viáquenu. <sup>2-3</sup> Ema Viya tjaracavapa tjaracaheyare eta iúricacarevaya eti esuapajirahiana, taicha ani tacahe eta máechajiriruva: “Epicauchayare ena ticachichaheana. Te esuapajirahi éti, nucajurucaheya te apaquehe. Tájina íchiravaimahi, iúritaresirainapa” macahepa. Tétavicavahi eta tasuapacarevahi eta juca mavanairipi ema Viya eta eyehe.

### *Ena náiyana, náenana, táurini eta náimitusiravacaina ena nachichanaveana*

<sup>4</sup> Énerichuvare, eti náiyana, náenana, vahi ecuiimiyusemaca ena echichanaveana tayehe eta evanesirana. Tauri eta ecavanairipira, apaesa napicaurahi eta najurusiraina, énajivayare ticaratacavana. Ímitucavaca tamutu eta máimiturapiana ema Viáquenu, apaesa nasuapajirahi.

### *Ena ticaquensurecana, táurini eta nacaemataneasiraina*

<sup>5</sup> Énerichuvare eti ecaquensurecana, tituparacahehi esuapajirahiyare nayehe ena iáquenuanahi. Epicauchavacayareva, émunacayareva. Táurivainahini eta ecaemataneasirahi, tacutirichu eta táurivahi eta ecaemataneasirahi ema Cristo. <sup>6-7</sup> Evapinavayarehi te esamureana eta ecaematamera, vahi tacucarichu te natiarihi ena iáquenuanahi te emirahu. Vahi ecuyacujiririha. Evapinavayaresera eta ecaemataneasirahi éna, taicha émarichuvare ema Viáquenu ema ecaematanearuhi. Ímrecavayare eta yátupirahi mavanarahahi éma. Tacaheyarehi eta itauchirayare eta mavarahaqueneana ema Viya. <sup>8</sup> Taicha écharipahi émutu éti, vijacapayare eta vícuchihi mayehe ema Viáquenu te vítauchahi tamutu eta táuriqueneana. Vahi manerejicaimahi nácani líbreanahi énapa ena ticaquensurecanahi; vínunayarehi tayehe eta vícuchihi.

### *Énapa ena náquenuana, tituparacavaca eta náurivaina nayehe ena nachanerana*

<sup>9</sup> Énerichuvare eti náquenuana, tituparacahehi iúriyareva nayehe ena echanerana, eJapanuyare éna tayehe eta evanesirana. Vahi ípicararerecaimahi te evanesirana. Ínunayarehi échava eta matiarahirahi ema Iáquenuhivare éti apanava, ema tiávihahi te anuma. Taicha éma, nájina máepuruquenéna ena acha neana.

### *Yátupina eta vicasíñavairahi me Viya; vétumechavavare eta véhisirahi*

<sup>10</sup> Puiti nutuparacahevare, nuparapenaveana, ecasíñava yátupina mayehe ema Viáquenu apaesa máijaracahe éma eta matumeva étapa eta máitupajijiasirava. <sup>11-13</sup> Nuvaraha numetacahe eta juca: Ema Váinaraji ticanarahavihi víti machaneranhavihi ema Viya. Tétavicavahi eta mavarairahi tiáquipaicahavi. Tásiha, tituparacahavi eta véchapajirisiravaya eta vicatiuchiravaya mayehe éma. Natiarivare ena camuriqueneana majupahana, énapa ena masuntarurana. Váhisera achaneanainahini, váhivare viparaepiyainahini. Éreananahi éna, váinarajiqueneanahi. Tétavicavahi eta nasimutuvahi éna.



Tétavicavahivare eta náitupajijiasiravahi étapa eta natumeva eta nacaematanera tayehe eta juca apaquehe, tamapicuquenehi náicha. Eta tacahe, échapajiricavayare eta ecatiuchiravayare tayehe eta mavayuarauiana ema Váinaraji. Étumechava eta éhisira. Ecuti ema suntaru ticasiañavahi tayehe eta mamuiriha vahi tasiapahacaimahi eta espada. Tásiha, eratahayare ecamicha tamutu eta ecatajivairana. Vahi ecañajiruvaimahi. Iáquipaicayareva namutu ena machamuriana ema Váinaraji. <sup>14</sup> Yátupinahisera esuapa eta vímiturapiana yátupiqueneana. Vahi ecuchavacuéjehava. Átupiruvahini eta ítaresirahi. Ecutiyare ema suntaru, manacahi eta máitijuhe, étapa eta fiéromehi tiávichayarehi eta matupa, tájinasarepa náicharaca ena mánarana. <sup>15</sup> Vahi tacuechuquiha eta ecametarairuirayare eta majacapiraya ema Viya namutu ena achaneana. Etanucayareva eta eparupevaya apaesa erataha eta epaisirayare te acheneana eta ítecapirayare tayehe eta tayerehiqueneana avasareana. <sup>16</sup> Tacutiquene eta ticamunucarehicha, yátupinahi eta ecasiñavairaina mayehe ema Viya. Eta ecasiñavairayare táimicutijiricavahi iávihuinahini eta ticaemahaequenehayarehi eta tamuruirapahi eta mayucaraqui ema Váinaraji. <sup>17</sup> Tacutiquene, ecasiñavahi yátupina eta iúchucuirayare, tácuti eta macasiñavaira ema suntaru eta mayehe casco te machuti. Iúnacahi eta máechajiriruva ema Viya, máimiturehequenehi ema Espíritu Santo. Eta juca tímicutijiricavahi eyehenahini espada eta ecatiuchiravahi. <sup>18</sup> Te eyujaraca, eyaseacaya ema Viya máijaracahe eta etumevaina. Eta eyujarasirana, tacuija tahapapiricahe eta máimitusirahehi ema Espíritu Santo. Vahi ecuyacuji eta eyaseuchiravaca namutu ena vichamuriana, majaneacavacahini ema Viya, táurivaina eta náehisirahi. <sup>19</sup> Énerichuvare, te eyujarasirana, eyaseuchanuhini me Viya, apaesa máijaracanhini éma eta nuvapinairava, tacuijavare tahapapiricanu eta néchajisirayare ena achaneana. Nuvaraha tasuapacarehini nayehe eta najacapacarevahi mayehe ema Viya. <sup>20</sup> Ema Viáquenu tinacanhini núti námayarehi eta máechajiriruva, nucutiyarehi mácani achane embajador mayehe ema aquenuca Emperador. Éta tíchanuhi ticaviurenuhi eta napresuchiranuhi puiti. Eta tacahehi, nutuparacahe eyujarauchanu, eyaseuchanu me Viya, máijaracanhini eta nutumevaina eta nucametarairuirayarehi nayehe namutu ena achaneana te avasareana, váhivare nucuyacujihini eta nucametarairuirayarehi.

*Eta táichecuaracui eta macartane ema Pablo*

<sup>21</sup> Tiuri puiti, máimahaherinesera ema vémunaruquenehi vichamuri Tíquico. Éma, títametacaheyare tamutu eta níchararacávahi núti. Tétavicavahi eta máimicatasiranuhi eta vicaemataneasirahi ema Viáquenu. <sup>22</sup> Eta tacahe, névatacachi éma eta ara eyehe. Títametacaheyare eta víchararacavahi, tétumechaheyareva éti eta éhisiraya ema Viáquenu.

<sup>23</sup> Puiti nuyaseacahi ema Vicaiyaquenehi émapa ema Viáquenu Jesucristo, náijaracahehini eti nuchamuriana eta enarasirahi te esamureana tamutu eta epanereruana, tajurucahivaréni eta ecasiñavairahi eta nayehe, étapa eta émunasiracacahi. <sup>24</sup> Nuyaseuchahevare táetaviuchahini eta iúricacárevaya emutu eti yátupihini éta émunasirahi ema Viáquenu Jesucristo.

Tamutupa eta néchajiriruvanahi eyehe.

## **Eta macartane ema Apóstole Pablo nayehe ena machamuriana ticavasanahi te avasare Filipos, ticaijare FILIPENSES**

<sup>1</sup> Nuti Pablo émapa ema Timoteo, mavanarahavihi ema Viáquenu Jesucristo, vímiamareca puiti eta juca vicartane eyehe emutu eti vichamurianahi ecavasanahi te Filipos, énaripa ena pastoreana énapa ena najupahana. Taicha eti machaneranahi ema Viya eta iúrujasiravahi ema Jesucristo. <sup>2</sup> Nuvaraha máetaviuchahini eta macatajisirahe ema Tata Vicaiyaquene, émapa ema Viáquenu Jesucristo; nájaracahehine táurivaina eta epanereruana.

### *EMA PABLO MAYASEUCHAVACA TE MAYUJARASIRANA ENA MACHAMURIANA*

<sup>3</sup> Tatiarihi eta te néchahe, nuhasulupayachahi ema Viya íchavenehi éti. <sup>4</sup> Te tamutu eta nuyujarasirana, tétavicavahi núrismureva eta nuyaseuchirahehi emutu éti. <sup>5</sup> Taicha te jena títapucainapa sache eta nucemetarairuirahi eta eyehe, ichapequene eta ímicatasiranuhi. Puíticha enasirichuhi. <sup>6</sup> Ema Viya, tétavicava eta máurichirahe eta ítaresira cape juca. Núti, tétavicavahi eta nucasiñavairahi mayehe eta máimiyansiravaina eta máurichiraheyare, mavarairahi iuri eta machimapiraheya ema Jesucristo te jena sache machavirayare. <sup>7</sup> Énerichuvare nucasiñavahi eyehe eta ejacapiraya eta máurichirahehi éma, taicha némunacahehi ichape emutu éti. Nucasiñavahivare viciticacaipahi eta vijacapirahi eta máimicatasirahavihi ema Viya, tayanapane viyerehicacahipuca, étaripa te juca návihahi cárcel. Étaripa te nutupihamirauchavaca ena tuparairucana eta nucatiuchirayarehi eta yátupira eta viúchucuiraya maicha ema Jesucristo, apaesa te nasuapapuca éna apanava. <sup>8</sup> Tímaracanuhi ema Viya eta némunasirahehi emutu éti, nucutihi ema Jesucristo eta máemunasirahehi éma. <sup>9</sup> Nuyaseacahivare ema Viya eta iápajusiravainahini eta émunaraivaya. Ítupajijiacavahini, támutuhini ímatiequeneha, apaesa ímatiparahini eta enerejisiraya eta táuriquenehi. <sup>10</sup> Taicha nuvaraha tápajupanávainahini eta iúrivaina eta ítaresirana, tájina téchípejicahémahi. Matapiravarehéyare, tiúriyarepa eta machimapiraheyare te machava ema Jesucristo. <sup>11</sup> Nuvarahavare iápajusiravainahini eta íchaqueneana táuriqueneana eta ecaemataneasirahi ema Viáquenu Jesucristo. Tásiha, tétavicavayarehi eta nacunachirayarehi ema Viya ena achaneana eta náimairahenehi éti.

### *ETA VÍTAESIRAHÍ, PUITI ÉMAPA EMA CRISTO TÉCHAHAVIHÍ*

<sup>12</sup> Nuparapenaveana, nuvaraha numetacahe tájinaichucha táichavahini eta nucaeratairahi. Eta návihairahi núti te juca cárcel, camuriana ena numetaruanahi eta máemunaraivahi ema Viya eta nayehe. <sup>13</sup> Énaripa ena tasuntarurana eta palacio énapa ena apamuriana achaneana náecharipahi eta táemeratasiranuhi eta néhisirahi ema Cristo. <sup>14</sup> Tacutiquene, eta náimairanuhi eta nupresuvahi, ena camuriqueneana nuchamuriana táetumechavacainehi eta nacemetarairuirahi eta máechajiriruva ema Viya. Vaipa napicahini taicha ichape eta nacasiñavairahi mayehe ema Viáquenu. <sup>15-17</sup> Nararihi éna, tiúrihi eta napanereruana eta náimituresirahi te máijare ema Cristo. Tatupiruvahi eta náichirahi, tásihaquenehi eta námunasiranuhi, taicha náechahi éna eta návihairahi ani, nucatiuchirayarehi eta yátupira eta viúchucuiraya maicha ema Jesucristo. Nararihismisera ena tímiturecanahi te máijare

ema Cristo, váhisera tátupiruvaquenénahini eta napanereruana. Nacapinaruraivarichucha, navarairahi ticachuricanuana. Napanerechaichuchavare tiápajucavayarehi eta néñamiravana, tavetijipa eta návihairahi nuti te juca cárcel. <sup>18</sup> Tájinachuchasera táichavahi. Núti vahi nucapinaruvacaimahi ena nani páureanasami. Ticurismurechanuanarichucha núti eta náechajisi-hairahi ema Cristo namutu.

Énerichu ichapemuriyarechucha eta núrismurevaya, <sup>19</sup> taicha németeaca tiúriyare tamutu eta níchavaquenevayare. Taicha tisamacarehi me Viya eta eyaseuchiranuhi. Émaripa ema Espíritu Santo, ichape eta máimicatasiranuhi. <sup>20</sup> Núti, ichape eta nuvarairahi váhini nucutsirihaini. Nuvaraha nuvapinava eta nímiyanirava nucasiñavaya mayehe ema Cristo eta majaneasiranuhi apaesa náimatihini ena achaneana eta yátupirahi eta macasiñacarevahi ema Cristo. Tájina vahi nupicacavahini eta náimicatichiranuhipuca, táimicapacanupuca. <sup>21</sup> Taicha, eta nítaresirahi puiti, ema téchahi ema Cristo. Te népenapuca, tiápajucavainapa eta núricacarevaya. <sup>22</sup> Téhesera te nítarecarichahapuca, nucamapuravayarehi nucaemataneacayare ema Viáquenu. Eta juca, vaipa nímatiequeneha tájahapuca tiúripanayarehi nuyehe. <sup>23</sup> Nuvarahaipanéni njahúchavahini népenahini apaesa nunaracapai ni te machacaya ema Cristo. Eta juca tiúripanahi eta nímairahi. Váhisera nímatiequeneha tájahapuca eta néhiruyare. <sup>24</sup> Néchahevaresera éti, néñamahevare nujunijicahe. Tiúripanaichupuca vuíchaha nucuepena. <sup>25-26</sup> Tásiha, németeaca vuíchaha mavaraha népenahini ema Viáquenu. Nucuchapa nápechavahivaréni níteca eta ara eyehe, nucachaneheyaréchaha éti. Nímicatacahenumayare apaesa tápajucavahini eta iúrisamurevana eta ecasiñavairahi me Viáquenu Jesucristo. Tacahe, tétavicavapai ni eta viúrisamurevainahini eta viúrujiacacairaya.

<sup>27</sup> Eta ítaresiraya, ímereca yátupina eta éhisiraina eta máimiturapiana ema Cristo. Tayanapane váhipuca nucuítca eta eyehe, ímiyanavasera eta étumechiravaina eta iúrujasiracacahi. Nusamairiricahehini táurihini eta ímiyaniravahi éhica emutu, étanainarichuhi eta epanereru, evapinavahi eta ecame-tarairuira eta véhiruhi tayehe eta viúchucuiraya. <sup>28</sup> Vahi ecuarameca naicha nácani iánaranahi. Eta nacatianasirahehi, tímicaecherachahi eta nacaicuchirahi eta náicuñayare. Táimicaecherachahi eta iúchucuirayarehi éti maicha ema Viya. <sup>29</sup> Éti, iúricacarehi maicha ema Viya eta ejacapacarevahi mayehe, táichavenehi eta ecasiñavairahi me Cristo. Tacamunuhisera eta ecatajivairayare táichavenehi eta éhisirahi éma, ecaicuchirahi éta. <sup>30</sup> Ecutinuripahi eta vicanarajirisiravacahi ena viánaranahi. Éti ímahanurichuhi cape juca eta nuncanaravacahi, puíticha esamairiricanuipahivare eta nunasirichuhi nuncanaravacahi.

## 2

*Tétavicavahi eta masuapajiraivahi ema Cristo. Tásiha puiti, tétavicavayarevare eta masuapacarevayare.*

<sup>1</sup> Tacahe puiti, németeaca esamavahi eta máetumechirahehi ema Cristo, iúrisamurerahivare táichavenehi eta máemunasirahehi; evapinavahivare eta mávahásirahehi ema Espíritu Santo, máimitusirahehi eta ecajirahi ejapanurahihivare. <sup>2</sup> Tacahe puiti, nuvaraha étanainarichuvare eta epanereru, ácuticacaini eta ecaemataneasiraina ema Viya; tácuticacahivaréni eta émunasiracacahi. Tásiha, tétavicavayare eta núrismurevaya ícha. <sup>3-4</sup> Éti eta ítaresiraina, tacuija eta ecasiñavavaisiraina, váhivare ecuimijuquiha eta evarahaqueneana. Nuvarahasera ímerecahini eta emansuvaina nayehe

ena echamuriana; énahi émunaruqueneanahi. Nativaina ímicatacavaca éna, táetaviuchiravainahini eta náuricacareva ícha. Vahi ecuítátijiva.

<sup>5</sup> Emutu éti iámanahini eta táurivahi eta juca mapanereru ema Jesucristo, tisuapajirahi éma. <sup>6</sup> Éma, tacahehi eta mapanereruanahi: Vahi macasiñavahini eta víyairahi éma. Tétavicavahisera eta mamansuvahi, étapa eta máurivahi. Tísapajiricavahi. <sup>7-8</sup> Tacahe, manaquicahi eta mávacuréní. Eta máucupauchirahavihi, macutipaiapa mácani achane macaquequenechucha eta máuchusirahi. Tamutusera eta máítaresirahi, tétavicavahi eta masuapajiraivahi, macutihi mácani moso. Eta masuapajiraivahi, étapa tiámaparauchahi eta máepenirahi te crusu. Titsirihacavahineni, máítauchahisera. <sup>9</sup> Eta tacahe, ema Viya máijaracapa eta máejasihayarehi tayehe eta anuquehepana mávacureyarehi, étapa eta tacapicahuirahi ichape eta máijare, <sup>10</sup> apaesa námutu nácani tisamanahi eta máijare Jesús, tépuyucanayarehi: ena tiávihanahi te anuma, énapa ena tiávihanahi te apaquehe, énapa ena nacaerataquenehi puiti te amahe apaquehe. <sup>11</sup> Namutu náichayare: “Yátupi Aquenucaquene éma”. Tacahe, tétavicavahi eta vicunachirayarehi ema Tata Vicaiyaquenehi.

*Tétavicava eta najaraiva ena téhicana ema Jesús, nacuti eta jarairiqui*

<sup>12-13</sup> Núti nuncunachahehi, eti nuparapenaveana némunaruqueneanahi, taicha tétavicavahi eta esuapiranuhi te nutiarahirichaha te echacaya. Púitiserá nuvaraha tápajucavaini eta esuapiranuyare, puiti eta nuyerehirahéhi. Ema Viya, émarichuhi ema tinacahi te esamureana eta evarairayare ecurisamurechayare éma; tiávahácahevare eta itauchirayare tamutu. Tásiha, muracaina eta ejaneasirava tayehe eta tájiparacana, epicavareni eta ímicatisamurechira ema Viya. Tacuija táemitiequenehahini eta tapachinavahi eta íchanevana.

<sup>14</sup> Te tatiarihinapuca jácani íchaqueneanayare, vahi ecuevataemachavaca, váhivare ecuacapauchava, <sup>15</sup> apaesa tacuija échajisiacarevaina emutu. Tacuijavare etapiravainahi eta náimairaheyare ena achaneana. Ímrecavayarehi eta machichahérahí ema Viya, tájina táechipejicahehíni nayehe ena achaneana váinarajipaneréruana. Nímicutichinahe eta táurinavahi eta jarairiquiana vímahaqueneana te anuma te jácani yati timapicuquenehi. <sup>16</sup> Ímitucavacahini eta máechajiriruva ema Viya, eta íchuhairavacavare náehicavare, apaesa náuchucuhahini tayehe eta apana náítaresira. Tacahe, te máiteca machava ema Viáquenu Jesucristo, eta máimairaheyarehi eta juca táuriqueneana íchaqueneanahi, tétavicavainapa eta nuncunachiravaya nútí íchavenéhi éti eta táurivahi eta nímitusirahehi. Vahi támapurujihini eta nucaemataneasirahehi. <sup>17-18</sup> Nímicutichahe eta esuapajiraivahi tayehe eta ecaemataneasirahi ema Viya. Ticutihi eta iámavahuhí mayehe. Núti, tíjuricati táimicapacanupuca eta nucametarairuirahi eta eyehe. Eta népenirainapucaini tacutiyareva eta námavahuhí mayehe ema Viya, tacachane eta iámavahuhí éti. Núti nuvavinavahi eta níjarasiravahi népena, núrísamurehivare eta nucamavahirahi me Viya. Nuvaraha iúrisamureyareva éti apanava. Vahi ecucatiequenehanu. Ácutinu eta núrísamurevahi nútí.

*Ema Timoteo émapa ema Epafrodito, vanairucanayare me Pablo*

<sup>19</sup> Nupanerechahi névatacayaréní ema Timoteo eta ara eyehe, máimaha-panahe apaesa núrísamurepaini eta nusamairirisiraheya te machavapa. (Máimahahavirinesera ema Viáquenu Jesús eta vítujisiravaya.) <sup>20</sup> Taicha ema Timoteo, yátupihí macutinuhí eta nuhapasamurechirava eta iúricacarevainahini éti. Nájina apanainahini nácutihini éma. <sup>21</sup> Nararihinéni ena apamuriana, énachuchasera tiyauruiricavanahi. Vahi tihapasamurechavanaimahi

eta iúricacarevaina eti machaneranahi ema Jesucristo. <sup>22</sup> Ímatiripahi éti eta máurivahi ema Timoteo eta máimicatasiranuhi tayehe eta vicametarairuirahi, tacutihi mácani machicha ema achane, eta táurivahi eta máimicatasirahi ema máiya. <sup>23</sup> Vuíchahasera névatacaimahi éma. Néchanumayare eta juca níchararacavayare te juca. <sup>24</sup> Nucasiñavahinénisera mayehe ema Viáquenu Jesucristo eta nútijacarúvainahini nímahapanahé.

<sup>25</sup> Tásihase, nupanerechahi névatachivaréni puítirichu ema apana viparape Epafrodito, ema évataruhi tímicatacanuyarehi, tiámapahíavare eta enaquíruvana. Puiti éma, tétavicavahi eta máimicatasiranuhi tayehe eta juca vématanerepihi, vicanarairahi eta tauriqueneana. <sup>26</sup> Mavarahaipaichavare tímahahe éma apanava. Téñamavaipahi eta eyehe emutu éti taicha máechahi eta esamairirisirahi eta macajumairahi. <sup>27</sup> Yátupihí eta macajumairahi, tiánehiyarehini tépena. Majapanuhisera ema Viya; tinaracahi. Tijapanunuhivare núti apana apaesa vahi nucueñamavahichaini, vahi tacuapiquihanuhini eta néñamiravahi puiti. <sup>28</sup> Eta tacahe, nuyayaucha puiti névataca éma, apaesa eta ímairainahini éti, iúrisamurevarepaini. Te néchapa eta iúrisamurevahi, étapa tacaepaha eta néñamavahi eyehe. <sup>29</sup> Táuriserá eta ejacapiraina éma te esamureana, taicha yátupihí echamuríhi éma eta éhisirahi ema Viáquenu. <sup>30</sup> Taicha éma, yátupihí tiánehipa eta máepenira, táichavenehi eta táetaviuchirahi eta mavaraira macamataneaca ema Cristo. Váhiquene tiyavanavahini eta máítaresirahi, taicha muraca eta mavarairahi máítaucha eta etuparasiranahi mayehe. Taicha éma ítsivahi éti, eta vahi ítujicavahini ítecahíni étijacarúvainahini ítátinuhini.

### 3

#### *Tiúripána véhica eta juca yátupiqueneana*

<sup>1</sup> Nuparapenaveana, evapinava eta macachaneraheripa ema Viáquenu. Núti, vahi nuyacují eta nápechirayare numetacahe te juca néchajiriruvahi te nájure taicha eta tiúrichaheyare éti. <sup>2</sup> Échapavayare nayehe nácani achaneana tipamicaheana éhica eta mavanairipiana ema Moiséini, navarairahivare ecamarcayare, náimijachahi machaneraheya ema Viya taicha eta ecamarcairahi. Ena nani, tétavicavahi eta náíñehivahi eta náemejecapirachira ena vichamuriana. Éna, nacutihi eta jácani tamucu tétavicavahi eta tanicairaivahi. <sup>3</sup> Jéhesaresera vítiquenehi machaneranahi ema Viya yátupiquenehavihi. Vicamarcaqueneanahi víti te visamureana maicha ema Espíritu Santo. Vítiquenehi yátupiquenehavihivare viti véneuchavahi me Viya. Vivapinavahivare táichavenehi eta vicasíñairahi eta machanerahavirahi ema Jesucristo. Véchahi vahi étaparacainahini vítauchahini eta vanairipiana, étainapucaini visamacarehini táicha. <sup>4</sup> Jéhevare núti, táuricahinéni nucasiñavahini núti nusamacarehini, taicha nítauchahi tamutu eta viyeherepiana viti israelítana. Nucachuricahi ena nujaneanana. <sup>5</sup> Núti yátupiquenenuhi israelítanuhi taicha nucamarcaripahi te óchopa sache eta núchusirahi, náitauchahi éna eta viyeherepi. Mámariéquenenuíni ema Benjamín. Yátupiquenenuhi hebreo. Yátupiqueneanahivare hebreoana ena ticachichanuana, énapa ena náchucanaveanaini. Núti náchamurinuínihivare ena fariséoana. Nítucahi nímicapicaucha eta náitauchiraina yátupi eta viápajusiravahi religiósohavihi nayehe ena apamuriana nujaneanana israelítana. <sup>6</sup> Eta nímicapicauchira, ichape eta nupanajirisiravacahi ena náinapureana creyénteana. Nucasiñavahi núti eta nítauchirahi yátupi eta viyeherepiana. Tájina néchajisiacarevahini



nayehe ena achaneana. <sup>7</sup> Puítisera eta néhisira ema Cristo, vaipa tacunachacarehini eta nusamiravahi tamutu eta juca níchaqueneanahi nusiñavirainihi. <sup>8</sup> Tacahe, eta nímairahi, váhinéni étaparacainahini tayehe eta viúchucuiraya. Puiti nínajicapa tamutu eta júcana, taicha tihapapicanuhi eta néhisirayarehi ema Cristo; táichavare vahi tácutihini eta táetaviuchiravahi eta táurivahi eta néhisirahi ema Náquenu Jesucristo. Puíticha tamutupa némitisica. Émachucha nucaemataneacahi. <sup>9</sup> Puiti eta návahásirahi éma, vahi étainahini eta táurivahi eta néhisirahi eta viyeherepiana. Ema Viya tijacapanupa táichavenehi eta nucasiñavairahi me Cristo. Taicha namutu ena ticasíñavanahi éma, tijacapacareanaya me Viya. <sup>10</sup> Nuvarahahi núti tajurucachucha eta nímatirayarehi ema Cristo. Nuvarahavare tacuija tahapapica eta macaemataneasiranuhi, máimeresirahi eta táetaviuchiravahi eta máitupajijiasiravahi, tacutipa eta máechepusiraipa éma te máecari. Nuvarahavare nucapayayaracahívaréni eta macatajivairahi. Étapa eta népenira, nuvarahavare táurichavacayare ena nuchamuriana, tácutihini eta táurichirahavihi eta máepenirahi ema Jesús. <sup>11</sup> Taicha núti nucaunevahi eta néchepusiraya núti apanava te nécari.

*Yátupiya eta vicaratasiravaya te vivaraha vítujicava viveha eta vícuchihi*

<sup>12</sup> Núti vahi nímiyachavaimahi tamutuhini nítaucha eta nítujisiravaya. Vuíchaha nítamuturuca. Nímiyanavaichuchasera eta nupamisiravahi, nuvarairahi nucurismurechayare ema Cristo te tamutu, taicha eta tacahehi eta máichuiranuhi néhisirayare. <sup>13</sup> Nuparapenaveana, yátupiquenehi vuíchaha támutu nucapayayaracahini. Nuvarahaipasera némitisicayare tamutu eta nunaquiruana. Tásiha, nétumechavainapa eta nítauchiraya tamutu eta mavarahaqueneanahi níchaqueneanayarehi. <sup>14</sup> Nupamicavahi taicha ichape eta nuvarairahi nucurismurechahini ema Viya, nuvehahini eta nícuchihi mayehe. Taicha eta tacahehi eta máichuirahavihi, mavarairahi tjaracahavi eta viúrujasirahi ema Jesucristo.

<sup>15</sup> Tacaheyarehi eta epanerechirayare éti. Ecutinuyarehi emutu eti échemachanaripahi eta juca véhiruhi. Te vuíchaha ecaicutiarahini eta juca, németeaca tímitucaheyare ema Viya. <sup>16</sup> Jéhesare, yátupina vímiyanava véhica tamutu eta vímitucasivanahi.

<sup>17</sup> Nuparapenaveana, nuvaraha yátupina ácutinu núti eta núrivahi eta nítaresira, éhicavaréni eta náurivahi ena apamuriana téchemachanaripa. <sup>18</sup> Ichapemurihi eta nutuparasirahehi tayehe eta juca. Puiti eta nápechirahehi numetacahehi, nýahasamurehi taicha nararihichaha ena vuíchaha náimatiequeneha eta tacayemaquenehi eta máepenirahi ema Cristo te crusu. Eta nacatichirahi, vahi navaraha nasamararaca te véchajisiha.

<sup>19</sup> Ena nánisami témitiequeneanayare taicha tétavicava eta tavayuasiravacahi eta najamurachaqueneana. Nacasamurechucha eta tájiparacana te juca apaquehe. Tisiñavavaicanahi, tivapinavanahi eta náichirahi eta tauriqueneana titsirihacareana. <sup>20</sup> Vítisera tachanerahavihi eta anuma. Eta tacahe, vicunevaipa eta vicuchapirahi ema Viáquenu Jesucristo ticatiurahiquene, másihairaya te anuma. <sup>21</sup> Máitsivachainapa éma eta juca viáquehesami. Apanainapa eta táimahiyare. Tacutinapa eta macáquehéra éma, tapachinaquenehi. Tétavicavainapa eta tatumevayare taicha ichapequene eta máitupajijiasiravahi éma. Maratahahi macapaquecha tamutu.

## 4

*Iúrisamurreacavayare me Viáquenu*

<sup>1</sup> Nuparapenaveana némunaruqueneanahi, tétavicavahi eta nuvarairahi nímahe, taicha nucajamurahehi éti, tétavicavahi eta núrismurevahi ícha.

Puiti nuvaraha ímiyanava túmehéna tayehe eta éhisirahi ema Viáquenu, eti némunaruqueneanahi.

<sup>2</sup> Nuvarahavare nutuparacavaca ena vichamuriana esu Evodia ésupa esu Síntique: Tachavaini eta náemunasiracaca. Vahi tacunasi eta nacatichiracacahi, taicha naparapejiricacahi te mavahuana ema Viáquenu. <sup>3</sup> Nutuparacavivare, piti némunaruquenehi nucompañeruvihí: Pímicatacavacahini ena nani apinana esenana viparapenaveanahi, taicha éna íchapemurihi eta náimicatasiranuhi tayehe vicametarairuirahi. Náimicatacahi ema Clemente, énapa ena apamuriana ena nucompañeruanahi. Eta náijareana ena nani ticajuanaripa tayehe eta libro tiama eta víjareana viti vítareruanayare.

<sup>4</sup> Támutuhini sácheana iúrisamurereacavahini me Viáquenu. Nuvaraha nápechahe numetacahe: Iúrisamurereacavahini mayehe. <sup>5</sup> Námutuhini ena achaneana náimatihéhini éti eta táetaviuchirahi eta iúriava. Taicha ema Viáquenu, tiánehípa eta máitesiraya.

<sup>6</sup> Vahi ecueñamava, te tatiarihinapuca eta íchava. Ecasiñavasera eta eyaseasira ema Viya te eyujarasirana. Ehasulupayachavare tayehe jácani máijararuheanahi. <sup>7</sup> Jéhesare, ema Viya macaepahayare eta jácani ecatisamurevana eta juca máijarasiraheyarehi táurivayare eta esamureana étapa eta epanereruana, táichavene eta iúrujasirahi ema Jesucristo. Eta macurisamurechirahavihi ema Viya, tétavicavahi eta tacachuriasirahi eta nacurisamurechira nácani achaneana.

#### *Epanerechayare eta táuriqueneana*

<sup>8</sup> Títecapa, nuparapenaveana, epanerechinavayare tayehe tamutu eta yátupiqueneana, tayehe tamutu eta típicauchacareana, tayehe tamutu eta itauraivaya tacuija taviuchahe, tayehe tamutu eta ticatajicaheyare eta íchirahi eta táuriqueneana. Epanerechayareva tayehe tamutu eta ecurisamurechirahi ema Viya, tayehevare tamutu eta ticunachacareana. Ecasamure tamutu jácani táuriqueneana apaesa ticunachacareyare tamutu eta íchaqueneanaya.

<sup>9</sup> Ímiyanava éhica eta nímiturapiana. Ítauchayare eta numetarapianahi esamarararuana. Ácutinu eta níchaqueneanahi ímahaqueneanahi. Ítauchaya eta juca, tásiha ema Viya, tamutuina pa tíjaracaheyare eta táurivaya eta epanereruana éti.

#### *Tinaquiquicavanapa ena machamuriana ema Pablo, náimicatasiraya éma*

<sup>10</sup> Tétavicava eta núsamurevahi eta mayehe ema Viáquenu eta máijarasirahehi éma eta epanerechiranuhi tayehe eta íápechavahi ímiámareca eta nuyehe. Németeaca váhiquene émitisicanuhini. Étachucha eta emaitujisiravavanehi ímiámareca eta ímicatarapi eta nuyehe, tapaenumavahi. <sup>11</sup> Vahi táichavenénahíni jácani nuvayuchiravainahini eta nucamunuirava. Núsamuréichucha, nítucasamihi nútí eta nítátiravahi tayehe jácani tatiariquenehi. <sup>12</sup> Nítucahi eta nítaresirahi puiti eta nupaurévahi. Nítucahivare te nucaimahaquenéchaha. Nítucahi eta nucamichirahi eta nátajivanahi, te nunicapuca, váhipuca; te nucaimahaquenehipuca, te tájinahivarepuca nímahaquenénahini. <sup>13</sup> Nútí nuratahahi nucamicha tamutu, taicha ema Cristo éma tétumechanuhi. <sup>14</sup> Tájinasera táichavahini eta ímicatasiranuhi tayehe eta ímiámareruhi, evarairahi ímerecanu eta émunasiranuhi, ítátiranuhi eta numaitujisiravahi nutanuchavahini.

<sup>15-16</sup> Eti nuchamuriana, nucunachahe eta némechirahehi eta ímicatasiranuhi eta nupaisirahi eta nucametarairuirahi te apanana avasareana. Tayanapane epaenumavahinéni épanava éhica ema Viáquenu, camurianahi

eta ímiámaresinanuhi eta enaquiruvana te náviharipa te Tesalónica. Énerichuvare, te núchucapa te provincia Macedonia, éti íápechavahi ímiámareca eta enaquiruvana. Jéhevare nájina apamurianainahini nacutihahini eta ímicatasiranuhi. <sup>17</sup> Váhisera étainahini jácani nuvarairahini íápechavahini ímiámareca eta nuyehe eta enaquiruvana. Nuvarahahi nímincapaeque-nehahé: Eta ímicataraivahi te juca apaquehe, puiti te anuma ánaqui táuruji-siavahi eta enaquiruvana te mamirahu ema Viya. <sup>18</sup> Nuti ichapemuripa eta nujacapirahi eta enaquiruvana, eta mámaquenepahi ema Epafrodito. ¡Tétavicavahi eta ecajiraivahi! Eta ímiámareruana, tacutirinehi eta inciensoinahini, eta táijiyevahi te mamirahu ema Viya. Tivapinava ema Viáquenu eta majacapirahi. Tacutihivare eta nanaquisira eta námavahuana te Templo. <sup>19</sup> Máimahahéine ema Viya. Éma, máitsivachayare tamutu eta enaquiruvanahi. Tíjaracaheyare te jácani ecamunuiravana. Émarihi téchayarehi ema Viáquenu Jesucristo. Éma, tétavicavahi eta tamutuirá marataha. <sup>20</sup> ¡Máichecuaraquireyare eta vicunachiraya ema Tata Vicaiyaquenehi, tijarahi eta vijirauchira éma! Amén.

*Eta táichecuaraqui eta macartane ema Pablo*

<sup>21</sup> Eta iúrujasiracacahi mayehe ema Viáquenu Jesucristo, nuvaraha échajisinanuini namutu ena machaneranahi ema Viya, vichamurianahi eta véhisirahi ema Viáquenu Jesucristo. Téchajicaheanahi éti ena nucompañeruana, ena nucachanequeneanahi ani te juca. <sup>22</sup> Téchajicaheanahivare namutu ena vichamuriana machanerana ema Viya, ena ticavasanahi ani te juca. Nararihivare ena tiávihanahi te mayehe palacio ema Emperador, énarichuvare vichamuriana. Téchajicaheanahivare éna apana.

<sup>23</sup> Nuyaseuchaheparaca emutu éti me Viáquenu Jesucristo táetavicavahini eta iúricacarevaya máicha.

Tamutupa eta néchajiriruvanahi eyehe.

## **Eta macartane ema Apóstole Pablo nayehe ena machamuriana ticavasanahi te avasare Colosas, ticaijare COLOSENSES**

<sup>1-2</sup> Nuti Pablo, mayehenuhi apóstole ema Jesucristo, taicha manerejiru-nuichuhi ema Tata Vicaiyaquene, navarairahi nímitucaya eta náechajiriruva. Puiti nucajurehe eta juca carta eyehe eti nuchamuriana ecavasanahi tayehe eta avasare Colosas, taicha éti machaneraheripa ema Viya, tiúrihi eta éhisirahi ema Jesucristo. Téchajicahe ema vichamuri Timoteo.

Nuvaraha macatajicahehini ichape ema Tata Vicaiyaquene, máijaracahini eta táurivaina eta epanereruana.

*EMA PABLO MASAMAIRIRICA ETA NÁEHISIRAHÍ EMA JESÚS ENA TICAVASANAHÍ TE AVASARE COLOSAS*

<sup>3-8</sup> Puiti títecapauchahaviripa ema vémunaruquene Epafra, ema vichamurihi eta vicametarairuirahi. Éma, ichape eta macunachacarevahi. Tiúrihi eta máítauchirahi tamutu eta macavanarairahi ema Cristo, máimitusirahehi yátupi eta máimiturapiana ema Viáquenu. Ema Epafra títametacahavihi eta íchararacavahi, eta éhisiraipa ema Jesucristo, étapa eta émunasiracacairahi emutu éti, émunasirahivare ena iúmurivanahi te apana avasareana, machaneranahivare ema Viya, taicha ecuchapavainapa eta esiapiraya tayehe eta mávasa anuma. Viúrisamurevahi eta visamairisirahi eyehe, vihasulupayachaparacahi ema Viya Macaiyaquene ema Viáquenu Jesucristo. Tamutu sácheana te viyujarasirana, viyaseuchahehi me Viya. Ichape eta viúrisamurevahi eta táurivahi esama eta macametarairuirahi ema Epafra eta yátupiquene máechajiriruva ema Viya, etupiruvahi esuapa eta ímitucasivahi, te esamainapa eta máemunasirahehi éti apanava ema Viya. Étarichuhi eta juca vímiturapihi nayehe ena apamuriana achaneana ticavasanahi te apanana avasareana. Natiarihipahi ena tisuapanapahi eta vímiturapiana.

*EMA PABLO MAYASEUCHAVACA TE MAYUJARASIRANA ENA MACHAMURIANA*

<sup>9</sup> Eta tacahe, te visamairiricahepa, viyaseuchaheparaca me Viya tamutu te viyujarasirana. Viyaseuchahehi máijaracahéni eta ítusiraina, ímatiraina yatupina eta mapanereruhi ema Viya. Máijaracahévaréni eta échema-raivainahini, eacutiarayare eta máechajiriruvana, máichavenénahini ema Espíritu Santo. <sup>10</sup> Víti viyaseacahi ema Viya tacuijahini etapiravaina te mamirahu taicha eti machanerahehi éma, ítauchahini tamutu eta ecaurismurechirayare éma. Táurihini eta ecaemataneasirahi, támutuhini ítaparaha eta táuriqueneana. Iápajucavapáipahivaréni eta ímatirayare éma. <sup>11</sup> Énerichuvare viyaseacahi ema Viya máijaracahéni eta ichapequene máitupajijiásirava apaesa ecamichahini tamutu eta ecatajivairana, ácayehehini paciencia muraca, iúrisamurereacavachuchaini. <sup>12</sup> Ehasulupayachahini ema Tata Vicaiyaquene eta máichuirahéni éti apanava, mavarairahi tíjaracahaviyare vimutu eta tajarahiquene vícuchianahi viti machaneranahi éma.

*EMA VIYA MAVARAHÁ TICUCHUCUHAVIYARE*

<sup>13</sup> Ema Viya ticatiuchahaviripa mayehe ema Váinaraji ticaratacavahinihi. Téquecaviripasera véhicayarehi ema Machicha Jesucristo máemunaruquenehi. Vaipa véhicaimahi eta nayeherepiana ena timapicumareana. Émapa

téchahavihi puiti. Viávacuhaipa eta mavanairipiana. <sup>14</sup> Taicha ema Viáquenu Jesucristo tépenahi te crusu eta macaepahairaya eta vipecaturana, viúchucu-haipahi máicha.

*Ema Jesucristo, ema tinacuchahi tamutu. Émarichuvare téchahi puiti.*

<sup>15</sup> Yátupi máimahasihí ema Tata Vicaiyaquene. Émasera ema Jesucristo tétaví-cavahi eta macavasirahi ema Maiya, émapa tímimatichahavihi eta máurivahi ema Maiya. Éma, ichapequenepanahi Aquenuca. Éma, téchahi tamutu. <sup>16</sup> Éma, mavanahihi me Maiya eta máepiyasirahi tamutu eta vímahaqueneanahi puiti: te anuma, étapa te juca apaquehe, étapa tamutu eta vimarataha-queneanapa vímaha. Ticavacureanahivare máicha ena ángeleana. Nararihi ena majupahaqueneanahi te machacaya, énapa ena túparairucanahi, énapa ena apamuriana tijacapanahi eta vanairipi nayehe ena majupahanahi, énapa ena apamuriana ángeleana masuntaruranahi. Máepiyacahi tamutu, máitachiraripa tamutu eta mapanereruanahi. <sup>17</sup> Ema Cristo manasique-neripa acane te tamirahuichaha eta táepanirávayarehi tamutu. Puíticha éma téchahi tamutu. <sup>18</sup> Énerichuvare ema téchahavihi vimutu víti véhicanahi éma, taicha machichaquenehaviripa. Éma, vínapuaraquihi víti véhicanahi, taicha éma tinacuchahi eta juca arairuhi véhiruhi. Énerichuhivare marata-hahi ticaechepucava te máecari, éne tacaheyare eta macaechepusirahaviyare víti apanavare. Puíticha, éma téjacahi tayehe eta mávacurehi aquenucairahi. Ichapequeneya eta vipicauchira vimutu. <sup>19</sup> Taicha ema Viya máijaracapa ema Machicha macutiyaehi eta masantuvahi, étapa eta máurivahi, étapa eta máitupajijiasiravahi. <sup>20</sup> Eta mapanereruhi ema Viya eta mavanahirahi ema Machicha te juca apaquehe, tépenayare te crusu taicha máetupirica-yarehi tamutu eta juca apaquehe pecatupaire, étapa tamutu eta anuma. Macaepahayarehiva eta majarareruquenehi ema Satanás émapa ema Adán. Tichavayarehi tiuri tamutu.

*Eta máepenirahi ema Jesucristo, mavacharecahi eta mámirahaviyare mayehe ema Maiya*

<sup>21</sup> Étiripa eti, cape juca iásinequenehi ecatianacainihi ema Viya. Vahi táurihini eta epanereruana, taicha eta íchirahi eta tauriqueneanahi. Iávamirahuinihi epauchahini ema Viya. Epicainihi éma. Émasera mavarahahi macamitiasinaheyare eta ecatianasirainihi. <sup>22</sup> Eta tacahehi eta máimitesirahi ema Jesucristo te juca apaquehe. Tépenahi te crusu táichavenehi eta macaepa-hairayare eta etapiravanainihi, masantochiraheyareva, apaesa tacuijapa ecuavamirahu te jena sácheyare eta mámiraheyare te mamirahu ema Viya. <sup>23</sup> Tacahe, nuvaraha étumechavayarechucha, ímiyanava táuri eta éhisirahi. Vahi ecúyacujiequenehava eta ecuchapirahi eta iúchucuiraya. Vahi ecuemepurureca eta esuapiraipahi eta máechajiriruva ema Viya. Tétaví-cavahi tasuapacarevahi nayehe namutu ena achaneana te juca apaquehe, nájina tanerejiruina. Nútiripa nuti Pablo vanairucaquenenuhi, étarichuhivare taca-hehi eta nucametarairuirahi.

*Ema Pablo matuparahaichuhi máechapajiricayare ena máumurivana*

<sup>24</sup> Puiti nútí, vahi nucatiequenehavahini eta nucatajivairahi táichavenehi eta nucatuparahairahi nucametarairu eyehe eti apavasanana. Ema Viáquenu Jesucristo, ichape eta macatajivairahi te crusu víchavenehi víti. Tatiarihichahasera eta macatajivairayarehi. Eta juca nucatajivairahi, tácutihini eta macatajivairahi éma. Nucatajivanumapaipahi íchavenehi eti machichanaveana, eti vichamurianahi. <sup>25</sup> Taicha tituparacanuhi ema



Viya eta néchapajiricaheyarehi emutu éti. Nuvanecasivahi mayehe eta nímitusiraheyare tamutu eta máechajiriruvana.

<sup>26</sup> Nímimatichaheyare tamutu eta juca mapanereruanahi ema Viya, tayumururevainihi eta táitaresirahi acane, énaripa ena viáchucanaveanaini vahi támutuhini náimatihini. Puitisera ema Viya tímimaticahaviripa viti machaneranahi tamutu eta júcana. <sup>27</sup> Tétavicavahi táramicarevahi maicha ema Viya eta máimimatichirahavihi eta juca tayumururevainihi ímitucasivahi puiti eti apavasananahi. Eta juca tayumururevainihi, émahi ema Jesucristo títecapauchaheripahi tiávahácaheripa. Puiti, ejacaparépahi me Viya. Ecunevainapa maicha ema Jesucristo eta esiapiraya te mávasa anuma. <sup>28</sup> Eta tacahe, émaquenehi ema Cristo véchajisihahi víti te vicametarairu. Étaripa te viconsejareca, te vímiturecapahi nayehe namutu nácani achaneana vicaimunaqueneanapahi, émarichuhi véchejisihahi, apaesa nácaicutiaraini tamutu eta mapanereruanahi ema Viya, náechemarahirivacahini táicha. Vivaraha ítamuturucaripahini te táitecapapa eta sache vímeresiraheyare te mamirahu ema Cristo. <sup>29</sup> Eta tacahe, nupamicavahi núti eta nucaemataneasirahi ema Viáquenu. Émaquenehi tétumechanuhi eta nuratahairahi tamutu eta nímitusirahehi emutu eti nuchamurianahi.

## 2

### *Éma Pablo tímereuchava eta máemunasiravacahi ena machamuriana*

<sup>1</sup> Núti ichapemurihi eta néñamiravahi eyehe eti numaimatiqueneanarichaha, énapa ena apamuriana vichamurianahivare ticavasanahi te Laodicea. <sup>2</sup> Nuvarahahi ámutuhini étumechavahini te esamureana. Evapinavahini te iúrujisiravana taicha eta émunasiracacahi. Nuvaraha yátupina ímati ema Cristo, émahi araenumahi vanairucahi me Viya. Nuvarahahivare ímatiequenehayare eta mapanereruana ema Viya apaesa ichapenahini eta ecasiñairavainahini eta mayehe. <sup>3</sup> Nájina mácuti ema Cristo, ema tíjaracahavihi tamutu eta vítupajijiasiravanahi, véchemarahivacahi máicha. <sup>4</sup> Éta tacahe, nutuparacahecha: Vahi ecuisapava nahapapicahe ena tiyururahiana. <sup>5</sup> Tayanapane viyerehicacahi, vahi vímahacacahini, núrismurehisera ticutirinehi étainahini návihahini eta ara eyehe, néchirahi eta tamajinairahi íchiravainahini, yátupihi esuapa eta éhisirahi ema Cristo.

### *Vímiyanava tauri eta véhisirahi ema Jesucristo*

<sup>6</sup> Tásiha puiti, tauri eta iávahásiraina ema Viáquenu Jesucristo. Ímiyanava eta ítauchira eta íjarasiravahi éhica éma. <sup>7</sup> Etupihayare muraca mayehe ema Cristo, apaesa tápajucavapaipa eta ítupajijiasiravaina, ímatirainapáipaicha éma. Émuracachavayare eta éhisirahi éma, yátupina esuapa taicha tacahehi eta ímitucasivanahi. Vahi ecucainajiruva eta ehasulupayachiraya ema Viya.

<sup>8</sup> Échapavayaresera, taicha nararihi ena navarahayare tiyurucaheana, navarairaya éhica eta napanereruana. Vahi ecuisapava náemejecapavachahe éna. Machu náimitucahe eta nayeherepiana, náehiruhi ena náinapureanaini ticayeherepianahi tásihaquenechucha te napanereruana éna. Eta júcana, tájina tavehapica apaesainahini eta máimiturapiana ema Cristo. Vahi ecusuapa ena nani.

<sup>9</sup> Éma Viáquenu Jesucristo, jéhevare éma, yátupiquenehi santo. Taicha ticuticacanahi ema Tata Vicaiyaquene eta nasantuvanahi éna. Ticuticacanhivare eta náurivahi, étapa eta náitupajijiasiravahi. <sup>10</sup> Éti apanavare, puiti eta iávahásiraripa ema Cristo, tisantuchahevacaripahi éma. Tájinapa ácamunuhini puiti eta iúchucuirapa. Taicha ema Viáquenu, téchavacahi ena

ángeleana. Éma, túmepanahi nayehe ena éreanana. <sup>11</sup> Ema Cristo, timarcha-chaheripa eta iáchanevana puiti eta iávahásiraipa éma. Ticamitisicaheripahi eta tajamurachaqueneanainihi eta iáquehe tavarahaqueneanainihi icha eta tamauriqueneanahi. Jéhevarequene, eta emarçahi éti, ecachuricahi eta nacamarçairahi ena israelítana náechatisirahi eta náquehe. <sup>12-13</sup> Éti, cape juca iásinequenehi, vahi ímatihini ema Cristo. Vuíchaha ecamarçahini mayehe. Tímicutijiricavahi táepenaquenénahini eta iáchanevana taicha eta epecaturanahi. Tímicutijiricavahi épenaquenénahini, ecaecarasihini tacutihi eta macaecarasirahi ema Cristo te máecari. Puitisera, eta ecasiñairiripa ema Jesucristo, ema Viya macaitaresinaheripa eta iáchanevana. Puiti ticutiripa échepurénaripahini éti, tacutiripahi eta máechepusirahi ema Cristo, maicha ema Maiya. Eta ecaicachasiriripa eta mayehe ema Cristo, táicutiarahi eta juca macaechepusiriripa eta iáchanevana. <sup>14</sup> Taicha ema Viya, eta máimairahi eta macatajivairahi ema Machicha máepenirahi te crusu, tiperdonachahaviripa eta vipecaturana. Énerichuvare macaepaharipa eta vitapiravana tímicuña-cahaviyarehini. Puiti matapiravarehaviripa eta máimairahavihi éma. <sup>15</sup> Eta máepenirahi ema Jesús tayehe eta crusu, máitahacavacaripa ema Váinaraji énapa ena machanerana éreanana. Tájinarinehi natumevainahini eta mayehe. Puiti táquijicavacahi éna, te vipiaraca te máijare ema Jesús. Vaipa tipauchahavi anaimahi.

*Ema Pablo mavanecavaca vahi nacusuapa ena tiyururahiana*

<sup>16</sup> Puiti nutuparacahe: Vahi ecusuapavaca ena navarahahi éhica eta nayeherepiana, apanapanenejiqueneana, nácani vahi tísapaheanaimahi enica eta apamuriana tinicacareana. Váhivare ecusuapavaca te ticamesajiricaheanahipuca epicaucha eta napiestarana. Étaripa eta ecaematanerana te aracheruana caje, navarahaya epicaucha. Étaripa eta sache sávarumuhuana, navarahayareva epicaucha. <sup>17</sup> Tamutu eta júcana, vaipa tásuapacare taicha náchucarapianachucha éna. Étaserá eta juca máechajiriruvanahi ema Cristo, jéhevare eta yátupiqueneanahi. Tisuapacareanahi. <sup>18</sup> Eta tacahe, vahi ecusuapa ena nácani navaraha típicararecaheana, te náichahepuca: “Vahi tiuri eta juca éhiruhi”. Váhivare ecusuapavaca, te ticamesajiricaheanahipuca éstacava, éta pa eta ejirauchirainaji ecasiñairainaji ena ángeleana. Éna náimijachahi tacarichu eta ejacapacareya me Viya taicha eta juca. Ena nani, ticasiñavavaicanahi taicha tímijachavanaripahi máechajicavacahiji ema Viya. Vaipa navaraha nacainajiru eta navayuacasivanahi. Tamutu eta juca tímereuchavacahi éna, máehicarahanahi ema Cristo. <sup>19</sup> Vítisera vimutu viti apanapanenejiquenehavianahi véhicanahi ema Jesucristo. Eta viúrujasiraipahi éma, vaipa apaimamajihavinahini máicha. Tímicutijiricavaipahi mácani achane máitucahi eta macajurusirahi ena machichanaveana. Náurujiacahi namutu nácani machinanaveana, machinenana, mámarinaveanapuca. Émanarichuhisera ema téchahi. Ene vicahehi viti véhicanahi ema Cristo. Macarichu ema téchahavihi. Vímicatajiricacahi vicatiujiricacahivare vimutu maicha ema Viya.

<sup>20-22</sup> Puiti, eta éhisiraipa ema Cristo tíminajicaheripa eta éhisirainihi eta nayeherepiana ena achaneana tamauriqueneana. Tacahe, vaipa ecusuapa ena ticamesajiricaheanahi te navanecahepuca: “Éhichavi eta viyeherepiana tayehe eta vinisiraya, apaesa eJapanucare eta me Viya”. Machu navayuacahé ena nani, taicha tamutu eta juca nayeherepianahi, tájina vahi étaparacaina tayehe eta viyapiraina te anuma. Eta juca nayeherepianahi, tásihaqueneanachucha te nachuti ena náchucanaveanaini. <sup>23</sup> Eta juca

nayeherepiana cútirinehi yátupiquenénahini tásihaquenénahini eta me Viya. Tásihasesa vahi táimanaca. Ichape tayerehi eta máechajiriruvana. Ena nani, tímijachavanahi nacurisamurechahi ema Viya. Tépiyacavanaripahi mánsuanahi eta náichirahi eta muraca penitencia. Téstacavanapa náijararecaripa eta naeche tayehe eta tacatiquene. Tamapurujihisera eta náichirahi, náviraichuhi náichahi eta tajamuraraívahi eta náqueheana.

### 3

*Tihapasamurerecahaviyare eta vivarairayare véhica eta máurivahi ema Cristo*

<sup>1-2</sup> Puítisera arairupa eta ítasesira maicha ema Cristo. Étainapa tihapasamurerecaheyare eta máurivahi éma étapa eta ítECApauchira éma tayehe eta anuma máejasihahi te mavaure ema Maiya. Vaipa étaimahi tihapasamurerecaheyare eta eyeherepianainihi tauriqueneanaini. <sup>3</sup> Taicha íjararuvaipa eta ínajisirayare eta júcana. Puiti ticaitarecaheripa éma táichavenehi eta ívahásiraipa ema Jesucristo. Iúricahi puiti. Vuíchahasera ímahahini tamutu eta táetaviuchiraya eta iúricacarevaya. <sup>4</sup> Téhesera te machava ema Viáquenu Jesucristo, máitsivachainapa eta íaqueheanayare, tajarahiqueneanayare. Tásiha, ecachanenapaipa éma. Tétavicavaya eta viúricacarevaya vimutu máicha.

*Vínajicayare eta viyeherepini eta viásinequene*

<sup>5</sup> Tásiha puiti, ínajicainapa eta eyeherepianainihi tauriqueneanahi. Nacuijapa nacuveha esu apana esena. Vaipa ecupanerecha eta panererucana tauriqueneana. Vaipa ecujamuracha icha eta tauriqueneanahi. Vaipa tihapapiricahemahi eta ecaimahaquenéraina, taicha ena titanucanahi eta juca, nacutihi nácani ticasíñarajiana. <sup>6</sup> Ena masuapajirairahana, náichahi tamutu eta juca tauriqueneana. Étapa tímicuñacayarehi éna, taicha táimiyusemacaichucha ema Viya. <sup>7</sup> Éti apanavare étainichuhivare íavacuhainihi cape juca íásinequenehi. <sup>8</sup> Puítisera ínajica tamutu eta júcana: esemarajivana, ecatianaraivana, evainarajivana, iúmeharaivana, étapa eta táíñemahiqueneana eta échajiriruvana. <sup>9</sup> Vahi ecuépiyaequenehacáca. Ímereuchava yátupina eta ínajisirahi tamutu eta eyeherepianainihi cape juca ítasesirainihi. <sup>10</sup> Puíticha, amairiharipahi arairupa eta juca ítasesirahi, machichaheripa ema Viya. Tajurucapaipaini eta ecutirayare éma eta masantuvahi étapa eta máurivahi éma. <sup>11</sup> Tayanapane apavasananjihavihi viti véhicanahi ema Viáquenu, émasera tihetamurichahaviripa viti israelítana, étipa eti apavasanana, énapa ena máicachasianana. Te mamirahu ema Cristo, vaipa apavasananjihavinahini, étanarinepa eta vímahí maicha éma. Tayanapane tájina emarcainahini te íaqueheana. Váhisera ticachuriacaheanaimahi ena ticamarcanahi. Tayanapanevare ecaquenuhipuca. Váhivaresera vicachuriacahemahi viti líbrianahi. Ema Cristo tiávahácahavihi vimutu.

*Vicaravahuinapa tiúriyare eta vítaresira*

<sup>12</sup> Ema Viya tétavicavahi eta máemunasirahehi. Eta tacahe, tinerejicahehi eti machaneranayarehi éma, ecutipaipa éma, eta masantuvahi. Eta tacahe, puiti étijiváinapa ecaravahuyare eta táurivayare eta ítasesirayare. Étavichayare eta eJapanuraivaya, émunarahiyareva. Ímerecaya eta emansuvayare. Ecamicha tamutu. <sup>13</sup> Te tatiarihinapuca eta náejecapiravaina ena echamuriana eta eyehe, vahi ecucaticha, ácayehavare paciencia. Eperdonachacayare, ecutiyare ema Cristo eta maperdonachirahehi éti. <sup>14</sup> Tamutu eta juca

numetaruheanahi, ítauchayare. Énerichuvare tiápajucavayare eta émunarai-vayare. Taicha te vémunajiricacahi, tétavicavayarehi eta viúricacarevaya eta viúrujiásiracacahi. <sup>15</sup> Vahi ecuemepurureca eta iúrivahi maicha ema Cristo. Ísapavavare mayehe ema Cristo macanaracahe tamutu eta epanereruana. Taicha tacahehi eta máichuirahahi, mavarahahi étanayaréichuhi eta epane-reruana eta iúrujasiracacahi. Ehasulupayachahivaréni tamutu sácheana.

<sup>16</sup> Étaviuchahini eta iúnasiráina te esamureana eta máechajiriruvana ema Cristo. Étumechacacahini eta ímitusiracacaya eta échemaráivayare. Evapina-vahini te esamureana eta ejiraira te iúrujisiravana. Ejirayare eta majiriahuana ema Viya, eta ehasulupayachirayarehi éma. <sup>17</sup> Tamutu jácani ecaematanerana, échajirisiravana, ímereuchava eta machaneraheirahi ema Viáquenu Jesucristo, iámirapaipa eta máijare. Te tamutu eta jácani íchararacavana, ehasulupayachayarehi ema Tata Vicaiyaquene.

### *Vímerecayare eta viúri va nayehe ena vichamuriana*

<sup>18</sup> Étiripa eti esenana ecaimaqueneanaripahi, epicauchayarehi ena ímanaveana. Esuapajirahiyare eta nayehe, taicha etuparahahi eta éhisirahi ema Viáquenu. <sup>19</sup> Éti apanavare eti náimanaveanahi, émunacayare ena eyenana. Vahi ecuímipananajica éna. <sup>20</sup> Éti apanava eti amaperuana, esuapayare ena ticachichaheana, esamararasinavaya te jácani náechajisiraheana. Te ítaucha eta juca, ecurisamurechayare ema Viya. <sup>21</sup> Énerichuva eti náiyana, vahi ecuímiyusémaraca ena echichanaveana apaesa vahi nacui puñacava eta eyehe.

<sup>22</sup> Étiripa eti ecaquenurecanahi, esuapajirahiyare nayehe ena iáquenuanahi. Ítauchayare eta navanairipianahi. Tátupiruva te esamureana eta ecaemat-nerana. Vahi tácarichuimahi ítaurahiyare te natiarihi te echacaya ena iáquenuanahi. Te nájinahipuca, tacutiyarerichu eta ecaematanerayare. Taicha ema Viya tímararacahehi. Éma epicauchayarehi. <sup>23</sup> Evapina-vayare icha eta evanecasivanahi nayehe ena iáquenuana, táimicutijiricavahi émainahini ecaemataneaca ema Viáquenu. <sup>24</sup> Taicha eti mamusurahehivare ema Cristo, ema tiápajucavahi iáquenupanahi. Écharichuhi éti eta tatiarihirahi eta ícuchihi íjaracasiyarehi eta mayehe. <sup>25</sup> Énasera ena téjecapavanapuca, máimararacahi ema Viya eta nájecapiravanahi. Étáinapa tímicuñacayarehi. Nájina mamunanequeneanaimahi.

## 4

<sup>1</sup> Éti apanavare eti náquenuanahi ena músuana, tiúriyareva eta ecavanairi-piraya, vahi ecuimipananajicavaca. Ítauchayare íjaraca eta nacamunuque-neanahi. Échavayare éti apanavare eta máimararasirahehi ema Viya, émahi Iáquenuquenehi.

### *Eta téqueneha matuparasirahavihi ema Pablo viti véhicanahi ema Viáquenu*

<sup>2</sup> Puiti emutu éti, étumechavachucha eta eyujarasirahi eta me Viya. Vahi ecuyacujihini. Énerichuvare ehasulupayachaparacayare tamutu me Viya. <sup>3</sup> Énerichuvare ímicatacavahi eyujarauchahavi, apaesa vítujicavapaini viúchucuha, vímijanavapaini vímimatichahini ena achaneana eta juca tayumururevainihi mayehe ema Cristo. Étavenehi puiti présunuhi táicha. <sup>4</sup> Nécatiachecha ímicatacanu eyujarauchanu apaesa nítujicava nucame-tarairu, taicha nutuparahaichuhi me Viya.

5-6 Táuri eta ítasesiraina nayehe ena máehicarahanarichaha ema Jesús. Tátupiruva tauri eta échajirisiravana, tapicauchacarehi. Táurivare eta ejicapiraina te natiarihinapuca nácani tiyaserecaheanayare. Ecamapuravachaha puiti juca sácheana eta ímitusiravacahi.

*Eta táichecuaraqui eta máechajiriruva ema Pablo*

7 Máimahaherinesera ema vémunaruquenehi vichamuri Tíquico. Éma, títametacaheyare tamutu eta níchararacavahi núti taicha éma nucachanehi eta te juca návihahi. Tétavicavahi eta máimicatasiranuhi eta vicaemataneasirahi me Viáquenu. 8 Eta tacahe, névatacahi máiteca eta ara eyehe. Éma timetacaheyare eta víchararacavahi. Énerichuvare tétumechaheyare éti apanava. 9 Énerichuhivare névatacahi ema Onésimo némunaruquenehivare. Éma, tiásihahi eta ara eyehe. Puiti émarichuhi vichamurihi eta te juca. Tétavicavahi eta máitauravahi eta macaemataneasirahi ema Viáquenu. Ena nani apinana, éna títametacaheanayare eta víchararacavahi víti te juca viávihahi.

10 Téchajicahe ema Aristarco, ema nucutiquenehi eta nucaeratairahi. Téchajicahevare ema Marcos, ema macheji ema Bernabé. Éti écharipa eta máitesirayare eta ara eyehe ema Marcos. Te máitecapauchahepa, tiúriyare eta ejacapirayare éma. 11 Énerichuvare téchajicahe ema Jesús Justo. Nacarichuhi ena nani mapanana nujaneananahi israelítana tímicatacanuanahi. Nacachuricahi ena apamuriana nujaneanana vichamurianahi. Ichape eta náimicatasiranuhi eta vicametarairuirahi eta máechajiriruvana ema Viya. Ichape eta nacurisamurechiranuhi éna.

12 Téchajicahevare ema Epafras, ema eyehe pastor. Ema maca, yátupi-quenehi mavanara ema Jesucristo. Tétavicavahi eta máecharairisirahehi éti te mayujarasirana, mavarairahi ímiyanavahini étumechava yátupinahini ítachahini eta mavarahaqueneana ema Viya. 13 Ichapemurihi eta nímararasirahi núti ema Epafras eta máecharairisiráhehi éti, énapa ena ticavasanahi te avasareana Laodicea etapa Hierápolis. 14 Énerichuhivare téchajicahe ema médico Lucas, ema vémunaruquenehivare. Téchajicahevare ema Demas.

15-16 Tacahe, te támutupa eta échajicuirayare eta juca nucartane, ímiamarecaya nayehe ena apamuriana vichamurianahi ticavasanahi te avasare Laodicea. Nuvarahavare échajisinanuini éna. Échajisinanuvare ema Nínfas, énapa namutu ena tiúrujicavarahanahi te mapena. Nímiamarécahivareséra eta nucartane nayeheyare namutu éna. Te táitecapauchahe, échajicuhayarevare éti apanava. 17 Piti apanavare piti Arquipo, nutuparacaviyare: Pítauchayare tamutu eta juca pématanerepianahi, taicha eta pituparahahi me Viáquenu.

18 Nuti Pablo nútiquenepa nájucha eta juca táichecuaraquihi eta nucartane tayehe eta némechajirisirahehi. Nutuparacahe vahi ecuemitiscanu te eyujarasirana. Eyaseasinanu eta núchucuirávanéna.

Nuyaseuchaheparaca me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi e yehe.



## **Eta macartane ema Apóstole Pablo nayehe ena machamuriana ticavasanahi te avasare Tesalónica, ticaijare**

### **1 TESALONISENSES**

<sup>1</sup> Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas\*, émapa ema Timoteo. Vímiama recahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo. Nuvaraha macatajicahehini ema Tata Vicaiyaquene, émapa ema Viáquenu Jesucristo; nájaracahehini eta táurivaina eta epanerua.

*Ema Pablo tiúrisamure eta máechirahi náimyaniravahi náehisirahi ema Cristo*

<sup>2</sup> Viti vihasulupayachaparaca ema Viya eyehe emutu eti. Tamutu sácheana, te viyujarasirana, viyaseuchahe me Viya. <sup>3</sup> Taicha tamutu sácheana vécharaicaheparaca eta ímeresirahi eta esuapirahi éhisirahi ema Viáquenu Jesucristo, etapa eta epamisiravahi ecaemataneacahi yátupi táichavene eta émunsirahi éma, etapa eta ecamichirahi tamutu táichavene eta ecuchapiravahi eta machaviraya. Ema Tata Vicaiyaquene máimaha tamutu eta íchararacavana. <sup>4</sup> Nuparapenaveana, éti, máemunaruana ripa ema Viya. Véchahi eta manerejisirahehi éma.

<sup>5</sup> Taicha te vímitucahepa eta máechajiriruva ema Viya tayehe eta viúchucuiraya, éti etupiruvahi ejacapa eta vimetarairuana taicha ímatihi yátupiquenériahi mayehe ema Viya. Ema Espíritu Santo tinacasamurechahehi eta táurivahi esama eta vímitusirahehi. Ímatihavihi eta mavanésirahavihi ema Viya. Ímahahivare eta viúrivahi eyehe.

<sup>6</sup> Jéhesare puiti, étijivapa eta épaniravahi éhichavi eta viúrivahi víti, vicutiyahe eta máuriva ema Viáquenu. Ecátajivanúmahi ichape taicha eta ejacapirahi eta vimetarapiana. Iúrisamurehiséra maicha ema Espíritu Santo. <sup>7</sup> Tacahe, ena apamuriana vichamuriana ticavasanahi te tinapaica eta Macedonia etapa te Acaya, eta náimairahi eta yátupirahi eta esuapirahi, étarichuhi náehicahi éna.

<sup>8</sup> Éti ímisamahi eta máechajiriruva ema Viya namutu ena achaneana ticavasanahi te Macedonia etapa te Acaya. Téchacarehivare te tamutu avasareana te jácani vítecapihapahi eta juca yátupirahi esuapa ema Viya. Vaipa tácomesahini vimetataracavacahini éna eta esuapajiraivahi éti. <sup>9</sup> Timetacahavianapahivare eta etupiruvairahi ejacapa eta vimetarapiana, etapa eta ínajisiraipa eta esiñarajanaini, équesiravarípa eta ecajúherapa yátupi ema Viya. Puíticha tépanavaripa eta ecaemataneasirahi éma. Éma, yátupiquenehi Viya. Yátupiquenehivare eta masamaraiva. <sup>10</sup> Énerichuvare timetacahaviana eta ecuchapirahi eta machaviraya ema Machicha ema Viya másihairaya te anuma, ema maca Jesús émarichu ema macaechepucasiquenehi te máecari maicha ema Maiya. Émara ticatiuchahaviyare tayehe eta ecuñaraqui náicuchihi ena masuapajirairahana.

## 2

*Eta máematanerepihi ema Pablo nayehe ena ticavasanahi te Tesalónica*

\* **1:1** Ema Silas, eta májarequene Silvano te náechajiriruva ena romanoana.

1-2 Écharichuhi eti nuparapenaveana, tamutu eta náichirahavihi ena achaneana, tímicuñacahavianahi ánaqui te avasare Filipos. Váhisera vácatsimavahini te vítecapauchahépa ani, vímiyanavaríchucha vicametarairu taicha tétumehahávirichucha ema Viya eta vímitusirahehi eta máechajiriruva, camurianahineni ena ticatianacahavianapahi. Váhisera támapurujihíni eta véjirairahehi. Éti etupiruvahi ejacapa eta vimetarairuanahi. <sup>3</sup> Taicha vahi véjecapavahini eta vímitusirahehi. Váhivare étainahini vipanerechapahini eta tájiparacana tamauriqueneana, váhivare vivayuararquina eta véchajisirapahi. <sup>4</sup> Víti manerejiruhavihi ema Viya taicha máechahi eta vítauchirayarehi eta vituparacasivayarehi mayehe. Eta tacahe, tituparacahavihi muraca viámayare eta máechajiriruva nayehe ena achaneana eta náuchucuiraina. Étapaichuhi eta juca véchajiriruvanapahi. Vahi étaina vivaraha táememunacahávihihi nayehe ena achaneana. Vítauchahi eta mavarahaqueneana ema Viya eta vicurismurechihahi éma, taicha éma, máimararacahi eta visamureana. <sup>5</sup> Écharichuhi éti eta vicayemaqueneanapahi, vahi vémetserajiricavapahini eyehe. Váhivare étaina vétseraruinapahini vivereacahehíni eta eplatane. Vitupiruvapahi eta vicayemaquenehi te mamirahu ema Viya. <sup>6</sup> Vahi vápanerechahini náetserajicahavihihi ena achaneana, étiripa, viratahahineni vímereco eta vituparahaquenehi mayehe ema Viáquenu Jesucristo. Váhisera vávarahahini vímereco vácutihini mácani achane ticamusura. <sup>7</sup> Véchapajirícahehiséra tacutihíni eta suéchapajirisira suémunasira súcani esena ena suchichanaveana. <sup>8</sup> Ichape eta vémunasirahehi. Vímitucahehi eta máechajiriruva ema Viya eta iúchucuiraya. Víjaracavahi ichape te visamureana, vivarairahi esuapa éti apanava, taicha vémunacahehi. <sup>9</sup> Nuparapenaveana, te vinasiqueneripa eta eyehe, eta vicametarairuirahi eta máechajiriruva ema Viya, ímararacahavirichuhi éti eta vicaematanehi muraca eta vítátijirisiravahi. Tamutuhi sácheana, yátiana vicaematanehi, taicha vahi vávarahahini vétsepanáracahéhíni eta vinicaquenerepi.

<sup>10</sup> Éti enecapaequenehahi tamutu eta víchararacavahi. Tímararacahávi-hivare ema Viya. Vitupiruvahi yátupi eta viúrivahi eta eyehe eti vichamur-rianahi. Tájina naviyahini nayunaca ena apamuriana achaneana. <sup>11</sup> Énerichu-vare échahi eta vétumechirahehi, émanapachuhi viconsejacha vicutihíni mácani achane tiuri eta maconsejachira ema machicha. <sup>12</sup> Vécatiacahéhi ichape eta iúrivaina éti, ímereco eta macáchichairaherípa ema Viya, taicha íchuarecasivaipa mayehe eta ecachaneraya éma tayehe eta mávasa te anuma, te távihahi eta majaraiva.

<sup>13</sup> Eta tacahe, vihasulupayachaparaca ema Viya eta táurivahi esama eta máechajiriruva vimetarapianahi. Éti, etupiruvahi ejacapa eta vimetasi-rahehi taicha eta esamirahi yátupiquenehi, tásihaquenehi ema Viya. Ímativanehi vahi vipanereruinchuchaini víti, émainapucaini mácani apana achane. Eta juca eta tiúrichahehi eti esuapanahi. <sup>14</sup> Énerichuvare tiúrihi eta ecamichirahi eta ecatajivairahi nacatianasirahehi ena ejaneanana, ecutihíni ena apamuriana vichamuriana ticavasanahi te Judea. Nuparapenaveana, ene nacahehi eta nacatajivairahi naicha ena najaneananarichu israelítana, táichavene eta náehisirahi ema Viáquenu Jesucristo. <sup>15</sup> Ena nani nujaneanana nacapacahi ema Viáquenu Jesucristo nacutihíni ena náchucanaveánaini eta nacapasiravacahi apaicape ena profetanaini. Tipanajiricahavianavare víti. Ena nani náimiyusemacahi ema Viya. Váhivare návaraha nasamahini ena apamuriana achaneana eta máechajiriruva ema Viya. <sup>16</sup> Taicha te vivara-

hainipa vímitucavaca ena apavasanana apaesa náuchucuhahini éna apanava, nacatichavare ena nujaneanana eta vímitucavaca éna. Tíchejimiráuchahavianapa. Eta tiviuachahi, tivayuchavapaichucha eta natapiravana. Ema Viya vaipa macamichahini eta náejecapirávana. Puítisera táitecapáuchainapa eta náicuñaya máicha.

*Ema Pablo mavaraha tiápechava máejiravaca ena machamuriana*

<sup>17</sup> Nuparapenaveana, tayanapane viyerehicacahi puiti juca cájeana, vahi vímahacacahini, tanasihisera vicaimairuhehi te viúquihana. Vivarahaine víjahúchavahini vítecapauchahe vímahahehini. <sup>18</sup> Nútiripa nuti Pablo, ichape-murihineni nuvaraha níteca eta ara eyehe, énapa ena apinana nucompañeroana. Émasera ema Satanás tíchejimiráurucahávichuchapúca jácani. <sup>19-20</sup> Véñamavahi víti eta eyehe taicha vivarahahi tánasihíni eta iúri va eta machimapiraheya eta machaviraya ema Viáquenu Jesucristo. Tásiha, viti vicuchapavainapa eta vijacapirayare eta vícuchihi mayehe éma. Viúrisamurenapa víti te jena sache, íchavenehi éti.

### 3

<sup>1-2</sup> Eta tayerevaipahi eta vimaimanasirahehi, tétavicavahi eta véñamiravahi eta eyehe. Vaipa viúrisamurehini. Vivarahaipaicha vecha tájahapuca eta ícharacavahi. Tásiha, vipanerechapa vévatata ema vichamuri Timoteo, máiteca máimahapanáhe. Vinasipa víti vicarichu te Atena. Taicha ema maca Timoteo, émarichuhi mavanara ema Viya, émarichuvare vicutiquenehi eta vicaematanerahi tayehe eta máechajiriruva ema Viáquenu Jesucristo. Nuvanecahi tímecatapanáheyare témuracacháheyare eta esuapajiraivaina, <sup>3</sup> apaesa nacuija nacuchavacuejehava tayehe eta ecatajivairana naicha ena ticitianarahiana. Écharichuhi éti eta vicatajivairaya táichavene eta véhisirahi ema Jesucristo. <sup>4</sup> Váhisera táramicare eta juca, taicha vimetacahévanehi te vinasiquenerichaha eta eyehe, eta vicatajivairayarehi. Jéhesaréinehi títauchavahi puítiripa, ímaharipahi éti. <sup>5</sup> Eta tacahe, tétavicavahi eta néñamiravahi núti eta eyehe. Vaipa núrisamurehini íchavenehi éti. Tacahe, nuvanecapa ema Timoteo máimahapanáhe te enasirichuhipuca eta éhisirahi ema Jesús. Taicha nímicauyayahehi máquipaicahehíni ema Satanás, támapurujihini eta vicaemataneasirápa ema Viya.

<sup>6</sup> Puítisera eta machaviraipa ema Timoteo, másihairahi eta ara eyehe, timetacahavipa tájinairahi íchiravainahini eta éhisirahi ema Viáquenu Jesucristo, étapa eta émunasiracacahi. Timetacahavivare eta écharairisrahávihi émunasirahavihi víti, evarairahi íjahúchavahini ímahahavi. Vicuticacahi eta vivarairahi vímahahe víti. <sup>7-8</sup> Eta tacahe, nuparapenaveana, véchararaháinehi eta visamairirisirahehi eta táurivahi eta éhisirahi ema Viáquenu. Tacamitiacarine eta véñamiravahi. Étumechahavirinehi eta vicatajivairana. Tichavarinehi eta viúrisamureva. <sup>9</sup> ¡Ichape eta vihasulupayachirahi ema Viya táichavenehi eta iúrivahi! ¡Tájinarine tácutihini eta viúrisamurevahi mayehe ema Viya, íchavenehi éti! <sup>10</sup> Tamutu sácheana, yátiana, viyujaracahi mayehe ema Viya, viyaseacahi vítujisirávainahíni viápechava vímahahe. Vímitucahehini eta apamuriana títucacareana tayehe eta juca véhisirahi ema Jesús. Támutuhini ítuca.

<sup>11</sup> Eta tacahe, viyaseacahi ema Tata Vicaiyaquene émapa ema Viáquenu Jesucristo náijaracahavihini eta vítujisiraváina víteca véjirapanáhe. <sup>12</sup> Énerichuvare macajurucahini ichape ema Viya eta émunaraivaina nayehe ena

echamuriana, énapa ena apamuriana achaneana, tácutihini eta vémunasirahehi víti. <sup>13</sup> Máijaracahéni táurivaina eta esamureana tacuija etapi-ravaina, máepachinachahini eta iáchanevana apaesa ecurisamurecha ema Tata Vicaiyaquene te jena sáchezare machaviraya ema Viáquenu Jesucristo, másihairaya te anuma, mámirayarepahi ena apamuriana manerejiruanahi.

## 4

### *Mavaraha ema Viya táuri eta vítaresiraina*

<sup>1</sup> Tiuri puiti, nuparapenaveana, vituparacahecha muraca te máijare ema Viáquenu Jesucristo. Táuri eta ítaresiraina puiti juca epaisirayare. Te tauri eta ítaresiraina, ecurisamuréchayare ema Viya. Puiti iápajupanaváinapáipa eta iúrivaya. <sup>2</sup> Ítucaripahi eta juca ímitucasivanahi viyehe. Étarichuhi vivanecasi-vanahi mayehe ema Viáquenu Jesucristo.

<sup>3</sup> Taicha eta juca mavarahaquenehi ema Viya, tiápajucavayare eta iávahásirahi éma. Vaipa ecuquicha eta pecatuana. Nacuijapa nacuveha súcani apana esena. Ésuripa esu esena, vahi sucuveha ema apana achane. Énaripa ena echichanaveana, tacuija eta natuhusivaina. <sup>4</sup> Nacuchapa eta náitauchiraváina yátupina te mamirahu ema Viya. Emutu éti, yátupina eta émunasiraina ena eyenanaveana. Tauri eta ítaresiraina te epenana. <sup>5</sup> Vahi ecucutipa ena ajairana esenamareana. (Éna náichahi eta juca taicha eta namaimatirahi ema Viya.) <sup>6</sup> Nacuija nacuveha esu mayena ema mácani echamuri. Taicha ema Viya, yátupi eta máicuñasirayare nácani ena tíchanahi eta juca. Étarichuhi eta vímiturapianahi eyehe cape juca te vítecinapa eta ara eyehe. <sup>7</sup> Taicha víti máichuhaqueneánaripa ema Viya, mavaraha tiúrinayare eta vítaresiraya, vaipa víchaimahi eta juca tauriqueneana. <sup>8</sup> Tacahe, ema mácani tépuruhi eta juca vímiturapianahi, máepuruhivare ema Viya; taicha mavanairipianahi eta juca, vimetacasivahi víti mayehe ema Espíritu Santo, eta mávahásirahavihi.

<sup>9</sup> Puiti numetacahe núti: Tájina vaipa néñamava eta eyehe eta émunasiracacahi, taicha ema Viya tíjaracahe ripa eta émunasiracacahi. <sup>10</sup> Vaipa néñamavahini taicha nusamairiricahe ipa eta émunaraivahi nayehe ena echamuriana títecapauchaheanahi tiásihanahi tayehe eta táunavanahi eta iávasa Macedonia. Nuparapenaveana, puiti vituparacahecha iápajucavayare éti eta émunaraivaya. <sup>11</sup> Énerichuva viápechava vituparacahe tauri eta ítaresiraina. Échapajirica eta émataneana. Ecaemataneacava yátupina, eviyihayare eta ecamunuqueneana tásihaqueneánayare te evahuana, <sup>12</sup> apaesa tacuija ecamunu te epenana. Te ítaucha eta juca, tipicauchaheanayare ena apamuriana achaneana.

### *Vahi téñamavacareana ena vichamurianaini náepenaqueneana taicha tiápechavanayare títarecanayare*

<sup>13</sup> Nuparapenaveana, énerichuvare vivaraha vimetacahe eta náichararacavayare ena vichamuriana náepenaqueneanaripa. Vahi ecucatisamureva nayehe. Ena apamuriana achaneana ticatisamurevanapa te náecarapana ena náepenaqueneana, taicha vahi nácasínavahini me Viya, nacunevahini eta nápechiravaya téchepucana te náecari. Vahi ecucahe éti. <sup>14</sup> Víti visuapahi eta máechepusirahi ema Jesús te táequenepa eta máepenirahi. Tásiha, visuapahivare eta macaechepusirahaviya ema Viya te vépenapa, vicáchanénapa ema Jesús viti véhicanahi éma. <sup>15</sup> Eta tacahe, vimetacahe eta juca vímitucasívanahi mayehe ema Viya. Te machavapa ema Viáquenu Jesús, te vuíchahapuca vicuepenahi víti, vahi vicainapucavaimahi nayehe ena náepenaqueneana.

<sup>16</sup> Taicha émarichu ema Viáquenu tiúcupaicaya tichavayare, tiásihaya te anuma. Tipiaracaya muraca tíchuarecaya. Ema Arcánglele énerichuvare tipiaracayareva. Ticaemayareva eta machuja ema Viya. Tacahe, téchepucanainapa títapucanaya ena náepenaqueneana ena tisuapajirahianahi mayehe ema Cristo. <sup>17</sup> Tacahe, viti vítareruaichaha viyanainapa. Vimutu vicáchanéna ena náepenaqueneánaini. Viácapajicáinapa ema Viáquenu te anuquehe te távihahi eta úcaji. Tásiha, máichecuaraquireyare eta vicachaneraya ema Viáquenu. <sup>18</sup> Eta tacahe, emetajiricacayare nayehe ena echamuriana tamutu eta juca vímiturapianahi, apaesa nacurisamurechavaya éna apanava.

## 5

### *Tiáramicareyarechucha eta machaviraya ema Viáquenu*

<sup>1-2</sup> Nuparapenaveana, vahi ecuemitiscava. Ecunevaicha yátupina, taicha téchacareipa eta táramicarevaya eta máitesirayare ema Viáquenu. Tacutiyare mácani tiámereca te yati, nájina tinecapaina. Ene tacaheyare eta máitesirayare ema Viáquenu. Váhisera vécha tájamuhuyarepuca. <sup>3</sup> Énaripa ena achaneana vuíchaha náemetecaimahi eta tánehiraripa eta máitecapiraya. “Viúririchucha puiti. Tájina víchiravaimahi” nacaheyare éna. Vahi tinecapauchavanaimahi eta táitecapauchiraya eta náicuñayare tacutiyare esu súcani esena ticajari, tíjahúchavapa ticati eta sujuhe eta suínasiraya. Ene nacaheyare éna. Tájina najunaiyaimahi. <sup>4</sup> Étisera, nuparapenaveana, écharipa eta juca. Vaipa iáramecaimahi te jena sache máitecapiraya ema Viáquenu, taicha tamutu sácheana ecuchapahi eta máitecapiraya. <sup>5</sup> Taicha víti viávihahi te majaraivahi ema Viya, víti vipaicahi te sáchemuhu. Vahi táíñehavina eta yati, taicha vínajicaipa eta tamapicuquene. <sup>6</sup> Eta tacahe, tavaraha vicuneuchava tamutu sácheana, vijaneasiravainahini muraca. Váhini vicucutihini ena tivayuchavanahi tímacacarácavana, tájina náechaquenena éna. Vítisera vijaneacavaya tamutu sácheana, yátiana. Tájina víchiraváimahi. <sup>7</sup> Ena achaneana, tímacacarácavanahi te yátiana, ena apamuriana ticávahaháracavánahi te yátiana. Vahi najaneacavahini éna. <sup>8</sup> Vítisera tamutu sácheana vicunevayare. Tiúriyarehi eta vipaisira, tájina víchiravaimahi. Yátupina eta véhisira ema Jesús. Vímiyanavahini eta vémunasiracacaina. Vácasiñavahini eta macuchucuirahaviya éma. Tájina vahi vicuyacujiequenehava eta vicuchapiraya eta jena sache. <sup>9</sup> Taicha ema Viya manerejiruhavihi eta macuchucuirahaviya máichavenehi ema Viáquenu Jesucristo. Vaipa vicaicuñaimahi. <sup>10</sup> Ema Jesucristo tépenahi te crusu vítivenehi, mavarairahí vítarecayare vicachaneyare éma. Te máitecapa éma, macaechepucainapa ena náepenaqueneana vichamurianaini. Tásiha, viti vítareruaichaha tihetamurichahavinapa, taicha mavarahahi vicachaneyare éma. <sup>11</sup> Eta tacahe, étumechacaca, ecatiacacavare. Núti nucasiñavahi eta eyehe eta íchirapaipa puiti eta juca.

### *Ema Pablo tímiyanava eta maconsejachiravaca ena machamuriana*

<sup>12</sup> Nuparapenaveana, énerichuvare vituparacahe eta epicauchiraina ena víyarahana pastoreana taicha ena ticonsejachaheanahi, tímitucaheanahi eta juca éhisirahi ema Viya. <sup>13</sup> Échapajiricavacaya éna. Émunasinávaicha, taicha éna tiúrihi eta náimicatasirahehi. Tacuija ecuichiravaina éti eta nayehe.

<sup>14</sup> Énerichuvare vituparacahe, nuparapenaveana, epamicayare muraca nacaematane ena plújuana, vahi náesachahi ticaemataneana. Énerichuvare étumechavaca ena tiyacujiririhana. Ena nani títanájjiricavanahi, muracaina eta ímitusiraina. Ecayeheyaresera paciencia nayehe namutu.



<sup>15</sup> Échapavayare. Tijuricati natiarihína navaraha titupiacaeana, vahi ecujicapa. Váhivare ecuitsicava. Ímerezayaresera eta iúrivaya nayehe ena echamuriana, énapa namutu ena apamuriana achaneana.

<sup>16</sup> Íúrisamurerecaya tamutu sácheana. <sup>17</sup> Vahi ecucainajiruva eta eyujarasirana mayehe ema Viya. <sup>18</sup> Tamutu jácani íchararacavanahi, ehasulupayacha ema Viya, taicha eta mavarahahi ema Viya ecaheyare eti éhicanahi ema Viáquenu Jesucristo.

<sup>19</sup> Váhivare ecuemepurureca eta mavarahaqueneanahi maicha ema Espíritu Santo eta eyehe. <sup>20</sup> Te esama nácani téchajisihanahi ema Viya, vahi ecuepuru. <sup>21</sup> Vahi ecuemunanasicava. Epanerechinavayare te tájahapuca jácani esamaqueneanahi, ímahaqueneanahi. Éhicaya eta táuriqueneana. <sup>22</sup> Téhesera vahi tiúrihi, vahi ecuisapava, taicha eta tamauriqueneanahi.

<sup>23</sup> Tiuri puiti, máijaracahéni ema Viya táurivaina eta epanereruana. Yátupinahini tacuijahini ecuichiravaina eta iávahásirahi éma. Majaneasinahini eta iáchanevana, eta iáqueheana. Tacuija eta etapiravainahini te machavapa ema Viáquenu Jesucristo. <sup>24</sup> Taicha éti máichuhaqueneanahi éma. Yátupi eta macasiñacarevahi. Máitauchayareva tamutu eta juca.

*Eta téqueneha matuparaha ema Pablo*

<sup>25</sup> Nuparapenaveana, ímicatacavi eyujarauchahavi me Viya.

<sup>26</sup> Échajisinhavi namutu ena vichamuriana.

<sup>27</sup> Nutuparacahe te máijare ema Viáquenu échajicuha eta juca vicartane te namuri ena vichamuriana apaesa námutu nasama.

<sup>28</sup> Nuyaseachaheparaca me Viáquenu Jesucristo táetaviuchahíni eta iúricarevaya máicha.

## **Eta macartane ema Apóstole Pablo nayehe ena machamuriana ticavasanahi te avasare Tesalónica, ticaijare**

### **2 TESALONICENSES**

<sup>1</sup> Nuti Pablo, némechajiricahe eti nuchamuriana ecavasanahi te Tesalónica. Téchajicahe ema Silas\*, émapa ema Timoteo. Vímiama recahi eta juca vicartane taicha eta iávahásiraipa ema Tata Vicaiyaquene, táichavene eta éhisiraipa ema Viáquenu Jesucristo. <sup>2</sup> Nuvaraha macatajicahehine ema Tata Vicaiyaquene, émapa ema Viáquenu Jesucristo; nájaracahehine eta táurivaina eta epanerurana.

*Ena Viya máicuñacayare ena ticapecaturarahiana te táitecapapa eta machaviraya ema Cristo*

<sup>3</sup> Nuparapenaveana, tatuparaca vihasulupayachaparaca ema Viya, taicha visamairiricahe eta tápajusiravapaipaicha eta esuapirahi ema Viya. Tajurusirapaipahi eta émunasiracacairahi. Eta tacahe, vihasulupayachaparacahi ema Viya. <sup>4</sup> Tájinarine tácuti eta vicajamurairahine nayehe ena vichamuriana te viúrujisirávana te jácani vítecapihapahi. Vimetacavacapahi eta táimiyanirávahi eta éhisirahi, ecamichirahivare tamutu eta nacatianasirahine ena achaneana étapa eta ecatajivairana, táichavene eta éhisirahi ema Viya. <sup>5</sup> Tímaracacahisera ema Viya eta ecamichirahi eta ecatajivairahi. Máimerecahi éma eta máuriva, máitauchirahi tamutu. Éma tijacapaheyare eta esiapirayare tayehe eta mávasa.

<sup>6</sup> Máimaháinepaséra ema Viya eta máicuñasiravacayare ena ticitianacacheanahi éti, taicha macarichu éma ticituparahahi juésyarehi téchayarehi. <sup>7</sup> Étisera, ticanaracahere ema Viya eta ecatajivairana, vicuticacainapa eta vinarasirayare te mamirahu ema Viya. Vinaracainapa vimutu, te máitecapapa ema Viáquenu Jesús, mápechiravaya títeca, másiháiraya te anuma. Te jena sáchehare, mámayarepahi ena mayeheana ángeleana, tíñehianainapáipa máicha. Tacutinapaipa eta ichapequene yucu eta máucupaisirayare. <sup>8</sup> Eta tímitecayare éma, máicuñacayare ena váhiquene návarahahine náimati ema Viya, váhivare návarahahine nasuapa eta máechajiriruva. <sup>9</sup> Ena nani máehicarahanahi ema Viáquenu Jesucristo, ticaquijianainapa eta te infierno. Váhivare nacamichahine náimarahaca eta mamira taicha táetaviuchahi eta máíñehivahi. Tájina náuchucuiraimahi. <sup>10</sup> Te jena sáchehare te máitecapapa ema Viáquenu, víáramimícainapa ichape eta mayehe vimutu viti manerejiruanahi. Tétavicavaya eta vicunachirainapa éma. (Éti apanava etiarihyarehi, taicha esuapahi eta vímiturapianahi.)

<sup>11</sup> Eta tacahe, tamutu sácheana te viyujarasirana, viyaseuchahehi me Viya eta ímiyaniravaina eta iúriya, taicha éti íchuarecasivahi eta mayehe. Énerichuvare viyaseuchahe me Viya eta májjarasirahéna eta ítupajijiasiraváina tayehe eta juca ématanerepihi táichavenénahi eta esuapajiravahi. Eta juca, ichape tacurisamurecha ema Viya. <sup>12</sup> Tásiha, ena apamuriana achaneana nacunachayare ema Viáquenu Jesucristo táichavenehi eta náimairahi eta íchirahi éti eta táuriqueneana. Énerichuvare, éti ecunachacaréna me Viya, taicha tétavicavahi eta máemunasirahine, émapa ema Viáquenu Jesucristo.

\* **1:1** Ema Silas, eta májjararquene Silvano te náechajiriruva ena romanoana.

## 2

*Emachane Váinarajiquene*

<sup>1-4</sup> Puítiripa, nuparapenaveana, naririhí ena tépiyaequenehanaripa emá Jesús, náimijacharipa matiaririhiripa, tichavaripa puiti. Vítuparacahecha vahí ecusuapa nácani tépiyahirahianapahi. Tayanapane nácahepuca: “Eta juca vimetacasivahi me Espíritu Santo”. Nácahepuca: “Emá Pablo tímitucahavihi eta juca”. Te náepiyaequenehahavipuca náimechahepuca eta carta, náimijachayarehi tásihaquene viyehé, váhiquenesera ecusuapavane. Váhi tacuimipanererecahe eta juca. Váhivare ecuarameca. Taicha te máitecapa yátupina emá Jesús, ticurujicahávinumayare viti manerejiruanahi.

Nuvaraha numetacahe eta apana. Te tánehipaicha eta máitesiraya emá Jesús, ena achaneana vaipa napicauchaimahi emá Viya. Náepuruinapa eta máechajiriruva. Tásiha, tímerecaváinapa emá Achane Váinarajiquene. Emá maca achane, macatichainapa masama eta máijare emá Viya. Étaripa eta nasiñarajiana ena achaneana, váipavare máuricaimahi. Macavanairipinapa ena achaneana te tamutu avasareana náepuyumirauchayare éma. “Nuti Víanu. Núti ecasiñayare” macahénapa. Masapihainapa, ticaejacavainapa tayehe eta Templo. Téhesera támutupa, yátupiquenenapa eta máicuñayare muraca.

<sup>5</sup> Échavarichuhi éti eta nímitusiraheparacahi cape juca te návihachahahi eyehe. Numetacahehi eta táichararacavayarehi. <sup>6-7</sup> Puiti ena achaneana, nararihípa tivainarajichavanapaipahi. Vuíchahasera máisapahini emá Viya navayuchavahini. Mararihí emá mavaneruhi tíchejimiráuchavacaráchaha. Eta tacahe, vuíchaha máuchujicahíni máimerecavahíni emá Achane Váinarajiquene. (Éti ímatichuhi emá tíchejimiráurucahi.) Tacahe, emá Viya máisapainapa térajicava emá tíchejimiráurucahi. <sup>8-10</sup> Tásiha, mapaenumavainapa tímerecavayare emá Achane Váinarajiquene. Tuparairucayare mayehé emá Satanás. Éma, tijaracayarehi eta máitupajijiásiravayarehi. Tamutuyare máimereca eta tiáramicareana tacutiyare yátupiquenénahíni mayehénahíni emá Viya. Emá maca, máetaviuchainapa eta mavayuaraiava nayehe ena achaneana. Éna, tísapavanainapaipa náehica eta táíñehiqueneana mavayuarauianapahi. Váhiserá máyerémahi. Tiúcupaicavanénapa emá Viáquenu Jesús. Tiáramicarénapa eta majaraivayarepahi. Te máchajurapa, máquipaicainapa macapacainavarepa emá Achane Váinarajiquenéní. Tacahe, ena nani achaneana máiturevanahi témitiequenehanainapa. Ticaicuñanainapa taicha vahí návarahahini náehica eta yátupiqueneana tiúriana echájirirucavana. Te nasuapahini, tiúchucuhanahini tayehe eta ecuñaraqúí. <sup>11</sup> Taicha eta namasuapirahí emá Viya, máisapayarehi ena nani achaneana nasuapa eta mavayuarauiana emá Achane Váinarajiquene. <sup>12</sup> Tacahe, namutuyare ticaicuñanayare éna, taicha vahí návarahahini nasuapa eta yátupiqueneana vímiturapiana. Navapinaichucha eta náichiraya eta tamauriqueneana.

*Tiúchucuhanayare ena téhicanahi emá Viya taicha manerejiruanahi*

<sup>13-14</sup> Étiserá, nuparapenaveana, máemunaruanahi emá Viya. Vítí tatuparaca vihásulupayachaparácayare emá Viya íchavenehi éti, taicha manerejiruhehi emá Viya te tépanavainapa. Táitusiava, te esamapa eta vimetarairuhi, etupiruvapa ejacapahi; taicha esamapa eta máichuirahéhi éma. Éma ticuchucaheyare taicha ímiyanavahi esuapa eta yátupiqueneana máimiturapiana emá Cristo. Émapa emá Espíritu Santo máimiyana emá mávahásirahéhi,

májaracahe eta esantuvainapaipaicha puiti juca ecajúheyare. Tásiha, ítujicavainapa esiapa tayehe eta mávihahi ema Viáquenu Jesucristo, ímahainapa eta majaraiva.

<sup>15</sup> Tiuri puiti, nuparapenaveana, ímiyanava eta éhisiraina ema Jesucristo. Vahi ecuemitisica eta vímiturapianahi, te vimuturichaha eta eyehe, étapa eta juca véchajiriruvanahi te carta, vémevataruanahi eyehe.

<sup>16</sup> Nuparapenaveana, tétavicavahi eta máemunasirahavihi ema Viáquenu Jesucristo, émapa ema Tata Vicaiyaquene. Tayanapane vahi viúrihíni, énasera navarahahi ticurismurechahavianaya. Tásiha, vicunevainapa eta viúricacarevaya, máichecuaraquirénapa náicha. <sup>17</sup> Puiti nuvaraha esamavaini éti eta nacurismurechirahe te esamureana. Náetumechavaréni eta ímiyaniravaya icha eta táuriqueneana, táurihivaréni eta échajirisiravana.

### 3

#### *Éma Pablo mayaseacavaca eta nayujarauchiraina me Viya*

<sup>1</sup> Títecapa, vivaraha vituparacahe puiti, eti nuparapenaveana: Eyaseuchahavi te eyujarasirana mayehe ema Viya. Tasuápacareváiinahíni muraca nayehe ena achaneana eta vimetarairuana máechajiriruvana ema Viya, tácutihini eta esuapirávanehi éti. Táitecapauchavanehíni ena ticavasanahi te tayerehiqueneana te juca apaquehe. <sup>2</sup> Énerichuvare, eyaseuchahavi macátíuchirahávinahíni ema Viya nayehe ena achaneana váinarajiqueneána titupiarahiana. Taicha camuriana ena masuapajirairahanahi me Viya. <sup>3</sup> Váhisera táéñamavacarehini eta máurivahi ema Viya eta viyehe, yátupihíni eta máitauchirahi tamutu. Tétumechaheyare éma eta ímiyanavairaya. Tijaneacahayareva mayehe ema Váinaraji. <sup>4</sup> Víti vicasíñavahi eyehe eta esuapirahaviya tamutu eta vitupararuheanahi taicha éti éhícahi ema Viáquenu, táicha esuaparipa eta táinapureanahi vitupararuheanahi cape juca. <sup>5</sup> Máimicatacahehini ema Viya eta ímatiraina eta máemunasirahehi. Májaracahevaréni eta ecayeheraya paciencia, ácutihini ema Cristo.

#### *Tatuparaca vicaematanezare*

<sup>6</sup> Nuparapenaveana, te natiarihinapuca ena echamurianahi plújuana, váhipuca náesachahi ticaemataneana, te váhipuca návarahahini náetumechavahini, nasuapahini eta vímiturapianahi, vivanecahe éti te máijare ema Viáquenu Jesucristo: Vahi ecuemeñahava nayehe. <sup>7</sup> Écharichuhi éti eta etuparahahi ítusiraina ítátijirícava, éhisirayarehi eta viyeherepianahi víti te viávihachaha eta ara eyehe. Vahi plújuhávímahi. <sup>8</sup> Váhivare vinicairihihini te epenana. Víti vicaematanehi muraca eta vítátijirísiravahi. Tamutu sácheana, yátiana, vicaematanehi, taicha vahi vávarahahini vétsepanáracahéhini eta vinicaquenerepi. <sup>9</sup> Tatuparacahinéni viyaseacahehini eta énisirahavinahíni, vivarahahisera vímechaheyarehi eta vicaemataneiraivana, apaesa étainarichuhíni éhica éti. <sup>10</sup> Étaripa te vinasiqueneichaha eta eyehe, vivanecahehi: Vahi ecuenica mácani vahi mavarahahi ticaematane. <sup>11</sup> Puítiripasera visamairiricahi eta natiarirahahi ena echamuriana tinerejicavanahi plújuana. Vahi náesachahini ticaemataneana, tinicairihianahi. Tímiapitavairicavanapaipahi te pétiana. <sup>12</sup> Étihi íchanahi eta juca, vivanecahe te máijare ema Viáquenu Jesucristo: Yátupina táuri eta ecáematanérainá, eviyayare eta ecamunuqueneana. <sup>13</sup> Éti apamuriana nuparapenaveana, vahi ecuinajica eta táurivahi eta ecaemataneana. <sup>14</sup> Te natiarihinapuca nácani vahi nacusuapa eta vivanairipianahi te juca carta, ecauneyare éna. Tásiha, emetacapa ena echamuriana vaipa nacucachane éna, apaesa nátsiriháichu ena nani eta

namasuapajiraivahi. <sup>15</sup> Váhisera ecucatichavaca, econsejachavacachucha taicha echamurianahi éna.

*Ena Pablo mayujarauchahi ena machamuriana*

<sup>16</sup> Tiuri puiti, nuyaseacahi ema Viáquenu ema tiúrichahavirahi, máimiyanavahíni máijaracahéni eta iúrivaya te epanereruana, tijuricati tájahapuca ícharacava te sácheana, taicha mavarahahi eta iúrivaya. Ámutuhíni mávahácahehíni ema Viya.

<sup>17</sup> Nuti Pablo, nútijacaru vapa nájucha eta juca táichecuaraquihi eta nucartane, apaesa ímati eta táimahihi eta nuyehe letra nuvahurupajihí.

<sup>18</sup> Nuyaseuchaheparacahi emutu éti me Viáquenu Jesucristo, táetaviuchahini eta iúricacarevaya máicha.

Tamutupa eta juca néchajiriruvahi eyehe.



## **Eta macartane ema Apóstole Pablo mayehe ema machamuri Timoteo, ticaijare**

### **1 TIMOTEO**

<sup>1</sup> Nuti Pablo mayehenu apóstole ema Jesucristo. Nuvanecasivahi mayehe ema Viya Macatiurahiquenehi viyehe, émapa ema Viáquenu Jesucristo, ema vicunequenehi eta mápechiravayare tichava. <sup>2</sup> Nímiamaeca eta juca nu-cartane piyehe piti nuparape Timoteo. Némunacavihi tímicutijiricavahi nuchichavinahíni táichavénehi eta péhisiranuhi eta nusupajiraivahi mayehe ema Cristo. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Nájaracavini eta táurivaina eta pipaneruana.

#### *Ema Pablo mametaca ema Timoteo eta macunerayare ena tihapapirahiana*

<sup>3</sup> Pécharipahi eta juca numetaruvihi, te nuyanayarepa tayehe te tina-paica eta Macedonia, eta nutuparasiravihi pinasiyaréhi tayehe eta avasare Efeso. Vuíchaha pijunijicaimahi taicha pímatirípahi píti ena nani navarahahi tihapapicana eta vímiturapiana. Vahi picuisapavaca. <sup>4</sup> Pécatiacaicha ena vichamurianahi, vahi nacusuapa eta echájjirirucavana náepiyapiruanahi ena achaneana, taicha eta juca tacutirichucha eta náchucarapiana. Ena nani achaneana, súnsurupiana eta náechajiriruvana te náechajisiha ena viáchuca-naveanaini. Eta juca náechajiriruvanahi, ticauyayacarehi táemejecapavachavaca ena vichamuriana, machu nachavacuejehava táicha. Étavanerecáinahipucáini náimicatahávihipucáini eta vítauchiráinahini eta véhisirahi ema Viya. <sup>5</sup> Nutuparacavihi taicha nuvarahahi náimerecaya ena vichamuriana yátupina eta náemunasiracacaina táuchurenavare te nasamureana, tapachinavareni eta napanereruana. Tacuija nacúquichiraváinahíni eta nasamiravahi te mamirahu ema Viya. Taurí eta náehisiraina ema Viáquenu. Yátupina nasuapa. <sup>6</sup> Taicha nararihi ena téjecapavanapaipa, nasuaparichucha eta tájiparacana súnsurupiana. Eta juca táiminajicavacapaipa tayehe eta vímiturapiana. <sup>7</sup> Tásiha, tépiyacavanapa náimatíhi tamutu eta Sagrada Escritura. Navarahavare tímiturecana, váhisera nácaicutiarahíni eta tacayemaqueneana eta táechajisihaqueneanahi. Ena nacahehi: “Víti véchahi tamutu”, tájinanéni náechihahíni.

<sup>8</sup> Tájina táichava eta tatiaríhírahi eta mavanairipianahi ema víyarahaini Moisés. Véchahi eta táuriva eta mavanairipiana, taicha éta, táimitucavacahi ena achaneana eta vahi nacuejecapava. <sup>9</sup> Taicha véchahi eta tacaemaneasirahi eta vanairipiana eta táimitupiruchiravacaya ena ticapecaturarahiana. Nácani achaneana tiúriana, vahi énaina tatuparaca eta vanairipianahi. Tatuparacahisera ena nácani mapicaaurirahana masupajirairahana; énapa nácani váinarajipaneréruana ticapecaturarahiana; énapa nácani mapicaucharahana ema Viya, ena ticatichana eta máechajiriruvána; énapa nácani téhana ena náiyana, ena náenana; énapa nácani ticapahiana; <sup>10</sup> énapa ena túhusiana énapa nácani ticaecahiana ena nayenana, navehapa esu apana esena; énapa nácani tivehana ena nacutiqueneanahi ajaira; énapa nácani tiámerecana achane, amaperupuca, esenapuca; énapa ena tépiyahirahiana; énapa ena tépiyaequenerahiána. Énerichuvare eta vanairipi tatuparaca ena ticatichana eta táuriqueneana vímiturapiana. <sup>11</sup> Taicha núti nutuparacasivahi me Viya eta nímituresiraya eta táurinaqueneanahi máechajiriruvana, eta

tímicaíjuhechahaviya tayehe eta táurinaquene mávasa ema Viya. Tétavicavahi eta macunachacarevahi éma.

*Éma Pablo mahasulupayacha ema Jesucristo taicha eta máichuirahi*

<sup>12</sup> Núti nuhasulupayacha ema Viáquenu Jesucristo, taicha eta máichuiranuhi mavanaranuyarehi. Tétumechanuhi yátupi taicha máimahahi eta nítauchirayarehi eta nutuparacasivayarehi mayehe. <sup>13</sup> Éma, tituparacanuhi eta juca, ichapemurihinéni eta néjecapiravahi mayehe, tíñemahihi eta néchajirivanahi mayehe. Nupanjiricavacahi ena náinapureanahi téhicanahi éma. Tijapanunuhisera éma, vuíchahahinéni nusuapahini néhichahini éma. Taicha vahi néchahini émahinéni puca nucatianacahi, eta níchirahi ena machanerana éma. <sup>14</sup> Tásihasera tétavicavahi eta máemunasiranuhi ema Viáquenu Jesucristo. Ichaperinehi eta máíjarasiranuhi eta nusuapirahi yátupi éma, étapa eta máíjarasiranuhi eta némunaraivahi.

<sup>15</sup> Nuvaraha námutihini ena achaneana nasuapa eta véhiruhi taicha yátupihini eta juca vímiturapiana: Éma Viáquenu Jesucristo tímitecahi te juca apaquehe macuchucuhavacayarehi ena ticapecaturarahiana.

Nútiripahi nuváyuchapanaváinihi eta nucapecaturaraváinihi. <sup>16</sup> Émasera ema Viáquenu Jesucristo tijapanunuhi, táitusiava tíchuhanuhi núti. Taicha mavarahahi máimerecayare ichape eta mayehe paciencia eta nuyehe, nuvayurevaquenénihi eta nucapecaturaraváinihi. Eta tacahe, nucaicutiarapa eta majacapirayareva namutu ena tisuapanayare, máichecuaraquirénapa eta náitaresiraya máicha.

<sup>17</sup> Eta tacahe, macarichu vicunachayare vijirauchayare tamutu sácheana ema Viya, taicha macarichuhi éma tamutu máituruequeneha. Éma, máimahasiquenehi, máepenacacahivare. Jéhevarequene éma, viyehehi Rey acanequene te tépanavainapa, étapa puiti juca vicaijuheyare. Amén.

*Éma Pablo matuparacahi ema Timoteo*

<sup>18</sup> Nuchicha Timoteo, nutuparacavicha muraca eta piratahairaina picanara eta tauriqueneana. Tiúriyare eta péhisiraya ema Viya. Tájina píchiravaimahi te mamirahu ema Viya. Péchavahi eta náechajisiavirahi eta piúrivahi ena vichamuriana mametaruanahi ema Espíritu Santo. Vahi picuemepurureca. <sup>19</sup> Taicha nararihi ena ticainajiruvanapaipa, náechahinéni eta táíñehivahi eta náichaqueneana, váhisera návarahahini nácaínajiruvahini eta tauriqueneana. Tíñajicavanarichucha eta náehisirainihi ema Viya. <sup>20</sup> Émaripa ema Himeneo émapa ema Alejandro, tacahehi eta náinajisiravahi eta náehisirainihi ema Viya. Puítisera, ena nani níjararupa ema Satanás, taicha nuvaraha nachava, náinajicayare eta nacaecahirahi ema Viya.

## 2

*Éma Pablo máimituca eta nayujarauchiravaya*

<sup>1</sup> Tativayaresera nutuparacache, vahi tacuechuquiha eta eyujarasiraina. Eyaseuchava. Tamutu ehasulupayachayare ema Viya. Eyaseuchayareva namutu ena achaneana. <sup>2</sup> Énerichuvare eyaseuchayare ena aquenucana énapa ena apamuriana tuparairucana, apaesa táuri eta náechapajirisiraina eta avasareana, váhini vicuimahaini eta táíñehiqueneana. Víti vímiyanavahini viúrihini te mamirahu ema Viya, vicapicahuhini nayehe ena achaneana. <sup>3</sup> Taicha ema Viya Macatiurahiquene máuricahi eta víchirahi víti eta júcana. <sup>4</sup> Taicha mavarahahi éma máimimatichayare namutu ena achaneana eta yátupiqueneana máechajiriruvana apaesa náuchucuha éna apanava. <sup>5</sup> Taicha májina apanainahini ticatiuchavacaina éna, macarichu

ema Tata Vicaiyaquene. Émapa ema Machicha ema achane Cristo Jesús, macarichuhi ema téchajiurahi viyehe viti achaneana te mamirahu ema Tata Vicaiyaquene. Nájina apanaina téchajiúrahínahi viyehe. <sup>6</sup> Ema Viáquenu Jesucristo tíjaracavahi tépena taicha eta macuchucuirahaviya vimutu viti achaneana. Puítisera mavaraha máimimatichayare namutu eta juca arairuhi vímiturapiana. <sup>7</sup> Eta tacahehi, manerejirunuichuhi mayehenuhi apóstole, nucametarairuyare tamutu avasareana, nímitucayarehi ena apavasanana eta nasuapiraina éna eta yátupiqueneana máechajiriruvana ema Viya. Nutupiruvahi núti eta juca néchajisirahi, vahi népiyahiraivainahi.

*Em Pablo máimitucavaca eta náicharacavaya te náurujisiravana*

<sup>8</sup> Tiuri, nutuparacahavare pímitucavacavare ena vichamuriana eta juca apana: Tauri eta náurujisiravaina te nayujarasirana. Ena ajairana, vahi nacueñamavahini me Viya eta máitauchirayare eta nayasearuhi. Tátupiruvahini te nasamureana. Vahi nacúsemamajuhehíni eta nayujarasirayarehi nacajapavaquichavapuca. <sup>9</sup> Énaripa ena esenana, táurihini eta nacamuirihairana. Vahi nacúyeheheácaicha eta nacamuirihaira. Náetupiricavahiséraini. Váhivare nacuvayuchaini eta nacatatasirana. Váhivare nacuvayuchaini nacuyeheheacavahini eta oro, eta perla, eta tasivachaqueneana múiriareana. <sup>10</sup> Étaripa náurinavahi yátupiquenehi, eta náimeresiravaina eta yátupina náehisirahi ema Viya, náichirainavare eta táuriqueneanapa. <sup>11</sup> Énerichuvare, tiúriyare eta nasamararasira eta náimitucasivana. Vahi nacuécapae-marahi nácani tímitucanahi. <sup>12</sup> Énerichuvare ena esenana, vahi tatuparaca náimitucahíni ena víyarahana te viúrujisiravana, taicha vahi tatuparacahini náimiturecahíni éna. Nasamararacayarechucha eta náimitucasivana. <sup>13</sup> Taicha te máepiyacainapa ema Viya ena viáchucanaveánaini, tínapuca máepiyacahi ema Adan, téquenehapa esu Eva. <sup>14</sup> Váhivare émainahini ema Adan máinapucanahi máquipaicavahíni. Ésuhi esu esena, tísapavahi mavayuaca ema Satanás. Eta suísapiravahi, tiáquipaicavanapa tayehe eta pecatu. <sup>15</sup> Tásiha, ticatajivainapa eta suínasirana. Puíticha tanasihi nayehe ena esenana. Tiúchucuhanayaresera, te náimiyana náehica ema Jesús, etapa eta náemunasiraina ena vichamuriana. Tacuijavare natapiravaina te mamirahu ema Viya, táurihini eta napanereruana.

### 3

*Tiúrianayarehi eta náitairesira nácani tatupararuanyare eta avacurecacare pastorecare*

<sup>1</sup> Étaripa eta juca evacureca pastorecare, puiti nutupiruva numetacahe. Te natiarihinapuca nácani ajairana návaraha ticavacureana eta pastorecare, tájina táichiravaina, taicha eta juca evacureca pastorecare, éta tiúriana evacureca ticaijuhecare. <sup>2</sup> Tacamunuhisera mácani ticavacureya eta pastorecare, tájina matapiravainaya eta máitairesirahi, tacuija nacuyunaca ena achaneana. Mácani ésunarichuhi esu mayena. Mácani ticapicahuhi. Mácani tijaneacavahi eta máitairesira, máitucahi tipanerereca. Mácani achanesamure tijacaparahi nayehe nácani tichimarachanaya. Mácani máituca tímitureca. <sup>3</sup> Mácani vahi tavayuaruina eta téracare. Váhivare macueharahi. Vahi macujamurarahi. Váhivare macutupiarahi. Váhivare tacuvayuaca eta plata. Tatuparacayare mácani tijapanurahi. <sup>4</sup> Ticaiyacareyare te mapena. Máitucayare eta macajurusirayare ena machichanaveana, tisuapajirahianayare tipicaurahianayare máicha. <sup>5</sup> Vahi tisiapaimahi mácani achane vahi máitucahi ticavanairipi te mapena. Taicha nararihi ena vahi náituca ticavanairipiana.

Tavetijipapuca eta juca evacureca, vaipa náitucaimahi eta náechajirisiraina najaneasirayarehi ena vichamuriana. <sup>6</sup> Vahi tisiapaimahi eta pastorecare mácani mapaemunavahi máehica ema Viáquenu, machu macasiñavavaica eta masiapirahi eta matuparahahi. Eta tacahe eta máquipaisiravahi ema Váinaraji. <sup>7</sup> Énerichuvare tacamunuhi mácani pastoreyare ticapicahu nayehe ena apamuriana achaneana, apaesa vahi nacuechajica eta mayehe. Machu máituruca ema Váinaraji.

*Tiúrianayarehi eta náitairesira nácani tatupararuanyare eta avacurecacare ticaijare diácono*

<sup>8</sup> Énerichuvare, nácani ticavacureya eta diáconocare, tacamunuhi ticapicahuanayare eta náitairesirahi. Vahi apipiemanaimahi eta náechajirisiravana. Váhivare ticavaharasianaimahi. Váhivare tijamurarahanaimahi. <sup>9</sup> Tacamunuhivare náimatiyare yátupi eta tisuapacareanahi mayehe ema Jesús, náitauchiraripa tamutu, tájinapa náichiravaimahi te mamirahu ema Viya. <sup>10</sup> Nacasamairunumaya te yátupihipuca tiuri, tájinapuca náichiravaimahi. Téhesera tiúrianahi, énarata tuparairucanayarehi eta evacureca diáconocare.

<sup>11</sup> Énerichuvare, ena esenana, tacamunuhi ticapicahuana. Vahi nacuechajiji. Súcani tijaneacavahi eta suítaresira. Tájina náichiravaimahi, títaurahiánayare.

<sup>12</sup> Ema tuparairucayare, tacamunuhi mácani ésunarichuvare esu mayena. Máitucayare eta máimitusirayare ena machichanaveana. Ticaiyacareyare te mapena. <sup>13</sup> Taicha te náitauchahi tamutu eta natuparahana ena tuparairucana, ticunachacareanahi tipícauchacareánahivare. Tásiha, énerichuvare tétumesamúrechaváinapa eta nacametarairuirahi eta máimiturapiana ema Jesucristo.

*Jéhevare eta juca téhicacare*

<sup>14-15</sup> Puiti nucunevaipa eta nítecapiravaneya eta ara piyehe, téhesera vuíchahapuca nucitujicava níteca. Nucajurevihisera eta juca carta, apaesa pítuca eta táurivaina eta pítaresiraya, taicha machichavihi píti ema Viya. Viti manerejiruanahi ema yátupiquenehi Viya. Viúnacahi vímiturecahi yátupi eta máechajiriruvana. <sup>16</sup> Taicha eta juca véhiruhi vimutu, tétavicavahi eta táuriva: Vimutuhi visuapahi eta máucupaisirahi te juca apaquehe ema Jesucristo, macaqueherahi eta juca viáquehehi viti achaneana.

Émaripa ema Espíritu Santo macametarapihivare eta yátupirahi Machicha ema Viya.

Náimahahivare ena ángeleana eta máechepusirahi te máecari.

Te tamutupa, tichavapa éma te mávasa anuma.

Tásiha, viti mavanarana véchajisihahi tamutu avasareana eta macuchucuirahivare vimutu viti achaneana.

Ichapemuriana ena ticasíñavanahi mayehe, téhicanahi éma.

## 4

*Natiarihiyare ena tñajicavanaya eta náehisira ema Jesús*

<sup>1</sup> Eta mametarapi ema Espíritu Santo, puiti juca vicaijuheyare, natiarihinapa ena timútserahávanayarepahi tñajicavana eta náehisirahi ema Jesús. Nasuapainapaipa ena tiyururahiana. Náehicainapa eta náimiturapiana ena éreanana. <sup>2</sup> Nasapihainapa tisamacareanayare ena apipiemanata tépiyahirahiana. Ena nani, máimatiacavarahánahi eta náepiyahiraivana taicha náitunaipahi eta nacahirana. <sup>3</sup> Ena nani achaneana nayurucainapaipa ena

vichamuriana. Ánipa nacaheyare: “Vahi táurica vitanucahini esu esena viyenainahini. Jucarihivare eta tinicacare, énerichuvare vahi táurica vinicahini” nacaheyare. Tamutusera eta juca tinicacareana máepiyaruana ema Viya vinicayarehi viti vímatiequenehanahi eta máechajiriruvana. Vihasalupayachayarehi te vinicayare eta máijjararuhavianahi ema Viya. <sup>4-5</sup> Taicha tamutuhi tiuri eta máepiyaruana ema Viya. Vahi táuricahíni vépuruhíni. Vijacapayarehi tamutu, vihasulupayachayarehi te vinicaya; taicha víjaracasíhi mayehe ema Viya, timetacahavihi eta táurivahi. Tacaurisamurechahi ema Viya eta viyujarasirana. Puíticha tanasihi viyehe víti. Te vinica, vihasulupayachayarehi ema Viya.

*Éma yátupiquene mavanara ema Jesucristo*

<sup>6</sup> Te pímitucavaca eta juca ena vichamuriana, pímerechahi eta yátupirahi mavanaravi ema Jesucristo. Eta juca táurinaquenehi echájirirucava, étarichuhi eta vímiturapianahi eta piyehe, éta tétumechaviyare eta pímiyaniravahi pisuapa eta juca véhiruhi. <sup>7</sup> Váhiserá picusuapavaca ena nani tíchanahi eta juca echájirirucavana tauriqueneana. Súnsurupianachucha éta. Pímiyanavaserá picaravahu eta piúritaresiráina mayehe ema Viya. <sup>8-10</sup> Tacuti eta náimicaravahuchirava ena ticavijarurahiana eta pelota, navaraha náetumecha eta náqueheana. Tacamunuhiserá nápepejiricava te sácheana. Píti, vahi tacuechuquiha eta picaravahuirahi. Te yátupihi vicaravahu viúritaresiraya mayehe ema Viya, tétavicavaya eta viúrivaya eta visamiravaya puiti juca vicahehi, énerichuvare véchapajiricavainapa eta vicaijuheraya eta mávasa ema Viya, vicachaneraya éma. Eta tacahe, vétumechavachucha apaesa viúritaresira eta mayehe. Vímiyanavachucha vímitucavaca ena achaneana apaesa náurítasesira éna apanava mayehe ema Viya. Taicha yátupiquene eta echájirirucava ani tacahe: Éma vicasíñaquenehi, éma yátupiquenehi Viya.

Éma, téchahavi vimutu viti achaneana.  
Vivetiji viti véhicanaripa éma,  
tétavicavahi eta macatiuchirahavipahi.

<sup>11</sup> Ena pímitureanaya, pituparacavacaicha muraca eta júcana. <sup>12</sup> Picuneuchava yátupina apaesa vahi nacuepuruvi eta pímituresirahi, taicha eta piámaperuváichaha. Pímerecayare eta piúriava apaesa étaina náehicavi ena vichamuriana. Tauri eta péchajisiráina. Tauri eta pítaresiraina, tájina pitapiravaimahi. Pémunarahi nayehe ena vichamuriana, énapa ena apamuriana achaneana. Yátupina eta péhisirahi, étapa eta picasíñavairahi mayehe ema Viáquenu. <sup>13</sup> Te vuíchahapuca nucuítécapa, pímiyanava eta pímitusirayare ena vichamuriana. Pímiyanavavare eta pétumechiravacaina. Péchajicuínayare eta Sagrada Escritura apaesa nasama namutu. <sup>14</sup> Pémechavayare eta nametarapianahi ena víyahana mametaruanahi ema Espíritu Santo eta picavacureraya. Péchavare eta nanasirahi éna eta navahuana te piápusi. Puiti, vahi picuemepurureca eta péchemaraivahi maicha ema Viya.

<sup>15</sup> Pipanerecha yátupina eta juca pímetacasivanahi. Pímereca eta táurivahi eta péhisirahi, apaesa náimaha namutu eta piúriváinapaicha. <sup>16</sup> Péchapavaicha yátupina eta pímituresirahi eta juca véhiruhi. Pítijiva pipamicava pítauchayare tamutu. Te pítaucha eta juca, picuchucuhavayare píti, énapa ena pímitureanahi.

## 5

*Vímerecayare eta viúrivayare nayehe ena vichamuriana*



<sup>1</sup> Te natiarihinapuca nájecapava ena víyarahana ichavicapananahi piyehe, vahi picucajachavaca éna. Piconsejachavacaséra tauri, tácuti te péchajica ema ticachichavi. Énerichuvare ena amaperuquijiana ajairana, tauri eta piconsejachiravacáina tácuti eta péchajisira ena pichuquiqueneana. <sup>2</sup> Énerichuvare ena vénarahana ichavicapananahi piyehe, te nájecapavapuca, piconsejachavaca tauri tácuti eta péchajisira esu ticachichavi. Énapa ena amaperuana esenana, piconsejachavaca tauri tácuti eta péchajisira ena pichuquiqueneana. Tátupiruva eta péchajirisiravacaina éna.

<sup>3</sup> Pímicatacavacaya ena tépenaimanahi, nácani tájinahi naviyavahini, yátupihí eta nacamunuiravana. <sup>4</sup> Téheserapuca natiarihihi ena suchichanaveana esu tépenaimahi, suámarianapuca, énapa títátianayarehi. Ticaravahuanainapa eta náitátijirisiravaya. Títisiriñicavánainapa eta nacajurusiravacahi ena náenana, nátseanapuca. Eta juca, máurica ema Viya. Taicha tatuparacahi ena echichanaveana eta náitsirijisiraváina eta nacajurusira ena ticachichana. <sup>5</sup> Pímicatacayaresera súcani tépenaimahi sucarichuhipuca, nájina suchichainahi, nájinavare suviyavahi. Sucuchapainapa eta tásihaqueneya mayehe ema Viya, taicha suíjararuvaipa yátupi eta mayehe. Tiyujaracainapa tamutu sácheana, tamutu yátiana. <sup>6</sup> Ésusera súcani suícutichiravahi suicha eta suvarahaqueneanahi, ésu tímicutijiricavaipa suáquijiruvahi eta mayehe ema Viya. <sup>7</sup> Pímitucavacayare ena tépenaimanahi, apaesa táuri eta nacaemataneasiraina ema Viya, tacuija natapiravaina. <sup>8</sup> Taicha ena vichamuriana, tatuparacavacahi náeñamavayarehi tayehe eta náitátira ena náenana, ena nátseana. Nácani vahi nacuquicha eta juca, tímicutijiricavaipa vahi náitauchahini eta náehisirahi ema Viya. Tiápajucavapanapa éma eta nayehe ena masuápajirairahánahi.

<sup>9</sup> Nacarichu pinacayare te nalista ena tépenaimana ena ticayeheanaripa sesenta año eta nahañora. Súcani émanarichuhi ema suímaini eta suítare-sirahi. <sup>10</sup> Ésupa súcani tímicarehi eta táurivanahi eta suématanerepiana. Súcani tiúrihi eta sucajurusirahi ena suchichanaveana. Súcani tijacaparahi te supena nayehe nácani tichimarachanapahi. Súcani tiuri eta suéchapajirísira ena vichamuriana. Súcani téchapajirahi nayehe nácani ticatajivanahi ticajumanahi, ticatiruhanahi. Súcani tamutuhi suítaparaha suicha eta táuriqueneana.

<sup>11</sup> Énaserá ena tépenaimanahi amaperuanarichaha, vahi picunaca te lista. Tijuricati tiáquipaicavana taicha tavayuacavacarichaha eta tájiparacana, natanucarichaha ema ajaira, navarahaichaha tiápechavanayarehi ticaimana. Tijuricati ticainajiruana eta náehisirahi ema Cristo. <sup>12</sup> Tacamitiscavacapáipa, énapa tímijnajicanapahi eta náehisirahi ema Cristo. <sup>13</sup> Énerichuvare ticauyayacarehi nayehe ena amaperuanarichaha, te pinaca eta te nalista, tijuricati tépiyacavanapa plújuana. Náematanepa tipaipiricana te pétiana, námapaipa eta cuéntoana. Tímisiáparacavánapáipa. Nacaemataneaca náechajisihapáipa jácani náimahaqueneanapahi te pétiana. Vahi tácatuparaha náichahíni eta juca. <sup>14</sup> Eta tacahe, ena tépenaimanahi amaperuanarichaha, nuvaraha nápechava nacaimavare, nacachicha, nacaenacarehi te peti, apaesa tacuija nacucayema ena ticunerahiana. <sup>15</sup> Taicha nararihi ena tépenaimanahi tínajicavanapaipa eta náehisirahi ema Jesús, náehicapa ema Satanás.

<sup>16</sup> Te sutiarhihipuca tépenaimahi esu vichamurihi, te natiarihivarepuca ena sujaneanahi vichamurianahivare, ena títátianayarehi ena sujaneanarichu; apaesa vahi sucuapitavairicahi nayehe ena máimaruanahi ítátijiríruanahi, táichavenehisera jácani tamajinairahi naviyahini éna.

*Tatuparacavacahi ena vichamuriana náimicacayare ena pastoreana eta náitátiravahi*

<sup>17</sup> Ena pastoreana, te tiúrihipuca eta náechapajirisiravaca ena vichamuriana, ichapeyare eta náemunacacarevayarehi. Tatuparacavacahi ena vichamuriana náimicacayare tayehe eta nanicaquenerepi ena pastoreana, taicha éna, eta náematanerepihi tímiturecanahi ticametairuanahi. <sup>18</sup> Taicha ani tacahehi eta Sagrada Escritura: “Vahi picuitisumucha eta pivuiyera te ticaemataneahi taicha técuahapahi”. Ánivare tacahe: “Ema achane ticaematanehi, tatuparacahi ticavachayarehi mayehe ema macaemataneahi”.

<sup>19</sup> Vahi picusuapavane te tatiarihinapuca eta máepiyaequenena mácani náiyacarahi ena vichamuriana. Téhesera natiarihinapuca ena apinana, mapananapuca tinecapaequenehanahi eta máejecapiravahi, jéhesare tisua-pacare éta. <sup>20</sup> Téhesera yátupiquenehipuca eta máejecapiravahi, picajachayare muraca te namirahu ena machamurianahi náiyacarana, apaesa nátsiriha napica ena apamuriana, vaipa nacuquicha eta juca. <sup>21</sup> Nutuparacavicha muraca, pítauchayare yátupina eta juca numetarapianahi piyehe. Vahi picunerejicavaca, nácuticaca eta píjarasiraina eta piyehe justicia. Vahi pépacuchaimahi eta máichavaquenevahi mácani téjecapavahi, taicha máimarracahi ema Tata Vicaiyaquene, émapa ema Viáquenu Jesucristo, énapa ena mayeheana ángeleana manerejiruanahi.

<sup>22</sup> Te matiarihinapuca mácani navaraha nacasiapa pastor, picasamairunumaya te tiúrihipuca éma. Vahi picujahúcha picunacavane éma. Tijuricati tatiarihinapahi eta máejecapiravahi. Machu pítina tamuriaca taicha eta pímisirainana éma. Pijaneacavaicha tayehe eta juca. <sup>23</sup> (Puiti néchavahi eta picajumamajipa eta pítaresirahi te piami. Tásiha, nuconsejachavi: Pímisiri-quicha apaesainarichu eta vino eta péresarama une, pípurujinahi.) <sup>24</sup> Tacamunhisera eta picasamairunumaya nácani tisiapanayare eta pastorecare, taicha nararihi ena máchasihi eta napecaturana. Vahi táimaticarevane, tapaenumavaya picasamairunuma éna. Nararihisera ena ticaecheravane eta napecaturana. Tímaticarenavane. <sup>25</sup> Ene tacahehi, nararihi ena tímaticarenavanehi eta náichirahi eta táuriqueneanahi. Nararihivare ena tacamunuhi eta picasamairunuma, apaesa ticaecheravanehi eta táuriqueneana náichaqueneanahi.

## 6

<sup>1</sup> Ena vichamuriana músuanahipuca, tatuparacavacahi napicauchayare ichape ena náquenuanahi. Vahi tijicapairihianaimahi apaesa vahi nacuyunaca ena achaneana eta máijare ema Viya, váhivare nacucaecahi eta vímiturapiana. <sup>2</sup> Étaripa te nacaquenuhipuca mácani vichamurihi, tiápajucavayare eta napicauchirayare. Vahi tímipanavanáimahi eta nachamurirahi éma. Náimerecayare yátupi eta táurivaya eta náemataneana, taicha ema nacaemataneyeruhi, nachamurihi máemunaruvare ema Viya.

*Ticurisamurechahavihi eta véhisira ema Jesús*

Piti nuchicha Timoteo, pímitucayare tamutu eta juca nayehe ena vichamuriana. Pémechavacayare eta vímiturapiana. <sup>3</sup> Natiarihinapuca ena nácani navaraha tímiturecana eta apana doctrina. Nahapapicainapa eta vímiturapiana, tájinasera vahi tavehapicaimahi eta juca yátupiqueneanahi tásihaqueneanahi mayehe ema Viáquenu Jesucristo. <sup>4</sup> Ena nani, ticasíñavaváicanahi, tájinahineni náitucaqueneanahíni. Ena nani, náurica téchajicana. Navayurevanapahi nácapaemachapahi tayehe eta

tacayemaqueneana eta véchajiriruvana te vímiturecahi. Ticapinarurahiana éna, tiúmeharahiana, tíchanarahiana, tipíccarácavanapa. <sup>5</sup> Tamutu sácheana ticitianarerecana taicha máuripanererurahána ena, máimatirahanahi eta yátupiqueneana. Navaraha nacavacharapiyare eta nayehe religión. Píti vahi picupauchavaca ena nani.

<sup>6</sup> Jéhesareva, tétavicava eta viúricacareva máicha ema Viya, eta véhisirahi éma. Tavetiji te vicurismurechava tayehe eta vicayehequeneanahi máijarahavianahi éma. <sup>7</sup> Taicha te viúchucapa suyehe esu ticachichahavi, tájina viámapahini vímahaquenenahíni. Ene tacaheyare eta vítavirayare, tájinavare viámaimahi eta vímahaqueneanahi. <sup>8</sup> Eta tacahe, te tatiarihipuca eta vinícaquenéna te vipenana, vicamuirihahipuca, tarataripa visuapayarehi. <sup>9</sup> Énaserá nácani tipanerechanahi tirricuchavana, apanapanepa eta najamurachaqueneana. Tacananesiricapa eta naplatanechiavaya. Énajivapa tímicuñacavana taicha eta najamuraraivana súnsurupianahi. Eta juca ticauyayacarehi étaina táimicuñaca eta náchanevana. <sup>10</sup> Táitsivahisera ena achaneana, náetaviuchahi eta tavayuasirahi náichapa tamutu eta tájiparacana, táichavenehi eta najamurachira eta plata. Namapurujipaipa ena vichamurianaini. Natiarihinapaipa timutserahavanapaipa eta tayurusiraina eta najamuraivana. Tásapihapapuca táiminajícapahi eta náehisirainihi ema Jesús. Énajivapa titanucavanahi eta naviurevahi, timutserahavanapaipa eta nacatajivairanahi eta náitairesiranahi.

#### *Yátupina eta véhisiraina ema Jesucristo*

<sup>11</sup> Pítisera vahi picupanerecha eta juca mamavarahaqueneana ema Viya. Pérajicava tayehe, taicha mavanaraviripa éma. Tátupiruvahi eta pisamure mayehe éma. Táimiyana eta juca táurivahi eta pítaresira. Tauri eta péhisiraina. Pémunaca yátupina. Picamichayare tamutu. Yátupina eta piman-suvaina te pisamure. <sup>12</sup> Pétumechavachucha eta picaemataneasirahi ema Viáquenu. Muracaina eta picasiñavaira mayehe. Vahi picuyacuquenehava eta picuchapirahi eta pítaresiraya máichecuaraquireyare, taicha máichuquenevirichuhi ema Viya. Vahi picuemepurureca eta péchajiriruvanahi te namuri ena vichamuriana, te píjaracavainapa eta péhisirayare ema Viya.

<sup>13</sup> Puiti, tímararacavihi ema Viya eta nutuparasiraviya. Éma, ticaitarecahi tamutu eta vímahaqueneanahi eta te juca apaquehe. Tímararacavivare ema Viáquenu Jesucristo. Pécharichuvare eta matupiruvairahi eta máimereuchiravahi éma te mamirahu ema Poncio Pilato. <sup>14</sup> Pítauchayare píti tamutu eta juca nuvanairipianahi taicha tásihaqueneanahi me Viáquenu. Vahi pihapapicaimahi, apaesa tacuija táimicajachavi mayehe. Tauri eta machimapiravina ema Viáquenu Jesucristo te máitecapa te táitauchavapa te jena sácheyare máicutiarahi ema Tata Vicaiyaquene. <sup>15</sup> Ichapenapa vicunachainapa ema Tata Vicaiyaquene taicha macarichuhi éma yátupiquenehi tamutu marataha. Émahi Réyquenehi, Viáquenuquenehi. Tivanecahi namutu ena réyeana énapa ena aquenucana. <sup>16</sup> Macarichu éma, yátupiquenehi máepenacaca. Máetaviuchahi eta maváyuháquiráivahi. Nájina tiratahaina ticachacayaina eta majaraiva tayehe eta mávihahi. Éma, nájina tímahaina, taicha máimahasiquenehi éma. Éma, vipicauchaquenehi vivapinaquenehi ichape. Máitavacainapa eta vicunachirayare éma. Jéhevare éma, tamutu marataha. Amén.

<sup>17</sup> Énerichuvare ena vichamurianahi ticaimahaqueneanahi rícuana, pímitucavacayare eta vahi nacucajamurava. Váhivare nacucasiñava eta nacaimahaquenérahí, taicha tijuricati títava eta náimahaqueneanahi,

témitiequenehapa tamutu. Nácasiñavasera mayehe ema Viya, jéhevarequene ema ticasañacare. Éma tíjaracahavihi tamutu eta vicamunuqueneana, viúrisamurerecahi máicha. <sup>18</sup> Tacahe, ena vichamuriana rícuana, pímitucavacaichavare eta náurivainaicha. Náimicatarahi ichape tayehe eta ematanecana. Nájapanuráhi nacajirahi nayehe ena ticamunuvanapahi. Tátupiruva te nasamure eta náíjarasiraina ena ticamunuvanahi. <sup>19</sup> Te yátupina náitaucha eta juca, tatiarihi eta sácheyare najacapiraya eta apanayare náimahaqueneanayare te anuma. Éna, ticaijaranainapa eta nápechiravaya títarecana, taicha éna yátupihí eta náimicataráivahi eta náítaresirahi te apaquehe. Máichecuaraquirénapa eta náuricacarevaya.

*Eta téqueneha matuparaha ema Timoteo*

<sup>20</sup> Tiuri puiti, Timoteo, péperajica yátupina eta juca vímitucasivahi mayehe ema Jesucristo taicha tacapicahuquenehi ichape. Vahi picujicapavaca ena nácani téchajisihana eta tájiparacana, técticavánachucha. Váhivare picujicapa ena nácani navaraha ticanaraemachaviana. Ena nani tímijachavanahi náimatihíji eta táuriqueneana, tásihasera ichape nayerehi eta náehisirainahíni ema Viya. <sup>21</sup> Nararihipaipa ena vichamurianaini tínajicavanapa eta náehisirahi ema Jesús, taicha nasuapahi ena nani tépiyahirahiana.

Nuyaseuchaviparaca me Viáquenu Jesucristo táetaviuchahini eta piúricacarevaya máicha.

Tamutupa eta néchajiriruvahi piyehe.

## **Eta macartane ema Apóstole Pablo mayehe ema machamuri Timoteo, ticaijare 2 TIMOTEO**

<sup>1</sup> Nuti Pablo mayehenu apóstole ema Jesucristo. Ema Viya tivanecanuhi eta nucametarairuyare eta máechajiriruva, taicha macaechajiriruvahi eta máijarasirahaviya víti eta vítaresiraya táichavenehi eta mávahásirahavihi ema Machicha Jesucristo. Máichecuaraquirénapa eta vítaresira máicha. <sup>2</sup> Puiti nápechavavare nucajurevi eta juca apana nucartane piyehe piti nuchicha Timoteo némunaruquene. Nuvaraha macatajicavini majapanuvini ema Tata Vicaiyaquene, émapa ema Viáquenu Jesucristo. Náijaracavini eta táurivaina eta pipanereruana.

### *Ema Pablo máetumehahi ema Timoteo*

<sup>3</sup> Núti nécharairicavihi te sácheana yátiana te nuyujarasirana, nuyaseuchavihi me Viya. Nuhasulupayachahi éma eta piúrivahi máicha. Éma nucasiñahi núti, tacutihi eta nacasiñairahi ena viáchucanaveanaini. Tájina níchiravainahi eta nusamiravahi te mamirahu. <sup>4</sup> Tétavicavahi eta nuvarairahi nápechavahini nímahavi. Vahi némitisicavahini eta piyairahi te nujunijicavinapa. Nuvarahahi píjahúchavahini pítecapauchanuhíni, núrismurepáini eta nímairavinahíni. <sup>5</sup> Taicha némechavahi yátupihí eta pímiyaniravahi pisuapa ema Viáquenu. Picápayayarácavacáinehi eta susuapirahi yátupi esu piátse Loida ésupa esu pena Eunice. Ichaperinehi pémechanuhi eta nayehe éna. Eta tacahe puiti, vahi néñamavahini eta piyehe.

<sup>6</sup> Puiti nutuparacavicha muraca vahi picucaemaha eta péchemaraivahi maicha ema Viya. Pímiyanavachucha. Vahi tacumapuruji eta nunasirahi eta nuvahuana te piápusi. <sup>7</sup> Taicha ema Viya vahi mavaraha vipíccarácavahini. Éma tíjaracahavihi eta vitumesamurevana eta vicutuparahairahi. Éma tímitucahavihi eta vémunaraivaya. Tíjaracahavivare eta vicaratasiravayare yátupi eta vítaresira. <sup>8</sup> Eta tacahe, vahi picutsiriha eta picametarairuyaya eta máechajiriruvana ema Viáquenu. Váhivare picutsiriha eta táemeratasiránuhi eta nucametarairuiranahi núti apana. Yátupina picamicha eta picatajivairaya. Taicha ema Viya, éma tíjaracaviya eta pitumevaya eta pímiyaniravaya picametarairu. <sup>9</sup> Ema Viya tíamavahi eta máemunasirahavihi acane te tépanavainapa tamutu. Tijapanuhavihi máichavenehi ema Machicha Jesucristo. Eta tacahehi te mapanerechainapa eta máichuirahaviyare vimutu víti véhicanayare ema Machicha, mavarairahi ticuchucuhahaviyare, váhinéni viámavahini viúrihíni eta vítaresirahi. Puítisera ema Viya mavaraha mapecaturarehaviya te mamirahu. <sup>10</sup> Puíticha, eta majapanuirahavihi ema Viya, máevatasinahavihi ema Machicha Jesucristo ticatiuchahaviyarehi. Éma, máechepurehi te máecari. Puiti manaquicahi eta máechajiriruvahi eta macaitaresirahaviya víti apana. Te jena sácheyare máitsivachainapa eta viáquehe, máepenacacahávinapa. <sup>11</sup> Ema Viya tituparacanuhi nucametarairuyare eta juca. Éma tinacanuhi apóstolenuhi, nímitucayarehi ena apavasanana. <sup>12</sup> Eta tímicaviuchanuhi eta juca, puíticha nucatajivahi ichape, taicha eta nítauchirahi eta nutuparacasivahi. Váhiserá nutschiriha eta néhisirahi, taicha nímatihí núti eta yátupirahi eta macasiñacarévhí ema nucasiñaquenehi. Néchahivare eta majacapirahi tamutu eta nématanerepiana. Nucunevainapa eta jena sácheyare eta máijarasiranuyare eta nícuchihi mayehe.



<sup>13</sup> Píti apana, eta péhicayare eta juca yátupiqueneana nímiturapianahi piyehe, tájina vahi pihapapicaimahi. Yátupina pisuapa, yátupina eta pémunaraivaina taicha tiávahácaviripa ema Jesucristo. <sup>14</sup> Piúnacaicha yátupina eta juca máechajiriruvana ema Viáquenu. Te natiarihipuca návaraha nahapapica eta vímiturapiana, vahi picuisapava. Máimahavinesera ema Espíritu Santo, ema tiávahácavivihi. Éma tímicatacaviyare.

<sup>15</sup> Títecapa, pécharichuhi píti eta namáimicatasiránuhi ena náiyarahanahi ena vichamuriana ticavasanahi te Asia. Émavanénahíni máitecahíni ema Figelo, émainahipucaini ema Hermógenes. <sup>16-18</sup> Macarichu títecapauchanuhi ema Onesíforo. Te títecapa éma te Roma, matupiruhi titanucanu, tétupiacanupa te juca cárcel nucaerataiyahi. Éma, tájina mapicaimahi ena ticatianacanuana. Ticajinuhi eta nucamunuqueneanahi. Pímaharichuhi píti apana eta máimicatasirahavihi te viávihaichaha te Efeso. Eta tacahe, nuyaseacahi ema Viya macatajicahini máimicatacáhiní éma, énapa ena machichanaveana. Majapanuhini te jena sácheyare vítecapauchiraya ema Viya.

## 2

### *Yátupina eta véhisiraya ema Jesucristo*

<sup>1</sup> Pítisera némunaruquene nuchicha Timoteo, nuvaraha yátupina máetumechavini ema Viáquenu Jesucristo. <sup>2</sup> Píti pímatirichuhi tamutu eta nímiturapiana, taicha pisamahi eta nímitusiravacahi ena vichamuriana te avasareana. Puiti pitanucaya ena apamuriana vichamuriana nácani pímitureana títaurahianahi. Pituparacaya éna tauri eta náimitusiraina ena apamuriana vichamurianayareva, tácutirichu eta nímitusiravihi núti.

<sup>3</sup> Nutuparacavi: Picamichayare piti tamutu eta picatajivairana. Yátupina eta masuntaruravina ema Jesucristo. <sup>4</sup> Picutiyare eta máuriva ema sun-taru, tacarichu máechapajiricahi eta mavanairipiana ema mayehe comandante. Vahi máemitisicaimahi eta mavanahiana, tahapapicahipucáini jácani tájiparacana. Ene picaheyare piti eta pítauchirayare eta mavanairipiana ema Viáquenu. <sup>5</sup> Eta juca tacutihí ena ticavijarurahiana eta pelota. Te vahi náitauchahi tamutu eta tavanairipianahi, vahi tivérearecanáimahi. <sup>6</sup> Píti pipamicavaya muraca eta pítauchiraya eta pituparahana. Picutiya eta mapamisirava mácani isanitireru eta macaematamera te máesane, mavarairahi tíuchucuhayare eta máematane. <sup>7</sup> Pipanerecha yátupina eta juca numetaruvianahi. Németeaca tímicatacaviyare ema Viáquenu eta picaicutiararayare tamutu.

<sup>8</sup> Vahi picuemitisica eta juca nímiturapianahi mayehe ema Jesús, eta émairahi yátupiquene Cristo, mámariequenenihi ema rey David. Éma, máepenquenenihi. Macaechepucahisera ema Viya. <sup>9</sup> Eta tímicaviuchanuhi eta juca, puíticha nucatajivahi ichape taicha eta nucametarairuirahi. Étara témeratacanuhi puiti, ticutirinehi nucaviurevahini. Váhisera vicainajiruvaimahi eta vicametarairuiraya eta máechajiriruva ema Viya, cápachi etiarhipa éti. Étinapa nítivaheyare. <sup>10</sup> Nucamichahisera tamutu eta náichiranuhi, nuvarairahi nasuapahini nácani máichuhaqueneánayarepahi ema Viáquenu Jesucristo, apaesa náuchucuhahini éna apanava, náitujicavahíni nasiapa tayehe eta táuricacarequene mávasa. Máichecuaraquirequene eta vicachaneraya éma. <sup>11-13</sup> Jéhesare, yátupiquenehi eta juca véhiruhi vímutu:

Te vépenaca mayehevivihi ema Viaquenu,  
éma ticaitarecahaviyare vicachanenapa  
éma tayehe eta mávasa.

Te vicamicha eta vicatajivairanahi  
máichavenénahi éma, vítujicavayare vicajupahayare  
éma eta macavacureraya.

Téhesera vicaerajicavahi eta véhisirahi éma,  
éma apanavare ticaerajicahaviyareva te mamirahu.

Te vínajicavahipuca eta véhisirahi éma,  
émasera vahi máinajicahavihíni.

Manasirichucha ticuchapahavihi te  
viápechavayarepuca vichavayare mayehe.

Taicha éma, vahi apánapanéna eta mapanereruana.

<sup>14</sup>Nutuparacavi: Pémechavaca ena pímitureana tamutu eta júcana. Pécatiacaicha muraca te máijare ema Viáquenu. Vahi nacuevataemajiricáca te jácani náechajirisiravána. Taicha tájina tájaracaimahi, machu étaina tahapapica eta napanereranahi ena vichamuriana eta nasámararásirainahi.

*Yátupiyare eta náurivaya ena mavanarana ema Viya*

<sup>15</sup>Píti, yátupina tauri picha eta picaematanerahi ema Viya, picurisamu-rechirayare éma. Tájinasarépa piávamirahuimahi taicha tamutuhi tiuri eta pémataneana. Tatupiruvayarehi eta pímituresirahi eta yátupiqueneanahi máechajiriruva ema Viya. <sup>16</sup>Téhesera natiarihinapuca ena téchajisihanahi eta tájiparacana técativana, vahi picujicapajiricavaca éna. Pérajicava nayehe, taicha ena nani navetijiyarepáichucha eta náichira eta tauriqueneana.

<sup>17</sup>Tíñehiqueneanahi eta náechajirisiravana taicha eta tavayuarasiravahi, ticauyayacarehi nahapapica ena vichamuriana. Ene tacahehi eta náejecapiravanahi ema Himeneo, émapa ema Fileto. <sup>18</sup>Péchapavayare nayehe ena nani apinana, taicha nacaerajiruvaipahi tayehe eta yátupiqueneana vímiturapiana. Taicha ena nani tépiyaequenehanahi eta táetavisiravarí-pahiji eta náechepusiraipahiji ena náepenaqueneana. Jéhesare, natiarhipahi ena náemejecapavaruanapáipahi. <sup>19</sup>Vitarihichahasera viti vímiyanavahi véhicahi ema Viya. Taicha muraca eta vicasiñavairahi eta majaneasirahavihi, taicha éma tímatihavihi eta machanerairahavihi. Yátupivare visuapa eta juca máechajiriruva, ani macahe: “Náinajicayarehi eta tauriqueneana namutu ena tiámanahi eta máijare ema Nuchicha Jesucristo” macahepa.

<sup>20-21</sup>Eta tacahe, víti, ichape eta vijaneasiravayare tayehe eta tauriqueneana. Yátupiyarehi eta vicamunucarevaina mayehe ema Viya, vítauchirayarehi eta vicaemataneasira éma. Jéhesare, ichapenapa eta vimunavayarehi mayehe. Véperajicavayarehiséra mayehe tacutiyare eta náeperajisira ena rícoana eta nayereruvana táuriqueneanahi nayeheana jarra oro, nacurujana plata. Vahi náimipananajicáimahi. Vahi náimicutichaimahi eta apamuriana nayereruvana yucuquisiana: eta raveta, eta yuvaraqui, étapa eta nacasuelana mátejisiana.

<sup>22</sup>Eta tacahe, vahi picuehica eta natuhusivana ena amaperuquijiana. Tamutuhi najamuracha éna, nacaravahuhi jácani tauriqueneanahi. Pítisera pímiyanava eta táurivahi eta pítaresirahi. Táuri eta picasiñairahi ema Viáquenu. Yátupinavare eta pémunaraivaina. Pétupiricayareva eta náichavaqueneva ena achaneana. Énaina pitanuca pácachanevaca nácani pichamurianarichu tíuripanereranahi, taicha éna nacasamurehi ema Viáquenu tamutu sácheana.

<sup>23</sup>Énerichuvare vahi picujicapajiricavaca nácani navarahahi tiyaserecaviana eta súnsurupiana. Taicha pímatipahi ena nani eta nacahirana, étachucha natanuca eta semanereana. <sup>24</sup>Viti mavanarana ema Viáquenu, vahi

viúriha vímisiaparacavahíni tayehe eta semanereana. Táitsivasera vétaviuchayarehi eta viúriha eta nayehe namutu. Vicayeheyareva paciencia eta nayehe namutu ena achaneana. Vímiturahiyareva eta táuriqueneana. <sup>25</sup> Énaripa ena viánaranahi, tiúriyare eta véchajirisirayare. Vicuchapayare eta táetupirisiravaina eta napanereruana, máíjaracahini ema Viya nasuapiraina eta máechajiriruvana, <sup>26</sup> apaesa nacuchucuhavahini eta náchanevana eta tacaertairahi maicha ema Váinaraji. Taicha eta máiturusiravacahi éma, mavarahahi náitauchaya eta mavarahaqueneanahi éma.

### 3

#### *Ena achaneana téváinarajichavanáinapáipa*

<sup>1</sup> Eta apana eta juca nuvaraha péchayare. Puiti juca vicaijuheyare tavetijinapaipa eta táejeravayare nasamira ena achaneana eta náehisiraina ema Jesús. <sup>2</sup> Taicha tivayuchavainapa eta náichirayare eta najamuraraivana. Tavayuacainapa eta plata. Ticasiñavanainapa, navayuchayare eta náechajirisiravana. Tipanarahiana. Énerichuvare, masuápajiráirahánainapa nayehe ena ticachichana. Tájinainapa eta náitsirijirápinaya. Váipavare napicauchaimahi ema Viya, nasapihayarechucha nacaecahiyare éma. <sup>3</sup> Nájinapa náemunaruimahi. Nájinavarepa najapanuquenémahi. Téchajihianainapa. Vaipa téchajicacareanáimahi. Titupiarahianainapa. Nacatichainapa eta táuriqueneana. <sup>4</sup> Cáetemarrahiana. Mapicauruirahanainapa. Ticasiñavaváicanainapa. Náuricainapa náicha eta piesta, tasapihainapa napauchayare, vaipa émaimahi napauchaimahi ema Viya. <sup>5</sup> Nararihipuca ena tímijachavanainapa yátupinahini nácaijuhe ema Viya. Váhisera náunacaimahi eta máechajiriruvana, váhivare tísapavanaimahi máemetupirucha ema Espíritu Santo eta napanereruana.

Puítiripa nararihipa ena achaneana, étapa návacuha eta juca. Pérajicava eta nayehe ena nani. Vahi picuimisiapava nayehe. <sup>6</sup> Taicha nararihi ena achaneana tiyururahiana tépiyacavanapaipa tipaipicana te pétiana, nayurucavacapaipa nácani esenana máecharaireana. Ena nani esenana tisipecaturanahi, tavayuaruanahi eta tájiparacana. <sup>7</sup> Nametainipa ticaravahuanahi, tájinasera vahi nacaicutiaraimahi eta yátupiqueneana. <sup>8</sup> Puíticha ena nani tiyururashianahi, éna ticaecahiana eta vímiturapiana yátupiqueneana taicha máuripanerérurahiána éna. Tacutihi acane ena iápemareana ema Janes émapa ema Jambres tiácapaemachanahi ema víyarahaini Moiséini. Tímaticareanahisera eta namaimatirahi eta yátupiqueneana. <sup>9</sup> Váhisera camurianaimahi ena náiturevanaya, taicha ena achaneana náimatiacavaneyarehi eta náepiyahiraivana súnsurupianahi éta, tacutiyaehi eta náimatiasiravacahi acane ena achaneana ena nani apina iápemareana tiácapaemachanainihi ema Moiséini.

#### *Eta téquenha matuparacasivahi ema Timoteo mayehe ema Pablo*

<sup>10</sup> Pítisera péhicahi yátupi eta nímiturapiana. Picutinuhi eta núrivahi nayehe namutu achaneana, étaripa eta nupamisiravahi eta néhisirahi ema Jesús, nucasiñavahi yátupi mayehe. Picutinuhivare eta nucayeherahi paciencia, étaripa eta némunaraivahi, étaripa eta nucamichirahi tamutu. <sup>11</sup> Péchahivare eta náichiranuhi ena achaneana, eta nucatajivairahi náicha. Ichapemurihi eta napanajirisiranuhi eta te avasareana Antioquía Ichipichu, te Iconio,

étapa te Listra. Émasera ema Viya ticatiuchanuhi tayehe eta juca náichiranuanahi. <sup>12</sup> Énesera tacaheyarehi eta juca. Tímiyanavanayare tipanajiricahavianayarehi vimutu víti vivarahana véhica yátupi ema Jesucristo. <sup>13</sup> Énerichuvare, ena achaneana váinarajiqueneana tiápajucavainapa eta navainarajivanaya. Énerichuvare ena ticaetemarahlana, tiápajucavainapa eta nacaetemaravaya. Énajicacainapa ticaetemacacanayare.

<sup>14</sup> Pítisera pímiyanavahi eta péhisirahi eta juca pímitucasivanahi. Yátupihí pímercahi eta písuapirahi. Píti pímatihavirichuhi viti vímitucavianahi, nútiripa. <sup>15</sup> Piámavahi te amuyavichaha pímatihi eta Sagrada Escritura. Éta, tímitucavihi tayehe eta viúchucuiraya te apana vítaesira, táichavenehi eta visuapirahi yátupi ema Jesucristo. <sup>16</sup> Taicha tamutu eta Sagrada Escritura tásihaqueneanahi mayehe ema Viya. Jéhevarequene eta viviyihayare eta ticaravahucareana, eta vímitusihaya véchajisihayare ena achaneana eta viconsejachihayareva, vímitupiruchihavacaya tayehe eta táurivayare eta náitaresirana. <sup>17</sup> Tacahe, ena vichamuriana mávaháruana ema Viya téchemarahianayarehi, yátupi náitucayarehi tamutu eta náichiraya eta táuriqueneana.

#### 4

<sup>1</sup> Puiti nutuparacaviyare muraca te máijare ema Viya, émapa ema Viáquenu Jesucristo. Taicha éma, títecavaneyare eta macavacureiraya te juca apaquehe. Viti vítareruanachaha énapa ena náepenaqueneanaripa vicayaseserehinapa te mamirahu tájahahipuca eta vicaemataneasiranahi éma. <sup>2</sup> Eta tacahe, pímiyanavachucha picametarairu eta máechajiriruva ema Viya te jácani pítujsiravana. Vahi picúyacujiéquenehava. Pécatiacavacaicha muraca ena téjecapavanahi eta náeneuchirávaina. Piconsejachavaca. Pétumechavaca ena tiúripanereruanahi. Pácayehesera paciencia eta pímitusiravacaya namutu. <sup>3</sup> Taicha tatiarihiyare eta sácheyare ena achaneana vaipa nasuapaimahi eta vímiturapiana táuriqueneana, étainapa náichayare eta navarahaqueneanarichu. Natanucainapa ena nácani tímitucanayare tayehe eta tájiparacana, nacarichuinapa tisamacareanayare nayehe. <sup>4</sup> Tasapihainapa náepuruyare eta yátupiqueneana, nacaepaquecuinapa. Étasera eta náepiyapirua ena achaneana, tasapihayare eta tisuapacareyarehi nayehe.

<sup>5</sup> Pítisera pinasiyareichu tájina píchiravaimahi. Picamichayare tamutu eta picatajivairana. Pímiyanavachucha picametarairu eta máechajiriruva ema Viya. Pítauchayare eta pituparacasivahi.

<sup>6</sup> Puítisera, nútí tiánehipa eta nítaviraya te apaquehe. Nucutiripa eta yúcupi te títavayarepa témahayarepa, éneripa nucahehi nútí. <sup>7</sup> Váhiquene néñamavacare. Nítavavarerupa eta nuncanarairahi eta tamauriqueneana. Vahi nuvítaequenehahini. Nítauchahi eta nutuparacasivahi mayehe ema Viáquenu. Núnacahi muraca eta nusupirahi ema Jesús. <sup>8</sup> Puiti nútí étanecha nucuchapahi eta jena sácheyare eta máijarasiranuyare eta níjaracasiya me Viáquenu, taicha eta néhisirahi yátupi. Taicha éma, máítauchayarehi eta máijarasiránuyare eta nícuchihi mayehe. Váhivareséra nácarichuimahi nútí nucaijaracasiyare. Énerichuva máijaracayareva namutu nácani ticuchapanahi eta machaviraya.

#### *Ema Pablo máimichuha ema Timoteo*

<sup>9</sup> Pítátijirícavaicha eta pítesirávaneyare ani nuyehe. <sup>10</sup> Puiti tijunijicanuripa ema Demos, taicha tétavicavahi majamurachirahi eta mavaraha ticaimahaqueneayare te juca apaquehe. Tiyanapa macaijuhehi tayehe eta Tesalónica. Émasera ema Crescente, névatacahi te departamento Galacia. Énerichuvare ema Tito, névatacavare te departamento Dalmacia.

<sup>11</sup> Macarinehi nucachanehi ema Lucas. Pivenumapahi ema Marcos, máiteca ema apanavare. Tétavicavahi eta nucamunuirahi éma. <sup>12</sup> Ema Tíquico, nuvanecahi máiteca ara piyehe te avasare Efeso. Émainachaha pítsivaina. <sup>13</sup> Te píteca, pétavajicayarepahi te Troas, pivenuminanuya eta nuyehe capa nunaquiruhi mayehe ema Carpo, etapa eta nuyeheana libro, etapa eta apamuri ajumerucana.

<sup>14</sup> Numetacavivare eta máejecapiravahi ema Alejandro eta nuyehe; tétavicavahi eta macatichiranuhi ema maca herrero. Máimahainesera ema Viáquenu. Éma títirijiequenehayare eta máichiranuhi. <sup>15</sup> Eta tacahe, picunearchavaicha eta mayehe, taicha tétavicavahi eta macatichirahi eta vicametarairuirahi.

<sup>16</sup> Étaripa, te tínapucainapa nucatiuchavahi te mamirahu ena tuparairucana juéseana, nájina náimicatacanuhini. Namutuhi tijunijjicanuanahi. Tiuri, tacuijaseraini macuícharacáini ema Viya, maperdonachavacaini ena tijunijjicanuanahi. <sup>17</sup> Émasera ema Viáquenu tijaneacanuhi, tímicatacanuhi. Vahi máisapanuhini nanacacanuhi te tapena eta sárareana tinicarahiana. Nítujicavahi núchuca nuyana tayehe eta apanaqueneana avasareana, nucametarairuhi nayehe ena apavasaqueneana. <sup>18</sup> Ene tacaheyare eta máimiyansiravayare ticatiuchanu ema Viáquenu tayehe eta táíñehiqueneana. Tiámanuyarehi tayehe eta mávasa anuma. Máichecuaraquireyarehi eta vijirauchiraya éma. Amén.

*Eta táichecuaraqui eta máechajiriruva ema Pablo*

<sup>19</sup> Péchajisinanuvaca ema Aquila ésupa esu mayena Priscila, énapa ena machichanaveana ema Onesíforo.

<sup>20</sup> Émasera ema Erasto, nunaquicahi te Corinto. Émapa ema Trófimo nunaquicahivare te Mileto taicha ticajumahi éma.

<sup>21</sup> Pítecavanecha te tamirahuinarichaha eta muracana técatícava. Téchajicaviana ena vichamuriana ema Eubulo, ema Pudente, ema Lino, esu Claudia, énapa ena apamuriana vichamuriana.

<sup>22</sup> Núti nuyaseuchaviparaca me Viáquenu Jesucristo majaneacavihini tamutu sácheana, táetaviuchavaréni eta iúricarevaya emutu éti máicha.

Tamutupa eta néchajiriruvahi piyehe.



## **Eta macartane ema Apóstole Pablo mayehe ema machamuri TITO**

<sup>1-4</sup> Nuti Pablo, nucajurevi piti nuparape Tito. Némunacavihi tímicutijiricavahi nuchichavinahini táichavenehi eta péhisiranuhi eta nusuapajiraivahi mayehe ema Cristo. Nuvaraha macatajicavini ichape, májapanuvini ema Tata Vicaiyaquene, émapa ema Viáquenu Jesucristo, émaripahi ema Macatiurahiquene viyehe. Nájaracavini eta táurivaina eta pipanereruana.

Acane, eta táepaniravahi eta juca apaquehe, ema Viya macametarapihi eta májarasirahaviya eta vítaresiraya máichecuaraquireyare. Ene tacaheyare, taicha ema Viya tájina máepiyahiraivaina. Puiti, títecapauchahaviripa eta sache mácutiarahi ema Viya, eta májarasirahaviripa viti apóstoleana eta máechajiriruvana, étaripa vémechaquenehi puiti ena achaneana. Tacahe, núti mavanaranuhi ema Viya. Manerejirunuhi ema Jesucristo, ema Macatiurahiquenehi viyehe. Tituparacanuhi nítauchayare núti eta námirayare eta máechajiriruva. Tivanecanuhi eta nímitusiraya ena apamuriana manerejiruana ema Viya eta nasuapajiraivanayare, mavarairahi náimatiequeneha tamutu eta tímitucacareana yátupiqueneana apaesa tauri eta náitaresiraina. Tacahe, nacunevaina eta jena sáchehare te májaracahavipa eta vítaresiraya máichecuaraquirénapa.

### *Eta macatuparahaira ema Tito*

<sup>5</sup> Péchavarichuhi te nunaquicavinapa eta te tiúrupuhi te mar ticaijare Creta. Nutuparacavihi pítauchayare tamutu eta numaitaureanahi. Eta nutupararuvihí pinerejicaya ena pinacaqueneanayare eta návacureanaya ena pastoreanaya téchapajiricanayare nácani náijamuripachu tisuapajirahiana.

<sup>6</sup> Nayehepachuina pastor, tacamunusera mácani achane maoporavare eta máitaresira. Mácani, ésunarichuhi esu mayena. Tisuapajirahianahivare ena machichanaveana. Tacuija natapiravaina. Tisamarahiana éna. <sup>7</sup> Taicha tacamunu matapiravarena nácani pitupararuayanayare; taicha éna, tuparairucanayarevare mayehe ema Viya. Mácani, tímitucacarehi. Mácani, vahi tisemarairihi. Váhivare tavayuaruina eta téracare. Váhivare macueharahi. Váhivare tijamurarahi. <sup>8</sup> Mácanisera achanesamure tijacaparahi nácani tichimarachana. Máurica macachane ena tiúripaneréruana. Mácani, máituca tipanerereca. Mácani, títaurahi tamutu nayehe ena achaneana. Mácani, macaijuhe ema Viya, títaurahihivare mayehe. Mácani, táuriquene eta macaratasirava. <sup>9</sup> Énerichuvare tacamunu ema mácani tisuápajiráhiquene tayehe eta vímiturapiana tisuapacareana, apaesa éma táurivare eta máimituresiraina. Taicha tacamunu eta májarasirayare eta natumevaina ena tisuapajirahianahi. Tacamunuhivare eta macajimuyasiravacaina ena nácani ticatianacandarichaha eta máimiturapiana. Májaracainavare eta nasuapajiraivaina.

<sup>10</sup> Taicha nararihi camuriana ena titupiarahiana. Náetaviucha eta náechajiricavarasivana, tivayuarahiana éna. Nararihi ena nujaneanana tiápajucavana eta natupiaravaina. <sup>11</sup> Picamatinacayare ena nani. Vahi picuisapa eta náimitureca eta tauriqueneana, machu náemejecapavacha ena vichamurianahi. Taicha vahi táuricacarehíni eta náimiturapiana. Ena nani náichahi eta juca taicha navarahahi navereacavaca eta naplataneana.

<sup>12</sup> Matiarihinihi ema nayehenihí profeta najaneanaichu ena cretenseana. Macahehi eta máechajiriruvahi nayehe: “Ena nujaneanana cretenseana,

tépiyahirahiana éna. Tíñehi eta náichaquene nacuti eta sárare tíñehi. Cánisiuquiana. Plújuanavare éna” macahepa éma. <sup>13</sup> Yátupi tacahehi eta náitairesirahi puiti ena cretenseana. Eta tacahe, pituparacaicha muraca ena vichamuriana cretenseana, apaesa vaipa nacuaquipaicava tayehe eta tájiparácana. Tauri eta náehisira eta véhiruhi. <sup>14</sup> Vaipa nacusuapa eta náimiturapiana navayuarapiana ena nujaneanana israelítana. Machu nacusuapa eta náimiturapiana ena nácani navaraha tihapapiricavaca ena vichamuriana eta náehisira eta yátupiqueneana tímitucacareana.

<sup>15</sup> Ena tipachinanahi te napanereruana téhepa nasamureana, éna ena nani nacaijuhe eta táuriqueneana taicha náurica eta nasamararasira tamutu eta táuriqueneanahi. Énasea ena masupajirairahana váinarajipanereruana, éna vahi táurihini nasamira eta tíuriana echajirirucava yátupiqueneana. Taicha tachipejiquenehi tamutu eta napanereruana, muracasamureanapa táicha. Tájina nasamahini eta tamaurivahi eta náichirahi. <sup>16</sup> Éna nacahehi: “Véhica ema Viya”. Tímaticareanahisera eta namáehisirahi ema Viya, taicha náicharichucha eta tamauriqueneana tíñemahiana. Émasera ema Viya macaticha tamutu eta juca náichaqueneana táíñemahiqueneana. Ena nani, masupajirairahanahi eta mayehe. Tájinasea vahi náituruéquenehaimahi ena nani náichahini eta táuriqueneana.

## 2

### *Eta yátupiquene vímiturapiana*

<sup>1-2</sup> Pítisera pímiturecaya tamutu eta táuriqueneana. Ena víarahana ichanaruana, pímitucayareva eta najaneasiravaina eta náitairesira, náitaurahivaina, náitusiraina tipanererecana, nasuápajiráhiquenéna tayehe eta mavanairipiana ema Jesucristo. Náemunarahi nayehe ena achaneana. Yátupina eta nacamichiraina tamutu. <sup>3</sup> Énerichuvare ena vénarahana ichanaruana, pímitucayareva éna tauri eta náitairesiraina taicha éna, tuparairucanahivare mayehe ema Viya. Vaipa téchajihianaimahi. Váhivare tacuvayuaca eta téracare. Náimiturahisera eta táuriqueneana. <sup>4</sup> Náimitucayareva ena amaperuana esenana apaesa náituca eta náemunasiraina ena náimanaveana énapa ena nachichanaveana. <sup>5</sup> Náitusirayareva tipanererecana. Napicaucha ena náimanaveana. Nasuapajirahivare nayehe. Napicauchacare nacaenacare te napenana, náitusiraina náechapajirica eta nayereruvana. Náurivaina éna, apaesa tacuija náechajisiacarevaina tayehe eta náehisirahi eta máechajiriruva ema Viya.

<sup>6</sup> Énerichuvare piconsejachayare ena amaperuana ajairana, yátupina eta náitusiraina tipanererecana. <sup>7</sup> Tamutu eta juca, pinaquipairuyare píti eta piúrivaina, apaesa étaina náehica ena vichamuriana eta piúrivahi píti. Étanarichu eta pímiturapiya, vahi pihapapicaimahi eta pímitucasivahi. Váhivare picuitsivacha. Tapicauchacare eta pímituresiraya. <sup>8</sup> Táuri eta pímimehapisirayare eta jácani péchajirisiravanaya, apaesa tacuija nacuviyava eta nacaecahiravina ena piánaranahi, titsirihavianayarechucha táicha.

<sup>9</sup> Piconsejachayare ena músuana eta nasuapajiraivaina nayehe ena náquenuana. Náitaucha támutu jácani navarahaqueneana ena náquenuana. Vahi nacujicapairihi tayehe eta vanairipiana. <sup>10</sup> Váhivare nacuavijaca eta nacayehequeneana ena náquenuana. Yátupina eta nacasiñacarevaina tayehe tamutu eta natuparahanahi. Náimereca yátupina eta náurivaina apaesa tajamurachacare eta véhiruhi, étarichuhi eta vímiturapiana mayehe ema Macatiurahiquenehi Viya.

<sup>11</sup> Ema Viya, acaneripa eta majapanuirahavihi vimutu viti achaneana. Eta tacahe, máimitesinahavihi puiti ema Machicha eta macuchucuirahaviya. Eta juca tímicaecherachahi víti eta majapanuirahavihi ema Viya. <sup>12</sup> Puiti ema Viya mavaraha eta táuri eta vítaresiraina te juca apaquehe. Mavaraha yátupina eta vítusiraina vipanerereca, étapa eta vítauraivaina tamutu nayehe ena achaneana, étapa eta vítauraivaina mayehe ema Viya. Vaipa víchaimahi eta tájiparacana tamauriqueneanahi. Váipavare víchaimahi eta tajamura-chaqueneana eta viáquehe. <sup>13</sup> Tásiha, vicunevainapa eta machavirayare ema Viáquenu Jesucristo ema Macatiurahiquenehi viyehe. Eta máitesiraya mámayarepahi eta tapachinaquene majaraiva. Tétavicava eta viúrisamurevainapa te jena sáchezare. <sup>14</sup> Éma, máepeninahavihi, mavarairahi macaichepaicaya tamutu eta víchirahi eta tamauriqueneanahi. Máepachinachayare tamutu eta tamaeperajivana eta viáchanevana. Taicha mavarahahi machaneraquenehaviyare. Tacahe, puiti vivapinavayarehi vicha eta táuri queneana.

<sup>15</sup> Tiuri, pímitucayare eta júcana nutupararuvianahi, tamutu piconsejachavacayareva ena achaneana. Tijuricati natiarihi navaraha téjecapavana, picortachavaneyare. Pétumechava eta pímitusirahi taicha eta pituparacasivahi. Piúriyare eta pítaresira apaesa námutu napicauchavi, váhivare nacuepuru eta pituparahahi.

### 3

#### *Eta vítaresira viti véhicana ema Cristo*

<sup>1</sup> Pémechayareva ena vichamuriana eta nasuapiraina ema ichapequenehi aquenuca, tásiha, énapa ena tuparairucana. Énerichu pémechavare ena vichamuriana énaína nápajucava eta návanacare tayehe jácani ematane-canaya. <sup>2</sup> Vahi nacuechajica nayehe nácani achaneana. Váhivare nacumehareca. Váhivare nacutupiarahi. Mánsuanáinasera, najapanurahi nayehe ena achaneana.

<sup>3</sup> Víti, acane eta masuápajiráirahahavirichaha, vimáimatiéquenehahinivare. Víchahi tamutu eta tájiparacana tavarahaqueneana eta viáquehe. Tétavicavahi eta viváinarajívainihi eta vítaresirahi. Vicapinarurahini. Vímicatichavainihi nayehe ena achaneana. Vicatianarahinivare nayehe éna. <sup>4-5</sup> Puítisera, vaipa vácahehini, taicha máítsivacharipa eta vítaresira ema Macatiurahiquenehi Viya. Émasera, tétavicava eta máuriva eta viyehe. Témunacahaviripa. Váhinéni víchahini eta táuriqueneana, tijapanuhavisera éma. Masipacaipa eta visamureana, máquijicaipa eta tamauriqueneanahi eta viyehe. Énerichuvare tíjaracahavipa ema Espíritu Santo. Ema Espíritu Santo máítsivachinahávipaipahi eta vítaresira, tímitucahavipa eta viúrivayare eta viyehe-repiyare. <sup>6</sup> Tétavicavahi eta viúricarevanahi maicha ema Espíritu Santo máíjararuihi ema Jesucristo Macatiurahiquenehi eta viyehe. <sup>7</sup> Majacapahaviripa ema Viya, tiásihaquenehi eta máemunasirahavihi ichape. Énerichuvare timetacahavihi eta máíjarasirahaviyare eta vítaresiraya máíchequaquirénapa. Tásiha, vivapinavahi víti eta vicuneiravahi eta jena sáchezare.

<sup>8</sup> Yátupiquenehi tasuapacareva eta juca vímitucasivahi. Eta juca néchajisihagueneanahi puiti, nuvaraha pímitucayare tamutu sácheana apaesa náimiyana naicha eta táuriqueneana ena vicutiqueneana tisuapajirahiana me Viya. Tétavicavahi táuriva eta vímiturapiana. Tájina táichiravaina, taicha eta juca tíjaracarahi eta náurivaya nayehe namutu ena achaneana. <sup>9</sup> Puíticha nararihi ena tisuapanarichaha eta nahapapiruanahi nayehe-repiana ena viáchucanaveánaini. Te návarahapuca náevataemachavi, vahi picujicapajiricavaca, taicha súnsurupianachucha eta nayasereruvianaya.

Váhivare picuimicasiapava nayehe nácani tiyunacana eta mayeherepiana ema Moiséini. Te navarahapuca nácani ticajachaviana, vahi picujicapa. Pihapapicayaresera eta tajuricatira eta nasemanevanahi. Técativachucha éta.

<sup>10</sup> Te matiarhipuca ema mácani mavaraha mahapapica eta napaneruana ena vichamuriana, pímicuhayare picórtachávaneya eta mapaneruhi. Te apihequenénapa eta pímicuha, te máviraichu vahi macusuapavi, pévatacayare mayana máuchuca. <sup>11</sup> Taicha tímaticarepahi ema achane eta mamaimitucacarevaya. Étavenérahí eta mapecaturana táimicuñacaya.

*Eta téqueneha matuparacasivahi ema Tito mayehe ema Pablo*

<sup>12</sup> Tiúri, névatacayare pítsivayare ema Artemas eta ara piyehe, téhesera émapuca névataca ema Tíquico. Te máitecapauchavipa ara piyehe, pítecávanezare ani nuyehe te juca avasare Nicópolis, taicha nunasiyarechaha ani.

Nuvaraha táetavicavanúmachaha eta muracana técativava, nupaenumavainapa nuyanaya. <sup>13</sup> Énerichuva títecapauchaviya ema vichamuri abogado Zenas, émapa ema vichamurivare Apolos. Pímicatacavacayare éna eta nayanirayare. Péchapajiricayare éna, te náechuriapuca eta napaisiraya. <sup>14</sup> Pímitucayare ena vichamuriana eta achanesamurevacaina, máejeraréna eta nacajiraivaina nayehe ena achaneana. Yátupina náitaucha eta nacamunucarevanahi.

<sup>15</sup> Téchajicaviana namutu ena natiarihiqueneanahi nuyehe. Tásiha, péchajisinanuya namutu ena némunacasáreana vicutiqueneana eta visuapajirivanahi mayehe ema Viya.

Nuyaseuchaheparaca emutu éti me viáquenu Jesucristo, táetaviuchahini eta iúricacarevaya máicha.

Tamutupa eta néchajiririvanahi piyehe.

## **Eta macartane ema Apóstole Pablo mayehe ema machamuri FILEMÓN**

<sup>1</sup> Nuti Pablo tapresuchaquenenuhi eta néhisirahi ema Jesucristo, puiti nucachane ema Timoteo eta vicajureravihi eta carta piti Filemón, vichamurivihahi vémunaruviquenehi tayehe eta vématanerepianahi. <sup>2</sup> Vémechajisihavare namutu ena vichamurianahi tiúrujicavarahanahi te pipena. Péchajisinhavivare esu vichamuri Apia, émapa ema Arquipo, vicompañeroquenehi muraca tayehe eta vématanerepianahi. <sup>3</sup> Nuvaraha macatajicahehini ichape ema Tata Vicaiyaquene, émapa ema Viáquenu Jesucristo. Náijaracahehini táurivaina eta epanereruana.

### *Eta máurivahi ema Filemón*

<sup>4</sup> Néchaviparaca te nuyujarasirana, nuhasulupayachahi ema Viya. <sup>5</sup> Taicha nusamairiricahi eta pímiyanirávahi pémunaca ema Viáquenu Jesús, péhicahi yátupi. Pémunacahivare namutu ena machanerana ema Viya. <sup>6</sup> Nuyaseuchavacahi me Viya nayehe namutu ena téhicavianapaipahi táichavenehi eta náimairahi eta pisuapirahi yátupi. Nuvaraha nácaicutiaraquenénaini muraca tamutu eta táuriqueneana máijararuhavianahi ema Cristo Jesús. <sup>7</sup> Ichaperinehi eta núrísamurevahi picha piti nuparape. Tijarahinehi picha te nusamure eta nusamairirisirahí eta pímiyaniravahi pémunacavaca yátupi ena vichamuriana, étapa eta picurísamurechiravacahi ichape éna.

### *Ema Pablo máchejiucha ema Onésimo mayehe ema Filemón*

<sup>8-10</sup> Tiuri puiti, nuvaraha néchajiucha ema Onésimo. Picatajicanu piperdonachinanu éma. Núti yátupiquenenuhi mayehenuhi apóstole ema Cristo. Tituparacanuhenéni nuvanecavihini. Étasea eta vémunasiracacahi, nuyaseacavi nuti paure ichavica, nucaerataquenehi puiti máichavenehi ema Cristo. Puiti éma, nuchichahi némunaruquenehi te juca cárcel taicha éma téhichaviripa eta visuapirahi ema Jesús.

<sup>11</sup> Ema maca Onésimo, cape juca másinequenehi, vahi máitaurahini eta picamusurairahi. Tijunahivare. Púitiserá éma, ichaperinehi eta máitátiranuhi. Eta máitátiranuhi núti tacutiyare eta máitátiraviyareva píti apana. <sup>12</sup> Puiti névatacayare éma eta ara piyehe. Picatajicanu pijacapanuyare táimicutijiricava nútinayarehi nítecapauchavi piyehe. <sup>13</sup> Nuvarahahineni mánasihini eta ani nuyehe. Émainahini pítsivainahini eta pivarairahi píteca pítátinuya eta návihairahi te juca cárcel táichavenehi eta nucametarairuirahi eta máechajiriruvana ema Viya. <sup>14</sup> Nuvarahahineni níminasicha éma, nucuchaphisera tájahapuca picayemayare píti. Váhisera nuvaraha nupamicavi eta juca picatajisiranuya, nucuchapayare eta pijicapiranuyare. Nuvaraha étachucha tásihaqueneyarehi eta táurivaina eta pipanereru. <sup>15</sup> Táitaurevaquene tijunijicavihi ánipi ema Onésimo. Émarichuserapuca jácani ema Viya tásihahi máisapahi eta macaheyarehi ema Onésimo. Púitiserá tétupiricavapa éma. Márajapainapa tichavayare eta ara piyehe, aparahinapa eta máitátiraviya. <sup>16</sup> Váipa tácutimahi cape juca másinequenehi. Puiti pímahainapa eta máurivayare macamunucarevayare eta piyehe, taicha váchupa puiti vichamuripahi éma te mavahuana ema Viáquenu. Núti, ichape eta némunasirahi ema maca. Énénapa picaheyare píti apanava, tiápajucavainapaipa eta pémunasiraya ema maca.



<sup>17</sup> Te yátupina pémunacanu eta nuchamurivírahi, pijacapinanuyare éma táimicutijiricava nútinayarehi pijacapa. <sup>18</sup> Te tatiarihinapuca eta máejecapiravahi piyehe, ticantevehipuca, nútinarine picobracha. <sup>19</sup> Nuvachachaviyare núti. Nuti Pablo, nútiquenehi nájuchahi eta nufirmachirahi puiti eta nuvachachiraviyare. Nuvarahahinéni némechavi píti apana eta pintevehi nuyehe eta nucatiuchiravihi. <sup>20</sup> Tiuri, nuparape, picatajicanuchaha eta juca nuyasearuvíhi táichavenehi eta nucachamurivirahi mayehe ema Viáquenu. Picurisamuréchanuya.

<sup>21</sup> Németeaca vahi táéñamavacare eta juca pisuapiranuyare. Eta tacahe, nucajurevíhi puiti. Taicha néchahivare eta vahi tácarichuimahi pítauchaya eta juca nuyasearuvianahi. Tatiarihiyare jácani apanayare píjararuvanayare píti tásihaqueneyare te pisamure. <sup>22</sup> Énerichuvare nuvaraha pétupirisinanuya eta nítecapihaya. Étanecha nucuchapahi eta tasamacarevaina eta eyujaracasana me Viya eta nútujisiravaina nítecapauchahe.

*Eta táichecuaraqui eta máechajiriruva ema Pablo*

<sup>23</sup> Téchajicavi ema Epafra, ema nucompañerohi te juca cárcel, tapresuchaquenehivare ema apana eta véhisirahi ema Jesucristo. <sup>24</sup> Énerichuvare téchajicaheana ena apamuriana vicompañeroanahi tayehe eta vématanerepianahi: ema Marcos, ema Aristarco, ema Demas, émapa ema Lucas.

<sup>25</sup> Nuyaseuchararaca ema Viáquenu Jesucristo táetaviuchahíni eta iúricacarevaya máicha.

Tamu tupa.

## **Eta apanavare carta nayehe ena israelítana téhicanahi ema Jesús, ticaijare HEBREOS**

### *Emá Jesús títametacahavi eta máechajiriruvana emá Tata Vicaiyaquene*

<sup>1</sup> Acane eta náitaresirahi ena viáchucanaveanaini, natiarihihi ena camuri-queneana santo profetana mavanaranahi emá Viya. Éna, náitametacahi ena achaneana eta máechajiriruvana mapanereruanahi. Ichapemurivare eta náimeresirahi eta máitupajijiasiravanahi emá Viya. Apanapanenéjivare eta náimituresira eta máechajiriruvana. <sup>2-3</sup> Puítisera viti vítareruanahi puiti juca áñoana, emá Viya mavanecahi emá Machicha eta viyehe, títametacahaviya eta táequenereruana mapanereruana. Emá maca Jesucristo, Víyahivare éma, taicha machichahi emá Viya. Acane émahí tépiyacahi eta apaquehe, eta anuma, étapa eta vímahaqueneanahi puiti, máitauchirahi tamutu eta mapanereruana emá Maiya. Émarichuvare ticatuparahahi me Maiya eta émahí téchahi tamutu. Puíticha émahí téchahi tamutu, máetaviuchahi eta máitupajijiasiravahi. Emá Cristo ticayehéhi eta majaraivahi máijararuhi emá Maiya. Eta máucupaisirahi eta viyehe, tímimaticahavipa eta máurivahi emá Maiya. Tásiha, te tamutupa eta macaepahairahi eta vipecaturana vimutu viti achaneana, tichavapa te anuma. Ánaqui emá Maiya macaejacapa te mayehe trono te mavaure.

### *Emá Cristo, éma ticapicahupanahi nayehe ena ángeleana*

<sup>4</sup> Tacahe, emá Cristo, éma ticapicahupanahi nayehe namutu ena ángeleana, taicha emá Maiya máijaracahi eta ichapequene mávacurehi ticapicahuhi. <sup>5</sup> Taicha eta máechajiriruvahi emá Viya mayehe emá Cristo, ani macahehi: “Píti yátupiquenévihi nuchicha. Puiti nucaejacavihi te piávacure” macahepa. Tacahe, ena ángeleana, tájina vahi máichahini: “Píti nuchichavi”. Váhivare máichahini: “Núti picaiyaquenehi”. Emá Viya máechajisihahi emá Cristo, ani macahehi: “Emá maca, emá yátupiquenehi nuchicha, taicha nútiquenenuhivare máiyánu” macahepa. <sup>6</sup> Tacahe, te macucupaicapa emá macarichuquene Machicha te juca apaquehe, macavanairipipa eta natsiusirayare nacunachirayare namutu ena ángeleana. <sup>7</sup> Énasera ena ángeleana, táechajisihahi eta Sagrada Escritura, ani tacahehi: “Éna ángeleana vanairucanachucha éna. Nacutihi eta técaticava eta najuricativa te ticavanahiana. Nacutihivare eta yucu eta nasipasirayare jácani tamaeperajiqueneana” tacahépa eta Sagrada Escritura. <sup>8</sup> Ánisera tacahehi eta táechajisihairahi emá Cristo: “Píti yátupiquenevihi Viya. Máitavacacayarehi eta aquenucavirayare. Tétavicava eta tatupiruvairayarehi eta pivanairipi. <sup>9</sup> Píjaracayarehi eta táurivayare eta náitaresira ena achaneana tíuriana tisuapavianaya. Énerichu píjaracayare eta náicuñayare ena achaneana váinarajiana masuapajirairahanahi eta piyehe. Eta tacahe, emá Tata Vicaiyaquene, emá Ticachichavihi, tíjaracavihi tamutu eta picapicahuirayare nayehe ena pichamuriana téhicanvianahi. Tétavicavahi eta náurisamureva pícha”. <sup>10</sup> Ánivare tacahehi: “Píti yátupiquenévihi Viáquenu. Píti pítucahi eta táimahiyare eta táepaniravahi eta apaquehe étapa eta anuma, pépiyaruana te pivahuana. <sup>11-12</sup> Tayanapane títavayarehi tamutu eta juca vímahaqueneanahi, ichasipaipahi tacutipaipa eta táichasivapaipa eta vimuiríha. Pítisera pinasiyarehi. Te pímahapa

táuricapa eta pítsivachiraya tamutu, máejerareyarehi pícha. Picañapupujicainapa tamutu. Taicha píti, máitavacacaviyarehi eta pítaresirahi” tacahepa. <sup>13</sup> Jararihi eta apana máechajiriruvahi ema Viya, ani macahehi mayehe ema Cristo: “Yare, péjaca te nuvaure, eta picuchapihayare eta nucaepuyusiraya te pimirahu ena ticatianacavianahi” macahepa. Énaserá ena ángeleana, tájina vahi máichahini: “Péjaca ani te nuvaure”. <sup>14</sup> Taicha ena ángeleana, mavanaranahi ema Viya. Éna, espírituanahi. Vahi énajivainahini nacapicahuhini. Eta natuparahahi éna, tijaneacahavianaya víti macuchucureanayare ema Jesús.

## 2

### *Tacamunuhi eta vipamisirava tayehe eta véhisirahi ema Jesús*

<sup>1</sup> Eta tacahe, tituparacahe yátupina eta ecaravahuiraya eta ímitucasique-  
neanahi, machu émitisica, machu étaina taviuchahe vahi iúchucuhahini.  
<sup>2</sup> Eta acane, ena ángeleana, éna tímitucanahi ema víyahaini Moisés eta  
vanairipiana. Tétavicavahi eta tasuapacarevahi. Ticaicuañavaneanahi ena  
téjcapavanahi, timasuapanahi eta nasamaquenehi. <sup>3</sup> Puiti numetacahe:  
Tisuapacarepanahi eta véhiruhi. Tájina vahi ticaiticahémahi eta ícuñayare  
te váhipuca ecucamapuravahi eta iúchucuirayare. Taicha émarichuhi ema  
Viáquenu tínapucahi máichuhavacahi ena achaneana eta náuchucuirayare. Tac-  
ahe, ena tisamanahi éma, tíchuhahavianapa víti. <sup>4</sup> Énerichuvare, ema Viya  
máimerecapahi eta tiáramicareana, máicutiaranahi eta émarahi vanairuca,  
mavarairahi tisuapacareyarehi eta nametarapiana. Énerichuvare puiti ema  
Espíritu Santo, éma tíjaracahavihi eta vítucaquenepachuyare apaesa vítaucha-  
yarehi eta vématanerepipachuhi víjarahi máicha.

### *Ema Jesucristo, achanehi eta máimahi eta máitesirahi te vitaracu*

<sup>5</sup> Ema Viya, váhivare énainahini matuparacavacahini ena ángeleana eta  
énairayare téchanaya eta arairuyare avasare eta vicuchapaquenehi, étaripa  
eta véchajisihaquenehyarehi. <sup>6</sup> Eta Sagrada Escritura, ani tacahehi eta  
táechajiriruva: “Piti Tata Viáquenu, tétavicavahi eta pijapanuirahavihi viti  
achaneanasami. Víti, váhinéni táunahini eta vítaresirahi. Váhivare véñama-  
carehini. Pítisera péñamavahi eta viyehe, váhivare pémitisicahavihini viti  
pépiyaruanahi. <sup>7</sup> Te pépiyacapa ema viáchucaini Adán, vahi mácutinasivacahini  
ena ángeleana. Ena, nacachuricahi éma eta náitupajijiasiravana. Váhisera  
tánasimahi eta nacachuriasirahi. Taicha pijapanuhavihi viti mámarieque-  
nehana ema Adán. Píjaracahavihi eta viávacurehi tajarahiquenehivare, tétavi-  
cavahivare eta vicapicahuirahi. Aquenucahavihi pícha. Véchahi tamutu  
eta pépiyaruanahi. <sup>8</sup> Visuapacarehi viti tamutu eta pituparasirahavihi”  
tacahepa eta Sagrada Escritura.

Tacahe, téchajisihavihi eta Sagrada Escritura eta véchirahi tamutu  
eta máepiyaruanahi ema Viya, tájina ticaejeraimahi, maicha ema Viya.  
Vuíchahasera vímahahini vicayamuricahini tamutu táichavenénahini eta  
visuapacarevahi. <sup>9</sup> Mararihisera ema Jesús. Tiúcupaicahi ánipihi te juca  
apaquehe, nacachuriacaripa ena ángeleana eta náitupajijiasiravana. Eta  
máemunasirahavihi vimutu viti achaneana, ema Viya máimicapacari-  
chahavare te crusu vítivenehi. Téhesera te táequenepa, macaejacapa ema  
Jesús tayehe eta tajarahiquene mávacurehi tacapicahuquene, táitsivahi eta  
macatajivairahi eta máepenirahi.

<sup>10</sup> Ema Viya émarichuhi téchahi tamutu. Ema, tétavicavahi eta máechema-  
raivahi eta manerejisirahi ema Machicha eta macuchucuirahaviyarehi,

tiámahaviyarehi eta te mávasa, viti machichanayarehi. Émaripa ema Jesús, eta macamichirahi tamutu eta mátajivana, títauchavahi tamutu eta matuparahahi. <sup>11</sup> Eta máepachinachiraripa eta viáchanevana, visiapamurihaipa ena machichanaveanahi ema Viya, vicutiripa ema Jesús eta machichairahi ema Maiya. Eta tacahe, ema Jesucristo, ichape eta máurisamurevahi eta viyehe eta majacapirahavihi maparapehaviyare. <sup>12</sup> Eta te Sagrada Escritura, ani tacahehi eta máechajiriruvahi ema Cristo: “Nuvapinava eta néchajisihairaviyare, Tata, nayehe ena nuparapenaveana. Nuvaraha nujirauchaviyareva, nacachanenuhivare éna”. <sup>13</sup> Ánivare tacahehi: “Tétavicava eta nucasiñavairahi mayehe ema Tata Nucaiyaquene”. Eta apana, ánivare tacahehi: “Ani návihahi núti, énapa ena pichichanaveanahi, ena pinerejiruanahi píjararunuanahi piti Tata” macahepa.

<sup>14</sup> Viti achaneana, étanarichuhi eta vicaechera etapa eta vítine. Ene macahehi ema Jesucristo, macaechehi, macaitinehivare étarichuhi tacutihi eta vítine víti. Eta tacahe, eta máepeninahavihi, macapaquechihayarehi ema Váinaraji, émarichuhi muracaquenénihí eta máitupajijiasiravahi eta macapareresirahi. <sup>15</sup> Viti achaneana, ichapequenénihí eta vipisirahi eta vépenirayarehi, taicha vipicahi eta vícuñayare. Eta vipisirahi tahapapiricahi eta vítaresira. Émasera ema Jesucristo macaepaharipa eta vícuñayarehini, vaipa tápicacarehini eta viyehe. <sup>16</sup> Éma, eta máitesirahi, vahi étainahini táimitecahíni eta máimicatasiravacayarehi ena ángeleana. Yátupihisera viti achaneana, víti máimicataruanayarehi, taicha eta vicasiñavairahi eta mayehe, vicutirahi ema víyarahaini Abraham eta macasiñavairahi me Viya. <sup>17</sup> Eta tacahe, eta máucupaisirahi ema Viáquenu, tatuparacahi macaqueheyarehi eta viáquehe eta máitaresirahi, ticutihaviyarehi viti maparapenaveana te tamutu eta vítaresirahi, yátupiyarehi eta máetaviuchiraya eta majapanuirahaviya, máetaviuchayareva eta macasiñacarevaya eta viyehe. Taicha macarichuhi ema tiyaseuchahaviparacahi te mamirahu ema Viya Macaiyaquene, macaepaháinahaviyarehi eta viviurevanahi táichavenehi eta vipecaturana viti achaneana. <sup>18</sup> Ema Jesús, ichape eta macatajivairahi, macaitsamarajiquenehi ema Váinaraji. Macamichahisera tamutu, vahi máisapavahini. Tásiha puiti, éma marataha tímicatachaviyare víti eta vicamichirayare eta viátajivana táichavenehi eta macaitsamarajirahavihi ema Váinaraji.

### 3

*Éma Cristo tiápajucavahi eta macunachacarevapanahi mayehe ema víyarahaini Moisés*

<sup>1</sup> Nuvaraha numetacaheya eta apana, eti nuparapenaveana máepachiaruanahi ema Viya, máichuhaqueneanahivare eta esiapiraya eta mávasa. Nuvaraha epanerecha apaesa ácaicutiara eta táetaviuchirahi eta máitupajijiasiravahi ema Jesús. Éma, yátupihí mavaneruhi ema Viya eta máimitusirahaviyarehi eta juca véhiruhi. Macarichuhi ema tiyaseuchahaviparacahi te mamirahu ema Viya. <sup>2-6</sup> Ema Jesús, tétavicavahi eta máitauchirahi tamutu eta mavanahiana matuparacasivanahi me Viya. Énerichuvare ema víyarahaini Moisés, títaurahivare eta mavanahi eta maconsejaraivahi, máimitusirahivare ena achaneana tamutu eta mavanairipiana ema Viya. Énerichuvare máechajisihahi tatiarihiyare eta apana mapanereruana ema Viya vuíchahasera máimerecahíni ema Viya. Émasera ema Jesucristo, ema tiápajucavapanahi eta macunachacareva, macachuricahi ema víyarahaini

Moisés. Ticunachacarepanahi taicha machichahi ema Viya, ticatuparaha-hivare téchahavihi vimutu viti machanerana ema Viya. Émasera ema Moisés vanairucaichucha. Ema Moisés máichuhavacahi ena achaneana. Émasera ema Jesucristo, émahí tépachinachahi eta viáchanevana viti machanerana, tihetamurichahavivare. Víti yátupihí machanerahavihi, te vímiyanava eta juca véhisirahí éma, vicasiñavavare eta mayehe, viúrisamurevare eta vicuchapirahi eta viúchucuiraya te jena sácheyare.

*Ema Viya tícuchahavihi eta vinarasihayare viti machaneranahi*

<sup>7</sup> Eta tacahe, nuvaraha ejaneacava. Ema Espíritu Santo, ani macahehi eta máechajiriruvahi tayehe eta Sagrada Escritura: “Puiti jena sache, esamayare esuapayare éti eta numetarapiana núti. <sup>8</sup> Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apaquehe. Ichape eta namasuapajiraivahi eta nuyehe, náetaviuchirahi eta nacaitsamarajiranuhi núti. <sup>9</sup> Tétavicavahisera eta nucamichiravacahi eta namasuapajiraivahi. Cuarenta añoripahinéni eta nímechiravacahi eta tiáramicareana níchaqueneanahi, váhisera nasuapanuhini. <sup>10</sup> Eta tacahe, te táequenepa, nusemapa nayehe ena nani achaneana. Taicha éna, táetaviuchahi eta táejecapiravahi eta nasamureana. Vahi návarahahini náimatihini eta táurinaquene achene, nuvarahaquenehi nímechavaca. <sup>11</sup> Núti nétupiricaripahi eta náicuchihi nanarasihayarehini eta nuyehe. Tétavicavahisera eta náimiyusemasiranuhi. Tásiha, nucahepa núti: Ena nánitátaji váhiquene nasiapaimahi tinaracanaimahi eta nuyehe” macahepa ema Espíritu Santo.

<sup>12</sup> Eta tacahe, nuparapenaveana, nuvaraha ejaneacavayare yátupina. Machu éhica eta napanereru ena masuapajirairahana, machu emutserahava íminajicava eta éhisirahi ema yátupiquenehi Viya Vicaiyaquene. <sup>13</sup> Étumechacacayaresera nayehe ena apamuriana echamuriana támutuhi sácheana puiti juca vicaijuheyare, apaesa nacuija navayuaca ena tivayuarahiana tayehe eta pecatu, machu étaina táemuracacha eta esamureana. <sup>14</sup> Taicha viti machamurihavianahi ema Cristo. Vijacapainasarepa eta vícuchihi mayehe éma, te vímiyanavahi eta vicasiñairava mayehe, vétumechiravahivare eta véhisirahi. <sup>15</sup> Eta tacahe, nápechavavare némechahe eta máechajiriruva ema Espíritu Santo: “Puiti jena sache, esamayare esuapayare éti eta numetarapiana núti. Tacuija eta tamuracavaina eta esamureana. Vahi ecucuti ena achaneana mámaqueneanahi ema Moisés te mávapahi apaquehe. Ichape eta namasuapajiraivahi eta nuyehe, náetaviuchirahi eta nacaitsamarajiranuhi núti” macahepa.

<sup>16</sup> Puiti nuvaraha epanerechaya eta juca. Némechaheya ema víyarahaini Moisés eta macuchusiravacahi ena viáchucanaveanaini tayehe eta avasare Egipto. Tétavicavayaréni eta náuricacareva. Tamapurujisera eta nasamirahi eta mahu ema Viya, májarasirahi eta mavanairipiana. Náimiyusemacapaipa éma eta namasuapirahi. <sup>17</sup> Tamapurujivare eta cuarenta añohi eta macamichiravacahi ema Viya. Taicha tavayuacahi eta napecaturana éna, étapa tivichahi eta náepenarahirahi te mávapahi apaquehe. <sup>18</sup> Eta namavarairavacahi nasuapahini, éma manacapa eta mayehe juramento eta namaitujisiravayare tisiapana nanaracahini eta mayehe. <sup>19</sup> ¡Ácaicutiara éti! Táichavenihi eta namasuapajiraivahi, puiti vímahaipahi eta namaitujisiravahi tisiapana tayehe eta mávasa ema Viya.



## 4

<sup>1</sup> Tacahe puiti, vicasiñavayare me Viya apaesa vítujicava vinaraca mayehe. Ticamunucarehisera eta ejaneasiravayare muraca machu émepururecava éti, tijuricati vahi ecuitujicava esiapa. <sup>2</sup> Taicha víti vicametacasihivare eta viúchucuirayare tacutihi eta nacametacasirahi éna. Tamapurujihisera eta nacametacasirahi eta náuchucuirayarehíni, váhiquenesera nasuapahini. <sup>3</sup> Yátupisera jararihi eta vinarasihayarehi, taicha ánipa macahe ema Viya: “Núti nétupiricaripahi eta náicuchihi nanarasihayarehini eta nuyehe. Tétavica vahisera eta náimiyusemasiranuhi. Tásiha, nucahepa núti: Ena nánitátaji váhiquene nasiapaimahi tinaracanaímahi eta nuyehe” macahepa ema Viya. Vítisera viti visuapajirahiana, vítujicavayare visiapa tayehe eta juca vinarasihayare eta mayehe ema Viya.

Émarichuhi ema Viya máetupiricaripahi eta vinarasihaya, taicha tinaracapa éma, te táequenepa eta máitauchirahi macaemataneasirahi tamutu eta juca apaquehe. <sup>4</sup> Taicha eta Sagrada Escritura, ánipa tacahe: “Saisi sache eta macaemataneerahi ema Viya. Téhesera te siétequenepa sache, tinaracapa éma, taicha máitaucharipahi tamutu” tacahepa. <sup>5</sup> Tásiha, nápechavavare némechahe eta juca máechajiriruvana ema Viya: “Váhiquene nasiapaimahi tinaracanaímahi eta nuyehe” macahepa. <sup>6</sup> Tacahe puiti, mávacuichahahi eta nanarasihayarehini ena tnapucanahi tisamanahi eta náuchucuirayare, táichavenehi eta namasuapajiravahi. Étainapasera viávihayare viti véqueneruana visuapajirahianayare. <sup>7</sup> Ánaquiaparipahi eta táetavisiravahi eta áñoanahi te táequenepa eta namasuapirahi ena nani, máichapa ema Viya eta te Salmo, ánipa macahe: “Puiti jena sache, esamayare esuapayare éti eta numetarapi núti. Tacuija eta tamuracavaina eta esamureana”. Eta macaheirahi eta juca, ema Viya máimicutiarachahi eta apana sache ticamapuravacarehi eta visiapirayare eta te vinarasihayare eta mayehe. <sup>8</sup> Yátupihí ema víyahaini Josué macaitecapavacahi ena nani achaneana tayehe eta apaquehe natuparahahi. Váhiserá étainahini eta nanarasihayare mavarahaquenehi ema Viya. Eta tacahe, eta máechajisihapa eta apana sáchezare visiapiraya víti. <sup>9</sup> Tacahe, jararihichaha eta juca tacapicahuquenehi vinarasihayare, táicuchihi eta viáchaneva viyehe viti machaneranahi ema Viya. <sup>10</sup> Eta visiapirayare vinaracaya eta mayehe ema Viya, yátupi máitavacacayare eta vinarasiraya, vaipa vicaematánemahi. Vicutiyare ema Viya eta manarasirahi tayehe eta máemataneanahi. <sup>11</sup> Eta tacahe, tavarahahi vétumechavayarehi tayehe eta visuapiraina éma, apaesa vítujicava visiapa tayehe eta vinarasihaya. Machu vémpurureca eta vícuchihi, machu vácuti ena masuapajirairahanahi.

<sup>12</sup> Taicha eta máechajiriruva ema Viya, tétavica vahi eta táitupajijiasiravahi máicha, tamutuhi tarataha. Tacachuricahi eta tacasiriva eta espada. Tacapayacayarehi te amahe tayehe eta viáchanevana viti achaneana. Tímechahavi eta taurivahi eta visamureana. Tasiapavare eta vipanereruana. Tímitucahavivare eta vétupirisieca eta vítaresirana. <sup>13</sup> Ema Viya máimararacahi tamutu. Tájina vahi viratahaimahi viyumuruca eta víchaqueneanahi. Tamutuyarehi tiúchujica te mamirahu éma vépuyumiraureyarehi te máichuhahavipa eta vimetauresiravayare mayehe.

### *Ema Jesús macarichu éma tiyaseurahi eta viyehe*

<sup>14</sup> Ema Jesús, yátupiquenehi Machicha ema Viya. Macarichuhivare ema tiyaseurahi eta viyehe taicha mávaháruhi puiti ema Maiya mávihahi te machacaya. Eta tacahe, vicaratacavayarehi muraca tayehe eta véhiruhi.

<sup>15</sup> Éma, yátupihí tiyaseurahiquenehi eta viyehe, taicha tímatihavi eta vimatu-mevahi. Tijapanuhavisera, taicha éma énerichuvare ticatajivahi tamutuhi macaitsamaraji ema Váinaraji, tacuti eta macaitsamarajirahavihi víti. Váhisera macapecaturahini ema Jesús. <sup>16</sup> Eta tacahe, vicasiñavayarehi te viyujarasirana, vémeñahairavahi me Viya témunarahiquene. Taicha tétavivacavihi eta majapanuraiva táichavenehi eta máemunasirahavihi. Éma, yátupihí eta máimicatasirahavi tayehe tamutu eta vicamunuiravana.

## 5

<sup>1</sup> Nuvaraha epanerechaya nayehe ena nácani catuparahanayare tiyujaracarahiana viyehe viti israelítana. Éna, nerejianahi te nataracu ena achaneana. Natuparacasivaichuhi éna ticaitecapanayarehi me Viya eta námavahuana ena achaneana, étapa eta nanaquíruvana táichavenehi eta napecaturana, nayaseuchirayarehi ena achaneana mayehe ema Viya. <sup>2</sup> Éna, tijapanurahianayarehi nayehe ena máiturereana énapa ena téjecapavana, taicha énarichuvare ticatajivanahi tayehe eta naeche máteji. <sup>3</sup> Étaripa eta nacatajivairana, ticamunuvanahi éna apana ticamavahuanahi mayehe ema Viya táichavenehi eta napecaturana.

<sup>4</sup> Tacahe, mácani ticatuparahayare tiyaseurahiyarehi, vahi émajiriruvaimahi máichuhacasivarichuhi. Émahi ema Viya tíjaracahi eta matuparahahi mapicahuyarehi, tacutihi eta máijarasirahi ema víyarahaini Aarón eta matuparahahi macapicahuirahivare. <sup>5</sup> Ene macahehi ema Cristo. Vahi émajiriruvainahini eta macatuparahairahi tiyaseurahiyarehi eta viyehe. Émarichuhi ema Viya tíjaracahi eta matuparahahi mapicahuyarehi, taicha ani macahehi ema Viya: “Píti yátupiquenévihi nuchicha. Puiti nucaejacavihi te piávacure” macahepa. <sup>6</sup> Eta apana máechajiriruva, ánivare tacahe: “Nunerejicavihi píti piyaseurahiyare. Nutuparacavihi péchajiurahiyare nayehe ena achaneana. Máitavacacayare eta juca pituparaha, picutiyahe ema nuvanaraini Melquisedec” macahepa ema Viya. <sup>7</sup> Tacahe, ema Cristo, te matiarichaha ani te juca apaquehe, tiyaseuchavahi te mayujarasirana eta me Maiya. Muraca eta máumitirahi, máiyahairahivare. Tiyaseuchavahi vahi máemitisicahini ema Maiya eta macaechepusirayarehi te máecari te táequenepa eta máepenirahi te crusu. Jéhesare, tisamacarehi te mayujarasirana, táichavenehi eta mavarairahi máitaucha tamutu eta mapaneruana ema Maiya. <sup>8</sup> Taicha ema Cristo, machichahi yátupiquene ema Viya. Váhisera máeñamavahini. Váhivare majunijicahini eta macatajivairanahi. Macamichahi tamutu, macaravahirahi eta masuapajiravahi. <sup>9</sup> Eta tamutuirapa eta máepenirahi, téchepucavarepa, tásiha maratahapa eta macuchucuhairahivare vimuti viti visuapanahi éma. Máitavacacayarehi eta vítare-siraya máicha. <sup>10</sup> Eta tacahe, ema Viya manacahi eta mávacure téchajirahi eta viyehe macutihi ema víyarahaini Melquisedec.

### *Ecunevahi machu ánasi ácuti ena amuyana*

<sup>11</sup> Ichapemuriyare eta táechajisihaquenehi eta juca numetaruhehi. Ticajerahisera nítametacahehinehi taicha tétavivacavihi eta tamuracavahi eta echutiana. <sup>12</sup> Ánaquiaparípahinéni eta ecaravahirahi, iúrihaipahini puiti máestrohevacaínahini. Ecamunuichahahisera natiarihiyarehi nácani típechaheanaya títametacaheanayarehi jácani vahi tácajerahini eta vímitucasivanahi me Viya. Puiti éti épiyacavaripahi máiturerehe. Ecutiripa ena amuyana, tacamunuhi vésihayarehi eta leche eta ticaitarecayarehi, taicha vuíchaha táitucahini tanicahini eta tinicacareana.

<sup>13</sup> Taicha ena amuyana tiájicanachaha, vuíchaha técharecana, vuíchahavare napanerequenehaimahi eta táurivayare eta náitaresira. Ene ecahehi éti, apaesarichuhi ecaratacavahi eta éhisira eta táuriqueneana. <sup>14</sup> Énasera ena yátupihí eta nacaravahuirahi, ena nacutihí ena ichanaruanahi. Téchavanaripa náitucaripa tinerejiuchavana eta táuriqueneana, náepurupa eta tauriqueneana.

## 6

<sup>1</sup> Núti, nuvaraha ímiyanavayare eta ecajurusiraya eta échemaravahi tayehe eta juca véhiruhi. Ichanaruhénahini tayehe, vaipa ecucutihini ena amuyana. Éhicapaini yátupi eta máimiturapi ema Cristo. Vaipa ecuápechavahini épanaequenereca eta táinapureanahi iáravahuanahi. Éti, vaipa ecamunuhini viápechahehíni vímitucahehíni eta éneuchiravayarehi eta epecaturana tímicapacaheyaréni, váhivare viápechavahini vímitucahe eta ecamunuirahi yátupina eta ecasiñavairayarehi me Viya. <sup>2</sup> Éti ímatipa eta táichararacavahi te ecaicachasinapa, étapa eta táichararacavahi te nanacapa eta navahu te echuti. Ímativarepa tamutu eta vímiturapiana tayehe eta náechepusirayare ena náepenaqueneana, étapa eta ecuñaraqui máitavacacayare. <sup>3</sup> Tásiha puiti, nímitucaheyare eta apamuri, te máijaracanurichahapucaini ema Viya eta nítupajijiasiravaya, étapa eta ecaravahuiraya.

### *Ecunevahi, machu ínajicava eta véhiruhi*

<sup>4-6</sup> Páureanasamisera ena tínajicavanapuca eta véhiruhi, tichavanaya-repuca. Taicha nácani natupiruvahi najacapa ema Jesús, tásiha énévanehi najirica te nasamure eta majacapiravacapa ema Viya, machichanaipa; mávahácaripa ema Espíritu Santo; tacurisamurechavacavarepa eta máechajiriruva ema Viya; náimatiequenehavarepa eta náuricacarevaya tayehe eta arairuyare avasare, téhesera te nácani náinajicapuca eta náehisirahi, vaipa táitujicacareimahi tiápechavana náeneuchavahini. Taicha eta náinajisiravapa, náepuruipahi ema Machicha ema Viya. Tímicutijiricavaripa nacaecahihini éma te namirahu ena achaneana, nápechavahini náetataca te crusu éma. <sup>7</sup> Nímicutichayare. Eta macamirisirahi ema Viya eta tiquiva, táerapaisiravanehi tamutu eta apaquehe. Jararihi eta apaquehe, tíurinasarepa eta tasucucureruvana, maicha ema Viya. <sup>8</sup> Jararihivare eta apana apaquehe, tájina tasucucureruvaina. Itapeparechucha, ijarevare. Ema Viya máijaracayarehi eta táicuñayare, tíjuinapa te yucu táicuchihi.

### *Vahi vínajicavaimahi taicha tatiaríhi eta vicuchapaquenehi*

<sup>9</sup> Puiti, muracacaha apaesa eta numetasirahehi, nútisera nucasiñavahi eta eyehe eta vahi ínajicavaimahi, eti némunaruanahi nuparapenaveanahi. Nucasiñavahi eta máijarasiraheya ema Viya eta iúricacarevayare te macuchucuhavipa. <sup>10</sup> Ema Viya tétavicavahi eta máitauravahi, váiparinehi máemiticaimahi eta ecaemataneasiranahi. Étapa tímereuchahehi eta émunasiravacahi ímicatasiravacahivare ena echamurianahi tayehe eta juca véhiruhi. Máimahahi eta ímiyanavairahi ecaemataneaca. <sup>11</sup> Nuvarahavare ímiyanavahini eta evapinavairavaca ámutu éti eta ecaemataneasirahi, yátupina ecasiñava mayehe ema Viáquenu, ecuchapaya eta machaviraya. <sup>12</sup> Váhivare nuvaraha plújuhéna. Ímiyanavahi éhica ácuti ena echamurianaini yátupiquenehi eta nacasiñavairahi me Viáquenu, nacamichahi tamutu. Jéhesare, ecuticacasarepa éna eta ejacapiraya eta ícuchihi mayehe ema Viya.

13-14 Émechava eta acane eta máechajiriruvana ema Viya eta máijarasiravahi eta máuricacarevayare ema Abraham. Ánipa máicha: “Yátupiyare eta níjarasiraviyare eta piúricacarevayare, tásiha, níjaracaviyareva eta náichapemurivaya ena piámariéqueneana. Nútijiva nupamicava eta nítauchirayare eta juca néchajiriruvana níjararuviyare” máichapa. Ani tacahehi eta máechajiriruvana, taicha nájina apanainahini tipamicaimahi éma. Tásiha, émajiva tipamicavayare. <sup>15</sup> Ema víyarahaini Abraham, ichapemurihi eta macasiñavairahi me Viya, eta macuchapirahi eta máijararuvanahi ema Viya. Tásiha, tétavicavahi eta máuricacarevahi. Máimahahivare ema machicha Isaac énapa ena mámarinaveana. <sup>16</sup> Tacutihi mácani achane, te maicha eta juramento, majurachahi te mamirahu ema Viya, mavaraha ema Viya mapamicayarehi eta máitauchiraina. Te mácani achane majurachapuca, tájina táéñamavacarehini eta máitauchirayare. <sup>17-18</sup> Ene macahehi ema Viya, tíjaracavahi eta mapamisiravayarehi máitaucha eta máijarasirahaviyare eta viúricacarevayare. Tipamicavayare, taicha mavaraha vahi véñamavaimahi. Tímaticarehi eta máurivahi ema Viya. Tájina táéñamavacaréna eta vicasiñavairaya muraca eta mayehe, taicha éma vahi máitsivachaimahi eta mapanereruana, váiparinehivare tépiyahirahimahi. Tájina véñamavaimahi eta vicuchapirahi eta máijarasirahaviyare eta vícuchihi. <sup>19</sup> Eta juca vicuchapaquenehi, étara tétumechahavihi muraca te viáchanevana. Tétavicavayarehi eta vicasiñavaira eta vipauchirayare ema Viya, taicha mararihiyare ema tímisiapahaviyare te mávihahi ema Maiya. <sup>20</sup> Taicha ema Jesús, ema tínapumirauchayarepahi eta máetupirisirayare eta viyanirayarehi, taicha macarichuhi éma ticatuparahahi eta mayaseuchirahaviyare, macutihi ema víyarahaini Melquisedec.

## 7

### *Ema Jesús, ema tiyaseurahi eta viyehe, macutihi ema víyarahaini Melquisedec*

<sup>1</sup> Ema maca Melquisedec, émahí maparajuruhi ema Abraham. Taicha acane, te jena año, ema viáchucaini Abraham énapa ena masuntarurana téhacacanapa nacanarapa ena réyeana, navarairahi nacuchucuha ena námereruana, émaripa ema máneva Lot, énapa ena machichanaveana. Máitahacacavacahisera. Matiarihivare ema apana rey, táquenuhi eta avasare Salem. Émahí ema Melquisedec. Éma, mavanarahivare ema Viya, tiyujaracarahi éma. Tacahe, te tichavapa te mapena ema Abraham, mácapapa ema Melquisedec, mavarahapa mayujarauchaya ema Abraham. <sup>2</sup> Tacahe, ema viáchucaini Abraham títsirijicavapa. Máijaracapa ema Melquisedec eta diésmuri tayehe eta maganareruanahi nayehe ena mánarana. Étahi eta mámvahuhi me Viya. Ema Melquisedec, aquenucahi éma tayehe eta avasare ticaijare Salem. Eta máijare, te véchajiriruva ticaijare: “Ema Rey máuriquenehi, tájina táichava tamutu te mávasa”. <sup>3</sup> Ema maca Melquisedec, eta majurusirahi, vahi táimaticarehini nájahhipuca ena ticachichanahi, nájinavare majaneanaina. Váhivare táechacare eta máuchusira étapa eta máepenirahi. Énerichuvare, nájina ema máitsivainahini ema Melquisedec. Eta matuparahahi, ene macahehi puiti ema Machicha ema Viya, nájina máitsivainahini. Máichecuaraquirehi eta mávacure tiyaseurahi.

<sup>4</sup> Nuvaraha epanerequeneha. Ema maca Melquisedec ticapicahupanahi maicha ema Viya. Eta tacahe, ema viáchucaini Abraham máijaracahi eta diésmuri eta maganareruhi nayehe ena réyeana máitajaruanahi. <sup>5</sup> Acane, matiarihíhi ema mámariequenéni ema Abraham, ticaijare Leví. Te táequenepa, matiarihíhi ema mámariequenéni ema Leví, ticaijare Aarón, maparapehi ema

Moisés. Tásiha, ema Moisés manacapa eta vanairipi, tatuparacahi namutu ena mámariequeneana ema Aarón, tiyujaracarahianayare éna. Tavanecahi ticobrarecanayare eta diésmuri eta navachayare ena najaneananarichuhi, mámariequeneánaini ema Abraham. Nájina tacaitiruinahini. <sup>6</sup> Émasera ema Melquisedec, vahi mámarinahini ema Leví. Majacapahisera eta diésmuri mayehe ema Abraham, te tamutupa eta mayujarauchirahi éma. Tayanapane tímijachavahipuca ticunachacarepanahi ema Abraham táichavenehi eta máijjaruanahi ema Viya eta mayehe ema Abraham. <sup>7</sup> Eta tacahe, vimutu vecha víti, mácani tiyujarauchahi ema apana, éma ticunachacarepanahi mayehe mácani mayujarauchaquenehi. <sup>8</sup> Tacahe, ena apamuriana tiyujaracarahiana tépenanapaipahi, tásihasera namutu ticaitsivanapahi. Émasera ema Melquisedec vahi macaitsivahini. Puiti eta Sagrada Escritura táechajisihahi éma, máichecuaraquire eta máitairesirahi. <sup>9-10</sup> Émaripa ema Leví énapa namutu ena tiyujaracarahiana mámariequeneanáinihi, natuparahaichuhi náicuchihi eta náuchusirayare mámariequeneanayare ema Abraham. Tásiha, tímicutijiricavahi éna apanava navachachahi eta diésmuri ema Melquisedec te jena sache eta mavachachirahi ema Abraham. Énarichuyarehini najacapaya eta diésmuri.

<sup>11</sup> Ena tiyujaracarahiana mámariequeneanáinihi ema víyarahaini Aarón, éna tímitucanahi ena achaneana eta vanairipiana májureanahi ema víyarahaini Moisés. Váhisera naratahaimahi napamicavaca ena achaneana náitaucha tamutu. Taicha te náitauchapucaini, váipapucaini tacucamunuini ema apana tiyujaracarahi macutiyarehi ema Melquisedec, vaipa mámariequenenahini ema víyarahaini Aarón. <sup>12</sup> Émasera ema Viya máechajisihahi ema apana tiyujaracarahiyare matupararuyarehi. Émapa tímechahaviyare eta máitsivachirayare eta viyanihayare mayehe. <sup>13-14</sup> Jararihi puiti eta apana. Taicha ema Viáquenu Jesús, vahi mámariequenenahini ema Aarón. Éma, máchucaini ema Judá. Te nataracu namutu ena majaneanaini, nájina émanainahini mayujaracarahihini. Ema Moisés vahi máechajisihahini matiarihiyare ema tiyujaracarahiyare, mámariequenehi ema Judá. Émasera ema Jesús táechajisiquenehi eta Sagrada Escritura eta émayare tiyujaracarahiyare.

<sup>15</sup> Tacahe, vímatiequenehahi yátupi eta máitsivachirapa ema Viya eta viyanihayare eta mayehe, taicha ema arairuyare tiyujaracarahi, tacamunuhi eta macutirayarehi ema Melquisedec. <sup>16-17</sup> Taicha tacahehi eta máechajiriruvahi ema Viya, ani macahehi: “Nunerejicavihi píti, piyaseurahi. Nutuparacavihi péchajirahiyare nayehe ena achaneana. Máitavacacayare eta juca pituparaha, picutiyare ema nuvanaraini Melquisedec” macahepa. Tásiha, vímatiequenehahi puiti ema ticatuparahahi ema Jesús táichavenehi eta máitairesirayare máitavacacahi. Vahi étaparacainahini eta nájahhipuca ema máchucaini. <sup>18-19</sup> Tacahe, tépahapa eta vanairipiana náehiruinihi ena náinapureana tiyujaracarahiana, étaripa eta vanairipiana manaquiruanahi ema Moisés. Taicha tájina táratahaini tacuchucuhahavihini táichavenehi eta vimáitauchirahini víti. Vahi tacaitecapahavihini me Viya. Puítisera ema arairuhi, tétavicavapa eta macasiñacarévahi éma. Émapa tacaitecapahavihi mayehe ema Viya.

<sup>20-22</sup> Ena náinapureana tiyujaracarahiana, tájina eta júramentoinahini eta nacatuparahairahi. Émasera ema Jesús, ticapicahupanahi eta mávacurehi taicha tíjaracavahi ema Viya eta juramento, te matuparacapa ema Machicha. Taicha eta Sagrada Escritura táechajisihahi, ani tacahe: “Ema Viya, váhiquene máitsivachaimahi eta máechajiriruvana. Majurachapa, ánipa macahe:



Nunerejicavihi píti, piyaseurahiyare. Nutuparacavihi péchajiurahiyare nayehe ena achaneana. Máitavacacayare eta juca pituparaha, picutiyaie ema nuvanara Melquisedec” macahepa. Jéhesare ema Jesús, tétavicavahi eta macasiñacarevahi eta máitauchiraya tamutu eta máijjararuvanahi ema Viya. Tiúripanahi eta arairu viyanihayare me Viya. <sup>23</sup> Tiuri, eta tayerevahi eta áñoanahi, camurianahi ena tiyujaracarahiana mámariequeneánaini ema Aarón, taicha ticaitsivanapahi, arairuanapahi éna. Étasera tíchahi ena tépenanapaichucha, vahi náimiyannahini náitarecahini. <sup>24</sup> Émasera ema maca Jesús, máepenacacahi éma. Nájina nasiapahini máitsivainahini tayehe eta mávacurehi. <sup>25</sup> Tásiha puiti, macarichu éma maratahahi ticatichahavihi viti vicasíñanahi éma. Éma, ticaitecapahavihivare me Viya. Máitavacacayarehi eta máechajiuchirahavihi taicha váiparinehi tépenaequenehahavimahi. <sup>26</sup> Tacahehi puiti eta macatuparahairahi ema Jesús téchajuchahaviyare. Tétavicavahi eta vicamunuirahi éma, taicha yátupiquenehi santo, matapiravarehi éma. Tájinavare máimatyahini macapeaturahini. Váhiquene mácutihini ena pecatumareana eta napanereruana. Puíticha éma mávihahi tayehe eta anuquehe anuma te machacaya ema Viya. <sup>27</sup> Éma, váhivare mácutihini ena apamuriana tiyujaracarahiana. Éna, nacamu-nuichaha tamutuyarehi sácheana nacapaca eta sárare náijuchaquenyarehi, tásiha nativayarepa tiyaseuchavana tayehe eta napecaturaichu. Te tamutupa, tapaenumavapa nayaseucha tayehe eta napecaturana ena achaneana. Émasera ema Jesús, étaheichuhi eta mavachachirahi eta vipecaturana vimutu, tíjaracavainapa eta máepenirahi te crusu. <sup>28</sup> Ena nani ajairana ticatuparahana tiyujaracarahianayarehi taicha eta vanairipiana, étasera vahi nánasihini te juca apaquehe, náepenaequenehapaichucha eta námatanerepianaini. Émasera ema Jesucristo tiyaseurahiquenehi yátupihí. Eta macatuparahairahi tacachuricahi eta nacatuparahairahi ena nani. Máitavacacahivare eta máechajiúchirahávihi. Taicha ema Viya máichahi eta juramento eta matuparasirahi ema Machicha.

## 8

*Éma Jesús ema vituparahahi téchajuchahavihi viti véhicahi eta arairu viyanihayarehi*

<sup>1</sup> Tiuri puiti, nuvaraha yátupi ácaicutiara eta juca: Ticunachacarepanahi ema téchajurahi eta viyehe víti. Taicha matiaríhi te anuma, téjacahi éma te mayehe trono te mavaure ema Viya. <sup>2</sup> Ánaqui, eta máitauchihahi eta mávacure tayehe eta yátupiquenehi Santuario tíávihihi te anuma, máepiyarúhi ema Viya. Vahi tácutihini eta náepiyarúhi ena achaneana. <sup>3</sup> Namutu ena tiyujaracarahiana, tatuparacahi náimerecayare eta námavahuana étapa eta nanaquiruvana. Éne macahehi ema Jesucristo, tatuparacahi máimerecaya eta mámahuyarehi, tiúripanahisera éta. <sup>4</sup> Ena náinapureana tiyujaracarahiana, nacarichuhi ena ticatuparahanahi náimerecayarehi eta námavahuana tacamunuqueneanahi eta nayujarasirahi eta te Templo te jena Jerusalén. Émasera ema Jesucristo, tájina vahi mácamunuimahi ticamavahu tayehe eta Templo. Taicha éma, anuma eta mayujarasirarehi. <sup>5</sup> Énasera ena tiyujaracarahiana te juca apaquehe, eta námamacasareana te nayujarasirana, étachucha eta tavasíhi eta tíávihanahi te anuma. Véchahi eta tavasichucha, taicha ema Viya máemechahi ema víyahaini Moisés eta yátupiquene Santuário tíávihihi te anuma. Ánipa maicha: “Pépiyacayare eta

Santuário tavasiyare picha eta tiávihihi te anuma nímeruvihi te piávihaipa te cerro” macahepa. <sup>6</sup> Émasera ema Jesús, tiúripanahi eta máematanerepi taicha te anuma eta máechajiuchirahavihi. Éma, téchajiurahi tayehe eta arairu matratune ema Viya. Eta arairu matratune, tiúripanahi eta táinapurehi, taicha tétavicavahi eta viúricacarevayarehi taicha máíjaracahi eta máechajiruva ema Viya. <sup>7</sup> Jéhesare, eta táinapuiru matratune, vahi náitauchaimahi ena achaneana. Taicha te náitauchahipucaini, vahi tácamunuhini máíjaracahini eta apana arairu. <sup>8</sup> Émasera ema Viya, eta máimairahi vahi náitauchahini, tiápechavavarepa eta máechajiriruvahi, ánipa macahe: “Tatiarihiyare eta sáchevayare tépanavayare arairu eta nutratune nayehe ena achaneana israelítana. <sup>9</sup> Vaipa tácutimahi eta natratunehi nayehe ena náchucanaveanaini te jena sache te nuvecuhainapa te nuvahu, nucuchucavacapa tayehe eta avasare Egipto. Váhisera náitauchahini eta nutratunehi eta nuyehe. Eta tacahe, nujunijiacavacapa. <sup>10</sup> Eta nutratuneyare nayehe ena nani israelítana te jena sáchevare, nunacachutichayare te nachutiana eta nuvanairipiana. Najiricainapa te nasamureana. Jéhevarénapa núti nacaiyaqueneyare. Tásiha, éna, jéhevarénapa nuchichanavequeneanainapa. <sup>11</sup> Vaipa nácomesaimahi ticaimitucasiana nayehe ena nachamuriana, énaripa ena naparapenaveana eta náimatiranuyare. Núti yátupiquenenuhi náquenunuhi. Namutuina títatinuanayare: ena amaperuana, ena ichanaruana, énapa ena ichavicana. <sup>12</sup> Énerichuvare nuperdonachavacainapa núti eta napecaturana navainarajivana. Vaipa nécharairicaimahi eta natapiravanaini” macahepa ema Viya. <sup>13</sup> Tacahe, ema Viya, te máechajisiha eta arairu matratune, tépaharipahi eta táinapurénihi. Éta táemitiaruripahi. Vaipa tasuapacarehini.

## 9

*Eta santuário tiávihihi te Jerusalén, tavasihi eta táimahi eta Santuário tiávihihi te anuma*

<sup>1</sup> Tacahe, eta táinapuiruhi matratune ema Viya nayehe ena nani náinapureana tiyujaracarahiana, tatiarihihi eta nayeherepichuhi te tiyujaracana me Viya. Jéhesare, te jena Jerusalén eta távihihi eta santuario nayujarasirare. <sup>2</sup> Ani tacahehi eta táimahi te náepiyacainapa: Eta títapuca cuarto ticaijarehi “Lugar Santo”. Tacapicahuquenehi éta. Éta távihihi eta candelero étapa eta mesa távirare eta pan sagrado. <sup>3</sup> Eta apana cuarto, ticaijarehi “Lugar Santísimo”. Éta tétavicavapanapa eta tacapicahuira. Tatiarihihi eta ichapequene cortina. <sup>4</sup> Te tachacaya eta ichapequene cortina, tatiarihivare eta mesa náijuchirare eta incienso, amairiha oro. Te tajuhe, tatiarihi eta cajune, amairihavare oro, tacaunaiyahi eta márimeana ajureca eta diez mandamiento, étapa eta cajeta amairihavare oro tacaunaiyahi eta maná, étapa eta matsucurupa ema Aarón eta tímarutsicaipahi. <sup>5</sup> Te táinahu eta cajune, natiarihihi ena apinana ángeleana, ticaijare “querubín”. Eta juca querubín támahi eta majaraivahi ema Viya. Tásiha, eta napavana táepacuhicahi eta cajune, eta náepusaisirarehi eta iti tavachasarehi eta napecaturana namutu ena achaneana. Jararihivare eta apamuriana tayereruvanainihi eta santuario, váhisera nuvaraha nájuchahini te juca puiti.

<sup>6</sup> Eta tacahehi eta táimahi eta náemamacasareana eta te santuario. Tacahe, tamutu sácheana ena tiyujaracarahiana tisiapaparacanahi tayehe eta títapuca cuarto eta náitauchihaparacahi eta náematanerepiana. <sup>7</sup> Étasera eta te apajuhe, táetaviuchahi eta tacapicahuvahi. Macarichuhi tisiapa ema náquenunuri ena tiyujaracarahiana. Étaherichuvare tisiapa te étana año,

mámayarepahi eta táitine eta sárareana. Éta tivachachayarehi eta mapecatura ema tisiapahi, étapa eta napecaturana ena achaneana. <sup>8</sup>Émasera ema Espíritu Santo mavaraha vímatiequenehaya eta juca. Eta cortina, éta tiávimirauchahi eta Lugar Santísimo, vahi táisapahini tisiapana ena achaneana. Puítisera vísapacarehi víti eta vítecapauchaya ema Viya. <sup>9</sup>Tamutu eta juca tacamunuhi vímatiequenehayare. Eta jena náichasareanahi ena nani tiyujaracarahiana eta nacamavahuirahi, vahi tacanarasinávachahini eta napanereruana ena téneuchavanahi, apaesa tiúriyarepahini eta náitaresirana. <sup>10</sup>Vahi étapara-cainahini tayehe eta náchaneva, taicha eta námavahusana éna, tinicacarea-nachucha téracarechucha, étapa eta nacasipavahuirahi te tisiapana tayehe eta Templo. Eta júcana nayeherepianahi, vahi tímiyanavaimahi. Taicha te tépenapa ema Cristo te crusu, máitsivachahi ema Viya eta vítecapauchirayarehi éma.

*Tiúripanahi eta yátupiquenehi Santuário tiávihahi te anuma*

<sup>11</sup>Puítisera, tímerecavapa ema Cristo. Jéhevare éma, yátupiquenehi tiyujaracarahi eta viyehe. Tétavicavahi eta táuriva eta viáchanevana máicha. Eta Santuario te anuma távihahi eta mayujarasirare, vahi tayehe te juca apaquehe tauriquenehi. Te jena, tamutu tiúrihi, tipachinahivare. Tétavicavahi eta tacunachacareva. Tacachuricahi eta santuario nayujarasirare ena apamuriana tiyujaracarahiana, náepiyaruchucha ena vicutiqueneana achaneana. <sup>12</sup>Ema Cristo, jéhevare éma mávihahi tayehe eta yátupiquene Lugar Santísimo te anuma. Vaipa mámavahuhini eta táitine eta sárareana chíqueru, chívanahipucaini. Eta mámavahuhini éma, étaquenepa eta máitine. Étaherichuhi máicha éma. Vimutuhisera viti macuchucureanahi. Tásiha, máitavacacaipa eta vítaresiraya. <sup>13</sup>Ena nani tiyujaracarahiana náepusasapairichaha te náinahu ena nachipejiqueneanahi. Eta náepusasapairuhi, eta táitineana eta toro étapuca eta chívachicha, étapa eta tsimapama tayehe eta esena chíqueru náijureasa. Eta júcana, tépachinachinavacahi eta náqueheana, apaesa táisapacarepa nasiapa tayehe eta Templo. <sup>14</sup>Étasera eta máitine ema Cristo ema matapiravarequenehi, tétavicavahi eta táitupajijiasiravahi. Tacachuricahi eta náepusasapairuhi ena nani tiyujaracarahiana. Taicha taratahahi tacaepaha tamutu eta vipecaturana, viperdonachacarepa táicha. Tímicutijiricavahi tisipacahavihi tamutu eta vipanereruanaini tamaeperajiquenehi, étaripa eta tímicapacahaviyarehini. Puítisera eta vítaresiraya, émainapa vicaemataneacainapa ema yátupiquenehi Viya. Ema Espíritu Santo máetumechahi muraca ema Jesús eta máijarasiravahi tímicapacava te crusu, taicha mavarahahi eta mámavahuyarehi me Viya.

*Ema Jesucristo, éma yátupiquenehi abogado eta viyehe*

<sup>15</sup>Puíticha ema Cristo, éma yátupiquenehi viyehe abogado, téchajiurucahavihi tayehe eta táequenereruhi matratunehi ema Viya. Eta máepenirahi ema Cristo, mavachacharipahi tamutu eta vipecaturanaini viti máichuhaque-neanahi éma: viti, énapa ena náinapureanaini tijacapanahi eta táinapurénihi matratune ema Viya. Tásiha, yátupihahi eta macuchucuirahaviya, máijaracahavi eta vítaresiraya máitavacacayarehi. <sup>16</sup>Nuvaraha nímicutichinahe: Mácani achane te manaquicahi eta testamento, májuchapa eta mavarairahi máijaracasichavacayarehi ena machichanaveana te máepenapapuca. Eta tasuapacarevayarehi, eta ley tacamesaequenehayarehi tacayasesereru te yátupipuca tépenaripa ema achane. Te yátupihahi tépenaripahi, eta testamento tisuapacarehi. <sup>17</sup>Vuíchahasera tasuapacarehini eta testamento, te vuíchahahi tépena ema maca tépiyacahi. <sup>18</sup>Tacutiquenehi, eta táepaniravahi eta

táinapuiruhi matratune ema Viya, tacamunupa tépena eta sárareana, apaesa navehaya eta táitine. <sup>19</sup> Ema víyahaini Moisés macametarapipa tamutu eta vanairipiana nayehe namutu ena achaneana. Tacahe, mavehapa eta titsi lana máitiapusichapa eta yucuqui, máepusasapaisihayarehi eta ítiama, táitineana eta chiqueruana, chívana. Tativa máepusasaca eta libro tiámahi eta vanairipiana. Máepusasacavare ena achaneana náurujiruvanahi. <sup>20</sup> Tacahe, mametacavacapa éma: “Eta juca ítiama népusaruhehi, eta táicutiara eta íjarasiravahi ítauchayare tamutu eta matratune ema Viya eta eyehe éti” máichavacapa ema Moisés. <sup>21</sup> Énerichuvare ema víyahaini Moisés máepusasacavare eta ítiama te tapaja eta santuário étapa tamutu eta náemamacasareana te nayujarasirana. <sup>22</sup> Taicha tacahehi eta vanairipi: Ticaepusahayarehi te iti tamutuyaréni eta náemamacasareanahi eta nayujarasirayarehi, náepachiasihayarehi. Taicha te vahi tacuepusaicavahini eta iti, váhivare tacuepahahini eta pecatuana.

### *Eta máitine ema Cristo tacaepaha eta pecatuana*

<sup>23</sup> Tacahe, eta juca náemamacasareanahi ena nani, tacamunuhi náepusacayarehi eta nayujarasirayarehi apaesa tapachinavacahini. Eta santuário te Jerusalén náepiyarui ena achaneana étapa eta náemamacasareanahi, náicutipaqueneanahi eta tiávihanahi te anuma. Étasera eta Santuário tiávihahi te anuma, tacamunuhi eta apana iti tasivachaquene, tacachuricayarehi eta iti náepusarui tayehe eta santuário tiávihahi te juca apaquehe. <sup>24</sup> Ema Jesucristo, tájina máimatiyahini mayujaracahini eta te jena santuário te juca apaquehe. Étaquenehisera masiapa eta mayujarasirayare eta te Santuário tiávihahi te anuma. Puíticha matupihamirauchahi ema Viya eta mayaseuchirahavihi víti. <sup>25-26</sup> Ema maca tiyujaracarahi te juca apaquehe, áñopahi eta masiapira tayehe eta téqueneha cuarto Santísimo. Ticamavahupahi eta táitine eta sárare, vahi máitinénarichuhíni éma. Émasera ema Cristo, étaherichuhi eta máepusaisirahi eta máitine. Vahi máepejiricavahini te áñoana. Te máepejiricavahini, énerichuhivaréni tíapepejicavahini eta máepenirahi puiti juca táepaniravahi eta apaquehe. Ema Viya mapanerequenehapa eta táicharacavayarehi tamutu. Te máimahapa tiuri, mavanecapa ema Machicha te juca apaquehe. Tímitecahi eta macaepahairayarehi eta pecatu, máijarasiravaripa eta máepenirayarehi. Étaherichuhi máicha. <sup>27</sup> Víti achaneana, eta vícharacavahi eta vítaresirahi, étaherichuhi eta vépeniraya vimutu. Te táequenepa, járajapainapa eta viyaseserehiyare. <sup>28</sup> Énerichuvare, eta máitare-sirahi ema Cristo, étaherichuhi eta máepenirahi te crusu eta macaepahairayare eta vipecaturana viyehe viti camuriqueneana achaneana. Yátupisera tíapechavaya tímerecava. Váipasera étaimahi tímiteca mavachachaya eta pecatuana. Eta tímitecayare éma, tépanahaviyarepa viti véhicanahi vicuchapanahi éma eta macuchucuirahaviyarehi.

## 10

### *Eta máitine máepusairuhi ema Cristo, tacarichuhi tarataha tépachiacahaviyare*

<sup>1</sup> Eta mavanairipiana ema Moisés, étachucha táicutiarahi eta arairuyarehi viyanihayare me Viya, eta tiúrichahaviyarehi. Ticutihi eta tacuna eta yucuqui. Vahi tánasihini máitavacacainahini eta mavanairipiana, taicha vahi táurichahini ena achaneana nácani tivarahanahi ticaijuheana ema Viya,

taicha váhivare nasamavahini eta náuchucuirahi, tayanapane nápepejiricavahini te áñoana eta nacapasirahi eta sárareana. <sup>2</sup> Te yátupinahini táurichavacahini eta náichirahi eta nayeherépi, vahi nacuaepepejiricavahini nacamavahuhini ena tiyujaracarahiana, énerichuvare ena achaneana tisamavandaripahini eta náuchucuirahi. <sup>3</sup> Taicha tacamunuhi nápechava te áñoana eta nacapasirahi eta sárareana, taicha tíápechavana ticapecaturanahi. Étaripa eta táepeniranahi eta sárareana táemecharairicavaca eta nacapecaturairaripa. <sup>4</sup> Taicha eta táitineana eta toro, étapa eta chivu, yátupiquenehi váhiquene táratahaimahi tacaepaha eta pecatuana.

<sup>5</sup> Étasera te tiúcupaicayareipahi te juca apaquehe ema Cristo, ánipa macahe mayehe ema Maiya: “Píti Tata, vahi pácamunu eta nucamavahuhini nunaquicavahipucaini eta piyehe, táitinehi eta sárareana. Píti píjaracanuhi eta juca náquehehi. Váhisera táemepururecavaimahi eta píjarasiranuhi. Eta náquehe tisuapaviyare jácani pivanesiranuya. <sup>6</sup> Váipavare pácamunu eta nacamavahuirá ena achaneana eta sárareana, náijuchahini te pimirahu, táimicapacahini eta tacaepahairayarehi eta pecatuana. <sup>7</sup> Núti, tímitecanuhi puiti nítauchayare tamutu eta pivarahaqueneanayare eta nuyehe, piti Tata. Nusuapaviyare te tamutu eta pituparasiranuhi tajuquenehi eta te Sagrada Escritura” macahepa.

<sup>8</sup> Tiuri puiti, nuvaraha ecaicutiarayare eta vaipa mácamunuhini ema Viya, váipavare máurica nácamavahuhini eta sárare náijuchahipucaini ena achaneana, navarairahi táepahayare eta napecaturana, tayanapane nayeherépi chucha eta náitauchirahi eta vanairipiana. <sup>9</sup> Énerichuvare, nuvaraha epanerechavare eta juca máechajiriruva ema Cristo: “Tímitecanuhi puiti nítauchayare tamutu eta pivarahaqueneanayare, piti Tata”. Eta tacahe, vímatiequenehahi vaipa tácamunuhini eta táinapure nayujarasirahi ena achaneana. Taicha ema Viya máitsivachahi eta apana, arairupa, taicha ema Cristo macarichuhi máitauchahi eta mavarahaqueneana ema Maiya. <sup>10</sup> Jéhevare, ema Viya tépachiacahaviripa máichavenehi ema Cristo, eta masuapirahi máitauchirahi eta mavarahaqueneana ema Maiya, máijararecahi eta máquehe eta máepeninahavihi. Étaherichuhi máicha, vahi mápepejiricavahini.

<sup>11</sup> Namutu ena nani tiyujaracarahiana vahi nanaracahini. Tamutuhi sácheana ticamesavana nanacahi eta námavahuana. Vahi táechuquihahini eta náichirahi eta juca. Tájinasera váhiquene tacaepahahini eta pecatuana. <sup>12</sup> Émasera ema Jesucristo étaherichuhi eta máichirahi. Váhiquene mápepejiricavahini. Tacahe, téjacaripahi te mavaure ema Viya. <sup>13</sup> Énerichuvare puiti eta máejasiraipahi, macuchapavacaripa eta macaepuyusiraya ema Viya te mamirahu ena ticatianacanahi éma. <sup>14</sup> Taicha eta máepenirahi, eta mámvahuhi me Viya eta máquehe. Tétavicavainehi eta tajacapacarevahi me Viya eta máepachiasihahaviyarehi viti máichuhaqueneanahi. Váhiquene tacamunuhini mápepejiricavahini. <sup>15</sup> Ema Espíritu Santo, étarichuhivare tacutihi eta máechajiriruvahi, títametacahavihi. <sup>16</sup> Ani macahehi: “Eta nutratuneyare arairu nayehe ena nani te jena sáchezare, níjaracavayare nunacasamurechayare te nasamureana eta nuanairipiana. Najiricainapa te napanereruana”. <sup>17</sup> Ánivare macahe: “Yátupina eta nucaepahairayare eta napecaturana. Vaipa néchaimahi eta natapiravanaini étapa eta navainarajivanaini” macahepa. <sup>18</sup> Tacahe, nuvaraha ecaicutiara eta juca: Te yátupihí táepahairahi eta pecatuana eta mámvahuhi, vaipa tácomesahini tápepejiricavahini nacamavahuhini ena apamuriana.



*Vicasiañavayare eta vicaijuheiraya ema Viya*

<sup>19</sup> Tacahe, nuparapenaveana, vácasiñava yátupi eta vítecapauchirayare ema Viya tayehe eta mávihahi Santísimo, táichavenehi eta máepachiasirahavihi te máitine ema Jesucristo. <sup>20</sup> Véhicayare eta juca arairu achene mavejiarui, yátupi eta tacaijuhériahi me Viya. Tájinapa táichejimirauchahavihini taicha mavejiacahi tamutu ema Cristo, eta máepenirahi te crusu. <sup>21</sup> Tacahe éma, yátupiquene tiyujaracarahi eta viyehe taicha émaquenehi téchahi namutu ena machichanaveana ema Viya. <sup>22</sup> Eta tacahe, tatupiruvayarehi eta visamureana eta vicaijuhériaya ema Viya. Vácasiñavaini eta mayehe, vahi véñamavaimahi taicha éma masipacaripahi eta visamureana apaesa tacuija vitapiravaina tayehe eta vipecaturana. Tájinapa eta táechipejicahavihini eta vipecaturana, tímicutijiricavahi vicavahini eta te tapachinaquene une. <sup>23</sup> Eta tacahe, vímiyanava vétumechava eta véhisirahi. Vahi viyacujimahi. Yátupina eta vicuchapira eta vícuchihi taicha ema Viya máitauchayare tamutu eta máijararuvahi eta viyehe. <sup>24</sup> Puiti vétumechavayare vímicatajiricacayare eta tápajusiravaina eta vémunaraivanaya. Vímitucacayareva eta víchirayare eta táuriqueneana. <sup>25</sup> Váhivare viyacujimahi eta viúrujisiravana. Vahi ecucutihini ena víchamuriana, tinerejicavanahi mayanarahanahi te viúrujicava. Vétumejiricacayaresera, tavetijipa puiti eta vímairapa eta tánehirapa eta masacheraya ema Viáquenu eta machavirayare.

<sup>26</sup> Taicha te ímiyanavaichuchapuca icha eta pecatuana, tayanapanehi ímatiripahi puiti eta yátupiqueneana, eti émeppurecaripahi ema Cristo eta ímicapasirahi táichavenehi eta epecaturana. Páurehesami, taicha nájina apanainahini ecasiñahini. <sup>27</sup> Ena nani náemepurposecaripahi ema Cristo, tétavicavahi eta tamuracavaya eta náicuñayare. Tisiapanayare eta táíñehiquene yucu táijurequene. Eta juca eta náicuchihi návihayare ena ticatianacanahi ema Viya. <sup>28</sup> Tacutihini acane eta macaicuñaira mácani téjecapavahi tayehe eta mavanairipiana ema Moisés. Te natiarihipuca apinanahi, mapananahipuca ena testigoanahi, tímahanahi eta máejecapiravahi, tatuparacahi nacapacavanyarehi ena tuparairucana. Vahi tijapanucaremahi éma. <sup>29</sup> Tásiha, tétavicava muraca eta náicuñayare ena témepurposecanahi ema Machicha ema Viya, ¿masi? Taicha náemepurposecavahivare eta máitine máepusairuhi, nacaecahivare ema Espíritu Santo, náemepurposecavahivare eta máemunasiravacahi ema Viya. Váhivare návarahahi náimati eta máitine máepusairuhi, étara vivachahi eta majacapirahaviyarehi ema Viya. <sup>30</sup> Vimutuhi vecha eta máechajiriruvahi ema Viáquenu, ani macahehi: “Núti tituparacanu nícuñasiravacayare. Nútichucha némecharecavacayare éna”. Tásiha, ánivare macahehi: “Ticayaserehianayare ena achaneana te numirahu”. <sup>31</sup> ¡Tipicacarequenehi eta náicuñayare ena témepurposecanahi te mamirahu ema Viya, tamutuquene máimaha!

<sup>32</sup> Németeacaserá ímiyanavayare éti tauri eta éhisirahi. Écharichuhi eta itaresirahi cape juca, te épanavainapa eta ejacapirahi eta juca tajarahiquene máechajiriruva ema Viya. Ichapemurihi eta ecatajivairahi naicha ena ticatianacaheanahi. Ecamichahisera éti. <sup>33</sup> Etiarihihi éti ecaumehacasihi ecaehanahi te namirahu ena achaneana. Etiarihihivare éti ímicatacanahi tayehe eta náichavaquenevanahi ena ticaehanahani. <sup>34</sup> EJapanuhivare nácani ticaeratanahi te cárcel. Tacutiquene ecurisamurechavachucha eta naverejisiraheanahi eta ímahaqueneana, taicha échahi éti tatiarihihi eta ímahaqueneanayarehi te anuma. Tétavicavahi tíuripanahi tayehe, máitavacacahi éta. <sup>35</sup> Tásiha puiti, vahi ecuyacujihini. Étumechavasera eta ímitusirahi eta máechajiriruva ema Viya. Éta tíurichaheyare, ejacapayare

eta mavachachiraheyare ichapequeneya. <sup>36</sup> Ecayehechahavare paciencia. Ímiyanavavare ítaucha eta mavarahaquenehi ema Viya, tásiha yátupina ejacainapa eta ícuchi eta mayehe. <sup>37</sup> Taicha eta Sagrada Escritura, ani tachehi: “Vaipa máyeremahi márjapainapa ema Cristo ema vicuchapaquenehi”. <sup>38</sup> “Nácani natupiruvahi eta nasamureana, ticasíñanuanayarehi eta náitare-sirahi. Énasera nácani tichavacuejehavanahi, nucaerajicavacayare táicha” tacahepa. <sup>39</sup> Vítisera vahi vácutimahi ena tichavacuejehavanahi, énajivaya tímitaequenehavanayare. Vítisera viti vímiyanavanahi eta vicasiñavaira me Viya, vicuchucuhayarehi eta viáchanevana táicha.

## 11

### *Tétavicavaya eta viúricacareva te vicasiñavahi mayehe ema Viya eta vítaresira*

<sup>1</sup> Te yátupi visuapa eta máechajiriruva ema Viya, vicasiñayare éma, vicasiñavavare eta mayehe eta máítauchirayare tamutu eta máíjararuvanahi, tayanapane vuíchaha vímahaimahi. <sup>2</sup> Ena viáchucanaveanaini, tétavicavahi eta nasuapajiraivahi. Macunachavacahi ema Viya taicha eta nasuapajiraivahi.

<sup>3</sup> Tacutiquene, te visuapa eta máechajiriruva ema Viya, vímatiequeneha eta máepiyasirahi acane eta juca apaquehe, tájinarichahasera eta táimahacarehini. Visuapahi tamutuhi máítaucha eta mapanereruhi, máetupirisirahi tamutu eta vímahaqueneanahi puiti.

<sup>4</sup> Émaripa ema víyarahaini Abel, eta masuapajiraivahi mayehe ema Viya, tétavicavahi eta tajacapacarevahi eta mámahuhu mayehe ema Viya, tacachuricahi eta mámahuhu ema maparape Caín. Tásiha, ema Viya macametarapihi eta majacapacarevahi ema Abel. Puíticha, májinaripahinéni, ánaquiaparipahi eta máepenirahi, tanasihisera eta tacunachacareva eta masuapajiraivahi.

<sup>5</sup> Étapa eta masuapajiraivahivare ema víyarahaini Enoc, vahi máepenamahini te juca apaquehe eta mayaniraya te anuma. Tamutuhi eta máquehe mámahitayehe eta apana vítaresira, eta mámirahi ema Viya. Eta Sagrada Escritura táechajisihahi eta macurisamurechirahi ema Viya. Táitusiava, mámapa éma. <sup>6</sup> Tásihasera víti, te tájinahi eta visuapajiraivainahini me Viya, váiparinehi vicurisamurechaimahi éma. Eta vicaijuheiraya éma, tativayarehi tacamunu yátupina eta vicasiñavaira mayehe, eta majacapirahaviya, viúricacareyare máicha.

<sup>7</sup> Émaripa ema víyarahaini Noé, ticasíñavahi me Viya. Tásiha, tijacapacarepa. Taicha masuapahi eta mavanecasivahi máepiyasirayarehi eta ichapequene pacure, eta macuchucuiyavayarehi éma, énapa ena machichanaveana tayehe eta ichapequene une. Tájinaichahanéni ecutiararenahini eta taquivairayarehi. Máichuhavacavarepa ena apamuriana achaneana nasiapavare. Ticaicuñanapasera, taicha eta namasuapirahi.

<sup>8</sup> Émapa ema víyarahaini Abraham, masuapahivare eta máichuirahi ema Viya, máíjarasirayare eta apana apaquehe mávasayarehi. Tacahe, ema Abraham tíuchucapa te mávasaini, váhinéni máimatihini távihapuca eta macaijuheyarehi. Ticasíñavahisera me Viya eta mámirahi. <sup>9</sup> Eta máitecapirahi, tímiyanava eta macasiñavairahi me Viya. Manasipa macavasahi eta apaquehe máíjararuihi ema Viya, tayanapane vuíchaha mayehenahi eta apaquehe. Tájinavare mapenainahini. Cárpachucha eta mapenahi. (Ema machicha Isaac, ene macahehi eta máítaresirahi, émapa ema mámari Jacob. Taicha éna, énerichuvare natuparacahi eta juca apaquehe návasayarehi.) <sup>10</sup> Émasera ema

Abraham, vahi máeñamavahini. Yátupihí eta macasiñavairahi, ticuchapa-vaichucha eta máijarasirayare ema Viya eta mávasayare máepahacacayarehi eta tíasihaqueneyarehi te mavahuana ema Viya, máetupiriruhi tamutu.

<sup>11</sup> Ésuripa, esu Sara ticasíñavahivare mayehe ema Viya, máitauchayarehi eta máijarasirava eta sucachichairaya, ichavicachicharipahinéni. Macheruhivare ésu. Máijaracahisera ema Viya eta suchicha taicha eta susuapirahi eta máitauchirayare ema Viya tamutu eta máijararuvanahi eta suyehe. <sup>12</sup> Tacahe, ema Abraham ichavicachicharipahivare, mapaenumavapa ticachicha. Tásiha, tiúchucanapa ena camuríqueneana mámariequeneana. ¡Tétavicavahi eta nasimutuvahi! ¡Vaipa natupachacarehini!

<sup>13-14</sup> Tacahe, namutu ena nani néchajisihaqueneana, tímiyanavana eta nasuapirahi ema Viya tamutu eta náitaresiranahi. Tétavicavahi eta nacasiñavairahi eta máitauchiraya eta máijararuvanahi. Te navapureana, náimahapa eta návasaqueneyarehi. Tásiha, vahi náetupiricavahini eta nanasirayare te juca apaquehe. Navarahaipahi náitecapauchavaneyarehi eta arairu avasare natanujiriruhi. <sup>15</sup> Éta tímicaecherachahi vahi nacatiequenehahini eta apaquehe návinénihi, taicha vahi náechajisihahini nachavahini. <sup>16</sup> Natanucahisera eta arairu apaquehe tíuripanahi, eta tiávihahi te anuma. Eta tacache, tétavicavahi eta máurisamurevahi ema Viya eta nayehe, táichavenehi eta nacasiñavairahi eta mayehe éma. Taicha máicuchavacahi eta arairu návasayarehi, émairahi nacaiyaquenehi éma.

<sup>17</sup> Apanavare eta máimerechirahi ema Abraham eta masuapajiravahi, te ticavanahipa eta macapasirayarehi ema machicha Isaac, máijuchirayarehi eta macamavahuiraya me Viya. Vahi macatiequenehahini ema émanaracavahi machicha. Taicha yátupihí eta masuapirahi ema Viya eta máechajiriruva, ani macahehi: <sup>18</sup> “Ema pichicha Isaac, níjaracayare ena camuríqueneana mámariequeneanayare”. <sup>19</sup> Taicha ema Abraham máimatihí eta tamutuirahi máituruequeneha ema Viya. Maratahahi macaechepuca ema Isaac te táequenepa eta máepenirahi. Téhesera te macapacayarepaini ema machicha, ema Viya téchajicapa. Vaipa máisapahini eta macapasirayarehi, taicha máimahapa yátupihí eta masuapajiravahi ema Abraham. Tásiha, tímicitijiricavahini máechepurénahini ema amaperu Isaac.

<sup>20</sup> Émapa ema Isaac, yátupihivare eta macasiñavairahi me Viya eta máitauchirayare eta máechajiriruvana. Te ichavicapa, mabendiciónchapa ema machicha Jacob émapa ema maparape Esaú, mavarairahi najacapayare eta táurinaqueneana máijararuanaya ema Viya.

<sup>21</sup> Émaripa ema Jacob, yátupihivare eta macasiñavairahi me Viya. Te tiánehipa eta máepenirayarehi, énerichuvare mabendiciónchapa ena apinana machichanaveana ema José, mavarairahi najacapayarehi eta náicuchiana. Te títapiricapa tamutu, téneuchavapa me Viya, ticayupaicaripa eta te mayupairiqui.

<sup>22</sup> Émapa ema José, te tiánehipa eta máepenirayarehi, macaechajiriruvapa eta náuchusirayare ena israelítana tayehe eta apaquehe Egipto, nayanirayare te apaquehe náicuchihi. Eta macasiñavairahi mayehe ema Viya, macavanairipipa eta náunasirayarehi eta máperana éma, tásiha, námayarehi te náuchucapa.

<sup>23</sup> Énerichu eta nasuapajiravahi ena ticachichanahi ema Moisés, ticasíñavanahi mayehe ema Viya. Vahi napicahini eta mavanairipiana ema rey eta nacapajisirayarehi ena amuyana ajairana. Eta náimairahi eta

máurinavahi ema amuya, nayumurucapa éma. Mapana caje eta nayumuru-jirisirahi. <sup>24</sup> Tásiha, náitucahi eta sucajurusirahi esu esena rícoquenehi, taicha ésu, machichahi ema rey.

Tacahe, ema Moisés, te ichanarupa énerichuvare tisuapajirahihi. Vahi macatiequenehahini eta majunijiasirayarehi esu ticajurucahi. <sup>25</sup> Váhivare mapicaracahini eta macatajivairayarehi eta macachanerayare ena majaneanana machaneranaahi ema Viya. Vahi tavayuacahini jácani tájiparacana pecatuanahi te apaquehe. <sup>26</sup> Ticasiñavaipahi éma eta tatiarahirayare eta máimahaqueneanayare táitsivanayare eta macatajivairaya táichavenehi eta macatiuchirahi ena machamuriana, tacutihi eta macatiuchirahavihi víti ema Cristo. Tájinahinéni mácamunuhini eta táimahaquenehi tayehe eta avasare Egipto.

<sup>27</sup> Táichavenehivare eta masuapajiraivahi ema Moisés, vahi mapicarahini eta masemirayare ema rey tayehe eta Egipto eta macuchucuiravaca, mámayacahi ena machamuriana israelítana. Tétumechavarichucha taicha ticasiñavahi eta majaneasiravacaya ema Viya, tayanapane máimahasi ema Viya.

<sup>28</sup> Eta masuapajiraivahi ema Moisés, máitauchapa eta mavanairipi ema Viya. Mavanecavaca ena machamuriana nacapacayare eta uvesachicha, nátsiquiriacaya eta iti te tapaja eta napenana, apaesa vahi macuesirujicavaca ema ángele ema tiámayarehi eta náepenira ena náechavimuri te jácani peti.

<sup>29</sup> Énaripa ena machumariana ema Moisés, eta nasuapajiraivahi, naratahahi nánueca eta ichape Mar Titsi. Témunahiricavahi tiájiji te túpicuha eta nayanihayarepahi. Tásiha, ena masuntarurana ema rey te Egipto, navarahavarepa tiánuecana. Tichavapasera eta une. Téricanapa namutu. <sup>30</sup> Táichavenehivare eta nasuapajiraivahi ena israelítana, tiáquipaicavapa naicha eta tayuchamarana eta avasare Jericó, te jena siétequenepa sache eta návicuruarasirahi eta avasare.

<sup>31</sup> Ésuripa esu Rahab túhusini, eta susuapajiraivahi, vahi suépenahini te tépenaracanapa ena masuapajirairahanahi. Taicha ésu sucatiuchapa ena vanairucana me Josué.

<sup>32</sup> Nuvarahahineni numetacahe tamutu eta nasuapajiraivanahi ena apamuriana: ema víyarahaini Gedeón, ema víyarahaini Barac, ema víyarahaini Sansón, ema víyarahaini Jefté, ema víyarahaini David, ema víyarahaini Samuel, énapa ena víyarahaini profetanaini. Nararihivare ena apamuriana, tétavicavahivare eta nacasiñavairahi mayehe ema Viya. Váhisera nunaca támutu te juca eta náijareana. <sup>33</sup> Eta nasuapajiraivahi éna, nararihihi ena titahacanapahi ena nánarana te avasareana. Nararihihi ena apamuriana aquenucanahi, tatupiruhi eta nagobernachirahi eta návasana. Ema Viya, eta majaneasiravaca ena apamuriana, máeratajacachavacahi eta tajacana eta táíñehiqueneana sárareana. <sup>34</sup> Ena apamuriana, macaemahainehivare eta táijurequene yucu te jórnu. Ena apamuriana, macuchucuhavacahi te navaraha náechatinucavacayarehi ena nánarana. Nararihivare ena matumerahanahi, máetumechavacahisera eta nacaemataneasirahi éma. Ena apamuriana, tétavicavapa eta náitupajijiasiravapahi tayehe eta guerra, náitahavacapaipa eta ichapequeneana ejército ena nánaranahi. <sup>35</sup> Natiarihivare ena esenana, eta nasuapajiraivahi, mápechava máimichava ema Viya titarecana ena najaneananaini náepenaqueneanahi. Natiarihivare ena apamuriana náemépenahi eta nacatajivairasamihi. Nacamichahisera tamutu taicha eta nasuapajiraivahi, namavarairahi náinajiacahini ema

Viya, navarairahivare náimahayarehi eta táuricacarequene eta náitaresirayare te náechepucapa. <sup>36</sup> Natiarihivare ena apamuriana, ichapemurihi eta nacaecahirasamihi, ticaestanahivare, táimitiacavacahivare te cadena tayehe eta cárcel te nacaerataiyapahi. <sup>37</sup> Ena apamuriana, natupisiruanapahi te márijahiana eta nacapasirapahi ena achaneana. Ena achaneana, eta návarairahi náiminajicayarehi eta náehisirahi ema Viya, nayuchatihecavare. Ena apamuriana náechatinucavacapahi te espada. Napanajiricavaca ena apamuriana, náimijunavacavarepa te napenana. Tiyananapa témestajiricavanapaipa. Tépacuchavanapa te taparumachichana eta sárareana eta náechuriasirapa eta nacamuirihaquene. Tájinapa naviyavapahini taicha eta napaurevavacapaipa. <sup>38</sup> Ena nani páureanasamí, ichape eta napicau-chacarevainihi. Vaipa náuriahini eta najunanairisirahi te mávapahiana apaquehe eta tataracuana eta máriana, nacapenajuechapahi eta enurujuheana. <sup>39</sup> Jéhesare, namutu ena nani néchajisihaqueneanahi, ticatajivanahi eta náitaresirahi. Majacapavacaipahi ema Viya táichavenehi eta nasuapajiraivanahi. Vuíchahasera náijahúchavahini nacaijaracasihini eta náicuchianahi me Viya. <sup>40</sup> Taicha mavarahahi éma tihetamurichahaviyarepa viti véquenehanahi visuapanahi ema Jesús énapa namutu éna. Vicuticacayarepa eta viúricacarevayare vimutu.

## 12

### *Vicutiyare ema Jesús eta macamichirahi tamutu*

<sup>1</sup> Puíticha víti apanavare vicamichayare tamutu eta vicatajivairana, vácutivaca eta nacamichira ena nani náinapureanahi téhicanahi ema Viya. Taicha puiti éna tímararacahavianahi víti tájahapuca táicharacavahi eta vipaisirahi víti. Eta tacahe, tituparacahavi vínajicayarehi eta táitiasirahavihi eta tájiparacana, tiámaparaurahiana tayehe eta pecatuana. Tacahe, vicamichayare tamutu, táurivaya eta vicaemataneasirahi ema Viya, apaesa vija-capa eta vícuchihi. <sup>2</sup> Vicutiyareva ema Viáquenu Jesús. Éma, tímitucahavihi eta véhiruhi, éma tínapuisinahavivare eta masuapajiraivahi. Tayanapane ichape eta matsirihahi te máimahapa eta macatajivairayare eta macaetatairayare te crusu, vahi machavacuejehavahini. Tétumechavahisera taicha máechahi éma tatiarihihi eta táitsivayarehi. Tétavicavahi eta máurisamureva eta máejasirahi te mayehe trono te mavaure ema Maiya.

<sup>3</sup> Puíticha éta, epanerequenehayare éhicayareva eta macamichirahi ema Jesús tamutu eta macatajivairahi naicha ena ticatianacanahi. Ene ec-aheyare éti, vahi ecuyacujihini, étumechavayaresera eta éhisirahi éma. <sup>4</sup> Táitaurevaquene éti, tájinaichaha ímahahini ecatajivahini táimicapacahehi-pucaini eta ínajiasiraipa eta tájiparacana te juca apaquehe pecatupaire. <sup>5</sup> Vahi ecuemitisica eta máemunasirahehi ema Viya te jácani máemecharasiraheana táichavenehi eta machichaheirahi. Taicha ani tacahehi eta Sagrada Escritura: “Piti nuchicha, vahi picueñamava jácani máemecharasiraviana ema Viya, mavarairahi máetupiricayare eta pipanereruana. Váhivare picuinajicava tayehe eta maconsejachiraviana. <sup>6</sup> Taicha éma, máemecharacayarehi nácani máemunaruanahi machichanaveanahi” tacahepa. <sup>7</sup> Tacahe, ecamichayare éti jácani máemecharasiraheyare ema Viya táichavenehi eta máemunasirahehi eti machichanaveana. Tácuti mácani achane, te matiarahi ema machicha, tímerecavahi eta tacaiyairahi eta mapena eta máemecharasirahi ema machicha, mavarairahi máetupiricayare eta mapanereruana. <sup>8</sup> Yátupihhi eta máemecharasirahavi ema Viya vimutu viti machichanaveana. Téhesera te tacuija ímaha eta máemecharasiraheana éma, máimerecaripa éma vahi



yátupinahini machíchahénahíni. <sup>9</sup> Tacutihi eta vijurusirahi víti te amuyahavirichaha. Témecharecahavihi ena ticachichahaviana, visuapavacapa táicha. Tásiha, tavetijipa eta visuapirayarehi ema Tata Vicaiyaquenehi apaesa éma tíjaracahaviyarehi eta táurivayarehi eta vítaresiraya. <sup>10</sup> Ena ticachichahaviana, ánipirichu eta náimitusirahavihi jácani eta navarairahi éna viúriyarehi nayehe ena achaneana. Émasera ema Viya, tiúripanahi eta vímitucasivahi mayehe. Éta tiápajucava tiúrichahaviyare. Tépacinachahaviyarehivare éta. Mavarahahi vicutiyaehi eta masantuvahi éma. <sup>11</sup> Jéhevare, te tatiarihipuca eta vicaemecharahirana, vahi viúrisamurémahi táicha. Ticatihi visama. Téhesera te vétupiricava táicha, tétavicavayarehi eta viúricacarevaya te visamureana taicha tatupiruhi eta vítaresira.

### *Tétavicava tavarahacareva te visama eta máechajiriruva ema Viya*

<sup>12</sup> Tacahe, nuparapenaveana, nutuparacahe étumechacaca nácani nayacujihipuca. Ímicatacaca eta etupihaira muraca eta éhisirahi. <sup>13</sup> Énerichuvare eta ecaijuheira eta me Viya, etanucayare tatupiruina eta ecaijuheira eta me Viya, etanucayare etupiruina eta eyanirayare. Vahi ecuepiñuñuica, machu náevejuca ena matumerahana ena téhicaheanahi te équene. Táuri eta iámiracacaina, apaesa nacaravahuyare náetupirica eta napanereruana, náetumechavavare énajiva.

<sup>14</sup> Tacuijavare ecuichiravainahi nayehe namutu ena achaneana. Yátupina eta epachinavaina te esamureana étapa eta iúriya eta ítaresirana. Taicha te vahi tiúrihi eta ítaresirana, vahi eratahaimahi ítecapaucha ema Viáquenu. <sup>15</sup> Ejaneacavaicha yátupina, machu etiarhipuca eyacujihí, tásiha émepurureca eta máimicatasirahe ema Viya. Tacuija eta ecuimipananajicava eta esemirana. Machu tapareacavaca ena echamuriana eta evainarajivana, tacuti jácani sucureca máurirahana, tapareacayare eta apana sucureca táurinaquenehi, táimicapacapa. <sup>16</sup> Nacuijavare te etaracu nacuveha esu apana esena. Nacuija nacuepuru jácani típicauchacareanahi. Vahi ecucuti ema achane ticaijare Esaú. Éta mavarairahi tíjahúchava tinica, máijararecapa eta máicuchinihi mayeheníhi, taicha éma, máechavihi ema maparape. <sup>17</sup> Écharichuhi éti, te táequenepa, te mavarahainipa majacapa eta mayehe bendición ema maiya, vaipa majacapacarehini, mametainipa tíyahahi. Vahi maratahahini ticajimuyacahini ema maiya.

<sup>18</sup> Éti, tájina étaparacaina eta napisirahi ichapequenehi ena achaneana israelítana, acane te náitecapauchapa eta cerro Sinaí. Éta jara cerro, tatiarihihi eta yucu timuruhi te tápusi. Énerichuvare te távihahi eta timapicuquenehi, távihahivare eta táíñehiquene emarere. <sup>19</sup> Muracaquene eta machuja ema ángele. Muracavare eta mahu ema Viya eta máechajisiravacahi éna. Ichapequenehi eta napisirahi ena tisamanahi. Éta tacahe, tiyaseserecanapa vaipa macuechajicavacahini. <sup>20</sup> Éta napicacarasiravahi, navaraha tichavacuejichavana. Ichapequenehi eta tapicahucareva eta cerro, taicha tatiarihihi eta muraca vanairipi, ani tacahehi: “Ecapaca nácani achane, jácanivare sárare tiápanapuca te juca cerro. Ecapacavaneyarehi te márijahi, te váhipuca ticayavarayarehi te lanza” tacahepa. <sup>21</sup> Tacahe, tétavicavahi eta táíñehiva, émaripa ema Moisés ani macahehi: “Nuyayacarenecha eta nupisirahi” macahepa. Nuparapenaveana, numetacahe: Tájina étaparacaina eyehe tamutu eta juca típicaicareanahi.

<sup>22</sup> Étisera tachichaheanapa puiti eta mávasa ema Viya Vicaiyaquene, ticaijare Arairu Jerusalén\*, eta távihahi eta cerro Sión te anuma, te náurujisihavahi ena camuriqueneana ángeleana eta najirauchirahi ema Viya. <sup>23</sup> Éti esiapapa eta nasimutuva ena ecutiqueneanahi machichanaveanahi ema Viya. Ecajucunavare eta nalista. Natiarihipa ánaqui eta náchanevana ena machichanaveana náepenaqueneana. Natupiruhi eta náitaresirahi. Tipachinavaqueneanaripahi puiti, sántohivare. Matiarhivare ema Viya, yátupiquenehi Juese viyehe vimutu víti. <sup>24</sup> Matiarhivare ema Jesús ema tiyaseurahiquene eta viyehe. Émahi ema tiámahi eta arairu matratune ema Viya. Émaripa máepusaicapa eta máítine tasipahacahaviyarehi, apaesa vijacapacareyarehi me Maiya. Eta máítine ticunachacarepanahi tayehe eta máítine ema víyarahaini Abel.

<sup>25</sup> Eta tacahe, échapavaicha éti. Vahi ecuepuru eta máichuarapianahi ema Jesucristo. Machu ácuti ena tépuruanahi eta mavanairipiana ema Viya, máimiturapianahi ema Moisés. Étapa tímicuñacavacahi éna. Vivetijinapapuca víti eta vícuñayare, te vicaepaquecupuca eta máichuarapiana puiti ema Viáquenu, taicha éma tiásihahi te machacaya ema Viya te anuma. <sup>26</sup> Taicha eta acane, eta mahu ema Viya, tétavicava eta tamuracava. Tiyayacarehi taicha eta apaquehe. Puítisera, ani macahehi éma: “Étaherineyare tiyayacare nicha eta apaquehe. Váhiserá tácarichuimahi. Éneyareichuvare te anuma” macahepa. <sup>27</sup> Eta juca máechajiriruvahi, tímaticareipahi eta táitavirayare tamutu jácani tiyamuricanahi máepiyaruanahi ema Viya te juca apaquehe. Tacarichu tanasiyare jácani máitavacacaqueneana taicha mayamurianahi.

<sup>28</sup> Étaripa eta mávasa ema Viya, mavarahaquenehi máimiávihahavihi, máitavacacaquenehi éta. Eta tacahe, vihasulupayachaparaca éma. Vétaviuchainavare eta vipicauchiraya éma. Tásiha, vicurismurechaina éma eta vivapinava ichape eta vijirauchirahi éma. <sup>29</sup> Taicha ema Viáquenu macutihi eta yucu, maratahahi máitaequeneha mámainuca.

## 13

### *Vicurismurechayare ema Viya*

<sup>1</sup> Tiuri, nuparapenaveana, vahi ecucainajiruva eta émunajirisiracacahi, táichavenehi eta echamuricacairahi te mavahuana ema Viya. <sup>2</sup> Vahi ecuemitiscava eta táurirayare eta ejacampiraya ena echimarana te epenana. Taicha tajuricati ángeleanainapahi nácani tipaipiuchaheanahi, éta vahi ecumatihí.

<sup>3</sup> Énerichuva échayareva nayehe ena ticaeratana. Ejapanuvaca éna, táimicujiricavahini étinahini ecaeratahini ecachanevacahini. Énerichuvare ejapanuyare nácani náemejapanuráruana taicha éna étarichuhi eta náqueheana tacutihi eta iáqueheana éti.

<sup>4</sup> Ámutu epicauchacaca éti ecaimaqueneanaripa: eti esenana, étipa eti ajairana. Taicha máimaha tiuri ema Viya eta evehacacairahi. Tacuijaserá eta échipeacava eta evehacacairahi ena apanana. Ema Viya máicuñacayarehi nácani tivehacacanahi vahi nacuchapahini náitauchavahini, énapa ena ticayepacacanahi.

<sup>5</sup> Váhivare tacuvayuacahe eta plata. Taratarichu tacurismurechahe jácani ítrevahi ecayehequenehi. Ema Viya ani macahehi eta máechajiriruvahi: “Vahi nujunijicavimahi, váhivare némitisicavimahi” macahepa. <sup>6</sup> Tacahe, vicasiñavayare mayehe ema Viya te viyaseaca. Ani vicaheyare te visamure:

\* **12:22** Te pivaraha pecha eta apana tayehe eta Arairu Jerusalén, pitanuca te libro Apocalipsis 21.2-27 étapa 22.1-5.

“Ema Viáquenu ema tímicatacanuhi. Vahi nupicaimahi jácani náichiranuhi nácani achaneana” vicaheyare.

<sup>7</sup>Échavayare ena tímitucaheanapaini tímisamaheanahini eta máechajiriruva ema Viya. Natupiruhi eta náitaresiraini. Éti, epamicava ecutiya éna eta nacasiñavairahi me Viya.

<sup>8</sup>Ema Viáquenu Jesucristo, vahi máitsivacha eta máurivahi eta viyehe. Manasihi puíticha, étapa eta apajarahiyare. <sup>9</sup>Eta tacahe, vahi ecuisapava ecuehica eta jácani apanapenenejiqueneana náimiturapiana. Tiúripa étumechayare eta esamureana, táichavenehi yátupiquene eta máemunasirahavihi ema Viya. Étapasera eta nayeherepiana tayehe eta tinicacareana, vahi étaparacaina taicha tájinachucha támicatacavacahini ena ticayeherepianahi.

<sup>10-11</sup> Eta nayeherepinihini ena tiyujaracarahiana tayehe eta santuario te Jerusalén, natuparahahi eta nanicasarehi eta námavahuana ena achaneana. Étahi eta navachachahi eta nacaemataneasirahi. Étasera eta sárareana námavahuanahi, navarahahi tacaepahayarehi eta napecaturana, éta, tituparacavaca vahi nacunicahini. Étachucha eta táitine mámahi ema náquenu ena tiyujaracarahiana tayehe eta téqueneha cuarto Lugar Santísimo. Étasera eta táqueheana, náijuchaqueneyarehi te tachachacu eta avasare. Vítisera, mararihi ema apana tiyujaracarahi eta viyehe, apanapavare eta mayujarouchirahavi. Vahi énaparacaimahi ena náinapureana tiyujaracarahiana. <sup>12</sup>Ema Cristo, ticatajivahi eta máepenirahi te tachachacu eta avasare, mavarairahi máepachiacahaviyarehi viti achaneana tayehe eta máitinerichu éma. <sup>13</sup>Tacahe puiti, vínajicavayarehi eta nayeherepiana ena vijaneanana. Vahi étaparacaina viyehe. Yátupina véhicayare ema Jesús. Tayanapane vicatajivayarepuca, vicutiyaresera éma eta macatajivairahi. <sup>14</sup>Taicha te juca apaquehe, tájina vahi táyeremahi eta avasareana étapa eta tayeherrepiana. Vítisera tachichahavipa eta avasareyare arairuyare. Apanainapa eta viyeherepiana víchaqueneanayare. Tétavicava eta vijamurachirahi viyápávane. <sup>15</sup>Tásiha puiti, eta véhisirahi ema Jesús, tavaraha eta vijirauchiraparacayarehi ema Viya tamutu sácheana, yátiana. Te jácani tájahapuca víchararacava, váhasulupayachavare éma. Eta juca eta viámavahuhi eta mayehe. Éma vicavapajayarehi. <sup>16</sup>Énerichuvare, vahi ecuemitisica eta íchirahi eta táuriqueneana. Ecajiyareva ena echamuriana eta ecayehequeneana. Eta tímicutijiricavaipa eta iámavahuhi me Viya. Éta ecurisamurechirahi éma.

<sup>17</sup>Esuapayareva nácani tímitucaheanahi, evapinavayare nayeherepiana eta esuapajiraivahi. Taicha éna, tijaneacaheanahi eta iáchanevanahi éti. Náechahi éna eta ticayaserehianayarehi te mamirahu ema Viya. Ecurisamurechavaca éna eta esuapajiraivahi, tavapinacarénapa eta nacaemataneasirahena éti. Vahi ecuímpanerechavaca eta eyacujiva, emasuapajiraivapuca.

<sup>18</sup>Eyaseuchanuyare núti te eyujarasirana. Nucasiñavaipahinéni núti táurivaipahi eta nupanereru. Tájinapa níchiravainahini. Nuvaraha níchayare eta táuriqueneana nayeherepiana namutu ena achaneana. <sup>19</sup>Nuvarahasera eta eyaseuchinanu me Viya, máisapanuhini éma níjahúchavahini nuchavahini eta eyeherepiana.

### *Ema Apóstole mayaseuchavacahi ena machamuriana me Viya*

<sup>20</sup>Ema Viya, tétavicavahi eta macanarasirahavihi eta vipanereruana. Éma tétavicavahivare eta máitupajijiasirava taicha macaechepecahi ema Viáquenu Jesucristo te máecari, apaesa émayarehi yátupiquenehi Pastoryare,

tijanearahi viyehe viti machichanaveana. Tisipahacahavipa eta te máitine apaesa máitavacacayarehi eta vicachanerayare éma. <sup>21</sup> Núti nuyaseuchahe me Viya, máimicatacahehini ítauchayare tamutu eta mavarahaqueneana, íchirahi eta táuriqueneana apaesa ecurisamurechahini éma te tamutu eta ítaresira eta éhisirahi ema Machicha Jesucristo. ¡Máitavacacayare eta vicunachira ema Cristo! Amén.

*Eta táichecuaraqui eta natuparacasivahi*

<sup>22</sup> Nuparapenaveana, nuvaraha nuyaseacahe á cayehéni paciencia tayehe eta juca nuconsejarapihi eta eyehe. Ánipichichahi nájurehi tayehe eta juca nucartane. Jararihisera camuriqueneana eta apana nuvarahahi numetaruhayahini. <sup>23</sup> Numetacahevare ema viparape Timoteo tiúchucuharipa te cárcel. Te máitecapavanepuca éma, nucachaneyarepahi te níteca eta ara eyehe. Nuvarahahi nímahapanahe.

<sup>24</sup> Néchajicahe emutu eti ejanearahiana ena vichamuriana. Échajisina-nuvaca namutu ena vichamuriana vicutiqueneanahi tisuapajirahianahi te jácani návihahi éna. Ani te juca, nucachanevaca ena vichamuriana náiteruana te Italia. Téchajicaheanavare éna.

<sup>25</sup> Nuyaseuchaheparaca emutu éti me Viáquenu Jesucristo, táetaviuchahini eta iúricacarevaya máicha. Amén.

Tamutupa eta juca néchajiriruvahi eyehe.

**Eta macartane ema Santiago nayehe ena  
majaneanana machamurianahivare,  
náejanerepairuanahi te avasareana, ticaijare  
SANTIAGO**

<sup>1</sup> Nuti Santiago, mavanaranuhi ema Viya, mavanaranuhivare ema Viáquenu Jesucristo. Nuvaraha nucaitecapa eta juca néchajiriruva eyehe emutu eti nujaneanana israelítana éjanerepairuanahi te tamutu avasareana.

*Eyaseacayare eta ítupajjiasiravaina*

<sup>2-4</sup> Nuparapenaveana, nuvaraha nuconsejachahe: Te tatiarihinapuca eta ecatajivairana puiti juca ítasesirahi, vahi ecucainajiruva. Evapinavachucha, ácasíñava mayehe ema Viya. Taicha te yátupina ecasiñava mayehe, vahi tiáquipaicahémahi ema Váinaraji. Énerichuva ácamicha yátupina jácani apana táitecapaureheanaya. Ácuti nácani achaneana náitucahi ticaratacavana. Mavarahahi ema Viya tátupiruvahini eta ítasesirana. Eta tacahe, te tatiarihipuca eta ecatajivairana, ecaurisamurechavachucha. Evapinavaya, taicha iúripanayare eta iúchucuirayare.

<sup>5</sup> Tacahe, te tatiarihinapuca eta téchacare, te váhipuca íturuequenehahini, eyaseacayare ema Viya eta ítupajjiasiravaina. Éma, tíjaracaheyare, taicha tájina mayavana éma. Váhivare ticajachahavimahi eta viyaseasirana jácani vicamunuqueneana. <sup>6</sup> Yátupinahisera ácasíñava me Viya eta eyaseasirana yare eta ítupajjiasiravaya. Vahi ecueñamava mayehe. Taicha te éñamavapuca, tímicitijiricavaipahi ecutihi eta táepacuruha eta une téquequerecavahi. <sup>7-8</sup> Taicha nararihi ena téquequerecavanachucha eta napanereruana. Vahi étanainarichuhini jácani navarahaquenyare náicha. Nácani tacahehi eta napanereru, éna tájina máijaracaimahi ema Viya.

<sup>9</sup> Émaripa mácani vichamuri, te páurehipuca eta máitasesirahi, tivapinavayaresera taicha eta máimicatasiraipa ema Viya taicha eta máemunasirahi. <sup>10</sup> Émaripa mácani vichamuri rícoquenehi eta máitasesirahi, énerichuvare tivapinavayareva, tayanapane títahapuca eta máimahaqueneanahi. Taicha eta vímahaqueneanahi te juca apaquehe, vahi táeñamacarehini, taicha títavayarehi tamutu. <sup>11</sup> Ánipirichu eta táurinajiva eta flureana; taicha te járajapapa eta muracana sache, tacajiyujicapa. Tamutu títava eta táurinajivainihi. Témiricaipavare eta taflurena. Ene macahe mácani rico, vahi tánasimahi eta máimahaqueneana, tayanapane vahi macuvaraha táitava, máitucahipuca eta macaematánera.

<sup>12</sup> Tétavicava eta náurivayare nácani vichamuriana ticamichanahi tamutu eta nátajivanahi. Járajapayare eta sácheanayare eta najacapiraya eta táitsivayarehi maicha ema Viya, máijaracainapa eta táurivayare eta náitasesirayare, taicha ticunachacareanahi. Tacahehi eta mapanereruhi ema Viya nayehe ena témunacanahi éma.

*Máisapa ema Viya eta jácani víchavaquenevanaya, mavarairahi tétupiricahaviyare*

<sup>13</sup> Téhevare tatiarihinapuca eta éjecapiravaya jácani tamauriqueneanahi, vahi émaimahi émeteaca ema Viya. Taicha vahi tásihaquenéna me Viya eta juca tájiparacana. Nájinavare mapamiruimahi náichahini eta júcana. <sup>14-15</sup> Nácanisera náquipairuvana tayehe eta tamauriqueneana, táuchurepa te



napanereru tauriqueneana, tásiha navaraha náichayarehi eta pecatua. Vaipa nanecapavahini eta náichiraipa. Téhesera te táequenénapa, étapa tiviuchayarehi. Tíñehicha eta táimicapasiravacaina.

<sup>16</sup>Némunarqueneana nuparapenaveana, machu éjcapava tayehe eta juca numetaruheanahi. <sup>17</sup>Ema Viya, étanarichuhi eta mapanereru. Vahi apananenejinahi eta máuriva viyehe. Éma, tíjaracahavihi viti achaneana eta majaraiva, étapa tamicahuhi eta viáchanevana. Taicha tamutu eta juca táuriqueneanahi vijacapaquenehi puiti, tásihaqueneanahi me Viya. Vahi apaesajiruinaichuhini eta táurivahi. Jéhevare eta yátupiqueneanahi. <sup>18</sup>Taicha acane tacahehi eta mapanereruana, mavarairahi vijacapayarehi eta yátupiqueneanahi máechajiriruvana apaesa machichahaviyarehi. Eta máitsivachirahi eta viáchanevana, ticaecherahi máitsivachayarehi tamutu eta apamuriana máepiyaruana te juca apaquehe.

### *Vímerecavaya yátupi eta visuapirayare eta máechajiriruva ema Viya*

<sup>19</sup>Eta tacahe, eti némunarqueneana nuparapenaveana, nutuparacahecha yátupina tauri eta esamiraina eta máechajiriruvana ema Viya. Vahi ecuijajahúchava esema. Epanerechinava eta échajisiraya. <sup>20</sup>Taicha nácani tiseमारairihiana, vahi étainahini náichahini eta mavarahaqueneana ema Viya. <sup>21</sup>Puiti te juca vítaesirahi, jararihi eta tavarairahi vipanerechaya tayehe eta tájiparacana, tamaeperajisira eta viáchanevana. Tétavicavavare eta tapamisirahavihi vicha eta tauriqueneana. Puítisera nutuparacahe: Ínajicapa tamutu eta júcana. Ecasamureyareva eta máechajiriruva ema Viya eta ímitucasi vanahi. Yátupina esuapa. Jéhevare, éta ticuchucuhayare eta iáchanevana.

<sup>22</sup>Ítauchayare eta tametarapianahi eta máechajiriruvana ema Viya. Vahi tacuejcapava eta epanereruana, machu ímijachapuca taratarichuhi eta esamararasirahi. <sup>23</sup>Vahi ecucuti nácani nasamarararuchucha, tásiha vahi náitauchahini eta tavanairipihi, tímicutijiricavaipa nácani tímacunachavanahi te espejo. <sup>24</sup>Tásihasera, vahi nasipacahini eta náimahaquenehi nachipeuquivahi. Tásiha, tiyananavanepa, náemitisicavanepa. <sup>25</sup>Étisera ecutiyare ena natupiruvanahi eta nasamirahi táuriva eta yátupiqueneana vímiturapiana tásihaqueneanahi me Viáquenu. Vahi ecuemitisica. Tásiha, ítucayare enerejica eta táuriqueneana, esuapayareva eta ímitucasi queneanahi. Tásiha, tétavicavaya eta iúrivaya táicha.

<sup>26</sup>Nararihipuca nácani tímijachavanahi religiósosana. Téhesera vahi náitucahini ticaratajacachavana, ena nani téjcapavanahi eta napanereruana. Tájinachucha vahi émainahini nasuapahini ema Viya. <sup>27</sup>Vítisera, eta vítauchirahi eta yátupiquene téhicacare, te vivaraha tájina véchajisiacarevaina te mamirahu ema Tata Vicaiyaquene, tatuparacahi vijapanuyare vítátiyare ena amaperuana váchachichana énapa ena náepenaimaqueneana tayehe eta nacamunuiravanahi. Tituparacahavihivare vahi víchaimahi eta pecatua te juca apaquehe.

## 2

### *Nácuticaca ejacapa ena achaneana*

<sup>1</sup>Nuparapenaveana, éti éhicanahi ema máitupajijahaquenehi Viáquenu Jesucristo, vahi táuricahini enerejicavaca ena echamuriana ejacapaqueneanaya. <sup>2</sup>Étaripa te natiarihinapuca nácani nasiapauchahe te iúrujisirarevana íchirana eta culto, vahi macarichuimahi tiuri eta ejacapiraya mácani tíurinahapahi eta macamuirhairahi, ticasurutijapahipuca eta oro. Énerichuvare ejacapayare mácani paure, tévichíjihapahípuca. <sup>3-4</sup>Taicha téjcapavahi eta epanereruana,

te macarichuhi mácani tiúrinamuirihapahi, échapajiricahi eta ecaejasirahi, mácanisera paure, te váipapuca ecuechajiricahi, váipapucaini ecuijaracahi eta máejasiha, tasapiha evanecainapapuca téjahapaica. Éti, vaipa étupicavaimahi eta juca enerejisiravacaichucha nácani ejacapaqueneanaya.

<sup>5</sup> Némunarqueneana nuparapeneveana, esamanuchaha. Ena páureanahi te juca apaquehe, majacapavacahi ema Viya, táichavenehi eta nacasiñairahi ema Machicha. Éna, tiápajupananahi eta náurivaya taicha ena ticaicuchianahi eta mávasa ema Viya taicha machaneranahi. Nacachaneyarehi ena apamuriana témunacanahi éma. <sup>6</sup> Étisera evarahapa ímitsirihavaca ena páureana, nasapihapa échapajiricahi ena rícoana. Ticutiripa vahi ímativacahini eta náemeratasiraheripa, te apaesachichapa éjecapava. <sup>7</sup> Ticutiripavare vahi ímativacahini eta nacaecahirahi ema Cristo, nacaecahihivare eta íamirahi eta máijare tacapicahuquenehi.

<sup>8</sup> Puítisera éti, yátupiyare ítaucha eta ticunachacarepanaquenehi mavanairipi ema Viya tayehe eta Sagrada Escritura. Ani tacahehi: “Pémunacayare ema piparaepiya tácuti eta pémunasiravahi píti”. <sup>9</sup> Téhesera enerejicaichucha nácani émunaruanahi, ecapecaturaichucha eta emasuapirahi eta mavanairipi ema Viya, éta tiviuchaheya. <sup>10</sup> Taicha te natiarihipuca nácani náitaucha tamutuyaréni eta vanairipiana, téhesera apaesarichu eta néjecapiravahi, étapa tiviuchahi eta náicuñayare, tímicutijiricavahi vahi náitauchahini. <sup>11</sup> Taicha ema Viya, ani tacahehi eta mavanairipihini: “Vahi picuveha esu apana esena. Váhivare picucapareca”. Piti, te váhipuca pivehahini esu apana esena, picaparecahiserapuca, piáviraichuhi picaviurevahi.

<sup>12</sup> Íúrihainehi ejacaparalihini nayehe namutu, táurihini eta échajirisiravana. Vahi ecuemitisica eta tatiarihiraya eta sache ecayaserehiraya tayehe eta juca vanairipiana. Étara tétupiricahavihi. <sup>13</sup> Taicha nácani majapanurairahanahi nayehe nácani apamuriana, tájinavare najapanucarevaimahi te nacayaserehipa. Nácanisera tijapanurahianahi, ichape eta najacapacarevanaya me Viya te jena sáchezare.

#### *Vímerecaya eta visupajiraivaya étapa eta vicaemataneasiraya ema Viya*

<sup>14</sup> Nuparapenaveana, nuvaraha níminicapaequenehaheyare. Te natiarihinapapuca nácani nacahehi: “Núti nusuapa ema Viáquenu”, tásiha vahi náichahini eta táuriqueneanahi, vahi tisuapacare eta náechajiriruvahi. Németeaca vahi yátupinahini nasuapahini ema Viáquenu. <sup>15</sup> Nuvaraha nímicutichinaheyare eta juca. Te mararihipuca mácani vichamuri ticamunuvahi eta mamuiriharapiyare, manicaquenerepipuca te sácheana. <sup>16</sup> Tásiha, mácani echamurihi tépiyacavahipuca tijapanurahihini. Máichahipuca: “Páurevisami piti, te picasarechahipuca, pépacuchava. Te pécuhapuca, pinica”. Tásihasera, te vahi máijarachahini eta macamunuquenehi, tamapurujichucha eta máichirahi. <sup>17</sup> Ene vicahe viti véhicana ema Viáquenu. Te vahi víchahini eta táuriqueneana, tamapurujichucha eta véhisirahi, vaipa tásuapacarehini.

<sup>18</sup> Tiuri puiti, németeaca etiarhiyarepuca eti épuruyare eta juca numetaruheanahi. Áninapapuca ecaheyare: “Tarataripa eta vicasañavairahi me Viya. Vaipa étaparacaina víchahini jácani apamuriana táuriqueneana” ecáhe-  
napapuca. Nútisera numetacahe: Vahi tisuapacaremahi eta ecasiñavairahiji, te vahi íchahini eta táuriqueneana. Taicha eta íchirahi eta táuriqueneana, étapa tímereuchaheya eta yátupirahi eta ecasiñavairahi mayehe ema Viya. <sup>19</sup> Éti ímijachaipapuca tarataripahi ticuchuchaheyare eta esuapirahi eta

matiarahirahi émanarichu ema Viya. Táitaurevaquene esuapahi eta matiarahirahi ema Viya. Apanasica ena éreanana nasuapahivare eta matiarahirahi ema Viya. Tayanapane eta nasuapirahi, váhiquene tiúchucuhanaimahi éna. Énaripa, tiyayacareanahi éna te nasama eta máijare ema Viya. <sup>20</sup> ¿Vuíchahacaru ácaicutiarahini? Tiuri puiti, níminicapaequenehaheyare, taicha nuvaraha ácaicutiara: Tacamunuhi íchayare eta táuriqueneana tacachaneyarehi eta ecasiñavairahi. Tamapurujicha eta ecasiñavairahi te vahi ecuquichahini eta táuriqueneana.

<sup>21</sup> Nuvaraha némechahe mayehe ema viáchucaini Abraham. Eta acane, émaripa macaitsamarajihí ema Viya, te yátupihípuca eta masuapajiraiva. Mavanechahi máechatinucayarehi ema machicha Isaac. Tacahe, ema Abraham, máechatinucayarepáini ema machicha, máimeresirayarehi eta masuapajiraivahi yátupi. Eta tacahe, ema Abraham, tétavicavahi eta majacapacarevahi mayehe ema Viya. <sup>22</sup> Étara ícutiaraya eta juca masuapajiraivahi yátupi ema Abraham. Vahi máeñamahini ema machicha eta mavarairahi máimerecayare yátupihí eta masuapirahi. <sup>23</sup> Taicha eta táechajiruvahi eta Sagrada Escritura, ani tacahehi: “Ema Abraham masuapahi ema Viya. Tásiha, tétavicavainehi eta majacapacarevahi ema Abraham. Éma, máemunacasarehi ema Viya”.

<sup>24</sup> Ácaicutiara yátupina eta juca. Viti achaneana vijacapacare me Viya táichavene eta vímeresira eta visuapirahi. Vahi tarataha eta vicaheira: “Núti nusuapa ema Viya”. <sup>25</sup> Níminicapaequenehahe eta acane tacahevare eta súchucuirahi esu esena túhusiquenénihi ticaijaru Rahab. Ésu, ticatiuchavacahi ena vanairucanahi mayehe ema víyaraha Josué, suímicatacavacahivare eta náitujisiravayarehi tijunana nayehe ena ticaratacanayarehini. Eta máimairahi ema Viya eta juca suíchirahi, ichaperinehivare eta majacapirahi ésu. <sup>26</sup> Eta juca tacutihí eta viáquehe te tajunijica eta viáchaneva, enevanerinehi tésamiricava eta viáquehe, tépenavaneyarehi. Ene tacahehi eta visuapajiraiva. Títavavare te vaipa vímeracahi eta viúrivahi, víchirahi eta táuriqueneana.

### 3

#### *Eta vijaca, tamutu tajarareca*

<sup>1-2</sup> Nuparapenaveana, yátupi vimutu véjecapava tayehe eta véchajisirana. Nájina émanaina vahi macuejecapavaini eta máechajisira. Te matiarihinaini mácani achane vahi macuejecapavaini, ichapehini eta macunachacarevainihini, taicha éma, yátupihí eta máitupajijiasiravahi, máitucahivare ticaratacava eta máquehe. Eta tacahe, nuvaraha nuconsejachahe: Tacamunu najaneacava muraca nácani náimereca eta navarairahi máestroanayarehi tayehe eta máimiturapiana ema Viáquenu. Échavayare eta vicayaseserehirayarehi muraca me Viya viti máestroanahi.

<sup>3</sup> Nuvaraha nímicutichinahe. Eta juca tímicutijiricavahi te vicaopera eta cavayu: vinacapa eta freno, vichurujacachapa, viámapa te jácani vivarahaquene viámiha. <sup>4</sup> Tacutiquene eta ichape lancha, táevatajicaneni muraca eta técativaca, étape eta tajunapira muraca eta une, taratahayarehisera táimitupirucha eta tayehe leme váhineni ichapenahini, ema piloto máimitupiruchayarehi te jácani mavarahaquene máimhayarepahi. <sup>5-6</sup> Ene tacahehi eta juca vijaca. Ánichicharichunéni tayehe eta viáquehe. Tasapihahisera táechajisihahi eta ichapequeneana. Tacutiquene eta yucu. Ánichicharichunéni eta táepanirava táijucha, taratahahisera táijucha eta ichapequene vámahí. Nácani achaneana te vahi náitucahini ticaratajacachavana, amairijipa tamutu eta

náitaresira. Tíñehicarehi najarareca ena nácani camuriana achaneana taicha eta náechajiriruvanahi. Ena nani téchajisihanahi eta tauriqueneana, éna mávaháruanahi ema Váinaraji, téchahi eta infierno. <sup>7</sup>Ena achaneana narataha namansucha eta cáyureana étapa eta quichareana étapa eta táíñehiqueneana sárareana tiávihana te apaquehe étapa te une. <sup>8</sup>Étasea eta jacare, nájina ticaratacaina, táechajisihayarehi eta tauriqueneana. Tacutihi eta jumare te nájina tiratahaimahi típuchaina, tiámahivare eta tacapasiravacayare ena achaneana. <sup>9-10</sup>Eta jacare, étarichuvare táuchusiha eta náechajiriruvana ena ticunachanayarehi ema Tata Vicaiyaquene. Ticunachacarehi eta juca. Váhisera ticunachacaremahi te tiúchucahi eta jacare eta náumehaira ena nacutiqueneana achaneana naparaepíyanahi me Viya. Nuparapenaveana, tatuparacahi vahi ecaecahihini ena ecutiqueneana tiámanahi eta macaquehera ema Viya. <sup>11</sup>Tacutiquene eta une, te tipachinahi eta tajututurusirahi te apaquehe, vahi tíjahúchavaimahi titsiriecava, táuchucapucaini tisucareamahini, ticheveamapucahini. <sup>12</sup>Tacutiquene vahi tiúchucaimahi eta aceite tayehe eta tahi eta yana. Étaripa eta narasa, vahi tiúchucaimahi eta tahi siñávehinapahini. Ene tacahehi eta une, vahi tajututurucachini te apaquehe eta tipachina une tacachanepahipucaini eta ticheveama. Nuconsejachahe: Ecutachachucha. Vahi ecumehareca.

*Te yátupihí eta véchemaraivahi, tatuparacahi víchayarehi eta táuriqueneana*

<sup>13</sup>Te natiarihinapuca te etaracu nácani náechemahahi tamutu, tatuparacahi náichayare eta táuriqueneana, yátupinavare eta namansuvayare. Étapa tímicaecherachayarehi eta náitusirahi. <sup>14</sup>Te etiarhipuca eti ímijachavahi échemahahi tamutu, tásiha ecapinarurecarichuchasera te esamureana, evarahapa iápajupanavayarehi nayehe ena apamuriana eta ítupajijiasiravaya, vahi yátupinahini eta ítupajijiasiravainahini. <sup>15</sup>Eta juca échemaraivavacahi, vahi étainahini tásihaquenénahini me Viya. Tayehecucha te juca apaquehe tásihaquenechucha eta ne achaneana, máevaequeneruhi ema Váinaraji. <sup>16</sup>Taicha ena ticapinarujiricacanahi téhajiricacanapa. Vahi tácuticacahini eta napanereruana. Náicharichucha eta tájiparacana. <sup>17</sup>Nararihisera ena yátupiquenehi eta náechemaraiva, tásihaquenehi me Viya eta náitupajijiasiravanahi. Náimerecachi tativa tatupiruvahi eta napanereruhi. Táurivahivare eta náitaresira. Ticatiurahianahivare nayehe ena apamuriana. Tisamarahianavare. Tijapanurahianavare. Eta náichirahi eta táuriqueneana, ticajirahianahi. Nájina nanerejiruina. Tatupiruvahi eta náechajirisiravana. <sup>18</sup>Nácani ticatiurahianahi, náetupiricahi eta náitaresira ena apamuriana. Jéhesare, tájinasarepa náichiravainahi. Nanaquipaicahi eta táuriqueneana.

## 4

*Ema Viya mavaraha vínajica eta tájiparacana*

<sup>1</sup>Puítiripa, ¿tájaha tacayema eta éhajiricácahi? Éti ecuticacahi ena apamuriana eta ejamuraraivanahi. Éta, timaurichahehi eta tájiparacana, étiji-vaichucha íchavahi. <sup>2</sup>Éti ejamurachahi ecaimahaquene. Étasea emaitusiravahi, evarahapa ecapaca ena ticaimahaqueneanahi. Éti ecapinarurecachi. Éta emaitusiravahi, téhacacapa eta échajirisiravana; tásiha, éhacacauchapa. Nuconsejachaheyare: Eyaseaca ema Viya eta ecamunuqueneanahi. <sup>3</sup>Éti eyaseacahinéni éma, váhisera máijaracahehini, taicha vahi táetupicavahini eta eyasesearapiana, étachucha eta tajamurachaqueneanahi eta iáquehe.

<sup>4</sup> ¡Tétavicavapa eta emaetupisiravahi eti achaneana! ¡Éjecapavahi ichape mayehe ema Viya! Evarahapa éhica eta nayeherepianahi ena achaneana masuapajirairahanahi. Tihapapicahepa eta tájiparacana te juca apaquehe. Masapihapa epuruyarehi ema Viya, ecatianacapa éma. <sup>5</sup> Éti ímijachai-papuca táepiyevahi eta táechajiriruvahi eta Sagrada Escritura. Ani tacahehi: “Eta mávahásirahavihi ema Espíritu Santo, téñamahaviripa vahi vihapasamurechaimahi tayehe eta tamauriqueneana”. <sup>6</sup> Étaripa eta máemunasirahavihi ema Viya, tétumechahavihi, mamavarairahi víchahini eta tamauriqueneanahi. Taicha ánivare tacahe eta Sagrada Escritura: “Ema Viya macatianacavaca ena tisiñavavairicana. Máemunacavacahisera máimicatacavacahivare ena mánsuana”.

<sup>7</sup> Eta tacahe, esuapa yátupina ema Viya. Ecanaraya ema Váinaraji, te mavaraha mavayuacahe. Jéhesare, tijunijicahénapa éma. <sup>8</sup> Puiti, yátupina eta epauchirahi ema Viya. Tásiha, ema apanavare tipauchaheyare. Ínajicapa puiti eta íchira eta tamauriqueneana. Émitisicainapa eta ejamurachira eta tájiparacana te esamureana. Taicha éhicasareipa ema Viya. Vaipa ecupanerecha eta nayeherepiana ena achaneana masuapajirairahana te juca apaquehe. <sup>9</sup> Puiti, éneuchava me Viya. Íyauchava táichavenehi eta éjecapiravanahi. Vaipa ecuecarairicava, vaipa ecurisamure eta íchira eta tamauriqueneana. Ácatisamurevasera táichavenehi eta tamutu eta tamauriqueneana íchaqueneanahi. <sup>10</sup> Ecajapanuravayare eta éneuchiravayare te mamirahu ema Viáquenu. Tásiha, tétavicavayare eta ejacapacarevainapa mayehe ema Viya.

#### *Vahi picucaecahi ema pichamuri*

<sup>11</sup> Nuparapenaveana, vahi ecuechajica mayehe mácani echamurihi. Taicha mácani téchajicahi mayehe mácani machamuri, macaechahipuca, mavaraha máicuñaca mácani machamuri. Émaripa máepururipahi eta mavanairipi ema Viya. Nuvaraha numetacahe: Te épuruhi éti eta mavanairipi ema Viya, eta tímicaecherachahehi eta emasuapirahi éma. <sup>12</sup> Ema Viya, émahí ticavanairipihí. Macarichu éma tatuparacahí téchayarehi te tíurhipuca eta náichaqueneana ena achaneana. Téchayarehivare eta máicuñasiravacahí ena téjecapavanahi. Vahi étina tatuparacahéhiní ícuñacahini ena echamuriana.

#### *Vahi vítina vecha eta vítaresira*

<sup>13</sup> Esamanuchaha. Vahi táuricahini ácahehí: “Puiti juca sácheana, achichupuca, nuyanaya te apana avasare. Níjararecaya eta nucayehequeneana. Tiámainucava nuchava te apana año. Ichapeyare eta nuganare-ruyare”. <sup>14</sup> Éti, vahi échahini tájahapuca eta íchavaquenévaya achichu. Taicha vahi evachareruina eta ítaresira. Tacutichucha eta iyaru. Ánipirichu eta tacaecheraira. Tásiha, témitiacaripavare. <sup>15</sup> Íurihainehi ácahehí: “Ema Viya téchahavihi eta vítaresira. Te mavaraha éma, vítauchayarehi eta juca vipaneruhi” ácahehí. <sup>16</sup> Étísera, tétavicavapa eta ecasiñavavaisirahi eta échajisirana. Ticutirinehi étinahini échinavahini eta ítaresirana. Vahi táurihini eta ecasiñavavaisirahi. <sup>17</sup> Némechahe eta juca yátupiquenehi: Mácani máimatihí eta macatuparahairahi máichaya eta táuriqueneana, tásiha te vahi máitauchahini máichahini, ticapecaturaipahi te mamirahu ema Viya.

## 5

*Eta náichavaquenévaya ena rícoana*



<sup>1</sup> Tiuri puiti, nuvaraha numetacahe eta náichararacavaya ena rícoqueneana. Éna, ichape eta nacatajivairayare. Náurihaipa náiyahasamureripahini taicha eta nacatajivairaya. <sup>2</sup> Taicha títavainapa eta náimahaqueneana. Étaripa eta nacamuirihairana eta táurinaqueneana, tanicacamecainapa eta cachusiri. <sup>3</sup> Tájinaapa táichaquenemahi eta naplataneana étapa eta nayehe oro. Ichape eta nacatajivairaya, taicha eta náeñamirahi, tájina náimicatarapínahini. Étainapa tímicuñacavacayare te jena yucu te táitecapapa eta jena sáchezare. <sup>4</sup> Nararihi ena nani rícoqueneana, ichape eta navayuasiravacahi eta navachachirahi ena ticaemataneacanahi eta nayehe. Tatiarihiyaresera eta sáchezare táitecapauchayare eta náicuñayare, taicha ema Viya máimararacahi tamutu, masamahivare eta nayaseserepianahi ena páureanasami músuana. <sup>5</sup> Ena rícoana puiti te juca apaquehe, tétavicavahi eta náuritairesirahi. Tamutuhi nanica eta táurinisiqueneana, tisatuheherecanahi. Tésinanacavanahi nacuti eta cuchi te náesinacha. Éna, títahúchavayare eta náepenirayare, nacutiyare eta tájiahúchirava nacapaca eta cuchi náesinaruhi. <sup>6</sup> Tacutiquene náimicaviurehi náimicapacavare ena matapiravareanahi, náimipanapa eta namaitusirahi tiácapauchavana nacatiuchavahini.

*Vicamichayare tamutu, taicha táetumechahavi eta vicuchapirahi eta machavirayare ema Viáquenu*

<sup>7</sup> Étisera, nuparapeanaveana, ecamichayare tamutu, táichavenehi eta ecuchapirahi eta machavirayare ema Viáquenu. Ecutiyare mácani achane ticaematanerahi. Macamichahi tamutu eta macatajivairana. Tiámainucava te tiúchucuhapa eta máevaru, mapaenumavapa majacapa eta macuchapacuenahi máevaraqui. <sup>8</sup> Ene ecaheyare éti, yátupina ecamicha tamutu, váhivare ecuinajicava eta juca éhiruhi. Ecuchapavachucha, taicha tiánehipa eta máitesirayare ema Viáquenu.

<sup>9</sup> Nuparapenaveana, vahi ecuquicha eta tájiparacana nayehe ena echamuriana. Váhivare ecuemeteaca éna, apaesa tacuija eta táimicatsiriacahe te ecayaseserehipa te mamirahu ema Viya. Écharichuhi éti eta tánehirapa eta máuchujisirayare ema Juez, ecayaseserehinapa.

<sup>10</sup> Nuparapenavechichana, nuvaraha ácutini ena profetanaini eta nacamichirahi tamutu eta nacatajivairahi, táichavenehi eta nacametarairuirahi te máijare ema Viáquenu. <sup>11</sup> Némechahe: Ichape eta nacunachacarevahi eta viyehé nácani ticamichanahi eta nátajivanahi. Écharichuhi eta macamichirahi ema víyarahaini Job. Échahivare eta táuriquenehi máijaracasihi me Viáquenu. Taicha tétavicavahi eta majapanuraivahi ema Viáquenu.

<sup>12</sup> Tacutiquene nutuparacahecha éti nuparapenaveana: Te ecayaseserehipuca, vahi ecuquicha eta juramento te máijare ema Viya, ema tépiyacahi eta anuma étapa eta juca apaquehe. Váhiquene ecuquicha eta juramento. Átupiruvachucha te ítauchayarepuca, “Nítauchayare” ácahepa. Téhesera váhipuca, étupiruvayare “Vahi nítauchaimahi” ácahepa. Apaesa tacuija taviuchahe mayehe ema Viya.

*Tatuparaca eyujarauchacacayare*

<sup>13</sup> Te etiarihinapuca éti ecatajivahi, tatuparacahi éneuchavayare me Viya. Te etiarihinapuca eti iúrisamureanahi, tatuparacahi ejira eta alabanza. <sup>14</sup> Téhevare etiarihinapuca eti ecajumanahi, ímichuhayare ena víyacarana vichamuriana apaesa nayajisicahe eta aceite, te máijare ema Viáquenu.

Tásiha, tiyujarauchaheanayare. <sup>15</sup> Jéhesare, tisamacareyarehi eta nayasea-sirana, táichavenehi eta nacasiñairava me Viya. Tásiha, ema Viáquenu macanaracayarehi eti ecajumaquenehi. Te étapuca tiviuchahehi eta epecaturana, macaepahayareva ema Viya eta epecaturana. <sup>16</sup> Eta tacahe, te tatiarihipuca eta éjecapiravanahi mayehe ema echamuri, eyaseacayare maperdonachahe. Tásiha, eyaseuchacacayare te eyujaraca eta enarasiraina. Taicha tétavicavahi eta tasamacarevahi eta nayujaracasa ena matapiravareana. <sup>17</sup> Émaripa ema vicutiquenéni achane víyarahaini profetaini Elías, te tiyujaracapa éma, tiyaseserecapa vahi tacuquiva. Tisamacarehi éma. Vaipa taquivahini. Mápana año, saisi caje eta tamajinairahi tiquiva. <sup>18</sup> Tásiha, tiápechavavarepa tiyujaracahi. Tiyaseserecapa táemiricahini eta tiquiva. Tiquivavarepa. Tacahe, tiúrinainehi eta evaraquiana te apaquehe.

<sup>19-20</sup> Nuparapenavechichana, te natiarihinapuca nácani vichamuriana téjecapavanahi tayehe eta yátupiqueneana, eti ecatuparaha iúrichavacayarehi éna, econsejachavacayare apaesa nachava éna, náinajicahini eta nájecapiravana. Tétavicavahi eta táurivahi eta íturusiraina eta nachavira, taicha táemesiava eta ecuchucuiravacayare tayehe eta náicuñayarehini, taicha eta táemesiavahi eta táepahairapa eta camuriquenehi eta napecaturana.

Tamu tupa.

## Eta macartane ema Apóstole Pedro, ticaijare 1 PEDRO

<sup>1</sup> Núti Pedro, mayehenu apóstole ema Viáquenu Jesucristo. Nucajurehe eta juca nucartane eti nuchamuriana éjanerepairuanahi ecaquijiqueneanahi tayehe eta apana avasareana: eti iávihanahi te provincia Ponto, eti iávihanahi te Galacia, eti iávihanahi te Capadocia, eti iávihanahi te Asia, étipa eti iávihanahi te Bitinia. <sup>2</sup> Emutu eti, yátupiquenehi eta manerejisirahehi ema Tata Vicaiyaquene taicha tacahehi eta mapanereruhi acane eta táepaniravahi. Émaripa ema Espíritu Santo, tiávahácaheripa máepachiasirahehi eta epecaturana eta te máitine ema Jesucristo, máitsivachinahehivare eta ítasesirana, máimicasirahehivare eta esuapajiraivahi me Viya. Puiti, nuvaraha tajurucaini eta eacutiaraira eta máemunasirahehi ema Viya; tájinavare tahapapiricahini eta táurivahi eta epanereruana.

### *Vijacapayare eta vícuchihi te anuma te tauri eta vítaesiraina*

<sup>3-4</sup> Tétavicavahi eta vicunachirahi ema Viya, Macaiyaquene ema Viáquenu Jesucristo. Tétavicavahi eta majapanuirahavihi, vijacapacarehi mayehe eta macachichairahaviripa. Tásiha, viratahahi vicamichahi tamutu eta viátajivana te juca vítaesirana taicha vicuchapahi eta sáchezare visiapaya eta mávasa ema Viya. Máitavacacayare eta vítaesirayare, táichavenehi eta máechepusirahi ema Machicha Jesucristo te máecari. Ánaqui, tájinapa ticapacahemahi, váipavare íchaimahi eta tamauriqueneana. Máitavacacayare eta iúrisamurereasiravanayare. <sup>5</sup> Puítisera, tétavicavahi eta máitupajijiasiravahi ema Viya eta majaneasirahehi, táichavenehi eta ecasiñavairahi mayehe. Taicha mavaraha ticuchucuhaheyare te jena sache táepaniravayare eta viúritaresiraya.

<sup>6</sup> Puiti, apanapaneyarechaha eta ecatajivairayarechaha. Nucasiñavahisera eyehe éti, vahi ecainajiruvaimahi. Eta ecasiñavairahi me Viya, evapinavaichucha eta ecamichirahi tamutu, taicha ímatihini vaipa táunaimahi eta ecatajivairaya. <sup>7</sup> Ema Viya máisapahi eta juca ecatajivairana, mavarairahi ímereuchavayare eta yátupiquenehi eta ecasiñavairahi eta mayehe. Ecutiyare eta oro te nacaitsamaraji te yucu te yátupihipuca étaquenehi. Étisera étaviviriacahi eta tatumeva eta oro, taicha eta oro títavayarehi, témitiacayarehi. Te vahi ecainajiruva eta ecasiñavairahi mayehe ema Viáquenu, tétavicavayare eta ecunachacarevayarehi mayehe éma eta machimapiraheyare te machava.

<sup>8-9</sup> Éti, vuíchaha ímatihini eta mamira ema Viáquenu. Émunacahisera éma. Ichapehivare eta ecasiñavairahi eta mayehe. Tásiha, ichapeyarehiva eta iúrisamurevaya, tájina eviyaimahi ácayemahini eta ecunachiraya éma, te jena sache iúchucuhainapa eta ítasesiraya máichecuaraquirenapa. Étasera eta táitsivahi eta ecasiñavairahi mayehe ema Viáquenu.

<sup>10-11</sup> Eta juca viúchucuirayare, acaneripahi eta tacaecherairahi. Énaripa ena víyarahanaíni profetanaini nájuequeneharipa tayehe eta Sagrada Escritura eta máitesirayarehi ema ticuchucuhahaviyarehi. Émaripa ema Espíritu Santo máitametacavacahi éna eta macatajivairayarehi éma Cristo étapa eta machavirayare tayehe eta táurinaquenehi mávasa. Énasera ena profetana vahi náimatimahi tamutu. Navarahahi náimatiyare ¿nájahapuca ema máiteruyarehi? ¿Tájahapuca eta máijareya? ¿Tájamuhuyarepuca eta máimeresiravaya?

<sup>12</sup> Émasera ema Espíritu Santo (ema másihaquenehi te anuma), mametacavacapa vahi náimahaimahi ema Cristo, taicha camuriyarehi eta áñoana eta máitecapiraya. Vítipasera puiti viti vítareruanaichaha, vítipa vímatihí éma. Te vicametarairupa mayehe ema Jesucristo, ema Espíritu Santo títametacahehi te esamureana. ¡Tétavicavayare eta viúricacarevayare víti, te viúchucuhapa! Énaripa ena ángeleana, ichape navarahahi náimatihini tájahapuca táichararacavayare eta viúricacarevayare.

*Ema Viya, eta máichuirahavihi, mavarahahi tépachinachahaviyare eta vítaresirayare*

<sup>13</sup> Eta tacahe, ecaratacava tayehe eta epanereruana, táurivainavare eta ítaresiraya. Ecasiñavayare eta ejacapirayare eta ícuchihi me Viya, máijaruheyare te machavapa ema Viáquenu Jesucristo. <sup>14</sup> Ímrecavayareva eta machichairahahi, esuapajirahiyare. Vaipa ecuquicha eta íchaqueneanaini eyeherepianaini cape juca te vuíchaha ímatihini ema Viya. <sup>15</sup> Puítisera, sánturuhahénapa eta ítaresirayare. Taicha ema tíchuhahahi, tétavicavahi eta masantuvahi. <sup>16</sup> Taicha ema Viya, ani macahahi eta máechajiriruvahi tayehe eta Sagrada Escritura: “Nuvaraha sántuhéna eta ítaresiraina, taicha núti, yátupiquenehi eta nusantuva”.

<sup>17</sup> Te eyujarasirana éti, ani ecahehi: “Tata Vicaiyaquene” ecahehi mayehe ema Viya. Ímatiyare yátupi éma eta nájinairahi manerejiruina, tacutiquene eta máemecharesirahi ena téjecapavana, máitsivachavacahivare nácani tíchanahi eta táuriqueneana. Tacahe, yátupina eta epicauchiraina éma tamutu sácheana puiti juca ítaresiraichaha te juca apaquehe. <sup>18</sup> Ema Viáquenu Jesucristo ticuchucuhaheripa tayehe eta tamaurivainihi eta ítaresirana, íamapiricaichaha eta nayeherepianaini ena iáchucanaveánaini. Écharichuhi éti eta mavacharesirahahi ema Cristo eta iúchucuirahi, váhisera te plátainahini, óroinahipucaini. <sup>19</sup> Étasera eta máítine máepusairuhi éma eta mavacharesirahahi, étivenehi ímijararecahi éma, cútiripa te cájararecasi eta uvesa matapiravarequenehi. <sup>20</sup> Acane te tépanavainapa eta apaquehe ema Viáquenu Jesucristo ticatuparahaipa tacaheyarehi eta máepeniraya. Váhisera táitauchavavanehini. Tapaenumavapa puiti, títauchavahi eta étavenepa eta iúchucuirayarehi éti. <sup>21</sup> Énerichu táichavenehi eta éhisirahi ema Cristo, ímatipa puiti ema Viya, ema ticaechepucahi ema Machicha te máecari. Puíticha téjacaripa éma tayehe eta mávacure te anuma. Eta tacahe, tétavicavainehi eta ecasiñavairahi mayehe éma, ecuchapavaipa eta mayehe.

<sup>22</sup> Puiti tipachinaripa eta iáchanevana táichavenehi eta esuapirahi eta yátupiquene máimiturapiana ema Jesucristo, máimitusiraheripa ema Espíritu Santo. Eta tacahe, ímrecavainapa puiti yátupina eta émunasiracacahi nayehe ena echamuriana. Evapinavavare eta te esamureana eta émunasiracacairahi. <sup>23</sup> Cape juca, eta ítaresirahi, tájina vahi íturuequenehahini eta iúchucuiraya. Puítipasera machichaheripahi ema Viya. Ítsivachaipahi eta ítaresirainihi eta esuapirahi eta máechajiriruva ema Viya. Éta ticaitarecaheyarehi; jéhevare eta máitavacacahi. <sup>24</sup> Eta Sagrada Escritura, ani tacahehi eta táechajiriruva, májurehi ema víyahaini profeta Isaías: “Eta vítaresirahi viti achaneanasami te juca apaquehe, vicutihí eta táimarusira eta muiji. Tijurucapa, tásiha tiájijipa. Eta vitumevainihi étapa eta vítupajijiasiravainihi, títavayare tacutihí eta flore: tépunehapa, tijiyupa, témiricapa. Étasera eta máechajiriruva ema Viya, jéhevare eta máitavacacahi” tacahepa. <sup>25</sup> Eta juca

máechajiriruva ema Viya, étaquenehi eta emetacasivanahi apaesa táuripa eta éhisirahi.

## 2

<sup>1</sup> Eta tacahe, támutupa ínajica eta evainararajivanainihi, tamutu eta ecaete-maraivainihi, eta apipiémairahénihi, eta ecapinaruraivainihi, étapa eta échajivanainihi. <sup>2-3</sup> Puiti, eta ímatiraripahi yátupi eta máurivahi ema Viya, tijurucaínapa puiti eta esuapirayare eta máechajiriruvana. Ecutinapa eta najurusira ena amuyana. Ánipichichapachu téchuhana, tiájicanaripavare te nacheneana ena náenana. Ene ecahehi éti, yátupina eta evarairaya ecaravahu eta máechajiriruva ema Viya, apaesa tiápajucavaya eta ímatiequenehairaina eta mapanereruana.

### *Ema Cristo macutihi eta mari máepenacacahi*

<sup>4</sup> Yátupina eta ecasiñavaira me Viáquenu, taicha tétavicavahi eta macasiñacarevahi, macuti eta mari máepenacacahi. Éma, náepuruquenehi ena achaneana. Manerejiruhisera ema Viya taicha tétavicavahi eta macunachacarevahi mayehe. <sup>5</sup> Éneripa ecahehi éti, ecutiripa eta márijahiana máepenacacahi. Tacahe puiti, táuripa eta ecachaneracacainapa. Macarichu ema Viya ema ecaemataneacaya. Tivayuacaheya eta esuapajiraivaya eta máijarasiraherehi eta ématanepachuyare. Énerichuvare ecatuparahaipa sántuhénapa. Ecutiyare ena tiyujaracarahiana eta te Templo. Ecatuparahaipavare eyaseurahiya nayehe ena echamuriana. Étapa eta ecamavahaira me Viya, étaripa eta esuapajiraivahi, eta ehasulupayachirahi ema Viya, étapa eta ecunachirahi éma. Tamutu eta juca, ecurisamurechayare éma, taicha émarichuhi ema Jesucristo ticaitecapinaheyarehi me Viya. <sup>6</sup> Eta Sagrada Escritura, ani tacahe eta máechajiriruvahi ema Viya: “Núti névatacahi ema Nuchicha Cristo eta eyehe. Taicha nunerejiruhi éma eta macurujisirayarehi ena nuchanerana návaháruanaya. Tétavicavahi eta macunachacarevahi eta nuyehe. Nácani ticasíñavanahi eta mayehe ema nuvaneruyare, vahi máinajiacavacaimahi” macahepa ema Viya. <sup>7</sup> Éti, tétavicavahi eta macunachacarevahi ema Cristo eta eyehe, taicha yátupihí eta ecasiñairahi éma. Énaserá nácani masuapajirairahanahi mayehe, náepuruhi éma, nacuti ena tépiyarecarahiana eta Templo, eta náepuruirahi eta mari ticunacharepanayare eta te peti. <sup>8</sup> Nácani masuapajirairahanahi eta máechajiriruvana ema Viya, tacutiqueneyarehi náepuruhi ema mavaneruhi ema Viya. Nacutihi mácani achane máquipairuhi táichavenehi eta macayutetuirahi. Tisemahi, mavaraha térajicavayare eta tímicyutetuchahi.

### *Ena machanerana ema Viya*

<sup>9</sup> Étisera manerejiruhiripa ema Viya, machichaheripa. Tachichaheripavare eta mávasa. Sántuhepa máicha. Tituparacaheripavare éma eyaseuchinavacayare ena achaneana eta mayehe. Majupahahehivare ema Rey. Puiti émapa macarichuhi téchahehi taicha mavecuhaqueneheripahi tayehe eta timapicu, tímisiapaheripa tayehe eta táuricacarequene majaraiva éma, apaesa emetajiricaya eta táuricacarequeneana máematanerepi ema Viya. <sup>10</sup> Cape juca ítaresirahi éti, vuíchaha ímatihini ema Viya. Eyerehichaha éma, vuíchaha échahini eta majapanuiraherahi éma. Puítisera evapinavahi eta ímatirahi yátupi eta majapanuiraherahi, taicha machaneraheripa.

### *Yátupina eta ecaemataneasirayare ema Viya eta ítaresiraya*

<sup>11</sup> Némunaruruqueneana nuparapenaveana, puiti éti, tímicutijiricavaichaha estranjerohehi taicha iáviharichaha te juca apaquehe. Váipasera áyeremahi



eta eyanirayare eta iávasayare te anuma. Eta tacahe, nuconsejachahe: Vaipa táuricachini íchahini eta tajamurachaqueneana eta iáqueheana. Taicha tétavicavahi eta tavarairahi tácamitieueneha eta iáchanevana. <sup>12</sup> Iúrihisera eta ecachanerarichaha ena achaneana te juca apaquehe máimatirahanahi ema Viya. Tayanapanerine ticatianacaheana, téchejicanahi eta eyehe ecutihi ena máuritairesirana náicha. Ímrecayaresera eta iúrivahi apaesa éna nacunachayare ema Viya, navarahainapa náehica ema Cristo taicha náimahahi eta táurivahi eta ítaresiranahi.

<sup>13-14</sup> Táichavenenahi eta éhisirahi ema Viáquenu, ímrecayareva eta esuapajiraiva mayehe ema Emperador Presidente, énapa ena prefectoana, énapa namutu ena apamuriana tuparairucana tanacaqueneanahi eta ley. Éna, ticatuparahanahi náicuñacavacayare ena achaneana váinarajiqueneana, téjecapavanahi. Énaserá ena achaneana tiúriana títaurahianahi, ticaemunacasianayarehi. <sup>15</sup> Taicha ema Viya, éta mavarahahi íchayare eta táuriqueneana apaesa ecamatinacaya ena máecharaireana nácani téchajicanahi eta eyehe.

<sup>16</sup> Yátupihí vaipa tapamiruhénahi éti eta esuapirahi eta mavanairipianaini ema Moisés eta iúchucuirayare. Váhisera ecuyunaca eta vahi tapamisirahenahini, táetseraruina icha eta tamauriqueneana. Esapihasera ímrecavayare yátupihí eta mavanaraherahi ema Viya. <sup>17</sup> Epicaurahiyare nayehe namutu ena achaneana. Émunajiricacayare nayehe ena vichamuriana. Ímrecapa eta epicauchirahi ema Viya. Epicauchayarehivare ema Emperador Presidente.

### *Vácuti ema Jesucristo eta macamichirahi eta mátajivana*

<sup>18</sup> Éti, te ecaematanerecapuca, esuapajirahiyare, epicauchayareva nácani iáquenuanahi. Vahi nacucarichu esuapa nácani tiúriana achaneana. Tácuticaca eta epicauchiraina nácani váinarajianahi. <sup>19</sup> Te ecatajiva náicha, tájinapa eta eviurevanainahini, tétavicavahi eta ecunachacarevaya me Viya te ecamichahi tamutu, taicha evarahahi ítaucha eta mavarahaquenehi ema Viya. <sup>20</sup> Téhesera náicuñacahepuca táichavenénahi eta íchirahi eta tamauriqueneana, tájina ecunachacarevaimahi eta ecamichirahi, taicha tatupiruvahi eta ecaicuñairayare. Téhesera táimicuñacahepuca eta íchirahi eta táuriqueneana, ecamichirahi eta náichirahéhi, tétavicava eta ecunachacarevaya te mamirahu ema Viya. <sup>21</sup> Taicha ema Viya, eta máichuirahéhi, mavarahahi ecutiyahehi ema Cristo eta macamichirahi tamutu eta mátajivana íchavenéhi éti, mavarairahi ecaravahu eta máurivahi, ecutiyahehi éma eta macayehera paciencia. <sup>22</sup> Éma, tájinhineni maviurevainahini, mapecaturainahipucaini. Nájinavare macaetemaquenénahíni. <sup>23</sup> Te nacaetemajiricapa, éma, vahi mácapaemachavacahíni, macatitiemahipucaini eta náemecatajivachirahi. Máechajicahisera ema Maiya, máimahainéhi éma. Taicha yátupihí eta máicuñasiravacaya ena témecatajivachanahi. <sup>24</sup> Yátupihí ema Cristo ticaicuñahi víchavenéhi víti eta vícuñayaréni vícuchinihi táichavenéhi eta vipecaturana. Tétavicavahi eta mátajivana te máquehe eta náemetatasirahi eta te crusu. Macamichahisera tamutu, mavarahahi vaipa tacuvayuacahavi eta pecatu, tatupiruvayarehi eta vítaresiraina. Eta majarana, éta ticanaracaheyare. <sup>25</sup> Eta ítaresirainihi acane éti, ecuti eta uvesa táemitiaru. Puítisera iávahácaripa ema Cristo, émapa tijaneacahehi, ticatiuchahehivare eta iáchanevana.

## 3

### *Tiúriyare eta náitairesirayare ena nacaimaqueneana*

<sup>1</sup> Tacutiquene eti esenana ecaimaqueneana, epicauchayareva ena ímanaveana, apaesa mácani vahi masuapahini eta máechajiriruvana ema Viáquenu, ecajimuyasamurechavaca táichavenénahi eta iúrivahi nayehe. <sup>2</sup> Vaipa tácomesaimahi échajirica taicha náimahayare eta esuapajiraivahi nayehe, epicauchirahivare. <sup>3-4</sup> Ímrecayareva eta iúri va yátupiquenehi, tásihaquenehi te esamureana, tímicutijiricavahi eta iúrina eta emira. Tayanapanepuca ichanaruheripa, iúrinachavaya te esamureana. Evayuchahini eta étupisirava eta ésamirisirava. Eta juca, tétavicavahi eta ecunachacarehi mayehe ema Viya. Vahi étaparacaina eta evayuyujisirahipuca eta ecamuirihaira étapa eta ecatatasirana, váhivare étaina eta ecayehera oro. <sup>5</sup> Taicha acane ena vénarahana esenana náinapureanahi téhicanahi ema Viya, tacahehi eta náurinachiravahi eta náitaresirana, taicha yátupihi eta nacasiñavairahi mayehe ema Viya. Tásiha, tétavicavahi eta nasuapajiraivahi nayehe ena náimanaveana. <sup>6</sup> Ecutiyare esu vénaraha Sara. Suímerecahi eta susuapajiraiva mayehe ema suima Abraham, taicha ani sucahehi mayehe: “Náquenu eñi”. Tásiha éti, vahi ecupica eta esuapirahi ena ímanaveana. Ímreca yátupina eta iúrivahi nayehe.

<sup>7</sup> Étipa ajairana ecayenaqueneana, eJapanuyare ena eyenana. Ejanecavare, échahi éna eta vahi túmenahini. Yátupinahisera eta émunasirahi éna, taicha ecuticayare eta eJacapirayare eta ícuchihi eta ítaresiraya mayehe ema Viya te jena sácheyare. Te iuri nayehe, esamacareya te eyujaraca.

*Tiúriyare eta ecamichirahi eta iátajivana táichavenénahi eta íchirahi eta táuriqueneana*

<sup>8</sup> Ámutu éti, ácuticacahi eta epanereruana. EJapanucaca, émunacacavare nayehe namutu ena echamuriana. Ecajirahi. Mánshéhahi. <sup>9</sup> Tijuricati natupiacahepuca, náumehahe, váhisera ecujicapa. Eyaseacachucha ema Viya eta náuricacarevaina. Taicha mavaraha ema Viya vijapanurahiyarehi víti, vicutiyare éma eta majapanuraivahi. Tatiarihiyare táitsivayare viyehe máicha. <sup>10</sup> Taicha ani tacahehi eta Salmo: “Mácani mavarahahi tiúritaresira te apaquehe, támutuyare sácheana tiúriya, vahi téchajijicaimahi tivayuarcaimahi. Váhivare ticaetemarecaimahi tépiyahirahimahi. <sup>11</sup> Váhivare máichaimahi eta tamauriqueneana. Máichahisera eta táuriqueneana. Macamitiacahi eta semanereana. <sup>12</sup> Ema Viya majaneaca ena náuriqueneana; tisamacareanahi eta nayujarasirana. Énasera ena tíchanahi eta tamauriqueneana, macatianaruanahi éma” tacahepa eta Salmo.

<sup>13</sup> Nájina tíjaracavaimahi titupiacahéana te náimahahi icha eta táuriqueneana. <sup>14</sup> Tijuricati natiarhipuca ena ticatianacaheanahi táichavenéhi eta táurivahi eta ítaresirahi, tásiha, tétavicavaya eta iúricacareva. Váhivare ecupica eta jácani náichirahepuca, váhivare iávmirahuimahi nayehe. <sup>15</sup> Íjaracavasera yátupi eta éhisira ema Viáquenu. Te nayaserecahepuca eta tacayema eta éhisirahi éma Jesucristo, tiúrihi eta eJicapiravacaya tayehe eta ecuchapaquene. Mánshéna éti, epicaurahivare. <sup>16</sup> Tátupiruva tamutu eta íchaqueneana, táurivare eta náimairahena namutu ena achaneana, apaesa ecamatinaca nácani téchajisiaracaheanahi eta táurivahi eta éhisirahi ema Jesucristo, nátsirihapaini eta náechajjisira. <sup>17</sup> Te máisapahipuca ema Viya eta námecatajivachirahe táichavenéhi eta iúrivahi, tacunachacareyare mayehe eta ecamichira. Tájinasera ecunachacarevaimahi te ecaviurevahi.

<sup>18</sup> Yátupi ema Cristo, étaherichuhi vímicapacahi táichavenéhi eta vipecaturana. Éma, tétavicava eta máuriva, matapiravarehivare. Tíjaracavahisera ticatajivaya víchavenéhi víti váinarajiqueneana, mavarairahi tiámahavi

me Viya. Tépenahi eta máquehe, étasera eta máchaneva tímiyanavaichucha títareca. <sup>19-20</sup> Tiyanavarepa máejirapanavacahi eta náchanevana ena náepenaqueneanaini nacaerataqueneanahi te infierno. Ticametarairupa nayehe ena nani náepenaqueneana antivuanaini, machamurianaini ema víyarahaini Noé. Ichapehinenihi eta macamichiravacahi ema Viya eta macuchapiravacahi eta nasuapirainahini, vahi náeñamavahini eta náimairahi ema Noé máepiyasirahi eta ichape pacure. Tacahe, te témiricapa eta ichapequene tiquiva, macarichuhi ema Noé ésupa esu mayena, énapa ena machichanevana énapa ena nayenana, óchoanaichuhi ena tiúchucuhanahi tayehe eta ichapequene une. <sup>21</sup> Tiuri puiti, eta une ticaeririjicavacahi ena masuapajirairahana, nímicutichahehi eta vícachasi. Eta vicaicachasirahi te víjaracavapa véhica ema Jesucristo, vahi étaparacaina táepachiacahavimahini eta viáquehe. Étasera eta vicaicachasirahi, étapa tímereuchahavi eta maperdonachirahaviripa ema Viya tamutu eta vipecaturana. Máepachinachinahaviripavare eta viáchanevana, tájinapa taviuchahavihini, eta visamiravahi te mamirahu. Yátupina eta viúchucuirayare táichavenehi eta máechepusirahi te máecari ema Viáquenu Jesucristo. <sup>22</sup> Puiti éma, tiyanaripahi te anuma; téjacaripa te mavaure ema Maiya. Tétavicavahi eta masuapacarevahi nayehe namutu ena mayeheana ángeleana. Énapa ena váinarajiana, nasuapahivare.

## 4

*Eti éhicanahi ema Viáquenu, tituparacahe ecaratacavayarehi apaesa vaipa íchaimahi eta tamauriqueneana*

<sup>1</sup> Ema Cristo, ichapemurihi eta macatajivairahi eta máepenirahi te crusu. Macamichahisera éma tamutu. Éti apanavare, ecutiyare éma. Vahi iávamirahuimahi eta ecatajivairaya. Nímicutichaheyare eta mácani achane tépenapa, máinajicaripa eta pecatu. <sup>2</sup> Eta tacahe éti, táichavenehi eta iúrujasirahi ema Jesucristo, tímicutijiricavaipa épenaipahini, ínajicaripavare eta pecatu. Puiti eta tápechiravaripa táitarecahini eta iáchanevana, tatuparacahi ecaemataneacayare ema Viya. Vaipa tivayuacahémahi eta tajamuraraiva eta iáquehe. <sup>3</sup> Tamapurujipa eta táetavisiravaripa eta áñoana eta íchirahi eta tamauriqueneana, taicha emaimatirahi ema Viya. Tamutuhi icha eta tájiparacana, tivayuacahehi eta tajamuraraiva eta iáquehe. Evayuchavahi eta esenamaréranahi étapa eta ecavaharasiva. Ecasamurehi eta íchira eta piesta. Íchahi eta tájiparacana tamauriqueneana eta ejaneasirahi eta esiñarajiana achanemirana. <sup>4</sup> Puítisera éti, vaipa ecasiriquimurihini ena émunacasareana. Vaipa íchaimahi eta táíñemahiquene eta náitaresirahi. Ichapemurinehi eta náejasirahehi. Tásiha, téchajicanapa eta eyehe. <sup>5</sup> Járjapainapasera eta sácheyare nacayaseserehirayare te mamirahu ema Viáquenu, taicha éma yátupiquenehi eta macatuparahairahi eta vicayaseserehiraya víti, vítarerua-naichaha énapa ena náepenaqueneana. <sup>6</sup> Eta tacahe, ema Jesucristo ticametarairuhi nayehe ena náepenaqueneana, mavarairahi macuchucuhayare eta náchanevana apaesa nápechavahini náitareca te mamirahu ema Viya, tayanapane eta náeche máteji táitavapapuca tayehe eta tacaecarasiyahi.

*Yátupina eta émunajirisiracacaya, ítátijíricacayareva*

<sup>7</sup> Esamanuchaha, tiánehipa eta táitavirayare tamutu eta juca. Eta tacahe, ecaratacava eta epanereruana apaesa táurivaina eta eyujarasiranaya. <sup>8</sup> Tiápajucavayarehisera ichape eta émunajirisiracacayare éti. Te yátupihi eta émunajirisiracacahi, máejerareya eta eperdonachiracacaya eta jácani éjecapiravana. <sup>9</sup> Evapinavaya eta ejacampiracacaya, te epaiiachaca te epenana.

10 Ema Viya tġjaracahevacaripa eta ġtucaquenepachuhi. Tacahe, yġtupina ġtauchaya eta ecaemataneasiracacahi te mamirahu. 11 Eti mġimitureana ema Viya eta ġchajisira, ecuneuchava ġchajica yġtupi eta mġechajiriruvana ġma. Eti ġmicatarahiana ġtġtivaca ena echamuriana, vahi ġñamaimahi eta etumeva mġajararuhehi ema Viya. ġtavenehi ġhisirahi ema Viġquenu Jesucristo, tamutu tauri eta ġġcani ġchaqueneana apaesa nacunacha ema Viġquenu namutu ena tġmaheana. ġma, ġtġtavicavahi eta macunachacarevahi! ġtġtavicavahivare eta mġġitupajġġiasiravahi eta mġechirahavihi tiuri! ġmġġtavacacahivare eta vġhisiraya ġma! Amġn.

*Vahi ecuavamirahu eta ecatajivairaya tġchavene eta ġhisirahi ema Jesucristo*

12 Nġmunaruqueneana nuparapenaveana, vahi ecuarami eta muracairaya eta ġġtajivanayare, tġmicutġġiricavayarehi tġramicarehini eta eyehe. 13 Evapinavachucha taicha ecapayayaracahi eta macatajivairahi ema Cristo apaesa evapinava te jena sġcheyare eta enecapirayare ġma eta mġacupaisiraya mġmirayarepahi eta majaraiva. 14 Te nġumehahepuca mġchavenġnahi ema Cristo, tġtavicavayare eta ġuricacarevaya ġti. Taicha tġvavahġcaheyare ema Espġritu Santo, mġsihaquenehi te majaraiva ema Vicaiyaquene. Tayanapane nġepurupuca ġma, ġtisera ecunachahi ġma. 15 Te etiarhipuca eti ecatajivahi nġcha, tacuijaser a tġaimahi tġviuchahġmahġ ġġcani ecapahġvainahini, ġmerai-vainahġpucġini, vġhivare tġaimahi tġviuchahġmahġ ġġcani ġmisiapirasiravainahġpucġini tayehe eta nġchaqueneana nġcani apanana achaneana. 16 ġtisera, te ecatajivapuca tġchavenġnahi eta ġhisirahi ema Cristo, vahi ecutsiriha. Evapinavachucha, ehasulupayachavare ema Viya tayehe eta ecaġjarerahi eta mġġjare ema Cristo.

17 Puiti juca sġcheana viġvacurehi, tġitecapaurehaviripa ichape eta vicatajivairayare, mavarairahi ema Viya vġmereuchava eta viuriva vġti machichanaveana. ġnasera ena masuapajirairahanahi eta nġchuirahi ema Viya, pġureanasami taicha tġġpajucava eta nacatajivairaya, ichape eta nġcuñaya. 18 Ichape eta vicatajivairahi te juca apaquehe viti macuchucureanayarehi ema Viya. ġPġureanasamisera ena achaneana masuapajirairahana, vġinarajiqueneanahivare! ġIchapepanayare eta nacatajivairaya! 19 Puiti viti vġhicanahi ema Cristo, ichape eta vicatajivairahi. Vġhisera vicainajiruvaimahi. Vġmiyanavayarehi vicha eta tġuriqueneana. Vġcasiñava mayehe ema Vicaiyaquene eta majaneasirahavġhivare, taicha ġma, tġtavicavahi eta mġġtauravahi.

## 5

*Ema Pedro maconsejachavaca ena machamuriana*

1 Tiuri puiti, nuparapenaveana, nuvaraha nuconsejachahe emutu eti pastoreana ejaneacanahi ena vichamuriana. Nġtiripa pastornuhi. ġnerichuvare testigonuhi eta nġmararasirahi eta macatajivairahi mġepenirahi eta te crusu ema Cristo. Esuapanuyare puiti eta nuconsejarapi taicha vicuticacayare tayehe eta vicatuparahairaya viġvihayare te majaraiva ema Cristo te tġitecapa eta machaviraya. 2 Tauri eta ejaneasiravacaina namutu ena vichamuriana, taicha ġna tġmicutġġiricavahi uvesanainahini mayehe ema Viya. ġtauchayare eta etuparacasivahi. Ema Viya mavarahahi evapinavahini eta ejaneasiravacahi. Vahi ecuyacujiequenehavaca. Vġhivare ecupanerecha ecavacha. Evapinavayaresera eta ecaemataneasiravacaya. 3 Vġhivare ġmipananjġcavacġmahġ taicha vahi ecavanaravacahini. ġmrecayarehisera eta ġurivaya nayehe, apaesa ġna nġhica eta ġurivanahi. 4 Apaesa te machavapa ema

yátupiquene Pastor eta viyehe, tétavicavaya eta macunachiraheya. Tíjaraca-henapa éma eta evachayare ícuchihi. Máitavacacainapa eta ecachaneraya éma te mávihahi eta te majaraivahi.

<sup>5</sup> Eti apanava eti amaperuana, nuconsejachahe: Esuapayare eta navane-siraheana ena víyarahana. Emutuyare esuapacaca. Mánsuhénahi. Taicha ema Viya vahi majapanuimahi ena ticasíñavavairicana. Tétavicavasera eta majapanuiravacaya ena mánsupanereruanahi. <sup>6</sup> Te ímereca eta emansuvavacahi tayehe eta ecasíñavairahi eta me Viya, éma, te máimahapa tiuri, ticatiuchahenapa te tamutu eta íchararacavaqueneana. Tásiha, tétavicavayare eta iúrisamurevaya. <sup>7</sup> Te tatiarihipuca eta éñamiravana, emetaca tamutu ema Viya. Éma, ticanaracaheyare taicha tétavicavahi eta máeñamiravahi eta eyehe.

<sup>8</sup> Ecuneuchava yátupina. Ejaneacavahivare, taicha ema viánarahi Váinaraji, macuti eta táíñehiquene sárare tatanujiriricahi eta tanicayarehi. Ene macahehi éma, matanucahi ena máquipairuanayare. <sup>9</sup> Eta tacahe, túmehéna ecanarairayare éma, machu máquipaicahe. Ácasíñava muraca eta mayehe ema Viáquenu. Écharichuhi vahi ácarichuhini eta ecatajivairahi. Túmehénahi eta ecamichiraina, ecutiyahe eta nacamichirahi ena vichamuriana ticavasanahi te tamutu avasareana. <sup>10</sup> Ema Viya, tíchuhahavihi, mavarahahi visiapayare tayehe eta mávasa táichavenehi eta véhisirahi ema Jesucristo. Ánipirinesera eta ecatajivairaya puiti juca sácheana. Émasera ema Viya, tétavicavahi eta majapanuraivahi. Éma, tímararacahehi eta ecamichirahi; tásiha éma, tíjaraca-henapa eta evayuchiravainapaicha eta etumevaya. Tájina ticayayacahemahi máicha. <sup>11</sup> Éma, ¡máitavacacahi eta macunachacarevahi! ¡Macachuricahi eta máitupajijíásirava, máitavacacahivare éta! Amén.

*Eta táichecuaraqui eta macartane ema Pedro*

<sup>12</sup> Ímati emutu ema vichamuri Silvano. Éma, tétavicavahi eta máitauravahi te tamutu. Puiti, émahí ema tiáminanurihi eta juca nucartane. Núti, ánipichichahi nájurehi eta eyehe. Esamanusera eta nuconsejachirahehi. Eta numetasirahehi tamutu eta juca, nuvaraha nétumechahe eta véhiruhi, taicha yátupihí eta vicaijuheirahi me Viya táicha.

<sup>13</sup> Énaripa ena vichamuriana ticavasanahi te juca avasare Babilonia, téchajicaheana. Énerichuhivare éna, manerejiruanahi ema Viya ecutihi eti eta manerejisirahehi. Téchajicahehivare ema nuchicha Marcos. <sup>14</sup> Núti, eta néchajirisirahehi éti nuchamuriana, nuvaraha nétserarecahe emutu, táicutiarahi eta tavayuchirahi eta némunasirahehi emutu éti.

Puiti nuyaseuchahehi me Viya, májjaracahehini tanaraca tamutu eta epanereruana emutu éti machaneranahi ema Viáquenu Jesucristo.

Tamutupa eta juca néchajiriruvahi eyehe.



## Eta macartane ema Apóstole Pedro, ticaijare 2 PEDRO

<sup>1</sup> Nuti Simón Pedro, mavanaranuhi ema Jesucristo. Manerejirunuhivare mayehenuhi apóstole. Nucajurehe eta juca nucartane eti nuchamuriana taicha tétavicavahi eta evapinairavahi eta juca véhiruhi. Puiti éti apanava ejacapacarehivare me Viya, ecaicuchiripavare eta iúchucuiraya maicha ema Viáquenu Jesucristo. <sup>2</sup> Puiti, nuvaraha tajurucaini eta ecaicutiaraira eta máemunasirahehi ema Viya, tásihaquenehi eta ímatiequenehairapaipahi eta mapanereruana éma, émapa ema Viáquenu Jesucristo. Tájinavare tahapapiricahini eta táurivahi eta epanereruana.

### *Eta náurivana ena téhicanahi ema Jesucristo*

<sup>3</sup> Táichavenehi eta vímatirahi ema Viya, tétavicavahi eta máitupajijiasiravahi eta macaemataneasirahavihi eta vítaresirana, mavarairahi vétaviuchahini eta viúrivahi, vicutiyarehi éma eta masantuvahi. Étahi eta mapanereruhi eta máichuirahavihi. Tásiha, visuapavanepa taicha vímahapa eta majaraivahi, vímahavarepa tétavicavahi eta máurivahi taicha camuriquenehi eta táuriqueneana máichaqueneanahi. <sup>4</sup> Tíjaracavaripavare éma táetaviuchayare eta viúricacarevanayare maicha te jena sáchezare, tijamurachacareanahi tamutu. Muracahi eta vicasíñavairahi eta máitauchirayare tamutu eta júcana, taicha tétavicavahi eta máurivahi étapa eta majaraivahi. Táichavenehi eta ecasíñavairahi mayehe, tinacasamurechahehi eta ecasamurerayarehi étachuca eta táuriqueneana, ecutiyare éma eta macasamurerahi eta táuriqueneana. Vaipa tivayuacahemahi eta tajamurachaqueneanahi eta iáqueheana, taicha tétavicavahi eta tamaeperajichirahehi eta cape juca eta ítaresirana. <sup>5</sup> Eta tacahe, etuparahahi puiti, ímiyanavahini eta éhisirahi éma, epamicavavarehini iúri va nayehe namutu ena achaneana. <sup>6</sup> Epamicavavaréni ecaravahu apaesa ímatiequeneha eta mapanereruana ema Viya, ecaravahuvarehini ecaratacava, étumechavavarehini eta ecamichira eta jácani iátajivana. Epamicavahivareni ácuti ema Viya eta masantuvahi. <sup>7</sup> Epamicavahivareni iápajucaya eta émunaraivahi nayehe ena echamuriana, ecajirayare. Epamicavahivareni eta émunaraivahi nayehe ena apamuriana achaneana, tayanapane vahi náehicahavihini. <sup>8</sup> Eta tacaheyare eta ítaresirana éti, ítamuturusirahi tamutu eta júcana iúri vanahi, ecutipaipahi ema Viáquenu Jesucristo eta máurivahi éma. Énerichuvare te muracahi íjaracava ecaravahupaipahi eta júcana, tiápajucavapaipahi eta ímatiequenehairahi eta máimiturapiana, tiápajucavapaipahivare eta etumeva tayehe eta ecaemataneasirahi éma. <sup>9</sup> Nácanisera vahi návarahahini nacaravahu, tímicutijiricavahi ena púchuquiána énainapa ticatajivanayare. Taicha náemitisicaipahi eta máepachinachiravacahi ema Viya tayehe eta táinapurénihi napecaturana náichaquenénihi cape eta náitaresirahi.

<sup>10</sup> Étiserá, eti nuparapenaveana, nuvaraha échavahini eta máichuirahahi ema Viya, manerejisirahehi. Epamicavahini eta ímeresirahi yátupi eta machichaherahi. Eta ímiyaniravahi eta ecaravahuirá eta juca néchajisihagueneanahi, jéhesare, tájinapa tímiáquipaicahémahi. <sup>11</sup> Tásiha, tétavicavaya eta iúricacarevaya eta machimapiraheya ema Viáquenu Jesucristo te macuchucuhahepa eta te juca apaquehe, mámiraheya eta te mávacureya. Máitavacacaya eta macachanerahaviya vimutu.

<sup>12</sup> Tacahe núti, nupamicavahi puiti eta némechiraheya eta júcana, tayana-pane nímatihehi eta ímatiriripahi, muracaripavare eta éhisirahi eta yátupiqueneana ímitucasivanahi. <sup>13</sup> Németeaca nétupicavahi eta juca nuconsejachirahehi puiti juca nítaresiraichaha te juca apaquehe. <sup>14</sup> Taicha vaipa náyeremahicha eta nítaviraya. Ema Viáquenu Jesucristo tímimetacanuhi eta nunarasiravanenapa te machacaya. <sup>15</sup> Nuvarahahisera vahi ecuemitisica eta juca numetaruheanahi, tayanapanéinepuca népenaipa. Eta tacahe, nupamicavahi eta nímiájurecahe emutu, taicha nuvarahahehi échayarehi tamutu sácheana.

### *Viti vímahahi eta majaraivahi ema Jesucristo*

<sup>16</sup> Viti vitupiruva eta vímitusirahehi tayehe eta táichararacavayare eta machaviraya ema Viáquenu Jesucristo, máimeresiraya eta máitupajijiasirava ichape. Vahi vépiyahirahimahi, váhivare vivehaquenéna te vichuti. Vímatipa yátupi, taicha vímahahi te viúquihana eta majaraivahi eta aquenucairahi. <sup>17-18</sup> Taicha víti vitiarihihi te machacaya ema Viáquenu Jesús, vicachanehi éma tayehe eta cerro santo, te vinecapaequenehapa eta macajareirahi éma eta Aquenucairaya. Visamahivare eta mahu ema Tata Vicaiyaquene eta macunachirahi ema Machicha. Ánipa macahehi: “Ema maca éma yátupiquenehi Nuchicha némunarquenehi. Tétavicavahi eta núrismurevahi máicha” macahepa.

<sup>19</sup> Víti vítametacahi eta nacayemaqueneanahi ena víyarahánaini profetana tayehe eta Sagrada Escritura, eta náechajisihairahi eta aquenucairayarehi ema Viáquenu. Eta náimiturapiana tacutihi eta tajaraiwa eta lámpara eta tamicauchirahavihi apaesa táuriyare eta vítaresirana te juca apaquehe taurivahi. Tacahe, étumechava tayehe eta ecuchapiravaya eta sácheyare te márajapainapa ema yátupiquene eta majaraiva, tétavicavayarepa eta mamicauchiraheyare tamutu eta esamureana. Tacahe, tituparacahahi esuapayare eta juca esamaqueneanahi vímitucasivanahi. <sup>20-21</sup> Nuvarahasera yátupina ímatiequeneha eta juca: Vahi táurica viveha te vichuti eta vímijachirahi eta tacayemaqueneanahi eta Sagrada Escritura. Vicatuparahahi vicaravahuyarehi eta yátupiquenehi. Ena víyarahánaini profetana, váhivare navehaquenénahíni te nachutiana eta nájuequenehairahi eta máechajiriruvana ema Viya. Ema Espíritu Santo, éma tímitucavacahi eta nájuequenehairaya éna tayehe eta Sagrada Escritura vímahaquenehi puiti.

## 2

### *Natiarihiyare ena tépiyahirahianaya tímijachavanayare pastoreana*

<sup>1</sup> Tiuri, acane natiarihivaresera ena tépiyahirahiana tímijachavanahi profetana te namuri ena náchucanaveanaini israelítana. Ene tacaheyare puiti, natiarihiyareva ena tépiyahirahianaya, tépiyacavanaya pastoreana eyehe. Éna típichasicaheanayare. Témejecapavachaheanaya, apanaya eta náimiturapiana. Vahi émaimahi náechajisiha ema Viáquenu ema náimicaparuhivare. Énajivahi tíchavanahi natanucahi eta náicunayare, táijahúchiravayarehi eta náemitiequenehairayare. <sup>2</sup> Camurianayare ena náemejecapavaruanayare, náehicainapa eta nayeherepi, táetaviuchirahi eta natuhusivahi. Náichavenehi éna, téchajicanainapa ena apamuriana achaneana, nacaecahinapa eta juca véhiruhi táurinaquenehi achene. <sup>3</sup> Ena nani, tímitucaheanaya eta náimiturapiana náepiyahiraivanahi, taicha navarahahi títucavana tivereacaheanainapa éti, taicha tétavicavahi eta najamurarasirahi eta plata. Tájinasera

náipuinayare, vahi táevejuacaimahi eta náicuñayare. Taicha acanevacaipa eta tacaecherairahi eta náicuñayare.

<sup>4</sup> Nacutiyare ena ángeleana téjecapavanahi. Tájina vahi maperdonachavacaimahi ema Viya. Máquijicavacapa tayehe eta táíñehiquene infierno távihahi eta timapicuquene. Ticaitihanahi puiti te cadena. Te táitecapapa eta juicio, tiápajucavanainapa eta náicuñayare éna. <sup>5</sup> Nuvaraha némechahe nayehe ena machamurianaini ema víyahaini Noé eta acane, váhivare májapanuvacahini ema Viya táichavenehi eta namasuapajiraivahi. Macamiricapa eta ichape tiquiva náicuñahi. Téricanahi namutu ena nani achaneana, taicha náepuruhi eta máichuiravacahi ema Noé, táurivayarehini eta náitairesirana. Nacarichuhi tiúchucuhanahi ema Noé, esu mayena, énapa ena sáisiqueneana machichanaveana. <sup>6</sup> Nuvaraha némechahevare nayehe ena ticvasanainihi te avasare Sodoma, étapa te Gomorra, váhivare majapanuvacahini ema Viya. Macamiricahi eta yucu, náicuñahi éna. Tájjahúchavacapa tacamitiequenehavaca namutu. Títavanapa, amairihanecha tsimapa eta náitavirahi. Ema Viya máimerecahi eta juca, nayehe ena najurureanapa te juca apaquehe puiti, mavarairahi máemechavaca ena achaneana váinarajipanereruanahi te napicayarepuca. <sup>7-8</sup> Téhesera te nataracu, matiarahi ema víyahaini ticaijare Lot. Éma, tamutuhi sácheana ticatisamurevahi taicha máimairavacahi ena achaneana náichirahi eta tauriqueneana, masamirahivare eta náechajisihairahi eta titsirihacareanahi. Téñamayahivare éma eta máimairavacahi ena achaneana, natuhusivavacahi eta náitairesiranahi. Tacahe, macuchucuhahi ema Viya, taicha éma Lot, tétavicavahi eta máurivahi, tisuapajirahihi mayehe ema Viya. <sup>9</sup> Eta tacahe, ema Viya tétavicavahi eta macatiuchirahavi puiti, ticuchucuhahavi viti véhicanahi éma, tayehe eta viátacajivana. Énerichuvare yátupihi matsecaripa eta náicuñayare nácani achaneana masuapajirairahanahi.

<sup>10</sup> Ema Viya, yátupihi máicuñacavacayarehi namutu ena tivayuchanahi eta náechipejisirahi eta náqueheana taicha tétavicavahi eta tavayuasiravacahi eta natuhusivana, énapa ena tépuruanahi ema Viáquenu eta émairahi téchavacahi. Ena nani, máeyajanahi. Mapicaurairahana, nájina návamirahuquenéna eta náumeharaiva. Nasapiha nacaecahivare ena ángeleana tiámana eta majaraivahi ema Viya. <sup>11</sup> Apanasica ena ángeleana tiávianahi te mamirahu ema Viáquenu, vahi náijaracavahini nacajacharecahini ena váinarajiana, tétavicavahinéni eta natumeva. <sup>12</sup> Énaserá ena nani tépiyacavanahi pastoreana, nacaecahihisera eta téhicacareana namaitururequeneruanahi. Éna, nacutihi eta táitairesira eta sárare, tájina nacaicutiaraquenéna. Najurupairuchucha te apaquehe. Éna, táuriavasahi eta justicia, máejehahi náeratata táimicapacavanezare. Tépenanayarehi nacuti eta táepenira eta sárare. <sup>13</sup> Éna, náimicatajivachahi nácani apamuriana achaneana. Páureanasamisera éna, tiápajucavayare eta nacatajivairayare.

Ena nani, tétupicavanahi eta náimairavahi, tiúrisamurereácavanahi eta nacavahairahi tamutu sácheana. Táitaurevaquenehi tétavicavahi eta natsirihacarevayarehi eta namaetupicushivanahi, eta nacasiriquirahehi te jácani énisiracacana ena echamuriana. Ticamapuravanahi ticurisamurechavana, navarairahi náituruca jácani najamurachaqueneana. <sup>14</sup> Namutuchucha najamuracha nácani esenana. Tájina náipuína eta náesenamarévana. Náechemaha eta náiturusiraya súcani esena máejerarehi. Náimitucavare ena ajairana tájina náituruéqueneha, nacutiyare éna eta náesenamarevanahi. Tájina tivechuquihaimahi eta nacapecaturairahi. Ecuñaraquisera eta náicuchihi éna. <sup>15</sup> Témunasiricavanahi éna, taicha namaimatirahi eta achene nacaijuheya

eta táuriquenehi. Nacutipahi eta mayeherepini ema maca achane Balaám, machichaini ema Beor. Éma, tétavicavahi eta majamurachirahi eta plata, mavachayare eta máichirayare eta tamauriqueneana. <sup>16</sup> Ema Viya máimahahi eta taurivahi eta mapanereruhi ema Balaam. Eta tacahe, eta burro macaperaquenehi ema Balaam téchajicapa, tacajachahi ema Balaam. Éma, macaicutiarahi eta táechajiriruvana eta mapera. Enevanepa témitiacahi eta mapanereruhi tauriquenénihini.

<sup>17</sup> Ena nánitátaji achaneana nacutihi eta tiájicu eque. Nacutivare eta úcaji támarairuhi eta técativava. Éna, jararihipa eta náicuchi náicuñayare tayehe eta táetaviure eta tamapicuva. <sup>18</sup> Ena téchajisiavanapa ticunachavanapa eta náichaqueneana napecaturanahi náiturureanahi. Náiminajicapaipa nácani náiturevanapahi eta táurivainiripahi eta náehisirahi eta táuriqueneana, tichavanapaipa tayehe eta tamaeperajivanahi eta náitairesira. <sup>19</sup> Éna, ánipa tacahe eta náechajiriruvahi: “Víti, nájina vísapaimahi tipamicahavi. Tacutirichuhi te vicha eta tauriqueneana étapuca eta táuriqueneana. Vítijiva véchinavahi eta vítaresiraya” nacahehi. Éna, tímijachavanahi líbreana. Énaserá tiápajucavanahi ticaeratanahi taicha eta tavayuchiravahi eta napecaturana étapa eta namaeperajivana. Nácani tavayuaruanahi eta napecaturana, vaipa énaínahini náechinavahini. <sup>20</sup> Tacutiquene nácani tínajicavanahi eta náehisirahi ema Viáquenu Jesucristo, tichavanapa tayehe eta tamaeperajivahi eta náitairesirana te juca apaquehe, éna, tiápajupananapa eta nacaicuñairayare, taicha eta naviurevahi. <sup>21</sup> Tiúripánaichuhipucaini vahi nacuatihini eta táurinaquene véhiruhi, váchupa náimatiripahi eta tiúrina achene, tásiha tínajicavanarichahavare tayehe eta táurinaquene vanairipi najacapaquenénihini. <sup>22</sup> Jucarihi eta náechajiriruva náchucarapi, ani tacahehi: “Te tiáhica eta tamucu, táimichavayarehi tanica eta táhiruha. Étape eta cuchi, tamapuruji vícachahini éta, taicha técarajicavayarehi te tiúrají”. Ene nacahehi ena tínajicavanahi tayehe eta véhiruhi, tichavanapa tayehe eta tamaeperajiqueneanahi.

### 3

#### *Vaipa táyeremahi eta machavirayare ema Viáquenu Jesucristo*

<sup>1</sup> Némuraruqueneana nuparapenaveana, apihepa puiti nímiamaréca eta juca nucartane. Eta táechajiriruvahi eta apinaquene nucartane, nuvarahahi nuconsejachahe, apaesa tacuija tahapapicahé eta éhisirahi ema Viáquenu. <sup>2</sup> Nuvarahavare yátupina eta esuapiraina eta Sagrada Escritura nájureanahi eta acane ena víarahanaini santo profetana, étapa eta máimiturapiana ema Viáquenu Macatiurahiquene. Étarichuhivare vímiturapihi puiti eta eyehe viti apóstoleana.

<sup>3</sup> Tínapucayare nuvaraha némechaheyare eta juca. Te jena sache tánehipa eta táitavirayare, tímerecavainapa ena achaneana ticaecahirahiana tayehe eta juca yátupiqueneana vicuchapaqueneanahi víti. Eta náitairesirahi éna, apanachucha eta tihapapiricavacahi eta náichirahi eta tauriqueneana najamurachaqueneanahi. <sup>4</sup> Áninapa nacaheyarecacha: “Táicharacava eta juca ecuchapaquenehi. Vuíchahacaru machavahini ema Cristo, ímijachaquenehi tichavavaneyarehi. Vaipa tasuapacare eta machaviraya. Taicha puiti tacutirichuhi eta náitairesirainihini ena viáchucanaveánaini. Tanasirichuhi eta táepaniravahi acane eta apaquehe. Vahi táitsivachavahini” nacahepa.

<sup>5-6</sup> Ena nani, vahi návarahahini napanerequeneha eta táitsivachiravahi maicha ema Viya. Jéhesare éma, eta acane, máechajiriruchucha eta máepiyasirahi tamutu eta anuma étapa eta apaquehe. Máechajiriruchuchavare

eta táimeresiravahi máicha, eta tiájipahi tétupiecahi te une. Énerichuvare, te táequenepa, únehi eta náicuñahi máicha, macamirisirahi eta ichapequene tiquiva. Téricanahi namutu ena masuapajirairahanahi. <sup>7</sup> Numetacahe puiti: Ema Viya tiápechavayare máicuñacayare eta juca apaquehe. Yúcuyarehisera eta tacamitiequenehayare tamutu eta anuma étapa eta juca apaquehe. Taicha éma, manacaripahi eta máechajiriruva, máicutichahi eta tayerevaya étapa eta távaphianahi. Jéhesare, te jena sáchezare, títapaicavacayare namutu ena achaneana masuapajirairahanahi váinarajianahi.

<sup>8</sup> Váhivare ecuemitisica, nuparapenaveana, eta matuparaquihi ema Viya, vahi tácuti eta vituparesira viti achaneana. Éma, étana sache matuparacahi, vítisami mil áñoripa eta vitupachirahi tayerevaipa. <sup>9</sup> Éma, manacahi eta juca tayerevahi, mavarairahi macuchapayare ena achaneana eta náeneuchiravayare mayehe. Vahi tácahequenénahini eta juca táitaresirahi maicha eta apaquehe. Ichapemuri eta macayeherahi paciencia eta viyehe, mamavarairahi vámutuhichaini vémitiequenehíni. Nararihisera ena achaneana téjcapavanahi te napanereruana. Eta náimairahi eta mayerevahi ema Viya eta máicuñasiravacayarehi, náimijachahi vaipa maratahaimahi máicuñaca eta juca apaquehe.

<sup>10</sup> Esamanuchaha. Te táitecapapa eta sáchezare táitavirayare tamutu maicha ema Viya, vahi vinecapauchavaimahi, taicha tacutiyare eta mayumurusirava eta máitesira mácani tiámerahi. Eta anuma, étapa tamutu eta távaphianahi, tamutuyare témitiaca. Ticaemayare muraca, tacutiyare eta tacaemaira eta ichapequene yucu te ichape curiche. Étapa eta tiávihanahi te apaquehe, tamutuyarehi títava, énapa ena távaphianahi. Tamutuyare táijuchayare eta yucu.

<sup>11-12</sup> Tásiha éti, écharipahi eta juca táitavirayarehi eta anuma étapa eta apaquehe, táijuirayare tamutu te yucu. Puítipa tacamunuihiri ámutuhini ésenicahini ema Viya, étaviuchahini eta iúrivahi eta itaresirahi. Puiti, yátupi ávarahahini táitecapavanehini eta jena sáchezare. Eyaseaca ema Viya táitecapavane. <sup>13</sup> Taicha viti machaneranahi ema Viya, vicuchapainapa eta arairuyare anuma étapa eta arairuyare apaquehe, vícuchihi mayehe ema Viya. Tájinainapa eta pecatuana, vaipa tihapapicahavimahi. Tétavicavayarehi eta táuriva.

<sup>14</sup> Eta tacahe, némunaruqueneana nuparapenaveana, puiti eta ecuchapirayare eta juca tacaitsivairaya tamutu, étumechavayarechucha eta ecasiñairahi ema Viáquenu Jesucristo, apaesa tauri eta machimapiraheyare, tacuija etapiravainahi. <sup>15</sup> Échava yátupina eta macayeherahi paciencia eta viyehe ema Viáquenu taicha mavarahahi ticuchucuhahaviya. Étarichuhívare tacahehi eta máimiturapihi ema apana viparape vémunaruquenehi Pablo, táichavenehi eta máitupajjiasiravahi máijararuhi ema Viya. <sup>16</sup> Tamutu eta macartaneana máimiamareranahi eta eyehe, étarichuhi táechajisihahi eta júcana. Jararihisera ticajerahi eta ecaicutiarairainahini. Nararihisera ena ticaravahuana apaesachicha, vuíchahavare túmevacaimahi eta náehisirahi. Náequepicasamichucha eta táimiturapi eta macartane. Nahapapicavare eta táimiturapihi eta apana Escritura. Táimicuñacavacayaresera eta nahapapisirahi.

<sup>17</sup> Eta tacahe, némunaruqueneana nuparapenaveana, vahi tacumapuruji eta ímatiequenehairahi eta juca, machu nahapapicahe eta epanereruana ena tivayuarahianatataji. Máchuvare náiminajicahe eta éhisirahi ema Viáquenu. <sup>18</sup> Puiti, nuvaraha tajurucaparichuchaini eta ímatiraina ema Viáquenu Jesucristo. Tajurucaparichuchavaréni eta evapinairavahi eta máemunasirahehi



ema Ticatiuchahavihi. ¡Tétavicavahini eta vijirauchira, vicunachahini éma, te vinarasirana, te véjamisirana! ¡Te visiapainapa eta mávasa, vímiyanavayare! ¡Amén!

## Eta macartane ema Apóstole Juan, ticaijare 1 JUAN

### *Eta viúrujasira ema Jesucristo*

<sup>1</sup> Nuti Juan nímiámareca eta juca nájure eta eyehe. Nuvaraha numetacahe éti, eta véchaquenehi mayehe ema Jesucristo, ema tíjaracahavi eta echájirirucava ticaitarecarahi. Éma, matiaríhihi acane te tépanavapa tamutu. Tacahe, tiúcupaicahi, tímerecavahi eta viyehe. Visamapa eta máechajiriruva. Camuri eta sácheana eta vímararasirahi éma te viúquiha. Vémamahaca te vivahu. <sup>2-3</sup> Éma, matiaríhihi acane, manasiqueneripahi mayehe ema Maiya. Tiúcupai-capasera eta viyehe. Víti vímatipa eta achánequenérahí éma. Tásiha, puiti vimetacahe eta juca vímahaquenehi étapa eta visamaquenehi. Vimetacahe taicha vivaraha iúrujicavahíni eta viyehe. Taicha víti viúrujicavahi mayehe ema Tata Vicaiyaquene émapa ema Machicha Jesucristo. Tásiha, éti apana iúrujicavahíni nayehe. <sup>4</sup> Tásiha, nucajurehe eta juca taicha nuvaraha yátupina eta iúrisamurevaina.

### *Eta majaraivahi ema Viya*

<sup>5</sup> Vimetacahe eta máimitusirahavi ema Jesucristo. Eta juca eta macaye-maquenehi: “Jararihi eta tijarahi mayehe ema Tata Vicaiyaquene. Tájina timapicuina mayehe, taicha mavayure eta máuriva”.

<sup>6</sup> Tiúri, te vinasirichupuca víti te timapicu, tásiha te vicahehipuca: “Viúrujicava mayehe ema Viya”, tásiha víti vépiyahirahiripa. Vahi viúrujicavahini mayehe, váhivare visuapahini eta mavanairipiana. <sup>7</sup> Téhesera yátupina eta visuapira eta mavanairipiana, vinasirichuhi eta te majaraivahi ema Viya, tacutihi eta manasirarichuhi éma eta te majaraivahi. Tásiha, eta vinasirarichuhi eta te majaraivahi, viúritarecayarehi eta viúrujusiracaca nayehe ena vichamuriana. Énerichuvare máepachinachayare tamutu eta vicapecaturairana, taicha te tépenapa ema Jesucristo Machicha ema Viya, máepusaicahi eta máítine eta máepachinchirahaviyarehi.

<sup>8</sup> Te vicahehipuca: “Tájina eta nupecaturaina”, tacahe, vahi vátupiemahini eta vipanereruhi. Vítijiva vivayuaracavahi víti.

<sup>9</sup> Téhesera vitupiruvahi eta vimetauresiravahi eta vicapecaturairana mayehe ema Viya, jararirahirihi eta maperdonachirahavihi. Taicha tíjaracavahi éma eta maperdonachirahaviyare, vahi táeñamavacarehíni. Énerichuvare májahaya tépachinachahaviyare tamutu eta tamauriqueneana viyehe. <sup>10</sup> Téhesera vicahehipuca: “Tájina nupecaturaina”, vépiyaequenehahi ema Viya. Vímicutijiricapa ema máepiyahirahini. Vahi tátupiruvahíni eta vijachapirainahini eta máechajiriruva.

## 2

### *Ema Jesucristo, ema ticatajirahi*

<sup>1</sup> Nuchichanaveana, nucajurehehi eta júcana taicha nuvaraha vahi eucapaturaini. Téhesera íchapuca eta pecatu, mararihi ema ticatajirahi viyehe te mamirahu ema Tata Vicaiyaquene. Ticaijare Jesucristo ema ticatajirahivirahi. Éma, matapiravare; tétavicava eta máuriva. <sup>2</sup> Éma, tímicapacavahi táichavenehi eta macaepahairayarehi eta vipecaturana apaesa viúri mayehe ema Viya. Váhisera tácarichu eta vipecaturana víti. Táimicapacahi éma

eta macaepahairayarehi eta napecaturana namutu ena achaneana te juca apaquehe.

<sup>3</sup> Tiúri puiti, vicasiañavahi eta vímatirahi ema Viya, taicha visuapahi eta mavanairipiana. <sup>4</sup> Te nararihipuca ena nácani achaneana nacahehi: “Núti nímati ema Viya”, téhesera vahi nasuapahini eta mavanairipiana, tacahe náepiyevahi éna. Vahi tásuapacarehini eta náechajiriruva. <sup>5</sup> Étasera eta visuapirahi víti eta mavanairipiana tímechahavihi eta viávahásirahi ema Viya. Yátupihí eta vémunasirahi ema Viya. <sup>6</sup> Víti vicahehi: “Viávaháca ema Viya”, tásiha, tacamunuhi eta táurihini eta vítaresirainahini tácutihini eta táurivahi eta máitaresirahi ema Jesucristo.

*Eta mavanairipi ema Viya eta vémunasiracacaina*

<sup>7</sup> Nuparapenaveana, nuvaraha némechahe te juca carta eta macavanairipirahavi ema Jesucristo eta vémunasiracacaya. Te tépanavainapa eta ecaijuharahi ema Jesucristo, vímitucaheripa eta juca mavanairipi. Taicha tamutu eta juca vímiturapiana táuchurehi tayehe eta juca mavanairipi ema Jesucristo.

<sup>8</sup> Puítirichu nuvaraha tápajucava eta ecaicutiarairaya eta máemunasirahavihi éma. Manasirichuhi éma te majaraiva ema Maiya. Tásiha éti, te esupa eta juca mavanairipi, te émunacaca, epauchainapaipa eta majaraiva ema Viya. Térajicavainapa eyehe eta timapicu.

<sup>9</sup> Te nararihipuca ena nácani achaneana nacahehi: “Núti návihahi eta te majaraiva ema Viya”, téhesera nacatichahipuca ena nachamuriana, návirichuhi te timapicu. Vahi napauchaimahí eta majaraiva ema Viya.

<sup>10</sup> Nácanisera náemunacahi ena nachamuriana, nanasirichuhi te majaraiva ema Viya. Tásiha, tiúrihi eta napaisirahi, apaesa vahi nájecapavahini.

<sup>11</sup> Énasera ena nácani nacatichahi ena nachamuriana, nanasirichuhi éna te timapicu. Vahi náechahíni eta napaisirayare eta náitaresira, taicha eta timapicu vahi táisapahíni náimairirichahíni.

<sup>12-14</sup> Eti nuchichanaveana, nucajurehe taicha néchahi eta maperdonachiraheripahi ema Viya eta epecaturana émavenehi ema Jesucristo, táichavenehivare eta ímatirapa ema Tata Vicaiyaquene.

Eti ávinaveana, nucajurehe taicha éti ímatihí ema Jesucristo, ema matiarihiquenehi acane te tépanavapa tamutu.

Eti átinaveana, énerichuvare nímiaturecahehi taicha tanasirichu iúnacahi te esamureana eta máechajiriruva ema Viya. Tásiha éta, tétumechahehi eta ecapaquechiraipahi ema Váinaraji.

<sup>15</sup> Emutu eti, vahi ecujamuracha eta tauriqueneana te juca apaquehe. Váhivare ecujamuracha eta tatiariqueneana tayehe eta juca apaquehe. Te nararihipuca ena najamuracha eta tauriqueneana te juca apaquehe, vaipa émainahini náemunaca ema Tata Vicaiyaquene. <sup>16</sup> Taicha tamutu eta napanereruana ena achaneana te juca apaquehe, tájina táurivaina.

Napanerechahi naicha eta tauriqueneana. Najamurachaipa eta apayehe. Navarahaipa nacayehe náimijachaipapuca tiúrihi eta náimairahi. Te ticaimahaqueneana, tisiñavanapa táicha. Éta juca napanereruana, vahi máijaruinahini ema Tata Vicaiyaquene. <sup>17</sup> Numetacahe puiti: Títavainapaipa tamutu eta apaquehe. Énerichuvare títavainapaipa tamutu eta najamurachaqueneana ena achaneana. Vítisera, te visuapa eta mavarahaquene ema Viya, máichecuaraquiréna eta vítaresira.

*Ena ticatianacana ema Cristo*

<sup>18</sup> Nuchichanaveana, puiti tiánehinapa eta táichecuiraya, títavainapa tamutu. Vimetacaheripa eta máitesirayare ema maca achane ticaijare Ánticristo, ema

ticatianacayare ema Viáquenu. Puítiripa nararihipa ena ticatianacanahi ema Cristo, navarahaipa máitecavane ema Ánticristo. Tásiha, véchainapa eta tiánehinapa eta táichecuiraya tamutu. <sup>19</sup> Ena ticatianacana ema Cristo náuchurehi eta viyehe. Váhiserá viúmurivainahini éna. Taicha te viúmurivainahini, nanasirichuhini eta viyehe. Náerajiruvaipahiserá eta viyehe. Tásiha, vímatipa eta vahi viúmurivainahini.

<sup>20</sup> Ema Viáquenu Jesucristo tíjaraca heripa éti ema Espíritu Santo. Tásiha, emuturipahi ímati eta yátupiqueneana. <sup>21</sup> Nucajurehehi táichavenehi eta ímatirahi. Nuvaraha ácaicutiaraquenénahini eta yátupiqueneana. Te esuapa eta yátupiqueneana, vahi ácutimahi ena tépiyahirahiana.

<sup>22</sup> Numetacahe eta juca taicha nararihipa puiti ena tépiyahirahiana, ena nácani nacahehi: “Ema Jesús váhira émaina Cristo Machicha ema Viya” nacahehi. Ena nácani achaneana, ticatianacanahi ema Cristo. Tacuti eta nácahehini: “Váhira émaina yátupiquene Tata Vicaiyaquene, váhivare émaina Maiya ema Jesús” nacahepaini. <sup>23</sup> Numetacahe eta apana: Nájina tiávahácanaimahi ema Tata Vicaiyaquene ena vahi nasuapahini ema Jesús eta machichairahi ema Tata Vicaiyaquene. Viávahácahisera víti ema Tata Vicaiyaquene vimutu víti visuapanahi ema Jesucristo eta machichairahi ema Viya.

#### *Eta viávahásirahi ema Jesucristo*

<sup>24</sup> Tásiha, ecapanereruyaréchucha éti eta máechajiriruva, tamutu eta esamaqueneanaripahi eta te tépanavainapa eta ecasiñairahi ema Jesucristo. Eta ecapanereruira eta júcana, iávahácayare ema Tata Vicaiyaquene émapa ema Machicha. <sup>25</sup> Taicha tíjaracavahi ema Jesucristo tíjaracahaviya eta vítaesira máichecuaraquirénapa.

<sup>26</sup> Puiti nararihi ena navarahayare tivayuaracaheana. Tásiha, nucajurehe apaesa ecuneuchava éti nayehe ena témejecapavarahiána.

<sup>27</sup> Éti, mávaháruheripa ema Espíritu Santo mavaneruhi ema Jesucristo. Tásiha, nájina apanaina ácamunuhini máimitucahehini, taicha tímitucahehi tamutu ema Espíritu Santo. Éma, yátupiquenehi eta máechajiriruva. Éma, vahi tépiyahirahi. Timetacahehi éma: “Ánasirichu iávahácahi ema Jesucristo”.

<sup>28</sup> Puítiserá, nuchichanaveana, ímiyanava eta iávahásiraina éti ema Jesucristo apaesa túmesamurehéina éti, vahi ecutsirihá mayehe eta te machava.

<sup>29</sup> Éti échahi eta máetaviuchira eta máurivahi ema Jesucristo. Tásiha, ímatiyare ena apamuriana machichanaveana ema Viya, táichavene eta náichirahi eta táuriqueneana.

## 3

#### *Viti machichanaveana ema Viya*

<sup>1</sup> Nuchichanaveana, tétavicava táramicareva eta máemunasirahavi ema Tata Vicaiyaquene. Yátupihí tímijarechahavihi “machichanaveana”. Puítiripa yátupiquenehi machichahaviripahi. Énaserá ena apamuriana achaneana vuíchaha nácaicutiarahíni eta macachichairahavihi ema Viya, taicha vuíchaha náimatihíni eta máemunaraivahi éma. <sup>2</sup> Némunacasareana, vécharipa eta macachichairahavipa ema Viya. Vuíchahasera tímechahavi éma eta viúrivayare. Vécharipavare eta vicitirayare ema Jesucristo eta te machava. Taicha vímahayare eta máimahiquene éma. <sup>3</sup> Tásiha, vimutu víti vicuneyayare eta vicitiraya ema Jesucristo, puiti vácuticaca viúrihíni tácutihíni eta máurivahi éma.

<sup>4</sup> Nuvaraha némechahe: Namutu ena tisipecaturana, nacaticha eta mavanairipiana ema Viya, étara eta juca napecaturahi. <sup>5</sup> Ema Jesucristo, tájina matapiravaina éma. Vímatiripasera eta tímitecahi éma te juca apaquehe eta macaepahairayare eta vipecaturana. <sup>6</sup> Víti, te viávahácahi ema Jesucristo, tituparacahavi vaipa vicuimisiapava tayehe eta pecatuana. Énaserá ena ticapecaturarahiana vahi náimatihini ema Cristo.

<sup>7</sup> Nuchichanaveana, vahi ecuisapava navayuacahe. Víti, te vímisiapavahi tayehe eta táuriqueneana, vímrecaya eta viúriya. Vicutinapa ema Jesucristo eta máetaviuchirahi eta máuriva. <sup>8</sup> Te náimisiapava ena apamuriana tayehe eta tauriqueneana, éta tímereuchavacahi eta machichairavacahi ema Váinaraji. Taicha ema Váinaraji, ema tinacuchahi táquenuhi eta pecatu. Numetacahe eta apana: Ema Machicha ema Viya tímitecahi eta macaepahairayare eta majarareruanahi ema Váinaraji.

<sup>9</sup> Víti machichahaviripa ema Viya. Váipa vímisiapavaimahi tayehe eta vicapecaturairana taicha vicutinapa éma eta tamajinairahi matapiravaina. Éma, tájina mapecaturaina. Eta macachichairahavihi ema Viya, vahi vicapecaturaimahi. <sup>10</sup> Nácani vahi tíchanahi eta táuriqueneana, váhivare náemunacahíni ena nachamuriana, náimerecahi eta vahi machichavacainahini ema Viya. Tímerecavanahivare eta machichairavacahi ema Váinaraji. Vítisera, eta víchirahi eta táuriqueneana, étapa eta vémunasiracacahi, vímrecavahi eta macachichairahavihi ema Viya.

#### *Eta vémunasiracaca*

<sup>11</sup> Te tépanavainapa eta ecasiñairahi ema Viya, vimetacahehi eta mavarairahi eta vémunasiracacayare. <sup>12</sup> Tásiha, vahi ecucuti éti ema Caín, mávaháruhi ema Váinaraji. Ema maca Caín macapacahi ema maparapéni Abel, táichavenehi eta máetaviuchirahi eta mavainarajivahi. Ema maca Abel, táimicapacahi eta masuapajiraivahi, máichirahi eta táuriqueneana. <sup>13</sup> Nuparapenaveana, énerichuvare puiti nararihiya ena achaneana ticatichaheanayare éti apana. Váhisera ecuarami eta juca.

<sup>14</sup> Nuparapenaveana, véchahi víti eta viápechiravaya vítareca te táequenéraya eta vépeniraya. Vicaijuhenapa eta vítaresiraya máichecuaraquireya. Véchahi eta juca, táichavenehi eta vémunasirahi ena vichamuriana. Énaserá ena vahi náemunacahini ena nachamuriana, nanasirichu. Vahi tiúchucuhaimahi tayehe eta náepenira. <sup>15</sup> Namutu ena ticatichanahi ena vichamuriana, ncutihi ena ticapahiana. Eta náichararacavayare ena ticapahiana, véchahi eta namauchucuirayare. <sup>16</sup> Ema Jesucristo tímechahavihi eta máemunasirahavihi, taicha tíjaracavahi tépena vítivenehi. Tásiha víti, te jácani táichararacava, tituparacahavi víjaracavayare vépena énavene ena vichamuriana, vímechiraya eta vémunasiracacahi. <sup>17</sup> Te mararihi ema mácani achane ticaimahaquenehi, te vahi achánesamurénahi mayehe ema machamuri eta macaijuherahi, ema maca váhivare máemunacahini ema Viya. <sup>18</sup> Nuchichanaveana, vémunacacachucha vicajicaca eta vicayehequeneana. Vahi vicúyacujiriríha. Váhivare vicuepiyahirahi eta vémunasiracacairahi. Vahi tacucarichu eta véchajiriruva.

#### *Vicasínavaya te mamirahu ema Viya*

<sup>19-20</sup> Tásiha, eta te vémunacaca, véchahi eta yátupirahi machichahavi ema Viya. Téheserapuca tipicacararacavahi eta visamure, vicaesamiricayare eta visamure, taicha ema Viya tímahahavihi eta vicasíñairahi eta majapanuirahavihi. Taicha majapanurahiquenehi éma. Téchahi tamutu. <sup>21</sup> Tíúripana, némunacasareana, te tájina eta tapicacararasiravaina eta visamure. Tásiha,



vahi vipicaimahi eta viyasearapianaya mayehe ema Viya. <sup>22</sup> Vicasiñavainapa eta máíjarasirahaviyare tamutu eta viyasearuanahi, taicha visuapahi eta mavanairipiana, vicurisamurechahi ema Viya. <sup>23</sup> Eta juca mavanairipianahi: “Ecasíña ema Nuchicha Jesucristo, énerichuvare émunacaca”. Tachahi eta mavanairipi viyehe. <sup>24</sup> Te visuapa eta mavanairipiana, viávahácahi éma, énerichuvare éma tiávahácahaviya. Véchahi eta matiarahirahi ema Viya eta viyehe, máicha ema Espiritu Santo mavaneruhi éma.

## 4

### *Ena mávaháruana ema Espiritu Santo énapa ena mávaháruana ema Váinaraji*

<sup>1</sup> Némunacasareana, ecuneuchava nayehe ena tépiyacavana ticameta-  
rairuana. Taicha puiti nararihi éna. Vahi mavaneruanaina ema Viya,  
váhivare mávaháruanaina ema Espiritu Santo. Tásiha, te náitecapauchahupuca  
ena návaraha tímitucaheana, éti eyaseresinavaya te yátupipuca vanairucana  
me Viya. Esamayare te étarichupuca eta vímiturapianahi víti. <sup>2</sup> Eta juca eta  
ímatiarayare ena mávaháruana ema Espiritu Santo te nacahehipuca: “Ema  
Jesucristo yátupiquenehi achane eta máuchusirahi”. <sup>3</sup> Énase ena apamuri-  
ana, te náñauchahipuca eta yátupirahi achane ema Jesucristo, vahi mavane-  
ruanaina ema Viya. Éna, ticatianacanahi ema Cristo. Vimetacaheripa eta  
náitesirayare ena ticatianacana ema Cristo. Tiuri, puítirichu nararihipa ani  
viyehe.

<sup>4</sup> Nuchichanaveana, éti machichahe ema Viya. Néchahi núti eta emaisa-  
piravahi tivayuacaheana taicha mávaháruhehi ema Espiritu Santo. Éma,  
túmeapanahi mayehe ema Váinaraji, náehiruhi ena nani tivayuarahiana. <sup>5</sup> Ena  
nani, tahapapiricavacahi eta tájiparacana tayeheana eta apaquehe tamauri-  
queneana. Tásiha, ena achaneana máehicarahanahi ema Viáquenu náuricaipa  
náitecapauchavaca. <sup>6</sup> Vítisera machichahavihi ema Viya. Tisamarara-  
cahavihi ena tímatiana ema Viya. Énase ena apamuriana máimati-  
rahana ema Viya, vahi tiúrimahi eta nasamirahavi. Tásiha, tímaticareanaya  
ena mávaháruana ema Espiritu Santo. Énerichuvare tímaticareanaya ena  
mávaháruana ema Váinaraji.

### *Témunarahiquene ema Viya*

<sup>7</sup> Némunacasareana, tacamunu eta vémunacaca vámutu. Taicha ema Viya  
tímitucahavihi eta vémunasiracacaya. Vimutu viti vémunacacanahi, étapa  
tímereuchahavihi eta macachichairahavihi ema Viya, yátupihí eta vímatirahi  
éma. <sup>8</sup> Énase ena nani vahi témunacacana, vahi náimatihini ema Viya.  
Taicha ema Viya, yátupiquenehi eta máemunaraiva. <sup>9</sup> Éma, tímechahaviripa  
eta máemunasirahavihi, eta mavanesarahi ema macarichuquene Machicha.  
Mavanecahi títeca te juca apaquehe, tíjaracahaviyare eta vítaresirayare  
máichecuaraquirénapa. <sup>10</sup> ¡Tétavicava eta máemunasirahavihi! Vítisera vahi  
vitívainahini vémunaca ema Viya. Mativahi ema témunacahavihi. Eta  
máemunasirahavi ema Viya, máíjararecahi ema Machicha. Mavanecahi  
tépenayare te crusu étavene eta macaepahairayare eta vipecaturana.

<sup>11</sup> Némunacasareana, máetaviucha eta máemunasirahavi ema Viya; tásiha,  
vítipa tacamunu eta vémunasiracacáina. <sup>12</sup> Nuvaraha ácaicutiara eta juca:  
Nájina tímahaina ema Tata Vicaiyaquene. Téhesera víti, te vémunacacapuca,  
tiávahácahaviya éma. Tásiha, vicutihí ema Viya eta máemunaraivahi éma.

<sup>13</sup> Puiti, viti viávahácahi ema Viya, énerichuvare tiávahácahavihi éma.  
Véchahi eta mávahásirahavihi ema Viya, máichavenehi ema Espiritu Santo

mavaneruhi eta viyehe. <sup>14</sup> Tásiha, viti vicachaneanaripa ema Jesús, vimeta-cavacapahi namutu ena vímanaruanapahi eta máucupaisiraipa te anuma, taicha vivaraha náimatiyare namutu eta mavanahirahi ema Viya máiteca ema Machicha ticatiuchahaviyare vimutu viti achaneana te juca apaquehe. <sup>15</sup> Tacahe, te nararihipuca ena nacahehi: “Ema Jesús machichara ema Viya”; tásiha, tímaticareanahi éna, mávaháruanahi ema Viya, étapa eta návahásirahi éma.

<sup>16</sup> Víti véchahi eta yátupirahi máemunahirahavihi ema Viya. Eta tacahe, vicasiñavahi eta mayehe. Témunarahiquene éma. Tásiha, viti apana, te vémunarahipuca, viávahácaya ema Viya; éma apana, tiávahácavahiya. <sup>17</sup> Vétaviuchaya eta vémunasiraya ena vichamuriana taicha eta viávahásirahi ema Viya. Tásiha, vahi vipicaímahi eta jena sácheyare te viyanapa te mamirahu ema Viya. Vahi vipicaímahi taicha machichahavihi ema Viya, vicutihi ema Jesús eta macachichairahi ema Maiya, tayanapanepuca vítarecarichaha te juca apaquehe.

<sup>18</sup> Ena apamuriana achaneana tipicacaracavanahi taicha téchavanahi eta nacaicuñairaya. Vítisera vahi vipicaímahi taicha vicasiñavahi eta máemunahirahavihi ema Viya. Te yátupihipuca vicasiñahi, macaesamiricaya eta visamure eta vipisira. Tásiha, nácani tipicanahi, napicahi taicha vahi nácasíñavahini eta máemunahiravacahi ema Viya.

<sup>19</sup> Víti vémunacahi ema Viya taicha ema mativahi témunacahavi. <sup>20</sup> Te nararihipuca ena nacahehi: “Viti vémunaca ema Viya”; téheserapuca nacatichachucha ena nachamuriana, éna tépiyahirahianahi. Taicha náimahanénipuca ena nachamuriana, váhisera náemunacahini, ene tacahehi eta namaemunahirahi ema Viya máimahasiquenehi. <sup>21</sup> Eta juca eta mavanairipihivi viyehe ema Viya: “Émunacanu nuti yátupiquenehi Viya; émunacavare ena echamuriana”.

## 5

### *Virataha vínajica eta tamauriqueneana*

<sup>1-2</sup> Yátupihivi eta macachichairahavipa ema Viya vimutu viti visuapanahi ema Jesús eta émairahi ema Cristo. Tásiha, vémunacarine ema ticachichahavihi. Tásiha, te vémunaca ema Viya, téhepa visuapa eta mavanairipiana, tituparacahavi tacutiyareichu eta vémunasiraya namutu ena vichamuriana, taicha machichanaveanahivare éna, viparapenaveanahi te mavahuana ema Viya. <sup>3</sup> Étavene eta vémunahirahi ema Viya, visuapaya eta mavanairipiana. Taicha vahi táyacujicarehini eta visuapiraya eta mavanairipiana. <sup>4</sup> Tásiha, viti machichanaveana ema Viya viratahaya vínajica eta tamauriqueneana eta vítaresiraya. Taicha tímicatacaviripa ema Jesús táichavenehi eta vicasiñairahi eta mayehe. <sup>5</sup> Víti visuapahi eta yátupirahi Machicha ema Viya ema Jesús. Tásiha, viti véhicanahi éma, vicarichuhi viti virataha vínajica eta tamauriqueneanahi eta vítaresira.

### *Ema Jesucristo, Manerejiruhi ema Maiya*

<sup>6-8</sup> Te títecapa ema Jesucristo, tímercavapa te juca apaquehe, une eta macaicachasiyahi. Énerichuvare eta máitine máepusairuhi eta máepenirahi te crusu. Tásiha, te vímatiequeneha eta macaicachahirahi te une, étapa eta máepusahirahi eta máitine, témechahaviripa eta manerejiruichuhi ema Maiya. Eta une étapa eta máitine témechahavipa ema Jesús eta émairaquenehi Cristo. Ema Espíritu Santo, émapa títámetacahavi. Taicha ema Espíritu Santo yátupihivi eta mametarapiana. Eta une, eta máitine, émapa ema Espíritu Santo, eta juca mapanaquene témechahaviripa. Ticuticacahi eta

tacayemaqueneana. <sup>9</sup> Tacutihi eta masuapacareva ema mácani achane tiuri. Tiápajucavasera tasuapacarevapana eta mametarapiana ema Viya mayehe ema Machicha. Ánipa macahe: “Émara nuchicha, némunaruquene ema maca”. <sup>10</sup> Tásiha, te vicasiña ema Machicha ema Viya, visuapava vicasiñava te visamure eta yátupirahi eta mametasirahi ema Viya. Ena apamuriana vahi nasuapahini ema Viya, náimicutichapa máepiyahirahihíni ema Viya, taicha vahi nasuapahini eta mametarapianahi mayehe ema Machicha. <sup>11</sup> Étarichuvare eta juca eta mametasirahi ema Viya, eta máijarasirahaviripa eta vítaresirayare máichecuarquirénapa. Ema Machicha ema Viya, éma téchahi eta vítaresira. <sup>12</sup> Ena ticasañanayare éma, títarecanayare. Énaserá nácani vahi ticasañanahi ema Machicha ema Viya, vahi títarecanaimahi.

*Eta vítaresirayare máichecuarquirereyare*

<sup>13</sup> Tiuri, némunacasareana, nuvaraha échayare eta ítaresirayare máichecuarquirénapa, taicha ecasiñahi ema Machicha ema Viya. Eta tacahehi eta nucajureirahehi.

<sup>14</sup> Tásiha, tájina táeñamavacarehini eta viyasearuanahi ema Viya, taicha véchahi víti eta masamirahavihi, taicha eta viyasearapiana tásihaqueneanahi eta vímatiequenehairahi eta mavarahaquenehi ema Viya. <sup>15</sup> Tásiha, véchahi eta máijarasirahaviya tamutu eta viyasearuana, taicha véchahi eta tasamacarevahi eta viyasearapianahi eta mayehe.

<sup>16-17</sup> Tamutu eta tamauriqueneana náichahi ena achaneana, ema Viya máimijarechahi “pecatuana”. Jararihi eta pecatuana tíñehipana mayuchaticavaneya ema Viya eta vítaresira táicha. Jararihivare eta apana pecatuana váhirichu tínehicha. Te mararihipuca ema mácani vichamuri ticapecaturarahi, eta váhirichu tínehicha eta máepeniraina; te ímahapuca eta macapecaturairahi, éti eyaseuchaya éma, mayehe ema Viya. Tásiha, ema Viya máijaracayare eta máítaresirayarechaha ema ticapecaturarahi. Téhesera mararihipuca ema mácani ticapecaturarahi eta tíñehipana mayuchaticavaneya ema Viya eta máítaresira, vahi nuvanecahe eta eyaseuchahini ema maca achane ticapecaturarahi.

<sup>18</sup> Vecha eta vahi vímisiapavaimahi tayehe eta vicapecaturairana viti machichanaveanahi ema Viya. Taicha ema Machicha ema Viya tijaneacahavihi vimutu víti. Vahi máratahaimahi ticaetemahavi ema Váinaraji.

<sup>19</sup> Taicha véchahi eta macachichairahavihi ema Viya. Váhisera vámutu. Nararihihi ena apamuriana achaneana machaneranahi ema Váinaraji.

<sup>20</sup> Vítisera véchahi eta máitesirahi eta te juca apaquehe ema Machicha ema Viya. Éma tímitupanahavihi. Émavenehi témesenicahavihi mayehe ema Maiya ema yátupiquenehi Viya. Máichavene ema Machicha Jesucristo, viávahácaripa víti ema yátupiquenehi Viya. Émara ema macarichuquenehi yátupiquenehi Viya. Éma, tíjaracahaviya eta vítaresiraya máichecuarquirénapa.

<sup>21</sup> Nuchichanaveana, vahi ecucasiñaraji; vahi ecucuti ena achaneana ticasañarajiana eta achanemirana.

Tamutupa eta juca néchajiriruvanahi eyehe.

## **Eta macartane ema Apóstole Juan, ticaijare 2 JUAN**

### *Eta vémunaraivaya*

<sup>1</sup> Nuti Juan, víyarahánupa, nucajurevi eta juca nucartane piti ati. Néchajicavi piti manerejiruhi ema Viya. Énerichuvare némechajirisihavaca ena pichichanaveana. Eti némunaruhequenehi núti, tacuti eta náemunasiravaca namutu ena apamuriana títucana tisuapana eta yátupiquene máechajiriruva ema Viya. <sup>2</sup> Viti vémunacahe taicha vicuticacahi eta visuapira eta yátupiquene máechajiriruva ema Viya. Máichecuaraquirénapa eta visuapiraya. <sup>3</sup> Nuvaraha macatajicahehine ichape ema Tata Vicaiyaquene, émapa ema Jesucristo, Machicha ema Viya. Nájapanuhehine, nájaracahehine eta táurivaina eta epanereruana, taicha yátupiquenehi eta náemunasirahehi.

<sup>4</sup> Núrisamureinehi eta néchirahi eta nanerejisiravahi ena pichichanaveana, tíurihi eta náehisirahi eta yátupiqueneanahi, tímiyanavanavare eta nasuapirahi eta mavanairipiana eta veyehe ema Tata Vicaiyaquene, taicha ene vicaheyarehi.

<sup>5-6</sup> Tiuri puiti, ati, nucajurevi, taicha nuvaraha némechavi eta juca mavanairipi ema Viya, étarichu eta vémunasiracacayare vimutu. Te vémunaca ema Viya, visuapaya tamutu eta mavanairipiana eta veyehe. Te tépanavainapa eta vicasañairahi ema Viya, tivanecahaviripahi eta vémunasiracacayare. Tásiha puiti, eta ecaheyare eta émunasiracacairayare eta ítaresirayare.

### *Ena tivayuarahiana*

<sup>7</sup> Nuvaraha némechavi eta juca, taicha nararihi te juca apaquehe te viávihihi ena navarahahi ticaetemaheanaya. Ena nani, vahi návarahahine náimicacheráchahine eta máuchusirahi yátupiquenerahi achane ema Jesucristo. Ena nani, tivayuarahianahi, ticatianacanahivare ema Cristo. Vahi návarahahine véhica éma. <sup>8</sup> Tásiha, ecaunevayare tayehe eta navayuarapiana. Échapa-vachucha éti, machu nacamitísicahe tayehe eta ícuchihi ématanevachahi. Nuvaraha ejacapayare tamutu.

<sup>9</sup> Viti visuapahi eta máimiturapiana ema Cristo, viti viávahácahi ema Tata Vicaiyaquene émapa ema Machicha. Váhisera návahácaimahi ema Viya nácani vahi návarahahine nasuapa eta máimiturapiana ema Cristo. Tasapihapa, náimitucahi eta nayehechiravarichu eta napanereruana. <sup>10</sup> Tacahe, te náitecapauchahepuca te iúrujisiavahi ena nácani, téhesera vahi nacuechajisiha eta máimiturapiana ema Cristo, tasiha, vahi ecujachapa te epenana. Váhivare ecuichuha: “Yare, ani, ítecapauchanu” vahi ecuquicha éna. <sup>11</sup> Taicha te íchapuca eta juca, ticutinapapuca eta étirichuhi nachamuriana ena tivayuarahiana. Váhira ecuimisiapava nayehe, máchura étaina etapiravaina eta juca náichirahi éna eta tamauriqueneana.

### *Eta táichecuaraqui eta macartane ema Juan*

<sup>12</sup> Tiuri, júcarahi apamuri eta numetaruheanaya. Vuíchahasera numetacahemahi puiti te juca carta. Taicha nucunevahi eta nitesiraya eyehe apaesa véchajiricavainapa eta vímanajirisiracacayare. Tásiha, viúrisamurénapa vimutu.

<sup>13</sup> Téchajicaviana ena suchichanaveana esu péchavi, ésurichuvare manerejiruhi ema Viya.

Tamutupa eta juca néchajiriruvahi eyehe.



## **Eta macartane ema Apóstole Juan mayehe ema Gayo, ticaijare 3 JUAN**

### *Eta Juan macunacha ema Gayo*

<sup>1</sup> Nuti Juan, víyarahánupa, nucajurevi piti némunaruquenehi Gayo. Núti yátupihí eta némunasirávihí.

<sup>2</sup> Némunaruquene, nuyaseuchavíhi me Viya táurivaina eta pémataneana. Énerichuvare nuyaseuchavivare táurivaina eta pítaresira, tácutini eta táurivaipa eta piáchaneva. <sup>3</sup> Tétavicavahí eta núrísamurevahí, te títecapanapa ena vichamuriana, taicha timetacananapa eta pisuapirahí, péhisirahí eta yátupiqueneana echájjirucávana mayehe ema Cristo. <sup>4</sup> Tájinarínehi tácuti eta núrísamurevahí taicha eta nusamairísiraparacahí eta éhisirahí eti nuchichanaveana eta yátupiquene echájjirucava mayehe ema Cristo.

<sup>5</sup> Némunaruquene, tájina táichavahí eta pijacapirahí péchapajirisirahí ena vichamuriana, váhinéni pímatiquenevacáinahíni éna. <sup>6</sup> Te títecapanapa ani te víúrujjisiavahí, timetacahavianainapa. Tájina táichava eta piúríva, pímicatasiravacahí eta nayanira ena vichamuriana. Eta picaheyare pímiyanavainí eta piúríva nayehe, taicha eta juca víchirahí tacurísamurechayare ema Viya. <sup>7</sup> Taicha éna, táimipaicahí eta nacametarairuirahí eta tiuri echájjirucava mayehe ema Jesucristo. Eta napaisirahí, tájina nayaseserecapahíni éna nayehe ena achaneana masuápajiráirahanaríchaha. <sup>8</sup> Tásiha, tavarahaichu eta véchapajirícavaca ena nani, apaesa eta vímicatasihaya éna eta nacametarairuiraya eta yátupiquene tiuri echájjirucava.

### *Eta mampurivahí ema Diótrefes*

<sup>9</sup> Nucajureripa ena pichamuriana te piávihahí. Mararihísera ema Diótrefes. Éma máurica ticainapupuiricava te namirahu ena achaneana. Éma, vahí masuapa eta vituparahana. <sup>10</sup> Tásiha, te nutiaríhinapa eta ara eyehe, núti nítame-tacaheyare tamutu eta máichaqueneana. Éma, téchajicahí eta víyehe. Cátichacarehí eta máechajiriruvana, váhisera másuapacarehíni. Váhivare tácarichu eta juca máichahí. Éma, vahí majacapaimahí ena vichamuriana tipaicana. Te natiaríhi ena navaraha najacapa, ema maca macavanairípi nacuija nacujacapa. Énerichuvare mavaraha macaerajica te emuri ena tivarahana najacapa.

<sup>11</sup> Némunaruquene, vahí picuicutípa ena tíchanahí eta tauriqueneana. Picutiyaresera ena tíchanahí eta táuriqueneana. Taicha víti víchana eta táuriqueneana, víti machichanaveana ema Viya. Énaserá ena tíchanahí eta tauriqueneana, éna, vahí náimatihíni ema Viya.

### *Eta Juan macunacha ema Demetrio*

<sup>12</sup> Nutuparacaví pijacapayare ema Demetrio. Namutu nacunacha éma, taicha yátupiquenehi táuriva eta mayeherepi. Núti apanavare énerichuvare nucunacha eta máuriva. Píti pímatínuhi, eta tatupiruvahí tamutu eta néchajiriruvana.

### *Eta táichecuaraquí eta macartane ema Juan*

<sup>13</sup> Tiuri, jucaríhi apamuri eta numetaruvianayare. Vuíchahasera numetacavimahi puiti te juca carta. <sup>14</sup> Nútijapainapasera eta ara piyehe apaesa nímahaví. Tásiha, véchajirícavainapa eta vímanasirácacayare.

<sup>15</sup> Puiti, nuvaraha májaracavini ema Viya eta piúrivaina tayehe tamutu eta pipanereruana. Téchajicaviana ena piájiriareana. Tásiha, péchajisinanu émanapachuina ena nájiriareana núti.

Tamutupa eta juca néchajiriruvahi piyehe.

## Eta macartane ema San Judas, ticaijare JUDAS

<sup>1</sup> Nuti Judas néchajicahevaca emutu eti nuparapenaveana nuchamurianahi. Núti mavanerunuhi ema Viáquenu Jesucristo. Éti ímatihi ema nuparape Santiago. Núti nucajurehevaca eta juca nucartane taicha eti apanavare machanerahepa ema Tata Vicaiyaquene, taicha esuapahi eta máichuarapihi. Tétavicavahi eta majaneasirahehi táichavene eta iúrujasirahi ema Machicha Jesucristo. <sup>2</sup> Puiti, nuvaraha tajurucaini eta evapinairavavacahi eta máemunasirahehi ema Viya, étapa eta majapanuirahéhi; tájinavare tahapapiricahini eta táuriva eta epanereruana.

*Yátupiyare eta náicuñayare ena tivarahanahi náemejecapavacha ena vichamuriana*

<sup>3-4</sup> Tétavicavahi eta nuvarairahi nucajurehe emutu éti, nétumechaheyare eta éhisiraina ema Viáquenu Jesús. Puítisera nusamairiricapa eta náimisiapiravahi eta eyehe ena nácani tépiyahirahiana tímijachavanahi vichamurianahi. Tásiha, nuvaraha ecuneuchavaya nayehe. Étumechacaca, vahi ecusuapavaca ena nánitátajiana, machu náemejecapavachahe. Táimiyanava tauri eta éhisiraina eta véhiruhi. Taicha ena víyarahana apóstoleana tímitucahavianahi eta máimiturapiana ema Viáquenu Jesucristo. Tásiha, vahi táuricahini vihapapiricahini. Énasera ena nani tépiyahirahiana, tétavicavahi eta namapicauravahi eta me Viya. Éna tímijachavanapa eta vahi máicuñacavacáimahi eta náichira tamutu eta tájiparácana taicha tétavicavahi eta máemunasiravaca. Tavetijipa tíñemahipanapa jararihiva eta náimiturapi, ánipa nacahe: “Vahi típicauchacare ema Jesús, váhivare táuricahini vácahehi émara Viáquenu. Te échajisihapuca éma, tatupiruvachucha ‘Jesús’ íchayare, taicha vahi émaina téchahavi víti” tacahehi eta navarahaquene éna. Máimahainepasera ema Viya eta náicuñayare éna, taicha acanevacaipa eta mametarapi ema Viya: “Muracaqueneya eta náicuñayare namutu ena ticaecahinuanahi eta némunasiravacahi”.

<sup>5</sup> Németeaca éti écharipa eta náichararacavahi ena viáchucanaveanaini israelítana eta náuchusirapa te avasare Egipto. Nuvarahasera némechahe émahí ema Viáquenu ticuchucuhavacahi namutu éna. Téhesera te táequenepa, tétavicavahi eta namasuapajiravahi ena namutuyaréni. Tásiha, máitapaimuríhapa ena masuapajirairahanahi. <sup>6</sup> Énerichuvare némechahe eta náichararacavahi ena ángeleana masuapajirairahanahi. Ena nani aquenucarahanaini te anuma, sántuanainihi. Tímisiapavanapasera tayehe eta tauriqueneanahi. Tásiha, ema Viya macavanairipipa eta náiyaracuha ena ángeleanaini téjecapavanahi eta te timapicu infierno, nacaerataiyahi. Puíticha váhiquene títurucavanaimahi tiúchucana. Te jena sáchezare mayaseseresihaya ema Viya, muracayare eta náicuñayare namutu éna. <sup>7</sup> Échahivare eta náichararacavahi ena achaneana ticavasanahi te apinaquene avasare Sodoma étapa eta Gomorra, étapa eta avasarechichana te tachacayanahi. Éna, tétavicavahi eta tavayuchiravacahi eta náesenamarevana. Navetijipa ena tivehacacana ajairacacana. Tacutiya eta táijahúchiravahi eta máemechaesiravacahi ema Viya ena ángeleanaini, macamiricahi eta yucu, táijuchavacapa namutu ena nani achaneana váinarajiqueneana. Eta juca tavaraha yátupina vicaicutiarahi tayehe eta nacaicuñairavacayare eta te yucu infierno namutu ena tíchanahi

eta tauriqueneanahi. Máitavacacainapa eta nacatajivairaya. <sup>8</sup> Táitusiava, vahi náechavahini ena nani tímisiapavanahi eyehe. Navayucharichucha eta náechipejisirahi eta náquehe taicha tétavicavahi eta tavayuasiravacahi eta natuhusivana. Ena nani tépuruanahi ema Viáquenu eta émairahi téchavacahi. Nacaecahivare ena ángeleana tiámana eta majaraivahi ema Viya. <sup>9</sup> Vahi táurihini eta juca. Nuvaraha némechahe eta jena sache máepenirahi ema víyarahaini Moisés, ema Váinaraji mavaraha mámayarehini eta máquehe. Ema Váinaraji macanarapa ema Arcángele Miguel, mavaraha máimiyusemaca. Váhisera masemahini ema Miguel. Váhivare macajacharecahini. Ánipa máicha: “Páurevisami píti. Pímahaya eta pícharacavayare maicha ema Náquenu” máichapa. <sup>10</sup> Énaserá ena nánitátajiana achaneana, vahi napicaurahihini. Tíjaracavana nacaecahi jácani tájahanapuca váhinéni náimatiequeneha. Éna nacutihí eta sárareana. Tinicanahi, téranahi, esenamareanahi. Nájina tatsiriháquenénahi. Étapa tímicuñacavacaya.

<sup>11</sup> ¡Páureanasami ena nani! Muracayare eta náicuñayare te yucu, taicha nacutihí ema Caín eta mamasuapajiraivahi me Viya. Nacutivare ema Balaam ema témejcapavacachavacahi ena achaneana eta mavarairahi eta plata. Nacutivare ema Coré ema tépuruhi ema mavaneruhi ema Viya. Étapa tivíuchahi eta macapasirahi ema Viya. <sup>12</sup> Tétavicavahi eta natsirihacarevahi eta náimisiapiravahi eyehe te iúrujisiravana eta énisirana ena echamuriana. Taicha éna, tájina napícauchaquenénahíni eta náurisamureravahi te nanisirana, náerirana. Éna, navarahahi epicauchavacayare éti, navarairahi ticaetemajiricaheana. Ena nánitátajiana nacutihí eta úcájiana te ichape sácherehi. Ticutimahi tiquivayarehi. Técativachuchasera eta támapahi. Tájina taquivahini. Nacutivare eta yucuquiana máhiquireana te ticahipaipa eta apamuriana yucuquiana tachamuriana. Tamapurují eta vicuchapirahi eta náichirahi eta táuriqueneana taicha nacutivare eta yucuquiana tájiqueruana vinereruana, tépurihapa. Váipaquene tímarucaimahi. <sup>13</sup> Éna, nacutivare eta táepacuruha eta une te técativavapa muraca eta ichape une, camurihi eta tarisasama. Tétavicavahi eta tatsirihacarevahi eta náichaquenehi eta tauriqueneana. Nacutivare eta jarariquiana tiyejerecavana. Jararihisera eta nacaicuñaiyayare eta ichapequene timapícu. Máitavacacayare eta nanasirayare.

<sup>14-16</sup> Ena nánitátajiana, tétavicavahi eta nacaecahirahi tamutu. Étachucha natanucahi eta najamuraraivana. Ticasíñavavaicana eta náechajirisiravana. Nacunachahi ena ticaimahaqueneanahi, navarairahi nacaetemajiricavaca éna. Ticaicuñayaresera, taicha ema víyarahaini profeta Enoc acane máimaha te mavapure eta náicuñayare éna. Ánipa macahe: “Nímahahi te nuvapure eta máitecapirayare ema Viáquenu te juca apaquehe. Mámayarepahi namutu ena mayeheana ángeleana. Tétavicavahi eta nasimutuvahi. Nacurujicavacayare namutu ena ticapecaturarahiana. Náimerecayareva tamutu eta naviurevana ena achaneana váinarajiqueneana, taicha tétavicavahi eta náichirahi eta tauriqueneana. Navetijinapa ena ticaecahirahiana me Viya, ichapepáinapa eta naviureva” macahepa. Tétavicavahi eta masuapacarevahi ema víyarahaini Enoc, taicha mámariequenehi ema Adán, sántoquenehivare éma.

#### *Ema Judas matuparacavaca ena machamuriana*

<sup>17</sup> Nuvarahavare némechahe, eti nuchamuriana némunaruqueneana, eta nametarapi ena víyarahana apóstoleana mayeheanahi ema Viáquenu Jesucristo. <sup>18</sup> Ánipa nacahe: “Vahi táyerémahi eta náuchujisirayare ena ticaecahirahiana tayehe eta táuriqueneana máimiturapiana ema Viáquenu. Váhivare

návarahahíni náinajica eta tamauriqueneana” nacahepa. <sup>19</sup> Puiti numetac-ahe: Natiarihipa puiti ena ticaecahirahiana. Tímaticareana éna, taicha navaraha náiputsicavaca ena vichamuriana. Étachucha natanucahi eta najamuraraivana. Éna, vahi návarahahíni émainahíni máechavacahini ema Espiritu Santo.

<sup>20</sup> Étisera némunaruqueneana, étumehacacaya eta éhisirahi ema Viáquenu, taicha tétavicavahi eta tasantuvahi eta véhiruhi. Ísapavayareva tímitucahe ema Espiritu Santo eta eyujarauchirana. <sup>21</sup> Tauri eta ítaresira, vahi ecuemitiscavahini eta táetaviuchiravahi eta máemunasirahehi ema Viya. Váhivare ecuyacujihini eta ecuchapirahi eta jena sácheyare táepaniravaya eta vítaresira. Máitavacacayare eta vítaresiraya taicha eta majapanuirahavihi ema Viáquenu Jesucristo.

<sup>22</sup> Étumehayare ena echamuriana nácani tipanerechanaripa náehica ena tivayuarahiana. <sup>23</sup> Ena apamuriana, ena téhicanaripa eta náepiyahiraivana, epamicayare éna apaesa tachava eta náehisiraina yátupina ema Viáquenu. Ecuchucuhavacayare eta náejecapiravana, tacuti te vicuchucuhahi eta viyereruvana te tíjahúchavapuca tiju eta vipena. Ejapanuyare nácani muracaripahi eta náejecapiravanahi. Ecuneuchavasera, machu napareac-ahe eta náejecapiravana, taicha tétavicavahi eta tamauriva. Epicayare éta.

*Tétavicava eta vicunachirahi ema Viya*

<sup>24-25</sup> Ema Viya, tétavicava eta máitupajjiasiravahi. Macarichuhi éma marataha ticatiuchahavi tayehe eta vícuchinihi vícuñayarehini, taicha mavanecahi máepeninahaviya ema Machicha, ema Viáquenu Jesucristo. Puíticha tétavicavahivare eta majaneasirahehi éti apaesa vahi ecuaquipaicavahini tayehe eta pecatu. Taicha mavarahahi máepachinachayare eta iáchanevana, tacuijahivaréni eviurevaina eta mámiraheyare te mamirahu te jena sácheyare. Tétavicavainapa eta iúrisamurevaya te ímahapa eta majaraivaquenahi. Acane nacunachanahi ena ángeleana. Énerichuvare víti, tétavicavayareva eta vicunachiraya éma vimutu víti, taicha tétavicavahi eta máramicarevahi taicha ichapequenahi eta máitupajjiasirava. Vépyumiraucha eta víjarasirava visuapayare. Máitavacacayare eta vitsiusirayare éma. Amén.



## **Eta mametacasivanahi ema Apóstole Juan te mavapure, ticaijare APOCALIPSIS**

<sup>1</sup> Ema Tata Vicaiyaquene mavarahahi tímimatichahaviyare eta tájahúchiravaya táichararacavayare eta apaquehe, apaesa vecha viti mavanaranahi. Ema máimechahi eta juca, ema machicha Jesucristo. Tásiha, ema Jesús mavanecapa ema ángele timetacanuyarehi nuti Juan mavanarahi. Eta tacahe, nájuchahi puiti eta juca apaesa écha éti apanavare eta táichararacavayare. <sup>2</sup> Tacuti eta yátupihí eta nucametarairuirahi nútí eta máechajiriruvana ema Viya, étarichuhi eta máimiturapiana ema Jesucristo, puiti nutupiruva numetacahe eta juca numetacasivanahi eta máimerunuanahi ema ángele. <sup>3</sup> Tétavicava eta náuricacarevaya ena téchajicuhanaya eta juca máechajiriruvanahi ema Viya, eta máimimatirunuhi. Énerichuvare tétavicava eta náuricacarevaya namutu ena tisamanaya tisuapanaya eta juca. Taicha tiánehinapa eta táitavirayare tamutu.

### *Ema Juan macajure ena siétemuriqueneana machamuriana*

<sup>4</sup> Nuti Juan nucajurehe eti siétemuriana nuchamurianahi ejanereruanahi tayehe eta tinapaica te Asia. Nuvaraha macatajicahehíni ichape ema Tata Vicaiyaquene, émapa ema Jesucristo. Táurihivaréni eta epanereruana. Ema Tata Vicaiyaquene matiaríhiquenehi te tépanavainapa, puiti manasirichuhi eta viyehe, émarichuva manasiqueneyare te táitavapa tamutu. Te tamirahu eta máejasihahi trono, natiaríhí ena siétequeneana mayeheana arcángeleana. Navarahahivare eta iúricacarevainaini. <sup>5</sup> Ema Viáquenu Jesucristo, ema yátupiquenehi tiámaparauchahavihi eta juca vímitucasivanahi. Énerichuhivare ema máinapuiruhi téchepuca te máecari, apanapa eta máquehe. Éma, yátupiquenehi Rey. Namutuhi macachuriacavacaya ena réyeana te juca apaquehe. Éma, yátupihí eta máemunasirahavihi, masipasinahavihi eta viáchanevana tayehe eta vipecaturana te máítine máepusairuhi. <sup>6</sup> Énerichuvare, tinacahavihi te namuri ena manerejiruanahi tuparairucahaviyarehi eta mayehe, mavarairahi viyujaracaráhiyare mayehe ema Viya. ¡Támutihini sácheana vicunacha eta máítupajijiasiravahi! ¡Viáramiparacahini eta aquenucairahi! ¡Amén!

<sup>7</sup> Ímaha, márajapainapa ema Cristo. Támayarepahi eta úcaji. Namutuyare nanecapa ena achaneana te juca apaquehe. Náimahainapa, tásiha, tipicanainapa. Tíyahahacavanainapa eta náimairayare, énaripa ena námariequeneana ena tijarachanahi, taicha téchavanahi éna eta nájecapiravahi ena náchucanaveanaini. ¡Ene tacaheyare! ¡Máitecapavanepaini!

<sup>8</sup> “Nútira nunacuchahi eta táepaniravahi eta apaquehe. Nútirichuvare nécha eta táimiyániravaya tiuri. Néchayareva eta táitavirayare tamutu” macahehi ema Viya, tétavicava eta máítupajijiasirava, máituruequenehahi tamutu. Éma, matiaríhiquenehi te tépanavainapa, puiti manasirichuhi eta viyehe, émarichuva manasiyare te táitavapa tamutu.

### *Eta máimeresirava ema Jesucristo mayehe ema Juan*

<sup>9</sup> Nuti Juan, nútirichu echamurínuhi. Nútirichuvare ecutiquenenuhi tayehe eta vicatajivairahi, vicamichahisera tamutu taicha tétumechahavihi ema Jesús. Taicha vicunevaipahi eta visiapirayare te mávasa, aquenucahaviya.

Núti, tiáquijicanuanahi tayehe eta tiúrupuhi ticajare Patmos te etupiereca mar, táichavenehi eta nucametarairuirahi eta máechajiriruva ema Viya, néchajisihairahivare eta máijare ema Jesucristo. <sup>10</sup> Te jena sáchequenehi lumincuquenehi, ema Espíritu Santo tímimahanuhi eta mavarahaqueneana tímechanu ema Jesucristo. Tacahehi eta táepaniravahi eta máimimahaquenuhi. Tativapa nusamahi eta mahu ema émana te nuquecu. Muraca eta máechajisiranuhi. Tirurehucha eta nusamirahi. <sup>11</sup> Ánipa macahehi:

—Piájuchaya tamutu eta juca pímahaqueneanaya. Pímiamarecapa eta piájure nayehe ena siétemuriqueneana pichamuriana: ena tiávihanahi te Efeso, ena tiávihanahi te Esmirna, ena tiávihanahi te Pérgamo, ena tiávihanahi te Tiatira, ena tiávihanahi te Sardis, ena tiávihanahi te Filadelfia, énapa ena tiávihanahi te Laodicea\* —macahepa.

<sup>12</sup> Tacahe, néviurucavapa. Nuvarahapa nímahayarehi ema téchajicanuhi. Tásiha, nímahapa eta siete candelero tiúquiána, amairiha oro. <sup>13</sup> Te enumuhumuri eta siétequene candelero, matiarahi ema achane vivasimahi. Tiúmaji eta mamuiriha. Títecapa te máivapeana. Ichapeme eta máitijuhe, títecapa te matupa. Amairihavare oro. Eta máitijuhehi táicutiarahi eta aquenucairahi éma. <sup>14</sup> Eta machutimaca amairiha tijapu, tirapepejicaquenehi. Eta máuquihana, tétavicavahi eta tavayuhauquiravahi. <sup>15</sup> Eta máivapeana tijanunupevachava, tacuti eta bronce eta tajanunusira. Eta mahu, tétavicavahi eta tamuracavahi eta marurehuchirahi. <sup>16</sup> Te mavahu vaure, macaratacahi eta siete jarairiquiana. Te majaca tiúchucahi tavasimahiyaréni eta espada. Tétaviuchahi eta tacasiriva, tínunapehivare. Eta mamira, tétavicavahi eta táeramemesirahi tacuti eta sache.

<sup>17</sup> Nupicarinehi eta nímairahi. Náquipaicavapa te máivapeana. Tiánehi népenaini eta nupisirahi. Émasera manacapa eta mavahu vaure te nápusi. Máichanupa:

—Vahi picupicanu. Nútichucha nuti nunacuchahi eta táepaniravahi. Nútirichuvare néchahi eta táitavirayare tamutu. <sup>18</sup> Núti yátupiquenénu nucaitarecarahi, taicha nuchavahi nítareca te táequenepa eta nacapasiranuhi. Puiti máichecuarquirénapa eta nítaresira. Nútirichuvare necha ena tépenana. Nucaehepucayare eta náqueheana ena náepenaqueneana nácani níchuhaqueneanayare. <sup>19</sup> Piti Juan, piájuchayare eta juca pímahaqueneanahi puiti, étapa eta pisamaqueneanahi nutupararuvianahi nayehe ena pichamuriana, étapa eta táichararacavayare nímechaquenéviyare. <sup>20</sup> Numetacaviya eta tacayemaquenehi eta siétequene jarairiqui nucarataruhi te vaure, étapa eta siétequiqueneana candeleroana óroquiána. Éta juca siete jarairiqui, énara ena ticametarairurahiana nayehe ena siétemuriqueneana pichamuriana. Eta siete candeleroana, énara ena siétemuriqueneana nuchanerana.

## 2

*Eta mametarapi ema Jesús nayehe ena machaneranahi ticavasanahi te Efeso*

<sup>1</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Efeso: Núti iáquenunuhi taicha núti nucaratacahi eta siétequene jarairiquiana te nuvahu vaure. Núti návihahi te tamuri eta siétequiqueneana candeleroana óroquiána, táicutiarahi eta néchirahahi emutu éti. <sup>2</sup> Núti nímati tamutu eta íchaqueneanahi, étaripa eta tamuracavahi eta ecaemataneasiranuhi, ecamichirahi tamutu. Váhivare

\* **1:11** Tamutu eta jucana avasareana tiávihanahi te provincia Asia. Púiticha eta juca provincia ticajare Turquíá.

iúricahini ecasiriquihini ena achaneana váinarajiana. Váhivare ejacapahini ena tépiyacavanapahi apóstoleana, ímatiacavanehi éti ena tépiyahirahianapahi. <sup>3</sup> Nímatihe eta ecamichirahi tamutu eta iátajivanahi táichavenehi eta ecaematanearanuhi núti. Vahi eyacujihini. <sup>4</sup> Jucarihisera eta juca eviurevahi nuyehe. Puiti ecamitiacaripa eta émunaraivana. Vaipa tácutihini eta émunaraivanahi te épanavainapa. <sup>5</sup> Puiti nuvaraha étupiricayare eta juca, tachava eta émunaraivahi. Éneuchavaya tativaina apaesa íchavare eta táuriqueneana tacuti eta acane. Te vahi ecuetupiricava, nútijacaruvayare níteca, nítivachayare eta candelero ícutiarahi eyehe. <sup>6</sup> Éti, ecunachacarehi eta ecatichirahi eta tamaetupisiravahi eta nayeherepiana ena apamuriana téhicanahi ema Nicolás. Ene nucahehi núti, nucatichahivare eta nayeherepiana.

<sup>7</sup> “Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucasiapaheyare núti tayehe eta paraíso ícumunahi me Tata. Nénicahayareva eta tahi eta yucuqui tiama eta táuricacarevayare eta ítaresira.

*Eta mametarapi ema Jesús nayehe ena machaneranahi ticavasanahi te Esmirna*

<sup>8</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Esmirna: Núti nunacuchahi eta táepaniravahi. Nútirichuvare néchahi eta táitavirayare tamutu. Nuti nacaparui, nuchavahisera nítareca. <sup>9</sup> Núti nímati tamutu eta íchaqueneanahi, eta ecatajivairahi, étapa eta epaureravanahi. Tétavicavahisera eta iúricacarevahi, tímicutijiricavaipahi rícohénahíni. Nímativare vahi esemahini taicha eta épiyaequeneanahi nayehe ena tímijachavanahi machanerana ema Viya. Mávaháruanahi ema Váinaraji, machaneranahivare. <sup>10</sup> Vahi ecupica eta ecatajivairaya. Numetacahe: Ema Váinaraji tímisiapaheya te cárcel eta máitsamaresiraheya te tíminajicaheyarepuca. Ecamichachuchasera, taicha diésquenerichu sache eta ecatajivairayare. Nutuparacahecha: Ejicapaicayare tayanapanepuca nacapacahe. Núti níjaracaheyare eta táitsivayare. Tiúriyare eta ítaresiraya.

<sup>11</sup> “Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nucuchucuhaheyare. Vahi ecatajivaimahi tayehe eta nacatajivairayare te yucu ena masuapajirairahanahi.

*Eta mametarapi ema Jesús nayehe ena machaneranahi ticavasanahi te Pérgamo*

<sup>12</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Pérgamo: Núti nítuca némecharecavaca nácani téjecapavana taicha nucayehe eta espada, táetaviurequenehi eta tacasiriva. <sup>13</sup> Núti nímati tamutu eta íchaqueneanahi. Nímativare eta éñamiravahi taicha namutuyaréni ena echácayapenána téhicanahi eta máimiturapi ema Váinaraji Satanás. Váhisera ínajicavahini, étumechavaichucha eta éhisiranuhi núti. Étaripa te ímahapa eta nacapasirahi ema nuchaneraini Antipas, yátupiquenehi eta masuapiranuhi éma. Ena machaneranahi ema Váinaraji nacapacahi éma te jena iávihahi éti. <sup>14</sup> Jucarihisera eta juca eviurevahi nuyehe. Taicha ísapavaichucha natiarihíhi ena nanerejiruvana ena echamuriana vahi návarahahini náinajica nanica eta tinicacare nayujaraurehi te tamirahu eta nasiñarajiana. Tacutiquene esenamareanahi éna. Eta acane, ema máratátaji Balaam tímitucahi ema Balac eta máimiaquipaisiravacahi ena israelítana tayehe eta juca tamauriqueneanahi. <sup>15</sup> Énerichuvare

nararihi ánaqui te emuri ena apamuriana váhivare navaraha náemitisica eta máimiturapiana ema Nicolás. Tétavicavahi eta nucatichirahi núti eta máimiturapiana ema Nicolás taicha tétavicavahi eta tamaetupisiravahi. <sup>16</sup> Eta tac-ahe, éneuchavayare eti éjecapavanahi. Te vahi ecueneuchava, nútijapayare némecharepanaheyare tayehe eta tacasiriquene espada táuchurequenehi te nujaca.

<sup>17</sup> “Ema Espíritu Santo tímitucaheyare eta juca numetarapiana eti nuchaneranahi. Etupiruvayarehi esuapa. Emutu eti ecamichanahi, ímiyanavahivare eta éhisiranuhi, nénicaheyare eta ícuchihi me Viya eta ticaijare maná, tayum-rurevaquenerichaha. Énerichuvare níjaracahevacayare eta tijapu mari. Eta te mari tatiarihiyare eta ajureca arapiru. Nájinasera tímatiequenehaimahi. Macarichu ema ticayeheyare, éma tímatiyare eta máijare arapiru.

*Eta mametarapi ema Jesús nayehe ena machaneranahi ticavasanahi te Tiatira*

<sup>18</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Tiatira: Núti Machichanuhi ema Tata Vicaiyaquene. Núti nímatihini tamutu, taicha tijarahivaca eta núquihana, tétavicavahi eta tavayuhauquiravahi. Eta nívapecana tijanunucavacava tacuti eta bronce eta tajanunusirahi. <sup>19</sup> Núti nímatihini eta íchaqueneana. Nímativare eta émunasiranuhi, eta esuapiranuhi yátupi, eta échapajirisirahi ena achaneana, etapa eta ecamichirahi. Nímativare muracapanaipahi eta ecaemataneasiranuhi. Tiápajucavaipahi puiti tayehe te épanavainapa. <sup>20</sup> Jucarihisera eta juca eviurevahi nuyehe. Ísapahi tisiapamurihahe esu esénatátaji. Ésu, vahi táetupicavahini eta suyeherepiana, sucutihini esu Jesabélnitataji eta acane. Tímijachavahi mavanara ema Tata, suémejecapavachahisera ena nuchanerana. Suímitucavacahi naicha eta piesta, tásiha nanicavare eta tinicacareana nayujaraureanahi te tamirahu eta nasiñarajiana. Suímitucavacavare eta natuhusivayare. <sup>21</sup> Núti íchapemurihi eta nucuchapirahi ésu, eta suéneuchavahini, apaesa suínajicahini eta sutuhusiva. Váhiquenesera suvaraha suínajica eta suyeherepi. <sup>22</sup> Puiti níjaracayare eta suícuñayare. Ticajumayare apaesa suíveca te sucamane. Ichape eta sucatajivairaya. Énerichuvare ena suítirevanahi, nícuñacavacayareva muraca, te vahi nacuíñajica eta suíchaqueneasanahi ésu. <sup>23</sup> Énerichuvare ena suchichanaveana níjaracayare eta najumayare, nímicapasiravacayare. Tásiha, échainapa eti nuchaneranahi eta nímatirahi tamutu eta epanereruana, eta te esamureana éti. Nímahainepasera núti eta nícharacavacayare ena téjecapavanahi, etapa tiámayare eta náichaqueneana. <sup>24-25</sup> Tájina apanainahini eta eviurevahi nuyehe. Núrisamurehi eyehe eti matapiravareanahi, eti vahi éhichahini eta suímiturapiana esu esénatátaji. Váhivare ávarahahini íjaracava éhica eta suhiapemarevanahi, susiñavavairisirahi eta máimitusirahi ema Satanás. Tásiha puiti, nutuparacahe eti nuchanerana iávihanahi eta te avasare Tiatira: Ecaratacava muraca tayehe eta juca éhiruhi. Ecunenuyare eta nuchaviraya.

<sup>26</sup> “Emutu eti ecamichanahi, ímiyanavahivare eta éhisiranuhi, váhivare ínajicahini eta ecaemataneasiranuhi, núti níjaracahénapa eta tuparairucairahénapa tayehe eta avasareana. <sup>27</sup> Ecutinuyare núti eta máijarasiranuhi ema Tata Ticachichanu eta tamuracavahi aquenucairanuhi. Ene ecaheyare éti. Muracayare eta aquenucairaheyare. Ecaratacayare eta etsucurupayare fiérrroqui. Esuapacareyare muraca. <sup>28</sup> Tétavicavayare eta ejaraivayare nicha núti, taicha nujupahaheyarehi éti. <sup>29</sup> Ema Espíritu Santo tímitucaheyare eta juca numetarapiana. Emutu eti nuchaneranahi, etupiruvayarehi esuapa.

### 3

#### *Eta mametarapi ema Jesús nayehe ena machaneranahi ticavasanahi te Sardis*

<sup>1</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Sardis: Núti néchavacahi ena siétequeneana arcángeleana, étipa eti ecametarairurahiana taicha núti távami-raurehi eta siétequeneana jarairiquiana. Núti nímati tamutu eta íchaqueneana. Ena achaneana tímijachanahi tíurihi eta ecaemataneasiranuhi. Nútisera nímararacahi eta esamureana. Nímatihe tiánehi eta ínajisirainapa eta éhisiranuhi. <sup>2</sup> Ecaunchavayare apaesa vahi ecuemitiaca eta éhisiranuhi. Taicha nímararacahi núti vahi tátupiruvahini te esamureana eta ecaemataneasirahi ema Tata. <sup>3</sup> Puítisera, éneuchavayare apaesa tacuijapa ecuichiravaina. Échavayare éti tamutu eta ímitucasivanahi. Yátupina eta éhisiraya. Te vahi ecuetupiricava eta epanereruana, nútijapayare tíjahúchavayare eta nítecapirayare némecharepanaheya. <sup>4</sup> Váhinéni ámutuhini éjecapavahini éti ecavasanahi te Sardis. Natiarihihi ena matapiravareanahi, váhivare náechipejicavahini. Ena nani, níjaracavacainapa eta namuirihayare tijapu. Ticachane-nuanayareva taicha tatuparacahi eta návihairayare eta nuyehe.

<sup>5</sup> “Emutu eti ecamichanahi, ímiyanavahivare eta éhisiranuhi, níjaracahayare ecamuirihayare eta tijapu. Váhivare nucaepahaimahi eta íjareana tayehe eta libro tiama eta nalista ena náitareruanayare. Nímimaticahayareva eta me Tata, énapa ena ángeleana. <sup>6</sup> Ema Espíritu Santo tímitucaheyare eta juca numetarapiana. Emutu eti nuchaneranahi, etupiruvayare esuapa.

#### *Eta mametarapi ema Jesús nayehe ena machaneranahi ticavasanahi te Filadelfia*

<sup>7</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Filadelfia: Núti yátupiquenénuhi Viya, yátupiquenehivare eta nusantuva. Nucarichu núti néchahi eta tapajacura eta arairuyare avasare Jerusalén, tacuti eta máechapajirisirahi ema náchucaini rey David eta táinapuiruinihi Jerusalén. <sup>8</sup> Núti nímati eta íchaqueneanahi eta ecaemataneasiranuhi. Nímahahivare eta vahi camurihénahini. Nímatihivare eta ecatajivairahi, váhisera ecainajiruvahini eta éhisiranuhi. Ímiyanavahivare esuapahi eta nímiturapiana. Tásiha, puiti níjaracahayare eta apana ématanerépiya. Nájina nísapaimahi tihapapiricaheánaimahi eta ítauchiraya éta. <sup>9</sup> Núti níta hacavacayare ena israelítana tépiyacavanahi machanerana ema Tata, machaneranahisera ema Váinaraji. Nucaepuyucavacayare te emirahu, apaesa náimati eta némunasirahehi.

<sup>10</sup> “Éti, ítauchahi eta nuvanairipi eta ecamichiraya tamutu. Eta tacahe, nujaneacaheya núti apaesa vahi tacuimivehahe te táitecapapa eta nucaetemajirisiravacayare namutu ena achaneana távapahianahi te juca apaquehe. <sup>11</sup> ¡Tiánehipa eta nuchaviraya! Étumechavaya eta éhisirahi, machu émeppureca ejacapirayare eta ícuchianayare.

<sup>12</sup> “Emutu eti ecamichanahi, ímiyanavahivare eta éhisiranuhi; nítisirijicavayare eyehe. Máichecuaraquireyare eta ecachaneraya ema Tata te mávasa. Iámayare eta máijare, étapa eta níjare arairu. Iámayareva eta táijare eta arairu Jerusalén, taicha tachichahevacya. <sup>13</sup> Ema Espíritu Santo tímitucaheyare eta juca numetarapiana. Emutu eti nuchaneranahi, etupiruvayarehi esuapa.

#### *Eta mametarapi ema Jesús nayehe ena machaneranahi ticavasanahi te Laodicea*



<sup>14</sup> “Picajureyare eta juca numetarapianahi ema ticametarairurahi nayehe ena pichamuriana ticavasanahi te avasare Laodicea: Núti náichasa ‘Ema títaurahi’. Námapahi eta yátupiqueneana táuriqueneana echajirirucava. Núti tájinaquenéhi néjequiha. Núti nítauchahi tamutu eta mapanereruanahi ema Tata, te népiyacapa eta anuma étapa eta apaquehe. <sup>15-16</sup> Eta juca numetarapi eyehe éti: Nímati eta íchaqueneanahi. Éti apáesasajíruichucha eta éhisiranuhi. Éti, vuíchaha ímereuchavahini eta ecatianasiranu; váhisera yátupinahini tatupiruvahini eta éhisiranuhi. Tacamunuinehi átupiruvahini, yátupinahini ímrecava eta éhisiranuhi. Machu étaina taviuchahe eta nucaerajisiráhéna nuyehe. <sup>17</sup> Taicha éti ímijachavahi rícohe, tájina íchiravainahini, tájinavare ácamunuhini. Vahi esamauchavahini ichapemurihi eta éjapanuravahi. Váhineni rícohenahini. Etihinéni ecáijare páureana, púchuquiana, mamuiriareana. <sup>18</sup> Nuvaraha nuconsejachahe: Te evarahapa yátupina eta erricovayare, íteca eta nuyehe. Jéhevare núti núrichaheyare, ecutiyare ena ticayeheana eta yátupiquene oro. Jéhevare núti níjaracaheyare eta emuirihayare tijapu apaesa vahi ecutsiriha te numirahu. Nétsarachaheyareva eta ipuruji apaesa ímairirica. <sup>19</sup> Núti nétupiricaya eta napanereruana namutu ena némunarua te nájecapava. Te vahi nacusuapanu, némecharecayarehi. Tásiha éti, tituparacahehi étupiricavane eta epanereruana, étumechavavare tayehe eta éhisira. Éneuchavavare apaesa tacuija ecuichiravaina. <sup>20</sup> Núti nujapanurahi. Nuvaraha tachava eta vicachaneracacahi. Vaipa ecuévuisiha eta nuyehe. Íchuhánuvare. Viápechava vivapinava eta véchajirisiravaparacayare\*.

<sup>21</sup> “Emutu eti ecamichanahi, ímiyanavahivare eta éhisiranuhi, núti nucaeja-cahevacyare tayehe eta néjasihayare, tacutiyare eta néjasirahi te mavaure ema Tata, taicha eta nétumechiravahi nucamichirahi tamutu. <sup>22</sup> Ema Espíritu Santo tímitucaheyare eta juca numetarapiana. Emutu eti nuchaneranahi, etupiruvayare esuapa” tacahehi tamutu eta máechajiriruvana ema Viáquenu eta eyehe.

## 4

### *Ema Juan máimaha eta natsiuresira te anuma*

<sup>1</sup> Te táequenepa eta juca, nímahavarepa eta téjiacahi eta anuma. Nusamavarepa eta mahu ema émarichuhi ema títapucahi téchajicanuhi. Tirurehucha eta mahu. Tíchuhanupa, ánipa macahe:

—Yare, piápana. Nuvaraha nímechaviyare eta táicharacavayare puiti juca vicaijuheyare —macahepa.

<sup>2</sup> Tacahe, eta nusamirahi eta íchuarapi, ema Espíritu Santo tíjaracanupa eta nucaicutiarairayare tamutu eta nímaqueneanayarehi. Tíjahúchavapa nímaha ema Viya, téjacahi te trono te anuma. <sup>3</sup> Tiáramicarehi eta máimahi. Tétavicavahi eta máurinavahi. Eta máimahi tacuti eta tajanunusira eta márijahi jaspe étapa eta cornalína. Te tachachacuana távihahi eta trono, tétavicava eta tajaravahi tacutiyaréni eta táimahi eta ahe eta táurinava. Véresera eta táimahi. <sup>4</sup> Távihahi eta ichape trono, tatiarivare te tachachacu eta vénticuatro trono. Natiarivare ena vénticuatroanavare téjacanahi tayehe, víyahana tuparairucana. Tijapu amairiha eta namuirihana. Namutu ticayeheana corona

\* **3:20** Te juca, ema Viáquenu tímicutijiricava eta máehahamesira te jácani tapajacura, mavarairahi masiapa, manica macachane ena ticavasanahi te tajuhe. Étasera eta máechajisihaqueneana, vahi étainahini eta tapajacura eta vipena. Te juca, ema Viáquenu máechajisihahi eta majapanuirahavi étapa eta mavaraira vichavaya vipaucha éma, tachavahini vivapinava mayehe, viúriyareva te machacaya.

te nachutiana, amairiha oro. <sup>5</sup> Tásiha, nímahahi eta térameca tásihaquenehi tayehe eta trono. Nusamavare tirurehuchanahi. Ticaemapa. Tásiha, tatiarihihi te tamirahu eta trono eta siete tijarahivaca tacutiyaréni tanene eta yucu. Énahi ena siétequeneana arcángeleana mayeheana ema Viya. <sup>6</sup> Tijararacavare te tamirahu eta trono tacutipa eta tajarahivahi eta ichapequene une.

Natiarihivare ena cuátroqueneana tijanearecanahi te machacaya ema Viya. Éna, ecutiarareana eta máitupajijiasirava. Tacutimahi ticaquihavacahi te namirahu téhepa nachepa. Amairiha eta náuquihana. <sup>7</sup> Eta títapuca tavasimahiyaréni eta sárare táíñehiquene\*. Eta apana tavasimahiyaréni eta torillo. Eta apana tacutimahiyaréni achanemira. Eta apana tacutimahiyaréni eta ichape mátihi tiárarairicahi. <sup>8-9</sup> Tacahe, ena nani cuátroqueneana ecutiarareana tiávihanahi tayehe eta trono, sáisivaca eta napavana. Ticaquihavacavare amairiha eta napavana. Ena nani, vahi táechuquihahini eta nacunachirahi ema Viya, ema acanevacaquene eta máitaresirahi. Tijiranahi tamutu sácheana, yátiana. Ánipa nacahe:

“Tétavicavahi eta pisantuva, piti Tata.

Tétavicavahivare eta pítupajijiasiravahi,  
píturuequeneha tamutu.

Piti pitiarihiquenehi te tépanavainapa eta apaquehe.

Puiti pinasirichuvare eta viyehe.

Pítirichuvare pinasiyare te táitavapa tamutu.

Puiti vihasulupayachavihi eta pichanerahavihi”

nacahepa ena ángeleana.

<sup>10</sup> Énavarepa ena vénticuatroqueneana víyarahana tuparairucana tépuyucanahi te mamirahu ema Viya, mávihahi te mayehe trono. Nacamavahupa eta nayeheana corona. Titsiurecanavare. Ánipa nacahe:

<sup>11</sup> “¡Tata Víyaquene, piti Viáquenuvivi!

¡Tétavicavahi eta piúrivahi!

Picarichuhi piti vicasiñaquenévi.

Ichapequenehi eta vicunachiravihi.

Tamutuhi pirataha píti.

Taicha píti pépiyacahi acane tamutu eta juca

vímahaqueneanahi puiti.

Pítirichuvare péchahi puiti tamutu eta

pépiyaranahi”.

## 5

### *Ena Cordero macarataca eta ajureca tiama eta siete sello*

<sup>1</sup> Tacahe, te mavahu vaure ema máejaruhi tayehe eta trono, nímahapa macaratacahi eta ichapeme ajureca ticayuruquihi, ticanaracacahi eta letra te tajuhe étapa te táquecume. Ticaipistahi tayehe eta siete sello, táipistaruvanahi. <sup>2</sup> Nímahapa ema ángele tipiaracahi muraca. Tétavicava eta tamuracava eta mahu. Ánipa macahehi:

—¡Puiti táuricapa máimerecava mácani tatupararuhi tivepistacayare eta tayeheana sello eta juca ajureca, maveruruasirayare! ¡Tatuparacapa máiteca puiti! —macahepa.

<sup>3</sup> Nájinasera nájaracavahini navejiapanahini eta ajureca: énaripa ena tiávihanahi te anuma, énavanerecainahipucaini ena tiávihanahi te apaquehe,

\* **4:7** Te jena avasare Asia (puíticha ticaijare Turquía), tatiarihihi eta tíñehiquenehi sárare náimijarechahi “león”. Te táiyahapa, eta tahu tacuti eta ichapequene toro, étapapuca eta ichi ajaira.

énaripa ena tiávihanahi te amahe apaquehe. Nájnavare tipatsicavaina náimarracahini eta ajureca. <sup>4</sup> Níyahahacavapa núti eta nímairahi namajinairahi náijaracavahini naveruruacahini eta ajureca, náechajicuhahipucaini, étavannerecainahipucaini náimarracahini. <sup>5</sup> Tacahe, téchajicanupa ema émana víyaraha tuparairucahi. Máichanupa:

—Vahi picuiyaha. Taicha matiarahi ema Cristo, ema yátupiquenehi manerejiruhi ema Viya ema téchaya tamutu eta juca apaquehe. Éma, tíjaracavahi eta máepenirahi víchavenehi víti. Tichavaripahisera titareca. Tásiha, macarichu ema tatuparacahi maveruruacayare eta ajureca, mavepistahayareva eta siétequene tayeheanahi sello táipistaruvanahi —máichanupa ema víyaraha.

<sup>6</sup> Tacahe, nímahavarepa ema Jesús, ticaijarehivare Cordero. Titupihahi éma te tamirahu eta trono, nachayacahi ena cuátroqueneana ecutiarareana énapa ena víyahana tuparairucana. Nímahahi eta majara, taicha táimicapacahi éma eta macaepahairahi eta vipecaturana viti achaneana. Siete eta majihuana. Eta juca táicutiarahi eta aquenucairahi. Siétevere eta máuquihana. Eta juca táicutiarahi eta tamutuirahi máimatiqueneha, taicha navanahihi ena siéteana arcángelena mayehe ema Viya, eta náimarrasiraya tamutu eta apaquehe. <sup>7</sup> Ema maca Cordero tianapa, majacapai eta ajureca te mavahu vaure mayehe ema máejaruhi te trono. <sup>8</sup> Te macaratacapa eta ajureca, ena nani cuátroquene ecutiarareana, énerichuvare ena véinticuatroqueneana víyahana tuparairucana tépuyucanapa te mamirahu ema Cordero. Ena nani véinticuatroqueneana, namutuyehihi te navahuana eta guitarra étapa eta escudilla, amairhasera oro. Tiana eta incienso, táicutiarahi eta táurivahi eta nayujarasiranahi ena machaneranahi ema Viya. <sup>9</sup> Tijiranahi eta juca jirasare arapiru. Ánipa nacahe:

“Picarichu píti tituparacavihi eta picaratasirayare eta ajureca, pivepistasi-rayare eta tayeheana sello.

Tituparacavihi taicha píjaracavahi píti tímicapacavihi eta pivacharesirahaviyarehi tayehe eta pítime vimutu víti apaimamajiquenehavihi te juca apaquehe.

Taicha pivarahahi machanerahaviyarehi ema Tata Vicaiyaquene.

<sup>10</sup> Píjaracahavivare viyujaracarahiyare mayehe ema Viya.

Píti píjaracahavihi eta aquenucairahaviya tayehe eta avasareana” nacahepa.

<sup>11</sup> Tásiha, nusamavarepa eta nahu ena camuriqueneana ángeleana nachayacahi eta trono, eta návihahi ena cuátroqueneana ecutiarareana, énapa ena tuparairucana. Tétavicava eta nasimutuvahi éna. <sup>12</sup> Énerichuvare tijirana muraca. Ánipa nacahe:

“Piti Cordero, piti nacaparuhi, picarichu tatuparacahi pijacapayare puiti eta piávacure mayehe ema Viya.

Tétavicava eta piúricarevahi táicha.

Tétavicava eta pímatiequenehairahi tamutu.

Tétavicava eta pitumevahi.

Tétavicava eta pipicauchacarevahi.

Tétavicava eta picunachacarevahi.

Tijarahi visama te vijirauchavi” nacahepa.

<sup>13</sup> Nusamavare eta tahu tamutu eta máepiyaruanahi ema Viya, eta tiávihanahi te anuma, étapa eta tiávihanahi te apaquehe, énerichuvare eta tiávihanahi te amahe eta apaquehe, étapa eta tiávihanahi te une. Ánipa tacahehi:

“Tétavicava eta pítipajijiasiravahi, piti Vicaiyaquene, pítipa piti Cordero.

Éti, tétavicava eta epicauchacarevahi.

Éti, tétavicava eta ecunachacarevahi.

Tijarahi visama eta vijirauchirahe.

Máitavacacayare eta vitsiusiraheyare” nacahepa.

<sup>14</sup> Énapa ena cuátroqueneana ecutiarareana najicapapaipa:

—Amén, ene vicaheparacayare —nacahepa.

Tásiha, ena véinticuatroqueneana víyarahana tépuyumurihanapa, natsiucapa ena apinana.

## 6

### *Eta táepistasira eta sélloana*

<sup>1</sup> Tacahe, nímahapa ema Cordero te mavepistacapa eta tínapuca sello. Tásiha, nusamapa ema émana ecutiararehi. Eta mahu tacutichucha titurehucha.

Ánipa macahe:

—Yare, piúchuca —macahepa.

<sup>2</sup> Tacahe, nímahapa eta cavayu tijapu. Ema ticaperahi, tatiarihi eta mataquiriqui. Tásihapa, ticaijaracasipa eta corona éma. Eta juca tácutiarahi eta máquipairisiraparacaya ena mánarana, taicha guerrerohi éma.

<sup>3</sup> Nímahavarepa ema Cordero mavepistacavarepa eta tápinane sello. Nusamavarepa ema apana ecutiararehi:

—Yare, piúchuca —macahevare.

<sup>4</sup> Tacahe, tiúchujicapa eta apana cavayu. Titsi eta táimahi. Ema ticaperahi mámahi eta ichapequenehi espada. Ticavanahipa eta manacasamurechirayare ena achaneana eta náehacacairayare. Téhepucainapa eta guerra. Ticapajiricainainapa ena achaneana camuriqueneana.

<sup>5</sup> Nímahavarepa ema Cordero mavepistacavarepa eta tamapanane sello. Nusamavarepa ema apana ecutiararehi, máichapa:

—Yare, piúchuca —macahevare.

Nímahapa eta cavayu tiquisa. Ema ticaperahi macaratacahi eta balanza te mavahu. <sup>6</sup> Nusamavarepa eta mahu ema apana te namuri ena cuátroqueneana ecutiarareana. Aní macahehi eta máechajiruvahi:

—Ticatajivanayare ena ticaematanerahiana. Vaipa tisivachaimahi eta mavacha mácani achane. Diez páneana eta mavachayare te étana sache. Étaripa eta arusu\* mapanarine kilo eta navachayare te étana sache. Étasera eta aceite comer, vahi téjiacavaimahi, étaripa eta tachi eta uva —macahepa.

<sup>7</sup> Te mavepistacavarepa ema Cordero eta tacuatrone sello, nusamapa ema apana cuátroquene ecutiararehi, máichapa:

—Yare, piúchuca —macaheparavare.

<sup>8</sup> Nímahapa eta apana cavayu tiyacaca. Ema ticaperahi, éma ticaijarehi “Ticaparerecaya ena achaneana”. Matiarivare ema téhicapahi, ema táquenu eta náchanevana ena náepenaqueneana. Tacahe, eta cuarta parte eta nasimutua ena achaneana tépenanaya naicha ena apinana. Taicha ticapajiricainainapa ena achaneana tayehe eta guerra. Ena apamuriana técuhanainapa. Apanapanenapa eta najumanayare. Énerichuvare tanicainapa eta sárareana táñehiqueneana.

<sup>9</sup> Te mavepistacavarepa ema Cordero eta tacincone sello, nímahapa eta mesa tiámahi eta mayucuneasa ema Viya. Te tápecu, nímahavarepa eta náchanevana ena náepenaqueneana támicaparuanahi eta náehisirahi ema Viya. Vahi náinajicahini eta náehisirahi te náimahapa eta nacatajivairayare.

\* **6:6** Ema ecutiarare máechajisihahi eta taqui ticaijare cebada. Eta juca tacuti eta arusu.

Váhivare timatinanaimahi eta nametasirahi eta máechajiriruva ema Viya.  
<sup>10</sup> Puiti éna, tipiaracanahi. Ani nacahe eta napiarasirahi:

—Tátachicha, sántoquenevihi píti. Yátupiquenevihi eta picasiñacareva. Píti pirataha tamutu. ¡Puiti vivaraha pítauchayare eta pitsirijiequenehairayare ena ticapacahavianahi te apaquehe! ¡Vivarahapa nacáemecharahipaini! —nacahepa.

<sup>11</sup> Tásiha, ticaijaracasianapa eta namuirihanayarehi eta tijapu. Ticame-tacasianapa nanarahasiranumayare apaesainahi. Tiámainucavayarehi te tiyuriticavapa eta natupayare ena nachamuriana nacaparuanayarechahavare ena téhicanahi ema Cristo.

<sup>12</sup> Te mavepistacavarepa ema Cordero eta tasaisine sello, nímahapa eta tamuracavahi tayamurisirahi eta apaquehe. Eta sache témahavarepa, tétavicavahi eta taquisava. Énerichuva eta caje amairihapa ítime. <sup>13</sup> Eta jarairiquiana tiávihanahi te anuma, témiririjicapa te juca apaquehe, tacuti eta tahi eta mitu te muracaicha técativava. <sup>14</sup> Eta anuma témitiacavarepa tacutipa te téchuquimeca eta ajumeruca. Tásiha, eta ichapequeneana cerro tiyamura-cavacapa tiyjecavavacapa. Étaripa eta tiúrupuhiana te mar énerichuvare tiyjecavavacapa. <sup>15</sup> Tacahe, tijunanapa ena réyeana te avasareana, énapa ena presidenteana, énapa ena comandanteana, énapa ena aquenucarahana, énapa ena rícoqueneana, énaripa ena músuana, énapa ena líbreana. Ticayumurú-quianapa te tajuhe eta ichapequeneana máriana cerro.

<sup>16</sup> Ánipa nacahe:

—Vicavi eta ichapequeneana mari, apaesa vahi macuimahahavi ema Viya, apaesa viúchucuha tayehe eta táíñehiquene máicuñaraqui ema Cordero.

<sup>17</sup> Táitecapaurehavipa puiti eta ichapequene juicio. ¡Páurehavisami! ¡Nájina tacaemachaquenemahi! —nacahepa.

## 7

### *Ena dócemuriqueneana israelítana nacamarcaqueneanayare*

<sup>1</sup> Tacahe, nímahapa ena cuátroqueneana ángeleana. Titupihanahi te táinahu eta juca apaquehe, náichejimiraurusirahi tamutu eta técativava. Éna, náichejicahi eta técativava apaesa tacuija eta técativava te apaquehe étaripa te une, étavanerecainahipucaini tacaecherahini te yucuquiana. Ticatuparahanasera éna nacamiriuchayarehi eta táicuñayare te apaquehe étapa te une mar. <sup>2</sup> Énerichuvare nímahavarepa ema apana ángele tiásihahi te táuchusinehi eta sache. Macaratacahi eta mamarca ema yátupiquene Viya Vicaiyaquene. Ema maca ángele máechajicavacapa muraca ena cuátroqueneana ángeleana. <sup>3</sup> Tacahe, ema ángele máichavacapa:

—Vuíchaha ecucamirica eta táicuñayare eta apaquehe eta une te mar étapa eta yucuquiana. Tapainumavaya te vimarcachavacapa te nanahuana ena mavanarana ema Viya —máichavacapa.

<sup>4</sup> Tásiha, te tamutupa eta nacamarcairavacahi, nusamapa eta natupa ena nacamarcaqueneanaripa. 144,000 eta nasimutuva. Násihaqueneanahi nayehe ena dócemuriqueneana israelítana. <sup>5</sup> Doce mil ena ticamarcanahi machichanavéqueneana ema Judá. Doce mílvare ena ticamarcanahi machichanavéqueneana ema Rubén. Doce mílvare ena ticamarcanahi machichanavéqueneana ema Gad. <sup>6</sup> Doce mílvare ena ticamarcanahi machichanavéqueneana ema Aser. Doce mílvare ena ticamarcanahi machichanavéqueneana ema Neftalí. Doce mílvare ena ticamarcanahi machichanavéqueneana ema Manasés. <sup>7</sup> Doce mílvare ena ticamarcanahi machichanavéqueneana ema Simeón. Doce mílvare ena ticama-



rcanahi machichanavéqueneana ema Leví. Doce mílvare ena ticamarcanahi machichanavéqueneana ema Isacar. <sup>8</sup> Doce mílvare ena ticamarcanahi machichanavéqueneana ema Zabulón. Doce mílvare ena ticamarcanahi machichanavéqueneana ema José. Doce mílvare ena ticamarcanahi machichanavéqueneana ema Benjamín.

*Camurianavare ena apavasajuecuana tijapumuirihavacahi*

<sup>9</sup> Tacahe, nímahavarepa ena camuriqueneana achaneana tiásihana te tamutu avasareana, apaechajiriruvaqueneana. Vaipa titupachacareana eta nasimutuvahi. Titupihanahi éna te tamirahu eta trono, mávihahi ema Cordero. Tijapumuirihavaca eta namuirihana. Tásiha eta náurisamurevahi nacaratacahi te navahuana eta cáchipaca. <sup>10</sup> Namutu tipiaracanahi, ánipa nacahe:

—Vihasulupayachavi, piti Tata Vicaiyaquene, pítipa piti Cordero, taicha éti ecuchucuhavahi —nacahepa.

<sup>11</sup> Tacahe, namutu ena ángeleana titupihanahi te tachacayahi eta trono, nachayacahivare ena cuátroqueneana ecutiarareanahi, énapa ena víyarahana tuparairucana. Tásiha, tépuyucanapa te tamirahu eta trono. Tétipaimurihanapa. Natsiucapa ema Viya. <sup>12</sup> Ánipa nacahe: “¡Eta vicaheyare!

Máitavacacayare eta vitsiusiraviyare.

Taicha tétavicavapa eta picunachacarevahi.

Tétavicavavare eta pímatiequenehairahi tamutu, étapa eta pipicauchacarevahi, étapa eta pitumeva.

Picarichu piti péchahavihi.

Ichape eta vihasulupayachiravihi.

Tijarahi te visamure te vijirauchavi. Amén”.

<sup>13</sup> Tacahe, ema émana víyaraha máichanupa:

—Te pivaraha pímati, nímimatichaviyare ena nani ticamuirihanahi eta tijapu, távihavarepuca násiha —máichanupa.

<sup>14</sup> Tacahe, níchapa núti:

—Picatajicanu, pimetacanu, tata.

Tásiha, máichanupa:

—Ena nani énara ena nacatajivaqueneanahi ichape taicha eta náehisirahi ema Jesús, tiúchucuhanaripasera. Ticasipaipa puiti eta náchanevana tayehe eta máitine ema Cordero. Puiti ticamuirihanapa tijapu, taicutiarahi eta tájinairaripa naviurevainahini. <sup>15</sup> Eta tacahe, titupihanahi puiti te tamirahu eta trono mávihahi ema Viya. Najirauchahi, natsiucahi éma tamutu sácheana yátiana te mayehehi templo. Éma majaneacavacahi. <sup>16</sup> Ena nani tájinapa nácamunuimahi, vaipa técuhana, váipavare timauneana. Váipavare ticatajivanaimahi taicha eta táijureva eta sache. <sup>17</sup> Taicha ema Cordero, ema tiávihahi te tamirahu eta trono, tétavicava eta majapanuraivahi, majaneacavacayarehi. Máesichayareva eta tiúriama une ticaitarerahi. Énerichuvare ema Viya macamitiasinayare eta náiyaira —máichanupa ema víyaraha.

## 8

*Éma Cordero mavepistacapa eta téqueneha sello*

<sup>1</sup> Tacahe, mavepistacapa ema Cordero eta téqueneha sello tayehe eta ajureca. Tamuturine timatina. Média-horapuca eta tamatinaira. <sup>2</sup> Tásiha, nímahapa ena siéteana ángeleana, titupihanahi te mamirahu ema Viya. Ticaijaracasianapa eta siete chujareana nachujanayarehi. <sup>3</sup> Tásiha, títecapavarepa

ema émana ángele. Mámapahi eta censario, amairiha oro. Tatiarihi te mamirahu ema Viya eta mesa tiámahi eta mayucuneasa. Amairihavare oro. Ema ángele titupihapa te tamirahu eta mesa. Náijaracapa eta incienso tisimuri. Tacahe, macaratacapa eta censario te tápusi. Macapusisiacapa ema Viya, tacachanepaipa eta nayujarasirana namutu ena machanerana ema Viya. <sup>4</sup> Tásiha, eta taquijarera étapa eta mayujarasirana tiápanapa mayehe ema Viya, tásihaquenehi te mavahuana ema ángele. <sup>5</sup> Tásiha, ema ángele mavehavarepa eta apamuri emaniqui eta te mayucuneasa. Máinicachapa eta censario. Tásiha, máepuraicapa te apaquehe. Tíjahúchavapa térameca, ticaema, tirurecapa. Tiyayacarepa eta apaquehe.

*Eta nacachujairayare ena siétequeneana ángeleana*

<sup>6</sup> Tacahe, nímahavarepa ena siétequeneana ángeleana titsecavanaripa eta nacachujairayare.

<sup>7</sup> Te ticachujapa ema títapuca ángele, témiricapa te apaquehe eta uverequi étapa eta tiquiva ítiama. Témiricavare eta yucu. Táijuchapa eta tercera parte te apaquehe. Támairiacapa eta yucuquiána, eta muiji, étapa eta sucurecana.

<sup>8</sup> Te ticachujapa ema apana ángele, témiricavarepa eta ichape mari. Timurupahi eta táemirisira tayehe eta mar. Eta une, ítiama pa taicha. Tercera pártéhivare eta ítiama. <sup>9</sup> Támairiacapa tacapapajicavaca eta sárareana tiávihana te une. Étapa eta pacureana tachimararuanahi, técharicavanapa. Téririjicanapa tamutu.

<sup>10-11</sup> Te ticachujapa ema apana ángele, témiricapa eta ichape jarairiqui. Tétiraraicaparine eta táemirisirahi. Tajararecapa eta une tayehe eta tercera parte eta cajacureana étapa eta cáquiureana. Venenoamapa taicha eta jarairiqui. Ichapemurianavare ena achaneana tépenaracanahi taicha eta náerirahi eta une tisucareama. Eta tacahe, ena tacaitiruanahi tímijarechanahi eta ecuñaraqui: Eta Súcareama Venenoama.

<sup>12</sup> Te ticachujapa ema apana ángele, tiúchujicapa eta tépacuchahi eta sache, eta caje étapa eta jarairiquiana. Óchorine hora eta táetaviuchirahi eta tamapicuva. Tacahe, óchovare hora eta tacaecherairahi eta sache. Ocho hóravare eta tacaecherairahi eta caje étapa eta jarairiquiana.

<sup>13</sup> Tacahe, nésenicapa te anuquehe. Nímahavarepa ema émana ángele tíararaicahi. Nusamapa tipiaracapahi muraca, ánipa macahe:

—Páureanasami ena tiávihanahi te apaquehe. Tétavicavaya eta nacatajivairayare, puiti te táitauchavapa eta nacachujairaya ena mapanaqueneana ángeleana, téquenehanaya ticachujana —macahepa.

## 9

<sup>1</sup> Te ticachujapa ema apana ángele, nímahapa ema ángeléní mavasíhi eta jarairiqui. Máquipairuvahi te apaquehe. Máisapa ema Viya eta mavejiasirayare eta pozo táupenaquene ticaijare Abismo. <sup>2</sup> Tacahe, mavejiacapa eta táupenaquenehi pozo. Tiúchucapa eta ichape quijare tacutipa eta taquijarera te tiju eta evitarahi. Eta sache, timapicupa taicha eta quijare. <sup>3</sup> Témunahiricavapa tiúchuca eta tavasiqueneana eta tsacarana, tayehe eta quijare. Amairipahipa tamutu eta apaquehe. Tajarachapahi eta tayucaraivahi tacutipa eta tayucaraiva eta sáserahi. <sup>4</sup> Ticatuparacasipa vahi tacunica eta tamuijira eta apaquehe étapa eta tapacajiana eta sucurecana étapa eta yucuquiána. Eta tatuparahahi eta tayucavacayarehi namutu ena achaneana. Nacarichu tacaitica ena ticamarcanahi te nanahuana tayehe eta mamarca ema Viya.

<sup>5</sup> Cíncoyarehi caje eta tayereva eta tayucarareresirayarehi. Váhisera tépenanáimahi ena achaneana tayucaqueneanayarehi. Tétavicavaseratacativayarehi nasama. Eta tayucaraqui tacutiyaehi eta sáserahi eta tacativayarehi nasama. <sup>6</sup> Te jena sácheanayare ena achaneana navarahayare ticapacavana. Váhisera tépenanáimahi, tayanapane navarahayare tépenana.

<sup>7</sup> Eta juca tavasiqueneana tsacarana, nímicutíchapa eta cavayua te titsecavanahi tayehe eta guerra. Tásiha, te tachuti tacutimahiyaréni ticayehe corona oro. Eta tamira achanemirayaréni. <sup>8</sup> Tiuji eta tachutimaca, tacutiyaehi eta suchutimaca esu esena. Tíñehivaca eta táheana. <sup>9</sup> Eta taparuma tacutiyaehi eta fierro muracaquenehi. Vahi táechucaimahi eta isavipe. Eta tárairahi, ¡tétavicavahi eta tamuracavahi! <sup>10</sup> Ticaijiquivaca tacutiyaehi eta sáserahi. Eta juca tiyucarahi, cinco cájeyarehi eta tacaitemajirisiravacayare ena achaneana. <sup>11</sup> Mararihivare ema táquenu ema téchahi éta, ema ángeléni tivejiacahi eta táupenaquene pozo. Ema maca ángeléni, eta májare te náechajiriruva ena hebréoana “Apolión”. Te véchajiriruvana víti, ticaijare “Tijararerahi”.

<sup>12</sup> Títauchavapa eta títapuca ecuñaraqui nímaquenehi. Jucarihichahavaresera apinachaha eta ecuñaraquiyare.

<sup>13</sup> Te ticachujapa ema apana ángele, nusamapa eta mahu ema apana te tápusi eta cuátroquene esquina tayehe eta mesa oro eta tiámahi eta mayucuneasa ema Viya, tiávihi te mamirahu éma. <sup>14</sup> Ticavanairipipa ema ángele ema ticachujahi, ánipa macahe:

—Picaiticapa ena cuátroqueneana ángeleanini váinarajiana, tiávihi te tachacaya eta cajacure Eufrates —macahepa.

<sup>15</sup> Taicha acane ema Viya manerejicaripa eta juca hora eta macaitisirainapa ena cuátroqueneana ángeleanini, máisapainapa eta nacapasirayarehi camuriqueneana achaneana, ena mapamuriqueneana eta náichapemuriva. Tacahe, téjapucanapa éna. <sup>16</sup> Tacahe, tiúchujicanapa ena suntaruana ticaperana. Nusamapa eta natupa. Doscientos millones eta náichapemuriva.

<sup>17</sup> Tacahe, eta nímaira ena ticaperana, tatiarihi eta náicutiara te natupana. Eta táimahiana titsi, azul, tiyacaca. Táíñehiquenehi eta tachuti eta naperana. Tiúchucapaipa eta yucu, eta quijare te tajaca. Azufrepuha eta táepuha. <sup>18</sup> Camurianahi ena achaneana, ena tacaparuanapahi eta juca mapanaquene ecuñaraqui eta tacuchusirapahi te tajaca: eta yucu, eta quijare, étapa eta azufrepuha. <sup>19</sup> Énerichuvare tatiarihi eta táijiqui ticutipainehi eta quichare. Tétavicavahi eta táíñehivapahi eta tacaparaqui táuchurepahi te tajaca étapa te táijiqui.

<sup>20-21</sup> Énaserá ena apamuriana achaneana tacaitiruanahi eta ecuñaraqui, váhiquene navarahaimahi náinajica eta náichira eta tauriqueneana. Váhiquene téneuchavanáimahi. Váhivare náinajicahini eta nacapahivana, eta nahiapemarevana, étapa eta náesenamarevana, étapa eta námeraivana. Váhivare náinajicaimahi eta najirauchira ena éreanana, eta natsiusirahi eta nasiñarajiana náepiyaruanahi oro, plata, bronce, márijahi, yucuqui. Tamutu eta juca mayamuricacahivare, váhivare tapaicahini, váhivare tasamarahihini, váhivare táimairiricahini.

## 10

### *Ema ángele macaratacáhi eta ajurecachicha*

<sup>1</sup> Tacahe, nímahapa ema apanavare ángele tiúcupaicahi te anuma. Tétavicava eta máíñehiva. Tamuichapahi eta úcáji. Te mápusi, tatiarihipa eta ahe. Eta mamira, tétavicava eta tajararasirahi tacuti eta táimahi eta sache. Eta

mapaiqueana tijarahivaca ticutipahi timuruquiape. <sup>2</sup> Téjiacahi eta ajurecachicha eta macaratasirahi te mavahu. Tásiha, eta mapaique vaure mácatayaecahi eta une te mar. Eta étaquiape sapa tacatayacahi te tiájipahi. <sup>3</sup> Tásiha, tipiaracapa muraca, tacuti eta tahu eta tíñehiquenehi sárare. Te títapiricapa, nusama eta nahu ena apamuriana tacutiyaréni eta titurehuchahi. Siétequenehi eta najicapirahi. <sup>4</sup> Te timatinapa, nuvarahapa nájuequenehaya-rehini. Nusamapasera ema téchajicanuhi te anuma. Máichanupa:

—Vahi picuajucha eta juca pisamaquenehi. Piáñauchayare eta juca. Váhivare picumetajirica —máichanupa.

<sup>5</sup> Tásiha, ema maca ángele nímahaquenehi eta mácatayasirahi eta une étapa eta tiájipahi, masuvechapa te anuma eta mavahu vaure. <sup>6</sup> Ánipa macahe:

—Tivanecanuhi ema Viya, ema acanevacaquenehi eta máitaresira, ema yátupiquenehi tépiyacahi eta anuma, eta apaquehe, eta mar, étapa tamutu eta tiávihaqueneanahi tayehe. Éma, tivanecanuhi numetaca eta juca máechajiriruvahi: “Tájinapa vaipa tiyeremahi eta táitaviraya”. <sup>7</sup> Ánaquiaparipahi eta nacametacasivahi ena profetana eta mapanereruana ema Viya. Puítisera te macachujapa ema téqueneha ángele, títavainapa tamutu eta mapanereruanahi —tacahepa eta mametarapihi ema ángele.

<sup>8</sup> Tacahe, nusamavarepa eta mahu ema téchajicanuhi tásihaquenehi te anuma. Tivanecanuvarepa nupaucha ema ángele titupihahi tayehe eta une étapa te tiájipahi. Ánipa macahe:

—Piyana piyaseaca eta ajureca macarataruhi ema ángele —macahepa.

<sup>9</sup> Tacahe, nuyanapa mayehe ema ángele. Nuyaseacapa eta ajureca. Tásiha, éma máichanupa:

—Júcahi eta ajureca. Piveha, pinica. Títiveyare eta pisamira te pijaca tacutiyare eta mápama. Étasera te piami, tisucareyare pisama —macahepa.

<sup>10</sup> Tacahe, nuvehapa eta ajurecachicha te mavahu ema ángele. Nunicapa. Jéhesaréinehi títivéinehi eta nusamira te nujaca tacutirinehi eta mápama. Téhesera nujiricapa, tisucarepa nusama te nami. <sup>11</sup> Tásiha, nucametacasi-varepa:

—Píti piápechavaya picametarapiya eta náichararacavayare namutu ena aquenucana te juca apaquehe, énapa ena achaneana ticavasanahi te tamutu avasareana.

## 11

### *Ema Viya mavanecainapa ena apinana mavanaranayarehi profetanaya*

<sup>1</sup> Tacahe, te nuvapure, tíjaracanuanapa eta ecutiriqui. Tásiha, máichanupa ema Viya:

—Piyanayare tayehe eta Templo te Jerusalén. Pícutichaya tamutu eta peti étapa eta canchón. Pícutichavare eta náijuchirarehi eta sárareana námavahu-queneana. Tásiha, pitupachayareva áyananahipuca ena achaneana téneuchavarahanahi eta te canchón. <sup>2</sup> Váhisera picuicuticha te aneca tamirahuhi eta Templo. Taicha ena apajuecuruhana, nísapaqueneanapa eta návihairaya éna. Nísapainavarepa eta náitahasiraya eta tayereruvanaini eta avasare tacapicahuquenehi Jerusalén. Ichape eta namapachichijisirayare. Cuarenta y dos caje eta náichirayare. <sup>3</sup> Nútisera nuvanecavacainapa ena apinana nuvaneruana profetana. Éna, tiquisamuirihanayarepahi eta namuirihana. Eta juca táicutiarayarehi eta náichuarésirayare náeneuchava ena achaneana. Mil doscientos sesenta sache eta nayerevayare —macahepa.

<sup>4-5</sup> Tásiha, nímahapa te anuma te mamirahu ema Viya eta apina yucuqui olivo étapa eta apina candeleroana te mamirahu ema Viya, ema téchahi

tamutu eta juca apaquehe. Eta juca táicutiara eta majaneasiravaca ena apinana mavanarana, taicha manerejiruanahi éna, nacametarairuyare eta náeneuchiravayare ena achaneana. Te natiarihinapuca nácani tivarahanayare titupiacana, éna ticatiuchavanayare. Tiúchucayare eta yucu te najaca. Táijuchayare muraca, tacapacayareva ena nánaranayarehi. <sup>6</sup> Énerichuvare ena nani, naratahayarevare náichejica eta tiquiva te jena sácheana nacametarairuirayare. Étaripa eta une, náepiyacayare ítiamayare náicha. Nacuchucayareva eta táíñepahiyare nayehe ena achaneana, apanapanenejiyarehi náicha, te jácani navarahaqueneyare éna. <sup>7</sup> Téhesera te táitauchavapa eta nacametarairuirayare, macanaravacainapa ema Tíñehi Achane Váinara-jiquene ticaijare Útsutsure. Émaripa ema majupaha ema Satanás. Tásiha, masapihainapa ticaparecayare macapacavacainapa ena apinana mavanarana ema Viya. <sup>8-9</sup> Tásiha, ema Tíñehi Achane Útsutsure vahi máisapaimahi náecara eta náqueheana. Tanasiyarehi te aneca. Tacahe, náimahayare namutu ena achaneana te juca apaquehe. Mapana sache y medio eta nacaheyare te calle eta te avasare. Eta juca avasare, étarichuhi eta macaetatainehi ema Viáquenu. Eta juca avasare, tétavicavahi eta tamauriva tacuti eta avasare Sodoma, étapa eta Egipto. <sup>10</sup> Ena achaneana, natiarihiyare te tamutu avasareana ena tiúrisamureanaya eta náimairaya ena tépenanahi. Ticapiestaranainapa. Tíjaracasichacacanainapa eta námavahuana. Taicha títavannaripa ena nani profetanaini, énaripa ena tihapapiricanahi eta náichira eta tamauriqueneana. <sup>11</sup> Tásihasera, te táequenénapa eta mapanaquene sache y medio, macaechepucavacainapa ema Viya. Tichavanainapa títarecanayare. Namutu ena achaneana náimahaya. Ichape eta napisirayare. <sup>12</sup> Tacahe, ena nani apinana profetana nasamainapa eta mahu ema tíchuhavacahi te anuma. Muraca eta mahu eta máichuiravacahi:

—Yare, íteca, iápana —máichapa.

Tacahe, járajapapa eta úcaji táepanavacapa éna, támapa te anuma. Ena ticanaranahi náimmaracaripa eta nayanirahi. <sup>13</sup> Enevanepa tiyayacarepa eta apaquehe. Muraca eta tayamurisirahi. Camuri eta pétiana tiáquipaicavavacahi. Siete mil eta náichapemuriva ena náepenaqueneanahi. Ena achaneana táemachanahi, tétavicavainehe eta napisirahi. Náimatinumainehe ema Viya. Napiaracapa, nacunachapa eta máitupajijiasiravahi ema Viya tiávihahi te anuma.

<sup>14</sup> Títauchavapa eta juca apinaquene ecuñaraqui. ¡Váhisera tayerequenehaimahi eta mapanaquene ecuñaraqui!

### *Ticachujapa ema téqueneha ángele*

<sup>15</sup> Tacahe, ticachujapa ema téqueneha ángele. Tásiha, ticaemapa muraca te anuma. Ánipa tacahehi eta nahu eta nusamirahi:

—Títauchavapa puiti eta émairayarepa ema Viya técha, ticavanairipiyare namutu ena achaneana te juca apaquehe. Macaejacapa ema Machicha Cristo, máijaracainapa eta mávacureyare. Acanevacainapa eta émairayare techá tamutu —tacahepa eta nahu.

<sup>16</sup> Tacahe, tépuyucanapa ena véinticuatroqueneana víyarahana, ena téjacanahi tayehe eta trono te mamirahu ema Viya. Títsiucapairicanapa, nacunachapa ema Viya. <sup>17</sup> Tijiranapa, ánipa nacahe:

“Vihasulupayachavi, Tata.

Tétavicavahi eta pítipajijiasiravahi, píturequeneha tamutu.

Píti pitiarhiquenehi te tépanavainapa eta apaquehe.

Pinasirichuhivare puiti eta viyehe.



Puiti péjacapa tayehe eta piávacure ichapequene, pítirayarepa pecha tamutu.  
<sup>18</sup> Tétavicavahi eta nasemanevahi ena achaneana eta piyehe.

Muracapanainapasera eta pícuñasiravaca éna.

Puiti ticayaseserehianainapa te pimirahu ena náepenaqueneana.

Jéhesare, picamitiequenehainapa namutu ena ticamitiequenerahianaini te juca apaquehe.

Puiti pítsirijicavainapa eta nacaemataneasiravihi ena pivanarana ticameta-rairurahiana eta péchajiriruva.

Puiti píjaracainapa eta náicuchihi ena yátupiqueneanahi pichichanaveanahi tiámanahi eta píjare:

nácani ichavicana, araitanana, énapa ena amaperuana” nacahepa.

<sup>19</sup> Tacahe, téjiacapa eta tapajacura eta Templo tiávihahi te anuma, mapena ema Viya. Ticaecherapa eta sagrario tacaunaiyahi eta echajirirucavana matratuneanahi ema Viya nayehe ena israelítana. Tásiha, enevanepa téramecahi, ticaemapa, tirurecapa. Témiricapa eta uverequi tímítutupahi. Tiyamuricavarepa eta apaquehe.

## 12

*Máimahavare ema Juan esu esena tñacayarehi étapa eta táíñehiquene sárare ticajare Serpiente*

<sup>1</sup> Nímahavarepa eta apana ecutiarare te anuma. Tiáramicarehi éta. Su-tiarahi esu esena. Eta sumuiraha tacutiyaréni eta tajaraiva eta sache. Te tápecu eta suívapeana tacutiyaréni eta caje. Eta te suyehe corona te suchuti, jararihi tacutiyaréni eta dócequeneana jarairiqui. <sup>2</sup> Esu suca esena ticajarihi. Tipiararecahi eta suínasirayarehi. Ichape eta sucatajivairahi.

<sup>3</sup> Tásiha, témunahiricavarepa tiúchujica eta táíñehiquene sárare. Ichapequenehivare. Ticajare Serpiente. Máchaneva ema Satanás. Titsi eta táimahi. Siete eta tachuti. Diez eta tajihuana. Ticayehahi eta corona eta te tachutiana. <sup>4</sup> Eta te táijiqui, táestacapa eta mapamuriana eta táichapemuriva eta jarairiquiana, tacamiricapa te juca apaquehe. Tásiha, titupihapa eta sárare te sumirahu esu esena esu tñacayarehi. Titsecavaipa eta tanisirayarehi eta suchicha. <sup>5</sup> Tacahe, ajaira eta suchichahi esu esena. Námavanepasera mayehe ema Viya, te mávihahi te trono. Ema suchicha, aquenucayarehi tayehe tamutu eta avasareana. Macaratacayare eta matsucurupa fiérroqui. Váhiqueneyarehi tijapanucareanaimahi nácani náichahi eta tauriqueneana. Muracayarehi eta náicuanayare ena téjecapavana. <sup>6</sup> Tásiha, esu esena tijunavanepa te mávapahi apaquehe eta suávihayarehi maicha ema Viya. Natiarihiyarehisera ena ténicanayarehi ésu. Mil doscientos sesenta sácheana eta náitátirayarehi esu esena.

<sup>7</sup> Tacahe, tiúchujicapa ema Arcángele Miguel énapa ena ángeleana machamuriana. Téhacacanapa nacanarapa eta Serpiente. Énerichuvare natiarihivare ena tayeheanahi ángeleanaini váinarajianahi. <sup>8</sup> Apaquererupasera eta ichapequenehi Serpiente, énapa ena tachamuriana. Tásiha, vaipa máisapa ema Viya nanasihini te anuma. <sup>9</sup> Tacahe, ticaquijianapa te juca apaquehe namutu ena ángeleanaini, émapa ema náquenumurihi Serpiente, ema ticaetemahi acane esu Eva. Émarichuhi ema Váinaraji ticajarehivare Satanás. Puíticha ticaetemajiricavacahi ena achaneana te juca apaquehe.

<sup>10</sup> Nusamavarepa te anuma eta mahu muraca, ánipa macahe:

—Títauchavapa puiti eta náuchucuirapa ena téhicanahi ema Cristo. Máimererupa ema Viya eta tamutuirahi marataha. Máijaracapa ema machicha Cristo eta émairapa techa tamutu. Taicha ticaquijipa ema

Satanás, ema timetauchaparacainihi me Viya eta náichavaquenévanahi ena vichamuriana, tamutu sácheana, yátiana. <sup>11</sup> Ena vichamuriana naratahaipa ticatiuchavana mayehe ema Satanás. Vaipa macapaquechavacaimahi éna, taicha yátupi ticasíñavanahi tayehe eta máepenirahi ema Cordero. Énerichuvare náimimaticahi ena apamuriana achaneana eta máechajiriruvana ema Viya. Éna, vahi napicacavavacahini tayehe eta náitairesira. Tíjaracavanahi te náepenirayarehi, vahi návarahahini náinajica eta náehisirahi ema Cordero. <sup>12</sup> Tétavicavaya eta iúrisamurevaya puiti, emutu eti iávihanahi tayehe eta juca anuma. Páureanasamisera ena ticavasanahi te apaquehe étapa eta tiávihanahi te une te mar, taicha ema Váinaraji máucupauchavacaipa. Tétavicava eta masemanevapahi taicha máechahi eta ánipirinehi macaheyare —macahepa ema maca.

<sup>13</sup> Tacahe, eta Serpiente, eta táimairahi eta tacaquijirahi te anuma, táucupaisiraipa te juca apaquehe, tacamesapa táehicarairica esu esena suínaruhi. <sup>14</sup> Ésusera ticaijaracasipa eta apina ichapequeneana supavanayarehi tacuti eta tapava eta ichape mátihi. Sumaitasiavayarehi tiara tayehe eta mávapahi apaquehe suávihayarehi. Ánaqui natiarihiyareva ena téchapajiricanayarehi. Mapana año y medio eta náenisirayarehi. Eta Serpiente vahi táitecapauchaimahi ésu. <sup>15</sup> Tásiha, eta Serpiente táhicapa eta une te tajaca, tavarairahi tíjahúchava tatiarihi eta cajacure apaesa suéricahini esu esena. <sup>16</sup> Étasera eta apaquehe tacatiuchapa esu esena. Téjiacapa eta apaquehe, táerapaicavanepa eta une táhiruamahi eta Serpiente. <sup>17-18</sup> Tacahe, eta táimairavahi eta Serpiente vahi táratahahini, tavetijipaicha eta tasemirahi suyehe esu esena. Tiyanapa nayehe ena suchamuriana, énapa apavequeneanahi. Tavarahapa tacapacayarehi ena sucutiqueneanahi tisuapanahi ema Viya, téhicanahivare eta máimiturapianahi ema Jesucristo.

## 13

### *Máimahavare ema Juan eta útsutsure étapa eta sárare tíñehiquene*

<sup>1-2</sup> Te táequenepa eta juca, te nuvapure, nutupihahi tayehe eta playa eta mar. Nímahapa eta útsutsure tiúcupaicapahi tásihahi te une. Siete eta tachuti. Dies eta tajihuana. Te tápusi eta tajihuana tatiarihi eta tayehe corona. Eta juca sárare tavasimahiyaréni eta ichini. Táíñehiquenehi eta tajaca. Eta táivapeana tacutiyaréni eta táivape eta aticure. Tásiha, te tachutiana tatiarihi eta ajureca tímijachavahi Váyainahíni. Macunahisera ema achane majupaha ema Satanás. Eta tacahe, eta Serpiente táijaracapa eta máitupajijiasiravayarehi ema Útsutsure eta macaetemaraivayarehi maratahairayarehi tamutu. Aquenucayare te tamutu avasareana maicha eta Serpiente. <sup>3</sup> Te étana machuti ema Útsutsure, tatiarihi eta majara eta ticapacahi. Tásihasera, tichavahi títareca, tinaracavarepa. Tacahe, eta náimairahi ena achaneana te tamutu avasareana, ichaperinehi eta nárami. Tásiha, náehicapa nasuapapa ema Útsutsure. <sup>4</sup> Natsiucavarepa eta Serpiente, taicha eta náimairahi eta táijarasirahi eta máitupajijiasiravahivare ema Útsutsure. Tásiha, nacahepa mayehe:

—Tétavicavahi eta máitupajijiasiravahi ema maca. Nájinavare tiratahaimahi nacanara náquipaica éma —nacahepa.

<sup>5-7</sup> Tacahe, ema Viya máisapahi ema Útsutsure téjacahi te mávacure, ichape aquenuca, ticavanairipipa tayehe tamutu avasareana te juca apaquehe. Ema Viya vahi máicuñacavanehini eta masíñavavaisirahi, tímijachavahi Váyainahíni. Tíñemahipivaca eta máechajisira, macaecahirahi ema Viya étapa

eta mapena. Macaecahivare ena tiávihanahi te anuma. Énerichuvare mapanajiricavaca ena machanerana ema Viya. Máimicaratacavacapa, mavarairahi máimicapacavacaya. Cuarenta y dos caje eta macamichirahi ema Viya eta máimiyusemasirahi ema Útsutsure.<sup>8</sup> Eta acane te tépanavainapa eta apaquehe, tatiarihi eta libro tiama eta nalista ena títarecanaya te apana vítaresira. Macarataruhi ema nacaparuhi Cordero. Natiarihisera ena apamuriana tájinahi eta nalista tayehe eta libro. Ena nani ena titsiucanahi ema Útsutsure.

<sup>9</sup> Te evarahapuca ecaicutiara eta juca, tavaraha epanerechaya ichape.  
<sup>10</sup> Mácani témeratacayare ema apana, énerichuvare éma te tacaicutiaravapa ticaeratayareva éma apanavare. Mácani ticaparecahi, nacapacayareva éma. Eta tacahe, nácani machanerana ema Viya, tatuparaca nacamichayare tamutu, náimereca yátupina eta náehisirahi ema Viya.

<sup>11</sup> Tásiha, nímahavarepa eta apana sárare, táíñehiquenevare. Tiúchujica te amahe apaquehe. Eta juca sárare, macunahi ema achane ticaijare Falso Profeta\*. Eta juca, tatiarihihi eta apina eta tajihuana, tacuti eta tajihu eta uvesa. Étasera eta táechajisira tacutiahu eta tahu eta Serpiente Satanás.

<sup>12-14</sup> Énerichuvare ema Falso Profeta majupahahi ema Útsutsure. Muraca eta tasuapacareva eta mavanairipiana ema Útsutsure maicha ema Falso Profeta. Éma, maratahahi tímereca eta tiáramicareana. Maratahahivare macamirica eta yucu tiásihaya te anuma. Náimahahi namutu ena achaneana te juca apaquehe. Ichape eta náramirahi. Étavenehi eta juca táimeresirahi eta tiáramicareana, étainapa tivayuacaya ena achaneana, tisuapacarenapa titsiucacarenavarepa ema Útsutsure. Taicha náimahahi eta manarasirahi eta majara te tumare; tiápechava títarecahi. Tacahe, ema maca Falso Profeta macavanairipipa náepiyacaya eta máimahi ema Útsutsure, nasiñarajiya.

<sup>15</sup> Ema Viya macamichahi tamutu eta máichaqueneanahi ema Falso Profeta. Vahi máicuñacavánehíni eta máchanechirahi eta náepiyarui máimahi ema Útsutsure. Téchajicayare máicha. Eta juca nasiñaraji tíupajijiacavainapa tivanereca, ánipa tacahe:

—Namutu tatuparacahi natsiucanu núti. Nácani vahi návarahahini titsiucanuhini, ecapacavacayarehi—tacahepa.

<sup>16-17</sup> Tacahe, ema Falso Profeta macavanairipinapa nacamarca te navahu te vaure, te nanahupuca ena achaneana: ena amaperuana, énapa ena ichanaruana, énapa ena ichavicana. Tayanapane rícoanahipuca, páureana-hipuca, líbreanahipuca, mósoanahipuca. Námayarehi eta máijare ema Útsutsure étapa eta mayehe número. Énerichuvare macavanairipipa vahi nacuisapa nacujachapa eta navacharapiana ena mamarcareana. Ticatajivanainapa eta náiturusirayare eta nacamunuqueneana taicha vahi nacamarcahini.

<sup>18</sup> Tacamunui yátupina vipáneréquenehayare maicha ema Viya, apaesa vácaicutiara eta tacayemaquenehi tayumururevahi eta tuparaquí máijare ema Útsutsure eta 666. Éta, tacunahi eta máijare ema maca achane.

## 14

*Eta najirasa ena 144,000 ena téhicanahi ema Cordero*

<sup>1-3</sup> Tacahe, nímahavarepa eta plaza ticaijarehi “Sántoquenehi Sión”, te mamirahu ema Viya, máejasirahi eta te trono, te návihahi ena cuátroana ecutiarareana énapa ena véinticuatroqueneana víyarahana tuparairucana.

\* **13:11** Te pivarahapuca pecha eta apana, pitanuca eta capítulo 16.13.

Nímahavarepa ema Cordero. Te machacaya natiarihihi ena 144,000que-  
neana téhicanahi éma. Éna, ticamarcavacahi te nanahuana eta máijare ema  
Cordero émapa ema Maiya. Nusamavarepa eta muraca ticaemahi te anuma  
tacutiyaréni eta muraca tirureca. Tásiha, títsivachavavarepa. Nusamapa  
ticapununeanahi eta camuriqueneana guitarrana. Tacahe, ena 144,000que-  
neana tijiranahi te mamirahu ema Viya. Arapiruhi eta najirasahi. Nájina  
apanaina títucaina eta najirasahi. Nacarichu títucanahi ena 144,000que-  
neana. Ena nani náuchucureanahi te namuri ena ticavasanahi eta juca apaquehe.  
<sup>4</sup> Matapiravareanahi éna te mamirahu ema Cordero. Tájina vare váhiquene  
náechipejicavahíni, navirainahini esu esena túhusi. Náehicahi ema Cordero te  
jácani mapaisirana. Ena nani, ena náinapureanahi masantuchaqueneanahi  
ema Viya émapa ema Cordero. <sup>5</sup> Tájina náimatiyahini eta náepiyahirahihini.  
Tájinaquene natapiravainahini te mamirahu ema Viya.

*Eta nametarapi ena mapanana ángeleana*

<sup>6-7</sup> Nímahavarepa ema émana ángele tiárarairicahi. Ticametarapihi eta  
téqueneha mametarapi eta máichuaresirahi eta náeneuchiravaina ena  
achaneana tiávanahi te tamutu avasareana, apaechajiriruvaqueneana.  
Máitavacacainapa eta náitaresiraya nácani ena tisuapanahi. Muraca eta  
máichuaresirahi, ánipa macahe:

—Éneuchava eta epecaturana. Epicauchayare ema Viya, taicha éma  
tépiyacahi eta anuma, eta apaquehe, eta mar, etapa eta cáquiureana. Émaina  
ejiraucha, ecunachaya. Émaina etsiuca. Taicha járajapainapa puiti eta  
máicuñasiraya ena achaneana máeneuchavarahana —macahepa.

<sup>8</sup> Tacahe, tiúchujicavarepa ema apana ángele. Émapavavare téchajica.  
Tiáramicare eta macayemaquene. Ánipa macahe:

—Tájinaapa táipuina tacamítiaruinapa eta ichapequenehi avasare Babilonia,  
taicha tétavicavahi eta tamutuirahi taicha eta tamauriqueneana. Tavayuac-  
ahi tamutu eta apana avasareana táichiraya eta tamauriqueneana, tacutihi  
súcani esena suétaviurequenehi eta sutuhisivahi, namutupahi suvayuaca —  
máichapa.

<sup>9</sup> Te títapiricapa, émapavavarepa téchajica ema émana ángele, ema namápa-  
nanehi. Muracavare eta máechajisirahi. Ánivare macahe:

—Tájinaavarepa táipuina eta náicuñanayare ena tijirauchanahi ema  
Útsutsure etapa eta máimahi náepiyaruihi nasiñarajihí, énaripa ena  
tiámanahi eta mamarca te nanahuana etapa te navahuana. <sup>10</sup> Muraca  
eta nacatajivairaya taicha ichape eta náimiyusemasirahi ema Viya.  
Ticaepujuquichacasianainapa eta te muracaquene yucu, táetiraráisina eta  
tamuruira. Muracaquenehi eta nasamira. Táitusiava, natsirihainapa eta  
máimararasira ema Cordero, énapa ena ángeleana. <sup>11</sup> Máichecuaraquireyare  
eta nacaicuñairayare. Tájina ticaemahaimahi eta yucu. Támutu sácheana,  
yátiana nacaheyare te yucu ena tijirauchanahi titsiucanahi ema Útsutsure,  
tiámanahivare eta mamarca, tacuna eta máijarehi ema nasiñarají. <sup>12</sup> Eta  
tacahe, ena machaneranahi ema Viya, ena tisuapanahi eta mavanairipiana,  
túmesamureanayare eta náehisiraya ema Jesús, puiti nacamichayarehi  
tamutu —máichapa ema ángele.

<sup>13</sup> Tacahe, nusamavarepa ema téchajicanuhi te anuma. Ánipa macahe:

—Piájuchayare eta juca numetaruvianayare: ¡Tétavicava eta náuricaca-  
revaya ena táimicaparuanayare puiti juca vicaijuheyare eta náehisirahi ema  
Viáquenu! —máichanupa.

Énerichuvare ema Espíritu Santo máichanupa:

—Jéhevare, najacapaína eta náicuchihi taicha eta nacaemataneasirahi ema Viáquenu. Tájinapa nácamunuimahi, tinaracanainapa —macahepa.

*Eta nacurujisiraya ena ángeleana ena achaneana*

<sup>14-16</sup> Te nésenicapa, nímahapa eta tijapu úcaji. Matiarihihí ema támaque-nepahi. Téjacahi éma te úcaji. Achanehi eta máimahi. Te machuti tatiarihihí eta mayehe corona oro. Németeaca titsecavaipa eta macurujisirayare eta trigo. Tásiha, tiúchucapa ema émana ángele te tajuhe eta Templo. Mapiaracapa muraca ema téjacahi tayehe eta úcaji. Máichapa:

—Puiti piyana. Picurujica namutu ena achaneana manerejiruanahi ema Viya, taicha tiyuriticavapa eta natuparaha. Piputuvahu\* —máichapa.

Tacahe, ema téjacahi te úcaji, tíjahúchavapa macurujicapa ena náequeneruanahi manerejiruanahi ema Viya. Macuchucavacapa eta te juca apaquehe.

<sup>17</sup> Tásiha, tiúchucavarepa ema apana ángele te tajuhe eta Templo te anuma. Németeaca matsecaripavare eta macurujisirayare, étapa eta uva†. <sup>18</sup> Énerichuvare tiúchujicavarepa ema apana ángele eta te mesa tiámahi eta mayucuneasa ema Viya. Éma, téchahi eta yucu. Tacahe, mapiaracapa muraca ema matsecaripa eta macurujisirayare. Máichapa:

—Puiti piyana. Piputuvahu picurujica ena apamuriana achaneana te juca apaquehe. Tícuñacacareanapa ichape, taicha tétavicavahi eta náichirahi eta tauriqueneana. Vaipa ticuchapacarehini eta náeneuchiravaina‡ —máichapa ema ángele.

<sup>19</sup> Tacahe, tiyanapa ema ángele. Macurujimurihapa ena achaneana tíchanahi eta tauriqueneana. Tíñehiquenehi eta náepenirahi taicha títecapapa eta táíñehiquene ecuñaraqui tiásihahi me Viya taicha eta náimiyusemasirahi éma. Tacajapapahecavacahi éna.

<sup>20</sup> Te tachachacu eta viávasa eta tacajapapahesihahi. Tiúchucapa eta náítine, tacuti eta cajacure. Étana metro eta táupenava. Tresciento kilómetro eta táunavayare.

## 15

*Ena siétequeneana ángeleana najacapapa eta siétequene ecuñaraqiana*

<sup>1</sup> Tacahe, te nésenicapa te anuma, nímahavarepa eta apana ecutiarare. Tétavicavapa eta táramicarevahi. Natiarivare ena siétequeneana ángeleana. Ticatuparacasianapa éna eta nacamirisirayarehi eta siétequene ecuñaraqiana te apaquehe. Te táitavapa eta juca ecuñaraqiana, títavainavarepa eta masemanevahi ema Viya.

<sup>2</sup> Nímaha tativa eta ticutiyaréni táimahi eta une te ichapequene cáquiure. Tétavicavasera eta tajanunusira tacutihi eta espejo. Tásiha, tacutiyaréni eta yucu eta táimahi. Natiarivare ena máisapavaranahi najirauchahini natsiucahipucaini ema Útsutsure étapa eta máimahi náepiyarui, váhivare náisapavahini nacamarcahini eta mamarca. Te tachacaya eta une titupihanahi. Nacaratacahi eta nayeheana guitarrana máijararuana ema Viya.

\* **14:14-16** Te pivarahapuca pecha eta apana, pitanuca Mateo 13.24-39, étapa te 24.30,31. † **14:17** Te juca, ema Juan máechajisihahi eta nacurujisirahi eta uva, tahi eta épire. Te jena avasare, eta nayeherepi ena achaneana, nácatayayajica eta uva te raveta, navairahi nacuchuca eta tachi. ‡ **14:18** Ema ángele máimicutijiricahi eta tíñehiquene ecuñaraqui ticapacayare ena camuriqueneana achaneana étapa eta sárareana. Vuíchahasera étaina eta táequeneha ecuñaraqui.



<sup>3</sup> Tijiranahi eta jirasare majirasaini ema víyahaini Moisés, mavanaraini ema Viya. Najirauchahi ema Cordero. Ani tacahehi eta jirasare:

“Píti ichapequenevihi aquenuca,

Tétavicava eta pítupajjiasirava.

Tamutuquenehi píturuequeneha.

Tétavicavapa eta táamicarevahi eta pépiyaruanahi.

Tiúricacarehivare eta pinaquipairuanahi.

Vahi apanapanenejinahini eta péchajiriruvana.

Yátupihhi eta piúriva.

Píti aquenucavihi, péchaya tamutu avasareana.

<sup>4</sup> Namutuhi tipicaviana, piti Tata.

Namutuvare ticunachaviana taicha piti yátupiquenévihi eta pisantuva, nájina nácutivihini.

Títecanayare nácani achaneana te tamutu avasareana.

Titsiucavianayare taicha náimahahi tatupiruvahi tamutu eta píchaqueneanahi”.

<sup>5-6</sup> Tásiha, nímahavarepa te anuma téjiacahi tamutu eta Templo. Nímahapa tiúchucanahi ena siétequeneana ángeleana te téqueneha cuarto te tajuhe, énaquenehi ena ticatuparahanahi eta siétequene ecuñaraqiana táequenereyare tiúchujica. Eta namuirihana, amairiha eta lino tijapu tirapepeacavaca. Eta náitijuheana ichapemevaca, títecapavaca te natupana. <sup>7</sup> Tásiha, nímahapa ema émana ecutiarareana nacuatronehi. Máijaracavacapa étasivaca eta escudilla oro ena siétequeneana ángeleana. Te tajuhe eta escudilla támapahi eta táíñehiquene ecuñaraqui táicutiarahi eta masemaneva ema Viya. Éma, acanevacaquenehi eta máitairesira. Máimahapa tamutu eta taurique-  
neanahi náichaqueneanahi ena achaneana. <sup>8</sup> Tacahe, nímahapa tíjahúchavapa eta tajurusirahi eta majaraivahi ema Viya, ema acanevaca eta máitairesirahi. Tétavicavahi eta mapicauchacarevahi taicha eta matumeva, maratahairahi tamutu. Tásiha, nájina tiratahaina tisiapana te Templo, váhivare tímahacarehini eta tapajacura táchavenehi eta tavayuchiravahi eta majaraivahi. Tiámainucava te táitauchavapa eta siétequene ecuñaraqui táequenereruyarehi námaquenepahi ena siétequeneana ángeleana.

## 16

*Títauchavapa eta ecuñaraqiana nacamiriruhi ena siétequeneana ángeleana*

<sup>1</sup> Nusamapa muraca eta mahu ema Viya tásihaquenehi eta téqueneha cuarto náuchusinehi ena siétequeneana ángeleana. Ticavanahianapa éna. Ánipa tacahe eta navanahi:

—Eyanapa ecamirica te apaquehe eta juca siétequene ecuñaraqui táíñehiqueneana tiávihanahi te escudilla taicha eta nusemanevahi —máichapa ema Viya.

<sup>2</sup> Tacahe, tianapa ema tínapuca ángele. Máepusaicapa te apaquehe eta ecuñaraqui tiávihahi te escudilla macarataruhi. Tacahe, ena achaneana tiámanahi eta mamarca ema Útsutsure, táchavenehi eta natsiusirahi eta máimahi nasiñarajihhi, témunahiricavapa táuchuacavaca éna eta caracha ticajachacarepa tijechevare, tacutiyareni eta espuntiu.

<sup>3</sup> Ema apana ángele máepusaicavarepa eta macarataruhi tayehe eta mar. Tacahe, eta une tíjahúchavapa ítiama, tijecheamapa. Tépenaracanapa tamutu eta sárarechichana ticavasanahi te mar.

<sup>4</sup> Ema apana ángele máepusaicavarepa eta macarataruhi tayehe eta cacajureana, te cáquiureana, étapa te tatavarapiana. Énerichuvare ítiavarepa.

<sup>5</sup> Nusamavarepa ema máepusaicahi eta juca ecuñaraqui tayehe eta cajacureana. Macahepa éma:

—Tétavicavapa eta piúriva, piti Tata Vicaiyaquene, eta pícuñasiravacaipa puiti ena ticaviurevanahi. Yátupiquenevihi eta pisantuva. Píti pitirihi-quenehi te tépanavainapa, puítiripa pinasirichuhi eta viyehe. <sup>6</sup> Tícutichavnainapa puiti eta navarahaquenehi térana eta íti ena tépusaicanaahi eta náitine ena pichanerana táimicaparuana eta náehisiravihi píti, étapa eta nacameta-rairuirahi eta péchajiriruva. Puiti píjaracaipa eta náerirayare eta ítíama taicha naviurevanahi éna.

<sup>7</sup> Nusamavarepa eta mahu ema apana tayehe eta mesa tiámahi eta mayucuneasa ema Viya. Ánipa macahe:

—¡Tata Vicaiyaquene, tétavicavapa eta vicunachiravi! Píti, tétavicava eta pítipajijiasirava, píturequeneha tamutu. Pitupiruvahi eta pícuñasiravacahi ena ticaviurevanahi. Vahi pémetavicahíni —máichapa.

<sup>8</sup> Ema apana ángele máepusaicavarepa eta macarataruhi tayehe eta sache. Tacahe, eta sache tépanavainapa eta tavayuchiravayare tíjure, táijuchirapa eta apaquehe énapa ena achaneana. <sup>9</sup> Jéhesaréinehi, táetaviuchapa eta táijurevahi. Táijuchavacapa ena achaneana. Váhiquenesera náeneuchavahini, váhivare návarahahini náesenicahini ema Viya. Navayuchaichucha eta nasemanevahi. Nacajachapa ema Viya, ema ticavanairipipa eta ecuñaraqüiana.

<sup>10</sup> Ema apana ángele máepusaicavarepa eta macarataruhi te táinahu eta mávasa capital ema Útsutsure, eta máejasihahi. Tacahe, ticutipa timapicupa te návihahi ena majupahana. Vaipa náimatiequenehahíni tájahapuca eta náicharacavaya namutu ena machanerana. Ticapitiquiahechavanapa ena achaneana taicha eta tacativa nasama. <sup>11</sup> Tacahe, tisemasamureanapa nacajachapa ema Viya taicha eta tacativahi nasama eta najarana nacarachana. Váhiquenesera téneuchavanáimahi mayehe ema Viya. Váhivare náinajicaimahi eta náichira eta tauriqueneana.

<sup>12</sup> Ema apana ángele máepusaicavarepa eta macarataruhi tayehe eta ichapequene cajacure ticaijare Eufrates. Tacahe, eta cajacure tiájicupa, apaesa máejerare eta nánucuiraya ena aquenucana tiásihanahi te tinapaica eta táuchusine sache, énapa ena suntaruana.

<sup>13</sup> Tásiha, nímahavacapa ena mapanaqueneana ticaetemarahanahi: ema Serpiente, ema Útsutsure, émapa ema Falso Profeta. Tiájajacanahi éna. Te najaca, tiúchucahi eta tavásiyaréni eta varutete. Éreananahi eta júcana, náchanevanahi ena mapanaqueneana. <sup>14</sup> Éna, títipajijiacavanahi tíchanahi eta tiáramicareana tavayuarauquianahi nayehe ena aquenucana te tamutu avasareana. Navaraha nacurujicavacayare, énapa ena nayeheana ejército nasuntaruana apaesa namutu ticanaranaya ema Viya. Tíjahúchavasera muraca eta máquipapaisiravacainapa éma, taicha tétavicava eta máitupajijiasirava, máiturequeneha tamutu.

<sup>15</sup> (Nutí, tíjahúchavaya eta nítecapauchiraheyare éti. Váhisera tánecapacaremahi eta nítesira. Eta tacahe, tétavicava eta iúricacarevaya te ecunevahi, machu ímacariana eta nuchimapiraheyare, etsiriacaréipa.)

<sup>16</sup> Tacahe, ena mapanaqueneana éreanana nacurujicapa ena aquenucana énapa ena nasuntarurana tayehe eta vámahí ticaijare Armagedón te náechajiriruva ena israelítana.

<sup>17</sup> Ema téqueneha ángele nasietenehi máepusaicapa eta mayehe escudilla te anuquehe. Tásiha, nusamapa muraca eta mahu ema Viya tiásihahi te trono tayehe eta Templo. Ánipa macahe:

—¡Títauchavapa puiti tamutu! —macahepa.

18 Tacahe, tiúchucapa eta térameca. Ticaemapa. Tirurecapa. Tiyamuricapa eta apaquehe, muraca eta tayamurisira. Tájina tácuti eta tamuracava nasamasarehini eta acane eta táepaniravahi eta apaquehe. 19 Te tamutu eta avasareana te juca apaquehe, tiáquipaicavanapa eta pétiana. Tavetijipa eta ichapequene avasare Babilonia. Tiáquipaicavapa tamutu eta pétiana. Mapana eta táejepahi eta apaquehe te tajuhe eta avasare. Taicha ema Viya máechavapa eta naviurevanahi ena tachichanaveana. Máimerecapa éma eta masemanevahi. ¡Tétavicavahi eta tamuracava eta táicuña! 20 Énerichuvare, tamutu eta tiúrupuhiana téricapa. Eta céroana témitiequenevarepa. 21 Témiricavarepa eta ichapequene uverequiana. Tájnavare tácuti eta táichapeva. Cuatro arroba eta tajitacarevavaca. Tásiha, ena achaneana tisemanaichucha, nacajachaichucha ema Viya, taicha tétavicava eta tamuracava eta ecuñaraqui, eta táemirisirahi eta ichape uverequi.

## 17

### *Esu esena túhusi téjacahi te tamaiquehe eta apanavare sárare tíñehi*

1 Tásiha, tipauchanupa ema émana ángele nasietenehi ena ticaratacanahi eta escudillana. Máichanupa:

—Yare, nímechaviyare eta suícuñayare esu esena túhusi, tavayurevahi eta supecaturana. Ésu, tacunahi eta ichapequene avasare te tachausi eta mar. 2 Ena aguenucana te juca apaquehe namutuhi suíturucavaca sucachanevaca éna. Suíchuhavare ena suvarahaqueneanahi suíturucavaca tayehe tamutu eta tájiparacana tauriqueneana —máichanupa.

3 Tacahe, ema Espíritu Santo tímimahanuhi eta mavarahaqueneana tímechanuya ema ángele. Ema ángele tiámanupa tayehe eta mávapahi apaquehe. Ánaqui nímahapa esu esena téjacahi te táinahu eta táíñehiquene sárare, máchanevahi ema Útsutsure. Titsi eta táimahi. Te táquehe, amairiha eta ajureca táimijarechavahi, tímijachavahi Váyainahini. Siete eta tachutiana. Diez eta tajihuana\*. 4 Esu suca esena, eta táimahi eta sumuiruha mularume étapa eta titsi. Tétavicavahi táurinavavacahi eta suyereruvana, amairiha oro étapa eta táurinaqueneana márijahichichana, étapa eta tiúrinana perla. Tásiha, te suvahu sucaratacachi eta ichape suéresero oro. Tiámahi eta tájiparacana pecatuana táíñemahiqueneana suíchaqueneanahi eta suítaresirahi sutuhusivahi. 5 Te suchuti, tatiarihihi eta ajureca eta suíjaruhi, tayumururevachuchasera eta tacayemaquenehi: “Eta ichapequene avasare Babilonia, tacachichapa ena túhusiana. Táquenuyare eta tájiparacana táíñemahiqueneana”. 6 Nucaicutiarapasera eta suícharacavahi esu esena ticavahahi ésu. Táecavahachahi taicha eta suérirahi eta náitineamaini ena machanerana ema Viya, ena suímicaparuanahi taicha eta náechajisihairahi ema Jesús. Eta nímairahi eta juca, ichaperinehi eta náramesirahi. 7 Tacahe, máichanupa ema ángele:

—¿Tájaha tacayema piárameca? Numetacaviyare puiti eta tacayemaquene eta juca pímaquenehi suyehe esu suca esena, étapa eta sárare superahi, eta siétequenehi tachuti, eta diésquenehi tajihuana. 8 Eta juca sárare pímaquenehi, tanasiqueneripahineni acane, tájinaipahisera puiti. Tiúchujicayareresera tásihaya tayehe eta táupenaquene pusu. Ichape eta náramesirayare eta náimairayare ena achaneana, namutu ena tájinahi eta nalistainahini acane te tépanavainapa eta apaquehe, tayehe eta libro tiama eta nalistana ena náitareruanayare. Tatupiruvayaresera eta sárare tépenayare títaequenénapa.

\* 17:3 Te pivarahapuca pecha eta apana, pitanuca eta capítulo 13.1-8.

9 “Pisamanuchaha. Puiti numetacaviyare eta tacayemaquenehi eta pímahaquenehi, te pivarahapuca picaicutiaraya. Esu esena tacunahi eta ichapequene avasare. Eta juca siétequene tachuti eta sárare tacunahi eta siétequene cerro távihahi eta avasare. 10 Tacutiquene eta juca siétequene tachuti eta sárare nácutiaranahi ena siétequeneana aquenucana. Cíncoanapaserá ena nájinaripa puiti. Matiarhisera ema émana aquenucaichaha puiti. Éma apana vuíchaha títecapahi. Téhesera te máitecapapa ema téquenehayare, vaipa tiyeremahi. 11 Étarichuvare eta sárare táitareruinihi acane, tájinaripahisera puiti. Éta, macunahi ema nahóchone ena siétequeneana aquenucana. Te máuchujicapa, majacapa eta návacureana ena siétequeneana aquenucana. Tíjuhúchavaserá eta máitaviraya.

12 “Eta pímahaquenehi diésquene tajihuana nacunahi ena apamuriana diésqueneana aquenucanayare. Vuíchahasera ticatuparacasiana. Najacapayaresera eta natuparahanaya ena aquenucanaya eta te návasana. Ánipirichusera nacaheyare eta nacachanerayare eta sárare. 13 Ena nani diésqueneana aquenucana tñunana eta napanereru. Náimicatacaya eta sárare eta aquenucairanahi te návasana. 14 Tacahe, ena nani nacanarainapa ema Cordero. Váhisera náratahaimahi. Máitahacavacayarehi ema Cordero. Taicha éma, yátupiquenehi Rey, Aquenucahivare. Mavanecahi ena réyeana énapa ena aquenucana. Natiarihiyareva ena macachanequeneanayare éma. Nacanejiquenehi eta máichuirahi ema Viya. Tásiha, yátupihí eta náehisirahi éma.”

15-18 Tásiha, máichanuvarepa ema ángele:

—Esu esena túhusi pímahaquenehi, tacunahi eta ichapequene avasare. Sucaetemaqueneanahi suítahacavacahi ena aquenucana te tamutu avasareana. Eta jena mar pímahaquenehi te tachaui eta suéjasihahi esu túhusiquenehi, tacunahi eta náichapemuriva ena achaneana te tamutu avasareana. Éta diésquenehi tajihuana eta sárare pímahaquenehi tacunahi ena diésqueneana aquenucana. Éna, nacatichayare esu túhusi. Téhesera te táequenepa eta juca, náitaracainapa ésu eta sucayehequeneanaini. Náepachiacainapa. Náquipaicayare tamutu eta supenana. Tásiha, eta náemachayare náijuchainapa te yucu. Eta nacuticacairaya, navaraha náimicataca ema Útsutsure, étapa eta nacamitiequenehaya esu túhusi, vahi tásihahini eta napanereruana éna. Émarichuhi ema Viya tíjaracavacahi eta napanereruanayarehi, náichirayare eta mavarahaquenehi éma —macahepa ema ángele.

## 18

### *Eta táquipaisiravahi eta avasare Babilonia*

1 Nímahavarepa ema apana ángele tiúcupaicapahi másihahi te anuma. Muraca eta matuparahahi. Mamicauchaparinehi eta apaquehe eta majaravapai. 2 Téchajicapa muraca, ánipa macahe:

—Tájínapa táipuina táquipairuvainapa eta ichapequene avasare Babilonia. Nájinapa nánasihini nacapenahini ánaqui. Énanecha ticapenanahi ena váinarajiana, étapa eta cáyureana tacajachacarequeneana. 3 Muracaqueneya eta táicuña taicha namutu ena achaneana te avasareana, tétavicavahi eta tavayuasiravacahi eta túhusicare, étanecha nacasamurehi. Énaripa ena aquenucana, énerichuhivare nacahehi éna táemesiavahi. Énerichuvare, ena tíjararecarahiana eta tétacare, tétavicavaipahi eta náurisirahi tarricochavacaipahi eta tímitahacavacayare ena apamuriana —macahepa.

4 Nusamavarepa te anuma eta mahu ema apana ángele. Ánipa máichanu:

—Eti machaneranahi ema Viya, vahi ecuehica eta napecaturana ena achaneana te juca avasare. Iúchucavanesera, machu tavehahe eta táíñehiquene táicuñayare taicha eta napecaturana. <sup>5</sup> Taicha tétavicavapa eta táuruquechiravahi eta napecaturana. ¡Ániquehepa! ¡Ema Viya máimararacahi tamutu eta tamaeperajivanahi! <sup>6</sup> ¡Puiti eti nuchamuriana ángeleana, ícuñacayare! ¡Íjaracayare muraca eta táitsivayare taicha tavayuaca náichahi eta tauriqueneana ena tachichanaveana eta juca avasare! Cape juca náimicatajivachavacahi ena páureana. Puiti, ichapepanayareva eta íjarasiraya eta nátajivaya. <sup>7</sup> ¡Émecharecayare muraca! Ichapena eta nacatajivaira taicha tétavicava eta náíjarasiravahi eta nacaetemaraivahi eta napanereruhi: “Tájina níchiravainahini eta návihahi. Núti néchahi. Tájina nácamunuimahi. Vahi nucatajivahini” tacahehi eta napanereruanahi. <sup>8</sup> Eta juca napanereruhi naviurevana eta táijahúchirainapa eta náicuñayare. Técuhanainapa ena tachichanaveanahi eta juca avasare. Ticatisamurevanainapa. Tíjuyare eta napenana, táimijuchavacainapa éna. Tépenaracanainapa namutu. Máijahúchahi máicuñacavaca ema Viya, máemereuchirahi eta tamutuirahi marataha —máichanupa ema ángele.

<sup>9</sup> Natiarihivare ena aquenucana te avasareana, ena tavayuaruanahi eta túhusicare, táimiaquijiararuana eta tavayuasiravacahi. Éna, te náimahapa tipusisicapa eta yucu, tíyahanainapa ticatiequenehavanainapa. <sup>10</sup> Nayere-requinainapa eta náimararasirayare táichavenénahi eta napisirayare eta yucu táicuñayare eta avasare. Tásiha, nacahepa:

—Páurevisami, piti ichapequene avasare Babilonia. Tíchechupa puiti eta táijahúchiravapa eta pícuña —nacahepa.

<sup>11</sup> Énaripa ena comerciánteana tíjararecarahiana eta tájiparacana te avasareana, tíyahanayareva ticatisamurevanaya eta náimairayarehi eta táitavirapa eta avasare. Taicha nájinainapa tiviyechaimahi eta námaqueneasana: <sup>12</sup> oro, plata, táurinaqueneana márijahichichana, perla, yeréucava táurinaqueneana, seda, apaimamajiqueneana mularumeana, títsimeana; énerichuvare eta náepiyaruana tijapu íápe ticaijare marfil, yucuqui táurinaquene, bronce, fierro, étapa eta mari ticaijare mármol. <sup>13</sup> Étaripa eta canela, eta apana táijiyequeneana táhiana yucuqui nasucureana, eta tátuyucuqui inciensosare, tíjiyequeneana brillantina, perfumeana. Étaripa eta téracareana, eta acéiteana, eta harina te trigo. Étaripa eta sárareana ticavanaracarevaca, eta vuiye, cavayu, burro, énerichuvare eta tinicacareana uvesa, vaca. Étaripa eta carro. Énaripa ena achaneana ticamusuracareana náíjarareruanayarehi.

<sup>14</sup> Tiápechavavarepa téchajica ema ángele, ánipa maicha eta avasare:

—¡Jéhesare pítitátaji! Títavapa puiti eta picayeheraini eta táurinisiqueneana tinicacareana, tétavicavainehi eta tavayuasiravihi. Énerichuvare títavavarepa eta picayehevaini eta tímahacareana táurinaqueneana pipincanillavainihi —máichapa.

<sup>15</sup> Énerichuvare ena nani tíjararecarahianaini eta juca tájiparacana ichape-muriqueneana tarricuchaqueneanahi eta avasare, nayererequinariipa eta náimararasirahi eta tacaicuñairayarehi eta avasare. Ticatisamurevanaripahi. Tíyahanaripahi. <sup>16</sup> Tásiha, nacahepa:

—Páurevisami piti ichapequene avasare. Tétavicavainihi eta piúrinavainihi. Picutinihi esu esena eta táurinava eta sumuiraha lino, mularume, titsi eta tayehejaca eta sumuiraha. Eta piyereruva amairiha oro, táurinaqueneana márijahiana, perla. <sup>17</sup> ¡Puiti, tétavicavapa eta táijahúchiravaipa témitiaca tamutu eta pímaqueneanainisamihi! —nacahepa.



Énerichuvare, namutu ena comandanteana táquenuanahi eta lancha, énapa ena pasajeroana, énapa ena marineroana, énapa ena ticaemataneanahi tayehe eta lánchana te mar, nanasipa namutu te tiyerehi. <sup>18-19</sup> Eta náimairahi eta taquijarera eta yucu tájuiirahi eta avasare, tipiararecanapa eta nacatiequenehairahi. Tíyahanapa. Nanacahivare eta máteji te nachuti. Tásiha, nacahepa:

—¡Páurevichapucaini! ¡Tamapuruji eta juca ichapequenení avasare! ¡Tájina apanaina avasarena tácutihini eta juca ichapequenéní avasare! ¡Títavapa tamutu eta tarricovainehi virrichochiravainíhi vimutu viti tímisiapanahi eta táimahaqueneana viyereruasanahi te lánchana tayehe eta juca mar! ¡Puiti tétavicavapa eta tájahúchiravahi eta táemitiequenerahi tamutu! —nacahepa.

<sup>20</sup> Tiápechava téchajicapa ema ángele, ánipa macahe:

—¡Íurisamurecarepa puiti eyehe eti iávihanahi te anuma, étipa eti apóstoleana, étipa eti profetana, emutu eti machaneranahi ema Viya! Taicha máitsirijiequeneharipa puiti ema Viya tamutu eta táemecatajivasirahehi —macahepa.

<sup>21</sup> Tacahe, tiúchujicapa ema émana ángele, máetaviure eta mamuracava. Manaracuhapa eta ichapequene mari ticheyame. Máquijiecapa te une. Tásiha, macahepa:

—Tacaheyare eta tamuracavaya eta náquipaisiraya eta ichapequene avasare Babilonia. Tájina támiapécháimahi náimahahini. <sup>22-23</sup> Tamutu timatina eta te távineníhi. Tájina támiapécháimahi tacasamahuhini eta irimaraquiana te cáleana eta nacapununeraini eta guitarrana, sivivire, naca-jane, étapa eta nachujana. Nájinavarepa ena ticachujarahianaini. Váipavare ticasamahuimahi eta piéstana ena araimarahiana. Nájinainavarepa ena ticaemataneanaini eta tinicacareana. Títavainapa tamutu eta ematane-canaini. Étaripa eta tamichahuana, tamutupa témitiequenehana. Tamapurujipa eta náiturequenehainíhi ichape ena comerciánteana, náijarareca eta tasimutuqueneana. Tamapurujivarepa eta tavayuasiravaca eta apamuriana avasareana téhicanahi éta, taicha puiti nájina ticatajicaimahi eta ichapení avasare. <sup>24</sup> Eta júcatataji avasare, ticaviurevahi eta nacapasiravacahi namutu ena machaneranaini ema Viya te juca apaquehe, énaripa ena profetanaini —macahepa.

## 19

<sup>1</sup> Te táequenepa eta juca, nusamavarepa eta nahu ena camuriqueneana achaneana tayehe eta anuma. Muraca eta najiraira. Ánipa nacahe:

“¡Aleluyapa puiti!

¡Tétavicavahi eta vicunachiravihi piti Tata!

Eta picatiuchiravahi, pímercahieta nacapasiravacahi nam eta pítupajijiasiravahi.

<sup>2</sup> Taicha títauchavapa eta náicuñahi ena ticaviurevana, vahi pémetaviacavacahini eta náemecharahiana ena túhusiqueneana tachichanaveanainíhi eta avasare.

Ichape eta navayuareresirainíhi ena achaneana te apanana avasareana eta túhusicare.

Puiti pítipa pítsirijiequenehahi eta nacapasiravahi viti machaneranaini”.

<sup>3</sup> Tiápechavanavarepa tijirana:

“¡Aleluyapa puiti, taicha acanevacainapa eta tacaicuñairahi eta juca avasare-tataji!” nacahepa.

<sup>4</sup> Tásiha, ena véinticuatroqueneana víyahana tuparairucana énapa ena cuátroqueneana ecutiarareana tépuyumurihanapa te mamirahu ema Viya, ema téjacahi te trono. Natsiucapa eta nacunachirahi. Ánipa nacahe:

—¡Amén! ¡Aleluya!

<sup>5</sup> Tásiha, nusamavarepa eta mahu ema téchajicahi tayehe eta trono. Macahepa:

—Puiti etsiucayarepa ema Viya, emutu eti machanerana, étipa eti amaperuana epicaurahiana mayehe —máichapa.

*Eta táurinaquene mapiestara ema Cordero*

<sup>6</sup> Nusamavarepa eta nahu ena camuriqueneana achaneana. Tijajacanahi. Tétavicavahi eta tamuracavahi eta najirairahi. Ánipa nacahehi:

“¡Aleluyapa puiti!

Taicha téjacaipa te mávacure ema Viáquenu, tinacuchavapa eta émairapa técha tamutu éma.

Taicha tétavicava eta máitupajijiasirava, tamutuquenehi máituruequeneha.

<sup>7</sup> ¡Vámutu vicunacha éma!

¡Tétavicava eta viúrisamurevapa puiti!

Taicha títauchavapa puiti eta macurujisirahavipa ema Cordero, tímicitijiricavahi te araimamuhu.

<sup>8</sup> Viti véhicanahi ema Cordero, tétavicavahi eta vipachinavaipahi máicha, tacutihi súcani araimayare ticaetupirihipa, sucamuirihahivare eta táurinaquene múiriare lino, tijapu tirapepemeca” nacahepa.

(Eta juca lino, táicutiarahi eta táurivahi eta víchaqueneana viti véhicanahi ema Viya.)

<sup>9</sup> Tacahe, máichanupa ema ángele:

—Piájuchayare eta juca: Tétavicavapa eta náuricacareva nácani nacaichuhasiqueneanahi tayehe eta táurinaquene mapiestara ema Cordero.

Tásiha, máichanuvarepa:

—Eta juca nímechaquenéviana, yátupiqueneanahi máechajiriruvanahi ema Viya —máichapa.

<sup>10</sup> Tacahe, népuyucapa te máivapechacaya ema ángele. Nuvarahapa nutsiucayarehini. Émasera máichanupa:

—Péchepecachucha. Vahi picutsiucanu. Taicha nútirichuhi picutiquenenuhi mavanaranuhi ema Viya, énapa ena pichamurianahi títauchanahi eta mavanairipiana ema Jesús. Ema Viya, éma tatuparacavihi pitsiucayare. Taicha étirichuhi vicutiqueneana eta vicametarairuira eta máechajiriruva ema Jesús —máichanupa.

*Ema Jesús, macaperahi eta tijapu cavayu*

<sup>11-13</sup> Tacahe, nímahavarepa eta anuma téjiacahi. Tiúchucapa eta cavayu tijapu. Eta máijare “Tímimatirahi me Viya”<sup>\*</sup> ema ticaperapahi éta. Éma, yátupiquene títaurahi; taicha éma, tatupiruva eta mahaquenucavahi. Éma, macatiuchavacahi ena náuriqueneanahi. Énaserá ena tíchanahi eta tamauriqueneana, muraca eta máicuñasiravacahi. Étapa eta macanarairavacahi ena mánarana, vahi macapacavacaimahi ena tájina naviurevaina. Énaserá ena nacaviurevanahi, máitaequenehavacayare. Eta tacahe, eta mamuirihá ticaepapamehi te iti. Eta máuquihana timuruhevaca tacutiyareni eta yucu. Te machuti ticayehéhi eta camuriquene coronana. Tatiarihivare eta ajureca tíamahi eta apana máijare. Macarichusera ema téchahi eta tacayemaquenehi

\* **19:11-13** Te pivarahapuca pecha eta apana, pitanuca eta Juan 1.1-8.

eta ajureca. <sup>14</sup> Náehicapahi ena mayeheana ejército, tiásihanahi te anuma. Namutu ticaperavaca eta cavayu tijapu. Eta namuirihana, amairiha eta táurinaquene lino tijapu. <sup>15</sup> Te majaca ema tnapucapahi, tiúchucapa tavasimahiyaeréni eta tacasiriquene espada eta macapasihayare ena mánarana. Macaratacahi eta matsucurupa fiérroqui eta macurujisiravacaya. Mácatayayajicavacayare ena mánarana tacutiyare eta nácatayayajisirahi eta uva eta nacuchusirahi eta tachi táitivequenehi. Éta tímereuchayarehi eta tamuracavayare eta náicuñaya, taicha tétavicavahi eta náimiyusemasirahi ema Viya ema máitupajijihaguenehi, máituruequenehavare tamutu. <sup>16</sup> Tatiarihivare eta ajureca te tacheyarapi eta mayehe capote tépacuchahi eta mapaheana. Eta táechajiriruva eta ajureca, ani tacahehi: “Éma yátupiquenehi Rey, Aquenucahivare. Mavanecahi ena réyeana énapa ena aquenucana”.

<sup>17</sup> Nímahavarepa ema ángele titupihahi te tamirahu eta sache. Mapiaracavacapa eta cáyureana tiárrairicaráhiana te anuquehe. Ánipa macahe:

—¡Yare, emutu eti cáyureana, iúrujicava! Enicayare eta táurinisiquene tinicacare máeniruheya ema Viya. <sup>18</sup> Enicayare eta náecheanaini ena aquenucanaini comandanteanaini, ena ajairanaini tímijachavana túmeana, énapa ena nayeheanaini ejército nasuntaruranainipahi, étapa eta táeche eta cavayu naperanaini. ¡Vénicaheyare namutu éna! —macahepa.

<sup>19-20</sup> Tacahe, nímahavarepa ema Útsutsure, énapa ena apamuriana majupahana aquenucana te avasareana, énapa ena nayeheana ejércitoana. Matiarihivarehi ema Falso Profeta, ema tímerecaparacainihi eta tiáramicareana, mavayuarauquianahi nayehe ena achaneana eta náisapiravayarehi ticamarcana, natsiusirayarehiva eta máimahi ema Útsutsure. Tacahe, namutu ena náurujiರುವನಾಹಿ ticanaranahi ema ticaperahi eta cavayu tijapu énapa ena téhicanahi mayeheanapahi ejército. Tacahe, ena ángeleana nacaratacapa ema Útsutsure, émapa ema Falso Profeta. Tásiha, ena apinana náitareruichaha náepujuquichapa tayehe eta táijurequene yucu táetiraraisina eta tamuruira. Éta nacaicuñaiyahi. <sup>21</sup> Tásiha, ema ticaperahi eta cavayu tijapu, máijahúchapa macapapajicavaca ena suntaruana mánaranahi. Eta macaparaqui eta tacasiriquene espada táuchurehi te majaca. Tásiha, járajapapa eta camuriquene cáyureana, tanicapa eta náecheanaini. Tisatuhevacapa.

## 20

### *Eta táichavaquenevaya eta mil año*

<sup>1</sup> Nímahavarepa ema émana ángele másihapahi eta te anuma. Mámapahi eta ichapepi cadena, étapa eta llave, tacaerataiyayare eta táupenaquene pusu. <sup>2</sup> Tacahe, ema ángele macaratacapa eta táíñehiquene Serpiente, eta ticaetemarerecahi acane, émarichuhi ema Váinaraji Satanás. Tacahe, ticaitihapa ema Satanás tayehe eta ichapepi cadena. Mil añozare eta macaitihairayare. <sup>3</sup> Tacahe, ema ángele máiyaracuhapa éma eta te mávacu pusu táupenaquenehi. Manacapa eta llave, máerataequenehapa. Manacavarepa eta ajureca, ánipa tacahe: “Machu évejiaca eta juca tapaja”. Tayerevayare eta mil año, vahi ticaetemarecaimahi nayehe ena achaneana. Te táequenepasera eta mil año, tiúchujicainavarepa eta ticaetemarecainavarepa, ánipinesera.

<sup>4-5</sup> Tacahe, nímahapa ena achaneana náechepureanahi nacaparuanainihi. Éna, táimicaparuanahi eta náehisirahi ema Jesús, étaripa eta nacametaruirahi eta máechajiriruva ema Viya. Ena nani, vahi náepuyumirauchahini ema Útsutsure, váhivare natsiuchahini eta máimahi nasiñarajihini ena apamuriana achaneana, váhivare návarahahini nacamarcahini eta te nanahu

étapa te navahu. Ena nani, ena náinapurehi téchepucana te tamirahuichaha eta mil año. Nímahapa eta náejasiraipa te trono, catuparahanapa éna, juéseanaripa. Mil año eta nacatuparahairayare. Énaserá ena apamuriana náepenaqueneanapa masuapajirairahanainihi, vuíchaha téchepucanaimahi. Tiámainucava te táequenénapa eta mil año, napaenumavainapa téchepucanayare. <sup>6</sup> ¡Tiúricacareanayare ena nani tiápechavanayare títarecana puiti juca! Masantuchainapa ema Viya. Vaipa tiápechavanaimahi tépenana. Vaipa ticaicuñanaimahi eta te táijurequene yucu. Tiyujaracarahianaya mayehe ema Viya, etapa me Cristo. Aquenucarahanayare, taicha ema Cristo máijaracainapa eta natuparahairayare. Mil año eta nacatuparahairayare.

<sup>7</sup> Tásiha, te táequenénapa eta mil año, tiúchucainavarepa ema Satanás tayehe eta macaerataiyahi. <sup>8</sup> Tépanavainavarepa ticaetemarerecayare nayehe ena achaneana te tamutu avasareana. Étaripa eta apinaquene avasare ticaijare Gog etapa eta Magog, macaetemareshayare. Mayurucavacainapa eta nacatianasiraya ema Viya. Tásiha, ticurujicacanainapa ena nayeheana ejércitoana. Tétavicavainapa eta nasimutuvayare. Vaipa titupachacareana eta nasimutuvahi. <sup>9</sup> Tacahe, tiyananapa. Ichapecuequeanapaine eta nayanine, taicha eta nasimutuvahi. Nacapayacayarehi eta nachayasirayare eta avasare máemunaruinihi ema Viya, návihahi ena machanerana. Émasera ema Viya, enevanepa máitaequenehavacahi. Tiúcupaica eta yucu tiásiha te anuma, táijuchavacapa namutu. Nájina tacaemachaquenéna. <sup>10</sup> Tásiha, ema Satanás ema tivayurecainihi, nacaratacapa náepujuquichapa tayehe eta táijurequene yucu, táetiraraisina eta tamuruira. Étaripa eta mávihahi ema Útsutsure, émapa ema Falso Profeta. Tájina nanarasiraimahi. Tamutu sácheana, yátiana eta nacatajivairaya, máichecuaraquireya.

*Étapa tiámahaviyare eta víchaqueneanahi vicaevatainapa tayehe eta viáviyahare*

<sup>11</sup> Nímahavarepa eta ichapequene trono tijapu. Téjacahi ema Viya tayehe. Tétavicavahi eta máramicarevahi. Eta nímararasirahi éma, némitiacapa. Vaipa necha távihapuca návihahi téhepuca anuma, téhepuca apaquehe. <sup>12-13</sup> Nímahavarepa namutu ena náepenaqueneanaini: ena amaperuana, énapa ena ichanaruana, énapa ena ichavicana. Taicha tichavanahi eta náchanevana namutu, téchepupujicanahi éna tayehe jácani náepenineanainipahi. Namutu titupihanahi te mamirahu ema Viya téjacahi te trono. Tásiha, tatiarihi eta libro tiama eta nalistana ena náitareruanaya. Tatiarihivare eta apamuriana libro tacajuiyahi eta náichavaquenevanahi ena achaneana. Ena ángeleana náechajicuhapahi. Nácani náichahi eta tauriqueneana, etapa tiviuchahi eta nacayaseserehirayarehi, nacaicuñairayare. Te tivayuchapuca eta napecaturana, muraca eta náicuñayare. <sup>14-15</sup> Eta nacaicuñaiyahi eta táijurequene yucu, táetiraraisina eta tamuruira. Namutu ena tájinahi eta nájarénahíni tayehe eta libro tiama eta nalista ena náitareruanayare, náepujuquichapa tayehe eta táijurequene yucu, tamutu eta náqueheana etapa eta náchanevana. Máitavacacainapa eta nacatajivairayare. Máitujianainapa tayehe.

## 21

*Ticasipainapa eta anuma etapa eta apaquehe*

<sup>1</sup> Nímahavarepa eta tacasipairaripahi, tamuturipahi arairu eta anuma etapa eta apaquehe. Tájina eta ichapequene une mar. <sup>2</sup> Tásiha, nímahavarepa núti tiúcupaica eta tiúrina avasare. Ticaijarehi Arairu Jerusalén. Tétavicavahi eta tasantuva, taicha tásihapahi te anuma te mávihahi ema Viya. Tiúrinapahi eta tacaetupirihirahi, tacutihi te ticaetupirihí esu araimayare.

<sup>3</sup> Nusamavarepa muraca eta mahu ema ángele, tiásihahi te anuma. Ánipa macahe:

—Puiti, ema Viya macucupaicapa eta mapena te juca apaquehe. Áninapa macavasaya. Tiávahácahénapa eti achaneana. Yátupiquenénapa Ecaiyaqueneya éma. <sup>4</sup> Tacahe, ema Viya macamitiasinaheyare eta íyairana. Váipavare épenaimahi. Váipavare ecatisamurevaimahi. Tájina ticaiyacahémahi. Váipavare ecatajivaimahi taicha tájinapa tiviuchahémahi —macahepa ema ángele.

<sup>5</sup> Tacahe, nusamavarepa eta mahu ema Viya ánipa macahe:

—Puiti tépanavapa arairu, tamutupa ticaitsiva nicha núti —macahepa.

Tásiha, máichanuvarepa ema ángele:

—Piájuchayare puiti eta juca, taicha yátupiqueneya eta táichararacavaya. Tamutuyare títauchava. Jéhevare eta tisuapacareana —máichanupa.

<sup>6</sup> Ánivarepa macahe ema Viya:

—Títauchavapa puiti tamutu eta nupanereruana. Nútira néchahi tamutu eta táepaniravahi eta apaquehe. Nútirichuvare néchahi eta táimiyansiravahi tiuri. Puiti núti nítauchapa tamutu. Eti emaunehi, núti níjaracaheyare eta máitavacaca une ticaitarecarahi. Tájina vahi evacharecaimahi. <sup>7</sup> Tacutiquene, eti ecamichanahi, ímianavahi eta éhisiranuhi, níjaracaheyare tamutu eta júcana ícuchianayarehi. Núti ecaiyaqueneya, taicha nuchichaheyare éti. Núti néchaheya éti. <sup>8</sup> Ticaicuñanayaresera namutu ena tipiturijiana, ena masuapajirairahana, ena máeperajiana, ena ticapahiana, ena túhusiana, ena iápemareana, ena ticasiañarajiana eta achanemirana, énapa ena tépiyahirahiana. Ticaquijianayare namutu éna tayehe eta náicuchi táijurequene yucu máitavacaca eta tamuruira, táetiraraisina eta tamuruira. Váhiquene tíuchucanaimahi tayehe —macahepa.

#### *Eta arairu avasare Jerusalén*

<sup>9</sup> Tacahe, tipauchanupa ema émana ángele nasietenehi ena ticaratacanahi eta siétequene escudilla tiámaphi eta siétequene ecuñaraquiana táíñehiqueneana. Tásiha, máichanupa:

—Yare. Nímechaviyare eta avasare, návihahi ena machanerana ema Cordero. Tímicutijiricavahi esu araima sucaetupirihiquenehi eta suítauchiravayare —máichanupa.

<sup>10</sup> Tásiha, ema Espíritu Santo tímimahanuhi eta mavarahaquene tímechanuya ema ángele. Ema ángele tiámanupa eta te tápusi eta ichapequene cerro anuquehequene. Tímechanupa eta táucupaisirahi eta avasare Arairu Jerusalén. Tétavicavahi eta tasantuva taicha tásihahi te anuma te mamirahu ema Viya. <sup>11</sup> Eta juca avasare, tétavicavahi eta tajaraivapahi taicha tiámahi eta majaraivahi ema Viya. Eta táimahi eta tajaraivahi tacutiyareni eta tajanunusira eta márijahi tijararacahi. <sup>12</sup> Te tachachacuana eta avasare, tatiarihi eta tacuti yúchama tímítutuche. Anuquehe eta táichapeva. Tatiarihi eta dócequene tapajacurana, távihahi eta ajureca náijare ena dócequeneanaini náchucanaini ena israelítana. Natiarihivare ena ángeleana tayehe eta tapajacurana. <sup>13</sup> Tatiarihi mapana tapajacura te tinapaica eta táuchusine eta sache. Mapanavare tapajacura te tinapaica eta cajaha. Mapanavare tapajacura te tinapaica eta vana. Tásiha, eta mapanaquenevare te tinapaica eta tasiapine eta sache.

<sup>14</sup> Te apaquehe eta yúchama, tatiarihi eta doce márimeana táejahameruanahi eta yúchama. Támahi eta dócequene náijareana ena apóstoleana mayeaneanahi ema Cordero.

<sup>15</sup> Ema ángele ema téchajicanuhi macaratacachi eta máicutiriqui úruqui, máicutichihayare eta tapajacurana étapa eta yúchamana. <sup>16</sup> Eta avasare falaru



eta táimahi. Eta táunava ticuticacahi eta tajuhe. Dos mil doscientos kilómetro eta táichapeva eta avasare. Ticuticacahi eta táunava, eta tánuqueva, etapa eta tajuhe. <sup>17</sup> Máicutichavare eta yúchama. Sesenta y cuatro metro eta tánuqueva.

<sup>18</sup> Eta yúchama amairiha mari jaspe timájumeana. Eta avasare amairiha eta yátupiquene oro. Tijanunucahi tacuti eta cristale eta tajarahivahi. <sup>19</sup> Eta márimeana tachunosipévanahi eta yúchama, tatiarihihi eta táurinaqueneana mari. Eta títapuca tacayehehi eta mari ticaijare jaspe. Eta apana tacayehehi eta ticaijare zafiro. Eta apana tacayehehi eta ticaijare ágata. Eta apana tacayehehi eta ticaijare esmeralda. <sup>20</sup> Eta apana tacayehehi eta ticaijare ónice. Eta apana tacayehehi eta ticaijare cornalina. Eta apana tacayehehi eta ticaijare crisólito. Eta apana tacayehehi eta ticaijare berilo. Eta apana tacayehehi eta ticaijare topacio. Eta apana tacayehehi eta ticaijare crisoprasa. Eta apana tacayehehi eta ticaijare jacinto. Eta téqueneha tacayehehi eta ticaijare amatista. <sup>21</sup> Eta dócequene tapajana tacayehehi eta doce perla. Tayehepachuhi eta tapaja eta étana perla. Eta títapuca calle, tacayehe eta yátupiquene oro, tijanunucahi tacuti eta cristale eta tajarahivahi.

<sup>22</sup> Te jena avasare, tájina nímahahini eta Templo nayujarasirarénahini. Tájina tácamunuhini eta nayujarasirareyare taicha matiarhihi ema Viya máitupajijihaguene máituruequenehavare tamutu, émapa ema Cordero. Návaháruhi namutu. <sup>23</sup> Tacutiquene, vahi tácamunuhini eta sache étaripa eta caje eta tamicauchirainahini eta avasare. Taicha tamicauchahi eta majaraiva ema Viya, émapa ema Cordero. <sup>24-26</sup> Tájina táimatiyaimahi ticaerata eta tapajana, taicha tájina timapicuina tayehe, tájinavare yátina. Tásiha, namutu ena achaneana te apanana avasareana macuchucureanahi ema Viya, ichape eta napicauchirayare eta Arairu Jerusalén, ichapevare eta nacunachirayare. Tisuapajirahianayarehi tayehe eta vanairipiana tásihaqueneanahi eta juca mávasa ema Viya. Énerichuvare ena aquenucana te avasareana, ichape eta námavahuanayare me Viya te jena avasare mávihahi éma.

<sup>27</sup> Tájina náimatiyaimahi tisiapana ena nachipejiqueneana énaripa ena tícharahiana eta tamaeperajivaqueneana énaripa ena ticaetemarrahiana. Nacarichu tatuparaca tisiapanayare ena tatiarihi eta náijareana tayehe eta libro macarataru ema Cordero, tiama eta nalista ena náitareruanayare.

## 22

<sup>1</sup> Tásiha, ema ángele tímechanuvarepa eta tapachinaquene cajacure. Tétavichavi eta tacaitarecaravahi eta tahunera. Tacutiyaeni eta cristale eta tajararaesira. Eta táuchusihahi eta mayehe trono ema Viya, émapa ema Cordero. <sup>2</sup> Tacahe, tatiarihihi eta yucuquiana, ticaitarecarahi eta tahi. Eta távihahi te enumuhuiyapahi eta títapuca calle, te tachaupahivare eta cajacure. Tásiha, dócehe ticahi te étana año. Cájepachu eta tacahira. Ipurujivare eta tapacaji, tacanaraca ena achaneana te avasareana. <sup>3</sup> Tájinapa tímiapachaimahi tiviuchaimahi ena achaneana ticavasana tayehe eta juca avasare, máejasihahi ema Viya, émapa ema Cordero. Vimutu viti mavanaranahi, máitavacacayarehi eta vijirauchirayarehi, vitsiusirayare. <sup>4</sup> Vímararacayare eta mamira tamutu sácheana. Vicamaracayare eta máijare te vinahu. <sup>5</sup> Aquenucahaviyare. Máichecuaraquireya eta vicatuparahairayare. Ánaqui tájinapa yátina, tájinainapa eta timapicu. Vaipa vicamunuimahi eta majaraiva eta sache. Váhivare vicamunuimahi eta vimícahu. Taicha tamicauchayare eta majaraivahi ema Viya.

*Tiánehipa eta máitesirayare ema Jesucristo*

<sup>6</sup> Máichanuvarepa ema ángele:

—Eta juca nímeruvihi, yátupiqueneya eta táichararacavaya. Tamutuyare títauchava. Jéhevare eta tisuapacareana. Taicha émarichuhi ema Viya tivane-canuhi eta nímitusiravi píti. Acane ema Viáquenu máimitucavacahi ena profetana eta mapanereruana. Puiti mavaraha nímechaheyare eti mavaneranahi eta táequenereruhana mapanereruana, tayehe eta táijahúchirainapa eta táichavaquenevaya. <sup>7</sup>Énerichuvare ema Viáquenu máichahehi: “Níjahúchavanénapa nútijapa”.

¡Tétavicava eta náuricacarevaya ena tisuapanahi, napanerequenehairahi eta nímechaviqueneanahi, étaripa eta piájurequeneanahi te juca libro! — macahepa ema ángele.

<sup>8</sup>Tétavicava eta náramirahi nútí eta nímairahi tamutu eta júcana, nusamirahi nuti Juan. Tásiha, te tamutupa, népuyucapa te máivapeana ema ángele ema tímechanuhi eta juca. Nuvarahapa nutsuicayarehini. <sup>9</sup>Émasera máichanupa:

—Péchepecachucha. Vahi picutsiucanu. Taicha nútirichuhi picutiquenenuhi mavanaranuhi ema Viya, énapa ena pichamurianahi ena ticametarairuana eta máechajiriruvana ema Viya, énaripa ena tisuapanahi tamutu eta tacajuqueneanahi te juca libro. Éma tatuparacahi pitsuicayare ema Viya — máichanupa.

<sup>10</sup>Énerichuvare máichanuvarepa:

—Vahi picuañaucha. Pimetajirica eta juca pimetacasivanahi eta máechajiriruva ema Viya piájuchaqueneana eta te juca libro, taicha tiánehipa eta táitauchiravayare tamutu eta táichararacavayarehi. <sup>11</sup>Énaserá, nácani váinara-jianahi, vahi picucamesavaca. Náimiyavachaha naicha eta navainarajiva. Nácani tíchanahi eta tauriqueneana, náimiyavachaha naicha eta tauriqueneanahi. Nácanisera tíchanahi eta táuriqueneana, tatuparacahi náimiyavachucha naicha eta táuriqueneana. Nácani matapiravareanahi te mamirahu ema Viya, náimiyavavare náuri eta mayehe — máichanupa.

<sup>12</sup>Ánivare macahe ema Viáquenu:

—Nútijapavanénapa. Námayarepahi eta nájaracasianayrajiva. Nácani tíchanahi eta tauriqueneana, náare ena ticaemataneacuanahi eta náitaresirahi te juca apaquehe. Énerichuvare námayarepahivare eta nayehenayare ena masupajirairahana. <sup>13</sup>Nútira néchahi tamutu te tépanavainapa eta apaquehe. Nútirichuvare néchahi eta táimiyániravahi tiuri. Puiti nútí nítauchayare tamutu — macahepa.

<sup>14</sup>Tétavicava eta náuricacarevayare nácani tépachinachana eta náchanevana, tacuti te ticasipajihana eta namuirihana. Éna tatuparacahi nanicayarehi eta tahi eta yucuquí ticaitarecarahi. Tatuparacahivare nasiapayare eta Arairu Jerusalén. <sup>15</sup>Énaserá ena masupajirairahanahi vahi títujicavanaimahi tisiapana. Nanasiyare te aneca, énapa ena iápemareana, ena túhusiana, ena ticipahiana, ena ticasiñarajiana eta achanemirana, énerichuvare ena tíúricanahi tépiyahirahiana ticaetemarrahiana.

<sup>16</sup>Macahevare ema Viáquenu:

—Nutí Jesús, nuvanecahi ema nuyehe ángele máimicaecherachayarehi tamutu eta juca numetarapiana puiti eyehe eti nuchanerana te avasareana. Nútí, yátupinuhi Reyhi ecuchapaquenehi, mavanerunuhivare ema Tata. Tétavicavahi eta nujaraivahi taicha eta aquenucairanuhi ichape — macahepa.

<sup>17</sup>Ema Espíritu Santo énapa ena téhicanahi ema Cordero, tíchuarecana éna:

—Yare, epauchahavi — náichapa.

Énapa nácani tisamanaya eta juca ichuárapi, énerichuvare éna náichuarecavare:

—Yare, epauchahavi —náichapa.

Énapa nácani timauneanayare, náiteca apaesa náera eta une ticaitarerahi. Tájina vahi navacharecaimahi.

<sup>18</sup> Emutu eti esamayare eta juca mametarapiana ema Viya tacajuque-  
neanahi te juca libro, nuvaraha numetacahe núti: Nácani navayuyupicayare  
eta táechajisihaqueneanahi eta juca libro, énerichuvare ema Viya mavayu-  
chinayare eta nacatajivairayare tayehe eta juca ecuñaraqüianayare táechaji-  
sihaqueneanahi. <sup>19</sup> Énerichuvare ecaunechava eta iáñauchira eta táechajisi-  
haqueneanahi te juca libro, machu máñauchahe ema Viya eta esiapira eta  
juca mávasa sántoquenehi, machu vahi macuenicahe eta tahi eta yucuquiiana  
ticaitarecarahiana, étaripa nímahaqueneanahi nájurequeneana te juca libro.

<sup>20</sup> Émarichu ema Viáquenu títametacahi tamutu eta júcana. Énerichuvare  
máichahehi:

—Yátupi nútijapavaneyare —macahehi.

¡Jéheyavapuca, Tata Jesús! ¡Pítecavanepaini! Amén.

<sup>21</sup> Aní táichecuiya eta juca nájurehi. Nuyaseuchaheparaca emutu éti me  
Viáquenu Jesucristo, táetaviuchahini eta iúricarevaya máicha.